


Didza' cubi rucá'ana
tsahui



New Testament in Zapotec, Rincón (MX:zar:Zapotec, Rincón)

Didza' cubi rucá'ana tsahui'

New Testament in Zapotec, Rincón (MX:zar:Zapotec, Rincón)

copyright © 2009 Wycliffe Bible Translators, Inc.

Language: Zapotec, Rincón

Translation by: Wycliffe Bible Translators, Inc.

Zapotec, Rincón

zar

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Rincón

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022

58bf86df-ae22-508c-81dc-936dbf138c25

Contents

Salmos	1
San Mateo	129
San Marcos	190
San Lucas	227
San Juan	289
Hechos	335
Romanos	392
1 Corintios	416
2 Corintios	439
Gálatas	453
Efesios	462
Filipenses	470
Colosenses	475
1 Tesalonicenses	481
2 Tesalonicenses	486
1 Timoteo	489
2 Timoteo	496
Tito	501
Filemón	504
Hebreos	506
Santiago	523
1 Pedro	529
2 Pedro	536
1 Juan	540
2 Juan	546
3 Juan	547
Judas	548
Apocalipsis	550

YUGU' SALMO

1

1 Bica' ba bönni' biti' runë' ca naca le ta'gú'u yöl-la' lë' nupa tu'cá'ana Dios, en biti' ridálenë' tsözxön nupa tun dul-la',

en biti' runë' tsözxön le tun nupa ta'zí' quidza' Dios.

2 Le raza ládxë'ë nácagaca xibá naguixjé' Xanru', en ca nácagaca xibá na' rëla, en te dza rulaba ládxë'ë.

3 Bönni' ni náquië' ca tu yaga dxe' ga naca ra' nisa, le ribía sizxöni cate' ridxín dza que,

en biti' ca' rizóa guba' ayisö.

Yúgu'të le runë' ta'rúaj dxi'a.

4 Biti' raca caní quégaca nupa tuá' dö'.

Nácagaca ca bëbu zxe café ruá' le bö'.

5 Que lë ni na' biti' ulu'rúajë' tsahui' bönni' tu'ë dö' cate' Dios uchi'a usöröë' quégäquïë',

en biti' ila'cu'ë bönni' dul-la' ga tu'dubë' bönni' tsahui'.

6 Rapa chi'ë Xanru' Dios nöza ga ta'dé' bönni' tsahui' na', pero uniti tsaz nu ridá gapa ta'dá nupa tuá' dö'.

2

1 ¿Bizx que tu'tsatsa böñachi yugu' yödzö en tu'pá'a nítisö le ilúngaca?

2 Bönni' ta'nna' bë'ë luyú ta'dá'baguë'ë Dios.

Tun tuz xtídfa'gaca nupa dë lu ná'agaca para ila'dá'baga' Xanru', en Nu na' nabö cazë' para inná bë'ë,

3 ta'nna': "Uzzuzzaj uquínnajru' le ta'nna' bë'enë' rë'u, en chú'unaru' yugu' le tu'zenë' bach rë'u."

4 Dios na' zoë' yehua' yubá uzxídxisë'.

Xanru' Dios utitaj cazë' léguequi.

5 Ní'irö lu yöl-la' rilé queë' güí'ilene' léguequi didza', en lu yöl-la' ridzä'a queë' uzenë' bach léguequi.

6 Inné': "Nuzúa caza' bönni' nabö caza' xilatjë' ga inná bë'ë. Inná bë'ë lu Guí'a Sión, le naca güí'a lá'ayi quia'."

7 Quíxjö'iida' libí'ili' didza' nuzoë' tsaz Dios.

Xanru' Dios gudxi cazë' neda': "Li' nacu' Zxí'ina'.

Na'a dza nuzúa caza' Li'.

8 Gunábini neda', ate' guna' ga ilequi quiu' yugu' yödzö. Guequi ca' quiu' idútë yödzölió.

9 Quitsju' léguequi len tu xiyyaga guíë.

Uzzuzzju' léguequi ca run nu rilá'a tu zxiga' yö'öna."

10 Que lë ni na', libí'ili' na' rinná bë'ëli', guli'tséajni'i. Guli'sedi cuinli', nülöli' ruchi'a rusöröli' le raca luyú.

11 Lu yöl-la' ba'a ladxi' queëli' guli'gún xichinë' Xanru'.

Lu yöl-la' rizzizi queëli' buli'sí' xibé'.

12 Guli'gún bal Zxí'inë' Dios para cabí ilétenë', en para cabí udxi queëli' la' nöza.

La' ilentë yöl-la' rilé queë'.
¡Bica' ba yúgu'të nupa tu'zxöni ladxi' Lë'!

3

¹ Xan, chinayángacada' nupa ta'lé neda'.
Zián nupa ta'dá'baga' neda'.
² Zián nupa ta'nné quia', ta'nná:
"Biti' usölé' Dios lë'."
³ Pero Li', Xan, run chí'itica'su' neda'.
Nacu' yöl-la' ba quia', en Nu rutipa neda'.

⁴ Bë'a zidzaj didza', bulidza'-në' Xanru',
ate' Lë' biyönné' chi'a ga na' zoé' lataj lá'ayi queë'.
⁵ Neda' rata', en rasia',
ate' rubana', tu' nazöntica'së' Xanru' Dios neda'.
⁶ Biti' gádxida' gayuá' gayuá' böñachi,
nupa na' nagü'ugaca neda' lë'ajlö.
⁷ ¡Guyasa, Xan! ¡Busólá neda', Dios quia'!
Budxía huë' xága'gaca nupa tu'dí'i neda',
en buquínnajda' nupa nácagaca xihui'.
⁸ Xan, rusöliá cazu' böñachi quiu'.
Ben ga gaca dxi'a quégaca böñachi quiu'.
¡Ca' gaca!

4

¹ Bubí'i didza' cate' rulidza' Li', Dios.
Nacu' Nu ruchi'a rusörö le raca quia'.
Cate' gurö'a böñiga, bida cazu' Li' ga zoa', en gúcalenu' neda'.
Ruhuéchi' ladxi' neda', en ruzé nagu' le rinábida' Li'.
² Rnné' Dios: "Libí'ili', böñachi, ¿gáca'xte ulidza dítajli' neda'?
¿Gáca'xte caz idxí'ili' le cabí nazaca', en gü'i ládxi'ili' le cabí naca?"

³ Guli'tsöjné nabö cazë' Xanru' nu radxi Lë',
ate' riyyönné' neda' cate' rulidza'-në'.
⁴ Guli'gadxi Lë', en bíti'rö gunli' dul-la'.
Guli'sá' ladxi' ca naca lë ni cate' dëli' ga ráta'li', en guli'sóa dxisö.
⁵ Guli'cú'u lahuë' Xanru' le naca dxi'a,
en buli'zxöni ladxi' Lë'.

⁶ Zián nupa ta'nná: "¿Nuzxi caz gun ga gaca dxi'a queëru'?"
Lu yöl-la' dxi'i ladxi' quiu' buyú netu', Xan.
⁷ Runu' ga rudzéjade'eröda'
ca tu'dzeja nupa tu'zí' xibé zxoa' za guizxi yu, en xisi lubá uva.
⁸ Cate' rata', la' rásitía' lu yöl-la' riböza dxi ladxi' quia',
tu' run cazu' Li', Xan, ga riböza' dxi'a tsáhu'do'.

5

¹ Ruzé nagu' didza' ruá'a, Xan.
Buyú ca rinnëda' ládxa'a lu yöl-la' ruhu'ini quia'.
² Dios quia', Nu rinná be'e neda', ruzé nagu' cate' rinábida' Li'

gácalenu' neda', na' güí'lena' Li' didza'.

3 Yugu' zila yönnu' chi'a.

Zílado' idxina' lo', en cöza' didza' ubi'u.

4 Nacu' Li' Dios biti' raza ládxu'u le cabí naca,
en biti' ru'u lataj ibiga' ga zu' nu ruá' dö'.

5 Biti' ru'u lataj nupa tun ba rahui ila'dxín lo',
en biti' rile'enu' dxi'a nupa nátagaca xihui'.

6 Rusunitiu' dérö nupa ta'zí' ye'e luzé'guequi,
en biti' rile'enu' dxi'a nupa tuti böñachi, en ta'zí' yé'.

7 Gaca tsu'a neda' lu yu'u lidxu', tu' nadxi'ide'enu' neda'.

Lu yöl-la' ba'a ladxi' quia' tsu'a ga naca yudo' lá'ayi quiu', en tseaj ládx'a'a Li'.

8 Tu' nacuá' zián nupa ta'lé neda', bulu'i neda' le naca dxi'a ré'énü' guna', Xan.
Busédi neda' para gaca guna' ca rë'énü' Li'.

9 Biti' gaca nu tseajlë' didza' tu'i nupa na' ta'lé neda'.

Nátagaca xihui' icja ládx'i do'guequi.

Naca ruá'agaca ca tu yero ba nayalaj,
en lu yöl-la' rizi' yé' quéguequi tu'i yulaj didza'.

10 Ben léguequi xiguia', Dios.

Ben ga biti' udxín xtídza'guequi.

Gurú'una léguequi tu' túntica'sö dul-la',
en tu' ta'dá'baga' xtídzu'u.

11 Ulu'dzeja nupa tu'zxöni ladxi' Li'.

Lu yöl-la' rudzeja quéguequi gúl-lagaca quiu' tu' rácalenu' léguequi.

Tu'zí' xibó' nupa nadxi'igaca Li'.

12 Run cazu' Li' ga raca dxi'a quégaca nupa tun ca rnna xtídzu'u, Xan.

Lu yöl-la' dxi'i ladxi' quiu' run chi'u léguequi.

6

1 Biti' uzenu' bach neda' lu yöl-la' rile' quiu', Xan.

Biti' gunu' neda' xiguia' lu yöl-la' ridzá'a quiu'.

2 Buéchi' ladxi' neda', Xan, tu' rudú ládx'a'a.

Bun neda', Xan, tu' rigui'i rizáca'a.

3 Rö'ö böñiga idútë le naca'.

¿Gáca'xté caz gaca caní, Xan?

4 Gudá dusölö' neda', Xan.

Tu' nadxi'nu' neda', busólá neda' lu yöl-la' guti.

5 Lu lataj chul-la cuntu nu tsöjnë Li'.

Cuntu nu zoa ni' nu gaca cu'u Li' yöl-la' ba.

6 Rudú ládx'a'a tu' rinnética'sö ládx'a'a.

Yugu' dzö' ribisa le ráti'da' len nisa ribödxi quia'.

Rusubisa' xcúgu'a' len nisa ribödxi quia'.

7 Rö'ö gui guiöj lahua' tu' ribödxitica'sa'.

Biti' gaca ilé'eda' tu' nözigaca nupa tu'dí'i neda'.

8 Guli'cuíta ga zoa', libí'ilí', ruá'ali' dö',
tu' riyönnë' Xanru' ribödxa' neda'.

9 Ruzé nagüe' le rulidza', ráta'yua' lahuë',
en rubi'ë didza' cate' bi rinábida' Lë'.

10 Ulu'tui'i nupa tu'dí'i neda', en ila'bö' böñiga.

Lu yöl-la' rutui'i quéguequi ulu'biga' ga zoa'.

7

¹ Ruzzöni ládex'a Li', gácalenu' neda', Xana' Dios.

Busölá neda' lu ná'agaca nupa ta'bía no neda', en gúcalen neda'

² para cabí soa nu cuéaj neda' ca runba' bëdxí guixí',

en para cabí usuniti neda' ga cuntu nu zoa gácalen neda'.

³ Xana' Dios, channö caní nuna':

Channö nabága'a xiguiá',

⁴ o channö bubí'a dö' que nu gúcalen neda',

o channö bi'a dö' que nu biti' bi ben quia' lu biti' rilé'e neda' dxi'a,

⁵ bë' lataj soa regu' neda' nu na' biti' rilé'e neda' dxi'a, en ucul-la neda'.

Bë' lataj nu na' quin neda' lu yu,

en ucá'ana neda' cá'assö.

⁶ Lu yöl-la' rilé quiu' guyasa, Xan.

Gudá'baga' nupa na' lu yöl-la' ridz'a' quéguequi tá'baga' neda'.

Guyasa, gúcalen neda' tu' nacu' Nu ruchi'a rusörö le raca quia'.

⁷ Ben ga ulu'dubi quiu' yúgu'të böñachi,

en gunná be'e léguequi ga ni' zu' xitsá'térö.

⁸ Ruchi'a rusörö' quéguequi yúgu'të böñachi, Xan.

Bubéaj neda' tsahui', Xan, tsca naca le tsahui' nuna', en tu' naca' idú tsahui'.

⁹ Ben ga udxi que le xihui' tun nupa tuá' dö',

pero buzóa tsutsu nupa tun le naca dxi'a,

tu' nacu' Li' idú tsahui', Dios, en ruchi'a rusöröu'

le ta'za' ládx'i'gaca böñachi, en le ta'guinnaj ícjaguequi.

¹⁰ Naca cazé' Dios Nu run chi'i neda'.

Rusölé' nupa nácgacaca idú ladxi'.

¹¹ Dios ruchi'a rusöröe' queëru' ca naca le naca tsahui',

en richúgutica'së' quégaca nupa tuá' dö'.

¹² Channö cabí ulu'bí'i ladxi' böñachi, utuchë' guïë tuchi' queë'.

Chinucözë' uxiti' yaga queë'.

¹³ Chinupé'ë yugu' le rudi'inë' lu gudil-la,

en nudxië' lu du uxiti' yugu' yaga túchi'do' zoa guí' láhuiguequi.

¹⁴ Buyútsöca', riguinnaj icjë' bönni' ru'ë dö' le xihui' gunë'.

Ru'íi ládxë'ë le naca dö', en rizi' yë'ë.

¹⁵ Nachö'önë' ga rë' tu yero zxön ga nu ibixi,

pero lë cazé' yöjbixë' lu yero na' guchö'önë'.

¹⁶ Budxín la' queëzë' dö' na' bi'ë,

en dxië' huë' ca naca xiguiá' nabáguë'ë.

¹⁷ Guía'-në' Xanru': "Xclenu'" tu' náquië' tsahui',

en gul-la' yöl-la' ba que Lë' Xanru', Nu nayépisétérö.

8

¹ ¡Xana' Dios,

bica' ba Lo' idútë yödzölió!

¡Xitsá'térö ca lúzxiba nayépisu' Li'!

² Túl-labi' bñido', enca' bi'i huë'ënido' yöl-la' zxön quiu'

sal-la' nacuá' nupa ta'dá'baga' Li'.

Uzóa dxíu' nupa na' biti' ta'lé'e Li' dxi'a, enca' nupa ta'dá'baga' Li'.

3 Cate' ruyúa' lízxiba quiu', le nunu' len xibön na'zu',
enca' beu', en yugu' bólaj bení' nuzú' xilátjaguequi,

4 ní'irö rnnía': ¿Bizxi caz bönni', tu' röjné cazu' lë'?

¿Bizxi caz nu naca böñachisö, tu' rui'i ládxu'u Li' nu na'?

5 Nunu' ga naquië' bönni' ia'lati' cuidi' ca naca cazu' Li'.

Nuzú' queë' yöl-la' ba quiu', en yöl-la' run bal ca
tu le néquini oro dxia icjé'.

6 Nunu' ga rinná bé'enë' yugu' le nun cazu' Li'.

Yugu'të nuzú' xini'ë lë'.

7 Nuzú' xini'ë yugu'tëba' bö'cu' zxila', en yugu'tëba' bëdxi,

8 en lës caní nunu' ca' quégacaba' biguínnido',

en quégacaba' böla dzö'öba' nísado',

enca' quégacaba' yugu'tëba' böa' ta'dödiba' lu nísado'.

9 ¡Xana' Dios,
bica' ba lo' idútë yödzölió!

9

1 ¡Idú ládx'a rigu'a Li' yöl-la' ba, Xan!

¡Usiyönda' böñachi ca naca yugu'të yöl-la' huáca nunu'!

2 ¡Udzéjada', en uzi'a xibó'!

¡Gul-la' yöl-la' ba que Lo', tu' nayépisétëru'!

3 ¡Ta'zxunnaj nupa ta'dá'baga' neda'!

¡Ta'dzö'ö, en tu'niti lo' Li',

4 tu' nubéaju' tsahui' le naca dxi'a runa'!

¡Rö'u ga rinná bë'u, en ruchi'a rusöröu' queëtu' ca naca le naca tsahui'!

5 Bulidza zi'u yugu' yödzö, en busunítiu' nupa tuá' dö'.

Tsaz busulu' lu guichi quiu' gapa gula'zúaj láguequi.

6 Chigula'niti nupa gula'dá'baga' Li'.

Tsaz naguínnajgaca gapa gula'cuá'.

Busunítiu' yugu' yödzö gapa na' gula'cuá',

ate' cuntu nu zoa röjné yugu' yödzö na'.

7 Zóatica'së' Xanru' Dios.

Naguixjë' tsaz lataj ga rö'ë rinná bë'ë en ruchi'a rusöröë' quégaca böñachi.

8 Uchi'a usöröë' quégaca böñachi yödzölió lu le naca tsahui'.

Uchi'a usöröë' quégaca yugu' yödzö lu le nácatë.

9 Gun chi'ë Xanru' Dios nupa nátagaca yechi'.

Gácalenë' léguequi cate' nu gun léguequi zi'.

10 Ulu'zxöni ladxi' Li' nupa núnbë'gaca Lo'.

Caní gaca, Xan, tu' cabí nusán ládxu'u nupa tu'guilaj Li'.

11 Guli'gul-la yöl-la' ba queë' Xanru', zoë' ga na' nazí'i le Sión.

Buli'siyón böñachi yugu' yödzö ca naca yugu' le nunë'.

12 Biti' ral-la ládxë'ë nupa ta'guí'i ta'zaca' cate' tu'lidza Lë',

tu' röjné léguequi Nu na' ruzi' lëbi nu ruti böñachi.

13 Buéchi' ladxi' neda', Xan.

Buyú ca tun neda' zi' nupa tu'dí'i neda'.

Ruchisu' Li' neda' cate' chirequi gátia'

14 para gaca usiyönda' bönachi yöl-la' ba quiu' Li'.
 Ga naca ga nu tsaza yödzö quiu' nazi'i le Sión,
 udzéjada' tu' nusöl' neda'.

15 Yöjbíxigaca bönachi yugu' yödzö lu yeru gula'chö'öna ga tsöjbíxigaca
 luzé'eguequi.

Bila'röli ni'aguequi lu yöjax bulu'cachi' para ila'zön léguequi.

16 Chinunë' Xanru' Dios ga núnbë'gaca bönachi Lë' tu' buchi'a busöröë'
 quéguequi.

Lu lë na' nun nu ruá' dö' zön la' cuinsi.

17 Ila'yaza lataj chul-la nupa tuá' dö',
 yúgu'të nupa na' nal-la ládx'i'gaca Dios.

18 Calëga tsaz ulu'gá'ana cá'asö nupa ta'yadzaj ta'yudxi,
 en biti' initi tsaz yöl-la' run löza quégaca nupa nácagaca yechi'.

19 Guyasa, Xan.

Biti' gu'u lataj tsépisë nu naca bönáchisö.

Buchi'a busörö quégaca bönachi yugu' yödzö.

20 Buxös léguequi, Xan.

Ben ga ulu'únbe' le nágacaca, tu' nácagacasö bönachi.

10

1 ¿Bizx que zu' zi'tu', Xan?

¿Bizx que rucachi' lo' cate' bi raca quia'?

2 Lu yöl-la' run ba rahui quégaca nupa tuá' dö'
 ta'bía no nupa nácagaca yechi'.

Ben ga ila'zön du yalaj na' nucáchi'gaca la' léguequisö.

3 Run ba zxön cuinë' bönni' ru'ë dö' ca naca le xihui' rizë ládxë'ë.

Bönni' ruhuídi'në' rulidza ditje' luzë'ë, en ruzóë' Dios tsölä'alö.

4 Lu yöl-la' run ba zxön cuinë' bönni' huía' dö' biti' ru'ë i ládxë'ë Dios.

Rizá'asö ládxë'ë, rnnë': Biti' ca' zoa Dios.

5 Ruzi'ë xibé yúgu'të le runë'.

Biti' ca' réquibe'enë' zoë' Dios Nu ruchi'a rusörö quégaca bönachi.

Ruzóë' tsölä'alö nupa biti' ta'le'e lë' dxia'.

6 Rë' la' cuinsë': "Gatga ichíxida'.

Catu caz bi gaca quia'."

7 Didza' ru'ë nácagaca le rudixia dö', enca' le rizi' yë', en le ruididza' yudxi yugu'
 luzë'ë.

Ru'ítica'së' didza' le cabí nácatë, en le naca xihui'.

8 Rucachi' cuinë' yugu' lu yödzö.

Bagáchi'sö rútië' nupa biti' bi nabága'gaca.

Ruyúlanë' nu bi gaca gun que.

9 Ribözë' ga na' nucachi' cuinë' ca runba' bëdxi guixi'.

Ribözë' nu gaca sönë'.

Rizöñë' bönni' yechi' lu du yalaj queë', en rá'ayöjë' lë' ga nagachi' queë'.

10 Riguinë' luyú nu na' nazönë'.

Zián nupa rucul-lë' len në'ë nal-la.

11 Rë' la' cuinsë': "Nal-la ládxë'ë Dios.

Nucachi' lahuë', en biti' ca' rilé'enë' le runa'."

12 ¡Guyaſa, Xan!

¡Gulís no'o, Dios!

¡Biti' gal-la ládxu'u nupa ta'gu'i ta'zaca'!

13 ¿Bízq que bönni' na'ru'ë dö' nuzóë' Dios tsölá'alö?

Gudxë' la' cuinsë': Bitti' uzi' lë' Dios neda'.

14 Li' bilé'e quézинu' lë ni, Xan.

Ru'i ládxu'u nu rigu'i rizáca', en nu risëbi ladxi',
en zóatica'su' gácalenu' léguequi.

Nu naca bayechi' rigú'u cuini lu no'o, Xan,
tu' zóatica'su' gácalenu' nu riyadza riyudxi.

15 Bugúa yöl-la' unná bë' quégaca nupa tuá' dö', en nácagaca xihui'.

Bubí'i quéguequi ca naca xiguia' nabágaga'gaca.

16 Inná bë'tica'së' Xanru' Dios.

Nupa tu'béaj ícjaguequi Xanru' ulu'niti tsaz lu xiyú cazë'.

17 Ruzé nagu', Xan, le ta'nábini Li' nupa nácagaca do' ladxi'.

Rutipu' ládx'i'guequi, en ruzé nagu' chí'iguequi.

18 Ruchi'a rusöröu' quégaca nupa nácagaca uzëbi,

en nupa zoa nu ribía no léguequi,
para cabirö ulu'xösa böñachi yödzölió ni luzë'eguequi.

11

1 Ruzxöni ládx'a'a Xanru' gácalenë' neda'.

¿Naru' gujëts'o' neda':

"Buzxúnnaj lu guí'a ca runba' biguínido"?"

2 Buyútsöca', zöngaca nupa tuá' dö' yaga uxiti'.

Nuzóagaca yágado' lahuí tuchi' lu du rusé,
para ilútië' bagáchi'sö nupa nácagaca dxí'a.

3 Channö ila'guínnaj yugu' le tu'zóa tsutsu le naca dxí'a,

¿bizxi caz gaca gun nu naca tsahui'?

4 ¡Zoa cazë' Xanru' yudo' lá'ayi queë'!

Yehua' yubá zoa ga rö'ë rinná bë'ë Xanru' Dios.

Rilé'e guiøj lahuë' para uyúë' le tun böñachi.

5 Rizi' bë'ë Xanru' nu naca tsahui'.

Biti' rilé'enë' dxí'a nu ruá' dö', en nu raza ladxi' ta'dá'baga' yúlahui'.

6 Gunë' ga sáca'gaca nupa tuá' dö' le usuniti léguequi.

Ubi'ë quéguequi guí', en le ruquéla' guí', en tu bö' régui.

7 Caní gunë' Xanru' tu' náquië' tsahui', en nadxi'inë' le naca tsahui'.

Nupa tun le nácatë ila'lé'e lahuë'.

12

1 Busölá neda', Xan, tu' cabirö zoa nitú nu naca dxí'a,
en biti' gaca nu idzöli nitú nu run ca rnna xtídza'a.

2 Ta'zí' ye'e yúgu'të böñachi luzë'eguequi.

Lu yöl-la' rizi' yë' quéguequi tu'ilen luzë'eguequi didza' yúlajdo'.

3 Xan, buzúa dxisö nupa na' tuí'i didza' yúlajdo',
en buzaga' ru'igaca nupa tun ba zxön cuínguequi.

4 Ta'nná: "Güí'iru' didza' ca rizësö ládx'i'ru',

ate' cuntu nu tá'baga' rë'u.

¿Nuzxi caz inná be'e rë'u ca naca didza' ruí'ru?"

⁵ Rnnë' Xanru': "Na'a guída' tu' nacuá' nupa tun zi' nupa ta'yadzaj ta'yudxi, ate' rinné ládxi'gaca nupa ni tu' zoa nu ribía no léguequi. Ca ta'zësö ládxi'gaca, la' guídatea' dusölá' léguequi."

⁶ Huáca uzxöni ládxi'ru' didza' ru'ë Xanru'.

Nácagaca ca guié plata ba nequi, le nudxi'a gadxi luzuí tu lu guí' lálë'e.

⁷ Li' caz, Xan, gun chi'u léguequi, en usöló' léguequi lu ná'agaca nupa tuá' dö' na'a dza.

⁸ Gáti'tës nacuá' nupa tuá' dö', cate' tun zxön böñachi le ruá' dö'.

13

¹ ¿Gáca'xté caz gal-la ládxu'u neda', Xan?

¿Naru' tsaz gal-la ládxu'u neda'?

¿Gáca'xté caz ucache' cuinu' lahuá'?

² ¿Gáca'xté caz gun bayudxi guá' ilena' le réquida' zi'?

¿Gáca'xté caz huí'inida' rëla, en te dza?

¿Gáca'xté caz ucúl-lágaca neda' nupa ta'dá'baga' neda'?

³ Buyú neda', Xan, en bubí'i didza'.

Butipa ládxa'a para cabí gátia'.

⁴ Ní'iro biti' gaca ila'nná nupa ta'dá'baga' neda', biti' ila'nná: "Bucúl-laru' lë'." Biti' gaca ulu'dzeja tu' nöjtada' ládxa'a neda'.

⁵ Neda' ruzxöni ládxa'a yöl-la' dxi'i ladxi' quiu'.

Rudzéjada' tu' rusöló' neda'.

⁶ Gul-la' queë' Xanru', tu' benë' quia' le naca dxi'a.

14

¹ Lu icja ládxi'da'ahuë' rnnë' bönni' tu' canöz, rnnë': Biti' zoa caz Dios.

Nachixi nanítigaquië' bönni' caní, en tunë' le cabí rilé'enë' dxi'a Dios.

Cuntu nu zoa nu run le naca dxi'a.

² Ga zoë' Dios yehua' yubá buyú' leuyú ni ga nacuá' böñachi para ilé'enë' channö zoa nu réajni'i, nu na' riguilaj Dios.

³ Yúgu'të' nadödigäquië' tsölá'alö.

Nachixi nanítigaquië' tu tuë'.

Cuntu nu zoa nu run le naca dxi'a, nitú böñachi.

⁴ ¿Naru' cabí ta'yéajni'i nupa tuá' dö'?

Le tun nupa na' naca tsca tagu böñachi quia' ca nu ragu yöta. Biti' ca' tu'lidza neda', Xángaca böñachi.

⁵ Lu yöl-la' radxi ridzöbi quéguequi ta'zxizi

tu' ta'lé'e Xanru' Dios, en zóalenë' böñachi tsahui'.

⁶ Tu'titaj xtídza'gaca nupa nácagaca yechi', pero nupa ni tu'zxöni ladxi' gácalenë' Xanru' léguequi.

⁷ Raca ládxa'a irúaj Sión Nu usólá böñachi Israel.

Cate' gunë' Xanru' ga ulu'dxín bönachi queë' nadzúngaca xilátjaguequi, ulu'dzeja zxí'ini xi'sóë' Jacob, bönachi Israel, en ulu'zí' xibë' Dios.

15

- ¹ ¿Nuzxi caz bönachi tsöjsóa xilatju', Xan?
 ¿Nuzxi caz tsöjsóa ga naca lá'ayi quiu'?
² Nu na' naca idú ladxi', en run le naca tsahui', en lu icja ládxida'ahui ruí'i didza' le nácaté.
³ Nu na' biti' rizi' quidza' bönachi, en biti' ruá' dö' que luzë'e, en biti' ruzé naga nu rizi' quidza' luzë'e.
⁴ Nu na' biti' run bal nu ruá' dö', pero run bal nupa tun zxön Dios, en sal-la' bi uniti cate' chinún xtidza', biti' ca' rutsá' didza' na'.
⁵ Nu na' biti' rizi' icja dumí cate' runödzaj dumí que tu chí'ido'sö, en biti' rizi' dumí para si' yë' ca naca le nun nu biti' nabaga' xiguia'. Nu na' run yúgu'té le caní biti' ca' idzá' xilataj.

16

¹ Ben chí'i neda', Dios, tu' ruzxöni ládxa'a Li'.

- ² Lu icja ládxida'ahua' gudxa'-në' Xanru': "Li' nacu' Xana".
 Bítirö bi zoa quia' le naca dxi'a, pero tuzu' Li'."
³ Riyaza ládxilenä' nupa nácacaca queë' Dios luyú ni, en nupa nácacaca idú ladxi'.
⁴ Ila'yán le ila'guí'i ila'zaca' nupa ta'yéaj ladxi' yugu' dios izá'a. Biti' ca' cu'a láhuiguequi rön ca tun bönachi na', en biti' ulidza' lágaca dios na'.
⁵ Náquië' Xanru' Dios Nu nabánida', en Nu ruzi'a xibé.

⁶ Li', Xan, nuzú' xilatja'.
 Lataj na' nuzú' quia' naca le ruzi'a xibé, en lachi naca lataj na' nequi quia'.

- ⁷ Gul-la' yöl-la' ba queë' Xanru', Nu rigú'u yöl-la' neda' le naca tsahui', ga ridxitë ruzéajni'inë' neda' cate' ni' rasia'.
⁸ Chinuna' ga zóatica'së' Xanru' lahua'. Tu' zoë' cuita' biti' bi utsá' neda'.

- ⁹ Que lë ni na' budzeja ládxa'a, en buzí' xibé ládxida'ahua', ate' gun löza le naca' cate' igácha'a yeru ba,
¹⁰ tu' cabí ucá'anu' neda' lataj chul-la, en biti' gu'u lataj uniti nu nequi quez quiu'.
¹¹ Nunu' ga núnbë'a nöza ichë' neda' ga soa' ibana'. Ga zu' Li' gata' quia' yöl-la' rudzeja idú, ate' cuitu' Li' uzi'tica'sa' xibó'.

17

- ¹ Ruzé nagu' neda', Xan.
 Lu le naca tsahui' quia' rulidza' Li'.

Bë' ladxi' le rinábida' Li' tu' cabí ca' rizí' yë'a.

² Buchi'a busörö quia'
tu' runu' Li' le naca tsahui'.

³ Núnbe'u Li' le yu'u ládxi'da'ahua'.

Ruyú' neda' chi'i dzö'ölö.

Guzxi' bë'u neda', ate' burúaja' tsahui'.

Biti' ca' ruá'a didza' le cabí naca idú dxi'a.

⁴ Runa' ca rinná bë' xibá quiu',
en biti' ca' ruá'a dö' ca tun bal-la böñachi.

⁵ Ridática'sa' la' nöza tsahui' quiu',
en biti' ca' ridöda' tsölá'alö.

⁶ Rulidza' Li', Dios, tu' rubi'u didza'.

Ruzé nagu' yugu' didza' ruá'a.

⁷ Bulu'i lahui yöl-la' dxi'i ladxi' quiu'.

Rusölá cazu' nupa tu'zxöni ladxi' Li'

lu ná'agaca nupa ta'dá'baga' léguequi.

⁸ Ben chi'i neda' ca run chi'u la' guiój lo cazu'.

Bucachi' neda' cuitu' Li' ca runba' böra, rucáchi'gacaba' börado' zxan xílabá',

⁹ para cabí bi ilún quia' nupa tuá' dö',
nupa na' ta'lé neda', en nagú'ugaca neda' lë'ajlö.

¹⁰ Biti' ca' zóalen léguequi yöl-la' ruhuéchi' ladxi',
ate' tu'i didza' lu yöl-la' run ba zxön cuínguequi.

¹¹ Gáti'tés ga ridöda' ta'gú'u neda' lë'ajlö,

en té'eni ila'guín neda' luyú.

¹² Nácagaquie' ca yugu' bëdxí guíxido'.

Té'énë' ulu'sunítië' neda'.

Nácagaquie' ca yugu' bëdxí guixi'.

Nucachi' cuíngaquie' para ila'zöne' neda'.

¹³ Gudá, Xan, gudá'baga' nupa ta'lé neda', en bucul-la léguequi.

Busölá neda' lu ná'agaca nupa tuá' dö', ugunu' dxin guíë tuchi' quiu'.

¹⁴ Lu yöl-la' huáca zxön quiu' busölá neda', Xan,
lu ná'agaca nupa tu'zí' xibé na'a dza,

nupa na' nuhuöläj nudzë'egaca yöl-la' tsahui' quiu'.

Nayángacabi' zxí'inigaquie',

ate' tu'cá'ané lu ná'agacabi' le dë sizzöni quégaquie'.

¹⁵ pero neda' ilé'eda' lo' tu' naca' tsahui',

en tsaza ládxa'a gaca' ca nacu' Li' cate' ubana'.

18

¹ ¡Nadxí'ide'eda' Li', Xan!

¡Li' rutipa cazu' ládxa'a!

² Ruzoë' Xanru' neda' tsutsu, en rapa chi'ë neda', en rusölë' neda'.

Náquië' Dios quia', en Nu rutipa ládxa'a,

ate' ruzxöni ládxa'a Lë'.

Rácalenë' neda' lu gudil-la: Rusölë' neda', en rizönë' neda'.

³ Rulidza'-në' Xanru' Nu ral-la' cú'uru' yöl-la' ba,

ate' usölë' neda' lu ná'agaca nupa tu'dí'i neda'.

⁴ Ia'láti'sö la' gútia',

ate' yöjbaga' neda' le usuniti neda', le ben ga gúdxida'.

5 Ia'láti'sö la' yöjtsu'a lataj chul-la que yöl-la' guti,
tu' la' gútitia'.

6 Lu le guca quia' bulidza'-në' Xanru'.
Bulidza'-në' Dios quia' para gácalenë' neda'.
Ga na' zoë' lataj lá'ayi queë' biyönnë' chi'a'.
Buzé naguë' le gunabi yúdxida' Lë'.

7 Ní'irö gudödi budó' zxu', en guzxizi luyú.
Guzzxízida' xilfibigaca yugu' güi'a sibi.
Guzzxízigaca tu' gulénë' Lë'.

8 Birúaj dzön zxínë'ë,
ate' birúaj guí' ru'ë le buzegui le dë idú gásibi'ilë',
ate' buguela' guí' yugu' bo' yalaj.

9 Benë' ga bötaj lúzxiba, en bötajë' Lë cazë',
ate' guzóa zxan ni'ë le naca chul-la.

10 Gudödë' lu bö'ös dxíë' tu le nayëpisë nazí'i le querubín.
Carelö gudödë' tu lu bö' budunu'.

11 Busubaga' cuinë' le naca chúl-lasö.
Lë na' naca böaj gasaj le richë'lë'e nisa.

12 Lu le rëpi yösa queë' lu böaj gasaj na'
bila'rúaj bo' yalaj, en guiój bögu' yöla sunna.

13 Gunné guziú' que chi'ë Xanru' lúzxiba xitsá'.

Biyön' chi'ë Dios nayëpisëtërë',
lu dzön, en yugu' lu bo' yalaj, en lu guiój bögu' yöla sunna.

14 Gusöl-lë'ë yugu' yaga lahui tuchi' queë', en bësilásïë' nupa na' tu'dí'i neda'.
Gusöl-lë'ë yugu' yösa queë' yugu' le bulu'cul-la léguequi.

15 Ní'irö bilá' lahui le zoa zxan nísado',
ate' bilá' lahui xilibi yödzölió,
cate' buzenu' bach nupa biti' ta'lé'e Li' dxí'a, Xan,
en lu yöl-la' rilé quiu' bulidza zi'u léguequi.

16 Bötjë' zaca' xitsá'alö, en gudélë'ë neda'.
Bubéajë' neda' lu nisa zilli.

17 Busölë' neda' lu na' nu biti' rilé'e neda' dxí'a, en nál-latërë,
enca' lu ná'agaca nupa tu'dí'i neda', en nál-lágacatërë ca neda'.

18 Cate' ni' chizóa inítia' gula'zóa régu'ë neda',
pero Xanru' gúcalenë' neda'.

19 Bubéajë' neda', en buzöö' neda' tu lu lataj zxön.
Busölë' neda' tu' guyaza ládxë'ë neda'.

20 Bubi'ë Xanru' quia' tsca le tsahui' naca',
en benë' quia' le naca dxí'a tu' cabí nabága'a xiguia',
21 tu' runa' ca naca le rusëdinë' Xanru' neda',
en biti' ca' ridá'baga'a Lë'.

22 Runa' ca ta'nná xibá nunë' Xanru',
en biti' ridá'baga'a le rinná bë' naguixjë' Lë'.

23 Biti' bi le naca dö' nabága'a lahuë' Lë',
ate' ben chi'a le innia' para cabí gu'a dö'.

24 Que lë ni na' bubí'ë Xanru' quia' tsca le tsahui' naca',
en tu' cabí nabága'a xiguia' lahuë' Lë'.

25 Ruhuéchi' ládxu'u nupa tu'huechi' ladxi' luzé'eguequi,
en nacu' idú dxi'a len nupa nátagaca idú dxi'a.

26 Rului'i cuinu' idú ladxi' len nupa nátagaca idú ladxi',
pero ridá'bagu'u nupa ta'dá'baga' xtídz'u'u.

27 Rusóló' nupa ta'gui'i ta'zaca',
pero ruzötju' nupa tun ba rahui.

28 Ruquéla' cazu' gui' quia', Xana' Dios,
en rigú'u quia' bení cate' ridá' ga chul-la.

29 Lu yöl-la' huáca queë' Dios rucul-la' bönni' guizxi yu röjáquië' gudil-la.
Tu' zóalenë' Dios quia' neda',
rixítia' ribixa' lu zö'ö run chí'i léguequi.

30 Idú dxi'a nátagaca le runë' Dios.

Nurúaj tsahui' xtídzë'ë.

Rapa chí'e yúgu'té nupa ta'nábini Lë' gácalenë' léguequi.

31 ¡Tuzë' Xanru' náquië' Dios!

¡Tuzë' Dios rapa chí'e reë'u!

32 Dios ni ruzalë' neda',
en runë' ga naca' idú ládxa'a.

33 Runë' ga nátagaca ni'a ca ni'agacaba' bidxina' guixi',
en ruzoë' neda' yugu' lu guí'a zxöön.

34 Rusédinë' neda' para gaca tseja' gudil-la,
en para gaca uguna' dxin uxiti' yaga néquini guíë bronce.

35 Lu yöl-la' rusólá quiu' run chí'u neda'.

Len no'o nál-la rizönu' neda',
en lu yöl-la' dxi'i ladxi' quiu' nunu' ga nayépisëtéra'.

36 Ruchi'u nöza ga ral-la' töda',
en runu' ga biti' cuila'.

37 Guzúa régu'a nupa tu'dí'i neda', en bucul-la' léguequi.
Biti' buéçja' ga bidxitë busunítia' léguequi.

38 Gudina' léguequi luyú, ate' biti' guca ulu'huöása.

Gula'dzö'ö zxan ni'a.

39 Benu' neda' nál-la para tseja' gudil-la,
en benu' ga bucul-la' nupa gula'dá'baga' neda'.

40 Benu' ga bulu'zxunnaj lahua' nupa biti' ta'lé'e neda' dxi'a,
ate' busunítia' nupa na' bulu'dí'i neda'.

41 Bulu'lidza nu gácalen léguequi,
pero cuntu nu zoa usólá léguequi.

Bulu'lidza ca' Xanru', pero biti' bubi'ë didza'.

42 Buzxuzxja' léguequi ca bëchtö yu nachë' lu bö'ös.
Buliba' léguequi ca ruliba' guna' la' nöza.

43 Busóló' neda' lu ná'agaca nupa ta'dá'baga',
en nunu' ga rinná bë'eda' böñachi zián yödzö.

Tun ca rnna xtídz'a' böñachi biti' núnbe'a zí'alö.

44 Cate' ta'yöni neda', la' tun ca rnna xtídz'a'.

Tadxi neda' böñachi zián yugu' yödzö izá'a.

45 Ta'cuidi' ladxi', en lu yöl-la' rizzizi quéguequi

ta'rúaj yugu' lu yödzö tsutsu quéguequi.

46 ¡Zoë' nabanë' Xanru'!

¡Yöl-la' ba Nu na' run chi'i neda'!

¡Guli'gún zxön Dios Nu rusólá neda'!

47 Náquië' Dios Nu rizi' la nupa tu'dí'i neda',

en runë' ga tadxi böñachi guizxi yu neda'.

48 Rusólë' neda' lu ná'agaca nupa biti' ta'lé'e neda' dxia'a.

Le nácatë runë' ga rucul-la' nupa ta'dá'baga' neda',
en rusólë' neda' lu na' bönni' ridzä'a.

49 Que lë ni na' guía' Li': Xclenu' Xan, lógaca böñachi zián yödzö,
en gul-la' yöl-la' ba que Lo' La'ayi.

50 Rusólá cazë' Xanru' bönni' rinná bë'ë uláz queë',

en nadxi'itica'së' nu na' nabö cazë',

nu na' naca David, en yugu' zxí'ini xi'sóë' ga idxinrö dza uksi.

19

1 Yugu' le nacuá' lúzxiba tu'lui' lo yöl-la' zxön queë' Dios,
ate' yugu' le raca lu bö'ös nácatë bë' le nunë'.

2 Yugu' dza tu'zéajni'i,

en yugu' dzö' tu'lui' lo yöl-la' réajni'i.

3 Biti' zoa didza' tu'i, en biti' riyoñ tu le ta'nná.

Biti' riyoñ chi'igüequi.

4 Le tu'zéajni'i ridxín ga naguélä'të luyú,
en le tu'sedi ridxín idútë yödzölió.

Ga na' nacuá' nuzóë' Dios xilataj gubidza,

5 le naca ca tu bönni' utsaga në'ë rirúajë' yu'u,

en naca ca' ca tu bönni' nál-la rudzéjanë' cate' zéajë' carelö lu huitaj.

6 Ga naguela' lúzxiba rilén gubidza,

en ridödi ga ridxitë ga ribiá.

Biti' bi zoa le cabí rutsë'e gubidza na'.

7 Tsahui' naca ca rinná bë'ë Xanru', en run ga huöáca ládxu'ru'.

Idútë li naca didza' nuzóë' Xanru', le run ga réajni'i nu naca nöñaj ladxi'.

8 Tsahui' nácatë xibá queë' Xanru', le tun ga rudzeja ládxu'ru'.

Nácatë idú dxi'a le gunná bë'ë Xanru', en ta'gú'u bení icja ládxu'do'oru'.

9 Dxi'ado' naca gádxiru'-në' Xanru', para sóatica'siru'.

Idú li naca ca ruchi'a rusöröë' Xanru' böñachi, en idú tsahui'.

10 Nazáca'gacatëro didza' na' ca oro, enca' ca oro ba nequi.

Nácatë idú zxixi ca bidxina' buz, en ca le zxixi queëba'.

11 Didza' na' tu'zéajni'i neda', huen dxin queë'.

Uzítérö xibé nu run ca rnna xtídzë'ë na'.

12 ¿Nuzxi caz gaca inöz channö richixi rinigui?

Büsölä neda'lu dul-la' nuna' le cabí gúquibe'eda' bena'.

13 Ben chi'i neda' para cabí udödi cuina' lu dul-la',

para cabí inná be'e neda' lë na' naca dul-la'.

Nírë ugá'ana' tsahui', en biti' ibága'a xigüia'.

14 Ben ga ilaca didza' ruá'a, en le rizá' ládxu'a ca raza ládxu'u Li'.

Nacu' Xana' ruzú' neda' tsutsu, en ruhuöá'au' neda'.

20

1 Rinábida'-në' Xanru' uzé naguë' li' cate' idxín dza qui'i sacu'u.
Dios queë' Jacob gácalenë' li'.

2 Rinábida'-në' isöl-lë'ë le gácalen li' le irúaj lataj lá'ayi queë'.
Lë na' irúaj Sión gun ga gacu' tsutsu.

3 Rinábida'-në' tsöjenenë' yúgu'të le gulú'u queë',
en si' lu në'ë le buzégui'u lahuë'.

4 Rinábida'-në' gunnë' quiu' tscá naca le rizë ládxu'u,
en gunë' ga gácatë yúgu'të le rizá' ládxu'u.

5 Udzéjatu' cate' usölë' li',
en uchísatu' le gaca bë' rulidztu'-në' Dios queëru'.

Rinábida'-në' Xanru' gunnë' quiu' yúgu'të le rinábinu' Lë'.

6 Na'a nözda' rusölë' Xanru' nu nabö' cazë'.

Riyönnë' nu na' naböë' ga ni' zoë' yehua' yubá la'ayi queë'.
Isöl-lë'ë yöl-la' huáca idú queë' le usölá nu na'.

7 Nacuá' nupa tu'zxöni ladxi' yugu' carreta que gudil-la,
ate' nacuá' bönachi yúbölö tu'zxöni ladxi' yugu' böa',
pero rë'u ruzxöni ládxu'ru' Lë' Xanru' Dios.

8 Ta'cuídi'në' nupa na', en ta'dzö'ë,
pero rë'u ni zuíru', en zóaru' tsutsu.

9 Busölá netu', Xan, tu' nacu' Nu rinná be'e netu'.
Rinábitu' Li' uzé nagu' netu' cate' ulídzatu' Li'.

21

1 Rudzéjanë' bönni' rinná bë'ë tu' zóalen lë' yöl-la' huáca quiu' Li', Xan.
Tu' busölö' lë', yénmi'térö rudzéjanë'.

2 Bunödzju' queë' le rizë ládxë'ë.

Biti' gudá'bagu'u le gunábinë' Li'.

3 Tu' raza ládxu'u lë' ruzú' queë' yugu' le naca dxi'a.
Nudxiu' icjë' tu le néquini oro idú.

4 Gunábinë' Li' gu'u queë' yöl-la' na'bán, ate' bë'u le queë'.
Nunu' ga sóatica'së' ibanë' yugu' dza si' zaca.

5 ZXöntë naca yöl-la' zxöñ queë' tu' nusölö' lë'.
Nunu' lë' bal, en nunu' ga nayépisë'.

6 Zóatica'sö le naca dxi'a nuzú' queë'.
Runu' ga rudzéjade'enë' tu' zóalenu' lë'.

7 Caní raca queë' bönni' na' rinná bë'ë tu' ruzxöni ládxë'ë Xanru'.
Biti' bi utsá' lë' tu' ruhuéchi' ládxë'ë Dios nayépisëtëre' lë'.

8 Huadeli' no'o ga nacuá' yúgu'të nupa ta'dá'baga' Li'.
Huadeli' no'o ibëla ga nacuá' nupa tu'df'i Li'.

9 Cate' idxín dza usiúdxu' léguequi gaca quéquequi ca tu guí' ruzequi bla'do'.

Usunítiu' léguequi, Xan, lu yöl-la' rilé quiu',
ate' tséguiguequi tu lu guí' zxöñ.

10 Ucuítu' yugu' zxí'ini xi'sóagaca nupa na' luyú ni,

en ubéaju' yugu' zxí'iniguequi ládjagaca bönachi.
11 Caní gunu' tu' gulé'ëniguequínë' ilu'ë dö' quiú'.
 Gulún xtídza'gaquie' bi ilunë', pero biti' gaca ilunë' ca rnna xtídza'gaquie',
12 tu' gunu' Li' ga ulu'zxúnnaje'.
 Ichisú' uxítí' yaga quiú', en gunu' léguequi huë'.
13 Len yöl-la' huáca quiú', Xan, uxicju' lu gudil-la.
 Gúl-latu', en cú'utu' yöl-la' ba que yöl-la' huáca quiú'.

22

- 1** Dios quia', Dios quia', ¿bizx que nusán no'o neda'?
 ¿Bizx que biti' riyönnu' le rinnëda' ladx'a, en biti' rácalenu' neda'?
2 Dios quia', idú dza rulidza' Li', pero biti' bi didza' rubi'u.
 Idú yëla' rulidza', en biti' ca' rasia'.
3 Lá'ayi nacu' Li'.
 Zu' ga riyön yöl-la' ba ta'gú'u bönachi Israel Li'.
4 Bulu'zxöni ladxë'ë xuz xtó'otu' Li'.
 Bulu'zxöni ladxë'ë Li', ate' busóló' légaquie'.
5 Bulu'lidzë' Li', ate' gúcalenu' légaquie'.
 Bulu'zxöni ladxë'ë Li', en biti' bulu'tu'fínë'.
6 Naca' neda' ca tuba' bëla guna', en caléga bönni'.
 Tu'dí'i bönnachi neda', en tu'cá'ana neda' cá'asö.
7 Yúgu'të nupa ta'lé'e neda' tu'titaj neda'.
 Ta'salaj ruí'iguequi lu yöl-la' rutitaj, en tu'tá ícjaguequi, ta'nná:
8 "Lë' buzxöni ladxë'ë Xanru' para usölë' lë'."
 Xanru' usölë' lë' channö tsaza ladxë'ë lë'."
9 Nacu' Li' Nu guléaj neda' lë'ënu xiná'a.
 Benu' ga ruzxöni ladx'a a Li'
 cate' ni' gúdxa'a luchú'unu xiná'a.
10 Nagá'ana' lu no'o Li' ga gudéla'té gulja'.
 Ga gudéla'té buzóanu xiná'a neda' nacu' Dios quia'.
11 Biti' su' zi'tu' ga ni zoa', tu' zoa gagu le gun neda' zi',
 ate' cùnturö nu zoa nu gácalen neda'.
12 Gula'gu'ë neda' lë'ajlö ca tunba' yugu' bëdxí.
 Ca yugu' bëdxí que yöödzö Basán gula'bía di'ë neda'.
13 Ta'salaj ruá'agaquie' lahua' neda'
 ca runba' bëdxí guixi', ridunba', en ribödxí'aba'.
14 Nuhuöáca' ca nisa nalalaj luyú, ate' nazángaca bëch dxita quia'.
 Nuhuöáca ladxí'da'ahua' ca bidxina' buz la lu lë'a.
15 Nacuidi' yöl-la' huáca quia' ca tu rö'ö nalá'a,
 ate' da' lúdx'a a chichja'.
 Nuzú' neda' lu bëchtö yu que yöl-la' guti.
16 Ta'gu'ë neda' lë'ajlö ca tunba' yugu' bö'cu'.
 Nagú'ugaquie' neda' lë'ajlö bönni' tu'ë dö'.
 Nuzóagaquie' yero blaga na'a, en ni'a.
17 Nalá'gaca yúgu'të dxita néquiñida'.
 Ta'në'ë neda', en tu'yú yénnië' neda'.
18 Ta'guisië' zxa' que queégaquie',
 en tu'yúë' le gaca bë' lahu lari' rixóa cùdza'a.
19 Biti' gá'anu' zi'tu', Xan.

Gúcalentë neda', Li', Nu naca yöl-la' huáca quia'.

20 Busölä neda' lu guíë tuchi'.

Busölä yöl-la' na'bán quia' lu ruá'agacaba' bö'cu'.

21 Busölä neda' lu ruá'agacaba' bëdxi guixi',
en lu lúzugacaba' bëdxi gú'unä.

Li' riyón quézinu' chi'a.

22 Usiyönda' yugu' böchí' luzá'a ca naca Lo'.

Gatsaj láhui'lö ga na' tu'dubi böñachi lo' cu'a Li' yöl-la' ba.

23 ¡Guli'cu'ë Xanru' yöl-la' ba, libí'ili' na' rádxili'-në'!

¡Guli'gun zxön Lë', yúgu'téli' zxí'ini xi'sóë' Jacob!

¡Guli'gadxi Lë', yúgu'téli' zxí'ini xi'sóë' Israel!

24 Caní ral-la' gunli' tu' cabí bucá'anë' cá'asö,
en bití' budí'inë' nupa gula'gu'i gula'zaca',
en bití' bucachí' lahuë' para cabí ilé'enë' léguequi,
pero cate' bulu'lidza Lë', biyönnë' léguequi.

25 Cu'a Li' yöl-la' ba ga tu'dubi böñachi guizzi yu lo'.

Lógaca nupa tadxi Li' usudxina' le guzxí' lu na'a guna' quiu'.

26 Ilágugaca nupa nácagaca nöxaj ladxi', en ulu'huölaj ulu'dzë'e'.
Nupa ta'guilaj Xanru', en ta'gú'u Lë' yöl-la' ba ulu'zí'tica'sö xibë'.

27 Böñachi idútë yödzölió tsöjnégaca Xanru', en ulu'huöáca queë'.
Böñachi yúgu'té yödzö luyú ila'gú'u Lë' yöl-la' ba.

28 Caní gaca tu' dë lu né'ë Xanru' inná bë'ë.

Inná bë'enë' yúgu'té böñachi luyú.

29 Yúgu'té nupa dë lu ná'agaca luyú ni ilágugaca, en ila'gú'u Lë' yöl-la' ba.

Yúgu'té nupa ila'niti ulu'zechu zxí'bigaca lahuë' Lë',
nupa na' bití' ca' gaca ilún chi'i yöl-la' na'bán quéguequi.

30 Zxí'ini xi'sóali' ilún xichinë'.

Illa'guixjö' lë ni ca naca queë' Xanru' para ila'yöni nupa tsöjsétëgaca luyú ni.

31 Ilidé', en ulu'lu'inë' lahui náquië' Xanru' tsahui'.

Ulu'siyönnë' ca' nupa ral-la' ilalaj ca naca yugu' le benë' Lë'.

23

1 Ruyú cazë' Xanru' Dios neda' ca tu nu ruyú bö'cu' zxila'.

Bití' bi riyádzjada'.

2 Runë' ga ruzí' ládexa'a ca túngacaba' bö'cu' zxila' tu'zí' ládxiba' gapa dëda' le
iláguba'.

Ga naca ra' nisa rizá' tsahui' ládxiba' do' richë'ë neda'.

3 Runë' ga ruhuöáca ládexa'a.

Richë'ë neda' ga naca nöza tsahui' tu' nadxí'inë' neda'.

4 Sal-la' ridá' ga zoa böñadxí gátia',
bití' bi gádxida' tu' zóalen cazu' neda', Dios.

Len xiyaga quiu', en no'o rutipu' ládexa'a.

5 Ga nacua' nupa ta'zóá regu' neda', ni' rucú'u quia' le gahua'.
Rigú'u icja' le za rilá' zxixi, en ruliru' le guíjada'.

6 Le nácatë dusóalengaca neda' le naca dxí'a,

en yöl-la' dxi'i ladxi' queë' yúgu'të dza soa' ibana',
ate' lu yu'u lidxë' Xanru' sôatica'sa'.

24

- ¹ Nequi queë' Xanru' Dios luyú ni, en yúgu'të le dë lahui.
Nequi queë' yödzölió, en yúgu'të nupa nacuá' ni'.
² Naguixjë' le lahui nísado' rö ö zxánilö,
en nuzoë' xilibi luyú ga rë' zxan nísado'.
³ ¿Nuzxi caz bönni' dë lu në'ë cuenë' guí'a lá'ayi queë' Xanru'?
¿Nuzxi caz gaca tsaza lu lataj lá'ayi queë'?
⁴ Huáca bönni' na' naca dxi'a ca runë', en ca rizá' ládxë'ë,
bönni' na' biti' runë' bal budó' guíoj budó' yaga,
en biti' rizi' yë'ë cate' rizi' lu në'ë bi gunë'.
⁵ Gunë' Xanru' ga gaca dxi'a queë' bönni' na'.
Caní gunnë' Dios, Nu rusólá lë', en náquië' tsahui'.
⁶ Caní nácagaca nupa ta'dxín lahuë' Dios,
nupa na' ta'biga' lahuë' Dios quégaca zxí'ini xi'sóë' Jacob.

- ⁷ Guli'salaj ga nu riyaza yödzö la'ayi.
Guli'salaj ga nu riyaza xilatjë' Dios le nuzoë' tsaz,
ate' tsázië' Bönni' unná bë' nayépisétérë'.
⁸ ¿Nuzxi caz Bönni' unná bë' nayépisétérë' na'?
Náquië' Xanru' nál-latérë', en nápatérë' yöl-la' huáca,
Lë', Xanru', Nu rideli' lu gudil-la.
- ⁹ Guli'salaj ga nu riyaza yödzö la'ayi.
Guli'salaj ga nu riyaza xilatjë' Dios le nuzoë' tsaz,
ate' tsázië' Bönni' unná bë' nayépisétérë'.
¹⁰ ¿Nuzxi caz Bönni' unná bë' nayépisétérë' na'?
Náquië' Xanru' Dios quéguequi ni'a në'ë guizxi yu.
Lë' náquië' Bönni' unná bë' nayépisétérë' na'.

25

- ¹ Idú ládxa'a rulidza' Li', Xan.
² Ruzxöni ládxa'a Li', Dios quia'.
Ben ga cabí utu'ida',
en cabí ulu'dzeja nupa biti' ta'lé'e neda' dxi'a.
³ Biti' ila'bö' böninga nupa tun löza Li',
pero ulu'tu'i nupa ta'dá'baga' xtídz'u.u.
⁴ Buluf'i neda' le rë'ënu' guna', Xan,
en buzéajni'i neda' le raza ládxu'u Li'.
⁵ Busedi neda' para guna' ca naca le naca idútë li quiu'.
Tu' nacu' Dios, Nu rusólá neda'
gúntica'sa' löza Li'.
⁶ Yöjnë ca naca yöl-la' dxi'i ladxi' quiu', Xan,
en yöl-la' ruhuéch'i ladxi' quiu', yugu' le nacuá'tica'sö.
⁷ Buniti lo neda' ca naca dul-la' bena',
en le gudá'baga'a Li' cate' ni' zoa' iz cuidi' quia'.
Lu yöl-la' ruhuéch'i ladxi' quiu',
en yöl-la' dxi'i ladxi' quiu' yöjnë neda', Xan.

8 Náquié' Xanru' dxi'a tsahui', en li ladxi'.

Que lē ni na' rulu'iñé' nupa tun dul-la' le ral-la' ilún.

9 Ca naca le naca tsahui' riché'ë Dios nupa nácgacá nöxaj ladxi', en rulu'iñé' nupa nácgacá do' ladxi' le ré'ënë' ilún.

10 Lu yöl-la' ruhuéchi' ladxi' queë', en yöl-la' rusudxín didza' queë', riché'ë Xanru' nupa tun ca rinná bë' xibá naguixjë', en ca naca didza' rucá'ana tsahui' nunë'.

11 Tu' nacu' dxi'i ladxi', Xan, buniti lo neda' ca naca dul-la' nuna', le naca dul-la' zxön.

12 Nupa tun bal Xanru'

uluí'quéziné' léguequi le naca dxi'a le ral-la' ilún.

13 Ulu'zí' xibé le naca dxi'a gunnë' quéguequi, ate' guequi quégacabí' zxi'ini xi'sóaguequi luyú ni.

14 Xanru' zóalentica'së' nupa tun ca rnna xtídë'ë, en ruzéajni'ñé' léguequi ca naca didza' rucá'ana tsahui' nunë'.

15 Ruyútica'sa' guíde' Xanru' gácalenë' neda', tu' usölë' neda' lu na' nu ré'ëni sön neda'.

16 Buéjya quia', Xan, en buéchi' ladxi' neda', tu' zoa' tuza', en nacuídi'da'.

17 Nayán le tu'quí'i tu'saca' neda'.

Busölá neda' lu le ruúbi rugu'i ládxi'da'ahua'.

18 Buyú ca rigu'i rizáca'a, en rudú ládxa'a.

Buniti lo neda' ca naca yugu' dul-la' nabága'a.

19 Buyú ca nayán nupa tun neda' zi'.

Buyú ca tu'dí'i neda'.

20 Ben chi'i neda', en busölá neda'.

Bití' gu'u lataj utu'ida' tu' ruzxöni ládxa'a Li'.

21 Ben ga ilún chi'i neda' le naca idú ladxi', en le naca li ladxi', tu' runa' löza Li'.

22 Buá'au' böñachi Israel,

Dios lu yugu' le raca quéguequi.

26

1 Guléaj neda' tsahui', Xan, tu' runa' le naca dxi'a, en idú ládxa'a ruzxöni ládxa'a Li'.

2 Buyú lu icja ládxi'da'ahua', Xan, en guzxí' bë' neda'.

Buyú le rizá' ládxa'a, en le ribequi icja',

3 tu' riché' yöl-la' dxi'i ladxi' quiu' neda', ate' runa' ca naca le naca idútë li quiu'.

4 Bití' runa' tsözxöni nupa ta'zí' ye', en bití' ridálena' nupa tu'lui'isö cuínguequi tsahui'.

5 Bití' raza ládxa'a udúbilena' nupa tuá' dö', en bití' guna' tuz didza' len nupa nácgacá xihui'.

6 Richisa na a lo' Li', Dios, cabí dxia dö' na'a, en idú ládxa'a ribíga'a lo bucugu quiu', Xan,

7 para gul-la' le guí'a Li': "Xclenu"

en usiyönda' böñachi ca nácgacá le zxön nunu'.

8 Nadxf'ida' yu'u lidxu' ga na' zu', Xan,

enca' lataj ga na' yu'u bení' lá'ayi quiu'.

⁹ Biti' usunítiu' neda' tsözxöñ len nupa tun dul-la',
en biti' gútiu' neda' len nupa tuti böñachi,

¹⁰ nupa na' ta'yaza ladxi' tuá' dö',
en nacuá'tica'sö ila'guizxaj dumí para ulu'rúaj tsahui'.

¹¹ Gúntica'sa' neda' le naca dxi'a.
Buzá' ladxi' quia', en buá'uö neda'.

¹² Nuzóë' Dios neda' ga zoa' tsutsu ladja böñachi guizxi yu
nudúbigaca queë' para cu'a-në' yöl-la' ba Xanru'.

27

¹ Náquië' Xanru' Dios bení' quia', en Nu rusólá neda'.

¿Nuzxi caz ral-la' gádxida'?

Rapa chi'ë Xanru' Dios caz yöl-la' na'bán quia'.

¿Nuzxi caz gaca gun ga gadxi idzöbida'?

² Cate' gula'dá'baga' neda' nupa tuá' dö' para iluti neda',
nupa na' biti' ta'lé'e neda' dxi'a, en tu'dí'i neda',
yöjchégü'gaca, en yöjbixigaca.

³ Sal-la' ila'dá'baga' neda' böñachi guizxi yu,
biti' ca' tsaza yöl-la' radxi ládxi'da'ahua'.

Sal-la' ila'díl-lalen böñachi neda',
naca' neda' tsutsu ladxi'.

⁴ Tu le rinaba' lahuë' Xanru' Dios, lë na' güí'i ládxi'sa',
le naca para sóatica'sa' lidxë' Xanru' yúgu'të dza soa' ibana',
para gaca uyúa' yöl-la' lachi queë' Xanru' Dios,
en para sa' ládxa'a ca naca queë' lu yu'u lá'ayi queë'.

⁵ Cate' idxin dza soa böñadxi quia', ucáchë'ë Lë' neda' lu yu'u lidxë'.
Ga nagachi' lu yu'u lidxë' ucáchë'ë neda'.

Uzóë' neda' tsutsu ca tu lu guiójito'o.

⁶ Gunë' ga ucul-la' nupa tu'dí'i neda',
ate' lu yöl-la' rudzeja quia' cödxi'atica'sa'
cate' bi' unödzja' queë' lu yu'u lidxë'.

¡Gul-la' queë'! ¡Ön, gul-la' queë' Xanru' yöl-la' ba!

⁷ Buzë nagu', Xan, cate' ulidza' Li'.

Buzá' ladxi' quia', en bubí'i didza' ca naca le inábida' Li'.

⁸ Cate' Li' gudxu' neda': "Buguilaj neda'",
idíú ládxa'a bubí'a didza', gunnía': Uguilja' Li', Xan.

⁹ Biti' ucachí' lo' lahua' neda'.

Biti' ta'bagu'u neda' lu yöl-la' rilé quiu'.

Li' nacu' Nu rácalen neda'.

Biti' ucá'anu' neda', en biti' usán no'o neda'.

Nacu' Dios, Nu rusólá neda'.

¹⁰ Huáca ulu'sán ládxë'ë xuz xiná'a neda',
pero uzi' cazë' Xanru' Dios neda'.

¹¹ Busedi neda' para guna' ca rë'ënu' Li', Xan.
Bulu'i neda' para guna' le naca tsahui',
tu' nacuá' nupa ta'dá'baga' neda'.

¹² Biti' usanu' neda' lu ná'agaca nupa biti' ta'lé'e neda' dxi'a

para cabí ilún quia' le tē'ëni.
Ta'dá'baga' neda' nupa ta'zí' yë',
en nupa tē'ëni iluá' dö' quia'.

13 Guzxí' lu në'ë Xanru' Dios gunë' ga ilé'eda' le naca dxi'a,
en le naca tsahui' queé' ga nacuá' nupa nabángaca.
La'tu' cabí réajlë'a lë ni, chiböaj ládxa'a.

14 ¡Guli'gún lözë' Xanru'!
¡Guli'gaca tsutsu, en buli'tipa ládxi'li'!
¡Ön, guli'gún lözë' Xanru'!

28

1 Rulidza' Li', Xan.

Nacu' Guiój le ruzóa neda' tsutsu.
Ruzë nagu' chi'a, tu' channö usayju' ru'u,
gaca' ca tu bönni' razie' lataj chul-la.

2 Ruzë nagu' le rulidza' Li' cate' rinábida' Li' gácalenu' neda',
cate' richisa' na'a zaca' Lataj Lá'ayi ga na' zu'.

3 Biti' ichë'u neda' tsözxön len nupa tuá' dö',
en tsözxön len nupa nátagaca xihui',
nupa na' tuí'i didza' dxi'a lahui' lógaca dzaga yu'u quéguequi,
pero yu'u ládxi'do'guequi le cabí naca tsahui'.

4 Bubí'i quéguequi tsca naca le tun, en tsca naca dö' ru'igaca.
Bubí'i quéguequi tsca naca le tun në'eguequi.
Bubí'i quéguequi tsca ral-la' gaca quéguequi.

5 Caní gaca quéguequi tu' cabí tun bal le nunë' Xanru',
en biti' tun bal le nun në'ë.
Uquínnajë' léguequi, en biti' ca' uchisë' léguequi.

6 ¡Yöl-la' ba Xanru',
tu' riyönnë' cate' rinábida' Lë' gácalenë' neda'!

7 Xanru' caz náquië' yöl-la' huáca quia', en le run chi'i neda'.
Ruzzöni ládxa'a Lë', ate' rácalenë' neda'.
Que lë ni na' ruzi' xibë' ládxi'da'ahua',
ate' gul-la' le guía' Lë': "Xclenu'."

8 Naca cazé' Xanru' yöl-la' huáca quéguequi böñachi queë',
en náquië' ca' Nu run chi'i Bönni' na' bubéajë' quez queë' para inná bë'ë.

9 Busölá böñachi quiu', Dios, en ben ga gaca dxi'a quéguequi nupa néquiguequi
quia'.
Ben chi'i léguequi ca run tu nu ruyú bö'cu' zxila', en guchë'tica'sö léguequi.

29

1 ¡Guli'cu'ë yöl-la' ba Xanru', libíili', nácali' zxí'inigaquië' bönni'
nayépiségaquië'!
¡Guli'cu'ë yöl-la' ba Xanru', en guli'guië': "Napu' yöl-la' huáca idú!"
2 ¡Guli'cu'ë yöl-la' ba Xanru' le ral-la' gata' que Lë' tu' náquië' lá'ayi!
¡Guli'gún bal Xanru', tu' naca lachi le naca lá'ayi queë'!

3 Riyōn chi'ë Xanru' lu nísado'.

Riyōn chi'ë Xanru' nayépisë' ca riyōn guziú' rinnë.

Riyōn chi'ë Xanru' lu nísado'.

4 Nál-latérö naca chi'ë Xanru'.

Nayépisétérö chi'ë Xanru'.

5 Chi'ë Xanru' rilá'a yugu' yaga zxön.

Ön, chi'ë Xanru' riguitsaj yugu' yaga lu guí'a Líbano.

6 Runë' Xanru' ga ta'xiti' guí'a ca tunba' bédxido'.

Ta'xiti' guí'a Líbano, en guí'a Sírión ca tunba' bédx guí'a.

7 Chi'ë Xanru' run ga répi yösa.

8 Ruxizi chi'ë Xanru' la' guixi' ga dë lataj.

Ruxizi chi'ë Xanru' la' guixi' nazí'i le Cades.

9 Chi'ë Xanru' run ga ta'béquiba' bidxina' guixi' böa' huë'ënido' quégacaba', en run ga ta'guínnaj yúgu'té laga' dxíagaca yugu' yaga.

Lu yudo' queë' tuí'i didza' yúgu'té le nacuá', ta'nná: "¡Yöl-la' ba Lë'!"

10 Gurö'ë gunná bë'ë Xanru' cate' gurö'ë nisa lu idútë yödzölió.

Ön, rö'ë rinná bë'tica'sé' Xanru'.

11 Rutipe' Xanru' ládxí'do'gaca böñachi queë'.

Gunë' Xanru' ga gaca dxi'a quégaca böñachi queë', en gunë' ga ila'böza dxi'a tsáhui'do'.

30

1 Guna' Li' zxön, Xan, tu' buchisu' Li' neda', en biti' bë'u lataj bi ilún quia' nupa biti' ta'lé'e neda' dxi'a.

2 Rigu'a Li' yöl-la' ba, Xana' Dios, tu' bulidza' Li' gácalenu' neda', ate' bunu' neda'.

3 Bubéaju' yöl-la' na'bán quia' lu yero ba, Xan.

Runu' ga zoa' nabana', para cabí tsu'a lataj chul-la ga dzö'ë nupa nátigaca.

4 ¡Guli'gul-la yöl-la' ba queë' Xanru', libí'ili' néquili' quez queë'!

¡Guli'guíë': "Xclenu'" ca naca Lë' le naca lá'ayl!

5 Tu chí'sö rilenë',

pero ruzá' ládxí'tica'sé' queëru'.

Channö cödxiru' tu yéla,

lu yöl-la' rudzeja queëru' cödxí'aru' itö yu.

6 Cate' guca dxi'a quia', ní'irö gunnía':

"Gatga bi utsá' neda'."

7 Tu' buzá' ládxu'u quia', Xan, buzú' neda' ga zoa' tsutsu, en cate' bucachi' lo', gurö'ë böñiga.

8 Bulidza' Li', Xan, en gúta'yua' lo'.

9 ¿Bixxi xibé uzi'tso' channö gátia', en tsöjtsázia' lataj chul-la ga dzö'ë nupa nátigaca?

¿Naru' huácatsö cu'a Li' yöl-la' ba channö huöáca' bëchtö yu?

¿Naru' huácatsö ulu'a lo le naca idú quiu'?

10 Ruzë nagu', Xan, en ruzá' ládxu'u quia'.

Gúcalen neda', Xan.

11 Buñinida', ate' benu' ga buyá'a lu yöl-la' rudzeja quia'.

Bugú' lari' cá'asö gúcua', en bugacu' neda' le ruzi'a xibé.

¹² Bil-la bö' naca caza' yöl-la' ba quiu', en biti' soa dxisö.
Guíëtica'sa' Li': "Xclenu'", Xana' Dios.

31

¹ Ruzxöni ládxa'a Li', Xan.

Biti' gu'u lataj utu'i'ida'.

Tu' nacu' tsahui', busölá neda'.

² Ruzé nagu' quia', en rusöló' neda'.

Gacu' ca tu güiøjto'o ga soa' tsutsu,
en ca tu ga soa' dxi'a tsáhui'do' lu gudil-la.

³ Nacu' Li' güiøjto'o ga zoa' tsutsu, en le run chi'i neda'.

Para gaca yöl-la' ba que Lo' guché' neda', en bulu'i neda' le dxi'a guna'.

⁴ Ubéaju' neda' lu du yalaj nucáchigaquië' bönni' tu'ë dö',
tu' nacu' Li' yöl-la' nál-la quia'.

⁵ Rigu'a lu no'o bö' naca caza'.

Böä' au' neda', Xan, Dios idú.

⁶ Biti' rilé'eda' dxi'a nupa tun zxön budó' güiøj budó' yaga,
pero neda' ruzxöni ládxa'a Li', Xan.

⁷ Udzéjada', en uzi'a xibé yöl-la' dxi'i ladxi' quiu',
tu' bilé'e quézinu' le gudi'i guzxáca'a.

Nöz quézinu' yugu' le raca quia'.

⁸ Biti' buca'anu' neda' lu na' nu biti' rilé'e neda' dxi'a,
pero nuzú' neda' tu lataj ga zoa' tsutsu.

⁹ Buzá' ladxi' quia', Xan, tu' zoa tu le raca quia'.

Lu yöl-la' ruhu'i'ini quia' ribödxa', en rudú ládxa'a.

¹⁰ Riyechi' dza quia' tu' ruhu'i'ini de'eda',
en tu' rinné ládxa'a, en riyechi' iz quia'.

Rudú ládxa'a tu' nözi dö' nu'a,
ate' nadxita iduté le naca'.

¹¹ Tu' nözi le gulún nupa ta'dá'baga' neda',
naca' tu le run gadxi yugu' dzaga yu'u quia',
ate' nupa núnbe'gaca neda' tadxi neda'.

Nupa ta'lé'e neda' la' nöza ta'zxunnaj ga rizá'a.

¹² Nál-la ládxi'gaca neda' ca nál-la ládxi'gaca nupa chinátigaca.
Naca' ca tu rö'ö nayuzzaj naguinnaj.

¹³ Biyönda' didza' zi' ta'nné böñachi zián quia' bagáchi'sö.

Gáti'tés zoa le run gadxi neda'.

Tun xtídzagaca bi ilún quia'.

Ta'zá' ládxi'gaca nacxi iluti neda'.

¹⁴ pero neda' ruzxöni ládxa'a Li', Xan.

Rnniá' nacu' Dios quia'.

¹⁵ Yú'ugaca lu no'o yúgu'té dza soa' ibana'.

Busölá neda' lu ná'agaca nupa biti' ta'lé'e neda' dxi'a,
en lu ná'agaca nupa ta'zóa regu' neda'.

¹⁶ Lu yöl-la' ruzá' ladxi' quiu' buyú neda', huen dxin quiu'.

Lu yöl-la' dxi'i ladxi' quiu' busölá neda'.

¹⁷ Biti' gu'u lataj utu'i'ida', Xan, tu' rulidza' Li'.

Ben ga ulu'tu'i nupa tuá' dö'.

Ben ga ila'cuá' dxisö lu yeru ba.

18 Ben ga biti' gaca bi inná nu rizi' yë',
 nu na' rinné zí' queë' bönni' tsahui',
 en run ba zxön cuini, en rulidza ditaj luzë'e.
 19 ¡Bica' zxön yöl-la' dxi'i ladxi' quiu',
 lë na' napu' para gácalenu' nupa tadxi Li!
 Runu' caní quégaca nupa tu'zxöni ladxi' Li'
 lógaca nupa tun ba zxön cuíniguequi.
 20 Rucáchu'u légaquië' ga na' zu' bagáchi'sö,
 ga biti' gaca idxín nu bönni' xihui'.
 Run chi'u légaquië' bagáchi'sö ga biti' gaca idxín didza' bizxaj.

21 ¡Yöl-la' ba Xanru' Dios,
 tu'bulu'i inë' neda' ca nadxi'inë' neda' cate' ni' zoa' tu yödzö
 ga nagú'ugaquië' lë'ajlö bönni' tu'tíl-lalenë' neda'!

22 Lu yöl-la' radxi ridzöbi quia' gunnía': "Ilútië' neda' lo' Li', Xan",
 pero biyönnu' le gunábida' Li', cate' ni' bulidza' Li'.
 23 ¡Guli'dxi'i-në' Xanru', libí'ili' néquili' queë'!
 Rapa chi'ë Xanru' nupa ta'yéajlé' Lë',
 en rubi'ë ca sa'yéaj queë' bönni' run ba zxön cuinë'.
 24 ¡Guli'gaca tsutsu, en buli'tipa ládxilí',
 yúgu'teli' na' runli' löza Xanru' Dios!

32

1 ¡Bica' ba bönni' na' Dios buniti lahuë' lë' ca naca dö' bi'ë,
 en bugüë' dul-la' queë'!
 2 ¡Bica' ba bönni' na' Dios rnnë' biti' nabáguë'ë xiguia',
 en biti' zóalen lë' yöl-la' rizi' yë'!

3 Cate' guzóa' dxisö ca naca dul-la' quia',
 budú ládxa'a tu' gunnética'sö ládxa'a.
 4 Rëla, en te dza buquí'i busácu'u neda', Dios.
 Budú ládxa'a ca raca cate' rö' böchila.
 5 Ní'irö guxóalëpa' dul-la' nabága'a lo' Li',
 en biti' bucácha'a le xihui' bena'.
 Gunnía': "Ixóalëpa' dö' bi'a lahuë' Xana",
 ate' buniti lo' neda' ca naca xiguia' gubága'a.
 6 Que lë ni na', nút'i tés nu nunbë' Li', Dios, ral-la' ulidza Li'
 cate' dë lataj güí'ilen Li' didza'.
 Cate' rö' nisa bach luyú ni, biti' ca' ideli' idxín ga zoa nu na'.

7 Li' nacu' ga gaca ucachi' cuina' cate' zoa bönadxi quia'.
 Li' caz gun chi'u neda' para cabí bi gaca quia'.
 8 Li' gunu' ga gúl-latica'sa' quiu' Li' tu' rusóló' neda'.
 Rnnë' Dios: "Neda' uzéajni'ida' li', en ulu'i'ida' li' le ral-la' gunu'.
 Usédida' li', en uyútica'sa' li'.
 9 Biti' gacu' ca tu böa' o tu mula cabí ta'yéajni'iba'.
 Ral-la' cu'u guíë en du ru'ugacaba' para inná bé'enu' légacaba'."
 Channö cabí gunu' caní, biti' ca' ilunba' ca rë'ënu'.
 10 Zián le tun ga tu'hu'i iniguequi nupa tuá' dö',
 pero bönni' ruzxöni ládxë'ë Xanru' ilé'enë' yöl-la' dxi'i ladxi' queë'.

11 Buli'dzéjalenë' Xanru', en buli'sí' xibë', libí'ili' nácali' tsahui' lahuë' Lë'.
Lu yöl-la' rudzeja queëli' guli'cödxi'a, libí'ili' nácali' idú dxi'a.

33

1 Lu yöl-la' rudzeja queëli' guli'gul-la lahuë' Xanru',
libí'ili' nácali' tsahui' lahuë' Lë'.

Nupa nácagaca tsahui' ral-la' ila'gú'u Lë' yöl-la' ba.

2 Guli'guué' Lë': "Xclenu'", quínnili' lë'e bihuél-la.
Guli'gul-la yöl-la' ba queë', quínnili' le zë chi du que.

3 Guli'gul-la queë' tu le rul-la cubi.

Guli'quinnaj dxí'ado', en lu yöl-la' rudzeja queëli' guli'cödxi'a.

4 Xtídzé'ë Xanru' naca idú tsahui',
ate' idú ládxé'ë runë' yúgu'të bi runë'.

5 Nadxi'inë' le naca dxí'a, en le naca tsahui'.
Nalá' lahui yöl-la' dxí'i ladxi' queë' Xanru' idútë yödzölió.

6 Len didza' bë'ësë' Xanru', benë' lúzxiba,
en benë' yúgu'të bólaj bení' len bö' rirúaj ru'ë.

7 Rutubë' nisa rö'ö nísado' para gaca ca tu guí'a.
Napa chi'ë nisa rö'ö zili ga na' nupé'ë xilataj.

8 Yúgu'të böñachi ral-la' ila'dxí'i Xanru'.

Böñachi idútë yödzölió ral-la' ila'cuá' nöñaj lahuë' Lë'.

9 Bë'ësë' didza' Xanru', ate' la' gúcatë ca na' gunnë'.

10 Gunná bë'ë, ate' guca tsutsu le nunë'.

Runë' Xanru' ga tu'huóáca cá'asö didza' túngaca böñachi yugu' yödzö.

Runë' ga biti' ilaca le të'ëni ilúngaca böñachi.

11 Sóatica'sö tsutsu didza' nunë' Xanru'.

Le rizá' ládxé'ë ulu'gá'anatica'sö quéguequi zxí'ini xi'sóaru'.

12 Bica' bágaca böñachi yödzö na' náquië' Xanru' cazé' Dios quéguequi,
böñachi na' nabö cazé' Dios para ilaca quez queë'.

13 Zoa cazé' Xanru' yehua' yubá, ruyúë' ga zóaru'.

Rilé'enë' le tun yúgu'të böñachi nacuá' idútë yödzölió.

14 Ga na' zoa cazé' ruyúë' idú gásibi'ilö,
en rilé'enë' yúgu'të nupa nacuá' idútë yödzölió ni.

15 Nun cazé' Lë' ládxí' do'gaca yúgu'tëguequi.

Réajni'i quézinë' ca naca yúgu'të le túngaca.

16 Biti' ca' ulë' bönni' unná bë' nacuá' queë' bönni' guizxi yu röjáquië' gudil-la.
Biti' ulë' bönni' zoë' gudil-la tu' nál-latérë'.

17 Biti' nazaca' gunru' löza böä' para idéli'ru' lu gudil-la,
tu' cabí gaca usölaba' nu bönni' tu' nál-latéröba'.

18 Buli'yú, ruyútica'së' Xanru' nupa tadxi Lë',
nupa na' tun löza yöl-la' dxí'i ladxi' queë',

19 para usölë' léguequi lu yöl-la' guti,
en para ugahuë' léguequi cate' tsu'u gubín.

20 Idú ládxí'ru' runru' löza Lë' Xanru'.

Rácalen cazé' rë'u, en rapa chi'ë rë'u.

21 Rudzeja ládxí'lenru' Lë',

en uzxöni ládxí'ru' Lë', tu' náquië' lá'ayi.

22 Lu yöl-la' dxi'i ladxi' quiu' gúcalen netu', Xan,
tu'runtu' löza Li'.

34

1 ¡Innética'sa' queë' Xanru' náquië' dxi'a!

¡Cú'utica'sa' Lë' yöl-la' ba!

2 Bö' naca caza' gun zxön Xanru'.

Nupa nácagaca nöxañ ladxi' ila'yöni lë ni, en ulu'dzeja.

3 Guli'gúí' zxönë' Xanru' tsözxön len neda',
en tsözxön usiyönru' böñachi ca naca Lë' La'ayi.

4 Bulidza'-në' Xanru', ate' bubi'ë didza' quia',
en busölë' neda' lu yugu' le gúdxida'.

5 Nupa nácagaca queë' bila'dxín lahuë', en bulu'zí' xibë'.

Bíti'rö caz ulu'tu'i nupa na'.

6 Bulidza'-në' Xanru', ate' biyönnë' quia' neda', bönni' yechi',
en busölë' neda' lu yugu'të le guca quia'.

7 Gubáz lá'ayi que ya'abá queë' Xanru' tapa chíë nupa tadxi Lë',
en tu'sölë' léguequi lu yugu'të le raca quéguequi.

8 Guli'sí' bë'ë, ate' inözili' náquië' Xanru' dxi'a.

¡Bica' ba bönni' ruzxöni ládxë'ë Lë'!

9 Guli'gadxi Xanru', libí'ili' nácali' quez queë',
tu' cabí bi ila'yadzaj nupa tadxi Lë'.

10 Ta'yadzaj ta'yúdxiba' bëdxí' guixi', en ta'dunba',
pero nupa tu'lidza Xanru' biti' ca' ta'yadzaj le naca dxi'a.

11 Guli'dá libí'ili', bí'ido', en buli'zé nágali' xtídfa'a.

Uzájní'ida' libí'ili' para gádxili'-në' Xanru'.

12 ¿Nuzxi caz bönni' rë'ënë' soë' ibanë',
en rë'ënë' soë' iz zián para uzi'ë xibé le naca dxi'a?

13 Ben chí'i lúdxu'u para cabí gu'u didza' xihui',
en para cabí si' yé'enu' luzzó'o.

14 Bucá'ana le cabí naca tsahui', en ben le naca dxi'a.

Bë' ladxi' ciòzu' dxi'a tsahui',
en ben bayudxi gunu' yugu' lë ni.

15 Ruyútica'sé' Xanru' nupa nácagaca tsahui',
en riyón quézinë' cate' tu'lidza Lë'.

16 Uzáguë'ë Xanru' xiñozgaca nupa tuá' dö',
en gunë' ga cuntu nu tsöjné léguequi.

17 Nupa nácagaca tsahui' tu'lidza Xanru', ate' riyönnë' quéguequi,
en rusölë' léguequi lu yugu' le raca quéguequi.

18 Xanru' záalen cazé' nupa tu'hu'iñi ladxi',
en rusölë' nupa nácagaca nöxañ ladxi'.

19 Zián le rigu'i rizáqué'ë bönni' tsahui',
pero Xanru' rusölë' lë' lu yugu'të lë na'.

20 Xanru' rapa chíë yugu'të dxita yu'ë,
ate' biti' gatsaj nitú dxita queë'.

21 Le xihui' run nu ruá' dö' gun ga gati nu na',
ate' ila'baga' xigui'a nupa biti' ta'lé'e dxi'a le naca tsahui'.

22 Xanru' caz ruhuó'a uë' bö' nácagaca caz huen dxin queë',

ate' biti' irugu que nitú nupa na' tu'zxöni ladxi' Lë'.

35

Tu le bil-lé' David

- 1** Xana' Dios, gudá'baga' nupa biti' ta'lé'e neda' dxi'a.
Butí-lalen nupa ta'díl-lalen neda'.
- 2** Guzxöñ le gun chi'i neda' lu gudil-la,
en gudá gácalenu' neda'.
- 3** Guzxöñ yaga tuchi' quiu' para uzagu'u xinözguequi nupa ta'zóa regu' neda'.
Gudxi bö' naca caza' nacu' Li' Nu rusölá neda'.
- 4** Ben ga ulu'tu'i, en ulu'gá'ana cá'asö nupa té'eni iluti neda'.
Ben ga ulu'huécaj, en ulu'gá'ana cá'asö nupa té'eni ilu'i dö' quia'.
- 5** Ben ga ilaca ca bëbu zxe café zeaj lu bö'ös,
en ben ga ulaguë' gubáz lá'ayi que ya'abá quiu' léguequi.
- 6** Ben ga gaca chul-la nöza yú'ugaca, en ga cuílagaca,
ate' soa régu'ë gubáz lá'ayi quiu' léguequi.
- 7** Bulu'cách' du yalaj le sön neda', en biti' bi nuna' quéguequi.
Gula'chö'öna yeru ga tsöjbixa', en biti' bi nuna' quéguequi.
- 8** Ben ga idxín quéguequi tsálido'os le usuniti léguequi,
en ben ga du yalaj na' bulu'cách' sön la' cuínguequi quez.
Ben ga ila'bixi lu yeru na' gula'chö'öna.
- 9** Udzeja ládxi'lena'-në' Xanru',
en uzi'a xibé yöl-la' rusölá queë'.
- 10** Ila'nná dxita néquinda': "Xan, ¿nuzxi caz naca ca nacu' Li"?
Rusöló' nu rigu'i rizáca' lu na' nu nál-latérö ca le.
Rusöló' nu rigu'i rizáca', en riyadzaj riyudxi lu na' bönni' ribanë' le nequi que."
- 11** Ta'dá'baguë'ë bönni' xihui' neda', en ta'nnë' quia'.
Ta'nabi yúdxinë' neda' ca naca yugu' le cabí nözda'.
- 12** Tu'bi'ë quia' le naca dö' cate' runa' le naca dxi'a,
ate' ruhui'inide'e ládxa'a.
- 13** Pero neda' gúcu'a lari' cá'asö cate' guláquië' huë'.
Bena'gubasa, en busaca' zi' bö' naca caza',
en uláz quéguequi bulidza'-në' Dios zián luzuí.
- 14** Bu'finide'eda' tsca gua luzá'a o bi'l böchi' caza' nu na' guca huë'.
Gurödxi yecha'a ca hui'inide'eda' channö gátinu xiná' caza',
- 15** pero cate' guchixi guníguida' neda', bulu'dzéjade'e, en bulu'dubi tsözxöñ.
Yugu' bönni' na' bulu'cá'anë' neda' cá'asö bulu'dubë' para ilunë' ga cö'a bagu'i'.
Yugu' bönni' na' biti' núnbe'a gulúnnatica'së' neda'.
- 16** Bulu'saca' zi'ë neda', en bulu'titje' quia'.
Lu yöl-la' rile' quégaequië' neda' gulagu zxea láyi'gaquië'.
- 17** Xan, ¿gáca'xte caz uyú iná'asu' le tunë'?
Busölá neda' lu dö' tu'ë quia'.
- 18** Guía' Li': "Xclenu'" lógaca böñachi zián ulu'dúbigaca quiu'.
Cu'a Li' yöl-la' ba ga nudúbigaca ziantë böñachi.

19 Biti' gu'u lataj ulu'dzeja nupa ta'dá'baga' neda', en ta'zi' yë', en biti' gu'u lataj ulu'titaj quia', nupa na' tu'dí'i neda', en biti' bi nuna' quéguequi.

20 Catu caz tuí'i didza' le gun ga soa dxisö didza' bizzaj. Lu yöl-la' rizí' yë' quéguequi ta nnë quégaca nupa ta'bó' dxi'a tsáhui'do' yödzölióni.

21 Bulu'salaj ruí'iguequi, en gula'nnë quia', gula'nná: "¡Ön, bilé'e quézitu' le nunë!"

22 ¡Bilé'e quézinu' Li' lë ni, Xan! ¡Biti' su' dxisö!

¡Biti' ucá'anu' neda', Xan!

23 ¡Guyasa, Xan! ¡Busubán ládxu'u, Xan, para uchi'a usöröu' quia'! ¡Gúcalen neda', Xana' Dios!

24 ¡Tu' nacu' tsahui', buchi'a busörö quia', Xana' Dios!

¡Biti' gu'u léguequi lataj ulu'dzeja ni'a que le raca quia'!

25 ¡Biti' gu'u léguequi lataj ila'nná:

"Ön, bidéli'ru' le guzé ládxí'ru"!

¡Biti' gu'u lataj ila'nná: "Chibucúl-laru' lë"!

26 ¡Ben ga ulu'tuí'i, en ulu'gá'ana cá'asö nupa tu'dzeja cate' ruhu'inida'!

¡Ben ga ulu'tuí'i, en ulu'gá'ana cá'asö nupa ta'dá'baga' neda'!

27 ¡Ben ga ila'bödxi'a lu yöl-la' rudzeja quéguequi, en ulu'zí' xibé nupa tui'i ládxí'gaca urúaja' tsahui'!

¡Bé'e lataj ila'nnática'sö: "Nayépisétérë' Xanru' Dios, tu' raza ládxë'ë gunë' ga gaca dxi'a quégaca huen dxin queë"!

28 Ní'irö guna' ba nali' quiu', innia': "¡Nacu' tsahui'!" en cu'a Li' yöl-la' ba idú dza.

36

¹ Le naca xihui' ruí'ilen bönni' nucá'anë' Dios lu icja ládxí'da'ahuë'.
 Biti' ca' rádxinë' Dios.

² Tu' run ba zxön cuine'

réquinë' biti' nözinë' Dios nabágue'ë lë' dul-la', en biti' ichúguië' Dios queë'.

³ Ru'ë didza' xihui', en rizi' yë'ë.

Biti' réajni'inë', en biti' runë' le naca dxi'a.

⁴ Cate' ni' dë' lu le ráti'në' rizá' ládxë'ë ca naca le xihui' gunë'.

Ru'í' ládxë'ë gunë' le cabí naca dxi'a, en biti' rusanë' runë' le naca xihui'.

⁵ Zxöntérö ca yehua' yubá naca yöl-la' dxi'i ladxi' quiu', Xan, ate' gúntica'su' ca rnna xtídzu'u, tsca zoa yehua' yubá.

⁶ Naca tsutsu le tsahui' nacu' ca nácagaca tsutsu yugu' guí'a zxön quiu'. Ca ruchi'a rusöröu' naca ca naca nísado', tu' cabí gaca nu gúnbe'ë le. Run chi'i cazu' bönachi, en yugu bôa' guixi', Xan.

⁷ Nazáca'térö yöl-la' dxi'i ladxi' quiu', Dios.
 Run chi'u yúgu'të bönachi ca runba' yójede, run chíiba' yugu' bôrado' zxan xílabá'.

⁸ Tu'huölaj tu'dzë'e bönachi quiu' le nayánda' lu yu'u lidxu', ate' rugui'ju' léguequi le naca yöl-la' dxi'i ladxi' quiu'.

⁹ Yúgu'të le nacuá' nabánigaca Li'.

Tu' naca cazu' bení' rilé'etu' bení'.

¹⁰ Bidxi'ítica'sö nupa núnbe'ë gaca Li',

en ben le naca dxi'a quégaca nupa nácgaca tsahui'.

11 Biti' gu'u lataj bi ilún quia' nupa tun ba zxön cuínguequi,
en biti' gu'u nupa tuá' dö' lataj ulu'laga' neda'.

12 Nadzö'ögaca nupa tuá' dö'.

Déguequi luyú, en biti' ca' gaca ulu'huöása.

37

1 Biti' ubi ugu'i ládx'i'do'oli' tu' tu'z'i'gaca xibé nupa tuá' dö'.
Biti' uzxé'eli' nupa biti' tun le naca dxi'a.

2 Huadöditë quéguequi ca raca que guixi' nacuadi,
en udxi quéguequi ca raca quégaca guixi'do' narúgugaca.

3 Buli'zxöni ládxë'ë Xanru', en guli'gún le naca dxi'a.
Buli'gá'ana luyú queë', en guli'cöz dxi'a tsáhui'do'.

4 Buli'sí' xibé' Xanru',
ate' gunnë' queëli' le rizé ládx'i'li'.

5 Buli'dödi cuinli' lu në'ë Xanru'.
Buli'zxöni ládxë'ë Lë', ate' gunë' le gácalen libí'ili'.

6 Gun cazë' Lë' ga urúajli' tsahui', en gácali' ca bení',
en cate' uchi'a usöröe' queëli', gaca queëli' ca lahui' dza.

7 Guli'soa dxisö lahuë' Xanru', en guli'cöza le gunë'.
Biti' cuéqui ícjali' tu' nözi bönni' ruzi'ë xibé,

bönni' na' ru'ë dö'.

8 Bítirö leli', en buli'sán yöl-la' ridzá'a.

Biti' ubi ugu'i ládx'i'do'oli' tu' gun lë ni ga guá'ali' dö'.

9 Dios caz uzágüë'ë xinözguequi nupa tuá' dö',
pero nupa tu'zxöni ladxi' Xanru', guequi quéguequi luyú.

10 Ia'láti'sö xidzé, en bítirö soë' bönni' na' ru'ë dö'.
Uguíjali' xilatjé', pero bítirö soë' ni'.

11 Nupa nácgaca nöñaj ladxi', guequi quéguequi luyú,
ate' ulu'zí' xibé yöl-la' tsahui' que.

12 Tun didza' nupa tuá' dö' bi ilúngaca quégaca nupa nácgaca tsahui',
en lu yöl-la' rilé quéguequi tagu zxea láyi'guequi.

13 Ruzzidxi cazë' Xanru' quéguequi,
tu' rilé'enë' dza udxi quéguequi.

14 Nupa tuá' dö' chigula'béaj guié tuchi' quéguequi,
en nuá'gaca uxiti' yaga quéguequi
para ulu'xicja nupa ta'zaca' zi', en ta'yadzaj ta'yudxi,
en para ilutí nupa tun le naca dxi'a.

15 Guié tuchi' quéguequi ila'chiza la' ládx'i'do'guequisö,
ate' ila'guítsaj uxiti' yaga quéguequi.

16 Dxi'atérö le do' dësö queë' bönni' tsahui'
ca le zián dë queë' bönni' ru'ë dö'.

17 Huayúzxjagaca ná'agaca nupa tuá' dö',
pero Xanru' caz rácalenë' nupa nácgaca tsahui'.

18 Rui'i ladxi' cazë' Xanru' nupa biti' bi xigui'a nabága'gaca,
ate' guéquitica'sö xiyúgaca quéguequi.

19 Biti' ca' ulu'tu'i cate' idxín dza biti' gaca dxi'a,
en cate' tsu'u gubín, gáta'dëra le ilágugaca.

20 Ulu'niti tsaz nupa tuá' dö',

ate' nupa biti' ta'lé'e dxi'a Xanru' ilaca ca yöl-la' lachi que guixi'.

La' tódítë quéguequi, en ilaca ca dzön le rinítitë.

21 Ta'nábini nu bi gunna quéguequi tu chí'isö, pero biti' ca' ulu'bí'i lë na'.

Nu naca tsahui' ruzá ladxi' quéguequi, en runödzaj quéguequi.

22 Gaca luyú quégaca nupa run lá'ayë' Xanru',

pero ila'niti tsaz nupa rudxië' Lë' dö'.

23 Le runë' bönni' dxi'a naca le nulu'inë' Xanru' lë',

ate' raza ládxë'ë Lë' le runë' bönni' na'.

24 Cate' röjtsö'ë, biti' ca' röjtsö'ë tsaz,

tu' röjzönë' Xanru' caz bönni' na'.

25 Guca' ra'bando', pero na'a nagula',

en catu caz bilé'eda' nusán në'ë Dios bönni' tsahui',

en catu caz bilé'eda' riyadzaj le ilágubi' zxí'inë'.

26 Yugu' dza ruzá' ládxë'ë bönni' tsahui' quéguequi luzë'ë

en runödzjë' le ta'nábini lë' unödzjë' tu chí'isö,

Nácagacabi' zxí'ini xi'söë' tu le run ga raca dxi'a queéru'.

27 Bull'cá'ana le cabí nácatë, en guli'gún le naca dxi'a.

Channö caní gunli', sóali' tsaz,

28 tu' nadxi'inë' Xanru' nu run le naca tsahui',

en catu caz usán në'ë nupa néquiguequi quez queë'.

Gun chí'itica'së' léguequi,

pero usunítie' zxí'ini xi'sóagaca nupa tuá' dö'.

29 Guequi luyú quégaca nupa nácagaca tsahui',

ate' ila'cuá'tica'sö luyú na'.

30 Ru'ë bönni' tsahui' didza' le napa yöl-la' réajni'i,

ate' raca yöl-la' ruchi'a rusörö ni'a que didza' na' ru'ë.

31 Yu'u icja ládxı'da'ahuë' le gunná bë'ë Dios.

Que lë ni na' catu caz ichixi iníguinë'.

32 Ruyuda' nu ruá' dö' le runë' bönni' tsahui',

en riguilaj nacxi gaca guti lë'.

33 Xanru' biti' gu'ë nu na' lataj bi gun queë' bönni' tsahui' na',

en biti' gu'ë lataj irugu queë' cate' nu uchi'a usörö queë'.

34 Bull'zxöni ládxë'ë Xanru', en guli'gún ca rë'ënë' gunli',

ate' uchisë' libí'il' para guequi queëli' luyú.

Cate' udxi quégaca nupa tuá' dö', hualé'e quézili' le.

35 Bilé'eda'-në' bönni' huía' dö'.

Gúquië' ca tu yaga zxön, en buzí'de'enë' xibé.

36 Ni'irö gudödi queë', en bíti'rö zoë'.

Yöjdilja' lë', pero biti' ca' guca udzölidá' le'.

37 Bull'yú ca náquië' bönni' tsahui'.

Cuntu nu gaca bi innë' queë',

tu' ila'cuá'abi' zxí'ini xi'söë' bönni' zxön ladxi'.

38 Ulu'niti tsaz nupa tu'cá'ana le gunná bë'ë Dios.

Usiúdxë' Xanru' yugu' zxí'ini xi'sóagaca nupa tuá' dö',

39 pero rusólá cazë' nupa nácagaca tsahui'.

Rutipë' ládxı'guequi cate' bi raca quéguequi.

40 Rácalenë' léguequi, en rusölë' léguequi.

Rubéajë' léguequi lu ná'agaca nupa tuá' dö', en rusölë' léguequi,

tu' tu'zxöni ládxı'guequi Lë'.

38

- ¹ Biti' ilenu' neda', Xan, en biti' uzenu' neda' bach.
 Biti' gunu' neda' xiguiá' lu yöl-la' rilé quiú'.
- ² Ben zi'u neda', en budxiú' neda' huë'.
 Nuzötju' neda' len no'o.
- ³ Yu'a yödzöhuë' zxön tu' rilenu' neda'.
 Dxía huë' idútë le naca' tu' nözi dul-la' nabág'a'a.
- ⁴ Xiguiá' nabág'a'a naca ca tu nísado' ga ruchicja' nisa.
 Naca ca tu yua' zi'i nabág'a'a neda'.
- ⁵ Tu' bena' yugu' le cabí naca dxi'a,
 dxía' huë' le rilá' siguti, en rudzu'.
- ⁶ Narecji' cùdza'a, en nagá'ana' cá'asö.
 Idú dza ruhuí' inide'eda'.
- ⁷ Idútë le naca' yú'uda'a xilá,
 ate' nazxí xipéla'a.
- ⁸ Rudú ládex'a, en ricuíd'i da'.
 Rinnëda' ládex'a tu' ruúbi rugui'i ládex'i da'ahua'.
- ⁹ Nöz quézinu' Li', Xan, le rizé ládex'a,
 en riyönnu' le rinnética'sö ládex'a.
- ¹⁰ Richunchu ládex'i da'ahua', en ricuidi' ládex'a,
 ga ridxintë richul-la guiöj lahua'.
- ¹¹ Bítirö ta'dzaga neda' yugu' luzá'a, en yugu' böcha'a, tu' nözi xihuë'a,
 ate' tu'biga' di'a dza quia' ga zoa'.
- ¹² Nupa té'eni iluti neda' ta'bequi le ila'zön neda',
 ate' nupa té'eni ulu'cul-la neda' tun xtídz'a'guequi nacxi ulu'suniti neda'.
 Idú dza ta'bequi ícjaguequi bi ilún quia'.
- ¹³ Naca' ca tu bönni' nacödzuë', en bítirö riyönda'.
 Naca' ca tu bönni' narugu lúdxë'ë, en biti' risalje' ru'ë.
- ¹⁴ Naca' ca tu bönni' bítirö riyönnë',
 en que lë ni na' biti' bi didza' rubi'ë.
- ¹⁵ Tuzu' Li' ruzxöni ládex'a, Xan.
 Ubí'i cazu' didza', Xana' Dios.
- ¹⁶ Bítir' gu'u lataj ulu'dzeja ni'a que le raca quia'.
 Bítir' gu'u lataj ilún ba zxön cuínguequi tu' nagá'ana' cá'asö.
- ¹⁷ Chizóá' tsöjbixa',
 en zóalentica'sö xihuë'a neda'.
- ¹⁸ Que lë ni na' rixóalëpa' xiguiá' nabág'a'a,
 en risëbida' ládex'a tu' nözi dul-la' nabág'a'a.
- ¹⁹ Nacuá' dxi'a, en nál-lagaca nupa téqui neda' zi'.
 Nayánda' nupa tu'dí'i neda', en biti' bi nuna' quéguequi.
- ²⁰ Ta'dá'baga' neda' nupa tu'bí'i le cabí naca dxi'a que nu run le naca dxi'a.
 Caní tun tu' ruí'i ládex'a guna' le naca dxi'a.
- ²¹ Bítir' usán no'o neda', Xan.
 Bítir' ubigu' ga zoa', Dios quia'.
- ²² Gudáchi gácalenu' neda', Xan,
 tu' naca cazu' Li' Nu rusölä neda'.

39

- ¹ Gunnía': Gun chi'i cuina' ca naca le runa',
 en biti' guna' dul-la' ca naca didza' ruá'a.

Biti' bi didza' gu'a
 cate' nacuá' nupa tuá' dö' gal-la' ga zoa'.
² Guzóa' dxisö, en biti' bë'a didza' ga bidxintë
 biti' gunní'a le naca dxí'a, pero biyali' xihuë'a.
³ Bubi bugu'i ládxida'ahua',
 en cate' guzá' ládx'a que, guyegui gulá ládxida'ahua'.
 Que lë ni na' gunábida'-në' Xanru', gunní'a:
⁴ Xan, ¿gáca' xte caz soa' ibana'?
 Bulu'i neda' tsca iz soa' ibana'.
 Ben ga inözda' channö chizóa caz gátia'.
⁵ Nabábasö dza nuzú' quia' soa' ibana'.
 Yugu' iz soa' ibana' biti' bi zeaj naca lo' Li'.

Le nácatë biti' bi nátagaca yúgu'të böñachi nacuá' luyú ni.
⁶ Nátagacasö ca tu zxul-la rigú'u böaj.
 Nítisö tu'úbi tu'gu'i ládxido'guequi, en tun dxin.
 Tu'tubi yöl-la' tsahui', pero biti' nözguequi nuzxi guequi que.

⁷ ¿Bizxi caz gaca guna' löza, Xan?
 Ruzxöni ládx'a Li'.
⁸ Busölá neda' lu xiguia' nabág'a,
 en biti' gu'u lataj ulu'titaj quia' nupa nátagaca canöz.
⁹ Soa' dxisö, en biti' bi didza' gu'a,
 tu' ben cazu' Li' ga rigu'i rizáca'a lë ni.
¹⁰ Bíti'rö gunu' neda' xiguia'.
 Chizúa gátia' tu' rusaca' zi'u neda'.

¹¹ Runu'-në' xiguia' bönni' dul-la', en ruzenu' lë' bach.
 Ca tu'töba' bélado' que le yú'uba', rusunítu' le ru'i ládxë'ë bönni' na'.
 Biti' bi naca cazë' bönni' dul-la' na'.

¹² Buzë nagu' le rulidza' Li', Xan, en le rinábida' Li'.
 Biti' su' dxisö cate' ribödxa' lo' Li',
 en biti' gaca' ca tu bönni' zi'tu' lo' Li',
 en ca tu bönni' ridasë' ca guláquië' xuz xtó'otu'.
¹³ Benna neda' lataj idipa ládx'a a
 zí'alö ca uzá'a yödzöliö ni, en bíti'rö soa'.

40

¹ Lu yöl-la' riböza zxön ladxi' quia' gulöza' gácalenë' Xanru' neda'.
 Ni'irö buzë naguë' quia', en biyönnë' le bulidza'-në'.
² Bubéajë' neda' ca tu lu yeru ga rë', en lu guna' zili.
 Buzöë' neda' tu lu guijojo'o, en guléquië' neda' tsutsu.
³ Busëdinë' neda' tu le cubi le rul-la' le naca yöl-la' ba queë' Dios queëru'.
 Zián nupa ila'lé'eni lë ni, en ilún Lë' zxön,
 ate' ulu'zxöni ladxi'-në' Xanru'.
⁴ Bica' ba bönni' ruzzöni ládxë'ë Xanru'.
 Biti' runë' tsözxön nu run ba zxön cuini, nu na' run zxön yugu' dios núngaca
 böñachi.

5 Ziántérö naca le nunu' queëtu', Xana' Dios, yugu' le tun ga rubáñitu'.
Ziántérö le yu'u icja ládxí'do'o ca naca le gunu' queëtu'.

Biti' ca' gaca nu ulaba lo' Li' tsca nácagaca.

Channö güéënda' nu usiyönda' tsca nácagaca,
nayántérö tsca le gaca ulaba'.

6 Biti' rë'ënu' gütigaca'-ba' böa' guixi' lo', en calëga bi cu'a lo'.
Biti' rinabu' uzégui'gaca'-ba' böa' bëdxí lo',
en calëga tu le guna' lo' para ugúa dul-la',
pero gusalju' naga' para yönda' le guío' neda'.

7 Que lë ni na' gunniá': Ni zoa caza' neda' quiu'.
Lu guichi lá'ayi quiu' nazúaj caz ca naca quia'.

8 Raza ládx'a runa' ca rë'ënu' Li', Dios quia'.
Nagu'a icja ládxí'da'ahua' xibá naguixju' Li'.

9 Ga tu'dubi böñachi guizxi yu quiu', Xan,
busiyönda' léguequi nacu' tsahui'.

Biti' ca' guzoá' dxisö.

Nöz quézunu' lë ni, Xan.

10 Biti' bucáchí'za' icja ládxí'da'ahua' ca ruúnu' tsahui' böñachi.
Bulu'a lahui ca runu' ca rnno', en ca rusölö' böñachi.
Ga nudúbigaca böñachi quiu' biti' guzoá' dxisö,
pero bë'a didza' ca nacu' dxi'i ladxi', en ca ru'u didza' le nácatë.

11 Biti' ugú' quia' yöl-la' dxi'i ladxi' quiu', Xan.

Yöl-la' dxi'i ladxi' quiu', en ca runu' ca rnna xtídz'u ilún chí'itica'sö neda'.

12 Zián le raca quia' nagú'ugaca neda' lë'ajlö, le cabí gaca nu ulaba'.
Nabága'a yugu' dö' bi'a, en bíti'rö gaca ilé'eda'.

Nayanrö ca guitsa' icja', ate' rudú ládx'a'a.

13 ¡Busölä neda', Xan!

¡Gudáchi gácalenu' neda', Xan!

14 Ben ga ulu'tuí'i, en ila'bö' baguí'i
nupa na' té'ëni ulu'suniti neda'.

Ben ga ulu'huécaj, en ulu'gá'ana cá'asö
nupa na' té'ëni gaca quia' le cabí naca dxi'a.

15 Ben ga ulu'dú ládxí'gaca tu' nabixigaca
nupa na' tu'titaj neda', ta'nná: "¡Buyútsöca' le raca queë'!"

16 Ben ga ulu'dzeja, en ulu'zí' xibó' yúgu'të nupa tu'guilaj Li'.
Ben ga ila'nnática'sö nupa ta'dxi'i yöl-la' rusölä quiu',
ila'nná: "Nayépsétérë' Xanru".

17 Nacuídi'da', en biti' bi gaca guna',
pero rui'i ladxi' cazu' Li' neda', Xan.

Naca cazu' Nu rácalen neda', en Nu rusölä neda'.

Biti' tsenu' guídu' quia', Dios quia'.

41

1 Bica' ba bönni' rui'i ládxë'ë nupa nácagaca yechi'.
Xanru' gácalen cazë' bönni' na' cate' bi gaca queë'.

2 Xanru' Dios gun chi'ë lë', en gunë' ga soë' ibanë'.
Gunë' ca' ga uzi'ë xibé xiyú cazë'.

Biti' usán në'ë lë' lu ná'agaca nupa biti' ta'lé'e lë' dxi'a.

3 Xanru' utipë' ládxë'ë bönni' na' cate' ré'enë'.
 Uchisë' lë' lu da'a le ráti'në', en gunë' ga soë' dxi'a.
4 Gunnía': Bena' dul-la' lo' Li', Xan.
 Buéchi' ladxi' neda', en bun neda'.
5 Nupa biti' ta'lé'e neda' dxi'a ta'nnë quia', ta'nná:
 "¿Bátaxi gátië', en huáca gal-la ládx'i'gaca böñachi lë'?"
6 Channö uduyúgaquië' neda', ta'zí' ye'ë.
 Ta'gúë' didza' ca naca le raca quia',
 en cate' ta'rúajë', tu'siyönnë' böñachi.
7 Tu'dubi nupa biti' ta'lé'e neda' dxi'a, en ta'nnë quia'.
 Ta'zá' ládx'i'gaca zián le naca dö' le ilún quia'.
8 Ta'nnë quia', ta'nná: "Yu'ë yödzöhuë' le guti lë'.
 Bítirö' caz huöásë' ga na' dë' lu le denë'."
9 Lësca' caní benë' böchi' luzá'a ruzzöni ládx'a-a-në'.
 Bönni' gudágulenë' neda' tsözxön ridá'baguë'ë neda'.

10 Buéchi' ladxi' neda', Xan, en bun neda',
 ate' ubí'i caza' quégaca nupa na' biti' ta'lé'e neda' dxi'a.
11 Gácabe'eda' raza ládxu'u neda',
 tu'cabí ulu'xicja neda' nupa biti' ta'lé'e neda' dxi'a.
12 Gáclen cazu' neda' tu' runa' le naca dxi'a.
 Gunu' ga sóatica'sa' lo' Li'.

13 ¡Yöl-la' ba Xanru', Dios quégaca böñachi Israel!
 ¡Guli'cu'ë yöl-la' ba na'a dza, en yugu' dza sì' zaca!
 ¡Ca' gaca!
 ¡Ön, ca' gaca!

42

1 Ca rizé ládx'i'ba' bidxina' guixi' nisa yégudo',
 lësca' caní rizé ládx'a'a Li', Dios.
2 Ribidxi ládx'a'a Li' cazu', Dios.
 ¿Bátaxi udixina' ga dë' quia', en tsu'a le yúbölö yudo' lá'ayi quiu'?'
3 Rëla, en te dza ribödxa', en biti' bi rahua'.
 Yugu' dza nacuá' nupa ta'nábini neda', ta'nná: "¿Gazxi caz zoa Dios quiu'?"
4 Risëbida' ládx'a'a cate' röjneda' ca guca zí'alö,
 cate' guzá'lena' böñachi guizxi yu, en yöjnörua' láhuilöguequi ra' yu'u queë'
 Dios.
 Lu yöl-la' rudzeja queëtu' bíl-latu', en guyéaj ládx'i'tu'-në' Xanru', en bentu'
 laní.
5 ¿Bizz que risëbida' ládx'a'a, en bizz que rö'a böñiga?
 Uzzöni ládx'a-a-në' Xanru' Dios, tu' huadxín dza cu'a-në' yöl-la' ba le yúbölö.
 Náquië' Nu rusölá neda', en náquië' Dios quia'.

6 Risëbida' ládx'a'a, Dios quia'.
 Que lë ni na' tsöjineda' Li' tsanni ni zoa', ridá' rizzúnnaja' ra' yegu Jordán,
 en tsanni ni ridá' lu gu'a Hermón, en lu gu'a Mizar.
7 Ca tu guziú' rinnë lu nísado', en ca bö ruí'i tu budoá' nísado' queë' Dios,
 caní rinnë ladxi' bö' naca caza' lu yöl-la' risëbida' ladxi'.

8 Rinábida'-në' Xanru' huéchi' ládxë'ë neda' yugu' dza.

Yugu' dzö' rul-la' yöl-la' ba queë' Lë',

en rulidza' Dios, ruí'lena'-në' didza', Nu na' runna quia' yöl-la' na'bán.

9 Guía'-në' Dios, Nu ruzoa neda' tsutsu, inniá': ¿Bizz que nál-la ládxu'u neda'?
¿Bizz que run bayúdx qui'i sáca'tica'sa' lu ná'agaca nupa biti' ta'lé'e neda'
dxi'a?

10 Rutsaba yúgu'të dxita yu'a tu' tu'didza' yudxi neda'.

Yugu' dza ta'nábini neda', ta'nná: "¿Gazxi caz zoa Dios quiu?"

11 ¿Bizz que risëbida' ládx'a, en bizz que rö'a böninga?

Uzxöni ládx'a-a-në' Xanru' Dios,

tu' huadxín dza cu'a-në' yöl-la' ba le yúbölö,

tu' náquië' Nu rusolá neda', en náquië' Dios quia'.

43

1 Guléaj neda' tsahui', Dios, en bë' didza' uláz quia' lögaca bönochichi tuá' dö' quia'.
Busolá neda' lu na' nu rizí' yë', en biti' naca tsahui'.

2 Li' cazu' nacu' Dios, Nu rutipa ládx'a. ¿Bizz que nusán no'o neda'?

¿Bizz que ruhu'ñida' tu' ta'bía no neda' nupa tu'dí'i neda'?

3 Gusol-la' quia' bení' quiu', en le naca idútë li quiu' para ulu'lui'i neda' nöza.
Ben ga ila'chë' neda' ga naca lá'ayi quiu', ga na' zoa cazu' Li'.

4 Tsu'a ra' bucugu queë' Dios.

Ibiga'a lahuë' Dios, Nu run ga rudzéjade'eda'.

Gúl-lalena' bihuël-la, cu'a Li' yöl-la' ba, Dios, nacu' Dios quia'.

5 ¿Bizz que risëbida' ládx'a, en bizz que rö'a böninga?

Uzxöni ládx'a-a-në' Xanru' Dios,

tu' huadxín dza cu'a-në' yöl-la' ba le yúbölö,

tu' náquië' Nu rusolá neda', en náquië' Dios quia'.

44

1 Biyön quézitu' le, Dios.

Bulu'siyönnë' netu' xuz xtó'otu'
ca naca yugu' le zxön benu' dza ni'te,
cate' ni' gula'cu'ë légaquië' luyú ni.

2 Bulaga cazu' Li' bönochichi yugu' yödzö izá'a,
en bucuásu' légaquië' luyú ni.

Busaca' zi'u bönochichi izá'a na', en gurú'unu' léguequi.

3 Biti' gula'deli'në' xuz xtó'otu' luyú ni rácasö quégaquië',
en biti' bulu'sölá la' cuíngacasë',
pero ben cazu' Li' lë na' len yöl-la' huáca zxön quiu',
en lu yöl-la' zxön que le naca cazu',
ate' bulu'luhui ca nadxi'inu' légaquië'.

4 Naca cazu' Li' Dios quia', en Nu rinná be'e neda'.

Busolá bönochichi quiu', yugu' zxí'imi xi'söe' Jacob.

5 Uguntu' dxin yöl-la' huáca quiu', uxíçjatu' nupa ta'dá'baga' netu',
ate' tu' zóalen cazu' netu', ucúl-latü' nupa biti' ta'lé'e netu' dxi'a.

6 Biti' uzxöni ládx'a a uxiti' yaga quia',
en biti' uzxöni ládx'a a güie' tuchi' quia' para ilácalen neda',

- ⁷ tu' rusölä cazu' Li' netu' lu ná'agaca nupa biti' ta'lé'e netu' dxi'a,
en ruzötju' nupa tu'dí'i netu'.
- ⁸ Cú'utica'stu' Li' yöl-la' ba,
en guiética'stu' Li': "Xclenu'."
- ⁹ Pero na'a nusán no'o netu', Dios, en bë'u lataj nu buxicja netu'.
Bítí'rö réajlenu' bönni' queëtu' rójáquië' gudil-la.
- ¹⁰ Benu' ga buzxúnnaaju' lógaca nupa ta'díl-lalen netu',
ate' gula'gúë' yugu' le nequí queëtu'.
- ¹¹ Bë'u lataj gulútië' ziantu' ca nu rúti-gacaba' bö'cu' zxila'.
Bésilásiu' netu' ládjagaca yödözö izá'a.
- ¹² Naca tsca bëti'u netu', en láti'do'os guzxi'u.
Biti' ca' buzi'u xibé tsca guzxi'u.
- ¹³ Bönachi yugu' dzaga yödözö queëtu' bila'lé'e lë na' benu' queëtu',
ate' tu'cá'ana netu' cá'asö, en tu'titaj netu'.
- ¹⁴ Benu' ga tu'didza' yudxi bönnachi yugu' yödözö netu'.
Tu'tá ícjaguequi lu yöl-la' rucá'ana netu' cá'asö.
- ¹⁵ Yugu' dza rutu'i da' ca raca queëtu',
en rö'a böninga lu yöl-la' rutu'i quia',
- ¹⁶ tu' riyönda' nupa tu'didza' yudxi neda', en tu'cá'ana neda' cá'asö,
nupa na'biti' ta'lé'e neda' dxi'a, en tu'dí'i neda'.
- ¹⁷ Guca queëtu' yúgu'té lë ni sal-la' biti' nál-la ládzi'tu' Li',
en biti' nucá'anatu' didza' dzaga bénlenu' netu'.
- ¹⁸ Biti' ca' böaj ládzi'tu' ca réajlë'ëtu' Li',
en biti' gudá'baga'tu' le bulu'falu' netu' guntu'.
- ¹⁹ pero nusán na' cazu' netu' ladaj nupa nácagaca ca yugu' böa' gui'a sínia',
en nucá'anu' netu' ga chizóatseajtsázatu' lataj chul-la.
- ²⁰ La'tu' gul-la ládzi'tu' Li', Dios queëtu',
o la'tu' guyéaj ládzi'tu' tu dios izá'a,
- ²¹ la' gáquibe'eténu' lë ni, Dios,
tu' nöz quézinu' le rizá' ládzi'tu'.
- ²² Tu' néquitu' quiu' Li' zóatica'sö nu guti netu'.
Nactu' ca yugu' bö'cu' zxíla'do' lo nu guti légacaba'.
- ²³ ¡Bubán, Xan! ¿Bizx que rásitso' Li'?
- ¡Guyasa! ¡Biti' usán no'o netu' chadía chacanna!
- ²⁴ ¿Bizx que nucachi' lo' lotu' netu'?
- ¿Naru' nál-la ládxu'u ca raca queëtu', en ca rigu'i rizáca'tu'?
- ²⁵ Naguínquaquië' netu' luyú.
Nadínitu' lu bëchtö yu.
- ²⁶ ¡Gudáchì gácalenu' netu',
en lu yöl-la' dxi'i ladxi' quiu' busölá netu'!

45

- ¹ Rizá' ládexa'a tu le naca dxi'a.
Ru'a didza' que le runé' bönni' rinná bë'ë.
Naca lúdx'a ca le ruzúajlenë' bönni' nabé'ede'enë' ru'ë didza'.
- ² Nácatéru' Li' lachi ca yúgu'té bönnachi.
Nabé'ede'enu' ru'u didza'.

Que lë ni na' nunë' Dios gaca dxi'a quiu' chadía chacanna.

³ Bega' lë'u guíe tuchi' quiu', bönni' nayépisë',
lu yöl-la' lachi quiu', en lu yöl-la' unná bë' quiu'.

⁴ Lu yöl-la' unná bë' quiu' idéli'nu' lu gudil-la,
ugunu' dxin le naca idútë li, en yöl-la' nöjax ladxi', en le naca tsahui'.
Yöl-la' huáca zxön quiu' gun ga ilá' lahui yugu' le zxöntëro.

⁵ Natúchi'gacada' yaga lahui tuchi' quiu'.
Bönachi yugu' yödzö zí'tu' ta dzö'ö lo', nupa na' ta díl-lalen lí'.
Yugu' yaga lahui tuchi' quiu' nachöza'gaca ládzi' do'guequi.

⁶ ¡Chadía chacanna naguixju' ga rö'u rinná bë'u, Dios!

¡Ca naca le naca tsahui' rinná bë'enu' böñachi quiu'!

⁷ Nadxi'nu' le naca tsahui', en biti' rilé'enu' dxi'a le biti' nácatë.
Que lë ni na' Dios quiu' nabö caze' li'.

Nachízire' icja ládzi' do'o yöl-la' rudzeja ca le nápagaca ia'zíca'rö böñachi.

⁸ Rilá' zxixi lari' nacu' len zi' mirra, en zi' áloe, en zi' casia.

Tunë' bönni' huil-la ga rudzéjanu' lu yu'u lidxu' zxön.

⁹ Yugu' nigula zxí'inigacië' bönni' ta'nná bë'ë
nútsa'gacabi' bi'i nigula nacuá'abi' lidxu'.

Nigula quiu' rinná bë'enu zuínu cuitu' ibëla,
en nácunu le nazí'i biquitaj oro nazaca'.

¹⁰ Bë' ladxi' neda', nigúlado'.

Bë' ladxi' neda', en biyöön xtídz'a.

Gul-la ladxi' böñachi yödzö quiu', en yugu' di'a dza quiu'.

¹¹ Ní'irö së ládxë'ë bönni' rinná bë'ë yöl-la' lachi quiu'.

Buzúa zxibü' lahuë' tu' náquië' xanu'.

¹² Ní'irö böñachi yödzö Tiro ila'dxin lo' nuá'gaca le nazáca'da' le ilunna quiu'.

Yugu' bönni' ta'lé'enë' yöl-la' tsahui' ila'nabine' li' bi unödzju' quégacië'.

¹³ Yugu' bi'i nigula queë' bönni' rinná bë'ë zóagacabi' lidxë', en nácatërögacabi'
lachi.

Lari' nácubi' nadíalen du oro.

¹⁴ Ila'chë'ë-bi' lahuë' bönni' rinná bë'ë, nácubi' lari' nazáca'da'.

Illa'dabi' yugu' bi'i nigula ra'bando' cúdzi'löbi',
ate' ila'chë'ë légacabi' lahuë' bönni' na' rinná bë'ë.

¹⁵ Lu yöl-la' rudzeja, en lu yöl-la' ruzi' xibé quégacabi' ila'dxinbi',
en ila'yázabi' yu'u lidxë' bönni' na' rinná bë'ë.

¹⁶ Ila'cuá'abi' bi'i bönni' quiu' uláz quégacië' xuz xto'o.

Gunu' ga ila'nná bë'ëbi' idútë yödzölió.

¹⁷ Gunu' ga tsöjnégacatica'sö böñachi ca nacu' Li'.

Que lë ni na' yúgu'të böñachi ilë li' "Xclenu'" yugu' dza si' zaca.

46

¹ ¡Náquië' Dios Nu run chi'i rë'u, en Nu ruzoa rë'u tsutsu!

¡Zóatica'së' gácalenë' rë'u cate' bi raca queëru'!

² Que lë ni na' biti' gádxiru' sal-la' izxizi idútë yödzölió,
en ila'niti yugu' guí'a lu nísado',

³ en sal-la' chasa idxía, en tsu'u bö nísado' na',
en ila'zxizi guí'ado' tu' nözi le raca.

4 Zoa tu yegu le run ga tu'dzeja nupa nacuá' ladzë' Dios,
ga na' rö'ö yudo' lá'ayi ga zoë' Dios nayépisétërë'.

5 Zoa cazë' Dios yödzö na', le catu caz initi.
Cate' ni' soa itö' yu gácalenë' nupa nacuá' ni'.

6 Tadxi ta'dzöbi bönnachi yugu' yödzö,
ate' ta'bö' bagu'i nupa ta'nná bë',
tu' ru'ë didza' Dios, ate' riniti luyú ni.

7 Xanru' nayépisétërë' zóalen cazë' rë'u.
Dios quégaca zxí'ini xi'sóë' Jacob rapa chi'ë rë'u.

8 Guli'dá ilé'eli' le nunë' Xanru'.
Buli'yú ca nusunítië' luyú ni.

9 Ruzúa dxíé' gudil-la rácagaca idútë yödzölió.
Riguitsjë' yugu' uxiti' yaga,
en rusunítië' yugu' yaga lahui tuchi' que gudil-la.
Ruzégui'ë yugu' carreta que gudil-la tu lu guí' zxön.

10 Rnnë': "Guli'sóa dxisö, ate' guéquibe'eli' naca caza' Dios.
Nayépisétëra' yugu' lu yödzö, en lu idútë yödzölió."

11 Xanru' nayépisétërë' zóalen cazë' rë'u.
Dios quégaca zxí'ini xi'sóë' Jacob rapa chi'ë rë'u.

47

1 ¡Lu yöl-la' rudzeja queëli' guli'capa' ná'alí, bönnachi yúgu'të yödzö!
¡Guli'cu'ë yöl-la' ba Dios, len yugu' le rúl-lalenli'!

2 Ral-la' gunru' bal Xanru' Dios nayépisétërë'.
Náquië' Nu rinná bë' idútë yödzölió.

3 Benë' ga bidéli'ru' yugu' lu bönnachi izá'a.
Benë' ga rinná be'era' yugu' yödzö.

4 Gurö' cazë' luyú ga ni nuzoë' rë'u.
Naca tu luyú lachi quégaca zxí'ini xi'sóë' Jacob, nupa na' nadxí'i quézinë'.

5 Len yöl-la' ba zxön ribenë' Dios ga rö'ë rinná bë'ë.
Le zián le tu'cödxë' cate' ribenë' Xanru' ni'.

6 ¡Guli'gul-la yöl-la' ba queë' Dios! ¡Guli'gul-la!
¡Guli'gul-la yöl-la' ba queë' Bönni' rinná bë'enë' rë'u! ¡Guli'gul-la!

7 ¡Rinná bë'ë Dios idútë yödzölió ni!
¡Idú ládxí'lí' guli'gul-la yöl-la' ba queë'!

8 ¡Zoa cazë' Dios lataj lá'ayi queë' ga rö'ë rinná bë'ë!
¡Rinná bë'enë' bönnachi yúgu'të yödzö!

9 Tu'dubi nupa ta'nná bë'e yugu' yödzö
tsözxön len bönnachi queë' Dios queë' Abraham.

10 ¡Nequi queë' Dios yöl-la' zxön quégaca yúgu'të yödzö nacuá' yödzölió!

¡Nayépisétëra' Lë'!

48

1 Nayépisétëra' Xanru', ate' run bayudxi cí'uru'-në' yöl-la' ba idú ládxí'ru'

ga zoa lu yödzö queë' Dios queëru' le zoa lu guí'a lá'ayi queë'.

² Lachi, en sibi naca guí'a lá'ayi na',
ate' raza ládx'i gaca böñachi idútë yödzölió ca naca.
Caní naca guí'a Sión le rö'ö tsolá alö ga za' bö' ziaga.
Lu yödzö na' dë ga zoa Bönni' Unná Bë' nayépisë'.

³ Rulu'ë lahuí Dios sóaru' tsutsu cuitë' Lë'
ga zoa lu yu'u lidxe'.

⁴ Gula'dá'baga' nupa ta'nná bë' lu yu ni,
en gula'bígu'ë ra' yödzö lá'ayi na'.

⁵ Cate' bila'lé'enë yödzö na' bulu'báninë'.
Gula'bö'ë böñiga, en la' bulu'zxúnnajtë'.

⁶ Ra' yödzö na' gula'zxizië'.

Gula'zaca' zi'ë ca raca queënu nigula chizóa uzóanu-bí' bí'ido'.

⁷ Risöl-lë'ë Dios tu bö' budunu',
le rusuniti yugu' barco zxön que yödzö Tarsis.

⁸ Biyönrú' ca nácagaca le zxön benë' Dios,
ate' na'a rilé'e quéziru' le runë',
lu yödzö lá'ayi queë' Dios quégaca ni'a né'ë guizxi yu,
en náquië' ca' Dios queëru'.
Tsaz naguixjé' yödzö na'.

⁹ Ga zoa lu yudo' quiu', Dios,
røjnetu' ca naca yöl-la' dxi'i ladxi' quiu'.

¹⁰ Ca nayépisétérö Lo', Dios,
ca' ta'gú'u Li' yöl-la' ba böñachi idútë yödzölió.
Ca naca le naca tsahui' rinná bë'u.

¹¹ Ulu'dzeja böñachi nacuá' yödzö Sión.
Ulu'zí'inu xibé nigula zxí'ini xi'sóë' Judá
tu' ruchi'a rusöröu' netu' ca naca le naca tsahui'.

¹² Guli'dá idú gásibi'ilö ga dë yödzö Sión,
en buli'laba yugu' yu'u sibi tun chi'i yödzö na'.

¹³ Buli'yú ca naca zö'ö run chi'i yödzö na',
en buli'yú ca' le nuzóagaca le tsutsu,
para gaca quíxjö'i'lli' zxí'ini xi'sóali' ca náquië' Dios zxön ni.

¹⁴ Tsaz náquië' Dios queëru', na'a dza, en dza si' zaca.
Ulu'iné' rë'u nöza tödi gátiru'.

49

¹ Guli'yöni lë ni, libí'ili', böñachi yúgu'të yödzö.
Buli'zé nágali', libí'ili', zóali' idútë yödzölió.

² Libí'ili', nayépsétéröli', en libí'ili', nácali' cá'asö.
Libí'ili', dë yöl-la' tsahui' queëli', en libí'ili', nácali' yechi'.

³ Tsöjsá' ládx'a' ca naca le nápagaca yöl-la' réajni'i,
en gu'a didza' le nápagaca yöl-la' raca yenni'.

⁴ Güí'i ládx'a' ca naca tu le rucudzu' didza',
en quíxjö'a' ca nácagaca tsanni quinnia' lë'e bihuël-la.

⁵ Biti' bi rádxida' cate' ridxín bi raca quia',
cate' ta'gu'ë neda' lë'ajlö bönni' tuá' dö' biti' ta'lé'enë' neda' dxi'a.

⁶ Tu'zxöni ládxë'ë bönni' na' yöl-la' tsahui' quégaquíë',

en tun ba zxön cuíngaquië' ca nácagaca le dë quégaprofilië'.

⁷ Biti' gaca huöá'uë' la' cuinsë' nitüé' bönni' na'.

Biti' gaca bi unödzjë' queë' Dios le gun ga usölë' lë',

⁸ tu' naca zxöntëro le huöá'u yöl-la' na'bán que nu bönni',
ate' catu caz gaca nu bönni' quizxjë' ca naca,

⁹ para idéli'në' sóatica'së' ibanë',

en cabí tsázië' yero ba ga yú'ugaquie' bönni' nati.

¹⁰ Rile'enë' tatië' ca' bönni' ta'yéajni'inë',

en ta'ntië' tuz ca tati nupa biti' bi nözigaca, en nupa biti' ta'yéajni'i,
ate' tu'cá'anë' yöl-la' tsahui' quégaprofilië' le ulu'zí' xibé böñachi yübölö.

¹¹ Téquinë' ila'cu'a tica'sö' lídxigaquie' bönni' na',

ate' tsaz ila'cu'ë ni',

ate' ta'gu'ë lágaca xiyúgaquie' ca naca la' lágacasë'.

¹² Pero yöl-la' ba zxön napë' bönni' na' biti' gun ga sóatica'së'.

Gati cazë' ca tátiba' böa' guixi'.

¹³ Caní naca le gaca quégaprofilië' bönni' tu'zxöni ládxë'ë yöl-la' tsahui' quégaprofilië',
enca' quégaca zxí'ini xi'sóagaquie',

yugu' bi'i na' ta'yaza ládxí'gacabi' didza' gulu'ë xúzgacabi' na'.

¹⁴ Ilátië' ca tátiba' bö'cu' zxila',

ate' yöl-la' guti gaca quégaprofilië' ca tu nu uyú bö'cu' zxila'.

Yugu' bönni' tsahui' ila'nná bë'enë' légaquie' cate' itö' yu zila.

Ila'niti le guta' quégaprofilië', ate' ila'cu'a tica'së' lataj chul-la ga dzö'ö nupa
nátigaca.

¹⁵ Huöá'u cazë' Dios yöl-la' na'bán quia' lu yöl-la' guti,
tu' ichë'ë nedä' ga tsöjsóalena' Lë'.

¹⁶ Biti' gádxinu' cate' idéli'në' nu bönni' yöl-la' tsahui' zxön,
en cate' xön yöl-la' lachi que yu'u lidxë',

¹⁷ tu'cabí bi u'ë cate' gátië',

en biti' tséajlen lë' yöl-la' lachi que le guta' queë'.

¹⁸ Sal-la' cate' ni' zoë' nabane' buzí' xibé bö' naca cazë',
ate' gula'gú'u böñachi lë' yöl-la' ba cate' bidéli'në' yöl-la' tsahui' na'.

¹⁹ Tsázië' ga na' dzö'ë xuz xtá'ahuë',

en bítirö' ilé'enë' bení'.

²⁰ Náquië' bönni' napë' yöl-la' zxön, pero riyádzjanë' yöl-la' réajni'i,
ca böa' guixi' tati cázaba'.

50

¹ Ru'ë didza' Xanru' Dios nayépisétérë'.

Nutubë' dérö nupa nacuá' yödzölió ga naguéla'të ga rilén gubidza ga ridxitnë
ga ribia.

² Lu yödzö Sión rigu'ë Dios bení'.

Napa yödzö na' yöl-la' lachi idú.

³ Zë'ë Dios queëru', en biti' soë' dxisö.

Tsöjnöru lahuë' tu guí' zxön,

ate' tsecja tu bö' budunu' idú gasibí'ilë'.

⁴ Ulidzë' lúxhiba xitsá', enca' luyú

cate' uchi'a usörö'ë quégaca böñachi queë'.

⁵ Rnnë' Dios: "Guli'túbi nupa néquiguequi quez quia',

nupa na' gulunlen nedä' didza' dzaga,

en bulu'lalaj rön lahua' le ben tsutsu didza' dzaga na'."

6 Naca bë' náquië' tsahui' Dios lúzxiba xitsá',
tu' uchi'a usöröe' Dios böñachi queë'.

7 Rnnë': "Buli'zë nágali', böñachi quia', ate' gu'a didza'.
Buli'zë nágali', böñachi Israel, ate' uzégua' libíili' didza'.
Naca caza' Dios.
Ön, naca' Dios queëli'.

8 Biti' uzégua' libíili' didza' ca naca le rúmnali' quia',
en caléga ca nácagacaba' böa' bëdxi ruzégu'ilí'-ba' lahuá'.

9 Biti' riquinda'-ba' bëdxi queëli',
en caléga chivo biguiú' nacuá'aba' queëli',

10 tu' néquigacaba' quia' yúgu'téba' böa' guixi',
enca' böa'-bëdxi nacuá'aba' lu gayuá' gayuá' guí'ado'.

11 Néquigacaba' ca' quia' yúgu'téba' böa' zoa xíligacaba',
enca' yúgu'té le zoa nabán la' guixi'.

12 La'tu' riduna' biti' guía' ca' libíili',
tu' nequi quia' yödzölió, enca' yúgu'té le nacuá' ni'.

13 ¿Naru' gágutsa' xipéla'gacaba' bëdxi,
o guí'jatsa' xichöngacaba' chivo?"

14 Le ral-la' unödzjali' queë' Dios naca yöl-la' rë Lë': "Xclenu'"
ate' ral-la' gunli' lahuë' Dios nayépisétëre' ca naca le guzxí' lu ná'ali' gunli'.

15 Rnnë' ca': "Ral-la' ulídzali' neda' cate' bi gaca queëli'.
Gácalen caza' libíili', ate' gunli' neda' bal."

16 Dios rë' bönni' huía' dö', rnnë':

"¿Bizx que ru'u didza' ca nácagaca xibá naguixja'?
¿Bizx que ru'u didza' ca naca didza' dzaga núnlena' böñachi?

17 Biti' runnu' lataj usédida' li',
pero rucá'anu' cá'asö didza' ruá'a.

18 Cate' rilé'enu'-në' bönni' gubán rácalenu' lë',
en runu' tsözxón nupa ta'guitsaj xibá que yöl-la' nutsaga na'.

19 Zóatica'su' gu'u didza' xihui',
en rui'itica'su' didza' biti' nácatë.

20 Zóatica'su' uzégua' nü' böchí' cazu',
en ruididza' yudxu' böchí'-zan cazu'.

21 Caní benu', ate' biti' bi gunnia',
ate' gúquinu' naca' ca naca cazu' li',
pero na'a uzégua' li' didza', en ulu'a lahui le nunu'.

22 Buli'zë nágali' didza' ni, nülöli' ruzóali' neda' tsölä'alö.
Channö cabi, usunítia' libíili', ate' cuntu nu gaca usölä libíili'.

23 Nu rë neda': Xclenu', runna quia' le run neda' bal,
ate' nu run ca rnna xtídfa'a, usölä caza' nu na'."

51

1 Dios quia', buzá' ladxi' quia' tsca naca yöl-la' dxi'i ladxi' zxön quiu',
en tsca naca le zián le ruzá' ládxu'u quia', bugúa yugu' le gudá'baga' a lo' Li'.

2 Buguíbitica'sö neda' tsca naca dö' bi'a.
Buchi'a neda' lu dul-la' nuna'.

3 Nöz quézida' le gudá'baga' a,

en röjnétiqui'sida' yugu' dul-la' nuna'.

⁴ Lo' Li' cazu' bena' dul-la',
en lo' Li' ca' bi'a dö'.

Naca bë' nacu' tsahui' cate' ru'u didza',
en idú dxi'a, en tsahui' nacu' cate' ruchi'a rusöröu' queëtu'.

⁵ Buyútsöca', nabága'a dö' cate' gusí lotë gulja',
en lu dul-la' zoa caza' cate' buzóanu xiná'a neda'.

⁶ Rë'ënu' soa le naca idútë li icja ládxi'do'otu'.

Guchiza icja ládxi'da'ahua' yöl-la' réajni'i.

⁷ Buchi'a neda' len le ruchi'aninu', ate' gaca' dxi'a.

Buguibi neda', ate' huöáca' zxíla'do'os.

⁸ Ben ga yönda' le naché' yöl-la' ruzí xibé, en yöl-la' rudzeja,
para huöáca ládxa'a lu le raca quia' tu' benu' ga réquibe'eda' nabága'a dul-la'.

⁹ Biti' uyú' yugu' dul-la' nuna',
en busulu yúgu'te le naca dö' nabága'a.

¹⁰ Dios quia', bun dxi'a ládxi'da'ahua',
en guchiza neda' tu bö' cubi le nuzú' tsutsu.

¹¹ Biti' ucuítu' neda' ga zoa' lo' Li',

en biti' ugú' Dios Bö' Lá'ayi quiu' Nu zóalen neda'.

¹² Bunna quia' yöl-la' rudzeja que yöl-la' rusölä quiu',
en ben ga guna' ca rnna xtídzu'u idú ládxa'a.

¹³ Ní'irö usëdida' nupa ta'guitsaj xibá quiu' ca nácagaca le rë'ënu' ilúngaca,
ate' yugu' bönni' dul-la' ulu'huécja quiu'.

¹⁴ Dios quia', benna neda' lataj cabí ibága'a xiguia'.
Naca cazu' Dios, Nu rusölä neda'.

Lu yöl-la' rudzeja quia' gul-la' ca naca cazu' tsahui'.

¹⁵ Xana' Dios, gusalaj ruá'a,
ate' usiyönda' böñachi yöl-la' ba quiu'.

¹⁶ La'tu' raza ládxi'u-ba' böä'-bëdxi güítitu'-ba' lo', la' güntea' caní.

Biti' raza ládxi'u-ba' nu böä' uzégui'tu'-ba' lo'.

¹⁷ Le rë'ënenë' Dios le naca ca tu le cú'uru' lahuë'
naca bö' naca cáziru' le nötaj nagula ladxi'.

Dios quia', biti' ucá'anu' cá'asö ládxi'do'otu'
le ruhuíini ladxi', en le naca nöxañ ladxi'.

¹⁸ Lu yöl-la' ruza' ladxi' quiu' ben le naca dxi'a
quégaca böñachi yöödzö Sión.

Buchisa zö'ö le run chi'i yöödzö Jerusalén.

¹⁹ Ní'irö tsaza ládxi'u yugu' le cú'utu' lo' le naca idú dxi'a,

yugu' böä' guíxi'do' güítitu'-ba' lo',
en yugu' böä'-bëdrido' uzégui'tu'-ba' lo'.

Ní'irö ilútië'-ba' yugu' bëdxi biguiú'do',
en ila'gu'ë'-ba' lu bucugu quiu'.

52

¹ ¿Bizx que run ba zxön cuinu' ni'a que dö' ru'u, bönni' nál-la?
Zóatica'sö yöl-la' dxi'i ladxi' queë' Dios.

² Len lúdxu'u rúnlenu' luzó'o didza' para usunítiu' böñachi.
Naca lúdxu'u, bönni' rizí' yë', ca tu guíë tuchi'.

3 Nadxí'irönu' le naca dö' ca nadxí'inu' le naca dxí'a,
en nadxí'irönu' le cabí nácatë ca nadxí'inu' le naca idútë li.

4 Nadxí'inu' yúgu'të didza' tun ditaj böñachi,
li' na', bönni' rizi' yë'ë.

5 Tsaz uzötaj cazë' Dios li'.

Söñë' li', en ubéajë' li' lu yu'u lidxu',
en ucuítë li' ga nacuá' nupa nabángaca.

6 Yugu' bönni' tsahui' ila'lé'enë' le ni, en iládxinë' Dios.

Ulu'zzidxë' queë' bönni' na' rizi' yë'ë, ila'në':

7 "¡Buli'yútsöca!" Bönni' ni biti' gú'unñë' uzxöni ládxë'ë Dios,
pero buzxöni ládxë'ë yöl-la' tsahui' queë',
en le zián le guzë ládxë'ë le cabí bi nazaca."

8 Naca' neda' ca tu yaga olivo ya'a le rö' ra' yu'u lidxë' Dios.
Uzxöni ládx'a'a yöl-la' dxí'i ladxi' queë' Dios yugu' iz si' zaca.

9 Guiëtica'sa' Li': "Xclenu'" tu' ben cazu' Li' ga naca caní,
ate' guna' löza Lo' le naca dxí'a lógaca nupa néquiguequi quez quiu'.

53

1 Ta'zá' ládxë'ë bönni' canöz, ta'nnë':
"Biti' ca' zoë' Dios."

Nácagaquie' xihui' bönni' caní, en núnagaquie' le nácatëro xihui'.

Cuntu nu bönni' zoë' rune' le naca dxí'a.

2 Ga na' zoë' Dios yehua' yubá ruyüë' gáti'tës,
en rilé'enë' böñachi nacuá' idútë yödzölió,
para inözinë' channö zoa nu réajni'i,
o channö zoë' nu bönni' ruí'i ládxë'ë Dios.

3 Yúgu'të böñachi söjáquie' ga yúbölö.

Yúgu'të' nácagaquie' xihui'.

Cuntu nu zoa run le naca dxí'a, nitúë' bönni'.

4 ¿Naru' cabí nápagaquie' yöl-la' réajni'i bönni' na' tu'ë dö'?
Tu'sunítië' böñachi quia' ca tu nu ragu yöta,
en biti' ca' tu'lidzë' neda'.

5 Tadxi ta'dzöbinë' bönni' caní, en biti' bi nuna' quégagaquie'.
Caní raca tu' rusunítië' Dios caz nupa ta'díl-lalen libí'ilí'.

Gunli' ga ulu'tu'inë' tu' chigurú'unë' Dios légaquie'.

6 Raca ládxí'ru' irúaj Sión Nu usólá böñachi Israel.

Cate' uchisa cazë' Dios böñachi queë' nadzúngaca,
ulu'dzeja zxí'ini xi'soë' Jacob, en ulu'zí' xibé böñachi Israel.

54

1 Busölá neda', Dios, para gaca yöl-la' ba que Lo'.
Len yöl-la' huáca quiu' guléaj neda' tsahui'.

2 Ruzë nagu' le rulidza' Li', Dios.

Ruzë nagu' didza' ruá'a.

3 Ta'díl-lalen bönni' zi'tu' neda',
tu' té'enë' bönni' zidzaj ilútië' neda'.

Biti' ca' tádxinë' Dios.

4 Buli'yútsöca', naca cazë' Dios Nu rácalen neda'.

Ruzóë' tsutsu Xanru' yöl-la' na'bán quia'.

⁵ Ubi'ë quégaca nupa ta'díl-lalen neda' le usuniti léguequi.

Tu' runu' ca rnna xtídz'u, Dios, busuniti léguequi.

⁶ Idú ládxa'a gútia'-ba' böa'-bëdxí lo'.

Guía' Li': "Xclenu'" Xan, tu' naca dxi'a Lo'.

⁷ Busólá cazu' Li' neda' lu yugu' le guca quia',
ate' rilé'eda' zeaj nanítitica'sö nupa ta'díl-lalen neda'.

55

¹ Ruzé nagu' le rulidza' Li', Dios,
en biti' tá'bagu' le rinábida' Li'.

² Ruzé nagu' neda', en rubí'u didza'.

Rulidza yúdxida' Li', en rö'a böninga

³ ni'a que chi'ë bönni' biti' rilé'enë' neda' dxi'a,
en tu' tu'tsá' neda' nupa tuá' dö', en tu'saca' zi' neda',
en lu yöl-la' rilé'quégequi ta'bía no neda'.

⁴ Réqui zi' ládxi'da'ahua',
ate' yöl-la' radxi que yöl-la' guti röjtsaza ládxi'da'ahua'.

⁵ Chigula'yaza yöl-la' radxi, en yöl-la' rizxizi neda',
ate' nabaga' yöl-la' radxi ridzöbi neda'.

⁶ Gunnía': "Gaca ládxa'a gata' quia' xílabá' gu'döö',
para gaca töda' lu bö'ös, en idxina' tu lataj ga gaca uzí' ládxa'a.

⁷ Raca ládxa'a tseja' zi'tu',
en tsöjsóa' lá' guixi' ga dé lataj.

⁸ Uyija' carelö tu lataj ga tsöjsóa' tsutsu,
para cabí bi gun quia' le naca ca bö' budunu'."

⁹ Busuniti légaquië', Xan, en buxí ruá'agaquië',
tu' bilé'eda' ta'dil-lé', en tu'tsatsë' lu yödzö.

¹⁰ Rëla, en te dza ta'dödë' nöza lu yödzö.

Tu'ë dö', en tunë' le xihui' idú gásibi'ilö yödzö.

¹¹ Tu'sunitië' le nacuá' ni'.

Tu'saca' zi'ë böñachi, en ta'zi' yë'ë la' nöza que yödz.

¹² Caléga bönni' biti' rilé'enë' neda' dxi'a nu rulidza' yudxi neda',
tu' huáca guá' ilena' le gunë',
en caléga bönni' rudí'inë' neda' nu ridíl-lalen neda',
tu' huáca ucachi' cuina' lahuë',

¹³ pero nacu' li', tu bönni' ca neda'.

Nacu' böchi' luzá'a, en nacu' tuz len neda'.

¹⁴ Lu yöl-la' dxi'i ladxi' queéru' gúcaru' tuz.

Ladaj böñachi zián gudaru', en bidxinru' lidxe' Dios.

¹⁵ Xana' Dios, bë' yöl-la' guti lataj idxín quégaquië' bagáchi'sö.

Ben ga tsöjtsázagaquië' nabángaqüië' lataj chul-la ga nacuá' nupa nátigaca,
tu'yu'u le xihui' lídxigaquië', en lu yu'u ca' gapa tu'dubë'.

¹⁶ Pero neda' ulidza'-në' Dios,
ate' usólá cazë' Xanru' neda'.

¹⁷ Chi'i dzö'ölö, en zílado', en gatsaj dza ulidza yúdxida' Lë',

en innë ládxa'a lahuë', ate' yön cazë' chi'a.

¹⁸ Huöá'uë' yöl-la' na'bán quia' lu na' nupa ta'díl-lalen neda'
en uzöé' neda' lataj ga ciòza' dxi'a tsáhui'do',
tu' nayánda' nupa ta'díl-lalen neda'.

¹⁹ Huayön quézinë' Dios, en ubi'ë quégäquië'.

Rö'ë rinná bë'tica'së' Lë'.

Caní gunë' Dios tu' cabí tu'sanë' ca tunë',
en bití' tådxinë' Dios.

²⁰ Bönni' ru'ë dö' ribia nahuë' nu riböza dxi'a tsáhui'do',
en rucá'anë' cá'asö didza' dzaga nunë'.

²¹ Bë'ë didza' yúlado',
pero yu'u icja ládxi'da' ahuë' yöl-la' ridzä'a.

Bë'ë didza' zxixido',
pero didza' na' bë'ë gulaca ca guíë tuchi'.

²² Gulú'u le nabág'u'u lu në'ë Xanru', ate' utipa cazë' ládzu'u.

Bití' gu'ë lataj iguïnnaj tsaz nu naca tsahui'.

²³ Chú'unë' bönni' tu'ë dö' na' lataj chul-la
ga nacuá' nupa nátigaca ga na' ila'nítigaquië'.
Bití' ila'cuá' gatsaj tscá ral-la' ila'cu'ë nabángäquië' bönni' tutië' böñachi,
en bönni' ta'zí' yë'ë.

Pero neda' uzxöni ládxa'a Li'.

56

¹ Buéchi' ladxi' neda', Dios, tu' ta'dá'baga' böñachi neda'.

Yugu' dza nupa tu'dí'i neda' ta'bía no neda'.

² Yugu' dza nupa bití' ta'lé'e neda' dxi'a tuá' dö' quia'.

Zián nupa ta'díl-lalen neda' lu yöl-la' run ba zxön cuínguequi.

³ Cate' radxi ridzöbida', uzxöni ládxa'a Xanru'.

⁴ Ruzxöni ládxa'a-në' Dios, en rigu'a yöl-la' ba xtídzë'ë.

Ruzxöni ládxa'a-në', en bití' bi gádxida'.

¿Bízxi caz gaca ilún quia' böñachi?

⁵ Yugu' dza tun nigui neda' nupa bití' ta'lé'e neda' dxi'a.

Ta'zá' ládxi'tica'sö nacxi iluá' dö' quia'.

⁶ Tu'dubë' ga nagáchisö, en tu'yúlanë' yúgu'të le runa',
para gata' quégäquië' lataj ilútië' neda'.

⁷ Bubi'ë quégäquië', Dios, ca naca dö' tu'ë,
en lu yöl-la' rilé quiu' busuniti légaquië'.

⁸ Nöz quézinu' Li' ca rö'a böñiga.

Nurixu' Li' nisa ribödxi quia'.

¿Naru' cabí nuzú' léguequi lu guichi quiu'?

⁹ Cate' ulidza' Li', la' dza ná'asö ulu'huécja gúz cíduzulö nupa tu'dí'i neda'.

Nöz quézida' rácalen cazu' neda', Dios.

¹⁰ Ruzxöni ládxa'a-në' Dios, en rigu'a yöl-la' ba xtídzë'ë.

Ruzxöni ládxa'a-në' Xanru', en rigu'a yöl-la' ba xtídzë'ë.

¹¹ Ruzxöni ládxa'a-në', en bití' bi gádxida'.

¿Bízxi caz gaca ilún böñachi quia'?

12 ¡Gunna' quiu', Dios yugu' le guzxí' lu na'a!
¡Cu'a Li' yöl-la' ba!

13 Busölo' neda' lu yöl-la' guti, en nuzú' neda' tsutsu.
Ridá caza' lo' Li', Xantu' Dios, lu bení' ru'u quégaca nupa nabángaca.

57

1 ¡Buéchi' ladxi' neda', Dios!

¡Buéchi' ladxi' neda' tu' ruzzöni ládxa'a Li' gun chi'u neda'!
Guxóa no'o neda' ca runba' böra run chí'igacaba' börado' zxan xílaba',
ga idxinrö tödi bönadxi raca quia'.

2 Rulidza'-në' Dios nayépisëtërë'.

Náquië' Dios Nu run ga raca dxi'a quia'.

3 Ga zoa cazé' yehua' yubá ubi'ë didza', en usölë' neda'.

Usölë' neda' lu na' nu ribía no neda'.

Lu yöl-la' dxi'i ladxi' queë', en yöl-la' idú ladxi' queë' gácalenë' neda'.

4 Naca quia' tsca zoa' lágjacaba' bëdxi guixi'.

Yugu' bönni' zidzaj nagú'ugaquïe' neda' lë'ajlö.

Nácgacaca láyi'gaquïe' ca yugu' yaga tuchi' que gudil-la,
ate' nácgacaca lúdxi'gaquïe' ca yugu' guë' tuchi'.

5 Dios quia', bulu'i lahui lúzxiba yöl-la' zxön quiu',
en yödzölió ni bulu'i lahui yöl-la' bení' quiu'.

6 Nupa tu'dí'i neda' nucáchi'gaca du yalaj le sön neda'.

Rudú ládxa'a tu' rö'a böniña.

Gula'chö öñë' yero ga tsöjbixa' neda',
pero gula'bixë' la' lágacasë' lu yero na'.

7 ¡Chinabá'a quia', Dios!

¡Chinabá'a quia'!

¡Gul-la' quiu', en cu'a Li' yöl-la' ba!

8 ¡Bubán, bö' naca caza'!

¡Guli'bán arpa, en bihuë'l-la!

¡Zílado' ubana',

9 en gul-la' quiu' Li', Xan, ladaj böñachi yugu' yödzö!

¡Cu'a Li' yöl-la' ba lögaca yúgu'të böñachi!

10 Zxöntëro naca yöl-la' ruhuéchi' ladxi' quiu', le ridxitë yehua' yubá,
ate' ridxitë yöl-la' idú ladxi' quiu' lúzxiba xitsá'.

11 Dios quia', bulu'i lahui lúzxiba yöl-la' zxön quiu',
en yödzölió ni bulu'i lahui yöl-la' bení' quiu'.

58

1 ¿Naru' ruí'ilí' didza' idútë li, libí'ilí' na', rinná bë'ëli'?

¿Naru' ruchi'a rusöröli' ca naca le naca tsahui'?

2 ¡Biti' ca'! Rizá' ládxi'ilí' yugu' le xihui',
en rusaca' zí'ilí' böñachi len yugu' le cabí nácatë runli'.

3 Ta'dödi tsölä'alö nupa tuá' dö' ga gudéla'të gúljagaca.
Ta'zí' yë' ga gudéla'të bulu'cuá'anu xiná'aguequi léguequi.

4 Yu'u ruíiguequi le naché' yöl-la' guti ca le dxía láyi'gacaba' bëla sínia'.

Nácagaca ca tuba' bëla sínia' nacödzuba',

5 bëla na' biti' riyönba' chi'ë bönni' gudzá',
o le rul-lë' bönni' rune' gudzá'.

6 ¡Dios quia'! ¡Buzuzzaj láyi'gaquië!

¡Guladzu' yugu' layi' tuchi' quégacaba'
nácagaca ca layi' tuchi' quégacaba' bëdxi guixi'!

7 Ben ga ila'nítie' ca raca que nisa yegu gubó'o cate' ruhuí'i!

Ben ga ila'cuádië' ca raca que guixi' rö ö la' nöza!

8 Ben ga ila'nítie' ca yugu' börhuinna tu'únaba' lu gubidza,
o ca tubi' bñido' nuzóanu-bi' nigula zí'alö ca ral-la' gáljabí', en chinátitëbi'!

9 Zí'alö ca gaca utsë'e yusu' tu guí' zxön,

ugüé' Dios légaquië' lu yöl-la' ridzá'a queë',

bönni' nabángacäquië', en bönni' chizóa ilátië'.

10 Ulu'dzeja nupa nácagaca tsahui' cate' ila'lé'e

uzí' lëbë' Dios bönni' tu'ë dö' na'.

Ulu'zxinë' len ná'agaquië' xichöngaca nupa na' tuá' dö'.

11 Ila'nná bönnachi: "Le nácatë zoa le rubi'ë Dios quégacaca nupa nácagaca tsahui'.
Le nácatë zoë' Dios Nu ruchi'a rusörö quégacaca nupa nacuá' yödzölió."

59

1 Busölá neda', Dios, lu ná'agaca nupa ta'zóa regu' neda'.

Buzóá neda' tsutsu ga biti' gaca ila'dxín nupa ta'dil-lalen neda'.

2 Busölá neda' lu ná'agaca nupa tuá' dö',

en guléaj neda' lu ná'agaca nupa tuti bönnachi.

3 Buyútsöca', ta'bö' nísië' neda' para ilútië' neda'.

Ta'zóa régu'ë bönni' zidzaj neda',

caléga tu' gudá'baga'a légaquië', o tu' ben zí'a légaquië', Xan,

4 en caléga tu' bëtia' bönnachi, pero ta'zë'ë carelö para til-lalenë' neda'.

Gudá gácalenu' neda', ate' ilé'enu' naca caní.

5 Xantu' Dios quégacaca ni'a no'o guizxi yu,

en Dios quégacaca bönnachi Israel,

gudá dujenu' xiguia' bönnachi yúgu'të yödzö.

Biti' uzá' ládxu' quégacaca nupa tuá' dö' lu yöl-la' rizi' yë' quéguequi.

6 Tu'dxinë' chi'i dzö'ölö, ta'bödxi yechë'ë ca runba' bö'cu' ragu yéchi'ba' beo',
ate' ta'dödë' idú gásibi'ilö yödzö.

7 Buyútsöca', didza' tu'ë nácagaca ca le rëbigaquië'.

Nácagaca didza' tu'ë ca yugu' güië tuchi'.

Ta'nné': "¿Nuzxi caz yoni?"

8 Ruzxidxu' ca naca le tunë', Xan.

Rutitju' ca naca le tun bönnachi yúgu'të yödzö.

9 Tu' nal-la cazu' Li' guna' löza Li'.

Nacu' Dios Nu run chi'i neda'.

10 Tu' náquië' Dios quia' dxi'i ladxi', dutságuië' neda'.

Uxicja cazë' Dios nupa ta'dil-lalen neda'.

11 Biti' gútiu' nupa na' tuá' dö' para cabí ilal-la ladxi' böñachi ladza'.
 Lu yöl-la' huáca zxön quiu' bësilasi nupa tuá' dö', en buzötaj léguequi luyú.
 Naca cazu' Xantu', Nu run chi'i netu'.

12 Ben ga sön légaquie' yöl-la' run ba zxön cuíngaquie'
 tu' nözi dul-la' tuné' ca tu'i isë' didza',
 enca' tu' tu'dxié' dö' luzá'agaquie', en ta'zí' yë'ë.

13 Lu yöl-la' rilé quiu' busuniti légaquie'.
 Busuniti légaquie' tsaz para cabí ila'cuá'aré',
 en para iléquibe'e böñachi Dios caz rinná bé'ené' zxí'ini xi'sóe' Jacob,
 ga ridxité idútë yödzölió.

14 Tu'dxiné' chi'i dzö'ölö, ta'bödxi yechë'ë ca runba' bö'cu' ragu yéchi'ba' beo',
 ate' ta'döde' idú gásibi'ilö yödzö.

15 Ta'dé' ta'guiljë' le ilahuë',
 ate' ta'bödxi'ë channö cabí ulu'huölaj ulu'dzé'ené'.

16 Gul-la' neda' ca naca yöl-la' huáca zxön quiu'.
 Yugu' zila gul-la' lu yöl-la' rudzeja quia' ca naca yöl-la' dxi'i ladxi' quiu',
 tu'naca cazu' Li' Nu run chi'i neda',
 en nacu' Nu rácalen neda' cate' bi raca quia'.

17 ¡Naca cazu' Li' Nu rutipa ládxa'a!
 ¡Gul-la' quiu' yöl-la' ba,
 tu'nacu' Li' Nu run chi'i neda', Dios, en Nu nadxi'i neda'!

60

1 Nusán no'o netu', Dios, en nuzötju' netu'.
 Buécka queëtu' na'a, en gúcalen netu'.

2 Ben cazu' ga gudödi budó' zxu', en guyalaj luyú.
 Bun luyú ni tu' chizóa iguínna.

3 Sizzöni busaca' zi'u böñachi quiu'.
 Le guca queëtu' guca tsca bugui'ju' netu' xis uva nal-la
 le ben ga yöjchégü'tu' ca tu bönni' nazúdxiné'.

4 Bunödzju' quégaca nupa tadxi Li' tu lari' ulu'chisa,
 le söjácalen cate' bi raca quéguequi,

5 para ulu'lágaca nupa na' nadxi'i quézinu'.
 Len yöl-la' huáca zxön quiu' busólá netu', en bubí'i didza' cate' rulidztu' Li'.

6 Lu le naca lá'ayi queë' bë'ë didza' Dios, gunnë':
 "Uzi'a xibé, en quísia' xiyúgaca böñachi Siquem, en urixa' luyú dë cuita yegu
 Sucot.

7 Nequi quia' xiyúgaca böñachi Galaad, enca' xiyúgaca zxí'ini xi'sóe' Manasés.
 Naca ca tu le rusubín icja' xiyúgaca zxí'ini xi'sóe' Efraín.
 Xiyúgaca zxí'ini xi'sóe' Judá naca ga rinná bë'a.

8 Xiyúgaca böñachi Moab naca ca tu ga riguibi na'a,
 ate' cu'a löla' uléaja' xiyúgaca böñachi Edom.
 Cödxí'a tu' uxicja' böñachi Filistea."

9 ¿Nuzxi caz gaca ichë' neda' lu yödzö zoa zö'ö idú gásibi'ilö le run chi'i yödzö
 na'?
 ¿Nuzxi caz ichë' neda' lu xiyúgaca böñachi Edom?

10 ¿Naru' cabí nusán ládxu'u netu', Dios?
 ¿Naru' cabí tséajlenu' bönni' queétu' röjáquië' gudil-la?
11 Gúcalen netu' cate' til-lalentu' nupa ridíl-lalen netu',
 tu' cabí gaca gácalen netu' nu naca böñachisö.

12 Len yöl-la' huáca queë' Dios idéli'ru'
 tu' uxicia cazë' Lë' nupa ta'díl-lalen netu'.

61

1 Ruzé nagu' le rulidza' Li', Dios.
 Rufí'i ládxu'u le rinábida' Li'.
2 Ga ni zoa' zi'tu' ga dë ladza' rulidza' Li' tu' rudú ládxa'a.
 Guchë' neda' ga zoa Nu na' naca ca tu guiöjto'o, Nu na' nál-latérö ca neda'.

3 Nacu' Li' Nu run chi'i neda'.
 Nacu' Nu rácalen neda' cate' zoa nu ribía no neda'.
4 Bë' lataj sóatica'sa' ga zoa cazu' Li'.
 Bë' lataj sóalena' Li', guna' neda' ca tunba' börado' ta'yázaba' zxan xílabá' yójede.
5 Biyón quézinu' Li' le guzxí' lu na'a guna' quiu' Li', Dios.
 Benu' ga nequi quia' le runödzu' quégaca nupa tadxi Li'.
6 Gunu' ga soë' xidzé bönni' na' rinná bë'ë uláz quiu'.
 Zián iz soë' ibanë'.
7 Sóatica'se' lo' Li', Dios.
 Bë' queë' yöl-la' dxi'i ladxi', en le naca idútë li, yugu' le ilún chi'i lë'.

8 ¡Gúl-latica'sa' yöl-la' ba que Lo',
 para gaca guna' tu tu dza le guzxí' lu na'a!

62

1 ¡Tuzé' Dios ruzxöni ládxa'a, en rizé ládxa'a Lë'!
 ¡Lë' cazë' rusölë' neda'!
2 ¡Tuzé' Lë' rapa chi'ë neda', en rusölë' neda'!
 ¡Ruzoë' neda' tsutsu, ate' biti' gaca nu uzötaj neda'!

3 ¿Gáca'xte caz güí'i ládxí'li' ucúl-lali' neda'?
 Rë'énisili' uzötjali' neda' ca tu zö'ö chizóa iguínnaj,
 o ca tu lë'aj yaga le chinatëbi.
4 Rë'énisili' uzötjali' neda' ga ni tunë' neda' bal.
 Ruzí'ilí' xibé yugu' didza' biti' nácatë.
 Ruí'ilí' dxi'a didza' láhui'sö,
 pero lu icja ládxí'do'oli' ruididza' yúdxili' neda'.

5 ¡Tuzé' Dios ruzxöni ládxa'a,
 en runa' löza Lë'!
6 ¡Tuzé' Lë' rapa chi'ë neda', en rusölë' neda'!
 ¡Ruzoë' neda' tsutsu, ate' biti' gaca nu uzötaj neda'!
7 ¡Tuzé' Dios rusölë' neda', en rune' ga naca' bica' ba!
 ¡Dios nuzoë' neda' tsutsu, en rapa chi'ë neda'!

8 Libí'ilí', böñachi, bulí'zxöni ládxë'ë Dios yúgu'të dza.
 Bulí'siyönnë' yugu' le raca queëli', tu' run chi'i cazë' rë'u.

9 Le nácatë nácagaca yúgutë bönachi ca tu bö' ridödisö,
en biti' bi nazáca'gaca nupa na' nadéli'gaca lataj lo.

Tu lu zxigóni biti' bi nál-lí'guequinë'.

Nácagacarë' dzá'asö ca tu bö' riguélä'siru'.

10 Biti' uzzöni ládx'i'lí' bi idéli'lí' len yöl-la' nál-la queëzili'.

Biti' uzi'lí' xibé le cuanli'.

Channö gata' queëli' yöl-la' tsahui', biti' gü'i ládx'i'lí' le.

11 Tu luzuísö bë' è didza' Dios.

Chopa luzuí biyönda' ca naca lë ni rnna:

"Nápatérë' Dios yöl-la' huáca,

12 ate' zóatica'sö yöl-la' dxi'i ladxi' queë'."

Ubi'i cazu', Xan, quégaca bönachi tsca naca le núngaca.

63

1 Dios, nacu' Dios quia', ate' idú ládx'a ruguilja' Li'.

Ribidxi ládx'a Li', ate' idútë le naca' rizë ládx'i Li'.

Zoa' tu luyú bidxi ga ni rudú ládx'a, ate' biti' bi dë nisa.

2 Ben ga ilé'eda' Li' lu lataj ga na' zoa cazu',

para ilé'eda' yöl-la' huáca quiu', en yöl-la' bení' quiu'.

3 Tu' nácatérë dxi'a yöl-la' dxi'i ladxi' quiu' ca yöl-la' na'bán caz.

Que lë ni na' cu'a Li' yöl-la' ba.

4 Guía' Li': "Xclenu'" tsanni ni zoa' nabana'.

Uchisa' na'a, en ulidza' Lo'.

5 Ruhuölaj rudzé'e icja ládx'i'da'ahua' le nácatérë dxi'a,

ate' lu yöl-la' rudzeja quia' rigu'a Li' yöl-la' ba.

6 Röjneda' Li' cate' déa' lu le ráti'da'.

7 Rizá' ládx'a ca nacu' cate' rina'sa' yëla.

Rácalen cazu' neda',

en tu' run chi'u neda', lu yöl-la' rudzeja quia' rul-la' quiu'.

8 Nazön cazu' Li' bö' naca caza'.

Rizön cazu' Li' neda',

9 pero ila'yaza lataj chul-la

nupa të'eni iluti neda'.

10 Ilátigaca lu guié tuchi'.

Ilágugaca bö'cu' zuga' léguequi.

11 Nu rinná bë' uláz queë' Xanru' udzeja ladxi' lahuë' Dios.

Ulu'zí' xibé yúgu'të nupa tu'zxöni ladxi' Lë',

tu' usayaj cazë' Lë' ru'igaca nupa ta'zí' yë'.

64

1 Dios, buzë nagu' chi'a le rinabi yúdxida' Li',

para gun chi'u yöl-la' na'bán quia' tu' rádxida' bi gun nu ridíl-lalen neda'.

2 Bucachi' neda' para cabí bi ilún quia' bagáchi'sö nupa tuá' dö',

en para cabí ila'bía di'ë neda' bönni' tutié' böñachi.

3 Nácagaca lúdx'i gaquie' ca yugu' guié tuchi',

ate' nácagaca didza' zi' tu'ë ca yugu' yaga lahui tuchi'.

4 Bagáchi'sö tu'zé yugu' yaga lahui tuchi' na'

para iluné' huë' nupa biti' bi nabága'gaca.

Tsálido'os tu'zé léguequi, en biti' bi tádxinë'.

- 5** Biti' ca' tu'cá'anë' le naca dö' të'ënë' ilunë'.
 Tu'ë didza' ca gaca ulu'cächë'ë yugu' du yalaj quégaquië', ta'nnë':
 "¿Nuzxi caz gaca ilé'e yugu' du na?"
6 Tunë' didza' ca naca le naca dö' ilunë', ta'nnë': "Chinabá'a le gunru'."
 Tu'cách'i'gaquië' le ta'zá' ládxë'ë, en le ta'bequi icjë'.
- 7** Uzal-lë' Dios tu yaga lahui tuchi' le ideli' légaquië'.
 Tsálico'os gunë' légaquië' huë'.
- 8** La' didza' tu'isë' ilún ga tseajchégü'gaquië'.
 Lu yöl-la' rubani quéguequi ulu'tá ícjaguequi nupa ila'lé'e légaquië'.
- 9** Ní'irö yúgu'të böñachi iladxi Dios,
 en ulu'siyön luzë'eguequi ca naca le nunë' Dios,
 en ila'zá' ládxí'gaca ca naca lë na' nunë'.
- 10** Nu bönni' tsahui' uzi'ë xibë' Xanru', en gunë' löza Lë'.
 Yúgu'të nupa nácagaca idú ladxi' ulu'zí' xibë'.

65

- 1** Dios, nupa nacuá' yödzö Sión ila'gú'u Li' yöl-la' ba,
 en ilunna quiu' le gula'zí' lu në'eguequi,
2 tu' riyön quézinu' Li' cate' tu'lidza Li',
 ate' yúgu'të böñachi ila'dxín lo'.
3 Tun nigui neda' dul-la' nuna',
 pero runiti lo cazu' netu' ca naca le ridá'baga'tu' Li'.
4 Bica' ba nupa nabö cazu' quiu', en nulidzu' quiu',
 para ila'cuá' yugu' lataj lá'ayi quiu'.
 Huölaj udzé'etu' le nácagaca dxí'a yú'ugaca lidxu',
 enca' le yú'ugaca yudo' lá'ayi quiu'.
5 Tu' nacu' tsahui' rubi'u didza', en runu' yugu' le zxön le tácalen netu'.
 Naca cazu' Dios Nu rusölä netu'.
 Nupa nacuá' idútë yödzölió ulu'zxöni ladxi' Li',
 enca' nupa nacuá' zi'tu' ia'tsölä'alö nísado'.
6 Len yöl-la' huáca quiu' nucú'u yugu' guí'a zxön,
 le naca bë'gaca nál-latérö cazu' Li'.
7 Ruzúa dxíu' le riyasa ridxía lu nísado', en le ru'u bö que.
 Ruzúa dxíu' böñachi cate' tu'tsatsa.
8 Bönachi idútë yödzölió tadxi Li' ni'a quégaca le zxön nunu'.
 Le run cazu' Li' tun ga tu'dzeja böñachi idapa la'a yödzölió.
9 Ruí'i ládxu'u luyú, en risöł-lu'u nisa guiöj.
 Runu' ga ruhuöáca yu ya'a.
 Nucú'u luyú na' yugu' yegu yúdzugaca nisa zila,
 le run ga dética'sö zxoa'-za, tu' caní raza ládxu'u Li'.
10 Risöł-lu'u nisa guiöj gapa dëgaca na, en rusubisu' gapa chinadúz.
 Ruúnu' yúludo' luyú zidzaj, en runu' ga ta'gula guixi' cuando'.
11 Runu' ga rulá' yödx yana' le nadúz luyú ni tu iz tu iz,
 en ga zóatica'sö le ilë'aj ilágugaca böñachi.
12 Nacuá'aba' böa'-bödxi la' guixi',
 ate' tu'dzeja böñachi yugu' lu guí'ado'.
13 Gapa naca lachi' nacuá'aba' bö'cu' zxila',
 ate' dxíada' zxoa' xtila la' yëla.

Lu yöl-la' rudzeja quéguequi ta'bödxi'a,
en tul-la bönachi quiu'.

66

1 ¡Guli'güí' zidzaj didza' lahuë' Dios
lu yöl-la' rudzeja queëli' yúgu'teli' zóali' yödzölió!

2 ¡Guli'gul-la ca naca yöl-la' ba que Lë'
¡Guli'cu'ë yöl-la' ba!

3 Guli'guië' Dios: "¡Zxöntérö nácagaca le nunu'
tu' naca zxöntérö yöl-la' huáca quiu'!"
Nupa biti' ta'lé'e Li' dxi'a ulu'lui'i cuini
ca nupa tun ca rnna xtídzu'u.

4 Yúgu'té nupa nacuá' yödzölió ilún Li' zxön,
en ilúl-la yöl-la' ba quiu'.
Ilúl-la yöl-la' ba que Lo'.

5 Guli'dá ilé'eli' yugu' le nunë' Dios.
Nayépisétérë' Dios lu le runë' quégaca bönachi.

6 Benë' ga böáca ca luyú bidxi ga dë nísado'.
Gula'dödë' gatsaj láhui'lö yegu, ta'zë'esö ní'agaquië'.
Ni' udzéjade'eru' ca náquië' Lë'.

7 Len yöl-la' unná bë' queë' rinná bë'tica'së'.
Ruyútica'së' bönachi yúgu'té yödzö.
Biti' ral-la' ilún ba zxön cuínguequi nupa ta'dá'baga' xtídzë'ë.

8 ¡Guli'gún zxönë' Dios queëtu', libí'ili' bönachi yúgu'té yödzö,
en guli'cu'ë yöl-la' ba gáti'tés!

9 ¡Run cazë' Lë' ga zóaru' nabanru',
en biti' ru'ë lataj cuila ní'atu'!

10 Guzxí' bë' cazu' netu', Dios.
Buchi'u netu' ca run nu ruchi'a guíë plata lu guí'.

11 Bë'u lataj bidzuntu' lu du yalaj.
Busubágú'u netu' tu yua' zí'i.

12 Benu' ga gula'libë' icjtu' bönni' dxíagaquië'-ba' böa'.
Gudöditu' lu gui', en lu nisa,
pero guchë' cazu' netu' tu lataj ga bölaj budzé'etu'.

13 Tsu'a lidxu', en cu'a-ba' lo' böa'do' uzégui'a-ba' lo'.
Guna' lo' Li' le guzxí' lu na'a guna',

14 lë na' bë'a didza' que,
le gunní'a cate' ni' rigu'i rizáca'a.

15 Cu'a-ba' lo' Li' böa'bëdxi renni' uzégui'a-ba' lo',
tsözxön len dzön quégacaba' chivo biguiú'.
Gútia'-ba' lo' yugu' bëdxi, en yugu' chivo biguiú'.

16 Guli'dá uzë nágali', yúgu'teli' rádxili'-në' Dios,
ate' usiyönda' libí'ili' yugu' le benë' le gulácalen neda'.

17 Len ruá' cuinsa' bulidza' Lë',
en bena' Lë' zxön len lúdxa'a.

18 Channö rucách'a a le naca dö' lu ládxi'da'ahua',

bití' yönné' Xanru' Dios didza' gu'a,
¹⁹ pero le nácaté biyönné' Dios didza' bë'a.
 Buzé naguë' cate' bulidza' Lë'.

²⁰ ¡Yöl-la' ba Dios!
 ¡Bití' gudá'baguë'ë neda' cate' bulidza'-në',
 en bití' buguë' yöl-la' nadxi'i queë' neda'!

67

¹ Xantu' Dios, buzá' ladxi' queëtu', en ben ga gaca dxi'a queëtu'.
 Lu yöl-la' dxi'i ladxi' quiu' buyú netu',
² para gaca bë' le rë'ënu' guntu' yödzölió ni,
 en para ila'nözi böñachi yúgu'të yödzö ca naca yöl-la' rusölá quiu'.

³ Ral-la' ila'gú'u böñachi Li' yöl-la' ba, Dios.
 Yúgu'të böñachi ral-la' ila'gú'u Li' yöl-la' ba.
⁴ Ral-la' ulu'dzeja böñachi yúgu'të yödzö,
 en ilú-la lu yöl-la' rudzeja quéguequi.
 Tu' uchi'a usöröu' böñachi ca naca le naca tsahui',
⁵ ral-la' ila'gú'u Li' yöl-la' ba böñachi, Dios.
 Yúgu'të böñachi ral-la' ila'gú'u Li' yöl-la' ba.

⁶ Yödxí yana' runödzaj luyú ni.
 Dios queëru' runë' ga raca dxi'a queëru'.
⁷ Runë' Dios ga raca dxi'a queëru',
 para iladxi Lë' yúgu'të nupa nacuá' yödzölió.

68

¹ Raca ládxi'ru' chasë' Dios, en usulásië' nupa ta'díl-lalen Lë',
 en gunë' ga ulu'zxunnaj nupa bití' ta'lë'e Lë' dxi'a.
² Ca rulaga tu bö' recja dzön, ca' bulaga léguequi.

Ca na' ruúna' lu guí' quízxi'ba' buz,
 ca' ila'niti nupa tuá' dö' lahuë' Dios.
³ Ulu'dzeja nupa nácagaca tsahui', en ulu'zí' xibë' Dios.
 Lu yöl-la' rudzeja quéguequi ulu'zí' xibë'.

⁴ ¡Guli'gul-la queë' Dios!
 ¡Guli'gul-la yöl-la' ba que Lë'!
 Buli'pá'a nöza ga tödë' gapa dë lataj.
 ¡Nazí'i lë' Xanru'!
 ¡Buli'dzeja lahuë' Lë'!

⁵ Náquië' ca xúzgacabi' bi'i uzëbido',
 enca' Nu ruchi'a rusörö quégacanu nigula uzëbi.
 Caní náquië' Dios ga na' zoë' lataj lá'ayi queë'.
⁶ Rucu'ë Dios nupa naga'anagaca bayechi' tu yu'u.
 Rubéaje' nupa nadzungaca, en runë' ga raca dxi'a quéguequi,
 pero ulu'gá'ana tu luyú bidxi nupa ta'dá'baga' Lë'.

⁷ Yöjnöru cazu' lógaca böñachi quiu', Dios,

cate' guchë'u léguequi la' guixi' ga na' dë lataj.

8 Gudödi budó' zxu' dza ni'.

Lësca' gula guiöjsiu' lahuë' Dios.

Guzxizi gui'a Sinaí lahuë' Dios quégaca bönachi Israel.

9 Benu' ga gulaj guiöjsiu', Dios.

Benu' ga böáca ya'a xiyú' ga ni' guca yu bidxi.

10 Yöjcua' nupa néquiguequi quiu' luyú na'.

Lu yöl-la' dxi'i ladxi' quiu', Dios,
bucözu' le gácalen nupa nácagaca yechi' luyú na'.

11 Bë' cazë' didza' Xanru' Dios.

Ta'guísinu nigula zián didza' dxi'a queë', ta'nnanu:

12 ¡Ta'zxúnnaejë! ¡Ta'zxúnnaejë' bönni' ta'nná bë'ë,

enca' bönni' röjáquië' gudil-la guizxi yu quégaquië'!"

Nigula gula'bözanu lídxigacanu bulu'zí'nu xibé le gutá' quégaquië'.

13 Sal-la' bucachi' lolí' gapa tun chí'ilí' bö'cu' zxila',
gáculi' le naca lachi ca nácagacaba' gu'dööd' néquiguequiniba' guíë plata,
en xitúbigacaba' néquiguequiniba' guíë oro.

14 Cate' bësilásiei' Dios bönni' na' gula'nná bë'ë lu guí'a Salmón,
benë' ga gula guiöj bögui' lu guí'a na'.

15 Nequi queë' Dios guí'a Basán.

Naca guí'a Basán na' tu guí'a zxön.

16 ¿Bizx que ruzxé'eli', yugu' guí'a zxön?

¿Bizx que ruzxé'eli' guí'a na' guzé ládxë'ë Dios tsöjsöë' ga na'?

Le nácatë tsaz soë' Dios ni'.

17 Gayuá', en gayuá' nácagaca carreta que gudil-la queë' Dios.

Rizë'ë Xanru' lu guí'a Sinaí ga na' tseajtsazië' lataj lá'ayi queë'.

18 Buëpu' yehua' yubá richë'u bönachi zián gula'dzúngaca.

Nu'u yugu' le bulu'nödzaj bönachi quiu',
en le gulunna quiu' nupa ta'dá'baga' Li',
para tsöjsöë' Dios ni' tsaz.

19 ¡Yöl-la' ba Dios, Nu ruá' sua'ru' tu dza tu dza!

¡Náquie' Dios Nu rusólá rë'u!

20 ¡Dios queëru' rusölë' rë'u!

¡Rusölë' Xanru' Dios rë'u lu yöl-la' guti!

21 Le nácatë Dios udxíe' huë' ícjagaca nupa ta'dá'baga' Lë'.

Udxíe' huë' ícjë' bönni' biti' gusanë' ca naca dö' ru'ë.

22 Ru'ë didza' Xanru', rnne': "Ubéaja' léguequi lu guí'a Basán,
en ubéaja' léguequi lu nísado',

23 ate' ulfbili' léguequi ga idxintë irúaj rön quéguequi,
ate' ilë'ajba' zxiculi' xichöngaca nupa ta'dil-lalen libí'ilí'."

24 Ta'lé'e yúgu'të bönachi nupa ta'dalen Li', Dios.

Lu yöl-la' run Li' zxön ta'dá lu lataj lá'ayi quiu', Dios quia', Nu rinná be'e neda'.

25 Nupa tul-la, en nupa ta'guínnaj lë'egaca bihuël-la, ta'dá ni',

ate' bi'i nigula ra'bando' tunbi' léguequi tsözxön, ta'gápabi' lë'egaca guídido'.

26 Buli'lidzé' Dios dxi'a tsáhui'do' gapa na' rudúbili' queë', tu' náquië' Xanru', libí'ili' zxí'ini xi'sóë' Israel.

27 Nacu'ë zxí'ini xi'sóë' Benjamín ga na', bönni' gúcarë' cuidi', ate' ta'nná bë'ë. Bönni' lo quégaquië' zxí'ini xi'sóë' Judá nútsa'gaquië' ládjagaquië', enca' ládjagaquië' bönni' lo quégaquië' zxí'ini xi'sóë' Zabulón, en Neftalí.

28 Buluí'i lahui yöl-la' huáca quiu', Dios. Buluí'i lahui yöl-la' huáca quiu', Dios, tu' chibenu' zián le gulácalen netu'.

29 Tu' dë yudo' quiu' lu yödzö Jerusalén, bönni' ta'nná bë'ë ila'chë'ë ni' le ilunnë' quiu'.

30 Buzé le bach böñachi yödzö na' nácagaca ca böa' guixi', enca' böñachi yugu' yödzö nácagaca ca yugu' bëdxi tsözxön len zxí'iniguequi. Tu'libi böñachi yechí' tu' ta'zë ládxigaca dumí. Bësilási nupa na' ta'yaza ladxi' rójaca gudil-la.

31 Bönni' gubáz quégaca böñachi Egipto ila'dxinë' lo'. Bönni' Etiopía ila'chisa ná'agaquië' lo', Dios.

32 ¡Guli'gul-la queë' Dios, böñachi yúgu'të yödzö! ¡Guli'gul-la yöl-la' ba queë' Xanru'!

33 Rö'ë yehua' yubá xitsá'térö, le zoa caz dza ni'te. Buli'yútsöca', ru'ë zidzaj didza', en naca chi'ë ca guziú' rinnë.

34 ¡Guli'gún zxönen' Dios! Yöl-la' nayépisë queë' rusubaga' böñachi Israel. Yöl-la' huáca zxön queë' nalá' lúzxiba xitsá'.

35 Rubániru' ca nacu' Li', Dios, lu lataj lá'ayi quiu'. Runnu' quégaca böñachi quiu' yöl-la' nal-la, en yöl-la' huáca.

Náquië' Dios quégaca böñachi Israel. ¡Yöl-la' ba Lë' Xanru' Dios!

69

1 Busólá neda', Xana' Dios, tu' raca quia' tscá nabága'a nisa ga ridxitnë ruchicja' nisa.

2 Raca quia' tscá ruhuötja' ga rë' lu guna', en bití' zoa ga gaca uliba'. Zoa' ca tu lu nisa zila, en chizóa uchicja' nisa.

3 Rudú ládexa'a tu' rulidza' nu gácalen neda', ate' da' lubá'a. Chirichul-la guiój lahua' tu' ruyúa' ga guídu' dusölo' neda'.

4 Nayánterö ca guitsa' icja' nupa bití' ta'lé'e neda' dxi'a, en bití' bi nuna' quéguequi.

Nál-lagaca nupa ta'díl-lalen neda', en té'ëni iluti neda', en bití' bi nuna' quéguequi.

Tunë' bayúdx ubi'a dumí le cabí gulana'.

5 Nöz quézinu' Li', Dios, yöl-la' canöz quia', en bití' nagachi' lo' Li' dul-la' nuna'.

6 Bití' gu'u lataj nupa tu'zxöni ladxi' Li' ulu'tu'i ni'a quia' neda', Xana' Dios nayépisëterü'.

Biti' gu'u lataj nupa tun Li' zxön ila'gá'ana cá'asö ni'a quia',
Dios quégaca bönachi Israel.

7 Tu' nadxi'iда' Li' tu'lidza ditje' neda',
en que lë ni na' rutu'iда'.

8 Naca' ca tu bönni' zi'tu' lógacabi' bi'i böcha'a,
en ca tu bönni' zi'tu' lógaquië' di'a dza quia'.

9 Tu' ruí'i ládx'a'a yudo' quiu' régui rilá ládx'iда'ahua'.
Naca ca tu lidza ditaj neda' nupa tu lidza ditaj Li'.

10 Ruzötaj cuina', en runa' gubasa,
en que lë ni na' tu'didza' yudxi neda'.

11 Rácua' larí' cá'asö ca run nu ribödxi yechi',
ate' tu'titaj neda'.

12 Ta'nnë' quia' yugu' la' nöza,
ate' nupa nazúdxigaca tul-la ca naca quia',

13 pero neda' ulidza' Li', Xan.

Bubí'i didza', Dios, cate' idxín dza raza ládxu'u Li'
tu' nadxi'iда'enu' neda',
en tu' guzxí' lu no'o usölö' neda'.

14 Guléaj neda' para cabí huötja' lu le naca ca guna'.
Ben ga ulá' lu ná'agaca nupa ta'díl-lalen neda',
en lu le naca ca nisa zila le chizóa ibaga' neda'.

15 Biti' gu'u lataj ibaga' neda' lë na'.

Biti' gu'u lataj uchicja' lu le naca ca nísado',
enca' cabí huötja' tu lu yeru ba.

16 Bubí'i didza', Xan, tu' nacu' dxí'i ladxi',
en tu' ruhuéchi' ládxu'u neda', gudá quia'.

17 Biti' ucachí' cuinu' lahua' neda', huen dxin quiu'.

¡Rö'a böniga! ¡Gudáchi gúcalen neda'!

18 ¡Gudá ga zoa' dusölö' neda'!

¡Ben ga ulá' lu ná'agaca nupa ta'díl-lalen neda'!

19 Nöz quézinu' Li' ca tu'didza' yudxi neda',
en ca tu'lidza ditaj neda', en tu'cá'ana neda' cá'asö.
Rilé'e quézinu' yúgu'të nupa biti' ta'lé'e neda' dxí'a.

20 Rudú ládx'a'a tu' tu'didza' yudxi neda', en biti' bi gaca guna'.
Gulöza' nu huéchi' ladxi' neda', pero cuntu nu guzóa.

Gú'unida' nu huë tsahui' neda', pero cuntu nu bidzöli.

21 Cate' guduna' bulu'gahuë' neda' tu le silá',
en cate' gubidxa' nisa, bulu'gui'jë' neda' nupe zi.

22 Ben ga huöáca laní quégacië' ca tu le sön légaquië',
en ben ga huöáca le tu'zi'ë xibé ca tu le gun ga ila'chixi ila'níguinë'.

23 Ben ga ichul-la guiöj lógaquië' para cabirö ila'lé'enë'.

Ben ga ila'zéchutica'sö кудзу'gaquië' zxan yua' nuá'gaquië'.

24 Busubaga' légaquië' lu yöl-la' rilé quiu',
en bë' quégacië' yöl-la' ridzá'a quiu'.

25 Ben ga cuntu nu soa ládzagaquië',
en ga bíti'rö nu soa lu yu'u lídxigaquië'.

²⁶ Ta'zóá régu'ë nupa na' benu' léguequi xiguiá'.
 Tu'siyönnë' ca ta'gu'i ta'zaca' nupa na' nunu' léguequi huë'.
²⁷ Buzúaj lu guichi yugu' dul-la' tunë',
 en biti' gu'u légaquië' lataj ila'déli'në' yöl-la' rusólá quiu'.
²⁸ Busulu lágaquië' nazúajgaca lu guichi quégaca nupa nabángaca.
 Biti' gu'u légaquië' lataj ila'bábalenë' nupa nátagaca tsahui'.
²⁹ Neda' rigui'i rizáca'a, en rudú ládxa'a.
 Guchisa neda', Dios, en busólá neda'.

³⁰ ¡Cu'a-në' yöl-la' ba Dios len tu le gul-la'!
 ¡Guna' Lë' zxön, en guía'-në': "Xclenu"!

³¹ Chaza ládxë'ë Xanru' Dios lë ni
 ca raza ládxë'ë-ba' böa'-bëdxí rútia'-ba' lahuë',
 o ca raza ládxë'ë-ba' tuba' bëdxí zxön chinagúlaba'.
³² Nupa ta'gu'i ta'zaca' ila'lé'eni lë ni, en ulu'dzeja.
 Ilá'dipa ládxí'gaca nupa tu'guilaj Dios.
³³ Ruzé nagüe' Xanru' Dios nupa ta'yadzaj ta'yudxi,
 en biti' ral-la ládxë'ë böñachi queë' nadzúngaca.

³⁴ ¡Guli'cu'ë yöl-la' ba Dios, libí'ili' yehua' yubá, en luyú ni,
 enca' nísado', en yúgu'të le nacuá' tu tu lataj na'!

³⁵ Usólá cazë' Dios böñachi Sión,
 en uchiseë' yugu' yödzö quégaca zxí'ini xi'soë' Judá.
 Ilá'cuá' böñachi queë' ga na', ate' guequi quéguequi luyú na'.
³⁶ Zxí'ini xi'soagaquië' huen xichinë' ila'zí'ibí' luyú na',
 ate' ila'cuá'tica'sö ni' nupa nadxí'igaca Lë'.

70

¹ ¡Busólá neda', Dios!
 ¡Gudáchí gácalenu' neda', Xan!
² Ben ga ulu'tu'i, en ila'bö' böñiga nupa na' té'ëni iluti neda'.
 Ben ga ulu'huécja, en ulu'gá'ana cá'asö nupa na' té'ëni gaca bi gaca quia'.
³ Ben ga ulu'huécja lu yöl-la' rutu'i quéguequi
 nupa na' tu'titaj neda', ta'nná: "Ja, ja."
⁴ Ben ga ulu'dzeja, en ulu'zí' xibö' yúgu'të nupa tu'guilaj Li'.
 Ben ga ilu'ítica'sö didza' nupa ta'dxi'i yöl-la' rusólá quiu', ila'nná:
 "¡Zxöntérö náquië' Dios!"

⁵ Neda' nacuídi'da', en biti' bi gaca guna'.
 ¡Gudáchí gácalenu' neda', Dios!
 Nacu' Nu rácalen neda', en Nu rusólá neda'.
 ¡Biti' ca' tsenu' guídu' quia', Xan!

71

¹ Nuzóá cazu' neda' dxi'a tsáhui'do' ga na' zu', Xan.
 ¡Biti' gu'u lataj utu'i ida'!
² ¡Tu' nacu' tsahui' gúcalen neda', en busólá neda'!
 ¡Buzé nagu' neda', en busólá neda'!
³ Nacu' le uzóá neda' tsutsu,

en le gun chi'i neda' ga gaca ucachi' cuina'.
 Chigunná bé'enu' nu usólá neda' tu' nacu' Nu ruzúa neda' tsutsu,
 en Nu run chi'i neda'.

4 Dios quia', busólá neda' lu na' nu ruá' dö',
 en lu na' nu ridá'baga' Li', en run dzatsa.

5 Tuzu' Li' runa' löza, Xan.

Ruzxöni ládxa'a Li' ga gudéla'té naca' bífido'.

6 Ruzxöni ládxa'a Li' ga gudéla'té gulja',
 tu' guzóalen cazu' neda' cate' ni' buzóanu xiná'a neda'.

¡Cú'utica'sa' Li' yöl-la' ba!

7 Zián nupa tu'bani ca naca quia',
 tu' run chi'i cazu' Li' neda'.

8 ¡Rigú'utica'sa' Li' yöl-la' ba,
 en tu dza tu dza rulu'a lahui yöl-la' ba quiu'!

9 ¡Biti' usán no'o neda' na'a, ni naca' bönni' gula!

¡Biti' ucá'anu' neda' na'a cate' ni rudú ládxa'a!

10 Tu'i didza' nupa biti' ta'lé'e neda' dxi'a ca gaca bi ilún quia',
 ate' tun tuz xtídza'gaca nupa tě'ëni iluti neda'.

11 Ta'nná: "¡Nusán në'ë Dios lë!"

¡Guli'dá sönrü'-në' tu' cuntu nu zoa gácalen lë'!"

12 ¡Dios, biti' su' zi'tu' ga ni zoa'!

¡Dios quia', gudáchi gácalenu' neda'!

13 Ben ga ulu'tui'i, en ila'niti nupa tě'ëni iluti neda'.

Ben ga ulu'tui'inë', en ila'bö'ë böñiga bönni' tě'ëñë' ilu'ë dö' quia'.

14 ¡Neda' góntica'sa' löza Li',
 en cú'utica'sa' Li' yöl-la' ba!

15 Idú dza usiyönda' böñachi nacu' tsahui',
 en rusóló' yúgu'té böñachi.
 Biti' nözda' bal-laxi luzuí busóló' neda'.

16 ¡Gu'a didza' ca nágagaca le zxön benu' Li', Xana' Dios!

¡Usiyönda' böñachi tuzu' Li' nacu' tsahui'!

17 Dios, rusédinu' neda' ga gudéla'té ni' naca' bífido',
 ate' ga ridxitné na'a dza ruá'a didza' ca nágagaca le zxön nunu'.

18 Na'a naca' bönni' gula, en chinagucha'.

¡Biti' usán no'o neda', Dios!

Benna neda' lataj usiyönda' yugu' zxí'ini xsoa' ca naca yöl-la' huáca quiu',
 ate' quíxjöi'ida' nupa ilalaj ca naca yöl-la' nál-la quiu'.

19 ¡Le tsahui' nacu', Dios, ridxitné lúzxiba!
 ¡Nunu' Li' yugu' le zxöntérö!

¡Cúnturö nu zoa nu naca ca nacu' Li', Dios!

20 Gusól-la' cazu' quia' yugu' le guca quia' le gulún neda' zi',
 pero ruúnu' neda' tsutsu,
 en le yúbölö uchisu' neda' para cabí gátia'.

21 Gunu' ga tsépisea',
 en huë tsahú'u neda' le yúbölö.

22 ¡Le nácatë cu'a Li' yöl-la' ba, en gul-la' tu bihuël-la, Dios!
 ¡Gul-la' ca runu' ca rnno', en nacu' Nu naca lá'ayi lógaca böñachi Israel!
23 ¡Lu yöl-la' rudzeja quia' códxi'a cate' gul-la' quiu',
 en idú ládxa'a gul-la' tu' busölo' neda'!
24 ¡Idú dza gu'a didza' ca nacu' tsahui'!
 ¡Tu'tu'i, en ta'bö' bagu'i nupa gulë'ëni iluá' dö' quia'!

72

- 1** Dios, buzéajni'inë' bönni' rinná bë'ë
 para gaca uchi'a usöröë' ca ruchi'a rusöröu' Li'.
 Ben ga ilácagacabi' tsahui' zxí'inë' ca nacu' Li' tsahui'.
- 2** Bë'ë lataj uchi'a usöröë' quégaca böñachi quiu' ca naca le naca tsahui',
 enca' quégaca böñachi quiu' ta'guí'i ta'zaca'.
- 3** Ben ga ila'cuá' dxi'a tsáhui'do' böñachi quiu' yugu' lu guí'a,
 en ilácagaca tsahui' yugu' lu guí'ado'.
- 4** Bë'ë lataj ubéajë' tsahui' nupa ta'guí'i ta'zaca' ladaj böñachi quiu',
 en usölë' yugu' zxí'inigaca nupa ta'yadzaj ta'yudxi,
 en ucul-lë' nu ribía no léguequi.
- 5** Ben ga iladxi böñachi quiu' Li' tsanni ni' soa gubidza,
 enca' tsanni ni' soa beo' ga idxintë dza udxi.
- 6** Ben ga gáquië' bönni' rinná bë'ë ca nisa guiöj ribixi lu guíxi'do',
 en ca yugu' guiöj gúpa'do' tu'subisa luyú.
- 7** Ben ga gaca dxi'a quégaca nupa nácgaca dxi'a yugu' dza inná bë'ë lë',
 en ila'cuá' dxi'a tsáhui'do' ga idxintë bíti'rö soa beo'.
- 8** Ben ga inná bë'ë idapa la'a yödzölio,
 ga naguela' ra' yegu Eufrates ga idxintë idútë luyú.
- 9** Ben ga ulu'zechu zxíbigaca lahuë' lë' nupa nacuá' luyú bidxi,
 en iladxi lë' nupa ta'díl-lalen lë'.
- 10** Ben ga ila'dxinë' lahuë' bönni' ta'nná bë'ë luyú Tarsis en yugu' lu yödzö,
 nuá'gaquië' yugu' le ulu'nödzjë' queë'.
 Bönni' ta'nná bë'ë luyú Sabá, en luyú Seba ilá'dxinë' bi ulu'nödzjë' queë'.
- 11** Ben ga ulu'zechu zxíbigaquië' lahuë' yúgu'te bönni' ta'nná bë'ë,
 en ilúngaca xichinë' böñachi yúgu'te yödzö.
- 12** Usölë' nu riyadzaj riyudxi cate' ulidza lë',
 enca' nu rigu'i rizaca', en nu biti' zoa nu gácalen nu na'.
- 13** Huéchi' lädxë'ë nupa nácgaca yechi', en nupa ta'yadzaj ta'yudxi,
 en gun chi'ë yöl-la' na'bán quégaca nupa nácgaca yechi'.
- 14** Usölë' léguequi lu ná'agaca nupa tun léguequi zi',
 en lu ná'agaca nupa tuá' dö',
 en güí'i ládxë'ë léguequi cate' nu gué'ëni guti léguequi.
- 15** Soë' ibanë', ate' iluá'gaca böñachi queë' oro que lu xiyúgaca böñachi Sabá.
 Ben ga ulu'lidza Dios böñachi, ila'nábitica'sö Li' gácalenu' lë'.
 Ben ga ulu'lidza lë' dxi'a tsáhui'do' idú dza.
- 16** Ben ga unödzjada' zxoa' luyú queë', enca' yugu' lu guí'ado',
 le unödzaj yödxí yana' xiyüë' ca run guí'a Líbano.
 Ben ga ila'yán nupa nacuá' ladzë' ca rö'ö guíxi'do' lu xiyüë'.
- 17** Ben ga tsöjnégaca le lë' ga idxintë dza udxi.
 Ben ga gaca yöl-la' ba que lë' tsanni ni' soa gubidza.
 Ben ga ila'nabi böñachi Li' yúgu'te yödzö

gunu' ga gaca dxi'a quéguequi ca benu' queë' lë'.
Ben ga ila'gú'u lë' yöl-la' ba böñachi yúgu'të yödzö.

18 ¡Yöl-la' ba Xanru' Dios, Dios quégaca böñachi Israel!
¡Tuzë' Lë' runë' le túngaca ga rubániru'!

19 ¡Yöl-la' ba Lë' le naca lachi ga idxintë dza udxi!
¡Rizë ládxí'rú' ilí idútë yödzölió le naca bení' queë'!

¡Ca' gaca! ¡Ön, ca' gaca!

20 Chibudxi le rinábida'-në' Dios neda', David, zxí'inë' Isaí.

73

1 Le nácatë runë' Dios ga raca dxi'a quégaca böñachi Israel,
nupa na' naca dxi'a tsahui' ládxí'do'guequi.

2 Ia'láti'sö guchixi guníguida'.

Ia'láti'sö tsöjdöda' tsölä' alö,

3 tu' buzxé'eda' nupa tun ba zxön cuínguequi,
en tu' dëda' yöl-la' tsahui' quégaca nupa tuá' dö'.

4 Biti' ca' téquinë' zi' bönni' tu'ë dö' na'.

Nácagaquïë' tsutsu, en nacu'ë dxi'a.

5 Biti' ta'gui'i ta'záquë'ë ca ta'gui'i ta'zaca' ia'zíca'rö böñachi.
Biti' ca' raca quégagaquïë' ca raca quégaca böñachi yúbölö.

6 Naca yöl-la' run ba zxön cuini quégagaquïë'
ca tu le néquini oro dxía ícagaquïë'.

Yöl-la' rutsatsa quégagaquïë' naca ca zxágaquïë' nácagaquïë'.

7 Tu'zi'ë xibé le ta'dödi bë'ë të'aj tahuë',
en ta'zá' ládxí'gaquïë' quégaca le zián le ila'déli'në'.

8 Tu'titjé' ia'zíca'rö böñachi,
en tu'ë didza' lu yöl-la' run ba zxön cuini quégagaquïë'.

Tun ba zxön cuíngagaquïë',
en të'ënë' ila'bía nahuë' ia'zíca'rö böñachi.

9 Ta'nnë' queë' Dios zoë' yehua' yubá,
en tu'didza' yudxë' nupa nacuá' yödzölió.

10 Que lë ni na' ta'dá' böñachi queë' Dios légaquïë',
en ta'yéajlé' didza' tu'ë.

11 Ta'nnë': "Biti' ca' nözinë' Dios,
en biti' ilé'e lë ni Nu na' zoa xitsá'alö."

12 Caní nácagaca nupa tuá' dö'.

Dëda' yöl-la' tsahui' quéguequi, en ta'zí'tica'sö ia'lati'.

13 ¿Naru' nítisö ben chi'i cuina' para gaca' dxi'a
en para cabí ibága'a dul-la'?

14 Dios, benu' ga gudi'i guzxáca'a idú dza.
Yugu' zila benu' neda' zi'.

15 La'tu' bë'a didza' ca nácagaca lë ni
guzzí' yé'eda' böñachi quiu'.

16 Que lë ni na' bë' ládx'a'a tséajní'ida' lë ni,
sal-la' gúcada' böñiga

17 ga bidxitë dza guyu'a yudo' quiu'

en guyéajni'ida' ca gaca quégaca nupa tuá' dö'.

¹⁸ Le nácatë nuzú' láguequi ga ta'chixi ta'nigui,
en runu' ga ila'niti tsaz.

¹⁹ La' ila'nítitë,
en ila'yaza ga udxi quéguequi.

²⁰ Nácagaca ca tu le rinetu' yëla le ridödi que cate' ritö yu.
Cate' chasu', Xan, la' udöditeu' láguequi tsölä'alö.

²¹ Cate' yöjdín icja' le nácagaca ca tu le silá',
en guzá' ládx'a yugu' le gúquida' zi',

²² guca' tu' canöz, en biti' bi guyéajni'ida'.
Guca' ca tuba' böa' guixi' lo' Li'.

²³ Zóatíca'sa' lo' Li',
ate' rizón cazu' neda'.

²⁴ Rigú'u yöl-lu'u neda' le rugú'u neda' nöza quiu',
en ga úxitë uzi'u neda', en gunu' neda' bal.

²⁵ ¿Núzxirö zoa yehua' yubá nu gácalen neda'?
¡Tuzu' Li'!

Tu' rácalenu' neda' cínturö nu zoa yödzölió nu riquinda'.

²⁶ Ricuidi' le naca', en rudú ládx'a'a.

Le ruzoá tsutsu ládx'i'da'ahua',
en le ruzi'tica'sa' xibé naca cazu' Li', Xan.

²⁷ Le nácatë ila'niti nupa tu'cá'ana Li'.

Usunítiu' yúgu'të nupa tu'zóa Li' tsölä'alö.

²⁸ Raca dxi'a quia' cate' ribiga' ga zu' Li', Dios.

¡Naca cazu' Li', Xana' Dios, Nu run chi'i neda'
para ulu'a lahui yúgu'të le nun cazu'!

74

¹ Dios, ¿naru' tsaz nusán ládx'u netu'?

¿Riléde'enu' netu', bö'cu' zxila' queë cazu'?

² Yöjné netu', bönachi tu'dubi quiu', nupa böá'u cazu' dza ni'te,
nupa böá'u cazu' para gácatu' bönachi queë cazu'.

Yöjné guí'a Sión, ga ni guzóá cazu' Li'.

³ Gudá tödu' ga ni naguínnajdérö yödzö lá'ayi quiu'.

Bulu'sunítidérö nupa gula'dá'baga' Li'
yúgu'të le gula'cuá' lataj lá'ayi quiu'.

⁴ Tu'tsatsa nupa na' gula'dá'baga' Li'
idú gásibi'ilö ga ni budúbitu' quiu'.

Nucuá'gaquië' ni le naca bë'gaca
nuxícjagaquië' yödzö lá'ayi quiu'.

⁵ Nalá' lahui yödzö ni ca nalá' tu guí'a cate' nu gulú'u le bidín,
en nurixi nu na' yugu' yaga gula'cuá' lu guí'a na'.

⁶ Bulu'zxuzxje' le nácagaca lachi lu yödzö ni
len yugu' guíë huága quégaquië', en yugu' yaga zidzaj.

⁷ Bulu'zégui'ë idútë lataj lá'ayi quiu'.

Nucá'anagaquië' cá'asö lataj ga benru' bal Lo'.

⁸ Lu icja ládx'i'do'gaquië' gula'né': "Nuxícjadérötu' bönachi ni."
Idútë lu xiyyutu' bulu'zégui'ë yúgu'të yu'u ga na' budúbitu' lo'.

9 Bíti'rö caz rilé'etu' yugu' le bulu'subán láxi'tu' gulísatu' lu xiyutu'.
Bíti'rö zoa nu bönni' ru'ë didza' uláz quiu'.

Bíti'rö zóalen netu' nu bönni' nözinë' gáca'xte caz gaca caní queëtu'.

10 Dios, ¿gáca'xte caz ulu'lidza ditaj netu' nupa ta'dí-lalen netu'?

¿Gáca'xte caz ulu'cá'ana ditaj Lo' nupa ta'dá'baga' Li'?

11 ¿Naru' cabí gácalenu' netu'?

¿Bixz que nucáchu'u yöl-la' huáca zxön quiu'?

12 Rinná be'e quézinu' netu' Li', Dios, dza ni'te quez,
en rusólá cazu' bönachi idúte yödzölió.

13 Len yöl-la' huáca zxön quiu' bubéaj cazu' choplö nísado'.

Gulá'a cazu' ícjagacaba' böa' zxön nacuá'aba' nísado'.

14 Bzxuzxja cazu' ícjagacaba' böa' sínia' lëba' Leviatán.

Ben cazu' ga guláguba' yugu' böa' guixi' xipëla'ba' böa' sínia' na'.

15 Gusalaj cazu' yugu' beaj nisa, en gapa rálajda' nisa.

Busubidxi cazu' yugu' yegu nisa gula'yúdzutica'sö nisa.

16 Nequi queë cazu' lahui' dza, en nequi ca' quiu' chi'i dzö'ölö.

Ben cazu' Li' bení', enca' gubidza.

17 Naguixaj cazu' Li' yúgu'të buzá' nacuá' yödzölió.

Nun cazu' Li' beo' la, en beo' ziaga.

18 Yöjné lé ni, Dios. Nupa ta'dá'baga' Li' nucá'anagaca ditaj Lo',
ate' nupa nácagaca canöz nucá'anagaca cá'asö Lo'.

19 Biti' usán no'o nupa nadxi'nu' lu ná'agaca nupa nácagaca ca yugu' böa'
guixi' sínia'.

Biti' gal-la ládxu'u tsaz nupa néquiguequi quiu', en ta'guí'i ta'zaca'.

20 Yöjné didza' dzaga na' núnlenu' netu',
tu' nacuá' nupa tuti bönachi gapa naca chul-la lu xiyutu'.

21 Biti' gu'u lataj ulu'gó'ana cá'asö nupa nácagaca bayechi'.

Ben ga ila'gó'u Li' yöl-la' ba nupa ta'guí'i ta'zaca', en ta'yadzaj ta'yudxi.

22 ¡Guyasa, Dios, en ben ca rnna xtídzu'!

¡Ruzé nagu' ca rulidza ditjé' Li' bönni' canöz idú dza!

23 Biti' gal-la ládxu'u didza' zi' tu'i nupa ta'dá'baga' Li'.

Yöl-la' dzatsa tun nupa tu'cá'ana Li' cá'asö riyöntica'sö.

75

1 ¡Rétu' Li': "Xclenu', Dios"!

¡Rétu' Li': "Xclenu'",

tu' zóatica'su' gal-la' ga zóatu'!

¡Tu'i didza' bönachi ca nácagaca le zxön nunu'!

2 Rnné' Dios: "Nuzóa' dza cate' uchi'a usöröa' bönachi.
Uchi'a usörö caza' léguequi ca naca le nácatë.

3 Tu'suniti yödzölió, en nupa nacuá' ni',
pero tsaz nuzóa caza' le."

4 Gudxa' nupa tun ba zxön cuínguequi, gunnía': "Biti' gun ba zxön cuinli",
en gudxa' nupa tuá' dö': "Biti' hué tsahui' cuinli".

5 Biti' hué tsahui' cuinli',
en biti' güí'ilí didza' lu yöl-la' run ba zxön cuinli'."

6 Caléga ga rilén gubidza, en caléga ga ribía gubidza,

en caléga la' guixi' ga dë lataj irúaj le huë tsahui' böñachi,
⁷ pero uchi'a usörö' cazë' Dios böñachi.
 Uzötjë' tuë' bönni', en uchisë' ia'tué'.
⁸ Nuá' caze' Xanru' lu né'ë tu zxiga' yudzu xisa le ribía lubá uva le ribixi rilëbi.
 Chinugútsi'déré' le, ate' rigu'ë le para ilë'aj le nupa tuá' dö' yödzölió ni,
 ate' ilé'jadérö le silá' que'.
⁹ Neda' usiyóntica'sa' böñachi lë ni,
 en gul-la' yöl-la' ba queë' Dios queë' Jacob.
¹⁰ Ugüë' yöl-la' unná bë' quégaca nupa tuá' dö'.
 Quíxjë' tsaz yöl-la' unná bë' quégaca nupa nácagaca tsahui'.

76

¹ Zxi'ini xi'sóë' Judá núnbë'gaquië' Dios.
 Nayépisë le lë' ladaj böñachi Israel.
² Zoa caz lataj lá'ayi queë' lu yödzö Jerusalen,
 ate' nazí'i le Sión lataj ga na' zoa cazë'.
³ Ni' guditsjë' yugu' yaga lahui tuchi' zoa guí' láhuiguequi,
 enca' yugu' guië la, en yugu' le ta'díl-lalen böñachi lu gudil-la.
⁴ ¡Yöl-la' ba Li', Dios!
 ¡Nayépisétetu' ca yugu' guí'a zxön!

⁵ Buxicju' bönni' nál-lagaquië'.
 Gudödi yëla guiöj lógaquië' bönni' rójáquië' gudil-la,
 en biti' guca ila'chisa ná'agaquië'.
⁶ Cate' Li', Dios queë' Jacob, gudíl-lalen cazu' légaquië'
 gulátiba' böa', ate' gulati ca' nupa dxíagaca légacaba'.
⁷ Li' caz ral-la' gádxitu',
 tu' cabí gaca nu soa lo' cate' ilenu'.
⁸ Ga zu' Li' yehua' yubá gunnó' uchi'a usöröu' böñachi.

Ní'irö guladxi nupa nacuá' lu yu, en gula'cuá' dxisö,
⁹ cate' guzuínë' Dios para uchi'a usöröö' quégaca böñachi,
 para usölë' nupa nácagaca nöxaj ladxi' yödzölió ni.
¹⁰ Sal-la' ta'léde' böñachi, gaca yöl-la' ba queë' Lë'.
 Uzi'ë xibégaca nupa ulu'gá'ana ládjaguequi.
¹¹ Guli'sí' lu ná'ali' bi gunli' lahuë' Xanru' Dios,
 en guligún ca na' innali'.
 Yúgu'të nupa nacuá' ga na' zoë' ral-la' bi ulu'nödzaj queë',
 tu' náquië' Nu ral-la' gádxiru'.
¹² Ubéaj cazë' bö' nácagaca caz nupa nadéli'gaca lataj lo.
 Bönni' ta'nná bë'ë luyú ni tádxinë' Lë'.

77

¹ Rulidza'-në' Dios, en ruá'a zidzaj didza'.
 Rulidza'-në' Dios, ate' riyyönne' chí'a.
² Cate' bi guca quia' bulidza'-në' Dios.
 Chi'i dzö' ölö guchisa na'a lahuë', en biti' busana' rulidza'-në'.
 Biti' guca nu huë tsahui' neda'.
³ Cate' röjneda'-në' Dios, rö'a böñiga.

Cate' rinně ládxa'a, ní'irö rudú ládxa'a.

⁴ Bubéaj cazu' yëla guiöj lahua'.

Tu' ribö'a böniga biti' gaca gu'a didza'.

⁵ Chiguzá' ládxa'a ca guca dza ni'te,

ca guca yugu' iz chigula'dödi.

⁶ Tsöjneda' le bulá' chi'i dzö'ölö,

en tsöjsá' ládxa'a ca naca que, ate' rinábini cuina':

⁷ ¿Naru' tsaz nusán Xanru' neda'?

¿Naru' cabirö uzá' ládxé'ë quia'?

⁸ ¿Naru' cabirö gáquië' dxi'i ladxi'?

¿Naru' cabirö tsöjenenë' le guzxi' lu në'ë gunë'?

⁹ ¿Naru' nál-la ládxé'ë Dios tu' cabirö ruzá' ládxé'ë queëru'?

¿Naru' biti'rö huéchi' ládxé'ë rë'u tu' rilenë'?

¹⁰ Ní'irö gudxi cuina': Raca caní quia' tu' risëbida' ládxa'a,

en que lë ni na' réquida' nadzä' yöl-la' unná bë' queë' Dios nayépisë'.

¹¹ Tsöjneda' yugu' le nun cazu' Li', Xantu'.

Tsöjneda' yugu' yöl-la' huáca benu' dza ni'te.

¹² Sa' ládxa'a ca nácagaca le nunu',

en cuéqui icja' ca nácagaca le runu'.

¹³ Naca lá'ayi ca run cazu' Li', Dios.

Cúnturö nu zoa naca dios ca nacu' Li', Dios queëtu'.

¹⁴ Naca cazu' Li' Dios, runu' yugu' yöl-la' huáca zxön.

Bulú'u lahui yöl-la' huáca quiu' lögaca bönachi yúgu'të yödzö.

¹⁵ Len yöl-la' huáca zxön quiu' busölö' bönachi quiu',

nupa nácagaca zxí'ini xi'sóagaquie' Jacob, en José.

¹⁶ Bila'lé'e yugu' nísado' Li', Dios.

Bila'lé'e yugu' nísado' Li', en gula'bö' böniga.

Gula'zxízilë e yugu' nísado'.

¹⁷ Bulu'lalaj böaj lúzxiba nisa.

Lúzxiba xitsá' gunnëda' guziú'.

Guyépi yösa ca yugu' yaga lahui tuchi'.

¹⁸ Lu bö' budunu' biyón guziú' quiu' gunnëda'.

Yösa gula'yëpi bulu'zeni' luyú.

Gudödida' budö' zxu', en guzxizi luyú.

¹⁹ Bilá' lahui nöza quiu' gatsaj láhui'lö nísado',

ate' guzoa nöza ga gudödu' gatsaj láhui'lö nisa zila.

Biti' nalá' lahui na'a ga na' bulibu'.

²⁰ Guchë' cazu' bönachi quiu' ca runë' bönni' richë'ë-ba' bö'cu' zxila' huë'ënido'.

Guchë'u léguequi lu ná'agaquie' Moisés, en Aarón.

78

¹ Buli'zë nágali' le uzéajni'ida' libíili', bönachi quia'.

Buli'zë nágali' didza' gu'a.

² Usalja' ruá'a, en ucúdzu'a didza'.

Gu'a didza' tu le nagachi' dza ni'te quez,

³ tu didza' chibiyönru', en núnbe'ëru',

le gulë' xuz xtó'oru' rë'u.

4 Biti' ucáchi'ru' didza' na' lógacabi' zxí'iniru'.
 Usiyónru' yugu' zxí'ini xi'sóaru' yöl-la' ba queé' Xanru',
 ca naca yöl-la' huáca queé', en yugu' le zxön bené'.
5 Gudixjé' tu didza' naca bë' queé' Jacob,
 en nuzoé' le rinná bë'qué gacabi bönachi Israel,
 le gunná bë'ené' yugu' xuz xtó'oru'.
 Ulu'zéajni'iné' zxí'inigaquié' ca naca,
6 para ilúnbë'gacabi' le, bi'i si' zá'gacabi', enca' bi'i si' iláljabí',
 para ulu'lui'ibi' ca' zxí'inigacabi' ca naca lë na' gunná bë'ë Dios.
7 Ulu'zxöni ládxí'gacabi' Dios,
 en biti' gal-la ládxí'gacabi' yugu' le nuné' Dios.
 Ilunbi' ca nácacaga le gunná bë'ë,
8 en biti' ilácagacabi' ca guláquié' xuz xtó'ogacabi'.
 Guláquié' zidzaj ladxi' tu' gula'dá'baguë'ë xtídzé'ë Dios,
 en biti' guláquié' nönxaj ladxi',
 ate' lu icja ládxí'do'gaquié' biti' gula'yéajlë'ë Dios.
9 Yugu' zxí'ini xi'sóé' Efraín guluá'gaquié' yaga uxiti',
 pero bulu'zxúnnajé' lu gudil-la.
10 Biti' gula'dá'gaquié' didza' dzaga Dios bénlenë' légaquié',
 en biti' guluné' ca naca le gunná bë'ené' légaquié'.
11 Gulal-la ládxí'gaquié' yugu' le bené' Dios,
 en yugu' yöl-la' huáca zxön bené' lógaquié'.
12 Bené' Dios le gulún ga bulu'bániné' xuz xtó'ogaquié'
 luyú Egipto, en luyú Zoán.
13 Gusaljé' nísado', en bené' ga gula'dödë' gatsaj láhui'lö nísado' na'.
 Bené' ga guca nísado' na' ca yugu' gui'ado' tsöla'a huéaj.
14 Bulu' iné' légaquié' nöza lahu'i' dza, buguné' dxin tu böaj,
 ate' chi'i dzö'ölö buguné' dxin tu böaj ruzen' ca gui'.
15 Bulë'ë tu guiój ga naca la' guixi' ga dë lataj,
 en bë'ë le gulë'ajé' le guca ca tu nísado'.
16 Gulë'ajé' nisa yegu le gulén lu guiójto'o.
 Bené' ga birúaj nisa ca tu yegu zxön lu guiójto'o na'.
17 La' ní'isö guluné' dul-la' lahuë' Lë',
 en gula'dá'baguë'ë Dios nayépisétérë' la' guixi' na'.
18 Lu icja ládxí'do'gaquié' gula'zí' bë'ë Dios quégäquié',
 cate' gula'nábiné' Lë' ugahuë' légaquié' ca gula'zësö ládxí'gaquié'.
19 Ni'irö gula'nné' queé' Dios, gula'nné':
 "¿Naru' huáca cu'ë Dios le gáguru' la' guixi' ni ga dë lataj?
20 Buli'yútsöca', bë'ë guiójto'o, ate' birúajda' nisa,
 le guca ca nisa yegu gubó'o zxön.
 ¿Naru' huáca gunné' ca' queéru' yótá gáguru'?"
 ¿Naru' gaca ugahuë' bönachi queé' le naca bëla'?"
21 Biyönné' Xanru' Dios didza' ni, en guléde'ené',
 ate' gulén tu gui' le buzegui zián zxí'ini xi'sóë' Jacob,
 tu' guléde'ené' bönachi Israel,
22 tu' cabí gula'yéajlë'ë Dios,
 en biti' bulu'zxöni ládxí'gaquié' Lë' usölë' légaquié'.
23 Gunná bë'ené' Lë' yugu' böaj lúzxiba,
 en gusaljé' yehua' yubá.

24 Gusöl-lë'ë yöta maná le ilahuë',

en bugahuë' légaquië' la' huagu que yehua' yubá.

25 Gulahuë' bönni' ni' yöta tahuë' gubáz que yehua' yubá.
Gusöl-lë'ë guizxi yu lë ilahuë'.

26 Benë' ga guyecja bö' birúaj ga rilén gubidza,
ate' len yöl-la' huáca queë' gunná bë'enë' bö' recja
le birúaj tsolá'alö ga ridödi gubidza beo' ziaga.

27 Benë' ga böxaj bëla' ca bëchtö yu ládjälö ga na' nacu'ë,
le naca böa' zoa xiligacaba' gurö'öba' ca yuzxi dë tu ra' yegu zxön.

28 Benë' ga böxjagacaba' gatsaj láhui'lö ga na' nacu'ë,
en ládjagaca yugu' yu'u guídido' quégaquië'.

29 Ca' guca, gulahuë', en bulu'huölaj gula'dzé'enë',
tu' bë'ë quégaquië' le gula'zösö ládx'i'gaquië'.

30 Zí'alö ca budxi bulu'huölaj gula'dzé'enë',
tsanni ni' yu'u ruá'agaquië' le tahuë',

31 gulénë' Dios légaquië',
en bëtië' bál-lagaquië', bönni' nál-latérögaquië' ládjagaquië',
en bucul-lë' bönni' Israel nayépisëtérögaquië'.

32 Sal-la' guca caní, gulunré' dul-la',
en biti' gula'yéajlë'ë Lë' ni'a quégaca le zxön benë'.

33 Que lë ni na' benë' ga böáca nítisö dxin guluné',
ate' lu yöl-la' radxi gula'zóë' yugu' lu iz quégaquië'.

34 Cate' bëtië' ziángaquië', ni'irö bulu'lidzë' Lë'.

Bulu'bí'i ládx'i'gaquië', en yöjtá'gaquië' Dios.

35 Ní'irö yöjnéguequinë' náquië' Dios Nu run chi'i légaquië',
en náquië' Dios nayépisëtérögaquië'.

36 Gula'zí' ye'enë' Lë' len didza' gulu'ë,
tu' gulu'ë diza' biti' nácatë lahuë' Lë' len ruá'agaquië'.

37 Biti' gudá'gaquië' Lë' idú ládx'i'gaquië',
en biti' gulunë' ca rnna didza' dzaga na' bénlenë' légaquië'.

38 Tu' buéchi' ládx'é'ë Dios légaquië',
buniti lahuë' ca naca xigüa' gulunë', en biti' busunítië' légaquië'.

Bubequi lahuë' quégaquië', en bítí'rö gulénë' légaquië',
en biti' benë' ca sa'yéaj yöl-la' ridz'á' queë'.

39 Ca' guca, yöjenenë' nácagaquië' böñachisö.

Nácagaquië' ca tu bö' recja le ridödisö, en biti' rudxín.

40 Zián luzuí gula'dá'baguë'ë Lë' ga na' naca la' guixi',
en bulu'suhuí'inë' Lë' lu yu bidxi na'.

41 Zián luzuí gula'zí' bë'ë Dios,
en gulunë' zí' Dios Lá'ayi quégaca böñachi Israel.

42 Biti' yöjnéguequinë' yöl-la' huáca zxön queë',
le bulu'e lahui dza ni' böá'uë' légaquië'

lu ná'agaca nupa biti' bila'lé'e légaquië' dxi'a,

43 cate' ni' benë' le gulaca bë' luyú Egipto,
en benë' yugu' yöl-la' huáca queë' luyú Zoán,

44 cate' benë' ga böáca nisa rön yugu' lu yegu luyú Egipto,
enca' nisa yugu' lu beaj quégaquië' para cabí guca ilë'ajë' le.

45 Gusöl-lë'ë ládjagaquië' bötsugayu guizxi yu,
böa' gula'guídxiba' légaquië'.

Gusöl-lë'ë ca' riu bulu'sunítiba' le nequi quégaquië'.

46 Budödë' le naz nuzóagaquië' lu ruá'agacaba' böchi' zu,

ate' guláguba' böchi' zu na' le rö'ö yugu' la' yëla quégaquië'.

47 Busunitié' yugu' lubá uva quégaquië' len nisa guiój yöla sunna na',
en busunitié' yugu' yaga higo quégaquië' len bögui'.

48 Bëtië'-ba' böa'-bëdxi quégaquië' len nisa guiój yöla sunna na',
en lu yösa gula'yëpi.

49 Lu yöl-la' rilé queëë gusöl-lë'ë quégaquië' yugu' lë ni,
en lu yöl-la' ridzá'a queëë busaca' zi'ë légaquië',

en gusöl-lë'ë quégaquië' gubáz que yehua' yubá para bulu'sunítie' légaquië'.

50 Biti' bubequi lahuë' quégaquië' para cabirö lenë' légaquië',
en biti' buniti lahuë' légaquië' para cabí llátie'.

Budödë' légaquië' lu yöl-la' guti,

51 en bëtië' yúgu'tëbi' bi'i bönni' lo quégaquië' bönni' Egípto,
yugu' bi'i bönni' lo quégaquië' zxí'ini xi'soë' Ham.

52 Guchë'ë bönachi queëë ca yugu' bö'cu' zxíla'do',
en bulu'i'ne' légaquië' nöza la' guixi' ga dë lataj.

53 Guchë'ë légaquië' lu në'ë para cabí bi iládxinë',
pero gubaga' nísado' nupa biti' bila'lé'e légaquië' dxí'a.

54 Ca' guca, guchë'ë légaquië' ga zoa luyú lá'ayi queëë',
luyú ni bidéli'ne' uláz quégaquië' len yöl-la' huáca queëë'.

55 Bulágui'ë bönachi izá'a luyú ni lógaca bönachi queëë',
en burixë' que queëgaquië' xiyúgaquië' ga ila'cu'ë,
en benë' ga gula'cu'ë bönachi Israel yugu' lu yu'u guídido'.

56 Le yúbólö gula'zí' bë'ë Lë', en gula'dá'baguë'ë Dios nayëpisëtërë',
en biti' gulunë' yugu' le gunná bé'enë' légaquië'.

57 Bulu'huöa ládx'i'gaquië', en bulu'cá'ané' Lë' ca gulunë' xuz xtó'gaquië'.
Gula'dödë' tsölä'alö ca run tu yaga lahui tuchi' biti' nácatë li.

58 Gulún lenë' Lë' tu' gulunë' xilátjagaca budó' guiój budó' yaga yugu' lu guí'a,
en gulunë' ga budúl'i'ne' légaquië' ni'a quégaca budó' na'.

59 Cate' bilé'enë' lë ni Dios, guléde'enë',
en budí'inë' bönachi Israel.

60 Ni'irö bucá'anë' xilatjë' lu yödzö Siló,

ga na' guzóa yu'u lá ayi queëë' lágjagaquië' bönni' ni'.

61 Bë'ë lataj gula'chë'ë bönni' zi'tu' guí'ina lá'ayi queëë',
guí'ina na' bulu'i' lahui yöl-la' zxön queëë'.

62 Budödë' bönachi queëë' lu ná'agaca nupa bëtigaca léguequi,

63 en gúquinë' zi' nupa nácapaca quez queëë'.

Buzegui tu guí' zxön yugu' bi'i bönni' quégaquië',
ate' cuntu nu bugá'ana nu ulu'tsaga na'lenbi' yugu' bi'i nigula ra'bando'.

64 Yugu' bixúz quégaquië' gulatië' lu guí'e tuchi',
ate' biti' guca ila'bödxinu nigula uzébi quégaquië'.

65 Ni'irö gúquië' Xanru' ca tu bönni' rubanë' lu yöl-la' rasi.

Gúquië' ca bönni' rejë' gudil-la gudödi bë'ë gu'ë xisi lubá uva nál-la.

66 Bulágui'ë yugu' bönni' gula'dí'lalenë' bönachi queëë',
en tsálido'os burixë' légaquië'.

67 Lësca' budödë' tsölä'alö yugu' zxí'ini xi'soë' José,
en biti' guröë' yugu' zxí'ini xi'soë' Efraín.

68 Guröë' yugu' zxí'ini xi'soë' Judá,

en yödzö Sión le nadxi'i quézinë' Lë'.

⁶⁹ Ni' benë' tu lataj lá'ayi queë' le naca ca tu guí'a zxön,
le zoa tsutsu ca yödzölió ni nuzóë' tsaz.

⁷⁰ Guröë' ca' David, huen dxin queë',
en bubéajë' lë' ga na' zoë' ruyúë'-ba' yugu' bö'cu' zxila'do'.

⁷¹ Bubéajë' lë' ga na' rapa chi'ë'-ba' yugu' bö'cu' zxila' guná',
nacuá'aba' bö'a huë'ënido' quégacaba',
para gáquië' nu uyú bönachi queë', yugu' zxí'ini xi'sóë' Jacob,
en bönachi Israel, nupa na' nácagaca quez queë'.

⁷² Ca' guca, idú ládxë'ë buyúë' David bönachi na',
en lu yöl-la' rácada' queë' guchë'ë légaquië' lu né'ë.

79

¹ Dios, nacuá' bönachi izá'a lu xiyúgaca bönachi quiu'.

Nucá'anagaca cá'asö yudo' lá'ayi quiu',
en nusunítigaca yödzö Jerusalén.

² Bulu'ca'anë' bönachi quiu' nátigaca luyú para iláguba' bíchulab léguequi,
en bëla' rön quégaca huen xichinu' ga iláguba' bö'a guixi' le.

³ Bulu'laljë' xichöngaca bönachi quiu' ca nisa idútë lu yödzö Jerusalén,
ate' cuntu nu bugá ana nu ucache' léguequi.

⁴ Bönachi yugu' dzaga luyú queëtu' tu'titaj netu'.
Tu'zzidxe', en tu'didza' yudxi netu'.

⁵ ¿Naru' tsaz ilenu' netu', Xan?

¿Naru' sóatica'sö yöl-la' rilé quiu' ca tu guí' ruzegui netu'?

⁶ Gulégaca bönachi yugu' yödzö zi'tu' biti' tun Li' bal,
enca' bönachi biti' tu'lidza Li'.

⁷ Bétingaca bönachi quiu' nácagaca zxí'ini xi'sóë' Jacob,
en nusunítigaca xiyutu' ga zoa cazu' Li'.

⁸ Biti' gunu' netu' xigui'a tu' nözi dul-la' gulunë' xuz xtó'otu'.
Buéchi' ladxi' netu' na'a, tu' rudú ládxì'tu'.

⁹ Gúcalen netu', Dios, Nu rusólá netu', para guntu' bal Lo'.
Busólá netu', en buniti lo netu' ca naca dul-la' nabága'tu' para idxí'itu' Lo'.

¹⁰ ¿Bizx que ta'nabi bönachi yugu' yödzö izá'a netu',
ta'nná: "Gázxitë zoa Dios queëli'"?

Bë' lataj ilé'etu', en ben ga gaca bë' lógaca yúgu'të bönachi
rizí' lo' nupa tu'lalaj xichöngaca huen xichinu'.

¹¹ Buzë nagu' ca ta'nné ládxì'gaca nupa nadzungaca.

Len yöl-la' huáca zxön quiu' busólá nupa na' narugu quéguequi ilátigaca,

¹² en bubí'i quégaca bönachi yugu' dzaga yödzö queëtu'
ia'gadxi cö'lö ca' tsca naca didza' zi' gula'nné quiu' Li', Xan.

¹³ Netu', bönachi quiu', enca' bö'cu' zxila' ruyú cazu' Li',
guiëtica'stu' Li': "Xclenu'",

en cí'utica'stu' Li' yöl-la' ba na'a dza, en dza si' zaca.

80

¹ Ruzë nagu' netu', Dios, Nu rapa chi'i bönachi Israel.

Nacu' Nu ruyú yugu' zxí'ini xi'sóë' José ca nu ruyú yugu' bö'cu' zxila'.
Buzení' queëtu', Li' na' rö'u rinná bë'u ga nacuá'

nupa nál-lágacatérö quiu' légaca querubín.

² Buluí'i yöl-la' huáca quiu' lógaca zxí'ini xi'sóagaquië' Efraín, en Benjamín, en Manasés.

Gudá queétu', en busólá netu'.

³ Ben ga huécjatu' quiu' Li', Dios.

Buluí'i netu' nadxí' inu' netu', ate' ulatu'.

⁴ Xantu' Dios quéguequi ni'a no'o guizxi yu,

¿gáca'xte caz ilenu' netu', en biti' yönnu' le rulidztu' Li'?

⁵ Rugagu' netu' nisa ribödxi queétu',

en rugui'ju' netu' sizzöni nisa ribödxi.

⁶ Nunu' ga bönachi dzaga yödzö queétu' tu'zxidxi queétu',

ate' nupa biti' ta'lé'e netu' dxi'a tu'titaj netu'.

⁷ Ben ga huécjatu' quiu' Li', Dios quégaca ni'a no'o guizxi yu.

Buluí'i netu' nadxí' inu' netu', ate' ulatu'.

⁸ Guléaju' tu lubá uva le nácatu' netu' luyú Egipto.

Bulagu' bönachi izá'a yugu' lu yödzö luyú ni, en budó'o lubá na' ni.

⁹ Buchi'u lataj ga guzxöni lubá na'.

Benu' ga ben líu' ga ré', ate' buli idútë luyú ni.

¹⁰ Gulú'u zxul-la lubá na' yúgu'të lu gu'ado',

ate' ni'a në'e gula'baga' yugu' gu'a zxöni.

¹¹ Gula'tunna ni'a në'e ga bidxitnë ra' nísado',

enca' ga bidxitnë ra' yegu Eufrates.

¹² ¿Bizx que buquínnaju' yugu' lë'aj gulún chi'i lubá na',

en ru'u lataj nupa ta'dödisö ta'bán le ribía lubá uva na'?

¹³ Tu'líbigacaba' cuchi guixi' le,

ate' táguba' böa' guixi' le.

¹⁴ Buéćja queétu', Dios quégaca ni'a no'o guizxi yu.

Ga ni' zu' yehua' yubá buyú ca raca que lubá quiu', en busólá netu'.

¹⁵ Gudá dusölö' lubá ni budá' cazu',

le naca ca tu lubá hué'eni buxöni cazu' Li'.

¹⁶ Nupa biti' ta'lé'e netu' dxi'a gula'chugu ni'a në'e lubá na', en bulu'quela' le guí'.

Buyú ca tun, en lu yöl-la' rilé quiu' busuniti léguequi.

¹⁷ Gúcalen bönni' na' gurö cazu' quiu',

netu', bönachi na' nuzóa cazu' tsaz quiu'.

¹⁸ Caní gaca, bíti'rö ucá'anatu' Li'.

Bunna queétu' yöl-la' na'bán, ate' uzxöni ládxitu' Lo'.

¹⁹ Ben ga huécjatu' quiu' Li', Dios quégaca ni'a no'o guizxi yu.

Buluí'i netu' nadxí' inu' netu', ate' ulatu'.

81

¹ Lu yöl-la' rudzeja queéli' guli'gul-la queéë' Dios.

Lë' náquië' yöl-la' nál-la queéli'.

Lu yöl-la' rudzeja queéli' guli'cödxi'a lahuë' Dios queéë' Jacob.

2 Guli'gul-la tu le gúl-lali', cápa'lí' lë'e guídido'.
Guli'quinnaj lë'egaca bihuél-la.

3 Guli'cödxi luzu chivo cate' zoa beo' huë'ëni,
en cate' zoa beo' nál-la, en cate' raca laní.

4 Lë ni naca tu xibá quégaca bönachi Israel,
le naca tu le gunná bé'enë' Xanru' Dios zxí'ini xi'sóë' Jacob.

5 Gudixjë' le para gaca tu le gun ba nalí queë' lógaca zxí'ini xi'sóë' José,
le gudixjë' cate' gudödë' luyú Egipro,
ga ni' biyönda' didza' izá'a biti' guyéajni'ida'.

6 Rnnë' Dios: "Gudúa' yua' zxoa ya'zxícjagaquië',
en bucuita' le nuá'gaquië' le bulu'subaga' légaquië'
nupa biti' bila'lé'e légaquië' dxi'a.

7 Bulídzali' neda' cate' bi guca queëli', ate' busölá' libí'ili'.
Bubi'a didza' cate' bi gunábili' neda', ni' nucachi' cuina' tu lu böaj gasaj.
Guzxí' bë'a libí'ili' ga zoa nisa na' lë Meriba.

8 Bulí'zë nágali', libí'ili', bönachi quia', ate' uxösa' libí'ili'.
Raca ládex'a' uzë nágali' neda', bönachi Israel.

9 Biti' ral-la' soa tu dios izá'a ga na' zóali',
en biti' gunli' zxön tu dios quégaca bönachi zi'tu'.

10 Neda', Xanli', naca' Dios queëli'.

Guléaja' libí'ili' luyú Egipro.

Guli'salaj ruá'ali', ate' cu'a ruá'ali' le gáguli'.

11 Biti' bulu'zë nágagaca bönachi quia' chi'a.

Biti' gulún bönachi Israel ca rnna xtídz'a'a.

12 Que lë ni na' busán ládex'a' léguequi
para gulún ca sa'yéaj yöl-la' ridá'baga' quéguequi,
en para gulún ca gula'za'sö ládx'i'gaca.

13 Guzá' ládex'a' ulu'zë nágagaca bönachi quia' xtídz'a'a,
para ilún bönachi Israel ca ré'ënda' neda'.

14 La'tu' ilún caní, uxicja caza' nupa biti' ta'lé'e léguequi dxi'a,
en til'-lalena' nupa ta'dil'-lalen léguequi.

15 Ulu'lui' cuínguequi nupa biti' ta'lé'e neda' dxi'a,
ca nupa tun ca rnna xtídz'a'a,
pero tsaz guna' léguequi xiguia'.

16 Lësca' ugahua' libí'ili', bönachi quia', zxoa' xtila dxí'ado',
en guna' ga huölaj idzé'eli' le zxixi que buz, le irúaj lë'e guiöj."

82

1 Zuínë' Dios ladaj nupa tu'dubi queë' ni' yehua' yubá.
Ruchi'a rusörë' nupa ta'nná bë'.

2 Rnnë': "¿Gáca'xte caz uchi'a usöröli' quégaca bönachi
lu yöl-la' biti' naca tsahui' queëli'?

Caní naca tu' rubéajl' tsahui' nupa tuá' dö'.

3 Bulí'béaj tsahui' nupa ta'cuidi', en yugu' bi'i uzëbi.
Guli'gún le naca tsahui' quégaca nupa ta'guí'i ta'zaca',
en quégaca nupa ta'yadzaj ta'yudxi'.

4 Bulí'sölá nupa ta'cuidi', en nupa nácagaca yechi'.
Buli'sölá léguequi lu ná'agaca nupa tuá' dö'.

5 Biti' nöziguequi, en biti' ta'yéajni'í.

Ta'dá ga chul-la.

Rizzxizi xilibi yödzölió."

6 Rnna caza' neda': 'Nácali' ca yugu' dios.

Nácali' yúgu'téli' zxi'iné' Dios nayépisétérë',

7 pero gátili' ca tati böñachi,

en ibíxili' lu gudil-la ca ta'bixi zxi'iné' bönni' lo."

8 Guyasa, Dios, en buchi'a busörö quégaca böñachi yödzölió ni,
tu' nácagaca queë cazu' yúgu'té yödzö böñachi.

83

1 Biti' ugá'anu' dxisö, Dios.

Biti' su' dxisö, Dios, en biti' usaya j ru'u,

2 tu' tu'tsatsa nupa ta'dá'baga' Li',

ate' nupa biti' ta'lé'e Li' dxi'a tun ba zxön cuínguequi.

3 Tun tuz xtíz'a'guequi bi ilún quégaca böñachi queë cazu',

en tu'pá yugu' le ilún quégaca nupa nadxí'i quézinu', ta'nná:

4 "Guli'dá, usuníritu' léguequi para cabirö ilaca tu yödzö böñachi,
en para cúntrö nu tsöjné böñachi Israel."

5 Núngaca tuz xtíz'a'guequi.

Nuzóagaca tsutsu xtíz'a'guequi ta'dá'baga' Li'.

6 Yugu' bönni' Edom, en yugu' bönni' Ismael,

en yugu' bönni' Moab, en yugu' bönni' Agar,

7 en yugu' bönni' Gebal, en yugu' bönni' Amón, en yugu' bönni' Amalec,
en yugu' bönni' Filisteo, en yugu' bönni' Tiro,

8 enca' yugu' bönni' Asiria núngaquië' légaquië' tsözxön.

Rácalengaquië' yugu' bönni' zxf'ini xi'sóë' Lot.

9 Ben quégagaquië' ca benu' quégaca böñachi Madián, nupa na' busunítiu' dërö,
en ca na' benu' queë' Sísara, en ca na' benu' queë' Jabín ra' yegu Cisón,

10 nupa na' busunítiu' lu yödzö Endor,

ate' gulaca ca xiquë'ëba' bëdxi luyú ni'.

11 Ben quégagaquië' bönni' lo quéguequi

ca benu' quégagaquië' Oreb, en Zeb,

en ben quégagaquië' bönni' ta'nná bé'enë' léguequi

ca benu' quégagaquië' Zeba, en Zalmuna,

12 nupa na' gula'nná: "Ilequi queëru'

yugu' lataj gapa na' gulequi queë' Dios."

13 Dios quia', ben ga ilácagaquië' ca bëchtö yu le richë' bö',

en ca bëbu zxe café le ruá' bö' budunu'.

14 Ca run tu guí' zxön, ruzegui' yugu' yaga zxön,

o ca run tu guí', ruzegui' tu guí'a zxön,

15 gusí regu' léguequi tu lu bö' budunu',

en ben gadxi léguequi tu lu nisa guiöjsiu' zili.

16 Ben ga ulu'tu'i

para ulu'guilaj Li', Xan.

17 Ben ga ulu'tu'i, en ila'bö' tsaz böñiga.

Ben ga ulu'gá'ana cásö, en tsaz ila'niti,

18 para iléquibe' e nayépisétérü' tuzu' Li' idúte yödzölió

en ulu'zóa zxibiguequi lo', Xantu' Dios.

84

¹ ¡Bica' lachi gapa zoa cazu' Li', Dios!
¡Nacu' Xángaca ni'a no'o guizxi yu!

² Rizé ládex'a soa' lu yu'u lidxu', Xana' Dios.
Lu yöl-la' rudzeja quia' idú ládex'a rul-la' quiu' Li', Dios ban.
³ Bidzóliba' biguínni chulí lataj ga nuzóaba' lídxiba',
en bidzóliba' xiguichi guiziú' ga budxíaba' xicá'aba',
ga na' rigú'uba' biguínndo' queéba',
gala' ga dë lu bucugu quiu' Li', Xángaca ni'a no'o guizxi yu.
Nacu' Nu rinná be'e neda', en nacu' ca' Dios quia'.

⁴ ¡Bica' ba nupa ta'yaza lu yu'u lidxu'!
¡Ta'gú'utica'sö Li' yöl-la' ba!
⁵ ¡Bica' ba bönni' nápagaquië' yöl-la' nál-la le nequi queé cazu',
en ta'zé ládx'i'gaquië' ila'yu'ë nöza le ridxín yödzö Sión!

⁶ Cate' ta'dödë' lu yu bidxi tunë' ga ruhuöáca gapa ralaj nisa beaj.
Tun ga rizi' xibé yu bidxi na' yugu' nisa guiöj ta'dxín bayön.
⁷ Lu yöl-la' huáca quégaquië' rójáquië', en tu'zí'rönë' yöl-la' huáca.
Ta'dxinë' yúgu'tëgaquië' lo' Li', Dios, lu yödzö Sión.

⁸ Ruzé nagu' le rulidza' Li', Dios, Xángaca ni'a no'o guizxi yu.
Ruzé nagu' neda', Dios queé Jacob.

⁹ Buyúë' bönni' rinná bé'enë' netu', Dios.
Buyúë' bönni' na' nabö cazu'.
¹⁰ Nácarö dxí'a soa' tu dza lu yu'u lidxu' ca le soa' idú chi gayuá' dza ga yúbölö.
Cóa' zí'alö gaca' huen dxin ga nu riyaza yu'u lidxë' Dios
ca le soa caza' tu yu'u zxön ga biti' zoa Dios.

¹¹ Náquië' Xanru' Dios ca gubidza, en le rusubín rë'u.
Xanru' caz runnë' queéru' yöl-la' ruzá' ladxi' queé', en yöl-la' zxön queé'.
Biti' ugüë' nitú le naca dxí'a gapa nacuá' nupa tun le naca tsahui'.

¹² ¡Li', Xángaca ni'a no'o guizxi yu,
bica' ba bönni' ruzxöni ládxë' è Li'!

85

¹ Buzá' ládex'u quégaca böñachi quiu', Xantu' Dios.
Buchë'u Li' zxí'ini xi'soë' Jacob gula'dzunë'.
² Buniti lo' böñachi quiu' ca naca xiguia' gula'baga'.
Bucáchu'u yugu' dul-la' gulúngaca.
³ Buzóá dxíu' yöl-la' rilé quiu'.
Bugú' yöl-la' ridzá' a quiu'.
⁴ Buzóá netu' xilátjatu' le yúbölö, Dios, Nu rusölá netu',
en bíti'rö lenu' netu'.
⁵ ¿Naru' tsaz ilenu' netu'?
¿Naru' tsaz ilenu' yugu' zxí'ini xsoatu'?
⁶ ¿Naru' cabí usubanu' ládx'i'tu' le yúbölö,
para udzeja ládx'i'lentu' Li' netu', böñachi quiu'?

7 Lu yöl-la' dxi'i ladxi' quiu' gúcalen netu',
en busólá netu', Xan.

8 Uzé naga' didza' gu'ë Xanru' Dios.

Le guíë' bönachi queë' gun ga gaca dxi'a quéguequi,
nupa na' nácagaca quez queë',
pero run bayúdx biti' ulu'huöa ládxi'gaca.

9 Le nácatë chizóë' usölé' nupa tun Lë' bal,
para soa yöl-la' ba queë' luyú queëtu'.

10 Dzágagaca yöl-la' dxi'i ladxi', en le naca idútë li.

Tagu zxixi luzë'eguequi nu naca tsahui', en nu riböza dxi'a tsáhui'do'.

11 Luyú caz rilén le naca idútë li,
ate' yehua' yubá rirúaj le naca tsahui'.

12 Le nácatë Xanru' unödzjë' queëru' le naca dxi'a,
ate' xiyuru' unödzaj le uláparu'.

13 Le naca tsahui' röjnöru lahuë' Xanru',
en gun ga soa nöza gáti'tës ga ulibë'.

86

1 Ruzë nagu', Xana' Dios, en rubí'u didza',
tu' zoa nu rusaca' zi' neda', ate' riyadzaj riyúdxida'.

2 Ben chí'i bö' naca caza', Dios, tu' naca' quiu' Li'.

Busólá neda', huen dxin quiu', Dios quia', tu' ruzxöni ládxa'a Li'.

3 Buzá' ladxi' quia', Xan,
tu' rulidza' Li' idú dza.

4 Ben ga udzeja ládxa'a neda', huen dxin quiu',
tu' rigu'a lu no'o bö' naca caza', Xan.

5 Nacu' dxi'a, Xan, en chizú' uniti lo' bönachi quiu'.
Nadxí'itica'su' yúgu'të nupa tu'lidza Li'.

6 Ruzë nagu' le rulidza' Li', Xan,
en ruí'i ládxu'u gunu' yugu' le inábida' lo'.

7 Cate' bi gaca quia' ulidza' Li',
tu' ubí'i cazu' didza' bi gunu' quia'.

8 Cúnturö nu zoa ládjagaca dios nu naca ca nacu' Li', Xan,
en biti' zoa ia'tú nu run ca nácagaca le runu' Li'.

9 Ila'dxín bönachi yúgu'të yödzö naguixju' Li', Xana' Dios,
en ila'yéaj ládxi'gaca Li', en ilún zxöön Lo'.

10 Nayépisétérösü' Li', en tuzu' Li' runu' yugu' yöl-la' huáca zxön.
Tuzu' Li' nacu' Dios.

11 Busëdi neda' ca naca le rë'ënu' guna', Xan.

Guna' ca naca le naca idútë li naguixju' Li'.

Ben ga gádxida' Lo' idú ládxa'a.

12 Idú ládxa'a guía' Li': "Xclenu'", Xana' Dios,
en guna' zxöön Lo' yugu' iz si' zaca.

13 Nadxi'ide'enu' neda',
en chibusölö' bö' naca caza' lu lataj chul-la ga nacuá' nupa chinátigaca.

14 Dios quia', nupa ta'dá'baga' neda' ta'díl-lalen neda',
ate' yugu' bönni' zidzaj ladxi' té'ënë' ilútië' neda',
yugu' bönni' na' biti' tunë' Li' bal.

15 Nacu' Dios ruhuéchi' ládxu'u netu', Xan, en ruzá' ládxu'u queëtu'.

Ridzenu' para ilenu' netu', en nadxi'ide'enu' netu', en runu' ca rnna xtídu'u.

16 Buyú neda', en buzá' ladxi' quia'.

Butipa ládx'a neda', huen dxin quiu',
en busólá neda', zxi'ininu nigula huen dxin quiu'.

17 Bulu'i neda' tu le gaca bë' gaca dxi'a quia',
para ila'lé'e le nupa biti' ta'lé'e neda' dxi'a.

Ulu'tui'i, tu' gúcalenu' neda',
en buë tsahú'u neda', Xan.

87

1 Nuzóë' Dios xilibi zö'ö que yödzö queë' lu guí'a lá'ayi.

2 Nadxi'irönë' Xanru' lataj ga na' tu'chi'a tu'sörö böñachi Sión
ca nadxi'inë' ia'zíca'rö lataj gapa nacuá' böñachi Israel.

3 Zián le lachi ta'nná böñachi ca naca
yödz na' nequi queë' Dios.

4 Cate' ulidza' böñachi núnbë'gaca neda', Dios,
ulidza' böñachi nníta'gaca Egipto, en Babilonia.
Ca naca quégaca böñachi Filistea, en Tiro, en Etiopía
inníá' nabábagaca yödzö lá'ayi na'.

5 Cate' gu'a didza' que yödzö Sión inníá':
Böñachi ni, en böñachi izá'a ni nabábagaca le,
ate' neda', Dios nayépisëtérë', uzó'a tsutsu yödzö na'.

6 Cate' ulabë' Xanru' nupa nácagaca queë' innë':
"Bönni' ni nababë' yödzö quia'."

7 Ní'irö ilui'i didza' nupa tul-la, en nupa tu'cödxi gui, ila'ná:
"Ruzí'itu' xibé tuzi yödzö ni."

88

1 Xana' Dios, Nu rusólá neda',
rulidza' Li' rëla, en te dza.

2 Bë' lataj idxín lo' le rulidza' Li'.
Ruzé nagu' le rinaba yúdxida' Li'.

3 Ruúbi rugu'i ládx'i'da'ahua',
en chizóa tsöjtsázia' lataj chul-la.

4 Chinabábalena' nupa chinátigaca.
Naca' ca tu bönni' nudú dërö ládxë'ë,
5 en nagá'anë' cá'asö ladaj nupa chinátigaca,
en ca nupa dëgaca yeru ba,
nupa na' bíti'rö röjnenu',
en nusán no'o léguequi.

6 Nuzú' neda' tu lu yeru zila,
ga naca chul-la, en le nácdada' zila.

7 Rilenu' neda',
en rusaca' zi'u neda' tu lu nísado' quiu'.

8 Nucuásu' yúgu'të nupa núnbë'a.
Nunu' neda' ca tu le ta'guti böñachi.
Nadzuna', en biti' gaca irúaja'.

9 Tu' rigu'i rizáca'a nudú guiøj lahua'.

Tu dza tu dza rulidza' Li', Xan.
Richisa na'a zaca' ga na' zu'.

- 10** ¿Naru' guntso' yugu' yöl-la' huáca zxön para gácalenu' nupa chinátigaca?
¿Naru' ulu'yasa nupa yú'ugaca lataj chul-la,
en ila'gú'u Li' yöl-la' ba?
11 ¿Naru' ulu'lui'i lahui yöl-la' dxi'i ladxi' quiu'
nupa nagáchigaca yero ba?
¿Naru' ulu'lui'i lahui nupa yú'ugaca lataj chul-la
ca runu' ca rnna xtídz'u?
12 ¿Naru' gaca bë' le zxön runu' ga na' naca chul-la?
¿Naru' gaca bë' nacu' tsahui' ga na' cuntu nu bi röjné?

- 13** Rulidza' Li' neda' para gácalenu' neda',
ate' yugu' zila ridxín lo' le rinábida' Li'.
14 ¿Bizx que nusán ládxu'u neda', Xan?
¿Bizx que rucachi' lo' lahua' neda'?
15 Riguí'i rizáca'a, en chizóa gátia' ga gudela' naca' bí'ido'.
Réquida' zi' tu' ruxösü' neda', en rudú ládx'a.
16 Nabág'a neda' yöl-la' rilé quiu',
ate' chizóa usunito neda' le ruxösü' neda'.
17 Idú dza naca quia' ca nabaga' neda' nisa.
Nagú'ugaca neda' lë'ajlö yugu' nisa.
18 Nucuásu' ga zoa' nu nadxi'i neda', enca' luzá'a.
Zóalensö le naca chul-la neda'.

89

- 1** Gúl-latica'sa' ca naca yöl-la' dxi'i ladxi' quiu', Xan.
Usiyönda' zxí'ini xsoatu' ca runu' ca rnna xtídz'u.
2 Gunnía': "Sóatica'sö yöl-la' dxi'i ladxi' quiu'.
Tsaz naca bë' yehua' yubá ca runu' ca rnna xtídz'u."

- 3** Rnnë' Dios: "Naguixja' tsaz didza' dzaga núlen'a nupa nabö caza' quia'.
Bena' tsutsu xtídz'a ca guna' queë' David, huen dxin quia'.
4 Gunnía': Ucuá'a tsaz zxí'ini xi'sú'.
Guna' ga sóatica'sö nu inná bë' uláz quiu'."

- 5** Nupa nacuá' yehua' yubá quiu' ila'gú'u yöl-la' ba le nunu' le tun ga rubánitu',
Xan.
Ga nudúbigaca nupa nácagaca quez quiu' ila'gú'u yöl-la' ba ca runu' ca rnna
xtídz'u.
6 ¿Nuzxi caz zoa ni' yehua' yubá naca ca nacu' Li', Xan?
¿Nuzxi caz zoa ladaj nupa nayépiségaca naca ca nacu' Li', Xan?
7 Nupa nácagaca lá'ayi tun Li' bal, Dios.
Ral-la' gúnroru' Li' bal ca tun nupa nacuá'len Li'.
8 Dios, Xángaca ni'a no'o guizxi yu, ¿nuzxi caz naca ca nacu' Li', Xantu'
nayépisétérö?
Naca bë' rúnica'su' ca rnna xtídz'u.
9 Rinná be'e quézinu' le riyasa ridxía que nísado'.
Cate' riyasa ridxía nísado', ruzúa cazu' le dxisö.

10 Busuniti cazu' böñachi Egipto, ate' gulaca ca nupa chinátigaca.
Bësilásiu' léguequi len no'o nál-la.

11 Nequi quiu' yehua' yubá,
en nequi ca' quiu' luyú ni, tu' nuzóá cazu' léguequi.

12 Naguixaj cazu' le dë tsölá'a ga za' bô' ziaga,
en le dë tsölá'a ga ridödi gubidza beo' ziaga.
Lu yöl-la' rudzeja quéguequi ta'bödxi'a guí'a Tabor,
en guí'a Hermón cate' ta'yöni Lo'.

13 ¡Nál-latérö naca no'o!
¡Nápatérö no'o yöl-la' huáca!
¡Nayépisétérö no'o ibëla!

14 Le naca dxi'a, en le naca tsahui' tun tsutsu le rinná bë'u.
Nacuálen Li' yöl-la' dxi'i ladxi', en le naca idútë li.

15 Bica' bágaca nupa ta'yöni didza' que yöl-la' rudzeja.
Ta'dá lu bení' que lo', Xantu' Dios.

16 Idú dza tu'dzeja tu' zóalen Lo' léguequi,
en tu' zóalen léguequi le naca tsahui' quiu', le nayépisétérö.

17 Naca cazu' Li' yöl-la' zxön que yöl-la' huáca quéguequi,
en tu' ruzá' ládxu'u queëtu' nazxönda' yöl-la' nál-la queëtu'.

18 Nequi queë' Xanru' le run chi'i rë'u,
ate' néquinë' queë' Dios bönni' rinná bë'enë' rë'u.
Dios na' náquië' lá'ayi ladaj böñachi Israel.

19 Dza ni'te bë'lenu' nupa néquiguequi quiu' didza'
lu yugu' le bulu' inu' léguequi,
gunnó: "Gúcalena' tu nu nayépisétérö.
Nuchisa' tu nu gurö caza' quia' ladaj böñachi.

20 Budzölidá'-në' David, huen dxin quia'.
Gulu'a-në' le za le naca lá'ayi quia'.

21 Len na' caza' naguixja' lë',
ate' len na'a ca' utipa' ládxë'ë.

22 Biti' si' ye'e lë' nu rilé lë',
en biti' usaca' zi' lë' nu ruá' dö'.

23 Uquínnaja' lahuë' nupa ta'díl-lalen lë',
en gu'a nupa biti' ta'lé'e lë' dxi'a.

24 Sóalena' lë' lu yöl-la' run ca rnna xtídza'a,
en lu yöl-la' dxi'i ladxi' quia',
ate' tu' ulidzë' La', uxöna' yöl-la' nál-la queë'.

25 Guna' ga inná bë'ë ga naguela' ra' nísado',
ga idxintë ra' yegu Eufrates.

26 Ulidzë' neda', innë': Li' nacu' Xuza', en Dios quia',
enca' Nu run chi'i neda', en Nu rusölä neda'.

27 Gun caza' neda' ga gáquië' ca bi'i lo queë caza',
ate' tsépisétëre' ca yugu' bönni' ta'nná bë'ë yödzölió.

28 Lu yöl-la' dxi'i ladxi' quia' gun chí'itica'sa' lë',
en uzóá' tsaz queë' didza' dzaga quia'.

29 Ucuá'a tsaz zxí'ini xi'sóë',

ate' sóatica'sö lataj ga inná bë'ë, tsca soa yehua' yubá.

30 Channö ulu'cá'anë' zxí'ini xi'soë' xibá quia',

en cabí ilunë' ca naca le buchi'a busöröa',

31 en channö ila'guitsjë' xibá que le gunná bë'a,

en cabí ilunë' ca nácagaca le gunná bë'eda' légaquië',

32 ní'irö guna' légaquië' xiguia' ca sa'yéaj le ta dödi bë' tunë',

en gu'a léguequi ca naca xiguia' nabágaga'quicië',

33 Pero biti' ugú'a queë' yöl-la' dxí'i ladxi' quia',

en biti' usana' guna' ca rnna le guzxi' lu na'a guna'.

34 Biti' ucá'ana' cá'asö didza' dzaga nuna',

en biti' utsá'a didza' bë'a.

35 Tu le nuzoá' tsutsu, en nuna' ba nalí que le naca lá'ayi quia'.

Biti' ca' si' yé'eda' David.

36 Gunnía' ila'cuá'tica'së' zxí'ini xi'soë',

en ga rö'ë rinná bë'ë sóatica'sö lahua' ca gubidza.

37 Naguixja' le tsaz ca nuzoá' tsaz beo',

ate' nacuá'tica'sö lúzxiba le tun ba nalí."

38 Pero nuzú' tsölä'alö, en nusán ládxu'u,

en rilede'enu' nupa na' gurö cazu' quiu'.

39 Nuzú' tsölä'alö didza' dzaga bénlenu' huen dxin quiu'.

Nuzötju' luyú yöl-la' unná bë' queë'.

40 Nuquínnaju' zö'ö gulún chi'i lë',

en nusunítiu' yugu' lataj tsutsu queë'.

41 Yúgu'të nupa ta'dödisö ta'bán le nequi queë',

ate' bönni' dzaga yu'u queë' tu'cá'ana lë' cá'asö.

42 Nuchisu' nupa ta'dá'baga' lë',

en runu' ga tu'dzeja nupa biti' ta'lé'e lë' dxí'a.

43 Runu' ga biti' sequi' idél'i'në' lu gudil-la,

ate' cuntu nu sequi' ucul-lë' lu gudil-la na'.

44 Bugú' yöl-la' lachi queë',

en nuzötju' yöl-la' unná bë' queë' lu yu.

45 Benu' ga chinagulë' sal-la' ni zoë' iz cuidi',

en nunu' ga rutu'íne'.

46 ¿Gáca'xté caz gunu' caní, Xan?

¿Naru' tsaz nucachi' lo'?

¿Naru' gácatica'sö yöl-la' rilé quiu' ca tu guí' réguide'e?

47 Yójnë nabábasö iz soa' ibana',

en tu chí'isö nacuá' bönnachi yödzölió ni.

48 ¿Nuzxi caz bönni' gaca sóatica'së' ibanë', en cabí gátië'?

¿Naru' huáca usölä cuin cazë' lu yöl-la' unná bë' que lataj chul-la?

49 ¿Gázxité zoa yöl-la' dxí'i ladxi' quiu' guzóa zí'alö, Xan,

lë' na' buzú' tsutsu xtídu'u gunu' queë' David,

len yöl-la' run ca rnna xtídu'u?

50 Yójnë ca tu'cá'ana cá'asö netu', huen dxin quiu', Xan,

enca' ca tu'cá'ana neda' cá'asö bönnachi zián yödzö izá'a.

51 Tu'cá'ana neda' cá'asö nupa biti' ta'lé'e Li' dxí'a, Xan.

Tu'cá'ana cá'asö yugu' le runa' neda', bönni' gurö cazu' quiu'.

52 ¡Yöl-la' ba Xanru' Dios iz si' zaca!
¡Ca' gaca! ¡Ön, ca' gaca!

90

- 1 Naca cazu' Li', Xan, ca yu'u lidxa'.
- 2 Zí'atélö ca gulata' yugu' gu'a, o ca guta' yödzölió, ga naguela' cate' gusí lo ga idxintë dza udxi, tsaz naca cazu' Dios.
- 3 Runu' ga tu'huöáca böñachi bëchtö yu cate' rnno': "Guli'huöáca le néquinili', böñachi."
- 4 Quiu' Li' chi gayuá' iz nácagaca ca dza neje le chigudödi que, o ca tu chí'isö chí'i dzö'ölö.
- 5 Bugacu' böñachi ca tu lu yegu gubó'o, ate' gúcagaca ca tu yëla rineru'. Cate' naca zila zéaj naca ca tu guíxido' relentë luyú.
- 6 Cate' naca lahui' dza rizxön, en rö' ni'a næ'e, pero cate' chiral-la, ricuadi', en ridödi que.
- 7 Rinítitu' tu' rilenu' netu', ate' tu' ridzö'o ruúbi rugu'itu'.
- 8 Nuzú' lo' xiguia' nabága'tu', en nubéaju' lu bení quiu' dul-la' yu'u ládxido'otu'.
- 9 Tu' rilede' enu' netu' ridödi quégaca dza queëtu', ate' chibú'u iz queëtu' ca tu le rinnë ládxitu'.
- 10 Tsónnalaj yu' chi ízisö zóatu' nabantu', o channö nál-latu', huazoatu' idú tápalalaj iz, pero runtu' dxin bayudxi, en ruhu'initu' yugu' iz na', tu' ridöditë quéguequi iz na', ate' uzá'atu'.
- 11 ¿Nuzxi caz réajni'i tscá naca yöl-la' rilé quiu'? ¿Nuzxi caz näzi ca naca tsöbi yu'u nu na' rilenu'?
- 12 Que lë ni na' busëdi netu' para guéquibe'etu' tscá gácagaca iz zóatu', para gácatu' böñachi ta'yéajni'i lo' Li'.
- 13 ¿Gáca'xté caz biti' huéchi' ládxu'u netu', Xan? Buéchi' ladxi' netu', yugu' huen dxin quiu'.
- 14 Tu zila tu zila bulu'i netu' ca naca yöl-la' dxí'i ladxi' quiu', para gúl-latu' lu yöl-la' rudzeja queëtu', en uzí'itu' xibé yugu' dza na'.
- 15 Ben ga udzéjatu' tscá chigulaca dza busaca' zi'u netu', en tscá gulaca iz biti' guca dxí'a queëtu'.
- 16 Bulu'i netu', yugu' huen dxin quiu', ca naca le nunu', en bulu'i zxi'initu' ca naca yöl-la' zxön quiu'.
- 17 ¡Buzá' ladxi' queëtu', Xantu' Dios, en ben ga irúaj dxí'a dxin runtu'! ¡Ön, ben ga gaca dxí'a lo' dxin runtu'!

91

- 1 Nu bönni' ruzxöni ládxë'ë Dios para gun chí'e lë', en rizi'ë Dios Nu napa idútë yöl-la' huáca, para gácalenë' lë',
- 2 gaca guië' Xanru': "Nacu' Nu run chí'i neda', en Nu ruzxöa neda' tsutsu. Nacu' Dios quia', ate' ruzxöni ládx'a a Li'."
- 3 Usólá cazë' Dios Li' lu du yalaj que nu rizöñ böñachi, en lu yödzöhuë' le rusuniti'.

4 Usubáguë'ë li' ca rusubága'ba' böra yugu' börado' queëba',
 ate' gaca chi'u lu në'ë ca raca quégacaba' börado' zxan xílaba' yöjede.
 Le run chi'i ré'u, en le ruzóa rë'u tsutsu naca yöl-la' run ca rnna xtídzë'ë cheë'.
5 Biti' gádxinu' le run gadxi böñachi chi'i dzö' ölö,
 en biti' gádxinu' yaga lahui tuchi' tu'së böñachi lahui' dza,
6 en biti' gádxinu' yödzöhuë' le rilén ga naca chul-la,
 en biti' gádxinu' le naca xihui' le rutí böñachi lahui' dza.
7 Ilátigaca chí gayuá' böñachi cuitu' li',
 en ia' chí cö' chí gayuá' cuitu' ibëla,
 pero biti' bi gaca quiu' li'.
8 Le nácatë uyú iná'asu',
 en ilé'enu' le rubí'i quégaca nupa tuá' dö'.
9 Tu' nuzú'-në' Xanru' Nu run chi'i li',
 nuzú'-në' Dios nayépisëtëre' Nu gácalen li',
10 biti' bi gaca quiu' le cabí naca dxí'a,
 en nitú le naché' yödzöhuë' biti' tsu'u lidxu',
11 tu' cu'u cazë' Dios li' lu ná'agaquië' gubáz lá'ayi queë',
 para ilún chí'ë li' gáti'tés ga ridó'.
12 Lu ná'agaquië' ila'chë'ë li',
 para cabí tsójchégu'u guiöj.
13 Uléaj ulibú' bëdxi guixi', en bëla sínia'.
 Usunu' lë'e labu' bëdxi guíxi'do', en bëla xitsiní'.
14 Rnnë' Dios: "Nadxi'inë' neda', ate' que lë ni na' usölá' lë'.
 Uzóa'-në' tsaz xitsá' téro tu' núnbeë' La'.
15 Ulidzë' neda', ate' ubi'a didza'.
 Sóalena' lë' cate' bi gaca queë'.
 Usölá' lë', en guna' lë' bal.
16 Uzánanda'a dza soë' ibanë',
 en ulu'ida'-në' ca gaca usölá' lë'."

92

1 ¡Bica' tsahui' naca rigú'utu' Li' yöl-la' ba, Xan,
 en rúl-latü' le tun Li' bal, Dios nayépisëtëre',
2 en rusiyöntü' böñachi yugu' zila ca ruhuéchi' ládxu'u netu',
 en ruluf'itu' lahui yugu' dzö' ca runu' ca rnna xtídzu'u!
3 Rúl-latü' len yugu' bihuél-la,
 en rúl-latü' yugu' le lachi ca tul-la.
4 Le zxön nunu' Li', Xan, run ga rudzéjatu',
 ate' ruzi'tu' xibé le nungaca lu no'o.
5 Bica' zxön nácagaca le nunu' Li', Xan.
 Zxöntëro le rizá' ládxu'u gunu'.
6 Zoa tu le cabí gaca inözinë' bönni' nazxí icjë',
 en biti' gaca tséjni'inë' bönni' canöz le.
7 Nupa nucá'anagaca Dios ila'yán ca ta'yán guíxi'do',
 en ulu'zí' xibé le tun nupa tuá' dö', pero ila'niti tsaz,
8 tu' nayépsëtëru' Li' tsaz, Xan.
9 Naca bë' le gaca quégaca nupa biti' ta'lé'e Li' dxí'a, Xan.
 Naca bë' ila'niti nupa biti' ta'lé'e Li' dxí'a.
 Ulu'gá'ana cá'asö yúgu'të nupa tuá' dö'.

- 10** Nunu' ga nácatëra' nal-la ca nácaba' bëdxi.
 Nagú'u neda' le za le run ga rudzéjada'.
11 Ilé'e quézida' cate' uxicju' nupa biti' ta'lé'e Li' dxi'a,
 en yönda' cate' ila'bödxi yechi' nupa tuá' dö', nupa na'ta'díl-lalen neda'.
12 Ila'yán nupa nátagaca tsahui' ca ta'yán yaga zina' ca'.
 Ila'zxön ca ta'zxön yaga rö'gaca lu guí'a Líbano.
13 Nátagaca ca yaga nudá'gacu' ra'yu'u lidxu', Xan,
 le ta'zxön lu lö'a lataj quiu', Dios queëtu'.
14 Cate' ni' yú'ugaca iz zián ila'bía le zxixi quéguequi.
 Ilátagaca tsutsu, en ila'cuática'sö ya'a.
15 Caní gaca para gaca bë' náquie' tsahui' Xanru', Nu run chi'i neda'.
 Biti' bi zóalen Lë' le cabí naca tsahui'.

93

- 1** ¡Rinná bë'ë Xanru'!
 ¡Nácuë' yöl-la' ba zxön queë'!
 ¡Nácuë' zxë' Xanru', en nüguië' lë'ë yöl-la' unná bë'!
 ¡Nuzóë' tsutsu yödzölió, ate' biti' utá cuini!

- 2** ¡Tsaz nuzú' tsutsu ga rö'u rinná bë'u, Xan,
 en zóatica'su' Li'!
3 Riyasa ridxiá nisa yugu' lu nísado', Xan.
 Riyasa ridxiá nisa, en ru'u bö que.
 Riyasa ridxiá nisa yugu' lu nísado', en yugu' lu yegu.

- 4** Xanru' Dios yehua' yubá nápatérë' yöl-la' unná bë'
 ca bö ru'u lu nísado' le riyon ca guziú' rinnë,
 enca' ca le riyasa ridxiá nisa lu nísado'.

- 5** Tsaz naguixju' xibá quiu', Xan,
 ate' idú lá'ayí naca ga zoa cazu' Li'.
 Caní zóatica'sö na'a dza, en dza si' zaca.

94

- 1** Nacu' Dios, Xan, Nu ruzí' lëbi bönachi.
 Buluí'i cuinu', Dios, Nu ruzí' lëbi.
2 Ruchi'a rusörö cazu' yúgu'të bönachi.
 Guzë, ate' len yöl-la' huáca zxön quiu' bubí'i quégaca nupa tun ba zxön
 cuínguequi.
3 ¿Gáca'xte caz ulu'zí' xibé nupa tu'cá'ana Li', Xan?
 ¿Gáca'xte caz ulu'zí' xibé?
4 ¿Gáca'xte caz ilún ba zxön cuínguequi, en iluí'i didza' zi'?
 ¿Gáca'xte caz ilún ba zxön cuínguequi ni'a que dö' tuá'gaca?
5 Tu'sunítië' nupa néquigüequi quiu', Xan.
 Tu'saca' zi'ë nupa néquigüequi quez quiu'.
6 Tútigaquie' nigula uzëbi, enca' yugu' bi'i uzëbido',
 en tuneë' le naca xihui' ladaj bönachi zi'tu'.
7 Ta'nnë': "Biti' ilé'enë' Xángaquie' re'u,
 en biti' rui'i ládxë'ë Dios queë' Jacob lë ni."
- 8** Guli'tséajni'i, bönachi biti' nözguequi,

ate' libí'ili', bönachi catún bal, ¿bátaxi tséajni'ili'?

⁹ Benë' Dios guídi nágaru'. ¿Naru' cabí riyón quézinë'?

Benë' Dios guiój loru'. ¿Naru' cabí rilé'e quézinë'?

¹⁰ Ruzéajni'i quézinë' Dios bönachi yúgu'té yödzö.

¿Naru' cabí gunë' léguequi xiguia'?

Ruchiza cazë' icja ládx'i do'oru' yöl-la' réajni'i.

¿Naru' cabí réquibe'enë' bi runli'?

¹¹ Nöz quézinë' Xanru' yugu' le ta'zá' ládx'i gaca bönachi.

Nözinë' canöz naca le ta'zá' ládx'i gaca.

¹² Bica' ba bönni' na' ruzéajni'i quézinu'-në', Xan, en rusedi quézinu'-në' ca naca xibá naguixju' Li'.

¹³ Gunu' ga uzí' ládxë'ë cate' bi gaca queë', ga idxinrö dza tsú'ugaca yeru ba nupa tuá' dö'.

¹⁴ Biti' usán në'ë Xanru' bönachi queë', en biti' ucá'anë' nupa néquiguequi quez queë'.

¹⁵ Ca naca le naca tsahui' uchi'a usöröe' rë'u le yúbölö, ate' ulu'zí' xibé nupa nácagaca tsahui'.

¹⁶ ¿Nuzxi caz tíl-lalen nupa tuti bönachi para gácalen neda'?

¿Nuzxi caz gácalen neda' cate' nacuá' nupa tuá' dö' quia'?

¹⁷ La'tu' cabí gócalenë' Xanru' neda', la' yöjtsú'utea' lataj chul-la que yöl-la' guti.

¹⁸ Gunnía': "Chizóa' ibixa", ate' lu yöl-la' dxi'i ladxi' quiú' guzxönu' neda', Xan.

¹⁹ Cate' ruúbi rugu'i ládx'i da'ahua', ruhué tsahú'u neda', en runu' ga rudzéjada'.

²⁰ Biti' ca' gunu' tsözxön nupa tu'chi'a tu'sörö netu' ca naca le cabí naca tsahui', nupa na' tu'béaj tsahui' le cabí naca tsahui'.

²¹ Tu'dubë' tsözxön para ilútië' nupa nácagaca tsahui', en ta'chúguië' quégaca nupa biti' bi nabága'gaca ilátigaca,

²² pero run chi'i cazë' Xanru' Dios neda'.

Nuzoë' neda' tsutsu, ate' ruzxöni ládx'a a lë'.

²³ Ubi'ë quégaguïë' ca naca dö' tu'ë, en usunítië' légaquïë' tu' nözí xiguia' nabága'gaquïë'.

Usunítië' dërò Xanru' Dios légaquïë'.

95

¹ Guli'dá, gúl-laru' queë' Xanru' lu yöl-la' rudzeja queëru'.

Lu yöl-la' rudzeja queëru' cödxi'aru' que Nu na' naca ca tu guiójto'o ga nuláru'.

² Uyéajru' lahuë', en guiéru'-në': "Xclenu'."

Lu yöl-la' rudzeja queëru' cödxi'aru' lahuë', gúl-laru' yugu' salmo.

³ Xanru' Dios náquië' Dios nayépisëtëre'.

Nápatérë' yöl-la' unná bë' ca yúgu'té dios izá'a.

⁴ Lu na' cazë' yu'u le dë ga re' zxan luyú, ate' néquiguequi ca' queë' guí'a sibi.

5 Nequi queë' nísado', tu' nun cazë' le,
en len ná'asë' benë' luyú bidxi.

6 Guli'dá, gunru'-në' zxöñ, en uzóa zxíbiru' lahuë'.
Uzóa zxíbiru' lahuë' Xanru' Nu ben rë'u.

7 Naca cazë' Lë' Dios queëru',
ate' nácaru' bönachi rugagu cazë', en ca bö'cu' zxila' richë' cazë'-ba' lu në'ë.
Rnna cazë' Dios: "Na'a, channö rë'ënili' yönili' chí'a,
8 biti' gunli' zidzaj icja ládx'i do'oli' ca gulunë' xuz xtó'oli' lataj na' lë Meriba,
en caléga ca gulunë' la' guixi' ga dë lataj lë Masa,
9 cate' ni' gula'zi' bë'ë xuz xtó'oli' neda'.

Gula'zi' bë'ë neda' sal-la' bila'lé'enë' yugu' le bena'."

10 Idú choá' iz gúquida' zi' bönachi gula'cuá' dza ni',
ate' gunnía': "Ta'chixi ta'níguinë' lu icja ládx'i do'gaquië',
en biti' nözguequinë' le rë'ënda' ilunë'."

11 Que lë ni na' lu yöl-la' rilé quia' bena' tsutsu xtídz'a'a,
gunnía': "Biti' ca' ila'yázië' ga ulu'zí' ládxë'ë tsözxöñ len neda'."

96

1 ¡Guli'gul-la queë' Xanru' tu le cubi!
¡Guli'gul-la queë' Xanru', yúgu'téli' zóali' yödzölió!
2 ¡Guli'gul-la queë' Xanru'! ¡Guli'gún zxöñ lë'!

Tu dza tu dza buli'siyón bönachi didza' dxi'a ca rusölë' rë'u.

3 Buli'siyón bönachi yúgu'té yödzö yöl-la' ba queë'.
Buli'siyón yúgu'té bönachi le nácacaca zxöñ nunë'.

4 Zxöntérö náquië' Xanru', ate' ronda' bayúdx cí'uru'-në' yöl-la' ba.
Ral-la' gádxitérö Lë' ca tadxi bönachi izá'a dios quéguequi.

5 Yugu' dios quégaca bönachi izá'a nácacacasö budo' guiöj budó' yaga,
pero Xanru' Dios nunë' lúzxiba xitsá'.

6 Nacuá' yöl-la' bení', en yöl-la' ba lahuë' Lë'.
Nacuá' yöl-la' huáca, en yöl-la' lachi ga zoa cazë'.

7 ¡Guli'cu'ë Xanru' yöl-la' ba, bönachi yúgu'té yödzö!
¡Guli'cu'ë yöl-la' ba, en yöl-la' huáca!

8 ¡Guli'cu'ë Xanru' yöl-la' ba ni'a que Lë'!
¡Guli'guá' le unödzjali', en guli'dá lahuë'!

9 ¡Guli'gún Lë' zxöñ, náculi' le naca ba'a!
¡Guli'zxizi lahuë', bönachi idútë yödzölió!

10 Guli'nná lógaca bönachi yúgu'té yödzö: "Rinná bë'ë Xanru'.
Naguixjë' tsaz luyú, ate' biti' utá cuini.
Ca naca le naca tsahui' uchi'a usöröë' quégaca yúgu'té bönachi."

11 Ral-la' udzeja lúzxiba, en ulu'zí' xibé luyú.
Ral-la' cödxí'a nísado', en ila'bödxí yúgu'té le nacuá' lu nísado'.

12 Ral-la' udzeja guixi' caz, en yúgu'té le nacuá' la' guixi'.
Lu yöl-la' rudzeja quéguequi ilúl-la yaga
13 lahuë' Xanru', tu' si' ulé'.

Guídë' duchi'a dusöröë' nupa nacuá' yödzölió.

Ca naca le naca tsahui' uchi'a usöröö' quégaca yúgu'té bönachi,
enca' quégaca bönachi yúgu'té yödzö para ilunë' ca rnna xtídzë'ë.

97

1 ¡Rinná bë' cazë' Xanru' Dios!

¡Ral-la' ulu'dzeja bönachi idútë yödzölió!

Buli'sí' xibë', libí' illí' zóali' yúgu'té yödzö izá'a.

2 Rö'gaca böaj, en le chul-la idú gásibi'ilö ga na' zoë'.

Le naca dxí'a, en le naca tsahui' tu'zóa tsutsu le rinná bë'ë.

3 Rinöru tu guí' zxön lahuë',

le uzegui' nupa ta'dá'baga' Lë'.

4 Tu'zení' le ta'yëpi yösa yödzölió.

Rilé'e luyú lë ni, en rizzizi.

5 Tu'una' guí'ado' ca ruún bidxina' buz lahuë' Xanru'.

Náquië' Xani idútë yödzölió.

6 Lúzxiba xitsá' naca bë' náquië' tsahui',

ate' ta'lé'e bönachi yúgu'té yödzö yöl-la' zxön queë'.

7 Tu'tui'i yúgu'té nupa tun zxön budó' guiój budó' yaga,

nupa na' tun ba zxön cuínguequi ni'a quégaca budó' quéguequi na'.

Ulu'gá'ana cá'asö yúgu'té dios quégaca bönachi izá'a lahuë' Xanru'.

8 Bila'yöni bönachi Sión, en bulu'dzeja,

enca' yugu' zxí'ini xi'sóë' Judá.

Tu'dzéjanë' ca ruchi'a rusöröu' netu', Xan.

9 Nayépisétérö cazu' Li', Xan, ca yúgu'té nupa nacuá' yödzölió.

Nayépisétérö cazu' Li' ca yúgu'té dios quégaca bönachi izá'a.

10 Núloli' nadxfí'ili'-në' Xanru', guli'guequi zi' le naca dö'.

Run chí'i cazë' bö' nádagaca caz nupa néquiguequi queë'.

Rusölë' léguequi lu ná'agaca nupa tuá' dö'.

11 Ruzení'tica'sö bení' queë' nupa nádagaca tsahui',

ate' tu'zí' xibë' nupa nádagaca dxí'a.

12 ¡Buli'sí' xibë' Xanru' núloli' nácali' tsahui'!

¡Buli'subán ládxí'li' ca nunë' Dios Lá'ayi, en guli'cu'ë yöl-la' ba!

98

1 ¡Guli'gul-la queë' Xanru' tu le cubi,

tu' nunë' le tun ga rubániru'!

Len yöl-la' unná bë' zxön queë', en yöl-la' huáca lá'ayi queë' nadéli'në' lu gudil-la.

2 Nunë' Xanru' ga naca bë' le nadéli'në'.

Nulu'inë' bönachi yúgu'té yödzö náquië' tsahui'.

3 Len yöl-la' dxí'i ladxi' queë', en yöl-la' li ladxi' queë'

benë' ca rnna xtídzë'ë le guzxí' lu në'ë gunë' quégaca bönachi Israel.

Bila'lé'e bönachi idútë yödzölió ca busölë' re' u Dios queëru'.

4 ¡Lu yöl-la' rudzeja queëli' guli'gul-la queë' Xanru', yúgu'teli' zóali' yödzölió!

¡Idú ládxí'li' guli'cu'ë yöl-la' ba, en guli'gul-la queë' le naca lá'ayi!

5 ¡Guli'gul-la queë' Xanru' yugu' salmo, en guli'quinnaj yugu' bihuél-la!

¡Guli'quinnaj lë'egaca arpa, en guli'gul-la yöl-la' ba queë'!

6 ¡Guli'cödxí lúzugacaba' chivo, en lúzugacaba' bëdxi

lahuë' Xanru' Dios, Nu rinná bë'!

7 ¡Bulílidza zidzaj, nísado', en yúgu'të le nacuá' nisa na'!

¡Guli'gul-la yödzölió, en yúgu'të nupa nacuá' ni'!

8 ¡Guli'capa' ná'ali', yugu' yegu,

ate' lu yöl-la' rudzeja queëli' guli'gul-la lahuë' Xanru', libíili', guí'ado',

9 tu' zë'ë duchi'a dusöröë' quégaca böñachi yödzölió!

Ca naca le naca tsahui' uchi'a usöröë' quéguequi,
en ca naca le naca dxí'a tsahui' inná bë'enë' yúgu'të böñachi.

99

1 ¡Rinná bë'ë Xanru' Dios! Ta'zxizi yúgu'të böñachi.

Rö'ë rinná bë'ë ladaj nupa nápagacatëro yöl-la' huáca,
légaca Querubín, ate' rízzizi luyú.

2 Nayépisétëre' Xanru' lu yödzö Sión,
ate' rinná bë'enë' böñachi yúgu'të yödzö izá'a.

3 Ral-la' ila'gú'u Lë' yöl-la' ba yúgu'të böñachi,
tu' caní sa'yéaj, en le run ga runru' Lë' bal.

¡Lá'ayi náquië' Lë'!

4 Nadxi'i quézinu' le naca tsahui', Li', Bönni' unná bë' nayépisë.
Tsaz naguixju' le naca dxí'a tsáhui'do',
en nuzú' quégacië' zxí'ini xi'sóë' Jacob le naca tsahui', en le naca idútë li.

5 ¡Guli'gún zxönë' Xanru' Dios!

Bulí'zechu zxibili' lahuë' Lë' ga rö'ë rinná bë'ë.
¡Lá'ayi náquië' Lë'!

6 Guláquië' Moisés, en Aarón bixúz queë',
ate' benë' Samuel tsözxön nupa gula'yéaj ládxí'gaca Lë'.

Bulu'lídze' Xanru', ate' bubí'i cazë' didza'.

7 Tu lu böaj bë'lenë' légaquië' didza'.

Gulunë' ca ta'nná bë' xibá queë', en yugu' le gunná bë'enë' légaquië'.

8 Bubi'u didza' lógaca böñachi quiu', Xantu' Dios.

Bulu'ínu' légaquië' nacu' Dios, en runiti lo' böñachi,
pero rubi'u quégacië' ca sa'yéaj dö' tu'ë.

9 ¡Guli'gún zxönë' Xanru' Dios!

Bulí'zechu zxibili' lahuí' lo guí'a lá'ayi ga zoa cazë',
tu' náquië' lá'ayi Xanru' Dios!

100

1 ¡Lu yöl-la' rudzeja queëli' guli'gul-la queë' Xanru',
libíili' zóali' idútë yödzölió!

2 ¡Lu yöl-la' rudzeja queëli' guli'cu'ë yöl-la' ba Xanru'!

¡Guli'dá lahuë' Lë', en lu yöl-la' rudzeja queëli' guli'gul-la queë'!

3 ¡Guli'tsöjné Xanru', náquië' Dios!

Buzá' cazé' rë'u, en caléga rácasö queëru' zóaru'.
 Nácaru' bönachi queë', en nácaru' ca bö'cu' zxila' queë'.
4 Guli'tsaza zaca' ra'yu'u queë', guiéli'-në': "Xclenu'."
 Guli'tsaza gapa naca lõ'a queë', cù'uli'-në' yöl-la' ba.
 Guli'guië': "Xclenu'", en guli'gunë' zxön.

5 ¡Náquië' dxi'a tsahui' Xanru' Dios, ate' zóatica'sö yöl-la' dxi'i ladxi' queë'!
 ¡Zóatica'sö yöl-la' run ca rnna xtídzë'ë queë'!

101

1 ¡Gul-la' ca runu' ca rnna xtídzu'u, en ca nacu' tsahui'!
 ¡Gul-la' yöl-la' ba quiu' Li', Xan!

2 Gü'i ládx'a' guna' le naca idú dxi'a.

¿Bátaxi huécju' quia' neda'?

Lu yu'u lidxa' guna' le naca idú ladxi'.

3 Biti' gu'a lataj sóalen neda' nitú le naca xihui'.

Biti' rilé'eda' dxi'a le tun nupa tu'cá'ana Li'.

Biti' ca' guna' léguequi tsözxön.

4 Biti' ca' gaca' chopá ladxi'.

Biti' ca' guna' le naca dö'.

5 Usunítia' dérö nu bönni' rinnë' que luzë'ë balándo'os.

Biti' ca' guá' ilena' nu run ba zxön cuini.

6 Uyúa' dxi'a tsáhui'do' nupa tun ca rnna xtídz'a'guequi luyú ni, para
 ila'cuá'len neda'.

Nu biti' bi xiguia' nabaga' huáca gun xichina'.

7 Biti' ca' tsöjsóa lidxa' nu rizi' yë'.

Biti' gu'a lataj ugá'ana lahua' nu ruí'i didza' le cabí naca.

8 Yugu' zila usunítia' yúgu'té nupa tuá' dö' luyú ni,

para ucuita' lu yödzö queë' Xanru' yúgu'té nupa tuti böñachi.

102

1 ¡Buzë nagu' le rulidza' Li', Xan!

¡Bë' lataj idxín lo' le rinaba yúdxida' Li'!

2 Biti' ucache' cuinu' lahua' cate' bi rusaca' zi' neda'.

Buzë nagu' neda', en gudáchi ubí'u didza' cate' rulidza' Li'.

3 Yöl-la' na'bán quia' ruúlu ca dzön,
 ate' régui rilá lu dxita lu bin quia' ca tu guí'.

4 Rudú ládx'a' ca raca que guixi' nabidxi,
 en bíti'rö rizé ládx'a' bi gahua'.

5 Tu'rinnëda' ládx'a' nadxítalë'a.

6 Naca' ca tuba' biguínni zóaba' luyú bidxi,
 o ca tuba' cuturú dxíab'a' tu lu yu'u nadachi.

7 Nabéaj yëla guiöj lahua',
 ate' naca' ca tuba' biguínnido' dxíab'a' túziba' ícjo'o yu'u.

8 Yugu' dza nupa biti' ta'lé'e neda' dxi'a tu'didza' yudxi neda'.
 Nupa tu'titaj neda' tu'gún dxin la' cate' nu tu'dxía dö'.

9 Naca le rahua' ca dödo'sö,
en nutsi' nisa ribödxa' le rë'ja'.

10 Caní raca quia' tu' rilenu' neda', en réquinu' neda' zi'.
Gulisu' neda', en gurú'unu' neda' tsölá'alö.

11 Naca yöl-la' na'bán quia' ca tu zxul-la rilá' cate' ribía gubidza,
en rudú quia' ca raca que guixi' ricuádi.

12 ¡Li', Xan, zóatica'su',
en zóalentica'sö Lo' böñachi!

13 ¡Chasú', en huéchi' ládxu'u böñachi yödzö Sión!

¡Chibidxín dza gü'i ládxu'u léguequi!

¡Ön, chibidxín dza na'!

14 Netu', huen dxin quiu', nadxí'itu' yugu' guiöj nacuá' lu zö'ö run chi'i yödzö
Sión,

en rui'i ládxí'tu' ga ridxitnë bëchtö rö'ö la' nöza que.

15 Bönachi yugu' yödzö izá'a iladxi Lë' Xanru',

ate' nupa ta'nná bë' yödzölió iladxi yöl-la' zxön queë'.

16 ¡Nuchisë' Xanru' caz yödzö Sión,

ate' ulu'i lahuë' ni' lu yöl-la' zxön queë'!

17 Riyönnë' le tu'lidza Lë' nupa ta'yadzaj ta'yudxi.

Biti' ca' uzóë' tsölá'alö le tu'lidza yudxi Lë'.

18 Buli'zúaj lë ni lu guichi para ulu'laba zxí'ini xi'sóali' le,
ate' nupa si' ilalaj ila'gú'u Xanru' yöl-la' ba.

19 Ga ni' ribözë' Xanru' xitsá' lu lataj lá'ayi queë',
ga ni' zoë' Xanru' yehua' yubá, ruzé nagüë'.

20 Riyönnë' le ta'nné ladxi' nupa nadzungaca,
en usanë' nupa narugu quéguequi ilátigaca.

21 Soa nu usiyöni böñachi yödzö Sión ca naca Lë' Xanru',
ate' ila'gú'u Lë' yöl-la' ba lu yödzö Jerusalén,

22 cate' ulu'dubi tsözxöön böñachi yugu' yödzö izá'a,
en böñachi yugu' luyú,

ate' tsözxöön ila'gú'u yöl-la' ba Xanru'.

23 Benë' Xanru' ga gucuídi'da' la' nöza,
en nunë' ga soa' nabábasö dza.

24 Gunnía': Dios quia', biti' gútiu' neda'
cate' ni zoa' gatsaj iza ral-la' soa' ibana'.

Zóatica'sö cazu' Li'.

25 Dza ni'te gudixju' yödzölió,
ate' len na' cazu' benu' lúzxiba.

26 Huadödi quéguequi, pero Li', tsaz idí'u.

Ilexu' yúgu'téguequi ca riyexu' lari',
en ca tu lari' utubu' léguequi, en utsó'o léguequi.

27 Li', biti' ca' utsá' cuinu', en biti' ca' guexu'.

28 Zxí'inigaca huen dxin quiu' ila'böza dxi'a tsáhui'do',
ate' ucú'u tsutsu zxí'imi xi'sóagaquie' lo'.

103

1 ¡Bil-la yöl-la' ba queë' Xanru', li', bö' naca caza',
ate' idútë le naca', bil-la yöl-la' ba que Lë' lá'ayi!
2 ¡Bil-la yöl-la' ba queë' Xanru', li', bö' naca caza',
en biti' gal-la ládxu'u yúgu'të le ruzi'u xibë'!

3 Runiti lo cazë' neda' ca naca yúgu'të dul-la' nabága'a,
en rugüë' yúgu'të xihuë'a.

4 Ruhuöá'uë' neda' lu lataj chul-la,
en ruzá' ládxë'ë quia' yöl-la' dxi'i ladxi', en yöl-la' ruhuéchi' ladxi'.

5 Riguë' xinöza' yugu' le naca dxi'a,
lë na' run ga ruhuöáca' ca tu bönni' zoë' iz cuidi' queë',
ca na' raca queëba' bisiá'.

6 Runë' yugu' le naca dxi'a,
en ruchi'a rusöröë' quégaca yúgu'të nupa zoa nu rusaca' léguequi zi'.

7 Buzéajni'inë' Moisés yugu' le gun cazë' Lë',
en buluï'inë' bönachi Israel yugu' le zxön runë'.

8 Xanru' ruhuéchi' ladxi' cazë' bönachi, en ruzá' ládxë'ë quéguequi.
Biti' rilétenë', pero nadxfi'itiqui'sinë' léguequi.

9 Biti' ruzétiqui'sinë' rë'u le bach,
en biti' riléti'qu'i'sinë'.

10 Biti' runë' rë'u xigua' ca sa'yéaj dö' nuá'aru',
en biti' rubi'ë queëru' ca naca le xihui' nabága'ru'.

11 Naca caní tu' ca na' naca xitsá'terö lúzxiba ca luyú ni,
la' canísö naca zxön ca nadxi'inë' Xanru' nupa tadxi Lë'.

12 Tsca nácatérö zi'tu' ga rilén gubidza ga ridxitnë ga ribía,
la' canísö rucuite' yugu' le ta'bágá'ru' Lë'.

13 Ca na' ruhuéchi' ládxë'ë xúzgaca cázabi' yugu' zx'i'inë',
la' canísö ruhuéchi' ládxë'ë Xanru' nupa tadxi Lë'.

14 Caní runë' tu' nözinë' le nácaru'.
Röjenenë' néquiniru' bëchtö yo.

15 Tsca nácabaca dza zóaru' nabanru',
nácabaca ca raca que xiyija guíxi'do'.

16 Cate' recaj bö', ruúlu runítisö xiyija na',
en biti' naca bë' ga na' guzóa.

17 Xanru', tsaz nadxi'inë' nupa tadxi Lë',
en runë' quégaca zx'i'iniguequi le naca dxi'a.

18 Caní runë' quégaca nupa tun ca rnna xtídzë'ë,
en quégaca nupa tun ca rinná bë' xibá queë'.

19 Naguixjë' Xanru' xilatjë' yehua' yubá ga na' rö'ë rinná bë'ë.
Rinná bë'enë' yúgu'të le dë'.

20 ¡Guli'cu'ë yöl-la' ba Xanru', libí'ili', gubáz lá'ayi queë',
nápatéröli' yöl-la' huáca zxön, en runli' ca rnna xtídzë'ë,
libí'ili' na' runli' ca rnna didza'ru'ë!

21 ¡Guli'cu'ë yöl-la' ba Xanru', libí'ili' nácali' ni'a në'ë guizxi yu,
libí'ili', huen dxin queë' na', runli' ca rë'ëni quézinë' Lë'!

22 ¡Guli'cu'ë yöl-la' ba Xanru', yúgu'tëli' na' nucu'ë libí'ili',
libí'ili' zóali' yúgu'të lataj ga na' rinná bë'ë Lë'!

¡Bil-la yöl-la' ba queë' Xanru', li', bö' naca caza'!

104

1 ¡Gulu'ë yöl-la' ba Xanru', li', bö' naca caza'!

¡Nayépisëtérü' Li', Xana' Dios!

¡Zxo' nacu' naca yöl-la' zxön, en yöl-la' ba!

2 ¡Nusubaga' cuinu' bení' ca zxo' nacu cazu',
ate' naguixaj cazu' lúzziba ca tu lari' zxön!

3 Naguixju' xilataj lidxu' lahui nisa dë xitsá'alö.
Dxía cazu' lu böaj ca tu lu carreta, en ridó' lu bö' ös.

4 Rugunu' dxin bö' raca ca tu gubáz quiu',
enca' yugu' guí' ca huen dxin quiu'.

5 Nuzú' tsutsu luyú ni lu xilibi,
en biti' ca' gaca nu utsá' xilataj.

6 Gudixju' nisa zxön luyú ni ca tu lari' nabaga' le,
ate' yöjbaga' nísado' na' yugu' guí'a.

7 Buzenu' le bach nisa na', ate' burúaj,
en cate' biyón chi'u, bayúdx buzxunnaj nisa na'.

8 Gurén yugu' lu guí'a, en bötaj ga naca ra' yegu,
ga bidxitë yöjsóa ga nupó'o que nisa na'.

9 Gudixju' buzá' que nísado' ga biti' gaca tödi.
Bíti'rö caz tseajbaga' nisa na' luyú bidxi.

10 Runu' ga ralaj beaj yugu' lë'e guí'ado',
enca' ga ta'dödi yegu ga rö'ögaca röga'.

11 Yudzu yugu' yegu na' nisa té'ajba' böa' guixi',
le rugúa yöl-la' ribídx quégacaba' burro ta'dásiba' la' guixi'.

12 Yugu' ra' yegu rö'ögaca yaga ga tu'dxiaba' biguínndo' xcá'agacaba',
en túl-laba' yugu' lu ni' né'eguequi.

13 Rigú'u nisa guiöj quiu' yugu' lu guí'a,
en runu' ga tu'huöla tu'dzé'e yugu' le dzö'ö luyú.

14 Runu' ga rizzön yö le táguba' böa' bëdx,
en yugu' cuan guixi' tu'gún dxin böñachi,
le ilagu ni'a que le nudó'o luyú,

15 en xisi uva le run ga tudzeja ládxigacaba',
en za olivo le ta'gú'u láhuiguequi lu yöl-la' ruzí' xibé quéguequi,
en yöta le nabániguequi.

16 Tu'zí' xibé nisa guiöj yaga cedro dzö'ö lu guí'a Líbano,
yugu' yaga na' budó'o, Xantu'.

17 Ni' tu'dxiaba' biguínni xcá'agacaba',
ate' tunba' biyúz lídxigacaba' ni'.

18 Nunu' Li' yugu' guí'a sibi ga dzö'öba' bdxina' guixi',
enca' yugu' zxan bulóaj gapa tapa chi'i cuíngacaba' bizxidxu'.

19 Benu' beo' le naca bë' yugu' beo' que iz,
ate' ribía gubidza ga ral-la' cuíá.

20 Benu' chi'i dzö'ölö, en cate' naca chul-la
ta'rúajba' ta'daba' böa' guixi'.

21 Ta'bödxí'aba' bëdxí guíxi'do', ta'zóa régu'ba' le ila'zönba'.
Tu'guíljba' le nuzóë' Dios iláguba'.

22 Cate' rilén gubidza tu'dxinba' lídxigacaba',
 en röjöxagacaba' yugu' lu zxan bulóaj quégacaba'.
 23 Ní'irö ta'rúaj bönachi söjaca huen dxin,
 en tun caz dxin ga ridxitë ribía gubidza.
 24 Xan, ziánterö yugu' le nunu' Li'.
 Len yöl-la' réajni'i zxön quiu' nunu' yúgu'të.
 Nalí luyú yödzölió ni yugu' le dxí'a nunu'.
 25 Ni' zoa nisa nácaterö zxön,
 ga na' nacuá'aba' böa' guizxi yu,
 böa' cuidí', enca' böa' zxön.
 26 Ni' ta'dödi barco zxön,
 enca' böa' zxön lëba' leviatán, böa' na' nuzóa cazu'.
 27 Yúgu'tëba' ta'bözaba' Li',
 cate' idxinxrö ugagu' légacaba'.
 28 Rugagu' légacaba', ate' táguba'.
 Runödzju' le iláguba', ate' tu'huölaj ta'dzé'eba'.
 29 Cate' ruhuecju' quiu', tádxiba',
 en cate' ruzi'u bö' quiu', tátiba',
 en ruhuöáca yu le néquinigacaba'.
 30 Cate' rigú'u légacaba' bö', nabángacaba'.
 Rucubu' yúgu'të le nacuá' yödzölió.

31 ¡Ral-la' gácatica'sö yöl-la' ba queë' Xanru'!
 ¡Ral-la' ila'yaza ládxí'tica'sö bönachi le nun cazë' Lë'!
 32 Ruyúë' Xanru' luyú, ate' rizzizi.
 Riganë' yugu' guí'a, ate' rirúaj dzön.

33 ¡Gul-la' queë' Xanru' yúgu'të dza soa' ibana'!
 ¡Gul-la' yöl-la' ba queë' Dios tsanni ni zoa' nabana'!
 34 ¡Zixxi naca le riza' ládx'a' ca naca queë'!
 ¡Udzéjalenda'-në' Xanru'!

35 ¡Ila'nítie' bönni' dul-la' nacu'ë yödzölió ni,
 en bíti'rö ila'cuá' nupa tuá' dö'.

¡Gulú'u yöl-la' ba Xanru', li', bö' naca caza'!
 ¡Yöl-la' ba Lë' Xanru'!

105

- ¹ ¡Guli'guíë' Xanru' Dios: "Xclenu"!
- ¹ ¡Buli'lidze' Lë'!
- ¹ ¡Buli'siyón bönachi ca nácgacaca le benë'!
- ² ¡Guli'gul-la queë'! ¡Guli'gul-la yöl-la' ba queë'!
- ¹ ¡Guli'güi' didza' ca nácgacaca le zxön nunë'!
- ³ ¡Buli'sí' xibé Lë' lá'ayi!
- Ral-la' ulu'dzeja ladxi' yúgu'të nupa ta'guilaj Xanru'.
- ⁴ Guli'guilje' Xanru', enca' yöl-la' huáca queë'.
- Guli'güi' ládxí'tica'sö idixinli' lahuë'.
- ⁵ Guli'tsöjné le nácgacaca zxön benë' Lë',

lē na' tun ga rubániru', enca' ca nácagaca didza' bë'ë cate' buchi'a busöröë' bönachi,
6 libí'ili', zxí'ini xi'sóë' Abraham, huen dxin queë' Dios,
 en libí'ili', zxí'ini xi'sóë' Jacob, nácali' nupa gurö cazë' queë'.
7 Lë' náquië' Xanru' Dios.
 Idúte yödzölió naca bë' ca buchi'a busöröë' bönachi.
8 Röjnétiqui'sinë' didza' dzaga nunë',
 didza' na' gunná bë'ë ila'zí' lu ná'agaquië' chi gayuá' cö' zxí'ini xi'sóë' Abraham,
9 didza' dzaga na' bénlenë' Abraham,
 le naca didza' na' benë' tsutsu Dios ca gunë' queë' Isaac.
10 Ní'irö benë' tsutsu didza' na' lahuë' Jacob,
 le naca tu le rinná bë' enë' lë' gunë',
 para gaca quégaca bönachi Israel tu didza' dzaga le zoa tsaz.
11 Gunnë': "Gunna' queëli' xiýúgaca bönachi Canaán,
 le guequi tsaz queëli', en quégaca zxí'ini xi'sóali'."
12 Caní gunnë' Dios cate' ni' gula'cu'ë nabábaguquië' bönni' Israel.
 Tu chópasë' guláquië', en guláquië' bönni' zi'tu' luyú.
13 Gula'dé' tu ia'tú yödzö izá'a.
 Bulu'zé'ë tu ga nu gunná bë', en bila'dxínë' ga nacuá' bönachi izá'a,
14 pero bití' bë'ë lataj Dios nu usaca' zí' bönachi queë' na',
 en buzenë' le bach bönni' gula'nná bë'ë para gulácalenë' bönachi queë'.
15 Gunnë': "Bití' bi gunlí' quégaca bönachi nabö caza' quia',
 en bití' bi dö' guá'alí' quégagaquië' bönni' tu'ë didza' uláz quia'."
16 Benë' ga guyú'u gubín yödzölió,
 en benë' ga biyadzaj yötä ilahuë'.
17 Gusöl-lë'ë tubí' bi'i bönni', bi'i bidxinbi' ni' zí'alö ca légaquië',
 tu' gulutí'ë-bi' José para gácabí' bi'i nadó'o.
18 Gulúgu'ë bönni' Egípto ní'abi' len du guíë,
 en bulu'dé'ë yen ná'abi' bregui' guíë,
19 ga bidxitintë dza budxín xtídzë'ë Xanru',
 tu' guzxí' bë'ë Xanru' Dios José na'.
20 Ní'irö gusöl-lë'ë bönni' gunná bë'ë luyú Egípto nu busán-bi'.
 Bönni' na' gunná bë'enë' yödzö izá'a zián busölë'-bi'.
21 Benë' ga gúcabi' xan yu'u queë',
 ate' guta' lu ná'abi' yúgu'të le dë queë' bönni' na' rinná bë'ë.
22 Guta' lu ná'abi' gulú'ubi' lidxi guíë bönni' ta'nná bë'ë tsca rë'ëni quézibi',
 para busédibi' bönni' gula queë' yöl-la' réajini'i.
23 Ní'irö bila'dxín ca' bönachi Israel luyú Egípto.
 Caní guca, guzóë' Jacob lu xiýúgaca zxí'ini xi'sóë' Ham.
24 Benë' Dios ga gula'yánterö bönachi queë' luyú ni',
 ate' guláquië' ziánterë' ca nupa gula'dil-lalen légaquië'.
25 Benë' Dios ga gulunë' zí' bönni' Egípto bönachi queë'.
 Lu yöl-la' banis quégagaquië' gula'zí' yé'enë' nupa na' nácagaca huen dxin queë'
 Lë'.
26 Ní'irö gusöl-lë'ë Moisés, huen dxin queë', lógaquië',
 enca' Aarón, bönni' na' nabö cazë' Lë'.
27 Gulunë' chopë' ni zián yöl-la' huáca zxön queë' Dios lógaca bönachi Egípto
 na'.
 Gulunë' zián yöl-la' huáca que yehua' yubá lu xiýúgaca zxí'ini xi'sóë' Ham.

28 Gusöl-lé'ë Dios le naca chul-la, ate' böáca chul-la lahui' dza,
en biti' guca ila'dá'bagüe'ë xtídzë'ë.

29 Benë' ga nisa yegu nacuá' lu yegu quégaquië' böáca rön,
en benë' ga gulátiba' bôla dzö'öba' yugu' yegu na'.

30 Gula'yanba' riu lu xiyúgaquië',
ga bidxitné gula'yázaba' yu'u lidxé' bönni' rinná bë'enë' légaquië'.

31 Bë'ë didza' Dios, ate' gulátsjaba' bôtsugayu guizxi yu,
en gulátsjaba' ca' bõ'i yudo' idútë lu xiyúgaquië'.

32 Benë' ga gurö'ö guiöj bögi' yöla sunna uláz que nisa guiöj,
ate' böxaj ca' guí' lu xiyúgaquië'.

33 Guditsjë' yugu' lubá uva quégaquië', en yugu' yaga higo,
en busunítië' yaga rö'gaca lu xiyúgaquië'.

34 Bë'ë didza', ate' bila'dxinba' böchi'zu guizxi yu,
enca' böchi'zu hué'ënido', cuntu nu gaca ulaba légacaba',

35 ate' guláguba' idútë guixi' cuan rö'ö lu xiyúgaquië',
en guláguba' ca' idútë le naz nudá'agaquië' lu xiyúgaquië'.

36 Benë' ga gulátibi' yúgu'tébi' bi'i bönni' lo idútë lu xiyúgaquië'.
Bi'i lo na' quégaquië' bönni' nál-la.

37 Ní'irö bubéajë' Dios yugu' bönni' Israel luyú na', nuá'agaquië' dumí plata,
en oro,

ate' cuntu nu yöjchegu' nu nutsa' légaquië'.

38 Bulu'dzeja bönachi Egípto cate' bulu'zé'ë bönni' Israel lu xiyúgaquië',
ate' guladxi gula'dzöbi tu' nöziguequinë' bönni' Israel na'.

39 Gusöl-lé'ë Dios tu böaj le gulú'u bönachi queë' zxul-la,
ate' chi'i dzö'ölö gusöl-lé'ë guí' le buzení' quégaquië'.

40 Gula'nábinë' Lë', ate' gusöl-lé'ë böra guixi'do' zián le ilahuë',
en benë' ga bulu'huöläj gula'dzé'enë' yöta que yehua' yubá.

41 Bulu'ë lahui tu guiöjto'o, ate' gulalaj nisa yégudo'.

Gudödi nisa na' luyú bidxi ni' ca tu nisa yegu gubo'o.

42 Caní benë' Dios tu' yöjenenë' didza' lá'ayi queë',
le guzxí' lu né'ë gunë' queë' Abraham, huen dxin queë'.

43 Bubéajë' bönachi queë' lu yöl-la' rudzeja quéguequi,
ate' lu yöl-la' rudzeja quéguequi gula'bödxí'a bönachi gurö cazë' queë'.

44 Bunödzjë' xiyúgaca bönachi yugu' yödzö izá'a quégaquië'.

Bulu'zi'ë xibé le ilá' luyú ni'a que dxin gulún bönachi izá'a na'.

45 Caní benë' Dios para ilunë' ca rnna le gunná bë'enë' légaquië' ilunë',
en ilunë' ca rinná bë' xibá gudixjë' Lë'.

¡Guli'cu'ë yöl-la' ba Xanru'!

106

1 ¡Guli'cu'ë yöl-la' ba Xanru'!

¡Guli'guí'e' Xanru': "Xclenu'" tu' náquië' idú dxí'a!

¡Zóatica'sö yöl-la' dxí'i ladxi' queë'!

2 ¿Nuzxi caz gaca quixjö' ca nácagaca le zxön nunë' Xanru',
en uluí'i lahui ca naca yöl-la' ba queë'?

3 ¡Bica' ba nupa tun le naca tsahui',
nupa na' túntica'sö le naca dxí'a!

- 4** Yöjné neda', Xan, cate' ruzá' ládxu'u quégaca böñachi quiu'.
 Buzá' ladxi' quia' yöl-la' rusólá quiu',
5 para gaca ilé'eda' gata' yöl-la' tsahui' quégaca nupa narõ cazu' quiu',
 en para gaca udzéjalenda' böñachi quiu' cate' tu'dzeja,
 en para gaca uzi'lena' xibé nupa néquiguequi quiu'.
6 Nuntu' dul-la' ca gulunë' xuz xtó'otu'.
 Biá'atu' dö', en bentu' le naca xihui'.
7 Cate' gula'cu'ë xuz xtó'otu' luyú Egípto,
 biti' gula'yéajni'inë' le nácagaca zxön benu'.
 Biti' yöjnéguequinë' yugu' le benu' quégäquië' lu yöl-la' dxi'i ladxi' quiu',
 pero gula'dá'baguë'ë xtídzu'u cate' gula'cu'ë ra' nísado' lë Nísado' Xiná.
- 8** Busölë' Xanru' Dios légaquië' para gaca bë' runë' ca rnna xtídzë'ë,
 en para ulu'e lahui yöl-la' huáca zxön queë'.
9 Caní guca, buzenë' le bach Nísado' Xiná na', ate' la' gubíxitë.
 Guchë'ë légaquië' ga rë'do' lu nísado' na',
 ate' gula'dë' lu yu bidxi ga na' gurö'ë nisa.
10 Caní guca, busölë' légaquië' lu na' nu na' benë' légaquië' zi',
 en buá'ue' légaquië' lu na' nu na' gudí-lalen légaquië'.
11 Ní'irö' gubaga' nísado' na' nupa gula'sí regu'légaquië'.
 Cuntu nu bugá'ana nu bidzaga léguequi.
12 Ní'irö' gula'yéajlë' böñachi queë' xtídzë'ë,
 ate' gulul-la yöl-la' ba queë'.
13 Pero la' gulál-latë ládx'i'gaquië' yugu' le benë'.
 Biti' gula'nábinë' Lë' uluf'inë' légaquië' le ral-la' ilunë'.
14 Zián le gula'zë ládxë'ë cate' ni' gula'cu'ë la' guixi' ga dë lataj,
 en gula'zí' bë'ë Dios la' guixi' na'.
15 Ní'irö' bë'ë Dios quégäquië' le gula'nábinë' Lë',
 pero gusól-lë'ë quégäquië' tu yödzöhuë' le bëti ziángaquië'.
16 Cate' bulu'zxé'enë' Moisés ga ni' gula'cu'ë tsózxön,
 en bulu'zxé'enë' ca' Aarón, bönni' nubéajë' Xanru' quez queë',
17 la' ná asö guyalaj luyú, en bucachi' Datán.
 Bucachi' ca' nupa gulún tsózxön Abiram.
18 Gulaj tu guí' zxön ga na' nudúbigaquië',
 en buzegui' nupa na' guluá' dö'.
19 Lu guí'a Horeb gulunë' tu bëdxido' néquiniba' oro,
 en gula'yéaj ládxë'ë budó' oro na'.
20 Caní guca bulu'cá'anë' Dios nayépisétë',
 para gula'yéaj ládxë'ë budó' oro le naca ca tu bëdxí ráguba' guixi'.
21 Gulal-la ládxë'ë Dios Nu busölá légaquië'.
 Lë' benë' zián le zxön le gulácalen légaquië' luyú Egípto.
22 Benë' zián le tun ga rubániru' lu xiyúgaca zxi'ini xí'sóë' Ham,
 en zián le tun ga rádirixu' Lë' le benë' ra' Nísado' Xiná.
23 Que lë ni na' gunnë' Dios usunítië' légaquië', ate' la' cá'asö gunë'
 la'tu' cabí guzuínë' Moisés, bönni' rö queë', lahuë' Lë',
 en buzúa dxië' yöl-la' rilé queë' para cabí usunítië' légaquië'.
24 Ní'irö' biti' gulé'ënë' ila'yázië' luyú dxi'a na' dë lógaquië'
 tu' cabí gula'yéajlë'ë xtídzë'ë Dios.
25 Gula'nnë' zi'ë queë' Dios gapa naca lu yu'u guídi quégäquië',

en biti' bulu'zé náguië' chi'ë Xanru'.

26 Que lë ni na' benë' tsutsu Dios xtídzë'ë le bë'lenë' légaquië', gunnë' gunë' ga ilatië' ga na' naca la' guixi' ga dë lataj.

27 Gunnë' gunë' ga ilasi lásië' zxi'ini xi'sóagaquië' ladaj zián yödzö izá'a, en gúsië' légaquië' gapa nacuá' bönachi zì'tu'.

28 Ní'irö bulu'dödi cuíngaquië' lu na' budó' guë' le Baal-peor, en gulahuë' xipëla'gacaba' böa' guixi' gulutië'-ba' para gulunë' zxön yugu' dios natí.

29 Ca' guca, gulún lenë' Dios ni'a que le gulunë', ate' gulén tu yödzöhuë' zxön lágagaquië'.

30 Ní'irö guzuínë' Finees, en benë' le raza ládxë'ë Dios, ate' guzóa dxi yödzöhuë' zxön na'.

31 Buzoë' Dios queë' Finees na' náquië' tsahui' ni'a que lë na' benë' le nuzoë' tsaz ca naca queë'.

32 Lësca' gulún lenë' Dios ga na' zoa nisa lë Meriba, ate' Dios gulénë' Moisés tu' nözi lë na' gulunë'

33 tu' gula'dá'baguë'ë xtidxë'ë Bö' Lá'ayi queë', ate' Moisés, lu yöl-la' ridzá'a queë', gunnë' lizë'.

34 Biti' bulu'sunítië' bönachi tuá' dö' gula'cuá' lu yu ni, ca na' gunná bé'enë' Xanru' légaquië' ilunë'.

35 Gulunë' léguequi tsözxön

en bila'zëdë' ilunë' ca gulún bönachi na',

36 ate' gula'yéaj ládxë'ë budó' guiöj budó' yaga quéguequi, le guca quégagaquië' ca tu du yalaj le guzxön légaquië'.

37 Gulutië'-bi' zxi'inigaquië' lógaca bö' xihuï', yugu' bi'i bönni', en nigúlado',

38 en bulu'laljë' xichöngaca nupa biti' bi nabága'gaca tu' bulu'laljë' xichöngacabi' bi'i bönni' quégagaquië', en bi'i nigula quégagaquië', yugu' bi'i na' gulutië'-bi' lógaca budó' guiöj budó' yaga nacuá' luyú Canaán, ate' gúcada' xihuï' luyú ni tu' nözi rön na' bulu'laljë'.

39 Ca' guca, guláquië' xihuï' ni'a que le gulunë'.

Guláquië' ca tu nigula udá dzaga tu' bulu'cá'anë' Dios quégagaquië'.

40 Que lë ni na' guléde'enë' Xanru' Dios bönachi queë', en biti' bilé'enë' dxi'a nupa na' néquiguequi queë'.

41 Ní'irö budödë' légaquië' lu ná'agaca bönachi zián yödzö izá'a, ate' nupa bulu'dí'i légaquië' gula'nná be'e légaquië'.

42 Nupa na' biti' bila'lé'e légaquië' dxi'a gulunda' légaquië' dxin, en bulu'zxicaj légaquië' lu yöl-la' unná bë' quéguequi.

43 Zián luzuí gó'unë' Dios usöle' légaquië', pero gula'dá'baguë'ë le rë'ënë' ilunë', ate' guzxöntérö xiguia' nabága'gaquië'.

44 Bilé'enë' Dios yöl-la' bayechi' quégagaquië', en biyönnë' ta'bödxi yechë'ë.

45 Yójnenë' didza' dzaga núnlenë' légaquië', ate' bubequi lahuë' quégagaquië' tu' nazxöntérö yöl-la' dxi'i ladxi' queë'.

46 Benë' Dios ga bulu'huéchi' ladxi' légaquië' nupa na' gula'chë' légaquië' nadzúngagaquië'.

47 ¡Busölä netu', Xantu' Dios!

Guléaj netu' ládjagaca yödзö izá'a
 para guíetu' Li': "Xclenu'" ni'a que Lo' lá'ayi,
 en lu yöl-la' rudzeja zxön queétu' cí'utu' Li' yöl-la' ba.
48 ¡Yöl-la' ba Lé' Xanru', Dios quégaca bönachi Israel
 na'a dza, en yúgu'té dza si' zaca!
 Ral-la' ila'nná yúgu'té bönachi: "¡Ca' gaca!
 ¡Guli'cu'ë yöl-la' ba Xanru' Dios!"

107

1 ¡Guli'guië' Xanru': "Xclenu'" tu' náquië' dxi'a,
 en tu' zóatica'sö yöl-la' dxi'i ladxi' queë'!

2 Ral-la' ila'nná caní nupa na' buá'uë' Xanru',
 nupa na' buá'uë' lu ná'agaca nupa gulún léguequi zi',
3 en nubéajé' léguequi zián lu yödзö izá'a,
 saca' ga rilén gubidza, en saca' ga ribía,
 saca' ga za' bő' ziaga, en saca' ga ridödi gubidza beo' ziaga.

4 Bal-lë' gula'dë' nanítigaquië' la' guixi' ga dë lataj,
 en ga ni' biti' zoa nöza.

Biti' guca ulu'dzölinë' tu yödзö ga gaca tsöjcu'ë.

5 Gula'dunë', en gula'bidxë' nisa,
 en gudú ládx'i'gaquië'.

6 Ní'irö lu lë na' raca quégäquië' bulu'lidzë' Xanru',
 ate' busölë' légaquië' lu zián le gula'guí'i gula'záquë'ë.

7 Guchë'ë légaquië' tu la' nöza tsahui',
 en guchë'ë légaquië' tu lu yödзö ga tsöjcu'ë.

8 Ral-la' ilë' Xanru': "Xclenu'" tu' nadxi'inë' légaquië',
 en tu' benë' yugu' le zxön, gúcalenë' légaquië'.

9 Rugui'jë' nupa ta'bidxi ladxi',
 en rugahuë' nupa ta'dún le nácagaca dxi'a queë'.

10 Bal-lë' gula'cu'ë ga chul-la, en ga zoa bönadxi ilátië'.
 Gula'dzunë' yugu' lu du guíë, en gula'guí'i gula'záquë'ë

11 tu' gula'dá'baguë'ë xtídzë'ë Xanru' Dios,
 en bulu'zöë' tsölá'alö le rigu'ë icja ládx'i'do'gaquië'.

12 Tu' gulunë' bayúdx dxin, gudú ládx'i'gaquië'.

Gula'dzö'ë lu yu zxan yua' nuá'agaquië',
 ate' cuntu nu zoa gácalen légaquië'.

13 Ní'irö lu lë na' raca quégäquië' bulu'lidzë' Xanru',
 ate' busölë' légaquië' lu zián le gula'guí'i gula'záquë'ë.

14 Bubéajë' légaquië' ga na' gula'cu'ë ga chul-la,
 en ga guzóa bönadxi ilátië',
 ate' guditsjë' yugu' du guíë núga'gaquië'.

15 Ral-la' ilé' Xanru': "Xclenu'" tu' nadxi'iné' légaquië',
en tu' bené' yugu' le zxön, gúcalenë' légaquië'.

16 Ruquínnajë' le tá'baga' gapa nu riyaza lidxi guíë le néquiniguequi guíë
bronce,
en ruzxuzxjë' yugu' vara néquiniguequi guíë.

17 Bal-lë' gula'guí'i gula'záquë'ë tu' gula'dá'baguë'ë Dios,
en tu' nözi dö' gulu'ë.

18 Gula'gúti'né' bíti'tës la' huagu,
en gula'zóá ilátië'.

19 Ní'irö lu lë na' raca quégaquië' bulu'lidzë' Xanru',
ate' busölë' légaquië' lu zián le gula'guí'i gula'záquë'ë.

20 Gusöl-lë'ë quégaquië' xtídzë'ë, en bunë' légaquië',
en busölë' légaquië' lu yöl-la' guti.

21 Ral-la' ilé' Xanru': "Xclenu'" tu' nadxi'iné' légaquië',
en tu' bené' yugu' le zxön, gúcalenë' légaquië'.

22 Ral-la' ilé' Dios: "Xclenu'", en bi ulu'nödzjë' queë',
en lu yöl-la' rudzeja quégaquië' ilul-lë' ca nácabaca le nunë'.

23 Bal-lë' gula'dödë' lahui nísado' yugu' lu barco zxön,
en gulunë' dxin yugu' lu nísado'.

24 Bila'lé'enë' yugu' le nunë' Xanru',
en yugu' le zxön nucu'ë lu nísado'.

25 Bë'ësë' didza', ate' guyecja bö' budunu',
ate' guyasa gudxia nísado'.

26 Gula'yasa barco ca tu lu guf'ado' nisa,
en la' bôtjatë ga rö'ö röga' lu nisa na'.

Tu' guzóale'ë bönadxi ilátië' gudú ládzi'gaquië'.

27 Gula'zxizië', en yöjchégü'gaquië' ca bönni' ta'zúdxinë',
ate' nítisö guca yöl-la' rácada' quégaquië'.

28 Ní'irö lu lë na' raca quégaquië' bulu'lidzë' Xanru',
ate' busölë' légaquië' lu zián le gula'guí'i gula'záquë'ë.

29 Benë' Dios ga guzóa dxisö bö' budunu' na' recja,
ate' guzúa dxi le rasa ridxía lu nísado'.

30 Bulu'dzéjanë' tu' guzúa dxi lu nísado',
en tu' guchë'ë Dios légaquië' dxi'a tsáhui'do' ga na' söjáquië'.

31 Ral-la' ilé' Xanru': "Xclenu'" tu' nadxi'iné' légaquië',
en tu' bené' yugu' le zxön, gúcalenë' légaquië'.

32 Ral-la' ulul'u'ë lahui yöl-la' zxön queë' ga nudúbigaca böñachi queë',
en ila'gu'ë Lë' yöl-la' ba ga nudúbigaquië' bönni' gula tu'chí'a tu'söröë'.

33 Runë' Xanru' Dios ga tu'hu'i dërö yugu' yegu,
enca' yugu' beaj nisa.

34 Ga naca yu ya'a runë' ga ruhuöáca yu bidxi,

ni'a que le xihui' nabága'gaca nupa nacuá' ni'.

35 Ga naca yu bidxi runë' ga ruhuöáca yu nabisa,
ate' ralaj nisa ga bití' bi nisa guzóá.

36 Ni' ru'ë lataj ila'cuá' nupa ta'dún
para iluné' ni' yödzö ga ila'cu'ë.

37 Tazë' yugu' le tazë', en tu'dé'ë yugu' lubá uva,
yugu' le ta'bía yödxi yana'.

38 Runë' Xanru' ga raca dxí'a quégaquië',
en ga ta'cuá'bi' ziánbi' bi'i quégaquië',
en runë' ga ta'yanba' böa' bëdxi quégaquië'.

39 Cate' yugu' bönni' unná bë' zi'tu' tu'zxicjë' böñachi queë',
en tu'zötjë' léguequi,

en tu'saca' zi'ë léguequi, en tu'ë dö' quéguequi,

40 rucá'anë' Dios bönni' na' dë lu ná'agaquië' cá'asö,
en runë' ga ta'dé'la' guixi' ga dë lataj, en tu luyú bidxi.

41 Rusölë' yugu' bönni' yechi' lu le ta'gui'i ta'záquë'ë,
en runë' ga ta'yanbi' zxí'inigaquië' ca ta'yánba' bö'cu' zxíla'do'.

42 Ta'lé'e lë ni nupa nácagaca tsahui', en tu'dzeja,
pero bití' bi ta'nná nupa tuá' dö'.

43 Nupa ta'yéajni'i ral-la' sa' ládxí'gaca ca nácagaca lë ni,
ate' iléquibe'e náquië' Xanru' Dios dxí'i ladxi'.

108

¹ ¡Chinabá'a quia', Dios!

¡Gul-la' quiu'! ¡Ön, idú ládex'a gul-la' yöl-la' ba quiu'!

² ¡Guli'bán, libí'ilí' riguínali' bihuël-la!

¡Gúl-laru' cate' ni' ritó yu!

³ ¡Guía' Li': "Xclenu'" Xan, ládjagaca böñachi yugu' yödzö izá'a!

¡Gul-la' yöl-la' ba quiu' lógaca yúgu'të böñachi!

⁴ ¡Zxöntëro naca yöl-la' dxí'i ladxi' quiu', le ridxitë lúzxiba xitsá'!

⁵ Bulu'i lahui lúzxiba yöl-la' zxön quiu', Dios,
ate' lahui yödzölió ni bulu'i lahui yöl-la' bení' quiu',

⁶ para usóló' netu', böñachi quiu', nupa nadxi' inu'.

Len yöl-la' huáca zxön quiu' busólá netu', en bubí'i didza'.

⁷ Lu lataj lá'ayi queë' bë'ë didza' Dios, gunnë':

"Uzi'a xibé, en quísia' xiyúgaca böñachi Siquem,
en urixa' luyú dë cuiti yegu Sucot.

⁸ Nequi quia' xiyúgaca böñachi Galaad,
enca' xiyúgaca zxí'ini xi'sóë' Manasés.

Naca ca tu le rusubín icja' xiyúgaca zxí'ini xi'sóë' Efraín.

Naca ga rinná bë'a xiyúgaca zxí'ini xi'sóë' Judá.

⁹ Naca ca tu ga riguibi na'a xiyúgaca böñachi Moab,

ate' lu xiyúgaca böñachi Edom chú'una' lölá'.

Códxia' tu' uxicia' böñachi Filistea."

¹⁰ ¿Nuzxi caz gaca ichë' neda' lu yödzö

dë zö'ö idú gásibi' ilö le run chi'i yödzö na'?
 ¿Nuzxi caz gaca iché' neda' lu xiýúgaca bönachi Edom?
¹¹ ¿Naru' cabí nusán ládxu'u netu', Dios?
 ¿Naru' cabí tséajlenu' bönni' queétu' rójáquië' gudil-la?
¹² Gúcalen netu' cate' til-lalento' nupa dutí-lalen netu',
 tu' naca dádusö gácalen netu' nu naca bönáchisö.

¹³ Len yöl-la' huáca queë' Dios idéli'ru'
 tu' uxicja cazé' Lé' nupa ta'díl-lalen rë'u.

109

¹ Rigu'a Li' yöl-la' ba, Xana' Dios.

Biti' su' dxiso,

² tu' ta'nná quia' nupa tuá' dö', en ta'zí' yë'.

Lu yöl-la' rizi' yë' quéguequi tuí'i didza' le tu'zegui' neda'.

³ Nagú'ugaca neda' lé'ajlö,

en lu yöl-la' biti' rilé'e neda' dxia' tu'ítica'sö didza'.

⁴ Sal-la' nadxi'ida' léguequi, tu'zegui' neda' didza',

pero neda' rulidza' Li'.

⁵ Bena' quéguequi le naca dxia', pero bulu'bí'i quia' le naca dö'.

Nadxí'ida' léguequi, pero biti' ta'lé'e neda' dxia'.

⁶ Buzóa tu bönni' huá' dö'

para uchi'a usöröe' que nu na' biti' rilé'e neda' dxia'.

Ben ga soa gagu nu üzegui' nu na' didza'.

⁷ Cate' nu uchi'a usörö bönni' na', biti' gu'u lataj urúajë' dxia'.

Buyú le rinábinë' Li' tscá naca dul-la' nabáguë'ë.

⁸ Ben ga ilaca nabábasö dza soë' ibanë'.

Ben ga tsu'u nu yúbölö uláz queë'.

⁹ Ben ga ilácabí' zxí'inë' bi'i uzëbi,

en ga gácanu nigula queë' nigula uzëbi.

¹⁰ Ben ga ila'dásöbi' zxí'inë' ila'nábibí' nu bi unödzaj quégacabi'.

Ben ga ila'guíjabí' le ilágubi' zi'tu' ga zoa lídxigacabi' le nadachi.

¹¹ Ben ga ugúa nu bi benna lé' tu chí'isö idútë le dë queë',

en ben ga ila'banë' bönni' zi'tu' le rulá' dxin runë'.

¹² Ben ga biti' soa nu huéchi' ladxi' lé',

en biti' soa nu uzá' ladxi' quégacabi' zxí'inë' nácagacabi' bi'i uzëbi.

¹³ Ben ga udxi quégaca zxí'ini xi'sóe',

en ga idxín dza biti'rö soa nu si' la ca guzxí'ilë'.

¹⁴ Yójnética'sö le xihui' gula'bágue'ë xuz xtá'ahuë', Xan,

en biti' gal-la ládxu'u dul-la' bennu xinë'ë.

¹⁵ Ben ga ila'cuá'tica'sö dul-la' na' lo' Li', Xan,

para cabirö nu soa yödzolió nu tsöjnë lé'.

¹⁶ Biti' buéchi' ládxë'ë luzë'ë,

pero gudxía nahuë' nupa gula'guí'i gula'zaca',

en nupa gula'yadzaj gula'yudxi,

enca' nupa gula'sébi ladxi', ate' bëtië' léguequi.

¹⁷ Bidxi'inë' le rudxiá luzë'ë dö'.

Ben ga ulu'bí'i ca' queë'.

Biti' raza ládxë'ë gaca dxia' que luzë'ë.

Ben ga biti' gaca dxia' queë'.

18 Gulaca ca zxë' nácuë' didza' xihui' bë'ë,
ate' gula'yaza le nayá' nabanë' ca nisa,
en gula'yú'u ca' dxita queë' ca le za.

19 Ben ga ilaca queë' ca tu lari' rixóa cídzë'ë,
en ca xipanë' rúgui'ë lë'ë.

20 Bubí'i caní quégaca nupa tu'zegui' neda' didza', Xan,
enca' quégaca nupa tu'i didza' zi' que bö' naca caza'.

21 Li', Xana' Dios, ben quia' le naca dxi'a
para gaca bë' runu' ca rnna xtídu'u.

Tu' naca dxi'a yöl-la' dxi'i ladxi' quiu', busólá neda'.

22 Rigu'i rizáca'a, en riyadzaj riyúdxida',
en raca zi' ládxid'a'ahua'.

23 Ridödi quia' ca raca que tu zxul-la cate' ribía gubidza.
Naca' ca tuba' böchí'zu, riché' bö' recja lëba'.

24 Ta'cuidi' zxiba' tu' runa' gubasa.

Nadxita', en bíti'rö rö'ö za lu bëla' rön quia'.

25 Nupa biti' ta'lé'e neda' dxi'a tu'titaj neda'.

Cate' ta'lé'e neda', tu'tá ícjaguequi.

26 Gúcalen neda', Xana' Dios.

Lu yöl-la' dxi'i ladxi' quiu' busólá neda'.

27 Ben ga iléquibe'e rácalen cazu' neda'.

Nun cazu' Li' lë ni, Xan.

28 Tu'dxía neda' dö', pero Li', ben ga gaca dxi'a quia'.

Cate' ila'yasë', ulu'tu'finë',

pero udzéjada' neda', huen dxin quiu'.

29 Ben ga ulu'gá'ana cá'asö nupa tu'zegui' neda' didza',
en ben ga gaca yöl-la' rutu'i quéguequi ca tu lari' nabaga' léguequi.

30 Len ruá' cuina', zián luzuí guía'-në' Xanru': "Xclenu'",
en ladaj bönachi zián cu'a Lë' yöl-la' ba,

31 tu' zuínë' cuita lë'e ibëla nu riyadzaj riyudxi

para usöle' nu na' lu ná'agaca nupa tu'siúdxí bö' naca caz nu na'.

110

1 Xanru' Dios gudxë' Xana': "Gurö'i cuita lë'a ibëla
cate' gunra' ga ulu'zechu zxibigaca lo'
nupa biti' ta'lé'e Li' dxi'a."

2 Ga zoë' yödzö Sión gusól-lë'ë Xanru' yöl-la' unná bë' quiu',
gunnë': "Gunná be'e nupa biti' ta'lé'e Li' dxi'a.

3 Ulu'dödi cuínguequi lu no'o bönachi quiu'
cate' si'u yöl-la' unná bë' quiu'
tu' napu' yöl-la' lachi que le naca lá'ayi."

Illa'cuá' bi'i bönni' ga zu' ca ribö'ö buzén zílado'.

4 Runë' tsutsu xtídzë'ë Xanru', en biti' utsë'ë le, rnnë':
"Tsaz nacu' bixúz ca na' gúqui' Melquisedec bixúz."

5 Zoa cazë' Xanru' cuita lë'u ibëla.
Ucul-lë' bönni' ta'nná bë'ë cate' idxín dza usiúdxë' luyú.

6 Uchi'a usöröë' quégaca bönachi yúgu'të yödzö izá'a,
ate' ilí yödzölió len bëla' rön quéguequi.

Uzötjé' nupa ta'nná bë' zián lu yödzö izá'a.

7 Gui'jé' nisa beaj ra' nöza,
en ni'a que lë ni huöáca ládxë'ë.

111

1 ¡Guli'cu'ë yöl-la' ba Xanru'!

Idú ládx'a rea'-në' Xanru': "Xclenu'."

Runa' caní tsazxöñ len bönni' tsahui' zián ga na' nudúbigaca bönnachi queë'.

2 Zxöñ nácagaca le nunë' Xanru'.

Yúgu'të nupa ta'yaza ládx'i gaca lë na' benë' tu'sëda ca nácagaca.

3 Idútë dxi'a nácagaca, en nayëpisëtérögaca le nunë' Lë',
ate' idía'tica'sö le naca tsahui' queë'.

4 Chinunë' ga tsöjneru' yugu' le benë', le tun ga rubániru'.

Náquië' Xanru' dxi'i ladxi', en ruí'i ládxë'ë rë'u.

5 Rugahuë' nupa tadxi Lë'.

Röjnética'së' didza' dzaga núnlenë' bönnachi queë'.

6 Buzéajni'inë' bönnachi queë' ca naca yöl-la' huáca quégaca le nunë',
le benë' ga gula'déli'në' xiyúgaca bönnachi izá'a.

7 Tsahui', en idútë li nácagaca le núngaca lu né'ë.

Nácagaca tsutsu yúgu'të xibá gunna bë'ë.

8 Rucuá'tica'së' tsutsu xibá queë',

en rusudxinë' léguequi lu le naca idútë li, en le naca tsahui'.

9 Gusöl-lë'ë Nu buá'uö bönnachi queë'.

Tsaz nuzóë' didza' dzaga nunë'.

Lá'ayi, en ba'a ladxi' naca Lë'.

10 Lu yöl-la' radxi queëru' Lë' risí loru' ridéli'ru' yöl-la' réajni'i.

Yúgu'të nupa tun ca ta'nná bë' xibá queë' nápagaca yöl-la' réajni'i.

Ila'cuá'tica'sö nupa ila'gú'u Lë' yöl-la' ba.

112

1 ¡Guli'cu'ë yöl-la' ba Xanru'!

¡Bica' ba bönni' na' rádxinë' Xanru',
bönni' na' raza ládxë'ë runë' ca gunna bë'ë Dios!

2 Tsëpisëgaca zxí'ini xi'sóë' bönni' na' yödzölió ni.

Gáquië' bica' ba bönni' na' runë' le naca dxí'a.

3 Lu yu'u lidxë'ë gata' yöl-la' tsahui',
ate' idía'tica'sö le naca tsahui' runë'.

4 Gulén bení' ga ridé' bönni' tsahui' ga na' naca chul-la.

Ruzá' ládxë'ë que luzë'ë, en ruí'i ládxë'ë lë', en runë' le naca dxí'a.

5 Gaca dxí'a queë' bönni' ruzá' ládxë'ë que luzë'ë,
en runnë' que tu chí'isö le riyadzaj que.

Urúajé' dxi'a cate' nu uchi'a usörö queë'.

6 Catu caz gaca nu utsá' bönni' na',
ate' sóatica'sö nu tsöjnë lë'.

7 Biti' gádxinë' cate' nu usiyöni lë' le cabí raca dxí'a.

Ridipa ládxë'ë tu' ruzxöni ládxë'ë Xanru' Dios.

8 Dios rutipë' ládxë'ë, ate' biti' gádxinë'
cate' idxinrö dza ilé'enë' nuhuötgagaca nupa ta'díl-lalen lë'.

9 Idú ládxë'ë runödzjë' quégaca böñachi yechi'.

Idía'tica'só le naca dxí'a runë'.

Dios uchisë' lë' ga tsépisë'.

10 Ila'lé'e lë ni nupa tuá' dö', en ila'bö' baguí'isö.

Ilagu zxe láyi'gaca, en ila'niti cuínguequi.

Tsaz initi le ta'zé láxi'gaca nupa tuá' dö'.

113

1 ¡Guli'cu'ë yöl-la' ba Xanru'!

¡Guli'cu'ë yöl-la' ba, libí'ilí huen dxin queë' Xanru'!

¡Guli'cú'u yöl-la' ba Lë' Xanru'!

2 ¡Cú'uru' yöl-la' ba Lë' Xanru',
cate' risí lo na'a, en yugu' iz sí' zaca!

3 ¡Ga naguela' ga rilén gubidza ga ridxitnë ga ribía,
cú'uru' yöl-la' ba Lë' Xanru'!

4 ¡Nayépisétërë' Xanru' Dios ca yúgu'të yödzö izá'a!

¡Nazxöntërë yöl-la' zxön queë' ca naca lúzxiba!

5 ¿Nuzxi caz zoa naca ca náquië' Xanru' Dios?

Rö'ë rinná bë'ë ga na' nayépisétërë'.

6 Ruzötaj cuiné' para uyúë'
le dë lúzxiba, en le dë luyú ni.

7 Ruchisë' nupa nácagaca yechi', rubéajë' léguequi lu bëchtö yu.

Ruchisë' nupa ta'yadzaj, rubéajë' léguequi lu dö bëbu.

8 Runë' ga ta'bö'len nupa ta'nná bë'.

Ta'bö'len nupa ta'nná be'e böñachi queë'.

9 Runë' ga zóanu nigula huödx yu'u lídxinu.

Rudzeja láxi'nu tu' runë' ga nacuá'abi' zxif'ininu.

¡Guli'cu'ë yöl-la' ba Xanru'!

114

1 Cate' bila'rúaj böñachi Israel luyú Egipto

bila'rúajë' zxí'ini xi'sóë' Judá ladaj nupa tuí'i didza' izá'a.

2 Zxí'ini xi'sóë' Judá guláquië' ca lidxë' Xanru' Dios,
ate' gulaca böñachi Israel nupa rinná bë'enë' Dios.

3 Lahuë' Dios bubiga' nísado',
ate' bubí'i nisa yegu Jordán.

4 Gula'xiti' guí'a zxön ca yugu' bö'cu' zxila' biguiú',
ate' gula'xiti' ca' guí'ado' ca yugu' bö'cu' zxila'do'.

5 ¿Bi raca quiu', nísado', tu' rubigu'?

¿Bi raca quiu', yegu Jordán, tu' rubí'i nisa quiu'?

6 ¿Bi raca queéli', guí'a zxön, tu' rixítí'lí' ca yugu' bö'cu' zxila' biguiú'?

¿Bi raca queéli', guí'ado', tu' rixítí'lí' ca yugu' bö'cu' zxila'do'?

7 Guzxizi lahuë' Xanru', yödzölió.

Guzzizi lahuë' Dios queë' Jacob.

8 Benë' Dios ga gulaj nisa tu lë'e guiöjto'o,

en benë' ga böáca le guca guiöj jara tu ga rilén nisa.

115

¹ Calëga queëtu', Xan, calëga queëtu',
pero que lo' gaca yöl-la' ba
tu' nacu' dxi'i ladxi', en le naca idútë li.

² ¿Bizx que ta'nná böñachi yugu' yödzö izá'a:
"Gazxi caz zoë' Dios quégäquié""?

³ Zoë' Dios queëru' yehua' yubá.
Runë' le raza ládxë'ë gunë'.

⁴ Néquiguequini plata, en oro budó' quégaca böñachi izá'a na',
yugu' le núngaca lu ni'a lu na' böñachi.

⁵ Nacuá' ruíiguequi, pero biti' gaca ilu'i didza'.
Nacuá' guiój lógaca, pero biti' gaca ila'lë'e.

⁶ Nacuá' nágagaca, pero biti' gaca ila'yöni.
Nacuá' zxíniguequi, pero biti' gaca ila'lë'e.

⁷ Nacuá' ná'agaca, pero biti' bi gaca ila'gán.
Nacuá' ní'agaca, pero biti' gaca ila'zá'.

Biti' gaca ilún bö lubá'agaca.

⁸ Nupa tun budó' guiój budó' yaga ilaca ca nácagaca budó' na',
núti'tës nu ruzxöni ladxi' budó' guiój budó' yaga.

⁹ Libí'ili', böñachi Israel, buli'zxöni ládxë'ë Xanru' Dios.
Rácalen cazë' libí'ili', en rapa chi'ë libí'ili'.

¹⁰ Libí'ili', zxí'ini xi'sóë' Aarón, buli'zxöni ládxë'ë Xanru' Dios.
Rácalen cazë' libí'ili', en rapa chi'ë libí'ili'.

¹¹ Libí'ili' na' rádxil'-në' Dios, buli'zxöni ládxë'ë Xanru' Dios.
Rácalen cazë' libí'ili', en rapa chi'ë libí'ili'.

¹² Xanru' Dios ruí'i ládxë'ë ré'u, en gunë' ga gaca dxi'a queëru'.
Gunë' ga gaca dxi'a quégaca böñachi Israel.

Gunë' ga gaca dxi'a quégaca zxí'ini xi'sóë' Aarón.

¹³ Gunë' ga gaca dxi'a quégaca nupa tadxi Lë',
nupa na' nácagaca cá'asö, en nupa na' nayépisëgaca.

¹⁴ Gunë' Xanru' Dios ga tsar le nequi queëli',
lë na' nequi queëli', en le nequi quégaca zxí'inili'.

¹⁵ Raca ládx'a gunë' Xanru' ga gaca dxi'a queëli'.
Náquië' Nu ben lúzxiba, en luyú ni.

¹⁶ Nequi queë' Xanru' Dios lúzxiba xitsá',
pero nudödë' lu ná'agaca böñachi luyú ni.

¹⁷ Nupa chinátigaca biti' gaca ila'gú'u Xanru' yöl-la' ba,
en calëga nupa nacuá' dxisö lataj chul-la que yöl-la' guti.

¹⁸ ¡Cú'uru' yöl-la' ba Xanru' Dios
na'a dza, en yúgu'të dza si' zaca!

¡Guli'cu'ë Xanru' yöl-la' ba!

116

¹ Nadxf'ida'-në' Xanru' Dios, tu' riyönnë'
le rulidza' Lë', en le rinábida'-në'.

² Ruzë naguë' chi'a.

Que lë ni na' ulidza' Lë' tsanni ni zoa' nabana'.

³ Guzóa bönadxi quia' gáta',
en guyu'a tsöbi que lataj chul-la que yöl-la' guti,
ate' gusëbi ládx'a, en buí'inide'eda' ládx'a.

⁴ Ní'irö bulidza'-në' Xanru' Dios, gunnía':
"Ráta'yua' lo', Xan, usóló' neda'."

⁵ Xanru' Dios ruzá' ládx'ë queéru', en náquië' tsahui'.
Dios queéru' ru'i ládx'ë ré'u.

⁶ Rapa chi'ë Xanru' nupa nácgaca do' ladxi'.
Bulu'xicja bönachi neda', ate' busölë' neda'.

⁷ Buzí' ladxi' bö' naca caza',
tu' runë' Xanru' Dios ga raca dxi'a quia'.

⁸ Busöló' bö' naca caza', Xan, lu yöl-la' guti.
Benu' ga buí'i nisa ribödxi guiój lahua',
en ga bíti'rö cuílagaca ni'a.

⁹ Ta'a lahuë' Xanru' Dios
ga nacuá' nupa nabángaca.

¹⁰ Guyéajlé a Lë' cate' gunnía':
"Zoa le rusaca' neda' zi'."

¹¹ Lu yöl-la' rö' böniga quia' gunnía':
"Ta'zi' yë' yúgu'të bönachi."

¹² ¿Bizxi caz gu'a-në' Xanru' Dios
ni'a que yugu' le runë' le ruzi'a xibé?
¹³ Si' lu na'a yöl-la' russölá queë' Xanru',
en ulidza'-në' Xanru' Dios.

¹⁴ Unödzja' queë' Xanru' le guzxí' lu na'a unödzja'.
Raca ládx'a gaca guna' caní lógaca yúgu'të bönachi queë'.

¹⁵ Rúndë'ë Xanru' bal
yöl-la' guti quégaca nupa néquiguequi quez queë'.

¹⁶ Le nácatë naca' huen dxin quiu', Xan.
Naca' huen dxin quiu', enca' zxí'ininu nigula huen dxin quiu'.
Busedxu' le biröli neda'.

¹⁷ Cu'a lo' le unödzja' quiu', en guía' Li': "Xclenu",
en ulidza' Li', Xan.

¹⁸ Unödzja' queë' Xanru' le guzxí' lu na'a unödzja'.
Raca ládx'a gaca guna' caní lógaca yúgu'të bönachi queë'.

¹⁹ Ga zoa lö'a que yu'u lidxë' Xanru',
lu yödzö Jerusalén guna' caní.

¡Guli'cu'ë yöl-la' ba Xanru' Dios!

¡Guli'cu'ë yöl-la' ba yúgu'téli',
 2 tu' buxönë' queëru' yöl-la' dxi'i ladxi' queë',
 en zóatica'sö le naca idü ladxi' queë'!

¡Yöl-la' ba Lë'!

118

1 ¡Guli'guíë' Xanru': "Xclenu'", tu' náquië' dxi'a!
 ¡Zóatica'sö yöl-la' dxi'i ladxi' queë'!

2 Ral-la' ila'nná böñachi Israel:
 "¡Zóatica'sö yöl-la' dxi'i ladxi' queë'!"
 3 Ral-la' ila'nná zxí'ini xi'sóë' Aarón:
 "¡Zóatica'sö yöl-la' dxi'i ladxi' queë'!"
 4 Ral-la' ila'nná nupa tadxi Xanru' Dios:
 "¡Zóatica'sö yöl-la' dxi'i ladxi' queë'!"

5 Cate' gudí'i guzxáca'a bulidza'-në' Xanru',
 ate' bubí'ë didza', en busölë' neda'.
 6 Zoë' Xanru' cuita' neda', ate' biti' bi gáxdida'.
 ¿Bixzi caz gaca ilún böñachi quia'?
 7 Zoë' Xanru' cuita' neda' ladaj nupa tácalen neda'.
 Que lë ni na' idéli'da' láhuigaca nupa biti' ta'lé'e neda' dxi'a.

8 Nácarö dxi'a uzxöni ládex'a-në' Xanru',
 en biti' uzxöni ládex'a a nu naca böñachisö.
 9 Nácarö dxi'a uzxöni ládex'a-në' Xanru',
 en biti' uzxöni ládex'a a nupa ta'nná bë'.

10 Böñachi yúgu'të yödözö izá'a gula'gú'u neda' lë'ajlö.
 Len yöl-la' huáca queë' Xanru' buxicja' léguequi.
 11 Gula'gu'ë neda' lë'ajlö. Ón, gula'gu'ë neda' lë'ajlö,
 pero len yöl-la' huáca queë' Xanru' buxicja' léguequi.
 12 Gula'gu'ë neda' lë'ajlö ca yugu' buzú' rön,
 pero gula'nítie' ca tu lu guí' guixí' yötsi' bidx.
 Len yöl-la' huáca queë' Xanru' buxicja' léguequi.
 13 Bulu'dxíguë'ë neda' ga bidxintë guzóa tsöjtsö'a,
 pero gúcalenë' Xanru' neda'.

14 Naca cazë' Xanru' yöl-la' huáca quia', en le rul-la'.
 Naca cazë' yöl-la' rusölä quia'.

15 Lu yu'u lídxigaca nupa nácagaca tsahui'
 ru'u bö que nupa ta'bödxi'a lu yöl-la' rudzeja quéguequi tu' nulágaca.

¡Runda' dxin në'ë ibëla Xanru'!
 16 ¡Nayépisétëro në'ë ibëla Xanru'!
 ¡Runda' dxin në'ë ibëla Xanru'!

17 Biti' ca' gátia', pero soa' ibana',
 ate' usiyönda' böñachi le nunë' Xanru'.
 18 Xanru' bëndë'ë neda' xiguia',

pero biti' budödë' neda' lu yöl-la' guti.

¹⁹ Guli'salaj quia' ga ta'yazë' bönni' tsahui'.

Tsu'a ni', en guía'-në' Xanru': "Xclenu'."

²⁰ Naca lataj ni ga riyaza cazë' Xanru' Dios.

Ila'yazë' ni bönni' tsahui'.

²¹ ¡Guía' Li': "Xclenu'" Xan, tu' bubi'u didza' quia',
en tu' nacu' Nu rusólá neda'!

²² Zoa tu guiój bulu'zóë' tsölá'alö bönni' tu'cu'ë zö'ö.
Na'a naca guiój na' guiój len squin zö'ö.

²³ Benë' Xanru' Dios ga naca caní.

Naca tu le run ga rubániru'.

²⁴ Dza ni naca dza nunë' Xanru' Dios.
Udzéjaru', en uzi'iru' xibé.

²⁵ Ráta'yutu' lo', Xan, usölö' netu'.
Ráta'yutu' lo', Xan, gunu' ga gaca dxi'a queëtu'.

²⁶ Bica' ba bönni' na' zë'ë uláz queë' Xanru'.
Guntu' Li' zxön lu yu'u lidxë' Xanru'.

²⁷ Dios náquië' Xanru', ate' bennë' queëru' bení'.
Buli'nödzaj queë' Dios yugu' bëdxi renni' uzégu'ru'-ba' lahuë' lu bucugu
queë'.

²⁸ Naca cazu' Li' Dios quia', ate guía' Li': "Xclenu'."
Naca cazu' Li' Dios quia', ate' guna' Li' zxön.

²⁹ ¡Guli'-guië' Xanru' Dios: "Xclenu'" tu' náquië' dxi'a!
¡Zóatica'sö yöl-la' dxi'i ladxi' queë'!

119

Le run le gunná bé'enë' Xanru' ré'u

¹ ¡Bica' ba nupa nácagaca idú dxi'a tsáhui'do',
nupa na' tun ca rnna xibá naguixjë' Xanru'!

² ¡Bica' ba nupa tun ca nácagaca le benë' ba nalí,
en idú ládxì'gaca ta'zë ladxi' Lë'!

³ Biti' bi le cabí naca tsahui' tun,
pero tun ca nácagaca le nulu'ë lahui.

⁴ Nuzú' queëtu' xibá quiu', Xan,
para idú ládxì'tu' guntu' ca ta'nná.

⁵ Raca ládxì'a gúntica'sa' ca ral-la' guna',
en guna' yugu' le gunná bë'u.

⁶ Ni'irö biti' ca' utuf'ida'
channö gapa chi'a yugu' le gunná bë'u.

⁷ Lu yöl-la' ba'a ladxi' quia' guía' Li': "Xclenu'"
cate' chinazi'a le buchi'a busöröu' le naca tsahui'.

⁸ Guna' ca ta'nná le gunná bë'u.

Biti' usán no'o neda' tsaz.

Ral-la' gunru' ca gunnë' Dios

- ⁹ ¿Nacxi gaca gunbi' tu bi'i bönni' ga ugá'ana tsahui' ládx'i'do'obi'?
 Ral-la' gunbi' ca rnna xtídz'u.u.
¹⁰ Idú ládx'a' rizé ládx'a' Li', Xan.
 Bití' gu'u lataj ucá'ana' yugu' le gunná bë'u.
¹¹ Lu icja ládx'i'da'ahua' runa' ca rnna xtídz'u.u,
 para cabí guna' dul-la' lo' Li'.
¹² ¡Bica' xibó', Xan!
 Busedi neda' yugu' le gunná bë'u.
¹³ Len ruá' cuina' ru'a didza'
 ca nácagaca yúgu'té le rusedi quézinu' netu'.
¹⁴ Rudzéjada' ca nácagaca le nunu' ba nalí
 ca nu rudzeja tu' dë yöl-la' tsahui' que.
¹⁵ Sa' ládx'a' ca nácagaca xibá quiu'
 en güí'l ládx'a' yugu' le nulú'u lahui.
¹⁶ Udzéjada' ca nácagaca le gunná bë'u.
 Bití' gal-la ládx'a' xtídz'u.u.

Rudzéjade' eru' runru' le rnna cazë' Dios

- ¹⁷ Ben ga gaca dxi'a quia' neda', huen dxin quiu', Xan,
 para soa' ibana', en guna' ca rnna xtídz'u.u.
¹⁸ Gusalaj guiój lahua' para gaca ilé'eda'
 le tun ga rubánitu' nazúajgaca lu xibá naguixju' Li'.
¹⁹ Zoa' yödzölió ca tu bönni' ridasö.
 Bití' ucachu' yugu' xibá nunu' ga bití' gaca ilé'eda' léguequi.
²⁰ Yúgu'té dza ruhu'i'ni ládx'a' tu' rizé ládx'a'
 yugu' le nusédinu' netu' ca ral-la' guntu'.
²¹ Ruzenu' le bach nupa tun ba zxön cuínguequi, en nupa nudxíagaca dö',
 nupa na' tu'zóa tsölá'alo yugu' xibá gunná bë'u.
²² Bití' gu'u lataj nu guequi neda' zí' o nu ucá'ana neda' cá'asö,
 tu' runa' ca ta'nná le nunu' ba nalí.
²³ Sal-la' ta'bö' nupa ta'nná bë', en ta'nné quia',
 rizá' ládx'a' neda', huen dxin quiu', ca nácagaca le gunná bë'u.
²⁴ Raza ládx'a' yugu' le nunu' ba nalí.
 Nácagaca le tu'zéajni'i neda'.

Idú ládx'i'ru' gunru' ca gunná cazë' Dios

- ²⁵ Nadinni lu yu bö' naca caza'.
 Busubán ládx'a', ugunu' dxin xtídz'u.u.
²⁶ Buluída' Li' yugu' le nuna', ate' bubí'u didza'.
 Busedi neda' yugu' le gunná bë'u.
²⁷ Buzéajni'i neda' ca nácagaca xibá quiu',
 ate' sa' ládx'a' ca nácagaca le nunu', le tun ga rubánitu'.
²⁸ Ribödxi bö' naca caza' tu' risébida' ládx'a'.
 Butipa ládx'a', ugunu' dxin xtídz'u.u.
²⁹ Ben ga bití' guna' le cabí sa'yéaj,
 en buzá' ladxi' quia' xibá naguixju' Li'.
³⁰ Guröa' le naca idútë li para guna' ca rnna.
 Nuzóa' lahua' yugu' le nusédinu' netu'.
³¹ Nazi' lu na'a yugu' le nunu' liná' lo.

Biti' gu'u lataj bi gun ga utu'i'ida', Xan.

³² Guna' ca ta'nná xibá gunná bë'u,
tu' rutipa cazu' ládxa'a.

Rë'ëniru' tséajni'iru' xtídzë'ë Dios

³³ Busedi neda', Xan, ca ta'nná le gunná bë'u,
ate' gun chi'a léguequi ga idxinrö dza udxí.

³⁴ Benna quia' yöl-la' réajni'i para gun chi'a xibá quiu',
en para idú ládxa'a guna' ca ta'nná.

³⁵ Ben ga guna' ca ta'nná le gunná bë'u,
tu' raza ládxa'a guna' ca ta'nná xibá na'.

³⁶ Ben ga gü'i ládxa'a yugu' le nunu' ba nalí,
para cabí gü'i ládxa'a yöl-la' ruhuidi'.

³⁷ Buchi'a guiój lahua' para cabí uyúa' le cabí nazaca'.
Butipa ládxa'a para guna' le ulu'inu' netu'.

³⁸ Ben tsutsu didza' bë'lenu' neda', huen dxin quiu',
para gádxida' Li'.

³⁹ Bucuita ga zoa' nu ruididza' yudxi neda', lë na' rádxida'
tu' nácagaca dxi'a tsahui' le nusédinu' netu' ca guntu'.

⁴⁰ Buyútsöca', rizë ládxa'a yugu' xibá quiu'.
Busubán ládxa'a, ugunu' dxin le tsahui' quiu'.

Ruzxöni ládzi'ru' xtídzë'ë Dios

⁴¹ Lu yöl-la' dxi'i ladxi' quiu' buyú neda', Xan,
en busólá neda' ca rnna xtídzu'u gunu'.

⁴² Ubi'a didza' bi guía' nu run ga rutu'i'ida', innia':
"Ruzxöni ládxa'a xtídzu'u", Xan.

⁴³ Biti' ucuítu' tsaz didza' idútë li lu ru'a
tu' runa' löza yugu' le nusédinu' netu'.

⁴⁴ Gúntica'sa' ca ta'nná xibá naguixju' Li'
yúgu'të dza, en yúgu'të iz si' zaca'.

⁴⁵ Lu yöl-la' rusólá quiu' soa' ibana'
tu' bë' ládxa'a guna' ca ta'nná bë' xibá quiu'.

⁴⁶ Gu'a didza' que le nunu' ba nalí lógaquië' bönni' ta'nná bë'ë
en biti' ca' utu'i'ida'.

⁴⁷ Tsaza ládxa'a yugu' xibá gunná bë'u,
yugu' lë na' nadxi'i'ida'.

⁴⁸ Guna' ca' ca ta'nná xibá nunu', lë na' së ládxa'a,
en sa' ládxa'a ca nácagaca le gunná bë'u.

Zóatica'sö xtídzë'ë Dios

⁴⁹ Yöjnë didza' na' bë'lenu' neda', huen dxin quiu',
tu' benu' ga runa' löza le.

⁵⁰ Didza' na' ruhuë tsahui' neda' cate' rigui'i rizáca'a,
tu' tu'subán ládxa'a didza' bë'u.

⁵¹ Tu'títjalë'e neda' nupa tun ba zxön cuínguequi,
pero biti' ca' usana' xibá naguixju' Li'.

⁵² Röjneda' yugu' le busédinu' netu' dza ni'te, Xan,
ate' lë na' ruhuë tsahui' neda'.

⁵³ Lu yöl-la' ridzá'a quia' rö'a böninga ni'a quégaca nupa tuá' dö',
nupa na' tu'cá'ana xibá naguixju' Li'.

54 Rul-la' ca nácagaca le gunná bë'u.

Zoa' ni ca tu bönni' ridë' zi'tu'.

55 Chi'i dzö' ölö röjneda' Lo', Xan,

en run chi'a xibá naguixju' Li'.

56 Nacuá'len neda' le ruzi'a xibé
ate' runa' ca rnna yugu' xibá quiu'.

Raza ládxí'ru' xtídzë'ë Dios

57 Nacu' Li', Xan, le ruzi'a xibé.

Chigunnía' guna' ca rnna xtídzu'u.

58 Idú ládxa'a inábida' Li' sóalenu' neda'.

Buéchi' ladxi' neda' ca rnna xtídzu'u gunu'.

59 Guzá' ládxa'a ca nácagaca le runa',

ate' bubí'i ládxa'a para guna' ca rnna le nunu' liná' lo.

60 Bénda'a bayúdx, en biti' gudzeda'

para guna' ca rinná bë' xibá quiu'.

61 Bönachi zián bönachi tuá' dö' gula'gú'u neda' lë'ajlö,
pero biti' gul-la ládxa'a xibá naguixju' Li'.

62 Gulahuëla riyasa', en rigu'a Li' yöl-la' ba
tu' nácagaca tsahui' yugu' le nusédinu' netu'.

63 Runa' tsözxöñ nupa tadxi Li',
enca' nupa tun ca rnna xibá quiu'.

64 Ridxín idútë yödzöliö yöl-la' dxi'i ladxi' quiu', Xan.
Busedi neda' yugu' le gunná bë'u.

Naca le saca' le gunná cazë' Dios

65 Benu' quia' neda', huen dxin quiu', le naca dxi'a,
ca rnna xtídzu'u gunu', Xan.

66 Busedi neda' yöl-la' réajni'i idú, en yöl-la' raca yenni',
tu' réajlé' a yugu' xibá gunná bë'u.

67 Zí'alö cate' buzötju' neda' gudá' nanitia',
pero na'a runa' ca rnna xtídzu'u.

68 Idú dxi'a tsahui' nacu', en runu' le naca dxi'a.
Busedi neda' yugu' le gunná bë'u.

69 Nupa tun ba zxöñ cuínguequi ta'zi' yë' ca naca quia',
pero idú ládxa'a guna' ca rnna xibá quiu'.

70 Chul-la niti naca icja ládxi'do'guequi,
pero raza ládxa'a neda' xibá naguixju' Li'.

71 Naca dxi'a buzötju' neda'
para bizédida' yugu' le gunná bë'u.

72 Nácagacarö dxi'a quia' xibá rinná bë'u
ca nácagaca gayuá' gayuá'sö dumí oro, en plata.

Naca tsahui' le gunná cazë' Dios

73 Len no'o benu' neda', en buzú' neda'.

Buzéajni'i neda' para gunbë'a xibá gunná bë'u.

74 Nupa tadxi Li' ila'lé'e neda', en ulu'dzeja ládxi'guequi,

tu' runa' löza xtídzu'u.

75 Nözda' naca tsahui' ca ruchi'a rusöröu' quia' neda', Xan,
ate' lu yöl-la' li ladxi' quiu' busaca' zi'u neda'.

76 Na'a, lu yöl-la' dxi'i ladxi' quiu' buë tsahui' neda',

ca rnna didza' chibë'lenu' neda', huen dxin quiu'.

⁷⁷ Gudá duhuechi' ládxu'u neda' para soa' ibana', tu' raza ládex'a xibá naguixju' Li'.

⁷⁸ Ben ga ulu'tui'i nupa tun ba zxön cuínguequi, tu' gula'nnë quia', en biti' bi bena' quéguequi, pero neda' sa' ládex'a ca naca xibá quiu'.

⁷⁹ Ral-la' udxín quia' nupa tadxi Li', nupa na' núnbë' gaca le nunu' ba nalí.

⁸⁰ Ben ga udxín ca rnna le gunná bë'u, para cabí utu'ida'.

Runë' Dios ca rnna xtídzë'ë

⁸¹ Rudú ládex'a tu' riböza' yöl-la' rusölá quiu', pero runa' löza xtídzu'u.

⁸² Chirequi ichul-la lahua' tu' rizëda' ládex'a xtídzu'u, rnna': "¿Bátaxi huë tsaú'u neda'?"

⁸³ Caní raca tu' naxú'unida' ca tu buzudi guídi nal-la' lahui guí, pero catu caz gal-la ládex'a yugu' le gunná bë'u.

⁸⁴ ¿Bál-laxi dza soa' ibana' neda', huen dxin quiu'? ¿Bátaxi usiúdxu' nupa ta'bía no neda'?

⁸⁵ Nupa tun ba zxön cuínguequi gula'chö'ona tu yeru ga tsöjbixa', nupa na' biti' tun ca rnna xibá naguixju' Li'.

⁸⁶ Idútë li nácagaca yúgu'të xibá gunná bë'u.

Lu yöl-la' rizi' yë' quéguequi ta'bía no neda'. ¡Gúcalen neda'!

⁸⁷ Gula'zóa ulu'sunitië' neda' lu yödzölió ni, pero biti' busán na'a xibá quiu'.

⁸⁸ Lu yöl-la' dxi'i ladxi' quiu' busubán ládex'a, para gapa chi'a le nunu' ba nalí len ruá' cuinu'.

Réajlé'ëru' xtídzë'ë Xanru'

⁸⁹ Rulidza' Li', Xan.

Tsaz naguixju' xtídzu'u yehua' yubá.

⁹⁰ Gunu' ca rnna xtídzu'u quégaca böñachi na'a dza, en yúgu'të dza si' zaca. Gudixaj cazu' yödzölió, ate' idía'tica'sö.

⁹¹ Ni'a que le gunná bë'u nacuá' caz yúgu'të ga ridxitë na'a dza, tu' tun xichinu' yúgu'të lë na'.

⁹² La'tu' cabí raza ládex'a xibá naguixju' Li', chigunítia' lu le busaca' zi' neda'.

⁹³ Catu caz gal-la ládex'a yugu' xibá quiu', tu' busubanu' ládex'a ni'a quéguequi.

⁹⁴ Néquida' quiu'.

¡Busölá neda', tu' ruí'i ládex'a xibá quiu'!

⁹⁵ Nupa tuá' dö' ta'bö' nisi neda' para ulu'suniti neda', pero neda' güí'i ládex'a le nunu' ba nalí.

⁹⁶ Chibilé'eda' ruúksi que yúgu'të le naca idútë yödzölió ni, pero catu caz udxí que le gunná bë'u guntu'.

Nadxí'iru' xtídzë'ë Xanru'

⁹⁷ Nadxí'ide'eda' xibá naguixju' Li'. Idú dza rizá' ládex'a ca naca que.

98 Réajni'iröda' ca nupa ta'dá'baga' neda'
tu' ruí'i ládex'a' yugu' le gunná bë'u, en tu' dá'tica'sa' léguequi.

99 Réquibe'eröda' ca yúgu'té nupa tu'sedi neda',
tu' rizá' ládex'a' le numú' ba nalí.

100 Réajni'iröda' ca yugu' bönni' gula,
tu' rapa chi'a xibá quiu'.

101 Gudapa chi'i cuina' para cabí guna' le cabí naca tsahui',
en para guna' ca rnna xtídz'u.u.

102 Bití' ca' nucá'ana' yugu' le nusédinu' netu',
le nusedi quézinu' neda'.

103 Bica' zxixi nácagaca xtídz'u.u.

Ön, nácagacarö zxixi ca le zxixi que buz.

104 Tu'zéajni'i xibá quiu' neda'.

Que lë ni na' réquida' zi' yúgu'té le cabí naca.

Xtídzëë Dios ruzení' lu icja ládxido'oru'

105 Ca tu bení' naca xtídz'u ga ridá',
en le ruzení' nöza ga ral-la' töda'.

106 Guzxí' lu na'a bi guna', en nuna' tsutsu xtídz'a.a.
Gapa chi'a le nusédinu' netu' le naca tsahui'.

107 Zoa le rusaça' zi' neda'.

Busubán ládex'a, Xan, ugunu' dxin xtídz'u.u.

108 Guzxí' yöl-la' ba rigu'a Li' len ru'a, Xan,
en buzéajni'i neda' yugu' le nusédinu' netu'.

109 Zóatica'sö böñadxi gáttia',
pero bití' ral-la ládex'a xibá naguixju' Li'.

110 Nupa tuá' dö' bulu'zé tu du yalaj le sön neda',
pero bití' bucá'ana' xibá quiu'.

111 Tsaz nazí' lu na'a le nunu' ba nalí,
ate' run ga rudzeja ládex'a.a.

112 Rui'i ládex'a gúntica'sa' ca ta'nná le gunná bë'u.
Guna' caní ga idxintë dza udxi.

Nagá'anaru' dxi'a ni'a que xtídzëë Dios

113 Réquida' zi' nupa nácagaca chopá ladxi',
pero nadxi'ida' xibá naguixju' Li'.

114 Nacu' ca tu ga rucachi' cuina', en le run chi'i neda'.
Runa' löza xtídz'u.u.

115 Guli'cuíta ga zoa', libí'ili' ruá'ali' dö',
tu' guna' ca ta'nná le gunná bë'ë Xana' Dios.

116 Buzóa neda' tsutsu, ugunu' dxin xtídz'u.u, ate' soa' ibana'.
Bití' gu'u lataj utu'ida' ca naca le runa' löza.

117 Buzóa neda' tsutsu, ate' ulá',
en güí'itica'sa' ládex'a le gunná bë'u.

118 Nusán no'o yúgu'té nupa nusángaca le gunná bë'u,
tu' naca yöl-la' sina' quéguequi le cabí nazaca'.

119 Ugú' nupa tuá' dö' luyú ni ca nu rugúa bëbu.
Que lë ni na' nadxi'ida' le nunu' ba nalí.

120 Rizzizi idútë le nayá' nabana' tu' rádxida' Li',
en rádxida' le gaca cate' usiúdxu' böñachi.

Ral-la' gunru' ca rnna xtídzë'ë Dios

- 121 Bena' le naca tsahui', en le naca li.
 Biti' usán no'o neda' lu ná'agaca nupa tu'saca' zi' neda'.
 122 Nacu' quia' neda', huen dxin quiu', le naca bë' gaca dxí'a quia'.
 Biti' gu'u lataj ulu'saca' zi' neda' nupa tun ba zxön cuínguequi.
 123 Richí guiöj lahua' tu' riböza' yöl-la' rusólá quiu',
 enca' didza' tsahui' quiu'.
 124 Lu yöl-la' dxí'i ladxi' quiu' ben quia' neda', huen dxin quiu',
 ca rë'ëni quézinu' gunu'.
 Busedi neda' yugu' le gunná bë'u.
 125 Naca' huen dxin quiu'.
 Benna quia' yöl-la' réajni'i para gaca gúnbe'a le nunu' ba nalí.
 126 Chibidxín dza bi gunu', Xan,
 tu' gula'guítsje' xibá naguixju' Li'.
 127 Que lë ni na' nadxí'iröda' xibá naguixju' Li' ca nadxí'ida' oro.
 ¡Ön, ca oro banéquini,
 128 en réquida' nácagacarö dxí'a xibá quiu' ca yúgu'të le dë!
 Biti' rilé'eda' dxí'a yúgu'të le cabí naca.

Raca ládzi'ru' gunru' ca rnna xtídzë'ë Dios

- 129 Run ga rubánida' le nunu' ba nalí.
 Que lë ni na' bö' naca caza' nazí' lu næ'e le.
 130 Cate' nalá' lahui xtídzu'u, ruzení' queëtu'.
 Run ga ta'yéajni'i nupa nácagaca nökaj ladxi'.
 131 Gusalja' ru'a, en gunnë ládx'a,a,
 tu' guzë ládx'a,xibá gunná bë'u.
 132 Buyú neda', en buzá' ladxi' quia',
 ca run cazu' quégaca nupa ta'dxí'i Li'.
 133 Buzóa neda' tsutsu para guna' ca rnna xtídzu'u.
 Biti' gu'u lataj le naca xihui' inná be'e neda'.
 134 Buá'u neda' lu na' nu rusaca' zi' neda',
 para gaca guna' ca naca xibá quiu'.
 135 Ben ga gaca bë' nazí' lu no'o neda', huen dxin quiu',
 en busedi neda' yugu' le gunná bë'u.
 136 Raca nisa ribödxí'guiöj lahua' ca tu yegu gubó'o,
 tu' cabí tun böñachi ca rinná bë' xibá quiu'.

Idutë li naca le rnna cazë' Xanru'

- 137 Nacu' Li' tsahui', Xan.
 Dxí'a tsahui' naca le ruchi'a rusöröu' queëtu'.
 138 Nugú'u lu na'tu' le nunu' ba nalí.
 Naca tsahui', en tsaz zoa.
 139 Tu' riböza' le naca quiu' run ga régui rilá ládx'i'da'ahua',
 ate' gulal-la ladxi' xtídzu'u nupa ta'dá'baga' neda'.
 140 Idú dxí'a tsahui' naca xtídzu'u.
 Que lë ni na' neda', huen dxin quiu', nadxí'ida' le.
 141 Nökaj ladxi' naca', ate' tu'cá'ana böñachi neda' cá'asö,
 pero biti' ral-la ládx'a,a le gunná bë'u.
 142 Zóatica'sö le naca tsahui' quiu',
 en idútë li naca xibá naguixju' Li'.

143 Ba bidxín le raca quia', en le rusaca' zi' neda',
pero raza ládxa'a xibá gunná bë'u.

144 Nácatica'sö tsahui' le nunu' ba nalí.
Buzéajni'i neda' para soa' ibana'.

Ral-la' ulaba ládxi'ru' le gunná cazë' Dios

145 Idú ládxa'a rulidza' Li'.

Bubí'i didza', Xan, ate' guna' ca naca le gunná bë'u.

146 Rulídzatica'sa' Li'.

Busölá neda', ate' guna' ca naca le nunu' ba nalí.

147 Riyasa' zi'alö ca ritó yu zila, en rulidza' Li' para gácalenu' neda'.

Riböza' yugu' didza' gu'u.

148 Chi'i dزو'ölö rubéajá' yëla guiój lahua',
para ulaba ládxa'a ca naca xtídz'u'u.

149 Lu yöl-la' dxi'i ladxi' quiu' buzë nagu' chi'a.

Busubán ládxa'a, Xan, ca naca le nusédinu' netu'.

150 Ta'biga' nupa tuá' dö' ga zoa' para ila'bía no neda'.

Nucá'anagaca xibá naguixju' Li'.

151 Zu' gala' ga zoa', Xan,

ate' idútë li naca le gunná bë'u.

152 Dza ni'te quez nún'bö'a le nunu' ba nalí,
en nözda' tsaz nuzú' le.

Le gunná cazë' Dios run rë'u tsahui'

153 Buyú le rusaca' zi' neda', en busölá neda',
tu' cabí ral-la ládxa'a xibá naguixju' Li'.

154 Bubí'i didza' uláz quia', en buá'u neda'.

Busubán ládxa'a ca naca xtídz'u'u.

155 Zi'tu' zoa yöl-la' rusölá ga nacuá' nupa tuá' dö',
tu' cabí tu'i ládxi'gaca le gunná bë'u.

156 Zxöntëro naca yöl-la' ruhuéchi' ladxi' quiu', Xan.

Busubán ládxa'a ca naca le nusédinu' netu'.

157 Ziángaca nupa ta'bía no neda', en ta'dá'baga' neda',
pero bití' nucá'ana' le nunu' ba nalí.

158 Bití' rilé'eda' dxi'a nupa nucá'anagaca Li',
en bití' tun ca rnna xtídz'u'u.

159 Buyú ca nadxi'ida' xibá quiu', Xan.

Lu yöl-la' dxi'i ladxi' quiu' busubán ládxa'a.

160 Idútë li nácagaca yúgu'të xtídz'u'u,

en tsaz nacuá' yúgu'të le nusédinu' netu' le nácagaca tsahui'.

Ral-la' udödi cuinru' lu né'ë Dios

161 Ta'bía no neda' nupa ta'nná bë', en bití' bi bena' quéguequi,
pero runa' bal xtídz'u'u icja ládxi'da'ahua'.

162 Rudzéjalenda' xtídz'u'u,

ca rudzeja nu rudzöli tu yöl-la' tsahui' zxön.

163 Réquida' zi', en bití' rilé'eda' dxi'a le cabí nácatë,
pero nadxi'ida' xibá naguixju' Li'.

164 Gadxi luzuí tu dza rigu'a Li' yöl-la' ba,
ni'a que le nusédinu' netu', le naca tsahui'.

165 Ta'böza dxi'a tsahui'do' nupa nadxi'igaca xibá naguixju' Li',

en biti' bi run ga röjchégu'gaca.

¹⁶⁶ Runa' löza yöl-la' rusölá quiu', Xan,
en runa' ca rnna xibá nunu'.

¹⁶⁷ Yugu' le nunu' ba nalí tun chi'i bö' naca caza',
ate' nadxi'ide'eda' léguequi.

¹⁶⁸ Runa' ca ta'nná xibá quiu', en yugu' le nunu' ba nalí
tu' rilé'e quézину' yúgu'të le runa'.

Rudzéjalenru' xtídzé'ë Dios

¹⁶⁹ Ruzé nagu' le rulidza' Li', Xan.

Ruzéajni'i neda' ca rnna xtídzu'u.

¹⁷⁰ Ruzé nagu' le rinábida' Li',
en busölá neda' ca rnna xtídzu'u gunu'.

¹⁷¹ Bë' neda' lataj cu'a Li' yöl-la' ba,
tu' rusédinu' neda' le gunná bë'u.

¹⁷² Bë' lataj gul-la ládx'a' ca naca xtídzu'u,
tu' nácagaca tsahui' yúgu'të xibá nunu'.

¹⁷³ Guzóatë gácalenu' neda',
tu' naböa' xibá quiu'.

¹⁷⁴ Rizé ládx'a' yöl-la' rusölá quiu', Xan,
en raza ládx'a' xibá naguixju' Li'.

¹⁷⁵ Bë' lataj soa ibán bö' naca caza' para cu'a Li' yöl-la' ba,
en ben ga gácalen neda' le nusédinu' netu'.

¹⁷⁶ Ridöda' tsölä'älö ca tuba' bö'cu' zxila' nanítiba'.
Gudá dudilju' neda', huen dxin quiu', tu' cabí ral-la ládx'a' xibá nunu'.

120

¹ Cate' gudi'i guzxáca'a bulidza'-në' Xanru',
ate' Lë' bubí'ë didza'.

² Busölá bö' naca caza', Xan, lu na' nu rizí' yë',
en lu na' nu biti' run ca gunná caz.

³ ¿Bizxi guné' quiu' Dios, en bizxi ubi'ë quiu', li' na' rizí' yë'u?

⁴ Ichizë' li' yugu' yaga lahui tuchi' que nu reaj gudil-la,
en cu'ë icju' bo' yalaq que ya' yörido'.

⁵ Bica' bayechi' neda' tu' zóasa' yödzö Mesec,
en zoa' tu lu yu'u guídi quégaca böñachi Cedar.

⁶ Xidzélë'ë chiguzóa bö' naca caza'
len nupa tu'suniti yöl-la' riböza dxi'a tsáhui'do'.

⁷ Rë'ënda' ciòza' dxi'a tsáhui'do', pero cate' ruá'a didza'
të'ënnë' ila'dil-lalen neda'.

121

¹ Uchisa icja' uyúa' le raca yugu' lu guí'a.
¿Gazxi za' le gácalen neda'?

² Le gácalen neda' za' lu në'ë Xanru'.
Lë' benë' lúzxiba, en luyú.

³ Biti' gu'ë lataj cuilu' ga ridó'.
Biti' ca' gasi Nu na' run chi'i li'.

⁴ Buyútsöca', biti' ridödi yëla guiój lahuë',
en biti' rásië', Lë' na' rapa chi'ë böñachi Israel.

5 Run chi'ë Xanru' Dios li'.
Zoë' Xanru' Dios cuitu' ibëla, rigu'ë li' zxul-la.

6 Biti' uzegui' gubidza li' lahui' dza,
en biti' bi gun beo' quiu' chi'ë dzö'ölö.

7 Gun chi'ë Xanru' Dios li' ga rizó'o, en ga rudxinu',
dza ni zóaru' na'a, en yugu' dza si' zaca.

8 Xanru' Dios gun chi'ë li' ga rizó'o, en ga rudxinu',
dza ni zóaru' na'a, en yugu' dza si' zaca.

122

1 Budzéjada' cate' gulë böñachi neda', gula'nná:
"Uyeajru' yu'u lidxë' Xanru' Dios."

2 Na'a zuíru' ni
ga nu riyaza yödzö Jerusalén.

3 Dxí'ado' gulunë' yödzö Jerusalén,
ate' naca lachi, en tuz ca röjlözgaca yu'u zxön que.

4 Ta'yaza yugu' cõ' böñachi queé' Xanru' ga ni
ca na' nusédinë' Dios böñachi Israel,
para ila'gú'u yöl-la' ba Xanru' Dios.

5 Ta'bó' nupa tu'chi'a tu'sörö queéru' ga ni,
ga ta'bó' ta'nná bë' zxí'ini xi'sóë' David.

6 Guli'nábinë' Dios gunë' ga gaca dxi'a que Jerusalén,
en ga ulu'zí' xibé nupa ta'dxi'i yödzö ni yöl-la' tsahui'.

7 Dios gunë' ga ila'böza dxi'a tsáhui'do' nupa nacuá' yödzö ni,
en ga ulu'zí' xibé nupa ta'nná bë' yöl-la' tsahui'.

8 Tu' nadxi'ida' yugu' böcha'a, en yugu' böchi' luzá'a,
rnnia': "Gaca yöl-la' ribözä dxi ladxi' lu yödzö ni."

9 Tu' nadxi'ida' lidxë' Xanru' Dios,
rinábida'-në' gunë' ga gaca dxi'a que yödzö ni.

123

1 Uchisa lahua' uyúa' ga zu' Li',
rö'u rinná bë'u yehua' yubá ni'.

2 Ca runë' bönni' nadó'o, ruyúë' bi ulu'ë xanë',
ate' ruyubi' bi'i nigula nadó'o bi ulú'unu nigula xanbi',
lësca' caní ruyuru' rë'u bi ulu'ë Xanru' Dios,
ga idixinrö dza uzá' ládxë'ë queéru'.

3 Buzá' ladxi' queétu', Xan. Buzá' ladxi' queétu',
tu' nacuá' nupa tu'cá'ana netu' cá'asö.

4 Rudú ládx'i'tu' tu' tu'titaj netu' nupa tu'zí' xibé yúgu'të le dë,
en tu' tu'cá'ana netu' cá'asö nupa tun ba zxön cuínguequi.

124

1 "La'tu' cabí gúcalenë' Xanru' rë'u",
ral-la' ila'nná böñachi Israel:

2 "La'tu' cabí gúcalenë' Xanru' rë'u
cate' nupa biti' ta'lé'e rë'u dxi'a gula'díl-lalen rë'u,

3 la' gulútítë rë'u
tu' gula'léde'e rë'u.

4 Guca queéru' ca la' usubágatë rë'u nisa,

en la' uchícjatëru' lu nisa na'.
5 La' uchícjatëru' tu lu nisa zila."

6 ¡Bica' lá'ayi Xanru' Dios
 tu' cabí bi'ë lataj nupa biti' ta'lé'e rë'u dxi'a ulu'suniti rë'u!

7 Bularu' ca rulaba' biguínido' tu lu le zön lëba'.
 Naröza' du yalaj, ate' nuláru'.

8 Le rácalen rë'u za' lu në'ë Xanru' Dios.
 Lë' benë' lúzxiba, en lu yu.

125

1 Nupa tu'zxöni ládx'i'gaca Xanru' Dios nácagaca ca guí'a Sión,
 tu' cabí bi gaca utá guí'a na', pero tsaz zoa caz.

2 Ca rö'gaca guí'a idú gásibi'ilö yödzö Jerusalén,
 la' canísö zoë' Xanru' Dios idú gásibi'ilö böñachi queë',
 na'a dza, en yúgu'té dza si' zaca.

3 Biti' ral-la' ila'nná bë' nupa tuá' dö' lu xiyúgaca böñachi tsahui',
 para cabí iún ga ilu'ë dö' bönni' tsahui' na'.

4 Xan, ben ga gaca dxi'a quégaca nupa nácagaca dxi'a,
 en quégaca nupa idú ládx'i'gaca tun ca rnna xtídz'u.

5 Nupa tu'dödi cuínguequi lu le cabí nácatë,
 ben léguequi xiguia' tsözxön len nupa tuá' dö'.
 Ben ga ila'cuá' böñachi Israel dxi'a tsahui'do'.

126

1 Cate' Xanru' Dios buchë'ë böñachi yödzö Sión
 nupa gula'dzún zi'tu', gúquiru' yélasö rineru'.

2 Ní'irö idú ládx'i'ru' buzzidxitiru',
 en lu yöl-la' rudzeja queëru' gurödx'i'aru'.

Ní'irö gului'i didza' böñachi yugu' yödzö izá'a, gula'nná:
 "Dios, Xángäquië, benë' le nácagaca zxön, gúcalenë' légaquië".

3 Xanru' Dios benë' le nácagaca zxön, gúcalenë' rë'u,
 ate' ruzi'ru' xibë'.

4 Buchë' netu', irúajtu' ga ni nadzuntu', Xan,
 para gácatu' ca nisa rudxín lu yegu nuhu'i'gaca.

5 Lu yöl-la' rudzeja ila'bödx'i'cate' ila'lapa
 nupa lu yöl-la' ribödx'i' quéguequi röjözagaca.

6 Nu bönni' lu yöl-la' ribödx'i' rizë'ë, nu'ë binnedo' röjözë',
 lu yöl-la' rudzeja cödx'i'cate' udxinë', nu'ë le nulapë'.

127

1 Channö cabí runë' tsutsu Xanru' Dios tu yu'u,
 nítisö tunë' dxin bönni' tunë' yu'u na'.

Channö cabí run chi'ë Xanru' Dios tu yödzö,
 nítisö ruyué' bönni' na' yu'u lu në'ë yödzö na'.

2 Nítisö naca rubanu' zílado', en röjö xu' cate' chigúl-lada',
 en ragu' le guzxi'u ni'a que le busaca' zi' cuinu',
 tu' runnë' Xanru' Dios que nu nadxi'inë' cate' ni' rasi nu na'.

³ Buli'yú, nácacabí' zxí'iniru' le runnë' Xanru' Dios queëru', ate' bí'ido' tu'cuá'anu nigula queëru'
nácacabí' le rubi'ë Xanru' Dios queëru'.

⁴ Ca nácacaca yaga lahui' tuchi' lu na' nu bönni' rejë' gudil-la
nácacabí' zxí'iné' bönni' zoë' iz cuidi' queë'.

⁵ Bica' ba bönni' nacuá'abi' queë' ziántéröbi'.
Biti' ca' utu'iñé' cate' ru'ë didza' láhui'gaquië'
bönni' tu'chi' a tu'söröë' queë', en lógaca nupa ta'díl-lalen lë'.

128

¹ Bica' ba yúgu'té nupa tadxi Xanru' Dios,
nupa na' tun ca rë'eni quézinë' Lë'.

² Cate' gagu' le gata' quiu' ni'a que dxin nun cazu',
uzi'u xibé lë na', en gaca dxi'a quiu'.

³ Gácanu nigula quiu' ca tu lubá uva dxia ga naca lö'a lidxu',
ate' ilácabi' zxí'inu' ca yugu' yaga olívodo' ta'bö'öbi' ga ni' ráguli'.

⁴ Buli'yútsöca', caní gáquië' bica' ba
bönni' na' rádxinë' Xanru' Dios.

⁵ Xanru' Dios zoë' Sión gunë' ga gaca dxi'a quiu',
en gu'ë li' lataj ilé'enu' le dxi'a gaca que yödzö Jerusalén
yúgu'té dza su' ibanu'.

⁶ Dios gu'ë li' lataj ilé'enu' yugu' zxí'ini xi'sú',
en gunë' ga ila'böza dxi'a tsáhui'do' böñachi Israel.

129

¹ "Zian luzuí gula'bía no netu' ga gudela' nácatu' ra'bando",
huáca ila'nná böñachi Israel:

² "Zian luzuí gula'bía no netu' ga gudela' nácatu' ra'bando',
pero biti' gula'deli' ulu'xicia netu'.

³ Guca tsca bulu'gá'ana-ba' bëdxi lu bëla' cúdzu'tu',
en gulún tunna ga gudödi xiyágaba' bëdxi quégaquië'."

⁴ Tsahui' náquië' Xanru' Dios.

Chinachúgu' du quégaca nupa tuá' dö' le gulúgui'ni netu'.

⁵ Ben ga ulu'tu'i, en ulu'huéjca guz cúdzu'lö
yúgu'té nupa biti' ta'lé'e dxi'a netu', böñachi Sión.

⁶ Ben ga ilácagaca ca güixi'do' da' ícjo'olö yu'u,
le ribíxitë cate' ni' naca huë'énido'.

⁷ Biti' gaca ulí në'e nu tsöjchugu le,
en biti' gaca nu gachi tsölén guizxi que,

⁸ en biti' ta'nná nupa ta'dödi ni':

"Rinábitu'-në' Xanru' Dios gunë' ga gaca dxi'a quiu'.
Lu Lë' Xanru' rinábitu' Lë' gunë' ga gaca dxi'a quiu'."

130

¹ Ga ni nötjada' rulidza' Li', Xan.

² Ruzë nagu' chi'a, Xana' Dios.

Ruzëda' nagu' le rinábida' Li'.

³ La' nnaru' tsöjnenu' xiguia' nabága'gaca böñachi,

¿nuzxi caz urúaj tsahui' lo', Xan?

⁴ Runiti lo cazu' netu', Xan,
para guntu' Li' bal.

⁵ Runa' löza Li', Xana' Dios. Run löza bö' naca caza' Li',
ate' runa' löza gaca ca rnna xtídz'u.

⁶ Bö' naca caza' runrö löza Li', Xan,
ca tuné' bönni' tapa chi'ë yödzö chi'i dzö'ölö ta'bözö' itö yu zila,
ca tuné' löza itö yu zila yugu' bönni' na'.

⁷ Guli'gún löza Xanru' Dios, libí'ili', böñachi Israel,
tu' náquië' dxi'i ladxi' Xanru',
en ruhuá'uë' böñachi Israel.

⁸ Xanru' Dios huöá'uë' böñachi Israel
lu yúgu'të xiguia' nabága'gaca.

131

¹ Biti' run ba zxön cuina', Xan, en biti' rigú'u cuina' yöl-la' ba,
en biti' ulapa' na'a le náca gaca zxön, en le náca gaca böñiga.

² Idú ládx'a'a nuzóa cuina' nöxaj, en zoa' dxisö.
Ca runbi' bi'i huë'ëni ruzí' ládx'i'bi' cuítanu xiná'abi',
ca' riböza bö' naca caza' lu icja ládx'i'da'ahua'.

³ ¡Libí'ili', böñachi Israel, guli'gunë' löza Xanru' Dios
ga naguela' na'a dza, en yúgu'të dza si' zaca!

132

¹ Rinábida' Li', Xan, uláz queë' David tsöjnénü'
yúgu'të le gudí'i guzxáquë'ë,

² en ca benë' tsutsu xtídzë'ë, Xan, en guzxí' lu në'ë bi gunë' lo',
nacu' Nu nál-latérö láhuigaquïë' zxí'ini xi'soë' Jacob, gunnë':

³ "Biti' ca' tsu'a lidxa',
en biti' gáta'a le ráti'da',

⁴ en biti' gu'a lataj tödi yëla guiój lahua',
en biti' utsudi' lahua',

⁵ ga idxinrö dza ucöza' tu lataj ga soë' Xanru' Dios,
le gaca yu'u lidxi Nu na' nál-latérö láhuigaquïë' zxí'ini xi'soë' Jacob."

⁶ Biyönitu' didza' que guí'ina lá'ayi queë' Dios cate' ni' zóatu' Efrata,
ate' budzölitu' le lu xiyúë' Jaar.

⁷ Uyéajru' ga na' zoa caze' Xanru' Dios.

Tseaj ládx'i'ru'-në' ga naca xilibi ni'ë.

⁸ Gudödi, Xan, ga na' soa cazu' Li'.

Gudá tsözxön len guí'ina lá'ayi que yöl-la' zxön quiu'.

⁹ Ben ga sóalen le naca tsahui' yugu' bixúz quiu'
ca tu lari' ta'xóë' cùdzu'gaquïë'.
Ben ga ilú-la böñachi quiu' lu yöl-la' rudzeja quéguequi.

¹⁰ Uláz queë' David, huen dxin quiu', rinábida' Li'
cabí ucá'anu' bönni' na' gurö cazu' Li'.

¹¹ Xanru' Dios benë' tsutsu xtídzë'ë bi gunë' queë' David,
le naca idútë li, ate' Lë' biti' unítië' xtídzë'ë na', gunnë':

“Uzóa’ tuë’ zxí’ini xi’sú’ xilatju’ ga inná bë’ëbi’.

¹² Channö ilunbi’ zxí’ini xi’sú’ ca rnna didza’ dzaga quia’, en le nuna’ ba nalí para uzéajni’ida’ légacabi’, ila’nná bë’ëbi’ ga rö’ u rinná bë’u yúgu’të dza si’ zaca.”

¹³ Xanru’ Dios nabö cazë’ queë’ yödzö Sión.

Raca ládxë’ë gaca Sión ga soa cazë’ Lë’.

¹⁴ Rnnë’: “Nácatica’sö lataj ni ga soa caza’ neda’.

Soa’ ni tu’ raca ládxä’ soa’ ni.

¹⁵ Guna’ ga gátada’ le ilágugaca bönachi ni, en guna’ ga ulu’huölaj ila’dzé’ e yöta xtila nupa ta’yadzaj ta’yudxi lu yödzö ni.

¹⁶ Guna’ ga sóalen yöl-la’ rusölä yugu’ bixúz quia’ ca tu lari’ ila’xóa cíduz’gaquie’, ate’ ilul-la bönachi quia’ lu yöl-la’ rudzeja quéguequi.

¹⁷ Guna’ ni ga ilá’ lahui yöl-la’ unná bë’ queë’ David.

Guna’ ga sóatica’sö nu inná bë’ xilatje’ bönni’ na’ nabö caza’.

¹⁸ Guna’ ga sóalen nupa biti’ ta’lé’ e lë’ dxia’ a yöl-la’ rutu’i ca tu lari’ ilácuguequi, pero tsëpi yösa bení’ le dxia’ icjé.”

133

¹ Buli’yútsöca’: ¡Bica’ dxia’ tsahui’ naca cate’ nupa náccagaca böch’i luzë’ e ta’böza lu yöl-la’ tuz quéguequi!

² Naca ca le za ta’gú’u ícjaguequi bönachi, le ridzún lu guitsa’ láhuiguequi, en bidzún lu guitsa’ lúzxuë’ Aarón, le bidzún ga ridxitë lu yeni zxë’.

³ Naca ca buzén le ridinni lu guí’ a Hermón, en ca le ribö’ a lu guí’ a Sión, tu’ gunná bë’ë Xanru’ gaca dxia’ a queëru’ lu guí’ a na’, en gata’ yöl-la’ na’bán idú queëru’.

134

¹ ¡Buli’yútsöca’!

¡Guli’cu’ë Xanru’ Dios yöl-la’ ba, yúgu’tëli’ runli’ xichinë’ Xanru’, yúgu’tëli’ na’ zóali’ yu’u lidxë’ Xanru’ chi’i dzö’ölö!

² ¡Guli’chisa ná’ali’ ga zóali’ lataj lá’ayi queë’, en guli’nná dxia’ a queë’!

³ Xanru’ Dios, zoa cazë’ yödzö Sión, gunë’ ga gaca dxia’ a queëli’. Naca cazë’ Nu ben yehua’ yubá, en yödzölió ni.

135

¹ ¡Guli’cu’ë yöl-la’ ba Xanru’ Dios!

¡Guli’cú’u yöl-la’ ba La la’ayi queë’ Xanru’ Dios!

¡Guli’cu’ë yöl-la’ ba, libí’ili’ runli’ xichinë’ Xanru’,

² libí’ili’ na’ zuíli’ yu’u lidxë’ Xanru’,

ga na’ zóali’ lö’ a que yu’u lidxë’ Dios queëru’!

³ ¡Guli’cu’ë yöl-la’ ba Xanru’ Dios tu’ náquië’ dxia’ a!

¡Guli’gul-la yöl-la’ ba que La la’ayi queë’, tu’ naca lachi!

4 Nabö' cazë' Xanru' zxí'ini xi'sóë' Jacob para ilaca quez queë'.
Guröë' bönachi Israel para ilequi queë'.

5 Nözda' nayépisë' Xanru' Dios.

Nayépisëtë' ca yugu' dios quégaca bönachi izá'a.

6 Run cazë' Xanru' ca riyaza ladxi' cazë' yehua' yubá ni',
en luyú ni, en lu nísado', en zxan lu yu.

7 Runë' ga rö' böaj gáti'tës luyú ni,
en runë' ga rëpi yösa cate' ralaj guiøj.

Rubéajë' bö' recja ga rapa chi'ë le nequi queë'.

8 Bëtië' yugu' bi'i bönni' zí'alö quégaca bönachi Egipto,
zxí'inigaca bönachi, en böa' huë'ënido' quégacaba' böa' guixi'.

9 Benë' yugu' yöl-la' huáca zxöñ le gulaca bë' luyú Egipto,
yugu' le na' gulaca queë' Faraón, en quégaca huen xichinë'.

10 Busunítië' Dios bönachi zián yödzö izá'a,
en bëtië' bönni' lo ta'nná bë'ë.

11 Bëtië' Sehón, bönni' gunná bë'enë' bönachi Amorreo,
en Og, bönni' gunná bë'enë' bönachi Basán,

en bönni' gula'nná bë'enë' bönachi yödzö nacuá' luyú Canaán.

12 Budödë' xiyúgaquië' bönni' na'

lu na'agaquië' bönni' Israel, bönachi queë' cazë'.

13 Tsaz zoa caz Lo', Xan.

Ila'cuá'tica'sö nupa tsöjnégaca Li', Xan,

14 tu' uchi'a usöröu' bönachi queu', Xantu' Dios,
en huéchi' ládxu'u nupa tun xichinu'.

15 Budö' quégaca bönachi yugu' yödzö izá'a néquiniguequi
plata, en oro, yugu' le núngaca lu ni'a lu na'agaca bönachi.

16 Zóagaca rui'iguequi, pero biti' bi didza' tu'í.

Zóagaca guiój lóguequi, pero biti' bi ta'lé'e.

17 Zóagaca nágagaca, pero biti' bi ta'yöni,
en biti' ta'guela' bö' rui'igaca.

18 Nupa tun léguequi ilaca ca nácabaca budö' na',
en caní ilaca yúgu'te nupa tu'zxöni ladxi' léguequi.

19 Libí'ili', bönachi Israel, guli'guíë' Xanru' náquië' dxí'a.

Libí'ili', zxí'ini xi'sóë' Aarón, guli'guíë' Xanru' náquië' dxí'a.

20 Libí'ili', zxí'ini xi'sóë' Levi, guli'guíë' Xanru' náquië' dxí'a.

Libí'ili', nóloli' rádxil'i-në' Xanru', guli'guíë' Xanru' náquië' dxí'a.

21 Nóloli' zóali' yödzö Sión ral-la'guiëli'-në' Xanru' náquië' dxí'a,
tu' zoa cazë' Xanru' Dios yödzö Jesusalén.

¡Guli'cu'ë yöl-la' ba Xanru'!

136

1 ¡Xclenë' Xanru' Dios tu' náquië' dxí'a!

Zóatica'sö yöl-la' dxí'i ladxi' queë'.

2 ¡Xclenë' Dios nayépisëtë' ca yugu' dios izá'a!

Zóatica'sö yöl-la' dxí'i ladxi' queë'.

3 ¡Xclenë' Xanru', nayépisëtë' ca yugu' xángaca bönachi!

Zóatica'sö yöl-la' dxi'i ladxi' queë'.

4 ¡Xclenë' Dios, tuzë' Lë' runë' yugu' yöl-la' huáca zxön!

Zóatica'sö yöl-la' dxi'i ladxi' queë'.

5 ¡Xclenë' Dios, len yöl-la' rácada' queë' benë' lúzziba!

Zóatica'sö yöl-la' dxi'i ladxi' queë'.

6 ¡Xclenë' Dios, gudixjë' luyú láhuilö nísado'!

Zóatica'sö yöl-la' dxi'i ladxi' queë'.

7 ¡Xclenë' Dios, benë' gubidza, en beo'!

Zóatica'sö yöl-la' dxi'i ladxi' queë'.

8 ¡Benë' Dios gubidza para tsení' lahui' dza!

Zóatica'sö yöl-la' dxi'i ladxi' queë'.

9 ¡Benë' Dios beo', en yugu' bólaj para ulu'zení' chi'i dzö'ölö!

Zóatica'sö yöl-la' dxi'i ladxi' queë'.

10 ¡Xclenë' Dios, bëtië' yugu' bi'i bönni' lo quégaca bönnachi Egipto!

Zóatica'sö yöl-la' dxi'i ladxi' queë'.

11 ¡Bubéajë' bönnachi Israel ladaj bönnachi Egipto na'!

Zóatica'sö yöl-la' dxi'i ladxi' queë'.

12 ¡Len yöl-la' huáca zxön queë', en lu yöl-la' nadxi'i queë' benë' caní!

Zóatica'sö yöl-la' dxi'i ladxi' queë'.

13 ¡Xclenë' Dios, bubéajë' choplö Nísado' Xiná!

Zóatica'sö yöl-la' dxi'i ladxi' queë'.

14 ¡Benë' ga gula'dödi bönnachi Israel gatsaj láhui'lö nísado' na'!

Zóatica'sö yöl-la' dxi'i ladxi' queë'.

15 ¡Lu nísado' na' busunítië' Faraón, en bönni' queë' röjáquië' gudil-la!

Zóatica'sö yöl-la' dxi'i ladxi' queë'.

16 ¡Xclenë' Dios, guchë'ë bönnachi queë' la' guixi' ga ni' naca yu bidxi!

Zóatica'sö yöl-la' dxi'i ladxi' queë'.

17 ¡Xclenë' Dios, bëtië' bönni' gula'nná bë'ë, guláquië' nal-la!

Zóatica'sö yöl-la' dxi'i ladxi' queë'.

18 ¡Bëtië' bönni' gula'nná bë'ë, dëda' lu ná'agaquie' yöl-la' unná bë'!

Zóatica'sö yöl-la' dxi'i ladxi' queë'.

19 ¡Bëtië' Sehón, bönni' gunná bë'enë' bönnachi Amorreo!

Zóatica'sö yöl-la' dxi'i ladxi' queë'.

20 ¡Bëtië' Og, bönni' gunná bë'enë' bönnachi Basán!

Zóatica'sö yöl-la' dxi'i ladxi' queë'.

21 ¡Budödë' xiyúgaquie' lu ná'agaca bönnachi queë'!

Zóatica'sö yöl-la' dxi'i ladxi' queë'.

22 ¡Budödë' le lu ná'agaca bönnachi Israel, bönnachi tun xichinë'!

Zóatica'sö yöl-la' dxi'i ladxi' queë'.

23 ¡Yöjenenë' rë'u lu ná'agaca nupa gula'díl-lalen rë'u!

Zóatica'sö yöl-la' dxi'i ladxi' queë'.

24 ¡Busöle' rë'u lu ná'agaca nupa gula'díl-lalen rë'u!

Zóatica'sö yöl-la' dxi'i ladxi' queë'.

25 ¡Rugahuë' yúgu'të bönnachi!

Zóatica'sö yöl-la' dxi'i ladxi' queë'.

26 ¡Xclenë' Dios, zoa cazé' yehua' yubá!

Zóatica'sö yöl-la' dxi'i ladxi' queë'.

137

- ¹ Ra' yegu nacuá' lu yu Babilonia gurö'ötü',
en gurödxi yéchi'tu', cate' yöjnetu' yödzö Sión.
- ² Lu yaga rö'gaca yugu' ra' yegu ni'
bugála'tu' yugu' le rül-lalentu'.
- ³ Caní bentu' tu' gula'nabi yudxi nupa gulachë' netu' nadzuntu' ni' gúl-latu'.
Nupa bulu'saca' zi' netu' gula'naba queétu' yöl-la' ruzxidxi, gula'nná:
"Guli'gul-la queétu' tu le rul-la que yödzö Sión."
- ⁴ ¿Nacxi caz gaca gúl-latu' le rul-la quee' Xanru'
ga ni nadzuntu' tu lu yödzö izá'a?
- ⁵ Channö gal-la ládexa' yödzö Jerusalén,
rinábida'-në' Dios ugüë' yöl-la' raca que na'a ibëla.
- ⁶ Rinábida'-në' gunë' ga ta'lúdexa'a chichja'
channö cabí tsöjneda' ladza',
en channö cabí huí' zxönra' yödzö Jerusalén ca ia'tú le ruzí'ida' xibé.
- ⁷ Yöjiné le gulunë' zxí'ini xi'sóë' Edom, Xan,
le gulunë' dza busiúdxu' yödzö Jerusalén,
ca na' gula'nnë': "Guli'quinnaj dëra.
Guli'quinnaj dëra ga idxintë xilibi zö'ö yödzö na'."
- ⁸ Libí'ili', böñachi Babilonia, libí'ili' rusunítili',
bica' ba nu ubí'i queëli' ca na' benli' queëtu'.
- ⁹ Bica' ba nu quela' yugu' bí'ido' queëli'
en uzzuzzaj lëgacabí' yugu' lu guiöj.

138

- ¹ Idú ládexa'a guía' Li', "Xclenu'" Xan.
Gul-la' yöl-la' ba quiu' lögaca le tun zxön böñachi yugu' yödzö izá'a.
- ² Uzóa zxiba' saca' yudo' lá'ayi quiu', en guía' Li', "Xclenu'"
ni'a que Lo', tu' nacu' dxí'i ladxi', en runu' ca rnna didza' bë'u,
tu' benu' ca naca lu xtídzu'u, en lu le naca ca nazí'i lo.
- ³ La' dza ná'asö cate' bulidza' Li', bubí'u didza'.
Tu' butipu' ládexa'a, guca' rugu ladxi'.
- ⁴ Yúgu'të bönni' ta'nná bë'ë ilë' Li': "Xclenu'" Xan,
cate' ila'yönnë' didza' ru'u.
- ⁵ Ilul-lé' ca nácagaca le runë' Xanru' Dios,
tu' nácatérö zxön yöl-la' ba queë' Xanru'.
- ⁶ Sal-la' nayépisétérë' Xanru' Dios
ruí'i ládexë' nupa nácagaca cá'asö,
pero zi'tu' zí'tu'sö ruyüë' nupa tun ba zxön cuínguequi.
- ⁷ Sal-la' ridá' ga zoa böñadxi quia', Li' utipa cazu' ládexa'a.
Tí'lalen cazu' nupa ta'dí'lalen neda',
ate' len yöl-la' huáca quiu' usölö' neda'.
- ⁸ Xanru' gun cazë' quia' ca chinuzóa cazë' gunë'.
- Zóatica'sö yöl-la' dxí'i ladxi' quiu', Xan.

Biti' usán no'o le nun cazu' len na' cuinu'.

139

1 Ruyú cazu' le yu'u icja ládxí'da'ahua', Xan, en nunbë' cazu' neda'.

2 Nöz quézinu' cate' ribö'a, en cate' riyasa'.

Nózinu' le rizá' ládxa'a ni' zu' zi'tu'.

3 Ruyú cazu' neda' cate' bi runa', en cate' rasia',
en nözinu' yúgu'té le runa'.

4 Zí'atëlö ca bi didza' ru'a,
chi nöz quézinu' bi innía', Xan.

5 Röjnöru cazu' lahua', en za' cazu' cùdza'a,
en naxóatica'sö no'o neda'.

6 Run ga rubánida' tu' nöz quézinu' Li'.

Biti' séqui'da' tséajni'ida' ca naca.

7 ¿Naru' huáca tseja' ga biti' idxín Bö' quiu'?

¿Naru' huáca izxúmaja' ga biti' zoa cazu' Li'?

8 La'tu' huabena' lúzxiba, ni' soa cazu' Li',
en la'tu' huötja' lataj chul-la, ni' zoa cazu' ca'.

9 La'tu' uyija' ga rilén gubidza,
o la'tu' huadöda' ia'tsölä'alö nísado',

10 ni' caz iché'u neda',
ate' len no'o ibëla sön cazu' neda'.

11 La'tu' innía': "Ucachi' neda' le naca chul-la",
en la'tu' huöáca chul-la bení' zóalen neda',

12 biti' gaca chul-la lo' Li' lë na' naca chul-la quia',
pero chi'i dzö'ölö gaca quiu' ca lahui' dza.

Tuz ca nácagaca lo' Li' le naca chul-la, en le naca lahui' dza.

13 Nun cazu' Li' le zoa icja ládxí'da'ahua'.

Benu' ga guyá' lë'ënú xiná'a le naca caza'.

14 Guía' Li': "Xclenu" tu' run ga rubánida' ca nun cazu' neda',
ate' rádxida' Li' tu' tun le nunu' ga rubánida',

ate' bö' naca caza' nözi caz naca caní.

15 Biti' bigachi' lo' le naca caza' cate' ni' si' galja',
cate' ni' yu'a lë'ënú xiná'a.

16 Bilé'e quézinu' neda' cate' ni' si' galja',
tu' chinuzúajgaca lu guichi quiu'

yugu' dza ral-la' soa' ibana',

sal-la' biti' ridxini nitú dza na'.

17 Nazáca' térogaca quia' le rizá' ládxu'u, Dios.

Ziántërö nácagaca lë na' rizá' ládxu'u.

18 La'tu' huáca nu ulaba léguequi,
ilácagaca ziántërö ca nácagaca guiój yuzxi.

Cate' rubana', ni' zóalena' Li'.

19 Raca ládxa'a usunítiu' nupa tuá' dö', Dios.

Que lë ni na', guli'cuíta ga zoa', nülöli' rútili' böñachi.

20 Tu'i didza' zi' ca nacu' Li', Dios,
ate' nupa ta'dá'baga' Li' ta'nnë liz que Lo'.

21 ¿Naru' cabí rileda' nupa ta'lé Li', Xan?

¿Naru' cabí ruzúa' tsölä'alö nupa ta'dá'baga' Li'?

22 Idú ládxa'a biti' rilé'eda' léguequi dxi'a.

Nuzúa' léguequi ca nupa ta'díl-lalen neda'.

23 Buyú neda', Dios, en gúquibe'e le zoa icja ládxi'da'ahua'.

Guzxi' bë' neda', en gúquibe'e le rizá' ládxa'a.

24 Buyú channö zóalen neda' le naca dö',
en bulu'i neda' nöza tsahui' quiu' zóatica'sö.

140

1 Busölá neda', Xan, lu ná'agaca nupa tuá' dö'.

Ben chi'i neda' para cabí bi ilunë' bönni' zi' quia'.

2 Ta'zá' ládxë'ë le nácagaca xihui' ilunë',
en tunë' ga ila'díl-lalen bönnachi luzë'eguequi.

3 Didza' tu'ë tun ga nácagaca lúdxi'gaquië' ca yugu' bëla sínia'.

Yü'u ruá'agaquië' le nachë' yöl-la' guti ca le dxia lu láyi'ba' bëla na'.

4 Ben chi'i neda', Xan, para cabí bi ilunë' bönni' tu'ë dö' quia'.

Ben chi'i neda' para cabí bi ilunë' bönni' zidzaj quia',
bönni' na' të'ënë' ilunë' ga ichixi iníguida'.

5 Nupa tun ba zxön cuínguequi nucáchigaca le sön neda',
enca' du yalaj iröli neda'.

Nucáchigaca du yalaj ga ral-la' töda'.

Nucözagaca le ilá'zön neda'.

6 Gudxa'-në' Xanru': "Nacu' Dios quia'.

Ruzë nagu', Xan, yugu' le rinábida' Li'.

7 Xana' Dios, naca cazu' Nu rusölá neda' len yöl-la' huáca quiu'.

Ben chi'i cazu' icja' cate' ni' zoa' lu gudil-la.

8 Biti' gu'u lataj, Xan, gaca quia' le rë'ënë' gunë' bönni' ru'ë dö'.
Biti' gu'u lë' lataj idéli'në' le rizá' ládxë'ë, para cabí tsëpisë'.

9 Nacuá' nupa nagú'ugaca neda' lë'ajlö.

Busubaga' ícjagaquië' dö' të'ënë' ilu'ë quia'.

10 Ben ga ila'bixaj bo' yalaj lahui ícjagaquië'.

Bë' lataj tsöjtsázagaquië' tu lu guí' zxön,
en yugu' lu yero zila ga biti' ila'zéqui'në' ulu'rúajë'.

11 Biti' gu'u lataj soë' bönni' rizí' yë'ë luyú ni.

Ben ga udxin queë' bönni' zidzaj dö' ru'ë."

12 Nözda' gunë' Xanru' ga ulu'rúaj tsahui' nupa ta'guí'i ta'zaca',
en uchi'a usöröë' quégaca bönnachi yechi'.

13 Le nácatë ilë Li': "Xclenu'" nupa nácagaca tsahui' tu' tu'lidza Lo'.
Ila'cuá' ga zoa cazu' Li' nupa nácagaca dxii'a.

141

1 Rulidza' Li', Xan. Gudáchigaca zoa'.

Ruzë nagu' chi'a cate' rulidza' Li'.

2 Buyú le rulidza' Li' ca dzön yalaj le ridxín lo',
en cate' richisa na'a, buzí' le ca tu böa'do' uzégu'a-ba' lo'.

3 Ben chi'i ruá'a, Xan,

en gudapa chi'i guídi ruá'a para cabí gu'a didza' zi'.

⁴ Bití' gu'u lataj gaca ládex'a le cabí nácatë,

para cabí guna' le naca xihui'

len yugu' bönni' tutié' bönnachi.

Bití' gu'u lataj guna' léguequi tsözxöñ.

⁵ Bë' lataj gu'é neda' bönni' tsahui' lu yöl-la' nadxí'i queë'

para uzéajni'inë' neda'.

Le gunë' gaca quia' ca le za cu'ë icja'.

Bití' gu'u lataj tá'baga' icja' le ilún nupa tuá' dö'.

Rinábida' Li' uzagu' xinözguequi.

⁶ Ilá'ládzu'gaquie' bönni' lo quéguequi lë'e gui'a guiöj,

ate' iléquibe' e gulaca dxí'a didza' bë'a.

⁷ Ca raca cate' nu rugá'ana-ba' bëdxí, en rulá'a yu,

ca' gaca que dxita yú'ugaquie',

le gulásilasi ra'ba que xilátjagaca nupa nátigaca.

⁸ Richisa lahuá' ruyúa' ga zu' Li', Xantu' Dios.

Rucachi' cuina' ga na' zu'. Bití' usán no'o neda'.

⁹ Ben ga bití' tsöjbixa' lu le sön neda', lë na' nucáchi'gaca,

en ga bití' tsöjtsaza' lu du yalaj nucözagaca nupa tuá' dö'.

¹⁰ Bë' lataj ila'yaza la' cuíngacasö lu du yalaj bulu'cachi' nupa tuá' dö',

pero benna lataj tödisa' neda' ga na' nagachi' du yalaj na'.

142

¹ Rulidza'-në' Xanru', ru'a zidzaj didza'.

Ráta'yua' lahuë' Xanru' uzá' ládxë'ë quia'.

² Rudöda' lahuë' yöl-la' rinaba yudxi quia',

en rusiyönda' Lë' le rácacaca quia'.

³ Cate' budú ládex'a,

gunözi quézinu' Li' le guca quia'.

La' nöza ga ridá' neda'

bulu'cachi' le sön neda'.

⁴ Buyú cuita' ibëla

tu' cuntu nu zoa nu rui'i ladxi' neda'.

Bití' bi zoa le gácalen neda'.

Cuntu nu run chi'i bö' naca caza'.

⁵ Gurödxi'a lo' Li', Xan, gunnía':

Run chi'i cazu' neda' Li',

en naca cazu' Nu rácalen neda' ladaj nupa nabángaca.

⁶ Ruzé nagu' le rulidza' Li',

tu' nagá'ana' cá'asö.

Busölá neda' lu ná'agaca nupa ta'zóa regu' neda',

tu' nácatëögaca nál-la ca neda'.

⁷ Guléaj bö' naca caza' lu yu'u lidxi guíë,

para gaca guía' Li': "Xclenu'" tu' rulidza' Lo'.

Nupa nácgacaca tsahui' ulu'dubi idú gásibi'ilö ga zoa',

tu' gunnu' sizxöni quia' le riquinda'.

143

¹ Ruzé nagu' le rulidza' Li', Xan.

Ruzé nagu' le rinabi yúdxida' Li'.

Tu' runu' ca rnna didza' bë'u, en nacu' tsahui' gunní'

² biti' iché'u neda' lo' ga uchi'a usöröu' quia', huen dxin quiu'.

Cuntu nu zoa naca tsahui' lo' Li'.

³ Nu biti' rilé'e neda' dxi'a zoa regu' bö' naca caza'.

Nuzötjé' yöl-la' na'bán quia' lu yu.

Benë' ga zoa' lataj naca chul-la ca raca quégaca nupa gulati dza ni'te.

⁴ Que lë ni na' rudú ládxa'a, en rö'a böninga.

⁵ Röjneda' dza chigula'dödi.

Rizá' ládxa'a ca nácagaca le benu' Li'.

Ribequi icja' ca nácagaca le nun no'o.

⁶ Richisa na'a zaca' ga zu' Li'.

Rizé ládxa'a Li' ca tu luyú bidxi rizé ladxi' nisa guiój.

⁷ Bubí'itë didza', Xan, tu' rudú ládxa'a.

Biti' ucachi' lo' lahuá' neda',

para cabí gaca' ca tu bönni' ru'ë lataj chul-la ga nacuá' nupa nátigaca.

⁸ Ben ga yönda' yugu' zila ca naca yöl-la' dxi'i ladxi' quiu',

tu' ruzxöni ládxa'a Li'.

Busëdi neda' ca ral-la' guna',

tu' ruchisa' lo' Li' bö' naca caza'.

⁹ Busölä neda', Xan, lu ná'agaca nupa biti' ta'lé'e neda' dxi'a.

Nacu' Nu ruzoá neda' tsutsu.

¹⁰ Busedi neda' para guna' ca rë'ënu' Li',

tu' naca cazu' Li' Dios quia'.

Bë' lataj iché' Bö' Lá'ayi quiu' neda' lu nöza tsahui'.

¹¹ Butipa ládxa'a, Xan, para gaca yöl-la' ba que Lo'.

Tu' nacu' tsahui' busölä neda' lu le raca quia'.

¹² Lu yöl-la' dxi'i ladxi' quiu' guchugu quégaca nupa biti' ta'lé'e neda' dxi'a.

Busuniti yúgu'të nupa tu'saca' zi' bö' naca caza',

tu' naca' huen dxin quiu'.

144

¹ ¡Yöl-la' ba Lë', Xanru' Dios!

¡Náquië' ca tu guiój ga zoa' tsutsu!

Rutipë' na'a para gaca tseja' gudil-la,

en rutipë' ca' xibön na'a para gaca til-lalena' bönni' nácagaquïë' nál-la.

² Naca cazë' Xanru' yöl-la' dxi'i ladxi' quia',

enca' ca tu ga zoa' tsutsu lu gudil-la.

Rusölë' neda', en náquië' ca tu ga zoa' tsaz.

Náquië' ca tu le run chi'i neda' lu gudil-la, ate' rucachi' cuina' ga na' zoë'.

Runë' ga tun nupa rinná bë'eda' ca rnna didza' ru'a.

³ ¿Bízxatë caz náquië' bönni' tu' runu' lë' ba lá'ana, Xan?

¿Bízxatë caz náquië' bönni' tu' ru'i ladxi' cazu' lë'?

⁴ Naca cazë' bönni' na' ca tu bö'do' recja,

ate' yugu' dza zoë' nabanë' nácagacasö ca tu zxul-la le rigú'u tu böaj ridödisö.

⁵ Buzötjä lúzxbiba, en bdinne ni, Xan.

Gudán yugu' guí'a, ate' irúaj dzön lë'eguequi.

⁶ Ben ga tsépi yösa quiu', en bésilasi léguequi.

Busë yugu' yaga lahui tuchi', en ben ga ila'bö' bagu'isö.

7 Bulí no'o ga na' zu' xitsá'alö.
Busölá neda', en guléaj neda' lu ná'agaca böñachi zi'tu',
le gaca ca rubéaju' neda' lu nisa zila.

8 Ta'zí' yë' böñachi na',
ate' le cabí nácatë naca yöl-la' unná bë' quéguequi.

9 ¡Gul-la' quiu' Li', Dios, tu le cubi!
¡Gul-la' quiu' yöl-la' ba, en quínnia' bihuël-la nuá' chi du que!

10 Rusölá cazu' bönni' ta'nná bë'ë.
Busöló' David, huen dxin quiu', lu guíë tuchi' queë' bönni' ru'ë dö'.
11 Gúcalen neda', en busölá neda' lu ná'agaca böñachi zi'tu'.

Ta'zí' yë' böñachi na',
ate' le cabí nácatë naca yöl-la' unná bë' quéguequi.

12 Ben ga ilácabi' bi'i bönni' queëtu' ni yu'ugacabi' iz cuidi'
ca yugu' yaga nazxöngaca,
en ben ga ilácabi' bi'i nigula queëtu'
ca nácgaca ya'zxén que tu yu'u nazaca'.

13 Ben ga ilígaca yu'u queëtu' zxoa' za utúbitu',
en ben ga iláljaba' gayuá' gayuá'aba' chíbodo',
en bö'cu' zxila'do' ga nucuá'atu'-ba'.

14 Ben ga ulu'cuá'aba' bö'a huë'ënido' quégaca bö'a' guixi' queëtu',
en ga biti' bi gaca quégacaba' bëdxi zxön, en bëdxido' ca'.
Biti' gu'u lataj soa nu cödxi yechi' la' nöza que ládzatu'.

15 ¡Bica' bágaca böñachi raca caní quéguequi!
¡Bica' bágaca böñachi na' Xanru' Dios náquië' Dios quéguequi!

145

1 ¡Guna' Li' zxön, Dios!

¡Nacu' Nu rinná be'e neda'!

¡Gádxitica'sa' Lo', Xana' Dios!

2 ¡Tu dza tu dza cu'a Li' yöl-la' zxön,
en cù'utica'sa' Lo' yöl-la' ba!

3 ¡Nayépiséterë' Xanru' Dios, ate' cù'uru'-në' yöl-la' ba!
¡Biti' ca' gaca gúnbe'ëru' ca naca yöl-la' zxön queë'!

4 Yúgu'të böñachi ila'gú'u yöl-la' ba le nun cazu' Li',
para ulu'siyón zxí'inigaca,
en ulu'lui'i lahui le nácgaca zxön benu'.

5 Sa' ládexa'a ca naca yöl-la' zxön que yöl-la' unná bë' quiu',
en ca nácgaca yöl-la' huáca zxön runu'.

6 Ilu'i didza' yúgu'të böñachi ca naca yöl-la' zxön
quégaca yöl-la' huáca runu'.

Usiyónda' böñachi ca naca yöl-la' zxön quiu'.

7 Idú ládxigaca ilu'i didza' cate' tsöjnégaca yöl-la' dxí'i ladxi' zxön quiu'.
Lu yöl-la' rudzeja quéguequi ila'bödxi'a tu' nacu' tsahui'.

8 Xanru' Dios ruzá' ládxë'ë queëru', en ruhuéchi' ládxë'ë rë'u.
Biti' ilética'së', ate' zxönterö naca yöl-la' dxi'i ladxi' queë'.

9 Runë' Xanru' Dios le naca dxi'a quégaca yúgu'të böñachi,
en ruhuéchi' ládxë'ë yúgu'të le nunë'.

10 Yúgu'të le nunu' ilë Li': "Xclenu'" Xan,
ate' nupa néquiguequi quez quiu' ilún Li' zxön.

11 Ilu'i didza' ca naca yöl-la' zxön que le rinná bë'u,
en ulu'lui'i lahui yöl-la' zxön quiu',

12 para ulu'siyön böñachi ca nácagaca le zxön runu',
en ca naca yöl-la' zxön que le rinná bë'u le nayépisétérö.

13 ¡Zóatica'sö le rinná bë,u,
ate' idia'tica'sö yöl-la' unná bë' quiu'!

¡Lu le naca idú ladxi' queë' runë' Dios ca rnágaca yúgu'të didza' ru'ë,
en lu yöl-la' dxi'i ladxi' queë' runë' yúgu'të le runë'!

14 ¡Röjzonë' Xanru' yúgu'të nupa röjtsö'ögaca,
en ruchisë' yúgu'të nupa ndínnegaca!

15 ¡Yúgu'të böñachi tu'yú Li', Xan,
ate' runödzu' le ilágugaca cate' ridxín dza que!

16 ¡Rusalaj cazu' no'o
en rugagu' yúgu'të le nacuá' nabángaca!

17 Náquië' tsahui' Xanru' Dios ca naca yúgu'të le runë'
en náquië' ca' dxi'i ladxi'.

18 Zoë' Xanru' gala' ga nacuá' yúgu'të nupa tu'lidza Lë',
nupa na' tu'lidza Lë' idú ládx'i'guequi.

19 Gunnë' le ta'zé ládx'i'gaca quégaca nupa tadxi Lë'.
Riyönnë' cate' tu'lidza Lë', en rusöle' léguequi.

20 Run chi'i cazë' Xanru' yúgu'të nupa nadxi'igaca Lë',
pero usunítie' nupa tuá' dö'.

21 Len ru'a cuina' cu'a-në' Xanru' yöl-la' ba,
ate' yúgu'të böñachi ilúntica'sö Lë' zxön.

146

1 ¡Guli'cu'ë yöl-la' ba Xanru'!
¡Li', bö' naca caza', gulu'ë yöl-la' ba Xanru'!

2 ¡Cu'a-në' Xana' yöl-la' ba tsanni ni zoa' nabana'!
¡Gul-la' yöl-la' ba queë' Dios quia' tsanni ni zoa bö' naca caza'!

3 Biti' uzxöni ládx'i'li' bönni' ta'nná bë'ë,
en calëga bönni' tati cazë', bönni' biti' ca' gaca ulu'sölë' rë'u.

4 Rurúaj bö' yu'ë nu bönni', ate' ruhuöáquië' yu.
La' dza ná'asö riniti le rizá' ládxë'ë gunë'.

5 Bica' ba bönni' rácalenë' Dios queë' Jacob lë',
bönni' na' runë' löza Xanru' Dios.

6 Nunë' Xanru' Dios lúzxiba, en luyú ni,
enca' nísado', en yúgu'të le nacuá' yugu' lataj na'.
Rúntica'së' Lë' ca rnna didza' bë'ë,

7 en ruchi'a rusöröë' nupa zoa nu rusaca' zi' léguequi.
Rugagu cazë' nupa ta'dún.

Rusanë' Xanru' Dios nupa nadzúngaca.

8 Rusaljë' Xanru' Dios guiój lógaca nupa nácgaca lo chul-la.
Ruchisé' Xanru' Dios nupa nadzö'ögaca.

Nadxi'inë' Xanru' Dios nupa nácgaca tsahui'.

9 Rapa chi'ë Xanru' Dios yugu' bönni' zi'tu'.

Rácalenë'-bi' yugu' bi'i uzëbi, enca' yugu' nigula uzëbi,
pero ruzagüe' xinözguequi nupa tuá' dö'.

10 Inná bë'tica'së' Xanru' Dios.

Náquië' Dios queéli', böñachi Sión.
¡Guli'cu'ë yöl-la' ba Xanru'!

147

1 ¡Guli'cu'ë yöl-la' ba Xanru'!

¡Tsahui' naca gúl-laru' yöl-la' ba queë' Dios queëru'!
¡Naca lachi, en le ral-la' gunru', cú'uru'-në' yöl-la' ba!

2 Runë' Xanru' Dios ga rizxön yödzö Jerusalén.
Rutubë' bönni' Israel násilasigaquië'.

3 Ruúnë' bönni' nácgagaquië' yechi' ladxi',
en rudë'ë lari' ga dxiaqagaquië' huë'.

4 Rulabë' tsca nacuá' böläj lúzxiba.
Nucu'ë lágacaba' tu tuba' yúgu'të böläj na'.

5 Nayépisétérë' Xanru' Dios, en nál-latërë'.
Ga rë'ë dzu réajni'inë' yúgu'të.

6 Xanru' Dios rácalenë' nupa ta'guí'i ta'zaca'.
Ruzötje' nupa tuá' dö' lu yu.

7 ¡Guli'gul-la queë' Xanru' Dios, guiéli'-në': "Xclenu"!
¡Guli'gul-la yöl-la' ba queë' Xanru', quínnili' lë'egaca bihuël-lado'!

8 Riguísie' yugu' böaj lúzxiba,
en risöl-lë'ë nisa guiój luyú.

Runë' ga rilén yö yugu' lu guí'ado'.

9 Rugahuë' yugu' böa' guíxi'do',
enca' böiquiajdo' ta'bödxi'aba'.

10 Biti' raza ládxë'ë yöl-la' nál-la queëba' böa',
en biti' ruzi'ë xibé yöl-la' nál-la queë' bönni'.

11 Raza ládxë'ë Xanru' Dios nupa tadxi Lë',
nupa na' tun löza yöl-la' dxí'i ládxí' queë'.

12 ¡Guli'cu'ë yöl-la' ba Xanru', libí'ili' zóali' Jerusalén!
¡Guli'cu'ë yöl-la' ba Dios queëli', libí'ili' zóali' Sión!

13 Bucu'ë tsutsu le tu'baga' gapa nu riyaza yödzö queëli',
en runë' ga raca dxí'a quégaca zxí'ini'l' ga na' zóali'.

14 Runë' ga ribözali' dxí'a tsáhui'do',
en runë' ga ruhuölaj ridzé'eli' zxoa' xtila dxí'atërö.

15 Rinná bé'enë' yödzölió ni,
ate' xtídzë'ë ridödítë gáti'tës.

16 Risöl-lë'ë guiój bögui' ca zxila',
en riguísie' buzén ca dö.

17 Riguísie' bögui' ca yugu' guiój ruaj.

¿Nuzxi caz gaca guá' ilén le naca ziaga queë'?

18 Risöl-lë'ë xtídzë'ë, ate' ruúna' bögui' na'.

Runë' ga recja bö', ate' ruhuöáca nisa.

19 Ruí'ilenë' zxí'ini xi'sóë' Jacob didza',
en riguíxjë' xibá queë' para ilún böñachi Israel ca rnna.

20 Biti' benë' caní ni'a quégaca böñachi ia'tú yödzö izá'a,
ate' biti' nözigaca ca nácgaca le gunná bë'ë.

¡Guli'cu'ë yöl-la' ba Xanru'!

148

1 ¡Guli'cu'ë yöl-la' ba Xanru'!

¡Guli'cu'ë yöl-la' ba, libí'ili' zóali' yehua' yubá!

¡Guli'cu'ë yöl-la' ba, libí'ili' zóali' xitsá'alö!

2 ¡Guli'cu'ë yöl-la' ba, libí'ili' gubáz lá'ayi queë'!

¡Guli'cu'ë yöl-la' ba, libí'ili' tscalí' dá'ali' Lë'!

3 ¡Guli'cu'ë yöl-la' ba, libí'ili' gubidza, en beo'!

¡Guli'cu'ë yöl-la' ba, libí'ili' böläj bení'!

4 ¡Guli'cu'ë yöl-la' ba, libí'ili' zóali' zxan lúzxiba!

¡Guli'cu'ë yöl-la' ba, libí'ili' nisa, zxóali' láhuilö lúzxiba!

5 ¡Guli'cú'u yöl-la' ba La la'ayi queë' Xanru', yúgu'tëli',
tu' bë'ësë' didza', en canísö benë' libí'ili'!

6 Naguixjë' tsaz libí'ili'.

Naguixjë' xtídzë'ë le catu caz tödi que.

7 ¡Guli'cu'ë yöl-la' ba Xanru' idútë yödzölió,

en libí'ili' böä' ridali' lu nísado', en nísado' 'caz,

8 en libí'ili' guí', en guiój bögui' yöla sunna, bögui', en böaj,

enca' li', bö' budunu', runu' ca rnna xtídzë'ë,

9 en libí'ili' yugu' guí'a, en yúgu'të guí'ado',

en libí'ili' yaga dxágaca le ta'bía, en yugu' yaga dxí'a,

10 en libí'ili' böä' guixi', en böä' bëdxí,

böä' tá'ayoj lé'ëba' lu yu, en böä' zoa xíligacaba',

11 enca' libí'ili' rinná bë'ëli' yödzölió, en böñachi yugu' yödzö izá'a,

yugu' zxí'inigaquië' bönni' ta'nná bë'ë, en bönni' ruchi'a rusöröli' yödzölió,

12 enca' libí'ili' bi'i bönni', en bi'i nigúlado',

yugu' bönni' zxön, en yugu' bï'ido'!

13 ¡Guli'cú'u yöl-la' ba La la'ayi queë' Xanru'

tu' nayépisétérö tuzé' Lë'!

¡Nayépisétérö yöl-la' ba queë' ca luyú ni, en ca lúzxiba xitsá'!

14 Nuchisë' tu le nuzóá tsutsu böñachi queë',

le naca yöl-la' ba ta'gú'u Lë' nupa néquiguequi queë',

yugu' zxí'ini xi'sóë' Israel, nupa na' nadxfí'inë'.

¡Guli'cu'ë yöl-la' ba Xanru'!

149

1 ¡Guli'cu'ë yöl-la' ba Xanru'!

¡Guli'gul-la queëë' Xanru' Dios tu le cubi,
en guli'gul-la yöl-la' ba queëë' ga nudúbigaca nupa néquiguequi quez queëë'!

2 Ral-la' ulu'zí' xibë' Xanru' Dios böñachi Israel,
tu' náquië' Nu ben léguequi.

Ral-la' ulu'dzéjalen Dios nupa nacuá' Sión,
tu' náquië' Nu rinná be'e léguequi.

3 Ral-la' ila'gú'u yöl-la' ba La la'ayi queëë',
en lu yöl-la' rudzeja ulu'yá'a lahuë'.

Ral-la' ilúl-la yöl-la' ba queëë', ila'capa' lë'e guídi,
en ila'quínni lë'egaca bihuél-lado',

4 tu' raza ládxëë' Xanru' Dios böñachi queëë'.
Uchise' nupa ta'gui'i ta'zaca', en usölé' léguequi.

5 Nupa néquiguequi quez queëë' ral-la' ulu'dzeja ládx'i gaca lu bení' queëë'.
Lu yöl-la' rudzeja quéguequi ral-la' ilúl-la queëë' cate' ní' dëgaca lu le ráti'gaca.

6 Yöl-la' ba queëë' Xanru' Dios ral-la' sóatica'sö rui'iguequi,
en tu guíë tuchi' natuchi' iropa la'a lu ná'agaca,

7 para ulu'zí' lëbi böñachi yugu' yödzö izá'a,
en ilún xiguiá' böñachi izá'a na',

8 para ilúguëë' bregui' guíë ná'agaquië' bönni' ta'ná bé'enë' böñachi yödzö izá'a
na',

en ulu'cu'ë bregui' guíë yen ná'agaquië' bönni' lo quégäquië',

9 para ilunë' quéguequi ca nachuguëë' Dios gaca quéguequi.

Naca lë ni le run bal nupa néquiguequi quez queëë' Dios.

¡Guli'cu'ë yöl-la' ba Xanru'!

150

1 ¡Guli'cu'ë yöl-la' ba Xanru'!

¡Guli'cu'ë yöl-la' ba Dios lu lataj lá'ayi queëë'!

¡Guli'cu'ë yöl-la' ba ga dëda' lataj queëë'!

2 ¡Guli'cu'ë yöl-la' ba ca nácagaca le zxön nunë'!

¡Guli'cu'ë yöl-la' ba ca naca yöl-la' zxön queëë'!

3 ¡Guli'cu'ë yöl-la' ba, ucödxili' lúzugacaba' chivo!

¡Guli'cu'ë yöl-la' ba, quinnili' lë'egaca bihuél-la ca'!

4 ¡Guli'cu'ë yöl-la' ba, cápa'lí' lë'e guídi, en uya'ali'!

¡Guli'cu'ë yöl-la' ba, quinnili' lë'egaca bihuél-la, en ucödxili' gui'!

5 ¡Guli'cu'ë yöl-la' ba, utíl-lali' guíë lë'e luzë'e!

¡Guli'cu'ë yöl-la' ba, utíl-lali' guíë zxön lë'e luzë'e!

6 ¡Guli'cu'ë yöl-la' ba Xanru', tscale' rizí'ilí' bö'!

¡Guli'cu'ë yöl-la' ba Xanru'!

DIDZA' DXI'A BUZÚAJË' MATEO

*Yugu' xuz xinë'e gudödi queë' Jesús
(Lc. 3:23-38)*

¹ Ni ruzúaja' lágaquië' xuz xinë'e gudödi queë' Jesucristo. Nabábaguacië' David, enca' Abraham xuz gudödi queë'.

² Abraham gúquië' xuzë' Isaac.

Isaac gúquië' xuzë' Jacob.

Jacob gúquië' xúzgaquië' Judá, en yugu' bönni' böchë'ë.

³ Judá gúquië' xúzgaquië' Fares, en Zara, ate' Tamar gúcanu xiná'agaquië'. Fares gúquië' xuzë' Esrom.

Esrom gúquië' xuzë' Aram.

⁴ Aram gúquië' xuzë' Aminadab.

Aminadab gúquië' xuzë' Naasón.

Naasón gúquië' xuzë' Salmón.

⁵ Salmón gúquië' xuzë' Booz, ate' Rahab gúcanu xinë'ë.

Booz gúquië' xuzë' Obed, ate' Rut gúcanu xinë'ë.

Obed gúquië' xuzë' Isai.

⁶ Isaí gúquië' xuzë' David.

David na' gunná bé'enë' böñachi Israel, ate' butsaga ná'alenë'-nu nigula na' gúcanu zí'älö nigula queë' Uriás, ate' David, en nigula ni guláquië' xuz xinë'ë Salomón.

⁷ Salomón gúquië' xuzë' Roboam.

Roboam gúquië' xuzë' Abías.

Abías gúquië' xuzë' Asa.

⁸ Asa gúquië' xuzë' Josafat.

Josafat gúquië' xuzë' Joram.

Joram gúquië' xuzë' Uzías.

⁹ Uzías gúquië' xuzë' Jotam.

Jotam gúquië' xuzë' Acaz.

Acaz gúquië' xuzë' Ezequías.

¹⁰ Ezequías gúquië' xuzë' Manasés.

Manasés gúquië' xuzë' Amón.

Amón gúquië' xuzë' Josías.

¹¹ Josías gúquië' xúzgaquië' Jeconías, en yugu' bönni' böchë'ë.

Yugu' bönni' ni gula'cu'ë dza ni' cate' yugu' bönni' Babilonia gula'chë'ë böñachi Israel nadzúngaca lu xiýugaquië'.

¹² Jeconías gúquië' xuzë' Salatiel.

Salatiel gúquië' xuzë' Zorobabel.

¹³ Zorobabel gúquië' xuzë' Abiud.

Abiud gúquië' xuzë' Eliaquim.

Eliaquim gúquië' xuzë' Azor.

¹⁴ Azor gúquië' xuzë' Sadoc.

Sadoc gúquië' xuzë' Aquim.

Aquim gúquië' xuzë' Eliud.

¹⁵ Eliud gúquië' xuzë' Eleazar.

Eleazar gúquië' xuzë' Matán.

Matán gúquië' xuzë' Jacob.

¹⁶ Jacob gúquië' xuzë' José.

José ni gúquië' bönni' queënu María, ate' María ni gúcanu xinë'ë Jesús, lë' ca' Cristo, Bönni' na' tun löza bönachi judío guídë' idinna bë' enë' légaquië'.

¹⁷ Caní naca, gulaca chida' cõ' dí'a dza ga gusí lo zoë' Abraham ga bidxintë zoë' David, ate' gulaca ca' ia'chidá' cõ' dí'a dza ga gusí lo zoë' David ga bidxintë dza yugu' bönni' Babilonia gula'chë'ë bönachi Israel nadzúngaca, ate' gulaca ca' ia'chidá' cõ' dí'a dza ga gusí lo dza ni' gula'chë'ë léquequi ga bidxintë dza guljë' Cristo.

Yugu' le guca cate' guljë' Jesucristo (Lc. 2:1-7)

¹⁸ Caní guca cate' guljë' Jesucristo. Cate' ni' chinazí' lu ná'abi' María, xinë'ë Jesucristo utsaga ná'alenbi' José, en zí'atélo cate' si' utsaga ná'alenë'-bi', en cabí ne sóalienë'-bi', guyú'ubi' tubi' bï'ido' lë'ëbi' María na'. Guca caní ni'a que yöl-la' huáca queë' Dios Bö' Lá'ayi. ¹⁹ Náquië' José na', bönni' queëbi' María, bönni' tsahui', pero biti' gú'unnë' uzéguië'-bi' didza' lógaca bönachi. Gú'unnë' ulá'alenë'-bi' bagáchi'sö. ²⁰ Tsanni ni' rizá' ládxë'ë José ca na' gunë', bulu'i lahuë' gubáz lá'ayi queë' Xanru' lahuë' José lu yëla bëchigal, en gudxë' lë':

—José, zxí'ini zxí'söé' David. Biti' gádxinu' si'u-bi' María, para gácabi' nigula quiu', tu' yú'ubi' bi' bönni'do' lë'ëbi' ni'a que yöl-la' huáca queë' Dios Bö' Lá'ayi. ²¹ Gáljabí' tubi' bi'i bönni'do' queëbi', ate' gu'u labi' Jesús, tu' usólabi' bönachi queëbi' lu dul-la' nabága'gaca.

²² Caní guca yúgu'te lë ni para gaca lë na' gunnë' Xanru' lu ru'ë bönni' bë'ë didza' uláz queë' Dios, gunnë':

²³ Buli'yútsöca', tu nigula ra'bando', tsú'ubi' bï'ido' lë'ëbi', ate' gáljabí' tubi' bi'i bönni'do', ate' ilu'ë labi' Emanuel.

Emanuel naca tu didza' hebreo le rnna: Len rë'u Dios.

²⁴ Cate' bubanë' José lu yëla bëchigal, benë' ca na' gudxë' gubáz lá'ayi queë' Xanru' lë', ate' guzxi'ë-bi' María, ate' gúcabi' nigula queë'. ²⁵ Biti' guzóalenë'-bi' cate' bidxinrö dza chigúlajbi' bi'i bönni'do' queëbi', bi'i zí'alö queëbi', ate' gulu'ë labi' Jesús.

2

Bönni' ta'yéajni'inë' ridiyúgaquië' bï'ido' Jesús

¹ Cate' gúljabi' Jesús lu yödzö Belén, luyú Judea, rinná bë'ë Herodes luyú ni', ate' bila'dxinë' bönni' ta'yéajni'inë' Jerusalén, narúajgaquië' tu yödzö dë saca' ga rilén gubidza. ² Gula'nabë' bönni' ni, ta'nnë':

—¿Gazxi zóabi' bï'ido' na' ral-la' inná bë'ebi' bönachi judío, bï'ido' na' si' gúljabi'? Cate' ni' zóatu' ga rilén gubidza bilé'etu'-ba' bólaj bení' naca bë' chigúlajbi', ate' za'tu' ni para tseaj ládxí'tu'-bi'.

³ Cate' gúquibe'enë' Herodes, bönni' rinná bë'ë, lë ni, gurö'ödë' böninga, en lëscá' caní gula'bö' böninga yúgu'te bönachi nacua' Jerusalén. ⁴ Ni'irö Herodes na' bulidzë' yúgu'te bixúz unná bë', len bönni' yudo' tu'sédinë', ate' gunábinë' légaquië' gazxi ral-la' galjë' Cristo, bönni' na' tunë' löza bönni' judío ilá' lahuë' para inná bë'enë' légaquië'. ⁵ Të' lë':

—Lu yödzö Belén luyú Judea. Caní naca tu' buzúajë' tu bönni' bë'ë didza' uláz queë' Dios le rnna caní:

6 Biti' nácarö cá'asö yödzö Belén luyú Judá lahuë' Dios ca nácgaca yödzö gapa nacuá' nupa ta'nná bë' luyú ni, tu' irúajé' tu bönni' yödzö Belén, en gáquië' lo, bönni' na' gun chië' böñachi Israel quia'.

7 Ní'irö Herodes bulidzë' bagáchi'sö bönni' ta'yéajni'inë' na', en gunábinë' légaquië' para inözinë' dxi'a gáca xte chiguca bulu'i lahui böläj na' bila'lé'enë'.

8 Ní'irö guslö'lë'ë légaquië' tsöjáquië' Belén. Rë' légaquië':

—Guli'tséaj ni', en guli'tsöjnaba dxi'a nacxi naca queëbi' bï'ido' na'. Cate' chibidzöllili'-bi', ididixjöili' neda', para tseja' ca' neda', tseaj ládxa'a-bi'.

9 Gudödi bila'yönnë' didza' bë'ë Herodes na', söjáquië' bönni' ta'yéajni'inë' na', ate' böläj na' bila'lé'enë' cate' ni' nacuë' lädzagaquië' söjnöruba' lógaquië' ga bidxitë yöjsöa ga na' dëbi' bï'ido' na'. **10** Cate' bila'lé'enë' böläj na', bulu'dzéjade'enë'. **11** Cate' gula'yázië' yu'u, bila'lé'enë'-bi' bi'i bönni'do' na', zóalenbi'-nu María, xiná'abi'. Bulu'zóa zxibigaquië' lobí, en gula'yéaj lädx'i gaquië'-bi'. Gudödi na' gula'saljë' yugu' yöoxaj quégaquië', ate' bulu'nödzjë' queëbi' oro, en yalaj, en nörido' rilá' zxixi que yaga mirra. **12** Tu' chibuzéajni'inë' Dios légaquië' lu yëla bëchigal para cabí tsöjhuöjquië' ga zoë' Herodes na', que lë ni na' yöjhüöjquië' lädzagaquië' nöza yübölö.

José, en María, ta'chë'ë-bi' Jesúz luyú Egípto

13 Gudödi bulu'zé'ë yugu' bönni' ta'yéajni'inë' ni', bulu'i lahuë' tuë' gubáz lá'ayi queë' Xanru' lu yëla bëchigal, ga na' dë' José, en rë' lë':

—Guyaschi. Guchë'-bi' bï'ido' ni, enca' xiná'abi', ate' buzxunnaj ni. Guyéaj luyú Egípto, ate' ugá'anu' ni' cate' guiéra' li' ia'tú. Caní gunu' tu' ugiljë' Herodes bï'ido' ni para gútië'-bi'.

14 Ní'irö guyasë' José, en ni' naca chi'i dzö'ölö, guchë'ë-bi' bï'ido' na', enca' xiná'abi', ate' yöjáquië' luyú Egípto. **15** Bulu'gá'anë' ni' cate' gútirë' Herodes. Caní guca para gaca lë na' gunné' Xanru' Dios lu ru'ë tu bönni' bë'ë didza' uláz queë', gunné': "Ga naca luyú Egípto bulidza' Zxi'ina'."

Risöl-lë'ë Herodes bönni' ilútië'-bi' bi'i huë'ënido' nacuá'abi' yödzö Belén

16 Cate' gúquibe'enë' Herodes biti' gulunë' bönni' ta'yéajni'inë' ca rnnë', gulénë', ate' gunná bë'enë' bönni' tsöjáquië' ni' para ilútië'-bi' yúgu'tëbi' bi'i bönni'do' nacuá'abi' yödzö Belén, en idu' gásibi'ilö ga dë Belén na', yugu' bï'ido' chiyú'ugacabi' chopa iz, en bï'ido' nahuë'ënigacaröbi'. Caní benë' ca busáquië' queë' Herodes na', tscá chiguca dza bulu'i lahui böläj na', dza na' bulu'zéajni'inë' bönni' ta'yéajni'inë' na' lë'. **17** Caní guca, bidxin lë na' gunné' Jeremías, bönni' bë'ë didza' uláz queë' Dios, gunné':

18 Lu yödzö Ramá riyön ch'igaca nupa ta'bödxí, en nupa ta'bödxí yechí'.

Raquel ribödxinu ni'a quégacabi' zxí'ininu. Biti' gaca nu huë tsahui' lënu, tu' chinátigacabi'.

19 Gudödi gútië' Herodes na', ní'irö bulu'i lahuë' gubáz lá'ayi na' queë' Xanru' lu yëla bëchigal lahuë' José ga ni' zoë' luyú Egípto, ate' rë' lë':

20 —Guyasa. Guchë'-bi' bi'i bönni'do' ni, enca' xiná'abi', ate' böaj luyú Israel, tu' chigulatië' bönni' ni' gulë'ënnë' ilútië'-bi' bi'i bönni'do' ni.

21 Ní'irö guyasë' José, ate' guchë'ë-bi' bi'i bönni'do' na', enca' xiná'abi', ate' yöjhüöjquië' luyú Israel. **22** Cate' gúquibe'enë' José rinná bë'ë Arquelao luyú Judea tu' chigutië' Herodes, xuzë' Arquelao na', que lë ni na' gúdxine' José huöjë' ni'. Cate' buzéajni'inë' Dios lë' lu yëla bëchigal, guyijë' luyú Galilea.

23 Cate' bidxinë' ni', yöjsóë' lu yödzö Nazaret. Caní guca para gaca lë na' gula'nnë' yugu' bönni' gulu'ë didza' uláz queë' Dios ca ral-la' gaca queë' Jesùs, si' Lë', Bönni' Nazaret.

3

*Juan, bönni' ruquilë' bönnachi nisa runë' libán lu lataj cá'asö
(Mr. 1:1-8; Lc. 3:1-9, 15-17; Jn. 1:19-28)*

1 Yugu' lu dza ni' bulu'i lahuë' Juan, bönni' na' buquilë' bönnachi nisa, en runë' libán lu lataj cá'asö luyú Judea. **2** Juan na' rnnë':

—Buli'bí'i láxli', tu' chizóa idxín dza idinná bë' Nu na' zoa yehua' yubá luyú ni.

3 Ca naca queë' Juan na', buzúajë' Isaías, bönni' bë'ë didza' uláz queë' Dios dza ni'të, le rnnna caní:

Riyón chi'ë bönni' rulidzë' lu lataj cá'asö, rnnë':

“Buli'pá'a nöza para idxín Xanru' ga zóali'.

Guli'béaj li yugu' nöza lasi tödë' lu icja láxdido'oli'.”

4 Nácuë' zxë' Juan lari' néquini lítsa'ba' bö'a, ate' núguë'ë lë'ë le néquini güidi. Rahuë'-ba' böchí'zu, en re'je' bidxindo' que buzzo'. **5** Yugu' bönni' yödz Jerusalén len bönnachi narúajgaca idú luyú Judea, en idú gásibi'ilö ga dë yegu Jordán bila'dxinë' ga zoë' Juan na'. **6** Cate' gula'xóalëpë' dul-la' nabágagaquie', Juan na' buquilë' légaquie' nisa lu yegu Jordán na'.

7 Cate' bilé'enë' Juan ta'dxinë' zián bönni' yudo' fariseo len yugu' bönni' yudo' saduceo ga zoë' para ila'dilë' nisa, gudxe' légaquie':

—Libi'ili', dí'a dza quégacaba' bëla sínia'. ¿Zoa nu buzéajni'i libi'ili' para izxúnmajl' yöl-la' rusiúdxí na' si' gaca quégaca bönnachi? **8** Guli'gún le gaca bë' chibubí'i láxli'. **9** Biti' cuéqui ícjali', biti' innali' nácali' tsahui' tu' naca Abraham xuz gudödi queëli'. Rea' libi'ili', huáca gunë' Dios ga ulu'huoáca yugu' guiój nacuë' ni dí'a dza queë' Abraham. **10** Chizóá riböza guíë huága para ichugu yugu' yaga le rului' ca gaca queëli'. Yúgu'te yaga biti' ta'bía le naca dxi'a, irúgugaca, ate' ila'gu'ë léguequi lu guí'. **11** Le nácatë ned'a ruquila' libi'ili' nisa lu nisa, nulöli' chibubí'i láxli', pero Bönni' na' ral-la' güide' cate' töd'i quia' ned'a', Lë' gunë' le rului'sö yöl-la' ridila nisa ni, uchízi' libi'ili' Dios Bö' Lá'ayi len guí' queë'. Bönni' ni nácatérë' lo ca ned'a', ate' ned'a' biti' naca' lesaca' ilecja' xiráchuë' nudë'ë. **12** Zönë' lu në'ë böcö' queë', le ulúbinë' ga ridxi'a zxoa' xtila queë' lu yu'u ga ni' gun chi'ë le, pero uzégui'ë bëbu que lu guí', ate' guí' na' biti' ca' ulu.

*Ridile' nisa Jesùs
(Mr. 1:9-11; Lc. 3:21-22)*

13 Ní'irö buzë'ë Jesùs luyú Galilea, ate' bidxinë' ra' yegu Jordán ga na' zoë' Juan, para idilë' nisa lu në'ë Juan na'. **14** Juan buzágüë'ë xinözë', en rë' Jesùs:

—Neda' ral-la' idila' nisa lu no'o Li'. ¿Za'tso' Li' quia' ned'a'?

15 Bubi'ë didza' Jesùs, rë' lë':

—Benna lataj na'a, tu' caní ral-la' gunru' idútë le naca tsahui'.

Ní'irö Juan bë'ë Lë' lataj. **16** Cate' chinadilë' Jesùs nisa, la' burúajtë' lu nisa. Ní'irö guyalaj lúzzixa lahuë' Jesùs, ate' bilé'enë' ruhuötje' Dios Bö' Lá'ayi, en bidxinë' ga na' zoë', rinë'ë ca riná'aba' gu'dödo'. **17** Ní'irö biyön chi'i nu ru'i didza' yehua' yubá, rnnna:

—Bönni' ni náquie' Zxi'ina'. Nadxfí'ida' Lë', en raza ládex'a' Lë'.

4

*Rë'ëni Satanás tu' xihui' ibaga' Jesúś dul-la'
(Mr. 1:12-13; Lc. 4:1-13)*

1 Ní'irö la' guché té' Dios Bö' Lá'ayi Jesúś lu lataj cá'asö para gata' lataj si' bë' Satanás tu' xihui' Lë'.

2 Idú choá' dza choá' yëla biti' bi gudahuë' Jesúś, ate' gudödi ni' ridunë'.
3 Ní'irö tu' xihui', nu na' run ga tá'baga' böñachi dul-la', bidxín ga zoë' Jesúś, en rë' Lë':

—Channö nacu' idú Zxí'inë' Dios, gunná na'a ulu'huöáca guiöj nacuá' ni yöta xtila.

4 Bubi'ë didza' Jesúś, rë' le:

—Nazúaj lu guichi lá'ayi le rnna: "Calégasö yöta xtila nabánigaca böñachi, pero lëscá' yúgu'té didza' ru'ë Dios nabánigaca böñachi."

5 Ní'irö tu' xihui' guché' Jesúś lu yödzö lá'ayi Jerusalén, ate' budxía Lë' ga naca xitsá' ícjo'olö yudo'. **6** Ní'irö tu' xihui' rë' Lë', rnna:

—Channö nacu' Li' idú Zxí'inë' Dios, busuladzu' cuinu' ni, tu' nazúaj lu guichi lá'ayi le rnna:

Dios isöl-lé'ë gubáz lá'ayi queë' para ilún chi'ë Li',
ate' ulu'chisë' Li' lu ná'agaquië',
para cabí tsöjchégü'u guiöj, en cabí gunu' zi' ni'u.

7 Bubi'ë didza' Jesúś, rë' le:

—Ia'stú nazúaj lu guichi lá'ayi, le rë böñachi, rnna: "Biti' ugunu' dxin Xanu' Dios."

8 Ní'irö tu' xihui' guché' Jesúś ga naca tu lu guí'a sibi, ate' ni' bulu'í Lë' yúgu'té yödzö nacuá' yödzölió ni, en yúgu'té yöl-la' tsahui' quéguequi. **9** Ní'irö rë' Lë':

—Yúgu'té lë ni udöda' lu no'o channö uzóá zxibu' lahua', en gunu' neda' zxöön.

10 Jesúś rë' le:

—Böaj quiu' li', Satanás tu' xihui', tu' nazúaj lu guichi lá'ayi le rë netu', rnna: "Xanu' Dios tseaj ládxu'u, en udödi cuinu' lu na' tuzë' Lë'."

11 Ní'irö buzá' Satanás tu' xihui' ga na' zoë' Jesúś, ate' gubáz lá'ayi queë' Dios bila'dxinë' ga zoë', en gulácalenë' Lë', en gula'gu'ë le gudahuë'.

Risi'lahue' Jesúś runë' libán luyú Galilea

(Mr. 1:14-15; Lc. 4:14-15)

12 Cate' biyönnë' Jesúś nadzunë' Juan lidxi guíë, guyijë' luyú Galilea.

13 Buzë'ë yödzö Nazaret, ate' yöjsóë' lu yödzö Capernaum ga naca ra' nísado', lu buzá' quégaca böñachi Zabulón, en böñachi Neftalí. **14** Caní guca, bidxín lë na' gunnë' Isaías, bönni' bë'ë didza' uláz queë' Dios, gunnë':

15 Luyú Zabulón, en luyú Neftalí,

la' nöza ra' nísado' ia'tsölä' a yegu Jordán saca' ga rilén gubidza.

Luyú Galilea, ga nacuá' böñachi biti' nácagaca judío.

16 Böñachi chul-la niti ni' bila'lé'e bení',
ate' bönni' ni' nácagaciä' ca nupa chinátigaca, gulén quégaciä' bení'.

17 Cate' ní'irö gusí' lahuë' Jesúś runë' libán, en rë' böñachi ni':

—Buli'bí'i ládxí'li', tu' chizúa idxín dza idinná bë' Nu na' zoa yehua' yubá luyú ni.

Jesúś rulidzë' tapë' bönni' uzxön böla para tsöjtá'gaquië' Lë'

(Mr. 1:16-20; Lc. 5:1-11)

¹⁸ Cate' gudë' Jesús ra' nísado' que Galilea, bilé'enë' chopë' bönni'. Tuë' lë' Simón, en zoa ia'tú lë' Pedro, ate' dzáguië' Andrés, bönni' böchë'ë, lë'. Chopë' ni ta'chilje' yöxaj böla quégaquië' lu nísado' na' tu' nácagaquië' uxzön böla. ¹⁹ Jesús re' légaquië':

—Guli'dutá' neda', ate' guna' ga ichë'ëli' bönachi quia', gunli' ca runli' rizönl'i'-ba' böla.

²⁰ Chopë' ni la' bulu'cá'anatë' yugu' yöxaj böla quégaquië', ate' söjácalenë' Jesús.

²¹ Cate' gudödë' Jesús ia'lati' ní'ilö, bilé'enë' ia'chopë' bönni'. Tuë' lë' Jacobo, ate' dzáguië' Juan, bönni' böchë'ë lë'. Nácagaquië' zxí'inë' Zebedeo. Nacu'ë lë'e bárcodo' dzágagaquië' Zebedeo, xúzgaquië', en tu'únë' yöxaj böla quégaquië'. Ní'irö Jesús bulidzë' chopë' ni para tsöjtä'gaquië' Lë'. ²² La' bulu'cá'anatë' bárcodo' na', enca' xúzgaquië', ate' söjácalenë' Jesús.

Jesús rusédinë' bönachi zián (Lc. 6:17-19)

²³ Gudë' Jesús idú luyú Galilea, rusédinë' bönachi gapa naca lu yu'u ga tu'dubë' bönni' judío, en tu'sëdë' queë' Dios. Benë' liban ni' que didza' dxí'a ca si' idinná bë'ë Dios luyú ni', en bunë' yúgu'të nupa te'e tsca naca yödzöhuë' te'eguequi. ²⁴ Guzé didza' que yöl-la' huáca queë' Jesús, ate' bila'yöni bönachi idú luyú Siria, ate' dujuá'gaquië' yúgu'të bönni' té'enë' zián yödzöhuë' que queëgaquië', en ta'gu'i' ta'zaquië', ga zoë' Jesús. Dujuá'gaquië' ca' yugu' bönni' yú'ugaquië' bö' xihui', en yugu' bönni' té'enë' huë' xjote', en yugu' bönni' nacu'unigaquië' bin ni'a ná'agaquië', ate' Jesús bunë' yúgu'të bönni' na'. ²⁵ Bönachi zián bila'rúajgaca luyú Galilea, en yugu' yödzö Decápolis, en yödzö Jerusalén, enca' luyú Judea, en yugu' yödzö nacuá' ia'tsólá'alö yegu Jordán saca' ga rilén gubidza, ate' röjácalen Jesús.

5

Libán benë' Jesús ga naca lu guí'ado' (Lc. 6:20-23)

¹ Cate' bilé'enë' Jesús bönachi zián söjácalen Lë', ní'irö gurenë' tu lu guí'ado' ga naca xitsá'alö, ate' gurö'ë lu guí'a ni'. Ní'irö bulu'dubë' bönni' usëda queë' ga zoë'. ² Gusi lahuë' rusédinë' légaquië', rnne':

³ —Bica' ba yugu' bönni' téquibe'enë' ta'yádzjanë' le naca queë' Dios, tu' nadéli'gaquië' lataj ga rinná bë'ë Bönni' na' zoë' yehua' yubá.

⁴ Bica' ba yugu' bönni' tu'huí'ini ládx'i'gaquië' tu' nabága'gaquië' dul-la', tu' huë' tsahuë'ë Dios caz légaquië'.

⁵ Bica' ba yugu' bönni' nácagaquië' nöxaj ladxi' lahuë' Dios, tu' gata' quégaquië' luyú ni.

⁶ Bica' ba yugu' bönni' ta'zé ládx'i'gaquië' le naca tsahui' lahuë' Dios, ate' raca quégaquië' ca raca quégaca nupa ta'dún, en ta'bidxi nisa, tu' gunë' Dios ga ulu'zi'ë xibé lë na' ta'zé ládx'i'gaquië'.

⁷ Bica' ba yugu' bönni' tu'huechi' ládx'i'gaquië' luzá'agaquië', tu' huéchi' ládxë'ë Dios légaquië'.

⁸ Bica' ba yugu' bönni' naca tsahui' icja ládx'i'do'gaquië', en biti' bi dul-la' nabága'gaquië', tu' ila'lë'enë' Dios.

⁹ Bica' ba yugu' bönni' ta'bequi dxíë' didza' bizxaj, tu' ila'zí' lágaquië' zxí'ini cazë' Dios.

10 'Bica' ba yugu' bönni' ta'zaca' ta'gui'ë lu le ta'bía ládx'i'gaca bönnachi légaquïë' cate' tuné' le naca tsahui', tu' dë lataj quégäquïë' ga rinná bë'ë Bönni' na' zoë' yehua' yubá.

11 'Bica' ba libí'ili' cate' tu'lidza bönnachi libí'ili' zi', en ta'bía ládx'i'gaquïë' libí'ili', ate' lu yöl-la' rizí' ye' ta'nnë' queëli' le xihui' tu' dá'alí' neda'.

12 Buli'dzeja, en guli'chaza ládx'i'li', tu' uzí'da'alí' xibé yehua' yubá. Ca raca queëli', guca quégäquïë' bönni' gulu'ë didza' uláz queë' Dios, en gula'cu'ë zí'atëlo ca libí'ili', tu' gula'bía ládx'i'gaca ca' bönnachi légaquïë'.

Bönachi dá'gaca Cristo ilaca ca zödi', en ca bení'

(*Mr. 9:50; Lc. 14:34-35*)

13 Gunné' ca' Jesúś:

—Libí'ili' nácali' ca zödi' luyú ni, pero channö initi zödi' na' yöl-la' siná'a que, biti' gaca gunru' ga huóáca siná'a. Bíti'rö naca lesaca', pero chinaca tu le chü'unaru', ate' ulu'libi bönnachi le.

14 'Libí'ili' nácali' ca bení' yödzölió ni para ulu'ili' lahui le naca queë' Dios. Ral-la' gácali' ca tu yödzö ro'ò tu lu guí'a, tu' cabí gaca igachi' yödzö na'. **15** Cate' ruquéla'ru' guí', biti' rigú'uru' le tu zxan guí'ina, pero ruzóaru' le ga liná' para uzení' yúgu'të nupa nacuá' lu yu'u. **16** Ca na' run bení', ral-la' gunli' ca' libí'ili', guí'ili' lataj gaca bë' le nácali' lógaca yúgu'të bönnachi, para cate' ila'lé'e le naca tsahui' runli', ila'gú'u-në' Xúzili' Dios zoë' yehua' yubá yöl-la' ba.

Rusédiné' Jesúś que le gunná bë'ë Dios lu në'ë Moisés

17 Gunné' ca' Jesúś:

—Biti' guéquili' bida' para usunítia' yugu' le gunná bë'ë Moisés, o xibá na' bulu'sédiné' bönni' gulu'ë didza' uláz queë' Dios. Bida', caléga para usunítia' yugu' lë na', pero para ulu'a lahui idútë le tu'sedi lë na'. **18** Le nácatë rea' libí'ili'. Tsanni nacuá' lúzxiba, en yödzölió ni, biti' tódi cá'asö nitú dídz'a'do', en nitú le rinná bë' xibá na', cate' gácarö yúgu'të le ral-la' gaca. **19** Que lë ni na', nútì'tës bönni' quitsjé' tu xibá cuídi'do'os le zoa lu xibá na', en usédiné' bönnachi para ilún caní, bönni' ni gácatërë' cuídi'do'os ca yúgu'të nupa ila'cuá' ga rinná bë' Bönni' na' zoë' yehua' yubá, pero nútì'tës bönni' gunë' ca rinná bë' xibá na', en usédiné' bönnachi para ilún ca' caní, bönni' ni tsépisëtërë' ga rinná bë' Nu na' zoa yehua' yubá. **20** Rea' ca' libí'ili': Channö cabí gunli' le nácatërë' tsahui' ca le tunë' bönni' yudo' usedi, enca' ca tunë' bönni' yudo' fariseo, biti' ca' tsú'uli' ga rinná bë'ë Dios yehua' yubá.

Rusédiné' Jesúś ca naca que nu rilé luzë' e

(*Lc. 12:57-59*)

21 Gunné' ca' Jesúś:

—Chibiyönilí' ca gula'nnë' bönni' guta' lu ná'agaquïë' le gulë' xuz xtó'oli': "Biti' gútilí' bönnachi. Nu bönni' gútië' bönnachi, nabáguë'ë xíguia', ate' huadxinë' ga uchi'a usöröë' Dios lë'." **22** Na'a, neda' rea' libí'ili': Nu bönni' rilenë' böchi' luzë'ë, nabáguë'ë xíguia' huadxinë' ga uchi'a usöröë' Dios lë'. Lësca' caní, nu bönni' innë' zí'ë queë' böchi' luzë'ë nabáguë'ë xíguia' ulu'chi'a ulu'söröë' bönni' lo tu'chi'a tu'söröë' lë', ate' nu bönni' guíë' luzë'ë: "¡Böa' canöz!" nabáguë'ë xíguia' tsöjtsu'ë lu guí' gabilia.

23 'Caní naca, channö chizóa cu'u tu le unödzju' lu bucugu lá'ayi, ate' tsöjnenu' ni' zoa bizx que rilenë' böchi' luzó'o li', **24** bucá'ana lë na' unödzju' lu bucugu ni', en böaj lidxu'. Zí'alo yöjcá'ana tsahui' le benu' queë' böchi' luzó'o, ate' ní'irö gudá unödzju' lë na' nu'u.

25 'Channö zoa nu bönni' rinábinë' li' bi ubi'u queë', en ichë'ë li' ga uchi'a usörö' tu bönni' li', budzágatë tsahui' bönni' na' tsanni ni' yú'ulenu' le' nöza, para cabí udödë' li' lahuë' bönni' ruchi'a rusörö', ate' bönni' ni udödë' li' lu né'ë bönni' rusayjë' lidxi güië', ate' le' cu'ë li' lidxi güië' na'. **26** Le nácatë rea li', biti' ca' uruju' ni' cate' idxinxrö dza quizzxju' ga buitë le ral-lu'u.

Rusédineë' Jesús ca naca que nu riguitsaj xibá que yöl-la' nutsaga na'

27 Gunné' ca' Jesús:

—Chibiyónili' ca na' gula'nnë': "Biti' gunu' dul-la' le riguitsaj xibá que yöl-la' nutsaga na'." **28** Na'a, neda' rea' libí'ili': Núti'tës bönni' ruyü' tu nigula len yöl-la' rizë ladxi' le ruá' dö', chibenë' dul-la' len lënu lu icja ládx'i'da'ahuë'.

29 'Que lë ni na', channö guiój lo' ibëla gun ga gunu' dul-la', guléaj le, en gurú'una le. Gácarö dxi'a quiu' unítiu' tu guiój lo', en caléga idúteo' tsöjtsú'u lu gü' gabila. **30** Channö no'o ibëla gun ga gunu' dul-la', guchugu le, en gurú'una le. Gácarö dxi'a quiu' unítiu' tu no'o, en caléga idúteo' tsöjtsú'u lu gü' gabila.

Rusédineë' Jesús ca naca que nu bönni' rulá'lenë' nigula queë'

(Mt. 19:9; Mr. 10:11-12; Lc. 16:18)

31 Gunné' ca' Jesús:

—Lësca' gula'nnë': "Núti'tës bönni' rusanë'-nu nigula queë', ral-la' unödżje' queënu tu guichi le rnna rulá'lenë'-nu." **32** Na'a, neda' rea' libí'ili', channö zoe' nu bönni' rusanë'-nu nigula queë', en biti' zoa le ruá' dö' runnu, gunë' bönni' na' ga gunnu dul-la' le riguitsaj xibá que yöl-la' nutsaga na' channö utsaga ná'lennu bönni' yübölö, ate' bönni' na' si'ë'-nu nigula na', lësca' gunë' dul-la' le riguitsaj xibá que yöl-la' nutsaga na'.

Rusédineë' Jesús ca naca que nu ruzötaj La la'ayi queë' Dios

33 Gunné' ca' Jesús:

—Lësca' biyónili' ca yugu' bönni' guta' lu ná'agaquïë' gulë' xuz xtó'oli', gula'nnë': "Biti' si' yë'u cate' run tsutsu xtídz'u ní'a queë' Dios, en ral-la' gunu' lahuë' Xanru' Dios idútë lë na' run tsutsu xtídz'u ní'a queë' Lë'." **34** Na'a, neda' rea' libí'ili', biti' ca' gun tsutsu xtídz'a'li'. Biti' gun tsutsu xtídz'a'li' ní'a que yehua' yubá, tu' naca ga rö'ë rinná bë'ë Dios. **35** Biti' gun tsutsu xtídz'a'li' ní'a que luyú ni, tu' naca luyú ni ca xilibi ní'ë Dios, en caléga ní'a que Jerusalén, tu' naca ladzë' Bönni' nayëpisëtërë' rinná bë'ë. **36** Biti' gun tsutsu xtídz'u ní'a que icju', tu' cabí gaca gunu' ga huöáca chiguichi o gasaj nitú guitsa' icju'. **37** Ral-la' innásili': "Ön", o innásili': "Biti'", tu' naca que tu' xihui' le nadödi bë' ca nácacaca didza' ni.

Rusédineë' Jesús ca naca que nu ruzí' lëbi luzë' e

(Lc. 6:29-30)

38 Gunné' ca' Jesús:

—Chibiyónili' ca naca le gunná bë'ë Moisés, gunnë': "Nu bi run que guiój lahui luzë'e, ubí'i ca' que, enca' nu bi run que layí' luzë'e, ubí'i ca' que."

39 Na'a, neda' rea' libí'ili': Biti' tá'baga'li' nu guá' dö' queëli', ate' channö nu capa' xagu' ibëla, bë' lataj capa' ca' ia'tú xagu' yögöla. **40** Channö zoa nu gun ga uchi'a usörö' tu bönni' li', en cuë' zxo', bë' ca' queë' lari' rixóa cùdzu'u. **41** Channö zoa nu gun bayudxi gu'u yua' que tu chi'i, guyéajlen nu na' chopa chi'i. **42** Nu bi rinábini li', bunödžaj que, en nu bi guë'ëni gunnu' que tu chi'i, biti' tá'bagu'u lë na' inabi li'.

*Rusédinë' Jesúś ca ral-la' idxí'iru' nupa biti' ta'lé'e re'u dxi'a
(Lc. 6:27-28, 32-36)*

⁴³ Gunnë' ca' Jesúś:

—Lësca' caní biyöñili' lë na' gula'nnë': “Ral-la' idxí'inu' nu nadxí'i li', en udí' inu' nu biti' rilé'e li' dxi'a.” ⁴⁴ Na'a, neda' rea' libí'ili', guli'dxfí'i nupa biti' ta'lé'e libí'ili' dxi'a. Guli'nábinë' Dios gácalenë' nupa tu'lidza libí'ili' zi'. Guli'gún le naca tsahui' quégaca nupa tu'dí'i libí'ili', en buli'lidzé' Dios inábili'-në' gunë' ga gaca dxi'a quégaca nupa ta'nnë queéli', en tuá' dö' queéli'. ⁴⁵ Channö gunli' caní, gácali' zxí'ini cazé' Xúziru' Dios, zoë' yehua' yubá, tu' runë' Lé' ga ruzení' gubidza queé' ga nacuá' böñachi tuá' dö', enca' ga nacuá' böñachi tsahui'. Risöl-lé'ë tu nisa guiój lu yu quégaca böñachi tsahui', enca' lu yu quégaca böñachi biti' nácacaga tsahui'. ⁴⁶ Channö nadxí'isili' bönni' nadxí'iguequinë' libí'ili', Ɂnużxi caz cu'u libí'ili' yöl-la' ba? Lësca' caní tunë' bönni' biti' nácacaga tsahui' na', bönni' tu'quizzjé' uláz que yödzo' zi'tu', nadxí'iguequinë' luzá' agaquië'. ⁴⁷ Channö rugápalí' Dios tuzé' böchí' luzá'ali', Ɂbizxi caz runli' le nácatérö dxi'a? Lësca' caní tunë' bönni' biti' núnbë'gaquië' Dios. ⁴⁸ Pero libí'ili', guli'gaca idú tsahui', ca na' náquië' Xúziru' Dios, zoë' yehua' yubá, náquië' idú tsahui'.

6

Rusédinë' Jesúś ca ral-la' gácalenru' böñachi

¹ Gunnë' ca' Jesúś:

—Guli'güi' ládxí'li' gaca idú ca reaj ládxí'li'-në' Dios. Biti' gúnsili' lë ni lógaca böñachi para ila'lé'e ca na' runli'. Channö runli' caní, biti' bi gunnë' Xúziru' Dios zoë' yehua' yubá queéli'. ² Cate' bi unödzju' que nu bi riyatdzaj, biti' gunu' ga ilá' lahui lë na' runu' ca tunë' bönni' tu'lui'isö tsahui' cuíngaquië' ga naca lu yu'u ga tu'dubé' bönni' judío, en tu'sédë' queé' Dios, enca' ga naca lu yé'ëyi. Caní tunë' para ila'gú'u böñachi légaquië' yöl-la' ba. Le nácatë rea' libí'ili', cá'asö naca yöl-la' ba gata' quégäquië'. ³ Pero li', cate' bi unödzju' que nu bi riyatdzaj, biti' ca' gu'u lataj nu inözi. ⁴ Na'a, lë na' unödzju', bagáchi'sö ral-la' unödzju', ate' Xúziru' Dios, Nu rile'e ca na' runu' bagáchi'sö, Lë' ubi'ë quiu'.

Rusédinë' Jesúś ca ral-la' ulídzaru'-në' Dios

(Lc. 11:2-4)

⁵ Gunnë' ca' Jesúś:

—Cate' ulídzali'-në' Dios, biti' gunli' ca tunë' bönni' tu'lui'isö tsahui' cuíngaquië', tu' ta'yaza ládxí'gaquië' ta'zuínë' tu'lidzé' Dios gapa naca lu yu'u ga tu'dubé' tu'sédë' bönni' judío queé' Dios, en gapa naca lu yé'ëyi para ila'lé'e böñachi légaquië'. Le nácatë rea' libí'ili', cá'asö naca yöl-la' ba gata' quégäquië'. ⁶ Pero libí'ili', cate' ulídzali'-në' Dios guli'tsaza lídxili', en buli'sayaj yu'u. Buli'lidzé' Dios inábili'-në' Xúziru' Dios, zóalenë' libí'ili' ga na' zóali' queézili', ate' Xúziru' Dios, Nu rile'e ca runli' bagáchi'sö, Lë' ubi'ë queéli'.

⁷ Cate' ulídzali'-në' Dios biti' gunli' la' yé'ëyi la' lez ca na' tunë' bönni' biti' núnbë'gaquië' Dios, tu' téquinë' huayonné' Dios légaquië' tu' tu'lidzé' la' yé'ëyi la' lez. ⁸ Biti' gunli' ca na' tunë' légaquië'. Xúziru' Dios, zí'atélo cate' si' inábili'-në', chinöz quézinë' le riyatdzaj queéli'. ⁹ Que lë ni na', ral-la' ulídzali'-në' Dios innali' caní:

Xuz netu', zu' yehua' yubá, gaca zxön Lo'.

¹⁰ Gudá inná bë'u luyú ni.

Ben ga gaca luyú ni ca raza ládxu'u Li'
ca na' raca yehua' yubá.

¹¹ Benna le gágutu' na'a dza.

¹² Buniti lo netu' le huiá' dö' bentu' Lo' Li'
ca runtu' netu', runuti lotu' nupa bi tun queëtu'.

¹³ Biti' gu'u lataj si' bë' tu' xihui' netu',
pero busölá netu' lu na' nu ruá' dö'.

Nequí quiu' ga rinná bë'u, en yöl-la' unná bë', en yöl-la' ba.

Caní rë' énitu' gácatica'sö. ¡Ca' gaca!

¹⁴ Channö uniti lolí' luzá'ali', nupa tuá' dö' queëli', uniti lahuë' Xúziru' Dios,
zöe' yehua' yubá, libí'ili'. ¹⁵ Channö cabí uniti lolí' luzá'ali', biti' uniti lahuë'
Xúziru' Dios libí'ili' ca naca dul-la' nabágali'.

Rusédine' Jesú斯 ca ral-la' gunru' gubasa

¹⁶ Gunné' ca' Jesús:

—Cate' gunli' gubasa, biti' gunli' bayechi' lolí' ca tunë' bönni' tu'lui'isö
tsahui' cuingaquië', tu' tunë' bayechi' lógaquië' para iléquibe'e bönnachi tunë'
gubasa. Le nácaté rea' libí'ili', cá'asö naca yöl-la' ba gata' quégäquië'.
¹⁷ Libí'ili', cate' gunli' gubasa, buli'pá'a icjali', en guli'quibi lolí', ¹⁸ para cabí
iléquibe'e bönnachi runli' gubasa. Bagáchi'sö ral-la' gunli' gubasa, ate' Xúziru'
Dios, zóalenë' libí'ili' ga na' zóali' queëzili', Lë' ubi'ë queëli'.

Yehua' yubá ral-la' utúbiru' yöl-la' tsahui' queëru' (Lc. 12:33-34)

¹⁹ Gunné' ca' Jesús:

—Biti' utúbili' yöl-la' tsahui' luyú ni, ga ni bélado' que tu'töba' le, ate' raca
ditaj, en ga ni ta'yaza gubán, ta'banë'. ²⁰ Buli'tubi yöl-la' tsahui' yehua' yubá,
ga ni' bélado' que biti' ulu'töba' le, en biti' gaca ditaj, en ga ni' biti' ila'yázië'
bönni' gubán, en biti' ila'banë'. ²¹ Ga ni' dë yöl-la' tsahui' queëli', ni' gü'i
ládxil'i' idixinli'.

Le rigú'u bení' icja ládxí'do'oru' (Lc. 11:34-36)

²² Gunné' ca' Jesús:

—Guiój loru' naca ca tu le rigú'u bení' icja ládxí'do'oru'. Que lë ni na',
channö guiój lolí' naca tsahui', idúteli' tsépili' yösa bení'. ²³ Channö guiój lolí'
biti' naca tsahui', idúteli' nachúl-lali'. Que lë ni na', channö bení' zóalen libí'ili'
nuhuöáca le naca chul-la, yénni'térö nachúl-lali'.

Dios, en dumí (Lc. 16:13)

²⁴ Gunné' ca' Jesús:

—Cuntu nu bönni' gaca gunë' xichíngäquië' chopa xanë', tu' uzóë' tuë'
tsólá'alö, ate' ia'tüé' na' idxi'inë', o ugá'analenë' tuë', ate' ia'tüé' na' usán
ládxë'ë. Biti' gaca gunli' xichinë' Dios, enca' dumí.

Dios rapa chi'ë nupa néquiguequi queëë' (Lc. 12:22-31)

²⁵ Gunné' ca' Jesús:

—Ia'stú rea' libí'ili': Biti' ubi ugu'ili' ni'a que le gáguli' o ni'a que le guí'jali',
yugu' le nabánili', o ni'a que lari' gáculi'. Nazáca'térö yöl-la' na'bán queëli'
ca le gáguli', ate' nácatérö lesaca' le nácali' ca lari' gáculi'. ²⁶ Buli'yú ca raca
quégacaba' biguínido' ta'daba' lúzxiba. Biti' bi taz tu'zóaba', en biti' tu'lápaba',

en biti' tu'túbiba' ga bi ila'gú'uba' quégacaba', pero Xúziru' Dios zoë' yehua' yubá, rugagu cazë' légacaba'. Nazáca'téröli' libi'ili' ca yugu' biguínnido' na'. ²⁷ ¿Nuzxi caz bönni' nútsë'ë ládjali' gaca gunë' ga soë' ibanë' ia'túz dza tu' ruúbi rugu'ë inë' para gaca caní queë'?

²⁸ ¿Bizx que ruúbi rugu'ë ili' ni'a que le gáculi? Buli'yútsöca' ca raca quégaca yöjdo' rö'gaca la' guixi' ca ta'zxön. Biti' tun dxin, en biti' tun du lari'. ²⁹ Neda' rea' libi'ili', Salomón, bönni' ni' gunná bë'ë, sal-la' gúta'da' yöl-la' tsahui' queë', lari' gúcuë' biti' gunná törö lachi ca rinná gaca yöjdo' na'. ³⁰ Dios caz runë' lachi yöj guixi'do', le rö'gaca la' guixi', le nacuá' na'a dza, ate' cuxö huidzaj ila' yegui lu gui'. Channö caní ru'i ládxë'ë yöj guixi'do', runë' léguequi lachi, gúnda'arë' ca' queëli', sal-la'biti' réajle'ëli'-në' idú ládxili'. ³¹ Que lë ni na', biti' ubi ugu'ëili', en biti' innali': "¿Bizxi gágutsatu?" o "¿Bizxi guí'jatsatu?" o "¿Bizxi lari' gácutsatu?" ³² Bönachi yödzölió ni tu'úbi tu'gu'i ni'a que yúgu'të lë ni, pero zoë' Xúziru' yehua' yubá, ate' Lë' nözine' naquínili' yúgu'të lë ni. ³³ Na'a, guli'gü'irö ládxili' inná bë'enë' Dios libi'ili', en gunli' le naca tsahui' lahuë' Lë', ate' Lë' cu'ë xinözali' yúgu'të lë ni. ³⁴ Que lë ni na', biti' ubi ugu'ëili' ni'a que le ral-la' gaca cuxö huidzaj, tu' huáca gü'i ládxili' cuxö huidzaj le gaca queëli' dza na'. Tu tu dza ilaca le ral-la' gü'i ládxili' dza na'.

7

Biti' ral-la' ichugu bë'ëru' böchi' luzá'aru'

(Lc. 6:37-38, 41-42)

¹ Gunnë' ca' Jesús:

—Biti' ichugu bë'ëli' böchi' luzá'ali', para cabí ichugu bë'ë Dios queëli', ² tu' ichugu bë'ë Lë' queëli' la' leze ca na' richugu bë'ëli' queë' böchi' luzá'ali', ate' ca na' rurixi rudödili' que luzá'ali', la' cá'asö urixi udödë' Dios queëli'. ³ ¿Bizx que ruyú' bëbudo' yu'u guiój lahuë' böchi' luzó'o, en biti' réquibe'enu' yu'u le zxöntérö guiój lo' li'? ⁴ ¿Guíétso' böchi' luzó'o: "Gulöz, cueja' bëbudo' yu'u guiój lo'", ate' li', le zxöntérö ca' yu'u guiój lo' li'? ⁵ Li', bönni' rului'isö tsahui' cuiun'. Guléaj zí'alö le zxön yu'u guiój lo' li', ate' ní'irö ilé'enu' tsahui' do' para gaca cueju' bëbudo' yu'u guiój lahuë' böchi' luzó'o.

⁶ 'Biti' gü'iili' quégacaba' bö'cu' le naca lá'ayi, para cabí ulu'huécjaba', en iláguya'aba' libi'ili', en biti' chú'unali' le naca lesaca' queëli' láhuigacaba' cuchi, para cabí ulu'zadi' ní'aba' le.

Guli'naba, guli'guilaj, en buli'lidza ra' yu'u

(Lc. 11:9-13; 6:31)

⁷ Gunnë' ca' Jesús:

—Guli'naba, ate' Dios gunnë' queëli'. Guli'guilaj, ate' gunnë' lataj idzöli queëli'. Buli'lidza ra' yu'u, ate' Lë' isaljë' queëli'. ⁸ Núti'tës bönni' rinabë', ridéli'në', ate' bönni' riguiljë', ridzöli queë', ate' bönni' rulidzë' ra' yu'u, ralaj queë'.

⁹ 'Channö zoë' nu bönni' ládjali' libi'ili', ate' zóabi' bi'i queë', channö inábibi' lë' yöta xtila, ¿naru' unödzjë'-bi' guiój? ¹⁰ Channö inábibi' lë' tuba' böla, ¿naru' unödzjë'-bi' bëla? ¹¹ Libi'ili' nácali' huiá' dö', pero nözili' unödzjali' zxí'inili' le naca tsahui'. Nácatérö löza, Xúzili' zoë' yehua' yubá unödzjë' nupa ta'nábini Lë' le naca dxia'.

¹² 'Que lë ni na', ca na' rë'ënili' ilún bönnachi queëli', lësca' caní guli'gún quégaaquië'. Lë ni naca le rinná bë' xibá queë' Moisés, enca' le gula'nnë' bönni' gulu'ë didza' uláz queë' Dios.

Tu ga ral-la' tsú'uru' le naca tsúpi'do'
(Lc. 13:24)

¹³ Gunnë' ca' Jesús:

—Guli'tsáz ga nu riyaza le naca tsúpi'do'. Blaga' naca ga nu riyaza, en yalaj naca nöza le rójácalenë' bönni' ga ni' ila'nítie', ate' ta'yázië' bönni' zián ni'. ¹⁴ Tsúpi'do' naca ga nu riyaza, en lárido'os naca nöza le rójácalen böñachi ga ni' ila'deli' yöl-la' na'bán idú, ate' nabábasö nupa ta'dzöli le.

Le runru' naca bë' le nácaru'
(Lc. 6:43-45)

¹⁵ Gunnë' ca' Jesús:

—Guli'gún chi'i cuinli' para cabí ila'zí' yé'enë' bönni' ta'zí' yë'ë libí'lli', ta'nnë' tu'ë didza' uláz queë' Dios. Ila'dxinë' bönni' caní ga zóali', en ulu'lufí'i cuíngaquië' nöxaj ládxí'do' ca nácagacaba' bô'cu' zxila'do', pero lu icja ládxí'do'gaquië' nácagaquië' ca bô'cu' guí'a sínia'. ¹⁶ Yugu' le tunë' ilaca bë' le nácagaquië'. Biti' ruchíbiru' le ribía lubá uva lu yaga yötsi', en biti' ruchíbiru' le ribía yaga higo lu guixi' legui lárido'. ¹⁷ Caní naca, yúgu'të yaga dxi'a ta'bía le naca dxi'a, ate' tu yaga cabí naca dxi'a ribía le cabí naca dxi'a. ¹⁸ Yaga dxi'a na' biti' gaca cuía le cabí naca dxi'a, ate' yaga na' biti' naca dxi'a biti' gaca cuía le naca dxi'a. ¹⁹ Yúgu'të yaga biti' ta'bía le naca dxi'a ila'rugu, ate' ila'gu'ë léguequi lu guí'. ²⁰ Caní naca, yugu' le tune' bönni' na' ilaca bë' le nácagaquië'.

Nupa biti' ila'yázië' ga rinná bë'ë Dios
(Lc. 13:25-27)

²¹ Gunnë' ca' Jesús:

—Zian nupa té neda': "Xan, Xan", pero caléga yúgu'të' ila'yázië' ga rinná bë'ë Dios yehua' yubá. Ila'yázase' ni' bönni' tunë' ca ré'enë' Xuza' Dios, zoë' yehua' yubá. ²² Cate' idxín dza údxí que yödzölió ni, bönni' zián ilë' neda', ila'nnë': "Xan, Xan, bentu' libán que xtídze'ë Dios, buguntu' dxin Lo', en buguntu' ca' dxin Lo' para bubéajtu' yugu' bô' xihui', en buguntu' ca' dxin Lo' bentu' zián yöl-la' huáca zxön." ²³ Ní'irö neda' guí'a légaquië': "Biti' ca' núnbë'a libí'lli'. Guli'cuítá ga zoa', libí'lli' ruá'alí' dö'."

Chopa ca gaca udxíaru' xilibi zö'ö
(Lc. 6:47-49; Mr. 1:22)

²⁴ Gunnë' ca' Jesús:

—Ia'stú ca', nu bönni' riyönnë' xtídza'a ni, en gunë' ca rnna, bönni' ni náquië' ca tu bönni' réajni'inë', budxië' lidxë' ga naca lu guiój. ²⁵ Cate' gulaj guiöjsiu', en guzxón yegu gubo'o, en guyecja bô', gudibi nisa cuita yu'u na', pero biti' gubixi, tu' dxia xilibi lu guiój. ²⁶ Na'a, nu bönni' riyönnë' xtídza'a ni, en biti' runë' ca rnna, bönni' ni náquië' ca tu bönni' biti' réajni'inë', budxië' lidxë' lu yu dzöbi. ²⁷ Cate' gulaj guiöjsiu', en guzxón yegu gubo'o, en guyecja bô', ní'irö gudá'a nisa cuita yu'u na', ate' gubíxitë, en tsaz biguinnaj.

²⁸ Cate' Jesús budxi bë'lenë' légaquië' didza' ni, bulu'bani böñachi zián nacuá' ni' ca naca le rusédinë', ²⁹ tu' rusédinë' légaquië' ca tu bönni' dë lu në'ë, en caléga ca tunë' bönni' yudo' usedi quégaquië'.

¹ Cate' böjtë' Jesús lu guí'a na', söjácalen bönachi zián Lë'. ² Bidxinë' tu bönni' ré'enë' huë' nudzu' ruzödi ga zoë' Jesús, ate' buzóá zxibë' lahuë' Jesús, en rë' Lë':

—Xan, channö rë'ënú', huáca unu' neda'.

³ Ní'irö Jesús la' bulitë né'ë, en gudanë' lë'. Rë' lë':

—Rë'ënda'. Huöácu' dxia'a.

La' bunítitë xihuë'ë bönni' huë' na'. ⁴ Ní'irö Jesús gudxë' lë':

—Buyú, cuntu nu guío' caní, pero guyéaj, yöjluf'i cuinu' lahuë' bixúz, ate' yöjnödzaj le gunná bë'ë Moisés le ulu'i bönachi chiböácu'.

*Jesús ruúnë' bi'i huen dxin queë' tu bönni' rinná bë'ë lu gudil-la
(Lc. 7:1-10)*

⁵ Cate' guyázië' Jesús yödzö Capernaum, bidxinë' tu bönni' ga zoë', bönni' rinná bë'enë' tu gáyu'ë bönni' röjáquië' gudil-la, ate' gúta'yuë' lahuë' Jesús, ⁶ en rë' Lë':

—Xan, bi'i huen dxin quia' dëbi' yu'u, ré'ebi' huë' nacú'unibi' bin, ate' rigui'i rizáca'da'abi'.

⁷ Jesús rë' lë':

—Neda' guída' una'-bi'.

⁸ Bubi'ë didza' bönni' na' rinná bé'enë' bönni' röjáquië' gudil-la, en rë' Jesús:

—Xan, biti' naca' zi tsáziu' lidxa', pero tsa innasu' quia', ate' huöácabí' bi'i huen dxin quia'. ⁹ Lësca' neda', zoa nu rinná be'e neda', en nacu'ë ca' bönni' röjáquië' gudil-la rinná bé'egacada'-në'. Cate' rea'-në' tuë': "Guyéaj ni", rejë'. Cate' rea'-në' ia'tuë': "Gudá ni", ridë'. Cate' rea'-në' bönni' huen dxin quia': "Ben dxin ni", la' runtë' dxin na'.

¹⁰ Cate' biyönnë' Jesús didza' ni, bubániñë', ate' gudxë' bönni' söjácalenë' Lë', rnñë':

—Le nácatë rea' libí'ilí', ga nacuá' bönachi Israel, cuntu nu bönni' röjxéqui'da'-në' réajlü'ë neda' ca runë' bönni' ni. ¹¹ Ila'stú rea' libí'ilí': Ila'rúaj bönachi zián saca' ga rilén gubidza, en saca' ga ribía gubidza, ate' ila'bö'len tsözxón Abraham, en Isaac, en Jacob, yehua' yubá ni' ga rinná bë'ë Dios, ¹² pero yugu' bönni' na' gurö cazë' Dios para ila'yázië' ga na' rinná bë'ë Lë', chú'unë' légaquië' ni'lö ga na' naca chul-la, ate' ni' ila'bödxë', en ulu'til-la láyë' lu yöl-la' ruhu'ini quégaquië'.

¹³ Ní'irö Jesús gudxë' bönni' na' rinná bé'enë' bönni' röjáquië' gudil-la, rnñë':

—Böaj lidxu'. Ca na' réajlü' u, ca' gaca quiu'.

La' ná'asö böácatëbí' bi'i huen dxin queë' na'.

*Jesús ruúnë' xiná'anu nigula queë' Pedro
(Mr. 1:29-31; Lc. 4:38-39)*

¹⁴ Bidxinë' Jesús lidxë' Pedro, ate' ni' bilé'enë'-nu xiná'anu nigula queë', dënu lu da'a, en yú'unu tu xilá. ¹⁵ Gudanë' Jesús ná'anu, ate' la' burúajtë xilá na' yú'unu. Ní'irö böásanu, en bunödzjanu le gulahuë'.

*Jesús ruúnë' zián nupa te'e
(Mr. 1:32-34; Lc. 4:40-41)*

¹⁶ Cate' chiridzö' dza na', dujuá'agaquië' zián bönni' yú'ugaca bö' xihui' légaquië' ga zoë' Jesús, ate' len yöl-la' rinnësö queë' bubéaje' yugu' bö' xihui' na', en buné' ca' yúgu'të nupa te'e. ¹⁷ Caní guca para gaca ca na' gunnë' Isaías, bönni' bë'ë didza' uláz queë' Dios, gunnë': "Lë' bu'ë yugu' le rizáca'ru', en bu'ë ca' yugu' yödzöhuë' queëru'."

*Nupa gulé'ëni tsójácalen Jesús
(Lc. 9:57-62)*

18 Cate' bilé'ené' Jesús nacuá' böñachi zián gásibi'ilé', gunná bé'ené' yugu' bönní' usëda queé' ila'dödë' ia'tsölá'a nísado' ni'. **19** Bidxiné' tu bönní' yudo' usedi ga na' zoë' Jesús, en rë' Lë':

—Bönní' Usedi, sá'lena' Li' gáti'tës ga tseju'.

20 Jesús rë' lë':

—Yugu' böza' nacuá' zxan guiöj quégacaba', ate' yugu' biguínido', nudxiágacaba' xicá'agacaba', pero neda', Bönní' Guljé' Bönachi, biti' dë ga quíxaj icja'.

21 Ia'tué' bönní', náquië' bönní' usëda queé' Jesús, gudxé' Lë':

—Xan, benna neda' lataj huöja' ga idxinrö dza chibucácha'a-në' xuza'.

22 Jesús gudxé' lë':

—Gudá' neda'. Bë' lataj yugu' bönní' tati cazë' ulu'cáchë'ë nupa ilátigaca quégaquïë'.

Jesús ribequi dxíë' bö' budunu'

(Mr. 4:35-41; Lc. 8:22-25)

23 Gurené' Jesús lë'e bárcodo', ate' dzágagaquïë' Lë' bönní' usëda queé'.

24 Ní'irö guyeca bö' budunu' lu nísado' na', ate' riyasa ridxiada' nísado' na' ga bidxitné'riyaza nisa lë'e bárcodo' na'. Dë' rásië' Jesús lë'e barco na'. **25** Ní'irö bila'dxiné' bönní' usëda queé' Jesús ga na' zoë', ate' bulu'subanë' Lë', en té' Lë':

—Xan, busólá netu'. Chirigáchi'ru' lu nisa.

26 Bubi'ë didza' Jesús, en rë' légaquïë':

—¿Bizx que rádxili'? Láti'do'os réajlé'ëli'-në' Dios.

Ní'irö guyasé' Jesús, en bulidzë' bö' na' recja, en nísado' na', ate' la' gurö'ötë dxi. **27** Bulu'bániné' bönní' na', ta'nné':

—¿Nuzxi caz bönní' ni? Rufisë' didza', ate' bö' recja, en nísado' tun ca rnñë'.

Yugu' bönní' Gadara yú'ugaca bö' xihui' légaquïë'

(Mr. 5:1-20; Lc. 8:26-39)

28 Cate' bidxiné' Jesús ia'tsölá'a nísado' ga na' naca lu xiyú yödzö Gadara, bila'rúajé' chopé' bönní' ga nacuá' ba quégaca nupa nátigaca, dutságagaquïë' Jesús. Nácaquïë' sínia', ate' cuntu nu gaca tödi la' nöza ni'. **29** La' gului'ítë' zidzaj didza' chopé' ni, ta'nné':

—¿Bizxi ral-la'tu' quiu', Jesús, Zxi'iné' Dios? ¿Naru' bidxitso' ni dusaca' zi'u netu' zí'alö ca idxín dza queétu'?

30 Ga ni' nacu'ë nacuá'aba' cuchi zián ta'daba' táguba', nacuá'aba' láti'do' ga naca zi'tu'. **31** Gula'naba yechi' bö' xihui' na' Jesús, en té' Lë':

—Channö ubéajú' netu', benna lataj tsöjtsú'ugacatu'-ba' cuchi zián ni'.

32 Ní'irö Jesús gudxé' léguequi:

—Guli'tséa'.

La' bila'rúajé' bö' xihui', en yöjcházagaca cuchi zián ni'.

Ní'irö yúgu'tëba' cuchi zián na' yöjbixitëgacaba' ga naca lë'e guiöj, en yöjcházagaca' lu nísado', ga ni' gula'yépiba' nisa, en gulátiba'.

33 Guládxiné' bönní' tu'yúë'ba' cuchi na', ate' bulu'zxúnnajé'. Cate' bila'dxiné' lu yödzö, gula'guíxjö'ë yúgu'të le' na' guca quégaquïë' bönní' ni' gula'yúu' bö' xihui' légaquïë'. **34** Ní'irö bila'rúaj böñachi lu yödzö ni', yöjtságagaquïë' Jesús. Cate' bila'lé'ené' Lë', guláta'yue' lahué' uzë'ë lu xiyúgaquïë' na'.

9

Jesús ruúnë' tu bönni' nacú'unië' bin

(*Mr. 2:1-12; Lc. 5:17-26*)

1 Ni'irö bubenë' Jesús lë'e bárcodo', en gudödë' ia'tsölá'a nísado' ni', ate' budxinë' ga naca ladzë'. **2** Ni' dujuá'gaquië' tu bönni' nacú'unië' bin ga zoë' Jesús, zxoë' lu da'a yaga. Cate' bilé'enë' Jesús ca na' ta'yéajlé'ë bönni' ni Lë', gedxë' bönni' na' nacú'unië' bin, rnnë':

—Butipa ládxu'u, zxí'ina do'. Chibuníti lahua' dul-la' nabágú'u.

3 Nacu'ë ca' bönni' yudo' tu'sédinë' ni', ate' ta'nnë' lu icja ládxido'gaquië', ta'nnë': "Didza' ru'ë bönni' ni ruzóa Dios tsölá'alö."

4 Cate' réquibe'enë' Jesús le ta'za' ládxigaquië', rë' légaquië':

—¿Bixz que rizá' ládxil'i caní le cabí naca tsahui? **5** Biti' naca böninga nu guiesö bönni' ni: "Yugu' dul-la' nabágú'u chibuníti lahua'", pero naca böninga nu gun ga huoásë', en uzé'enë'. **6** Na'a, uluída' libifili' neda', Bönni' Guljë' Bönachi, dë lu na'a yöl-la' unná bë' uniti lahua' dul-la' luyú ni.

Ni'irö Jesús gudxë' bönni' na' nacú'unië' bin, rnnë':

—Guyása. Buchisa da'a yaga quiu', en böaj lidxu'.

7 Ni'irö la' guyásatë' bönni' na' nacú'unië' bin, en böajé' lidxë'. **8** Cate' bila'lé'enë' bönni' nacu'ë ni' lë ni, bulu'báninë', ate' gula'gu'ë Dios yöl-la' ba tu' bunödzjë' yöl-la' huáca caní quégaca bönnachi.

Jesús rulidzë' Mateo

(*Mr. 2:13-17; Lc. 5:27-32*)

9 Cate' buzë'ë Jesús ni', bilé'enë' bönni' lë' Mateo, rö'ë ga na' ruquízxjë' uláz que yödzö zí'tu', ate' Jesús gudxë' lë':

—Gudá' neda'.

Ni'irö la' guyásatë' Mateo na', ate' sa'yéajlenë' Jesús.

10 Ia'tu le guca, cate' ni' rö'ë Jesús rahuë' ga naca lidxë' Mateo, zián bönni' tu'quízxjë', en yugu' bönni' cá'asö bila'dxinë' ga zoë', ate' gula'bö'lénë' Jesús tsözxöñ len yugu' bönni' usëda queë'. **11** Cate' bönni' yudo' fariseo bila'lé'enë' lë ni, gula'nábinë' yugu' bönni' usëda queë' Jesús, ta'nnë':

—¿Naru' bönni' rusédine' libifili' rágulentse' tsözxöñ bönni' tu'quízxjë', en iá'zica'rë' bönni' dul-la'?

12 Cate' biyönnë' Jesús lë ni, rë' légaquië':

—Biti' naquíniguequinë' bönni' nácagaquië' dxi'a nu un bönnachi, pero bönni' té'enë' naquíniguequinë' nu un bönnachi. **13** Guli'tséaj, en buli'séda le rnna lë na' nazúaj lu guichi lá'ayi, le rnna caní: "Ré'ënda' ulu'huéchi' ládxigaquië' bönni' luzá'agaquië', en caléga ilútie'-ba'böa' bëdx lu bucugu lá'ayi quia'." Bida' ni, caléga para ulídzagaca'-në' bönni' tsahui', pero bida' para ulídzagaca'-në' bönni' dul-la' para ulu'bí'i ládxigaquië'.

Rusédinë' Jesús ca ral-la' gunru' gubasa

(*Mr. 2:18-22; Lc. 5:33-39*)

14 Ni'irö bönni' dá'gaquië' Juan, bönni' na' buquilë' bönnachi nisa, bila'dxinë' ga zoë' Jesús, ate' gula'nábinë' Lë', ta'nnë':

—¿Bixz que na' netu', enca' yugu' bönni' yudo' fariseo, zián luzuí runtu' gubasa, pero yugu' bönni' usëda quiu' Li' biti' tunë' gubasa?

15 Bubi'ë didza' Jesús, en rë' légaquië':

—¿Naru' huácatsö ila'sébi ládxigaca nupa nacuá' laní que yöl-la' rutsaga na' tsanni ni' bönni' rutsaga në'ë zóalenë' légaquië'? Za' dza cate' idúë' bönni' na' rutsaga në'ë ga nacu'ë. Dza ni'irö ilunë' gubasa.

16 Bucúdu'ë didza' Jesús, rnnë' :

—Cuntu nu un tu lari' tēbi len lari' cubi, tu' uxú'uni lari' cubi na' nugu'ë lari' tēbi na', ate' ichöza'rō lari' tēbi na'. **17** Lësca' caní, cuntu nu bönni' riguë'ënë' xisi uva cubi tu lu buzudi guídi gula, tu' galaj ilëbi xisi uva cubi na', en uzzuzzaj buzudi guídi gula na', ate' gaca ditaj xisi uva na', ate' initia'ca' buzudi guídi na'. Rigá'aru' xisi uva cubi tu lu buzudi guídi cubi, ate' irópatë taca chi'i.

Rubanbi' bi'i nigula queë' Jairo, en ruhuöácanu tu nigula gudannu lari' nácuë' Jesús

(*Mr. 5:21-43; Lc. 8:40-56*)

18 Tsanni ni' Jesús ruí'ilenë' légaquië' didza' ni, tu bönni' rinná bénë' bönnachi judío bidxinë' ga zoë', ate' buzóoa zxibë' lahuë' Jesús, en rë' Lë' :

—Bi'i nigúlado' quia' la' gútítëbi'. Gudá ixóa no o lëbi', ate' ubanbi'.

19 La' guzuútenë' Jesús, en sa'yéajlenë' lë'. Dzágagaquië' bönni' usëda queë' Lë'.

20 Ní'irö bidxinnu tu nigula zaca' cùdzu'lë' Jesús, chiguca chinnu iz ré'enu, biti' ruhu'i rön queënu que huë' quégaca cázanu nigula, ate' gudannu lari' nácuë' Jesús. **21** Caní bennu tu' rizá' ládxí'nu, rnnanu: Channö cansa' zxë', huóáca'. **22** Ní'irö buécjë' Jesús, en ruyúë' lënu, ate' rë'ë-nu:

—Butipa ládxu'u, zxí'ina'do'. Chiböácateu' tu' réajlë'u neda'.

La' ná'asö böácatenü.

23 Cate' bidxinë' Jesús lidxë' bönni' unná bë' na', bilé'enë' nacu'ë ni' bönni' tu'cödxë' gui, en nupa ta'bödxì yechi'. **24** Jesús rë' légaquië':

—Guli'cuita ni, tu' cabí nátabi' bi'i nigúlado' ni. Rásisibi' na'.

Ní'irö nupa nacuá' ni' bulu'titaj Lë'.

25 Cate' chinubéajë' Jesús bönnachi na' ní'ilö, guyázië', en gudélé'ë ná'abi' bi'i nigula na', ate' la' guyásatëbi'. **26** Guzé didza' ca guca lë ni, ate' bila'yöni bönnachi nacuá' idútë luyú'na'.

Jesús ruúnë' bönni' nachul-la guiój lógaquië'

27 Cate' Jesús burúajë' ni', chopë' bönni' nachul-la guiój lógaquië' söjácalenë' Lë'. Tu'ë zidzaj didza', ta'nnë' :

—Zxi'ini xi'soë' David, buéchi' ladxi' netu'.

28 Cate' bidxinë' Jesús ga naca lu yu'u, bila'dxinë' chopë' bönni' na' nachul-la guiój lógaquië' ga zoë'. Jesús gunábinë' légaquië', rnnë' :

—¿Ba réajlë'ëli' neda', huáca una' libí'ili?

Légaquië' ta'nnë' :

—Ön, Xan.

29 Ní'irö Jesús gudanë' guiój lógaquië', ate' rnnë' :

—Ca réajlë'ëli', ca' gaca queéli'.

30 La' böáljatë guiój lógaquië'. Ní'irö Jesús buzenë' bach légaquië', rnnë' :

—Guli'gü'itica'sö ládxí'li' cuntu nu inözi lë ni.

31 Cate' bulu'rúajë' ni', la' bulu'zëtë' didza' idútë luyú ni' ca naca lë na' benë' Jesús.

Jesús ruúnë' tu bönni' biti' ru'ë didza'

32 Cate' Jesús, en yugu' bönni' usëda queë' bulu'rúajë' tu lu yu'u, bila'dxinë' bönni' ga zoë' Jesús naché'gaquië' lahuë' tu bönni' biti' ru'ë didza', tu' yu'u lë' bö' xihui'. **33** Cate' bubéajë' Jesús bö' xihui' na', la' gunnëtë bönni' na' biti' guca gu'ë didza'. Bulu'báninë' bönni' nacu'ë ni', ta'nnë' :

—Catu caz rilé'etu' le caní ladaj bönnachi Israel.

34 Ní'irö bönni' yudo' fariseo gula'nnë' queë' Jesús, ta'nnë' :

—Bönni' ni rubéajé' yugu' bö' xihui', rugunë' dxin yöl-la' unná bë' que xángaca bö' xihui' na'.

Jesús ruhuéchi' ládxë'ë böñachi zián

³⁵ Gudé' Jesú idú gásibi'ilö gapa nacuá' yödzö zxön, en gapa nacuá' yödzödo', ate' gapa naca lu yu'u ga tu'dubé' tu'séde' bönni' judío queé' Dios. Rusédiné' Jesú böñachi nacuá' ni', en runé' libán que didza' dxí'a ca rinná bë'ë Dios. Buné' yúgu'té nupa bi ta'gui'i ta'zaca' yugu' lu yödzö na'. ³⁶ Cate' Jesú bilé'ené' bönni' zián ni', buéchi' ládxë'ë légaquië', tu' ta'gui'i ta'záquië', en nudú ládxí'gaquië' ca raca quégacaba' bö'cu' zxila' biti' zoa nu ruyú légacaba'.

³⁷ Ní'irö Jesú rë' yugu' bönni' usëda queé', rnné'.

—Le nácaté dëda' yöla, pero nabábasö nupa tu'lapa. ³⁸ Que lë ni na', guli'gáta'yu lahuë' Dios, náquië' Xan yöla na', inábili'-në' isöl-lë'ë bönni' huen dxin ulu'lapë' yöla queé'.

10

Jesús riböë' bönni' ilácagaquië' gubáz queé'

(*Mr. 3:13-19; Lc. 6:12-16*)

¹ Ní'irö bulidzë' Jesú idxínnutë' bönni' usëda queé', en budödë' lu na'agaquië' yöl-la' unná bë' para ulu'béajé' bö' xihui' yúugaca böñachi, en ulu'üné' yúgu'té nupa te'e, en yúgu'té nupa bi ta'gui'i ta'zaca'.

² Caní naca lágaquië' idxínnutë' gubáz na' nasöl-lë'ë Jesú:

Simón, (lë' ca' Pedro),
Andrés, (bóchë'ë Simón na'),
Jacobo, (zxí'inë' Zebedeo),
Juan, (bóchë'ë Jacobo na'),

³ Felipe, Bartolomé, Tomás,

Mateo, (bönni' uquízxaj),

Jacobo, (zxí'inë' Alfeo),

Lebeo, (lë' ca' Tadeo),

⁴ Simón, (bönni' ruí'i ládxë'ë yödzö queé'),

Judas Iscariote, (bönni' udödë' Jesú lu na'agaquië' bönni' ilútië' Lë').

Jesús risöl-lë'ë gubáz queé' tsójéngaquië' libán

(*Mr. 6:7-13; Lc. 9:1-6*)

⁵ Ní'irö Jesú gusöl-lë'ë idxínnutë' bönni' ni tsójéngaquië' libán, ate' gunná bë'ené' légaquië', rnné':

—Biti' tséajli' ga nacuá' böñachi biti' nátagaca judío, en biti' tsú'ulí' ládzagaca böñachi nacuá' luyú Samaria. ⁶ Guli'tséaj ga nacuá' böñachi Israel, nátagaquië' ca bö'cu' zxila'do' nanítigacaba'. ⁷ Guli'tsójén libán, innali': "Chibidxín gala' dza Dios, Nu na' zoa yehua' yubá, inná bë'ë luyú ni." ⁸ Buli'ún nupa te'e. Buli'ún dxí'a nupa te'e hué' nudzu' ruzödi. Buli'subán nupa chinatígaca. Buli'béaj bö' xihui' yúugaca böñachi. Bénnasa' queéli' yöl-la' unná bë' ni. Buli'gún dxin le, en biti' bi uquízxjali'.

⁹ Biti' bi guá'ali' lu buzudi queéli', caléga dumí oro, en caléga dumí plata, en caléga dumí lárido'. ¹⁰ Biti' guá'ali' yóxaj yóta queéli' le gáguli' la' nöza. Tuz lari' ixúa yenli', en biti' guá'ali' xiráchuli' o xiyyaga queéli', tu' idzöli' quézinë' bönni' huen dxin le gahue'.

¹¹ Gáti'tés yödzö zxön o yödzödo' ga idxinli', guli'naba nuzxi naca idú ladxi' lu yödzö ni', ate' ugá'anali' lidxi nu na' cate' gála'rö dza urúajli' yödzö na'.

12 Cate' tsú'uli' tu lu yu'u, buli'gapa Dios böñachi nacuá' lu yu'u na', inábili-né' Dios unödziej' quégaciue' le cuéqui dxi icja láxido'gaquie'. **13** Channö böñachi nacuá' lu yu'u ni' nácagaca lesaca', ugá'analen le ribequi dxi ladxi' na' léguequi, pero channö böñachi na' cabí nácagaca lesaca', inábali' cabí ugá'ana lè' na' ribequi dxi ladxi' len léguequi. **14** Gáti'tés ga idxinl' ga böñachi ni' biti' ilún libí'ili' bal, en biti' ulu'zé nagui xtídza'li', buli'rúaj lu yu'u ni' o yödzö ni', ate' guli'cuíbi bëchtö da' lë' la'bali', le ulu'i léguequi nabága'gaca xíguia'. **15** Le nácaté rea' libí'ili', cate' idxín dza ichúgië' Dios quégaca böñachi, ila'gu'i ila'zaca'rö böñachi yödzö na' ca ila'gu'i ila'zaca' böñachi gula'cuá' yödzö Sodoma, en yödzö Gomorra, nupa ni' busunítié' Dios.

Nupa biti' ta'yéajlé' ulu'saca' zi' nupa dá'gaca Cristo

16 Gunné' ca' Jesús:

—Buli'yútsöca', neda' risöl-la'a libí'ili', ate' gácali' ca bö'cu' zxíla'do' ta'daba' ga dzö'öba' bö'cu' guí'a sínia'. Guli'gaca sina' ca nácagacaba' síná' bëla sínia', pero guli'gaca ca' nöxañ ladxi' ca nácagacaba' gu'döö'. **17** Guli'gún chi'i cuinli' quégaca böñachi, tu' ulu'döde' libí'ili' lu ná'agaquie' bönni' yúlahui', en ila'guín' libí'ili' gapa naca lu yu'u ga tu'dubë' tu'séde' bönni' judío queé' Dios. **18** Lësca' caní, ila'chë'ë libí'ili' lógaquie' bönni' lo, en lógaquie' bönni' ta'nná bë'ë, tu' dá'ali' neda'. Caní gaca para gaca gunli' ba nalí quia' lógaquie' bönni' ni', en lógaquie' bönni' biti' nácagaquie' judío. **19** Ni'irö cate' ulu'döde' libí'ili' lu ná'agaquie' bönni' unná bë'na', biti' cö'öli' böniga nacxi innali', tu' ichizé' Dios icja láxido'oli' didza' gü'ili', en ca innali' la' dza ná'asö. **20** Caléga libí'isili' na' innali', pero Dios Bö' Lá'ayi, Nu na' risöl-lé'ë Xúziru' Dios queélli', Lé cazé' sóalene' libí'ili', en gu'ë didza'.

21 'Illa'cuá' böñachi ulu'dödi böchi'guequi lu ná'agaquie' bönni' ilútië' lógaquie', en lësca' caní, bönni' nácagaquie' xuz ulu'döde' zxí'inigaquie', ate' ila'cuá'abi' bi'i ila'dá'baga'bi' xúzgacabi', en ilunbi' ga ilátië' xúzgacabi' na'. **22** Yúgu'té böñachi ulu'zóa libí'ili' tsölä'alo tu' dá'ali' neda', pero nu ugá'ana tsutsu ga idxinxrö dza údxi, nu ni ulá. **23** Cate' ulu'saca' zi' böñachi libí'ili' tu lu yödzö, buli'zxunnaj ni', ate' tséajli' ia'tu yödzö, tu' rea' libí'ili', huöda' neda', Bönni' Gulje' Bönachi, zí'alö cate' údxi gunli' libán gapa nacuá' yugu' yödzö quégaca böñachi Israel.

24 'Núti'tés bönni' náquië' bönni' usëda biti' nácarë' lo ca nu rusëdi lë', en lësca' caní, nu bönni' náquië' huen dxin biti' nácarë' lo ca xanë'. **25** Nu na' naca bönni' usëda ral-la' udzéjanë' channö huadéli'në' gáquië' ca naca nu rusëdi lë', ate' bönni' huen dxin na' ral-la' udzéjanë' channö gáquië' ca naca xanë'. Channö ta'nné' quia' neda', bönni' xan yu'u, ta'nné' naca' Belzebú tu' xihui', ila'nné zí'irë' quégaca böñachi tá'gaquie' neda'.

Nu ral-la' gádxiru' (Lc. 12:2-9)

26 Gunné' ca' Jesús:

—Que lë ni na', biti' gádxili' böñachi. Hualá' lahui yúgu'té le raca bëdxi länd'oos, ate' huáca bë' yúgu'té le nagachi'. **27** Yugu' didza' ruí'lena' libí'ili' ga naca chul-la, guli'quixjö' ga naca lu bení', ate' le rea' libí'ili' ga nagachi', guli'nné zidzaj ga naca lahui' lógaca böñachi. **28** Biti' gádxili' nupa tuti le nácagaca caz böñachi, pero biti' gaca ulu'suniti bö' naca cázarú'. Guli'gadxi Dios, Bönni' na' gaca gútië' idútë le nácali', en chí'unen' bö' naca cázali' lu guí' gabila.

29 'Ta'dá'uba' chópaba' biguínnido' len tu dumí lárido', pero biti' ibíxiba' tuba' lu yu channö cabí ru'ë Xúziru' Dios lataj gaca caní. **30** Lësca' caní, nabábagaca yúgu'të guitsa' ícjalí' lahuë' Dios. **31** Que lë ni na', biti' gádxili'. Ruí'itérö ládxë'ë Dios libíili' ca rui'i ládxë'ë-ba' zianba' biguínnido'.

Yugu' bönni' ta'zí' lu ná'agaquië' Cristo lögaca bönnachi

(Lc. 12:8-9)

32 Gunné' ca' Jesús:

—Nu bönni' si' lu në'ë neda' lögaca bönnachi, neda' si' lu na'a bönni' na' lahuë' Xuza' zoë' yehua' yubá. **33** Bönni' ta'dá'baguë'ë lögaca bönnachi, ila'nnë' biti' ta'dé'ë neda', lësca' caní neda' tá'baga'a légaquië' lahuë' Xuza' zoë' yehua' yubá.

Jesús náquië' le run ga ila'rúaj choplö bönnachi

(Lc. 12:51-53; 14:26-27)

34 Gunné' ca' Jesús:

—Biti' guéquili' za'a idigu'a le ribequi dxi bönnachi yödzölió ni. Biti' za'a idigu'a le ribequi dxi, pero za'a idigu'a le gun ga ila'rúaj choplö bönnachi. **35** Za'a ni, ate' guna' ga ila'dá'baga' bönnachi xúzguequi, ate' yugu' nigula ila'dá'baga'nu ca' xiná'agacanu. Lësca' caní, yugu' nigula zxoa' lídxigacanu ila'dá'baga'nu xto' zxí'ininu. **36** Caní gaca, la' di'a dzasö quégaca bönnachi ulu'saca' zi' luzë'eguequi.

37 'Nu nadxfí'irö xuz xinë'e ca nadxfí'i neda', biti' naca bachi nu na' ta' neda', ate' nu nadxfí'irö bi'i bönni' que o bi'i nigula que ca nadxfí'i neda', biti' naca bachi nu na' ta' neda'. **38** Nu biti' si' lu në'ë gaca ca tu bönni' söjtë'ë lë'e yaga cruz, en ta' neda', biti' naca bachi guequi quia' neda'. **39** Nu rui'i ladxi' gun chi'i yöl-la' na'bán que, uniti le, pero nu uniti yöl-la' na'bán que tu' da' neda', ulá nu na'.

Yugu' le ubi'ë Dios queëru'

(Mr. 9:41)

40 Gunné' ca' Jesús:

—Nu gun libíili' bal, neda' ca' gun bal, ate' nu na' gun neda' bal, gun bal ca' Dios Xuz nasöl-lë'ë neda'. **41** Nu gun bal tu bönni' ru'ë didza' uláz queë' Dios tu' ru'ë didza' uláz queë' Dios, huadeli' nu na' lu në'ë Dios la' leze na' idéli'në' bönni' ru'ë didza' uláz queë' Dios. Lësca' caní, nu gun bal tu bönni' tsahui' tu' náquië' bönni' tsahui', huadeli' nu na' lu në'ë Dios la' leze na' idéli'në' bönni' tsahui'. **42** Núti'tës nu unödzaj queë' tu bönni'do' ni tu zxibíndo'os nisa tu' náquië' bönni' usëda quia' neda', le nácatë rea' libíili', biti' uniti nu na' le ral-la' si' lu në'ë Dios.

11

Ta'dxinë' bönni' nasöl-lë'ë Juan ga zoë' Jesús

(Lc. 7:18-35)

1 Cate' Jesús budxi buzájní'inë' yugu' bönni' usëda queë', buzë'ë ni', sa'yéajë' rõjsédinë' bönnachi, en rõjenë' libán yugu' lu ládzagaca bönnachi na'.

2 Juan, bönni' buquile' bönnachi nisa, ni' yu'ë lidxi guíë, ate' biyönnë' ca nácacaca le runë' Jesús. Ní'irö Juan na' gusöl-lë'ë chopë' bönni' dá'gaquië' lë', ate' bila'dxinë' ga na' zoë' Jesús. **3** Chopë' ni gula'nábinë' Jesús, të' Lë':

—¿Nacu' Li' Cristo, Bönni' na' ral-la' idxinë' yödzölió ni, o ral-la' ciòtu' dza idxinë' ia'tué' bönni'?

4 Bubi'ë didza' Jesús, rë' légaquië':

—Guli'tséaj tsöjtixjöi'ili'-në' Juan lë ni riyönil'i', en rilé'eli'. ⁵ Guli'tsöjödxë' ca raca, tu'lé'enë' bönni' guchul-la guiöj lógaquië', ate' tu'zé'ë bönni' biti' guca ila'dë'. Nuhuöacagaquië' bönni' gü'iguequinë' huë' nudzu' ruzödi, ate' ta'yönnë' bönni' gula'cödzuë'. Nnita' nabáangaquië' bönni' gulatië', ate' raca libán que didza' dxi'a lógaca bönachi yechi'. ⁶ Bica' ba nu bönni' biti' gáquië' chopá ládxë'ë, biti' ubéaj ládxë'ë neda'.

⁷ Cate' yugu' bönni' na' dá'gaquië' Juan bulu'zé'ë söjhuöjgaquië', ní'irö gusí lahuë' Jesús ruí'ilenë' bönachi nacuá' ni' didza' ca naca queë' Juan na'. Rë' légaquië':

—¿Bizxi gú'unili' ilé'eli' cate' ni' guyéají' lu lataj cá'asö? ¿Naru' gú'unili' ilé'eli'-në' tu bönni' náquië' ca tu gui ruzecaj bö' recja le? ⁸ Channö cabí, ¿bizxi gú'unili' ilé'eli'? ¿Naru' gú'unili' ilé'eli'-në' tu bönni' nácuë' lari' dxí'ado? Nöz quézili' bönni' nácagaquië' lari' dxí'ado' nacu'ë lídxigaquië' bönni' ta'nná bë'ë. ⁹ Channö cabí, ¿bizxi gú'unili' ilé'eli'? ¿Naru' gú'unili' ilé'eli'-në' tu bönni' ru'ë didza' uláz queë' Dios? Ca' naca, réquida'. Rea' libí'ilí, bilé'eli'-në' tu bönni' nácatérë' lo ca ia'zíca'rë' bönni' gulu'ë didza' uláz queë' Dios. ¹⁰ Caní naca, tu' náquië' Juan bönni' na' ruí'i didza' le nazúaj lu guichi lá'ayi ca naca queë', le rnna:

Buyú, risöl-la'a bönni' gubáz quia', inöruë' ca Li'.
Lë' upë'ë nöza ga tödu'.

¹¹ Le nácatë rea' libí'ilí. Idútë yödzölió ni, cuntu nu zoa nácarö lo ca Juan, bönni' ni' buquilë' bönachi nisa, pero nu naca cuídi'do'os ga rinná bë' Nu na' zoa yehua' yubá nácatérë' lo ca Juan na'.

¹² Cate' ni' gusí lahuë' buquilë' Juan bönachi nisa, ga ridxitnë na'a dza, bayudxi túngaca bönachi para ta'yaza ga rinná bë'ë Bönni' na' zoë' yehua' yubá, ate' nupa tunsö bayudxi ta'deli' le. ¹³ Ga bidxitnë dza na' blë'ë Juan, le rinná bë'ë xibá queë' Moisés, en le bulu'zúajë' lu guichi yúgu'të bönni' gulu'ë didza' uláz queë' Dios gulufí'i didza' ca rinná bë'ë Bönni' na' zoë' yehua' yubá. ¹⁴ Channö rë'énili' si' lu ná'ali' lë ni, ral-la' inözili' Juan na' náquië' Elías, bönni' ni' bë'ë didza' uláz queë' Dios, bönni' na' Dios gunnë' ral-la' ila' lahuë' leyúbölö dza ni zóaru' na'a. ¹⁵ Nu zoa nagui, en riyöni ral-la' uzë nagui.

¹⁶ ¿Bizxi ubéqui'tseda' ca nácagaca bönachi nacua' dza ni zóaru' na'a? Nácagaquië' ca yugu' bí'ido' ta'bó'obi' lu yé'ëyi. Zidzaj tu'lídzabi' luzá'agacabi', ¹⁷ ta'nnabi': "Rucödxitu' queëli' gui. ¿Bizx que biti' ruyá'ali'? Rul-la yéchi'tu' queëli'. ¿Bizx que biti' ribödxi yéchi'ilí?" ¹⁸ Caní nácali', tu' bidë' Juan, ate' tu' cabí gü'i' gudahuë' ca rágulí' libí'ilí, gunnëli' queë', gunnali': "Tu' xihui' dzágui lë'." ¹⁹ Ní'irö bidxina' neda', Bönni' Guljë' Bönachi, ate' re'aj rahua', ate' rnñeli' quia', rnñali': "Náquië' bönni' huágulë'ë, en bönni' re'je'. Náquië' luzá'agaquië' bönni' uquízxaj, en ia'zíca'rö huen dul-la'." Yöl-la' réajni'i queë' Dios naca bë' ni'a que le tun nupa ta'zí' lu në'eguequi le.

Le gaca que nu biti' run ca rnna xtídzë'ë Dios (Lc. 10:13-15)

²⁰ Ní'irö gusí lahuë' Jesús ruzenë' bach bönachi nacuá' yugu' yödzö gapa ni' benë' zián yöl-la' huáca, tu' cabí tu'bí'ini ládxí'guequi. ²¹ Gudxë' léguequi:

—Bica' bayechi' libí'ilí', bönachi Corazín. Bica' bayechi' libí'ilí', bönachi Betsaida. La'tu' gulaca lu yödzö Tiro, en lu yödzö Sidón yugu' yöl-la' huáca bena' ga zóali', dza ní'telö ulu'bí' ládxí'gaca bönachi yödzö Tiro, en yödzö Sidón na', en ilácugaca lari' tëbi, en ulu'dxía dö ícjaguequi, le ulu'lui'i tu'bí'í ládxí'gaca bönachi na'. ²² Na'a, neda' rea' libí'ilí', cate' idxin dza ichúgië'

Dios quégaca bönachi, qui'i sáca'röli' libí'ili' ca ila'gu'i ila'zaca' bönachi yödzö Tiro, en yödzö Sidón, nupa na' busunítië' Dios. ²³ Libí'ili', bönachi Capernaum, guca queéli' ca bidxinteli' ga nu riyaza yehua' yubá. Huötjali' lu guí' gabilä. La'tu' gulaca yugu' yöl-la' huáca bena' ga zóali' lu yödzö Sodoma, ulu gá'ana bönachi yödzö ni' ga ridxintë na'a dza. ²⁴ Na'a, neda' rea' libí'ili', cate' idxin dza ichúguie' Dios quégaca bönachi, qui'i sáca'röli' libí'ili' ca ila'gu'i ila'zaca' bönachi Sodoma na'.

Rnnë Jesús: "Guli'dá ga zoa', uzi' ládxí'li"
(Lc. 10:21-22)

²⁵ Dza na' bë'ë didza' Jesús, rnnë:

—Xuza', nacu' Xani yehua' yubá, en Xani luyú ni. Rigu'a Li' yöl-la' ba, tu' bucáchu'u lë ni, para cabí ila'lé'enë' bönni' ta'yéajni'ide'enë' le, pero bulu'inu' nupa nácagaca ca yugu' bï'ido' le. ²⁶ Ca' gaca, Xuza', tu' caní guyaza ládxu'u Li'. ²⁷ Yúgu'të nudödë' Xuza' lu na'a. Cuntu nu nunbë' neda', Zxi'inë' Dios, pero tuzë' Dios Xuz, en cuntu nu nunbë' Dios Xuz, pero tuza' neda', Zxi'inë' Dios, enca' nupa na' rë'ënda' ulu'ida' léguequi Dios Xuz. ²⁸ Guli'dá ga zoa' yúgu'tëli' rójxéqui'li' tu' rúntica'sili' dxin que yöl-la' yudo', en nuá'ali' yua' zi'i quégaca xibá que, ate' neda' guna' ga uzi' ládxí'li'. ²⁹ Lu yöl-la' nökaj ladxi' queéli' guli'gún xichina', gácali' ca bëdxí ta'zí'iba' yugu' quégacaba'. Guli'séda lu na'a neda', tu' naca' nökaj ladxi', en do' ladxi', ate' idzöli' yöl-la' ruzí' ladxi' queéli', le cuéqui dxi ládxí'li'. ³⁰ Yugu' na' ugu'a libí'ili', le naca le inná bë'eda' libí'ili', biti' naca böniga, ate' yua' ugu'a libí'ili' le naca le rusédida', dzá'do'os naca.

12

Ta'lecjë' do bönni' usëda queë' Jesús dza lá'ayi
(Mr. 2:23-28; Lc. 6:1-5)

¹ Dza ni', le naca dza lá'ayi quégaciue' bönni' judío, gudödë' Jesús gapa dë yöla zxoa' xtila, ate' ta'dunë' bönni' usëda queë', en gusí lógaquië' ta'lecjë' do ga dxia zxoa' xtila, en tahuë' zxoa' xtila na'. ² Cate' bila'lé enë' bönni' yudo' fariseo lë ni, té' Jesús:

—Buyútsöca', tunë' bönni' usëda quiu' le cabí ral-la' gunru' dza lá'ayi.

³ Ni'irö Jesús gudxe' légaquië':

—¿Naru' cabí nulábanili' lu guichi lá'ayi bi benë' David cate' gudunë', ate' gula'dún ca' nupa gula'cuá'len lë? ⁴ Guyu'ë lu yu'u queë' Dios, en gudahuë' yugu' yöta xtila nagú'ugaquië' lu bucugu lá'ayi, le cabí ral-la' gahuë' lë, en biti' ral-la' ilahuë' bönni' gula'cuá'lenë' lë, pero légacsë' bixúz dë lataj ilahuë' le. ⁵ ¿Naru' cabí nulábanili' le rinná bë' xibá queë' Moisés ca tunë' bixúz yugu' dza lá'ayi? Tunë' dxin lö'a yudo' yugu' dza lá'ayi, en biti' ta'bágue'ë xigüia'. ⁶ Na'a, neda' rea' libí'ili', zoa' neda' ni, en naca' bönni' nácarë' lo ca yudo'. ⁷ Biti' réajni'ili' lë na' nazúaj lu guichi lá'ayi, le rnna: "Rë'ënda' huéchi' ládxí'li' luzá'ali', en calëga gútigacalí'-ba' bö'a' bëdxido' ruzégui'gacalí'-ba' lu bucugu lá'ayi quia'." La'tu' réajni'ili' lë ni, biti' ichúguli' quégaca nupa biti' nabága'gaca xigüia'. ⁸ Ca' naca, tu' naca' neda', Bönni' Guljë' Bönachi, Xani dza lá'ayi.

Jesús ruúnë' tu bönni' narequi' né'ë
(Mr. 3:1-6; Lc. 6:6-11)

⁹ Ni'irö buzë'ë Jesús ni', ate' guyu'ë lu yu'u ga tu'dubë' bönni' judío, en tu'sëdë' queë' Dios. ¹⁰ Lu yu'u na' zoë' tu bönni' narequi' né'ë, ate' tu' té'ennë'

bönni' judío unná bë' ila'dzölinë' bi ulu'zégui'ë Jesús didza', que lë ni na' gula'nábinë' Lë', ta'nnë':

—¿Naru' dë lataj unru' nu re'e cate' naca dza lá'ayi?

11 Bubi'ë didza' Jesús, rë' légaquië':

—Nu bönni' nútsë'ë ládjali', channö zóaba' tuba' bö'cu' zxila' queë', en channö ibíxiba' lu yero cate' naca dza lá'ayi, ¿naru' cabí tsöjxönë'-ba', en tsöjléaje'-ba'? **12** Nazáca'térë' tu bönni' ca tuba' bö'cu' zxila'. Que lë ni na', dë lataj gunru' le naca dxí'a quégaca bönnachi cate' naca dza lá'ayi.

13 Ní'irö Jesús gudxe' bönni' huë' na':

—Bulí no'o.

Cate' bulí në'ë, la' böácatë dxí'a ca naca ia' tsölá'a në'ë.

14 Ní'irö bulu'rúajë' bönni' yudo' fariseo na', ate' gulún xtídza'gaquië' para gaca ilútie' Jesús.

Le gunnë' tu bönni' bë'ë didza' uláz queë' Dios ca ral-la' gaca queë' Jesús

15 Cate' réquibe'enë' Jesús lë ni, buzë'ë ni', ate' söjácalen bönnachi zián Lë'. Jesús bunë' yúgu'té nupa te'e ladaj bönnachi na', **16** en gunná bë'enë' léguequi biti' usiyönguequi bönnachi Nu náquië'. **17** Caní gunnë', para gaca lë na' gunnë' Isaías, bönni' bë'ë didza' uláz queë' Dios, gunnë':

18 Buli'yútsöca', Bönni' ni náquië' Huen Dxin quia', na' gurö caza' neda' Lë'.

Nadxi'ida' Lë', en raza ládex'a' Lë'.

Ichiza' Lë' Bö' Lá'ayi.

Lë' usiyönnë' yúgu'té bönnachi ca guna', uchi'a usöröa' quéguequi.

19 Cuntu nu tíl-lalenë' didza', en biti' ulidzë' zidzaj. Cuntu nu yöni chí'ë ga naca zi'tu'.

20 Tu guido' zoa bö' biti' quitsjë' le, ate' güi' chizóa ulu, biti' usúluë' le, cate' uzóarë' le naca tsahui' queë'.

21 Yúgu'té bönnachi ilún löza Lë'.

Ta'nnë' bönni' judío unná bë': "Dzaga Jesús tu' xihui"

(*Mr. 3:19-30; Lc. 11:14-23; 12:10*)

22 Ní'irö dujuá'gaquië' tu bönni' ga zoë' Jesús, nachul-la lahuë', en biti' raca gu'ë didza', tu' yu'u bö' xihui' lë', ate' Jesús bunë' bönni' na'. Caní guca, rilé'enë', en ru'ë didza' bönni' na' guchul-la lahuë', en biti' guca gu'ë didza'.

23 Que lë ni na' bulu'baní yúgu'té bönnachi nacuá' ni', ta'nná:

—¿Naru' nácatsë' bönni' ni Zxi'ini Xi'soë' David, Bönni' na' ral-la' guídë'?

24 Cate' bila'yönnë' bönni' yudo' fariseo lë ni, ta'zá' ládxë'ë, ta'nnë': Bönni' ni rubéajë' yugu' bö' xihui' tu' dzaga Beelzebú tu' xihui', xángaca bö' xihui', Lë'.

25 Réquibe'enë' Jesús lë na' ta'zá' ládxí'gaquië', ate' rë' légaquië':

—Gáti'tës ga ta'nná bë' bönnachi, channö bönnachi ni' ila'rúaj choplö, en ila'díllalen luzë'eguequi, initi yöl-la' unná bë' quéguequi. Lëscá' caní, channö ila'rúaj choplö bönnachi nacuá' tu yözdö o tu yu'u, en ila'díll-la, biti' gaca ila'día' bönnachi nacuá' yözdö na' o yu'u na'. **26** Lëscá' caní, channö ubéaj Satanás tu' xihui' la' luzë'eso', ate' yugu' bö' xihui' na' ila'díll-lalen la' léguequisö, ¿naru' idía' yöl-la' unná bë' que tu' xihui'? **27** Rnnali' quia' rubéaja' yugu' bö' xihui' tu' dzaga Beelzebú tu' xihui' neda'. Channö runa' caní, ¿nużxi dzaga nupa dá'gaca libíili' cate' tu'béaj yugu' bö' xihui'? Que lë ni na' le túngaca caz naca bë'

nachíxili'. ²⁸ Na'a, channö neda' rubéaja' yugu' bö' xihui' tu' zóalen yöl-la' huáca queë' Dios Bö' Lá'ayi neda', le nácatë chibidixín le rinná bë'ë Dios ga zóali'.

²⁹ ¿Naru' huácatsö nu bönni' tsu'ë lidxë' bönni' nal-la, en cuéajë' yöl-la' tsahui' dzo'ë lidxë' channö cabí gúguë'ë bönni' nal-la na' zí'alö? Ní'irö gaca tsu'ë, en ulatjë' lidxë' bönni' nal-la na'.

³⁰ 'Nu biti' run neda' tsözxön, ridá'baga' neda', en nu biti' rutubi tsözxön len neda', rúsilasi nu na'.

³¹ Que lë ni na' rea' libí'ili', ca naca yúgu'të dul-la' tun böñachi, en yugu' didza' xihui' ta'nná, uniti lahuë' Dios léguequi, pero nu bönni' innë zi'ë queë' Dios Bö' Lá'ayi, biti' ca' uniti lahuë' Dios lë'. ³² Lësca' caní, nu bönni' innë' quia' neda', Bönni' Guljë' Bönachi, Dios uniti lahuë' lë', pero nu bönni' innë' queë' Dios Bö' Lá'ayi, biti' ca' uniti lahuë' Dios lë'. Biti' uniti lahuë' lë' dza ni zóaru' na'a, en biti' uniti lahuë' lë' dza si' za'.

Le runru' naca bë' le nácaru'
(Mt. 7:15-20; Lc. 6:43-45)

³³ Gunné' ca' Jesú:

—Channö naca dxi'a tu yaga, cuía le naca dxi'a, pero channö naca cá'asö yaga na', cuía ca' le naca cá'asö. Caní naca, le ribía tu yaga naca bë' yaga na'. ³⁴ Libí'ili' nácali' di'a dza quégacaba' bëla sínia'. ¿Nacxi gaca güí'ili' dxi'a didza', channö cabí nácali' dxi'a? Ca naca le ta'zä' ládxí'gaca böñachi, lësca' caní tu'i didza'. ³⁵ Tu bönni' tsahui' ru'ë didza' tsahui' tu' yu'u le naca tsahui' icja ládxí'da'ahuë', pero tu bönni' huiá' dö' ru'ë didza' biti' naca tsahui' tu' yu'u le cabí naca tsahui' icja ládxí'da'ahuë'. ³⁶ Que lë ni na' rea' libí'ili', cate' idxin dza ichúguië' Dios quégaca böñachi, uchi'a usöröë' tu tu bönni' ca naca yúgu'të didza' gula'nnazë' ca'. ³⁷ Ca naca didza' ru'u, uchi'a usöröë' li', ate' uruju' tsahui' o ibág'u xíguia' ni'a que didza' na' bë'u.

Ta'nábinë' Jesú gunë' le gaca bë' nu náquië'
(Mr. 8:12; Lc. 11:29-32)

³⁸ Ní'irö bulu'bi'ë didza' yugu' bönni' yudo' fariseo, en yugu' bönni' yudo' tu'sédinë', en të' Jesú:

—Bönni' Usedi, rë'ënitu' ilé'etu' tu le gunu' le gaca bë' dë lu no'o yöl-la' unná bë'.

³⁹ Bubi'ë didza' Jesú, en rë' légaquië':

—Yugu' bönni' tuá' dö' ni, biti' zoa idú ládxí'do'gaquië', ta'nábinë' neda' guna' tu le gaca bë' nu naca'. Biti' bi le gaca bë' ila'lé'enë', pero le naca bë'sö na' ca gua queë' Jonás, bönni' bë'ë didza' uláz queë' Dios. ⁴⁰ Ca na' gua queë' Jonás na', bugá'anë' lë'ëba' tu böla zxön idú tsonna dza tsonna yëla, lësca' caní gaca quia' neda', Bönni' Guljë' Bönachi, tsonna dza tsonna yëla ugá'ana' zxan yu. ⁴¹ Ilá'yase' bönni' gula'cu'ë yödöö Nínive dza ichúguië' Dios quégaca böñachi cate' uchi'a usöröë' böñachi nacuá' dza ni zóaru' na'a, ate' le gulunë' usubaga' böñachi ni xíguia' tu' bulu'bí'ládxí'gaquië' bönni' Nínive na' cate' ni' busiyönnë' Jonás légaquië' xtídzë'ë Dios, ate' na'a zoa' ni neda', en nácatëra' lo ca Jonás na'. ⁴² Lësca' caní, nigula ni' gunná bë'enu yödöö dë saca' ga ridöö gubidza beo' ziaga chásanu dza ichúguië' Dios quégaca böñachi cate' uchi'a usöröë' böñachi nacuá' dza ni zóaru' na'a, ate' le bennu usubaga' légaquië' xíguia', tu' birúajnu nigula na' ga nácatëra' zi'tu' para yöninu didza' réajni'i bë'ë Salomón, ate' na'a zoa' ni neda', en nácatëra' lo ca Salomón na'.

*Cate' rudxín tu bō' xihui' xilataj
(Lc. 11:24-26)*

⁴³ Gunné' ca' Jesús:

—Cate' riuráj tu bō' xihui' yu'u bönni', ridá gapa nabidxi, riguilaj ga uzí' ladxi'. Channö cabí idzöli ga na' uzí' ladxi', ⁴⁴ ní'irö inná: "Huöja' xilatja' ga ni' birúaja'." Cate' udxín ga ni' birúaj, tsöjxaca' bönni' na', náquié' ca tu yu'u nadachi', en nalúaj, en chinabá'a para nu tsöjsóa ni'. ⁴⁵ Ní'irö tseaj, tsöjzxí' ia'gadxi bō' xihui' nácacatérö xihui' ca le, ate' ila'yaza yúgu'té, en ila'cuá' icja láxdida'ahuë' bönni' na', ate' ga údxí huayálí'térö ca gaca queë' bönni' na' ca guca queë' zí'alö. Lësca' caní gaca quégaca bönnachi tuá' dö' ni.

Xiné'ë Jesúś, en yugu' bönni' böchë'ë

(Mr. 3:31-35; Lc. 8:19-21)

⁴⁶ Cate' ni' rui'ilené' Jesúś bönnachi didza' ni, xiné'ë, en yugu' bönni' böchë'ë bila'dxiné' ni'. Gula'cu'ë lö'alö, en gulé'ëniguequiné' ilui'ilené' Jesúś didza'.

⁴⁷ Ní'irö tu bönni' busiyönné' Jesúś, en rë' Lë':

—Buyútsöca', nacu'ë xinó'o, en yugu' bönni' böchu'u lö'alö, en të'enné' ilui'ilené' Li' didza'.

⁴⁸ Bubi'ë didza' Jesúś, en rë' bönni' na' busiyönné' Lë' caní, rnné':

—¿Nözili' nuzxi caz xiná'a, en nupxi caz bönni' böcha'a?

⁴⁹ Ní'irö bulí næ'ë, en bulu'e yugu' bönni' usëda queë', en rnné':

—Buli'yútsöca', bönni' ni nácaquie' ca xiná' caza', en yugu' böchi' caza'.

⁵⁰ Núti'tës nu run ca rë'ëni quéziné' Xuza' zoë' yehua' yubá, nu ni naca bi'i böchi' caza', en bi'i zan caza', en xiná' caza'.

13

Rucúdzu'ë didza' Jesúś ca naca queë' tu bönni' guz

(Mr. 4:1-9; Lc. 8:4-8)

¹ La' dza ni'isö birúajé' Jesúś niu' yu'u, ate' yójchö'ë ra' nísado'. ² Tu' bila'dxín bönnachi zián ga zoë' Jesúś, gurené' tu lë'e bárcodo', en gurö'ë ni', ate' bönnachi zián na' gula'cuá' luyú bidxi ra' nísado' na'. ³ Ní'irö Jesúś bë'lené' légaquie' didza', zián le busédiné' légaquie'. Bucúdzu'ë didza', rnné':

—Bulli'yútsöca', birúajé' tu bönni' guz, söjésie' xisedo'. ⁴ Tsanni ni' söjésie', bal-la xisedo' na' gulasi ra' nöza, ate' bila'dxinba' biguinnido', en gulé'ajba' xisedo' na'. ⁵ Gulasi ia'zíca'rö xisedo' na' luyú ga rö'ö/guiöj, ga na' rö'ö/láti'sö yu, ate' la' gula'lenté, tu' cabí rö'öda' yu ni'. ⁶ Ní'irö cate' budzá'a gubidza, lë na' bësië' la' gula'cuádité, en gula'bidxi, tu' cabí dë ga ilún luí. ⁷ Gula'lén ia'zíca'rö xisedo' na' ga bulu'lén lubá yötsi', ate' gula'zxón lubá yötsi' na', en bila'röli lë na' bësië', en gulún ditaj le. ⁸ Gulasi ia'zíca'rö xisedo' na' ga naca luyú bëbu, ate' bulu'nödzaj. Bal-la lë na' bësië' bulu'nödzaj ia'tú gayuá'térö ca'. Ia'zíca'rö bulu'nödzaj ia'tsónnalalaj ca', ate' ia'zíca'rö bulu'nödzaj ia'chí uruá' ca'. ⁹ Nu zoa nagui, en riyöni, ral-la' uzé nagui.

Le të'ëni ilún le bucúdzu'ë Jesúś didza'

(Mr. 4:10-12; Lc. 8:9-10)

¹⁰ Ní'irö bila'dxiné' bönni' usëda queë' Jesúś ga zoë', en gula'nábiné' Lë', ta'nné':

—¿Bizx que rui'ilenu' bönnachi didza' yugu' le rucúdzu'u didza'?

¹¹ Bubi'ë didza' Jesúś, en rë' légaquie':

—Dios ru'ë libí'ili' lataj tséajni'ili' le nagachi' ca rinná bë'ë Lë' yehua' yubá, pero bönnachi ni bití' të'ëni ila'yéajni'i. ¹² Nu si' xtídzë'ë, Dios unödzjë' que

ia'lati', ate' gáta'da'arö que, pero nu biti' si' le, la's duí le dë que udúa. ¹³ Que lë ni na' ruí'ilena' légaquië' didza' yugu' le rucúdzu'a didza', tu' tu'yúé' pero biti' ta'lé'enë'. Ta'yönnë' pero biti' tu'zé nágagaquië', en biti' ta'yéajni'inë'. ¹⁴ Caní raca quégäquië' para gaca ca na' gunnë' Isaías, bönni' bë'ë didza' uláz queë' Dios, gunnë':

Le nácatë yörnili' pero biti' tséajni'ili'.

Uyuli' iná'ali' pero biti' ilé'eli'.

¹⁵ Caní raca tu' nazidi ládzi'do'gaca bönni' ni, en biti' bi riyaza icja nágagaquië'.

Nadzudi' guiój lógaquië', para cabi ila'lé'enë' len guiój lógaquië' na'.

Biti' ulu'zé nágagaquië', en biti' ulu'zéajni'i ládzi'gaquië', en biti' ulu'huöáquië' quia' neda' para gaca una' légaquië'.

¹⁶ 'Na'a, bica' ba libí'ili', tu' rilé'e guiój loli', en riyöni nágali'. ¹⁷ Le nácatë rea' libí'ili', zián bönni' gulu'ë didza' uláz queë' Dios en yugu' bönni' tsahui' gulé'ënnë' ila'lé'enë' le rilé'eli' libí'ili' pero biti' bila'lé'enë' le. Gulé'ënnë' ila'yönnë' le riyönilí' libí'ili' pero biti' bila'yönnë' le.

Riguíxjö' è Jesús le bucúdzu' è didza'

(Mr. 4:13-20; Lc. 8:11-15)

¹⁸ Gunné' ca' Jesús:

—Buli'zé nágali' ca naca le bucúdzu'a didza' que bönni' guz. ¹⁹ Núti'tës nu riyöni didza' ca rinná bë'ë Dios yehua' yuba, en biti' réajni'ile, raca que didza' riyöni nu na' ca guca que xisedo' na' gulasi ra' nöza. La' za'të tu' xihu', en rugúa didza' na' guyú'u icja ládzi'da'ahuë' bönni' na'. ²⁰ Xisedo' na' gulasi luyú ga rö ö guiój rului' ca raca queë' bönni' riyönnë' didza' na', en la' ruzetë nágüi' lu yöl-la' rudzeja queë', ²¹ pero ca na' biti' ridíá' xisedo' na' tu' cabí dë ga gun luí, lëscá' caní raca queë' bönni' ni. Cate' idxín tu le usaca' zi' lë', ate' ila'bía na'gaca bönnachi lë' tu' nazí' lu në'ë didza' na', la' gácatë chopa ládxë'ë. ²² Xisedo' na' gulasi ga na' bulu'lén lubá yötsi' rului' ca raca queë' bönni' na' riyönnë' didza' na', pero rufí'i ládxë'ë yugu' le dë yödzöliö ni, ate' nazí' yë'ë bönni' na', tu' rufí'i ládxë'ë yugu' yöl-la' tsahui' que. Yugu' lë ni ta'röli didza' na', en tun ga biti' gun dxin lu icja ládzi'da'ahuë'. ²³ Xisedo' na' gulasi luyú bëbu rulufí'i ca raca queë' bönni' riyönnë' didza' na', en réajni'inë' le, ate' run dxin didza' na' lu icja ládzi'da'ahuë'. Nácagaca bal-la bönnachi ca xisedo' na' bulu'nödzaj ia'tú gayuá'terö ca'. Nácagaca ia'zíca'rö bönnachi ca xisedo' na' bulu'nödzaj ia'tsónnalalaj ca', ate' nácagaca ia'zíca'rö bönnachi ca xisedo' na' bulu'nödzaj ia'chí uruá' ca'.

Tu guíxi'do' cané le nalá' ca rilá' yöla zxoa' xtila

²⁴ Ia'tú le bucúdzu' è didza' Jesús, ate' rë' légaquië':

—Ca gaca cate idxín ni le rinná bë'ë Dios yehua' yubá naca ca guca que xisedo' dxí'a le guzë' tu bönni' ga naca lu xiyúë'. ²⁵ Tsanni na' tasië' bönni' nacu'ë lidxë', bidxín tu nu biti' rilé'e xan yu'u na' dxí'a, ate' yöjöza lu xiyúë' xisedo' guíxi'do' cané le nalá' ca naca yöla zxoa' xtila, ate' böaj xilataj. ²⁶ Cate' gulén zxoa' xtila na', en gurö'ö do que, ga na' dxí'a xui'i, ní'irö gulaca bë' guíxi'do' cané na'. ²⁷ Ní'irö bila'dxinë' bönni' huen dxin ga zoë' bönni' xan la' yëla na', en té' lë': "Xan, channö guzu' xisedo' dxí'a lu yu quiu', ¿nacxi guca

gula'lén guíxi'do' cané na?" ²⁸ Xan yu na' gudxë' légaquië', rnñe': "Tu bönni' biti' rile'enë' neda' dxi'a benë' caní." Ní'irö gula'nabinë' huen dxin queë' lë', ta'nnë': "¿Ba rë'ënú' tséajtu' tsöjöla'jtu' guíxi'do' cané na?" ²⁹ Xángaquië' rë' légaquië': "¡Biti' ca'! Nadx ca' cate' iládzul'i' guíxi'do' cané na', iládzul'entel'i' ca' yöla zxoa' xtila. ³⁰ Gácarö dxi'a güü'ilí' lataj ila'zxöngarö tsözxón cate' idixinrö dza tsöjtúbiru' le, ate' ní'irö guia' nupa ulu'tubi le: Buli'tubi zí'alö guíxi'do' cané na', en guli'guga' tsöjxili huéaj para uzégu'ru' le, ate' ní'irö utúbili' zxoa' xtila lu yu'u quia'."

*Rucúdzu'ë didza' Jesús ca naca que xisé mostaza
(Mr. 4:30-32; Lc. 13:18-19)*

³¹ Ia'tú le bucúdzu'ë didza' Jesús, ate' rë' légaquië':

—Ca gaca ga idixín le rinná bë'ë Dios yehua' yubá, gaca ca raca que tu xisé mostaza, le guzë' tu bönni' ga naca lu xiyüé'. ³² Le nácatë xisé mostaza na' nácatërö cuidi' ca yúgu'te xisedo' ia'zíca'rö, pero cate' chinadúz, rizxöntërö ca yúgu'te guixi' cuan, en rizxón ca naca tu yaga, ate' ta'dxinba' biguínnido', en tunba' xicá'agacaba' lu ní'a në'e.

*Rucúdzu'ë didza' Jesús que cúa zi que yöta xtila
(Lc. 13:20-21)*

³³ Ia'tú le bucúdzu'ë didza' Jesús, ate' rë' légaquië':

—Ca gaca ga idixín le rinná bë'ë Dios yehua' yubá gaca ca le run cúa zi que yöta xtila, le buchíxu tu nigula len tsonna libixi yöjza zxoa' xtila, ate' guyazxa idútë cúa na'.

*Le rë'ënì gun le rucúdzu'ë didza' Jesús
(Mr. 4:33-34)*

³⁴ Yúgu'të lë ni bucúdzu'ë didza' Jesús, le bë'lenë' böñachi nacuá' ní' didza', en biti' bi didza' bë'lenë' légaquië' le cabí bucúdzu'ë didza'. ³⁵ Caní benë' para gaca lë na' buzúajë' lu guichi tu bönni' bë'ë didza' uláz queë' Dios, gunnë': Gu'a didza' yugu' le ucúdzu' a didza'. Innia' yugu' le nagachi' cate' ní' gusí lo si' guta' yödzölió.

Riguíjö'ë Jesús le bucúdzu'ë didza' que guíxi'do' cané

³⁶ Ní'irö buzenë' Jesús böñachi nacuá' ní' didza', en gusöl-lë'ë légaquië', ate' guyu'ë yu'u. Ní'irö bilä'dxinë' bönni' uséda queë' ga zoë', en té' Lé':

—Gudíxjö'i netu' le rë'ënì inná lë na' bucúdzu'u didza' que guíxi'do' cané le nalá' ca naca yöla zxoa' xtila.

³⁷ Bubi'ë didza' Jesús, ate' rë' légaquië':

—Bönni' razë' xisedo' dxi'a naca' neda', Bönni' Guljë' Bönachi. ³⁸ La' yëla na' naca yödzölió ni, ate' xisedo' dxi'a na' tu'lui' ca nácagaca nupa nabábagaca ga rinná bë'ë Dios. Guíxi'do' cané na' le nalá' ca naca yöla zxoa' xtila tu'lui' ca nácagaca nupa néquiguequi que tu' xihui'. ³⁹ Nu na' biti' rile'e dxi'a xan la' yëla na', en yöjöza guíxi'do' cané na', tu' xihui' caz naca. Dza ulu'tubë' na' rului' ca gaca dza údxi que yödzölió ni, ate' nupa na' tu'tubi nácagaca gubáz lá'ayi queë' Dios. ⁴⁰ Ca na' guca, bulu'tubë' guíxi'do' cané na', en bulu'zégu'ë le lu gui', lësca' caní gaca cate' údxi que yödzölió ni. ⁴¹ Neda', Bönni' Guljë' Bönachi, isöl-la'gaca'-në' gubáz lá'ayi quia', ate' ulu'béajë' ga rinná bë'ë Dios yúgu'te nupa tun ga tun dul-la' luzë'eguequi, enca' nupa tuá' dö'. ⁴² Yugu' gubáz lá'ayi na' ila'gu'ë bönni' tuá' dö' na' lu gui' gabila. Ni' ila'bödxë', en ulu'til-la láyi'gaquië'. ⁴³ Ní'irö ila'yépi yösa bení' böñachi tsahui', en ilácagacië' ca gubidza ga ni' rinná bë'ë Dios yehua' yubá. Nu zoa nagui, en riyöni ral-la' uzé nagui.

Rucúdu'ë didza' Jesús que tu yöl-la' tsahui' nagachi'

44 Lësca' caní bucúdzu'ë didza' Jesús, rnnë':

—Le rinná bë'ë Dios yehua' yubá naca ca tu yöl-la' tsahui' nagachi' tu la' yëla. Cate' bidzölinë' tu bönni' le, bucáchë' le leyúbölo ga na' bigachi', ate' lu yöl-la' rudzeja queë' guyijë', yöjeti'ë yúgu'të le dë queë' ate' gú'uë' la' yëla na' para gata' yöl-la' tsahui' na' queë'.

Rucúdu'ë didza' Jesús que tu bugá le nazáca'da'

45 Gunné' ca' Jesús:

—Ca ral-la' së ládxí'lí' le rinná bë'ë Dios yehua' yubá naca ca benë' tu bönni' rå'uë', en ruúti'ë, en riguiljë' bugá nazáca'gaca. **46** Cate' bidzölinë' tu bugá le nazáca'da', guyijë', yöjeti'ë yúgu'të le dë queë', ate' gú'uë' bugá na'.

Rucúdu'ë didza' Jesús que tu yöoxaj böla

47 Lësca' caní gunnë' Jesús:

—Ca gaca ga ridxín le rinná bë'ë Dios yehua' yubá, gaca ca run tu yöoxaj böla le ta'chiljë' bönni' lu nísado', le röjxí' zián böla izá'a. **48** Cate' chibidzá' yöoxaj na', bulu'béajë' le luyu' bidxi ra' nísado' na', ate' gula'bö'ë ni', en gula'gu'ë-ba' yugu' böla dxi'a tu lu ga'böra, pero gula'rú'unë'-ba' yugu' böla cá'asö. **49** Lësca' caní gaca cate' údxi que yöödzölió ni. Ilá'rúajë' gubáz lá'ayi queë' Dios, ate' ulu'béajë' quez yugu' bönochchi tsahui', ate' ulu'cuítie' légaquië' ladaj bönochchi tuá' dö'.

50 Ní'irö ila'gu'ë bönochchi tuá' dö' na' lu guí' gabilia. Ní' ila'bödxë', en ulu'tíl-la láyë'ë.

Yöl-la' tsahui' le naca gula, en le naca cubi

51 Ní'irö Jesús gunábinë' yugu' bönni' usëda queë', rnnë':

—¿Ba réajni'ili' yúgu'të lë ni?

Bulu'bi'ë didza', të' Lë' :

—Ön, Xan.

52 Jesús gudxë' légaquië':

—Cate' tu bönni' yudo' usedi chinazí' lu në'ë le rinná bë'ë Dios yehua' yubá, náquië' ca tu bönni' xan yu'u, rubéajë' ladaj yöl-la' tsahui' queë' le naca cubi, en le naca gula, le nácgaca tsahui' le ruzi'ë xibé.

Le benë' Jesús lu yöödzö Nazaret

(*Mr. 6:1-6; Lc. 4:16-30*)

53 Cate' budxi bucúdzu'ë Jesús yugu' didza' ni, buzë'ë ni'. **54** Cate' budxinë' ladzë', busédinë' bönochchi nacuá' lu yu'u ga tu'dubë' bönni' judío, en tu'sëdë' queë' Dios, ate' bulu'báninë', ta'nnë':

—¿Gazxi caz guzëdë' bönni' ni yöl-la' réajni'i ni? ¿Nacxi caz naca, runë' yugu' yöl-la' huáca ni? **55** Náquië' bönni' ni zxí'inë' bönni' gubëdxí yaga, ate' xiné'ë lénü María. Náquië' böchí'gaquië' Jacobo, en José, en Simón, en Judas. **56** Lësca' nigula zanë' nacuá'lennu rë'u ni. ¿Gazxi caz guzëdë' yúgu'të lë ni?

57 Que lë ni na' gulaca chopá ládxí'gaquië', ate' bulu'ca'anë' Lë'. Ní'irö Jesús gudxë' légaquië':

—Yúgu'të bönochchi tun bal tu bönni' ru'ë didza' uláz queë' Dios, pero bönochchi uláz queë', en bönochchi nacuá' lidxë' bití' tun lë' bal.

58 Que lë ni na' bití' benë' Jesús zián yöl-la' huáca ni', tu' cabí ta'yéajlé'ë Lë'.

14

*Ca bëtgaquie' Juan, bönni' buquilë' böñachi nisa
(Mr. 6:14-29; Lc. 9:7-9)*

¹ Lu dza ni', biyönné' Herodes, bönni' rinná bë'ë luyú Galilea, ca nácagaca yugu' yöl-la' huáca runë' Jesús. ² Herodes na' gudxë' yugu' ni'a në'ë, rnnë':

—Bönni' na' Juan, bönni' buquilë' böñachi nisa. Chibubanë' lu yöl-la' guti. Que lë ni na' dë lu në'ë yöl-la' huáca zxön na'.

³ Caní gunnë' Herodes tu' gusöl-lë'ë lë cazë' bönni' gula'zönë' Juan, en gulúgui'ë lë' du guïë, ate' gula'gu'ë lë' lidxi guïë tu' gú'uninu Herodías ilunë' caní. Herodías na' gúcanu nigula queë' Felipe, böchë'ë Herodes na'. ⁴ Caní benë' Herodes, tu' gudxë' Juan na' lë': "Biti' ral-la' sóalenu'-nu."

⁵ Que lë ni na' gú'unnë' Herodes gútië' Juan, pero gúdxinë' ila'dá'baga' böñachi lu yödzö ni' lë', tu' téquiguequi böñachi náquië' Juan na' tu bönni' ru'ë didza' uláz queë' Dios. ⁶ Ní'irö cate' guca laní que dza guyé'enë' iz Herodes, birúajbi' bi'i nigula queënu Herodías na', en buyá'abi' lógaca nupa nacuá' laní na', ate' guyaza ládxë'ë Herodes le benbi'. ⁷ Guzxí' lu në'ë Herodes, en benë' tsutsu xtídze'ë unödzjë' queëbi' bítit'és bi inábibi' lë'. ⁸ Tu' chibusédinu-bi' zí'alö xiná'abi', gúdxibi' lë':

—Benna quia' na'a icjë' Juan, bönni' buquilë' böñachi nisa. Gulú'u le tu lu zxiga' zxön.

⁹ Ní'irö bu'innë' Herodes, pero tu' chibenë' tsutsu xtídze'ë, en tu' bila'yöni nupa te'aj tágulen lë', que lë ni na' gunná bë'enë' nu tsöjnödza' icjë' Juan na' queëbi'. ¹⁰ Caní guca, gusöl-lë'ë nu tsörrixí yenë' Juan ga ni' yu'ë lidxi guïë. ¹¹ Bönni' na' nasöl-lë'ë bu'ë icjë' Juan na', zxoa lu zxiga' zxön, ate' bunödzjë' le queëbi' bi'i nigula na', ate' lëbi' buá'abi' le queënu xiná'abi'.

¹² Ní'irö bila'dxinë' bönni' gula'dë'ë Juan na', ate' bulu'ú'ë lë', en bulu'cachë'ë lë'. Gudödi ni', yötixjö'i'guequinë' Jesús ca gulaca lë ni.

*Jesús rugahuë' ziánrö ca chi-un gayuá' böñachi
(Mr. 6:30-44; Lc. 9:10-17; Jn. 6:1-14)*

¹³ Cate' réquibe'enë' Jesús lë ni, buzë'ë ni', ate' gurenë' tu lë'e bárcodo', en sa'yéajë' la' queëzë' tu lataj cá'asö. Cate' bila'yöni böñachi zéajë' ni', bila'rúaj yugu' yödzö ni', en yöjaca ga ni' idixinë' Jesús, ta'zë' e ní'aguequi. ¹⁴ Cate' burúajë' Jesús lë'e barco, bilé'enë' nacua' böñachi zián ni', ate' buéchí' ládxë'ë léguiguequi, en bunë' nupa te'e, nútsa'gaca ládjaguequi. ¹⁵ Cate' chiridzö' dza na', bila'dxinë' yugu' bönni' usëda queë' Jesús ga zoë', en té' Lë':

—Chiridzö' na'a, ate' cá'asö naca lataj ni. Busöl-la' böñachi ni para tsöjaca gapa dë yödzödo' para gá'ugaca bi ilagu.

¹⁶ Ní'irö Jesús gudxë' légaquie':

—Biti' run bayudxi tsöjáquië'. Buli'nödzaj libí'ili' le ilahuë'.

¹⁷ Ní'irö té' Lë':

—Gáyu'sö yöta xtila dë, en chópasöba' böla dëba' queëtu' ni.

¹⁸ Jesús re' légaquie':

—Buli'dödi le lu na'a.

¹⁹ Ní'irö Jesús gunná bë'enë' böñachi na' ila'bö' ga yu'u daca'. Gudödi na' gudélë'ë gayu' yöta xtila na', en chópasöba' böla na', ate' guchisa lahuë', ruyúë' zaca' yehua' yubá. Gudxë' Dios: "Xclenu'." Ní'irö buzxuzxe' yöta xtila na', en budödë' le lu ná'agaquie' bönni' usëda queë', ate' légaquie' gula'guísie' le lögaca böñachi zián na'. ²⁰ Gulahuë' yugu'tëgaquie', en bulu'huöljanë'. Ní'irö bulu'tubë' yugu' bizxaj nagá'anagaca, en bulu'lifé' chinnu ga'böra. ²¹ Bönni'

ní' gulahuë' guláquië' idú chi-un gáyu'ë, pero cuntu nu bulaba yugu' nigula, en bí'ido'.

*Jesús rizë'e ni'ë lu nísado'
(Mr. 6:45-52; Jn. 6:16-21)*

22 Ní'irö la' bentë' Jesús ga gula'benë' bönni' usëda queë' lë'e bárcodo', en tsójáquië', ila'nöruë' lahuë' Lë', para ila'dödë' ia'tsölá'a nísado' ni', tsanni na' uzenë' Lë' bönachi nacuá' ni' didza'. **23** Cate' chibusól-lë'e Jesús bönachi na', gurenë' tu lu guí'ado' ga ni' yöjsóe' tuzé'. Ni' bulidzë' Dios. Cate' chigul-la, tuzé' zoë' ni'. **24** Bárcodo' ga na' nacu'ë bönni' usëda queë' ridödi gatsaj láhui'lö nísado' na', ate' riyasa bárcodo' na' tu' riyasa ridixía nísado' na', ate' ruzaga' bö' recja barco na'. **25** Gudödi guluhuëla, gubíguië' Jesús gala' ga na' nacu'ë, rizë'e ni'ë lu nísado'. **26** Cate' yugu' bönni' usëda queë' bila'lé'enë' Lë', rizë'e ni'ë lu nísado', gula'bö'dë'e böninga tu' táxdinë'. Gula'bödxi'ë, ta'nnë':

—Tu' ridasö na'.

27 Ní'irö Jesús la' bulidztë' légaquië', rnnëe':

—Buli'zxöni ládxil'i. Neda' ni. Biti' gádxil'i.

28 Ní'irö bubí'ë didza' Pedro, rë' Jesús:

—Xan, channö nacu' Li', gunná be'e neda' guída' ga na' zu' lu nisa.

29 Jesús gudxe' lë' :

—Gudá.

Ní'irö bötjë' Pedro lë'e bárcodo' na', en guzë'e ni'ë lu nísado', sa'yéajë' ga na' zoë' Jesús. **30** Ní'irö cate' bilé'enë' Pedro ca bö' na' recja rutá nisa, gúdxinë'. Ní'irö gusí lahuë' rötjë' lu nisa, ate' gurödxi'ë. Bulidzë' Jesús, rnnëe':

—Xan, busölä neda'.

31 Jesús la' bulitë në'ë. Buguéle'ë lë', en rë' lë':

—Láti'sö réajlë'u neda'. ¿Bizx que guca chopla ládxu'u?

32 Cate' bulu'benë' lë'e bárcodo' na', guröö dxi bö' na' recja. **33** Ní'irö bönni' nacu'ë lë'e bárcodo' na' gula'yéaj ládxí'gaquië' Jesús, ta'nnë':

—Le nácatë, Zxf'inë' Dios nacu'.

*Jesús ruúnë' yugu' bönni' huë' nacu'ë yödzö Genesaret
(Mr. 6:53-56)*

34 Cate' chigula'dödë' ia'tsölá'a nísado' na', la' bila'dxintë' lu xiyú yödzö Genesaret. **35** Cate' bulu'ünbü'ë bönni' yödzö ni' Jesús, gula'söl-lë'e didza' idútë luyú ni', ate' dujuá'gaquië' yúgu'të nupa te'e ga na' zoë' Jesús.

36 Guláta'yüë' lahuë' Jesús gu'ë légaquië' lataj ila'gansë' ru'i lari' nácuë', ate' la' bulu'huöácatë yúgu'të nupa na' bila'gán lari' na'.

15

Le tun ga biti' nácaru' tsahui' lahuë' Dios

(Mr. 7:1-23)

1 Ní'irö yugu' bönni' yudo' fariseo, en bönni' yudo' tu'sédinë', narúajgaquië' Jerusalén, bila'dxinë' ga zoë' Jesús, ate' té' Lë':

2 —¿Bizx que tunë' bönni' usëda quiu' le ridödi bë' ca naca le nulaga loru' runru' ca gulunë' xuz xtó'oru'? Biti' ta'guíbi në'ë ca naca que yudo' cate' si' ilahuë'.

3 Bubi'ë didza' Jesús, en gunábinë' légaquië', rnnëe':

—¿Bizx que libí'ilí' ca' rucá'anali' cá'asö xibá queë' Dios para gunli' le nulaga loli' runli'? **4** Caní raca, tu' gunná bé'enë' Dios libí'ilí', gunnë': “Ben bal xuz xino'o”, en gunnë' ca': “Nu innë zi' que xuz xinë'e, tsaz gati nu na'.”

5 Pero libí'ili' rnnali': "Channö nu guié xuz xiné'e: Bití' bi gaca gunna' quiu' tu' chiguzxí' lu na'a gunna' yúgu'té queë' Dios, **6** bíti'rö bi run bayudxi gun nu na' que xuz xiné'e." Caní runli', rucá'anali' cá'asö le gunna' bë'ë Dios, para gunli' le nulaga loli' runli'. **7** Libí'ili', bönni' rului'isö tsahui' cuinli', idú ca nácali' gudíjxö'ë Isaías, bönni' bë'ë didza' uláz queë' Dios, gunné':

8 Bönni' ni, len rú'agacsé' tunë' neda' bal, en calëga idú ládxi'gaquië'.

9 Nítiso naca le ta'yéaj ládxi'gaquië' neda', tu' tu'sédiné' yugu' le gula'nná bë' böñachi.

10 Ní'irö bulidzë' Jesús böñachi nacuá' ni', en rë' léguequi:

—Buli'zé nágali' le guía' libí'ili', en guli'tséajni'i. **11** Calëga le riyaza ru'ë nu bönni' run ga bití' náquië' tsahui' lahuë' Dios, pero le rirúaj ru'ë, lë ni run ga bití' náquië' tsahui' lahuë' Dios.

12 Ní'irö yugu' bönni' usëda queë' Jesús gula'bígui'ë ga zoë', en té' Lë':

—¿Naru' nöztseñu' gula'lenë' yugu' bönni' yudo' fariseo cate' bila'yönnë' didza' ni bë'u?

13 Ní'irö bubí'ë didza' Jesús, en rë' légaquië':

—Yúgu'té le nadúz, le cabí guzé' Xuza' zoë' yehua' yubá, huadúljugaca idú lui. **14** Bulí'ca'ana légaquië'. Chinachúl-la lógaquië', en ta'chë'ë nupa nachulla lógaca. Channö tu bönni' lo chul-la iché'ë ia'tué' bönni' lo chul-la, iropé' ila'bixë' tu lu yeru.

15 Ní'irö bubí'ë didza' Pedro, en rë' Jesús:

—Buzéajni'i netu' lë ni rucúdzu'u didza'.

16 Jesús rë' légaquië':

—¿Naru' cabí réajni'itseli' ca' libí'ili'? **17** ¿Naru' cabí réajni'itseli' riyaza lë'ëru' yúgu'té le riyaza ruá'aru', ate' rurúaj lë'ëru'? **18** Na'a, le rirúaj rúa'ali', lu icja ládxi'do'oli' za', ate' lë ni run ga bití' nácali' tsahui' lahuë' Dios. **19** Caní raca, tu' ta'lén lu icja ládxi'do'oli' yugu' le rizá' ládxi'li' le ruá' dö', le ilún ga gútili' böñachi, en le ilún ga quítsjali' xibá que yöl-la' nutsaga na', en le ruá' dö' runli', en yugu' le rizé ládxi'li' cuanli', en yugu' le rinnëli' que luzá'ali' le cabí nácate, en yugu' le rinnë xíhui'li'. **20** Yugu' le caní tun ga bití' náquië' tu bönni' tsahui' lahuë' Dios, pero channö cabí nayari né'ë ca naca que yudo' cate' bi gahuë', bití' gun ga bití' náquië' tsahui' lahuë' Dios.

Tu nigula izá'a réajlé'ënu Jesús (Mr. 7:24-30)

21 Ní'irö buzé'ë Jesús ni', en guyéajé' lu xiýú yödzö Tiro, en yödzö Sidón. **22** Tu nigula nabábanu luyú Canaaná birúajnu yödzö ni', ate' bë'ënu zidzaj didza', rënu Jesús:

—Xan, zxí'ini xi'soë' David, buéchi' ladxi' neda'. Bi'i nigúlado' quia' rigui'i rizáca'da'abi' tu' yu'u bô' xihui' lëbi'.

23 Bití' bi didza' bubí'ë Jesús. Ní'irö gula'bígui'ë bönni' usëda queë' ga zoë', ate' gulë' Lë', ta'nnë':

—Busö'l-la'-nu, tu' zá'anu cùdzu'ru' ribödxi'anu.

24 Ní'irö bubí'ë didza' Jesús, ate' rë'ë-nu:

—Dios nasö'l-lë'ë neda' gácalena' böñachi Israel, nupa nácataca ca bô'cu' zxíla'do' nanítigacaba'.

25 Ní'irö gubiga'nu nigula na' ga zoë' Jesús, en guyéaj ládxi'nu Lë', ate' rënu Lë':

—Xan, gúcalen neda'.

26 Bubi'ë didza' Jesús, rnnë':

—Biti' naca dxi'a ugúaru' yöta quégacabi' bí'ido', en chú'unaru' le lógacaba' bő'cu'do'.

27 Ní'irö nigula na' rënu Jesús, rnnanu:

—Ön, Xan, pero táguba' bő'cu'do' na' le bizzaj tu'huoxaj ga tagu xángacaba'.

28 Ní'irö bubí'ë didza' Jesús, rnnë':

—Nigúlado'. Idú naca ca réajlé'u neda'. Gaca quiu' ca rë'ënnu'.

La' ní'isö böácatëbi' bi'i niguladó' queénu'.

Jesús ruúnë' zián nupa te'e

29 Ní'irö buzé'ë Jesús ni', en gudödë' ga naca ra' nísado' que Galilea. Gurenë' tu lu guí'ado', ate' gurö'ë ni'. **30** Bönachi zián dujuá'gaquië' nupa biti' guca ila'zá', en nupa nachul-la guiój lógaca, en nupa biti' guca ila'nnë, en nupa narugu ni'a në'eguequi, en ia'zíca rö zián nupa te'e, ate' gula'guíxaj léguequi xini'ë Jesús, ate' Lë' bunë' léguequi. **31** Bulu'bani böñachi ni' ca naca le benë' Jesús, tu' bila'lé'e tu'nnë nupa biti' guca ila'nnë, ate' nuhuóacagaca nupa gurugu ni'a në'eguequi, ate' tu'zá' nupa biti' guca ila'zá', ate' tu'lé'e nupa guchul-la lógaca. Que lë ni na' gula'gu'ë yöl-la' ba Dios quégaca böñachi Israel.

Jesús rugahuë' ziánrö ca choá' gayuá' böñachi

(*Mr. 8:1-10*)

32 Ní'irö Jesús bulidzë' yugu' bönni' usëda queé', en rë' légaquië':

—Ruhuechi' láwdx'a' böñachi zián ni, tu' chiguca tsonna dza zá'lenguequi neda', en biti' bi dë le ilagu. Biti' rë'ënda' usö'l-la'gaca'-në' tsöjhuóajgaquië' lídxigaquië' ta'dunsë' ca', nadxi ca' udú ládx'i'gaquië' la' nöza.

33 Ní'irö yugu' bönni' usëda queé' té' Lë', ta'nnë':

—¿Gazxi caz idzölitu' yöta xtila zián lu lataj cá'asö ni, le ugágutu' böñachi zián ni?

34 Gunábinë' Jesús légaquië', rnnë':

—¿Bal-laxi yöta xtila dé queéli?

Bulu'bí'ë didza', ta'nnë':

—Gadxi, ate' nabábasöba' böla cuidi' dëba' queétu' ni.

35 Ní'irö Jesús gunna bé' enë' böñachi zián na' ila'bó' lu yu. **36** Gudélë'ë gadxi yöta xtila na', en yugu' böla na', ate' gudxë' Dios: "Xclenu'." Ní'irö buzxuzxjë' iroptë na', en bunödzjë' quégagaquië' bönni' usëda queé', ate' légaquië' gula'guísië' le lögaca böñachi zián na'. **37** Gulahuë' yúgu'té', en bulu'huöljanë'. Gudödi ni' bulu'tubé' le bizzaj nagá'anagaca, ate' bulu'líë' gadxi ga'böra. **38** Yugu' bönni' na' gulahuë' nácagaquië' choá' gáyu'ë, pero cuntu nu bulaba yugu' nigula, en bí'ido'. **39** Ní'irö busö'l-ië'ë Jesús böñachi na' tsöjhuóajgaquië' lídxigaquië', ate' gurenë' lë'e bárcodo' ni', en sa'yéaje' lu xiyú yödzö Magdala.

16

Ta'nábinë' Jesús gunë' tu le gaca bë' nuzxi náquië'

(*Mr. 8:11-13; Lc. 12:54-56*)

1 Ní'irö yugu' bönni' yudo' fariseo len yugu' bönni' yudo' saduceo bila'dxinë' ga zoë' Jesús para ila'zí' bë'ë Lë', ate' gula'nábinë' Lë' gunë' tu le gaca bë' ga za' yöl-la' unná bë' queé'. **2** Bubi'ë didza' Jesús, en rë' légaquië':

—Cate' ridzö', rnnali' caní: "Gun dxi'a cuoxö, tu' rö'ö böaj xiná lúzxiba."

3 Cate' naca zílado', rnnali' caní: "Biti' gun dxi'a na'a dza tu' rö'ö böaj xiná, en ruchul-la lúzxiba." Libí'ilí, bönni' ruluf'isö tsahui' cuinli'. Raca innë' ya'ali'

naca gun lúzziba, pero biti' gaca tséajni'ilí le tu'sedi le taca dza ni zóaru' na'a.
4 Yugu' bönachi tuá' dö' ni, en biti' zoa idú ládzi'gaca ta'nábini neda' guna' tu le gaca bë' Nu naca', pero biti' bi le gaca bë' ila'lé enë'. Ila'lé esinë' lë na' guca bë' ca' guca queë' Jonás, bönni' bë'ë didza' uláz queë' Dios.

Ní'irö Jesúus bucá'anë' légaquië', söhuöjë'.

*Le tu'sédinë' bönni' yudo' naca ca cúa zi que yöta xtila
(Mr. 8:14-21)*

5 Cate' bila'dxinë' ia'tsölá'a nísado' ni', guléquibe'enë' bönni' usëda queë' Jesúus gulál-la ládzi'gaquië' ilu'ë le ilahuë'. **6** Ní'irö Jesúus gudxë' légaquië':

—Bull'yútsöca'. Guli'gún chi'i cuinli' que le naca ca cúa zi que yöta xtila quégäquië' bönni' yudo' fariseo, en quégäquië' bönni' yudo' saduceo.

7 Ní'irö la' légacase' gulún xtídza'gaquië' bönni' usëda queë', ta'nnë':

—Rnnë' caní tu' cabí nuá'aru' yöta xtila.

8 Réquibe'enë' Jesúus lë ni, ate' rë' légaquië':

—¿Bizx que run xtídza'li' la' libí'isili' tu' cabí nuá'ali' yöta xtila? Láti'do'os réajlë'ëli' neda'. **9** ¿Naru' cabí réajni'itseli', en biti' röjnëtseli' ca guca quégaca gayu' yöta xtila ni', lë na' gulahuë' chi-un gáyu'ë bönni', ate' tsca xö ga'böra butúbili'? **10** ¿Naru' cabí röjnëtseli' ca' ca guca quégaca gadxi yöta xtila ni', lë na' gulahuë' choá' gáyu'ë bönni', ate' tsca xö ga'böra butúbili'? **11** ¿Naru' cabí réajni'ilí? Biti' bë'ë didza' que yöta xtila cate' gudxa' libí'ili' gun chi'i cuinli' que le naca ca cúa zi que yöta xtila quégäquië' bönni' yudo' fariseo, en quégäquië' bönni' yudo' saduceo.

12 Ní'irö gula'yéajni'inë' biti' gudxë' Jesúus légaquië' ilún chi'i cuíngäquië' que cúa zi que yöta xtila, pero ral-la' ilún chi'i cuíngäquië' que le tu'sédinë' yugu' bönni' yudo' fariseo, en yugu' bönni' yudo' saduceo.

*Pedro rnnë' Jesúus náquië' Cristo
(Mr. 8:27-30; Lc. 9:18-21)*

13 Cate' bidxinë' Jesúus lu xiyú yödzö Cesarea, ga na' rinná bë'ë Filipo, gunábinë' yugu' bönni' usëda queë', rnnë':

—¿Bizxi ta'nná bönachi nu naca' neda', Bönni' Guljë' Bönachi?

14 Bulu'bí'ë didza', ta'nnë':

—Bal-lë' ta'nnë': "Juan nacu', bönni' ni' buquile' bönachi nisa." Ia'zíca'rë' ta'nnë': "Elías nacu', bönni' ni' bë'ë didza' uláz queë' Dios dza ni'te." Ia'zíca'rë' ta'nnë': "Jeremías nacu', o ia'tué' bönni' bë'ë didza' uláz queë' Dios."

15 Ní'irö Jesúus gudxë' légaquië':

—Naru' libí'ili', ¿nuzxi rninali' naca' neda'?

16 Bubi'ë didza' Simón Pedro, en rë' Lë':

—Li' nacu' Cristo, Zxi'inë' Dios ban.

17 Bubi'ë didza' Jesúus, rë' lë':

—Bica' xibó' li', Simón, zxi'inë' Jonás, tu' cabí buluí'inë' nu bönni' li' lë ni. Xuza' zoë' yehua' yubá buluí'inë' li' lë ni. **18** Neda' rea' li', li' nacu' Pedro, ate' lu/guijö ni ucuá'a nupa ulu'dubi quia', ate' yöl-la' unná bë' que tu' xihui' biti' sequi' uzaga' xinözgaquië'. **19** Gunna' qui' yugu' zxi'ini guïë que lataj ga rinná bë' Nu zoa yehua' yubá. Le inná bë'u luyú ni, chigunná bë' ca' Nu na' zoa yehua' yubá, ate' le gu'u lataj gaca luyú ni, chibë' lataj gaca lë na' Nu na' zoa yehua' yubá ni'.

20 Ní'irö Jesúus gunná bë'enë' yugu' bönni' usëda queë' cuntu nu ilë'ë náquië' Lë' Cristo.

Jesús riguíjö' è ca sì' ilútië Lë'
(Mr. 8:31-9:1; Lc. 9:22-27)

21 La' dza ní'isö gusí lahuë' Jesús riguíjö'iñé' yugu' bönni' usëda queë' run bayudxi tsejë' Jerusalén, ga ni' yugu' bixúz unná bë' en bönni' gula tu'zéajni'iné', en bönni' yudo' tu'sédiné' ulu'saca' zi'ë Lë', ate' ní'irö ilútië' Lë', pero cate' gaca tsonna dza ubanë' lu yöl-la' guti. **22** Ní'irö Pedro guchë' è Jesús quez, en gusí lahuë' ridil-lë' Lë' didza', rnñë'.

—Xan, biti' gu'ë Dios lataj. Biti' ca' gaca quiu' ca rnno'.

23 Ní'irö buécjë' Jesús, en rë' Pedro:

—Gucuita ga zoa'. Runu' ca run Satanás, tu' xihui'. Runu' ga gaca chopá ládx'a tu' cabí naca le rizá' ládxu'u li' ca rizá' ládxë'è Dios, pero ca ta'za'sö ládx'i'gaca böñachi.

24 Ní'irö Jesús gudxë' yugu' bönni' usëda queë', rnñë'.

—Channö zoë' tu bönni' rë'ënë' té'ë neda', ral-la' uzóë' tsölá'alö yugu' le rë'ëni quézinë', en gáquië' ca tu bönni' sa'yéajë' zeajtë'ë le'e yaga cruz, ate' ní'irö gaca té'ë neda'. **25** Nu bönni' guë'ënnë' gun chi'ë yöl-la' na'bán queë', unítië' le, pero bönni' unítië' yöl-la' na'bán queë' tu' dë'ë neda', gata' yöl-la' na'bán idú queë'. **26** ¿Naru' uzi'tsë' xibé tu bönni' channö utubë' yúgu'të le dë yödzölió ni pero unítië' yöl-la' na'bán idú queë'? Biti' bi gaca unödzjë' tu bönni' para gata' yöl-la' na'bán idú queë'. **27** Caní rnñia', tu' huöda' neda', Bönni' Guljë' Bönachi, en idzaga yöl-la' unná bë' queë' Xuza' Dios neda', ate' idzágagaquïë' gubáz lá'ayi quia' neda'. Ní'irö ubi'a que queë böñachi tsca naca le nüngaca. **28** Le nácatë rea' libí'ilí: "Biti' ca' ilátigaca bal-la nupa nacuá' ni cate' ila'lë'erö idinná bë'a neda', Bönni' Guljë' Bönachi."

17

Ridzá' ca nalá' lahuë' Jesús
(Mr. 9:2-13; Lc. 9:28-36)

1 Gudödi xopa dza, Jesús gudélë'è Pedro len Jacobo, en Juan, böchë' è Jacobo na', en guchë' è légaquïë', ate' yójáquië' quez tu lu guí'a sibi. **2** Ni' bidzá' ca nalá' lahuë' Jesús lógaquïë'. Guyépi yösa bení' lahuë' Jesús ca ruzení' gubidza, ate' lari' nácuë' böáca chiguíchido'os ca bení'. **3** Ní'irö bila'lé'enë' bönni' usëda queë' buluí'i lógaquïë' Moisés, en Elías, ate' tu'ilenë' Jesús didza'. **4** Ní'irö Pedro rë' Jesús:

—Xan, naca dxí'a zóaru' ni. Channö rë'ënu', guna' ni tsonna yu'u lága'do', tu quiu', ia'tú queë' Moisés, en ia'tú queë' Elías.

5 Tsanni ní' ru'ë Pedro didza' ni, la' gurö'ötë tu böaj bení' le guzxóá légaquïë', ate' lu böaj na' biyörn chi'i nu rnna:

—Bönni' ni Zxi'ini caza'. Nadxi'ida'-në', en raza ládx'a Lë'. Buli'zë nágali' didza' gu'ë.

6 Cate' bila'yönnë' bönni' usëda queë' chi'i na', gula'dzö'ë gusurú'alö, en guladxi bila'dzöbinë'. **7** Ní'irö gubígui'ë Jesús ga na' nacu'ë, ate' gudanë' légaquïë', rnñë':

—Guli'chasa. Biti' gádxili'.

8 Cate' gula'chisa lógaquïë', en bulu'yúë', cínturö nu bila'lé'enë', pero tuzë' Jesús.

9 Cate' ni' tu'dínnië' lu guí'a na', Jesús gunná bë'enë' légaquïë', rnñë':

—Cuntu nu guiëli' ca guca lë ni bilé'eli' cate' ubanra' lu yöl-la' guti neda', Bönni' Guljë' Bönachi.

10 Ní'irö yugu' bönni' usëda queë' gula'nábinë' Lë', ta'nnë':

—¿Bizx que ta'nnë' bönni' yudo' usëdi run bayudxi ulu'i lahuë' Elías zí'alö ca ulu'i lahuë' Cristo?

11 Bubi'ë didza' Jesùs, rë' légaquië':

—Le nácatë ulu'i lo cazë' zí'alö Elías, en ucá'anë' tsahui' yúgu'të. **12** Neda' rea' libí'ili': "Chibulu'i lahuë' Elías na', pero biti' bulu'únbeë'ë lë', ate' yúgu'të ca rrnasö quégaquië' gulunë' queë'." Lësca' caní ilunë' quia' neda', Bönni' Guljë' Bönachi, ulu'saca' zi'ë neda'.

13 Ní'irö gula'yéajni'inë' bönni' usëda queë', bë'lenë' Jesùs légaquië' didza' ca guca queë' Juan, bönni' na' buquilë' bönachi nisa.

Ruúnë'-bi' Jesùs tubi' bi'i bönni' ré'ebi' xjote' (Mr. 9:14-29; Lc. 9:37-43)

14 Cate' bila dxinë' ga na' nacuá' bönachi zián, gubígui'ë tu bönni' ga zoë' Jesùs, ate' buzóa zxibë' lahuë' Lë', **15** en rë' Lë':

—Xan, buéchi' ladxi'bi' bi'i bönni'do' quia', tu' ré'ebi' xjote', en rigu'i rizáca'da'abil', ate' zián luzuí ridzö'öbi' lu guí' o lu nisa. **16** Chidiguá'a-bi' lógaquië' bönni' usëda quiu' pero biti' guca ulu'únë'-bi'.

17 Bubi'ë didza' Jesùs, rnñë':

—Libi'ili', bönachi cabí réajlë'ëli', en biti' nácali' tsahui'. ¿Gáca'xté caz ral-la' sóalena' libi'ili' para tséajlë'ëli' neda'? ¿Gáca'xté caz ral-la' guá' ilena' queëli'? Guli'diguá'-bi' quia' ni.

18 Ní'irö Jesùs buzenë' le bach bö' xihui' na' yu'u lëbi', ate' la' burúajtë lëbi', ate' la' na' asö böácatëbí' bi'i bönni'do' na'.

19 Ní'irö, yugu' bönni' usëda queë' Jesùs gula'biguë'ë quez ga zoë', ate' gula'nábinë' Lë', ta'nnë':

—¿Bizx que na' biti' guca ubéajtu' netu' bö' xihui' na'?

20 Jesùs rë' légaquië':

—Biti' guzxéqui'lí' tu' cabí réajlë'ëli' Dios idú ládxí'lí'. Le nácatë rea' libí'ili', sal-la' cuídi'sö naca yöl-la' réajlë' queëli' Dios, nácatë ca tu xisedo' mostaza, huáca guiëli' guí'ado' ni: "Gucuitá ni, en yöjsöa ní'ilö", ate' la' icuítaté gui'ado' na'. Biti' bi zoa le cabí gaca gunli' channö réajlë'ëli' Dios idú ládxí'lí'. **21** Tu bö' xihui' caní gácasö ubéajli' channö ulídzali'-në' Dios, en gunli' gubasa.

Riguíxjö'ë Jesùs leyúbölö ca si' ilútië' Lë' (Mr. 9:30-32; Lc. 9:43-45)

22 Tsanni ni' ta'dë luyú Galilea, Jesùs gudxë' yugu' bönni' usëda queë', rnñë':

—Zoa nu udödi neda', Bönni' Guljë' Bönachi, lu ná'agaca bönachi. **23** Ilútië' neda', pero cate' gaca tsonna dza Dios usubanë' neda'.

Ní'irö bulu'huí'innë' bönni' usëda queë'.

Jesùs riguixxaj lazë' que yudo'

24 Cate' bulu'dxinë' Jesùs, en yugu' bönni' usëda queë' lu yödzö Capernaum, bila'dxinë' yugu' bönni' tu'quizxjë' bönachi lázagaca que yudo' ga zoë' Pedro, ate' të' lë':

—¿Naru' cabí quizxaj lazë' que yudo' bönni' rusédinë' libí'ili'?

25 Bubi'ë didza' Pedro, rnñë':

—Ön, huaguixxjë'.

Cate' buázië' Pedro lu yu'u, Jesùs la' bulidztë' lë', en rë' lë':

—¿Nacxi rusaca' quiu', Simón? Bönni' ta'nná bë'ë luyú ni, ¿nupxi tu'quizxjë' le riguizxaj laz, en lazzxaj que yu? ¿Naru' tu'quizxjë' bönachi uládz quégaquië' o bönachi izá'a?

26 Bubi'ë didza' Pedro, rë' Lë':

—Bönachi izá'a tu'quizxjë'.

Ní'irö Jesúr rë' lë':

—Que lë ni na', biti' run bayudxi quizxaj laza' que yudo' tu' naca' Zxí'inë' Dios ca na' biti' bi ta'guízxaj nupa nácabaca bönachi uládz queë' bönni' na' ruquízxjë'. **27** Na'a, para cuntu nu gun leru', guyéaj ra' nísado', yöjzalaj lu nisale rizöñinu'-ba' böla, ate' böla cueju'-ba' zí'alö, guzxí'i-ba'. Cate' isalju' ruá'aba', ní' idzölinu' tu dumí lárido'. Guzxí'i le, ate' gudizxaj laza', en lazu'.

18

¿Núzxilö gaca lo?
(Mr. 9:33-37; Lc. 9:46-48)

1 La' dza n'isö bila'dxiné' bönni' usëda queë' Jesúr ga zoë', ate' gula'nábinë' Lë', ta'nnë':

—¿Núzxilë' bönni' ni gáquië' lo ga rinná bë'ë Dios yehua' yubá?

2 Bulidze'-bi' Jesúr tubi' bi'i bönni'do', ate' buzóë'-bi' gatsaj láhui'lö ga na' nacu'ë. **3** Ní'irö rë' légaquië':

—Le nácatë rea' libí'ilí', channö cabí huöácali' ca zeaj nácabí' bí'ido', biti' ca' tsú'uli' ga ni' rinná bë'ë Dios yehua' yubá. **4** Que lë ni na', nútítës nu gaca nöoxjá ladxi', en huöáca ca nácabí' bí'ido' ni, nu ni gaca lo ga ni' rinná bë'ë Dios yehua' yubá. **5** Nútítës nu gun bal tubi' bí'ido' caní tu' néquibi' quia', neda' caz gun bal.

Le tun ga nu gun dul-la'
(Mr. 9:42-48; Lc. 17:1-2)

6 Gunné' ca' Jesúr:

—Nu gun ga gunbi' dul-la' tubi' bí'ido' caní réajlë'ëbi' quia', gácarö dxi'a queë' bönni' na' la'tu' ugälë'ë guiój riyétuni yaga yenë', ate' tsöjsuladzu' cuiné' lu nísado'. **7** Bica' bayechí' bönachi yödzölió ni tun ga gun dul-la' luzé'eguequi. Nacuá'tica'sö le tun ga nu gun dul-la', pero bica' bayechí' nu run ga nu gun dul-la'.

8 Que lë ni na', channö gun no'o o ni'u ga gunu' dul-la', guchugu le, en gurú'una le. Gácarö dxi'a quiu' tsöjtsáziu' ga su' ibanu' biti' rizó'o o narugu ni'a no'o, en caléga nacuá' chopá no'o, en chopá ni'u ate' tsöjtsáziu' lu guí' gabilia le catu caz ulu. **9** Channö gun guiój lo' ga gunu' dul-la', guléaj le, en gurú'una le. Gácarö dxi'a quiu' tsöjtsáziu' ga su' ibanu', zoa tuz guiój lo', en caléga nacuá' chopá guiój lo', ate' tsöjtsáziu' lu guí' gabilia.

Jesúr rucúdzu'ë didza' que tu bö'cu' zxila' nanítiba'
(Lc. 15:3-7)

10 Gunné' ca' Jesúr:

—Guli'gún chi'i cuinli' para cabí uzóali'-bi' tsölä'alo tubi' bí'ido' caní. Neda' rea' libí'ilí', gubáz lá'ayi tapa chi'ë légacabi' nacuá'tica'së' lahuë' Xuza' zoë' yehua' yubá. **11** Bida' ni neda', Bönni' Guljë' Bönachi, para usölä' nu ni naniti.

12 ¿Nacxi rusáca'li' queëli'? Tu bönni', nacuá'aba' tu gayuá' bö'cu' zxila' queë', channö nítiba' tuba', ¿naru' cabí ucá'anë'-ba' tápatalaj yu' chénnaba' na', ate' tsejë' gapa naca lu guí'a, para tsöjtijë'-ba' bö'cu' zxila'do' na' nanítiba'?

13 Channö udzölinë'-ba', le nácatë rea' libí'ilí', udzéjarönë' ni'a queëba' bö'cu'

zxíla'do' na' ca gunë' quégacaba' ia'tápalalaj yu' chénnaba' ni' biti' gula'nítiba'.

¹⁴ Lësca' caní, Xúziru' Dios, zoë' yehua' yubá, biti' rë'ënë' nítibi' tubi' bfido' caní.

Car al-la' uniti loru' böchi' luzá'aru'

(Lc. 17:3)

¹⁵ Gunné' ca' Jesús:

—Channö böchi' luzó'o guá' dö' quiu', guyéajtsöca', en yöjcá'analenë' tsahui' la' libfisili'. Channö uzé náguië' li', chibuguél'u böchi' luzó'o. ¹⁶ Channö cabí uzé náguië' xtídz'u, guché'ë ia'túe' o ia'chopë' bönni' para urúaj li xtídz'u lógaquië' chop'a tsonné' bönni', nupa gaca ilún ba nalí que xtíza'li'. ¹⁷ Channö cabí uzé náguië' xtíza'gaquië', gudxi ca' bönnachi tu'dubi tu'sédi queë' Dios, en channö cabí uzé náguië' xtíza'gaca bönnachi na', ní'irö bönni' na' gáquië' quiu' ca tu bönni' biti' réajlé'ë Dios, en ca tu bönni' ruquízxjé' uláz que yödzö zi'tu'.

¹⁸ 'Le nácatë rea' libí'ili', yúgu'të le inná bë'ëli' lu yödzölió ni, naca le chigunná bë'ë Dios yehua' yubá, ate' yúgu'të le güí'ili' lataj lu yödzölió ni, naca le chibë'ë lataj Dios yehua' yubá.

¹⁹ 'Lësca' caní rea' libí'ili', channö chópasili' gun tuz xtíza'li' lu yödzölió ni ca naca tu le inábili'-në' Dios, gunë' Xuz caza' Dios, zoë' yehua' yubá, lë na' rinábili'-në'. ²⁰ Ga nacuá' chop'a tsonna nupa ni nudúbigaca quia' neda', zoa caza' neda' gatsaj láhu'lö ga na' nacu'ë.

²¹ Ní'irö gubigui'ë Pedro ga zoë' Jesús, en gunábinë' Lë', rnñë':

—Xan, ¿bál-laxité luzuí ral-la' uniti lahuá' böchi' luzá'a, nu na' ruá' dö' quia'? ¿Naru' gadxi luzuí?

²² Jesús rë' lë':

—Neda' rea' li', calégasö gadxi luzuí, pero idú tsónnalalaj yu' chi cuía le naca gadxi luzuí.

Jesús rucúdzu'ë didza' que tu bönni' huen dxin biti' buniti lahuë' luzë'ë

²³ Gunné' ca' Jesús:

—Ia'stú, ca gun Nu na' rinná bë' yehua' yubá naca ca benë' tu bönni' rinná bë'ë. Gú'unñë' ucá'analenë' tsahui' yugu' bönni' huen dxin queë'. ²⁴ Cate' gusí lahuë' rucá'analenë' légaquië' tsahui', dujuá'gaquië' ga zoë' tu bönni' ral-lë'ë queë' zián gayuá' dumí. ²⁵ Tu' cabí guca quizzxjé', gunná bë'ë xanë' idó'ogaquië' lë', en nigula queë', en yugu' bi'i queë', en yúgu'të le dë queë', ate' ní'irö gazxaj le ral-lë'ë queë' xanë' na'. ²⁶ Ní'irö bönni' huen dxin na' buzóa zzibë' lahuë' xanë', en gunábinë' lë', rnñë': "Xan, ben zxön ládxu'u neda'. Huaguixxaj caza' li' idutë." ²⁷ Ní'irö xanë' na' buéchi' ládxë'ë bönni' huen dxin queë' na', en buniti lahuë' lë' lë na' ral-lë'ë queë', ate' busanë' lë'. ²⁸ Cate' burúajë' bönni' huen dxin na', la' yöjtságatë' tu bönni' rúnlenë' lë' tsözxon dxin, ate' bönni' na' ral-lë'ë queë' láti'do'os dumí. Ní'irö guzxonë' lë', en guzxinnajë' yenë', ate' rë' lë': "Gudízxjatë lë na' ral-lu'u quia'." ²⁹ Ní'irö luzë'ë na' buzóa zzibë' lahuë', en gunaba yeché'ë lahuë', rnñë': "Ben zxön ládxu'u neda'. Huaguixxaj caza' li' idutë." ³⁰ Biti' gú'unñë' bönni' huen dxin na', ate' yöjlu'ë lë' lidxi güí'e dza quízxjarë' lë na' ral-lë'ë queë'. ³¹ Cate' bila'lë'enë' lë ni ia'zíca'rë' huen dxin, bulu'hui'mide'enë' ni'a queë', ate' yöjtixjö'i'guequinë' xángaquië' yúgu'të lë na' guca. ³² Ní'irö xángaquië' bulidzë' bönni' huen dxin na', ate' rë' lë': "Li', huen dxin catsahui'. Yúgu'të dumí na' gúl-lu'u quia' buniti lahu'a li'. Busúlua' lë na' gúl-lu'u quia' tu' gunaba yechu'u lahu'a". ³³ ¿Naru' cabí ral-la' huéchi' ládxu'u ca' luzó'o ca na' bena' neda', buéchi' ládx'a li'?"

34 Ní'irö guléde'enë' xanë', en budödë' lë' lu ná'agaca nupa ulu'saca' zi' lë' dza quízxjare' idútë le ral-lë'ë queë'.

35 Ní'irö rnnë' Jesús:

—Lësca' caní guné' Xuza' zoë' yehua' yubá queëli' channö cabí uniti lolí' idú ládxí'li' yugu' böchi' luzá'ali'.

19

Nupa tu'lá'a yöl-la' nutsaga na' (Mr. 10:1-12; Lc. 16:18)

1 Cate' budxi bë'ë Jesús yugu' didza' ni, buzë'ë luyú Galilea, ate' bidxinë' luyú Judea le dë ia'tsólá'a yegu Jordán saca' ga rilén gubidza. **2** Bönachi zián söjácalen Jesús, ate' bunë' léguequi ni'.

3 Ní'irö bila'dxinë' bal-lë' bönni' yudo' fariseo ga zoë' Jesús para ila'zí' bë'ë Lë', ate' gula'nábinë' Lë', ta'nnë':

—¿Naru' dë lataj bönni' nutsaga næ'ë usanë' nigula queë' tu' nözi bíti'tës bi raca?

4 Bubi'ë didza' Jesús, rë' légaquië':

—¿Naru' cabí nulábanili' le nazúaj lu guichi lá'ayi ca benë' Dios bönachi cate' si' benë' yödzölió? Bönni', en nigula benë' légaquië'. **5** Caní gunnë' Dios: "Que lë ni na', ral-la' usanë' tu bönni' xuz xinë'ë, ate' tsaz tsöjsóalenë'-nu nigula queë', ate' iropë'na' ulu'huoáquië' tuz bönachi." **6** Caní naca, bíti'rö nácagaquië' chopë' pero tuz bönachi chinuhuoáquië'. Que lë ni na', biti' ral-la' ulu'lë'ë bönni' nupa na' benë' Dios tuz.

7 Ní'irö bönni' yudo' na' gula'nábinë' Jesús, ta'nnë':

—¿Bizx que na' gunná bé'enë' Moisés légaquië' le ruí'i lataj nu bönni' unödzejë' tu guichi queënu nigula queë' le rnna nulá'a yöl-la' nutsaga na', ate' usanë'-nu nigula queë' na'?

8 Jesús rë' légaquië':

—Caní benë' Moisés tu' nazidi icja ládxí'do'oli'. Bennë' libí'ili' lataj usanli'-nu nigula queëli', pero cate' gusí lo guta' gurö'ö yödzölió, biti' guca caní. **9** Neda'rea libí'ili', channö tu bönni' usanë'-nu nigula queë', en biti' gudálenヌ bönni' yübölö, ate' utsaga ná'alenë'-nu nigula yübölö, gunë' dul-la' le riguitsaj xibá que yöl-la' nutsaga na'. Lësca' caní, channö nu bönni' utsaga ná'alenë'-nu nigula na', nusanë'-nu bönni' queënu, gunë' dul-la' le riguitsaj xibá que yöl-la' nutsaga na'.

10 Ní'irö yugu' bönni' usëda queë' Jesús gulë' Lë', ta'nnë':

—Channö caní naca queë' tu bönni' zóalenë'-nu nigula queë', gácarö dxi'a queë' la'tu' cabí utsaga caz në'ë, uga'anë' tuzë'.

11 Bubi'ë didza' Jesús, rë' légaquië':

—Biti' gaca ila'zí' lu ná'agaca yúgu'të bönachi didza' ni, pero núpasö na' Dios ruzéajni'inë' léguequi. **12** Nacu'ë bönni' biti' tu'tsaga ná'alengaquië' nigula tu' cabí nácagaquië' idú bönni' biguiú', tu' gulaljë' ca', ate' ia'zíca'rë' bönni' biti' tu'tsaga ná'alengaquië' nigula tu' bulu'zaga' bönachi xinózgaquië', ate' ia'zíca'rë' bönni' biti' tu'tsaga ná'alengaquië' nigula para gaca ilunë' xichinë' Dios, Nu rinná bë' yehua' yubá. Nu sequí' si' lu në'e didza' ni ral-la' si' lu në'e le.

Jesús rulidza tsáhuë'ë-bi' yugu' bíido' (Mr. 10:13-16; Lc. 18:15-17)

13 Ní'irö yugu' xuz xiná'agacabi' bí'ido' dujuá'agaquië'-bi' ga zoë' Jesús para ixóa në'ë légacabi', en ulidzë' Dios ni'a quégacabi', ate' bönni' usëda queë' bulu'zágui'ë xinözgaquië'. **14** Ní'irö Jesús rë'légaquië', rnnë':

—Gul'güi'-bi' yugu' bí'ido' lataj ila'dxinbi' ga zoa', en biti' uzágali' xinözgacabi', tu' ila'zí' lataj nupa nácagaca ca yugu' bí'ido' caní ga ni' rinná bë'ë Dios yehua' yubá.

15 Jesús guxóa në'ë légacabi', ate' ní'irö buzë'ë ni'.

*Tu bönni' unná bë' cuidi' dë yöl-la' tsahui' queë'
(Mr. 10:17-31; Lc. 18:18-30)*

16 Tu bönni' ni zoë' iz cuidi' queë' buduyúë' Jesús, en rë' Lë':

—Bönni' Usedi idú tsahui'. ¿Bizxi le naca tsahui' ral-la' guna' para gata' yöl-la' na'bán idú quia'?

17 Bubi'ë didza' Jesús, rë' lë':

—¿Naru' nöztseru' lë na' rnno' quia', rnno' naca' idú tsahui'? Cuntu nu bönni' náquië' idú tsahui'. Tuzë' Dios náquië' idú tsahui'. Channö rë'ënu' gata' yöl-la' na'bán idú quiu', ben ca rinná bë' xibá queë' Dios.

18 Ní'irö bönni' na' rë' Jesús, rnnë':

—¿Bízxilö xibá na'?

Jesús rë' lë':

—Xibá na' gunná bë'ë Moisés:

Biti' gútì' bönnachi.

Biti' gunu' dul-la' le riguitsaj xibá que yöl-la' nutsaga na'.

Biti' cuanu'.

Biti' innio' que böch'i' luzó'o le cabí nácate.

19 Ben bal xuz xinó'o.

Bidxi'i böch'i' luzó'o ca nadxi'i cuinu'.

20 Bönni' na' ni zoë' iz cuidi' queë' gudxe' Jesús, rnnë':

—Yúgu'të lë ni runa' ga gudela' naca' bí'ido'. ¿Naru' zoa ia'tú le ral-la' guna'?

21 Jesús rë' lë':

—Channö rë'ënu' gacu' tsahui', guyéaj, yöjeti' le dë quiu', ate' dumí na' si'u, bunödzaj quégaca bönnachi yechi'. Caní gata' yöl-la' tsahui' quiu' ni' yehua' yubá. Ní'irö gudá, gudá' neda'.

22 Cate' bönni' na' ni zoë' iz cuidi' queë' biyönnë' didza' ni, söhuöjë' ruhu'innë' tu' dëda' yöl-la' tsahui' queë'.

23 Ní'irö Jesús gudxe' yugu' bönni' usëda queë', rnnë':

—Le nácatë rea' libí'ili', böninga naca tsází' nu bönni' dë yöl-la' tsahui' queë' ga rinná bë'ë Dios yehua' yubá. **24** Ia'stú rea' libí'ili', nácarö böninga tsází' tu bönni' dë yöl-la' tsahui' queë' ga ni' rinná bë'ë Dios ca tödiba' bö'a lu nagui yötsi'.

25 Cate' bila'yönnë' yugu' bönni' usëda queë' didza' ni, bulu'báninë, ta'nnë':

—¿Nuzxi caz gaca ulá, channö?

26 Jesús buyúë' légaquië', en rë' légaquië':

—Biti' gaca ilún bönnachi lë ni, pero Dios huáca gunë' yúgu'të.

27 Ní'irö bubí'ë didza' Pedro, en rë' Jesús:

—Buyútsöca', netu' chibucá'anatu' yúgu'të, en zálentu' Li'. ¿Bízxirö gata' queëtu'?

28 Jesús rë' légaquië':

—Le nácatë rea' libí'ili', dza ni' cate' ucubi yödzölió, ate' cö'a inná bë'a neda', Bönni' Guljë' Bönachi, ga ni' gácatéra' lo, lësca' libí'ili' zálentli' neda' na'a, cö'öli'

chinnu lataj ga inná bë'ëli', en uchi'a usöröli' quégaca idxinnu cõ'të yödzö quégaca zxí'ini xi'soë' Israel. ²⁹ Nu bönni' rucá'anë' lidxë', o yugu' böchë'ë, o yugu' zanë', o xuzë', o xinë'ë, o nigula queë', o yugu' zxí'inë', o yugu' xiyúë', para gunë' xichina', bönni' ni si'ë ia'tú gäyua'tëro ca' queë', en gata' ca' yöl-la' na'bán idú queë'. ³⁰ Zián nupa nácagaca lo na'a, ulu'gá'ana cá'asö, ate' nupa nagá'anagaca cá'asö na'a, hualácagaca lo.

20

Rucúdu'ë didza' Jesùs ca tunë' bönni' huen dxin

¹Gunnë' ca' Jesús:

—Ca gun Bönni' na' rinná bë'ë yehua' yubá naca ca benë' tu bönni' xan yu'u. Birúajë' zílado', yöjdiljë' yugu' bönni' ilunë' dxin ga naca lu xiyúë' ga na' nadúzgaca lubá uva. ² Cate' chibugá'analenë' tsahui' yugu' bönni' huen dxin na', quizxjë' légaquië' tu dumí lazzaj que tu dza, gusöl-lë'ë légaquië' ilunë' dxin ga naca lu xiyúë'. ³ Cate' burúajë' idú xsila, bilé'enë' ia'zica'rë' bönni' nacuá'asë' ca' ga naca lu yë'ëyi. ⁴ Rë' légaquië': "Guli'tséaj ca' libí'ili' ga naca lu xiyúa', ate' quizxja' libí'ili' le naca tsahui'." La' yójácatë' ca' légaquië'. ⁵ Burúajë' bönni' xan yu'u na' leyúbólö idú huagubidza, enca' idú xihuö' udzö', en la' tuz ca benë', gusöl-lë'ë yugu' bönni' yójaxáquië' lu xiyúë'. ⁶ Burúajë' ca' cate' ni' zoa ia'láti'do'os gubidza, en yójaxáquië' ia'zica'rë' bönni' nacuá'asë' ca' ni', ate' rë' légaquië': "¿Bizx que zóatsali' ni cá'asö idú dza, biti' bi dxin runli?" ⁷ Yugu' bönni' na' té' lë', ta'nnë': "Cuntu nu benna xichintu." Ní'irö rë' légaquië': "Guli'tséaj ca' libí'ili' ga naca lu xiyúa', ate' quizxja' libí'ili' le naca tsahui'." ⁸ Cate' chizóá gal-la, bönni' xan yu na' rë' bönni' yu'u lu në'ë yugu' huen dxin na', rnnë': "Bulidza yugu' bönni' huen dxin na', ate' gu'u lázzjagaquië'. Quizxju' zí'alö yugu' bönni' na' bila'dxinë' yójsetë. Udxia' na' quizxju' yugu' bönni' na' bila'dxinë' zí'atëlö." ⁹ Ní'irö bila'dxinë' bönni' yójéngäquië' dxin cate' ni' zoa ia'láti'do'os gubidza, en gula'zi'ë tu tuhuéajë' dumí lazzaj que tu dza. ¹⁰ Cate' bila'dxinë' bönni' yójéngäquië' dxin zí'atëlö, guléquinë' huazi'gaquië' ia'lati', pero lëscá' gula'zi'ë tu tuhuéajë' dumí lazzaj que tu dza. ¹¹ Cate' gula'zi'ë le, gula'nnëdë'ë queë' bönni' xan yu'u na', ¹² ta'nnë': "Yugu' bönni' ni bila'dxinë' ga yójsetë, tu ch'isö' gulunë' dxin, en tuz ca gudízxjatso' légaquië' ca netu', ate' netu' ni bentu' dxin idú dza, en gúguida'atu' gubidza." ¹³ Bubi'ë didza' xan yu na', en rë' tuë': "Böcha'a, biti' bi runa' quiu' le cabí naca tsahui'. ¿Naru' cabí bugá'ana tsáhui'ru' si'u tu dumí lazzaj que tu dza? ¹⁴ Guzxí' lazzju', en böaj lidxu'. Neda' rë'ënda' quizxja' bönni' ni yöjenë' dxin ga yójsetë la' leze ca na' riguizxja' li'. ¹⁵ ¿Naru' cabí dë lu na'a guna' ca rë'ënda' len le nequi quia'? ¿Naru' ruzxé'etseñu'-në' luz'o tu' rúnnada'a queë'?" ¹⁶ Caní naca, bal-lë' bönni', tu'cá'ana böñachi légaquië' cá'asö, ilácagaquië' lo, ate' ia'zica'rë' bönni', nácagaquië' lo na'a, ulu'gá'anë' cá'asö. Zián nupa nulidza', pero nabábasö nupa narögaca.

Riguíjö'ë Jesùs leyúbólö ca si' ilútië' Lë'

(Mr. 10:32-34; Lc. 18:31-34)

¹⁷Cate' ni' yu'ë Jesùs nöza, sa'yéajë' Jerusalén, guchë'ë quez idxinnutë' bönni' usëda queë', en rë' légaquië':

¹⁸—Buli'yútsöca', ribenru' zéajru' Jerusalén, ate' ni' soa nu udödi neda', Bönni' Guljë' Bönachi, lu ná'agaquië' bixúz unná bë', en lu ná'agaquië' bönni' yudo' usëdi, ate' ila'chúguië' quia' gátia'. ¹⁹ Ulu'dödë' neda' lu ná'agaquië'

bönni' zi'tu' para ulu'titjë' neda'. Ila'guinë' neda', en ulu'dë'ë neda' lë'e yaga cruz, pero cátē' gaca tsonna dza, Dios usubanë' neda' lu yöl-la' guti.

*Le gunábanu xiná'agaquië' Jacobo, en Juan
(Mr. 10:35-45)*

²⁰ Ní'irö bidxinnu xiná'agaquië' Jacobo, en Juan, yugu' zxí'inë' Zebedeo, ga zoë' Jesús, dzágagaquië'-nu chopë' ni, ate' buzúa zxíbinu lahuë' Jesús, en gunábinu Lë' tu le uzá' ládxë'ë queënu. ²¹ Jesús gunábinë'-nu, rnñë':

—¿Bizxi rë'ënú?

Rënu Lë':

—Gunná bë' cō'öbi' tubi' zxí'ina' ni cuita lë'u ibëla, en ia'tubi' cō'öbi' cuita lë'u yögöla ga ni' inná bë'u.

²² Bubi'ë didza' Jesús, rë' légaquië':

—Biti' nözili' le rinábalí'. ¿Naru' huáca guá' ilenli' le qui'i saca' neda', en idílalí' nisa ca idila' neda' nisa, gátia'?

Të' Lë':

—Huácatu'.

²³ Ní'irö Jesús rë' légaquië':

—Le nácatë le ral-la' qui'i saca'a neda', gaca ca' queëli', en le ral-la' idila' neda' nisa, gátia', idílalí' ca' nisa libí'ili', pero que cō'öli' cuita lë'a ibëla o cuita lë'a yögöla, biti' dë lu na'a nu gu'a que, pero gata' quégaca nupa ni' chinupë'ë Xuza' quéguequi.

²⁴ Cate' ia'chië' bönni' usëda queë' Jesús bila'yönnë' lë ni, gula'lenë'. ²⁵ Ní'irö Jesús bulidzë' légaquië', rnñë':

—Nözquézilí' ca tunë' yugu' bönni' ta'nná bë'enë' bönnachi izá'a, ridödítë bë' ta'nná bë'enë' légaquië', ate' nupa ni' nácagacarö lo ta'nná be'e la' luzë'eguequisö. ²⁶ Biti' gaca caní queëli'. Núti'tëslöli' libí'ili' nu rë'ënì gaca zxön ga zóali', nu ni ral-la' gun dxin que ia'zíca'röli'. ²⁷ Lësca' caní, núti'tëslöli' libí'ili' nu guë'ëni gaca lo, ral-la' gaca ca tu bönni' nadó'o que ia'zíca'röli'. ²⁸ Lësca' neda', Bönni' Gulje' Bönnachi, bida' ni, caléga para nu gun xichina', pero para guna' xichíngaca bönnachi, en udöda' yöl-la' na'bán quia', le quízxjada' ni'a quégaca bönnachi zián para ulu'lágaca.

Ruúnë' Jesús chopë' bönni' nachul-la lógaquië'

(Mr. 10:46-52; Lc. 18:35-43)

²⁹ Cate' ni' tu'rúajë' yödzö Jericó, bönnachi zián söjácalen Jesús. ³⁰ Nacu'ë chopë' bönni' nachul-la lógaquië' ni', rö'gaquië' ra' nöza. Cate' bila'yönnë' ridödë' Jesús ni', gulu'ë zidzaj didza', ta'nnë':

—Xan, zxí'ini xi'sóë' David, buéchi' ladxi' netu'.

³¹ Bönnachi zián nacuá' ni' gulë légaquië' ila'cu'ë dxisö, pero zídzajrö gulu'ë didza', ta'nnë':

—Xan, zxí'ini xi'sóë' David, buéchi' ladxi' netu'.

³² Ní'irö guzë' ribözë' Jesús, en bulidzë' légaquië', ate' gunábinë' légaquië', rnñë':

—¿Bizxi rë'ënili' guna' queëli'?

³³ Të' Jesús:

—Xan, rë'ëntu' gunu' ga huöálaj guiój lotu'.

³⁴ Ní'irö Jesús buéchi' ládxë'ë légaquië', ate' gudanë' guiój lógaquië'. La' böáljatëgaca guiój lógaquië', ate' yöjácalenë' Jesús.

21

*Ridxinë' Jesús yödzö Jerusalén len yöl-la' ba zxön
(Mr. 11:1-11; Lc. 19:28-40; Jn. 12:12-19)*

1 Cate' bila'dxíngalë' yödzö Jerusalén, en ni' nacu'ë ga dë yödzö Betfagé ga na' zoa Guí'a Yaga Olivo, ní'irö gusöl-lé'ë Jesús chopë' bönni' usëda queë', **2** ate' rë' légaquië':

—Guli'tséajtsöca' yödzödo' ni' ca dödilö ga ni zóaru', ate' la' tsöjxáca'téli'-ba' tuba' burro guná' nága'ba', ate' dzaga lëba' tuba' burro biguiú'do'. Guli'tsöjsedxi'-ba', en ichë'eli'-ba' quia' ni'. **3** Channö nu bi guié libí'ili', guli'guíë nu na': "Xanru' riquinnë'-ba'." Ní'irö isöl-lé'ë légacaba' quia'.

4 Caní guca para gaca lë na' buzúajë' lu guichi bönni' bë'ë didza' uláz queë' Dios, gunnë':

5 Guli'guíë nupa nacuá' yödzö Sión,
Buli'yütsöca', zë'ë Bönni' inná bé'enë' libí'ili'.

Lu yöl-la' nöxaj ladxi' queë' dxíë'-ba' tuba' burro.

Dxié' cúdu'ba' búrrodo' nácabá' zxí'ini'ba' böa' ruá'aba' yua'.

6 Ní'irö bönni' usëda queë' yöjáquië' ni', ate' gulunë' ca na' gunná bé'enë' Jesús légaquië'. **7** Gula'chë'-ba' burro guná' na', en burro biguiú'do' na', ate' bulu'dxíë' cúdu'gacaba' yugu' lari' guitsa' quégäquië', ate' gudxíë' Jesús lahui' lari' na'. **8** Nacuá' ca' bönachi zián ni', ate' gula'chilaj yugu' lari' ta'xoa cúdu'guequi la' nöza. Ia'zíca'rë' bulu'chibë' zin le bulu'zxóë' ga naca la' nöza. **9** Gulu'i zidzaj didza' bönachi na' nanörugaca, en nupa na' sójácalen Jesús, ta'nná:

—¡Yöl-la' ba Lë', zxí'ini xi'sóë' David! ¡Bica' ba nu ni za' ni'a que Lë' Xanru'! ¡Yöl-la' ba Dios!

10 Cate' guyázië' Jesús yödzö Jerusalén, bulu'dzatsa yúgu'të bönachi lu yödzö na', ate' zián nupa gulé' luzë'eguequi, ta'nná:

—¿Nuzxi caz bönni' ni?

11 Ia'bal-la bönachi ni' ta'nná:

—Nu ni Jesús, bönni' ru'ë didza' uláz queë' Dios, ate' naca ladzë' Nazaret luyú Galilea.

*Jesús rulatjé' lö'a yudo'
(Mr. 11:15-19; Lc. 19:45-48; Jn. 2:13-22)*

12 Cate' guyázië' Jesús lö'a yudo' queë' Dios, bulágui'ë ní'ilö yúgu'të nupa tuti' to'o ga naca lös'a yudo' na'. Burixë' ca' yugu' blaga quégäquië' bönni' tu'tsë'ë dumí yödzö zi'tu', en yugu' le ta'bö'i nupa tuti' gu'dödo'. **13** Rë' légaquië':

—Nazúaj lu guichi lá'ayi le rnna: "Lidxa' si'i le, yu'u ga nu ulidza Dios", pero libí'ili' chinunli' lataj ni ca naca yu'u lídxigaca gubán.

14 Cate' ni' zoë' Jesús chila yudo', bal-lë' bönni' nachul-la lógaquië', en bönni' biti' raca ila'zë'ë bila'dxinë' ga na' zoë', ate' Lë' bunë' légaquië'. **15** Gula'lenë' yugu' bixúz unná bë', en bönni' yudo' tu'sédinë' cate' bila'lé'enë' yugu' yöl-la' huáca ni runë' Jesús, en bila'yönnë' tu'ibi' bi'ido' zidzaj didza' ga naca chila yudo', ta'nnabi':

—¡Bica' ba Lë', zxí'ini xi'sóë' David!

16 Ní'irö të' Jesús:

—¿Naru' cabí riyönnu' ca ta'nnabi' bi'i ni?

Bubi'ë didza' Jesús, rnnë':

—Ön, riyönda'. ¿Naru' catu caz nulábanili' le nazúaj lu guichi lá'ayi caní caz ral-la' gaca? Caní rnna: "Li' benu' ga yugu' bí'i cuidi', en yugu' bí'ido' ni' tádxí'bi' gulúl-labí' yöl-la' ba le naca idú."

¹⁷ Ní'irö Jesúś bucá'anë' légaquië', ate' burúajë' Jerusalén. Guyijë' yödzö Betania ga ni' bugá'anë' idú yëla.

*Jesús rulidza zi'ë yaga higo
(Mr. 11:12-14, 20-26)*

¹⁸ Cate' za' rení', ate' ni' söhuöjë' Jesúś Jerusalén, ridunë'. ¹⁹ Bilé'enë' tu yaga higo rö' gal-la' cuite nöza, ate' gubígu'ë ga na' rö', pero biti' bi bidzölinë' lu yaga na'. Xilágui'sö dxiá. Ní'irö Jesúś gudxë' le:

—Biti'rö cuia le ribía quiu'.

La' gubídxíté yaga higo na'. ²⁰ Cate' bila'lé'enë' bönni' usëda queë' lë ni, bulu'báninë', ate' gula'nábinë' Jesúś, ta'nnë':

—¿Nacxi caz guca, gubídxíté yaga ni?

²¹ Bubi'ë didza' Jesúś, rë' légaquië':

—Le nácaté rea' libi'ilí, channö tséajlé'ëli' Dios, en biti' gaca chopá ládxí'li', calégasö huáca gunli' ca na' bena' que yaga ni, pero channö guiéli' guí'a ni: Gucuítá, en yöjsöalu nísado', gaca ca na' innali'. ²² Lësca' caní, yúgu'të le inábali' cate' ulídzali'-në' Dios, channö huayéjlé'ëli' gunnë' Dios queéli', huazí'ilí' lë na' inábali'.

*Yöl-la' unná bë' dë lu në'ë Jesúś
(Mr. 11:27-33; Lc. 20:1-8)*

²³ Ní'irö guyázië' Jesúś chila yudo', ate' tsanni ni' rusédinë' böñachi nacuá' ni', bila'dxinë' yugu' bixúz unná bë' len bönni' gula tu'zéajni'inë' ga zoë', ate' gula'nábinë' Jesúś, ta'nnë':

—¿Bizxi yöl-la' unná bë' dë lu no'o, runtso' yugu' lë ni? ¿Nuzxi budödi lu no'o yöl-la' unná bë' ni?

²⁴ Bubi'ë didza' Jesúś, rë' légaquië':

—Lësca' neda' inábatsöqui'da' libi'ilí' tu didza'. Channö quíxjöi'ilí' neda' ca naca, neda' ca' guía' libi'ilí' bizxi yöl-la' unná bë' dë lu na'a runa' caní. ²⁵ ¿Nuzxi caz gusöl-la' Juan para buquile' böñachi nisa? ¿Naru' Dios gusöl-lë'ë lë', o gula'sö'l-lë'ë yugu' bönni' lë?

Ní'irö gula'sí lógaquië' bönni' yudo' na' ta'nnë' la' légacasë':

—Channö innaru': Dios gusöl-lë'ë lë', la' guiétë' rë'u: "¿Bizx que biti' guyéajlé'ëli' lë?" ²⁶ Na'a, channö innaru': Gula'sö'l-lë'ë yugu' bönni' lë', rádxiru' le ilún böñachi lu yödzö tu' ta'yéajlé'ë yúgu'të Juan na' bë'ë didza' uláz queë' Dios.

²⁷ Que lë ni na' bulu'bi'ë didza', të' Jesúś:

—Biti' nöztu'.

Jesúś rë' légaquië':

—Neda' ca', biti' guía' libi'ilí' bizxi yöl-la' unná bë' dë lu na'a runa' lë ni.

Rucúdu'ë didza' Jesúś ca gulinbi' chópabi' zxí'inë' tu bönni'

²⁸ Ní'irö Jesúś gudxë' yugu' bönni' yudo' na':

—¿Nacxi rusáca'li' queéli'? Guzoë' tu bönni' nacuá'abi' chópabi' bí'i bönni' queë', ate' yöjödxé'-bi' tubi' bí'i queë' na', gunnë': "Zxí'ina', guyéaj na'a tsójenu' dxin ga naca luyu' quia' ga rö'gaca lubá uva." ²⁹ Bubíibi' didza' bí'i na', gúdxibi'-në': "Biti' rë'ënda' tseja'." Gudödi ni' bubíi ládxí'bi', ate' yöjenbi' dxin.

³⁰ Ní'irö bönni' na' yöjödxé'-bi' ia'tubi' bí'i queë' na', en la' tuz ca gunnë', ate'

bubí'ibi' didza' bi'i ni, gúdxibi'-në': "Huaca, Dad. Uyéaja'." Biti' guyéajbi' bi'i ni.³¹ ¿Núzxilöbi' bi'i chopá ni benbi' le guyaza ládxë'ë xúzibi'?

Bulu'bi'ë didza', tē' Jesús:

—Bi'i zí'aló na'.

Ní'irö Jesús rë' légaquië:

—Le nácatë rea' libí'ili', ila'nóruë' bönni' uquízxaj tuá' dö', en yugu' nigula udá dzaga ca libí'ili', ate' ila'yázíë' ga ni' rinná bë'ë Dios.³² Caní gaca, tu' bidë' Juan, bönni' buquile' bönachi nisa, ga zóali', en busédinë' libí'ili' le naca tsahui' ca ral-la' gunli', ate' libí'ili' biti' guyéajlé'ë'lí' lë', pero yugu' bönni' uquízxaj, en yugu' nigula udá dzaga gula'yéajlé'ë'lí' lë'. Sal-la' bille' elí' lë ni, biti' bubí'iládxíli' para tséajlé'ë'lí' lë'.

Rucúdzu'ë didza' Jesús ca bénagaquië' bönni' huen dxin biti' nácagaquië' tsahui'
(Mr. 12:1-12; Lc. 20:9-19)

³³ Gunné' ca' Jesús:

—Buli'zé nágali' ia'tú le ucúdzu'a didza'. Guzóë' tu bönni' xan yu'u, ate' bönni' ni budë'ë yugu' lubá uva luyú queë'. Guléquië' lë'aj que, en guchö'önë' tu lerui guiój ga isié' xisi uva na'. Bené' ca' tu yu'u xitsá' ga gaca nu uyú idúte luyú queë'. Ní'irö budödë' luyú na' lu ná'agaquië' bönni' huen dxin, para ila'zi'ë quégaquië' gatsaj huéaj, ate' sa'yéaje' yödzö zi'tu'.

³⁴ 'Cate' chibidxín dza ulu'chibë' yugu' lubá uva na', gusöl-lë'ë bönni' xan luyú na' bal-lë' ni'a né'ë ga na' nacu'ë bönni' huen dxin ni' para ulu'zi'ë lu ná'agaquië' uláz queë'.³⁵ Ní'irö gula'zönë' bönni' huen dxin na' yugu' ni'a né'ë na'. Gulunë' huë' tuë', en ia'túë' bëtigaquië' lë', en ia'túë' bulu'ladxë' lë' guiój.³⁶ Leyúbólö bönni' xan luyú na' gusöl-lë'ë ca' ia'zíca'rë' ni'a né'ë, ate' guláquië' ziánterë' ca nupa na' gusöl-lë'ë zí'aló, ate' la' tuz ca gulunë' bönni' huen dxin ni' quégaquië'.

³⁷ 'Ga yøjsete, gusöl-lë'ë ca' zxí'inë' ga na' nacu'ë. Guzá' ládxë'ë, rnñë': Hualunë' bal bi'i quia'.³⁸ Cate' yugu' bönni' huen dxin na' bila'lé'enë'-bi' zxí'inë', la' gula'nnatë' la' légacasë': "Bi'i ni guequi queëbi' luyú ni. Guli'dá, gútiru'-bi', ate' le ral-la' guequi queëbi' guequi queëru'."³⁹ Ní'irö gula'zönë'-bi', ate' bulu'béajë'-bi' ní'ilö luyú ga na' rö'gaca lubá uva, ate' bëtigaquië'-bi' ni'.

⁴⁰ Ní'irö Jesús gunábinë' légaquië', gunnë':

—Cate' udxinë' bönni' xan luyú na', ¿nacxi gunë' quégaquië' bönni' huen dxin ni'?

⁴¹ Bulu'bi'ë didza' bönni' yudo' na', tē' Jesús:

—Usunítie' bönni' tuá' dö' na', ate' luyú queë' na' udödë' lu ná'agaquië' ia'zíca'rë' bönni' huen dxin, bönni' ilu'ë lë' uláz queë' cate' idxín dza ulu'chibë' le.

⁴² Ní'irö Jesús gudxë' légaquië':

—¿Naru' catu caz nulábanili' lë na' nazúaj lu guichi lá'ayi ca naca lë ni? Caní rnña:

Guój na' gula'rú'unë' bönni' tu'cu'ë zö'ö,

la' guój ná'asö chinaca guijoj len zö'ö.

Lë cazë' Xanru' benë' ga naca caní,

ate' naca tu le run ga rubániru'.

⁴³ 'Que lë ni na' rea' libí'ili', xilátjali' ga na' rinná bë'ë Dios idúa queëli', en gata' quégaca bönachi ilún ca ral-la' gun nu nadeli' lataj ni'.⁴⁴ Nu tsöjchegu' lu

guiōj ni, la' cuinsi quitsaj, ate' channō guiōj ni tseajbaga' bönni' na', uzxuzxaj le'.

⁴⁵ Cate' yugu' bixúz unná bë', en yugu' bönni' yudo' fariseo bila'yönnë' lë na' bucúdzu'ë didza' Jesús, téquibe'enë' bë'ë Jesús didza' ca naca quégacië'.

⁴⁶ Gula'zóa gula'bö'ë ila'zönë' Jesús, pero guládxinë' bi ilún bönnachi zián nacuá' ni' tu' ta'yéajlé' náquië' Jesús bönni' ru'ë didza' uláz quee' Dios.

22

Rucúdzu'ë didza' Jesús ca naca que laní que yöl-la' rutsaga na'

¹ Jesús bë'lenë' légaquië' didza' leyúbölö, ate' bucúdzu'ë didza', rnnë':

² —Ca gaca quégaca nupa ila'yaza ga rinná bë'ë Dios yehua' yubá naca ca guca quégaca nupa bulidzë' tu bönni' rinná bë'ë cate' benë' laní que dza utsaga ná'abi' bi'i bönni' queë'. ³ Gusöl-lë'ë ni'a në'ë tsöjxí'gaquië' yugu' bönni' chinulidzë' para guídagaquië' laní queëbi', pero biti' gulë'ënë' guídagaquië'. ⁴ Ní'irö gusöl-lë'ë ia'zica're' ni'a në'ë, en gudxë' légaquië': "Guli'tsójödxitsöca' nupa na' chinulidza', na' güielí' légaquië': Buli'yútsöca', chinupá'a la' huagu. Chibëtia'-ba' yugu' xpédxa', en yugu' bö'ë bëdxí renni' quia'. Yúgu'të chinupá'a. Guli'dá, sóaru' laní queëbi' bi'i bönni' quia' utsaga ná'abi'." ⁵ Yugu' bönni' na' yöjlídzagaquië' biti' gulunë' légaquië' bal, ate' yöjáquië' que queëgaquië'. Tuë' yöjenë' dxin, en ia'tué' guyijë' tsöjö'ù tsöjëti'ë. ⁶ Ia'zica're' gula'zönë' yugu' ni'a në'ë na', ate' gulu'ë dö' quégacië', en bëtgaquië' légaquië'. ⁷ Cate' bönni' na' rinná bë'ë biyönnë' lë ni, gulénë', en gusöl-lë'ë yugu' bönni' queë' rójáquië' gudil-la, ate' bëtgaquië' yugu' bönni' hueti bönnachi na', en bulu'quéli'ë guí' lâdzagaquië'. ⁸ Ní'irö bönni' na' rinná bë'ë gudxë' yugu' ni'a në'ë, gunnë': "Le nácaté chinupá'a que laní na', pero yugu' bönni' bulidza' biti' guláquië' lesaca' guídagaquië' laní quia'. ⁹ Guli'tséajtsöca' gapa naca la' nöza, en buli'lidza yúgu'të nupa tsöjxáca'li' ni' para guídagaca laní queëbi' bi'i bönni' quia' utsaga ná'abi'." ¹⁰ Ní'irö bila'rúaje' ni'a në'ë na', söjáquië' gapa naca la' nöza, ate' bulu'tubë' yúgu'të nupa yöjxáca'gaquië', yugu' bönni' dxi'a, en yugu' bönni' tuá' dö', ate' ga na' raca laní bilirö bönnachi.

¹¹ 'Cate' guyázië' bönni' na' rinná bë'ë para uyúë' nupa ni' nudúbigaca, bilé'enë' tu bönni' biti' nácué' lari' tsahui' le bunödzjë' quégacië' bönni' nacu'ë laní na'. ¹² Ní'irö gudxë' bönni' na': "Bönni'do', ¿zóatso' ni, en biti' nacu' lari' tsahui' bunödzja' quégaca nupa nacuá' laní?" Bönni' na' busayaj ru'ë. ¹³ Ní'irö bönni' na' rinná bë'ë gudxë' nupa na' tun xichinë', gunnë': "Guli'guga' ni'a në'ë bönni' ni. Guli'tsójchú'un-né' ni'ilö ga na' rö'ö chul-la. Ni' cödxë', en utila láyë'ë, lu yöl-la' ruhu'ini queë'."

¹⁴ Ní'irö Jesús gudxë' légaquië':

—Zian nupa nulidza', pero nabábasö nupa ila'rögaca.

Jesús ru'ë didza' ca naca le riguízxaj lázaru'

(Mr. 12:13-17; Lc. 20:20-26)

¹⁵ Ní'irö yugu' bönni' yudo' fariseo na' bulu'zë'ë ni', ate' gulún xtídz'a'gaquië' ilunë' ga bi innë' Jesús para gaca ulu'zégu'ë Lë' didza'. ¹⁶ Para ilunë' caní, gula'sól-lë'ë bal-lë' bönni' dä'gaquië' légaquië', len bönni' dä'gaquië' Herodes, ga zoë' Jesús, nupa na' gulë' Jesús:

—Bönni' Usedi, nöztu' Li' ru'u didza' cátëze naca, en naca idútë li ca rusédinu' ca naca queë' Dios, en biti' rui'i lâdxu'u le ta'nná qui' bönnachi, tu'

cabí ruchi'a rusöröu' bönnachi ca naca le ta'nnasö bönnachi na'. ¹⁷ Gudiixjöi'i netu'. ¿Nacxi runi li'? ¿Naru' run bayudxi, o biti' run bayudxi quizzaj laztu' queë' César, bönni' yödzö zi'tu' na' rinná bé'enë' rë'u?

¹⁸ Réquibe'enë' Jesús té'ënnë' ulu'béaje' Lë' didza', ate' gudxë' légaquië':

—Libi'ilí, bönni' rulu'isö tsahui' cuinli', ¿bizx que ruí'ilí didza' le ruzóa neda' ra' guí'a? ¹⁹ Buli'lui'i neda' dumí le riguízxaj lázali'.

Ní'irö bulu'lui'inë' Lë' tu dumí que yödzö Roma. ²⁰ Jesús gunábinë' légaquië', rnneë':

—¿Nuzxi lahui da' ni, en nuzxi le nazúaj lë'e dumí ni?

²¹ Të' Lë':

—Queë' César na'.

Ní'irö Jesús gudxë' légaquië':

—Guli'guízxjë' César le nequi queë' César, ate' Dios le nequi queë' Dios.

²² Cate' bila'yönnë' lë ni, bulu'báninë' ca naca didza' tsahui' bubí'ë Jesús, ate' bulu'cá'anë' Lë', sôhuðajtëgaquië'.

Ta'nabi yúdxinë' Jesús ca ulu'bán nupa chinátigaca

(Mr. 12:18-27; Lc. 20:27-40)

²³ La' dza ná'asö yugu' bönni' yudo' saduceo, bönni' na' ta'nnë' biti' ulu'bán nupa chinátigaca, bila'dxinë' ga zoë' Jesús, ate' gula'nábinë' Lë', ²⁴ ta'nnë':

—Bönni' Usedi, Moisés gunnéë: "Channó gátië' tu bönni' zóanu nigula queë', en cuntu nu bi'i zóabi' queë', ní'irö bi'i böchë'ë bönni' na' ral-la' utsaga ná'aleni'nu nigula uzëbi queë', para cabí inití di'a dza queë' bönni' böchi'bi' na'." ²⁵ Gula'cuá'abi' gadxi bi'i bönni' ga zóatu', naca böchi'gacabi'. Bi'i zí'alo na' butsaga ná'aleni'nu nigula, ate' gütitëbí'. Tu' cuntu nu bi'i queëbi' zóabi', bi'i buropi na' butsaga ná'aleni'nu nigula uzëbi queëbi' bi'i böchi'bi' na'.

²⁶ Lësca' caní guca queëbi' bi'i buropi na', enca' queëbi' bi'i bunni, en la' tuz ca guca quégacabi' igádxitëbí', gulatíbi' yúgu'tëbí'. ²⁷ Ga búdxítë gútinu ca' nigula na'. ²⁸ Cate' idxín dza ulu'bán nupa chinátigaca, ¿núzxilögacabi' bi'i gadxi ni' guéquinu nigula na' queëbi', tu' bulu'tsaga ná'aleni'nu yúgu'tëbí' nigula na'?

²⁹ Ní'irö bubí'ë didza' Jesús, ate' rë' légaquië':

—Nachíxíl' libí'ili' tu' cabí réajní'ili' le nazúaj lu guichi lá'ayi, en tu' cabí núnbehé'ili' yöl-la' huáca queë' Dios. ³⁰ Cate' idxín dza ulu'bán nupa chinátigaca, bíti'rö gaca yöl-la' rizóalen nigula, en biti' ulu'tsaga ná'agaquië', pero gácagaquië' ca nácagaquië' gubáz lá'ayi queë' Dios nacu'ë yehua' yubá. ³¹ Ca na' ral-la' ulu'bán nupa chinátigaca, ¿naru' cabí nulábanilí lë na' gudxi cazë' Dios libí'ili'? ³² Caní gunnéë: "Neda' naca' Dios queë' Abraham, en Dios queë' Isaac, en Dios queë' Jacob." Dios na' biti' náquië' Dios quégaca nupa nátingaca tsaz, pero náquië' Dios quégagaquië' bönni' ni nabángagaquië' sal-la' gulatië'.

³³ Cate' bila'yöni bönnachi nacuá' ni' didza' ni, bulu'bani ca naca lë na' rusédinë' Jesús léguequi.

Xibá queë' Dios le naca lo

(Mr. 12:28-34)

³⁴ Cate' guléquibe'enë' bönni' yudo' fariseo ca benë' Jesús, busayjë' ruá'agaquië' bönni' yudo' saduceo, ní'irö bulu'dubë' yúgu'të'. ³⁵ Tuë' bönni' nútse'ë lädjagaquië', en nazëdë' xibá queë' Moisés, gú'unneë' si' bë'ë Jesús.

³⁶ Que lë ni na' gunábinë' Jesús, rnneë':

—Bönni' Usedi, ¿bízzilö xibá queë' Dios naca lo?

37 Jesús rë' lë':

—Idxi'inu' Xanu' Dios idú ládxu'u, en idú icja ládxi'do'o, enca' len idú yöl-la' réajni'i quiu'. **38** Xibá ni naca lo, en nazáca'térö. **39** Xibá na' naca buropi, la' ca nácatë, en caní rnna: "Idxi'inu' böchi' luzó'o ca nadxi'i cuinu'." **40** Chopa xibá ni nácagaca ga röjlöz yúgu'të le rinná bë' xibá queë' Dios, en yúgu'të le bulu'sédinë' bönni' gulu'ë didza' uláz queë' Dios.

¿Nuzxi zxí'ini náquië' Cristo?

(*Mr. 12:35-37; Lc. 20:41-44*)

41 Tsanni ni' nacu'ë tsözxön bönni' yudo' fariseo na', Jesús gunábinë' légaquië', **42** rnñë':

—¿Nacxi rusáca'lì' queëli' queë' Bönni' na' lë' Cristo? ¿Nuzxi zxí'ini náquië'? Bulu'bí'ë didza', ta' nnë':

—Zxi'ini xi'sóë' David náquië'.

43 Ní'irö Jesús rë' légaquië':

—¿Bizx que na' lë' cazë' David bulidzë' Lë', gunnë': "Xana"”? Caní gunnë' cate' ni' bë'ë didza' uláz queë' Dios Bö' Lá'ayi, gunnë':

44 Xanru' Dios gudxë' Xana':

"Gurö'ö cuita lë'a ibëla,

cate' gunra' ga ulu'zechu zxibigaca Lo' nupa tequi Li' zi'."

45 Channö David na' gunnë' queë' náquië' Xanë', ¿nacxi caz naca, rnñali' náquië' zxí'ini xi'sóë' David na'?

46 Cuntu nu guca ubí'i didza', ate' ga gusí lo dza na', cùnturö nu burugui bi inábini Lë'.

23

Jesús ruzégui'ë yugu' bönni' yudo' didza'

(*Mr. 12:38-40; Lc. 11:37-54; 20:45-47*)

1 Ní'irö Jesús bë'lenë' böñachi nacuá' ni' len yugu' bönni' usëdi queë' didza'.
2 Rë' légaquië':

—Yugu' bönni' yudo' fariseo, en yugu' bönni' yudo' usedi nuhuöázagaquie' xilatjë' Moisés, en tu'sédinë' böñachi. **3** Que lë ni na', guli'gún yúgu'të le ilë' libí'lli', pero biti' gunli' libí'lli' ca na' tunë' légaquië', tu' tu le ta'nnë', en ia'tú le tunë'. **4** Le ta'nná bë'enë' böñachi naca ca tu yua' zi' le cabí sequi' nu guá', ate' tu'gu'ë le ya'zxícjagaca böñachi, pero légaquië' biti' té'ennë' ulu'tenë' le, calëga len tuze xibön ná'agaquie'. **5** Yúgu'të le tunë', tunë' para ila'lë'e böñachi légaquië', tu' tunë' zxön le tûgui'ë yen ná'agaquie', en ra' xigágaquie' ga na' nuzúajagacië' tu' le nazúaj lu guichi lá'ayi, en tu'tunnë' luzxi lari' náculaquie'. **6** Té'ennë' ila'bö'ë ga naca lataj lo ga na' tu'dubë' tahuë', enca' ga na' naca lataj lo lu yu'u ga tu'dubë' tu'sédë' queë' Dios. **7** Lësca' caní, té'ennë' ulu'gapa böñachi légaquië' didza' ba zxön gapa naca lögaca böñachi, en té'ennë' ilë' böñachi légaquië': "Padiux, bönni' usedi."

8 Pero libí'lli', biti' ral-la' gunli' ga nu güié libí'lli': Bönni' Usedi, tu' zoa tuz Nu naca Bönni' Usedi queëli', neda', Cristo, ate' yúgu'tëli' nácal' böchi'lì' tulí' ia'tuli'. **9** Cuntu nu güiéli' luyú ni, biti' innali': Xuz, tu' zoa tuz Nu naca Xúzili', zoë' yehua' yubá. **10** Biti' gunli' ga nu güié libí'lli': Xan, tu' zoa tuz Nu naca Xanli', neda', Cristo. **11** Nu nutsa' lágjali' nu run xichinli' ia'zíca'röli', nu ni na' gácarö lo ga zóali'. **12** Channö nu uzóa cuini lataj lo, cá'asò ugá'ana nu na', pero nu naca nöxaj ladxi', gaca lo.

13 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'i'sö tsahui' cuinli'. Ruzágá'lí' nöza söjácalen bönachi para ila'dxín ga ni' rinná bë'ë Dios yehua' yubá. La' libí'isili' biti' sequi' tsú'uli', en biti' rufí'ili' lataj ila'yú'u nupa té'eni ila'yú'u.

14 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'i'sö tsahui' cuinli'. Rugúali' yugu' lídxigacanu nigula uzébido', en para ulu'i'sö tsahui' cuinli', xidzé rulídzali'-në' Dios. Que lë ni na, zí'térö irugu queéli' qui'i sáca llí'.

15 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'i'sö tsahui' cuinli'. Ridödili' idú lu nísado', en idú yödzölio ni para gunlì' ga tseaj ládxë'ë tu bönni' Dios tsözxöñ len libí'ili', en cate' chiguzzéqu'i'li'-në', runli' ga nabágä'rë' xíguia' ca libí'ili', ate' tsöjtsu'ë lu guí' gabila.

16 'Bica' bayechi' libí'ili'. Nachul-la loli', ate' rë'ënilí' ulu'i'li' nöza bönachi. Caní naca queéli' tu' rniali': "Channö bi rizí'lu në'ë tu bönni' ni'a que yudo', biti' run bayudxi, pero channö runë' le ni'a que oro dzö'ö yudo', bayudxi gun." **17** Libí'ili', bönni' lo chul-la, en tu' careájni'i. ¿Bízzilö nácarö lo? ¿Naru' oro na', o yudo' le run lá'ayi oro na'? **18** Lësca' caní rniali': "Channö nu bönni' gunë' le ni'a que bucugu lá'ayi, biti' gun bayudxi, pero channö gunë' le ni'a que gun zxoa lahui, bayudxi gun." **19** Libí'ili', nazídili', en nachul-la loli'. ¿Bízzilö nácarö lo? ¿Naru' gun zxoa láhuisö, o bucugu lá'ayi na' run lá'ayi gun na'? **20** Que lë ni na', channö nu bönni' runë' le ni'a que bucugu lá'ayi, runë' le ni'a que le, enca' ni'a que yúgu'të le zxóagaca láhuisö. **21** Lësca' caní, channö nu bönni' runë' le ni'a que yudo', runë' le ni'a que le, enca' ni'a queé' Dios, nun cazë' xilatjë' ni'. **22** Lësca' caní, channö nu bönni' runë' le ni'a que yehua' yubá, runë' le ni'a que lataj ga rö'ë rinná bë'ë Dios, enca' ni'a que Lë cazë' Dios rö'ë ni'.

23 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'i'sö tsahui' cuinli'. Caní naca queéli' tu' riguizxjali' que yudo' tu cö' huéaj tu' chi cö' le rizí'ili' que xöhuéaj, en que guixi' anís, en que comino la' huagu, pero rucá'anali' le nácarö lo le rinná bë' xibá queë' Dios, tu' cabí runli' le naca tsahui', en biti' ruhuéchi' ládxí'li' luzá'alí', en biti' réajle'ëli'-në' Dios. Yugu' lë ni run bayudxi gunli', en lës biti' ucá'anali' ia'zíca'rö lë na' runli', le riguizxjali' que yudo'. **24** Libí'ili', nachul-la loli', en rë'ënilí' ulu'i'li' nöza bönachi. Ca na' runli' naca ca rudödili' bödzádzado' le réjali', rubéajgacalí'-ba'bó'iyudo', pero rë'jali'-ba'bó' ta'bíe'-ba'bönni'.

25 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'i'sö tsahui' cuinli'. Nácali' ca zxíga'do' rë'jali', en yö'öna ráhuilli'. Riguíbilí' le nuá' cuita lë'e, pero lu icja ládxí'do'oli' nalí yugu' le ribanli', en yugu' le ruá' dö' runli'. **26** Libí'ili', bönni' yudo' fariseo lo chul-la. Zí'alo guli'quibi le nuá' lu zxíga'do', en lu yö'öna, lë na' sa'yéaj gácali' tsahui' lu icja ládxí'do'oli', para gácali' ca' tsahui' cuita lë'ëli'.

27 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'i'sö tsahui' cuinli'. Caní naca queéli' tu' nácali' ca yugu' yero ba quégaca nupa chinátigaca, le nácapaca chigúichido'os cuita lë'e, en le nácaté lachi nalá'gaca, pero nalígaca dxita quégaca nupa chinátigaca, enca' yúgu'të le siguti. **28** Lësca' caní nácali' libí'ili'. Le nácaté láhuisö rulu'i cuinli' tsahui' lógaca bönachi, pero lu icja ládxí'do'oli' nalili' yugu' le rulu'i'sö tsahui' cuini, en le ruá' dö' runli'.

29 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Ruchísali' biquitaj que ba gapa nagáchi'gaquië' bönni' gulu'ë didza' uláz queë' Dios, en rui'ili' biquitaj gapa nagáchi'gaca böñachi tsahui'. **30** Lësca' caní rninali': "La'tu' zóatu' dza ni'te cate' gula'cu'ë xuz xtó'otu', biti' guntu' légaquië' tsözxón cate' gulútie' yugu' bönni' gulu'ë didza' uláz queë' Dios." **31** Tu' rninali' caní, la' libí'isili' runli' ba nalí nácali' zxí'ini xi'sóagaca nupa ni' bétigaca yugu' bönni' gulu'ë didza' uláz queë' Dios. **32** Caní naca, rusubaga' cuinli' xíguia' na' gula'báguië' xuz xtó'oli'.

33 'Libí'ili' na', nácali' ca yugu' bëla sínia', en di'a dza quégacaba' bëla sínia'. ¿Nacxi caz uláli' lu le usaca' zi' libí'ili' lu guí' gabila? **34** Que lë ni na', neda' isöl-la'a queéli' yugu' bönni' ilu'ë didza' uláz queë' Dios, enca' yugu' bönni' ta'yéajni'iné, en yugu' bönni' usedi. Yugu' bönni' ni, bal-lë' gútili'-në, en ia'zíca'reë' udá'ali' lë'e yaga cruz, en ia'zíca'reë' quinli' gapa naca lu yu'u ga rudúbili' rusédali' queë' Dios, ate' ulágali' légaquië' tu ia'tú yödzö. **35** Caní gaca, ibágalí' libí'ili' xíguia' que idútë rön quégaquië' bönni' tsahui' le gulalaj luyú, ga gudela' nu bëti Abel, bönni' tsahui', ga ridxitnë nupa bétigaca Zacarías, zxí'iné Berequías, bönni' na' bëtili'-në' gatsaj láhu'lö ga dë yudo', en ga dë bucugu lá'ayi ga na' tu'zégu'ë' böa' bëdxido' lahuë' Dios. **36** Le nácatë rea' libí'ili', yúgu'të lë ni ila'baga' böñachi nacuá' dza ni zóaru' na'a.

Jesús ribödxé' ni'a que yödzö Jerusalén (Lc. 13:34-35)

37 Lësca' caní gunné' Jesús:

—Jerusalén, Jerusalén, libí'ili' na' rútigacali'-në' bönni' tu'ë didza' uláz queë' Dios, en ruládxigacali' guiój nupa nasöl-lë'ë Dios. Zián luzuí gú'unida' utuba' libí'ili' quia', ca runba' yöjede, rutúbiba' börado' queëba' zxan xíliba', pero biti' gú'unili'. **38** Buli'yútsöca', cá'asö ugá'ana yu'u lídxili'. **39** Caní gaca, tu' rea' libí'ili', na'a isí lo biti' ulé'eli' neda' cate' innáröli': "Lá'ayi náquië' Bönni' na' zë'ë uláz queë' Xanru'."

24

Riguíxjö'ë Jesús ca si' ulu'quínnajë' yudo' (Mr. 13:1-2; Lc. 21:5-6)

1 Birúajë' Jesús chila yudo', en tsanni ni' rizë'ë ni', gula'bígu'ë bönni' usëda queë' ga na' zoë', ate' bulu'lui'iné' Lë' ca nácabaca zö'ö nagú'ugaca lë'a yudo'. **2** Bubi'ë didza' Jesús, ate' reë' légaquië':

—¿Rilé'etseli' yúgu'të lë ni? Le nácatë rea' libí'ili', biti' ca' ugá'ana guiój nabaga' luzë'ë ni, le cabí iguínnaj.

Le ilaca bë' chizóa idxín dza údxi que yödzölió (Mr. 13:3-23; Lc. 21:7-24; 17:22-24)

3 Cate' ni' rö'ë Jesús ga naca lu Gui'a Yaga Olivo, bila'dxinë' bönni' usëda queë' ga na' zoë' queëzé', en té' Lë':

—Gudíxjö'i netu', jóbátaxi ilaca lë ni, en bizxi gaca bë' dza huödu', en dza údxi que yödzölió ni?

4 Ní'irö' bubí'ë didza' Jesús, ate' reë' légaquië':

—Buli'yú para cabí nu si' ye'e libí'ili', **5** tu' zá'gaquië' zián bönni' légaquië' ca lea' neda'. Ilá'nné' nácabagaquië' Cristo, en ilá'zí' yé'ené' böñachi zián.

6 Huayönili' raca gudil-la, en le rui'ili' didza' que gudil-la, pero biti' cõ'öli' böñiga, tu' ral-la' ilaca yúgu'të lë ni, pero cabí ridxini dza údxi cate' ilácarö

lē ni. ⁷ Til-la tu yödzö len ia'tú yödzö, ate' tu ga nu rinná bē' len ia'tú ga nu rinná bē'. Ilatsaj yödzöhué' zxön, en gaca gubín, ate' zián lataj tödi budó' zxu'. ⁸ Yúgu'té lē ni nácabaca le isí lógaca yugu' le ila'gui'i ila'zaca' bönachi.

⁹ 'Ní'irö ulu'dödi bönachi libf'ili' lu na' nu usaca' zi' libf'ili'. Yúgu'té bönachi ulu'df'i libf'ili' tu' dá'ali' neda', en ilútié' bál-lalí' libf'ili'. ¹⁰ Cate' gaca caní, gaca chopá ládxí'gaca zián bönachi, en ulu'ca'ana neda', ate' udödi tu ia'tú luzé'e, en tu ia'tú udi'i luzé'e. ¹¹ Ní'irö ulu'lui'i lógaquie' zián bönní' ta'zí' yé'ë. Ulu'lui'i cuíngaqüie' ca yugu' bönní' tu'ë didza' uláz queë' Dios, en ila'zí' yé'enë' bönachi zián. ¹² Iluá'ada' dö' bönachi, ate' que lē ni na' bíti'rö ila'dxí'i böchi' luzé'eguequi. ¹³ Nu guequi tsaz queë' Dios ga idxintë dza údxi, nu ni ulá. ¹⁴ Idú yödzölió gaca libán que didza' dxi'a ca rinná bē'ë Dios para gaca ba nalí que lógaca yúgu'té bönachi izá'a, ate' ní'irö idxin dza údxi.

¹⁵⁻¹⁶ 'Nu ulaba lē ni ral-la' uzéajni' ladxi'. Gunné' Daniel, bönní' bē'ë didza' uláz queë' Dios, gunnë': "Tsaza le rudi'inë' Dios lataj lá'ayi queë' Dios, lē na' rusuniti." Cate' ilé'eli' gaca caní, ní'irö nuli' zóali' luyú Judea ralla' tsójzxúnnajli' saca' guí'ado'. ¹⁷ Nu dxia ícjo'olö bití' gal-la' huötaj tsójzxí' bi dë que lu yu'u, pero ral-la' izxúnnajtë. ¹⁸ Nu zoa la' guixi', bití' gal-la' huöaj tsójzxí' lari' que. ¹⁹ Bica' bayechi' yugu' nigula si' ulu'zóanu bí'ido' quégacanu, enca' nigula ni' tu'gádxí'nu-bi' bí'ido' quégacanu cate' idxin dza ni'. ²⁰ Buli'lidzé' Dios inábili'-në' cabí idxin dza ni' izxúnnajli' cate' raca beo' ziaga o cate' naca dza lá'ayi, ²¹ tu' ila'gui'i ila'záca'térö bönachi dza ni' ca gula'gui'i gula'zaca' bönachi dza ni'te cate' si' guta' gurö'ö yödzölió, ga ridxitnë na'a dza, en caléga dza zá'gaca bití' ila'gui'i ila'zaca' caní. ²² Cate' idxin dza ni', channö Dios bití' cuéqui lahuë' quégaqüie', cuntu nu ulá, pero cuéqui lahuë' quégaqüie' dza ni', en gácalenë' nupa gurö' cazé' Lé'.

²³ 'Ní'irö bití' tséajlé'ëli' channö nu idxin queëli', en guíë libf'ili': "Buli'yútsöca', ni zoë' Cristo", o inná: "Ní' zoë'." ²⁴ Ulu'lui'i lógaquie' zián bönní' ta'zí' yé'ë, en ila'nnë' nácabacaquie' Cristo, o ila'nnë' tu'ë didza' uláz queë' Dios. Iluné' le ilaca bë', en le ilún ga ulu'bani bönachi, ate' ila'zí' yé'enë' nupa gurö' cazé' Dios channö huala'zéqui'në'. ²⁵ Buli'yútsöca', chigudxi caza' libf'ili' yúgu'té lë ni zí'atélo ca si' ilaca. ²⁶ Que lë ni na', bití' irúajli' channö ila'dxin queëli' nupa ilé' libf'ili': "Buli'yútsöca', ni' zoë' Cristo lu lataj cá'asö." Lëscá' caní, bití' tséajlé'ëli' channö ila'nná: "Buli'yútsöca', lu yu'u zoë'." ²⁷ Ca na' raca cate' répi yösa ga rilén gubidza, en ruzení' ga ribía gubidza, lëscá' caní gaca cate' huöda' neda', Bönní' Gulje' Bönachi. ²⁸ Ilácatë caní, ca na' ta'nná bönachi: "Gáti'tës ga dë tu le natí, ni' ulu'dubi cázaba' bíchulab."

Ca gaca cate' huöde' Bönní' Gulje' Bönachi (Mr. 13:24-37; Lc. 21:25-33; 17:26-30, 34-36)

²⁹ Gunnë' ca' Jesús:

—Tödi yugu' dza ni' cate' ila'gui'i ila'zaca' bönachi caní, ichul-la gubidza, ate' beo' bití' gunna bení' que. Ila'guínnajba' bölaj lúzxiba, ate' ila'zzízi le nalá'gaca naca tsutsu lúzxiba. ³⁰ Ní'irö ilá' lahuí lúzxiba le gaca bë' huöda' neda', Bönní' Gulje' Bönachi, ate' ila'bödxí yechi' yúgu'té bönachi yödzölió ni, cate' ila'lé'e neda', Bönní' Gulje' Bönachi, suzá'a lu boaj lúzxiba, dë lu na'a yölla' unná bë', en yöll-la' huáca zxön. ³¹ Ní'irö isöl-la'gaca'-në' gubáz lá'ayi quia'. Ulu'cödxé' zidzaj lúzuba' böa' guixi', ate' ulu'tubé' nupa naböa' quia', nacuá' idapa la'atë yödzölió, en yúgu'té lataj zxan lúzxiba.

³² 'Buli'zéajni'i ládzi'lí' le rusedi libí'ilí' le raca que yaga higo. Cate' ta'lén ni'a në'e yúludo', en chirubía xilagui' yúludo', inözili' chizóa idxín cusubá. ³³ Lësca' caní, cate' ilé'eli' taca yúgu'té lë ni, inözili' chizóa idxín dza údzi na', en chiridzaga lahui. ³⁴ Le nácaté rea' libí'ilí', yúgu'té lë ni ilaca zí'atëlö ca ilátigaca böñachi nacuá' dza ni'. ³⁵ Huadödi quégaca lúzxiba, en luyú ni, pero yugu' xtídz'a bití' ila'dödi cá'asö.

³⁶ 'Cate' idxín dza ni' cuntu nu nözi. Bití' nözguequinë' gubáz lá'ayi queë' Dios nacu'ë yehua' yubá, en bití' nözd'a neda', Zxi'inë' Dios, pero tuze' Dios Xuz nözinë'.

³⁷ Ca'na' guca dza cate' ni' zoë' Noé, lësca' caní gaca cate' huöda' neda', Bönni' Guljë' Bönachi. ³⁸ Yugu' dza ni' zí'atëlö ca si' idxín nisa guiój le busuniti yödzölió, gulé'aj gulahué', bulu'tsaga ná'agaquie', en bulu'dödë' zxöinigaquie' lu yöl-la' rutsaga na' ga bidxitnë dza guyázië' Noé lë'e barco zxöön ni' benë', ³⁹ en bití' guléquibe'enë' cate' bidxitnë nisa guiój le busuniti yödzölió, ate' gula'nitië' yúgu'té. Lësca' caní gaca cate' si' huöda' neda', Bönni' Guljë' Bönachi, cuntu nu guéquibe'e. ⁴⁰ Dza huöda' ila'cu'ë chopë' bönni' la' guixi'. Tuë' uchë'a-në' quia', ate' ia'tuë' ucá'ana'-në'. ⁴¹ Ila'cuá'anu chópanu nigula nacuá'anu huëtu. Tunu uchë'a-nu quia', ate' ia'tunu ucá'ana'-nu.

⁴² 'Buli'subán ládzi'lí' tu' cabí nözili' bizxi dza huöda' neda', Xanli'. ⁴³ Na'a, guli'tséajni'i lë ni. La'tu' nözinë' xan yu'u bizxi dza guídë' gubán, huanë'ë yëla, en bití' gu'ë lataj nu quidaj zö'ö para cuan le dzö'ö lidxë'. ⁴⁴ Que lë ni' na', buli'subán ládzi'lí' ca' libí'ilí', tu' huöda' neda', Bönni' Guljë' Bönachi, tu dza bití' nuzúa icjali'.

Bönni' huen dxin tsahui', en bönni' huen dxin bití' náquië' tsahui' (Lc. 12:41-48)

⁴⁵ Gunnë' ca' Jesús:

—¿Nuzxi caz bönni' huen dxin náquië' tsahui', en réajni'inë', bönni' huen dxin na', xanë' cu'ë lu në'e böñachi nacuá' lidxë' para gu'ë le ilágugaca cate' idxín dza? ⁴⁶ Bica' ba bönni' huen dxin na' náquië' tsahui', bönni' na', cate' udixinë' xanë', uduxáquië' lë' caní runë' le nudödë' xanë' lu në'e. ⁴⁷ Le nácaté rea' libí'ilí', yúgu'té le dë queë' xanë', udödë' lu në'e bönni' huen dxin na' runë' caní. ⁴⁸ Channö huöáquië' bönni' huen dxin queë' huiá' dö', en sa' ládxë'ë, innë': "Huadzenë' xana', en bití' huödatiè'" ⁴⁹ en channö isí lahuë' gundë' zi' bönni' túnlene' lë' tsözxöñ dxin, en isí lahuë' ca' gu'aj gágulenë' nupa ta'zudxi, ⁵⁰ ní'irö huödë' xanë' bönni' huen dxin na' tu dza cate' bití' zoë' ribözë', o tu yëla bití' réquinë'. ⁵¹ Ní'irö xanë' na' usaca' zí'dë'ë bönni' huen dxin na', en gunë' ga gaca queë' ca na' ral-la' gaca quégaca nupa tu'lui'isö tsahui' cuínguequi. Ní'irö cödxi yechë'ë, en gagu zxea láyë'ë.

25

Rucúdu'ë didza' Jesús ca naca quégacabi' chibi' bi'i nigula ra'bando'

¹ Gunnë' ca' Jesús:

—Ca gaca quégaca nupa ila'yaza ga rinná bë'ë Dios yehua' yubá naca ca guca quégacabi' chibi' bi'i nigula ra'bando'. Gula'zí'ibí' le nuá'gaca guí' quégacabi', ate' bilä'rúajbi' tsöjtságagacabi' bönni' utsaga në'e. ² Gáyu'bi' náçagacabi' bi'i bití' ta'yéajni'ibí' ate' ia'gáyu'bi' nasína'gacabi'. ³ Yugu' bi'i nigula bití' ta'yéajni'ibí' na' gula'zí'ibí' le nuá'gaca guí' quégacabi' pero bití' guluá'abi' ia'latí' za régui. ⁴ Yugu' bi'i sina' na' guluá'abi' za régui lu bögä'do'

quégacabi' len le nuá'gaca gui' quégacabi'. ⁵ Tu' gudzenë' bönni' utsaga në'ë, gudödi yëla lógacabi', en gulásitëbi'. ⁶ Cate' bidxin idú guluhuëla, biyön chi'i nu rinnë zidzaj, rnna: "¡Chizé'ë bönni' utsaga në'ë! ¡Guli'rúaj tsöjtságali'-në!" ⁷ Ní'irö gula'yásabi' yúgu'tébi' bi'i nigula na', ate' bulu'pa'abi' le nuá'gaca gui' quégacabi'. ⁸ Gulu'ibí' didza' bi'i biti' ta'yéajni'ibi' na', en gulëbi' yugu' bi'i sina' na': "Guli'gunna queëtu' láti'do' za régui queëli' tu' tu'úlu le nuá'gaca gui' queëtu' ni." ⁹ Bulu'bí'ibí' didza' bi'i sina' na', gula'nnabi': "Biti' gaca, tu' cabí bi ugá'ana queëtu', en queëli' Guli'tséajtsöca' ga ridó'o za régui, tsöjö'uli' queëli'." ¹⁰ Tsanni ni' söjzácabi' söjxí'gacabi' le, bidxinë' bönni' utsaga në'ë. Yugu' bi'i na' nacuá'abi' sina', en ta'bözabí' lë' gula'yú'ulentëbi' lë' ga na' raca laní que utsaga na', ate' la' guyáyajté yu'u. ¹¹ Gudödi ni' ia'zíca'röbi' bi'i nigula ra'bando' na' bila'dxinbi' ni', ate' bulu'lídzabi'-në', en gula'nnabi': "Xan, Xan, gusalaj queëtu'." ¹² Lë' bubí'ë didza', rnne': "Le nácatë rea' libí'ili', biti' nözda' gazxi libí'ili'."

¹³ Ní'irö Jesús gudxé' légaquië:

—Buli'subán ládxí'li', tu' cabí nözili' bizzi dza o bizzi yëla huöda' neda', Bönni' Guljë' Bönachi.

Rucúdzu'ë didza' Jesús ca naca que dumí zaca'

¹⁴ Gunné' ca' Jesús:

—Ca gun Nu na' rinná bë' yehua' yubá naca ca benë' tu bönni', chizóa tsejë' zi'tu'. Bulidzë' yugu' bönni' huen dxin queë' en gulu'ë yugu' le dë queë' lu ná'agaquië'.

¹⁵ 'Tuë' bönni' huen dxin na', gulu'ë gayu' dumí nazaca' lu në'ë, ate' ia'tué' gulu'ë chopá dumí nazaca' lu në'ë. Ia'tué' gulu'ë tu dumí nazaca' lu në'ë. Tu tué' gulu'ë lu në'ë tsca huéaj le ila'zéqui'në'. Ní'irö la' guzá'atë' ga naca zi'tu'. ¹⁶ Guyijë' bönni' huen dxin na' guzxi'ë gayu' dumí nazaca' na', en yöjtíljalenë' le ia'gayu' dumí nazaca'. ¹⁷ Lësca' caní, bönni' na' guzxi'ë chopá dumí na', yöjtíljalenë' le ia'chopa ca'. ¹⁸ Bönni' na' guzxi'ë tu dumí guyijë', en yöjchö'önë' lu yu, ate' bucáchë'ë dumí queë' xanë' lu yu ni'.

¹⁹ 'Cate' chigudzé, budxinë' xángaquië' bönni' huen dxin na', ate' bucá'analenë' légaquië' tsahui'. ²⁰ Ga gusí lo bidxitnë' bönni' na' guzxi'ë gayu' dumí nazaca' na', en sunu'ë ia'gayu' dumí ca', ate' rë' xanë': "Xan, gayu' dumí gulú'u lu na'a. Ni dë ia'gayu' dumí ca' yöjtíljalena' le." ²¹ Xanë' na' rë' lë': "Naca dxi'a. Nacu' huen dxin tsahui'. Tsáhui'do' benu' cate' ni dë lu no'o láti'do'os. Na'a yénni'térö cu'a lu no'o. Guyaza ga zoa', udzéjalenu' neda'." ²² Gudödi ni' bidxinë' ca' bönni' huen dxin na' guzxi'ë chopá dumí nazaca', ate' rnne': "Xan, chopá dumí gulú'u lu na'a. Ni dë ia'chopa dumí ca' yöjtíljalena' le." ²³ Ní'irö xanë' na' rë' lë': "Naca dxi'a. Nacu' huen dxin tsahui'. Tsáhui'do' benu' cate' ni dë lu no'o láti'do'os. Na'a, yénni'térö cu'a lu no'o. Guyaza ga zoa', udzéjalenu' neda'." ²⁴ Ní'irö cate' bidxinë' bönni' huen dxin na' guzxi'ë tu dumí nazaca' na', rnne': "Xan, nözda' nacu' bönni' bizzaj, tu' rulapu' ga biti' guzu', en rutubu' ga biti' guchilju'. ²⁵ Que lë ni na' gúdxida' li', ate' guyija', yöjcácha'a dumí quiu' lu yu. Ni dë na'a le nequi quiu'." ²⁶ Ní'irö bubí'ë didza' xanë', en rë' lë': "Nacu' huen dxin biti' naca tsahui', en xöhüëdi. Nöz quézinu' rulapa' ga biti' guza', en rutuba' ga biti' guchilja'. ²⁷ Que lë ni na', gácarö dxi'a quiu' la'tu' bunödzju' dumí quia' lu ná'agaquië' bönni' ulu'gunë' le dxin, ila'guíjlalenë' le ia'lati', para cate' huöda' neda', uzi'a le nequi quia' len icja ca'." ²⁸ Ní'irö xanë' na' gudxë' nupa nacuá' ni': "Guli'cúa dumí na' dë lu

në'ë bönni' ni, en guli'cú'u le lu në'ë bönni' na' dë queë' chi dumí." ²⁹ Núti'tës nu rugún tsahui' dxin le dë queë', zoa nu unödzaj queë' ia'lati', ate' gáta'da' queë', pero nu na' biti' rugún tsahui' dxin le dë lu në'e, la's dui le dë queë' idúa. ³⁰ Na'a, bönni' huen dxin biti' naca tsahui' ni, guli'tsöjchú'una-në' ní'ilö ga naca chul-la. Ni' cödxi yéchë'ë, en gagu zxea láyë'ë.

Cristo uchi'a usöröë' quégaca bönnachi

³¹ Gunnë' ca' Jesús:

—Cate' ni' huöda' neda', Bönni' Guljë' Bönachi, idinná bë'a, ate' dzágagaquië' neda' yúgu'të gubáz lá'ayi quia', ní'irö cò'a lataj tsahui' quia', ga'na' uchi'a usöröä' quégaca bönnachi. ³² Ulu'dubi dërö lahuá' neda' bönnachi yödzölió ni, ate' ucu'a léguequi tsölä'a huéaj ca runë' bönni' uyú bö'cu' zxila', rucu'ë'-ba' tsölä'a huéajba' yugu' chivo, en yugu' bö'cu' zxila'. ³³ Yugu' bö'cu' zxila' na' ucu'ë'-ba' cuita lë'ë ibëla, ate' yugu' chivo na' ucu'ë'-ba' cuita lë'ë yögöla. ³⁴ Ní'irö, neda', bönni' unná bë', guía' nupa nacuá' cuita lë'a ibëla, innia': "Guli'dá ga zoa', libí'lli' bubájë' Xuza' libí'lli' quez queë'. Nequi queëli' lataj ga na' rinná bë'ë, lë'na' bupë'ë queëli' dza ni'te cate' ni' benë' yödzölió. ³⁵ Caní nequi queëli' tu' guduna', ate' bénnalí' le gudahua'. Gubidxa' nisa, ate' bénnalí' le gu'a. Guca' ca tu bönni' ridá zi'tu', ate' gulú'uli' neda' lídxili'. ³⁶ Biyadzaj le gácu'a, ate' bugáculi' neda' le ráculi'. Güf'ida', ate' buduyúli' neda'. Guyu'a lidxi guíë, ate' buduyúli' neda'." ³⁷ Ní'irö ulu'bí'ë didza' bönni' tsahui' na', ilé' neda': "Xan, ¿bátaxi bilé'etu' Li' gudunu', ate' bugágutu' Li'? ¿Bátaxi gubidxu', ate' bénnatu' le gu'u? ³⁸ ¿Bátaxi bilé'etu' Li' gudó' zi'tu', ate' gulú'utu' Li' lídxitu'? ¿Bátaxi biyadzaj le gacu', ate' bugácutu' Li' le rácutu'? ³⁹ ¿Bátaxi bilé'etu' Li' güí'inu', o guyú'u lidxi guíë, ate' buduyútu' Li'?" ⁴⁰ Ubi'a didza' neda', bönni' unná bë', ate' guía' légaquië': "Le nácatë rea' libí'lli', tu' benli' caní queë' nu bönni' böcha'ado' ni, sal-la' náquie' bönni' cá'asö, quia' neda' caz benli' ca'."

⁴¹ Ní'irö guía' nupa nacuá' cuita lë'a yögöla, innia': "Guli'cuítá ga zoa', libí'lli' na' nabága'lli' xíguia', tsöjtsázali' lu guí' na' biti' ulu, lë'na' bupë'ë Dios ni'a que tu' xihui', en quéguequi gubáz dá'gaca le. ⁴² Caní gaca queëli' tu' guduna', ate' biti' bénnalí' le gahua'. Gubidxa' nisa, ate' biti' bénnalí' le guí'ja'. ⁴³ Guca' ca bönni' ridë' zi'tu', ate' biti' gulú'uli' neda' lídxil'. Biyadzaj le gácu'a, ate' biti' bugáculi' neda' le ráculi'. Güf'ida', enca' guyu'a lidxi guíë, ate' biti' buduyúli' neda'." ⁴⁴ Ní'irö ila'nná ca' nupa na', ilé' neda': "Xan, ¿bátaxi bilé'etu' Li' gudunu', o gubidxu', o gucu' ca bönni' ridë' zi'tu', o biyadzaj le gacu', o güí'inu', o guyú'u lidxi guíë, ate' biti' gúcalentu' Li'?" ⁴⁵ Ní'irö ubi'a didza' neda', bönni' unná bë', guía' légaquië': "Le nácatë rea' libí'lli', tu' cabí bi benli' que tu nu nutsa' ladaj nupa nacuá' ni, sal-la' naca cá'asö nu na', biti' bi benli' quia' neda'." ⁴⁶ Ní'irö bönnachi tuá' dö' na'la' tsöjtsázagacaté ga ni' ila'gu'i ila'záca'tica'sö, pero bönnachi tsahui' ni' gata' yöl-la' na'bán idú quéguequi.

26

*Tun xtídza'gaquië' bönni' yudo' ila'zönë' Jesús
(Mr. 14:1-2; Lc. 22:1-2; Jn. 11:45-53)*

¹ Cate' budxi bë'ë Jesús yugu' didza' ni, gudxe' yugu' bönni' usëda queë',
² rññe'ë:

—Nöz quätzili' ia'chopa dza idxín Laní Pascua, ate' dza na' neda', Bönni' Guljë' Bönachi, ulu'dödë' neda' lu ná'agaca nupa ulu'dá' neda' lë'e yaga cruz.

³ Ní'irö bila'dxinë' yugu' bixúz unná bë' len yugu' bönni' yudo' usedi, en bönni' gula tu'zéajni'inë' bönnachi judío, ate' bulu'dubë' ga naca lö'a lidxi bixúz lo, lë' Caifás. ⁴ Ní' gulún xtídza'gaquië' ila'zönë' Jesús, lu yöl-la' rizí' yë' quégäquië', para ilútie' Lë'. ⁵ Ta'nnë':

—Biti' gunru' lë ni dza laní, para cabí ila'dzatsa bönnachi.

*Tu nigula rigú'unu le rilá' zxixi icjë' Jesús
(Mr. 14:3-9; Jn. 12:1-8)*

⁶ Cate' ni' zoë' Jesús lu yödöö Betania lu yu'u lidxé' Simón, bönni' na' güí'inë' huë' nudzu' ruzödi, ⁷ bidixinnu cídzul'le' Jesús tu nigula, nuá'anu tu böga'do' néquini guiój nazaca', en yudzu tu le rilá' zxixi le nazáca'da', ate' gulú'unu le icjë' Jesús cate' ni' rö'ë rahuë'. ⁸ Cate' bila'lé'enë' bönni' usëda queë' Jesús lë ni, gula'lenë', ta'nnë':

—¿Bizz que réqui ditaj lë ni? ⁹ Guca nu guti' lë ni, en si' dumí zián para gácalenru' yugu' bönnachi yechi'.

¹⁰ Cate' biyönnë' Jesús lë ni, rë' légaquië':

—¿Bizz que rnñeli' queënu nigula ni? Tsahui' naca le bennu quia'. ¹¹ Yugu' bönnachi yechi' ila'cuá'lentica'só libí'ilí', pero neda' biti' ugá'analentica'sa' libí'ilí'. ¹² Le bennu nigula ni, gulú'unu neda' le rilá' zxixi ni, naca le rupá'anu neda' para dza igácha' a yeru ba. ¹³ Le nácatë rea' libí'ilí', gáti'tës luyú yödöölió ga gaca libán que didza' dxi'a ni, lësca' ila'guixjö' bönnachi le bennu nigula ni quia' para nu tsöjnë lënu.

*Rizi' lu në'ë Judas udödë' Jesús lu ná'agaquië' bönni' unná bë'
(Mr. 14:10-11; Lc. 22:3-6)*

¹⁴ Ní'irö guyijë' Judas Iscariote ga na' nacu'ë bixúz unná bë'. Náquië' bönni' dzáguië' chínnuë' na' dá'gaquië' Jesús, ¹⁵ ate' gudxë' légaquië':

—¿Bizzxi gúnnali' quia' channó neda' udödä'-në' Jesús lu ná'ali'?

Bulu'gá'analenë' lë' tsahui' ilu'ë lë' chi uruá' dumí plata. ¹⁶ Ní'irö gusí lahuë' Judas na' risí ribö'ë udödë' Jesús lu ná'agaquië'.

*Le ráguru' le rusá' ládxiru' ca gótië' Xanru'
(Mr. 14:12-25; Lc. 22:7-23; Jn. 13:21-30; 1Co. 11:23-26)*

¹⁷ Cate' naca dza risí lo laní quégäquië' bönni' judío cate' tahuë' yöta xtila le cabí nazí'i cúa zi que, gula'bígu'ë bönni' usëda queë' Jesús ga zoë', en të' Lë':

—¿Gazxi rë'ënú'tsöjpá'atu' queëru' para gáguru'-ba'bö'cu'zxíla'do' dzö' Laní Pascua?

¹⁸ Jesús rë' légaquië':

—Guli'tséajtsöca' yödöö ni' ga na' zoë' tu bönni', en guli'guië': "Bönni' rusédinë' netu' rnñe": Chizá' gala' dza quia'. Lu yu'u lidxu' gágulengaca'-në' bönni' usëda quia' bö'cu'zxíla'do' dzö' Laní Pascua."

¹⁹ Ní'irö gulunë' bönni' usëda queë' ca na' gunná bë'enë' Jesús légaquië', ate' bulu'pë'ë le ilahuë' dzö' Laní Pascua.

²⁰ Cate' chigudzö' dza na', Jesús gurö'lenë' idxínnutë' bönni' usëda queë' tahuë'. ²¹ Tsanni ni' tahuë', Jesús rë' légaquië':

—Le nácatë rea' libí'ilí', tu nu nutsa'ládjali' ni udödi neda'.

²² Ní'irö bulu'huí'ini ládxiru'gaquië', en gula'nábinë' Jesús tu tuë', ta'nnë':

—Xan, ¿naru' neda'?

²³ Bubi' è didza' Jesús, rnñe:

—Bönni' ni runë' në'ë tsözxör len na'a lu yö'öna, bönni' ni udödë' neda'. ²⁴ Le nácatë neda', Bönni' Guljë' Bönachi, uyija' ga gátia' ca na' nazúaj lu guichi lá'ayi

ca ral-la' gaca quia', pero bica' bayechi' nu na' udödi neda' gátia'. Gácarö dxi'a queë' bönni' na' la' cabí guljë'.

²⁵ Ní'irö bubí'ë didza' Judas, bönni' na' udödë' Jesús, rnnë':

—Bönni' Usedi, ¿naru' neda'?

Jesús rë' lë':

—Ön, li' na'.

²⁶ Tsanni ni' tahuë', gudéle'ë Jesús yöta xtila, en gudxë' Dios: "Xclenu'." Ní'irö buzzuxxjë' le, en bunödzjë' quégäquië' bönni' usëda queë', rnnë':

—Guli'si', guli'gagu. Lë ni le naca caza'. Ca bena' que yöta xtila ni rulu'i ca gaca que le naca caza'.

²⁷ Gudélë'ë ca' tu zxiga'do', en gudxë' Dios: "Xclenu'." Ní'irö bunödzjë' ca' quégäquië', rnnë':

—Guli'gui'aj yúgu'tëli'. ²⁸ Lë ni rulu'i ca naca xichöna' le run tsutsu didza' cubi rucá'ana tsahui'. Xichöna' na' ilalaj ni'a quégaca bönachi zián para gaca uniti lahuë' Dios yugu' dul-la' nabága'gaquië'. ²⁹ Rea' ca' libí'ilí, bíti'rö guí'ja' xisi le ribía lubá uva ni cate' idxinrö dza ni' guí'jalena' libí'ilí tu le cubi ga ni' rinná bë'ë Xuza'.

Jesús rnnë' innë' Pedro biti' núnbe'ë Lë'

(*Mr. 14:26-31; Lc. 22:31-34; Jn. 13:36-38*)

³⁰ Cate' budxi gulúl-lë' yöl-la' ba queë' Dios, yójáquië' lu Guí'a Yaga Olivo.

³¹ Ní'irö Jesús rë' légaquië':

—Yúgu'tëli' gaca chopá ládxí'ilí, en ucá'analí' neda' na'a dzö' ni, tu' nazúaj lu guichi lá'ayi ca gaca quia', le rnna: "Guna' ga gátië' Bönni' Uyú Bö'cu' Zxila', ate' ilásilasiba' bö'cu' zxila' na'." ³² Cate' ubana' lu yöl-la' guti, ní'irö tséaja' tsöjnörua' loli' saca' luyú Galilea.

³³ Ní'irö bubí'ë didza' Pedro, en rë' Jesús:

—Sala' ilaca chopá ládxí'gaquië', en ulu'cá'anë' yúgu'të' Li', neda' biti' gaca chopá ládx'a', biti' ucá'ana' Li'.

³⁴ Jesús gudxë' lë':

—Le nácatë rea'li', na'a dzö' ni, cate' si' cödxilöba' böra, li' innó' tsonna luzuí biti' núnbe'u neda'.

³⁵ Ní'irö Pedro gudxë' Jesús:

—Sal-la' gátilentea' Li', biti' ca' innia' biti' núnbe'a Li'.

Lësca' caní gula'nnë' yúgu'të bönni' usëda queë'.

Jesús rulidzë' Dios la' yëla Getsemaní

(*Mr. 14:32-42; Lc. 22:39-46*)

³⁶ Ní'irö Jesús bidxinlenë' légaquië' la' yëla Getsemaní, ate' gudxë' yugu' bönni' usëda queë' na', rnnë':

—Guli'cö'tsöca' ni tsanni tséaja' ia'lati' ní'ilö, tsöjlidza'-në' Dios.

³⁷ Jesús guché'ë Pedro len iropë' zxí'inë' Zebedeo, ate' gusí lahuë' ruhuí'innë', en risëbi ládxë'ë. ³⁸ Ní'irö Jesús gudxë' légaquië':

—Ruhuí'ini ládx'a', en huáti caza' lu yöl-la' risëbi ladxi'. Guli'gá'ana ni, en guli'ná' yëla tsözxön len neda'.

³⁹ Gudöde' Jesús ia'láti'do' ní'ilö, ate' ni' biyéchuë'. Busudxín lahuë' lu yu, en bulidzë' Dios, gunnë':

—Xuza', channö huáca, ben ga biti' gun bayudxi qui'i saca'a lë ni, calëga ca rë'ënda' neda', pero ca rë'ënu' Li' gunu'.

⁴⁰ Cate' budxinë' Jesús ga na' nacu'ë bönni' usëda queë', yójáquië' légaquië' tasië', ate' rë' Pedro:

—¿Naru' cabí gúcatsö iná'alenu' neda' tsözxöñ yëla tu chí'ido'? ⁴¹ Guli'na' yëla, en buli'lidzë' Dios inábili'-në' gácalenë' libí'ilí, para cabí güí'ilí' Satanás tu' xihui' lataj si' bë' libí'ilí' le xihui'. Bö' naca cázali' nasína'tica'sö, pero lu yöl-la' böñachisö queé'lí' nacuúdilí'.

⁴² Ní'irö guyijë' Jesús le buropi luzuí, en bulidzë' Dios, rnne':

—Xuz, channö cabí gaca gunu' ga biti' qui'i saca'a lë ni, ben ca raza ládxu'u Li'.

⁴³ Cate' böajë', leyúbölö buduxaquië' légaquië' tasië' tu' nadödirö yëla guiój lógaquië'. ⁴⁴ Ní'irö bucá'anë' Jesús légaquië', ate' guyijë' leyúbölö, en bulidzë' Dios le bunni luzuí, ate' tuz ca gunnë' zí'alo rgnne'. ⁴⁵ Leyúbölö böajë' ga na' nacu'ë bönni' usëda queé', en rë' légaquië'.

—¿Rásitsali' na'a, en ruzi'tsö ládxilí? Buli'yútsöca', chibudzaga lo. Neda', Bönni' Guljë' Bönachi, chinadöda' lu ná'agaquië' bönni' dul-la'. ⁴⁶ ¡Guli'chasa, uyéajru'! Buli'yútsöca', bönni' na' rudödë' neda' chibidxinë' ni.

Ta'chë'ë Jesús nadzunë'

(Mr. 14:43-50; Lc. 22:47-53; Jn. 18:2-11)

⁴⁷ Tsanni ni' ru'ë Jesús didza' ni, Judas, bönni' nabábalenë' idxínnutë' na', la' bidxitnë' ni', ate' dzágagaquië' bönni' zián lë, nuá'agaquië' güié tuchi', en yugu' yágado'. Yugu' bixúz unná bë', en bönni' gula tu'zéajní'inë' böñachi judío nasöll-la'gaquië' légaquië'. ⁴⁸ Judas, bönni' na' rudödë' Jesus, chibulu'íne' légaquië' tu le gunë' le gaca bë' nu naca Jesús, gunnë':

—Bönni' na' utsaga lahua'-në', Lë' na' Jesús. Guli'söñë'.

⁴⁹ Ní'irö gubígu'ë Judas ga na' zoë' Jesús, rnne':

—Padiux, Bönni' Usedi.

Ní'irö la' busudxín lotë' Lë'. ⁵⁰ Jesús rë' lë':

—Böcha'a, ¿bizxi huen zo'o ni?

Ní'irö gula'bigue'ë bönni' na', ate' gula'zöñë' Jesús. ⁵¹ Tuë' bönni' dzáguië' Jesús gulecjë' güié tuchi' queé', en benë' huë', guchúguië' guídi náguië' bönni' huen dxin queé' bixúz lo. ⁵² Jesús gudxë' lë':

—Bugú' güié tuchi' qui' lidxi. Yúgu'të nupa tu'dí'ini güié tuchi', lu güié tuchi' ilátigaca. ⁵³ ¿Naru' cabí nözinzü' huáca ulidza' Xuza', ate' Lë' la' isöl-la'të' ziánterö ca chinu cö' gubáz lá'ayi le naca zián gáyu'ë tu cö' huéaj? ⁵⁴ Channö guna' caní, ¿nacxi gaca udxín le nazúaj lu guichi lá'ayi, le rnna caní ral-la' gaca quia'?

⁵⁵ Ní'irö Jesús gudxë' yugu' bönni' ni':

—¿Birúajtsali' nuá'ali' güié tuchi', en yágado' para sönli' neda' ca runli' rizönlí'-në' gubán? Yugu' dza gurö'a loli' ga naca lu chila yudo', en busédigacada' böñachi, pero biti' guzxönlí' neda'. ⁵⁶ Raca caní yúgu'të lë ni para udxín le nazúaj lu guichi lá'ayi, ca na' gula'nnë' bönni' gulu'ë didza' uláz queé' Dios.

Ní'irö yúgu'të bönni' usëda queé' Jesús bulu'cá'anë' Lë', en bulu'zxúnnaejë' ni'.

Ridxinë' Jesús lógaquië' bönni' yudo'

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Ní'irö yugu' bönni' na' zöngaquië' Jesús gula'chë'ë Lë', ate' bila'dxinë' lahuë' Caifás, bixúz lo, ga ni' nudúbigaquië' ca' yugu' bönni' yudo' usedi len bönni' gula tu'zéajní'inë'. ⁵⁸ Pedro söjnáhuë' Jesús zí'tu' zí'tu'sö, en bidixinë' ga naca ló'a lidxi bixúz lo na', para ilé'enë' nacxi utságuië' Jesús.

59 Yugu' bixúz unná bë' len bönni' gula tu'zéajni'inë', en bönni' yudo' tu'chi'a tu'söröe', bulu'guilje' nu uzegui Jesús didza' sal-la' si' yë'ë bönni' na', para gaca ila'chúguië' queë' gátië'. **60** Cuntu nu bila'dzölinë' sal-la' bila'dxinë' bönni' zián, en gula'nnë' queë' le cabí nácatë. Ga búdxite bila'dxinë' chopë' bönni', ate' lu yöl-la' rizi' yë' quégäquië' gula'nnë' queë', **61** ta'nnë':

—Bönni' ni gunnë': "Huaca uquínnaja' yudo' queë' Dios, ate' uchisa' le ia'tsonna dzasö."

62 Ní'irö guzuínë' bixúz lo na', en rë' Jesús:

—¿Naru' cabí rubí'its'o' didza'? ¿Bizxi caz lë ni ta'nnë' bönni' ni quiu'?

63 Jesús biti' bi gunnë'. Ní'irö bixúz lo gudxë' Lë':

—Ni'a queë' Xanru' Dios ban rinná bé'eda' Li' quíxjö'u le nácatë. Gudíxjö'i netu' channó nacu' Li' Cristo, Zxi'inë' Dios.

64 Jesús rë' lë':

—Ca na' rnno' naca'. Le nácatë rea' libí'ili', ilé'eli' neda', Bönni' Gulje' Bönachi, rö'a cuita lë'ë ibëla Dios, ga ni' dë lu na'a yöl-la' unná bë', ate' guída' lu böaj lízxiba, en idxina' ga zóali'.

65 Ní'irö lu yöl-la' rile queë' guchözë' bixúz lo lari' nácuë', rnnë':

—¡Gunnë zí'ë bönni' ni queë' Dios! ¿Núzxirö naquíniru' nu innë' queë' bönni' ni? Chibiyón quézili' didza' zí' bë'ë queë' Dios. **66** ¿Nacxi rusáca'li' queëli'?

Bulu'bí'ë didza', gula'nnë':

—Nabáguë'ë xíguia' gátië'.

67 Ní'irö bulu'chejë' zxöna'lahuë' Jesús, en gulu'ë dö' queë'. Gula'gápë'ë ru'ë Jesús ia'zíca'rë', **68** en të' Lë':

—¿Nácatso' Li' Cristo? Gunnëya'atsöca' na'a, ¿nuzxí na' gudapa' Li'?

Pedro rnne': "Biti' núnbe'a-në' Jesús"

(Mr. 14:66-72; Lc. 22:56-62; Jn. 18:15-18, 25-27)

69 Tsanni ni' gulaca lë na', rö'ë Pedro lö'alö, ate' bidxinnu tunu nigula huen dxin ga na' zoë', ate' rnnanu:

—Lësca' li' gudálenu' Jesús, bönni' Galilea na'.

70 Gudá'baguë'ë Pedro lögaca böñachi nacuá' ni', rnnë':

—Biti' nözda' nuzxi que na' ru'u didza'.

71 Cate' birúajë' Pedro ga nu riyaza lö'a, bilé'enu-në' ia'tunu nigula, ate' gúdxinu nupa nacuá' ni':

—Bönni' ni gudálenë' ca' Jesús, bönni' Nazaret na'.

72 Leyúbólö gudá'baguë'ë Pedro, en buzötjë' Dios, rnnë':

—Biti' ca' núnbe'a-në' bönni' ni.

73 Iá'láti'do'os gudzé, gula'biga' nupa nacuá' ni' ga na' zoë' Pedro, en të' lë':

—Le nácatë li' nunu' ca' tsözxón légaquië' tu' naca bë'u yöl-la' ru'isö quiu' didza'.

74 Ní'irö gusí lahuë' Pedro rudyá dö' cuinë', en ruzötjë' Dios, rnnë':

—Biti' ca' núnbe'a-në' bönni' ni.

La' ná'asö gurödxitéba' böra. **75** Ní'irö yójnenë' Pedro didza' gudxë' Jesús lë', gunnë': Cate' si' códixilöba' böra, tsonna luzuí chigunnó' biti' núnbe'u neda', ate' burúajë' Pedro ni', en gurödxi yéchi'dë'ë.

¹ Cate' za' rení' dza na', gulún xtídza'gaquië' yúgu'té bixúz unná bë' len bönni' gula tu'zéajni'inë' bönni' judío para ilútië' Jesús. ² Gula'chë'ë Jesús nágüe'ë, ate' bulu'dödë' Lë' lu né'ë Poncio Pilato, bönni' rinná bë'ë uláz que yödzö Roma.

Ratië' Judas

³ Cate' chinözinë' Judas, bönni' na' budödë' Jesús lu ná'agaquië' bönni' yudo', narugu queë' Jesús gátië', buf'innë', ate' yöju'ë chi uruá' dumí plata na' lu ná'agaquië' bixúz unná bë', en yugu' bönni' gula na'. ⁴ Rë' légaquië':

—Bena' dul-la' tu' budöda'-në' bönni' tsahui' gátië'.

Ní'irö té' lë':

—Biti' gun lë ni ga cõ'ötu' bönniga. Le ben cazu' li' na'.

⁵ Ní'irö gurú'unë' Judas yugu' dumí plata na' ga naca chila yudo', ate' buzë'ë ni', en yöjsí yenë'.

⁶ Bulu'zi'ë bixúz unná bë' yugu' dumí plata na', ta'nnë':

—Biti' sa'yéaj cú'uru' dumí ni ga rigú'uru' dumí que yudo', tu' naca lazxjë' tu bönni' ratië' bönnachi.

⁷ Ní'irö gulún xtídza'gaquië', ate' gulá'uinë' dumí na' tu la' yëla queë' tu bönni' huen rö'ö para gaca ga ila'gáchë'ë bönni' zi'tu'. ⁸ Que lë ni na', ga ridxitë' na'a dza nazí'i le lataj na', La' Yëla Rön. ⁹ Caní guca ca na' gunnë' Jeremías, bönni' bë'ë didza' uláz queë' Dios, gunnë': "Gula'guélë'ë chi uruá' dumí plata na', tsca le gula'zéqui'në' bönni' Israel Lë', ¹⁰ ate' dumí na' gulá'uinë' la' yëla queë' tu bönni' huen rö'ö. Lë ni bulu'inë' Xana' neda'."

Ridxinë' Jesús lahuë' Pilato

(Mr. 15:2-5; Lc. 23:3-5; Jn. 18:33-38)

¹¹ Cate' bulu'sudxinë' Jesús lahuë' Pilato, bönni' na' rinná bë'ë uláz que yödz Roma, bönni' ni gunábinë' Jesús, rë' Lë':

—¿Nacu' Li' Bönni' inná bé'enë' bönnachi judío?

Jesús rë' lë':

—Ca nácasö rnno'.

¹² Cate' yugu' bixúz unná bë' len bönni' gula tu'zéajni'inë' bulu'zégui'ë Jesús didza', biti' bi didza' bubí'ë Jesús. ¹³ Ní'irö Pilato rë' Jesús:

—¿Naru' cabí riyöntsenu' cate' xö le ta'nnë' quiu'?

¹⁴ Jesús biti' bi didza' bubí'ë. Caní guca, bubáninë' bönni' unná bë' na'.

Rirugu queë' Jesús gátië'

(Mr. 15:6-20; Lc. 23:13-25; Jn. 18:38-19:16)

¹⁵ Cate' naca dza Laní Pascua na', dë caz tu le runë' Pilato, bönni' unná bë' na', ca ta'naba bönnachi rusanë' tuë' bönni' yu'ë lidxi güië, nútítës nu té'ëni usanë'. ¹⁶ Dza na' tu bönni' nabáguë'ë xíguia', lë' Barrabás, yu'ë lidxi güië ni'.

¹⁷ Cate' bulu'dubi bönnachi zián ni', Pilato gunábinë' légaquië', rnne': —¿Nuzxi rë'ënili' usana' queëli'? ¿Naru' Barrabás o Jesús, Bönni' na' lë' Cristo?

¹⁸ Caní gunnë' Pilato tu' réquibe'enë' bulu'dödë' bönni' yudo' Jesús lu né'ë tu' tu'zxé'enë' Lë'.

¹⁹ Tsanni ni' rö'ë Pilato ga na' ruchi'a rusöröë', nigula queë' gusöl-la'nu nu tsöjödxí lë', rnna:

—Biti' bi gunu' queë' bönni' tsahui' ni, tu' güdxide'eda' guduyëla lu yëla bëchigal tu' nözinë' Lë'.

20 Yugu' bixúz unná bë' len bönni' gula tu'zéajni'inë' gula'gú'u yöl-lë'ë bönachi zián na' para ila'nabi Pilato usanë' Barrabás na', ate' gútië' Jesús.

21 Leyúbölä bë'ë didza' bönni' unná bë' na', rë' légaquië':

—¿Núzxilë' chopë' ni rë'ënili' usana'-në' queëli'?

Gula'nnë':

—Barrabás.

22 Ní'irö Pilato gunábinë' légaquië', rnnë':

—¿Nacxi guna' queë' Jesús, bönni' na' lë' Cristo?

Yúgu'të' ta'nnë':

—¡Budë'ë lë'e yaga cruz!

23 Ní'irö bönni' unná bë' na' rë' légaquië':

—¿Bizxi dö' benë'?

Zídzajrö gulu'ë' didza', ta'nnë':

—¡Budë'ë lë'e yaga cruz!

24 Cate' réquibe'enë' Pilato biti' birúaj xtídzë'ë, pero gula'dzátsarö bönachi, ní'irö gudélë'ë nisa, en gudibi né'ë lógaquië', rnnë':

—Biti' bi xíguia' nabága'a neda' tu' nözi yöl-la' guti queë' bönni' tsahui' ni. Le gun cázali' libí'ili' lë ni.

25 Bulu'bí'i didza' yúgu'të bönachi ni', ta'nná:

—¡Yöl-la' guti queë' bönni' ni ibága'tu' netu', en ila'baga' ca' zxí'initu'!

26 Ca' guca, Pilato busanë' Barrabás na' lu ná'agaquië'. Ní'irö gunná bé'enë' bönni' röjáquië' gudil-la ila'guiné' Jesús, ate' gudödi ni' budödë' Lë' lu ná'agaquië' para ulu'dé'ë Lë' lë'e yaga cruz.

27 Yugu' bönni' röjáquië' gudil-la nacu'ë lu né'ë bönni' unná bë' na' gula'chë'ë Jesús lu yu'u yúlahui' nazí'i le pretorio, ate' ni' bulu'tubë' yúgu'të bönni' röjáquië' gudil-la nacu'ë ni' ga na' zoë' Jesús. **28** Ní'irö gula'lecjë' lari' nácuë' Jesús, en bulu'gácuë' Lë' tu lari' xiná chul-la, ca rácugaca nupa ta'nná bë'.

29 Bulu'dxíë' icjë' tu le néquini ni'a në'e yaga yötsi' le naca ca le dxia icjë' bönni' rinná bë'ë, en bulu'zóë' tu guido' lu né'ë ibëla le rului'i ca tu yaga que bönni' yúlahui'. Ní'irö bulu'zóá zxibë' lahuë', en bulu'titjë' Lë', ta'nnë':

—¡Bica' ba Li', rinná bë'enu' bönachi judío!

30 Ní'irö bulu'chejë' Lë' zxöna', ate' bulu'guélë'ë gui na', en gula'guiné' icjë'.

31 Gudödi bulu'titjë' Jesús, gula'lecjë' lari' na' nácuë', ate' bulu'gácuë' Lë' lari' que cazë'. Ní'irö gula'chë'ë Lë' para tsöjdá'agaquië' Lë' lë'e yaga cruz.

Tu'dé'ë Jesús lë'e yaga cruz

(Mr. 15:21-32; Lc. 23:26-43; Jn. 19:17-27)

32 Cate' ni' bila'rúajë' bönni' na', yöjxáca'gaquië' Simón, tu bönni' Cirene, ate' gulunë' ga bi'ë yaga cruz queë' Jesús.

33 Cate' bila'dxinë' lataj nazí'i le Gólgota, le rnna lu didza' xidza', Lataj Que Böga' Ícjaru', **34** bulu'gui'jë' Jesús nupi zi nutsí'i zxígala'aba' böa' guixi'. Cate' buxi'i ri'ë Jesús, biti' gú'unne' guí'jë'.

35 Cate' chinudá'agaquië' Lë' lë'e yaga cruz, gula'guisië' lari' nácuë', en bulu'quitjë' lahui le gaca bë' núzxilë' guequi queë'. Caní guca, budxín lë na' gunnë' bönni' bë'ë didza' uláz queë' Dios, gunnë': "Gula'guisië' lari' nácuá', en bulu'quitjë' lahui le gaca bë'." **36** Ní'irö gula'bö'ë ni', tu'yúë' Jesús. **37** Lëscá' bulu'zóë' lë'e yaga cruz ícjälë' Jesús tu didza' le riguixjö' le nabáguë' le rnna caní: "Bönni' ni Jesús, Bönni' rinná bë'enë' bönachi judío."

³⁸ Ga ni' dë'ë Jesús, bulu'dë'ë ca' lë'egaca yaga cruz chopë' bönni' gubán. Tuë' bulu'dë'ë cuita lë'ë ibëla, en ia'túë' na' cuita lë'ë yöögöla. ³⁹ Gula'dödë' ni' yugu' bönni' bulu'lidza zi'ë Jesús, en bulu'tá Ícjagaquïë', tu'titjë' Lë', ⁴⁰ ta'nnë':

—Ön, Li' na' uquínnaju' yudo', ate' tsonna dzasö ca' uchísatso' le! ¡Busólá cuinu' na'a channö nacu' Li' Zxi'inë' Dios! ¡Böjtatsöca' lë'e yaga cruz na'!

⁴¹ Lësca' caní bulu'titjë' Lë' yugu' bixúz unná bë' len yugu' bönni' yudo' usedi, en yugu' bönni' yudo' fariseo, len bönni' gula tu'zéajni'inë', ta'nnë':

⁴² —Yugu' nu yübölö busólë' bönni' ni, pero biti' gaca usölá cuinë'. Channö náquië' Bönni' inná bë'enë' böñachi Israel, huötjatsöquië' na'a lë'e yaga cruz, ate' tséajlë'érü' Lë'. ⁴³ Lë' buzxöni ládxë'ë Dios. Dios usólá cazë' Lë' na'a channö raza ládxë'ë Lë', tu' gunnë': "Zxi'inë' Dios naca'."

⁴⁴ Lësca' caní yugu' bönni' gubán na' dá'gaquïë' lë'egaca yaga cruz ga ni' dë'ë Jesús bulu'lidza zi'ë Lë'.

Ratië' Jesús

(Mr. 15:33-41; Lc. 23:44-49; Jn. 19:28-30)

⁴⁵ Cate' bidxín huagubidza, guchul-la idütë yözdölió ga bidxitnë idú ridödi xihuö. ⁴⁶ Idú ridödi xihuö na', bë'ë zidzaj didza' Jesús, rnnë':

—Elí, Elí, ¿lama sabactani?

Didza' ni rnna lu didza' xidza': "Dios quia', Dios quia', ¿bizz que nubéaj ládx'u neda?"

⁴⁷ Cate' nupa nacuá' ni' bila'yöni didza' ni, ta'nná:

—Bönni' ni rulidzë' Elías, bönni' ni' bë'ë didza' uláz queë' Dios.

⁴⁸ La' guxítitë' tuë' bönni' nútsë'ë ládjagaquïë', en gudélë'ë tu le bululu rizxupi nisa, ate' buxúpинë' le nupi zi, en buzóë' le tu lu gui, ate' butságuië' le ru'ë Jesús para xupë'. ⁴⁹ Ní'irö ia'zíca'rë' bönni' ni' ta'nnë':

—¡Gulözagårö! ¡Uyútsöca'ru' channö huidë' Elías usölë' Lë'!

⁵⁰ Leyübölö gurödxi'ë zidzaj Jesús, ate' burúajtë bö' naca cazë', gútite'. ⁵¹ La' ná'asö biröza'té lari' nal-la'lu yudo', birúaj choplö, le gudela' icjlö ga bidxitnë xiní'i. Ní'irö gudödi budó' zxu', en gula'lá'a guiöj. ⁵² Gula'yalaj yero ba quégaca nupa chinátigaca, nupa ni' gula'yéajlë' Dios, ate' bulu'bán böñachi na'. ⁵³ Gudödi bubanë' Jesús, bulu'rúa'je' bönni' na' yero ba quégacië', en gula'yázi'ë yözdö lá'ayi Jerusalén, ga ni' bila'lé'e böñachi zián légaquïë'.

⁵⁴ Ní'irö gúdxinë' bönni' na' rinná bë'enë' bönni' röjáquië' gudil-la, enca' yugu' bönni' röjáquië' gudil-la nacuá'lenë' lë' tu'yúë' Jesús, ate' gunnë':

—Le nácatë bönni' ni gúquië' Zxi'inë' Dios.

⁵⁵ Zí'tu'sö gula'cuá'anu nigula zián tu'yunu Jesús, nigula na' gula'dálennu Jesús cate' ni' buzë'ë luyú Galilea, ate' gulunnu xichinë', gula'gú'unu le gulahuë'. ⁵⁶ Lësca' María Magdalena, en María, xiná'agaquïë' Jacobo, en José, nútsa'gacanu ládjagacanu, ate' zóanu ca' ni' xiná'agaquïë' yugu' zxi'inë' Zebedeo.

Ta'gu'ëe Jesús yero ba le nadaj lë'e guí'a guiöj

(Mr. 15:42-47; Lc. 23:50-56; Jn. 19:38-42)

⁵⁷ Cate' chiridzö' dza na', bidxinë' José, bönni' Arimatea, tu bönni' rilé'enë' yöl-la' tsahui' queë', en dë'ë ca' Jesús. ⁵⁸ Bönni' ni yögyptü' Pilato, en gunabë' lataj u'ë Jesús. Ní'irö Pilato gunnä bë'ë ulu'nödzë' queë' Jesús. ⁵⁹ Guzxi'ë José Lë', en buchölinë' Lë' tu lari' nazaca'. ⁶⁰ Ní'irö gulu'ë Lë' lu yero ba cubi queë' le naguidjë' lë'e guí'a guiöj. Budë'ë tu guiöj blaga zxön ga nu riyaza yero

ba na', ate' söhuöjë'. ⁶¹ Gula'cuá'anu María Magdalena, en ia'tunu María ni', rö'gacanu ra' yeru ba na'.

Yugu' bönni' röjáquië' gudil-la tapa chi'ë ba queë' Jesús

⁶² Cate' za' rení ia'tú dza, gudödi bulu'pé'ë que dza lá'ayi quégaquië' bönni' judío, bulu'dubë' yugu' bixúz unná bë', en yugu' bönni' yudo' fariseo ga zoë' Pilato. ⁶³ Të' Pilato:

—Bönni', röjnetu' bi gunnë' bönni' rizí yë'ë na', cate' ni' zoë' nabanë', gunnë': “Cate' gaca tsonna dza ubana' lu yöl-la' guti.” ⁶⁴ Que lë ni na' gunná be'e nupa ilún chi'i ba ni' ga idxintë dza bunní, para cabí ídigaquië' bönni' usëda queë' chi'i dzö'ölö, en ulu'béajë' Lë'. Ní'irö ilë' bönnachi: “Bubanë' Jesús lu yöl-la' guti.” Channö caní gaca, didza' cabí nácatë ni ilu'ë güntérö huiá' dö' ca ben didza' cabí nácatë na' gulu'ë zí'alö.

⁶⁵ Pilato gudxë' légaquië':

—Ni nacu'ë bönni' röjáquië' gudil-la. Guli'chë'ë queëli'. Guli'tséaj, guli'gún chi'i yeru ba na' tsca séqui'li' gunli'.

⁶⁶ Ní'irö yöjáquië' ni', en bulu'sayjë' dxi'a yeru ba na', en bulu'dé'ë lë'e guiöj na' tu le gaca bë' channö isalaj, ate' bulu'cá'anë' ni' bönni' röjáquië' gudil-la ilún chi'ë le.

28

Rubanë' Jesús lu yöl-la' guti (Mr. 16:1-8; Lc. 24:1-12; Jn. 20:1-10)

¹ Cate' chigudödi dza lá'ayi quégaquië' bönni' judío, en chizá' rení dza domingo, yöyjúgacanu María Magdalena en ia'tunu María na' yeru ba queë' Jesús. ² Tsálido'os gudödi budó' zxu'. Caní guca, tu' böjtë' tuë' gubáz lá'ayi queë' Xanru' narúajë' yehua' yubá. Bidxinë' ra' yeru ba na', ate' gudüe' guiöj blaga zxön na', en gurö'lu guiöj na'. ³ Nalá' lahui gubáz lá'ayi na' ca yösa bení, ate' zxila'do'os naca larí' nácuë'. ⁴ Cate' yugu' bönni' na' röjáquië' gudil-la tapa chi'ë yeru ba na' bila'lé'enë' lë', guládxinë', en gula'zxízië'. Gula'dzö'ë lu yu, en guláquië' ca bönni' nati caz. ⁵ Ní'irö gubáz lá'ayi na' gudxë' yugu' nigula na', rmnë'.

—Biti' gádxili'. Nözda' ruguíjali'-në' Jesús, bönni' na' bulu'dé'ë lë'e yaga cruz. ⁶ Biti' zoë' ni tu' chibubanë' ca na' chigunná cazë' Lë'. Guli'dá, uyuli' ga ni' gutë' Xanru'. ⁷ Guli'tséaj na'a, guli'tsöjtixödxi yugu' bönni' usëda queë' chibubanë' Jesús lu yöl-la' guti, ate' na'a Lë' cazë' inöruë' loli' saca' luyú Galilea. Ni' ulé'eli'-në'. Chigudxa' libíili' le gulu'ë Dios lu na'a.

⁸ Ní'irö la' bulu'zá'ténu' ra' yeru ba na', tádxinu, en tu'dzéjanu, ate' carelö söjácanu söjtixjöi'iguequinu yugu' bönni' usëda queë'. ⁹ Tsanni ni' söjácanu, Jesús yöjtságuië' légacanu, ate' ré' légacanu:

—Padiux.

Ní'irö gula'bíga'nu ga zoë' Jesús, en bulu'nida'nu ni'ë. Gula'yéaj ládxigacanu Lë'. ¹⁰ Ní'irö Jesús ré' légacanu:

—Biti' gádxili'. Guli'tséaj, guli'tsöjtixjöi' i yugu' böcha'a tsöjáquië' saca' luyú Galilea, ate' ni' ulu'lé'enë' neda'.

Le gula'guíxjö'ë yugu' bönni' röjáquië' gudil-la

¹¹ Tsanni ni' söjácanu nigula na', yugu' bönni' na' röjáquië' gudil-la gulún chi'ë yeru ba na' bulu'dxinë' lu yödzö ni', ate' gula'guíxjöi' inë' yugu' bixúz unná bë' yúgu'të lë na' gulaca. ¹² Cate' chibulu'tubë' yugu' bönni' gula

tu'zéajni'inë', gulún xtídza'gaquië'. Ní'irö bulu'nödzjë' dumí zián quégaquië' bönni' na' rójáquië' gudil-la. ¹³ Të légaquië':

—Caní innali: “Bila'dxinë' bönni' usëda queë' chi'i dzö'ölö, en bulu'béaje' Lë' tsanni ni' rásitu’.” ¹⁴ Channö huayönnë' bönni' rinná bë'ë lë ni, netu' uzéajni'itu' lë', en guntu' ga biti' bi gunë' queëli'.

¹⁵ Ní'irö yugu' bönni' rójáquië' gudil-la na' gula'zi'ë dumí na' ate' yójéngäquië' ca na' chinazédagaquië'. Caní guca, tu'zé' bönni' judío didza' ni ga ridxitnë na'a dza.

Jesús risöl-lë'ë yugu' bönni' gubáz queë'
(Mr. 16:14-18; Lc. 24:36-49; Jn. 20:19-23)

¹⁶ Ní'irö idxinéajtë' bönni' usëda queë' Jesús yójáquië' luyú Galilea, ate' bila'dxinë' lu gui'ado' na' chibului'inë' Jesús légaquië'. ¹⁷ Cate' bulu'lé'enë' Jesús, gula'yéaj láxhi'gaquië' Lë', pero bal-lë' gulaca chopá láxhi'gaquië'. ¹⁸ Ní'irö gubigui'ë Jesús ga na' nacu'ë, en rë' légaquië':

—Dios chinudödë' lu na'a yúgu'të yöl-la' unná bë' yehua' yubá, en luyú ni. ¹⁹ Que lë ni na', guli'tséaj, guli'tsöjsëdi yúgu'të böñachi idútë yödzölió. Buli'quila légaquië' nisa, ugunli' dxin Lë' Dios Xuz, en Lë' Dios Zxi'ini, en Lë' Dios Bö' Lá'ayi. ²⁰ Guli'sëdi légaquië' ilunë' yúgu'të lë na' gunná bë'eda' libí'ili'. Buli'yútsöca', nedá' caz zóalena' libí'ili' yúgu'të dza ga idxinxrö dza úxni que yödzölió. Ca' gaca.

DIDZA' DXI'A BUZÚAJË' MARCOS

*Libán benë' Juan, bönni' buquile' bönnachi nisa
(Mt. 3:1-12; Lc. 3:1-9, 15-17; Jn. 1:19-28)*

¹ Caní gusí lo didza' dxí'a ca guca queë' Jesucristo, Zxí'inë' Dios.

² Budxín lë na' buzúajë' lu guichi Isaías, bönni' bë'ë didza' uláz queë' Dios, le gunnë' Dios:

Buyútsöca', risöl-la'a bönni' gubáz quia', inöruë' Lo'.
Lë' upë'ë nöza ga tödu'.

³ Yön chië' tu bönni' ulidzë' zidzaj lu lataj cá'asö, innë':
"Buli'pá'a nöza para idxín Xanru' yichaj lázxdo'oli'.
Buli'béaj li yugu' nöza lasi ga töde'."

⁴ Caní budxín, tu' ruquilë' Juan bönnachi nisa lu lataj cá'asö, en runë' libán para ila'dila bönnachi nisa, bönni' na' bulu'bí'i ládx'i gaquië' para uniti lahuë' Dios dul-la' nabágagaquië'. ⁵ Bila'rúaj bönnachi zián yúgu'té yödzö luyú Judea, enca' yödzö Jerusalén, en yöjáquië' ga na' zoë' Juan, ate' Juan na' buquile' légaquië' nisa lu yegu Jordán, bönni' na' gula'xóalépë' dul-la' nabágagaquië'.

⁶ Nácuë' Juan lari' néquini lítsa'ba' böa', en núguë'ë lë'ë tu guidi. Rahuë'-ba' böchí'zu, en re'je' le zxixi que buzzo'. ⁷ Runë' Juan libán, rnneë':

—Si' zë'ë bönni' tödi na'a, náparë' yöl-la' unná bë' ca neda'. Biti' naca' neda' lesaca' yéchua', para ilecxa' xiráchue' nudë'ë. ⁸ Neda' ruquila' libí' illi' nisa, pero Lë' gunë' le rulu'i soñ yöl-la' ridila nisa ni, uchízië' libí' illi' Dios Bö' Lá'ayi.

*Ridile' Jesús nisa
(Mt. 3:13-17; Lc. 3:21-22)*

⁹ Tu dza ni' birúajë' Jesús yödzö Nazaret luyú Galilea, ate' Juan na' buquile' Lë' nisa lu yegu Jordán. ¹⁰ Cate' burúajë' Jesús lu nisa, la' ná'asö bilé'enë' guyalaj lúzxiba, en ruhuötjë' Dios Bö' Lá'ayi, rulu'i cuinë' ca tuba' gu'döödö, en bidisóalenë' Lë'. ¹¹ Biyön chi'i nu ru'i didza' yehua' yubá, rnna:

—Li' nacu' Zxf'ina'. Nadxi'ida' Li', en raza ládx'a' Li'.

*Re'ëni tu' xihui' gun ga ibágue'ë Jesús dul-la'
(Mt. 4:1-11; Lc. 4:1-13)*

¹² Ni'irö Dios Bö' Lá'ayi guchë'ë Jesús bayudxi lu lataj cá'asö. ¹³ Guzóë' Jesús lataj cá'asö na' idú choá' dza, ate' gó'uni Satanás tu' xihui' gun ga ibágue'ë Jesús dul-la'. Guzóë' Jesús ga ni' ta'daba' böa' guixi' dzö'öba' gu'ado'. Yugu' gubáz lá'ayi queë' Dios gulácalenë' Jesús, en gula'gu'ë le gudahue'.

*Rusédinë' Jesús bönnachi luyú Galilea
(Mt. 4:12-17; Lc. 4:14-15)*

¹⁴ Gudödi gula'gu'ë Juan na' liidxi guíë, sa'yéajë' Jesús luyú Galilea. Runë' libán ni' que didza' dxí'a ca rinná bë'ë Dios. ¹⁵ Caní rnneë':

—Chibidxín dza. Chizóa idinná bë'ë Dios. Buli'bí'i ládx'i li', en guli'tséajlé' didza' dxí'a ni.

*Rulidzë' Jesús tapë' bönni' uzxön böla
(Mt. 4:18-22; Lc. 5:1-11)*

¹⁶ Tsanni ni' ridë' Jesús ra' nísado' luyú Galilea, bilé'enë' Simón len Andrés, bönni' böchë'ë Simón na'. Nácagaquië' uzxön böla, en ta'chiljë' yöoxaj böla quégaquië' lu nisa na'. ¹⁷ Jesús gudxë' légaquië', rnneë':

—Guli'dutá' neda', ate' guna' ga iché'ëli' bönachi quia' neda', gunli' ca runli' rizönlí'-ba' böla.

¹⁸ La' bulu'cá'anatë' yöxaq quégäquië', en söjácalenë' Jesús.

¹⁹ Gudödë' Jesús ia'láti'do' ní'ilö, ate' bilé'enë' Jacobo, en Juan, yugu' zxí'inë' Zebedeo, nacu'ë lë'e bárcodo' quégäquië', tu'únë' yöxaq böla quégäquië'. ²⁰ Jesús la' bulidzté' légaquië', ate' bulu'cá'anë' xúzgaquië' Zebedeo, dzáguië' yugu' huen dxin queë' lë'e bárcodo' na', ate' söjácalenë' Jesús.

Tu bönni' yu'u lë' bö' xihui'

(Lc. 4:31-37)

²¹ Bila'dxinë' Jesús, en yugu' bönni' dá'gaquië' Lë' lu yödzö Capernaum. Cate' ni' naca dza lá'ayi quégäquië' bönni' judío, guyázië' Jesús yu'u ga tu'dubë' bönni' judío, en tu'sëdë' queë' Dios, ate' gusí lahuë' rusédinë' nupa nudúbigaca ni'. ²² Bulu'báninë' ca na' rusédinë' Jesús, tu' rusédinë' ca runë' tu bönni' dë lu në'ë, en caléga ca tunë' bönni' yudo' usëdi. ²³ Zóatë' ca' tu bönni' yu'u lë' bö' xihui' lu yu'u ga na' tu'dubë' tu'sëdë' queë' Dios, ate' gurödxí'ë bönni' na', rnnë':

—¿Bizxi rál-la'tu' quiu', Jesús, bönni' Nazaret? ¿Za'tsu' usunítiu' netu'? Núnbë'a Li', nacu' Bönni' Lá'ayi queë' Dios.

²⁵ Jesús buzenë' le bach, rnnë':

—Busayaj ru'u, en burúaj lu bönni' ni.

²⁶ Ní'irö bö' xihui' na' buxízida'bönni' na' yu'u lë', ate' gurödxí'a zidzaj, en la' burúajtë. ²⁷ Bulu'báninë' yúgu'të bönni' nacu'ë ni', ate' gula'nabi luzë'egaquië', ta'nnë':

—¿Bizxi caz lë ni? ¿Naru' nácatsö xibá cubi? ¡Len yöl-la' unná bë' rinná bë' enë' yugu' bö' xihui', ate' tun ca rnnë':

²⁸ La' guzétë didza' que yöl-la' huáca queë' Jesús, ate' bila'yöni bönachi idútë luyú Galilea na'.

Ruúnë' Jesús xiná'anu nigula queë' Pedro

(Mt. 8:14-15; Lc. 4:38-39)

²⁹ Ní'irö burúajë' Jesús lu yu'u ga na' tu'dubë' tu'sëdë' queë' Dios, en la' guyéajlente' Jacobo, en Juan, ate' bila'dxinë' lídxigaquië' Simón, en Andrés.

³⁰ Ni' dënu xiná'anu nigula queë' Pedro, yú'unu tu xilá. La' gula'guíxjö'i'itenë' Jesús ca raca queënu. ³¹ Ní'irö gubígu'ë Jesús, ate' gudélé'ë ná'anu, en guchisë'-nu. La' burúajtë tu xilá na' yú'unu, ate' bupá'anu le gulahuë'.

Ruúnë' Jesús zián nupa te'e

(Mt. 8:16-17; Lc. 4:40-41)

³² Cate' chiridzö', ca gudxía gubidza, la' dujuá'gacatë' yúgu'të nupa te'e, en yugu' bönni' yu'u légaquië' bö' xihui' ga zoë' Jesús. ³³ Yúgu'të bönachi lu yödzö bila'guírø ga nu riyaza yu'u ga na' zoë' Jesús. ³⁴ Jesús bunë' zián nupa te'e, naca zián yödzöhuë' té'enë'. Bubéajë' ca' zián bö' xihui' yú'ugaca bönachi na'. Biti' bë'ë lataj ila'nnë bö' xihui' na' tu' núnbë'gaca Lë' Nu náquië'.

Runë' libán Jesús luyú Galilea

(Lc. 4:42-44)

³⁵ Zí'acado' guyasë' Jesús, ni' naca chul-la. Burúajë' yödzö na', en sa'yéajë' tu lataj cá'asö, ate' ni' bulidzë' Dios. ³⁶ Simón, en nupa nacuá'len lë' söjdíljagaquië' Jesús. ³⁷ Cate' yójxáca'gaquië' Lë', të' Lë':

—Yúgu'të bönachi tu'guílaj Li'.

³⁸ Ní'irö Jesús gudxë' légaquië', rnnë':

—Uyéajru' yugu' dzaga yödzö, para guna' ca' libán ni'. Que lë ni na' birúaja'.

³⁹ Caní guca, gudödë' Jesús idú luyú Galilea, runé' libán lu yu'u gapa tu'dubë' bönni' judío, tu'sédinë' queë' Dios, ate' rubéajë' bö' xihui' yú'ugaca bönachi.

Tu bönni' ré'enë' huë' nudzu' ruzödi

(Mt. 8:1-4; Lc. 5:12-16)

⁴⁰ Tu bönni' ré'enë' huë' nudzu' ruzödi bidxinë' ga zoë' Jesús. Buzóá zxibë', en güta'yuë' lahuë', rnnë':

—Channö rë'ënu', huáca unu' neda'.

⁴¹ Jesús buéchi' ládxë'ë lë'. Bulí në'ë, gudanë' lë', en gudxë' lë':

—Ré'ënda'. Chinuhuöácu'.

⁴² Ca gunnë' ca', la' bunítitë huë' ré'enë', en böáquië' dxí'ado'. ⁴³ Ní'irö Jesús buzenë' bach bönni' na', en la' busöl-la'të' lë'. ⁴⁴ Caní gudxë' lë':

—Cuntu nu guío' ca bena' quiu', pero guyéaj, yöjlu'i cuinu' lahuë' bixúz, en yöjnödzaj para le böácanu' li' que yudo' ca na' gunná bë'ë Moisés, lë na' ulu'i bönachi chinuhuöácu'.

⁴⁵ Burúaje' bönni' ni, en gusí lahuë' riguíxjöi'inë' bönachi zián ca guca queë'. Tu' buzé' didza' ni, bíti'rö guca tsázië' Jesús yálajdo' tu lu yödzö, pero guzóasë' ní'lö gapa naca lu lataj cá'asö. Bönachi yúgu'të yödzö bila'dxín ga na' zoë' Jesús.

2

Bönni' ré'enë' huë' nacú'unië' bin

(Mt. 9:1-8; Lc. 5:17-26)

¹ Cate' chigudödi chopá tsonna dza, buázië' Jesús yödzö Capernaum, ate' guzé didza' zoë' yu'u. ² La' bulu'dúbitë bönachi zián ga na' zoë' Jesús, ga bidxi-intë bíti'rö guzxéqui' ila'cuá' ni', ni ra' yu'u, ate' Jesús benë' libán que xtídzë'ë lógaquië'. ³ Ní'irö bila'dxinë' ga na' zoë' Jesús tapë' bönni', nuá'agaquië' tu bönni' huë' nacú'unië' bin. ⁴ Bití' guca ila'dxinë' lahuë' Jesús tu' nacuá' bönachi zián ni'. Que lë ni na' gula'saljë' ícjo'olö ca dödilö ga zoë' Jesús. Cate' budxi bulu'dxië' yero na', ni' bulu'zötjë' le denë' bönni' huë' na'. ⁵ Cate' gúquibe'enë' Jesús ca na' ta'yéajlë'ë Lë', gudxë' bönni' huë' na':

—Zxi'ina', chibunít lahua' li' ca naca dul-la' nabágú'u.

⁶ Rö'ögäquië' bal-lë' bönni' yudo' usedi ni'. Ta'zá' ládxí'gaquië', ta'nnë': ⁷ ¿Bizz que ru'ë caní didza' bönni' ni? Rucá'anë' cá'asö Dios. Cuntu nu bönni' gaca uniti lahuë' dul-la'. Tuzë' Dios gaca gunë' lë ni. ⁸ La' gúquibe'etenë' Jesús le ta'zá' ládxí'gaquië', ate' gudxë' légaquië':

—¿Bizz que rizá' ládxí'li' caní? ⁹ Bití' naca böninga nu guiësö bönni' huë' ni chibunít lo dul-la' nabágüe'ë, pero naca böninga nu gun ga huöásë', en u'ë le denë', en uzë'e ni'ë. ¹⁰ Guna' le gaca bë' nedá', Bönni' Guljé' Bönachi, dë lu na'a luyú ni uniti lahua' dul-la' nabág'a gaca bönachi.

Ní'irö Jesús gudxë' bönni' huë' na':

¹¹ —Li' rea': Guyasa. Buá' le denu', en böaj lidxu'.

¹² La' guyásatë' bönni' huë' na', bu'ë le gútí'në', en burúaje' lógaca yúgu'të nupa nacuá' ni'. Bulu'báninë' yúgu'të, en gula'gu'ë Dios yöll-la' ba, ta'nnë':

—Catu caz rilé'etu' le caní.

Jesús rulidzë' Levi

(Mt. 9:9-13; Lc. 5:27-32)

13 Burúajë' Jesús yödzö Capernaum, na' gudödë' leyúbölö ra' nísado'. Bulu'dubi bönnachi zián ga zoë' Jesús, ate' Lë' busédinë' légaquië'. **14** Cate' ridödë' Jesús ni', bilé'enë' Leví, zxí'inë' Alfeo, rö'ë ga ruquízxjë' uláz que yödzö zi'tu'. Jesús gudxë' lë':

—Gudá' neda'.

La' guyásatë' Leví na', sa'yéajlenë' Jesús.

15 Gudödi guca lë ni, rö'ë Jesús rahuë' lu yu'u lidxë' Leví na', ate' zián bönni' uquízxaj, en ia'bal-lë' bönni' cá'asö rö'ölengaquië' tsözxön Jesús, en yugu' bönni' usëda queë'. Caní guca, tu' röjaca bönnachi zián len Jesús. **16** Cate' yugu' bönni' yudo' usedi, en yugu' bönni' yudo' fariseo, bila'lé'enë' Lë' rö'ë rágulenë' tsözxön yugu' bönni' uquízxaj, en ia'bal-lë' bönni' cá'asö, gulë' yugu' bönni' usëda queë' Jesús, ta'nnë':

—¿Bixzi caz runtsë? ¡Rë'aj rágulentsë' yugu' bönni' uquízxaj, en ia'bal-lë' bönni' dul-la'!

17 Biyönnë' Jesús didza' ni tuë, en gudxë' légaquië':

—Nupa nacuá' dxi'a biti' naquíniguequi nu un bönnachi, pero nupa te'e naquíniguequi nu un bönnachi. Za a neda', calëga dulízagaca' bönnachi tsahui', pero rulízagaca' bönnachi dul-la' para ulu'bí'i ládzi'gaca.

*Ru'ë Jesús didza' que yöl-la' run gubasa
(Mt. 9:14-17; Lc. 5:33-39)*

18 Tu dza ní' tunë' gubasa bönni' dá'gaquië' Juan, en bönni' dá'gaquië' yugu' bönni' yudo' fariseo, ate' bila'dxín nupa gula'nabi Jesús, ta'nná:

—¿Bixz que tunë' gubasa bönni' dá'gaquië' Juan, en bönni' dá'gaquië' yugu' bönni' yudo' fariseo, pero bönni' dá'gaquië' Li' biti' tunë' gubasa?

19 Bubi'ë didza' Jesús, rë' légaquië':

—¿Naru' réquitseli' ilún gubasa nupa nacuá' laní queë' bönni' rutsaga në'ë tsanni ni' bönni' na' rutsaga në'ë zóalenë' légaquië'? Tsanni ni' bönni' na' rutsaga në'ë zóalenë' légaquië', biti' gaca ilunë' gubasa. **20** Idxín dza cate' udúë' bönni' na' rutsaga në'ë, en bíti'rö sóalenë' légaquië', ate' dza ní'irö ilunë' gubasa.

21 'Cuntu nu bönni' udë'ë tu lari' cúbido' lu lari' chinatëbi, tu' utsupi' lari' cubi na', en huachöza' lari' tëbi na', ate' huaröza'rö lari' tëbi na'. **22** Lësca' caní cuntu nu bönni' quë'ë xisi uva cubi lu buzudi bidxi néquini guídi, tu' gal-la xisi uva cubi na', en ulá'a buzudi bidxi na' néquini guídi, ate' ilalaj xisi uva na', en gaca ditaj buzudi néquini guídi. Xisi uva cubi lu buzudi néquini guídi cubi ralla' cá'aru'.

*Bönni' dá'gaquië' Jesús ta'lecjë' do dza lá'ayi
(Mt. 12:1-8; Lc. 6:1-5)*

23 Tu dza lá'ayi quégäquië' bönni' judío, gudödë' Jesús gapa dë yöla zxoa' xtila, ate' bönni' usëda queë' gula'sí lógaquië' ta'lecjë' do ga dxía zxoa' xtila.

24 Ni'irö bönni' yudo' fariseo gulë' Jesús, ta'nnë':

—Buyútsöca'. ¿Bixz que tunë' bönni' dá'gaquië' Li' le cabí ral-la' gunru' dza lá'ayi?

25 Jesús gudxë' légaquië':

—¿Naru' cabí nulábanili' ca benë' David cate' gudunë'? Biyadzaj le ilahuë' lë', en nupa nacuá'len lë' **26** ate' guyází' lu yu'u queë' Dios cate' ni' náquië' bixúz lo Abiatar, en gudahuë' yöta xtila tu'cu'ë lahuë' Dios, lë' na' biti' dë lataj nu gagu, pero tuz bixúz dë lataj ilahuë' le. Bë'ë ca'le ilahuë' bönni' nacuá'lenë' lë'.

27 Ní'irö Jesúś gudxë' légaquië':

—Dios benë' dza lá'ayi le ulu'zí' xibé böñachi, calëga benë' böñachi para ilún chí'i dza lá'ayi. **28** Que lë ni na', neda', Bönni' Guljé' Bönachi, naca' Xani dza lá'ayi.

3

*Ruúnë' Jesúś tu bönni' narequi' në'ë
(Mt. 12:9-14; Lc. 6:6-11)*

1 Leyubölö guyu'ë Jesúś tu lu yu'u ga tu'dubë' tu'sëdë' bönni' judío queë' Dios, ate' zoë' ca' ni' tu bönni' narequi' në'ë. **2** Bönni' yudo' nacu'ë ni' tu'yüé' Jesúś channö únë' bönni' na' dza lá'ayi, tu' të'ënnë' ulu'zégu'ë Lë' didza'.

3 Ní'irö Jesúś gudxë' bönni' na' narequi' në'ë, rnne':

—Guyasa, en guzuí lógaca böñachi ni.

4 Jesúś gunabìnë' böñachi ni', rnne':

—¿Naru' dë lataj gunru' le naca dxí'a cate' naca dza lá'ayi o gunru' le ruá' dö? ¿Naru' dë lataj gunru' ga ila'deli' böñachi yöl-la' na'bán o usunítiru' le?

Gula'cuá' dxisö böñachi ni'. **5** Ní'irö len yöl-la' rilé queë', buyúé' Jesúś böñachi na' nacuá' gásibi'ilé'. Ruhu'innë' tu' nácagaquië' zidi ladxi'. Gudxë' bönni' na' narequi' në'ë, rnne':

—Bulí no'o.

Ní'irö bulí në'ë bönni' na', ate' böácatë dxí'ado' në'ë. **6** Ní'irö bulu'rúajë' bönni' yudo' fariseo, ate' la' guluntë' tsözxöñ didza' len bönni' dá'gaquië' Herodes bi ilun' queë' Jesúś, para ilútië' Lë'.

Tu'dubi böñachi zián ra' nísado'

7 Buzé'ë Jesúś ni' tsözxöñ len bönni' dá'gaquië' Lë', en bidxinë' ra' nísado', ate' sójácalen Lë' böñachi zián narúajgaca luyú Galilea, en luyú Judea. **8** Böñachi zián narúajgaca Jerusalén, en luyú Idumea, en ia'tsólá'a yegu Jordán, en yugu' yödözö nacuá' idú gásibi'ilö ga nacuá' yödözö Tiro, en yödözö Sidón bila'dxín ca' ga zoë' Jesúś. Caní gulunë', tu' bila'yönnë' ca nácagaca yugu' le zxöñ runë' Jesúś. **9** Que lë ni na' Jesúś Gunná bé'enë' bönni' dá'gaquië' Lë' ulu'cöztica'se' tu bárcodo' ga gaca cuenë', para cabí ulu'quí böñachi zián na' Lë'. **10** Caní guca tu' chibunë' zián nupa te'e, ate' bila'guirö böñachi bila'lé'e Jesúś, bulu'dxiga' böñachi na' yú'ugaca xini'ë Jesúś, ate' gula'bödxi'a, ta'nná:

—Nacu' Li' Zxf'inë' Dios.

12 Jesúś buzenë' le bach bö' xihui' na', cabí ila'guixjö' nu náquië' Lë'.

Riböë' Jesúś chinnu bönni' ilácagaquië' gubáz queë'

(Mt. 10:1-4; Lc. 6:12-16)

13 Ní'irö gurenë' Jesúś tu lu guí'ado', ga ni' bulidzë' nupa rë'ënë'. Gula'biguë'ë bönni' ni' gásibi'ilë'. **14** Jesúś bucu'ë chínnuë' bönni' ni, para ila'cuál'enë' Lë', en para isöl-lë'ë légaquië' tsójéngäquië' libán. **15** Budödë' lu ná'agaquië' yöl-la' huáca ulu'únë' nupa te'e, en ulu'beajë' bö' xihui' yú'ugaca böñachi. **16** Caní nácagaca lágaquië':

Simón, (buzóë' Jesúś ia'tú lë', Pedro),

17 Jacobo,

Juan, (bönni' böchë'ë Jacobo, ate' nácagaquië' zxí'inë' Zebedeo. Chopë' ni,

Jesúś buzóë' ia'tú lágaquië', Boanerges, le rnna lu didza' xidza': Bönni' Sínia' ca guziú'),

18 Andrés, Felipe, Bartolomé, Mateo, Tomás,
Jacobo, (zxí'inë' Alfeo),

Tadeo,
Simón, (bönni' ruí'i ládxë'ë yödzö queë'),
19 Judas Iscariote, (bönni' udödë' Jesús lu ná'agaquië' bönni' ilútië' Lë').

Yugu' bönni' yudo' ta'nnë': "Tu' xihui' dzaga Jesús"
(Mt. 12:22-32; Lc. 11:14-23; 12:10)

Gudödi ni' Jesús len bönni' dá'gaquië' Lë' bulu'dxinë' tu lu yu'u. **20** Leyübölö bila'guiró böñachi zián ga zoë' Jesús, ate' bíti'rö guta' lataj bi ilahuë' Jesús, en bönni' na' dá'gaquië' Lë'. **21** Cate' di'a dza queë' Jesús bila'yönnë' ca raca queë', bila'dxinë' ni' para ulu'chë'ë Lë', ta'nnë': Richixi icjë'.

22 Lësca' caní bönni' yudo' usedi, narúajgaquië' Jerusalén gula'nnë' queë', ta'nnë':

—Dzaga Belzebú, xángaca bö' xihui' Lë', ate' len yöl-la' unná bë' que rubéajë' yugu' bö' xihui'.

23 Ní'irö Jesús bulidzë' yugu' bönni' yudo' usedi na', en bucúdu'ë didza', rnnë':

—¿Naru' ubéaj la' cuinsi Satanás tu' xihui'? **24** Channö ila'rúaj choplö böñachi tu yödzö, en ila'díl-lalen luzë'eguequi, bíti' gaca idía' yödzö na'. **25** Lësca' caní channö ila'rúaj choplö böñachi nacuá' tu yu'u, en ila'díl-lalen luzë'eguequi, bíti' gaca ila'día' böñachi nacuá' yu'u na'. **26** Que lë ni na', channö Satanás tu' xihui' tá'bag'a' luzë'e, narúajgaca choplö bö' xihui'. Biti' gaca idía' yöl-la' unná bë' que, pero chizóa údxi que.

27 'Cuntu nu gaca tsu'u lidxë' tu bönni' nál-la, en cuéaj yöl-la' tsahui' queë' channö cabí gaga' zí'alö bönni' nál-la na', ate' ní'irö sequí' cuéaj le dzö'ö lidxë'.

28 'Le nácatë rea' libí'ilí': Dios gaca uniti lahuë' böñachi ca naca yúgu'të dul-la' nabág'a'gaca, en ca naca yúgu'të didza' schanní' ta'nná, **29** pero nútí'tës nu innë schanní' queë' Dios Bó' Lá'ayi, catu caz uniti lahuë' Dios nu na'. Tsaz nabaga' xígua' nu na'.

30 Caní gunnë' Jesús tu' ta'nnë' queë' bönni' yudo' usedi na', ta'nnë':
—Tu' xihui' dzaga Lë'.

Nu naca xinë'ë Jesús, en bönni' böchë'ë
(Mt. 12:46-50; Lc. 8:19-21)

31 Ní'irö bila'dxinë' yugu' bönni' böchë'ë Jesús, enca' xinë'ë ga zoë'. Gula'cu'ë lõ'alö, en gula'söl-lë'ë nu tsöjlidza Jesús. **32** Böñachi zián na' rö'gaca cuítë' Jesús gulé Lë', ta'nná:

—Yugu' bönni' böchu'u, enca' xinó'o nacu'ë lõ'alö, tu'lidzë' Li'.

33 Bubi'ë didza' Jesús, gudxë' légaquië':

—¿Nuzxi caz na' xiná'a, en nupxi caz yugu' bönni' böcha'a?

34 Ní'irö buyúë' nupa na' rö'gaca gásibi'ilë', rnnë':

—Buli'yútsöca'. Nupa ni náca gaca ca xiná'a, en yugu' bönni' böcha'a. **35** Nu run ca rë'ënë' Dios, nu ni naca ca bi'i böcha'a, en bi'i zana' enca' xiná'a.

4

Rucúdu'ë didza' Jesús ca naca queë' bönni' guz
(Mt. 13:1-9; Lc. 8:4-8)

1 Leyübölö gusí lahuë' Jesús rusédinë' böñachi ga naca ra' nísado'. Bulu'dubi böñachi zián ga zoë', ate' gurenë' Jesús tu lë'e bárcodo' zxoa lu nisa na', en

gurö'ë ni', ate' yúgu'të bönachi na' gula'cuá' luyú ra' nisa na'. ² Zián le busédinë' Jesús légaquië', bucúdu'ë didza'. Tsanni ni' rusédinë' légaquië', rnnë':

³ —Guli'zé nágali' didza' ni. Birúajë' tu bönni' guz, söjésië' xisedo'. ⁴ Tsanni ni' rúsië', gulasi bal-la xisedo' na' ra' nöza, ate' bíla'dxinba' biguínido', gulé'ajba' le. ⁵ Gulasi ia'bal-la xisedo' na' ga rö'ö guiöj ga biti' rö'ö yenni' yu. Bayön gula'lén xisedo' na' tu' cabí rö'ö yenni' yu. ⁶ Ni'irö cate' gulén gubidza, buquexu' le, ate' gubidxi, tu' cabí nun luí ga re'. ⁷ Gulasi ia'bal-la xisedo' na' ga tu'lén lubá yötsi'. Cate' gula'lén xisedo' na', bulu'lén ca' lubá yötsi' na', en gula'röli le, ate' lë' na' bësië' biti' bi bunödzaj. ⁸ Gulasi ia'bal-la xisedo' na' ga naca luyú bëbu, ate' gula'zxön, en xitsá' ra' gula'bö'. Bulu'nödzaj lë' na' bësië'. Tu dxigu' xisedo' na' bësië' bunödzaj ia'chí uruá' xisedo' ca'. Ia'tú bunödzaj ia'tsónnalalaj ca', ate' ia'tú na' bunödzaj ia'tú gayuá' ca'.

⁹ Ni'irö Jesús gudxë' légaquië', rnnë':

—Nu zoa nagui, en riyöni ral-la' uzé nagui.

Riguíjö'ë Jesús bizx que rucúdu'ë didza'

(Mt. 13:10-17; Lc. 8:9-10)

¹⁰ Cate' chibugá'anë' tuzë' Jesús, bíla'dxín nupa dá'gaca Lë' ga zoë', núngaca tsözxön idkinnutë' bönni' usëda queë', ate' gula'nábinë' Lë' bi sa'yéaj lë' na' bucúdu'ë didza'. ¹¹ Jesús gudxë' légaquië', rnnë':

—Libi'ili' nadéili' tséajni'ili' le nagachi' ca rinná bë'ë Dios, pero nupa na' biti' nácagaca tuz len rë'u, ruí'lena' légaquië' didza' yugu' le rucúdu'a didza'.

¹² Caní runa' para gaca lë' na' nazúaj lu guichi lá'ayi, rnna:

Ulu'yüë', en biti' ila'lé'enë'.

Ulu'zé nágagaquië', en biti' ila'yéajni'inë'.

Biti' ulu'bí'i ládzi'gaquië' para gaca uniti lahua' légaquië' ca naca dul-la' nabága'gaquië'.

Riguíjö'ë Jesús le bucúdu'ë didza'

(Mt. 13:18-23; Lc. 8:11-15)

¹³ Jesús gudxë' ca' yugu' bönni' dá'gaquië' Lë', rnnë':

—¿Naru' cabí réajni'itseli' lë' na' bucúdu'a didza'? ¿Nacxi caz gaca tséajni'ili' ia'zíca'rö le ucúdu'a didza'? ¹⁴ Bönni' guz na' náquië' nu ruzé xtídze'ë Dios.

¹⁵ Nácagaca bal-la bönachi ca xisedo' na' gulasi ra' nöza. Ta'yönnë' xtídze'ë Dios, en ca ta'yönisinë' ca', la' za'të Satanás tu' xihui', en rigúa didza' na' bidxín lu icja ládzi'do'gaquië'.

¹⁶ Nácagaca ia'bal-la bönachi ca xisedo' na' gulasi ga rö'ö guiöj. Ta'yönnë' didza' na', ate' len yöl-la' rudzeja quégagaquië' ta'zi'é le. ¹⁷ Biti' riyaza icja ládzi'do'gaquië', ate' tu chí'isö ta'dé'ë le. Cate' bi raca quégagaquië', o zoa nu ribia ladxi'légaquië' tu' ta'dé'ë didza' na', la' tu'huoäté ládzi'gaquië'.

¹⁸ Nácagaca ia'bal-la bönachi ca xisedo' na' gulasi ga na' tu'lén lubá yötsi'. Ta'yönnë' didza' na', ¹⁹ pero tu'i ládzi'gaquië' le nácagaca que yödžolió ni. Nazi' yé'eguequine' tu' nadxi'igüequine' yugu' yöl-la' tsahui', en ta'zé ládzi'gaquië' yugu' le dë. Ta'yaza icja ládzi'do'gaquië' yúgu'të lë ni, en tu'suniti didza' na', para cabí gun dxin lu icja ládzi'do'gaquië'.

²⁰ Nácagaca ia'bal-la bönachi ca xisedo' na' gulasi ga naca luyú bëbu. Ta'yönnë' didza' na', en ta'zí' lu ná'agaquië' le, ate' run dxin lu icja ládzi'do'gaquië'. Nácagaca bal-la bönachi caní ca xisedo' na' bulu'nödzaj ia'chí uruá' huéaj. Nácagaca ia'bal-lë' ca xisedo' na' bulu'nödzaj ia'tsónnalalaj ca', ate' nácagaca ia'bal-la bönachi ca xisedo' na' bulu'nödzaj ia'tú gayuá' ca'.

*Rucúdu'ë didza' Jesús que tu le rigú'u bení
(Lc. 8:16-18)*

²¹ Jesúz gudxë' ca' bönni' dá'gaquië' Lë', rnnë':

—¿Naru' rigála'ru' guí', ate' rudús'i'ru' le tu gufina, o rigú'uru' le zxani le ráti'ru'? Bití' ca' runru' caní. Ruzóaru' guí' ga naca xitsá' ga cu'u bení'.

²² Yúgu'té le nagachi' ilá' lahui, ate' yúgu'té le raca balándo'os ila'rúaj ga liná'.

²³ Nu zoa nagui, en riyöni ral-la' uzé nagui.

²⁴ Gudxë' ca' légaquië':

—Guli'güí' ládxilí' le riyönilí'. Ca naca le ruríxili', la' leze urixë' Dios queëli', ate' gunnë' queëli' ia'latí'. ²⁵ Nu nazí'i le za' que, gu'ë que ia'latí', pero nu bití' nazí'i le, la's dui le dë que, udúa.

Rucúdu'ë didza' Jesús ca rizxön zxoa' xtila

²⁶ Gunnë' ca' Jesúz:

—Ca raca ni le rinná bë'ë Dios naca ca raca cate' ruchejë' tu bönni' zxoa' xtila lu yu. ²⁷ Chi'i dzö'ölö rásië', en riyasë' cate' za' rení'. Ta'lén zxoa' xtila na', en ta'zxön, pero bití' nözinë' lë' nacxi raca ta'zxön. ²⁸ La' cuinsi luyú na' ruxöñ le nadúzgaca luyú na', zí'alö xiyazi, ní'irö za' do que, en tödi na' cuía xui'i nál-la lu do que. ²⁹ Cate' chinal-la xui'i na', la' tséajtë' tsöjchibë' do na' tu' chibidxín dza uzi'ë xui'i.

Rucúdu'ë didza' Jesús ca raca que xisé mostaza

(Mt. 13:31-32; Lc. 13:18-19)

³⁰ Gunnë' ca' Jesúz:

—¿Bizxi caz innaru' ca raca ni le rinná bë'ë Dios? ¿Bizxi ucúdu'ru' didza' ca raca? ³¹ Racá ca raca que tu xisedo' mostaza. Cate' riyaza luyú naca tu xisedo' nácatérö cuidí' ca yúgu'té xisedo' dzö'ölö luyú, ³² pero cate' chinadúz, rillén, en rizxöntérö ca yúgu'té guixi' cuan rö'gaca luyú. Tsca run yana' ni'a në'e, gaca ila'dxinba' biguinnido', en ulu'dxiaba' xicá'agacaba' lu zxul-la que.

Ca rugunë' dxin Jesús le rucúdu'ë didza'

(Mt. 13:34-35)

³³ Caní guca, busédinë' Jesús légaquië', en ziánro ca' le bucúdu'ë didza' tsca guca ila'yéajni'inë'. ³⁴ Yúgu'té didza' bë'lenë' böñachi bucúdu'ë didza', ate' yúgu'té didza' ni buchila lá'anë', buzéajni'inë' légaracasö' bönni' usëda queë'.

Jesús ribequi dxíe' bö' budunu'

(Mt. 8:23-27; Lc. 8:22-25)

³⁵ La' dza ná'asö, cate' ridzö', Jesús gudxë' yugu' bönni' dá'gaquië' Lë', rnnë': —Töditsöca'ru' ia'tsölä'a nísado' ni.

³⁶ Ní'irö bulu'lá' alenë' böñachi zián nacua' ni, ate' bulu'së'ë bárcodo' ga na' chizóasë' Jesús. Gula'cuá' ca' ni' ia'zíca'rö bárcodo' söjácalen légaquië'. ³⁷ Gusílo recja bö' budunu' lu nisa na', ate' gudá'a nisa lë'e bárcodo' na'. Ca' guca, zeaj ridzá' nisa lë'e bárcodo' na'. ³⁸ Dë' rásië' Jesús lu xicúgüe' ga naca xitsá'alö lë'e bárcodo' na', ate' bulu'subanë' Lë'. Të' Lë':

—Bönni' Usedi! ¿Naru' cabí rui'i ládxitso' netu'? ¡Huáti caztu' lu nisa ni!

³⁹ Ní'irö guyasë' Jesús, en gunná bë'enë' bö' na' recja, gunnë':

—Gurö'ö dxi.

Gudxë' ca' nisa na', gunnë':

—Dxisö guzóa.

Gurö'ö dxi bö' na' guyecja, en guzóa dxi lu nísado' na'. ⁴⁰ Ní'irö Jesús gudxë' yugu' bönni' dá'gaquië' Lë', rnnë':

—¿Bizx que radxi ridzöbili' caní? ¿Naru' cabí réajlë'ëli' Dios?

41 Ni' tádxinë' gulë luzë'ë tuë' ia'túë':

—¿Nuzxi caz bönni' ni? ¡Tun bö' recja, en nísado' ca rnna xtídzë'ë!

5

Bönni' Gadara yu'u bö' xihui' lë'

(Mt. 8:28-34; Lc. 8:26-39)

1 Ní'irö bila'dxinë' Jesús, en yugu' bönni' dá'gaquië' Lë' ia'tsól'a nísado' ga naca lu xiyúgaca böñachi Gadara. **2** Cate' burúajë' Jesús lë'e bárcodo' na', tu bönni' rirúajë' zxan buloaj ga nacua' yero ba la' dutságatë' Lë'. Bönni' ni yu'u bö' xihui' lë', **3** ate' nun xilatjë' ga na' nacuá' yero ba. Cuntu nu guca guga' bönni' na', caléga len du guíë. **4** Zián luzuí bulu'zóë' bregui' guíë yen në'ë, en ni'ë, en gulúguíë' lë' du guíë. Yugu' du guíë na' bulë'ë, ate' bregui' guíë na' guditsje'. Biti' rizéqui'në' nu bönni' inná bë'enë' lë'. **5** Ridática'së' ribödxi'ë rëla, en té daga na' nacuá' yero ba, en gapa naca lu guí'ado', run huë' cuinë' yugu' lu guiöj dzö'ö ni'. **6** Cate' bilé'enë' zë'ë zi'tu' Jesús, guxítë' guyijë' ga na' zë'ë, ate' buzóá zxibë' lahuë' Lë'. **7** Bë'ë zidzaj didza', rë' Jesús:

—¿Bizxi ral-la'a quiu' Jesús, Zxi'inë' Dios nayépisëtërë? Ni'a queë' Xanru' Dios ráta'yua' lo', biti' usaca' zi'u neda'.

8 Caní gunnë' bönni' na' tu' chigudxë' Jesús bö' xihui' na':

—Li', bö' xihui', burúaj lu bönni' ni.

9 Jesús gunabinië' le, rnnë'ë:

—¿Bi leu'?

Bubí'i didza' le, gudxi Lë':

—Lea': Le Zián, tu' rö'ö ziantu'.

10 Gula'nabi yechi' yugu' bö' xihui' na' Jesús para cabí isöl-lë'ë léguequi zi'tu' luyú ni'. **11** Nacuá'aba' cuchi zián lu guí'ado' ní'isö, ta'daba' táguba' ni'.

12 Gula'nabi yechi' bö' xihui' na' Jesús, ta'nná:

—Gusöl-la' netu' ga ni' dzö'öba' cuchi zián. Bë' netu' lataj tsöjtsú'ugacatu'-ba'.

13 La' bë'të' Jesús léguequi lataj, ate' bila'rúaj bö' xihui' na', en yöjtsú'ugaca cuchi zián na', ate' gula'xíti'ba' cuchi zián na', yöjbíxigacaba' ga naca ra' guí'a, yöjházagacaba' nísado'. Lu nísado' na' gula'yépiba' nisa, gulátiba', en nácacacaba' ca galaj gayuá'aba'.

14 Ní'irö bulu'zxunnaj nupa ni' gulún chi'i cuchi zián na'. Yöjtíxjö'i'iguequinë' böñachi lu yödzö ni', enca' böñachi nacuá' la' guixi' ni'. Bila'rúaj böñachi lu yödzö, söjyúgaquië' bizxi na' guca ni'. **15** Cate' bila'dxinë' ga ni' zoë' Jesús, bila'lé'enë' bönni' na' zi'alö yú'ugaca bö' xihui' lë'. Bönni' ni rö'ë ni', nácué' lari', en zoë' dxí'ado', ate' guladxi böñachi na'. **16** Nupa na' bila'lé'e le benë' Jesús gula'guíjöi'ı'bönachi na' bila'rúaj lu yödzö ca na' guca queë' bönni' na' zi'alö yú'ugaca bö' xihui' lë', enca' ca guca quégacaba' cuchi na'. **17** Ní'irö gula'sí lögaca böñachi zián na' ta'ta'yu lahuë' Jesús urúajë' lu xiyúguequi.

18 Cate' bubenë' Jesús lë'e bárcodo', bönni' na' zi'alö yú'ugaca bö' xihui' zián lë', gúta'yuë' lahuë' Jesús gu'ë lë' lataj tséajlenë' Lë'. **19** Jesús biti' bë'ë lë' lataj, pero gudxë' lë':

—Boaj lidxu'. Yöjtíxjöi'ı di'a dza quiu' yugu' le zxön bena' quiu' neda', naca' Xanu', en ca bena' buéchí' ládxa'a li'.

20 Söhüöje' bönni' na', en ruzë' didza' yugu' yödzö Decápolis ca nácacacaba le zxön benë' Jesús queë', ate' bulu'bani yúgu'të böñachi nacuá' yugu' yödzö ni'.

*Bí'i nigula queë' Jairo, en nigula na' gudannu lari' nácuë' Jesùs
(Mt. 9:18-26; Lc. 8:40-56)*

21 Cate' budxiné' Jesùs ia'tsól'a nísado' na', ní'irö bulu'dubi böñachi zián ga' zoë' ra' nísado'. **22** Bönni' lë' Jairo, bönni' rinná bë' lu yu'u ga tu'dubë' bönni' judío, en nazëdë' queë' Dios, bidë' ga zoë' Jesùs. Cate' bíle'ené' Jesùs, buzóa zxibë' lahuë', **23** en gúta'yuë' lahuë', rnne':

—Chiraqui gátibi' bi'i nigúlado' quia'. Gudá ixóa no'o lëbi' para huöácabi', en biti' gátibi'.

24 Sa'yéajlené' Jesùs lë', ate' böñachi zián söjácalen Jesùs, tu'quirö Lë'. **25** Tu nigula, chinaca chinnu iz re'enu, zóanu ca' ni'. Biti' ruhu'i rön queënu que huë' quégaca cázano nigula. **26** Yenni' chigudí'i guzxáca'nu lu ná'agaquie' zián bönni' tu'únë' böñachi. Nítisö chibutönu dëra le dë queënu, tu' cabí bi gúcalen lënu, pero riyali' queënu. **27** Cate' biyöninu tu'i didza' böñachi ca naca queë' Jesùs, gudödinu ládjalo' böñachi zián na', en bidixinu zaca' cídzulë' Jesùs, en gudannu lari' nácuë'. **28** Caní bennu tu' rnnanu: "Channö cansa' le nácuë', huöáca'." **29** La' bu'ítë rön queënu, ate' réquibe'enu chiböácanu que le guca queënu.

30 La' gúquibe'etené' Jesùs ben dxin yöl-la' huáca queë', ate' buécjë', ruyúë' böñachi zián na'. Rnné':

—¿Nuzxi na' gudán neda'?

31 Ní'irö bönni' dá'gaquie' Lë' té' Lë', ta'nné':

—Rilé'e quézinu' böñachi zián ni tu'quirö Li', en rnnatso': "¿Nuzxi na' gudán neda'?"

32 Ruyúë' Jesùs gásibi'ilë' para ilé'ené' nuzxi na' gudán Lë'. **33** Ní'irö nigula na' gubiga'nu lahuë'. Rádxinu, en rizxízinu tu' chinözinu bi na' guca queënu, ate' buzóa zxíbinu lahuë' Jesùs, en gúdxinu Lë' idútë le nácaté. **34** Jesùs rë'ë-nu:

—Nigúlado'. Chiböácu' tu' réajlé'u neda'. Böaj lidxu' idú ládxu'u. Tsaz nuhuöácu' que le guca quiu'.

35 Tsanni ni' ru'ë caní didza' Jesùs, bönni' narúajgaquie' lidxë' bönni' na' rinná bë' lu yu'u ga tu'dubë' tu'sedé' queë' Dios bíla'dxnë' ni', en té' bönni' na':

—Chigútibi' bi'i nigúlado' quiu'. Bíti'rö upízxjanu' Bönni' Usedi.

36 Biti' bë' ládxë'ë Jesùs lë na' ta'nné', ate' gudxë' bönni' unná bë' na', rnne':

—Biti' gádxinu'. Guyéajlé'ësë' Dios.

37 Biti' bë' lataj Jesùs tsójácalen Lë' ia'zíca'rö böñachi, pero légarasë' Pedro, en Jacobo, en Juan, böchë'ë Jacobo na'. **38** Cate' bidxinë' lidxë' bönni' na' rinná bë' ga tu'dubë' tu'sedé' queë' Dios, bíle'ené' raca dzatsa, enca' nupa ni' ta'bödxi, en nupa ta'bödxi yechi'. **39** Guyázië' Jesùs, en gudxë' légaquie':

—¿Bízq que rutsátsali', en ribödxili' caní? Biti' nátabi' bi'i nigúlado' ni. Rásisibi' na'.

40 Ní'irö bulu'titje' Jesùs, pero Lë' bubéaje' yúgu'të böñachi na' ní'ilö, ate' guchë'ë xuz xiná'abi' bi'i nigúlado' na', enca' nupa nacuá'len Lë', ate' guyázië' ga' na' dëbi'. **41** Gudélë'ë na'abi' bi'i nigúlado' na', en gudxë' bi':

—Talita, cumi.

Didza' hebreo ni rnna lu didza' xidza': Bi'i nigúlado', guyasa. **42** La' guyásatëbi' bi'i nigúlado' na', en buzé'ebi'. Chiyú'ubi' chinnu iz. Bulu'bani nupa nacuá' ni'. **43** Ní'irö Jesùs gunná bë'ené' légaquie' cuntu nu ulu'siyönnë' lë' na' guca. Gudxë' légaquie':

—Guli'güí' le gágubi' bi'i nigúlado' ni.

6

*Ridxinë' Jesús Nazaret, le naca ladzë'
(Mt. 13:53-58; Lc. 4:16-30)*

¹ Buzé'ë Jesús ni', budxiné' ladzë', ate' yugu' bönni' dá'gaquië' Lë' söjácalenë' Lë'. ² Cate' bidxín dza lá'ayi quégaquië' bönni' judío, gusí lahuë' Jesús rusédinë' bönnachi ga na' tu'dubë' tu'sëdë' queë' Dios. Gula'cuá' bönnachi zián ni' ta'yöni Lë'. Bulu'bani, ta'nná:

—¿Gazxi caz bizéddë' bönni' ni yugu' lë ni? ¿Bizxi caz yöl-la' réajni'i ni nadéli'në'? ¿Nacxi caz runë' le nácagaca bë' na' zá'gaca yehua' yubá? ³ Náquië' bönni' ni gubëdxì yaga na', en zxí'ininu María. Náquië' bôch'i'gaquië' Jacobo, en José, en Judas, en Simón. Nigula zanë' nacuá'lennu ca' rë'u.

Que lë ni na' bulu'cá'anë' Lë' cá'asö. ⁴ Ní'irö Jesú gudxë' légaquië', rmnë':

—Gáti'tës tunë' bal nu bönni' ru'ë didza' uláz queë' Dios, pero bönnachi uládz queë', en bönnachi di'a dza queë', en bönnachi nacuá' lidxë' biti' tun lë' bal.

⁵ Que lë ni na' biti' guca gunë' Jesús nitú yöl-la' huáca zxöñ ni'. Bunse' nabábasö bönnachi te'e cate' guxóa në'ë léguequi. ⁶ Bubáninë' Jesú tu' cabí ta'yéajlë' Lë'. Gudödi na' gudödë' yugu' yödzödo' nacuá' gásibi'ilö, rusédinë' bönnachi ni'.

*Risöl-lë'ë Jesús bönni' dá'gaquië' Lë' tsöjéngäquië' libán
(Mt. 10:5-15; Lc. 9:1-6)*

⁷ Ní'irö bulidzë' Jesús idxínnutë' bönni' dá'gaquië' Lë', en gusí lahuë' risöl-lë'ë légaquië' chopá huéajgaquië'. Budödë' lu ná'agaquië' yöl-la' unná bë' ulu'béajë' yugu' bö' xihui' yú'ugaca bönnachi. ⁸ Gunná bë'enë' légaquië' biti' bi ilu'ë la' nöza, caléga yöxaç, caléga yöta, en caléga dumí biti' ila'gu'ë lu buzudi quégaquië', pero ilu'ásë' xiyágodo'. ⁹ Ral-la' ulu'dë'ë xirächugaquië', pero caléga chopá lari' ulu'xóa yéngäquië'. ¹⁰ Gudxë' ca' légaquië':

—Gáti'tës ga tsú'uli' tu yu'u, guli'sóa yu'u na' cate' uzá'aröli' yödzö na'. ¹¹ Channö tsú'uli' tu yödzö ga biti' ilún bönnachi lu yödzö na' libí'il' bal, en biti' ulu'zé nágagaquië' xtídzi'li', buli'rúaj ni', en buli'quínnaj bëchtö da' lë'e lábali'. Lë ni gaca bë' nabága'gaquië' xíguia'. Le nácaté rea' libí'il', cate' idxín dza ichúguië' Dios quégaca bönnachi, ila'gu'i ila'zácarö bönnachi lu yödzö na' ca ila'gu'i ila'zaca' bönnachi Sodoma, en Gomorra, yugu' yödzö na' busunitié' Dios.

¹² Ní'irö bila'rúajë' bönni' dá'gaquië' Lë', yójéngäquië' libán ca ral-la' ulu'bí'i ládzi'gaca bönnachi. ¹³ Bulu'béajë' zián bö' xihui' yú'ugaca bönnachi. Gula'gu'ë le za zián nupa te'e, ate' bulu'huoáquië'.

*Ca bëtigaquië' Juan, bönni' buquilë' bönnachi nisa
(Mt. 14:1-12; Lc. 9:7-9)*

¹⁴ Biyönnë' Herodes, bönni' unná bë', ca naca le runë' Jesús, tu' rizë didza' gáti'tës que yöl-la' huáca queë'. Bal-la bönnachi ta'nná:

—Chibubanë' Juan, bönni' ni' buquilë' bönnachi nisa, lu yöl-la' guti. Que lë ni na' napë' yöl-la' huáca runë' yugu' lë ni.

¹⁵ Ia'bal-la bönnachi ta'nná:

—Naquië' Elías, bönni' bë'ë didza' uláz queë' Dios dza ni'te.

Ia'bal-la bönnachi ta'nná:

—Naquië' bönni' ru'ë didza' uláz queë' Dios ca guláquië' bönni' gulu'ë didza' uláz queë' dza ni'te.

¹⁶ Cate' biyönnë' Herodes yugu' lë ni, gunnë':

—Naquië' Juan, bönni' na' burixa' yenë'. Chibubanë' lu yöl-la' guti.

17 Caní gunnë' Herodes tu' gusöl-lë'ë lë cazë' bönni' yöjxöngaquië' Juan na', ate' gulúgui'ë lë' du guíe lu yu'u lidxi guíe. Caní benë' Herodes tu' rilenu Herodías Juan na'. Nácanu nigula na' gúcanu nigula queë' Felipe, böchë'ë Herodes na'. Herodes gudúë'-nu Herodías na', en butsaga ná'alenë'-nu.

18 Juan na' gudxë' Herodes:

—Biti' ral-la' sóalenu'-nu nigula queë' böchu'u.

19 Que lë ni na' gusí gurö'önü Herodías. Gú'uninu bi gunnu queë' Juan, tu' gú'uninu gútinu lë', pero biti' bi guzxéqui'nu **20** tu' rádxinë' Herodes Juan. Nözinë' náquië' Juan na' tsahui', en lá'ayi. Que lë ni na' gudapa chi'ë lë', en buzé náguië' lë' idù ládxë'ë sal-la' lë na' rnnë' Juan ben ga gurö'ë böninga Herodes na'. **21** Ní'irö bidixín tu dza guzxéqui'nu Herodías na', le naca dza runë' Herodes laní que dza guyë'enë' iz. Bupë'ë le ilë'aj ilahuë' bönni' dë lu ná'agaquie' uláz queë', en bönni' ta'nná bé'enë' bönni' röjáquië' gudil-la, enca' bönni' nácagaquie' lo luyú Galilea. **22** Guyázabi' bi'i nigula queënu Herodías ga na' të'aj tahuë', en buyá'abi' lógaquie'. Guyaza ládxë'ë Herodes ca runbi', en gula'yaza ládxí'gaca ca' nupa të'aj tágulen lë'. Ní'irö Herodes gudxë'-bi' bi'i nigula na', gunnë':

—Gunaba bi rë'ënu' gunna' quiu', ate' guna' ca'.

23 Benë' tsutsu xtídze'ë, gudxë'-bi':

—Ni'a queë' Xanru' Dios gunna' quiu' bíti'tës bi inabu' ga idxintë gatsaj ga rinná bë'a.

24 Burúajbi' lëbi', ate' gunábabi' xiná'abi':

—¿Bizxi inábatsa?

Lënu gúdxinu-bi':

—Icjé' Juan, bönni' buquilë' bönochchi nisa, inabu'.

25 La' buázatëbi' ga na' zoë' Herodes, en rëbi'-në':

—Rë'ënda' ixú' quia' na'a lu zxiga' zxön icjé' Juan, bönni' na' buquilë' bönochchi nisa.

26 Ní'irö bu'innë' Herodes, pero tu' buzötjë' Dios, en tu' bila'yöni ca' nupa tágulen lë', biti' gú'unrë' initi xtídze'ë na' guzxí' lu në'ë queëbi'. **27** Herodes la' gusöl-la'të' tu bönni' reje' gudil-la rapa chi'ë, ate' gunná bé'enë' lë' tsöjxi'ë icjé' Juan. **28** Bönni' na' reje' gudil-la guyijé' lidxi guíe, yöjrixë' yen Juan na', ate' bu'ë icjé', nuxóë' le tu lu zxiga' zxön. Budödë' le lu ná'abi' bi'i nigula na', ate' lëbi' bunödzjabi' le queënu xiná'abi'.

29 Cate' bönni' dá'gaquie' Juan na' bila'yönnë' didza' chiguca lë na', bila'dxinë' ni', en bulu'u'ë lë', ate' yöjcáchi'gaquie' lë' yeru ba.

Rugahue Jesús ziánrö ca chi-un gayuá' bönochchi

(Mt. 14:13-21; Lc. 9:10-17; Jn. 6:1-14)

30 Gudödi ni' bulu'dubë' bönni' gubáz queë' Jesús ga zoë', en gula'guíxjö'iñë' Lë' yúgu'të le gulunë', en yugu' le bulu'sédinë' bönochchi. **31** Nacuá' bönochchi zián ni', nupa zá'gaca, en nupa söjacä, ga bidxitë bíti'rö dë lataj ilahuë' Jesús, en yugu' bönni' dá'gaquie' Lë'. Que lë ni na' Jesús gudxë' légaquie', rnnë':

—Gullidá. Uyéaj cázaru' ga naca lataj cá'asö, en uzi' ládxí'ru' tu chi'i.

32 La' légaçasë' yöjáquië' tu lë'e bárcodo', ate' bila'dxinë' tu lataj cá'asö.

33 Bila'lé'e bönochchi zián légaquie' söjáquië' ni', en núnbë'gaca Jesús. Que lë ni na' bönni' yúgu'të yözdö' ni' carelö yöjáquië' ni'. Gula'zë'e ní'agaquie', ate' bila'dxinë' ni' zí'atëlø ca Jesús, en yugu' bönni' dá'gaquie' Lë'. **34** Cate' burúajë' Jesús lë'e bárcodo' na', bilé'enë' bönochchi zián na', ate' buéchí' ládxë'ë légaquie' tu' nácagaquie' ca bö'cu' zxíla'do' biti' zoa nu gapa chi'i légaçaba'. Gusí lahuë'

rusédinë' légaquië' le zián. ³⁵ Cate' chiridzö' dza na', yugu' bönni' dá'gaquië' Jesús bila'dxine' ga zoë', en të' Lë':

—Chiridzö', ate' lataj cá'asö naca ni. ³⁶ Busöl-la' bönnachi zián ni para tsöjaca yugu' yú'udo', en yugu' yödzödo' nacuá' gásibi'ilö, tsöjö'ugaca yöta, tu' cabí bi dë ni le ilagu.

³⁷ Bubi'ë didza' Jesús, gudxë' légaquië':

—Guli'güí libí'i cázali' le ilahuë'.

Gulé' Lë':

—¿Naru' tsöjö'utsatu' yöta xtila len lázzjatu' que idú xunu' beo', ate' güí'itu' le ilahuë'?

³⁸ Jesúus gudxë' légaquië':

—¿Bal-laxi yöta xtila dë queéli? Guli'tsöjyútsöca'.

Cate' chinöziguequinë', të' Lë':

—Gáyu'sö yöta xtila dë, en chópasöba' böla dëba'.

³⁹ Ní'irö gunná bë'ë Jesús ilunë' ga ila'bö' bönnachi zián na', ila'cuá' tu cö' huéajguequi ga naca lachi' lu daca'. ⁴⁰ Gula'cu'ë tu cö' huéajgaquië', tu gayuá' huéajgaquië', en chi-un huéajgaquië'. ⁴¹ Ní'irö gudélë'ë Jesús igáyu'të yöta xtila na', en irópabä' böla na'. Buyuë' zaca'lúzxiba, en gudxë' Dios: "Xclenu." Ní'irö buzzuzxjë' yöta xtila na', en bë'ë quégagaquië' bönni' usëda queë' para ila'guisië' quégaca bönnachi zián na'. Gudisië' ca' irópatëba' böla na' quégaca yúgu'të bönnachi na'. ⁴² Gulahuë' yúgu'të', en bulu'huöljanë'. ⁴³ Ní'irö bulu'tubë' le bizzaj que yöta xtila na', en quégacaba' böla, ate' chinnu ga'böra bulu'líë'. ⁴⁴ Guláquië' ca chi-un gáyu'ë bönni' na' gulahuë'.

Rizë'e ni'ë Jesús lu nísado' (Mt. 14:22-27; Jn. 6:16-21)

⁴⁵ La' bentë' Jesús ga gula'benë' yugu' bönni' dá'gaquië' Lë' lë'e bárcodo', para ila'nörue' lahuë', ila'dödë' lu nísado' na', para ila'dxine' lu yödzö Bet-saida, tsanni ni' Lë' rusöl-lë' bönnachi zián na' lídxiguequi. ⁴⁶ Cate' chibudxi busöl-lë' légaquië', guyijë' tu lu gu'ado', ate' ni' ruí'ilënë' Dios didza'. ⁴⁷ Cate' chizá' ral-la, zeaj bárcodo' na' gatsaj láhui'lö nísado', ate' zoë' Jesús tuzë' luyú bidxi na'. ⁴⁸ Bílë'enë' Jesús légaquië', böninga tu'së'ë bárcodo' na' tu' recja bö' za' ga na' ta'dödë'. Gudödi guluhuëla bidxinë' Jesús ga na' nacu'ë, rizë'e ni'ë lu nísado' na', ate' gú'unne' tödisë' ga na' nacu'ë. ⁴⁹ Cate' bila'lé'enë' Lë' rizë'e ni'ë lu nísado', guléquinë' bixín na', ate' gula'bödxi'ë ⁵⁰ tu' bila'lé'enë' yúgu'të' Lë', en guladxi gula'dzöbinë'. Ní'irö la' bulidztë' Jesús légaquië', rnñë':

—Buli'tipa ládzi'li'. Neda' caz. Biti' gáxdili'.

⁵¹ Gurenë' Jesús lë'e bárcodo' ga na' nacu'ë, ate' gurö'ö dxi bö' na' recja, ate' légaquië' gula'niti gula'tíquisinë' bulu'báninë'. ⁵² Biti' ta'yéajni'ininë' le rulu'i lë na' benë' Jesús que yöta xtila na'. Ni' naca zidi icja ládzi'do'gaquië'.

Ruúnë' Jesús nupa te'e lu yödzö Genesaret (Mt. 14:34-36)

⁵³ Gula'dödë' Jesús, en yugu' bönni' dá'gaquië' Lë' ia'tsolá'a nísado', ate' bila'dxinë' ga naca lu xiyúgaca bönnachi Genesaret. Bulu'dxiguë'ë bárcodo' luyú bidxi ni'. ⁵⁴ Cate' bulu'rúajë' lë'e bárcodo' na', la' bulu'ünbe'të bönnachi ni' Jesús. ⁵⁵ Gula'xití' bönnachi na', yójaca yúgu'të yödzödo' idú gásibi'ilö, en gula'sí lógaquië' dujuá' agaquië' yúgu'të nupa te'e ga zoë' Jesús, zxóagaca yugu' le déguequini, ate' bila'dxinë' gáti'tës ta'yönnë' zoë' Jesús. ⁵⁶ Gáti'tës ga ridödë' Jesús, yugu' lu yödzödo', en yugu' yödzö zxön, en yugu' yú'udo', tu'cu'ë nupa

te'e quégaquië' gapa naca la' nöza, en gapa naca lu yë'ëyi, en ta'tá'yuë' lahuë' Jesús gu'ë légaquië' lataj ila'gansë' luzxi lari' nácuë'. Yúgu'të nupa na' bila'gán lari' nácuë' bulu'huoácatë dxí'ado'.

7

*Le tun ga biti' nácagaca böñachi tsahui' lahuë' Dios
(Mt. 15:1-20)*

1 Ní'irö bal-lë' bönni' yudo' fariseo len bal-lë' bönni' yudo' usedi narúajgaquië' Jerusalén, bulu'dubë' ga zoë' Jesús. **2** Bönni' yudo' ni bila'lé'enë' bönni' usëda queë' Jesús tahuë' yöta, biti' nuchi'agaquië' ná'agaquië', lë na' rnna: Biti' nayárigaca ca nalébiguequinë' tunë' bönni' yudo' na'. Que lë ni na' gula'nnë' quégaquië'. **3** Yugu' bönni' yudo' fariseo na', en ia'zíca'rö böñachi judio tunë' ca gulébiguequinë' gulunë' xuz xtó'ogaquië', ate' channö cabí ta'guíbi ná'agaquië' zián luzuí ca na' nalébiguequinë' tunë', biti' ca' tahuë'. **4** Cate' tu'dxinë' röjö'ugaquië' lu yë'ëyi, channö cabí ta'guibë' lë na' ca nalébiguequinë' tunë', biti' ca' tahuë'. Ziánrö ca' tunë', yugu' le nalébiguequinë' tunë'. Caní ta'guibë' zxiga' yö'öna, en yugu' zxiga' guïë, en yugu' le tátinë'. **5** Que lë ni na' yugu' bönni' yudo' fariseo, en yugu' bönni' yudo' usedi gula'nábinë' Jesús, ta'nnë':

—¿Naru' cabí tunë' yugu' bönni' usëda quiu' ca gulébiguequinë' gulunë' xuz xtó'oru', pero tahuë' yöta biti' nuchi'agaquië' ná'agaquië'?

6 Bubi'ë didza' Jesús, re' légaquië':

—Libi'ili', bönni' rului'isö tsahui' cuinli'. Nácatë le gudíxjö'ë Isaías, bönni' ni' bë'ë didza' uláz queë' Dios, ca naca queëli'. Buzúajë' lu guichi, gunnë': Yugu' bönni' ni, len rú'agacase' tunë' neda' bal, calëga idú ládxigaquië'.

7 Nítisö naca yöl-la' ba ta'gu'ë neda'
tu' tu'sédinë' le ta'nná bë' böñachi,
calëga xibá quia'.

8 Caní naca, tu' rucá'anali' le gunná bë'ë Dios, ate' runli' yugu' le nazi' láhuili' lu ná'agaca böñachi.

9 Gudxë' ca'légaquië':

—Idú ládxili' rucá'anali' cá'asö le gunná bë'ë Dios para gunli' ca naca le nulaga loli' runli'. **10** Moisés gunnë' caní: "Ben bal xuz xinö'o." Gunnë' ca': "Nu ulidza zi' xuzi o xinë'e, guli'gútite nu na'." **11-12** Libi'ili' rnna' caní: "Channö nu bönni' guíë' xuzë' o xinë'ë: Biti' gaca bi gunna' queëli', tu' naca Corbán." (Didza' ni rnna lu didza' xidza': Tu' nuzó'a' quez queë' Dios yúgu'të.) Ní'irö rnna'li': "Biti' run bayudxi bi gunë' bönni' na' quégaquië' xuz xinë'ë." **13** Caní naca, rucá'anali' cá'asö xtídzë'ë Dios para gunli' le nulaga loli' runli', yugu' le ruddödili' lu ná'agaca zxí'ini xi'sóali'. Ziánrö ca' le caní runli'.

14 Ní'irö Jesús bulidze' bönni' zián na' nacu'ë ni', en re' légaquië':

—Guli'zé nágali' didza' gu'a, yúgu'teli', en guli'tséajni'i. **15** Biti' bi dë le riyaza nu bönni' le gaca gun ga biti' náquië' tsahui' lahuë' Dios, pero le rirúaj lë', lë ni gaca gun ga biti' náquië' tsahui' lahuë' Dios. **16** Channö zoa nágali', en riyónili', buli'zé nágali'.

17 Cate' Jesús bulá'alenë' böñachi zián na', guyu'ë tu yu'u, ate' yugu' bönni' usëda queë' gula'nábinë' Lë' ca naca lë na' bucúdzu'ë didza'. **18** Jesús gudxë' légaquië':

—¿Riyádzjatsö ca' queëli' yöl-la' réajni'i? ¿Naru' cabí réajni'ilí', yúgu'té le riyaza nu bönni', biti' gaca gun ga biti' náquië' tsahui' lahuë' Dios? ¹⁹ Naca caní tu' cabí riyaza icja láxí'da'ahuë', pero lë'ësë' riyaza, ate' rurúaj lë'ë.

Tu' gunnë' caní Jesús, bului'inë' rë'u naca dxí'a yúgu'té le rë'aj ráguru'.
²⁰ Gunnë' ca' Jesús:

—Le rirúaj lu bönni' run ga biti' náquië' tsahui' lahuë' Dios. ²¹ Caní naca, tu' ta'rúaj icja láxí'do'gaquie' bönni' yugu' le ta'zá' láxí'gaquie' le naca xihui', yugu' le tun ga tuné' dul-la' ta'guitsje' xibá que yöl-la' nutsaga na', en yugu' le ruá' dö'. Tun ga tútië' böñachi, ²² en ta'banë', en ta'zé láxí'gaquie' le dë que luzá'agaquie', en tu'ë' dö', en ta'zí' yë'ë, en tu'zxë'ë, en ta'nná zi'ë que luzá'agaquie', en tun ba zxön cuíngaqüie', en tuné' le canöz. ²³ Yúgu'té le xihui' caní ta'rúaj icja láxí'da'ahuë' nu bönni', en tun ga biti' náquië' tsahui' lahuë' Dios.

Tu nigula izá'a réajlë'ënu Jesús

(Mt. 15:21-28)

²⁴ Buzé'ë Jesús ni', ate' bidxinë' gala' ga nacuá' yödzö Tiro, en yödzö Sidón. Guyázië' tu yu'u ni', en gú'unne' cuntu nu inözi, pero biti' ca' guca ucachi' cuinë'. ²⁵ Tu nigula zóabi' bi'i nigúlado' queënu, yu'u bö' xihui' lëbi', biyöminu didza' rizë ca naca queë' Jesús, ate' la' bïdatënu ga zoë' Jesús, en buzóá zxíbinu xini'ë. ²⁶ Nigula ni biti' nácanu judío, pero nabábanu böñachi Sirofenicia. Gúta'yunu lahuë' Jesús ubéajë' bö' xihui' na' yu'u-bi' bi'i nigúlado' queënu. ²⁷ Ní'irö Jesús gudxë'-nu, rnnë':

—Bë' lataj ulu'huolaj zí'alö nupa nácagaca ca zxí'ini xan yu'u, tu' cabí naca dxí'a ugúaru' yöta quégacabi' bi'i na', en chú'unaru' le lögacaba' bö'cu'do'.

²⁸ Bubí'nu didza' nigula na', gúdxinu Jesús:

—Ön, Xan, pero yugu' bö'cu'do' nacuá'aba' zxani ga tágubi', táguba' le bizzaj tu'huóxaj ga na' tágubi'.

²⁹ Ní'irö Jesús gudxë'-nu, rnnë':

—Tu' gunnó' caní, huáca huóxaju'. Chiburúaj bö' xihui' na' guyú'u-bi' bi'i nigúlado' quiu'.

³⁰ Cate' budxinnu líxdinu, bilé'enu-bi' bi'i nigúlado' queënu na', dëbi' lu da'a, en chinurúaj bö' xihui' na' guyú'u lëbi'.

Jesús ruúnë' tu bönni' nacödzuë', en biti' gaca innë'

³¹ Burúajë' Jesús lataj na' nababa yödzö Tiro, ate' gudödë' gapa dë yödzö Sidón, en yugu' yödzö Decápolis, ate' bidxinë' ra' nísado' lu xiyú Galilea.

³² Böñachi ni' dujuá'gaca tuë' bönni' nacödzuë', en biti' raca innë' ga zoë' Jesús, ate' ta'ta'yu lahuë' Jesús ixóa në'ë lë'. ³³ Jesús bubéajë' lë' tsölá'alö ládjagaca böñachi na', ate' bunë'ë xibön në'ë yero náguië' bönni' na'. Gurú'unë' zxöna'do', en gudane'ë lúdxë'ë. ³⁴ Ní'irö buyúë' lúzxibálö, en gunnë' ládxë'ë, rnnë':

—Efata.

Didza' hebreo ni rnna lu didza' xidza': Guyalaj.

³⁵ La'böáljatë náguië', en la' buguítjatë lúdxë'ë, en gunnëtë dxí'ado'. ³⁶ Jesús gunná bë'enë' légaquie' cuntu nu ilë' ca', pero tsca gunná bë'enë' légaquie', bulu'zëterë' ca' didza' que lë na' benë'. ³⁷ Bulu'báninë, ta'nnë':

—Tsáhui'do' runë' yúgu'té. Runë' ga tu'yöni nupa gulaca cödzu, en ga tu'i didza' nupa biti' guca ila'nnë'.

8

*Rugahuë' Jesús ziánrö ca choá' gayuá' bönachi
(Mt. 15:32-39)*

1 Yugu' dza na' bulu'dubi bönachi zián ga zoë' Jesús. Tu' cabí dë le ilágugaca, Jesús bulidzë' bönni' usëda queë', ate' bë'lenë' légaquië' didza'. **2** Gudxë' légaquië':

—Ruhuechi' ládxa'a bönachi zián ni tu' chinaca tsonna dza nacuá'len neda' ni, en biti' dë le ilágugaca. **3** Channö usöl-la a léguequi lídxigaca ta'dunsö ca', huala'cuídi' la' nöza, tu' zá'gaca zi'tu' bál-lagaca.

4 Bulu'bi'ë didza' bönni' usëda queë', té' Lë':

—¿Bizzi ugágutsaru' bönachi guizxi yu ni, ga ni naca lataj cá'asö?

5 Gunábinë' Jesús légaquië', rrnñë':

—¿Bál-laxi yöta xtila dë queëli'?

Té' Lë':

—Gáxdixiö.

6 Ní'irö Jesús gunná bë'enë' bönachi zián na' ila'bö' lu yu. Gudélë'ë gadxi yöta xtila na', ate' gudxë' Dios: "Xclenu'." Ní'irö buzzuxxjë' léguequi, en bë'ë quégäquië' bönni' usëda queë' para ila'guisië' lögaca bönachi zián na'. **7** Guta' ca' quégäquië' tu chòpaba' böla cuidi'. Jesús gudxë' Dios: "Xclenu'", ate' gunná bë'enë' légaquië' ila'guisië' ca' légacaba' lögaca bönachi. **8** Gulagu yúgu'të bönachi na', en bulu'huölaj. Ní'irö bulu'tubë' le bizxaj nagá'anagaca, ate' gula'lí idú gadxi ga'böra. **9** Bönachi na' gulagu gulaca idú ca choá' gayuá'gaca. Jesús busöl-lë' léguequi lídxigaca, **10** ate' gurenë' lë'e bárcodo' tsözxönen len yugu' bönni' usëda queë', ate' bila'dxinë' lu xiýúgaca bönachi Dalmanuta.

Ta'nábinë' Jesús gunë' tu le gaca bë' nuzxi náquië'

(Mt. 16:1-4; Lc. 12:54-56)

11 Ní'irö bila'dxinë' bönni' yudo' fariseo ga zoë' Jesús, en gula'sí lógaquië' ta'díl-lalene' Lë' didza'. Gulé'ënnë' ila'zí' bë'ë Jesús. Que lë ni na' gula'nábinë' Lë' gunë' tu le naca bë' za' yehua' yubá. **12** Gunnëda' ládxë'ë Jesús, rrnñë':

—¿Bizzi que ta'nábitsö bönachi ni neda' guna' tu le naca bë' za' yehua' yubá? Le nácatë rea' libí'ilí, biti' ca' ilé'eli' tu le naca bë' za' yehua' yubá.

13 Ní'irö bulá'alene' légaquië'. Bubenë' lë'e bárcodo', en sa'yéajë' ia'tsölä'a nísado'.

*Le tu'sédinë' bönni' yudo' naca ca cúa zi que yöta xtila
(Mt. 16:5-12)*

14 Gulal-la ládzi'gaquië' bönni' usëda queë' Jesús ilu'ë bi ilahuë', ate' tuz yöta xtila dë lë'e bárcodo' na'. **15** Ní'irö Jesús buzáejni'inë' légaquië', rrnñë':

—Buli'yútsöca' queëli'. Guli'gún chí'i cuinli' para cabí sí'ilí le naca ca cúa zi que yöta xtila quégäquië' bönni' yudo' fariseo, en queë' Herodes.

16 Gula'sí lógaquië' tu'ë didza' bönni' usëda queë' la' légacasë', ta'nnë':

—Gunnë' caní tu' cabí dë yöta xtila gáguru'.

17 Réquibe'enë' Jesús le ta'nnë', ate' rë' légaquië':

—¿Bizzi que ruí'ilí' caní didza' tu' cabí dë yöta xtila gáguru'? ¿Naru' cabí réajni'itseli', en biti' réquibe'itseli'? ¿Ni nácatsö zidi icja ládzi'do'oli'? **18** ¿Zóatsö güiöj loli', en biti' rilé'eli', en zóatsö güidi nágali', en biti' riyönilí'? ¿Naru' cabí röjnëtseli'? **19** Cate' ni' buzzuxxja' gayu' yöta xtila, ate' gulahuë' chi-un gáyu'ë bönni', ¿bál-laxi ga'böra bulili' le bizxaj butúbili'?

Gula'nnë':

—Chinnu.

20 Gunné' ca' Jesús:

—Cate' ni' buzzuzxja' gadxi yöta xtila, ate' gulagu choá' gayuá' böñachi, ¿bál-laxi ga'böra bulili' le bizzaj butúbili?

Gula'hñé':

—Gadxi.

21 Ní'irö Jesús gudxë' légaquië':

—¿Naru' cabí réajni'itseli' na'a, bë'a didza' que le tu'sédinë' bönni' na'?

Jesús ruínë' bönni' Betsaida nachul-la lahuë'

22 Cate' Jesús, en bönni' dá'gaquië' Lë' bila'dxinë' yödzö Betsaida, bila'dxín ga zoë' Jesús nupa dujuá'gaquië' queë' tu bönni' nachul-la lahuë'. Ta'tá'yuë' lahuë' canë' bönni' na'. **23** Jesús gudélë'ë në'ë bönni' na' nachul-la lahuë', ate' guchë'ë lë' ní'ilö ra' yödzö. Ni' budxíë' zxöna' guiój lahuë', en guxóa në'ë lë'. Ní'irö gunabínë' lë', rnnë':

—¿Ba rilé'enu' lati?

24 Buyúë' bönni' na' nachul-la lahuë', rnnë':

—Rilé'égacada' böñachi, nalá'gaca ca yugu' yaga, pero ta'dá böñachi na'.

25 Leyúbölö guxóa në'ë Jesús guiój lahuë', ate' buyúdë'ë bönni' na' nachul-la lahuë', ate' böacatë dxí'ado' guiój lahuë'. Na'a rilé'enë' dxí'ado' yúgu'të. **26** Ní'irö Jesús gusöl-lë'ë lë' lidxe', rnnë':

—Bití' tsöjdödu' lahuí' yödzö, en cuntu nu guío' le bena' nu zoa lu yödzö ni.

Rnnë' Pedro: "Jesús náquië' Cristo"

(Mt. 16:13-20; Lc. 9:18-21)

27 Gudödi na', bulu'zë'ë Jesús, en yugu' bönni' usëda queë' ni', ate' gula'dödë' yugu' yödzödo' nabábagaca Cesarea, ga na' rinná bë'ë Filipo. Tsanni ni' yú'ugaquië' nöza, Jesús rinabi yudxé' yugu' bönni' usëda queë', rnnë':

—¿Nuzxi ta'nná böñachi naca?

28 Bulu'bi'ë didza', ta'nnë':

—Ta'nná bal-la böñachi nacu' Juan, bönni' buquillë' böñachi nisa. Ta'nná ia'bal-la nacu' Elías, bönni' bë'ë didza' uláz queë' Dios dza ni'te. Ta'nná ia'bal-la nacu' bönni' yúbölö bë'ë didza' uláz queë' Dios dza ni'te.

29 Ní'irö Jesús gunabínë' légaquië', rnnë':

—Nazxi libi'ilí, ¿nuzxi rnñalí' naca?

Bubi'ë didza' Pedro, rnnë':

—Li' nacu' Cristo.

30 Ní'irö Jesús Gunná bë'enë' légaquië' cuntu nu ulu'siyönnë' Nu náquië'.

Riguixjö'ë Jesús ca si' ilútië' Lë'

(Mt. 16:21-28; Lc. 9:22-27)

31 Ní'irö gusí lahuë' Jesús rusédinë' bönni' dá'gaquië' Lë', rnnë':

—Run bayudxi qui'i saca'a neda', Bönni' Guljë' Böñachi. Bönni' gula tu'zéajni'ine', en yugu' bixúz unná bë', en bönni' yudo' tu'sédinë' ulu'zöë' neda' tsölä'alö. Ilútië' neda', pero cate' gaca tsonna dza ubana'.

32 Yálajsö bë'lenë' légaquië' didza' ni. Ní'irö Pedro guchë'ë Jesús tsölä'alö, en gusí lahuë' ridil-lë' lë' didza'. **33** Buécjë' Jesús, en buyúë' ia'zíca'rë' bönni' usëda queë', ate' buzenë' bach Pedro, rnnë':

—Gucuita ga zoa'. Nacu' ca Satanás, tu' xihui'. Le rizá' ládxu'u biti' za' lu në'ë Dios, pero ca ta'zá' ládxu'gaca böñachi naca.

34 Ní'irö Jesús bulidzë' yugu' bönni' usëda queë', enca' böñachi nacuá' ni', en gudxë' légaquië':

—Channö rë'ënë' nu bönni' të'ë neda', ral-la' uzóë' tsölá'alö le rë'ëni quézinë', en gáquië' ca tu bönni' sa'yéajë' söjtë'ë lë'e yaga cruz, ate' ní'irö huáca të'ë neda'. ³⁵ Nu bönni' ruí'ida' ládxë'ë yöl-la' na'bán queë', unitië' le, pero nu bönni' unitië' yöl-la' na'bán queë' tu' dë'ë neda', o tu' dë'ë didza' dxia' quia', udéli'në' bönni' ni yöl-la' na'bán queë'. ³⁶ ¿Naru' uzi'tsë' xibé tu bönni' channö utubë' yúgu'te le dë yödzölió ni, pero uniti cuinë'? ³⁷ Biti' bi gaca unödzjé' tu bönni' le huó'ui cuinë'. ³⁸ Channö zoë' nu bönni' rutu'i inë' quia' neda', en que xtídz'a a lögaca böñachi ni nucá'anagaca Dios, en tun dul-la', lësc'a' caní neda', Bönni' Guljé' Bönachi, utu'i'ida' queë' bönni' na' cate' guídalena' yöl-la' huáca zxön queë' Xuza', ate' dzágagaquië' gubáz lá'ayi neda'.

9

¹ Jesúz gudxë' ca' légaquië', rnne':

—Le nácatë rea' libí'ili', nacuá' ni nupa biti' ilátigaca cate' ila'lé'erö idinná bë'ë Dios luyú ni, en ilá' lahui yöl-la' huáca zxön queë'.

*Ridzá'a ca riná' lahuë' Jesúz
(Mt. 17:1-13; Lc. 9:28-36)*

² Cate' chigudödi xopa dza, Jesúz guchë'ë Pedro, en Jacobo, en Juan, ate' lögacasë' yójáquië' tu lu guí'a sibi. Ni' bidzá'a ca riná' lahuë' Jesúz lögäquië' yonnë' na'. ³ Guyëpi yösa bení' lari' nácuë' Jesúz, ate' guca chiguichido'os. Zxila'do'os guca, le cuntu nu ra' lari' yödzölió ni gaca gun chiguichido'os ca guca lari' na'. ⁴ Bulu'lui'i lögäquië' Elías, en Moisés, tu'i'ilenë' Jesúz didza'.

⁵ Ní'irö Pedro gudxë' Jesúz:

—Bönni' Usedi, bica' ba rë'u zóaru' ni. Gúntsöca'tu' tsonna yu'u lága'do', tu quiu', ia'tú queë' Moisés, en ia'tú queë' Elías.

⁶ Caní gunnë' Pedro tu' cabí nözinë' bi na' rnne', tu' tádxinë' bönni' usëda queë' Jesúz na'. ⁷ Ní'irö gurö'ö böaj le gulú'u zxul-la légaquië', ate' biyön chi'i nu rui'i didza' lu böaj na', rnna:

—Bönni' ni Zxf'ina'. Nadxf'ida' Lë'. Buli'zë nágali' Lë'.

⁸ La' bulu'yutë' pero cúnтурö nu ta'lé'enë'. Tuzë' Jesúz zóalenë' légaquië'.

⁹ Tsanni ni' yú'ugaquië' nöza, tu'dínni' lu guí'a sibi na', Jesúz gunná bé'enë' légaquië' cuntu nu ulu'siyönnë' ca', lë na' bila'lé'enë', cate' ubanrë' lu yöl-la' guti Lë', Bönni' Guljé' Bönachi. ¹⁰ Que lë ni na' gula'gú'usë' icjagaquië' didza' ni bë'ë, ate' la' lögacasë' ta'nabi yúdxinë' luzá'agaquië' bizxi sa'yéaj didza' na' bë'ë, gunnë' ubanë' lu yöl-la' guti. ¹¹ Gula'nábinë' Jesúz, ta'nnë':

—¿Bixz que ta'nnë' bönni' yudo' usedi run bayudxi guíde' Elías zí'alö ca guíde' Cristo?

¹² Bubi'ë didza' Jesúz, rnne':

—Le nácatë guíde' Elías zí'alö, en ucu'ë yúgu'te ca ral-la' gaca. Na'a, ¿bizxi sa'yéaj le nazúaj lu guichi rnna run bayudxi qui'i sáqueë' Bönni' Guljé' Bönachi, ate' cá'asö ulu'cá'ana böñachi Lë'? ¹³ Rea' libí'ili': Chibidë' Elías, ate' gulunë' queë' tsca gulë'ënnë', tsca nazúaj lu guichi lá'ayi ca ral-la' gaca queë'.

Jesúz ruíñë'-bi' bi'i bönni' yu'u lëbi' bö' xihui'

(Mt. 17:14-21; Lc. 9:37-43)

¹⁴ Cate' ni' bulu'dxinë' Jesúz, en bönni' dzágagaquië' Lë' ga na' nacu'ë ia'zíca're' bönni' usëda queë' Jesúz, bila'lé'enë' nacuá' böñachi zián ni', ate' bönni' yudo' tu'sédinë' ta'dí'lalénë' yugu'bönni' usëda queë' na' didza'. ¹⁵ Cate' böñachi zián na' bila'lé'e Jesúz, bulu'bani, en carelö zá'gaca ga na' zë'ë, dijödxigaca Lë': "Padiux."

16 Ní'irö Jesúś gunábinë' yugu' bönni' usëda queë' na', rnnë':

—¿Bizxi didza' na' ridíl-lalenli' légaquië?

17 Bubi'ë didza' tu bönni' nútse'ë ladaj böñachi zián na', rnnë':

—Bönni' Usedi, nachë'a-bi' bi'i bönni'do' quia' ni quiu', yu'u lëbi' bö' xihui' le run ga biti' raca innëbi'. **18** Cate' bö' xihui' na' ru'u lëbi', rurixi rutula lëbi' lu yu, ate' ribía bidxina' zidi' ruá'abi', en rutil-la láya'bi'. Que lë ni na' zeaj ridxitabi'. Gunábigacada'-në' bönni' usëda quiu' ulu'béajë' bö' xihui' na', pero biti' gula'zéqu'ne'.

19 Bubi'ë didza' Jesúś, rnnë':

—Libi'ili', bönni' cabí ta'yéajlë'ë. ¿Gáca'xte caz ral-la' sóalena' libíili'? ¿Gáca'xte caz ral-la' guá' ilena' queëli'? Guli'diguá'-bi' quia' ni.

20 Dujuá'agaquië'-bi' ga na' zoë' Jesúś. Cate' bö' xihui' na' bilé'e Lë', la' buxizitë lëbi'. Gudzö'öbi' lu yu, ate' burixi butula lëbi', ate' bidxía bidxina' zidi' ruá'abi'. **21** Ní'irö Jesúś gunábinë' xúzibi' bi'i na', rnnë':

—¿Gáca'xi chiguca raca caní queëbi'?

Rnnë' xúzibi' na':

—Ni' nácatëbi' bï'ido' ré'ebi' caní. **22** Zián luzuí rirú'una lëbi' lu guí', en lu nisa para guti lëbi'. Que lë ni na', channö racu' lati', buéchi' ladxi' netu', gácalenu' netu'.

23 Jesúś gudxë' lë':

—Channö huáca tséajlë'u, yúgu'te huáca channö tséajlë'u Dios.

24 La' bë'të' zidzaj didza' xúzibi' bi'i na', rnnë':

—¡Réajlë'a! ¡Gúcalen neda' para tséajlë'ëra' Lë'!

25 Cate' bilé'enë' Jesúś zá'gaca böñachi zián, tu'quí Lë', buzenë' bach bö' xihui' na', rë' le:

—Li', bö' xihui' runu' ga biti' raca inná, en biti' raca yöni böñachi, rinná bé'eda' li' uruju' lu bi'i ni, en bíti'rö tsu'u lëbi'.

26 Gurödxi'a bö' xihui' na', en burixi butulada' bi'i na'. Ní'irö burúajtë, en bucá'ana bi'i na' ca bi'i nati cázabi'. Ca' naca, gulu'i didza' böñachi zián ni', ta'nná:

—Chinatibí'.

27 Ní'irö Jesúś gudélë'ë ná'abi', en buchisë'-bi', ate' guzuíbi' bi'i na'.

28 Ní'irö guyázü'ë' Jesúś tu yu'u, ate' la' légacasë' gula'nábinë' bönni' usëda queë' Lë', ta'nnë':

—¿Bizx que biti' guca ubéajtu' netu' bö' xihui' na'?

29 Jesúś gudxë' légaquië':

—Biti' gaca ubéajli' cá'asö bö' xihui' caní, pero tuz channö ulídzali'-në' Dios, en gunli' gubasa.

Jesúś riguíjö'ë leyübölö ca si' ilútië' Lë'

(Mt. 17:22-23; Lc. 9:43-45)

30 Cate' bulu'zë'ë Jesúś, en yugu' bönni' dá'gaquië' Lë' ni', gula'dödë' luyú Galilea. Biti' rë'ënë' Jesúś nu inözi ga na' zoë' **31** tu' rusédinë' yugu' bönni' usëda queë'. Rë' légaquië':

—Ulu'dödë' neda', Bönni' Guljë' Bönachi, lu ná'agaquië' bönni' ilútië' neda', pero tödi gátia', cate' gaca tsonna dza ubana'.

32 Biti' gula'yéajni'inë' didza' ni rë' légaquië', ate' tu' tádxinë', biti' bi gula'nábinë' Lë'.

Nu naca lo

(Mt. 18:1-5; Lc. 9:46-48)

33 Ní'irö Jesúś, en bönni' dá'gaquië' Lé' bila'dxinë' yödzö Capernaum, ate' tsanni ni' nacu'ë lu yu'u, Jesúś gunábinë' légaquië', rñnnë':

—¿Bizxi didza' na' gudíl-lalen luzá'ali' cate' ni' yú'uli' nöza?

34 Légaquië' bulu'sayaj rú'ugaquië', tu' gula'díl-lalen luzá'agaquië' didza' la' nöza ni' núxilögaquië' gáquië' bönni' lo. **35** Ní'irö guro'ë Jesúś, en bulidzë' idixinnutë' bönni' usëda queë'. Rë' légaquië':

—Nu rë'ëni gaca lo ral-la' gaca ca tu bönni' cuídi'sö, enca' ca ni'a ná'ali' yúgu'tëli'.

36 Ní'irö Jesúś gudélë'-bi' tubi' bï'ido', en buzóë'-bi' gatsaj láhui'lö ga na' nacu'ë. Ni' runidë'-bi', rë' légaquië':

37 —Nu bönni' si' lu në'ë tu bï'ido' caní tu' néquibi' quia', si' lu në'ë ca' neda', ate' nu bönni' si' lu në'ë neda', calëga néda'sö si' lu në'ë, pero si' lu në'ë ca' Xuza', Bönni' na' nasöl-lë'ë neda'.

*Nu biti' ridá'baga' rë'u, rácalen rë'u
(Mt. 10:42; Lc. 9:49-50)*

38 Ní'irö Juan gudxë' Jesúś:

—Bönni' Usedi, bilé'etu'-në' tu bönni' rubéajë' yugu' bö' xihui', rugunë' dxin lo'. Gunná bé'etu' lë' bítirö gunë' ca', tu' cabí dë'ë rë'u.

39 Ní'irö Jesúś gudxë' lë':

—Biti' inná bé'eli'-në', tu' channö zoë' nu bönni' runë' tu yöl-la' huáca le za' yehua' yubá, en rugunë' dxin La' neda', biti' ca' gaca bönni' na' innë zi'ë quia'.

40 Caní naca, nu biti' ridá'baga' rë'u, rácalen nu na' rë'u. **41** Núti'tës nu gunna queëli' tu zxiga'do' nisa guí'jali' tu' dá'ali' neda', Cristo, si'i caz nu na' le ral-la' gata' que.

*Zoa böñadxi queëru' gunru' ga nu gun dul-la'
(Mt. 18:6-9; Lc. 17:1-2)*

42 Gunnë' ca' Jesúś:

—Núti'tës nu gun ga gunbi' dul-la' tubi' bï'ido' caní réajlé'ëbi' neda', gácarö dxí'a ugal-la' nu na' guichi riyyetu yaga yeni, en tsöjchú'una cuini lu nísado'.

43 Channö tu no'o gun ga gunu' dul-la', guchugu le. Dxi'arö gaca qui' tsöjtsáziu' ga su' ibanu' zoa tuz no'o, calëga zoa chopá no'o, ate' tsöjtsáziu' lu guí' gabila, ga ni' biti' ulu guí' que. **44** Lataj ni' biti' ilátiba' buzuga' yú'ugacaba' nupa tsöjcuá' ni', ate' guí' na' biti' ca' ulu. **45** Lësca' caní, channö tu ni'u gun ga gunu' dul-la', guchugu le. Gácarö dxí'a qui', tsöjtsáziu' ga su' ibanu' zoa tuz ni'u, calëga zoa chopá ni'u, ate' tsöjtsáziu' lu guí' gabila, ga ni' biti' ulu guí' que. **46** Lataj ni' biti' ilátiba' buzuga' yú'ugacaba' nupa tsöjcuá' ni', ate' guí' na' biti' ca' ulu. **47** Lësca' caní, channö tu guíj lo' gun ga gunu' dul-la', guléaj le. Gácarö dxí'a qui' tsöjtsáziu' ga rinná bë'ë Dios zoa tuz guíj lo', calëga zoa chopá guíj lo', ate' tsöjtsáziu' lu guí' gabila. **48** Lataj ni' biti' ilátiba' buzuga' yú'ugacaba' nupa tsöjcuá' ni', ate' guí' na' biti' ca' ulu.

49 'Ruxi'iru' bëla' zödi', en rugálaru' le ra' guí', para cabí gaca ditaj. Lë ni rusedi rë'u ca ulu'huóáca dxí'a yúgu'të böñachi. Lësca' caní, rë'ënë' Dios izxi'i zödi' yúgu'të bö'a' bëdxido' tu'zégu'gaquië'-ba' lu bucugu lá'ayi queë'.

50 Dxi'a naca zödi', pero channö inici yöl-la' siná'a que, ¿nacxi úniru' le siná'a? Guli'gaca la' libí'isili' ca zödi' dxí'a, sóali' dxí'ado' tulí' len ia'tuli'.

10

Rusédiné' Jesús que nu rulá' yöl-la' nutsaga na'
(Mt. 19:1-12; Lc. 16:18)

¹ Buzé'ë Jesús yödzö Capernaum, ate' guyijé' luyú Judea, en gudödë' ia'tsölä'a yegu Jordán saca' ga rilén gubidza. Bulu'dubi leyúbölö bönnachi zián ga zoë', ate'leyúbölö busédiné' légaquië' ca run cazeë'. ² Ní'irö bila'dxinë'bönni' yudo' fariseo ga zoë' Jesús, ate' të'ennë' ilunë' ga bi innë' Jesús para gaca ulu'zéguïë' Lë' didza'. Gula'nábinë' Lë', ta nnë':

—¿Dë lataj bönni' nutsaga né'ë usanë'-nu nigula queë'?

³ Bubi'ë didza' Jesús, rnne'ë:

—¿Bizxi gunná bë'enë' Moisés libí'ili'?

⁴ Gula'nnë':

—Moisés bë'ë lataj nu bönni' uzúajë' lu guichi le rnna rulá'alenë'-nu nigula queë' na', ate' ní'irö usanë'-nu.

⁵ Bubi'ë didza' Jesús, rnne'ë:

—Gunná bë'enë' Moisés libí'ili' caní tu' naca zidi icja ládxido'oli', ⁶ pero cate' gusí lo rata' yödzölió, Dios benë' légaquië' bönni', en nigula. ⁷ Gunné': "Que lë ni na' ucá'anë' bönni' xuz xinë'ë, en tsöjsóalenë'-nu nigula queë', ⁸ ate' chopë' ni ulu'huööquïë' ca tuz bönnachi." Que lë ni na' bítirö nácagaquië' chopë' pero tuz chinácagaquië'. ⁹ Que lë ni na' ca', nu naca bönnachi biti' ral-la' ulá'a nupa na' chinutságuië' Dios.

¹⁰ Cate' gula'yázië' yu'u, gula'nabi yúdxinë' bönni' usëda queë' Jesús ca naca didza' na' bë'ë. ¹¹ Jesús gudxë' légaquië':

—Núti'tës bönni' ulá'alenë'-nu nigula queë', en utsaga ná'alenë'-nu nigula yúbölö, runë' dul-la' le riguitsaj xibá que yöl-la' nutsaga na' tu' rusubaguë'ë'-nu dul-la' nigula na' guzóalenë'-nu zí'alö. ¹² Lësca' caní channö tu nigula nutsaga ná'lennu bönni' usannu-në', en sí' inu-në' bönni' yúbölö, runnu ca' dul-la' le riguitsaj xibá que yöl-la' nutsaga na'.

Jesús rulidza tsáhuë'ë-bi' yugu' bí'ido'

(Mt. 19:13-15; Lc. 18:15-17)

¹³ Ní'irö bila'dxin bönnachi ga zoë' Jesús dujuá'gaquië' bí'ido' quéguequi. Të'ëni ixoa né'ë légacabi', ate' gula'sí lógaquië' bönni' usëda queë' Jesús ta'dilla díidza'gaquië' nupa na' dujuá'agaca légacabi'. ¹⁴ Cate' bilé'enë' Jesús lë ni, gulénë' légaquië', en gunnë':

—Guli'gúi'-gácabí' bí'ido' lataj ila'dxinbi' quia'. Biti' uzága'gacali'-bi', tu' gata' quégaca nupa nácagaca ca bí'ido' ni, lataj ga rinná bë'ë Dios. ¹⁵ Le nácatë rea' libí'ili': Nu cabí si' lu né'e le rinná bë'ë Dios ca runbi' tu bí'ido', biti' ca' tsaza ga ni' rinná bë'ë.

¹⁶ Ní'irö Jesús bunidë'-bi' yugu' bí'ido' na'. Guxóa né'ë légacabi', en bulidza tsáhuë'ë-bi'.

Bönni' cuidi' napë' yöl-la' tsahu'

(Mt. 19:16-30; Lc. 18:18-30)

¹⁷ Cate' bu'ë Jesús nöza, carelö bidë' tu bönni', en buzúa zxibë' lahuë' Jesús, en gunábinë' Lë', rnne'ë:

—Bönni' Usedi idú dxi'a, ¿nacxi guna' para idéli'da' yöl-la' na'bán idú?

¹⁸ Jesús gudxë' lë':

—¿Bizxi que ru'u neda' didza', rnno': "Idú dxi'a"? Cuntu nu bönni' náquië' idú dxi'a. Tüze' Dios náquië' idú dxi'a. ¹⁹ Chinöz quézinu' yugu' le gunná bë'ë Dios, gunnë':

Biti' gunu' dul-la' le riguitsaj xibá que yöl-la' nutsaga na'.

Biti' gútiu' böñachi.

Biti' cuanu'.

Biti' innío' que luzó'o le cabí nácatë.

Biti' ucáchilanu'.

Ben bal xuz xinó'o.

20 Bubi'ë didza' bönni' na', rë' Jesús:

—Bönni' Usedi, yúgu'të lë ni run caza' cate' ni' nácatea' bñido'.

21 Len yöl-la' dxí'i ladxi' queë', Jesús buyué' lë', rnnë':

—Tu le riyadzaj quiu'. Guyéaj, yøjëti' yúgu'të le dë quiu', en bunödzaj quégaca böñachi yechí' lë na' si'u, ate' gata' quiu' yöl-la' tsahui' yehua' yubá. Ní'irö huödú' quia', gacu' ca tu bönni' sa'yéajë' söjtë'ë lë'e yaga cruz, ate' to'o neda'.

22 Cate' biyönnë' didza' ni, buí'innë', ate' söhuöjë' risëbi ládxë'ë tu' dëda' yöl-la' tsahui' queë'.

23 Ní'irö buyué' Jesús gásibi'ilë', en gudxë' yugu' bönni' usëda queë':

—Böniga naca ila'yaza nupa ta'lë'e yöl-la' tsahui' ga rinná bë'ë Dios.

24 Bulu'báninë' bönni' usëda queë' ca naca xtídzë'ë, ate' leyúbölö Jesús gudxë' légaquië':

—Libi'ili', zxí'ina'do', böñiga naca ila'yázië' bönni' tu'zxöni ládxì'gaquïë' yöl-la' tsahui' quégäquië' ga rinná bë'ë Dios. **25** Nácarö böñiga tsázië' nu bönni' rile'enë' yöl-la' tsahui' ga rinná bë'ë Dios, ca tòdiba' bö'a' ta'bía-ba' böñachi lu nagui yötsi'.

26 Cate' bila'yönnë' didza' ni, bulu'bánitëronë' ca'. Ta'nnë' la' légaçasë':

—¿Nuzxi caz gaca ulá, channö?

27 Buyué' Jesús légaquië', rnnë':

—Biti' gaca gun böñachi lë ni, pero huáquië' Dios, tu' rizéqui'në' Dios yúgu'të.

28 Ní'irö Pedro gudxë' Lë':

—Xan, netu' nucá'anatu' yúgu'të, en dá'atu' Li'.

29 Bubi'ë didza' Jesús, rnnë':

—Le nácatë rea' libi'ili', nu bönni' ucá'anë' lidxë', o böchë'ë, o zanë', o xuzë', o xinë'ë, o nigula queë', o yugu' zxí'inë', o xiyüë', tu' runë' xichina' o tu' runë' libán que didza' dxí'a quia', **30** bönni' ni huazi' queë' ia'tú gayuá'térö ca' dza ni zóaru' na'a, yugu' lidxë', en yugu' böchë'ë, en yugu' zanë', en yugu' xinë'ë, en yugu' zxí'inë', en yugu' xiyüë', enca' yugu' le ila'bía ládxì'gaca böñachi lë', ate' lu yödzölió si' za', gata' yöl-la' na'bán idú queë'. **31** Zián nupa náca gaca lo na'a, ilaca cuídi'sö ni', ate' nupa náca gaca cuídi'sö na'a, ilaca lo ni'.

Leyúbölö riguíxjö'ë Jesús ca si' ilútië' Lë'

(Mt. 20:17-19; Lc. 18:31-34)

32 Cate' ni' yúugaquië' nöza, ta'benë' söjáquië' Jerusalén, nanöruë' Jesús lógaquië' bönni' usëda queë'. Nanítiguequinë', en lu yöl-la' rádxisö söjácalenë' Lë'. Leyúbölö Jesús guchë'ë quez idxínnutë' na'. Gusí lahuë' ruí'ilenë' légaquië' didza' ca naca le ral-la' gaca queë'. **33** Rnnë':

—Rilé'e quézilí' ribenru' zéajru' Jerusalén ga ni' zoa nu udödi neda', Bönni' Guljë' Bönachi, lu ná'agaquië' bixúz unná bë', en lu ná'agaquië' bönni' yudo' usedi, ate' chúguië' quia' gátia', en ulu'döde' neda' lu ná'agaquië' bönni' zi'tu'.

34 Bönni' na' ulu'titjë' neda', en ilúndë'ë neda' zi'. Ulu'chejë' neda' zxöna'. Ní'irö ilútië' neda', pero cate' gaca tsonna dza ubana' lu yöl-la' guti.

*Jacobo en Juan ta'nábinë' Jesús bi gunë' quégaquië'
(Mt. 20:20-28)*

35 Ní'irö gula'biguë'ë Jacobo, en Juan, zxí'inë' Zebedeo, lahuë' Jesús, en të' Lë':

—Bönni' Usedi, rë'ënitu' gunu' queëtu' le inábatu'.

36 Jesús gudxë' légaquië':

—¿Bizxi rë'ënili' guna' queëli'?

37 Gulë' Lë':

—Cate' idxín dza cö'u ga inná bë'u, ben ga cö'ötü' tutu' cuitu' ibëla, en ia'tutu' cuitu' yögöla.

38 Ní'irö Jesús gudxë' légaquië':

—Biti' nözili' bi rinábalí'. ¿Naru' huáca sí'ili' le ral-la' si'a neda', le naca le qui'i saca'a? ¿Naru' huáca idílali' nisa ca idila' neda' nisa, gátia'?

39 Bulu'bí'ë didza', ta'nnë':

—Huácatu'.

Jesús gudxë' légaquië':

—Le nácatë, le qui'i saca'a neda', sí'ili' ca' libíilli', en ca idila' neda' nisa, idílali' ca' nisa, **40** pero biti' dë lu na'a cö'a' nu cuía cuita' ibëla, en nu cuía cuita' yögöla. Dios unödzjé' quégaquië' bönni' chinupé'ë quégaquië' yugu' lataj na'.

41 Cate' bila'yönnë' ia'chíë' bönni' usëda queë' Jesús didza' ni, gula'lenë' Jacobo, en Juan na'. **42** Ní'irö Jesús bulidzë' légaquië', rnnë':

—Nöz quézili' ca tun nupa ta'nná be'e yugu' yödzö, tu'zenë' bach böñachi, ate' nupa nácagaca lo ládjagaquië' ta'nná be'e luzë'eguequi. **43** Biti' gaca caní queëli', pero nu guë'ëni gaca zxön ga zóali', ral-la' gun xichinli' ia'zíca'röli', **44** ate' nútítëslöli' nu guë'ëni gaca lo ral-la' gaca ca bönni' huen dxin tsaz queëli' yugu'tëli'. **45** Caní ral-la' gunli' tu' bida' ni neda', Bönni' Guljë' Bönachi, caléga para nu gun xichina', pero para guna' xichíngaca böñachi, en udöda' yöl-la' na'bán quia' le huöá'uida' böñachi zián.

*Jesús ruúnë' Bartimeo, bönni' lo chul-la
(Mt. 20:29-34; Lc. 18:35-43)*

46 Ní'irö bila'dxinë' Jesús, en yugu' bönni' dá'gaquië' Lë' yödzö Jericó. Cate' ni' rurujë' Jesús yödzö ni, dzágagaquië' Lë' yugu' bönni' usëda queë', enca' böñachi zián. Ra' nöza ni' rö'ë tu bönni' nachul-la lahuë', lë' Bartimeo, zxí'inë' Timeo. Rinabë' nu bi günnösö queë'. **47** Cate' biyönnë' Bartimeo ridödë' Jesús, bönni' Nazaret, ni', gusí lahuë' ru'ë zidzaj didza', rnnë':

—¡Jesús, zxí'ini xi'sóë' David! ¡Buéchi' ladxi' neda'!

48 Nupa ta'dödi ni' gula'dil-la lë' didza'. Të lë':

—Busayaj ru'u.

Ní'irö zidzajrö bulidzë', rnnë':

—¡Zxí'ini xi'sóë' David! ¡Buéchi' ladxi' neda'!

49 Ní'irö guzóë' dxiso Jesús, ribözë', ate' rë' légaquië':

—Buli'lidzë'.

Bulu'lidzë' bönni' na' nachul-la lahuë'. Të lë':

—¡Butipa ládxu'u! ¡Guyaşchi! ¡Rulidzë' li'!

50 Ní'irö gurú'unë' tsölä' alö lari' naxóa yenë'. La' guyásatë', en bidë' ga na' zoë' Jesús. **51** Jesús gunábinë' lë', rnnë':

—¿Bizxi rë'ënú' guna' quiu'?

Bubi'ë didza' bönni' na' nachul-la lahuë', rnnë':

—Bönni' Usedi, rë'ënda' gunu' ga huöálaj guiøj lahua'.

52 Jesús gudxë' lë':

—Böaj lidxu'. Chinuhuöácu' tu' réajlë'u neda'. La' böáljatë guiöj lahuë', ate' sa'yéajlenë' Jesús.

11

Riyazië' Jesús yödzö Jerusalén (Mt. 21:1-11; Lc. 19:28-40; Jn. 12:12-19)

¹ Bila'dxinë' Jesús, en yugu' bönni' dá'gaquië' Lë' gala' ga dë Jerusalén, ga na' nacuá' yödzö Betfagé, en yödzö Betania, en ga na' dë ca' Gu'a Yaga Olivo. Ní'irö Jesús gusöl-lë'ë chopë' bönni' usëda queë², ²en rë' légaquië':

—Guli'tséaj lu yödzödo' dë loru' ni', en cate' tsú'uli' ni', tsójxáca'li'-ba' tuba' búrrodo' nága'ba' ni', en cuntu nu ribiani lëba'. Guli'sedxi-ba', en guli'chë'-ba' quia' ni. ³Channö nu bi guié lib'iili' tu' runli' lë ni, guli'guié nu na': "Xanru' riquinnë'-ba", ate' la' usö'l-la'të'-ba' quiu".

⁴ Ní'irö yöjáquië', en yöjxáca'gaquië'-ba' búrrodo' na', nága'ba' ra' nöza ga nu riyaza lö'a, ate' gula'sedxë'-ba'. ⁵Nupa nacuá' ni' të légaquië':

—¿Bízixi ni runli'? ¿Biza que risédxili'-ba' búrrodo' na'?

⁶ Bulu'bí'ë didza' bönni' usëda queë' Jesús, gulé' légaquië' ca na' chigudxi cazë' Jesús légaquië', ate' gulu'ë légaquië' lataj. ⁷Ní'irö gula'chë'ë-ba' búrrodo' na' ga na' zoë' Jesús. Gula xóë'larí' quégaquië' cídzu'ba', ate' Jesús gudxië'-ba'. ⁸Zián bönni' nacu'ë ni' gula'chiljë' larí' quégaquië' gapa naca la' nöza. Ia'bal-la böñachi ni' gula'guítsaj zin le bulu'zxoa la' nöza.

⁹Gula'sí lo nupa nanörugaca lahuë' Jesús, en nupa na' zá'gaca cídzu'lë' tu'i zidzaj didza', ta nné':

—¡Yöl-la' ba! ¡Xanru' Dios gun lá'ayë' Bönni' zë'ë ni, nasö'l-lë'ë Dios Lë'!

¹⁰¡Dios gun lá'ayë' Bönni' ni si' inná bë'ë, ca na' gunna bë'ë xuz xtó'oru' David! ¡Yöl-la' ba Dios!

¹¹ Caní guca, bidxinë' Jesús Jerusalén, ate' guyázië' lö'a yudo'. Cate' budxi buyüé' yúgu'të le nacuá' idú gásibi'ilö ni', burúajë' zaca' yödzö Betania tu' chiridzö', ate' dzágagaquië' Lë' yugu' bönni' usëda queë'.

Jesús rulidza zi'ë tu yaga higo

(Mt. 21:18-19)

¹² Cate' za' rení' ia'tú dza, ate' tu'rúajë' Jesús, en yugu' bönni' dá'gaquië' Lë' yödzö Betania, ridunë' Jesús. ¹³Zi'tu' bílé'enë' tu yaga higo dxia' xilaguï'. Gubíguï'ë ga na' zoa yaga na' channö utsójxaquië' lati' le ribía. Cate' bidxinë' ni' bití' bi yöjxáquië' le ribía. Xilaguï'sö dxia' tu' cabí ridxini dza cuía. ¹⁴Ní'irö Jesús bulidzë' yaga na', rnne':

—Bítí' rö nu gagu le ribía quiu'.

Yugu' bönni' usëda queë' bila'yönnë' didza' ni.

Jesús rulatjë' lö'a yudo'

(Mt. 21:12-17; Lc. 19:45-48; Jn. 2:13-22)

¹⁵ Cate' bila'dxinë' Jesús, en yugu' bönni' dá'gaquië' Lë', yödzö Jerusalén, guyázië' Jesús lö'a yudo', en gusí lahuë' rubéajë' ní'ilö nupa tuti', en nupa to'o lu lö' a yudo'. Burixë' yugu' blaga quégaca nupa tu'tsá' dumí izá'a, enca' yugu' ga ta'bö' nupa tuti' yugu' gu'dödo'. ¹⁶Biti' ca' bë'ë lataj nu bi guá', uzóa nöza ga naca lö' a yudo'. ¹⁷Busédinë' nupa nacuá' ni', rnne':

—Nazúaj lu guichi lá'ayi, rnna: "Lidxa' si'i le, yu'u ga böñachi idútë yödzölio ulu'lidza Dios." Libí'ili' chinunli' le ca naca lídxigaca gubán.

¹⁸Cate' yugu' bixúz unná bë', en yugu' bönni' yudo' usedi bila'yönnë' didza', ní, gula'sí lógaquië' tu'guiljë' nacxi llútië' Jesús, pero tu' tådxinë' le ilún böñachi,

bití' bi gulunë' queé', tu' tu'bani yúgu'té bönachi ca naca le rusëdinë' Jesús.
19 Cate' chiridzö' burúajë' Jesús lu yödzö na'.

*Ribidxi yaga higo bulidza zi'ë Jesús
(Mt. 21:20-22)*

20 Cate' za' rení' ia'tú dza, gula'dödë' Jesús, en yugu' bönni' dá'gaquië' Lë' ga zoa yaga higo na' bulidza zi'ë Jesús, en bila'lé'enë' le, chinabidxi idú luí.
21 Ní'irö yöjenenë' Pedro bi guca, ate' gudxë' Jesús:

—Bönni' Usedi, buyútsöca'. Chinabidxi yaga higo ni bulidza zi'u néaje.

22 Bubi'ë didza' Jesús, rë' légaquië':

—Guli'tseajlë' Dios. **23** Le nácaté rea' libí'ili', channö nu bönni' guí'ado' ni: "Gucuítia ni, yöjsöa lu nísado", en bití' gaca chopá ládxë'ë bönni' na', pero idú ládxë'ë tseajlë'ë gunë' Dios ca na' rnñé', ca' gaca. **24** Que lë ni na' rea' libí'ili': Yúgu'té le inábali' cate' ulídzali'-në' Dios, guli'tséajlë' chibennë' Dios queéli' lë na' rinábali', ate' gunnë' queéli'. **25** Cate' ni' rulídzali'-në' Dios, channö zoa nu rileli' nu bi ben queéli', buli'niti lo nu na', para uniti lahuë' ca' libí'ili' Xúzili' na' zoë' yehua' yubá ca naca dul-la' nabágali'. **26** Channö cabí uniti lolí' bönachi, bití' uniti lahuë' Xúzili' zoë' yehua' yubá libí'ili' dul-la' nabágali'.

*Yöl-la' unná bë' dë lu në'ë Jesús
(Mt. 21:23-27; Lc. 20:1-8)*

27 Ní'irö Jesús, en yugu' bönni' dá'gaquië' Lë' yöjuöjgaquië' Jerusalén. Cate' ni' ridë' Jesús ga naca chila yudo', bila'dxinë' yugu' bixúz unná bë', en yugu' bönni' yudo' usedi, en bönni' gula tu'zéajni'inë', ga zoë'. **28** Gula'nábinë' Jesús, ta'nnë':

—¿Bizxi yöl-la' unná bë' dë lu no'o runu' yugu' lë ni? ¿Nuzxi caz budödi lu no'o yöl-la' unná bë' gunu' caní?

29 Bubi'ë didza' Jesús, rë' légaquië':

—Neda' ca' inábida' libí'ili' tu didza'. Channö ubí'ili' quia' didza', ní'irö guía' libí'ili' bi yöl-la' unná bë' rúnida' yugu' lë ni. **30** ¿Bizxi budödi lu në'ë Juan uquile' bönachi nisa? ¿Naru' Dios o bönachi? Guli'nnátsöca'.

31 Gula'sí lógaquië' tun xtídz'a'gaquië' la' légacasë', ta'nnë':

—Channö innaru' Dios gusö'l-lë'ë lë', guí'ë rë'u: "¿Bizxi que bití' guyéajlë'ëli' lë?" **32** ¿Naru' guí'ëtsaru'-në': Gula'söl-lë'ë bönni' lë?

Caní ta'zá' ládx'i'gaquië' tu' tádxinë' le ilún bönachi zián nacuá' ni' tu' téquigüequi yúgu'té bönachi na' bë'ë didza' Juan na' uláz queé' Dios. **33** Que lë ni na' gulé' Jesús:

—Bití' nöztu'.

Ní'irö Jesús gudxë' légaquië':

—Neda' ca' bití' quíxjö'i'ida' libí'ili' bi yöl-la' unná bë' dë lu na'a rúnida' yugu' lë ni.

12

*Rucúdzu'ë didza' Jesús ca gaca quégaca huen dxin bití' nácagaca tsahui'
(Mt. 21:33-46; Lc. 20:9-19)*

1 Ní'irö gusí lahuë' Jesús ruí'ilenë' yugu' bönni' dá'gaquië' Lë' didza' yugu' le rucúdzu'ë didza', rnñé':

—Guzoë' tu bönni', budë'ë lubá uva zián ga naca lu xiyúë'. Guléquië' lë'a que, en guchö'önë' tu röga' guiöj ga isié' xisi uva na'. Budxië' tu yu'u gupa ga naca xitsá' ga nu uyú xiyúë' na'.

'Ní'irö budödë' xiyúé' na' lu ná'agaquië' huen dxin, ila'zi'ë gatsaj huéaj le unödzaj, ate' guyijë' yödzö zi'tu'. ² Cate' bidxín dza ulu'chibë' le ribía, gusöl-lë'-bi' bi'i huen dxin tsöjxi'ibi' lu ná'agaquië' huen dxin na' le ral-la' si'ë xanbi' que le gula'bía lubá uva na'. ³ Ní'irö yugu' huen dxin na' gula'gueleë'ë-bi' bi'i na', en gulundë'-bi' zi', ate' bulu'söl-lë'-bi' cá'asöbi'. ⁴ Ní'irö bönni' xan luyú na' gusöl-lë'-ë-bi' ia'tubi' bi'i huen dxin queë', ate' bi'i ni bulu'ladxë'-bi' guijoë. Bulu'lë'ë ícjabí'. Gulu'ë dö' queëbi'. ⁵ Ní'irö bönni' xan luyú na' gusöl-lë'-ë-bi' ca' ia'tubi' bi'i huen dxin queë', ate' bi'i ni gulútië'-bi'. Gusöl-lë'-ë-bi' ca' ziánröbi', ate' bál-labi' gulúngacadë'-bi' zi', en ia'bál-labi' gulútigaquië'-bi'.

⁶ 'Cúnturö nu nagá'ana queë' xan luyú na'. Nagá'anasibi' zxí'inë', ate' nadxf'ide'enë'-bi'. Ga yöjetse', gusöl-lë'-ë-bi' zxí'inë', rnnë': "Ilunë' bal zxí'ina'." ⁷ Ní'irö yugu' bönni' huen dxin na' gula'nnë' la' légacasë', ta'nnë': "Bi'i ni ralla' guequi queëbi' luyú ni. Guli'dá, gútiru'-bi', ate' guequi queëru' luyú ni." ⁸ Que lë ni na' gula'zönë'-bi', en gulútië'-bi'. Gula'rú'unë'-bi' ní'ilö ga dá'gaca lubá uva na'.

⁹ Ní'irö Jesús gunábinë' bönni' nacu'ë ni', rnnë':

—¿Nacxi gunë' bönni' xan luyú na', channö? Huidë', en gútigaquië' bönni' huen dxin na', ate' udödë' luyú na' lu ná'gaquië' bönni' yúbölö.

¹⁰ ¿Naru' cabí nulábanili' lë na' nazúaj lu guichi lá'ayi? Caní rnna: Guiój na' gula'rú'unë' bönni' tu'cu'ë zö'ö, na'a naca guiój len, squin zö'ö.

¹¹ Xanru' Dios benë' ga naca caní ate' rubániru' ca naca lë ni rilé'eru'.

¹² Ní'irö ta'zóia ta'bö'ë ila'zönë' Jesús tu' téquibe'enë' bucúdu'ë didza' ca naca quégaquië', pero tádxinë' le ilún böñachi zián nacuá' ni', en que lë ni na' bulu'cá'anë' Lë', söhüöjgaquië'.

Ca naca le ta'guízxaj lázagaca böñachi

(Mt. 22:15-22; Lc. 20:20-26)

¹³ Gudödi lë ni yugu' bönni' yudo' unná bë' na' gula'söl-lë'-ë bal-lë' bönni' yudo' fariseo len bönni' dá'gaquië' Herodes ga zoë' Jesús para ilunë' ga bi innë' para gaca ulu'zéguë' Lë' didza'. ¹⁴ Bila'dxinë' bönni' ní ga na' zoë' Jesús, en té' Lë':

—Bönni' Usedi, nözitu' ru'u didza' idútë li. Biti' ruí'i ládxu'u bi ta'nnasö böñachi, tu' cabí ruyusu' le tu'lu'isö cuínguequi böñachi, pero rusédinu' ca nácaté le rë'ënë' Dios ilún böñachi. ¿Ruí'i netu' lataj xibá queë' Moisés quizxaj laztu' le tu'quizxjé' uláz queë' César? ¿Naru' uguízxajtu' o biti' quízxajtu'?

¹⁵ Réquibe'enë' Jesús tu'ë didza' lu yöl-la' riguúlaj ladxi' quégaquië', ate' rë' légaquië':

—¿Bízx que rubéajli' neda' didza'? Guli'diguá'tsöca' tu dumí ridá para ilé'eda' le.

¹⁶ Diguá'agaquië' le, ate' Jesús gunábinë' légaquië', rnnë':

—¿Nuzxi lahui da' lë'e ni, en nuzxi lë ni?

Bulu'bi'ë didza', ta'nnë':

—Queë' César na'.

¹⁷ Ní'irö Jesús gudxë' légaquië', rnnë':

—Buli'nödzaj queë' César le nequi queë' César, ate' queë' Dios le nequi queë' Dios.

Bulu'báninë' ca naca didza' bubí'ë Jesús.

Ca naca que yöl-la' rubán lu yöl-la' guti

(Mt. 22:23-33; Lc. 20:27-40)

18 Ní'irö bila'dxinë' bal-lë' bönni' yudo' saduceo ga zoë' Jesús. Bönni' ni ta'nnë' biti' ulu'bán nupa chinátigaca. Que lë ni na' gulé' Jesús, ta'nnë':

19 —Bönni' Usedi, Moisés nuzúajë' queëru' lu guichi channö gátië' tu bönni' biti' zoa bi'i queë', ate' ugá'ananu nigula queë', bi'i böchë'ë bönni' na' ral-la' utsaga ná'alenbi'-nu, en uzóabi' bí'ido' gácabi' bi'i queëbi' böchí'bi'.

20 Gula'cuá'abi' gádxibi' bi'i nágacagabi' böchí'gacabi'. Bi'i huáca na' butsaga ná'alenbi'-nu nigula, ate' gútibí', cuntu nu zoa bí'ido' queëbi'. **21** Bi'i buropi na' butsaga ná'alenbi'-nu nigula uzëbi na', ate' gútibí' ca', cuntu nu zoa bí'ido' queëbi'. Lësca' caní guca queëbi' bi'i bunni. **22** Caní guca, bulu'tsaga ná'alenbi'-nu yúgu'tébi', cuntu nu zoa bí'ido' quégacabi'. Ga yójsetë, gútimu ca' nigula na'. **23** Na'a, cate' ulu'bán nupa chinátigaca, ¿núzxilöbi' guéquinu nigula na' queëbi', tu' bulu'tsaga ná'alenbi'-nu igádxítëbi'?

24 Bubi'ë didza' Jesús, rë' légaquië':

—Richíxili' tu' cabí núnbe'ëli' le nazúaj lu guichi lá'ayi, en biti' nözili' ca naca yöl-la' huáca queë' Dios. **25** Cate' ulu'bán nupa chinátigaca, biti' ca' ulu'tsaga ná'agaquië', ate' yugu' bönni' biti' ila'cuá'lenë' nigula, pero ilácagaquië' ca nácaquäquië' gubáz lá'ayi queë' Dios, nacu'ë yehua' yubá. **26** Na'a, ca naca quégaca nupa chinátigaca channö ulu'bán, ¿narú' cabí nulábanili' le buzúajë' lu guichi Moisés? Ruí'i didza' ca na' bulidzë' Dios lë' lu yaga yötsi'do' régui. Gudxë' lë': "Neda' naca' Dios queë' Abraham, en Dios queë' Isaac, en Dios queë' Jacob." Tu' gunnë' caní quégacäquië', naca bë' nabángacäquië' sal-la' gulátië' zí'alö. **27** Dios náquië' Dios quégaca nupa nabángaca, calëga quégaca nupa nátingaca tsaz. Richixitéröli'.

Le naca lo le gunná bë'ë Dios (Mt. 22:34-40)

28 Bidë' ca' tu bönni' yudo' usedi ga zoë' Jesús. Biyönnë' ca na' gului'ilenë' Jesús didza', en nözinë' dxí'ado' bubi'ë Jesús didza'. Que lë ni na' gunábinë' Jesús, rnnë':

—¿Bízzilö le gunná bë'ë Dios nácatérö lo ca yúgu'té le gunná bë'ë?

29 Bubi'ë didza' Jesús, rë' lë':

—Le gunná bë'ë le nácatérö lo ca yúgu'té naca lë na' rnna: "Guli'yöni böñachi Israel. Xanru' Dios, tuzé' Lë' náquië' Xanru'. **30** Ral-la' idxf' inu' Xanu' Dios idú ládxu'u, en lu idú icja láxi'do'o, en lu idú yöl-la' réajni'i quiu', en lu idú yöl-la' huáca quiu'." Lë ni naca le gunná bë'ë le nácatérö lo. **31** Le gunná bë'ë le naca buropi, lëbisö ca naca. Caní rnna: "Ral-la' idxf' inu' luzó'o ca nadxf'i cuinu'." Biti' ca' zoa ia'tu' le gunná bë'ë le nácarö lo ca chopá ni gunná bë'ë.

32 Ní'irö bönni' yudo' usedi na' gudxë' Jesús, rnnë':

—Dxí'ado' gunnó', Bönni' Usedi. Le nácaté rnno'. Tuzé' náquië' Dios, en cúnturö nu zoa naca Dios. **33** Para idxf' iru'-në' Dios idú láxi'ru', en lu idú yöl-la' réajni'i queëru', en lu idú icja láxi'do'oru', en lu idú yöl-la' huáca queëru', en para idxf' iru' luzá'aru' ca nadxf'i cuinru', nácarö lesaca' ca yúgu'té böa' bëdxido' rútigacarú'-ba' lu bucugu lá'ayi queë' Dios, enca' ca yúgu'té böa' bëdxido' ruzégui'gacarú'-ba' lu bucugu na'.

34 Cate' biyönnë' Jesús dxí'ado' rubi'ë didza' bönni' ni, ní'irö gudxë' lë', rnnë':

—Ia'láti'sö riyadzaj quiu' gúnbe'ü le rinná bë'ë Dios.

Cúnturö nu burugui bi inábini Jesús.

¿Nuzxi zxí'ini náquië' Cristo? (Mt. 22:41-46; Lc. 20:41-44)

35 Cate' ni' rusédinë' Jesús böñachi ga naca chila yudo', rnnë':

—¿Bix que ta'nnë' bönni' yudo' usedi náquië' Cristo zxí'ini xi'sóë' David?

36 Lë cazë' David na' bë'ë didza', zóalenë' Dios Bö' Lá'ayi lë', gunnë':

Xanru' Dios gudxë' Xana':

“Gurö'ö cuita lë'a ibëla

cate' gunra' ga ulu'zóa zxí'bigaca lo'

nupa biti' ta'lé'e Li' dxi'a.”

37 ¿Naru' nácatsë' Cristo zxí'ini xi'sóë' David channö lë cazë' David na' rnnë' queë' náquië' Xanë?

Böñachi zián nacuá' ni' tu'zé nágagaca Lë' gula'yaza ládx'i'gaca didza' ni.

Jesús ruzégui'ë didza' bönni' yudo' tu'sédinë'

(Mt. 23:1-36; Lc. 11:37-54; 20:45-47)

38 Ni' rusédinë' Jesús yugu' bönni' dá'gaquïë' Lë', rë' légaquïë':

—Guli'gún chi'i cuinli' quégäquïë' bönni' yudo' tu'sédinë'. Ta'yaza ládx'i'gaquïë' ta'dé' nilö na'lö, nácuagaquïë' lari' tunna. Ta'yaza ládx'i'gaquïë' ca' tu'lidza tsahui' böñachi légaquïë' gapa naca lu yë'ëyi. **39** Ta'bö'ë yugu' lataj lo lu yu'u ga tu'dubë' tu'séde' queë' Dios, enca' gapa tu'dubë' të'aj tahuë'.

40 Rugúagaquïë' lídxigacanu nigula uzëbi, en para ulu'lui'isö tsahui' cuíngäquïë', xidzé tu'lidzë' Dios. Bönni' ni, gúnda'rë' Dios légaquïë' xíguia'.

Le bunödzjanu tu nigula uzëbido' queë' Dios

(Lc. 21:1-4)

41 Tsanni ni' rö'ë Jesús chila yudo' ga zoa guí'ina ga ta'gú'u böñachi dumí que yudo', ruyúë' ca tun böñachi ta'gú'u dumí lu guí'ina. Dumí zián ta'gu'ë bönni' dë yöl-la' tsahui' quégäquïë'. **42** Ní'irö' bidixinnu tu nigula yechi' uzëbido' ni', ate' gulü'unu chopá dumí lárido', le nazáca'gaca láti'do'os. **43** Ní'irö' bulidzë' Jesús yugu' bönni' usëda queë', en rë' légaquïë':

—Le nácaté rea' libí'ilí, nigula yechi' uzëbido' ni gulú'urönu ca yúgu'të nupa bi ta'gú'u lu guí'ina que yudo'. **44** Yúgu'të bönni' ni ta'gu'ë que le nagá'anasö quégäquïë', pero nigula ni, lu yöl-la' yéchi'do' queënu gulú'unu idútë la's dui tscá le dësö queënu, le ral-la' gáhuinu.

13

Riguíjö'ë Jesús ca si' ulu'quínnajë' yudo'

(Mt. 24:1-2; Lc. 21:5-6)

1 Cate' burúajë' Jesús chila yudo', tuë' bönni' usëda queë' gudxë' Lë', rnnë':

—Bönni' Usedi, buyútsöca' náctiga yugu' yu'u zxön ni, en náctiga yugu' guiöj lë' e zö'ö quéguequi.

2 Bubi'ë didza' Jesús, rë' lë':

—Rilé'enu yugu' yu'u zxön ni, pero biti' ca' ugá'ana guiöj lahui luzë'e ni, tu' ulu'quínnaj böñachi léguequi.

Le ilaca bë' cate' si' údxi que yödzölió

(Mt. 24:3-28; Lc. 21:7-24; 17:22-24)

3 Ní'irö' yójáquïë' Jesús, en yugu' bönni' dá'gaquïë' Lë' lu Guí'a Yaga Olivo, guí'a na' dë ca dödilö ra' yudo'. Cate' chiro'ë Jesús ni', la' légarasë' Pedro, en Jacobo, en Juan, en Andrés, gulé' Lë', ta'nnë':

4 —Gudíxjö'i netu' bátaxi ilaca lë ni. ¿Bixzi gaca bë' chizóa ilaca yúgu'të lë ni?

5 Bubi'ë didza' Jesús, rusédinë' légaquïë', rnnë':

—Guli'gún chi'i cuinli' para cabí nu si' ye'e libí'ili'. ⁶ Ila'lá' lahuë' zián bönni' si' lágiquië' ca lea' neda', ila'nné' nácagaquië' Cristo. Caní ila'zí' ye'enë' bönachi zián.

⁷ Ní'irö cate' yönilí' raca gudil-la nilö ná'alö, bití' gádxili'. Yugu'të lë ni ral-la' ilaca, pero bití' ridxini dza údxi. ⁸ Tu yödzö tíl-lalen ia'tú yödzö, en tu ga nu rinná bë' tsöjtíl-lalen ia'tú ga nu rinná bë'. Zián lataj tödi budó' zxu', en tsu'u gubín. Ila'tsatsa bönachi. Yugu'lë ni ilaca le isí lo ila'gu'i ila'zaca' bönachi dza illí.

⁹ Ní'irö guli'gún chi'i cuinli', tu' ulu'dödë' libí'ili' lu ná'agaquië' bönni' yúlahui'. Ila'guiné' libí'ili' gapa tu'dubë' tu'sëdë' queë' Dios bönni' judío. Idxinrín lógaquië' bönni' ta'nná bë'enë' libí'ili', en lógaquië' bönni' ta'nná bë'enë' yödzö zí'tu'. Iluné' caní queë'lí' tu' dá'ali' neda', pero gunlí' ba nalí quia' neda' ni'. ¹⁰ Zí'alö ca idxín dza údxi, run bayudxi gaca libán que didza' dxi'a quia' lógaca bönachi idútë yödzölió. ¹¹ Cate' ni' ila'chë'ë libí'ili', en ulu'dödë' libí'ili' lu ná'agaquië' bönni' yúlahui', bití' gü'i ládxí'li' bizzi innali'. La' dza ní'isö Dios gunnë' queë'lí' didza' gü'i'ili', ate' lë ni innali'. Cate' ni' gü'i'ili' didza', caléga libí'isili' na' innali', pero Dios Bö' Lá'ayi innë'. ¹² Ulu'dödi bönachi la' böchí'gacasö lu ná'agaquië' bönni' ilútë' légaquië'. Yugu' bönni' nacuá'abi' bi'i quégaquië' ulu'dödë' la' zxí'inigaca cazé' ca', ate' zxí'inigaquië' na' ulu'dödibí' la' xuz xiná'agaca cázabi' lu ná'agaquië' bönni' ilútë' légaquië'. ¹³ Yugu'të bönachi ulu'zóa libí'ili' tsölä'alö tu' dá'ali' neda', pero núlöli' guá' ilenli' lë na' ga idxinxrö dza údxi, uláli'.

¹⁴ Nupa tu'laba didza' ni ral-la' ila'yéajni'i. Buzúajë' lu guichi Daniel, bönni' ni' bë'ë didza' uláz queë' Dios, le rnna caní: "Tsaz tu le xihui' le rucá'ana cané ga naca la'ayi." Dza ní'irö ral-la' ila'zxunnaj nupa nacuá' luyú Judea, en tsöjaca gapa naca lu guí'ado'. ¹⁵ Nu zoa ícjo'olö dza ni' ral-la' izxúnnajtë, en bití' huötaj zxan yu'u para tsöjzxí' bi dë que lu yu'u. ¹⁶ Nu zoa la' guixi' ral-la' izxúnnajtë, en bití' huödaj tsöjzxí' lari' rixóa yeni. ¹⁷ Bica' bayechí' yugu' nigula dza ni' nuá'agacanu-bí' bí'ido', enca' nigula tu'gádxí'nu-bí' bí'ido'. ¹⁸ Buli'lizdë' Dios inábili'-në' cabí gun bayudxi izxúnnajlí' cate' raca beo' ziaga ca'. ¹⁹ Yugu' dza ni' ila'gu'i ila'zaca'rö bönachi ca le guca zí'atëlö cate' si' guta' yödzölió le benë' Dios ga ridxintë na'a dza, ate' dza zá'gaca bití' gaca caní. ²⁰ La'tu' cabí nunë' Dios ga ulu'huöáca nabábasö yugu' dza ni', cuntu nu ulá, pero tu' nadxi'inë' nupa chigurö cazé', chinunë' queë' gunë' ga ulu'huöáca nabábasö yugu' dza ni'.

²¹ 'Na'a, channö nu guíë libí'ili': "Buli'yútsöca', ni zoë' Cristo", o inná: "Buli'yútsöca', ni' zoë'", bití' ca' tséajlë'ëli' nu na'. ²² Ila'lá' lahuë' zián bönni' ila'zí' ye'enë' bönachi. Ila'nné' nácagaquië' Cristo, en ila'nné' nácagaquië' bönni' tu'ë didza' uláz queë' Dios. Ulu'luf'ine' le ilaca bë', en ilunë' yugu' yöl-la' huáca zxön. Huala'zí' ye'enë' ca' nupa gurö cazé' Dios channö ila'zéqui'në'. ²³ Ní'irö libí'ili', guli'soa ban ladxi'. Yugu'të chigudxa' libí'ili' zí'atëlö ca gaca.

Ca huödë' Bönni' Guljë' Bönachi (Mt. 24:29-35, 42-44; Lc. 21:25-36)

²⁴ Gunnë' ca' Jesús:

—Yugu' dza ni', tödi gaca dza na' ila'gu'i ila'zaca' caní bönachi, ichul-la' gubidza, en bití' cu'u bení' beo'. ²⁵ Ila'guínnaj bólaj lúzxiba, en ila'zxizi le nál-agaca nalá'gaca lúzxiba na'. ²⁶ Ní'irö ila'lé'eni neda', Bönni' Guljë' Bönachi, za'a

lu bōaj lúzxiba, napa' yöl-la' huáca zxön, en yöl-la' bení' quia'. ²⁷ Isöł-la'gaca'-në' gubáz lá'ayi quia', ate' ulu'tubë' böñachi gurö caza' quia' nacuá' idapa la'a yödzölió, ga naguélä' tē luyú bidxi, ga ridxité ga naguela' lúzxiba.

²⁸ 'Guli'tséajni'i le rusedi yaga higo ni'. Cate' ta'lén ni'a në'e huë'ënido', en rubía xilagui' yulu, nözili' chizóa idxín beo' cusubá. ²⁹ Lësca' caní, cate' ilé'eli' taca lë ni, inrözili' chizóa idxín dza údxí na', en chiridzaga lo. ³⁰ Le nácaté rea' libí'ili', yúgu'té lë ni ilaca zí'atëlö ca ilátigaca nupa nacuá' dza na'. ³¹ Huadödi que lúzxiba, en que luyú ni, pero xtídza' a catu caz tödi que.

³² 'Cate' idxín dza ni' o rëla ni', cuntu nu nözi. Biti' nözguequinë' gubáz lá'ayi nacuë' yehua' yubá, en biti' nözda' neda', Zxi'inë' Dios. Tuzé' Dios Xuz nözinë'. ³³ Que lë ni na', buli'subán ladxí'li'. Guli'soa sina', en buli'lidzë' Dios tu' cabí nözili' bizxi dza gaca lë ni. ³⁴ Gaca ca raca cate' sa'yéajë' zí'tu' tu bönni'. Cate' chizóa uzé'ë lidxë', udödë' lu ná'agaquie' huen dxin queë' yugu' le dë queë'. Que queëgaquie' gu'ë xichíngaquië', en inná bë'ë soa ban ladxi' nu zoa huen chi'i ga nu riyaza. ³⁵ Guli'soa libí'ili' ban ladxi' tu' cabí nözili' bátaxi huödë' xan yu'u, cate' chiridzö', o gatsaj lahui' yëla, o cate' ribödxiba' böra, o zilado'. ³⁶ Guli'gún caní, para cabí idixáquie' libí'ili' rásili' channö huödë' tsálido'os. ³⁷ Lë ni rea' libí'ili', rea' ca' yúgu'té böñachi: Guli'soa ban ladxi'.

14

Tun xtídza'gaquië' bönni' yudo' ila'zönë' Jesús

(Mt. 26:1-5; Lc. 22:1-2; Jn. 11:45-53)

¹ Ia'chopa dza ca' gaca Laní Pascua cate' tu'subanë' bönni' judío ca benë' Dios, bubéajë' xuz xtó'ogaquie' luyú Egipto. Naca laní cate' tahuë' yöta xtila biti' nazí' cúa zi que. Ta'zóa ta'bö'ë yugu' bixúz unná bë', en bönni' yudo' tu'sedinë' ila'zönë' Jesús bagáchisö para ilútie' Lë. ² Ta'nnë':

—Biti' gaca sönru'-në' dza laní tu' ila'tsatsa böñachi.

Nigula rigú'unu le rilá' zxixi icjë' Jesús

(Mt. 26:6-13; Jn. 12:1-8)

³ Zoë' Jesús yödzö Betania, lu yu'u lidxe' Simón, bönni' güi'inë' huë' nudzu' ruzödi. Tsanni ni' rö'ë rahuë' Jesús, guyázanu tu nigula, nuá'anu tu böga'do' néquini guiój zaca', yudzu le rilá' zxixi que yöj susén lasi idú, le nazaca'yenni'. Gulá'anu böga'do' na', en gulú'unu le rilá' zxixi na' icjë' Jesús. ⁴ Gula'lélanë' bal-lë' bönni' nacuë' ni. Ta'nnë' la' légacase':

—¿Bizz que guca ditaj le zxixi na'? ⁵ La'tu' nu guti' lë na', huazi' que ia'lati' ca lázxjaru' que tu iz para nu quisi le quégaca böñachi yechi'.

Gula'nnëdë'ë queénu.

⁶ Ni'irö Jesús bë'ë didza', rnnë':

—Guli'gü'i-nu lataj. ¿Bizz que rinnë zí'ili' queénu? Naca dxia' le bennu quia'. ⁷ Nacuá'lentica'sö böñachi yechi' libí'ili', en bátati'tës guë'ënili', huáca gunli' dxia' quégacaquie', pero neda' biti' sóatica'sa' ga zóali'. ⁸ Tscá le guzxéquiu'nu bennu nigula ni. Cate' gulú'unu le rilá' zxixi ni neda', bupá'anu neda' zí'atëlö ca igáchaa' yeru ba. ⁹ Le nácaté rea' libí'ili', gáti'tës ga gaca libán que didza' dxia' quia' idú yödzölió, soa nu quixjö' ca' lë ni bennu nigula ni quia'. Caní gaca para nu tsöjnë lënu.

Rizi' lu në'ë Judas udödë' Jesús

(Mt. 26:14-16; Lc. 22:3-6)

10 Ní'irö birúajë' Judas Iscariote, bönni' nabábalenë' chínnuë' na' dá'gaquië' Jesús. Guyijë' ga nacu'ë bixúz unná bë' para udödë' Jesús lu ná'agaquië'. **11** Cate' bila'yönnë' xtídzë'ë Judas na', bulu'dzéjanë', ate' gula'zí' lu ná'agaquië' ilu'ë lë' dumí. Ní'irö gusí lahuë' Judas rizóa ribö'ë udödë' Jesús lu ná'agaquië'.

Le rë'aj ráguru' rusubanru' ca gótië' Xanru'

(Mt. 26:17-29; Lc. 22:7-23; Jn. 13:21-30; 1Co. 11:23-26)

12 Naca dza risí lo laní cate' tahuë' yöta xtila biti' nazí'i cúa zi que, dza na' tutië'-ba' bö'cu' zxíla'do' tahuë'-ba' dzö' Laní Pascua na', cate' tu'subanë' ca benë' Dios busölë' bönnachi judío luyú Egipto. Ní'irö bönni' usëda queë' Jesús gula'nábinë' Lë', ta'nnë':

—¿Gazxi rë'ënu' tsöajtu' tsöjpá'atu' le gáguru' xtsö' que Laní Pascua?

13 Ní'irö Jesús gusöl-lë'ë chopë' bönni' usëda queë', en rë' légaquië':

—Guli'tséaj lu yödzö. Ni' huadzágali' tu bönni' nu'ë tu rö'ö nisa. Guli'tséajlenë'. **14** Ga na' tsázië', guli'guíë' xan yu'u na': "Rnnë' Bönni' Usedi: ¿Gazxi zoa yu'u ga na' gágulengaca'-në' bönni' usëda quia' xtsö' que Laní Pascua?" **15** Ní'irö ulu'inë' libíili' tu yu'u zxön ga naca buropi cuía ga chinabá'a. Bulí'pá'a le gáguru' ni'.

16 Bila'rúajë' bönni' usëda queë' na', en bila'dxinë' lu yödzö, ate' yöjkáca'gaquië' yúgu'te ca na' chigudxë' légaquië' Jesús. Bulu'pë'ë le ilahuë' ni' que Laní Pascua.

17 Cate' chizá' ral-la, bidxinë' Jesús ni', dzágagaquië' idxinnutë' bönni' usëda queë' Lë'. **18** Tsanni ni' rö'ögaquië' tahuë', bë'ë didza' Jesús, rnnë':

—Le nácatë rea' libíili', zoa nu dzaga libíili', nu rágulen neda' tsözxön, nu udödi neda' lu ná'agaca bönnachi.

19 Ní'irö bulu'hui'innë', en gula'sí lógaquië' tu tuë' të' Lë':

—¿Naru' neda'?

Ia'tüe' ca' gunnë':

—¿Naru' neda'?

20 Bubi'ë didza' Jesús, rë' légaquië':

—Naca tu nu nutsa' ladaj chínnuli' ni, bönni' na' numë'ë nö'ë tsözxön len na'a lu yö'öna. **21** Tseja' ga gátia' neda', Bönni' Guljë' Bönachi, ca na' nazúaj lu guichi lá'ayi ca gaca quia', pero bica' bayechi' bönni' na' udödë' neda' lu ná'agaquië' bönni' ilútie' neda'. Gácarö dxi'a queë' bönni' na' la'tu' cabí guljë'.

22 Tsanni ni' tahuë', gudélë'ë Jesús yöta xtila. Gudxë' Dios: "Xclenu'." Buzzuzxjë' le, en bë'ë quégagaquië', rnnë':

—Guli'gagu. Lë ni naca bë'lä' rön quia'.

23 Gudélë'ë ca' tu zxíga'do', en gudxë' Dios: "Xclenu'." Ní'irö bë'ë quégagaquië', ate' yúgu'të' gul'ëajë' le. **24** Jesús rë' légaquië':

—Lë ni xichöna' le run tsutsu didza' cubi rucá'ana tsahui', le núnlenë' Dios bönnachi. Rön ni ilalaj ni'a quégaca bönnachi zián. **25** Le nácatë rea' libíili', bíti'rö guí'ja' xisi uva ga idixinrö dza guí'ja' le cubi ga ni' rinná bë'ë Dios.

Jesús rnnë' innë' Pedro biti' núnbe'ë Lë'

(Mt. 26:30-35; Lc. 22:31-34; Jn. 13:36-38)

26 Gudödi gulúl-lë' yöl-la' ba, bila'rúajë' söjáquië' Guí'a Yaga Olivo. **27** Ní'irö Jesús gudxë' légaquië', rnnë':

—Yúgu'tëli' gaca chopá ládxíli', ucá'anali' neda' na'a dzö', tu' nazúaj lu guichi lá'ayi, rnna: "Gutia'-në' uyú bö'cu' zxila', ate' ilásilasiba' bö'cu' zxila' na'." **28** Tödi ubana' lu yöl-la' guti, tseja' luyú Galilea zí'alö ca libíili'.

29 Ní'irö Pedro gudxë' Jesús, rnnë':

—Sal-la' yúgu'té' ilaca chopá ládx'i'gaquië', en ulu'cá'anë' Li', biti' ca' gaca chopá ládx'a' neda'.

30 Jesús gudxë' lë', rnnë':

—Le nácatë rea' li', la' dzö' nisö, si' cödxilöba' böra le buropi luzuí, tsonna luzuí innó' biti' núnbe'u neda'.

31 Ní'irö Pedro buzötjë' Dios, rnnë':

—Sal-la' gátilentea' Li' tsözxöñ, biti' ca' innia' biti' núnbe'a Li'.

Lësca' caní gula'nnë' yúgu'té'.

Jesús rulidzë' Dios la' yëla Getsemaní

(Mt. 26:36-46; Lc. 22:39-46)

32 Ní'irö Jesús, en bönni' dá'gaquië' Lë' bila'dxinë' la' yëla Getsemaní, ate' Jesús gudxë' légaquië', rnnë':

—Guli'cö' ni, tsanni tseja' neda', tsöjlidza'-në' Dios.

33 Jesús guchë'ë Pedro, en Jacobo, en Juan, ate' gusí lahuë' ridzöbinë', en risëbi ládxë'ë. **34** Gudxë' légaquië', rnnë':

—Huati caza' lu yöl-la' risëbi ladxi'. Guli'cöz ni, en guli'ná' yëla.

35 Ní'irö guzë'ë Jesús ia'láti'do', en busudxín lahuë' lu yu, bulidzë' Dios. Gunábinë' Lë', channö huáca, ucuítë' queë' le ral-la' qui'i sáqueë'ë dza na'. **36** Ni' rulidzë' Dios, rnnë':

—Xúza'do', yúgu'té huáca gunu' Li'. Gucuítá lë na' ral-la' qui'i saca'a, pero calëga ca rë'ënda' neda', pero ca rë'ënu' Li', gunu'.

37 Ní'irö bōajë' Jesús ga na' nacu'ë bönni' usëda queë', ate' yöjxáquië' légaquië' tasië'. Gudxë' Pedro:

—Simón, ¿rásitsalo? ¿Naru' cabí rubéajtso' yëla lo' tu chí'ido'? **38** Guli'ná' yëla, en buli'lidzë' Dios, inábili'-në' para cabí gata' lataj tu' xihui' idilú'u yöl-la' libí'ilí. Le nácatë bö' naca cázali' zoa caz sina', pero lu yöl-la' bönáchisö queëli' ricudí'ilí'.

39 Ní'irö sa'yéajë' Jesús leyúbölö, rulidzë' Dios, en la' tuz ca gunnë'. **40** Cate' bōajë' leyúbölö ga na' nacu'ë, yöjxáquië' légaquië' tasië' tu' nadöditë yëla lógaquië'. Biti' nözguequinë' bizxi didza' ulu'bí'ë, le ilë' Lë'. **41** Cate' bōajë' le bunni luzuí ga na' nacu'ë, rë' légaquië':

—¿Rásitsali? ¿Ruzi'tsa ládxí'ilí? ¡Tsca'ti' gaz! ¡Chibidxín dza! ¡Buli'yútsöca', Neda, Bönni' Guljë' Bönachi, chinadöda' lu ná'agaca bönachi dul-la'! **42** ¡Guli'chasa, uyéajru! ¡Buli'yútsöca', chizë'ë bönni' na' udödë' neda' lu ná'agaca bönachi!

Ta'zönë' Jesús

(Mt. 26:47-56; Lc. 22:47-53; Jn. 18:2-11)

43 Ni' ru'ë Jesús didza' ni, bidxinë' Judas, bönni' nabábalenë' chínnue' na' dá'gaquië' Jesús, ate' zá'lengaquië' bönni' zián lë', nuá'agaquië' guíe tuchi', en yaga. Yugu' bixúz unná bë', en yugu' bönni' yudo' usedi, en bönni' gula tu'zéajni'inë' nasöl-la'gaquië' légaquië'. **44** Judas, bönni' na' rudödë' Jesús lu ná'agaquië' chinulu'i'inë' légaquië' tu le gunë' le gaca bë' nu naca Jesús, gunnë':

—Bönni' na' utsaga lahua'-në', Lë' na' Jesús. ¡Guli'sönë', en guli'chë'ë! ¡Buli'yútsöquië'!

45 Cate' bidxinë' Judas ni, la' gubíga'të' ga na' zoë' Jesús, en gudxë' Lë':

—Bönni' Usedi, Bönni' Usedi.

Ní'irö busudxín lahuë' Jesús. ⁴⁶ Ní'irö gula'zönë' Jesús, en gula'chë'ë Lë' nadzunë'.

⁴⁷ Ní'irö tuë' bönni' ni' dë'ë Jesús guléajë' güië tuchi', en benë'-bi' huë' bi'i huen dxin queë' bixúz lo. Guchúguië' guidi nágabi'. ⁴⁸ Jesús gudxë' böñachi na', rnnë':

—¿Narúajtsali' nuá'ali' güië tuchi', en yaga para sönli' neda', runli' ca runli' cate' rizönlì'-në' gubán? ⁴⁹ Yugu' dza guzóalena' libí'ilí rusédigacada' böñachi ga naca chila yudo', ate' biti' guzxönlì' neda', pero raca caní para gaca le nazúaj lu guichi lá'ayi.

⁵⁰ Ní'irö yúgu'të bönni' usëda queë' Jesús bulu'cá'anë' Le', ta'zxúnnaejë'.

Rixzúnnajbi' tubi' bi'ira'bán

⁵¹ Zóabi' ca' ni' tubi' bi'i ra'bán söjnobi' Jesús, nuxoásö cuinbi' tu lari' blaga'. Yugu' bönni' na' nachë'gaquië' Jesús gula'zönë'-bi' ⁵² pero busanbi' lari' na', en xiguídisöbi' buzxúnnaajbi'.

Ridxinë' Jesús lógaquië' bönni' yúlahui' lo

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Gula'chë'ë Jesús lahuë' bixúz lo, ate' bulu'dubë' ni' yúgu'të bixúz unná bë', en bönni' gula tu'zéajni'inë', en yugu' bönni' yudo' usedi. ⁵⁴ Pedro yójnahue' Jesús zi'tu' zi'tu'sö, en guyázië' lö'a lidxi bixúz lo na', en gurö'ölénë' tsözxöñ yugu' ni'a né'ë bixúz lo na', rutsë'e cuinë' ra' güi'.

⁵⁵ Yugu' bixúz unná bë' len yúgu'të bönni' yúlahui' lo bulu'guiljë' tu le ulu'subáguië' Jesús para gaca ila'chúguië' queë' gátië' pero biti' bi bulu'dzölinë'. ⁵⁶ Bönni' zián gula'nnë' queë' Jesús le cabí nácatë, pero biti' yójlozagaca le gula'nnë' queë'. ⁵⁷ Ní'irö gula'zuinë' yugu' bönni' gula'nnë' queë' Jesús le cabí nácatë, ta'nnë':

⁵⁸ —Netu' biyöñitu' didza' bë'ë bönni' ni, gunnë': "Uquínnaja' yudo' ni, lë ni nequi lu ni'a lu na' böñachi, ate' tsonna dzasö uchisa' ia'tu le cabí nequi lu ni'a lu na' böñachi."

⁵⁹ Lësca' lë ni, biti' yójlozagaca xtídza'gaquië'.

⁶⁰ Ní'irö guyasë' bixúz lo na' gatsaj láhu'lö böñachi nacuá' ni', en gunábinë' Jesús, rnnë':

—¿Naru' cabí rubi'itso' didza'? ¿Bizxi na' ta'nnë' quiu' bönni' ni?

⁶¹ Jesús, dxiso zoë'. Biti' bi didza' rubi'ë. Gunábinë' Lë' leyúbölö bixúz lo na', rnnë':

—¿Naru' nacu' Li' Cristo, Zxí'inë' Dios Lá'ayi?

⁶² Bubi'ë didza' Jesús, rnnë':

—Naca'. Ilé'eli' neda', Bönni' Guljë' Bönachi, soa' cö'a cuitë' ibëla Dios napa cazë' yöl-la' huáca cate' ni' huöda' lu böaj lúzxiba.

⁶³ Ní'irö bixúz lo na', lu yöl-la' rilé queë' guchözë' lari' nácuë', rnnë':

—¿Núxirö naquíñiru' nu quixjö'? ⁶⁴ ¡Riyón quézili' rucá'anë' Dios cá'asö len didza' ru'ë! ¿Nacxi rusáca'li' queëli'?

Yúgu'të gula'chúguië' queë' gátië'.

⁶⁵ Ní'irö gula'sí lógaquië' bal-lë' tu'chejë' Jesús zxöna'. Bulu'sayjë' lahuë', en gulundë' Le' zi', ta'nnë':

—Gunnë yá'atsöca' nuzxi na' bë' Li'.

Yugu' bönni' ni'a né'ë bixúz lo gula'gápë'ë ru'ë Jesús.

Rnnë' Pedro biti' núnbe'ë Jesús

(Mt. 26:69-75; Lc. 22:56-62; Jn. 18:15-18, 25-29)

66 Cate' ni' zoë' Pedro lö'a zxan yu'u, bidxinbi' tubi' bi'i nigula huen dxin queë' bixúz lo na' ga na' zoë'. **67** Cate' bilé'ebi' Pedro, rö'ë rutsë'e cuinë' ra' guí', buyubí' lë', rnabí':

—Do'o ca'lí Jesús, bönni' Nazaret na'.

68 Gudá'baguië' Pedro, rnnë':

—Biti' núnbe'a-në', en biti' nözda' bizxi na' rnno'.

Burúaje' Pedro yöjsöö' ga nu riyaza lö'a. Ní'irö gurödxiba' böra. **69** Buyubi' lë' leyübölö bi'i nigula huen dxin na', en gusí lobí' rëbi' nupa nacuá' ni':

—Bönni' ni dzáguië' légaquië'.

70 Leyübölö gudá'baguië' Pedro. Ia'lati' gudzé nupa nacuá' ni' të Pedro, ta'nná:

—Le nácatë dzagu' légaquië', tu' nacu' bönni' Galilea. Yöl-la' ruí'sö quiu' didza' naca bë'u, tu' tuz ca ruí'ilí' didza'.

71 Gusí lahuë' Pedro rudxía dö' cuinë', en ruzötje' Dios, rnnë':

—Biti' ca'núnbe'a-në' bönni' na' ruí'ilí' didza' ca naca queë'.

72 La' gurödxitebä' böra le buropi luzuí. Ní'irö yöjenenë' Pedro didza' na' bë'ë Jesús, gudxë' lë': "Zi'alö cödxiba' böra le buropi luzuí, tsonna luzuí innó' biti' núnbe'u neda'." Cate' yöjenenë' didza' ni, gusí lahuë' ribödxidë'ë.

15

Ridxineë' Jesús lahuë' Pilato, bönni' rinná bë'ë

(Mt. 27:1-2, 11-14; Lc. 23:1-5; Jn. 18:28-38)

1 Ni' naca zílado', yugu' bixúz unná bë' len bönni' gula tu'zéajni'inë', en yugu' bönni' yudo' usedi, en yugu'të bönni' yúlahui' lo gulún xtídzagaquië'. Ní'irö gula'chë'ë Jesús náguë'ë, en bulu'dödë' Lë' lu në'ë Pilato, bönni' rinná bë'ë uláz que yödz Roma. **2** Pilato gunábinë' Jesús, rnnë':

—¿Naru' nacu' Li' Bönni' inná bë'enë' böñachi judío?

Bubi'ë didza' Jesús, rnnë':

—Ca nácatë rnno'.

3 Yugu' bixúz unná bë' bulu'zéguië' Jesús didza' le zián. **4** Ní'irö Pilato gunábinë' Lë' leyübölö, rnnë':

—¿Naru' cabí rubí'itsó' didza'? Buzétsöca' nagu' cate' xö zián le ta'nnë' quiu'.

5 Biti' bi didza' bubí'ë Jesús. Ca' guca, bubáninë' Pilato.

Ta'chúguië' queë' Jesús gátië'

(Mt. 27:15-31; Lc. 23:13-25; Jn. 18:38-19:16)

6 Dë tu le runë' Pilato cate' raca laní na', rusanë' lu ná'agaca böñachi tu bönni' nadzunë' lidxi guíë, nútí'tés nu ta'naba. **7** Nadzunë' tu bönni' lë' Barrabás lidxi guíë, ate' dzágagaquië' lë' ia'bal-lë' luzë'ë, yugu' bönni' gulútië' böñachi cate' gula'dá'báguië' yúlahui'. **8** Cate' bila'dxín böñachi zián ni', gula'sí lógaquië' ta'nabë' lahuë' Pilato gunë' quégaquië' ca run cazë'. **9** Bubi'ë didza' Pilato, rnnë':

—¿Rë'ënili' usana'-në' queëli' Bönni' Inná Bé'enë' Böñachi Judío?

10 Caní gunnë' Pilato tu' réquibe'enë' bulu'dödë' yugu' bixúz unná bë' Jesús lu në'ë tu'tu'zxé'enë' Lë'. **11** Yugu' bixúz unná bë' na' gula'gu'ë xilá ládxí'gaca böñachi zián na', para ila'nabë' lahuë' Pilato usanë' lu ná'agaquië' Barrabás.

12 Ní'irö Pilato gunábinë' légaquië' leyübölö, rnnë':

—¿Bizxi rë'ënili' guna' queë' bönni' na' ruí'ilí' lë', Bönni' Inná Bé'enë' Böñachi Judío?

13 Gulu'ë zidzaj didza', ta'nnë':

—¡Budé' é lë'e yaga cruz!

¹⁴ Gunábiné' Pilato légaquié', rnné':

—¿Bizxi caz dö' nu'ë?

Leyúbolö tu'ë zidzaj didza', ta'nné':

—¡Budé' é lë'e yaga cruz!

¹⁵ Tu' gü'unné' Pilato guné' ga ila'yaza láxi' gaca böñachi zián na', busané' Barrabás lu ná'agaquie'. Ní'irö gunná bë'ené' nu quin Jesúś, ate' budödë' Lë' lu ná'agaquie' bönni' ulu'dé' è Lë' lë'e yaga cruz.

¹⁶ Ní'irö yugu' bönni' röjáquié' gudil-la gula'chë' è Jesúś lõ'a yúlahui', ate' bulu'tubë' luzá'agaquie' ni'. ¹⁷ Bulu'gácuë' Jesúś tu lari' xiná gul-la, en guluné' tu bregui' ni'a në'e yötsi', le bulu'dxië' icjé'. ¹⁸ Ní'irö gula'sí lógaquié' tu'lidzé' Jesúś, ta'nné':

—¡Yöl-la' ba li', rinná bë'enu' böñachi judío!

¹⁹ Gula'guíné' gui icjé', en bulu'chejë' Lë' zxöna'. Bulu'zúa zxíbagaquié' lahuë', en lu yöl-la' rutitaj guluné' Lë' bal. ²⁰ Cate' budxi bulu'titjé' Lë', bulu'güé' lari' xiná chul-la na' nácuë' ate' bulu'gácuë' Lë' lari' que cazé'. Ní'irö gula'chë' è Lë' ní'ilö yúlahui' na' para tsöjda'gaquié' Lë' lë'e yaga cruz.

Tu'dé' è Jesúś lë'e yaga cruz

(Mt. 27:32-44; Lc. 23:26-43; Jn. 19:17-27)

²¹ Guluné' ga bi'ë tu bönni' Cirene yaga cruz quee' Jesúś, ridödisé' ni' suzé' è la' guixi'. Lë' Simón, xúzgacabí' Alejandro, en Rufo.

²² Gula'chë' è Jesúś lataj na' nazí'i le Gólgota, tu didza' hebreo le rnna lu didza' xidza', Lataj Que Böga' Ícjaru'. ²³ Gulu'è le guíjé' Jesúś xisi uva nutsi' nöri silá' que yaga mirra, pero Lë' biti' gu'é le. ²⁴ Ní'irö bulu'dé' è Jesúś lë'e yaga cruz, ate' gula'guisië' lari' nácuë', le gula'zí' que queégaquié' bönni' na' röjáquié' gudil-la. Bulu'béajé' le gaca bë' para ila'nöziné' bizxilö idela' que queégaquié'.

²⁵ Naca idú xsila cate' bulu'dé' è Lë' lë'e yaga cruz. ²⁶ Didza' na' bulu'zóë' lë'e yaga cruz íjalë' Jesúś ca naca le tu'quíë' Lë' rnna caní: "Bönni' Rinná Bé'ené' Böñachi Judío." ²⁷ Bulu'dá'lené' Jesúś tsözxón lë'egaca yaga cruz chopë' gubán, tuë' cuita lë' ibëla, en ia'tuë' cuita lë' è yögöla. ²⁸ Caní guca lë na' nazúaj lu guichi lá'ayi, rnna: Gubábalené' bönni' tuá' dö'.

²⁹ Yugu' bönni' ta'dödë' ni' tu'lidza zi'ë Jesúś, en tu'tá ícjagaquié', ta'nné':

—¡Ön! ¿Naru' uquínnajtso' yudo' quee' Dios, ate' tsonna dzasö uchísatsu' le?

³⁰ ¡Busölá cuinu' na'a, en bötaj lë'e yaga cruz na'!

³¹ Lëscá' caní yugu' bixúz unná bë', en yugu' bönni' yudo' usedi tu'titjé' Lë'. Të' luzá'agaquié' tuë' ia'tuë':

—Böñachi yúbölö busölë', pero biti' gaca usölá cuinë'.

³² Ta'nné' ca':

—¡Ön! ¿Nácatsu' Cristo, Bönni' Inná Bé'ené' Böñachi Israel? ¡Bötjatsöca' na'a lë'e yaga cruz para ilé'etu', ate' tséajlë'ëtu' Li'!

Yugu' bönni' na' dá'gaquié' tsözxón len Lë' lë'egaca yaga cruz bulu'lidza zi'ë ca' Lë'.

Le guca cate' gútië' Jesúś

(Mt. 27:45-56; Lc. 23:44-49; Jn. 19:28-30)

³³ Cate' bidxín idú huagubidza, guchul-la idútë yödzölió. Guca caní ga bidixté idú ridödi xihuö. ³⁴ Idú ridödi xihuö na' bë' è Jesúś zidzaj didza', rnné':

—Eloi, Eloi, ¿lama sabactani?

Didza' hebreo ni rrna lu didza' xidza': Dios quia', Dios quia', ¿bizx que nubéaj ládxu'u neda'?

35 Yugu' bönni' nacu'ë ni' bila'yönni'ë didza' ni, ate' ta'nnë':

—Buli'zëtsöca' nágali'. Elías rulidzë'.

36 Ní'irö guxití'ë tu bönni' nútse'ë lädjagaquië', en buxúpinë' nupi zi tu le bululu rë'aj nisa. Budë'ë le lahui gui, en bë'ë le xupë' Jesús, rnnë':

—Cöztsöca'ru', uyuru' channö huidë' Elías uzötjë' Lë'.

37 Gurödxi'ë zidzaj Jesús, en la' gütítë'. **38** Biröza' lari' yödx nala' lu yudo'. Birúaj choplö, gudela' icjlö, en birúajtë zxánilö. **39** Bönni' na' rinná bé'enë' bönni' rójäquië' gudil-la zuínë' lahuë' Jesús, en bilé'enë' ca na' guca gurödxi'ë Jesús, en la' gütítë', ate' gunnë':

—Le nácatë bönni' ni gúquië' Zxí'inë' Dios.

40 Nacuá'anu ca' ni' nigula, zí'tu'sö tu'yunu. Nútsa'gacanu lädjagacanu María Magdalena, en Salomé, en María, xiná'agacabi' Jacobo cuidi', en José.

41 Nigula ni yójácalennu Jesús cate' ni' gudë' luyú Galilea, en gulácalennu Lë', gula'gú'unu le gulahuë'. Nacuá'anu ca' ni' ia'bál-lanu nigula zián gula'zá'lennu Lë' lu yödzö Jerusalén.

Ta'gu'ë Jesús yero ba

(Mt. 27:57-61; Lc. 23:50-56; Jn. 19:38-42)

42 Chizá' ral-la, en naca dza tu'pë'ë, dza sì' idxín dza lá'ayi quégagaquië' bönni' judío. **43** Que lë ni na' bidë' José, bönni' yödzö Arimatea, bönni' lo lädjagaquië' bönni' yúlahui' lo. Ribözë' ca' dza idinná bë'ë Dios. Idú lädxë'ë guyázie' ga na' zoë' Pilato, en gunábinë' lë' gu'ëlé' lataj u'ë Jesús. **44** Bubáninë' Pilato tu' gunnë' chigutië' Jesús, ate' bulidzë' bönni' na' rinná bé'enë' bönni' rójäquië' gudil-la para inábinë' lë' channö chinatië' Jesús. **45** Cate' biyönnë' ca na' gunnë' bönni' na' rinná bé'enë' bönni' rójäquië' gudil-la, bë'ë José lataj u'ë Jesús. **46** Ní'irö José na' gúue' tu lari' xtila dxí'ado', ate' buzötjë' Jesús lë' e yaga cruz, en buchölinë' Lë' lari' na'. Ní'irö gulu'ë Lë' yero ba nadaj lë' e guí'a guiój. Budë'ë tu guiój blaga zxön ga nu riyaza ba na'. **47** María Magdalena, en María, xiné'ë José tu'yunu ga na' ta'gu'ë Jesús.

16

Rubanë' Jesús lu yöl-la' guti

(Mt. 28:1-10; Lc. 24:1-12; Jn. 20:1-10)

1 Cate' chinadödi dza lá'ayi quégaca bönochí judío le naca dza gadxi, María Magdalena, en Salomé, en María, xiné'ë Jacobo, ta'zí'nu yugu' le rilá' zxixi para tsöjlú'ugacanu Jesús. **2** Ni' naca zílado' dza risí lo, yójácanu ra' yero ba queë'. Bila'dxinnu ni' cate' si' gulén gubidza. **3** Gula'nábinu luzá'agacanu:

—¿Nuzxi cíatso' queëru' guíoj na' da' ga nu riyaza ba queë'?

4 Cate' bila'dxinnu ni', bulu'yunu, en bila'lé'enu chinadúa guíoj na', ate' guíoj zxön naca. **5** Gula'yú'unu yero ba lë' e guí'a guíoj na', ate' ni' bila'lé'enu-bi' tubi' bi'i bönni' ra'bán, nácabi' gubáz lá'ayi queë' Dios. Rö'öbi' tsölä'a ibëla lu yero ba na', náculbi' lari' tunna chiguichido'os. Guládxide'nu. **6** Ní'irö bi'i na' gúdxibi' légaçanu, rnnabi':

—Bítirö gádxili'. Ruguílajli' Jesús, Bönni' Nazaret, Bönni' na' gudë'ë lë' e yaga cruz. Chibubanë'. Biti'zoë' ni. Buli'yú ga ni gula'gú'ë Lë'. **7** Guli'tséaj na'a, guli'tsöjtixjöi'i ca' yugu' bönni' usëda queë', enca' Pedro. Guiéli' légaquië':

“Tsejë’ Jesús luyú Galilea zí’alö ca libí’ili’. Ni’ ulé’eli’-në’ ca na’ chigudxi cazë’ libí’ili’.”

⁸ Ní’irö bulu’rúajnu ni’, bulu’zxúnnajnu ra’ yero ba na’ tu’ ta’zxízinu lu yöl-la’ radxi ridzöbi quégacanu. Cuntu nu gulënu ca’ tu’ tádxinu.

*Rulu’i lahuë’ Jesús lon María Magdalena
(Jn. 20:11-18)*

⁹ Cate’ bubanë’ Jesús zílado’ dza na’, bulu’i lahuë’ zí’alö lonu María Magdalena, nigula na’ bubéaje’ gadxi bö’ xihui’ gula’yú’u lënu. ¹⁰ Guyéajnu yöjtíxjöi’ inu nupa na’ gula’dalen Jesús. Nupa ni ta’sëbi ládxigaca, en ta’bödxi yechi’. ¹¹ Cate’ bila’yöni didza’ rui’inu, zoë’ nabanë’ Jesús, ate’ bilé’e quézinu Lë’, biti’ gula’yéajlë’ lënu.

*Chopë’ bönni’ usëda queë’ Jesús tu’lé’enë’ Lë’
(Lc. 24:13-35)*

¹² Gudödi na’, nadzá’alö bulu’i lahuë’ Jesús lógaquië’ chopë’ bönni’ usëda queë’ yú’ugaquië’ nöza, söjáquië’ ga naca ladaj guixi’. ¹³ Ní’irö bulu’dxinë’, dutíxjöi’iguequine’ ia’zíca’re’, ate’ ni xtídza’gaquië’ biti’ gula’yéajlë’ë.

*Le rigu’ë Jesús lu ná’agaquië’ bönni’ gubáz queë’
(Mt. 28:16-20; Lc. 24:36-49; Jn. 20:19-23)*

¹⁴ Ga yöjetë, bulu’i lahuë’ Jesús lógaquië’ idxinéajtë’ tsanni ni’ ta’bö’ë tahuë’, ate’ gudil-lë’ légaquië’ didza’ tu’ cabí ta’yéajlë’ë Lë’, en tu’ naca zidi icja ládxido’gaquië’, tu’ cabí gula’yéajlë’ë xtídza’gaca nupa na’ bila’lé’ë Lë’ nubanë’. ¹⁵ Ní’irö gudxë’ légaquië’, rnne’:

—Guli’tséaj idútë yödzölió tsöjenli’ libán que didza’ dxi’a lógaca yúgu’të böñachi. ¹⁶ Nu tséajlë’ neda’, en idila nisa, ulá nu na’, pero nu biti’ tséajlë’, irugu que gati nu na’. ¹⁷ Le ilaca bë’ ni ilunë’ bönni’ ila’yéajlë’ë neda’. Ulu’gunë’ dxin La’ neda’, en ulu’béaje’ yugu’ bö’ xihui’ yú’ugaca böñachi, en ilu’ë didza’ izá’a. ¹⁸ Channö ila’zönë’-ba’ bëla sínia’ lu ná’agaquië’, o channö ile’jë’ le nachë’ yöl-la’ guti, biti’ bi gun quégaquië’. Ilä’xóa në’ë nupa te’e, ate’ ulu’huöacatë.

*Ruhuëpë’ Jesús yehua’ yubá
(Lc. 24:50-53; Hc. 1:6-11)*

¹⁹ Cate’ Xanru’ budxi bëlenë’ légaquië’ didza’ ni, buchisë’ Dios Lë’ yehua’ yubá ga ni’ gurö’ë cuitë’ ibëla Lë’. ²⁰ Bila’rúaje’ légaquië’, yöjéngäquië’ libán yúgu’të yödzöö. Gúcalenë’ Xanru’ légaquië’, en benë’ ga gulunë’ le náccagaca bë’ naca idútë li didza’ tu’ë. Ca’ naca.

DIDZA' DXI'A BUZÚAJË' LUCAS

Didza' rigu'ë Lucas lu në'ë Teófilo

¹ Zián nupa chigulún bayudxi ulu'zúaj lu guichi idútë le nácatë, le guca ga zóaru', ² ca na' bila'lé'e nupa ni' dza ni'te, ate' bulu'lui'i rë'u, en bulu'zé didza' que. ³ Teófilo, bönni' tsáhui'do', runi neda' naca dxi'a uzúaja' quiu' lu guichi, ga ze lo dzö' yúgu'të lë ni, tu' chibuguúlaj bubéquia' ga ze lo dzö' ca naca yúgu'të lë na' guca dza ni'te. ⁴ Ruzúaja' quiu' lu guichi ni para inözinu' naca idútë li lë na' chinazëdu'.

Rulu'inë' gubáz lá'ayi queë' Dios ca si' gálajbi' Juan, bönni' uquile' böñachi nisa

⁵ Dza ni'te cate' gunná bë'ë Herodes luyú Judea, ni' zoë' tu bixúz lë' Zácarías. Nabábalené' cö'bixúz, nazí'ile Cö' Queë' Abías. Elisabet, nigula queë' Zácarías na' nácanu ca' zxif'ini xi'soë' Aarón, bönni' gúquië' bixúz lo dza ni'te. ⁶ Náccagaquië' Zácarías, en Elisabet tsahui' lahuë' Dios, ate' idú ládxigaquië' tunë' ca rnna xtídze'ë Dios, en le rinná bë' xibá queë'. Caní guca, cuntu nu guca bi innë' quégaquië'. ⁷ Cuntu nu zoa bi'i quégaquië', tu' nácanu Elisabet nigula huödx, ate' chinagúlaguacië' irópatë'.

⁸ Guca beo' gul-la' uláz que cö' na' nabábalené' Zácarías ilunë' dxin lahuë' Dios, lu yöl-la' bixúz quégaquië'. ⁹ Ca naca le nulaga lógaquië' tunë' bixúz, gulla' uláz queë' Zácarías guyázie' lu lataj lá'ayi que yudo' para uzégu'ë yalaj lahuë' Xanru' Dios. ¹⁰ Tsanni ni' ruzégu'ë Zácarías na' yalaj, gula'cuá' yúgu'të böñachi ni'ilö, tu'lidza Dios. ¹¹ La' ná'asö bulu'i lahuë' gubáz lá'ayi queë' Xanru' ga zoë' Zácarías na'. Zuínë' gubáz na' tsolá'a ibëla bucugu lá'ayi ga na' régui yalaj. ¹² Cate' bilé'enë' Zácarías gubáz lá'ayi na', gurö'ë böñiga, en gudxi bidzöbinë'. ¹³ Ni'irö gubáz lá'ayi na' gudxe'ë lë', gunnë':

—Zácarías, biti' gádxinu', tu' chibiyönnë' Dios le rinabu' lahuë', ate' Elisabet, nigula quiu', uzóanu-bi' tubi' bi'i bönni'do', ate' gu'u labi' Juan. ¹⁴ Gata' quiu' le uzi'u xibé, en udzéjanu', ate' zián nupa ulu'dzeja ládxigaça cate' gálajbi' bï'ido' na', ¹⁵ tu' gácatëbi' zxön lahuë' Dios. Biti' guí'ajbi' xisi uva, en calëga tu le rusudxi böñachi, ate' sóalené'-bi' Dios Bö' Lá'ayi cate' isí lo si' gálajbi'. ¹⁶ Gunë' Juan ni ga ulu'huóaca zián böñachi Israel queë' Xanru'. ¹⁷ Inöruë' lë' ca Xanru', ate' ila'cuá'alen lë' Bö' na', en yöl-la' huáca na' gula'cuá'alen Elías, bönni' bë'ë didza' uláz queë' Dios dza ni'te. Caní gunë' para únë' tuz nupa náccagaca xuz len zxif'inigaquië', en uzéajni'inë' nupa ta'dá'baga' para ilácagaca tsahui', en ucözë' böñachi para ila'zí' lu në'eguequi Xanru'.

¹⁸ Zácarías gunábinë' gubáz lá'ayi na', rnnë':

—¿Bixxi gaca bë' para inözdä' ilaca lë ni? Chinagúla' neda', en chinagúlanu ca' nigula quia'.

¹⁹ Bubi'ë didza' gubáz lá'ayi na', rnnë':

—Neda' lea' Gabriel. Runa' dxin lahuë' Dios. Lë cazë' gusöl-lë'ë neda' para gü'ülena' li' didza', en usiyönda' li' didza' dxi'a ni. ²⁰ Na'a, tu' cabí guyéjalë'u xtídza'a, icödzu', en bíti'rö gaca innó' cate' gácarö lë ni. Yúgu'të lë ni udxín cate' idxín dza que.

²¹ Tsanni ni' raca lë ni, nacuá' böñachi ni'ilö, ta'böza Zácarías, ate' tu'bani tu' ridzenë' xidzé ga na' zoë' lu lataj lá'ayi. ²² Cate' burúajë' Zácarías, biti' guca

güí'ilenë' légaquië' didza', ate' guléquibe'enë' bilé'enë' tu le buluí'inë' Dios lë' lu lataj lá'ayi. Bulá'a buluí'isë' Zacarías, buzéajni'inë' légaquië', tu' cabí raca innë'.

²³ Cate' bizá'a yugu' dza na' ral-la' gunë' dxin Zacarías lahuë' Dios, ní'irö böaje' lidxe'. ²⁴ Gudödi yugu' dza na' Elisabet, nigula queë' Zacarías na', biá'anu-bi' lë'ënu bï'ido', ate' idú gayu' beo' bugá'anasinu ga zoa lídxigaquië'. Guzá'ládxí'nu, rnnanu: ²⁵ "Canírunë' Xanru' quia'. Ruzá'ládxë'ë quia'bï'ido', en runë' ga bíti'rö utu'ida' lögaca bönnachi."

Riguíjö'ë gubáz lá'ayi ca si' gálajbi' Jesús

²⁶ Cate' chiguca xopa beo', bulu'i lahuë' gubáz lá'ayi na', tu' gusöl-lë'ë Dios lë' cazë' Gabriel, tseje' Nazaret, tu yödzö luyú Galilea. ²⁷ Dios gusöl-lë'ë lë' ni' tsøyüé'-bi' tubi' bi'i nigula ra'bando' lëbi' María. Chinazí' lu ná'abi' María utsaga ná'alenbi'-në' bönni' lë' José. Nababë' José di'a dza queë' David, bönni' gunná bë'enë' bönnachi Israel dza ni'te. ²⁸ Cate' guyázië' Gabriel na' ga zóabi' María, gudxé'-bi':

—Padiux. Dios ruzá' ládxë'ë quiu'. Xanru' Dios zóalenë' li'. Lë' cazë' benë' ga nácaru' li' bica' ba ca yúgu'të nigula.

²⁹ Cate' bilé'ebi' María gubáz lá'ayi na', gurö'öbi' böninga tu' nözi didza' na' bë'ë, en rubani ládxí'bi' nacxi sa'yéaj didza' na' bulidzë'-bi' gubáz lá'ayi na'.

³⁰ Ní'irö gubáz lá'ayi na' gudxé'-bi', rnñë':

—María, bití' gádxinu', tu' chibidéli'nu' le ruzá' ládxë'ë Dios quiu'. ³¹ Na'a, tsú'ubi' tubi' bï'ido' lë'u, ate' uzú'-bi' tubi' bi'i bönni'do', ate' gu'u labi' Jesús.

³² Jesús ni tsépisétérë', en si' Lë' Zxi'inë' Dios, Nu nayépisétérö. Xanru' Dios gunë' ga inná bë'ë ca na' gunná bë'ë David, xuz gula gudödi queë'. ³³ Jesús na' inná bë'etica'sinë' bönnachi Israel, ate' le inná bë'ë Lë' catu caz tödi que.

³⁴ Ní'irö María gunábibi' gubáz lá'ayi na', rnñabi':

—¿Nacxi caz gaca lë ni, tu' cabí zóalena' bönni'?

³⁵ Bubi'ë didza' gubáz lá'ayi na', rë'ë'-bi':

—Guidé' Dios Bö' Lá'ayi ga zu', ate' yöl-la' huáca queë' Dios, Nu nayépisétérö, sóalen li', le gaca ca tu zxul-la rigú'u böaj ga zu'. Que lë ni na' bi'i bönni'do' na' ral-la' gálajbi', tsú'ubi' lu në'ë Dios, ate' si' labi' Zxi'inë' Dios.

³⁶ Cá'anqueze Elisabet, nigula dí'a dza quiu', chinuá'anu-bi' lë'ënu tubi' bi'i bönni'do' sal-la' chinagúlanu. Gula'nnë' queënu: "Nácanu nigula huödx", pero chizéaj xopa beo' nuá'anu-bi' lë'ënu bï'ido' na'. ³⁷ Bití' bi zoa le cabí séqui'në' Dios.

³⁸ Ní'irö María gunabi':

—Ni zoa'. Tsaz naca' huen dxin queë' Xanru'. Gaca quia' ca na' chigunnó'. Ní'irö la' buza'të' gubáz lá'ayi na' ga zóabi' María.

María söjubi'-nu Elisabet

³⁹ La' dza ní'isö guyú'ubi' nöza María, ate' carelö sa'yéajbi' ga naca guí'ado', en bidxinbi' tu yödzö luyú Judea. ⁴⁰ Ni' guyázabi' lidxe' Zacarías, en gúdxibi'-nu Elisabet:

—Padiux.

⁴¹ Cate' biyöninu Elisabet didza' na' bë'ëbi' María, la' butátë cuinbi' bi'i huë'ënido' na' yú'ubi' lë'ënu, ate' bidisóalenë'-nu Dios Bö' Lá'ayi. ⁴² Ní'irö bë'ënu Elizabeth zidzaj didza', rnñanu:

—¡Chinunë' Dios ga nácaru' li' bica' ba ca yúgu'të nigula, en chinunë' ca' ga nácabí' bica' ba bï'ido' na' yú'ubi' lë'u! ⁴³ ¿Núzzxitë neda', zá'anu xinë'ë Xana'

quia'? ⁴⁴ Cate' biyönda' didza' bë'u, bulidzu' neda', lu yöl-la' rudzeja queëbi' la' butátē cuinbi' bi'i huë'ënido' ni yú'ubi' lë'a. ⁴⁵ ¡Bica' ba li' tu' guyéajlë'u xtídzë'ë gubáz lá'ayi, ate' udxín caz lë na' gudxë' li' uláz queë' Xanru'!

⁴⁶ Ní'irö gunabi' María:
¡Idútë le naca' rigú'u Xanru' yöl-la' ba,
⁴⁷ en rudzeja ládxilena'-në' Dios, Nu rusólá neda'
⁴⁸ ¡Dios caz buzá' ládxë'ë quia' neda'
Yu'a lu në'ë, en tsaz naca' huen dxin queë'.
Na'a isí lo, ca naca quia' ila'nná:
Bica' ba nigula na'.

⁴⁹ ¡Zxöntérö naca le benë' Dios unná bë' quia'!

¡Lá'ayi naca Lë'!
⁵⁰ Lë' ruhuéchí' ládxitica'së' böñachi tadxi Lë'
na'a dza, en dza zá'gaca.

⁵¹ Yugu' yöl-la' huáca zxön chibenë' Lë'.
Buzötje' nupa gulún zxön yöl-la' réajni'i quéguequi.
⁵² Bugúé' yöl-la' unná bë' quégaca nupa gulaca lo,
en benë' ga gulaca lo nupa gulaca nöxaj ladxi'.
⁵³ Benë' ga bulu'huölaj bulu'dzë'e nupa gula'dún,
en bucá'anë' cá'asö nupa bila'lé'e yöl-la' tsahui'.
⁵⁴ Gúcalenë' böñachi Israel, nupa na' tun xichinë',
tu' yöjenenë' légaquïë', en buéchí' ládxë'ë légaquïë'.
⁵⁵ Benë' ca guzxí' lu në'ë gunë' quégäquïë' xuz xtó'oru'
enca' queë' Abraham, en quégaca dí'a dza queë'.

⁵⁶ María bugá'analenbi'-nu Elisabet idú ca tsonna beo', ate' gudödi ni' böajbi' lídixibi'.

Le guca cate' gúlajbe' Juan, bönni' uquile' böñachi nisa

⁵⁷ Cate' bidxín dza ral-la' sóabi' bï'ido' queënu Elisabet, buzóanu-bi' tubi' bi'i bönni'do'. ⁵⁸ Bila'yöni dzaga yu'u queënu, en yugu' dí'a dza queënu ca na' guca, buéchí' ládxë'ë-nu Dios, ate' bulu'dzéjalen lënu. ⁵⁹ Cate' chiguca xunu' dza zóabi' bï'ido' na', bila'dxinë' dí'a dza queënu para ila'chúgië' lu xipëla'bi' bi'i bönni'do' na' lë na' gaca bë' néquibí' queë' Dios, ate' té'ënnë' ilu'ë labi' Zacarías ca na' lë' xúzibi'. ⁶⁰ Ní'irö bubí'nu didza' Elisabet, xiná'abi', rnnanu': Caléga. Juan si' labi'.

⁶¹ Gula'nábinë'-nu, ta'nnë':

—¿Bízq que? Cuntu nu dí'a dza quiu' lë' Juan.

⁶² Ní'irö bulu'lá' bulu'luf'isinë', gula'nábinë' xúzibi' nacxi rë'ënë' gu'ë labi'.
⁶³ Zacarías na' gunabë' tu blágado', ate' buzúajë' lahui caní: Juan lëbi'. Bulu'báninë' yúgu'të'. ⁶⁴ La' ní'isö böáljatë ru'ë Zacarías na', en buguitjatë lúdxë'ë, ate' bë'ë didza' le gulu'ë Dios yöl-la' ba. ⁶⁵ Ní'irö guládxinë', en bulu'báninë' yúgu'të' dzaga yu'u quégäquïë', ate' yúgu'të yödzôdo' nacuá' lu guí'ado' luyú Judea, guzé didza' ca guca lë ni. ⁶⁶ Gula'zá' ládxigaca yúgu'të nupa bila'yöni ca na' guca, ta'nná: "¿Nacxi caz gácabí' bi'i bönni'do' ni? Le nácatë Xanru' zóalenë'-bi'."

Didza' bë'ë Zacarías uláz queë' Dios

⁶⁷ Ní'irö Dios Bö' Lá'ayi bidisóalenë' Zacarías, xúzibi' Juan, ate' bë'ë didza' uláz queë' Dios, rnne':

⁶⁸ ¡Yöl-la' ba Dios, Xángaca böñachi Israel

tu' buduyúë' rë'u, bönachi queë', en böá'uë' rë'u!

69 ¡Gusöl-lë'ë queëru' Bönni' usölë' rë'u,

len yöl-la' huáca zxön queë'!

Bönni' ni guljë' lágajgaca dí'a dza queë' David,
huen dxin queë' Dios.

70 ¡Dza ni'te guzxi' lu në'ë gunë' ga gaca caní!

Raca ca na' gunnë' lu ruá'agaquië' bönni' gulu'ë didza' uláz queë'.

71 Guzxi' lu në'ë usölë' rë'u

lu ná'agaca nupa tequi rë'u zi',
enca' lu ná'agaca nupa biti' ta'lé'e rë'u dxi'a.

72 Guzxi' lu në'ë huéchi' ládxë'ë xuz gudödi queëru',

en tsöjenenë' le guzxi' lu në'ë le naca lá'ayi.

73 Lë ni benë' tsutsu xtídzë'ë, en guzxi' lu në'ë,

le gunë' queë' Abraham, xuz gudödi queëru',
le naca tú le ral-la' gurië' queëru' rë'u.

74 Guzxi' lu në'ë usölë' rë'u

lu ná'agaca nupa biti' ta'lé'e rë'u dxi'a
para cabirö gádxiru' gunru' xichinë' Lë',

75 en para gácaru' ba'a ladxi', en idú dxi'a
lahuë' Lë' yúgu'té dza sóaru' ibanru'.

76 Lí', zxí'ina'do', si' lo' bönni' ru'ë didza' uláz queë' Dios unná bë'
tu' tsöjnöru' ca Xanru' caz, en upó'o nöza ga tödë'.

77 Gunu' ga ila'nözi bönachi queë' ca gaca ulu'lágaca,
en ca na' uniti lahuë' Dios dul-la' nabága'gaca.

78 Caní gaca, tu' ruhuéchi'da' ládxë'ë Dios rë'u,
en runë' ga tsení' queëru' Bönni' na' náquië' bení' idú.

79 Lë' uzení'ë quégaca nupa nacuá' gapa naca chul-la,
en gapa nacuá' nupa chizóa ilátigaca

para ugú'ë rë'u nöza ga cö'ö dxi'ládx'i'do'oru'.

80 Guzxönbí' bi'i bönni'do' na', en bidipa ládx'i'bi'. Guzóasibi' gapa naca lu
lataj cá'asö cate' bidixinrö dza bulu'i lobi' lögaca bönachi Israel.

2

*Le guca cate' gúlajbi' Jesús
(Mt. 1:18-25)*

1 Lu dza na' gunná bë'ë Augusto César, bönni' Roma, ila'yaza lu guichi yúgu'té bönachi nacuá' yödzölió. **2** Cate' gusí lo ta'yaza lu guichi caní, rinná bë'ë bönni' lë' Cirenio luyú Siria. **3** Yúgu'té bönachi yöjaca yödzö que queëguequi ga na' zeaj nababa para ila'yaza lu guichi. **4** Guzé'ë José yödzö Nazaret luyú Galilea, sa'yéajë' luyú Judea, en bidixinë' yödzö Belén, ga ni' guljë' David, tu' guljë' José lágajgaca dí'a dza queë' David na'. **5** Guyijë' José ni' para tsazië' lu guichi, ate' dzágabi'-në' María, bi'i nigula nazí' lu ná'abi' utsaga ná'alenbi' lë', en chizóa sóabi' bi'ido' queëbi'. **6** Cate' ni' nacu'ë lu yödzö Belén, bidixin dza sóabi' bi'ido' queëbi'. **7** Buzóanu-bi' tubi' bi'i bönni'do', bi'i huáca queënu. Buchölinu-bi' yugu' lári'do', ate' gudíxjanu-bi' tu lu yú'udo' ga tun chi'i le táguba' böa' quégaca bönachi yú'ugaca nöza. Caní guca, tu' cabí bidzöli lataj ila'cu'ë lu yu'u ga ni' ta'dxín bönachi yú'ugaca nöza.

Tu'lu'i lahuë' gubáz lá'ayi queë' Dios ga nacu'ë bönni' tu'yúë'-ba' bö'cu' zxila'

⁸ Gala' ra' yödzö Belén nacu'ë bönni' tu'yúgaquië'-ba' bö'cu' zxila' la' guixi', tapa chí'igaquië'-ba' chí'i dzö'ölö. ⁹ La' bului'íté lahuë' gubáz lá'ayi queë' Xanru' ga na' nacu'ë. Yöl-la' bení' queë' Xanru' buzení' ga na' nacu'ë, ate' guládxinë'. ¹⁰ Ni'irö gubáz lá'ayi na' gudxë' légaquië', rñne':

—Biti' gádxili'. Na'a rusiyönda' libi'ili' didza' le gun ga udzéjade'eli', le ulu'zi' ca' xibé yúgu'te böñachi. ¹¹ Na'a chigúlajbi' lu ladzé' David Nu usólá libi'ili'. Nu ni naca Cristo, Xanru'. ¹² Lë ni gaca bë'ëbi'. Udzólilí'-bi' Bí'ido' na', narólibi' yugu' lári'do', en dëbi' tu lu yú'udo' ga tun chí'i le táguba' böä' quégaca böñachi yú'ugaca nöza.

¹³ Ga na' zoë' gubáz lá'ayi na', tsálido'os bulu'lui' lógaquië' ziánrö ca' gubáz lá'ayi queë' Dios, narúajgaquië' yehua' yubá, en ta'gu'ë Dios yöl-la' ba, ta'nnë': ¹⁴ ¡Yöl-la' ba Dios zoë' xitsá', ate' luyú gaca le cuéqui dxi ládxí'do'gaquië' bönni' raza ládxë'ë Dios légaquië'!

¹⁵ Cate' bulu'zë'ë gubáz lá'ayi na' ga ni' nacu'ë, söjhuöjgaquië' yehua' yubá, ni'irö gulé luzë'ë tuë' ia'túë' bönni' uyú bö'cu' zxila' na', ta'nnë':

—Uyéajtsöca'ru' Belén para ilé'eru' lë ni chiguca ca na' chibusiyönnë' Xanru' ré'u.

¹⁶ La' yójacatië', ate' yójacá'gaquië' María len José, enca' bí'ido' na', dëbi' tu lu yú'udo' ga tun chí'i le táguba' böä' quégaca böñachi yú'ugaca nöza.

¹⁷ Cate' bila'lé'enë' läbi', gula'guíxjö'ë lë na' si' busiyönnë' gubáz lá'ayi na' légaquië' ca naca queëbi' bí'ido' na'. ¹⁸ Bulu'bani yúgu'te nupa bila'yöni didza' gulu'ë bönni' tu'yúë' bö'cu' zxila' na'. ¹⁹ María gulú'usö icja náganu didza' ni, ate' guzá' ládxí'nu ca naca que. ²⁰ Söjhuöjgaquië' bönni' na' tu'yúë'ba' bö'cu' zxila', tunë' zxön Dios, en ta'gu'ë Lë' yöl-la' ba ni'a que yúgu'te lë na' bila'yönnë', en bila'lé'enë', le guca ca na' busiyönnë' gubáz lá'ayi na' légaquië'.

Ta'gu'ë-bi' bí'ido' Jesús lu né'ë Dios

²¹ Cate' chiguca xunu' dza zóabi' bí'ido' na', gula'chúguië' lu xipëla'bi' lë na' naca bë' néquibi' queë' Dios, ate' gulu'ë labi' Jesús ca na' chibé' cazë' labi' gubáz lá'ayi na' zí'alö cate' si' tsú'ubi' lë'ënu xiná'abi'.

²² Cate' chibizá'a dza que le tu'pá'a cuíngacanu nigula ca rinná bë' xibá queë' Moisés, gula'chë'ë-bi' bí'ido' Jesús yödzö Jerusalén para ila'gu'ë-bi' lu né'ë Xanru' Dios. ²³ Caní gulunë', tu' nazúaj lu guichi lu xibá queë' Xanru' le rnna: "Yúgu'tebi' bi'i bönni'do' nácagacabi' bi'i zí'alö queënu xiná'agacabi', ulu'béajë'-bi' quez queë' Xanru' Dios." ²⁴ Que lë ni na' yójáquië' ni' para ilútie'-ba', en ila'gu'ë-ba' lahuë' Dios chópaba' gúgudo' o chópaba' budödu' ca na' rinná bë' xibá queë' Xanru' Dios.

²⁵ Dza ní'isö zoë' tu bönni' lë' Simeón lu yödzö Jerusalén. Bönni' ni náquië' tsahui', en reaj ládxë'ë Dios. Ribözë' Bönni' na' isöl-lë'ë Dios, Bönni' na' gácalenë' böñachi Israel. Dios Bö' Lá'ayi zóalenë' Simeón na', ²⁶ en chibulu'ínë' lë' biti' gátië' cate' ilé'erönë' Cristo, Bönni' na' isöl-lë'ë Xanru' Dios. ²⁷ Bidixinë' Simeón na' chila yudo' tu' guchë'ë Dios Bö' Lá'ayi lë' ni'. Cate' xuz xiná'abi' gula'chë'ë-bi' bí'ido' Jesús chila yudo' para ilunë' queëbi' ca rinná bë' xibá na', ²⁸ ní'irö bunidë'-bi' Simeón na', en guyéaj ládxë'ë Dios, rñne':

²⁹ Xana', na'a huáca gunnu' neda' lataj gátiá', soa dxi ládx'a'a tu' chiguca le gudxu' neda', huen dxin quiu'.

³⁰ Chibilé'eda' Nu na' buzúa cazu', Nu usólá böñachi,

³¹ Nu na' ulú'u lahui lógaca yúgu'te böñachi,

³² Lëbi' nácabí' bení' le uzení' böñachi izá'a,

en nácabí' ca' bení' quégaca bönachi Israel quiu'.

³³ Bulu'bániné' José, en María, xiná'abi' bí'ido' Jesús, ca naca lë na' gunnë' Simeón ca naca queébi' Jesús. ³⁴ Simeón na'gunábiné' Dios gunë' ga gaca dxi'a quégaquië', ate' gudxë'-nu María, xiná'abi' Jesús, rnnë':

—Buyútsöca'. Bi'i ni nuzóë'-bi' Dios para gunbi' ga ila'chixi bönachi zián, ate' ulu'huóåsa bönachi zián ladaj bönachi Israel. Gácabi' tu le naca bë', ate' ila'nne' bönachi queébi'. ³⁵ Gaca caní para ila'lá' lahui le ta'zá' ládxigaca bönachi zián. Yugu' lë ni ilaca quiu' ca tu guíë tuchi' le tsaza ládxido'o.

³⁶ Ana, nigula ruí'nu didza' uláz queé' Dios, zóanu ca' ni'. Nácanu zxí'inë' Fanuel, bönni' nababé' di'a dza queé' Aser. Chinagúlada'anu Ana na', tu' guzóalennu bönni' queénu idú gadxi iz gudödi gúcanu ra'bando', ³⁷ ate' bugá'ananu tuzi cate' bidxité dza chiyú'unu idú ca tápalalaj yu' tapa iz. Biti' ca' rubí'i ruzá'nu ga naca chila yudo'. Rëla, en te dza reaj ládxinu-në' Dios, runnu gubasa, en ruldzanu-në' Dios. ³⁸ La' ná'asö bidxiténu ni', rënu-në' Dios: "Xclenu'." Gudíxjöi'nu yúgu'te bönachi ca naca queébi' bí'ido' Jesús, bönachi na' nacuá' Jerusalén, nupa ta'böza dza idxín Nu na' isöl-lë'ë Dios para gácalen bönachi.

Söjhuöjgaquië' José, en María yödzö Nazaret

³⁹ Gudödi guluné' José, en María yúgu'te le rinná bë' xibá queé' Xanru' Dios, yöjhuöjgaquië' lázagagaquië' Nazaret luyú Galilea. ⁴⁰ Guzxönbí' bí'ido' Jesús, en bidipa ládxibi'. Guta' queébi' yöl-la' réajni'i, ate' zxöön naca le ruzá' ládxë'ë queébi' Dios.

Rudxinbi' bí'ido' Jesús chila yudo'

⁴¹ Yugu' iz röjáquië' xuz xiná'abi' Jesús Jerusalén cate' raca Laní Pascua, laní tu'subané' bönni' judío ca bené' Dios, bubéajë' xuz xtó'ogaquië' luyú Egípto. ⁴² Cate' chiyú'ubi' chinnu iz bi'i Jesús, yöjáquië' Jerusalén ca tun cazé' cate' raca laní na'. ⁴³ Cate' gudödi laní, söjhuöjgaquië', ate' bugá'anabi' bí'ido' Jesús Jerusalén, pero biti' téquibe'ené' José, en María, xiná'abi' Jesús. ⁴⁴ Tu' téquiné' nútsa'bi' ladaj bönachi zián yú'ulengaca légaquië' nöza, tu dza nayá' gula'zë'ë. Ní'irö cate' bulu'guiljë'-bi' gapa nacuá' di'a dza quégaquië', en gapa nacuá' nupa núnbë'gaquië' ⁴⁵ biti' bulu'dzölinë'-bi'. Que lë ni na' yöjhuöjgaquië' Jerusalén, söjdiljagaquië'-bi'.

⁴⁶ Cate' chiguca dza bunni, bulu'dzölinë'-bi' ga naca chila yudo', rö'öbi' gatsaj láhui'lë' bönni' yudo' tu'sédinë'. Ruzé nágabi' didza' tu'ë, en rinaba yúxdibi' légaquië'. ⁴⁷ Bulu'bani yúgu'te nupa bila'yöni didza' bë'ëbi' ca naca yöl-la' réajni'i queébi', en ca nácacaca didza' bubíibi'. ⁴⁸ Cate' bila'lé'enë'-bi' xuz xiná'abi', bulu'bániné', ate' gudxinbi' xiná'abi', rnnnanu:

—Zxi'ina', ¿bizx que benu' caní queétu'? Buyútsöca', len yöl-la' rugu'i neda', en xuzu' buguíljatu' li'.

⁴⁹ Ní'irö gúdxibi' Jesús légaquië', rnnabi':

—¿Bizx que buguíljali' neda'? ¿Naru' cabí nözili' run bayudxi guna' xichinë' Xuza'?

⁵⁰ Biti' gula'yéajni'inë' xuz xiná'abi' didza' na' gúdxibi' légaquië'.

⁵¹ Jesús bőajlenbi' légaquië', budxinbi' Nazaret, ate' benbi' ca rnna xtída'gaquië' xuz xiná'abi'. María, xiná'abi' Jesús, gulú'usönu icja ládxido'onu yúgu'te lë ni. ⁵² Ráta'rö yöl-la' réajni'i queébi' bi'i Jesús, en rizzönbí'. Burúajbi' dxi'a lahuë' Dios, en lögaca bönachi.

3

*Libán runë' Juan, bönni' ruquile' böñachi nisa
(Mt. 3:1-12; Mr. 1:1-8; Jn. 1:19-28)*

1 Cate' chiguca chinu iz rinná bë'enë' Tiberio César idútë yödzölió, rinná bë'ë Poncio Pilato luyú Judea, ate' Herodes rinná bë'ë ca' luyú Galilea. Felipe, böchë'ë Herodes na', rinná bë'ë luyú Iturea, en luyú Traconite, ate' Lisanias rinná bë'ë luyú Abilinia. **2** Yugu' dza na' nácagaquië' bixúz lo Anás, en Caifás, ate' la' ná'asö Dios bë'lenë' Juan, zxí'inë' Zacarías, didza' cate' ni' zoë' Juan lu lataj cá'asö. **3** Ridë' Juan ni yúgu'té lataj nacuá' ra' yegu Jordán, runë' libán ca ral-la' ila'dila nisa nupa tu'bí'láxdxi'gaca para uniti lahuë' Dios dul-la' nabága'gaca. **4** Guca caní ca na' nazúaj lu guichi lá'ayi yugu' didza' bë'ë Isaías, bönni' bë'ë didza' uláz quee' Dios, rnna:

Riyón chí'ë bönni' rulidzë' lu lataj cá'asö, rnnë':

"Buli'pá'a nöza lu icja láxdido'oli' para idxín Xanru' queëli'.

Buli'béaj li yugu' nöza lasi ga tödë'.

5 Ral-la' uligaca yúgu'té gapa naca röga',
en ulu'huöáca lachi' yúgu'té guí'a sibi, en guí'ado'.
Ral-la' ulu'rúaj li nöza nayecja nabí'igaca,
ate' ulu'huöáca dxi'a nöza guiøj.

6 Ila'lé'eni yúgu'té böñachi Bönni' na' isöl-lë'ë Dios,
Nu usólå böñachi."

7 Cate' bila'rúaj böñachi zián para ila'dila nisa lu në'ë Juan, lë' gudxë' légaquië':

—Libí'ili', di'a dza quégacaba' bëla sínia'. ¿Zoa nu bului'i libí'ili' ral-la' izzúnnajli' yöl-la' rusiúndxi si' gaca quégaca böñachi? **8** Na'a, guli'gún le ilaca bë' chibubi'i láxdxi'li', en biti' sa' láxdxi'li', biti' innali': "Nácatu' tsahui' tu' nácatu' di'a dza quee' Abraham", tu' rea' libí'ili', huáca quélë'ë Dios yugu' guiój ni, en gunë' ga ulu'huöáca di'a dza quee' Abraham. **9** Nácali' ca yugu' yaga. Chizóa riböza guí'e huága para ichugu yugu' yaga. Yúgu'té yaga biti' ta'bía le naca dxi'a, ila'chúguïe' yaga na', en ila'gu'ë léguequi lu guí'.

10 Ní'irö böñachi nacuá' ni' gula'nabi lë', ta'nná:

—¿Nacxi gúntsatu?

11 Bubi'ë didza' Juan, rë' légaquië':

—Nu dë chopa cö' zxe ral-la' unödzaj que nu biti' dë que, ate' nu dë le gagu, lesca' caní ral-la' quisí quégaca nupa biti' dë le ilágugaca.

12 Bal-lë' bönni' tu'quizzxjë' lázagaca böñachi uláz que yödzö zi'tu' bila'dxinë' ca' ni' para ila'dilë' nisa, ate' gula'nábinë' lë', ta'nnë':

—Bönni' usëdi, ¿nacxi gúntsatu' netu'?

13 Juan gudxë' légaquië':

—Biti' uquizzxjaröli' tsca le chigunnë' bönni' yú'uli' lu në'ë.

14 Bal-lë' bönni' rójáquië' gudil-la gula'nábinë' ca' lë', ta'nnë':

—¿Nazxi netu', nacxi guntu'?

Juan gudxë' légaquië':

—Bítirö gun gáxdili' böñachi para cúa' le dë quéguequi. Bítirö innëli' quégaca böñachi le cabí nácatë para gunli' ga ila'guizzxaj libí'ili', pero guli'tsaza láxdxi'li' tsca rázxjali'.

15 Ta'zá' láxdxi'gaca böñachi na' ta'böza Bönni' na' ral-la' isöl-lë'ë Dios, channö náquië' Juan na' Bönni' lë' Cristo. **16** Bubi'ë didza' Juan, gudxë' yúgu'té, rnnë':

—Le nácaté neda' ruquila' libí'ili' nisa, pero zé'ë Bönni' gunë' le rulu'i isö yöl-la' ridila nisa ni, ichízié' libí'ili' Dios Bö' Lá'ayi, en le naca guí' queë'. Bönni' ni náparé' yöl-la' unná bë' ca neda', ate' neda' biti' naca' lesaca' ilecja' le nudë'ë ni'e. ¹⁷ Zönë' lu né'ë böcö' queë', ate' ulubë' ga rilubi zxoa' xtila queë', lë ni rulu'i le gaca quégaca böñachi. Utubë' zxoa' xtila, en cu'ë le xilataj, pero bëbu que uzégu'ë lu guí' le catu caz ulu.

¹⁸ Ca nácacaca didza' ni, en ia'zíca'rö zián didza' le guchízié' icja nágagaca böñachi, benë' libán Juan lógaquïë' que didza' dxia'. ¹⁹ Juan na' buzégu'ë didza' Herodes, bönni' rinná bë'ë, tu' zóalenë'-nu Herodías, nigula queë' Felipe, bönni' böchë'ë, enca' tu' runë' zián le ruá' dö'. ²⁰ Ní'irö benë' Herodes tu le nácarö huiá' dö', gulu'ë Juan na' lidxi guíé.

*Ridile' Jesús nisa
(Mt. 3:13-17; Mr. 1:9-11)*

²¹ Dza na' cate' cabí nadzunë' Juan lidxi guíé, cate' ni' ruquilë' böñachi nisa, bidilë' ca' Jesús nisa. Cate' ni' rulidzë' Dios, guyalaj lúzziba, ²² ate' bötjë' Dios Bö' Lá'ayi, bidixinë' ga na' zoë' Jesús. Buluf'i lahuë', rinë'ë ca riná' tuba' gu'dödo', ate' biyön chí'i Nu ruf'i didza' yehua' yubá, rnna:

—Li' nacu' Zxí'ina'. Nadxi'ida' Li', en raza ládx'a' Li'.

*Yugu' xuz xinë'e gudödi queë' Jesús
(Mt. 1:17)*

²³ Cate' gusí lahuë' runë' xichinë' Jesús, yu'ë ca chi uruá' iz. Téquiguequi böñachi náquië' zxí'inië' José. Jesús náquië' zxí'ini xi'soë' Elí, nu na' náquië' xúzinu María, nigula queë' José na'.

²⁴ Elí na' gúquië' zxí'inië' Matat,
nu ni guca zxí'inië' Levi,
nu ni guca zxí'inië' Melqui,
nu ni guca zxí'inië' Jana,
nu ni guca zxí'inië' ia'túë' José.

²⁵ José ni gúquië' zxí'inië' Matatías,
nu ni guca zxí'inië' Amós,
nu ni guca zxí'inië' Nahum,
nu ni guca zxí'inië' Esli,
nu ni guca zxí'inië' Nagai.

²⁶ Nagai na' gúquië' zxí'inië' Mat,
nu ni guca zxí'inië' ia'túë' Matatías,
nu ni guca zxí'inië' Semei,
nu ni guca zxí'inië' ia'túë' José,
nu ni guca zxí'inië' Judá.

²⁷ Judá na' gúquië' zxí'inië' Joana,
nu ni guca zxí'inië' Ressa,
nu ni guca zxí'inië' Zorobabel,
nu ni guca zxí'inië' Salatiel,
nu ni guca zxí'inië' Neri.

²⁸ Neri na' gúquië' zxí'inië' ia'túë' Melqui,
nu ni guca zxí'inië' Adi,
nu ni guca zxí'inië' Cosam,
nu ni guca zxí'inië' Elmodam,
nu ni guca zxí'inië' Er.

²⁹ Er na' gúquië' zxí'inië' Josué,

nu ni guca zxí'inë' Eliezer,
 nu ni guca zxí'inë' Jorim,
 nu ni guca zxí'inë' ia'tué' Matat.
 30 Matat na' gúquië' zxí'inë' Levi,
 nu ni guca zxí'inë' Simeón,
 nu ni guca zxí'inë' Judá,
 nu ni guca zxí'inë' ia'tué' José,
 nu ni guca zxí'inë' Jonán,
 nu ni guca zxí'inë' Eliaquim.
 31 Eliaquim na' gúquië' zxí'inë' Melea,
 nu ni guca zxí'inë' Mainán,
 nu ni guca zxí'inë' Matata,
 nu ni guca zxí'inë' Natán.
 32 Natán na' gúquië' zxí'inë' David,
 nu ni guca zxí'inë' Isaí,
 nu ni guca zxí'inë' Obed,
 nu ni guca zxí'inë' Booz,
 nu ni guca zxí'inë' Salmón,
 nu ni guca zxí'inë' Naasón.
 33 Naasón na' gúquië' zxí'inë' Aminadab,
 nu ni guca zxí'inë' Aram,
 nu ni guca zxí'inë' Esrom,
 nu ni guca zxí'inë' Fares,
 nu ni guca zxí'inë' ia'tué' Judá.
 34 Judá na' gúquië' zxí'inë' Jacob,
 nu ni guca zxí'inë' Isaac,
 nu ni guca zxí'inë' Abraham,
 nu ni guca zxí'inë' Taré,
 nu ni guca zxí'inë' Nacor.
 35 Nacor na' gúquië' zxí'inë' Serug,
 nu ni guca zxí'inë' Ragau,
 nu ni guca zxí'inë' Peleg,
 nu ni guca zxí'inë' Heber,
 nu ni guca zxí'inë' Sala.
 36 Sala na' gúquië' zxí'inë' Cainán,
 nu ni guca zxí'inë' Arfaxad,
 nu ni guca zxí'inë' Sem,
 nu ni guca zxí'inë' Noé,
 nu ni guca zxí'inë' Lamec.
 37 Lamec na' gúquië' zxí'inë' Matusalén,
 nu ni guca zxí'inë' Enoc,
 nu ni guca zxí'inë' Jared,
 nu ni guca zxí'inë' Mahalalel,
 nu ni guca zxí'inë' ia'tué' Cainán.
 38 Cainán na' gúquië' zxí'inë' Enós,
 nu ni guca zxí'inë' Set,
 nu ni guca zxí'inë' Adán,
 nu ni guca ca zxí'ini cazë' Dios.

4

*Satanás tu' xihui' rë'ënì usubaga' Jesús dul-la'
(Mt. 4:1-11; Mr. 1:12-13)*

¹ Buzé'ë Jesús ra' yegu Jordán, zóalenë' Dios Bö' Lá'ayi Lë', ate' Dios Bö' Lá'ayi na' guché'ë Jesús lu lataj cá'asö. ² Guzóë' Jesús ní' idú ca choá' dza, ate' gú'uni tu' xihui' usubaga' Jesús dul-la'. Biti' bi gudahuë' Jesús yugu' dza na', ate' gudödi ni' ridunë'. ³ Ní'irö tu' xihui' na' gudxi Jesús, rnna:

—Channö naca cazu' Li' Zxi'inë' Dios, gunnátsöca' ulu'huoáca guiöj ni yöta xtila.

⁴ Bubi'ë didza' Jesús, rë' le:

—Nazúaj lu guichi, rnna: "Calégasö yöta xtila nabánigaca böñachi, pero nabánigaca ca' yúgu'té xtídzë'ë Dios."

⁵ Ní'irö guché' tu' xihui' na' Jesús ga naca tu lu gu'a sibi ate' tu chí'ido'osö bulu'i Lë' yúgu'té xilátjagaca nupa ta'nná bë' yödzölió. ⁶ Tu' xihui' na' rë' Jesús, rnna:

—Gunna' quiu' yúgu'té xilátjagaca nupa ta'nná bë' ni, en yöl-la' tsahui' quéguequi, tu' nadödi lu na'a yúgu'té lë ni, ate' nu rë'ënisa' ruá'a que. ⁷ Channö Li' uzóa zxibü' lahua', en gunu' neda' zxön, yúgu'té lë ni guequi quiu'.

⁸ Bubi'ë didza' Jesús, rë' le:

—Gucuita ga zoa', Satanás, tu' nazúaj lu guichi lá'ayi le rë netu', rnna: "Xanu' Dios tseaj ládxu'u-në', en tuzé' Lë' gunu' xichinë'."

⁹ Ní'irö tu' xihui' na' guché' Jesús Jerusalén, ate' budxía Lë' lu zö'ö ícjo'olö yudo', en rë' Lë':

—Channö nacu' Zxi'inë' Dios, busuládzu'tsöca' cuinu' ni ¹⁰ tu' nazúaj lu guichi lá'ayi, rnna:

Dios isöl-lë'ë gubáz lá'ayi queë', ilácalenë' Li'.

¹¹ Lu ná'agaquïë' ulu'chise' Li' para cabí tsöjchégu'u guiöj, en biti' gunu' zi' ni'u.

¹² Bubi'ë didza' Jesús, rë' le:

—Nazúaj lu guichi lá'ayi le rë netu': "Biti' si' bë'u Xanu' Dios."

¹³ Cate' biti' budzöli tu' xihui' na' ia'tu le si' bë' Jesús, buzá' ga zoë' tu chí'ido'.

Risí lahuë' Jesús runë' xichinë' luyú Galilea

(Mt. 4:12-17; Mr. 1:14-15)

¹⁴ Böajé' Jesús luyú Galilea, dë lu në'ë yöl-la' huáca queë' Dios Bö' Lá'ayi. Guzé' didza' ca naca queë', ate' bila'yöni böñachi nacuá' yúgu'té yödzö idú gásibi'ilö. ¹⁵ Busédinë' Jesús böñachi gapa naca lu yu'u ga tu'dubë' tu'sëdë' bönni' judío queë' Dios, ate' yúgu'té böñachi gulún Lë' zxön.

Le benë' Jesús yödzö Nazaret, ga naca ladzë'

(Mt. 13:53-58; Mr. 6:1-6)

¹⁶ Ní'irö budxine' Jesús yödzö Nazaret ga ni' guzxöne'. Cate' bidxín dza lá'ayi quégäquïë' bönni' judío, ca run cazé' Jesús, guyázië' lu yu'u ga tu'dubë' tu'sëdë' bönni' judío queë' Dios, ate' guzuinë' para ulabë' tu le nazúaj lu guichi lá'ayi. ¹⁷ Bulu'dödë' lu në'ë Jesús guichi ga na' nazúaj didza' bë'ë Isaías, bönni' bë'ë didza' uláz queë' Dios. Cate' gusaljë' guichi na', budzölinë' ga nazúaj lu guichi le rnna:

¹⁸ Zóalenë' Bö' Lá'ayi queë' Xanru' neda' tu' nubéajë' neda' quez queë' para usiyönda' böñachi yechi' didza' dxi'a.

Gusöl-lé'ë neda' para una' nupa raca zi' ládxí' do'guequi,
en usiyönda' nupa nadzungaca, ca gaca ululágaca,
en úna' bönachi nachul-la lóguequi,
en usólá' bönachi zoa nu run léguequi zi',

19 en guna' libán que dza ruzá' ládxé'ë Xanru' Dios quégaca bönachi.

20 Ní'irö butubë' Jesús guichi na', en bugu'ë le lu né'ë bönni' rapa chi'ë yugu'
guichi lá'ayi, ate' gurö'ë. Ní'irö yúgu'të nupa nudúbigaca lu yu'u na' gula'ná'
Jesús. **21** Gusí lahuë' Jesús rë' légaquië':

—Na'a dza ni zóali' libí'ili', rudyxín caz le nazúaj lu guichi ni.

22 Yúgu'të gula'nné' dxi'a queë', en bulu'báninë' ca naca didza' dxi'a ru'ë,
ate' ta'nné':

—¿Naru' caléga bönni' ni zxí'inë' José?

23 Jesús rë' légaquië', rnne':

—Nadxi huéli' neda' lë ni ta'nná bönachi, le rnna: "Li', bönni' ruún bönachi,
bun cuinu'." Lësca' caní huéli' neda': "Yugu' le biyönitu' benu' Capernaum,
ben ca' ga ni naca ladzu'."

24 Gunné' ca' Jesús:

—Le nácatë rea' libí'ili', channö zoë' nu bönni' ru'ë didza' uláz queë' Dios,
biti' tun bönachi uládz queë' lë' bal. **25** Le nácatë rea' libí'ili', gula'cuá'anu
zián nigula uzébi luyú Israel yugu' dza ni' zoë' Elías, bönni' bë'ë didza' uláz
queë' Dios, cate' ni' biti' gulaj guiój idú ca tsonna iz yu' xopa beo', ate' guca
gubín luyú na', **26** pero Dios biti' gusöl-lé'ë Elías na' ga nacuá'anu nigula uzébi
nabábagacanu Israel, pero gusöl-lé'ë lë' ga na' zóanu tu nigula uzébi lu yödzö
Sarepta, le nababa yödzö Sidón. **27** Lësca' caní, gula'cuá' zián nupa te'e hué'
nudzu' ruzödi luyú Israel dza ni' zoë' Eliseo, bönni' bë'ë didza' uláz queë' Dios,
pero biti' böáquië' nu bönni' nútsë'ë ladaj bönachi Israel na', pero böáquië'
tuzë' Naamán, bönni' nababë' luyú Siria.

28 Cate' bila'yönné' didza' ni, gula'lené' yúgu'të bönni' nacu'ë lu yu'u ga na'
tu'dubë' tu'sëdë' queë' Dios. **29** Ní'irö gula'yasë', en bulu'béajë' Jesús ní'ilö
ra' yödzö. Gula'chë'ë Lë' ga naca lë'e guí'a guiój ga na' dë ládzagaquië' para
ulu'suládzue' Lë' ga naca lë'e guí'a guiój na'. **30** Ní'irö gudödë' Jesús gatsaj
láhui'lö ga na' nacu'ë, söhu'oajte'.

Tu bönni' yu'u lë' bö' xihui'

(Mr. 1:21-28)

31 Ní'irö guyijë' Jesús yödzö Capernaum luyú Galilea, ate' busédinë' bönachi
yugu' dza lá'ayi quégaquië' bönni' judío. **32** Bulu'báninë' ca naca le rusédinë'
Jesús légaquië', tu' bë'ë didza' ca tu bönni' dë lu né'ë yöl-la' unná bë'.

33 Zóatë' ca' tu bönni' yu'u lë' bö' xihui' lu yu'u ga na' tu'dubë' tu'sëdë' queë'
Dios, ate' bë'ë zidzaj didza', **34** rnne':

—¡Busán netu'! ¿Bizxi rálatu' quiú', Jesús, bönni' Nazaret? ¿Naru' zo'o para
usunítiu' netu'? Núnbë'a Li' Nu nacu'. Bönni' Lá'ayi queë' Dios nacu'.

35 Jesús buzené' le bach bö' xihui' na', en rë' le:

—Busayaj ru'u, en burúaj lu bönni' ni.

Ní'irö bö' xihui' na' gurú'una bönni' na' lu yu lógaca bönachi nacuá' ni'.
Burúajte' lu bönni' na', en bíti'rö bi ben queë'. **36** Bulu'báninë' yúgu'të', en
gulu'ë didza' tuë' len ia'tué', ta'nné':

—¿Bizxi didza' ni ru'ë? Len yöl-la' unná bë', en yöl-la' huáca zxön rinná
bë'enë' yugu' bö' xihui', ate' tu'rúajte' bö' xihui' na'.

³⁷ Guzé didza' ca naca queë' Jesús, ate' bila'yöni böñachi yúgu'të yödzö idú gásibi'ilö.

*Ruúnë' Jesús xiná'anu nigula queë' Pedro
(Mt. 8:14-15; Mr. 1:29-31)*

³⁸ Ní'irö guyasë' Jesús, en burúajë' lu yu'u ga na' tu'dubë' tu'sëdë' queë' Dios, ate' guyázië' lidxë' Simón. Xiná'anu nigula queë' Simón na' zóanu ni', en yú'unu xilá, ate' guláta'yuë' lahuë' Jesús únë'-nu. ³⁹ Gubígui'ë Jesús ga na' dënu, ate' bulidzë' huë' xilá na' yú'unu. La' birúajtë xilá na' yú'unu, ate' la' guyástënu, en bë'ënu le gulahuë'.

*Ruúnë' Jesús zián nupa te'e
(Mt. 8:16-17; Mr. 1:32-34)*

⁴⁰ Cate' chiribía gubidza, yúgu'të nupa nacuá'len léguequi nupa na' te'e que queëguequi yödzhuë' bila'dxín ni', ate' dujuá'gaca léguequi ga na' zoë' Jesús. Lë' guxóa né'ë nupa na' te'e, en bunë' léguequi. ⁴¹ Bulu'rúaj ca' zián bö' xihui' yú'ugaca böñachi te'e na'. Ta'bödxi'a bö' xihui' na', ta'nná:

—Li' nacu' zxí'inë' Dios.

Ní'irö Jesús buzenë' le bach yugu' bö' xihui' na', en biti' bë'ë lataj ila'nná, tu' nöziguequi náquië' Cristo.

*Runë' Jesús libán luyú Galilea
(Mr. 1:35-39)*

⁴² Cate' za' rení' ia'tú dza, burúajë' Jesús Capernaum na', ate' guyijë' tu lataj cá'asö. Bila'dxín böñachi zián ni', tu'guílaj Jesús. Cate' bila'dxinë' ga na' zoë', gulë'ënigüequinë' ulu'tsenë' Lë', para cabí uzë'ë ga na' nacu'ë. ⁴³ Ní'irö Jesús gudxë' légaquïë', rnnë':

—Run bayudxi tseja' gapa nacuá' ia'zíca'rö yödzö, tsöjena' ca' libán ni' que didza' dxí'a ca rinná bë'ë Dios. Que lë ni na' gusöl-lë'ë neda' ni.

⁴⁴ Caní guca, benë' libán yugu' yödzö luyú Galilea gapa naca lu yu'u ga tu'dubë' bönni' judío, en tu'sëdë' queë' Dios.

5

*Ta'dzunba' böla zián
(Mt. 4:18-22; Mr. 1:16-20)*

¹ Cate' ni' zoë' Jesús ra' nísado' nazi'i le Genesaret, lu xiyú Galilea, bulu'quídä' böñachi zián Lë' para ila'yöni xtídzë'ë Dios. ² Ní'irö bilé'enë' Jesús chopa bárcodo', zxóagaca lu nísado' ga na' naca ra' yu bidxi, ate' narúajgaquïë' bönni' uxzhón böla lë'égaca bárcodo' na', en ta'guibe' yöxa jöxa quégäquïë'.

³ Gurenë' Jesús tu lë'e bárcodo' na', le nequi queë' Simón Pedro, ate' gunábinë' lë' udxígüi'ë le ia'látido' zi'tu' ga naca ra' yu bidxi na'. Ní'irö guro'ë Jesús lë'e bárcodo' na', en rö'ösë' ca' ni' rusédinë' böñachi zián nacuá' lu yu bidxi na'.

⁴ Cate' budxi bë'ë didza' Jesús, ní'irö gudxë' Simón, rnnë':

—Busá' bárcodo' ni lu nísado' ga na' rö'ösë' zila, ate' ni' guli'zalaj yöxa jöxa queëli' para sönli'-ba' böla.

⁵ Bubi'ë didza' Simón, rë' Jesús:

—Bönni' Usëdi, idú yëla chibentu' dxin, en biti' bi böla nazönitu'-ba', pero didza' quiu' izáljagara' yöxa jöxa.

⁶ Cate' chigula'zaljë' le, gula'zöne' ziánteröba' böla, ate' réquitiqui' iröza' yöxa jöxa böla na'. ⁷ Ní'irö bulu'lá'a bulu'lufisine', bulu'lidzë' luzá'agaquïë' nacu'ë ia'tú lë'e bárcodo' na' para zá'gaquïë' ilácalenë' légaquïë'. Cate' bila'dxinë' ni'

bulu'dzé'ë-ba' böla irópatë bárcodo' na', ate' chirequi ulu'huötaj bárcodo' na' lu nisa. ⁸ Cate' bilé'enë' Simón Pedro lë ni, ní'irö buzúa zxibé' lahuë' Jesús, rnnë':

—Gucuita ga zoa', Xan, tu' naca' bönni' dul-la'.

⁹ Caní gunnë' tu' radxi ridzöbinë' Pedro ni'a quégacaba' böla zián na' gula'zöngaqüi'ë-ba', en lësca' caní guca quégaca nupa nacuá'len lë'. ¹⁰ Guladxi gula'dzöbinë' ca' Jacobo, en Juan, yugu' zxí'inë' Zebedeo, nupa ni nácagaca luzé'ë Simón Pedro na'. Ní'irö Jesús rë' Simón na', rnnë':

—Biti' gáxdinu'. Na'a isí lo' iché'u quia' böñachi ca runu' rizönu'-ba' böla.

¹¹ Cate' chibulu'sudxinë' yugu' bárcodo' na' ga naca' ra' yu bidxi, ní'irö bulu'cá'anë' yúgu'të ni', ate' söjácalenë' Jesús.

Ruúnë' Jesús tu bönni' ré'enë' huë' nudzu' ruzödi

(Mt. 8:1-4; Mr. 1:40-45)

¹² Cate' zoë' Jesús tu lu yödzö ni', bidxinë' tu bönni' ré'ede'enë' huë' nudzu' ruzödi ga'na' zoë'. Cate' bilé'enë' Jesús, busudxín lahuë' lu yu, en góta'yuë' lahuë', rnnë':

—Xan, channö rë'ënü', huáca unu' neda'.

¹³ Ní'irö bulí né'ë Jesús, en gudanë' lë'. Rë' lë':

—Rë'ënda'. Gacu' dxi'a.

La' gubídixite huë' nudzu' queë' bönni' na'. ¹⁴ Ní'irö Jesús gunná bë'enë' lë' cuntu nu güi'ë' ca'. Gudxë' lë':

—Guyéaj, yöjlui'i cuinu' lahuë' bixúz, ate' yöjnödzaj que yudo' le ruluf'i nahuöácu' dxi'a ca gunná bë'ë Moisés, lë na' ulu'i légaquï'ë chiböácu'.

¹⁵ Guzéterö didza' que yöl-la' huáca queë' Jesús, ate' bulu'dubi böñachi zián ga na' zoë' para ila'yöni xtídzë'ë, en para únë' léguequi, ugúë' yödzöhuë' té'eguequi. ¹⁶ Ní'irö buzé'ë Jesús ni', en guyijë' tu lataj cá'asö, ate' ni' bulidzë' Dios.

Ruúnë' Jesús tu bönni' huë' nacú'unië' bin

(Mt. 9:1-8; Mr. 2:1-12)

¹⁷ Ia'tú dza, cate' ni' rusédinë' Jesús böñachi, rö'ögäqui'ë yugu' bönni' yudo' fariseo len bönni' yudo' tu'sédinë' xibá queë' Moisés ni', narúajgaqui'ë yúgu'të yödzö luyú Galilea, en luyú Judea, en lu yödzö Jerusalén. Naca bë' dë lu né'ë Jesús yöl-la' huáca queë' Xanru' Dios tu' ruúnë' böñachi te'e nacuá' ni'.

¹⁸ Ní'irö bönni' nuá agaqui'ë le denë' tu bönni' huë' nacú'unië' bin bila'dxinë' ga ni', ate' bulu'guilje' nacxi ilunë' para ila'gu'ë lë' lu yu'u para ila'guixjé' lë' lahuë' Jesús. ¹⁹ Cate' biti' gula'dzölinë' nacxi ilunë', tu' nacuá' böñachi zián ni', gula'benë' ícjo'olö yu'u na', en gula'saljë' ícjo'o na'. Ní'irö bulu'zötje' le denë' bönni' huë' na', ate' gula'guixjé' lë' gatsaj láhui'lö böñachi ni' lahuë' Jesús.

²⁰ Cate' güquibe'enë' Jesús ca na' ta'yéajlé'ë Lë', gudxë' bönni' huë' na':
—Bönni', yugu' dul-la' nabágu'u chibunití lahua'.

²¹ Ní'irö gula'sí lógaqui'ë ta'zá' ladxí'gaqui'ë bönni' yudo' tu'sédinë' na', en yugu' bönni' yudo' fariseo, ta'nnë': “¿Nuzxi caz bönni' ni rnnë' le rucá'ana Dios cá'asö? ¿Nuzxi caz gaca uniti lo dul-la'? Tuzé' Dios runiti lahuë' dul-la'.”

²² Réquibe'enë' Jesús le ta'zá' ladxí'gaqui'ë, ate' rë' légaqui'ë:

—¿Bizx que rizá' ladxí'lí' caní? ²³ Biti' naca böñiga nu güiesö bönni' ni: “Yugu' dul-la' nabágu'u chibunití lahua”, pero naca böñiga nu gun ga chasë', en se'e ni'ë. ²⁴ Guna' ga inözili' dë lu na'a neda', Bönni' Guljé' Bönachi, yöl-la' unná bë' uniti lahua' dul-la' luyú ni.

Ní'irö gudxë' bönni' na' nacú'unië' bin, rnnë':

—Li' rea', guyasa. Buá' le denu', en böaj lidxu'.

²⁵ La' guyásatë' bönni' huë' na' lógaquië', ate' bu'ë lë na' gúti'në', en söhuöjë' lidxë', rigu'ë Dios yöl-la' ba. ²⁶ Gula'nítitiqu'i siné' yúgu'të', ate' gula'gu'ë Dios yöl-la' ba, en táxdxisiné' ca', ta'nnë':

—Na'a bilé'eru' le run ga rubániru'.

Jesús rulidzë' Levi

(Mt. 9:9-13; Mr. 2:13-17)

²⁷ Gudödi gulaca yugu' lë ni burúajë' Jesús ni', ate' bilé'enë' tu bönni' uquízxaj lázagaca bönachi, lë' Leví, rö'ë ga na' ruquízxjë', ate' Jesús rë' lë':

—Gudá' neda'.

²⁸ La' guyásatë' Leví, ate' bucá'anë' yúgu'të', en sa'yéajlenë' Jesús.

²⁹ Gudödi ni' benë' Leví na' tu gü'i huagu queë' Jesús ga naca lu yu'u lidxë', ate' gula'cu'ë zián bönni' uquízxaj ni' len ia'bal-lë' bönni' ta'bö'lénë' légaquië' tahuë'. ³⁰ Ni'irö bönni' yudo' tu'sédine' len yugu' bönni' yudo' fariseo gula'nnë' quégäquië' bönni' usëda queë' Jesús, ta'nnë':

—¿Bizx que rë'aj rágulenli' yugu' bönni' uquízxaj, en ia'zíca'rë' bönni' dul-la'?

³¹ Bubi'ë didza' Jesús, rë' légaquië':

—Yugu' bönni' nacu'ë dxi'a biti' naquíniguequinë' nu un bönachi, pero bönni' té'enë' naquíniguequinë' nu un bönachi. ³² Za'a, caléga ulídzagaca'-në' bönni' tsahui', pero za'a ulídzagaca'-në' bönni' dul-la' para ulu'bí'i ládx'i'gaquië'.

Ta'nábinë' Jesús ca naca que yöl-la' run gubasa

(Mt. 9:14-17; Mr. 2:18-22)

³³ Ni'irö bönni' yudo' na' gula'nábinë' Jesús, ta'nnë':

—¿Bizx que tunë' gubasa zián luzuí bönni' dá'gaquië' Juan, en tu'lidzë' Dios, ate' tunë' ca' caní bönni' dá'gaquië' yugu' bönni' yudo' fariseo, pero bönni' dá'gaquië' Li' té'aj tahuë'?

³⁴ Jesús rë' légaquië':

—¿Naru' huácatsö gunli' ga ilunë' gubasa bönni' nacu'ë laní que yöl-la' rutsaga na' tsanni ni' bönni' rutsaga né'ë zóalenë' légaquië'? ³⁵ Huadxin dza cate' udúé' bönni' rutsaga né'ë ga nacu'ë. Dza ní'irö ilunë' gubasa.

³⁶ Ni'irö bucúdzu'ë didza' Jesús ca naca lë ni, ate' rë' légaquië':

—Cuntu nu bönni' ichúguië' tu lari' cubi chinadía, en cuejë' tsötaca' le udë'ë lë'e lari' tébi. Channö gunë' caní, calégasö gaca ditaj lari' cubi na', pero lári'do' na' birúaj lë'e lari' cubi na' biti' tsöjlöza lari' tébi na'. ³⁷ Lësca' caní, cuntu nu bönni' rigu'ë xisi uva cubi lu buzudi guídi gula. Channö nu gun caní, xisi uva cubi na' uchöza' buzudi guídi gula, ate' ilalaj xisi uva na', ate' gaca ditaj buzudi guídi gula na'. ³⁸ Que lë ni na' ral-la' cá'aru' xisi uva cubi lu buzudi guídi cubi, ate' irópatë ilaca chi'i. ³⁹ Channö zoa nu rë'aj xisi uva gula, biti' guë'ënité gu'aj xisi uva cubi, tu' rnna: "Nácarö sizxi' xisi uva gula na'."

6

Bönni' usëda queë' Jesús ta'lecjë' do zxoa' xtila dza lá'ayi

(Mt. 12:1-8; Mr. 2:23-28)

¹ Cate' naca tu dza lá'ayi quégäquië' bönni' judío, ridödë' Jesús gapa dë yöla zxoa' xtila, ate' bönni' usëda queë' ta'lecjë' do ga dxia zxoa' xtila. Ta'zxúbi'ni ná'agaquië' le, en tahuë'. ² Ni'irö gula'nábinë' bönni' yudo' fariseo légaquië', ta'nnë':

—¿Bizx que runli' le cabí ral-la' gunru' dza lá'ayi?

³ Bubi'ë didza' Jesús, rë' légaquië':

—¿Naru' cabí nulábanili' ca benë' David cate' gudunë', ate' gula'dún ca' nupa nacuá'len lë'? ⁴ Guyázië' lu yu'u queë' Dios, en guzxi'ë yöta xtila tu'cu'ë lahuë' Dios, lë na' biti' ral-la' gáguru', pero tuz bixúz dë lataj ilahuë', ate' gudahuë' David le, en bë'ë ca' quéguequi nupa nacuá'len lë'.

⁵ Ní'irö Jesús gudxë' légaquië', rnnë':

—Neda', Bönni' Guljë' Bönachi, naca' xani dza lá'ayi.

Tu bönni' narequi' né'ë

(Mt. 12:9-14; Mr. 3:1-6)

⁶ Cate' naca ia'tú dza lá'ayi quégaequië' bönni' judío, guyázië' Jesús lu yu'u ga tu'dubë' tu'sëdë' queë' Dios, en busédinë' nupa nacuá' ni'. Zoë' ca' tu bönni' ni' narequi' né'ë ibëla. ⁷ Yugu' bönni' yudo' tu'sédinë', en yugu' bönni' yudo' fariseo tu'yüë' Jesús para ila'lé'enë' channö únë' bönni' na' cate' naca dza lá'ayi quégaequië' para ulu'dzölinë' nacxi ulu'zéguë' Lë' didza'. ⁸ Réquibe'enë' Jesús le ta'zá' ládx'i'gaquië', ate' gudxë' bönni' na' narequi' né'ë, rnnë':

—Guyasa. Guzuí gatsaj láhui'lö ni.

La' guyasatë' bönni' na', guzuinë'. ⁹ Ní'irö Jesús gudxë' yugu' bönni' yudo' na', rnnë':

—Unábitsöqui'da' libí'ili' tu didza'. ¿Naru' dë lataj cate' naca dza lá'ayi gunru' le naca dxi'a o gunru' le ruá' dö? ¿Naru' dë lataj uguéla'ru' yöl-la' na'bán quégaca bönachi, o ugúaru' le?

¹⁰ Ní'irö buyuë' Jesús yúgu'të bönni' na' nacu'ë gásibi'ilë', ate' gudxë' bönni' huë' na':

—Bulí no'o.

Bulí né'ë bönni' na', ate' la' böácatë né'ë na'. ¹¹ Ní'irö gula'lenë' bönni' yudo' na', ate' gulún xtídz'a'gaquië' la' légarasë' nacxi bi ilunë' queë' Jesús.

Riböë' Jesús chínnuë' bönni' ilácagaquië' gubáz queë'

(Mt. 10:1-4; Mr. 3:13-19)

¹² Dza ní' guyijë' Jesús ga naca tu lu guí'ado'. Bulidzë' Dios ní', ate' idú yëla bë'lenë' Dios didza'. ¹³ Cate' za' rení', bulidzë' yugu' bönni' dá'gaquië' Lë', ate' guröë' chínnuë' para iláquië' gubáz queë'. ¹⁴ Bulidzë':

Simón, (lë' ca' Pedro),

Andrés, (böchë'ë Pedro),

Jacobo, en Juan, en Felipe, en Bartolomé,

¹⁵ Mateo, en Tomás,

Jacobo, (zxí'inë' Alfeo),

Simón, (bönni' ruí'i ládx'ë' yödzö queë'),

¹⁶ Judas, (böchë'ë Jacobo),

en Judas Iscariote, (bönni' udödë' Jesús lu ná'agaquië' bönni' ilútië' Lë').

Ruúnë' Jesús bönnachi zián

(Mt. 4:23-25)

¹⁷ Jesús bötjalenë' yugu' bönni' gubáz queë' na' lu guí'ado' na', ate' bila'dxinë' tu ga naca lachi', ga ní' nacu'ë ziánrö ca' bönni' usëda queë', ate' nacuá'len légaquië' bönnachi zián narúajgaca yúgu'të yödzö luyú Judea, en yödzö Jerusalén, en yugu' yödzödö' dëgaca ra' nísado' ga na' nacuá' yödzö Tiro, en yödzö Sidón. Bila'dxín bönnachi ni ga ní' para ulu'zé nágagaca xtídzë'ë Jesús, en ulu'huóálu ya yödzöhuë' té'eguequi. ¹⁸ Bulu'huóáquië' ca' bönni' ni' ta'guí'i ta'záquië' lu ná'agaca bö' xihui'. ¹⁹ Yúgu'të bönnachi zián na' tu'i ládx'i'gaca ila'gán Jesús tu' ruúnë' léguequi len yöl-la' huáca queë'.

Nupa nátagaca bica' ba, en nupa nátagaca bica' bayechi'
(Mt. 5:1-12)

²⁰ Ni'irö buyú' Jesús yugu' bönni' usëda queë' nacu'ë ni', en gudxë' légaquië':
 —Bica' ba libí'ili', réquibe'eli' riyadzjali' le naca queë' Dios, tu' gata' queëli'
 lataj ga rinná bë'ë Dios.

²¹ 'Bica' ba libí'ili' ridunli' le gunnë' Dios queëli', tu' huöljali'.

'Bica' ba libí'ili' ribödxili' tu' bi nadéli'lí' le naca tsahui', tu' huadxín dza uzxídxili'.

²² 'Bica' ba libí'ili', tu' za' dza cate' biti' ila'lé'e bönachi libí'ili' dxi'a, en ulu'béaj libí'ili' ga nacuá, en ila'nné zi' queëli', en ulu'cá'ana cá'asö le nazí'i lali' ca tu le naca xihui' tu' dá'alí' neda', Bönni' Guljë' Bönachi. ²³ Buli'sí xibé dza na', en buli'dzeja, tu' naca zxön le guequi queëli' yehua' yubá. Lësca' caní gulunë' xuz xtó'ogaca bönachi ni quégaquië' bönni' gulu'ë didza' uláz queë' Dios.

²⁴ 'Bica' bayechi' libí'ili', dë yöl-la' tsahui' queëli', tu' chidë le ruzí'ili' xibé.

²⁵ 'Bica' bayechi' libí'ili' nahuöläj nudzé'eli' na'a, tu' huadunli'.

'Bica' bayechi' libí'ili' ruzxídxili na'a, tu' huf'inilli', en cödxí yéchi'li'.

²⁶ 'Bica' bayechi' libí'ili' ta'nné yúgu'té bönachi dxi'a queëli'. Lësca' caní gulunë' xuz xtó'oli', gula'nnë' dxi'a quégaquië' bönni' gula'zí' yë'ë, gula'nnë' nácagaquië' bönni' tu'ë didza' uláz queë' Dios.

Ral-la' idxi'iru' nupa biti' ta'lé'e rë'u dxi'a
(Mt. 5:38-48; 7:12)

²⁷ Gunnë' ca' Jesús:

—Libí'ili' zóali' ni, en riyönili' xtídz'a'a, rea' libí'ili': Guli'dxi'i nupa biti' ta'lé'e libí'ili' dxi'a. Guli'gún le naca dxi'a quégaca nupa tu'dí'i libí'ili'.

²⁸ Guli'nabi Dios gaca dxi'a quégaca nupa tua' dö' queëli', en buli'lidzë' Dios inábili'-në' gácalenë' nupa ta'nné zi' queëli'. ²⁹ Channö nu capa' tsölä'a xagu', buzé ia'tsölä'a ca' xagu'. Channö nu cúa lari' naxoa cúdz'u, bë' lataj cúa ca' zxo'. ³⁰ Nútì'tës nu bi inaba le dë quiu', bunödžaj que, ate' nu cúa le nequi quiu', biti' unabu' le. ³¹ Ca rë'ënili' ilún bönachi queëli', lësca' caní guli'gún quéguequi.

³² 'Channö nadxi'isili' nupa nadxi'igaca libí'ili', ¿bizxi yöl-la' ba idéli'li'? Lësca' caní tunë' bönni' dul-la', ta'dxi'inë' nupa nadxi'iguequi légaquië'.

³³ Channö runli' le naca dxi'a quégacaso nupa tun dxi'a queëli', ¿bizxi yöl-la' ba idéli'li'? Lësca' caní tunë' bönni' dul-la'. ³⁴ Channö runödžjali' quégaca nupa runli' löza ulu'bí'i queëli', ¿bizxi yöl-la' ba idéli'li'? Lësca' caní tunë' bönni' dul-la', tu'nödžjë' quégaca nupa tun dul-la', tu' tunë' löza ulu'bí'i quégaquië' lë na' bulu'nödžjë'. ³⁵ Neda' rea' libí'ili': Guli'dxi'i nupa biti' ta'lé'e libí'ili' dxi'a, en guli'gún le naca dxi'a. Buli'nödžaj quégaca bönachi sal-la' biti' runli' löza nu ubí'i queëli'. Channö caní gunli', zxön naca le gata' queëli', ate' gácali' zxí'ini cazë' Dios. Nu nácatérö lo, tu' runë' Lë' le naca dxi'a quégaca bönachi biti' ta'yaza láxi'gaca, en quégaca bönachi tuá' dö'. ³⁶ Buli'huéchi' láxi'li' bönachi ca na' runë' Xúzili' Dios, ruhuéchi' ládxë'ë yúgu'té bönachi.

Biti' ral-la' ichugu bë'ëru' que luzá'aru'
(Mt. 7:1-5)

³⁷ Gunnë' ca' Jesús:

—Biti' ichugu bë'ëli' que luzá'ali', ate' cuntu nu ichugu bë' queëli'. Biti' cuéaj bë'ëli' que luzá'ali', ate' cuntu nu cuéaj bë' queëli'. Buli'niti lo luzá'ali', ate' Dios uniti lahuë' ca' libí'ili'. ³⁸ Buli'nödžaj que luzá'ali', ate' Dios gunnë'

queéli'. Ulu'nödzjé' queéli' le ulu'rixé' len tu guí'ina ribixi le naca idú, le naguirö, en nagui gate ga rë, en zóatica' gubá. Ca naca le ruríxili', la' cá'asö urixé' Dios ca' queéli'.

39 Bucúdzu' è didza' Jesús, rë' légaquië':

—¿Naru' huácatsö nu bönni' lo chul-la iché' è ia'túé' bönni' lo chul-la? Biti' ca' gaca, tu' ila'bixé' iropé' tu lu yero. **40** Biti' ca' gácarë' lo tu bönni' usëda ca nu rusëdi lë', pero cate' údxí izëdë' bönni' na', gáquië' ca naca nu na' rusëdi lë'.

41 ;¿Bixz que ruyú' bëbudo' yu'u guiój lahuë' böchi' luzó'o, en biti' rilé'enu' le zxön yu'u guiój lo cazu'? **42** ¿Naru' huácatsö guío'-në' böchi' luzó'o: "Böcha'a, benna lataj cueja' bëbudo' yu'u guiój lo", en biti' rilé'enu' le zxön yu'u guiój lo cazu'? Li', bönni' ruluí'isö tsahui' cuiunu', guléaj zí'alò le zxön yu'u guiój lo cazu', ate' ní'irö ilé'enu' dxi'a para cueju' bëbudo' yu'u guiój lahuë' böchi' luzó'o.

Le runru' naca bë' le nácaru'

(Mt. 7:17-20; 12:34-35)

43 Gunné' ca' Jesús:

—Tu yaga dxi'a biti' cuía le naca cá'asö. Lësca' caní, tu yaga guí'a biti' gaca cuía le naca dxi'a. **44** Caní naca, le ribía tu yaga naca bë' ca naca yaga na'. Biti' ruchíbiru' le ribía yaga higo lu yaga yötsi', en calëga lu bisequi' yötsi' biti' ruchíbiru' le ribía lubá uva. **45** Tu bönni' dxi'a ru'ë didza' dxi'a tu' yu'u le naca dxi'a icja ládxí'da'ahuë', ate' didza' xihui' ru'ë bönni' xihui' tu' yu'u icja ládxí'da'ahuë' le xihui'. Rinné ruá'aru' ca naca le yu'u icja ládxí'do'oru'.

Chopa ca gaca cuéquiru' xilibi yu'u

(Mt. 7:24-27)

46 Gunné' ca' Jesús:

—¿Bixz que rulídzali' neda', rnnali': "Xantu', Xantu", pero biti' runli' ca rinná bë'eda' libí'ili'? **47** Ulu'ida' libí'ili' ca naca nu na' za' quia', en riyöni xtídz'a, en run ca rnna xtídz'a. **48** Nu ni naca ca tu bönni', cate' benë' lidxë', guchö'önë' ga rë', en guléquië' xilibi yu'u ga naca lu guiój. Cate' bötaj yegu gubo'o, guchö'öna cuita yu'u na', pero biti' guca uquínnaj le, tu' nulibi ga naca lu guiój. **49** Na'a, nu riyöni xtídz'a, en biti' run ca rnna, nu ni naca ca tu bönni' benë' lidxë' ga naca lu yu cá'asö. Biti' benë' xilibi. Cate' guchö'öna yegu gubo'o cuita yu'u na', la' biguínnajtë, ate' gubixi dërø zö'ö que.

7

Jesús ruúnë'-bi' bi'i huen dxin queë' tu bönni' unná bë'

(Mt. 8:5-13)

1 Cate' Jesús budxi bë'lenë' légaquië' didza' ni, guyázië' yödzö Capernaum.

2 Lu yödzö ni' zoë' tu bönni' Roma rinná bë'enë' bönni' röjáquië' gudil-la. Zóabi' bi'i huen dxin queë' nadxí'ide'enë'-bi', ate' bi'i ni ré'ebi', en chirequi gátibi'. **3** Cate' biyönnë' bönni' ni didza' tuë böñachi ca naca queë' Jesús, la' gusöl-la'té' bal-lë' bönni' gula tu'zéajni'inë' bönni' judío ga na' zoë' Jesús, tsöjöta'yugaquië' lahuë' Lë' guídë' uduhuénë'-bi' bi'i huen dxin queë' na' ré'ebi'. **4** Bönni' gula tu'zéajni'inë' na' bila'dxinë' ga zoë' Jesús, ate' guláta'yuë' lahuë' idú ládxí'gaquië', ta'nnë':

—Náquië' lesaca' bönni' na' gunu' queë' lë ni, **5** tu' runë' bal böñachi uládz queéru', en benë' tu yu'u queéru' ga rudúbiru' rusëdaru' queë' Dios.

6 Ní'irö Jesús guyéajlenë' légaquië'. Cate' chizóa ila'dxinë' lidxë' bönni' na', lë' gusöl-lë' è bal-lë' böchi' luzë' è ga zë'è Jesús, ate' té' Lë':

—Xan, rnnë' bönni' na': “Biti' uguí' inu', tu' cabí naca' lesaca' tsáziu' lidxa',
 7 en biti' naca' lesaca' guída' ga zu'. Que lë ni na' biti' burúguida' guída' ga zu'.
 Bé'ësö didza', ate' huöacatëbi' bi'i huen dxin quia'. 8 Neda' ca', zoa nu rinná
 be'e neda', ate' nacu'ë ca' bönni' röjáquië' gudil-la rinná bë'eda' légaquië'. Rea'-
 né' tuë: Guyéaj ni', ate' rejë'. Rea'-në' ia'tué': Gudá ni, ate' ridë'. Rea'-në' ca'
 huen dxin quia': Ben dxin ni, ate' runë' dxin na'.”

9 Cate' biyönnë' Jesús didza' ni, bubánine' queë' bönni' na', ate' buécjë', en
 gudxë' böñachi na' zá'gaca cùdzulë', rnnë':

—Le nácatë rea' libí'ili', cuntu nu bönni' Israel biti' röjxáqui'da'-në' réajlë'ë
 quia' ca réajlë'ë quia' bönni' ni.

10 Cate' bulu'dxinë' bönni' na' gusöl-lë'ë bönni' rinná bë'enë' bönni' röjáquië'
 gudil-la, gula'yázië' ga naca lu yu'u lidxë', en bila'lé'enë' chiböácabí bi'i huen
 dxin na'.

Jesús rusubanë'-bi' bi'i bönni' queënu tu nigula uzëbi

11 Gudödi guca lë ni, sa'yéajë' Jesús yödzö Naín, ate' dzágagaquië' bönni' usëda
 queë' Lë', len böñachi zián. 12 Cate' bidxinë' gala' ra' yödzö na', bilé'enë' yugu'
 bönni' nuá'agaquië'-bi' tubi' bi'i bönni' nati. Söjcáchi'gaquië'-bi'. Bi'i nati na'
 nácabí' la's dui bi'i queënu tu nigula uzébido'. Zián böñachi uladza queënu
 nigula uzébi na' söjácalen-nu. 13 Cate' Xanru' bilé'enë'-nu, buéchí' ládxë'-ë-nu,
 ate' gudxë'-nu:

—Bíti'rö cödxu'.

14 Ní'irö gubígui'ë Jesús, en gudanë' da'a yaga ga na' dëbi' bi'i nati na'.
 Gula'bözë' bönni' na' nuá'agaquië'-bi', ate' Jesús gunnë':

—Bi'ido', lí' rea', guyasa.

15 Ní'irö bubanbi'. Gurö'öbi' bi'i na' zí'alö nátibi', ate' gusí lobi' ruí'ibi'
 didza'. Jesús budödë'-bi' lu ná'anu xiná'abi'. 16 Cate' bönni' ni' bila'lé'enë' lë
 ni, guládxinë' yúgu'të', ate' gula'gu'ë Dios yöl-la' ba, ta'nnë':

—Bidxín queëru' tu bönni' lo, ru'ë didza' uláz queë' Dios. Dios caz rácalenë'
 böñachi queë'.

17 Guzë didza' ca naca yöl-la' huáca queë' Jesús, ate' bila'yöni böñachi yúgu'të
 yödzö luyú Judea, en yúgu'të yödzö idú gásibi'ilö.

Le rinabé' Juan, bönni' buquilë' böñachi nisa

(Mt. 11:2-19)

18 Bönni' dá'gaquië' Juan gula'guíxjö'i'inë' lë' yúgu'të lë ni runë' Jesús. Ni'
 yu'ë Juan lidxi guíë, bulidzë' chopë' bönni' na' dá'gaquië' lë, 19 ate' gusöl-lë'ë
 légaquië' ga na' zoë' Jesús para ila'nábinë' Lë', ila hnë': “¿Nacu' Li' Cristo, bönni'
 ral-la' guidé', o naru' ral-la' ciòtu'-në' bönni' yúbölö?” 20 Cate' bila'dxinë' bönni'
 na' nasöl-lë'ë Juan ga na' zoë' Jesús, té' Lë':

—Juan, bönni' buquilë' böñachi nisa, nasöl-lë'ë netu' para inábitu' Li',
 innatu': “¿Nacu' Li' Cristo, bönni' na' ral-la' guidé', o naru' ral-la' ciòtu'-në'
 bönni' yúbölö?”

21 La' ná'asö ruúnë' Jesús zián nupa te'e, yugu' bönni' huë', en bönni'
 yú'ugaca légaquië' bö' xihui', ate' zián bönni' lo chul-la busaljë' guiöj lógaquië'.

22 Bubi'ë didza' Jesús, rë' chopë' bönni' na' nasöl-lë'ë Juan, rnnë':

—Guli'tséaj, guli'tsöjtixjö'i-në' Juan ca naca le bilé'eli', en le biyönilí'.
 Tu'lé'enë' bönni' guchul-la lógaquië'. Tu'zë'ë bönni' gulatsjë'. Nuhuöácagaquië'
 bönni' gü'igüequinë' huë' nudzu' ruzödi. Tu'yönnë' bönni' gula'cödzü'.
 Nubángaqüië' bönni' gulatië'. Ta'yönnë' bönni' yechi' didza' dxí'a. 23 Bica' ba

nu biti' gaca chopá ladxi', ate' za'len neda' sal-la' biti' runa' ca réqui nu na' ral-la' guna'.

²⁴ Cate' bönni' na' gusöl-lë'ë Juan bulu'zé'ë ni', gusí lahuë' Jesús ruluúinë' bönachi ni' ca naca queë' Juan na', rnne':

—¿Bizxi birúajli' yöyjuli' lu lataj cá'asö? ¿Naru' birúajli' yöyjuli' tu gui rutá bö' recja le? ²⁵ ¿Bizxi caz birúajli' yöyjuli'? ¿Naru' birúajli' yöyjuli'-në' tu bönni' nácuë' lari' nazáca'de'e? Nöz quézili' nupa nácugaca lari' nazáca'de'e, en tu'zi' xibé yöl-la' tsahui', nacuá' lídxigaciü' bönni' ta'nná bë'ë. ²⁶ ¿Bizxi caz birúajli' yöyjuli'? ¿Naru' birúajli' yöyjuli'-në' tu bönni' ru'ë didza' uláz queë' Dios? Ön, rea' libi'ili', ate' nayépisétëro' ca nu ru'i didza' uláz queë' Dios. ²⁷ Náquië' Juan bönni' na' nazúaj lu guichi lá'ayi ca naca queë', rnna'.
Buyútsöca', risöl-la'a-në gubáz quia', inöruë' ca Li'.

Bönni' ni uchi'ë nöza ga tödu'.

²⁸ 'Neda' rea' libi'ili': Gapa nacuá' bönachi, channö zoë' nu bönni' ru'ë didza' uláz queë' Dios, biti' nácarë' lo ca Juan, bönni' na' buquile' bönachi nisa, pero nu nácatérö cuídi'sö ga rinná bë'ë Dios nayépisétëro ca Juan na'.

²⁹ Cate' bönachi ni', en bönni' tu'quizxjë' lázagaca bönachi bila'yönnë' didza' ni bë'ë Juan, guléquibe'enë' le naca tsahui' lahuë' Dios, en bila'dilë' nisa lu në'ë Juan, ³⁰ pero yugu' bönni' yudo' fariseo, en bönni' yudo' tu'sédinë' xibá queë' Moisés biti' bila'dilë' nisa lu në'ë Juan, ate' caní guca, bulu'cá'anë' cá'asö le gü'unnë' Dios gunë' quégaquië'.

³¹ Gunnë' ca' Xanru':

—¿Nacxi uséqu'i'tseda' bönachi nacuá' dza ni zóaru' na'a? ¿Nacxi caz nácaagaquië'? ³² Nácaagaquië' ca bï'ido' ta'guitjabí'. Ta'bö'öbi' lu yë'ëyi, en ta'bödxi'abi'. Ta'nnaabi' tubi' ia'tubi': "Rucödxitu' queëli' gui, pero biti' ruyá'ali'. Rul-la yéchi'tu', pero biti' ribödxili'." ³³ Caní nácali' tu' bidë' Juan, bönni' buquile' bönachi nisa, en biti' gudahuë' yöta xtila, en biti' gu'ë xisi uva, ate' rninali' queë': "Tu' xihui' dzaga lë'." ³⁴ Cate' bida' neda', Bönni' Guljë' Bönachi, en rë'aj rahua', rninali' quia': "Bönni' ni náquië' bönni' huágule'ë, en bönni' re'je'. Náquië' lúzaga'gaquië' bönni' tu'quizxjë', en ia'zíca're' bönni' dul-la'." ³⁵ Rea' libi'ili': Naca bë' nupa nápagaca yöl-la' réajni'i queë' Dios ni'a que le túngaca.

Le bene' Jesús lidxë' tu bönni' yudo' fariseo

³⁶ Tu bönni' yudo' fariseo bulidzë' Jesús gágulenë' lë' tsözxön, ate' guyázië' Jesús lidxë' bönni' na', en gurö'ë rahuë'. ³⁷ Zóanu lu yödzö na' tu nigula udá dzaga, en cate' nözinu rö'ë rahuë' Jesús lidxë' bönni' yudo' fariseo na', ní'irö bidixinnu ni' nuá'anu tu böga'do' néquini guiöj nazaca' le yudzu tu le rilá' zxxi. ³⁸ Cate' bidixinnu zaca' cùdzu'lë' Jesús, gurö'önü xini'ë ribödxinu. Ní'irö gusílonu rigú'unu nisa ribödxinu ni'ë Jesús, en ruzxinu ni'ë len guitsa' ícjanu. Butsaga lonu ni'ë, en gulú'unu ni'ë lë na' rilá' zxxi. ³⁹ Cate' bönni' yudo' fariseo na' nulidzë' Jesús bíle'enë' lë ni, guzá' ládxë'ë, rnne': "La'tu' náquië' bönni' ni bönni' ru'ë didza' uláz queë' Dios, huéquibe'enë' nuzxi na', en nacxi nácanu nigula ni rigannu Lë', tu' nácanu nigula udá dzaga." ⁴⁰ Ní'irö Jesús gedxë' bönni' fariseo na', rnne':

—Simón, dë tu le ral-la' guía' li'.

Bubi'ë didza' bönni' na', rnne':

Gunná, Bönni' Usedi.

⁴¹ Jesús rë' lë':

—Zoë' tu bönni' dë dumí queë', ate' nacu'ë chopë' bönni' tál-lë'ë dumí queë'. Tuë' bönni' na' ral-lë'ë queë' lazzxjë' que chopa iz, ate' ia'túë' na' ral-lë'ë queë' lazzxjë' que chopa beo'. ⁴² Tu' cabí dë quégäquië' dumí ulu'guízjë' lë na' tál-lë'ë queë', que lë ni na' buniti lahuë' iropé' lë na' tál-lë'ë queë'. Gunnátsöca' na'a. ¿Núzxilë' bönni' chopë' ni idxí'irönë' bönni' na' buniti lahuë' légaquië'?

⁴³ Bubi'ë didza' Simón na', rnnë'.

—Réquida' neda', bönni' na' rálal're' queë' dumí, lë na' buniti lahuë'.

Jesús gudxé' lë':

—Le nácasö rnno'.

⁴⁴ Ni'irö buécjë' Jesús, ate' ni' ruyúë'-nu nigula na', rë' Simón:

—¿Naru' rilé'enu' nigula ni? Guyázia' lidxu', ate' biti' bennu' quia' nisa quíbida' ni'a, pero nigula ni gulú'unu ni'a nisa ribödxinu, en buzzinu ni'a len guitsa' ícjanu. ⁴⁵ Biti' butsaga lo' neda', pero cate' bidixíntea' lidxu', biti' ruzoá dxinu nigula ni, rutsaga lonu ni'a. ⁴⁶ Biti' gulú'u icja' le za, pero nigula ni gulú'unu ni'a lë na' rilá' zxixi. ⁴⁷ Que lë ni na' rea' li', dul-la' zián gubága'nu nigula ni, chiguyú'u yöl-la' runiti lo quéguequi, ate' nadxi'ide'enu neda'. Nu na' Dios runiti lahuë' le láti'do'os, láti'do'os nadxi'i Dios nu na'.

⁴⁸ Ni'irö Jesús gudxé'-nu nigula na', rnnë'.

—Dul-la' gubágu'u chiguyú'u yöl-la' runiti lo que.

⁴⁹ Yugu' bönni' na' ta'bö'lenë' Jesús tahuë' gula'sí lógaquië' të' luzá'agaquië', ta'nné':

—¿Nuzxi caz bönni' ni, runiti lotsë' ca' dul-la'?

⁵⁰ Ni'irö Jesús gudxé'-nu nigula na', rnnë'.

—Tu' réajlé'u neda', chibuló' li'. Böaj lidxu', zoa dxí ládxu'u.

8

Yugu' nigula tácalennu Jesús, ta'gú'unu le tahuë'

¹ Gudödi gulaca lë ni, gudë' Jesús gapa nacuá' zián yödzö zxön, en yugu' yödzödo', ate' bene' libán ni', en bë'ë didza' que didza' dxi'a ca rinná bë'ë Dios, ate' idxínnutë' bönni' usëda queë' dzágagaquië' Lë'. ² Bál-lanu nigula bunë' Jesús légacanu dzágagacanu ca' Lë'. Bubéajë' bö' xihui' yú'ugaca légacanu, en bugüë' yugu' yödzöhuë' gü'igüequinu. Nútsa'nu ládjagacanu María, lënu ca' Magdalena, nigula na' bubéajë' gadxi bö' xihui' yú'ugaca lënu. ³ Juana, nigula queë' Chuza, bönni' yu'u lu né'ë le dë lidxë' Herodes, nútsa'nu ca' ládjagacanu, ate' cá'anqueze Susana nútsa'nu ca' légacanu. Ta'gú'unu nigula ni, en ziánrönü ca', le tahuë' Jesús, en yugu' bönni' usëda queë'. Tu'nödzjanu le dë quégacanu.

Rucúdzu'ë didza' Jesús ca naca queë' bönni' guz

(Mt. 13:1-9; Mr. 4:1-9)

⁴ Bila'rúaj böñachi zián yugu' yödzö ni', en bilá'gaca ga na' zoë' Jesús. Cate' bulu'dubë' ga na' zoë', Lë' bucúdzu'ë didza', rë' légaquië':

⁵ —Birúajë' bönni' guz, söjésië' xisedo'. Cate' ni' söjésië', bulu'huöxaj bal-la xisedo' na' ga naca la' nöza, ate' bulu'libi böñachi léguequi. Bila'dxinba' ca' biguínndo', en gulé'ajba' xisedo' na' dzö' ö la' nöza. ⁶ Bulu'huöxaj ia'bal-la xisedo' na' lu yu ga rö' ö guiój. Cate' gula'lén xisedo' na', la' gula'bídxítë tu' cabí nalupa' yu na'. ⁷ Bulu'huöxaj ia'bal-la xisedo' na' ga bulu'lén lubá yötsi'. Tsözxön gula'zxön lubá yötsi' na', en xisedo' na', ate' lubá yötsi' na' bila'röli xisedo' na' gula'lén, en gulún ditaj léguequi. ⁸ Bulu'huöxaj ia'bal-la xisedo' na' ga naca luyú' bëbu. Cate' chigula'zxön, bulu'nödzaj. Tu dxigu' na' bunödzaj ia'tú gayuá' téro xisedo' ca'.

Cate' budxi gunnë' caní Jesús, bë'ë zidzaj didza', rnnë':
—¡Nu zoa nagui, en riyöni ral-la' uzë nagui!

Bizx que rucúdzu'ë Jesús didza'
(Mt. 13:10-17; Mr. 4:10-12)

9 Ní'irö yugu' bönni' usëda queë' Jesús gula'nábinë' Lë', ta'nnë':
—¿Bizxi sa'yéaj lë na' bucúdzu'u didza'?

10 Jesús gudxë' légaquië':

—Dios ruzéajni'inë' libifili' le nagachi' ca rinná bë'ë Lë', pero ia'zica'rö böñachi ni, ruñ'lena' léguequi didza' le rucúdzu'a didza' para cate' ulu'yüë', biti' ila'lé'enë', en cate' ila'yönnë', biti' ila'yéajni'inë'.

Riguíxjö'ë Jesús le rulu'i le bucúdzu'ë didza'
(Mt. 13:18-23; Mr. 4:13-20)

11 Gunnë' ca' Jesús:

—Caní naca le rulu'i lë na' bucúdzu'a didza'. Xisedo' na' naca xtídzë'ë Dios. **12** Xisedo' na' bulu'huökaj la' nöza tu'lui'i ca raca quégaca bönni' ta'yönnë' didza' na', pero la' za'të tu' xihui', en rigúa didza' na' bidxín lu icja ládxido'gaquië', para cabí ila'yéajlë'ë, en cabí ulu'lë'. **13** Xisedo' na' bulu'huökaj lu yu ga rö'ö guiój tu'lui'i ca raca quégagaquië' bönni' ta'yönnë' didza' na', en tu'dzéjanë' ta'zi'ë le, pero nácagaquië' ca xisedo' na' biti' ben lui. Tu chí'isö ta'yéajlë'ë, tu' ridxín le rizí' bë' légaquië', ate' la' tu'huóatë ládxido'gaquië'. **14** Xisedo' na' bulu'huökaj ga bulu'lén lubá yötsi' tu'lui'i ca raca quégagaquië' bönni' ta'yönnë' didza' na', en cate' chibila'yönnë', yugu' le tu'i ládxido'gaquië' yödzöliö ni, en yugu' yöl-la' tsahui' que, en yugu' le ta'yaza ládxido'gaquië' le taca ni, tun nigui légaquië', ate' biti' run dxin didza' na' lu icja ládxido'gaquië'. **15** Xisedo' na' bulu'huökaj ga naca luyú bëbu tu'lui'i ca raca quégagaquië' bönni', idú ládxido'gaquië' ta'yönnë' didza' na', en ta'gu'ë tsutsu le lu icja ládxido'gaquië', ate' lu yöl-la' riböza zxön ladxi' tunë' ca rnna didza' na'.

Rucúdzu'ë didza' Jesús que le rigú'u bení lídxiru'
(Mt. 4:21-25)

16 Gunnë' ca' Jesús:

—Cuntu nu bönni' ruquélë'ë guí', ate' la' rudúsi'të' le guí'ina, en biti' rigu'ë le zxani le ráti'në', pero ruzoë' le xilataj ga naca liná' lu yu'u, ate' nupa ila'yaza ni' ulu'zi' xibé guí' na'. **17** Ilá' lahui yúgu'të le nagachi', ate' gaca bë', ate' irúaj ga liná' yúgu'të le raca balándo'os.

18 'Que lë ni na', buli'zé nágali', tu' huadéli'në' ia'lati' bönni' ruzoë' tsutsu icja ládxida'ahuë' didza' riyönnë', en huazi'rë' xtídzë'ë Dios, pero bönni' biti' ruzoë' tsutsu icja ládxida'ahuë' didza' riyönnë', huadúa didza' na' biyönnë'.

Xinë'ë Jesús, en yugu' bönni' böchë'ë
(Mt. 12:46-50; Mr. 3:31-35)

19 Ní'irö bila'dxinë' xinë'ë Jesús, en yugu' bönni' böchë'ë ga na' zoë', pero biti' guca ila'bíguë'ë gala' ga zoë' tu' nacuá' böñachi zián ni'. **20** Zoa ni' nu bulidza Jesús, rnna:

—Nacu'ë xinó'o, en yugu' bönni' böchu'u lö'a. Të'ënnë' iluñ'ilenë' Li' didza'.

21 Bubi'ë didza' Jesús, rë' légaquië':

—Nupa ni ta'yöni xtídzë'ë Dios, en tun ca rnna, bönni' ni nácagaquië' ca xina' caza', en yugu' bönni' böchi' caza'.

Jesús ribequi dxië' bö' budunu'
(Mt. 8:23-27; Mr. 4:35-41)

22 Tu dza gurenë' Jesús tu lë'e bárcodo', dzágagaquië' bönni' usëda queë' Lë', ate' Jesús rë' légaquië':

—Udöditsöca'ru' ia'tsólá'a nísado' ni.

Ní'irö söjácatë'. **23** Tsanni ni' ta'dödë' lu nísado' na', rásië' Jesús. Ní'irö gusí lo recja bö' budunu' lu nísado' na', ate' chirequi huötaj bárcodo' na' zxan nisa, en zoa böndxi quégaquië'. **24** Ní'irö gula'biguë' ga dë' Jesús, en bulu'subanë' Lë', ta'nnë':

—¡Bönni' Usedi! ¡Bönni' Usedi! ¡Chirequi huötjaru' lu nisa!

Cate' bubanë' Jesús, bulidzë' bö' na' recja, en nisa na' riyasa ridxíada', ate' guzóá dxi bö' na' recja, en guröö dxi lu nísado' na'. **25** Ní'irö Jesús gudxë' yugu' bönni' usëda queë', rnnë':

—¿Naru' cabí réajlë'ëli' Dios?

Guláxdxinë' légaquië', en tu'báninë'. Gulë luzá'agaquië' tuë' ia'túë':

—¿Nuzxi caz bönni' ni? Rinná bë'enë' bö' recja, en nísado', ate' tun ca rnna xtídzë'ë.

Tu bönni' yödzö Gadara yu'u lë' bö' xihui'

(Mt. 8:28-34; Mr. 5:1-20)

26 Ní'irö bila'dxinë' lu xiyúgaquië' bönni' Gadara, le dë ia'tsólá'a nísado' ca dödilö ga dë luyú Galilea. **27** Cate' birúaje' Jesús lë'e bárcodo' na' ga naca lu yu' na', dutságuië' tu bönni' yödzö na' Lë'. Chigudzé yu'u bö' xihui' lë', ate' bíti'rö rácue' lari', en bíti'rö rizöé' lu yu'u, pero nun xilatjë' lu zxan bulóaj ga nádjagaca yero ba. **28** Cate' bönni' na' yu'u bö' xihui' lë' bilé'enë' Jesús, gurödxi'ë zidzaj, ate' buzóá zxibë' lahuë' Jesús, en bë'ë zidzaj didza', rnnë':

—¿Bizxi ral-la'a quiú', Jesús, Zxfínë' Dios nayépisétérë? Rátaya'ua' lo' cabí usaca' zi'u neda'.

29 Caní gunná' tu' chigunná bë'enë' Jesús bö' xihui' na' uruaj lu bönni' na'. Zián luzui zí'atëlö burixi butúluda' bö' xihui' na' bönni' na', ate' yugu' bönni' yödzö ni' gulúgië'ë lë' du guié, en bulu'xéjanë' bregui' guíë ni'a në'ë, pero blë'ë yugu' du guié na', ate' bö' xihui' na' yu'u lë' guchë' lë' lu lataj cá'asö. **30** Ní'irö Jesús gunábinë' bö' xihui' na', rnnë':

—¿Bi leu'?

Bö' xihui' na' gudxi Lë':

—Le Zián lea'.

Caní gunná tu' yú'ugaca bö' xihui' zián bönni' na'. **31** Ní'irö yugu' bö' xihui' na' guláta'yugaca lahuë' Jesús cabí isöl-lë'ë léguequi lataj chul-la quégaca nupa nátilaca. **32** Nacuá'aba' ca' tu cõ'öba' cuchi zián ta'daba' táguba' lu guí'ado' ni', ate' bö' xihui' na' gula'naba yechí' Jesús gu'ë léguequi lataj tsöjts'ugaca cuchi zián na'. Jesús bë'ë léguequi lataj. **33** Bulu'rúaj yugu' bö' xihui' lu bönni' na', en yójts'ugaca cuchi zián na', ate' yójácaba' cuchi zián na' ga naca tu lë'e guíöj. Yójbixigacaba' lu nísado', ate' ni' gula'yépiba' nisa, gulátiba'.

34 Cate' bila'lé'enë' bönni' tu'yúgaquië'-ba' cuchi zián na' ca na' guca quégacaba', guladxi gula'dzöbinë'. Bulu'zxúnnaejë' ni', ate' yójhuöjgaquië' yöjtixjöi'iguequinë' nupa nacuá' yödzö na', en nupa nacuá' la' guixí' ni'.

35 Ní'irö bila'rúaje' bönni' na', yöjyúgaquië' lë' na' guca. Cate' bila'dxinë' ga na' zoë' Jesús, bila'lé'enë' bönni' na' gula'yú'u bö' xihui' lë', rö'ë xini'ë Jesús. Nácué' lari', en dxi'ado' chizóë', ate' guláxdxinë'. **36** Nupa na' bila'lé'e lë' na' guca gula'guíjöi'i légaquië' ca guca, böáquie' bönni' na' gula'yú'u bö' xihui' lë'. **37** Ní'irö yúgu'të böñchi zián na' quégaca yödzö nabábagaca Gadara na' guláta'yu lahuë' Jesús uruajë' lu xiyúgaquequi, tu' tádxinë'. Bubenë' Jesús lë'e

bárcodo' na', en söhuöjë'. ³⁸ Bönni' na' bulu'rúaj bö' xihui' na' lë' gúta'yuë' lahuë' Jesús gu'ëlë' lataj tséajlenë' Lë'tsözxön. Gunná bë'enë' Jesús lë' ugá'anë' ni', rnnë':

³⁹—Böaj lidxu'. Yöjtíxjö'i bönachi uládz quiu'yugu' le zxön benë' Dios quiu'.

Böajë' bönni' na' lidxë', ate' buzë' didza' idú lu yödzö ni' ca naca le zxön benë' Jesús queë'.

*Jesús ruuñë'-bi' bi'i nigula queë' Jairo enca' nigula na' gudannu lari' nácuë'
(Mt. 9:18-26; Mr. 5:21-43)*

⁴⁰ Cate' budxinë' Jesús ia'tsölá'a nísado' na', bulu'dzeja bönachi zián nacuá' ni' ni'a queë' Lë', tu' ta'böza Lë'. ⁴¹ Ní'irö bidixinë' Jairo ga zoë' Jesús. Náquië' bönni' lo que yu'u ga tu'dubë' bönni' judío, en tu'sëdë' queë' Dios. Biyéchuë' xini'ë Jesús, en gúta'yuë' lahuë' tsejë' lidxë'. ⁴² Caní benë' tu' zóabi' tubi' bi'i nigula queë', chirequi gátili'. Nácabi' bi'i la's dui queë', en yú'ubi' ca chinnu iz. Tsanni ni' sa'yéajë' Jesús, sönögaca tu'quirö bönachi zián Lë'.

⁴³ Nútsa'nu tu nigula ladaj bönachi zián na', chiguca chinnu iz rigu'i rizáca'nu. Biti' ruhu'i rön queënu que huë' quégaca cázanu nigula, ate' chibutönu déra le dë queënu, riguízjanu nupa tu'ún bönachi, pero biti' guca nu bönni' únë'-nu. ⁴⁴ Gubiga'nu zaca' cùdzulë' Jesús, en gudannu rui'i lari' nácuë', ate' la' bu'ítë huë' rön queënu.

⁴⁵ Ní'irö Jesús gunábinë' nupa nacuá' ni', rnnë':

—¿Nuzxi na' gudán neda'?

Gula'dá'bagui'ë yúgu'të'. Ní'irö Pedro, en nupa nacuá'len lë' gulë' Lë', ta'nnë':

—Bönni' Usedi, nacuá' bönachi zián ni, tu'quirö Li', en tu'dxiga' Li', ate' ñmnatso': “¿Nuzxi na' gudán neda'?”

⁴⁶ Ní'irö Jesús gunné:

—Zoa nu gudán neda', tu' gúquibe'eda' birúaj yöl-la' huáca neda' le ruún bönachi.

⁴⁷ Cate' réquibe'enu nigula na' nözinë' Jesús le bennu, ní'irö guzxízinu. Biyéchunu xini'ë Jesús, en gudíxjö'inu Lë' lógaca bönachi zián na' bizx que na' gudannu lari' nácuë', en ca na' guca, la' böácatenü. ⁴⁸ Ní'irö Jesús gudxë'-nu:

—Nigúlado', tu' réajlé'u neda' chiböácu'. Böaj lidxu', zoa dxí ládxu'u.

⁴⁹ Cate' ni' ru'ë Jesús didza' ni, bidixinë' tu bönni' ni', zë'ë lidxë' bönni' lo na' que yu'u ga tu'dubë' tu'sëdë' queë' Dios, ate' gudxë' bönni' lo na':

—Chigútibi' bi'i nigúlado' quiu'. Bítirö upízjanu'-në' Bönni' Usedi.

⁵⁰ Cate' biyönnë' Jesús lë ni, bubí'ë didza', rë' bönni' lo na':

—Biti' gádxinu'. Guyéajlé'ësö Dios. Huóacabi' bi'i nigúlado' quiu'.

⁵¹ Cate' guyázië' Jesús yu'u na', biti' bë'ë lataj nu tsázalen Lë', pero légaçase' Pedro, en Jacobo, en Juan, enca' xuz xiná'abi' nigúlado' na'. ⁵² Ta'bödxi nupa nacuá' ni'. Ta'bödxi yechë'ë ni'a queëbi' bi'i nigúlado' na', ate' Jesús rë' légaquïë', rnnë':

—Bítirö códxili'. Biti' nátibi' nigúlado' ni. Rásisibi'.

⁵³ Bulu'titje' Lë' tu' nözguequinë' chinátihi'. ⁵⁴ Ní'irö gudélë'ë Jesús ná'abi', en bë'ë zidzaj didza', rnnë':

—Bi'i nigúlado', guyaschi.

⁵⁵ Ní'irö bu'u bö' naca cázabi', bubanbi', ate' la' guyásatëbi'. Jesús gunna bë'enë' légaquïë' ilu'ë le gágubi'. ⁵⁶ Bulu'báninë' xuz xiná'abi', pero Jesús gunna bë'enë' légaquïë' cuntu nu ilë' ca na' guca.

9

*Risöl-lë'ë Jesús bönni' usëda queë' tsöjéngaquië' libán
(Mt. 10:5-15; Mr. 6:7-13)*

¹ Ní'irö butubë' Jesús idxinnutë' bönni' usëda queë', ate' budödë' lu ná'agaquie' yöl-la' huáca, en yöl-la' unná bë' para ulu'béaje' bö' xhui' yú'ugaca bönnachi, en ulu'únë' nupa te'e. ² Gusöl-lë'ë légaquie' tsöjéngaquië' libán ca rinná bë'ë Dios, en tsöjhüéngaquië' nupa te'e. ³ Jesús gudxë' légaquie':

—Biti' bi guá'ali' para la' nöza, calëga xiyágado', en calëga yöyxaj, en calëga yöta, en calëga dumí, en biti' ixóa yenli' chopla lari'. ⁴ Bítitës yu'u ga tsú'uli', guli'sóa ni' cate' uzá'aröli' yödzö na'. ⁵ Gáti'tës ga biti' ilún bönnachi libí'ili' bal, buli'rúaj yödzö na', en guli'cuíbi bëchtö da' lë'e lábalí', le ulu'i légaquie' nagá'ana xíguia' nabága'gaquie'.

⁶ Ní'irö bila'rúajé' bönni' usëda queë' na'. Gula'dödë' yúgu'të yödzödo', tunë' libán que didza' dxi'a, en tu'únë' nupa te'e yúgu'të lu yödzö na'.

*Ca gütië' Juan, bönni' buquilë' bönnachi nisa
(Mt. 14:1-12; Mr. 6:14-29)*

⁷ Biyönnë' Herodes, bönni' rinná bë'ë, ca naca yúgu'të le runë' Jesús, ate' gurö'ë böninga, tu' ta'nná bönnachi:

—Juan na' chibubanë' lu yöl-la' guti.

⁸ Ia'bal-lë' ta'nnë':

—Chibulë'ë Elías, bönni' na' bë'ë didza' uláz queë' Dios.

Ia'bal-lë' ta'nnë':

—Chibubanë' tu bönni' bítsë'ë yugu' bönni' gulu'ë didza' uláz queë' Dios dza ni'te.

⁹ Herodes na' gunnë':

—Juan na' burixa' yenë'. ¿Nuzxi caz bönni' ni, riyönda' queë' runë' yugu' lë ni?

Rizóa ribö'ë Herodes ilé'enë' Jesús.

*Rugahuë' Jesús chi-un gayuá' bönnachi
(Mt. 14:13-21; Mr. 6:30-44; Jn. 6:1-14)*

¹⁰ Cate' bulu'dxinë' bönni' gubáz nasöl-lë'ë Jesús ga zoë' Lë', bulu'siyönnë' Lë' yúgu'të le gulunë'. Ní'irö guchë'ë Jesús légaquie' quez. Yójáquië' tu lataj cá'asö lu xiyú yödzö Betsaida. ¹¹ Cate' chinöziguequi bönnachi lë ni, yójnöguequi Lë', ate' Jesús benë' lguequei bal, en bë'lenë' lguequei didza' ca rinná bë'ë Dios, ate' bunë' nupa te'e.

¹² Cate' chízá' ral-la dza na', idxinnutë' bönni' gubáz queë' Jesús gula'bíguë'ë ga zoë', en té' Lë':

—Busöl-la' bönnachi ni tsöjaca gapa dë yödzödo', en gapa dë yú'udo' idú gásibi'ilö para tsöjtíljagaquie' gapa ulu'gá'anë', en bi ilahuë', tu' naca lataj cá'asö ga ni zóaru'.

¹³ Ní'irö Jesús rë' légaquie':

—Guli'gu'ë libí'ili' le ilahuë'.

Të' Lë':

—Gáyu'sö yöta xtílado' dë, en chópasöba' böla dëba' queëtu', o ¿narü' huéajtsatu' tsöjö'ötu' le ilágugaca bönnachi zián ni?

¹⁴ Nacu'ë ca chi-un gáyu'ë bönni' ga na'. Ní'irö Jesús gudxë' yugu' bönni' usëda queë', rnnë':

—Guli'gún ga ila'bö'ë tu cö' huéajgaquie', ilaca ca chi-un huéajgaquie'.

15 Caní gulunë', ate' gula'bö'ë yúgu'të'. **16** Ní'irö gudélë'ë Jesús gayu' yöta xtila na', en chópaba' böla na', ate' guchisa lahuë' ruyúë' lúzxiba, en rë' Dios: "Xclenu'." Ní'irö buzzuzxje' léguequi, en bë'ë quégaquië' bönni' usëda queë' para ulu'cu'ë lögaca bönnachi na'. **17** Gulahuë' yúgu'të', en bulu'huöljanë'. Gudödi na' bulu'tubë' yugu'bizzaj bugá'ana, ate' bulu'líë' idú chinnu ga'böra.

Rnnë Pedro Jesús náquië' Cristo

(Mt. 16:13-19; Mr. 8:27-29)

18 Tu dza tsanni ni' zoë' quez Jesús, rulidzë' Dios, bila'dxinë' bönni' usëda queë' ga zoë', ate' gunábinë' légaquië', rnnë':

—¿Nuzxi ta'nná bönnachi naca' neda?

19 Bulu'bï'ë didza', ta'nnë':

—Ta'nná bal-la bönnachi nacu' Juan, bönni' buquilë' bönnachi nisa. Ta'nná ia'bal-lë' nacu' Elías, ate' ta'nná ia'bal-lë' nacu' tu bönni' bítsë'ë yugu' bönni' gulu'ë didza' uláz queë' Dios dza ni'te, en nubanë' lu yöl-la' guti.

20 Ní'irö Jesús gunábinë' légaquië', rnnë':

—Názxi libí'ili', ¿nuzxi rninali' naca?

Bubi'ë didza' Pedro, rnnë':

—Nacu' Cristo nasö'l-lë'ë Dios.

Riguíxjö'ë Jesús ca si' ilútië' Lë'

(Mt. 16:20-28; Mr. 8:30-9:1)

21 Ní'irö Jesús gúxdidë'ë légaquië', en gunná bé'enë' légaquië' cuntu nu ilë' Nu náquië' Lë'. **22** Ní'irö rë' légaquië':

—Run bayudxi qui'i saca'a neda', Bönni' Guljë' Bönachi, zián le gaca quia'. Ulu'cá'anë' neda' cá' asö yugu' bönni' gula tu'zéajni'inë', en yugu' bixúz unná bë', en yugu' bönni' yudo' usedi. Ilútië' neda', pero dza tsonna dza Dios usubanë' neda' lu yöl-la' guti.

23 Gudxë' ca' yúgu'të':

—Channö rë'ënë' nu bönni' të'ë neda', ral-la' uzóë' tsölä'alö le dë queë', en gáquië' ca tu bönni' sa'yéajë' söjtë'ë lë'e yaga cruz, ate' ní'irö gaca të'ë neda'.

24 Núti'tës bönni' ruí'i ládxë'ë gun chi'ë yöl-la' na'bán queë', unitië' le, pero channö unitië' yöl-la' na'bán queë' tu' dë'ë neda', bönni' ni gata' yöl-la' na'bán idú queë'.

25 Biti' bi uzi'ë xibé tu bönni' channö utubë' queë' yúgu'të le dë yödzölió ni, pero unitië' tsaz yöl-la' na'bán queë'. **26** Nu bönni' rutu'iñë' neda', en rutu'iñë' ca' xtídza'a, lësca' neda', Bönni' Guljë' Bönachi, utu'ida' bönni' na' cate' huöda' idinná bë'a, dzágagaca neda' yöl-la' zxön queë' Xuza', en yöl-la' zxön quégaquië' gubáz lá'ayi queë' Dios. **27** Le nácaté rea' libí'ili', nacuá' bal-lë' bönni' ni biti' ilátië' cate' ila'lé'erönë' dza idinná bë'ë Dios.

Ridzá' ca riná' lahuë' Jesús

(Mt. 17:1-8; Mr. 9:2-8)

28 Cate' bizá'a xunu' gubidza gudödi bë'ë Jesús yugu' didza' ni, ní'irö guchë'ë Pedro, en Juan, en Jacobo, ate' gurenë' tu lu guí'ado', ga na' bulidzë' Dios. **29** Tsanni ni' ruí'ilenë' Dios didza', bidzá' ca riná' lahuë', ate' böáca chiguíchido'os lari' nácuë', en guyépi yösa bení'. **30** Ní'irö bulu'lui'i lógaquië' chopë' bönni' ga zoë' Lë' tuí'ilenë' Lë' didza'. Nácagaquië' Moisés, en Elías.

31 Chopë' ni gula'yépë' yösa bení', ate' tuí'ilenë' Jesús didza' ca si' uzë'ë yödzölió ni, gátië' lu yödzö Jerusalén. **32** Sal-la' chirácada' ilásie' Pedro, en nupa nacuá'len lë', bayudxi gula'ná'asë', ate' bila'lé'enë' yöl-la'bení' queë' Jesús, en chopë' na' nacuá'lenë' Lë'. **33** Cate' bulu'zë'ë chopë' na' ga na' zoë' Jesús, ní'irö Pedro gudxë' Lë':

—Bönni' Usedi, dxi'a naca zóaru' ni. Gúntsöca'tu' tsonna yu'u lága'do', tu quiu', ia'tú quee' Moisés, en ia'tú quee' Elías.

Biti' réquibe'ené' Pedro bi na' rnné'. ³⁴ Tsanni ni' ru'ë didza' ni, la' gurö'ötë böaj le bugacu légaquië', ate' guládxiné' tu' nacu'ë lu böaj na'. ³⁵ Ní'irö biyön chí'i Nu rui'i didza' lu böaj na', rnné:

—Bönni' ni náquië' Zxi'ina'. Nadxi'ida' Lë'. Buli'zë nágali' didza' gu'ë.

³⁶ Cate' budxi bë' didza' chí'i na', tuzë' Jesús nagá'analenë' légaquië'. Ta'cuá' dxi'ë bönni' usëda quee', ate' dza na' cuntu nu gulë' ca naca le bila'lë' ené'.

Ruúnë' Jesús bi'i bönni' yu'u bö' xihui' lëbi'

(Mt. 17:14-21; Mr. 9:14-29)

³⁷ Cate' za' reni' ia'tú dza bulu'huötjë' Jesús, en bönni' na' dzágagaquië' Lë' lu guí'ado' na', ate' bila'rúaj bönachi zián dutságagaca Jesús. ³⁸ Ní'irö bë'ë zidzaj didza' tu bönni' nútsë'ë ladaj bönachi zián na'. Bulidzë' Jesús, rnné:

—Bönni' Usedi, ráta'yua' lo' duyú'-bi' bi'i bönni' quia' tu' nácabí' bi'i la's dui quia'. ³⁹ Yu'u bö' xihui' lëbi' le run ga ribödxi'abi', en ruxízida' lëbi'. Run ga ribía bidxina' zxöna' ruá'abi', en rurixi rutúluda' lëbi', ate' catu caz rusán lëbi'. ⁴⁰ Gúta'yua' lógaquië' bönni' usëda quiu' ulu'béajë' le, pero biti' gula'zéqui'në'.

⁴¹ Bubi'ë didza' Jesús, rnné:

—Libi'ili', biti' réajlë'ëli', en nachixi ícjali'. ¿Gáca'xté ral-la' sóalena' libi'ili', en guá' ilena' quee'li'? Dijuá'a-bi' bi'i bönni' quiu' ni.

⁴² Cate' ni' zá'abi' ribígabi' ga na' zoë' Jesús, burixi butúluda' bö' xihui' na' lëbi'. Jesús gudil-lë' bö' xihui' na', en buné'-bi' bi'i bönni' na'. Ní'irö bugu'ë-bi' lu në'ë xúzibi'. ⁴³ Bulu'bani yúgu'të bönachi ni' ca naca yöl-la' huáca zxön quee' Dios.

Jesús ru'ë didza' leyúbölö ca si' ila'zönë' Lë'

(Mt. 17:22-23; Mr. 9:30-32)

Tsanni ni' tu'bani yúgu'të bönachi ca naca le zxön runé' Jesús, Lë' gudxë' yugu' bönni' usëda quee', ⁴⁴ rnné'.

—Guli'cú'u icja nágali' didza' ni, tu' si' ulu'dödë' neda', Bönni' Guljë' Bönachi, lu ná'agaca bönachi.

⁴⁵ Biti' gula'yéajni'iné' bönni' usëda quee' didza' ni, tu' cabí ruí'iné' Dios légaquië' lataj ila'yéajni'iné', pero biti' bulu'rúguiné' ila'nábiné' Jesús ca naca didza' ni.

Nu naca lo

(Mt. 18:1-5; Mr. 9:33-37)

⁴⁶ Ní'irö gula'sí lógaquië' bönni' usëda quee' Jesús tu'ë didza'. Ta'nábini luzá'agaquië' tuë' ia'túë' núzxile' gáquië' lo. ⁴⁷ Réquibe'ené' Jesús le ta'zá' ládxia'gaquië', ate' gudélë'-ë-bi' tubi' bï'ido', en buzóë'-bi' cuitë'. ⁴⁸ Ní'irö rë' légaquië':

—Núti'tës bönni' gunë' bal tu bï'ido' caní tu' néquibí' quia' neda', neda' caz gunë' bal, ate' nu bönni' gunë' neda' bal, gunë' ca' bal Xuza' nasöllë'ë neda'. Que lë ni na' bönni' nútsë'ë ládjali' nácarë' nöökaj ladxi', bönni' ni náquië' lo.

Nu biti' ridá'baga' rë'u, rácalen rë'u

(Mr. 9:38-40)

⁴⁹ Ní'irö Juan bulidzë' Jesús, rnné':

—Bönni' Usedi, bilé'etu'-në' tu bönni' rugunë' dxin Lo' rubéajë' bö' xihui', ate' gunná bë'etu'-në' tu' cabí dë'ë rë'u.

⁵⁰ Jesúus rë' lë':

—Bití' inná bé'eli'-në', tu' rácalen rë'u nu bití' ridá'baga' rë'u.

Jesús ridil-lë' Jacobo, en Juan

⁵¹ Cate' chizá' gal-la' dza ral-la' gátië' Jesús, en huëpë' yehua' yubá, benë' bayudxi tseje' Jerusalén. ⁵² Gusöl-lë'ë yugu' bönni' gubáz queë' ila'nörue' ca Lë', ate' yójáquië' tu yödzödo' quégaca bönnachi Samaria para tsöjpá'agaquië' ga ugá'anë' Jesús tu yëla. ⁵³ Yugu' bönni' yödzö na' bití' gulunë' Jesús bal tu' chinaca queë' sa'yéajé' Jerusalén. ⁵⁴ Cate' Jacobo, en Juan, bönni' usëda queë' Jesús, bila'lé'enë' lë ni, té' Lë':

—Xan, ¿naru' inábatsöca'tu' huötaj guí' le za' yehua' yubá, en usuniti légaquië', guntu' ca na' benë' Elías?

⁵⁵ Buécjé' Jesús, en gudil-lë' légaquië', rnñë':

—Bití' nözili' bizxi bo' dzágui libí'ilí'. ⁵⁶ Bida' ni neda', Bönni' Guljë' Bönachi, caléga para usunítia' yöl-la' na'bán quégaca bönnachi, pero bida' dusölá' bönnachi. Ní'irö yójáquië' yödzö yúbölö.

Nupa të'ëni tsöjácalen Jesús

(Mt. 8:19-22)

⁵⁷ Tsanni ni' yú'ugaquië' nöza Jesús, en yugu' bönni' dá'gaquië' Lë', bidxinë' tu bönni' yödzö Jerusalén, en rë' Jesús:

—Xan, rë'ënda' sá'lena' Li' gáti'tës ga tseju'.

⁵⁸ Jesús rë' lë':

—Yúgu' böza', nacuá' zxan bulóaj quégacaba', ate' biguinnido', dxíagaca xcá'agacaba', pero neda', Bönni' Guljë' Bönachi, bití' dë quia' ga gáta'a uzi' ládx'a a.

⁵⁹ Ní'irö Jesús gudxë' tu bönni' yúbölö, rnñë':

—Gudá' neda'.

Bönni' ni gudxë' Lë':

—Xan, benna neda' lataj huöja' lidxa' ga idxinxrö dza chibucácha'a-në' xuza'.

⁶⁰ Jesús gudxë' lë':

—Bë' lataj bönni' chizóa ilátië' ulu'cáchë'ë nupa chinati quégacaba', pero li', guyéaj, yójén libán ca inná bë'ë Dios.

⁶¹ Ní'irö bidxinë' ia'túë' ca', en rë' Jesús:

—Xan, rë'ënda' sá'lena' Li', pero benna neda' lataj tseja' tsöjzégacada'-në' didza' dí'a dza quia'.

⁶² Jesús gudxë' lë':

—Nútí'tës bönni' ruí'i ládxë'ë le raca yödzölió náquië' ca tu bönni' rugá'anë'-ba' bëdxí, en ruyüe' zaca' cùdzu'lë'. Nu run caní bití' naca lesaca' tsaza ga rinná bë'ë Dios.

10

Risöl-lë'ë Jesús tsónnalalaj yu' chië' bönni' tsöjéngaquië' libán

¹ Gudödi gulaca yugu' lë ni, guröë' Xanru' ia'tsónnalalaj yu' chië' bönni' usëda queë', ate' gusöl-lë'ë légaquië' chopa huéjagaquië' para ila'nörue' ca Lë', en tsöjáquië' yúgu'të yödzö, en yödzödo' gapa chizóa tödë' Lë'. ² Gudxë' légaquië':

—Le nácatë, dëda' dxin quia', le naca ca tu la' yëla zxön ga nu tsöjlapa', pero nabábasö huen dxin quia' nacuá'. Que lë ni na', guli'gáta'yu' lahuë' Dios, náquië' Xan la' yëla na', isöl-lë'ë yugu' huen dxin ga naca la' yëla queë'.

³ Guli'tséaj na'a. Buli'yútsöca', neda' risöl-la'a libí'ilí', nácali' ca yugu' bö'cu'

zxila' söjácaba' ládjagacaba' bö'cu' guí'a sínia'. ⁴ Biti' guá'ali' yöxa j dumí, en caléga buzudi yöta, en biti' guá'ali' ia'tú cō' xiráchuli', en biti' tseli' para güt'ilenli' böñachi didza' gapa naca la' nöza. ⁵ Gáti'tës yu'u ga tsú'uli', innali': "Le ribequi dxi ladxi' gaca quégaca böñachi nacuá' yu'u ni." ⁶ Channö zoa ni' nu bönni' si'ë yöl-la' ribequi dxi ladxi', ugá'analen le' le ribequi dxi ladxi' na' inábali', pero channö cabí zoa ni' nu bönni' caní, ugá'analen libí'ili' le ribequi dxi ladxi' na' inábali'. ⁷ Guli'gá'ana yu'u ga na' tsú'uli', en guli'guí'aj guli'gagu bi ilunnë' queëli', tu' udzöli' quégaca' bönni' huen dxin le gahuë'. Biti' tödili' yu'u yu'u. ⁸ Gáti'tës yödzö ga tsú'uli', ate' ilún libí'ili' bal, guli'gagu le ulu'cu'ë lolli'. ⁹ Buli'ún nupa te'e nacuá' yödzö na', en guli'guí'ë laguequi: "Chibidxín le rinná bë'ë Dios ga zóali'." ¹⁰ Gáti'tës yödzö ga tsú'uli', channö cabí ilún libí'ili' bal, guli'ruáj, tsöjsóali' la' nöza que yödzö na', en innali': ¹¹ "Béchtö que lädzali' le da' lë'e lábatu' ruquínnajtu', le rului'i nabága'li' xígua', pero ral-la' inözili' lë ni, chibidxín le rinná bë'ë Dios ga zóali'." ¹² Neda' rea' libí'ili', cate' idxín dza ichúguië' Dios quégaca böñachi, ila'guí'i ila'zaca'rö böñachi yödzö ni' ca ila'guí'i ila'zaca' böñachi yödzö Sodoma, nupa ni' busunítië' Dios.

Le gaca quégaca nupa biti' ulu'bí'i ládxí'gaca (Mt. 11:20-24)

¹³ Gunnë' ca' Jesús:

—Bica' bayechi' libí'ili', böñachi yödzö Corazín. Bica' bayechi' libí'ili', böñachi yödzö Betsaida. La'tu' gulaca lu yödzö Tiro, en lu yödzö Sidón yugu' yöl-la' huáca rubani ca yugu' le bena' ga zóali', dza ni'te ulu'bí'i ládxí'gaquië' bönni' ni', ate' ilácuë' lari' cá'asö, en ila'guí'ë dö icjagaquië', le ulu'igaca chibulu'bí'i ládxí'gaquië'. ¹⁴ Que lë ni na', cate' idxín dza ichúguië' Dios quégaca böñachi, qui'i sáca'röli' ca ila'guí'i ila'záquië' bönni' yödz Tiro, en yödz Sidón. ¹⁵ Libí'ili', böñachi Capernaum. Réquili' tsázali' yehua' yubá. Huötjali' tsöjtsázali' lataj chul-la quégaca nupa nátigaca.

¹⁶ Ní'irö Jesús gudxë' yugu' bönni' usëda queë', rnnnë':

—Nu ruzë nagui libí'ili', ruzë nagui ca' neda', ate' nu rucá'ana libí'ili' cá'asö, rucá'ana ca' neda' cá'asö, en nu rucá'ana neda' cá'asö, rucá'ana ca' cá'asö Xuza', nasö'l-lë'ë neda'.

Bönni' yöjéngäquië' libán tu'dxinë' ga zoë' Jesús

¹⁷ Cate' tsónnalalaj yu' chië' bönni' na' gusö'l-lë'ë Jesús bulu'dxinë' ga zoë' Lë', bönni' na' yöjéngäquië' libán, ta'nnë':

—Xan, tun bö' xihui' ca rnнатu' cate' ruguntu' dxin Lo'.

¹⁸ Jesús gudxë' légaquië':

—Neda' bilé'eda' Satanás tu' xihui', gubixi zxan lúzxiba ca run yösa, le riyaza luyú. ¹⁹ Buli'yútsöca', neda' nudöda'lu ná'ali' yöl-la' unná bë' para gaca söngacali'-ba' bëla sínia', en xöjnö', en biti' bi gaca queëli', ate' ucúl-lali' yöl-la' unná bë' que tu' xihui', nu biti' rile'e rë'u dxi'a. ²⁰ Na'a, buli'dzeja, calégasö tu' tun bö' xihui' ca rnñali', pero tu' nuzúajaca lali' lu guichi ni' yehua' yubá.

Rudzéjanë' Jesús (Mt. 11:25-27; 13:16-17)

²¹ La' ní'isö rüdzéjanë' Jesús, dzáguïë' Dios Bö' Lá'ayi Lë', rnnnë':

—Rigu'a Li' yöl-la' ba, Xuza', nacu' Xani yehua' yubá, en Xani luyú ni, tu' bucáchu' yugu' lë ni lógaquië' bönni' táquië' yenni', en bönni' ta'yéajni'inë', pero bulu'iguequinu'bí' bí'ido' ca naca. ¡Ca' gaca, Xuza', tu' caní guyaza ládxu'u!

22 Ní'irö gunnë':

—Yúgu'té budödë' Xuza' lu na'a. Cuntu nu bönni' nözinë' Nu náquië' Zxi'inë' Dios, pero tuzë' Dios Xuz nözinë', ate' cuntu nu nözi Nu náquië' Dios Xuz, pero tuzë' Zxi'inë' nözinë', ate' inözigaca ca' nupa na' Zxi'inë' rë'ënë' ului'inë' léguequi Xuzë'.

23 Ní'irö Jesús buyúë' yugu' bönni' usëda queë', en rë' légaquïë':

—Bica' bágaca nupa ta'lé'e le rilé'eli' libí'ili', **24** tu' rea' libí'ili': Zián bönni' gulu'ë didza' uláz queë' Dios, enca' bönni' gula'nná bë'ë, gulé'ënnë' ila'lé'enë' le rilé'eli', pero biti' bila'lé'enë' le. Gulé'ënnë' ila'yönnë' le riyónili', pero biti' bila'yönnë' le.

Tu bönni' Samaria, bönni' tsahui'

25 Ní'irö guyasë' tu bönni' yudo' usedi, en para si' bë'ë Jesús, gunábinë' Lë', rnnë':

—Bönni' Usedi, ¿bizxi ral-la' guna' para idéli'da' yöl-la' na'bán idú?

26 Jesús rë' lë':

—¿Bizxi caz nazúaj lu guichi lu xibá queë' Moisés? ¿Nacxi rusaca' quiu' lë na'rulabu'?

27 Bubi'ë didza' bönni' na', rnnë':

—Caní rnna: "Idxí' inu' Xanu' Dios idú ládxu'u, en len idú icja ládxido'o, en len idú yöl-la' run quiu', en len idú yöl-la' réajni'i quiu', ate' idxí' inu' bönni' luzó'o ca nadxi'i cuinu'."

28 Jesús rë' lë':

—Dxí'ado' bubi'u didza'. Ben caní, ate' gata' quiu' yöl-la' na'bán na'.

29 Tu' gü'unnë' bönni' na' ubéaj dxi'a cuinë', rë' Jesús:

—¿Nuzxi na' bönni' luzá'a?

30 Bubi'ë didza' Jesús, rë' lë':

—Buzë'ë tu bönni' Jerusalén, rudínnië', sa'yéajë' yödzö Jericó. La' nöza ni' gula'zönë' gubán lë'. Gula'gúe' lari' nácuë', en guluñé' lë' huë'. Ní'irö bulu'zé'ë ni', en nucá'anagaquïë' lë', chirati cazë'. **31** Ní'irö gudödë' tu bixúz la' nöza ni'. Cate' bilé'enë' bönni' huë' na', tsölä'alö gudödë'. **32** Gudödë' ca' ni' tu bönni' nababë' zxí'ini xi'soë' Leví, yugu' bönni' na' tunë' dxin que yudo'. Cate' bilé'enë' lë', tsölä'alö ca' gudödë'. **33** Lësca' yu'ë tu bönni' Samaria nöza na', ate' bidxinë' gala' ga dë' bönni' huë' na'. Cate' bilé'enë' lë', buéchi' ládxë'ë lë'. **34** Gubígu'ë ga na' dë', ate' gulu'ë le za, en xisi uva nál-la lu huë' queë', ate' buchölinë' le lari'. Ní'irö budxië' lë' cùdzu'ba' böa' queë', en bu'ë lë' yu'u ga ta'dxinë' bönni' yú'ugaquïë' nöza, ate' ni' gudapa chi'ë lë'. **35** Cate' za' reni' ia'tú dza, en chizóa uzé'ë bönni' Samaria na', guléajë' lázxjaru' que chopa dza, le bucá'anë' lu në'ë bönni' xan yu'u na', en rë' lë': "Gudapa chi'ë bönni' ni, en channö utöu' ia'lati' dumí, ubi'a neda' quiu' cate' huöda'." **36** Na'a, ¿nacxi runi li'? ¿Núzxilë' bönni' yonna ni gúquië' bönni' luzë'ë bönni' na' gulu'ë dö' bönni' gubán queë'?

37 Bubi'ë didza' bönni' yudo' usedi na', rë' Jesús:

—Bönni' na' buéchi' ládxë'ë lë'.

Ní'irö Jesús gudxë' lë':

—Guyéaj na'a, yöjén ca' li'.

Le benë' Jesús lídxigacanu Marta, en María

38 Ní'irö bu'ë nöza Jesús, ate' bidxinë' tu yödzödo' ga ni' tu nigula lënu Marta guchë'ënu Lë' lídxinu. **39** Marta ni zóanu nigula zxílanu lënu María, ate' María

na' gurö'ötenu ga naca xini'ë Jesús, en ruzë náganu xtídzë'ë. **40** Marta na' bubi bugui'inu, zián dxin runnu, ate' gubiga'nu ga na' zoë' Jesús, en rënu Lë':

—Xan, ¿naru' cabí ruí'ládxí'tso' neda'tu' nucá'anabi' bi'i zxila' ni neda', ate' tuza' runa' dxin? Gudxi-bi' gácalenbi' neda'.

41 Bubi'ë didza' Jesús, rë'ë-nu:

—Marta, Marta, ruúbi rugui'ide'enu', en zián le ruí'ládxu'u runu'. **42** Tuz le run bayudxi nu gun, ate' María ni guröbi' lë na' nácatérö dxi'a, ate' lë na' guröbi' biti' udúa queëbi'.

11

Caral-la' ulídzaru'-në' Dios

(Mt. 6:9-15; 7:7-11)

1 Tu dza ni' Jesús rulidzë' Dios. Cate' budxi bë'lenë' Dios didza', tuë' bönni' usëda queë' rë' Lë', rnñé:

—Xan, busedi netu' ulídzatu'-në' Dios gü'ilentu'-në' didza', ca benë' Juan, busédinë' bönni' dá'gaquië' lë'.

2 Ní'irö Jesús rë' légaquië':

—Cate' ulídzali'-në' Dios gü'ilenli'-në' didza', guli'ná: Xuztu', zu' yehua' yubá, gá'ana zxön Lo'. Gudá inná bë'u.

Gaca ca raza ládxu'u Li' luyú ni, ca na' raca yehua' yubá.

3 Benna le gágutu' na'a dza.

4 Buniti lo netu' dul-la' nabága'tu' ca netu' ca' runiti lotu' nupa tua' dö' queëtu'. Biti' gu'u lataj si' bë' tu' xihui' netu', pero busölá netu' lu na' nu ruá' dö'.

5 Jesús rë' ca' légaquië':

—Channö zoë' nu bönni' ládjali', en zoë' böchi' luzë'ë, en channö huidë' ga na' zoë' guluhuëla, ate' ulidzë' lë, innë: "Böcha'a, benna quia' tsonna yöta xtila **6** tu' si' bidxinë' quia' böchi' luzá'a, zë'ë zi'tu', pero biti' bi dë le gu'a-në' gahuë'." **7** ¿Naru' ubi'ë didza' caní bönni' na' zoë' yu'u, guië' lë': "Biti' utsó'o neda' tu' chinayayaj yu'u, en chidé lengacabi' bi'i quia' neda', ate' biti' gaca chasa' bi gunna' quiu"?" **8** Neda' rea' libíili': Sal-la' biti' chase' bi unödziejë' queë' tu' náquië' böchi' luzë'ë, pero chasë', en unödziejë' queë' idutë le riquinnë' para cabirö upízjanë' lë'. **9** Que lë ni na' rea' libíili': Guli'naba, ate' Dios gunnë' queëli'. Guli'quilaj, ate' idzöli queëli'. Buli'lidza ra' yu'u, ate' tsalaj queëli'. **10** Nu rinaba, rizi' que, ate' nu rigulaj, ridzöli que, ate' nu rulidza ra' yu'u, ralaj que.

11 'Channö zoë' nu bönni' ládjali', en náquië' xuz, ate' channö zxí'inë' inábibi' lë' yöta xtila, ¿naru' unödzejatsë' queëbi' guiöj? Channö inábibi' lë' tuba' böla, ¿naru' unödzejatsë' queëbi' bëla? **12** Channö inábibi' lë' dxita que böra, ¿naru' unödzejatsë' queëbi' xöjnö? **13** Caní naca, nácali' libíili' huiá' dö', pero nözili' unödzejali' quégacabi' zxí'inil' le naca dxi'a. Nácatérö löza Xúzili' zoë' yehua' yubá gunnë' queëli' Dios Bö' Lá'ayi, nülöli' inábili' Lë'.

Ta'nnë' runë' dxin Jesús len yöl-la' huáca que tu' xihui'

(Mt. 12:22-30; Mr. 3:19-27)

14 Tu dza bubéaje' Jesús bö' xihui' yu'u tu bönni', le run ga biti' raca innë'. Cate' burúaj bö' xihui' na', bë'ë didza' bönni' na' biti' guca innë', ate' bulu'bani böñachi nacuá' ni'. **15** Bal-la böñachi nacuá' ni' ta'nná:

—Len yöl-la' huáca que tu' xihui' Beelzebú, xángaca bö' xihui', rubéajë' yugu' bö' xihui' na'.

¹⁶ Ia'bal-la böñachi na' gulë'ëni ila'zí' bë' Jesús, ate' gula'nabi Lë' gunë' tu le gaca bë' le za' yehua' yubá. ¹⁷ Réquibe'enë' Jesús le ta'zá' ládx'i'gaquië', ate' rë' légaquië':

—Gáti'tés ga ta'nná be'e böñachi luzë'eguequi, channö ila'rúaj choplö la' léguequisö böñachi na', ila'nti. Channö ila'rúaj choplö böñachi nacuá' tu yu'u, údxi quéguequi. ¹⁸ Lësca' caní raca que Satanás, tu' xihui', nazf'i le ca' Beelzebú. Channö ila'rúaj choplö nupa dá'gaca le, ¿nacxi gaca idía' yöl-la' unná bë' que? ¿Rnnátsali' na'a: Len yöl-la' huáca que Beelzebú rubéaja' yugu' bö' xihui'? ¹⁹ Channö neda', len yöl-la' huáca que Beelzebú rubéaja' yugu' bö' xihui', ¿nuzxi runna quégaca nupa dá'gaca libi'il' yöl-la' huáca tu'béaj yugu' bö' xihui'? Que lë ni na', le tun nupa ni naca bë' nachíxili'. ²⁰ Channö neda', len yöl-la' huáca queeë' Dios rubéajgaca' bö' xihui', le nácatë chibidxín le rinná bë'ë Dios ga zóali'.

²¹ 'Cate' tu bönni' nál-la dë lu në'ë le rudí'inë', en rapa chi'ë lidxë', naca chi'i dërö le dë queeë'. ²² Na'a, channö zë'ë ia'túë bönni' nál-latérë' ca lë', en ucul-lë' lë, ní'irö cuë' yúgu'të le rudí'inë', lë na' ruzzxoni ládxë'ë, ate' quísië' le dë queeë' bönni' na'.

²³ 'Nu biti' rácalen neda', ridá'baga' neda'. Nu biti' rutúbilen neda', rusilasi nu na'.

Ca naca que bö' xihui' rudxín xilataj

(Mt. 12:43-45)

²⁴ Gunnë' ca' Jesús:

—Cate' rirúaj bö' xihui' lu bönni', ridá gapa nabídx, riguilaj ga uzi' ladxi'. Channö cabí idzöli que, inná: "Huöja' xilatja' ga ni' birúaja." ²⁵ Cate' rudxín ni', röjxaca'bönni'na', náquië' ca tu yu'u chinulúa, en chinabá'a para nu tsöjsóa ni'. ²⁶ Ní'irö reaj, en röjxí' ia'gadxi bö' xihui', nácagacatëro xihui' ca le, ate' ta'yú'u bönni' na'. Na'a, le raca queeë' bönni' na' nayáli'térö ca le guca queeë' zí'alö.

Le naca bica' ba le naca idú

²⁷ Tsanni ni' ru'ë Jesús didza' ni, tu nigula nútsa'nu ladaj böñachi zián na' bë'ënu zidzaj didza', rnnanu:

—Bica' ba nigula na' biá'anu Li' lë'ënu, en bica' ba ca' luchú'unu ga na' güdxu'u.

²⁸ Bubi'ë didza' Jesús, gunnë':

—Nácagacatëro bica' ba nupa ta'yöni xtídzë'ë Dios, en tun ca rnna.

Ta'nábinë' Jesús gunë' le gaca bë' nuzxi náquië'

(Mt. 12:38-42; Mr. 8:12)

²⁹ Tsanni ni' ta'biga' böñachi zián ga zoë' Jesús, gusílahuë' ru'ë didza', rnneë':

—Ta'nába böñachi tuá' dö' ni guna' le gaca bë' ga za' yöl-la' huáca quia', pero biti' bi le gaca bë' ila'lé'enë'. Tuz le gaca bë' ca na' guca queeë' Jonás ila'lé'enë'. ³⁰ Ca na' guca queeë' Jonás, gúquië' tu le naca bë' lógaca böñachi yödöz Nínive, lësca' caní gaca quia' neda', Bönni' Guljë' Bönachi, gaca' tu le gaca bë' lógaca böñachi dza ni zóaru' na'a. ³¹ Cate' idxín dza ichúguië' Dios quégaca böñachi ila'gu'i ila'zaca', en uchi'a usöröë' böñachi dza ni zóaru' na'a, Dios uchisë'-nu nigula gunná bë'enu böñachi dza ni'te luyú ni' dë tsölá'a ga ridödi gubidza beo' ziaga, ate' le bennu ulu'i nabág'a gaca böñachi ni xíguia', tu' bídanan lënu, birúajnu ga naca zí'tu' para uduzé náganu didza' réajni' bë'ë

Salomón, bönni' gunná bé'enë' böñachi Israel, pero na'a, zoa' neda' ni, en nayépisétéra' ca Salomón na'. ³² Lësca' caní, Dios uchisë' bönni' gula'cu'ë yödzö Nínive cate' idixín dza ichugu bë'ë quégaca böñachi, en uchi'a usöröë' böñachi dza ni zóaru' na'a, ate' le gulunë' ului'i nabágac a böñachi ni xíguia', tu' bulu'bí'i ládx'i'gaquie' bönni' Nínive cate' bila'yönnë' libán benë' Jonás, ate' na'a zoa' neda' ni, en nayépisétéra' ca Jonás na'.

Le rigú'u bení' lu icja ládx'i'do'oru'

(Mt. 5:15; 6:22-23)

³³ Gunné' ca' Jesús:

—Cate' nu ruquela' guí', biti' rigú'u le ga nagachi', en biti' rudusi' le guí'ina, pero ruzúa le xitsá' ga liná', para uzení' quégaca nupa ta'yú'u yu'u na'. ³⁴ Guiój loru' naca ca tu le rigú'u bení' lu icja ládx'i'do'oru'. Channö guiój lo' naca dxi'a, idúteo' yudzu le naca bení', pero channö naca xihui' guiój lo', idúteo' yudzu le naca chul-la. ³⁵ Ben chi'i cuinu' na'a, para cabí huöáca chul-la lë na' rigú'u bení' lu icja ládx'i'do'o. ³⁶ Caní naca, channö idúteo' nalísinu' le naca bení', en biti' bi zóalen li' le chul-la, yúgu'të ilé'enu' dxi'a ca raca cate' ruzení' quiu' guí'.

Jesús ruzégu'ë yugu' bönni' yudo' didza'

(Mt. 23:1-36; Mr. 12:38-40; Lc. 20:45-47)

³⁷ Cate' budxi bë'ë didza' ni Jesús, tu bönni' yudo' fariseo bulidzë' Lë' para tsötjágulenë' lë'. Cate' guyázië' Jesús lidxë' bönni' yudo' na', gurö'ë rahuë'.

³⁸ Cate' bönni' yudo' fariseo na' bilé'enë' Lë', bubáninë' tu' cabí gudibi në'ë Jesús cate' si' gahuë'. ³⁹ Xanru' rë' lë':

—Libi'ilí, bönni' yudo' fariseo, riguibí cuinli' ca riguóbili' láhuilögaca le rë'aji ráhuili', pero lu icja ládx'i'do'oli' ruhuídili', en riza' ládx'i'lí le ruá' dö'.

⁴⁰ Libi'ilí, bönni' biti' réajni'ilí. ¿Naru' cabí nözili', Nu ben le zoa láhuisö ben ca' le yu'u lë'elö? ⁴¹ Na'a, guli'gún gun le dë queëli', ate' ní'irö huöáca dxi'a yúgu'të le dë queëli'.

⁴² 'Bica' bayechi' libi'ilí, bönni' yudo' fariseo. Riguízxjali' que yudo' tu cö' huéaj tu' chi cö' le rizi'ilí que xöhuéaj, en que guixi' ruda, en quégaca guixi' cuando', pero rudödisili' le naca tsahui', en yöl-la' nadxi'i queëli' Dios. Yugu' lë ni run bayudxi gurli', en biti' ucá'analí ia'zica' lë na' runli'.

⁴³ 'Bica' bayechi' libi'ilí, bönni' yudo' fariseo. Rë'ënilí cö'öli' gapa naca lo lu yu'u ga rudubili' rusédali' queë' Dios, en rë'ënilí ulu'lidza böñachi libi'ilí ba zxöön gapa naca láhuilöguequi böñachi.

⁴⁴ 'Bica' bayechi' libi'ilí, bönni' yudo' usedi, enca' libi'ilí, bönni' yudo' fariseo, bönni' rulu'isö tsahui' cuinli', tu' nácali' ca náccagaca yero ba quégaca nupa nátigaca le cabí nalá'gaca, ate' ta'dá böñachi láhuigaca yero ba na', en biti' téquibe'e.

⁴⁵ Ní'irö bubí'ë didza' tu bönni' yudo' usedi raquie' xibá queë' Moisés. Rë' Jesús:

—Bönni' Usedi, cate' rnno' caní, netu' ca' runu' zi'.

⁴⁶ Jesús rë' lë':

—Bica' bayechi' ca' libi'ilí, bönni' yudo' usedi rácali' xibá queë' Moisés, tu' rusubá'gacali' böñachi tu yua' zi'i le cabí gaca nu guá', pero libi'ilí caléga láti'do'os biti' ruláhuilí le len ná'ali'.

⁴⁷ 'Bica' bayechi' libi'ilí, tu' richísali' biquitaj quégaca ba ga nagáchigaquie' bönni' gulu'ë didza' uláz queë' Dios, ate' gulútië' xuz xtó'oli' légaquie'. ⁴⁸ Caní

naca, runli' ba nalí runli' tuz le guluné' xuz xtó'oli' tu' gulútié' xuz xtó'oli' na' légaquié', ate' libí'ili' richísali' biquitaj quégaca ba ga nagáchi'gaquié'.

⁴⁹ Que lë ni na', lu yöl-la' réajni'i queé', Dios gunnë' caní: "Isöл-la'a queéli' bönni' ilu'ë didza' uláz quia', en yugu' bönni' gubáz quia', ate' yugu' bönni' ni, bal-lë' gútili', en ia'bal-lë' cuia na'li' légaquié'." ⁵⁰ Caní guné' Dios tu' uchi'a usöröe' quégaca böñachi dza ni zóaru' na'a, ni'a que rön quégaca yúgu'té bönni' gulu'ë didza' uláz queé', bönni' ni' bétigaca böñachi légaquié' cate' gusí lo rata' yödzölió, ⁵¹ ga gusí lo nu bëti Abel, ga bidxité gulútié' Zacarías, bönni' na' gulútié' gatsaj láhu'lö ga dë bucugu lá'ayi ga na' tu'zégui'gaquié'-ba' bö'a' bëdxido' lahuë' Dios, en ga dë lataj lá'ayi. Que lë ni na', rea' libí'ili', Dios uchúgué' quégaca böñachi dza ni zóaru' na'a, ni'a que rön quégaca yúgu'té bönni' na' gulútié' xuz xtó'oli' légaquié'.

⁵² 'Bica' bayechi' libí'ili', bönni' yudo' usedi, rácali' xibá queé' Moisés. La' libí'isili' dë lu ná'ali' zxí'ini guíé que lataj ga ta'dzöli böñachi yöl-la' réajni'i. Libí'ili' biti' riyázali', ate' ruzágali' xinözigaca nupa té'ëni ila'yaza.

⁵³ Cate' Jesús budxi bë'lené' légaquié' didza' ni, bönni' yudo' tu'sédiné', en yugu' bönni' yudo' fariseo gula'léde'ené' Lë', ate' gula'sí lógaquié' ta'naba yúxdide'ené' Lë' ca naca zián le taca, ⁵⁴ en tu'béajé' Lë' didza' para gaca ulu'zéguié' Lë' didza' ni'a que didza' ubi'ë.

12

Rusédiné' Jesús ca naca yöl-la' rulu'isö tsahui' cuini

¹ La' dza na' bulu'dubi zián gayuá' böñachi ga zoë' Jesús ga bidxité ta'rölisö luzé'eguequi böñachi na'. Ní'irö gusí lahuë' Jesús rë' yugu' bönni' usëda queé cazé', rnne'.

—Guli'gún chi'i cuinli' que le naca ca cúa zi que yöta xtila quégäquié' bönni' yudo' fariseo, le naca yöl-la' rulu'isö tsahui' cuini quégäquié'. ² Biti' bi dë le naca balándo'os le cabí ilá' lahu, en biti' bi dë le nagachi' le cabí gaca bë'. ³ Que lë ni na', yúgu'té le chigunnáli' ga naca chul-la, ila'yöni böñachi ga naca lu bení', ate' didza' bë'eli' bagáchi'sö ga guzóa lu yu'u nayabaj, gaca libán que ga naca lógaca böñachi.

Nu ral-la' gádxiru' (Mt. 10:28-31)

⁴ Gunnë' ca' Jesús:

—Böcha'ado', rea' libí'ili': Biti' gádxili' bönni' tútigaquié' böñachi, ate' tödi na' biti'rö bi gaca iluné' quéguequi. ⁵ Ulu'ida' libí'ili' nu ral-la' gádxili'. Guli'gadxi Nu na' gaca ugúa yöl-la' na'bán queéli', en tödi na' dë lu në'ë yöl-la' unná bë' chú'uné' libí'ili' lu gu' gabila. Ön, rea' libí'ili', guli'gadxi Nu na'.

⁶ Túti'gaquié'-ba' gáyu'ba' biguínido' len chopá dumí lárido'. Biti' ral-la ládxë'ë-ba' Dios tu biguínido' na'. ⁷ Lëscá' caní, yúgu'té guitsa' ícjalí' nabábagaca lahuë' Dios. Que lë ni na', biti' gádxili'. Nazáca'téröli' libí'ili' ca zianba' biguínido'.

Nupa ta'nnasö néquiguequi queé' Jesús (Mt. 10:32-33; 12:32; 10:19-20)

⁸ Gunnë' ca' Jesús:

—Rea' libí'ili': Yúgu'té bönni' ta'nné' néquiguequiné' quia' neda' lógaca böñachi, lëscá' neda', Bönni' Gulje' Bönachi, innía' néquiguequiné' quia' lógaquié' gubáz lá'ayi queé' Dios, ⁹ ate' bönni' ta'dá'baguë'ë néquiguequiné' quia' lóga-

bönachi, lësca' neda' tá'baga'a néquiguequiné' quia' lógaquié' gubáz lá'ayi queé' Dios.

¹⁰ 'Yúgu'té nupa bi ila'nné quia' neda', Bönni' Guljé' Bönachi, gaca uniti lahué' Dios léguequi, pero nu inné zi' queé' Dios Bö' Lá'ayi, biti' uniti lahué' Dios nu na'.

¹¹ 'Cate' ila'ché' libí'ili' gapa naca lu yu'u ga tu'dubé' bönni' judío, en tu'séde' queé' Dios, en lógaquié' bönni' ulu'chi'a ulu'sörö' libí'ili', en lógaquié' bönni' dë lu ná'agaquié', biti' ubi uguí'ili' nacxi gunlí' o bizxi didza' ubí'ili', o bizxi innali'. ¹² La' dza ná'asö usédiné' Dios Bö' Lá'ayi libí'ili' le ral-la' innali'.

Huáca gun yöl-la' tsahui' queéru' ga gal-la ládxí'ru'-në' Dios

¹³ Tu bönni' nútse'ë ladaj bönnachi zián na' rë' Jesús, rnné':

—Bönni' Usedi, gudxé' böcha'a gunné' uláz quia' le guta' queé' xuztu'.

¹⁴ Jesús rë' lë':

—Bönni'. ¿Naru' zoa nu buzóa neda' ca nu uchi'a usörö libí'ili', o nu gun gatsaj le dë queéli'?

¹⁵ Ní'irö Jesús gudxé' bönnachi nacuá' ni', rnné':

—Bull'yútsöca'. Guli'gún chi'i cuinli' para cabí uhuídi'li'. Le uzi'ë xibé nu bönni' biti' nácaso le zián le dë queé'.

¹⁶ Ní'irö Jesús bë'lené' lógaquié' didza', bucúdzu'ë didza', rnné':

—Zoé' tu bönni' rilé'ené' yöl-la' tsahui' queé', ate' runödzjada' gulapa lu xiyúé'. ¹⁷ Ní'irö guzá' ládxé'ë bönni' na', rnné': "¿Nacxi guntsa'? Biti' dë ga gapa chi'a le rulá' quia'." ¹⁸ Ní'irö rnné': "Caní guna'. Uquínnajgaca' yu'u ga rapa chi'a le rulá' quia', ate' guna' yugu' yu'u zxöntérö ca', ate' gapa chi'a le rulá' quia' ni', len yugu' le dë quia'". ¹⁹ Ní'irö gaca guí'e cuina': Chidéda' quia' zián le chinutuba', le gáhuida' zián iz. Uzi' ládx'a'a. Guí'aj gahua', en udzéjada'."

²⁰ Ní'irö Dios rë' lë': "Li', bönni' biti' bi nöziñé'. Na'a dzö' gátiu'. Na'a, ¿nuzxi caz queequi que, lë na' chinutubu'?" ²¹ Caní raca queé' bönni' rutubé' la' queézé' yöl-la' tsahui', en biti' runé' le naca ca yöl-la' tsahui' lahué' Dios.

Dios run chi'ë yugu' bönnachi queé'

(Mt. 6:25-34)

²² Gudödi ni' Jesús gudxé' yugu' bönni' usëda queé', rnné':

—Que lë ni na' rea' libí'ili': Biti' ubi uguí'ili' ni'a que le guí'aj gáguli', lë na' nabánili', o ni'a que lari' gáculi'. ²³ Nácarö lesaca' yöl-la' na'bán queéli' ca le ráculi', ate' nácarö lesaca' idú le nácali' ca lari' ráculi'. ²⁴ Buli'yutéz ca raca quégacaba' boíquiaj. Biti' tázaba', en biti' ta'lápaba', en biti' nacuá' quégacaba' ga ilún chí'iba' le rulá' quégacaba', pero Dios rugahue' lógaacaba'. ¿Naru' cabí nazáca' térlöi' libí'ili' ca yugu' biguínido'? ²⁵ ¿Nuzxi caz bönni' ládjali' gaca guné' ga soë' ibané' ia'tú chí'ido'os tu' ruúbi ruguí'i ládxí'da'ahué'? ²⁶ Que lë ni na', channö cabí gaca gunlí' lë ni naca cuídi'sö, ¿bizx que ruúbi ruguí'ili' ni'a que la naca zxöntérö?

²⁷ Buli'yutéz ca ta'zxón yöjdo'. Biti' tun du lari', en biti' taba lari', pero rea' libí'ili', biti' gúcarö lachi le gúcué' Salomón ca nácagaca yöjdo' ni, sal-la' gúta'da' yöl-la' tsahui' queé'. ²⁸ Channö Dios runé' lachi yöj guíxi'do' rö'gaca na'a la' guixi', ate' cuxö' huidzaj ila'gu'ë léguequi lu guí', ¿naru' cabí guné' le nácarö dxi'a queéli', libí'ili' na' biti' réajlé'ëli' Dios idú ládxí'li'? ²⁹ Que lë ni na', biti' gúi'i ládxí'li' le ral-la' gáguli', en le ral-la' guí'jali', en biti' ubi uguí'i ládxí'do'oli'. ³⁰ Yúgu'té lë ni ta'guilaj bönnachi yödzölió ni, pero chinöz quéziné' Xúzili' Dios

le riquínili'. ³¹ Guli'güí ládxí'li' tsú'uli' ga rinná bë'ë Dios, ate' yúgu'të lë ni cu'ë xinöza queéli'.

*Yöl-la' tsahui' rigú'uru'yehua'yubá
(Mt. 6:19-21)*

³² Gunné' ca' Jesús:

—Biti' gádxíli', libí'ili' na' nácali' bö'cu' zxíla'do' quia'. Nabábasili' zóali', pero raza ládxë'ë Xúzili' Dios gunnë' queéli' lataj tsú'uli' ga ni' rinná bë'ë Lë'.

³³ Guli'guti' le dë queéli', en buli'nödzaj quégaca bönachi yechí'. Caní gaca, gunli' queéli' yökaj dumí le cabí gaca ditaj, en cú'uli' yöl-la' tsahui' na' yehua'yubá le biti' ubidxi udú, ga ni' biti' idxiné' bönni' gubán, en biti' usunítiba' bö'a'do' le. ³⁴ Ga ni' dë yöl-la' tsahui' queéli', ni' güí'i ládxí'li' idxinli'.

Ral-la' sóaru' ban ladxi'

³⁵ Gunné' ca' Jesús:

—Guli'soa sina', en guli'quela' guí' le uzení' queéli'. ³⁶ Guli'gaca ca bönni' huen dxin ta'bözë' dza huödë' xángaquië', bönni' sa'yéajë' laní que yöl-la' rutsaga na', para cate' udxiné', en ulidzë', la' ila'sáljatë' queë' tsu'ë. ³⁷ Bica' bágaca huen dxin na' ila'cu'ë ban ladxi' cate' huödë' xángaquië'. Le nácatë rea' libí'ili', upá'a cuiné' xángaquië' na', ate' gunë' ga ila'bö'ë ga ilahuë', ate' cu'ë le ilahuë'. ³⁸ Sal-la' huödë' cate' chiral-la o idú guluhuëla, channö idixáquië' légaquië' nacu'ë ban ladxi', bica' bágaca huen dxin na'. ³⁹ Lë ni ral-la' inözili'. La'tu' nöziné' xan yu'u bizxi dza huadxiné' bönni' gubán, usubán ládxë'ë, en biti' gu'ë lataj bönni' na' udxiné' yero lidxë', para cabí cuané' le dzö'ö lidxë'. ⁴⁰ Que lë ni na', guli'soa ban ladxi' ca' libí'ili', tu' huöda' neda', Bönni' Guljë' Bönachi, tu dza biti' ribözali' neda'.

*Bönni' huen dxin tsahui', en bönni' huen dxin biti' náquië' tsahui'
(Mt. 24:45-51)*

⁴¹ Ní'irö Pedro gunábinë' Jesús, rnnë':

—Xan, ¿naru' reo' nétu'sö lë ni rucúdz'u didza', o reo' ca' caní yúgu'të bönnachi?

⁴² Rë' Xanru' lë:

—¿Nuzxi na' bönni' huen dxin tsahui', en réajni'inë', dë lu në'ë uláz queë' xanë? Bönni' ni, xanë' udödë' lu në'ë lidxë' para cate' gála'rö ilahuë' bönni' nacu'ë lidxë', gu'ë que queégaquië' le ilahuë'. ⁴³ Bica' ba bönni' huen dxin na' cate' huödë' xanë', idixáquië' lë' runë' caní dxin na' nudödë' lu në'ë. ⁴⁴ Le nácatë rea' libí'ili', udödë' xanë' lu në'ë bönni' huen dxin tsahui' na' idutë le dë queë'. ⁴⁵ Channö guéquinë' bönni' huen dxin na' huadzenë' huödë' xanë', ate' isí lahuë' gu'ë dö' quégagaquië' ia'zíca'rë' huen dxin, bönni' en nigula, en isí lahuë' gu'aj gahuë', en súdxinë', ⁴⁶ ní'irö huödë' xanë' bönni' huen dxin na' cate' biti' ribözë' lë', en cate' biti' réquibe'enë', ate' usaca' zi'ë bönni' huen dxin biti' náquië' tsahui' na', en ichúguië' queë' qui'i sáquië' ca narugu quégagaquië' bönni' biti' ta'yéajlë'ë.

⁴⁷ 'Bönni' huen dxin na' nöziné' le rë'ënë' xanë', en biti' zoë' sina', en biti' runë' ca rnnë' xanë', bönni' ni, quínterë' xanë' lë'. ⁴⁸ Channö cabí nözinë' tu bönni' huen dxin le rë'ënë' xanë', en gunë' le gun ga ibágue'ë le quinë' xanë' lë', bönni' ni quinë' lë' láti'do'os. Tu bönni' yu'u lu në'ë yenni', yenni' unabë' xanë' lu në'ë, ate' bönni' na' xanë' nuzxöni ládxë'ë lë' le zxön, le zxöntérö ca' unabë' xanë' lu në'ë bönni' huen dxin na'.

*Le náquié' Jesús gun ga ila'rúaj choplö böñachi
(Mt. 10:34-36)*

⁴⁹ Gunné' ca' Jesús:

—Bida' nedá' dujéna' ga tsegui guí yödzölió ni, en caba ládx'a chinaguéla' guí' na'. ⁵⁰ Na'a, dë tu le ral-la' qui'i saca' a le naca ca tu le idílida' nisa, ate' rö'a böñiga ga idxinté gaca caní quia'. ⁵¹ ¿Naru' réquili' bida' dulequi dxia' le raca yödzölió ni? Rea' libí'ili': ¡Caléga! Bida' duléquia' le gun ga ila'rúaj choplö böñachi. ⁵² Na'a isí lo ulu'lá'alen luzé'eguequi gayu' böñachi nacuá' tu yu'u. Tsonné' ila'dá'baguë' e'chopé' nazí'igaquié' xtídz'a, ate' chopé' na' ila'dá'baguë' e' tsonné' na'. ⁵³ Nu bönni' zóabi' bi'i bönni' queé' tá'baguë' e' zxí'iné' na', ate' bi'i bönni' na' tá'baga'bi' xúzibi'. Nigula zóabi' bi'i nigula queénu tá'baga'nu zxí'ininu na', ate' bi'i nigula na' tá'baga'bi' xiná'abi'. Nigula zóanu nigula zxoa' lídxinu tá'baga'nu zxoa' lídxinu na', ate' nigula zxoa' lídxinu na' tá'baga'nu xto' zxí'ininu.

Le nácagaca bë' le taca na'a dza

(Mt. 16:1-4; Mr. 8:11-13)

⁵⁴ Jesús gudxé' ca' böñachi zián nacuá' ni', rnné' :

—Cate' rilé'eli' za' böaj saca' ga ribía gubidza, la' rnnáteli': "Hualaj guiój", ate' caní raca. ⁵⁵ Cate' recja bö' za' saca' ga ridödi gubidza beo' ziaga, rnalii': "Udzá'a na'a", ate' caní raca. ⁵⁶ Libí'ili', bönni' rulu'isó tsahui' cuinli'. Nözili' le rulu'i le raca lúzxiba, en le raca luyú ni, pero biti' réquibe'eli' le rulu'i le nácagaca bë' taca dza ni zóaru' na'a.

Ral-la' ugá'analenru' tsahui' nu rilé reë' u

(Mt. 5:25-26)

⁵⁷ Gunné' ca' Jesús:

—¿Bizx que biti' ruchi'a rusöröli' la' libí'isili' ca naca le naca tsahui'? ⁵⁸ Channö zoa nu bi unabi yudxi li', ate' zéajli' idxinli' yúlahui', bë' ladxi' ugá'analenru' tsahui' nu na' tsanni ni' yú'uli' nöza, para cabí uzegui li' lahuë' bönni' uchi'a usöröe' libí'ili', ate' bönni' uchi'a usöröe' na' udödë' li' lu në'ë bönni' rusayjé' lidxi guíe, ate' bönni' na' rusayjé' lidxi guíe cu'ë li' lidxi guíe na'. ⁵⁹ Rea' li', biti' uruju' ni' cate' údxirö quizxju' yúgu'të dumí lárido' ral-lu'u que nu na'.

13

Run bayudxi ubí'i ládxí'ru'

¹ La' dza ní'isö bila'dxiné' bönni' ta'guíjöi'iné' Jesús ca benë' Pilato, bëtië' bal-lë' bönni' Galilea, en guzxi'ë rön quégaquië', le bugútsi'në' xichöngacaba' böa' bëdxi chigulútië' légacaba' para ila'gu'ë xichöngacaba' na' lahuë' Dios.

² Bubi'ë didza' Jesús, rë' légaquië':

—¿Naru' réquili' gulácarë' bönni' dul-la' bönni' Galilea na' ca ia'zíca'rë' bönni' Galilea, tu' gula'guí'i gula'zaquië' caní? ³ Rea' libí'ili': ¡Caléga! Channö cabí ubí'i ládxí'li', nítili' ca' yúgu'tëli'. ⁴ Lësca' caní guca quégäquië' chizxuné' bönni' ni', yöjbaga' yu'u sibi na' nazf'i le Siloé légaquië', ate' gulátië'. ¿Naru' réquili' gula'bága'tëre' légaquië' xíguia' ca ia'zíca'rö böñachi nacuá' Jerusalén? ⁵ Rea' libí'ili': ¡Caléga! Channö cabí ubí'i ládxí'li', nítili' ca' yúgu'tëli'.

Rucúdu'ë didza' Jesús que yaga higo biti' bi ribía

⁶ Ni'irö bucúdu'ë didza' Jesús, rë' légaquië':

—Zoë' tu bönni', zoa tu yaga higo nazë' ga naca lu xiyúë'. Röjtijë' le ribía yaga na', pero biti' bi ridzölinë'. ⁷ Ní'irö gudxë' bönni' runë' dxin lu xiyúë' na', rnnë': "Chiguca tsonna iz rida' rududilja' le cuía yaga higo ni, en biti' bi ridzöliða'. Guchugu le. ¿Bisz que run nigui luyú ni?" ⁸ Ní'irö bubi'ë didza' bönni' huen dxin na', re' le': "Xan, bucá'anagarö le ia'tú ízatëz, ate' uzatsa' yu zxani, en cu'a bëbu zxani. ⁹ Channö cuía yaga ni, gaca dxi'a, pero channö cabí bi cuía, ní'irö ichugu' le."

Ruúnë' Jesús tu nigula ré'enu cate' naca dza lá'ayi

¹⁰ Tu dza rusédinë' Jesús bönnachi nacuá' lu yu'u ga tu'dubë' bönni' judío, en tu'sëdë' queë' Dios cate' naca dza lá'ayi quégaquï'. ¹¹ Zóanu tu nigula ni' chiguca chizzunu' iz ré'enu, tu' yu'u lënu bö' xihui' run ga te'e bönnachi, ate' nayéchutica'sinu ridanu, en biti' ca' raca ulí cuinnu. ¹² Cate' bilé'enë'-nu Jesús, bulidzë'-nu, rnnë':

—Nigúlado', chiböácu' que yödzöhuë' qui'.

¹³ Ní'irö Jesús guxóa né'ë lënu, ate' la' bulitë cuinnu, en gulú'unu-në' Dios yöl-la'ba. ¹⁴ Ní'irö gulénë' bönni' lo que yu'u ga na' tu'dubë' tu'sëdë' queë' Dios. Rilenë' tu' bunë' Jesús nigula na' cate' naca dza lá'ayi. Bönni' lo na' gudxë' nupa nacuá' ni', rnnë':

—Xopa dza nacuá' cate' runru' dxin. Dë lataj yugu' dza ni guídali' para nu un libi'ili', en caléga dza lá'ayi.

¹⁵ Ní'irö bubi'ë didza' Xanru', rnnë':

—Libi'ili', bönni' rului'isö tsahui' cuinli', ¿naru' cabí rusédxigacali'-ba' böa' bëdxi que queëli' ga na' dá'gacaba' cate' naca dza lá'ayi, ate' tsöjuá'agacali'-ba' para ilé'ajba' nisa? ¹⁶ Nácanu nigula ni zxí'ini xi'soë' Abraham, ate' idú chizzunu' iz chiyú'unu lu yalaj que Satanás tu' xihui'. ¿Naru' cabí ral-la' nu usedxi lënu sal-la' naca dza lá'ayi?

¹⁷ Cate' bë'ë didza' ni Jesús, bulu'tu' inë' yúgu'të bönni' nacu'ë ni' ta'lenë' Lë', pero bulu'dzeja ia'zíca'rö bönnachi, yúgu'të nupa nacuá' ni', tu' ta'lé'enë' yugu' le zxön runë' Jesús.

Rucúdu'ë didza' Jesús que xisedo' mostaza (Mt. 13:31-32; Mr. 4:30-32)

¹⁸ Ní'irö rnñë' Jesús:

—¿Nacxi caz raca rizzön le rinná bë'ë Dios, o bizxi uséqui'tseru' le? ¹⁹ Raca ca raca que xisedo' mostaza, le guzxi'ë tu bönni', ate' guzë' le ga naca lu xiyúë'. Guzxön yaga mostaza na', en guca ca tu yaga zxön, ate' bila'dxinba' biguínido', gulunba' xcá'agacaba' lu ni'a në'e yaga mostaza na'.

Rucúdu'ë didza' Jesús que cúa zi que yöta xtila (Mt. 13:33)

²⁰ Lësca' caní rnñë' Jesús:

—¿Bizxi caz uséqui'tsedá' le rinná bë'ë Dios? ²¹ Naca ca cúa zi que yöta xtila, le guzxi'inu tu nigula, en bugútsi'nu tsonna cō' cúa yöta xtila, ate' guyazxaj idütë cúa na'.

Tu ga tödiru' le naca guido' (Mt. 7:13-14, 21-23)

²² Tsanni ni' yu'ë noza Jesús, sa'yéajë' Jerusalén, ridödë' yugu' yödzö zxön, en yugu' yödzöödo', ate' rusédinë' bönnachi nacuá' gapa na'. ²³ Tu bönni' zoë' ni' gunábinë' Jesús, rnnë':

—Xan, ¿naru' nabábasö nupa ulu'lágaca?

Jesús rë' nupa nacuá' ni', rnnë':

²⁴—Guli'gü'i ládzi'li' tsú'uli' saca' ga nu ridödi le naca guido', tu' rea' libí'ili': Zián nupa ilé'eni ila'yaza ni', pero biti' ila'zéqui'në'. ²⁵ Tödi chasë' Xan yu'u, en usayjë' yu'u, isí lolí' libí'ili' na' zóali' ní'lö ulídzali'-në' ra' yu'u na', ate' guiélli'-në': "Xan, Xan, gusalaj queétu'." Ní'irö ubi'ë didza' Lë', en guié' libí'ili': "Biti' nözda' nuzxi libí'ili'." ²⁶ Ní'irö isí lolí' innali': "Gü'i gudágulento' Li', ate' busédinu' gapa naca lu yé'ëyi queétu'." ²⁷ Ní'irö guié' libí'ili': "Rea' libí'ili', biti' nözda' gazxi böñachi libí'ili'. Guli'cuítä ga zoa', yúgu'teli' ruá'ali' dö." ²⁸ Ní'irö cödxi yéchí'li', en gagu zxea láya'li' cate' ilé'egacali'-në' Abraham, en Isaac, en Jacob, en yúgu'te bönni' gulu'ë didza' uláz queé' Dios, nacu'ë ga ni' rinná bë'ë Dios, pero libí'ili' sóali' ní'lö. ²⁹ Ila'dxín böñachi ila'rúaj saca' ga rilén gubidza, en saca' ga ribía gubidza, en saca' ga za' bö' ziaga, en saca' ga ridödi gubidza beo' ziaga, ate' ila'bö'ë ilahuë' ga ni' rinná bë'ë Dios. ³⁰ Ní'irö ilaca lo bal-la böñachi nácagaca cá'asö na'a, ate' ulu'ga'ana cá'asö bal-la nupa nácagaca lo na'a.

Ribödxi yechë'ë Jesús ni'a quégaca böñachi Jerusalén

(Mt. 23:37-39)

³¹ La' dza ní'isö bila'dxiné' bal-la bönni' yudo' fariseo ga zoë' Jesús en të' Lë': —¡Burúaj! ¡Buxzunnaj ni! ¡Rë'ënë' Herodes gútië' Li'!

³² Jesús rë' légaquië':

—Guli'tséaj, guli'tsöjödxë' bönni' na' náquië' ca tuba' böza', innali': "Buyútsöca', rubéajgaca' bö' xihui', en ruúna' böñachi na'a, en cuoxö, en cate' gaca lidzaj, údxí guna' dxin quia'." ³³ Run bayudxi tséajlensa' ca' nöza na'a, en cuoxö, en huidzaj, ate' idxina' Jerusalén, tu' tútigaquië' bönni' tu'ë didza' uláz queé' Dios ni'.

³⁴ 'Libí'ili', zóali' Jerusalén. Rútigacali'-në' bönni' tu'ë didza' uláz queé' Dios, en ruládzi'gacali'-në' guiöj bönni' gubáz risöl-lë'ë Dios ga zóali'. Cate' xö zián luzuí gú'unida' utuba'libí'ili' quia' ca runba' yöjede, rutubiba' börado' queéba' zxan xíliba', pero biti' gú'unilli'. ³⁵ Buli'yútsöca', cá'asö ugá'ana lídxili', ate' rea' libí'ili', bítirö ilé'eli' neda' cate' idxinxrö dza innali': "Bica' ba Nu na' za' uláz queé' Xanru'."

14

Ruúnë' Jesús tu bönni' ré'enë' huë' gui

¹ Cate' naca dza lá'ayi quégaciue' bönni' judío, guyu'ë Jesús lidxe' tu bönni' unná bë', bönni' yudo' fariseo. Rö'ë Jesús rahuë', ate' nacu'ë bönni' yudo' fariseo ni' ta'në'ë Lë'. ² Zoë' ca' tu bönni' ré'enë' huë' gui ga na' zoë' Jesús.

³ Ní'irö Jesús gunábinë' bönni' yudo' usedi táquië' xibá queé' Moisés, en yugu' bönni' yudo' fariseo, rnnë':

—¿Naru' dë lataj unru' nu re'e cate' naca dza lá'ayi?

⁴ Légaquië' bulu'sayaj ruá'agaciue'. Ní'irö Jesús gudélë'ë bönni' huë' na', en bunë' lë', ate' la' busöl-la'te' lë'. ⁵ Ní'irö Jesús rë' yugu' bönni' yudo' na', rnnë':

—Channö nu bönni' ládjali' nacuá'aba' queé' böa' bëdxi, ate' ibíxiba' tuba' lu yeru, ¿naru' cabí tsöjléjtë'-ba', sal-la' naca dza lá'ayi?

⁶ Biti' bi didza' guca ulu'bi'ë ca naca lë ni.

Nu cö' lataj lo

⁷ Cate' bilé'enë' Jesús ca tunë' bönni' yudo' fariseo na', ta'bö'ë lataj lo ga na' ta'bö'ë tahuë', ní'irö bucúduz'ë didza', ate' rë' légaquië':

⁸—Cate' nu bönni' ulidzë' li' guídu' ga raca laní que yöl-la' rutsaga na', biti' cõ'u lataj lo. Nadxi ca' nulidzë' ca' tu bönni' nácatëré' lo ca li'. ⁹ Ní'irö bönni' na' bulidzë' li' huidë' ga zu', en guïë' li': "Bé' lataj bönni' ni cõ'ë ga zu'", ate' ní'irö lu yöl-la' rutui'i quiu' tsöjchö' uxánitelö. ¹⁰ Que lë ni na', cate' nu bönni' ulidzë' li', guyéaj yöjchö' uxánitelö, para cate' idxinë' bönni' na' bulidzë' li', huë' li': "Böcha'a, gudödi ia'lati' nilö." Ní'irö gácaru' li' lo lógaca nupa ta'bö'len li' tsözxön. ¹¹ Nu run ba zxön cuini, ilunë' ga huöta' huöxaj, pero nu zoa nöxaj ladxi, ilunë' ga gácarö' lo nu na'.

¹² Jesús rë' ca' bönni' na' bulidzë' Lë', rnñë':

—Catí' gunu' tu gü'i huagu o tu lanido', biti' ulídzagacu'-në' yugu' böchi' luzó'o, en yugu' bönni' böchu'u, en yugu' dí'a dza quiu', en dzaga yu'u quiu' ta'lé'enë' yöl-la' tsahui' quégäquië', tu' ulu'lidzë' ca' li', ate' caní gaca, ubí'i quiu'. ¹³ Cate' gunu' tu gü'i huagu, bulidza yugu' bönnachi yechi', en nupa nabixi ni'a ná'agaca, en nupa biti' raca ságaca, en yugu' bönni' lo chul-la. ¹⁴ Ní'irö gacu' bica' ba, tu' cabí gaca bi ulu'bi'ë bönni' caní quiu', pero ubí'i quiu' cate' idxin dza ulu'bán nupa gulún le naca tsahui', en gulátigaca.

Rucúdzu'ë didza' Jesús que tu laní zxön

¹⁵ Cate' tu bönni' rö'ë rágulenë' Jesús biyönnë' didza' ni, rë' Lë':

—Bica' ba nu gagu ga ni' rinná bë'ë Dios.

¹⁶ Jesús rë' lë':

—Zoë' tu bönni' benë' laní zxön, ate' zián nupa bulidzë'. ¹⁷ Cate' chinabá'a la' huagu, gusöl-lë'ë bönni' huen dxin queë' tsöjödxë' nupa na' chinulidzë', gunnë': "¡Guli'dá! ¡Yúgu'te chinabá'al!" ¹⁸ Gula'sí lógaquië' yúgu'te' ta'nabë' lataj cabí tsöjáquië'. Bönni' zí'alö na' rnñë': "Si' guzxi'a tu luyú, en ronda' bayudxi tsöjyú'a le. Ráta'yua' lo' gunnu' neda' lataj." ¹⁹ Ia'tué' rnñë': "Si' guzxi'a gayu' nözaba' bëdxí, ate' tsöjzxí' bë'a légacaba' ugúngaca'-ba' dxin. Ráta'yua' lo' gunnu' neda' lataj." ²⁰ Ia'tué' rnñë': "Si' butsaga na'a, en que lë ni na' biti' gaca guída'." ²¹ Cate' böajé' bönni' huen dxin na', yöjtíxjö'i inë' xanë' yúgu'te' lë ni. Ní'irö gulénë' bönni' xan yu'u na', ate' gudxë' bönni' huen dxin na', rnñë': "Guyéajte' na'a gapa naca lu yë'ëyi, en gapa naca la' nöza que yödzö ni, ate' iché'u yugu' bönnachi yechi' ni, en nupa nabixi ni'a ná'agaca, en nupa biti' raca ságaca, en yugu' bönni' lo chul-la." ²² Cate' chinuné' bönni' huen dxin na' caní, rnñë': "Xan, chibena' ca na' gunná bë'enu' neda', ate' ni dë lataj." ²³ Ní'irö xanë' gudxë' bönni' huen dxin na', rnñë': "Guyéaj gapa naca la' nöza, en gapa naca nöza lasi, ate' ben bayudxi guídigaca nupa nacuá' ni' para ilí lidxa', ²⁴ tu' rea' libíili': Biti' gahuë' que laní quia' nitúë' bönni' ni' bulidza' zí'alö."

Le sáca'ru' cate' zéajlenru'-në' Cristo

²⁵ Yugu' dza ni' rójácalen Jesús bönnachi zián, ate' buécje' Jesús, en rë' légaquië':

²⁶—Channö guídalenë' neda' tu bönni', en biti' idxí'irónë' neda' ca nadxí'inë' xuz xinë'ë, en nigula queë', en yugu' zxí'inë', en yugu' bi'i böchë'ë, en yugu' bi'i zanë', en yöl-la' na'bán queë', biti' gaca gáquië' bönni' usëda quia'. ²⁷ Nu bönni' biti' gáquië' ca tu bönni' sa'yéajé' söjtë'ë lë'e yaga cruz, ate' të'ë neda', biti' gaca gáquië' bönni' usëda quia'. ²⁸ Channö zoë' nu bönni' ladaj libíili' gué'ënnë' gunë' tu yu'u zián cuúa, ¿narü' cabí cõ'ë zí'alö ulabé' gáca'xi dumí ral-la' utöë' para inözinë' channö dë queë' tsca le riquinnë' para údxi gunë' yu'u na'? ²⁹ Channö cabí gunë' caní, en isí lahuë' cuéquië' xilibi yu'u na', ate' biti' gaca údxi gunë' yu'u na', ní'irö ila'sí lógaca yúgu'te' nupa ila'lë'e le

ulu'titaj lé', ³⁰ ila'nná: "Bönni' ni gusí lahuë' runë' yu'u, pero biti' guca údxi gunë' le." ³¹ Lësca' caní, channö zoë' nu bönni' rinná bë'ë, en ral-la' tsejë' gudilla tsöjtíl-lalenë' ia'túë' bönni' rinná bë'ë, ¿naru' cabí cō'ë zí'alö, en cuéqui icjë' channö séqui'në' tsöjtíl-lalenë' bönni' ni' nachë'ë galaj milë' bönni', ate' lë' chi milsë' bönni' nachë'ë? ³² Channö cabí séqui'në', cate' ni' zoë' zi'tu' ia'túë' bönni' na' rinná bë'ë, isöl-lë'ë bönni' gubáz queë', ate' inábinë' lë' nacxi ral-la' gunë' para ulu'dzáguië' dxi'a. ³³ Caní naca, channö zoë' nu bönni' ladaj libíili' biti' ucá'anë' yúgu'të le dë queë', biti' gaca gáquie' bönni' usëda quia'.

Zödi' le naniti yöl-la' siná'a que

(Mt. 5:13; Mr. 9:50)

³⁴ Gunnë' ca' Jesús:

—Dxi'a naca zödi', pero channö initi yöl-la' siná'a que, ¿nacxi gaca úniru' le siná'a? ³⁵ Bítirö nazaca' zödi' na', calëga para luyú, en calëga para ga rirú'uniru' bëbu, pero chû'unaru' le ní'ilö. Nu zoa nagui, en riyöni, ral-la' uzë nagui nu na'.

15

Rucúdzu'ë didza' Jesús ca naca queëba' bö'cu' zxila' gunítiba'

(Mt. 18:10-14)

¹ Bulu'dubé' yúgu'të bönni' tu'quízxjë' lázagaca böñachi, en yugu' bönni' cá'asö ga zoë' Jesús para ulu'zë náguië' Lé'. ² Que lë ni na' yugu' bönni' yudo' fariseo, en yugu' bönni' yudo' usedi gula'nnë' queë' Jesús, ta'nnë':

—Bönni' ni runë' bal yugu' bönni' dul-la', en rágulenë' légaquie'.

³ Ní'irö bucúdzu'ë didza' Jesús, rë' légaquie':

⁴—Channö zoë' tu bönni' ladaj libíili', nacuá'aba' queë' tu gayuá'aba' bö'cu' zxila', en channö nítiba' tuba', ¿naru' cabí ucá'anë' ia'zíca'röba' tápalalaj yu' chénnaba' na' ga naca lu lataj cá'asö, ate' tsejë' tsöjdiljë'-ba' bö'cu' zxila' na' nanítiba', cate' udzölırönë'-ba'? ⁵ Cate' udzölinë'-ba', lu yöl-la' rudzeja queë' ixóë'-ba' ya' zxicjë', ⁶ en cate' udxinë' lidxe' utubë' yugu' böchí' luzë'ë, en yugu' dzaga yu'u queë', ate' guíë' légaquie': "Buli'dzéjalen neda', tu' chibudzölıda'-ba' bö'cu' zxila' quia' gunítiba'." ⁷ Rea' libíili': Lësca' caní gácatërò yöl-la' rudzeja yehua' yubá ni'a queë' tuë' bönni' dul-la' ubí'i ládxë'ë ca gaca quégaquie' tápalalaj yu' chénnë' bönni' tsahui', bönni' téquinë' biti' naquíniguequinë' ulu'bí'i ládx'i'gaquie'.

Rucúdzu'ë didza' Jesús que tu dumí guniti

⁸ Rnnë' ca' Jesús:

—Channö zóanu tu nigula, dë queënu chi dumí plata, en channö initi tu dumí plata na', ¿naru' cabí uquéla'nu gui', ate' ulúanu yu'u, uguilaj yúdxinu le cate' udzölırönü le? ⁹ Cate' udzölinu le, utúbinu yugu' nigula luzá'anu, en yugu' nigula dzaga yu'u queënu, ate' guíenu légaçanu: "Buli'dzéjalen neda', tu' chibudzölıda' dumí plata na' guniti." ¹⁰ Rea' libíili': Lësca' caní, ulu'dzéjade'erönë' gubáz lá'ayi queë' Dios ni'a queë' tuë' bönni' dul-la' ubí'i ládxë'ë.

Rucúdzu'ë didza' Jesús queëbi' tu bi'i gunítibi'

¹¹ Rnnë' ca' Jesús:

—Zoë' tu bönni' nacuá'abi' chópabi' bi'i bönni' queë'. ¹² Bi'i cuidì' na' rëbí'-në' xúzibí: "Dad, benna quia' le dë quiu' le ral-la' guequi quia'." Ní'irö xúzibí' na' gudisië' quégacabi' le dë queë'. ¹³ Nabábasö dza gudzé, bi'i cuidì' na' butúbibí'

yúgu'të, ate' guyéajbi' tu yödzö zí'tu', ate' ni' butöbi' dërö le dë queëbi'. Le ruá' dö' benbi'. ¹⁴ Cate' chibutöbi' dërö le dë queëbi', guca gubín lu yödzö ga na' zóabi', ate' biyadzaj queëbi'. ¹⁵ Ní'irö guyéajbi' yöjsóabi' huen dxin queë' tu bönni' lu yödzö ni', ate' bönni' na' gusöl-le'-bi' ga dë xiyüé' tsójgágubi'-ba' yugu' cuchi queë'. ¹⁶ Guca ladxí'bi' gágubi' guixi' cá asö na' táguba' cuchi, pero cuntu nu bi bë' le gágubi'. ¹⁷ Ní'irö bubí'i ladxí'bi', rñnabi': "Cate' xö bönni' huen dxin nacu'ë lidxé' xuza', en dëda' le tahuë', pero neda' ni huáti caza' yöl-la' ridún. ¹⁸ Uzá'a ni, huöja' ga zoë' xuza', en tsójödxä'-në': Dad, bena' dul-la' lahuë' Dios, zoë' yehua' yubá, en lo' li'. ¹⁹ Bíti'rö naca' neda' lesaca' gaca' zxí'nu'. Ben neda' ca bönni' huen dxin quiu'." ²⁰ Ní'irö guyú'ubi' nöza, söhüöajbi' ga zoë' xužibi'.

'Cate' ni' zóabi' zi'tu' suzá'abi', bilé'enë'-bi' xúzibi', en buéchi' ladxé'-ë-bi'. Carelö yöjzxí'galë'-bi' xúzibi', en yöjnidé' yenbi', gudahuë'-bi' zxixi. ²¹ Ní'irö zxí'inë' na' rëbi'-në': "Dad, bena' dul-la' lahuë' Dios, zoë' yehua' yubá, en lo' li'. Bíti'rö naca' neda' lesaca' gaca' zxí'nu'." ²² Ní'irö xúzibi' rë' yugu' bönni' huen dxin queë', rñnë': "Guli'tsöjléajtë lari' nazáca'tëro, en guli'gacu-bi'. Guli'cú'u le nazaca' xibön ná'abi', en buli'dá' huarache ní'abi'. ²³ Guli'tsöjzxí'i-ba' bëdxi renni', ate' guli'guti-ba'. Gáguru'-ba', en gunru'laní, ²⁴ tu' guca bi'i bönni' quia' ni ca tu bi'i chinatíbi', ate' bubanbi'. Gunítibi', ate' chibulá'abi' na'a." Ní'irö gula'sí lógaquië' tu'dzéjanë'.

²⁵ 'Tsanni' ni' raca lë ni, zóabi' bi'i bönni' zí'alö queë' bönni' na' la' guixi'. Cate' suzá'abi' rudxinbi' gala' ra' yu'u, riyónibi' raca huila, en raca huö'a lu yu'u na'. ²⁶ Ní'irö bulidzabi'-në' tuë' bönni' huen dxin zoë' ni', en gunábibi' lë' bizzi na' raca. ²⁷ Bönni' huen dxin na' rë'ë-bi': "Bi'i böchu'u na' budxinbi', ate' gunná bë'ë xuzu' gulútië'-ba' bëdxi renni', tu' budxinbi' lu në'ë dxi'a tsahui'do'." ²⁸ Ní'irö gulébi' bi'i zí'alö na', en biti' gú'unibi' tsú'ubi' yu'u. Ní'irö birúajë' xúzibi', en gúta'yuë' lobí' tsú'ubi'. ²⁹ Bubí'ibi' didza'bi'i zí'alö na', rëbi'-në' xúzibi': "Nöz quézinu' cate' xö iz bena' dxin lo', en catu caz gudá'baga'a li', pero catu caz bennu' quia' tuba' bô'cu' zxíla'do' para gúi'ilena' xibé yugu' luzá'a. ³⁰ Na'a, cate' budxinbi' bi'i quiu' ni busunitibi' yugu' le guta' quiu', gudálenbi'-nu yugu' nigula udá dzaga, benu' ga gulútië'-ba' bëdxi renni' ni'a queëbi'." ³¹ Ní'irö xúzibi' rë'ë-bi', rñnë': "Zxi'ina', lí' zóalen cazu' neda' ate' yúgu'të le dë quia', quiu' nequi. ³² Ben bayudxi gunru'laní, en udzéjaru', tu' gúcabí' bi'i böchu'u ni ca tu bi'i chinati cázabi', ate' nubanbi'. Gunítibi' ate' chibulá'abi'."

16

Rucúdu'ë didza' Jesús queë' bönni' huen dxin biti' náquië' tsahui'

¹ Jesús rë' ca' yugu' bönni' dá'gaquië' Lë', rñnë':

—Zoë' tu bönni' dë yöl-la' tsahui' queë', en zoë' ca' queë' tuë' bönni' huen dxin dë lu në'ë uláz queë'. Bila'dxinë' yugu' bönni' tu'zéguë' bönni' huen dxin na' lahuë' xanë', ta'nné' queë' rutösë' le dë queë' xanë' na'. ² Ní'irö xan yu'u na' bulidzë' bönni' huen dxin na', en rë' lë': "¿Bizzi didza' ni riyönda' quiu'? Buluú'i neda' le naca bë' dxin nunu', tu' cabirö gata'lu no'o uláz quia'." ³ Ní'irö guzá' ladxé'ë bönni' huen dxin na', rñnë': "¿Nacxi guntsa? Rubájë' xana' neda' lataj lo ga runa' dxin. Biti' séqu'ida' guna' dxin gú'una, en utu'ida' inaba' nu bi gúnnasö quia'. ⁴ Na'a nözdá' naca guna' para cate' ubéajë' neda' lataj lo ni, ila'cuá' nupa ulu'zí' neda' lidxigüequi. ⁵ Ní'irö bönni' huen dxin na' bulidzë' yugu' bönni' bi' tál-lë'ë queë' xanë', ate' rë' bönni' zí'alö: "¿Gáca'xi ral-lu'u queë'

xana?" ⁶ Lé' rnne': "Tu gayuá' rö' ö chugu le za ral-la'a." Bönni' huen dxin lo na' rë' lë', rnne': "Ni dë guichi ga nazúaj le ral-lu'u. Gurö' ötë ni, en buzúaj ia'tu lu guichi le inná chi-un rö' ö chugu ral-lu'u." ⁷ Gudödi ni' gunábinë' ia'tuë', rnne': "Nazxi li', ¿gáca' xi ral-lu'u?" Lé' rnne': "Tu gayuá' da'a zxoa' xtila." Ní'irö bönni' huen dxin lo na' rë' lë', rnne': "Ni dë guichi ga nazúaj le ral-lu'u. Buzúaj ia'tu lu guichi le inná tápalalaj da'a ral-lu'u." ⁸ Réquibe'enë' xanë' na' sína'te benë' bönni' huen dxin biti' náquië' tsahui' na'. Caní naca, nácacacare' sína'bönni' yödzölió ni lu le tunë' la' légacase', ca nácacaca bönnachi ta'dalen Dios lu beni' queé'.

⁹ 'Neda' rea' libí'ili': Guli'cözalen bönnachi dxi'a, ugunli' dxin yöl-la' tsahui' dë queéli' yödzölió ni, para cate' idxín dza ucá'anali' yugu' lë ni, ilunë' libí'ili' bal lataj ni' zóatica'sö.

¹⁰ Nu rugún dxi'a dxin tu le cuídi'sö dë lu në'e, lësca' ugún dxi'a dxin tu le zxön gata' lu në'e. Nu biti' rugún dxi'a dxin tu le cuídi'sö dë lu në'e, biti' ugún dxi'a dxin tu le zxön gata' lu në'e. ¹¹ Que lë ni na', channö cabí rugunli' dxi'a dxin yöl-la' tsahui' dë queéli' yödzölió ni, ¿nuzxi caz udödi lu ná'ali' yöl-la' tsahui' le naca idú? ¹² Channö cabí rugunli' dxi'a dxin le dë lu ná'ali' le nequi que nu yübölö, ¿nuzxi caz udödi lu ná'ali' le ral-la' guequi que quézili?

¹³ 'Biti' gaca nitúë' bönni' huen dxin gunë' xichíngaca chopa xanë', tu' udí'inë' tuë', en idxí'inë' ia'tuë', o gunë' bal tuë', en uzóë' tsölä'alö ia'tuë' na'. Biti' gaca gunli' xichinë' Dios, en gunli' ca' dxin para uzí'ili' xibé yöl-la' tsahui' que yödzölió.

¹⁴ Bila'yönnë' bönni' yudo' fariseo didza' ni, ate' tu' nadxí'iguequinë' yöl-la' tsahui' quégäquïë', que lë ni na' bulu'titje' Jesús. ¹⁵ Ní'irö Jesúr rë' légaquïë':

—Libí'ili' rubéaj dxi'a cuinli' lógaca bönnachi, pero nözinë' Dios le yu'u icja ládxido'o'li', tu' naca lë na' tun zxön bönnachi tu le ruzoë' Dios tsölä'alö.

Xibá queë' Moisés, en le rinná bë'ë Dios

¹⁶ Gunnë' ca' Jesús:

—Ga bidxitë dza zoë' Juan, ben dxin le rinná bë' xibá queë' Moisés, en le bulu'zúajë' lu guichi yugu' bönni' gulu'ë didza' uláz queë' Dios. Ní'irö cate' bidxinë' Juan na', gusi lo raca libán ca gaca nu tsaza ga rinná bë'ë Dios, ate' tun bayudxi yúgu'të bönnachi ila'yaza ni'.

¹⁷ 'Sal-la' raca caní, gácarö ila'dödi que lúzxiba, en que luyú ni ca initi tu didza'sö nazúaj lu guichi lu xibá queë' Dios.

Le rulá'a yöl-la' nutsaga na' (Mt. 19:1-12; Mr. 10:1-12)

¹⁸ Gunnë' ca' Jesús:

—Channö tu bönni' ulá'alenë' nigula queë', ate' utsaga ná'alenë'-nu nigula yübölö, gunë' dul-la' le riguitsaj xibá que yöl-la' nutsaga na', ate' nu utsaga ná'alen nigula na' nusanë'-nu bönni' queënu, gun ca' dul-la' le riguitsaj xibá que yöl-la' nutsaga na'.

Bönni' dë yöl-la' tsahui' queë', en Lázaro

¹⁹ Ní'irö bucúdzu'ë didza' Jesús, rnne':

—Zoë' tu bönni' rilé'enë' yöl-la' tsahui' queë'. Rácuë' lari' xiná, en lari' nazáca'da', ate' yugu' dza rúntica'së' laní, ate' të'aj tahuë' le banéquini. ²⁰ Zoë' ca' ni' tu bönni' yéchi'do' lë' Lázaro, bönni' rinabë' nu bi unödzaj queë', ate' huë'tëzë' rö'ë ra' yu'u queë' bönni' na' rilé'enë' yöl-la' tsahui'. ²¹ Raca ládxë'ë bönni' yéchi'do' na' gahuë' le bizxaj tu'huoxaj zxani ga rahuë' bönni' na'

rilé'ené' yöl-la' tsahui'. Ta'dxinba' ca' bö'cu', en ta'lé'ëba' lu hué' queë' bönni' yéchi'do' na'. ²² Bidxín dza gútië' bönni' yéchi'do' na', ate' gubáz lá'ayi queë' Dios gula'chë'ë lë' tsöjsóalenë' Abraham ga naca lataj lachi queë' Dios. Gútië' ca' bönni' na' bilé'ené' yöl-la' tsahui', ate' bulu'cachë'ë lë' yeru ba. ²³ Cate' ni' rigu'i rizáquë'ë bönni' na' bilé'ené' yöl-la' tsahui', zoë' lataj quégaca nupa nátigaca, guchisa lahuë', en bilé'ené' Abraham zoë' zi'tu', en dzaguë' Lázaro na' lë'. ²⁴ Ní'iro bë'ë zidzaj didza', rnñë': "Xuza', Abraham, buéchi' ladxi' neda'. Gusöl-la' Lázaro quia' para usubisë' xibón në'ë, en udusuhuöälë' lúdxa'a, tu' rigu'i rizáca'a lu gui'ni." ²⁵ Abraham rë' lë', rnñë': "Zxi'ina', busá' ládxu'u ca guca quiu', buzi'u xibé yöl-la' tsahui' tsanni ni' zu' nabanu', pero Lázaro ni, guca queë' yöl-la' yechi', ate' na'a, ruzí' zxönë' Lázaro ni, pero li' rigu'i rizácu'u. ²⁶ Ia stú, tu ra' gu'a sibi rö', le zoa gatsaj láhui'lö ga ni' zóali' libíili', en ga ni zóatu' netu'. Que lë ni na' nupa nacuá' ni, en ilë'ëni ila'dödi ga zóali' libíili', biti' ca' gaca iluné' ca', en biti' gaca ilida ni nupa nacuá' ni'." ²⁷ Ní'iro bönni' na' bilé'ené' yöl-la' tsahui' rë' lë', rnñë': "Xuza' Abraham, rátaya'ua' lo' isöl-lu'u-në' Lázaro tsejë' lidxe' xuza', ²⁸ tu' nacu'ë gáyu'ë bönni' böcha'a ni'. Gusöl-lë'ë tsöjenë' liná' lo que le raca ni, para cabí guídigaquië' ca' lataj ga ni rigu'i rizáca'a." ²⁹ Ní'iro Abraham rë' lë', rnñë': "Dë quégäquië' le buzúajë' lu guichi Moisés, en le bulu'zúajë' lu guichi bönni' gulu'ë didza' uláz queë' Dios. Yugu' didza' quégäquië' na' ral-la' ulu'zë náguië'." ³⁰ Bubi'ë didza' bönni' na' bilé'ené' yöl-la' tsahui', rnñë': "Xuza' Abraham, biti' gaca caní, pero channö ubanë' tu bönni' lu yöl-la' guti, en tsejë' ga na' nacu'ë, ulu'bíi ládx'i'gaquië'." ³¹ Abraham rë' lë', rnñë': "Channö cabí tu'zë náguië' didza' bë'ë Moisés, en le gula'nnë' bönni' gulu'ë didza' uláz queë' Dios, biti' ila'yéajlë'ë sal-la' nu ubán lu yöl-la' guti."

17

Run bönadxi queëru' gunru' ga nu gun dul-la'
(Mt. 18:6-7, 21-22; Mr. 9:42)

¹ Jesús rë' yugu' bönni' dá'gaquië' Lë', rnñë':

—Nacuá'tica'sö le tun ga ilún bönachi dul-la', pero bica' bayechi' bönni' na' runë' ga nu gun dul-la'. ² Dxi'arö gaca queë' bönni' na' runë' caní, nu ugala-la' tu guiój riyetü yaga yenë', en tsöjchú'una lë' lu nísado', cátelö gunë' ga gun dul-la' nu bi'i néquibi' quia'. ³ Guli'gún chi'i cuinli'. Channö böchi' luzo'o gu'ë dö' quiu', buzéajni'i-në', en channö ubíi ládxë'ë, buniti lo lë'. ⁴ Sal-la' gadxi luzuí tu dza gu'ë dö' quiu', en gadxi luzuí ca' guídë' ga zu', en guië' li': "Rubí'i ládx'a'a", ral-la' uniti lo' lë'.

Yöl-la' huáca que le réajlë'ëru' Cristo

⁵ Ní'iro yugu' bönni' gubáz queë' Xanru' të' Lë', ta'nnë':

—Ben ga tséajlë'ërötü'ñë' Dios.

⁶ Xanru' rë' légaquië', rnñë':

—La'tu' naca cuíd'sö yöl-la' réajlë' queëli' Dios, nácasö ca tu xisedo' mostaza, huáca guiëli' yaga zxön ni: "Gucuítá ni, en yöjsóa lu nísado", ate' gun yaga na' ca rnñali'.

Le ral-la' gun nu naca huen dxin

⁷ Gunnë' ca' Jesús:

—Channö zoë' tuë' bönni' ladaj libíili', en zoë' queë' tuë' bönni' nadó'o rugá'anë'-ba' bëdxi o rulapë', cate' údxí gunë' xichinë' xanë', ñnarú' huëtsë'

xanë' lë', innë': "Gudá, guröö gagu"?" ⁸ ¡Calëga! Caní guíë' lë': "Bupá'a le gahua'. Guzóa sina' cu'u le guí'aj gahua', ate' tòdirö na' huáca guí'aj gagu' li'." ⁹ ¿Naru' huëtsë' bönni' nadó'o queë' na': "Xclenu", tu' benë' ca gunná bë'enë' lë? Runi neda', biti' gunë' caní. ¹⁰ Lësca' caní gaca queëli'. Cate' chinunli' yúgu'te le gunná bë'enë' Dios libi'ili', ral-la' innali': "Nácatu' huen dxin cabí nácatu' lesaca', tu' bénsoü' le run bayudxi guntu'."

Chië' bönni' té'enë' huë' nudzu' ruzödi

¹¹ Tsanni ni' yu'é Jesús nöza, sa'yéajë' Jerusalén, ridödë' gapa dë yödzödo' nabábagaca luyú Samaria, en luyú Galilea. ¹² Cate' guyázië' tu yödzödo', bila'rúajë' dutságagaquië' Lë' chië' bönni' té'enë' huë' nudzu' ruzödi, ate' gula'cu'ë zítu'sö, ¹³ en tu'ë zidzaj didza', ta'nnë':

—¡Jesús, Bönni' Usedi! ¡Buéchi' ladxi' netu'!

¹⁴ Cate' bilé'enë' Jesús légaquië', rë' légaquië':

—Guli'tséaj, guli'tsöjlu'i cuinli' lógaca bixúz.

Tsanni ni' söjäquië', bulu'huöáquië' dxi'a. ¹⁵ Ní'irö tuë' bönni' nútsë'ë ládjagaquië', cate' réquibe'enë' chinuhuöáquië' dxi'a, böajë' ga na' zoë' Jesús, ruvíitica'së' zidzaj didza', riguë' Dios yöl-la' ba. ¹⁶ Biyéchuë', en busudxín lahuë' lu yu lahuë' Jesús, en rë' Lë': "¡Xclenu'!"

Bönni' ni nababë' Samaria. ¹⁷ Ní'irö Jesús rë' lë':

—¿Naru' cabí bulu'huöáquië' dxi'a chië' bönni'? ¿Gazxi nacuá'tsë' ia'zíca'rë' bönni' na'? ¹⁸ ¿Naru' cabí zoa nu huöda cu'u Dios yöl-la' ba, pero tuzë' bönni' zi'tu' ni?

¹⁹ Ní'irö Jesús gudxë' bönni' na', rnnë':

—¡Guyasa, en böaj lidxu'! ¡Chiböácu' dxi'a tu' réajlë'u neda'!

Ca idxín le rinná bë'ë Dios

(Mt. 24:23-28, 36-41)

²⁰ Cate' yugu' bönni' yudo' fariseo ta'nábine' Jesús bátaxi ral-la' idxín le rinná bë'ë Dios, Lë' bubí'ë didza', rë' légaquië':

—Ca idxín le rinná bë'ë Dios, biti' naca le ilé'eli'. ²¹ Cuntu nu gaca inná: "¡Ni bidxín!", o inná: "¡Ni' bidxín!" ¡Bulí'yútsöca'! ¡Rinná bë'ë Dios lu icja ládzi do' gaca böñachi!

²² Ní'irö Jesús gudxë' yugu' bönni' usëda queë', rnnë':

—Huadxín dza cate' guë'ënili' ilé'eli' dza huöda' neda', Bönni' Guljë' Bönachi, pero biti' ilé'eli' le. ²³ Ila'cuá' nupa ilé libí'ili': "¡Ni zoë'!", o ila'nná: "¡Ni' zoë'!" Biti' tséajli' ni', en biti' tséajlenli' légaquië'. ²⁴ Ca raca cate' rëpi yösa, ruzení' idá'alö lúzxiba, lësca' caní gaca cate' idxín dza huöda' neda', Bönni' Guljë' Bönachi. ²⁵ Zí'alö ca gaca lë ni, run bayudxi qui'i sáca'da', ate' böñachi dza ni zóaru' na'a ulu'cá'ana neda' cá'asö. ²⁶ Ca na' guca dza ni' zoë' Noé, lësca' caní gaca cate' idxín dza huöda' neda', Bönni' Guljë' Bönachi. ²⁷ Dza ni'te na' gulë'aj gulahuë'. Bulu'tsaga ná'agaquië', en bulu'dödë' zxí'inigaquië' lu yöl-la' rutsaga na' ga bidxitnë dza guyázië' Noé lë'e barco zxón na' nazí'i le arca, ate' bidxitnë nisa guiøj usuniti yödzölió le busuniti yúgu'te'. ²⁸ Lësca' caní guca dza ni' zoë' Lot. Gulë'aj gulahuë'. Gulá'uë', en gülüti'ë. Gulazë' xiýugaquië', en gulunë' yugu' yu'u quégaquië'. ²⁹ Cate' bidxín dza na' burúajë' Lot lu yödzö Sodoma, böxaj guí' ca tu nisa guiøj, enca' le ruzéguida' nazí'i le azufre, ate' bulu'suniti yúgu'te'. ³⁰ Lësca' caní gaca cate' idxín dza ulu'i lahua' neda', Bönni' Guljë' Bönachi.

³¹ 'Cate' idxín dza na', channö zoë' tu bönni' ícjo'olö, en dzö'ö le dë queë' lu yu'u na', biti' ral-la' huötjé' tsöjxi'ë le dë queë', ate' nu zoa la' guixi', lësca' caní, biti' ral-la' huøjé' lidxé'. ³² Guli'sá' ládxí'lí' ca guca queënu nigula queë' Lot. ³³ Nu bönni' rë'ënë' gun chi'ë yöl-la' na'bán queë', unifië' le, pero bönni' udödë' yöl-la' na'bán queë' ni'a quia', udélë' le.

³⁴ 'Rea' libí'ilí': Cate' idxín rëla na', ila'cu'ë chopë' bönni' tsözxön ga tasië', ate' tuë' uduzxi'a-në', en ia'tué' ucá'ana' lé'. ³⁵ Ila'cuá'ana' huëtu tsözxön chópanu nigula, ate' tunu uduzxi'a-nu, en ia'tunu ucá'ana'-nu. ³⁶ Ila'cu'ë chopë' bönni' la' guixi', ate' tuë' uduzxi'a-në', en ia'tué' ucá'ana' lé'.

³⁷ Cate' bila'yönnë' lë ni bönni' usëda queë' Jesús, gula'nábinë' Lë', ta'nnë':

—Xan, ¿gazxi gaca lë ni?

Jesús rë' légaquië' :

—Ga dë tu le nati, ni' ulu'dubi quéziba' bíchulab.

18

Tu nigula uzëbi, en bönni' ruchi'a rusöröe'

¹ Ní'irö bucúdzu'ë didza' Jesús, rë' légaquië' ca run bayudxi ulídzatica'siru'-në' Dios, en biti' gaca chopá ládxí'ru'. ² Rnnë':

—Zoë' tu bönni' ruchi'a rusöröe' tu yödzö, bönni' biti' rádxinë' Dios, en biti' runë' nu bönni' bal. ³ La' yödzö ná'asö zóanu tu nigula uzëbi, ate' bidixinu nigula ni ga zoë' bönni' ruchi'a rusöröe' na', rnnanu: "Buchi'a busörö le run quia' nu ruá' dö' quia'." ⁴ Xidzé biti' gú'unne' bi gunë' queënu, pero gudödi ni' guzá' ládxé'ë, rnne': "Biti' rádxida'-në' Dios, en biti' runa' nu bönni' bal, ⁵ pero tu' rupízxjanu nigula uzëbi ni neda', que lë ni na' uchi'a usöröa'-nu, para cabí guídatica'sinu ni, en para cabí tödi bë' upízxjanu neda'."

⁶ Ní'irö Xanru' rë' légaquië', rnne':

—Guli'zé nágali' ca na' gunnë' bönni' ruchi'a rusöröe' na', bönni' biti' náquië' tsahui'. ⁷ ¿Naru' cabí uchi'a usöröe' Dios böñachi gurö cazë' queë', nupa na' tu'lidza Lë' rëla te dza? ¿Naru' huadzétsenë' gácalenë' légaquië'? ⁸ Rea' libí'ilí': La' uchi'a usörötenë' légaquië'. Cate' huöda' neda', Bönni' Guljë' Bönachi, ¿naru' idzólida' nupa ta'yéajlë' neda' luyú ni?

Tu bönni' yudo' fariseo, en tu bönni' uquízxaj

⁹ Bucúdzu'ë didza' Jesús ca naca quégaaquië' bönni' tu'béaj tsahui' cuíngaaquië', en tu'cá'anë' cá'asö ia'zíca'rö böñachi. ¹⁰ Gunnë':

—Bila'dxinë' chopë' bönni' ga naca chila yudo' para ulu'lidzë' Dios. Tuë' bönni' na' náquië' bönni' yudo' fariseo, ate' ia'tué' na' náquië' bönni' ruquízxjë' lázagaca böñachi. ¹¹ Guzuínë' bönni' yudo' fariseo na', en caní bulidzë' Dios, rnne': "Dios, rea' Li': Xclenu', tu' cabí naca' ca nácagaquië' ia'zíca'rë' bönni', nácagaquië' gubán, en biti' nácagaquië' tsahui'. Ta'guitsjë' xibá que yöl-la' nutsaga na'. Lësca' biti' naca' ca bönni' uquízxaj ni. ¹² Neda' runa' gubasa chopá luzuí tu' xunu' dza huéaj, en runödzja' que yudo' tu cö' huéaj tu' chi cö' que yúgu'té le rata' quia'." ¹³ Guzóazë' zi'tu' bönni' uquízxaj na', en biti' böázjanë' ichisa lahuë' uyúë' lúzxiba, pero gudapë' luchuë', rnne': "Dios, buéchi' ladxi' neda', bönni' dul-la'." ¹⁴ Neda' rea' libí'ilí': Böajé' lidxé' bönni' uquízxaj na', nuhuöáquië' tsahui' lahuë' Dios, calëga ia'tué' bönni' ni'. Núti'tës bönni' run ba zxöñ cuïñe', gunë' Dios ga huöta' igulë', pero nu bönni' rizöe' nöñaj ladxi', gunë' Dios ga gácarë' lo.

Jesús rulidza tsáhué-ë-bí' yugu' bí'ido'
(Mt. 19:13-15; Mr. 10:13-16)

¹⁵ Ní'irö bila'dxine' yugu' bönni', en nigula ga zoë' Jesús, naché'gaquié'-bi' yugu' bí'ido' quégacié' para ixóa né'ë Jesús légacabi'. Cate' bila'lé'enë' yugu' bönni' usëda queë' Jesús lë ni, gula'dil-lé' légaquié'. ¹⁶ Ní'irö Jesús bulidzé' yugu' bönni' dá'gaquié' Lë', rnnë'.

—Guli'gú'i-bí' lataj ila'dxinbi' bí'ido' ni ga zoa'. Biti' uzága'li' xinözagacabi', tu' gata' quégaca nupa nátagaca ca bí'i canílataj ga rinná bë'ë Dios. ¹⁷ Le nácaté rea' libí'ilí': Nu cabí si' lu né'e le rinná bë'ë Dios, ca runbi' tubi' bí'ido', biti' ca' tsaza ga ni' rinná bë'ë Lë'.

Tu bönni' rilé'enë' yöl-la' tsahui'
(Mt. 19:16-30; Mr. 10:17-31)

¹⁸ Tu bönni' unná bë' gunábinë' Jesús, rnnë':

—Bönni' Usedi idú dxi'a. ¿Bizxi ral-la' guna' para idéli'da' yöl-la' na'bán idú?

¹⁹ Jesús rë' lë':

—¿Bizx que rë'u neda': "Idú dxi'a"? Cuntu nu bönni' náquié' idú dxi'a. Tuzé' Dios náquié' idú dxi'a. ²⁰ Nöz quézinu' yugu' le gunná bë'ë Dios: Biti' gunu' dul-la' le riguitsaj xibá que yöl-la' nutsaga na'. Biti' gútigacu' bönnachi.

Biti' cuanu'.

Biti' innio' que luzo'o le cabí nácaté.

Ben bal xuz xin'o.

²¹ Bönni' na' rë' Jesús, rnnë':

—Yugu'té lë ni runa' ga gudela' naca' bí'ido'.

²² Cate' biyönné' Jesús didza' ni, rë' lë':

—Ia'tú le riyadzaj quiu' gunu'. Bëti' yúgu'té le dë quiu', ate' lë na' si'u bunödzaj quégaca bönnachi yechi', ate' gata' quiu' yöl-la' tsahui' yehua' yubá. Ní'irö gudá, gudá' neda'.

²³ Cate' bönni' na' biyönné' didza' ni, ruhuínnë', tu' dëda' yöl-la' tsahui' queëe'. ²⁴ Cate' bille'enë' Jesús ca na' ruhuínnë' bönni' na', rnnë':

—¡Bica' böñiga gaca, ila'yaza nupa ta'lé'e yöl-la' tsahui' ga rinná bë'ë Dios!

²⁵ Gácaro' tódiba' böa' nagui yötsi', ca tsázië' tu bönni' rilé'enë' yöl-la' tsahui' ga rinná bë'ë Dios.

²⁶ Ní'irö nupa bila'yóni didza' ni gula'nná:

—¿Nuzxi caz gaca ulá, channö?

²⁷ Jesús gudxe' légaquié':

—Le biti' gaca iluné' bönni', huáca gunë' Dios.

²⁸ Ní'irö Pedro rë' Jesús:

—Buyútsöca', netu' nucá'anatu' yúgu'té le dë queëtu', en dá'atu' Li'.

²⁹ Ní'irö Jesús rë' légaquié':

—Le nácaté rea' libí'ilí', nu bönni' ucá'anë' lidxé', o xuz xinë'ë, o yugu' böchi' zanë', o nigula queëe', o yugu' zxí'inë', tu' ruví'ládxé'ë inná bë'ë Dios, ³⁰ bönni' ni huazí'irë' dza ni zóara' na'a, ate' dza si' za' idéli'në' yöl-la' na'bán idú.

Jesús riguixjö'ë leyübölö ca si' ilútië' Lë'
(Mt. 20:17-19; Mr. 10:32-34)

³¹ Jesús guché'ë quez queëe' idxínnuté' bönni' usëda queëe', en rë' légaquié':

—Buli'yútsöca', ribenru' zéajru' Jerusalén, ga ni' ilaca yúgu'té le nazúajacala guichi ca gula'nné' bönni' gulu'ë didza' uláz queëe' Dios ca ral-la' gaca quia' neda', Bönni' Gulje' Bönnachi. ³² Yugu' bönni' Jerusalén ulu'dödë' neda'

lu ná'agaquië' bönni' zi'tu', ate' ulu'titje' neda', en ulu'lidza zi'ë neda', en ulu'chejë' neda' zxöna'. ³³ Ila'guinë' neda', ate' tödirö ni' ilútië' neda', pero cate' gaca tsonna dza ubana'.

³⁴ Biti' gula'yéajni'inë' bönni' usëda queë' didza' ni, en biti' guléquibe'enë' ca sa'yéaj le ru'ilenë' légaquië' didza' que, tu' naca le cabí sequi' ila'yéajni'inë'.

Jesús ruúnë' tu bönni' yödzö Jericó nachul-la lahuë'
(Mt. 20:29-34; Mr. 10:46-52)

³⁵ Cate' chizóa idxinë' Jesús yödzö Jericó, zoë' tu bönni' ni' nachul-la lahuë'. Rö'ë ra' näza rinabë' nu bi günnasö queë'. ³⁶ Bönni' ni' biyönnë' ta'dödi bönnachi zián ni', ate' gunabë' bizxi na' raca. ³⁷ Bönachi ni' të lë':

—Jesús, bönni' Nazaret, ridödë' ni.

³⁸ Ní'irö bönni' na' nachul-la lahuë' bë'ë zidzaj didza', rnnë':

—Jesús, zxí'ini xi'sóë' David, buéchi' ladxi' neda'!

³⁹ Yugu' bönni' nanörugaquië' lahuë' Jesús gula'dil-lë' bönni' na' nachul-la lahuë' para usayaj ru'ë, pero le' zídzajrö bë'ë didza', rnnë':

—Zxí'ini xi'sóë' David, buéchi' ladxi' neda'!

⁴⁰ Ní'irö guzë' dxiz Jesús ribözë', ate' gunná bé'enë' nu tsöjlidza lë' para idxinë' lahuë'. Cate' bönni' na' nachul-la lahuë' bidxinë' lahuë' Jesús, gunábinë' Jesús lë', rnnë':

⁴¹ —¿Bizxi rë'ënu' guna' quiu'?

Bönni' na' nachul-la lahuë' rnnë':

—Rë'ënidä' huöálaj guiöj lahua'.

⁴² Jesús rë' lë':

—Chiböálaj guiöj lo'. Chiböácu' tu' réajlë'u neda'.

⁴³ La' ni'isö bulé'etenë', ate' sa'yéajlenë' Jesús, rigu'ë Dios yöl-la' ba. Lësca' yúgu'të bönnachi nacuá' ni', en bila'lé'e lë na' guca gula'gú'u Dios yöl-la' ba.

19

Jesús, en Zaqueo

¹ Ní'irö guyázië' Jesús yödzö Jericó, en ridödë' lu yödzö na'. ² Zoë' tu bönni' lë' Zaqueo ni', bönni' lo lädjagaquië' bönni' uquízxaj, ate' dë yöl-la' tsahui' queë'.

³ Ru'í ládxë'ë bönni' ni ilé'enë' Jesús, pero biti' guca queë' tu' nacuá' bönnachi zián ni', en náquië' bönni' ga rë'ëdo'. ⁴ Ní'irö carelö yöjnöruë' lögaca bönnachi zián na', ate' yöjchenë' tu lu yaga para gaca ilé'enë' Jesús, tu' ral-la' tödë' ni'.

⁵ Cate' bidxinë' Jesús ni', guchisa lahuë' ruyúë' ga na' dxíë' Zaqueo na', en rë' lë':

—Zaqueo, bötjatë lu yaga na', tu' run bayudxi tsöjgá'ana' lidxu' na'a.

⁶ Ní'irö la' bötjatë' Zaqueo lu yaga, ate' lu yöl-la' rudzeja queë' guchë'ë Jesús lidxë'. ⁷ Cate' bila'lé'e bönnachi nacuá' ni' lë ni, gula'sí lögagaquië' yúgu'të' ta'nnë' queë', ta'nnë'.

—Guyázië' Jesús ugá'analenë' bönni' dul-la'.

⁸ Ní'irö guzuínë' Zaqueo, en rë' Xanru':

—Xan, buyútsöca'. Gatsaj le dë quia' gu'a quégaca bönnachi yechi', en channö bi gudödi bë' buquizxja' bönnachi, ubi'a quégaca bönnachi na' tapa cö'telö ca'.

⁹ Jesús rë' lë':

—Na'a dza ni bidxín yöl-la' rusölä quégaca nupa nacuá' yu'u ni, tu' nababë' bönni' ni di'a dza queë' Abraham. ¹⁰ Bida' neda', Bönni' Guljë' Bönachi, ududilja', en udusölá' nupa nanítigaca.

Rucúdu'ë didza' Jesús que chi cö' dumí

11 Tsanni ni' ta'yönnë' didza' ni ru'ë Jesús, rë' légaquië' le rucúdu'ë didza', tu' chizóa ila'dxinë' yödzö Jerusalén, ate' téquinë' chizóaté ilá' lahui le rinná bë'ë Dios. **12** Caní rnnë' Jesús:

—Zoë' tu bönni' lo, sa'yéajë' tu yödzö zi'tu' para si' lu në'ë yöl-la' unná bë', ate' ni'irö huödë. **13** Cate' chizóa tsejë' ni' bulidzë' chië' bönni' huen dxin queë', en bë'ë que queëgaquië' tu cö' huéaj dumí, ate' rë' légaquië': "Guli'guílajlen dumí ni tsanni huöda'." **14** Yugu' bönni' uládz queë' biti' ta'lé'enë' lë' dxi'a, ate' gula'sö'l-lë'ë yugu' gubáz queëgaquië' ga ni' tsejë', ila nnë': "Biti' rë'ënitu' inná bë'enë' bönni' ni netu'." **15** Ni'irö guzxí' lu në'ë yöl-la' unná bë', ate' budxinë' ladzë'. Cate' bidxinë' ni' gunná bë'enë' nu tsöjlidza yugu' bönni' huen dxin na' budödë' lu ná'agaquië' dumí na', para inözinë' gáca'xi bulu'guílajlenë' le tu tuë'. **16** Cate' bönni' zí'alö'na' bidixinë' lahuë', rnnë': "Xan, tu cö' dumí quiu' na' chibén icja ia'chí cö' ca'." **17** Xanë' na' rë' lë': "Tsahui' benu'. Nacu' huen dxin tsahui'. Tu' dxi'ado' bugunu' dxin láti'do'na' guta' lu no'o, na'a, guna' ga inná bë'enu' chi yödzö." **18** Ni'irö bidixinë' ia'tué' bönni' huen dxin na' lahuë' lë', rnnë': "Xan, tu cö' dumí quiu' na' chibén icja ia'gayu' cö' ca'." **19** Xanë' na' rë' ca'lë': "Inná bë'enu' gayu' yödzö." **20** Ni'irö bidixinë' ia'tué' lahuë' lë', rnnë': "Xan, ni dë tu cö' dumí quiu' na'. Ben chi'a le, butulida' le lari". **21** Caní bena' tu' rádxida' li', tu' nacu' bönni' bizxaj. Runu' ca na' ta'nná böñachi: Ruzi'u le cabí buzú', en rulapu' ga biti' guzu'." **22** Ni'irö xanë' na' rë' lë': "Nacu' huen dxin biti' naca tsahui'. Ni'a que didza' bë'u uchi'a usöröa' li'. ¿Réquibe'enu' naca' bönni' bizxaj: Ruzi'a le cabí buzóa', en rulapa' ga biti' guza'?" **23** Na'a, ¿bizx que biti' yöjlü'u dumí quia' na' ga gun icja, para cate' huöda', uzi'a le idú len icja na'?" **24** Ni'irö rë' nupa nacuá' ni': "Guli'cúa lu në'ë dumí na', ate' guli'gü'i queë' bönni' na' dë queë' chi cö' dumí." **25** Légaquië' té' lë': "Xan, chidé queë' chi cö' dumí." **26** Ni'irö bubi'ë didza' xángaquië', rnnë': "Rea'libí'ilí: Nu rugún dxi'a dxin le do' dë lu në'e, ulu'zxöni ládx'i'gaca lë' ia'late', pero nu biti' rugún dxi'a dxin le do' dë lu në'e, ulu'béaj lu në'e lë na' guta' lu në'e. **27** Ca naca quégaquië' bönni' ni' biti' ta'lé'enë' neda' dxi'a, en biti' gulë'ënnë' inná bë'eda' légaquië', guli'tsöjzxí' légaquië' para ídigaquië' ni, ate' guli'guti légaquië'."

Len yöl-la' ba zxön razie' Jesús yödzö Jerusalén (Mt. 21:1-11; Mr. 11:1-11; Jn. 12:12-19)

28 Cate' budxi gunnë' caní Jesús, buguélë'ë xinözë', sa'yéajë' zaca' yödzö Jerusalén. **29** Cate' bila'dxinë' gala' ga nacuá' yödzö Betfagé, en yödzö Betania, ga naca ra' gu'ado' nazí'i le Gui'a Yaga Olivo, gusöl-lë'ë Jesús chopë' bönni' usëda queë', **30** ate' rë' légaquië':

—Guli'tséaj yödzödo' ni' ca dödilö ga zóaru', en cate' idxinli' ni', tsöjxáca'li'-ba' tuba' búrrodo' nágaba' ni', búrrodo' na' cuntu nu ribíani lëba'. Guli'sedxi-ba', en guli'duché'-ba' quia' ni. **31** Channö zoa nu rinábini libí'ilí, inná: "¿Bizx que risédxili'-ba?", ubí'ilí' didza' caní innali': "Xanru' riquinnë'-ba'."

32 Sójáquië' bönni' usëda queë' na' nasöl-lë'ë, ate' yöjxáca'gaquië'-ba' ca na' chigudxë' Jesús légaquië'. **33** Cate' gula'sedxe'-ba' búrrodo' na', yugu' bönni' xanba' té' légaquië':

—¿Bizx que risédxili'-ba' búrrodo' na'?

34 Bulu'bí'ë didza', ta'nnë':

—Xanru' riquinnë'-ba'.

35 Gula'chë'é-ba' ga na' zoë' Jesús. Cate' chigula'xóë' yugu' lari' tsölä'a quégaquië' cúdu'ba' búrrodo' na', bulu'dxië' Jesús cùdu'ba' lahui lari' na'.

36 Gapa ral-la' tödë' Jesús, gula'chiljë' lari' quégaquië' la' nöza. **37** Cate' chibila'dxinë' gala' ga zoa lidinni que Guí'a Yaga Olivo, lu yöl-la' rudzeja quégaquië' gula'sí lógaquië' yúgu'të bönni' dá'gaquië' Jesús, tu'ë zidzaj didza', ta'gu'ë Dios yöl-la' ba, ni'a quégaca yugu' yöl-la' huáca zxön bila'lé'enë' benë' Jesús. **38** Ta'nnë':

—Yöl-la' ba bönni' unná bë' ni zë'ë uláz queë' Xanru' Dios! ¡Yehua' yubá za' le ribequi dxi ládxí'ru'! ¡Yöl-la' ba Dios!

39 Ní'irö yugu' bönni' yudo' fariseo nútasa'gaquië' ladaj bönnachi zián ni' të' Jesús, ta'nnë':

—¡Bönni' Usedi, gudil-la yugu' bönni' usëda quiu'!

40 Bubi'ë didza' Jesús, rë' légaquië':

—Rea' libí'ili': Channö ila'cuá' dxie'bönni' ni, yugu' guiój hualu'i caz zidzaj didza'.

41 Cate' bidxinë' Jesús gala' ra' yödzö na', en rilé'enë' le, ní'irö ribödxë' que, **42** rnñë':

—Raca ládex'a huanözili' na'a dza le gaca gun ga cuéqui dxi ládxí'li' lahuë' Dios, pero na'a chinagachi' queëli', para cabí ilé'eli' le. **43** Huala'dxín queëli' dza cate' nupa biti' ta'lé'e libí'ili' dxia'ila'bequi zö'ö idú gásibi'ilö ga zóali', en ila'gú'u libí'ili' lë'alö, ate' yúgu'të lataj idú gásibi'ilö ilúmlenë' libí'ili' gudil-la. **44** Ulu'quínnajë' zö'ö run chi'i yödzö queëli', en ilútië' nupa nacuá' lu yödzö ni. Biti' ugá'ana guiój lahui luzë'e. Yúgu'të lë ni gaca queëli' tu' cabí gúquibe'eli' dza bidé' Dios buduyúë' libí'ili'.

Rulatjë' Jesús lö'a yudo'

(Mt. 21:12-17; Mr. 11:15-19; Jn. 2:13-22)

45 Ní'irö guyáziji' Jesús lö'a yudo', en gusí lahuë' rubéaje' ní'ilö yúgu'të nupa tuti', en nupa to'o ga naca lö'a yudo'. **46** Rë' légaquië':

—Nazúaj lu guichi lá'ayi, rnna: "Lidxa' naca yu'u ga ulu'lidza bönnachi Dios", pero libí'ili' chinunli' le ca tu lídxigaca bönni' gubán.

47 Yugu' dza rusédinë' Jesús bönnachi ga naca chila yudo', ate' gula'zóa gula'bo'ë bixúz unná bë', len bönni' yudo' tu'sédinë', en yugu' bönni' lo que lu yödzö ilútië' Lë'. **48** Biti' bulu'dzólinë' nacxi ilútië' Lë', tu' idú ládxí'gaca tu'zë nágagaca yúgu'të bönnachi xtídzë'ë.

20

Yöl-la' unná bë' dë lu në'ë Jesús

(Mt. 21:23-27; Mr. 11:27-33)

1 Tu dza, cate' ni' rusédinë' Jesús bönnachi ga naca chila yudo', en riguixjö'ë didza' dxi'a, bila'dxinë' yugu' bixúz unná bë', en bönni' yudo' tu'sédinë', len bönni' gula tu'zéajni'inë', ga na' zoë', **2** ate' të' Jesús:

—Gudixjö'i netu'. ¿Bizxi yöl-la' unná bë' dë lu no'o runu' caní? ¿Nuzxi caz budödi lu no'o yöl-la' unná bë' ni?

3 Bubi'ë didza' Jesús, rë' légaquië':

—Inábida' ca' libí'ili' tu didza', ate' ubí'ili' innali'. **4** ¿Nuzxi gusöl-la' Juan ruquile' bönnachi nisa? ¿Naru' Dios, o bönnachi?

5 Gulún xtídzä'gaquíë' la' légaçase' bönni' yudo' na', ta'nnë':

—Channö innaru': Gusöl-lé'ë Dios lë', guié' rë'u: "¿Bizx que biti' guyéajlë'ëli'në'?" **6** Channö guiérü'në': Gula'söl-lé'ë yugu' bönni' lë', bönnachi lu yödzö ni ulu'ladxi' rë'u guiój, tu' nöziguequi bë'ë didza' Juan na' uláz queë' Dios.

7 Ní'irö bulu'bi'ë didza', ta'nnë':
—Biti' nöztu' nuzxi na' gusöl-la' Juan.

8 Ní'irö Jesús rë' légaquië':
—Neda' ca' biti' guá' libíili' bi yöl-la' unná bë' rúnida' caní.

Yugu' bönni' huen dxin biti' nácagaquië' tsahui'
(Mt. 21:33-44; Mr. 12:1-11)

9 Ní'irö la' gusí lotë' Jesús ruí'ilenë' böñachi nacuá' ni' didza'. Rucúdu'ë didza', rnnë':

—Zoë' tu bönni' budë'ë yugu' lubá uva lu xiyúë', ate' budödë' luyú na' lu ná'agaquië' bönni' huen dxin para ilún gatsjé' len lë' le ulu'zi'ë, ate' guyijé' zi'tu' ga ni' bugá'anë' xidzé. **10** Cate' bidxín dza ulu'chibë' uva luyú na', gusöl-lë'ë tuë' bönni' gubáz queë' ga na' nacu'ë huen dxin na' para si'ë uláz queë' que le ulu'zi'ë, pero huen dxin na' gulúndë'ë lë' zi', en bulu'söl-lë'ë lë' cá'asö. **11** Leyúbölö gusöl-lë'ë ia'túë' gubáz queë', ate' légaquië' gulúndë'ë lë' ca' zi', en gulu'ë dö' queë', ate' bulu'söl-lë'ë lë' cá'asö. **12** Leyúbölö gusöl-lë'ë quégaquië' bönni' bunní gubáz queë', ate' bulu'dxië' ca' lë' huë', en bulu'béajë' lë' ní'ilö luyú na'.

13 Ní'irö guzá' ládxë'ë xani luyú na', gunnë': “¿Nacxi guntsa? Isöl-la'a zxí'ini caza' nadxi'ida'-bi' quégaquië'. Cate' ila'lé'enë'-bi', nadxi ca' ilunë'-bi' bal.” **14** Ní'irö, cate' yugu' bönni' huen dxin na' bila'lé'enë'-bi', gulún xtídza'gaquië' la' légacasë', ta'nnë': “Bi'i ni guequi queëbi' luyú ni. Guli'dá, gútiru'-bi', para guequi queëru' le ral-la' guequi queëbi'.” **15** Bulu'béajë'-bi' ní'ilö luyú na', en gulútië'-bi'.

‘Na'a, ¿nacxi caz gunë' xani luyú na' quégaquië'? **16** Guídë', en gútië' yugu' huen dxin na', ate' udödë' luyú queë' lu ná'agaca böñachi yúbölö.

Cate' böñachi nacuá' ni' bila'yöni lë ni, gula'nnë':

—¡Inná Dios biti' gaca caní!

17 Ní'irö buyúë' Jesús légaquië', rnnë':

—¿Bizxi sa'yéaj lë na' nazúaj lu guichi lá'ayi, rnna:

Guiój na' gula'rú'unë' bönni' huen zö'ö,
guiój ni chinaca guiøjlen squin zö'ö?

18 Núti'tës nu ibixi lahui guiój ni, quitsaj nu na', ate' nu bönni' tsöjbága' guiój ni lë', uzxuzzaj lë'.

Ca naca dumí ta'guizxaj lázagaca böñachi
(Mt. 21:45-46; 22:15-22; Mr. 12:12-17)

19 La' dza ní'isö, yugu' bixúz unná bë' len bönni' yudo' tu'sédinë' gula'zóa gula'bö'ë ila'zönë' Jesús, tu' téquibe'enë' gunnë' quégaquië' lë na' bucúdu'ë didza', pero guládxinë' bi ilún böñachi zián nacuá' ni'. **20** Ní'irö bulu'yúyenië' Jesús, en gula'söl-lë'ë yugu' bönni' para ulu'béajë' Lë' didza', bönni' ulu'lui'i cuíngaqüië' ca bönni' tsahui', para ilunë' ga bi innë' Jesús, para gaca ulu'dödë' Lë' lu në'ë bönni' rinná bë'enë' uláz queë' César. **21** Para ilunë' caní, gula'nábinë' Jesús, ta'nnë':

—Bönni' Usedi', nöztu' rnno' le nácatë, en rusédinu' le nácatë, en biti' ruchi'a rusörö' ca naca le tu'lui'isö lahui böñachi, pero idütë li naca ca rusédinu' xibá queë' Dios. **22** Gudíxjöri'i netu'. ¿Naru' run bayudxi quizzaj laztu' queë' César, bönni' Roma rinná bë'ë, o cabí?

23 Réquibe'enë' Jesús le té'ënne' ilunë' queë', ate' rë' légaquië':

—¿Bizx que rizi' bë'ëli' neda'? **24** Bulu'lui'itsöqui' neda' tu dumí ridá. ¿Nuzxi lahui da' lë'e ni, en nuzxi le nazúaj ni?

Bulu'bi'ë didza', ta'nné':

—Queë' César na'.

25 Ní'irö Jesùs rë' légaquië':

—Buli'nödzaj queë' César le nequi queë' César, ate' queë' Dios le nequi queë' Dios.

26 Biti' guca ilunë' ga bi innë' Jesùs para gaca ulu'zéguïë' Lë' didza' lógaca bönachi zián na', pero bulu'báninë' ca naca didza' bubì'ë, ate' bulu'sayaj ruá'agaquië'.

Ca gaca quégaca nupa ulu'bán lu yöl-la' guti

(Mt. 22:23-33; Mr. 12:18-27)

27 Ní'irö yugu' bönni' yudo' saduceo, nupa na' ta'nná biti' ulu'bán nupa chinátigaca, bila'dxinë' ni', ate' gula'nabínë' Jesùs, ta'nné':

28—Bönni' Usedi, Moisés buzúajé' queérü' lu guichi, le rnna: "Channö gátië' nu bönni', ate' ugá'anamu nigula queë', en channö cuntu nu zoa bi'i queë', ní'irö bi'i böchi'bi' ral-la' s'i'bi'-nu nigula queë' na', para uzóabi' bi'i queëbi' böchi'bi' na' gútibí'." **29** Gula'cuá'abi' gadxi bi'i bönni' nácagacabí' böchi'bi', ate' bi'i zí'alö na' butsaga ná'alenbi' bi'i nigula, en gútibí', biti' zóabi' bi'i queëbi'. **30** Ní'irö bi'i buropi na' butsaga ná'alenbi'-nu nigula na', ate' gútibí' ca' bi'i ni, biti' zóabi' bi'i queëbi'. **31** Butsaga ná'alenbi'-nu bi'i bunni na', ate' la' tuz ca gulunbi' igáxitëbi', ate' gulatibí', biti' zóabi' bi'i quégacabí'. **32** Ga búdxitë, gütinu ca' nigula na'. **33** Na'a, cate' ulu'bán nupa chinátigaca, ¿núzxilöbi' guéquinu nigula na' queëbi', tu' bulu'tsaga ná'alenbi'-nu igáxitëbi'?

34 Ní'irö bubì'ë didza' Jesùs, rë' légaquië':

—Tu'tsága ná'agaca bönachi dza ni zóaru' na'a, en tu'nödzjë'-bi' zxí'inigaquië' para ulu'tsaga ná'agacabí'. **35** Na'a, nupa nácagaca lesaca' ulu'bán lu yöl-la' guti, en tsöjcuá' yöödzöliö si' gata', biti' ilún yöl-la' rizóalen nigula, en biti' ulu'tsaga ná'agaca. **36** Caní gaca, tu' cabirö ilati nupa na' ulu'bán lu yöl-la' guti, pero ilácagaca ca nácagaquië' gubáz lá'ayi queë' Dios, en ilácagaca zxí'ini cazé' Dios. **37** Ca na' ral-la' ulu'bán nupa chinátigaca, rulu' inë' rë'u Moisés caz ga na' nazúaj lu guichi ca naca que yaga yötsi' régui, ga ni' ru'ë didza' Xanru', rnne' náquië' Dios queë' Abraham, en Dios queë' Isaac, en Dios queë' Jacob. **38** Dios náquië' Dios, caléga quégaca nupa nátigaca tsaz, pero quégaca nupa nabángaca, tu' nabángaca lahuë' Lë' yúgu'të bönachi, sal-la' gulati luyú ni.

39 Ní'irö bulu'bi'ë didza' bal-lë' bönni' yudo' usedi, ta'nné':

—Bönni' Usedi, dxí'ado' gunnó'.

40 Bítirö bulu'rúguinë' ila'nabínë' Lë' didza'.

¿Nuzzxi zxí'ini náquië' Cristo?

(Mt. 22:41-46; Mr. 12:35-37)

41 Ní'irö Jesùs rë' légaquië':

—¿Nacxi caz na' ta'nné': "Cristo náquië' zxí' inë' David"? **42** David caz bë'ë didza' le nazúaj lu guichi lá'ayi ga nazúajgaca salmo, le rnna:

Xanru' Dios gudxë' Xana':

"Gurö'i cuita lë'a ibëla

43 cate' gunra' ga ulu'zechu zxí'bigaca lo' nupa ta'dá'baga' Li'."

44 David caz na' gunnë' queë' náquië' Xanë'. ¿Nacxi caz naca, rnñali' libí'ili' náquië' zxí' inë'?

Jesús ruzégu'i'ë diza' bönni' yudo' tu'sédinë'
(Mt. 23:1-36; Mr. 12:38-40; Lc. 11:37-54)

⁴⁵ Tsanni ni' yugu'të bönachi nacuá' ni' tu'zë nágagaca Jesús, rë' yugu' bönni' uséda queë'.

⁴⁶ —Guli'gún chi'i cuinli' quégaquië' bönni' yudo' tu'sédinë', tu' ta'yaza ládx'i'gaquië' ta'dë' nácugaquië' lari' tunna, en té'ënne' ulu'lidza bönachi légaquië' zxön gapa naca lu yë'ëyi, en ta'yaza ládx'i'gaquië' ca' ta'bö'ë lataj lo gapa tu'dubë' tu'sëdë' queë' Dios, en gapa ta'bö'ë tahuë'. ⁴⁷ Ta'güë' lídxigacanu nigula uzébido', ate' para ulu'lu'i tsahui' cuíngaquië', xidzé tu'lidzë' Dios. Yugu' bönni' ni, yénni'térö gunë' Dios ga ila'gu'i' ila'záquië'.

21

Gun le gulú'unu tu nigula yechi' lahuë' Dios
(Mr. 12:41-44)

¹ Ga na' zoe' Jesús chila yudo', guchisa lahuë', en rilé'enë' yugu' bönni' dë yöl-la' tsahui' quégaquië', ta'gu'ë dumí lu gu'i'na que dumí gun que yudo'. ² Bilé'enë' ca' tu nigula yechi' uzébido', rigú'unu chopá dumí lárido', le nazáca'gaca láti'do'os. ³ Rnnë' Jesús:

—Le nácaté rea' libí'ili', tu le zxöntérö gulú'unu nigula yechi' uzébido' ni ca ia'zíca'rö bönachi na' ta'gu'ë dumí. ⁴ Yugu'të', tscá le nadödi bë' dë quégaquië', gula'gu'ë dumí que yudo', pero nigula ni, lu yöl-la' yechi' queënu gulú'unu idútë le dë queënu, le ral-la' gáhuinu.

Riguíxjö'ë Jesús ca ulu'sunítië' yudo'
(Mt. 24:1-2; Mr. 13:1-2)

⁵ Nacuá' ni' nupa tu'i didza' ca naca que yudo' na', ca na' nazí'i biquitaj que, yugu' guiöj nazácalé'egaca, en yugu' gundo' nácagaca lachi, ate' Jesús rë' légaquië', rnñe':

⁶ —Yugu'të lë ni rilé'eli', huadxín dza cate' bíti'rö ugá'ana guiöj lahui luzë'e ni, tu' ulu'suníti bönachi yudo' ni.

Le ilaca bë' cate' si' idxín dza úksi
(Mt. 24:3-28; Mr. 13:2-23)

⁷ Ni'irö gula'nábinë' Jesús, ta'nnë':

—Bönni' Usedi, ¿bátaxi gaca lë ni? ¿Bizxi gaca bë' chizóa gaca caní?

⁸ Bubi'ë didza' Jesús, rnñe':

—Guli'gún chi'i cuinli', para cabí nu si' ye'e libí'ili', tu' ila'lá'gaquië' bönni' zián, en ila'zí'i lágaquië' ca lea' neda', ila'nnë' nácagaquië' Cristo, en ila'nnë': "Chizá' gala' dza úksi." Neda' rea' libí'ili': Biti' tséajlenli' légaquië'. ⁹ Cate' yönilli' raca gudil-la, en ta'dá'bag'a' bönachi yúlahui', biti' gadxi idzöbili', tu' run bayudxi ilaca le caní, pero biti' zuiténi dza úksi.

¹⁰ Ni'irö rë' ca' légaquië':

—Til-la tu yödzö len ia'tú yödzö, ate' bönachi tu ga nu rinná bë' ila'díl-lalen bönachi ia'tú ga nu rinná bë'. ¹¹ Tödigaca budó' zxu', ate' zián lataj gaca gubín, en ilatsaj yödzöhuë' zxön. Ila'lá' lahui lúzxiba le ilún gadxi bönachi, en le ilaca bë'.

¹² Zí'atélo cate' si' ilaca lë ni, ila'zón bönachi libí'ili', en ila'bía ládx'i'gaca libí'ili'. Ila'chë'ë libí'ili' gapa tu'dubë' tu'sëdë' queë' Dios para ilútië' libí'ili', en ila'gu'ë libí'ili' lidxi guíë. Ila'chë'ë libí'ili' lógaquië' bönni' ta'nná bë'ë, en lógaquië' bönni' lo, tu' dá'ali' neda'. ¹³ Gaca caní queëli' para séqui'li' gunli'

ba nalí quia' neda'. ¹⁴ Tsutsu guli'gún ládxí'li', para cabí cuéqui ícjali' zí'alö nacxi innalí' uláz queéli', ¹⁵ tu' gunna' queéli' didza' ubí'ili', en yöl-la' réajni'i, para cabí gaca ulu'cul-lë' libí'ili', en para cabí gaca bi ila'nné' que xtídfa'li' bönni' ni' biti' ila'lé'ené' libí'ili' dxi'a. ¹⁶ Ní'irö xuz quézili' ulu'död' libí'ili', en cá'anqueze yugu' bönni' böchí' quézili', en yugu' di'a dza que quézili', en yugu' böchí' luzé'e quézili', ate' ilútie' bál-lali'. ¹⁷ Yugu'té bönnachi ulu'zóa libí'ili' tsólá'alö tu' dá'ali' neda', ¹⁸ pero biti' initi nitú guitsa' ícjali'. ¹⁹ Channö ugá'analí' tsutsu, idéli'li' yöl-la' na'bán idú.

²⁰ 'Cate' ilé'eli' bönni' rójáquië' gudil-la nagú'ugaquie' lë'a Jerusalén, inózili' chibidxín dza initi yödzö ni. ²¹ Ní'irö nupa nacuá' luyú Judea ral-la' ila'zxunnaj ni, en tsójaca gapa naca guí'ado', ate' nupa nacuá' lu yödzö ni ral-la' ila'rúaj ni, ate' nupa nacuá' la' guixi', biti' ral-la' ulu'dxín lu yödzö ni. ²² Yugu' dza ni' Dios gunë' xíguia' nupa nacuá' yödzö ni para gaca yúgu'té le nazúaj lu guichi lá'ayi ca ral-la' gaca quégäquie'. ²³ Cate' idxín dza ni', bica' bayechi' yugu' nigula nuá'gacanu-bí' bí'ido' si' ilaljbi', en nigula tu'gáxdí'nu-bí' bí'ido', tu' ila'guí'i ila'záca'da' bönnachi nacuá' ni', ate' Dios gündë'ë bönnachi ni' xíguia'. ²⁴ Ilátië' ziánë' lu gudil-la na', ate' ila'chë'ë ia'bal-lë' nadzúngäquie' ga ila'dxinë' idútë yödzölió, ate' yödzö Jerusalén ni, ulu'léaj ulu'libë' le bönni' zi'tu', cate' izá'arö dza quégäquie'.

*Le ilaca bë' si' huödë' Bönni' Guljë' Bönachi
(Mt. 24:29-35, 42-44; Mr. 13:24-37)*

²⁵ Gunnë' ca' Jesús:

—Ni'irö ila'cuá' le ilaca bë' lu gubidza, en lu beo', en yugu' lu bólaj lúzxiba, ate' luyú ni ulu'chixi bönnachi, en iládxiguequi, tu' yön chi'i guziú' yu que nísado', en que le riyasa ridxía nisa na'. ²⁶ Ulu'dú ládxí'gaca lu yöl-la' radxi quégäquie' tu' ila'zá' ládxí'gaca quégäquie' le ral-la' ilaca lu yödzölió, en ila'zxizi le nalá'gaca lúzxiba. ²⁷ Ní'irö ila'lé'ené' neda', Bönni' Guljë' Bönachi, guída' lu böaj lúzxiba, dë lu na'a yöl-la' unná bë', ate' ilá'lahui yöl-la' zxön quia'. ²⁸ Cate' isí lo ilaca lë ni, buli'tipa ládxí'li', en guli'chisa lolí', tu' chizóa udxina' neda', para huöá'ua' libí'ili'.

²⁹ Jesús gudxe' ca' légaquie' tu le bucúdzü'ë didza', rnnë':

—Buli'yútsöca' ca raca que yaga higo, en que biti'tës yaga yübölö. ³⁰ Cate' rilé'eli' ta'lén ni'a në'e huë'ënido', nöz quézili' chizá' gala' cusu ba. ³¹ Lësca' caní, cate' ilé'eli' chitaca yugu' lë ni, inózili' chizá' gala' dza idinná bë'ë Dios luyú ni.

³² 'Le nácatë rea' libí'ili', biti' ilátigaca bönnachi ila'cuá' dza ni' cate' ilaca yúgu'té lë ni. ³³ Ila'dodi que lúzxiba, en que luyú ni, pero xtídfa'a, biti' tödi cásö, tu' idxín caz ca rnna.

³⁴ 'Guli'gún chi'i cuinli' para cabí güí'ili' lataj tsaza icja ládxí'do'oli' le gun ditaj libí'ili', lë na' naca yöl-la' rágulë'e, en yöl-la' rizudxi, en yöl-la' ruúbi rugu'i, para cate' idxín dza ni', cabí sóali' niti ladxi', ³⁵ en para cabí gaca queéli' ca tu le rizón bönnachi, ca naca le gaca quégäquie' yúgu'té bönnachi nacuá' idútë yödzölió. ³⁶ Que lë ni na', guli'sóa ban ladxi', en buli'lídzatica'së' Dios, para gaca uláñ' lu lë na' ral-la' ilaca, en para cabí utu'ili' cate' idxinli' lahua' neda', Bönni' Guljë' Bönachi.

³⁷ Lahui' dza rizóë' Jesús chila yudo', rusédinë' bönnachi, ate' chi'i dzö'ölö rirúaje' ni', en rejë' lu guí'ado' nazí'i le Guí'a Yaga Olivo. ³⁸ Yugu' zila bila'dxín yúgu'té bönnachi ga zoë' Jesús chila yudo' para ulu'zë nágagaca xtídzë'ë.

22

*Tun xtídza'gaquië' ilútië' Jesús
(Mt. 26:1-5, 14-16; Mr. 14:1-2, 10-11; Jn. 11:45-53)*

¹ Cate' chizóa idxín laní cate' tahuë' yöta xtila cabí nazí'i cúa zi que, nazí'i le Pascua laní na', ² bulu'dubé' yugu' bixúz unná bë' len bönni' yudo' tu'sédiné'. Ta'zóa ta'bó'ë ilútië' Jesús, pero biti' gula'zéqui'në' tu' tádxiné' bi ilún bönochí.

³ Ní'irö Satanás tu' xihui' yöjtsaga Judas. Judas lë' ca' Iscariote, en nababé' idxínnute' gubáz nasól-lë'ë Cristo. ⁴ Guyijé' Judas na', yójé'lené' didza' yugu' bixúz unná bë', en bönni' dë lu ná'agaquië' que yudo', nacxi guné' para udödë' Jesús lu ná'agaquië'. ⁵ Bulu'dzéjané' bönni' yudo' na', en gula'zí' lu ná'agaquië' ulu'nödzjé' queë' dumí. ⁶ Raza ládxé'ë Judas lë ni, ate' rizóa ribö'ë udödë' Jesús lu ná'agaquië' bagáchí'sö.

Le ráguru' le rusá' ládxí'ru' ca gútië' Xanru'

(Mt. 26:17-29; Mr. 14:12-25; Jn. 13:21-30; 1Co. 11:23-26)

⁷ Bidxín dza na' tahuë' yöta xtila cabí nazí'i cúa zi que, cate' ral-la' ilútië'-ba' bō'cu' zxila' le tahuë' dzö' Laní Pascua. ⁸ Jesús gusól-lë'ë Pedro, en Juan, rnñë':

—Guli'tséaj, guli'tsöjpá'a queëru' le gáguru' dzö' Laní Pascua.

⁹ Të' Lé':

—¿Gazxi rë'ënú' tsöjpá'atu' queëru'?

¹⁰ Jesús rë' légaquië', rnñë':

—Buli'yútsöca', cate' tsú'uli' lu yödzö ni, irúajé' tu bönni' dutságuië' libí'ili', söjnu'ë tu rö'ë nisa. Guli'tséajlené' ga idxínteli' yu'u ga tsázië'. ¹¹ Guli'guíë' xan yu'u na': “Bönni' Usedi rë' li': ¿Gazxi zoa yu'u laní ga gágulena' yugu' bönni' usëda quia' dzö' Laní Pascua?” ¹² Ní'irö ulu'inë' libí'ili' tu yu'u zxön xitsá' ga ni' chinabá'a. Buli'pá'a ni' le gáguru'.

¹³ Ní'irö yójáquië', en yójaxáca'gaquië' ca na' chigudxë' Jesús légaquië', ate' bulu'pë'ë ni' le ilahuë' dzö' Laní Pascua.

¹⁴ Cate' bidxín dzö' na', gurö'ë Jesús ga ilahuë', ate' bönni' gubáz queë' na' gula'bö'lené' Lë' tsözxöñ. ¹⁵ Ní'irö Jesús rë' légaquië':

—Gúcada' ládx'a'a gágulena' libí'ili' tsözxöñ xtsö' ni zí'atélö cate' si' qui'i saca'a, en gátia'. ¹⁶ Rea' libí'ili': Bítirö' gahua' lë ni cate' idxinxrö dza gaca le rulu'isö xtsö' ni ga ni' rinná bë'ë Dios.

¹⁷ Gudélië'ë Jesús tu zxíga'do', en gudxë' Dios: “Xclenu’.” Ní'irö rë' légaquië':

—Guli'sí' lë ni, en guli'guí'aj lati' huéaj, ¹⁸ tu' rea' libí'ili': Bítirö' guí'ja' xisi uva cate' idxinxrö le rinná bë'ë Dios.

¹⁹ Ní'irö gudélië'ë yöta xtila, en gudxë' Dios: “Xclenu’.” Gudödi ni' buzzuxjé' le, en bë'ë que queégäquië', rnñë':

—Lë ni naca idútë le naca' le rudöda' uláz queëli'. Guli'gún caní para usá' ládx'i'li' nedá'.

²⁰ Cate' budxi gulahuë', lësca' caní bë'ë didza' que zxíga'do' na', rnñë':

—Zxíga'do' ni rulu'i ca naca didza' cubi ruca'ana tsahui', ate' rön quia' run tsutsu le, rön na' ilalaj ni'a queëli'.

²¹ 'Na'a, bönni' na' udödë' neda' lu ná'agaca bönochí rö'ë rágulené' neda' tsözxöñ. ²² Le nácatë huayija' ga ilútië' neda', Bönni' Guljé' Bönochí, en gaca quia' ca na' nazúaj lu guichi lá'ayi ca ral-la' gaca quia', pero bica' bayechi' bönni' na' udödë' neda'.

²³ Ní'irö gula'sí lógaquië' ta'nábinë' Lë' tu tuë', ta'nnë':

—¿Núzxilötu' nu gun caní?

Tui'i xtída'gaquië' núzxilögaquië' gáquië' lo

²⁴ Ní'irö gulu'ë didza' la' légaracasë' núzxilögaquië' idéli'në' lataj lo. ²⁵ Jesús geduxë' légaquië':

—Yugu' bönni' unná bë' tu'gunë' dxin yöl-la' unná bë' quégaequië', ta'nná bë'enë' böñachi, ate' nupa ni dë lu ná'agaca yöl-la' unná bë', légaquië' bönni' tácalen. ²⁶ Libí'ili' biti' ral-la' gunli' caní, pero nu naca lo ládjali' ral-la' gaca ca nu naca cuídi'terö, ate' nu rinná bë' ral-la' gaca ca nu run dxin quéguequi luzë'e. ²⁷ ¿Núzxilö na' nácarö lo, nu na' rö'ö ragu, o nu rupá' la' huagu? ¿Naru' calëga nu na' rö'ö ragu nácarö lo? Neda' zóalena' libí'ili' ca nu rupá' la' huagu.

²⁸ 'Libí'ili' ni guzóalenli' neda' cate' ni' bi guca quia', yugu' le gula'zí' bë' neda'. ²⁹ Que lë ni na' udöda' lu ná'alí' tu ga inná bë'ëli', ca na' benë' Xuza', budödë' lu na'a ga inná bë'a neda'. ³⁰ Caní guna' para gaca cö'öli', en guí'aj gágulenli' neda' ga ni' inná bë'a, ate' cö'öli' xilataj cázali' ga uchi'a usöröli' idxinu cö' zxi'ini xi'soë' Israel.

Rnnë' Jesús innë' Pedro biti' núnbeë'ë Lë'

(Mt. 26:31-35; Mr. 14:27-31; Jn. 13:36-38)

³¹ Gunnë' ca' caní Xanru':

—Simón, Simón. Buyútsöca'. Chigunaba Satanás tu' xihui' libí'ili', para urixi udödi libí'ili' ca nu rurixi rudödi zxoa' xtila, ³² pero chibulidza'-në' Dios, en gunábida' Lë' gácalenë'li', para cabí údxi udú yöl-la' réajlë' quiu' neda'. Na'a, cate' huoácu' quia', butipa ládxí'gaquië' böchi' luzó'o.

³³ Pedro rë' Lë':

—Xan, chizóa' sá'lena' Li', calégasö tseja' lidxi guíë, pero lësca' gátilena' Li'.

³⁴ Jesús rë' lë':

—Pedro, rea' li': Zí'älö cödxiba' böra na'a, chigudá'bagu'u tsonna luzuí, innö' cabí núnbeë'u neda'.

Le beneë' Jesús cate' chizóa ilútië' Lë'

³⁵ Jesús gunábinë' légaquië', rnneë':

—Catí' gusöl-la'a libí'ili' cabí nuá'alí' yöoxaj yöta, en caléga buzudi dumí, en caléga chopá cö' xiráchuli', ¿naru' bi biyadzaj queëli'?

Légaquië' ta'nnë':

—Biti' bi.

³⁶ Ní'irö rë' légaquië':

—Na'a, nu dë yöoxaj yöta que ral-la' guá' le, ate' lësca' caní ral-la' gun nu dë que buzudi dumí, ate' nu biti' dë que guíë tuchi' ral-la' guti' lari' rixóa yeni, en si' tu guíë tuchi'. ³⁷ Rea' libí'ili': Run bayudxi gaca quia' lë na' nazúaj lu guichi lá'ayi, rnna: "Guluné' queë' ca tunë' quégaca nupa tua' dö", ate' ilaca yúgu'te le nazúajgaca lu guichi ca ral-la' gaca quia'.

³⁸ Ní'irö légaquië' ta'nnë':

—Xan, ni dë chopá guíë tuchi'.

Lë' rë' légaquië':

—Chinaca.

Jesús rulidze' Dios la' yëla Getsemani

(Mt. 26:36-46; Mr. 14:32-42)

³⁹ Ní'irö birúajë' Jesús, en ca run cazë' sa'yéajë' lu Guí'a Yaga Olivo, ate' yugu' bönni' usëda queë' söjácalenë' Lë'. ⁴⁰ Cate' bila'dxinë' ni', Jesús rë' légaquië', rnneë':

—Bulí'lídze' Dios, inábili'-në' cabí gata' lataj si' bë' tu' xihui' libí'ili'.

41 Ní'irö Jesús guzé'ë ga na' nacu'ë, en gudödë' ia'lati' tsca ga ridxín tu guiöj rirú'uniru', ate' ni' buzóa zxibë', en rulidzë' Dios. **42** Rnnë':

—Xúz, channó rë'ënu', bucuásá ga zoa' lë na' ral-la' quí'i saca'a, pero calëga ca rë'ënda' neda', pero ca rë'ënu' Li' gunu'.

43 Ní'irö bului'ì lahuë' gubáz lá'ayi queë' Dios, zë'ë yehua' yubá, ate' butipë' ládxë'ë Jesús. **44** Lu yöl-la' risëbi ladxi' queë', idú ládxë'ë Jesús bulidzë' Dios, ate' nisa yösa queë' guca a rön raba' luyú.

45 Cate' budxi bulidzë' Dios, guyasë', en bðajë' ga na' nacu'ë bönni' usëda queë', ate' duxáquië' légaquië' tásie' tu' tu'huí'inigaquië'. **46** Ní'irö Jesús rë' légaquië':

—¿Rásitsali? ¡Guli'chasa, en buli'lidzë' Dios! Inábili'-në' cabí gata' lataj si' bë' tu' xihui' libf'ili'.

Ta'zöne' Jesús

(Mt. 26:47-56; Mr. 14:43-50; Jn. 18:2-11)

47 Tsanni ni' ru'ë didza' Jesús, la' bila'dxintë' bönni' zián ni', ate' Judas, bönni' na' nababë' idxínnüe' bönni' usëda queë' Jesús dzáguïë' légaquië', ate' nanörue' lógaquië' bönni' zián na'. Gubígu'ë ga zoë' Jesús para utsaga lahuë' Lë'. **48** Ní'irö Jesús rë' lë':

—Judas, ¿naru' rudöditso' caní neda', Bönni' Guljë' Bönachi, rutsaga lo' neda'?

49 Cate' yugu' bönni' na' nacuá'lenë' Jesús bila'lé'enë' ca na' raca queë' Lë', té' Lë':

—Xan, ¿naru' güí'itu' légaquië' guíë tuchi'?

50 Tuë' bönni' usëda queë' Jesús benë' huë' guídi náguië' bönni' huen dxin queë' bixúz lo. Burixë' guídi náguië' ibëla. **51** Jesús rnnë':

—Chinaca na'a. Tsca' gaz.

Gudanë' Jesús guídi náguië' bönni' huen dxin na', en bunë' le. **52** Ní'irö rë' yugu' bixúz unná bë', en bönni' dë lu ná'agaquië' que yudo', en bönni' gula tu'zéajni'inë', bönni' na' biti' ta'lé'enë' Lë' dxíl'a, rnnë':

—¿Narúajtsali' nuá'ali' guíë tuchi', en yaga para sönlí' neda' ca runli' rizönlí' në' gubán? **53** Yugu' dza guzóalen caza' libí'lli' chila yudo', ate' biti' bi benli' quia', pero na'a chibidxín dza queëli', le naca dza dë lu në'e nu na' zoa lataj chul-la.

Rnnë' Pedro: "Biti' núnbe'a-në' Jesús"

(Mt. 26:37-58, 69-75; Mr. 14:53-54, 66-72; Jn. 18:12-18, 25-37)

54 Ní'irö gula'zöne' Jesús, en gula'chë'ë Lë' ga na' bulu'sudxinë' Lë' lidxë' bixúz lo. Pedro yöjinahuë' Jesús zi'tu' zi'tu'sò. **55** Cate' ni'a në'ë bixúz lo chigula'béquië' guí' ló'a lidxë' bixúz lo na', gula'bö'ë idú gásibi'ilö ra' guí' na', ate' Pedro gurö'lenë' légaquië' tsözxon. **56** Cate' tubi' bi'i nigula huen dxin bilé'ebi'-në' Pedro, ni' rö'ösë' ra' guí', buyubi' lë', en rnnabi':

—Bönni' ni dë'ë ca' Jesús.

57 Gudá'baguië' Pedro, rnnë':

—Nigúla, biti' ca' núnbe'a-në' bönni' na'.

58 Ia'lati' gudzé ia'túë' bönni' bilé'enë' Pedro, ate' rnnë':

—Li' do'o ca' légaquië'.

Pedro gunnë':

—Bönni', calëga neda'.

59 Ia'láti'sò gudzé, gunnë' ia'túë' bönni':

—Le nácatë bönni' ni dë'ë Jesús, tu' náquïë' bönni' Galilea.

60 Ní'irö Pedro gunnë:

—Bönni', biti' nözdä' bizxi na' ru'u didza' que.

Tsanni ni' ru'ë didza' ni, la' gurödxitebä' böra. **61 Ní'irö buécjë' Xanru'**, en ruyü'ë Pedro, ate' yöjneneë' Pedro xtídzë'ë Xanru', ca na' gudxë' lë: "Zí'alö cödxiba' böra na'a, li' chigudá'bagu'u tsonna luzui, innó' biti' núnbeë'u neda."

62 Burúajë' Pedro ní'ilö, ate' rön caz gurödxë'.

Tu'titjë' Jesús

(Mt. 26:67-68; Mr. 14:65)

63 Yugu' bönni' na' nazöngaquië' Jesús bulu'titjë' Lë', ate' gula'guinë' Lë'.

64 Ní'irö bulu'sayjë' lahuë' Jesús, ate' gula'gápë'ë lahuë', en gula'nábinë' Lë', ta'nnë':

—Gunnëya'atsöca! ¿Nuzxi na' gudapa' Li?

65 Ziánrö ca' gula'nnë' queë' le gulu'ë dö' queë'.

Ridxinë' Jesús lógaquië' bönni' yudo' tu'ch'i a tu'söröë'

(Mt. 26:59-66; Mr. 14:55-64; Jn. 18:19-24)

66 Cate' chizá' rení' dza na', bulu'dubë' bönni' gula tu'zéajni'inë' böñachi judío len yugu' bixúz unná bë', en bönni' yudo' tu'sédinë', ate' gula'chë'ë Jesús lógaquië' bönni' yudo' tu'ch'i a tu'söröë', ate' gula'nábinë' Lë', **67 ta'nnë':**

—Gudíxjöi' i netu'. ¿Naru' nactso' Li' Cristo?

Jesús rë' légaquië':

—Channö guía' libíili' naca' Cristo, biti' tséajlë'ëli' neda', **68** en channö inábida' libíili' tu didza', biti' ubíili' didza', en biti' usanli' neda'. **69** Na'a isí lo, neda', Bönni' Guljë' Bónachi, cö'a cuita lë' ibëla Dios, nápatérë' yöl-la' unná bë'.

70 Gula'nábinë' Lë' yúgu'të', ta'nnë':

—¿Naru' nactso' Li' Zxi'inë' Dios?

Lë' gudxë' lógaquië':

—Le nácasö rnñali'.

71 Ní'irö ta'nnë':

—¿Núzxirö naquíniru' nu gun ba nalí queë'? La' rë'usö chibiyóniru' didza' ru'ë.

23

Ridxinë' Jesús lahuë' Pilato, bönni' rinná bë'ë uláz queë' César

(Mt. 27:1-2, 11-14; Mr. 15:1-5; Jn. 18:28-38)

1 Ní'irö gulazuinë' yúgu'të bönni' zián ni', ate' gula'chë'ë Jesús lahuë' Pilato,
2 ga ni' gula'sí lógaquië' tu'zéguïë' Lë' didza', ta'nnë':

—Bönni' ni, budzölitu' ca runë'. Runë' ga ta'dá'baga' böñachi uládz queëtu' yúlahui', en ruzágüë'ë xinözigaca nupa ta'guízxaj laz ruquízxjë' César, en rnñë' lë caze' näquië' Cristo, bönni' ral-la' inná bë'ë.

3 Ní'irö Pilato gunábine' Jesús, rnñë':

—¿Naru' nacu' Li' nu inná be'e böñachi judío?

Bubi'ë didza' Jesús, rnñë':

—Le nácasö rnno'.

4 Ní'irö Pilato gudxë' yugu' bixúz unná bë', en böñachi nacuá' ni', rnñë':

—Biti' bi rudzölidä' le naca xíguia' nunë' bönni' ni.

5 Ní'irö gulunrë' tsutsu xtídzä'gaquië', ta'nnë':

—Runë' ga tu'tsatsa böñachi, en rusédinë' caní böñachi idú luyú Judea. Gusí lahuë' benë' caní luyú Galilea ga ridxitë runë' ca' ni.

Ridxiné' Jesús lahué' Herodes, bönni' rinná bë'ë luyú Galilea

6 Cate' biyönné' Pilato didza' ni, tu'ë didza' que luyú Galilea, ní'irö gunábiné' légaquië' channö näquië' Jesús bönni' Galilea. **7** Cate' gunóziné' nababé' Jesús ga ni' rinná bë'ë Herodes, gusöl-lë'ë Lë' lahué' Herodes na', tu' zoë' ca' Herodes Jerusalén yugu' dza na'. **8** Cate' Herodes na' bilé'ené' Jesús, budzéjanë', tu' chiguca xidzé ré'ënë' ilé'ené' Lë' tu' chibiyönné' le zián ca naca queë' Jesús, en runé' löza ilé'ené' tu yöl-la' huáca gunë'. **9** Ní'irö Herodes gunábiné' Jesús le zián, pero Jesús biti' bi didza' bubüë'. **10** Nacu'ë ca' ni' yugu' bixúz unná bë', len bönni' yudo' tu'sédinë', ate' bulu'zéguidé' Jesús didza'. **11** Ní'irö Herodes, en bönni' queë' rójäquië' gudil-la bulu'cá'ané' Jesús cá'asö, en para ulu'titjé' Lë', bulu'gacuë' Lë' tu lari' nazaca' ca rácuë' tu bönni' unná bë', ate' leyúbölö bulu'sudxiné' Lë' lahué' Pilato. **12** Dza na' bulu'dzáguië' dxi'a Pilato, en Herodes, tu' zí'alö gula'lé luzë'ë tuë' ia'túë'.

Ta'chúguië' queë' Jesús gátië'

(Mt. 27:15-26; Mr. 15:6-15; Jn. 18:39-19:16)

13 Ní'irö butubë' Pilato yugu' bixúz unná bë', en bönni' dë lu ná'agaquïë', en bönochí lu yödzö, **14** ate' ré' légaquië':

—Dujuá'ali'-në' bönni' ni lahua' neda', rrnali' queë' runë' ga tu'tsatsa bönochí, pero cate' gunabi yúxdixa'-në', ate' zóatéli' ca' ni, biti' bi budzölidá' le naca xíguia' nabáguë'ë, yugu' lë na' ruzéguili'-në' didza'. **15** Cate' gusöl-la'a libí'lli' lahué' Herodes, biti' bi budzölinë' le benë' bönni' ni le naca xíguia' nabáguë'ë para nu ichugu queë' gátië'. **16** Na'a usaca' zí'a-në', ate' tödi na' usana'-në'.

17 Run bayudxi tu le gunë' Pilato, usanë' lu ná agaca bönochí tuë' bönni' nadzunë' cate' raca laní na', ca na' run cazë'. **18** Ní'irö gulu'ë zidzaj didza' yúgu'të bönni' nacu'ë ni, ta'nnë':

—Bëtië' bönni' ni, en busanë' queëtu' Barrabás.

19 Nadzunë' Barrabás na' lidxi güié tu' gudíl-lalenë' yúlahui' lu yödzö na', en tu' bëtië' bönochí. **20** Bulidzë' Pilato légaquië' leyúbölö, tu' ré'ënë' usanë' Jesús.

21 Leyúbölö gulu'ë zidzaj didza', ta'nnë':

—¡Budë'ë lë'e yaga cruz! ¡Budë'ë lë'e yaga cruz!

22 Ní'irö Pilato gudxé' légaquië' le bunni luzuí, rrnë':

—¿Bizxi caz le ruá' dö' benë' bönni' ni? Biti' bi budzölidá' nunë' le run ga nabáguë'ë xíguia' gátië'. Usaca' zí'a-në', ate' ní'irö usana'-në'.

23 Zídzajrò gulu'ë didza', ta'nabé' të'ë Jesús lë'e yaga cruz. Tu' gula'bödxí'ë yenni' yugu' bönni' na', en yugu' bixúz unná bë', gula'déli'në' gaca ca na' të'ënnë'. **24** Ní'irö Pilato guchúguïë' queë' Jesús, para gaca queë' ca na' ta'nabé'.

25 Busanë' quégaquië' bönni' na' nadzunë' lidxi güié tu' gudíl-lalenë' yúlahui', en bëtië' bönochí, bönni' na' chigula'nabé', ate' budödë' Jesús para gaca queë' ca na' të'ënnë'.

Dë'ë Jesús lë'e yaga cruz

(Mt. 27:32-44; Mr. 15:21-32; Jn. 19:17-27)

26 Cate' ni' ta'chë'ë Jesús tsöjdá'gaquïë' Lë' lë'e yaga cruz, gula'zönë' Simón, bönni' yödzö Cirene, suzë'ë la' guixi', ate' gula'xóë' yen zxicjé' yaga cruz na' para gu'ë le, en tsejé' cíduzulë' Jesús.

27 Bönochí zián, enca' yugu' nigula söjnögaca Jesús, ta'bödxinu nigula na', en ta'bödxí yéchi'nu queë' Lë'. **28** Ní'irö buécjé' Jesús, en ruyúë' légacanu, ate' ré' légacanu:

—Libí'ili' nigula Jerusalén. Biti' códxilí' quia' neda', pero guli'códxi que quézili', en quégacabi' zxi'inili' ²⁹ tu' huadxín dza ila'nná: "Bica' bágaca yugu' nigula huöd, en nigula biti' guluá'anu-bí' bí'ido', en biti' bulu'gádxí'nu-bí' bí'ido'." ³⁰ Ní'irö ila'sílögaca ila'nná böñachi, ilë' yugu' guí'a sibi: "Guli'dubága' netu", en ilë' ca'yugu' guí'ado': "Guli'cachí'netu'." ³¹ Channö canítuné' quia' neda', naca' ca tu yaga ya'a, ¿naru' cabí ilúnteré' ca' queëli', nácali' ca yaga bidxi?

³² Gula'chë'ee ca' chopé' bönni' tuá' dö', para ilútié' légaquië' tsözxón len Jesús.

³³ Cate' bila'dxinë' lataj nazfí le Calavera, le rnna len didza' xidza' Lataj Que Böga' Ícjaru', bulu'dé'ee Jesús lë'e yaga cruz. Bulu'dé'ee ca' lë'egaca yaga cruz chopé' bönni' tuá' dö'. Tué' bulu'dé'ee cuita lë'ibëla Jesús, en ia'túë' bulu'dé'ee cuita lë'ë yögöla. ³⁴ Ní'irö Jesús rnne':

—Xuz, buniti lo légaquië', tu' cabí nözguequinë' bi tuné'.

Bönni' rójáquië' gudil-la nacu'ë ni' bulu'lë'ë que queëgaquië' le nácuë' Jesús, en bulu'quitjë' le gaca bë' lahuí. ³⁵ Bönachi nacuá' ni' tu'yú, en yugu' bönni' dë lu ná agaquië' bulu'titjë' Jesús, ta'nné':

—Yugu' nu yübölö busölë' bönni' ni. Na'a ral-la' usölä cuinë' channö náquië' Cristo, bönni' gurö cazé' Dios.

³⁶ Yugu' bönni' na' rójáquië' gudil-la bulu'titjë' ca' Jesús. Gula'biguë'ee ga na' zoë', en bulu'guí'je' Lé' nupi zi, ³⁷ ta'nné':

—Channö nacu' Li' bönni' inná bë'enë' böñachi judío, busölä cuinu'.

³⁸ Da' ca' lë'e yaga cruz icjlé' Jesús tu le nazúaj lu guichi lu didza' griego, en lu didza' latín, en lu didza' hebreo, le rnna caní: "Bönni' Rinná Bé'enë' Bönachi Judío." ³⁹ Tué' bönni' huiá' dö' na' dë'ë lë'e yaga cruz bulidza zi'ë Jesús, rnne':

—Channö nacu' Li' Cristo, busölä cuinu', enca' netu'.

⁴⁰ Bubi'ë didza' ia'túë' bönni' huiá' dö' na', en gudil-lë' luzë'ë na', rnne':

—¿Naru' cabí rádxinu'-në' Dios? Lësca' lí' narugu quiu' gátiu'. ⁴¹ Le nácatë rë'u, le rál-la'sö gaca queëru' rigu'i rizáca'ru', ca na' sa'yéaj dö' biá'aru', pero Bönni' ni, biti' bi dö' nu'ë.

⁴² Ní'irö bönni' ni rë' Jesús:

—Yöjnë neda' cate' idxinu' ga ni' inná bë'u.

⁴³ Jesús rë' lë':

—Le nácatë rea' li', na'a dza ni sóalenu' neda' lataj lachi quia'.

Ratië' Jesús

(Mt. 27:45-56; Mr. 15:33-41; Jn. 19:28-30)

⁴⁴ Cate' bidxín idú huagubidza, guchul-la idútë yödzölió ga bidxinrö idú ridödi xihuö. ⁴⁵ Guchul-la gubidza, ate' lari' nal-la' lu yudo' biröza' chopa dí'ilö. ⁴⁶ Ní'irö bë'ë zidzaj didza' Jesús, rnne':

—Xuz, rigu'a lu no'o bò' naca caza'.

Cate' budxi gunnë' caní, birúajtë bò' naca cazé', gútië'.

⁴⁷ Cate' bönni' rinná bë'enë' bönni' rójáquië' gudil-la bilé'enë' ca na' guca, gulu'ë Dios yöl-la' ba, rnne':

—Le nácatë bönni' ni gúquïë' bönni' tsahui'.

⁴⁸ Cate' yúgu'të bönni' nacu'ë ni' tu'yúë' bila'lé'enë' lë' na' guca, yöjhüöjgaquië' yödzö, ta'gapa' luchú'ugaquië' tu' tu'báninë'. ⁴⁹ Zí'tu'sö bulu'gá'ana yúgu'të nupa ni' núnbë'gaca Jesús, en yugu' nigula na' yójácalennu' Lë' cate' ni' gudë' luyú Galilea, ate' tu'yúë' lë ni raca.

Rigáchë'ee Jesús yero ba

(Mt. 27:57-61; Mr. 15:42-47; Jn. 19:38-42)

50 Zoë' ca' ni' tu bönni' yödzö Arimatea que luyú Judea, lë' José. Bönni' ni näquië' dxi'a, en tsahui', en nabábalenë' yugu' bönni' yudo' tu'chi'a tu'söröe'. **51** Biti' bené' tuz nupa na' gula'chugu queë' Jesús gátië', tu' ribözë' ca' José ni le rinná bë'ë Dios. **52** Ní'irö guyijë' José na' lahuë' Pilato, en gunabë' lataj u'ë Jesús. **53** Cate' chinuzötje' Lë', buchölinë' Lë' lari', ate' gulu'ë Jesús yero ba, le nadaj lë'e guí'a guiøj, ate' lu ba na', cuntu nu nagüi'iguequinë'. **54** Dza na' naca dza tu'pé' que dza lá'ayi quégäquië' bönni' judío, tu' si' idxín dza na'.

55 Yójacanu ca' ni' nigula na' gula'zá'lennu Jesús, cate' ni' gudë' luyú Galilea, ate' bila'lé'enu yero ba na', en ca na guca, gula'gu'ë Lë' ni'. **56** Cate' yöjhüöjgacanu yu'u, bulu'pá'anu nöri rilá' zxixi, en yugu' le za rilá' zxixi. Ní'irö bulu'zí' ladxí'gacanu dza lá'ayi na' quégäquië' bönni' judío ca na' rinná bë' xibá queë' Dios.

24

Rubanë' Jesús lu yööl-la' guti (Mt. 28:1-10; Mr. 16:1-8; Jn. 20:1-10)

1 Cate' bidxín dza risí lo ia'gadxi dza na', cate' ni' naca zílado', bila'dxinnu nigula na' ra' yero ba queë' Jesús. Nuá'gacanu yugu' le rilá' zxixi, lë na' chinupá'agacanu, ate' dzágagacanu légaracanu ia'bál-lanu nigula. **2** Cate' bila'dxinnu ni', bila'lé'enu chinadúa guiøj na' gudá' ga nu riyaza yero ba queë'. **3** Cate' gula'yázana yero ba na', biti' bulu'dzölinu zoa Xanru' Jesús ni'. **4** Cate' ni' ta'bö'önü bönniga ni'a que lë ni, chopë' bönni' nácagaquië' lari' répi yösa bení' la' bila'dxintë' ni', en gula'zuínë' ga na' nacuá'anu. **5** Ní'irö guládxinu, en bulu'zötäj ícjagacanu, tu'yunu lu yu, ate' chopë' gubáz lá'ayi na' té' légaracanu, ta'nné':

—¿Bizx que ruguíajlí' nu zoa nabán xilataj nu nati? **6** Biti' zoë' ni, tu' chibubanë'. Guli'tsöjnë lë na' chigudxi cazë' libí'ilí' cate' ni' zoë' luyú Galilea. **7** Gunnë': "Run bayudxi nu udödi neda', Bönni' Guljë' Bönachi, lu ná'agaquië' bönni' dul-la', ate' ulu'dë'ë neda' lë'e yaga cruz, ate' ubana' cate' gaca tsonna dza."

8 Ní'irö yöjnégacanu didza' na' bë'ë Jesús, **9** ate' bulu'zá'anu ra' yero ba na', yöjtíxjö'iguequinu idxinéajtë' bönni' gubáz queë' Cristo, en ia'zíca'rë' ca', ca naca lë na' guca. **10** Nigula na' yöjtíxjö'iguequinu bönni' gubáz na' yugu' lë ni, nácagacanu María Magdalena, en Juana, en María, xinë'ë Jacobo, en ia'bál-lanu nigula na' dzágagacanu légaracanu. **11** Guléquinë' bönni' gubáz na' tu'ínu didza' chixi, en biti' gula'yéajlë'ë légaracanu.

12 Ní'irö guyasë' Pedro, en carelö sa'yéajë' ra' yero ba na'. Cate' buyúë' lu ba na', bilé'enë' yugu' lári'sö nacuá' ni', ate' ní'irö böajë' lidxë', rubáninë' ca naca lë na' guca.

Le guca la' nöza ridxitë Emaús (Mr. 16:12-13)

13 La' dza ná'asö söjáquië' chopë', yú'ugaquië' nöza le ridxitë Emaús, le rõ'ë ca chopa hora riza'aru' Jerusalén. **14** Yú'ugacasë' ca' nöza, tu'ë didza' ca naca yúgu'të lë na' guca. **15** Tsanni ni' yú'ugaquië' nöza, tu'ë didza' la' légaracasë', gubigu'ë gala' Lë cazë' Jesús, ate' gudálenë' légaquië' tsözxón. **16** Biti' bulu'ünbe'ë Lë' tu' naca ca tu le nabaga' guiøj lógaquië'. **17** Ní'irö Jesús gunábinë' légaquië', rnñë':

—¿Bizxi didza' na' ruí'ilí' la' libí'isili' yú'uli' nöza? ¿Bizx que na' ruhuí'inili?

18 Bubi'ë didza' bönni' na' lë' Cleofas, rë' Lë':

—¿Nácatso' bönni' zi'tu' lu yödzö Jerusalén, en tuzu' li' biti' nözinu' lë na' guca néaje nasi ni'?

19 Ní'irö Jesús rë' légaquië:

—Bízxi na' guca?

Të' Lë':

—Lë na' guca queë' Jesú, bönni' Nazaret. Gúquië' bönni' bë'ë didza' uláz queë' Dios, ate' len yöl-la' huáca zxön benë' dxin, en bë'ë didza' lahuë' Dios, en lógaca yúgu'të böñachi. **20** Yugu' bixúz unná bë', len bönni' ta'nná bë'enë' netu' bulu'dödë' Lë', en gulunë' ga nu guchugu queë' gátië', ate' bulu'dë'ë Lë' lë'e yaga cruz. **21** Netu' bentu' löza gúquië' Lë' bönni' na' ral-la' huöá'uë' böñachi Israel, pero na'a chiguca tsonna dza cate' gulaca lë ni. **22** Ia'stú, bál-lanu nigula nútsa'gacanu netu' gulunnu ga gurö' ötu' böñiga. Yójácanu ra'yeru ba queë' cate' si' gulén gubidza na' dza, **23** en cate' biti' bulu'dzölinu Lë', buduhuöjgacanu, en gulénu netu' bila'lé'enu yugu' gubáz lá'ayi queë' Dios, nupa ni' gulé' légacanu zoë' nabane' Jesú. **24** Ní'irö bal-lë' bönni' luzá'atu' yójáquië' ra' yeru ba na', en bila'lé'enë' naca ca na' gula'nnanu nigula na', pero biti' bila'lé'enë' Jesú.

25 Ní'irö Jesús gudxë' légaquië:

—Libi'ili', bönni' biti' réajni'ininë'. Nazidi icja ládzi'do'oli' para cabí tséajlé'ëli' yúgu'të le gula'nné' bönni' gulu'ë didza' uláz queë' Dios. **26** ¿Naru' cabí ben bayudxi qui'i sáquë'ë Cristo yugu' lë ni, en tsázië' ga ni' tsépisëterë'?

27 Ní'irö gusí lahuë' Jesú riguíxjö'i'inë' légaquië' yúgu'të le ruí'i didza' ca naca queë' le nazúajgaca lu guichi lá'ayi, ca na' gusí lo bë'ë didza' Moisés ga bidxintë yugu' le gula'nné' yúgu'të bönni' gulu'ë didza' uláz queë' Dios.

28 Cate' bila'dxinë' yödzödo' ga na' söjáquië', benë' Jesú ca tu bönni' zéajtëre' zi'tu'. **29** Gulunë' bayudxi ugá'analenë' légaquië', ta'nnë':

—Bugá'analen netu', tu' chiridzö' na'a, en chizóa gal-la.

Ní'irö guyázië' Jesú yu'u, en bugá'analenë' légaquië'. **30** Cate' ni' Jesú rö'ë rágulenë' légaquië', gudélë'ë yöta xtila, en gudxë' Dios: "Xclenu.". Ní'irö buzzuzxjë' le, en bë'ë quégäquië'. **31** La' ni'isö bidúa lë na' gubaga' guiój lógaquië', ate' bulu'únbe'ë Jesú, ate' Lë' buniti cuinë' lógaquië'. **32** Ní'irö gulë luzë'ë tuë' ia'tué':

—¿Naru' cabí böála'tica' ládzi'do'oru' tsanni ni' ruí'ilenë' rë'u didza' la' nöza, en cate' ni' ruchila lá'anie' le nazúaj lu guichi lá'ayi?

33 La' ni'isö gula'zuinë' yöjuöjgaquië' Jerusalén, ate' yöjxáca'gaquië' nudúbigaquië' idxinájtë' bönni' gubáz queë' Jesú, en nupa nacuá'len légaquië'. **34** Ní'irö yugu' bönni' na' nacu'ëni' gulé' chopë' na':

—Chibubán cazë' Xanru', en bulu'í i lahuë', ate' bill'ë'enë' Simón Lë'.

35 Ní'irö chopë' na' gula'guíxjö'ë ca na' guca quégäquië' la' nöza, en ca na' bulu'únbe'ë Jesú cate' ni' buzzuzxjë' yöta xtila na'.

*Bönni' usëda queë' Jesú tu'lé'enë' Lë'
(Mt. 28:16-20; Mr. 16:14-18; Jn. 20:19-23)*

36 Tsanni ni' tu'ë didza' ca nátagaca lë ni, la' yöjsóatë' Jesú gatsaj láhui'lö ga na' nacu'ë, ate' rë' légaquië':

—Guli'sóa dxi ládzi'li'.

37 Ní'irö guladxi gula'dzöbinë' tu' téquinë' bixín ta'lé'enë'. **38** Jesú rë' légaquië':

—¿Bizx que rö'öli' böniga? ¿Bizx que rizá' ládxí'lí yugu' lë ni? ³⁹ Buli'yútsöca' na'a, en ni'a. Neda' caz ni. Guli'cán neda', en buli'yú neda', tu' cabí da' bixín bëla', en biti' yu'u dxita ca ni rilé'eli' naca quia' neda'.

⁴⁰ Ni' rui'isë' ca' didza' ni, bulu'iñe' légaquië' në'ë, en ni'ë. ⁴¹ Tu' tu'dzéjaguequinë' biti' gula'yéajlë'ë, en gula'bö'ë baniga. Que lë ni na' Jesúz gudxé' légaquië':

—Dë queéli' ni le gahua?

⁴² Ni'irö bulu'nödzjë' queë' láti'do'oba' böla chinégu'ba', en tu quízxi'ba' buz. ⁴³ Guzxí'ë Jesúz le, en gudahuë' lógaquië'. ⁴⁴ Ni'irö re' légaquië':

—Yúgu' lë na' gulaca quia' gulaca ca na' gudxi caza' libí'ili' cate' ni' zóalena' libí'ili', gunnía': Run bayudxi gaca yúgu'te le nazúaj lu guichi lu xibá queë' Moisés, en le gula'mnë' bönni' gulu'ë didza' uláz queë' Dios, en le nazúaj lu guichi nazí'i le Yugu' Salmo, ca ral-la' gaca quia' neda'.

⁴⁵ Ni'irö buzéajni'inë' légaquië' lë na' nazúajgaca lu guichi lá'ayi. ⁴⁶ Rë' légaquië':

—Caní nazúaj lu guichi ca run bayudxi gaca queë' Cristo, qui'i sáquë'ë, en ubanë' lu yöl-la' guti cate' gaca tsonna dza, ⁴⁷ ate' idútë yödzölió ral-la' gaca libán ca naca quia' neda' para ulu'bí'ládxí'gaca bönachi para uniti lahuë' Dios dul-la' nabág'a gaquië'. Lu yödzö Jerusalén isí lo gaca libán na' ⁴⁸ ate' libí'i cázali' na' bülé'eli' yugu' lë ni ral-la' gunli' ba nalí que. ⁴⁹ Buli'yútsöca', isöl-la'a queëli' le guzxí' lu në'ë Xuza' gunnë' queëli', pero buli'gá'anasö Jerusalén cate' idxinrö queëli' yöl-la' huáca na' za' yehua' yubá.

Ruhuepë' Jesúz yehua' yubá

(Mr. 16:19-20)

⁵⁰ Ni'irö Jesúz guché'ë yugu' bönni' dá'gaquië' Lë', söjáquië' yödzö Be-tania, ate' ni' guchisa në'ë, en bulidza tsáhuë'ë légaquië'. ⁵¹ Tsanni ni' rulidza tsáhui'së' ca' légaquië', buzá'atë' ga na' nacu'ë, buépë' yehua' yubá. ⁵² Gudödi gula'yéaj ládxí'gaquië' Lë', lu yöl-la' rudzeja quégaquië' yöjhuöjgaquië' Jerusalén. ⁵³ Gula'cuá'tica'së' chila yudo', ta'gu'ë Dios yöl-la' ba, en tun zxönë' Lë'. ¡Ca' naca!

DIDZA' DXI'A BUZÚAJË' JUAN

Bönni' na' nazí'i lë' Didza' gúlajé' bönnachi

1 Cate' gusí lo, zí'atélo cate' si' gata' yödzölió, ni' zoa cazé' Bönni' lë' Didza', ate' Bönni' na' náquië' Didza' zóalenë' Dios, ate' Didza' na' naca caz Dios. **2** Bönni' na' náquië' Didza' zóalenë' Dios cate' ni' gusí lo si' rata' yödzölió. **3** Lu në'ë Bönni' ni, Dios benë' yúgu'të le dë, en biti' bi dë le nunë' Dios le cabí benë' lu në'ë Bönni' na'. **4** Dë caz queé' yöl-la' na'bán, ate' yöl-la' na'bán na' naca ca tu bení' le ruzení' lu icja láxdi'do'gaca bönnachi. **5** Ruzení' bení' na' ga naca chul-la que dul-la', pero biti' ca' sequi' le chul-la na' usulu bení' na'.

6 Dios gusöl-lë'ë ni tu bönni' lë' Juan. **7** Bidë' bönni' ni para gáquië' nu gun ba nalí. Bidë' para gunë' ba nalí queé' Bönni' na' náquië' bení', para tséjlé'gaca yúgu'të bönnachi Dios ni'a que lë na' runé' ba nalí. **8** Biti' náquië' Juan bení' na', pero bidë' para gunë' ba nalí queé' Bönni' na' náquië' bení'. **9** Bönni' na' náquië' bení' le naca idú ni' razié' yödzölió ni, ate' ruzeni'ë lu icja láxdi'do'gaca yúgu'të bönnachi.

10 Bönni' na' náquië' bení' bidxinë' yödzölió ni, ate' lu në'ë Lë' Dios benë' yödzölió ni, pero bönnachi yödzölió biti' bulu'únbe'ë Lë'. **11** Bidxinë' ga nequi queé', pero biti' ca' gula'zí' lu ná'agaquie' Lë' bönni' nabábalenë'. **12** Yúgu'të bönni' gula'zí' lu ná'agaquie' Lë', bönni' ni' gula'yéajlé'ë Jesús, Lë' benë' ga dë lu ná'agaquie' ilácagaquie' zxí'inë' Dios. **13** Bönni' ni nácagaquie' zxí'inë' Dios, caléga tu' nácagaquie' zxí'inë' nu bönni', en caléga tu' nálajagaquie' ni'a que le rizé' ládxë'ë nu bönni', o ni'a que tu le ré'ënë' nu bönni', pero nácagaquie' caní tu' naca le ré'ëni quézinë' Dios.

14 Bönni' na' náquië' Didza' gulgjé' bönnachi, en tu chí'isö guzóalenë' rë'u, idú dzágagaca Lë' le ruzá' ládxë'ë Dios queéru', en le naca idútë li. Bilé'etu' yöl-la' zxön queé', ate' yöl-la' zxön queé' na' naca le rui'i queébi' bi'i la's dui que, Nu na' naca Xúzibi'. **15** Juan na' benë' ba nalí queé' Bönni' na', en bë'ë zidzaj didza', rnnë':

—Bönni' ni náquië' Nu na' gudíxjö'a que, gunnía': Bönni' si' zá'télë' ca neda' nayépisétëre' ca neda', tu' zoa cazé' Lë' zí'alö ca neda'.

16 Le naca idú queé' buzí'iru' xibé yúgu'tëru', lë na' buzá' ládxë'ë queéru' Dios, en ziánrö ca' le ruzá' ládxë'ë queéru'. **17** Bidxín queéru' xibá queé' Dios lu në'ë Moisés, pero le ruzá' ládxë'ë queéru' Dios, en le naca idútë li bila'dxín queéru' lu në'ë Jesucristo. **18** Catu caz nu bilé'e Dios, pero Lë', la's dui Zxí'inë' Dios, Bönni' na' nadxí'ide'enë' Dios Xuz, Bönni' ni na' benë' ga núnbë'ëru'-në' Dios.

Le benë' ba nalí Juan, bönni' buquilë' bönnachi nisa, ca náquië' Jesús

(Mt. 3:1-12; Mr. 1:7-8; Lc. 3:1-17)

19 Lë ni naca le benë' ba nalí Juan, cate' ni' bönni' judío unná bë' nacu'ë Jerusalén gula'söl-lë'ë yugu' bixúz, en bönni' nabábaguacië' Leví, nupa ni nácgaca ni'a ná'agaquie' bixúz, para ila'nábinë' Juan na', ila'nnë':

—¿Nuzxi bönni' li?

20 Yálajdo' bë'ë didza' Juan, en biti' gudá'baguië', pero gudíxjö'ë catëz naca, rnnë':

—Biti' naca' Cristo, Bönni' na' guzxi' lu në'ë Dios isöl-lë'ë queéru'.

21 Ní'irö gula'nábinë' lë' leyúbölö, të' lë':

—¿Nuzxi caz li? ¿Naru' nacu' li' Elías, bönni' bë'ë didza' uláz queë' Dios dza ni'të?

Gunné' Juan:

—Biti' naca'.

Ní'irö të' lë':

—¿Naru' nacu' li' bönni' na' ral-la' guídë' gu'ë didza' uláz queë' Dios?

Bubi'ë didza' Juan, rnne':

—Caléga neda'.

²² Ní'irö të' lë':

—¿Nuzxi caz nacu'? Gudíxjöi'i netu' para gaca usiyöntu' nupa gula'söl-la' netu'. ¿Bizxi rnno' li' nuzxi nacu'?

²³ Bubi'ë didza' Juan, rë' légaquië':

—Neda' naca' bönni' na', nazúlu lu guichi lá'ayi ca naca queë', rnna: Riyön chí'i nu rulidza lu lataj cá'asö, rnna: Buli'béaj li näza para idxín Xanru' queëli'. Caní gunnë' Isaías, bönni' na' bë'ë didza' uláz queë' Dios.

²⁴ Yugu' bönni' ni nácagaquië' bönni' yudo' fariseo nasöl-la'gaquië' bönni' judío unná bë'. ²⁵ Gula'nabíne' Juan, të' lë':

—¿Bizx que ruquilo' bönachi nisa channö cabí nacu' li' Cristo, en biti' nacu' Elías, en caléga bönni' na' ral-la' guídë' gu'ë didza' uláz queë' Dios?

²⁶ Bubi'ë didza' Juan na', rë' légaquië':

—Neda' ruquila' bönachi nisa lu nisa, pero gatsaj láhui'lö ga zóali' zoë' tu bönni' biti' núnbë'eli'-në'. ²⁷ Bönni' ni náquië' Bönni' na' sì' zá'télë' ca neda', en nayépisétëre' ca neda', ate' biti' naca' neda' lesaca' ulecja' xiráchuë' nudë'ë.

²⁸ Yúgu'té lë ni guca lu xiyú yödzö Betábara, ga naca ia'tsölá'a yegu Jordán, zaca' ga rilén gubidza, ga ní' buquillë' Juan bönachi nisa.

Jesús náquië' ca bö'cu' zxíla'do' tutië'-ba' lahuë' Dios tu' nözi dul-la'

²⁹ Dza buropi ni' Juan bilé'enë' Jesús, zë'ë ga zoë', ate' rnne':

—Buli'yútsöca'. Bönni' ni náquië' bö'cu' zxíla'do' queë' Dios, gátië' para ugüë' dul-la' nabágä gaca bönachi yödzöliö. ³⁰ Lë' náquië' bönni' na' gunná' queë': "Sì' zá'télë' ca neda' tu bönni', nayépisétëre' ca neda', tu' zoa cazë' zí'alö ca neda'." ³¹ Neda' biti' bénbë'a-në' zí'alö, pero bida', ruquila' bönachi nisa para ilúnbe'ë bönachi Israel Lë'.

³² Benë' ba nalí Juan ca naca queë' Jesús, rnne':

—Bilé'eda'-në' Dios Bö' Lá'ayi, böjtë' birúajë' yehua' yubá, gunë'ë ca riná'aba' gu'dödo', ate' bidxinë' ga zoë' Jesús, en bugá'analenë' Lë'. ³³ Biti' bénbë'eda' Lë' zí'alö. Gudxi neda' Nu na' gusöl-la' neda' para uquila' bönachi nisa, gunnë': "Cate' ilé'enu'-në' huötjë' Dios Bö' Lá'ayi, tsöjsóalenë' Bönni' na', en uga'analenë' Lë', Bönni' ni gunë' le ruluf'isö yöl-la' ridila nisa ní, uchízië' bönachi Dios Bö' Lá'ayi." ³⁴ Na'a, chibilé'eda' lë na', en runa' ba nalí queë' Bönni' ni, náquië' Zxí'inë' Dios.

Yugu' bönni' usëda zí'alö queë' Jesús

³⁵ Ia'tú dza ca', leyúbölö zoë' Juan ni', ate' nacuá'lenë' lë' chopë' bönni' dá'gaquië' lë'. ³⁶ Cate' Juan na' bilé'enë' Jesús, ridödë' ni', ní'irö gudxë' bönni' na' dá'gaquië' lë', rnne':

—Buli'yutsöca'. Ni' zoë' bönni' na' náquië' bö'cu' zxíla'do' queë' Dios, gatië' uláz quegaca bönachi dul-la'.

³⁷ Chopë' bönni' na' dá'gaquië' Juan bila'yönnë' didza' ni bë'ë lë', ate' yöjnógaquië' Jesús. ³⁸ Ní'irö buécjë' Jesús, en buyúue' chopë' ni söjnógaquië' Lë', ate' rë' légaquië':

—¿Bizxi riguíljali?

Të' Lë':

—Bönni' Usedi, ¿gazxi zu?

³⁹ Bubi'ë didza' Jesús, rë' légaquië:

—Guli'dá, uyuli'.

Ní'irö yöjácalenë' Lë', en bila'lé'enë' ga na' zoë', ate' bulu'gá'analenë' Lë' dza na', tu' chizá' ral-la.

⁴⁰ Andrés, böchë'ë Simón Pedro, náquië' tuë' bönni' chopë' ni' bila'yönnë' didza' bë'ë Juan, en yöjnógaquië' Jesús. ⁴¹ Andrés na', zí'alö yöjdiljë' bönni' böchë'ë, lë' Simón, ate' rë' lë':

—Chibidzölitu'-në' Mesías.

Mesías naca tu didza' hebreo le rnna lu didza' griego: Cristo, ate' lu didza' xidza': Bönni' nasól-lë'ë Dios.

⁴² Ní'irö Andrés na'la' guchë'të Simón ga na' zoë' Jesús. Cate' Jesús bilé'enë' lë', rë' lë':

—Li' nacu' Simón, zxí'inë' Jonás. Na'a, si' lo' Cefas.

Cefas naca ca' tu didza' hebreo le rnna: Pedro, lu didza' xtila, ate' lu didza' xidza': Guiój.

Jesús rulidzë' Felipe, en Natanael

⁴³ Cate' za' rení' ia'tú dza, gúunnë' Jesús tsejë' luyú Galilea, ate' yöjxáquië' Felipe, en rë' lë':

—Gudá' neda'.

⁴⁴ Náquië' Felipe bönni' yödzö Betsaida, le naca ládzagaquië' Andrés, en Pedro. ⁴⁵ Felipe budzölineë' Natanael, en rë' lë':

—Chibidzölitu'-në' bönni' na' buzúajë' Moisés ca naca queë' lu guichi lu xibá queë' Dios, ate' bulu'zúajë' ca' ca naca queë' bönni' gulu'ë didza' uláz queë' Dios. Bönni' ni Jesús, zxí'inë' José, bönni' yödzö Nazaret.

⁴⁶ Natanael rë' lë':

—¿Naru' huala'tsö Nazaret tu le naca dxi'a?

Felipe rë' lë':

—Gudá uyú.

⁴⁷ Cate' bilé'enë' Jesús zë'ë Natanael na' ga zoë', rnnë':

—Buli'yú ni tu bönni' náquië' idú bönni' Israel, en biti' rnناسë' ca' bönni' ni.

⁴⁸ Ní'irö Natanael gunábinë' Jesús, rë' Lë':

—¿Naru' núnbë'tso' neda'?

Bubi'ë didza' Jesús, rë' lë':

—Cate' si' ulídzatérë' Felipe li', cate' ni' zu' zxan yaga higo, bilé'eda' li'.

⁴⁹ Ní'irö bubi'ë didza' Natanael, rë' Lë':

—Bönni' Usedi, Li' nacu' Zxí'inë' Dios. Li' nacu' Nu inná be'e böñachi Israel.

⁵⁰ Bubi'ë didza' Jesús, rë' lë':

—¿Réajlé'tso' tu' gudxa' li': Bilé'eda' li' zxan yaga higo? Yugu' le zxöntëro ca lë ni hualé'enu'.

⁵¹ Lësca' caní rë' Jesús légaquië', rnnë':

—Le nácatë rea' libf'ili', ilé'eli' nayalaj lúzxiba, en ta'benë', en tu'huötje' gubáz lá'ayí queë' Dios ga zoa' neda', Bönni' Guljë' Bönachi.

2

Laní que yöl-la' rutsaga na' le guca lu yödzö Caná

¹ Cate' chiguca tsonna dza, guca laní que yöl-la' rutsaga na' lu yödzö Caná luyú Galilea, ate' zóanu xinë'ë Jesús ni'. ² Lësca' zoa nu bulidza Jesús, en yugu'

bönni' usëda queë' dijáquië' laní na'. ³ Cate' biyadzaj xisi uva ilë'ajë', ní'irö xinë'ë Jesús gúdxinu Lë', rnnanu:

—Biti'rö dë xisi uva ilë'ajë'.

⁴ Bubi'ë didza' Jesús, rë'ë-nu:

—Nigúlado'. ¿Bizx que rulidzu' neda'? Biti' ca' ridxini dza ulu'a lahui yöl-la' huáca quia'.

⁵ Ní'irö xinë'ë Jesús gúdxinu bönni' huen dxin ta'gu'ë le tahuë', rnnanu:

—Guli'gún yúgu'të le guïë' libíili'.

⁶ Nacuá' ni' xopa yusu' guiój tu'gunë' dxin bönni' judío cate' tu'pá'a cuíngaqüië' ca nalébiguequinë' tunë', en rúdzugaca chopá tsonna rö'ö nisa tu tu yusu' na'. ⁷ Jesús gudxë' yugu' bönni' huen dxin na', rnne'ë:

—Bulilí yugu' yusu' ni nisa.

Bulu'líe' yugu' yusu' na' nisa. ⁸ Ní'irö Jesús rë' légaquüië' :

—Guli'gachi' na'a, en guli'tsöjuá' lahuë' bönni' zoë' ra' yusu'.

Yöjuá'gaquüië' na'. ⁹ Buyúü' bönni' na' zoë' ra' yusu' channö nazxi'i nisa na' nuhuöáca xisi uva, pero biti' réquibe'enë' gazxi za'. Nóziguequine' bönni' huen dxin na' gulächë'ë nisa na'. Ní'irö bönni' na' zoë' ra' yusu' bulidzë' bönni' rutsaga në'ë, ¹⁰ en rë' lë'.

—Zí'alö tu'nödziejë yúgu'të bönni' xisi uva nácarö sizxi'i, en cate' chigulë'ajë' yenni', ní'irö tu'nödziejë le cabí nazxi'i. Li', ga bidxitë na'a ben chí'u xisi uva nácarö sizxi'i.

¹¹ Yöl-la' huáca naca bë' ni benë' Jesús lu yödzö Caná luyú Galilea naca le risí lo yugu' yöl-la' huáca gunë'. Caní guca, bulu'e lahui yöl-la' zxön queë', ate' gula'yéajlë'ë Lë' bönni' usëda queë'.

¹² Gudödi na' guyijë' Jesús yödzö Capernaum, ate' dzágagaquüië' xinë'ë, en yugu' bönni' böchë'ë, en yugu' bönni' usëda queë' Lë', ate' zián dza gula'cu'ë Capernaum na'.

Rulatjë' Jesús lõ'a yudo', rubéajë' nupa tun le cabí ral-la' ilún ni'

(Mt. 21:12-13; Mr. 11:15-18; Lc. 19:45-46)

¹³ Cate' chizóa idxín Laní Pascua cate' tu'subanë' bönni' judío ca benë' Dios, ca na' bubéajë' xuz xtó'ogaquüië' luyú Egipto, guyijë' Jesús yödzö Jerusalén.

¹⁴ Lu yödzö na' yöjxáquië' Jesús nacu'ë bönni' lõ'a yudo' ga na' túti'ë-ba' yugu' bëdxi, en yugu' bö'cu' zxila', en yugu' gu'döö', böa' bëdxi na' tútigaquüië'-ba' lahuë' Dios. Rö'ögäquië' ca' ni' bönni' tu'tsë'ë dumí za' idútë yödzöliö. ¹⁵ Cate' bilé'enë' Jesús lë ni, buzalé' yugu' du lasi le quindë' bönachi na', ate' bulágui'ë yúgu'të ní'ilö lõ'a yudo', en bulágui'ë-ba' ca' ní'ilö yugu' bö'cu' zxila', en yugu' bëdxi. Bësië' dumí quégaquüië' bönni' na' tu'tsë'ë dumí lu yu, en burixë' yugu' blaga quégaquüië'. ¹⁶ Ní'irö Jesús gudxë' bönni' na' túti'ë-ba' yugu' gu'döö', rnne'ë:

—Guli'cúa yugu' lë ni. Biti' únili' lidxë' Xuza' tu yë'ëyi.

¹⁷ Ní'irö yöjnéguequinë' bönni' usëda queë' Jesús le nazúaj lu guichi lá'ayi, rnna: Tu' ru'ida' ládx'a'a lidxu', régui rilá' ládx'i'da'ahua'.

¹⁸ Ní'irö bulu'bí'ë didza' bönni' judío unná bë' nacu'ë ni', të' Jesús:

—¿Bizxi yöl-la' huáca ulu'inu' netu' le gaca bë' dë lu no'o runu' yugu' lë ni?

¹⁹ Bubi'ë didza' Jesús, rë' légaquüië':

—Guli'quinnaj yudo' ni, ate' tsonna dzasö uchisa' le.

²⁰ Ní'irö të' Lë' bönni' judío, ta'nnë'ë:

—Idú xopa-un iz guyá' yudo' ni, ate' Li', ¿tsonna dzasö uchísatso' le?

²¹ Yudo' na' bë'ë didza' que Jesús naca la' cuin cazë'. ²² Que lë ni na', cate' bubanë' Jesús lu yöl-la' guti, yöjnéguequinë' bönni' usëda queë' Jesús ca na' gunnë', ate' gula'yéajlë'ë le nazúaj lu guichi lá'ayi, enca' yugu' didza' bë'ë Jesús.

Jesús núnbe'ë yúgu'të böñachi

²³ Cate' ni' zoë' Jesús Jerusalén, cate' raca Laní Pascua na', gula'yéajlë' böñachi zián Lë', tu' bila'lé'enë' yugu' yöl-la' huáca runë'. ²⁴ Biti' buzxöni ládxë'ë Jesús légaquië', tu' nunbë' cazë' yúgu'të böñachi. ²⁵ Biti' naquínnë' Jesús nu quíxjöi'i Lë' ca nácagaca böñachi, tu' nöz quézinë' Lë' le yu'u icja ládxido'gaca böñachi.

3

Jesús, en Nicodemo

¹ Nicodemo, tu bönni' yudo' fariseo, nabábalenë' yugu' bönni' judío unná bë'.

² Bidë' bönni' ni ga zoë' Jesús chi'i dzö'ölö, en rë' Lë':

—Bönni' Usedi. Réquibe'etu' nasöl-lë'ë Dios Li' para usédinu' netu'. Biti' séqui'në' tu bönni' gunë' yugu' yöl-la' huáca nácagaca bë' ca nácagaca le caní runu' Li' channö cabí zóalene' Dios lë'.

³ Bubi'ë didza' Jesús, rë' lë':

—Le nácatë rea' li', nu cabí galaj leyúbölö, biti' ca' ilé'e lataj ga ni' rinná bë'ë Dios.

⁴ Nicodemo gunábinë' Lë', rnnë':

—¿Nacxi caz séqui'në' tu bönni' galjë' leyúbölö cate' chináquië' bönni' gula? ¿Naru' huácatsö tsu'ë leyúbölö lë'ënu xiné'ë, ate' galjë' ia'tú?

⁵ Bubi'ë didza' Jesús, rë' lë':

—Le nácatë rea' li'. Nu bönni' cabí galjë' ni'a que nisa, en ni'a queë' Dios Bö' Lá'ayi, biti' gaca tsázié' ga rinná bë'ë Dios. ⁶ Nu na' nalaj lu ni'a lu na' böñachi, böñachisö naca, pero nu nalaj ni'a queë' Dios Bö' Lá'ayi, Bö' Lá'ayi nabani nu na'. ⁷ Biti' ubáninu' tu' rea' li', run bayudxi galju' leyúbölö. ⁸ Gáti'tés recja bö', ate' riyönnu' rnnë bö' na', pero biti' nözinu' gazxi za', o gazxi zeaj. Lësca' caní raca quégaca nupa náljagaca ni'a queë' Dios Bö' Lá'ayi.

⁹ Ní'irö Nicodemo gunábinë' Jesús, rnnë':

—¿Nacxi caz gaca lë ni?

¹⁰ Bubi'ë didza' Jesús, rë' lë':

—¿Ruséditsenu' li' böñachi Israel, en biti' nözinu' yugu' lë ni? ¹¹ Le nácatë rea' li', le nöztu' ru'itu' didza' que, en le bilé'etu' runtu' ba nalí que, pero biti' rizi' lu ná'ali' lë na' runtu' ba nalí. ¹² Channö cabí réajlë'ëli' neda' cate' ru'ilenä' libíili' didza' ca naca le raca yödzölió ni, ¿nacxi caz gaca tséajlë'ëli' channö guía' libíili' le raca yehua' yubá?

¹³ 'Catu caz gurenë' nu bönni' yehua' yubá, pero tuza' neda', Bönni' Guljë' Böñachi, böjtä' birúaja' yehua' yubá, ate' zoa caza' ni' yehua' yubá. ¹⁴ Ca na' benë' Moisés lu lataj ca'asö, buchisë'-ba' bëla néquiniba' guíé, budë'ë'-ba' lë'e yaga, lësca' caní run bayudxi gaca quia' neda', Bönni' Guljë' Böñachi, ulu'chisë' neda' xitsá'. ¹⁵ Caní gaca quia', para cabí ila'niti yúgu'të nupa ila'yéajlë' neda', pero gata' quéguequi yöl-la' na'bán idú.

Dios nadxf'ide'enë' böñachi yödzölió

¹⁶ Tu' bidxí'ide'enë' Dios bönachi yödzölió, buzá' ládxë'ë quéguequi Zxi'inë' la' buduínë', para cabí ila'niti yúgu'té nupa ila'yéajlé' Lë', pero gata' yöl-la' na'bán idú quéguequi. ¹⁷ Dios gusöl-lë'ë Zxi'inë' yödzölió ni, caléga para ichúguïë' quégaca bönachi yödzölio ni gátigaca, pero para ulu'lágaca bönachi yödzölió ni ni'a quee' Lë'.

¹⁸ Nu bönni' réajlé'ë Zxi'inë' Dios, biti' ca' narugu quee' inítië', pero bönni' na' biti' réajlé'ë Lë', chinarugu quee' gátië', tu' cabí réajlé'ë Zxi'inë' Dios la' buduínë'. ¹⁹ Que lë ni na' chinarugu quégaca bönachi gátigaca, tu' bidxiné' Bönni' na' náquië' bení yödzölió ni, pero gulunrö zxön bönachi ni le naca chul-la que dul-la' ca gulunë' zxön Bönni' na' náquië' bení', tu' nácagaca xihui' le tunë'. ²⁰ Yúgu'té bönni' tu'ë dö' biti' raza ládx'i gaquie' bení', en biti' rídiagaquie' lu bení', para cabí ilá' lahui le tunë'. ²¹ Nu run le naca idútë li ridxín lu bení' para gaca bë' núngaca ni'a quee' Dios le run nu na'.

Juan, bönni' ruquilé' bönachi nisa, ru'ë didza' ca naca quee' Jesús

²² Gudödi na', Jesús guyéajlenë' bönni' dá'gaquie' Lë', ate' bila'dxiné' luyú Judea, en guzóalenë' légaquie' ni', ga na' tu'quilé' bönachi nisa. ²³ Lësca' ruquilé' Juan bönachi nisa ga nazí'i le Enón, gala' ga dë yödzö Salim, tu' dë nisa zila lataj na', ate' ta'dxin bönachi ni', en ta'dila nisa. ²⁴ Raca caní zí'atélö cate' biti' idzunë' Juan na' lidxi güie'.

²⁵ Ní'irö gula'sí lógaquie' bal-lë' bönni' dá'gaquie' Juan ta'díl-lalenë' yugu' bönni' judío didza' ca naca que yöl-la' ruchi'a cuini que yudo'. ²⁶ Bila'dxiné' ga zoë' Juan, en té' lë':

—Bönni' usedi. Buyútsöca'. Bönni' na' guzóalenë' lì' ia'tsólá a yegu Jordán, bönni' na' benu' ba nalí quee', ruquilé' bönachi nisa, ate' ta'dxin yúgu'té bönachi ga zoë'.

²⁷ Ní'irö bubí'ë didza' Juan, reë' légaquie':

—Biti' bi dë lu në'ë nu bönni', channö cabí nudödë' Dios le lu në'ë. ²⁸ Biyón quézili' lë na' bena' ba nalí, gunnía': "Biti' naca' neda' Cristo", pero Dios nasöl-lë'ë neda' para guía' bönachi si' zë'ë Lë'. ²⁹ Bönni' na' rizi'ë-bi' bi'i nigula rutsaga ná'abi' náquië' bönni' rutsaga në'ë, pero böch'i luzë'ë bönni' rutsaga në'ë, en dzáguië' lë', ruzé' náguië' didza' ru'ë, en rudzéjanë' tu' riyonné' didza' ru'ë bönni' rutsaga në'ë. Lësca' caní, rudzéjade'eda' neda' tu' raca lë ni caní. ³⁰ Run bayudxi gácarë' zxön Cristo, pero neda', run bayudxi gácará' cuídi'sö.

Nu za' zaca' yehua' yubálö

³¹ Gunné' ca' Juan:

—Bönni' na' zë'ë zaca' xitsá'alö nayépisétérë' ca yúgu'té bönachi. Nu bönni' náquië' bönachi yödzölió ni, que yödzölió ni náquië', en ru'ë didza' que le raca yödzölió ni, pero Bönni' na' zë'ë zaca' yehua' yubálö nácatérë' lo ca yúgu'té bönachi. ³² Bönni' na' runé' ba nalí que le bilé'enë', en le biyonné', pero cuntu nu rizi' lu në'le the runé' ba nalí. ³³ Núti'tés bönni' rizi' lu në'ë lë na' runé' ba nalí, bönni' ni rulu'ë lahui réajlé'ë naca idútë li didza' ru'ë Dios. ³⁴ Bönni' na' nasöl-lë'ë Dios, didza' quee' Dios ru'ë, tu' nuzóadérë' Dios Bö' Lá'ayi quee' lu bönni' na'. ³⁵ Dios Xuz nadxí'inë' Zxi'inë', ate' yúgu'té le dë chinudödë' lu në'ë Zxi'inë' na'. ³⁶ Nu bönni' réajlé'ë Dios Zxi'ini, dë yöl-la' na'bán idú quee', pero bönni' na' biti' réajlé'ë Dios Zxi'ini, biti' idéli'në' yöl-la' na'bán na', pero nabáguë'ë xíguia' lahuë' Dios.

4

Jesús ruíilené-nu didza' tu nigula Samaria

¹ Bila'yönnë' bönni' yudo' fariseo ca na' dá'gaca Jesús ziánrō böñachi ca dá'gaca Juan, ate' ruquile' ca' nisa ziánrō böñachi ca ruquile' nisa Juan. ² Caléga Jesús caz ruquile' böñachi nisa, pero bönni' usëda queë' tu'quilë' böñachi nisa. ³ Cate' gúquibe'enë' Jesús lë ni, buzë'ë luyú Judea, ate' sa'yéajë' leyübölö luyú Galilea.

⁴ Ga ni' sa'yéajë', run bayudxi tödë' luyú Samaria. ⁵ Caní guca, bidxinë' Jesús tu yödzödo' luyú Samaria, nazi'i le Sicar, gala' ga dë yu na' bunödzjë' Jacob queëbi' José, zxí'inë' Jacob na', dza ni'te. ⁶ Lataj na' zoa tu yeru nisa nachö'önë' Jacobo na' ga rë'. Cate' bidxinë' Jesús ni', gurö'ë ra' yeru nisa na' tu' yöjxéqui'në' yu'ë nøza. Guca idú huagubidza. ⁷ Ní'irö bidxinnu tu nigula Samaria ni' para sí'nu nisa. Jesús rë'ë-nu:

—Benna le guí'ja.

⁸ Tuzë' zoë' Jesús tu' chisójáquië' bönni' usëda queë' lu yödzö söjxí'gaquië' le ilahuë. ⁹ Ní'irö nigula Samaria na' rënu Jesús, rnnanu:

—¿Rinábitsenu' neda' le guí'ju', en nacu' bönni' judío? Neda' ni naca' nigula Samaria.

Caní gunnánu tu' cabí ta'dzaga dxi'a böñachi Samaria len böñachi judío.

¹⁰ Bubi'ë didza' Jesús, rë'ë-nu:

—La'tu' núnbe'u le runödzjë' Dios, en Nuzxi na' rë li': “Benna le guí'ja”, li' inabu', ate' Lë' gunné' quiu' nisa runna yöl-la' na'bán.

¹¹ Ní'irö nigula na' rënu Lë', rnnanu:

—Bönni', biti' nu'u le cuéajú' nisa, ate' yeru nisa ni, dxí'terö rö'. ¿Gazxi dë nisa na' runna yöl-la' na'bán? ¹² ¿Naru' nácatérötso' Li' zxöñ ca xúziru' gudödi Jacob, bönni' ni' bennë' queëtu' yeru nisa ni, ga ni guzxi'ë nisa gu'ë, en gulé'ajbi' ca' zxí'inë', en gulé'ajba' ca' bö'a' bëdxi queë'?

¹³ Bubi'ë didza' Jesús, rë'ë-nu:

—Núti'tës nu guí'aj nisa ni, leyübölö ubidxi nisa, ¹⁴ pero nu guí'aj nisa na' unödzja' neda', bíti'rö ubidxi icja ládx'i'da'ahuë', tu' unödzja' queë' nisa na' gaca lu icja ládx'i'da'ahuë' ca tu ga ralaj nisa, le güí'i yöl-la' na'bán idú queë'.

¹⁵ Ní'irö nigula na' rënu Lë', rnnanu:

—Bönni', benna quia' nisa na', para cabirö ubidxa', en cabirö uduzxi'a nisa ni.

¹⁶ Jesús rë'ë-nu:

—Guyéaj, yöjlidzë' bönni' quiu', ate' huödu' ni.

¹⁷ Bubi'nu didza' nigula na', rënu Lë':

—Cuntu nu zoa bönni' quia'.

Ní'irö Jesús rë'ë-nu:

—Ca nácatë rnno': “Cuntu nu zoa bönni' quia'”, ¹⁸ tu' chiguzóalenu' gayu' bönni', ate' bönni' na' zóalenu'-në' na'a, biti' náquië' bönni' quiu'. Didza' ni ru'u, ca nácatë rnno'.

¹⁹ Ní'irö nigula na' rënu Lë', rnnanu:

—Bönni', runi neda' nacu' bönni' ru'ë didza' uláz queë' Dios. ²⁰ Xuz xtó'oru' guléquinë' Dios le bach lu guí'a ni, pero rnñali' libí'ilí' Jerusalén naca ga ral-la' ilequi böñachi Dios le bach.

²¹ Jesús rë'ë-nu:

—Nigula, guyéajlë' neda'. Za' dza cate' tseaj ládx'i'li'-në' Dios Xuz sal-la' biti' idisóali' guí'ado' ni, en biti' tsöjsóali' Jerusalén. ²² Libí'ilí' reaj ládx'i'li'

Nu biti' nún'bë'ëli', pero netu' nún'bë'ëtu' Nu na' reaj ládxí'tu', tu' benë' queë' Dios ilá' lahui yöl-la' rusólá ni'a quégaguïë' bönni' judío. ²³ Na'a, za' dza, en chiridxín dza na', cate' nupa le nácatë ta'yéaj ládxí'gaca Dios, ila'yéaj ládxí'gaca Lë', zóalenë' Dios Bö' Lá'ayi léguequi, en le naca idútë li, tu' rë'ënë' Dios Xuz ilácagaquïë' queë' bönni' ila'yéaj ládxí'gaquïë' Lë' caní. ²⁴ Dios náquië' Bö', ate' nupa ta'yéaj ládxí'gaca Lë', run bayudxi ila'yéaj ládxí'gaca Lë', zóalenë' Dios Bö' Lá'ayi léguequi, en le naca idútë li.

²⁵ Ní'irö nigula na' rënu Lë', rnnanu:

—Nözda' ral-la' guídë' Mesías, Bönni' na' lë' Cristo. Cate' guídirë' Lë' quíjxöjinë' rë'u yúgu'të.

²⁶ Jesús rë'ë-nu:

—Lë cazë' ru'i'lenë' li' didza'.

²⁷ La' ná'asö bulu'dxinë' bönni' usëda queë' Jesús, ate' bulu'báninë' tu' ru'i'lenë'-nu nigula didza', pero biti' burúguinë' nitú' inábinë' Lë', cabí innë': “¿Bizxi rinábinu' lënu?” o: “¿Bizxi didza' ru'i'lenu'-nu?” ²⁸ Ní'irö nigula na' bucá'anana xichö'önu ni', ate' bðajnu la' yödzö, söjödxinu nupa nacuá' ni', rnnanu:

²⁹ —¡Guli'dá, ilé'eli'-në' tu bönni' gudxë' neda' yúgu'të le chinuna! ¿Naru' cabí nácatsë' Lë' Cristo?

³⁰ Ní'irö bila'rúaj böñachi yödzö na', en bila'dxín ga zoë' Jesús.

³¹ Tsanni ni' sôhuöajnu nigula na', bönni' usëda queë' Jesús gulunë' bayudxi, te' Lë':

—Bönni' Usedi, gudagu.

³² Jesús rë' légaquïë':

—Dë tu le rahua', le cabí réquibe'eli'.

³³ Ní'irö gula'nabi luzá'agaquïë' bönni' usëda queë' tuë' ia'túë', ta'nnë':

—¿Zoa nu chidiguá'tsö le gudahuë?

³⁴ Ní'irö Jesús rë' légaquïë':

—Le nabáñida' naca guna' ca rë'ënë' Xuza' nasöllë'ë neda', en údxí guna' xichinë'. ³⁵ Caní rnnañi' libí'ilí: “Ia'tapa beo' huadxín dza uláparu.” Neda' rea' libí'ilí: Guli'chisa loli' uyuli' böñachi nácgaca ca gapa nadúzgaca, le chinabídxigaca para tsöjláparu'. ³⁶ Bönni' na' rulapë' rizi'ë lazzxjë', ate' lë na' rulapë' bönni' na', naca para gata' yöl-la' na'bán idú quégaca böñachi, para gaca ulu'dzeja tsözxöñ nu raza, en nu rulapa. ³⁷ Naca idútë li lë na' rnna caní: Tu nu raza, ate' ia'tú nu rulapa. ³⁸ Neda' gusöll-la'a libí'ilí' tsöjlápali' ga biti' gúzali'. Gulún böñachi yúbölö dxin guláz, ate' libí'ilí' ruzí'ilí' xibé dxin na' núnagaquïë'.

³⁹ Zíán böñachi Samaria nacuá' yödzö Sicar na' gula'yéajlë'ë Jesús ni'a que xtízda'nu nigula na' bennu ba nalí queë', gunnánu: “Gudxë' neda' yúgu'të le chinuna.” ⁴⁰ Cate' bila'dxinë' bönni' Samaria ga ni' zoë' Jesús, guláta'yuë' lahuë' ugá'analenë' légaquïë'. Jesús bugá'anë' ni' ia'chopa dza. ⁴¹ Caní guca, ziánterë' ca' bönni' ni' gula'yéajlë'ë Jesús ni'a que didza' bë'ë. ⁴² Ní'irö bönni' ni' gulë'-nu nigula na', ta'nnë':

—Na'a réajlë'ëtu' Lë', calégasö ni'a que didza' bë'u li', pero lësca' tu' biyönitu' netu' Lë', en nözta' le nácatë bönni' ni náquië' Cristo, Nu rusólá böñachi yödzölió.

Ruúne' Jesús zx'jinë' tuë' bönni' dë lu ne'ë

⁴³ Ia'chopa dza ca', buzë'ë Jesús luyú Samaria, en sa'yéajë' luyú Galilea.

⁴⁴ Caní benë', tu' gudixjö'ë Lë cazë' Jesús, gunnë': “Böñachi uládz queë' nu bönni' ru'ë didza' uláz queë' Dios biti' tun lë' bal.” ⁴⁵ Cate' bidixinë' Jesús luyú

Galilea, guluné' bönni' Galilea na' Lë' bal tu' yójáquië' ca' Jerusalén cate' guca Laní Pascua, en bila'lé'enë' le benë' Jesús ni'.

⁴⁶ Ní'irö böajé' Jesús yödzö Caná luyú Galilea, ga ni' benë' ga böáca nisa xisi uva. Lu yödzö Capernaum na' zoë' tu bönni' dë lu në'ë uláz queë' bönni' rinná bë'ë, ate' ré'ebi' bi'i bönni' queë' bönni' na' dë lu në'ë. ⁴⁷ Cate' biyönnë' bönni' ni chibuzé'ë Jesús luyú Judea, en budxiné' luyú Galilea na', ní'irö guyijé' ga na' zoë' Jesús, en gúta'yuë' lahuë' guídë' lidxé', para uduhuéné'-bi' bi'i bönni' queë' na', tu' chirequi gátibi'. ⁴⁸ Ní'irö Jesús rë' lë':

—Biti' ca' tséajlé'ëli' channö cabí ilé'eli' le nácabaca bë', en yugu' yöl-la' huáca guna'.

⁴⁹ Ní'irö bönni' na' dë lu në'ë uláz queë' bönni' rinná bë'ë gudxë' Jesús, rnnë':

—Bönni', gudía'të para cabí gátibi' bi'i quia'.

⁵⁰ Ní'irö Jesús rë' lë':

—Böaj lidxu'. Nabanbi' bi'i quiu'.

Bönni' ni guyéajlé'ë didza' bë'ë Jesús, ate' söhuójë'. ⁵¹ Tsanni ni' yu'ë nöza söhuójë', duzxí'gala'gaquïë' lë' bönni' huen dxin queë' ate' gula'guíjöi' inë' lë', ta'nné':

—Nabanbi' bi'i quiu'.

⁵² Gunábinë' légaquïë' bátaxi gusí lo ruhuöáca ládxí'bi'. Të' lë':

—Ba'ayi, idú huagubidza, buruáj xilá yú'ubi'.

⁵³ Ní'irö gúquibe'enë' xúzibí' bi'i na', böácabí' cate' ni' bë'lenë' Jesús lë' didza', en gudxë' lë': "Nabanbi' bi'i quiu'." Que lë ni na' guyéajlé'ë Jesús, ate' gula'yéajlé' ca' Lë' bönochí nacuá' lidxé'.

⁵⁴ Yöl-la' huáca ni naca le buropi benë' Jesús cate' ni' zoë' luyú Galilea, gudödi buzé'ë luyú Judea.

5

Ruúnë' Jesús tu bönni' nacú'unië' bin ga nazí'i le Betesda

¹ Gudödi guca lë ni, guca laní quégaquïë' bönni' judío, ate' guyijé' Jesús Jerusalén. ² Lu yödzö na', gala' ga tu'ú'uba' bö'cu' zxila', dë tu le zxön yuduza nisa, nazí'i le Betesda lu didza' hebreo, en nacuá' gayu' chila don que. ³ Yugu' lu chila na' dëgaquïë' zián bönni' té'enë', bönni' nachul-la lógaquïë', en bönni' biti' gaca sá'gaquïë', en bönni' nacú'unigaquïë' bin. Ta'bözë' bata utá cuini nisa na'. ⁴ Caní raca, tu' ruhuötje' tu gubáz lá'ayi queë' Dios tu chí'i huéaj, en röjtsu'ë lu nisa na', en rutë' nisa na'. Huöacatë' nu bönni' tsöjsú'utië' lu nisa na' cate' rutá cuini ca naca bíti'tës yödzöhüë' raca queë'. ⁵ Zoë' tu bönni' ni', chiguca chizzunu' uruá' iz ré'enë'. ⁶ Cate' bilé'enë' Jesús dë' bönni' huë' na' ni', réquibe'enë' chiguca zián iz ré'enë', ate' gunábinë' lë', rnnë':

—¿Ba rë'énü' huöácu'?

⁷ Bubi'ë didza' bönni' huë' na', rë' Jesús:

—Bönni', cuntu nu zoa cu'u nedá' lu nisa na' cate' rutá cuini. Tsanni sa'yéaja' nedá', röjtsu'ë bönni' yübölö zí'alö ca nedá'.

⁸ Jesús rë' lë':

—Guyaschi. Buá' le denu', en guzë'e.

⁹ La' böácatë' bönni' na', ate' bu'ë le gúti'në', en guzë'ë. Dza na' raca caní naca dza lá'ayi quégaquïë' bönni' judío. ¹⁰ Ní'irö bönni' judío unná bë' gulé' bönni' na' nuhuöáquïë', ta'nné':

—Dza lá'ayi naca na'a. Biti' ral-la' u'u le ráti'nu'.

¹¹ Bubi'ë didza' bönni' na', rë' légaquïë':

—Bönni' na' bunë' neda' gudxi cazë' neda', gunnë': "Buá' le denu', en guzë'e." Bönni' na' bunë' neda'.

¹² Ní'irö gula'nábinë' lë', ta'nnë':

—¿Nuzxi na' gudxi caní li': "Buá' le denu', en guzë'e"?

¹³ Biti' nözinë' bönni' na' nuhuoáquië' nuzxi na', tu' chibuzé'ë Jesúz lataj ni' tu' nacua' bönachi zián ni'. ¹⁴ Gudödi guca lë ni, Jesúz yöjxáquië' bönni' na' ga naca chila yudo', ate' rë' lë':

—Buyútsöca'. Chiböácu'. Bíti'rö gunu' dul-la', para cabí gaca quiu' tu le nácarö zi' ca lë na' guca quiu'.

¹⁵ Guyijë' bönni' na', yöjtixjöi'inë' yugu' bönni' judío unná bë' Jesúz na' bunë' lë'.

¹⁶ Que lë ni na' bönni' judío unná bë' gula'bía ládx'i'gaquië' Jesúz, en gulë'ënne' ilütië' Lë', tu' runë' yugu' lë ni cate' naca dza lá'ayi quégäquië'.

¹⁷ Bubi'ë didza' Jesúz, rë' légaquië':

—Xuza' ná'atë rune' dxin, ate' neda' ca' runa' dxin.

¹⁸ Que lë ni na' gulë'éniröne' bönni' judío unná bë' ilütië' Jesúz, calëgasö tu' guditsjë' xibá que dza lá'ayi quégäquië', pero lëscá' tu' gunnë' Dios caz náquië' Xuzë', ate' caní naca nun cuine' ca náquië' Dios.

Yöl-la' unná bë' dë lu në'ë Zxi'inë' Dios

¹⁹ Ní'irö bubí'ë didza' Jesúz, rë' légaquië':

—Le nácatë rea' libí'ili'. Biti' bi gaca guna' neda', Zxi'inë' Dios, rácasö quia', pero tuz lë na' rilé'eda' rune' Dios Xuz. Yúgu'të le rune' Dios Xuz, lëscá' caní runa' neda', Zxi'inë'. ²⁰ Dios Xuz nadxí'inë' neda', Zxi'inë', en rulu'ñinë' neda' yúgu'të le rune', ate' yugu' le zxöntérö ca lë ni ulu'ñinë' neda', le ilún ga ubánilí' libí'ili'. ²¹ Ca na' rune' Dios Xuz, rusubane' nupa nátigaca, en rugú'ë légaquië' yöl-la' na'bán, lëscá' caní runa' neda', Zxi'inë', runödza' quégaca bönachi yöl-la' na'bán ca rë'eni quézida'. ²² Cuntu nu ruchi'a rusöröë' Dios Xuz, pero chinudödë' lu na'a neda', Zxi'inë', yúgu'të yöl-la' unná bë' para uchi'a usöröa' bönachi. ²³ Caní naca para ilún bal yúgu'të bönachi neda', Zxi'inë', ca na' tun bal Dios Xuz. Nu biti' run bal neda', Zxi'inë', biti' run bal Dios Xuz, nasö'l-lë'ë neda', Zxi'inë' na'.

²⁴ Le nácatë rea' libí'ili'. Bönni' na' riyönnë' didza' ruá'a, en réajlë'ë Dios Xuz na' nasö'l-lë'ë neda' dë yöl-la' na'bán idú queë', ate' biti' irugu queë'. Náquië' ca nu chinubán lu yöl-la' guti tu' chidé yöl-la' na'bán idú queë'. ²⁵ Le nácatë rea' libí'ili', za' dza, en chiridxín dza na', cate' ila'yöni nupa chinátigaca chi'a neda', Zxi'inë' Dios, ate' nupa ila'yöni xtídza'a, en ilún ca rnna, huöáta' yöl-la' na'bán quéguequi. ²⁶ Ca na' dë lu në'ë Dios Xuz unödžje' yöl-la' na'bán quégaca bönachi, lëscá' caní benë' ga dë lu na'a neda', Zxi'inë', unödžja' yöl-la' na'bán quégaca bönachi. ²⁷ Lëscá' caní budödë' lu na'a yöl-la' unná bë' uchi'a usöröa' bönachi, tu' naca' Bönni' Guljë' Bönachi. ²⁸ Biti' ubánilí' ca naca lë ni, tu' huadxín dza cate' yúgu'të nupa chinátigaca ila'yöni chi'a, ²⁹ en ulu'rúaj yero ba. Ulu'bán nupa na' gulún le naca tsahui', en huöáta' yöl-la' na'bán quéguequi, pero nupa na' gulún le biti' naca tsahui', ulu'bán, ate' irugu quéguequi ilátigaca tsaz.

Le naca bë' le náquië' Jesúz

³⁰ Gunnë' ca' Jesúz:

—Biti' bi gaca guna' la' néda'sö. Ca naca le riyönda' rë' Xuza' neda', caní ruchi'a rusöröa', ate' ca na' ruchi'a rusöröa' naca tsahui', tu' cabí runa' ca rë'énisida' neda', pero ca rë'eni quézinë' Xuza' nasö'l-lë'ë neda', runa'.

³¹ Channö neda' runa' ba nalí que la' cuin caza', biti' naca lesaca' lë na' runa'

ba nalí. ³² Zoa Nu yúbölö Nu run ba nalí quia' neda', Lë' Xuza', ate' nözda' naca lesaca' le runë' ba nalí quia'. ³³ Libí'ili' gusöl-la'li' bönni' yöjnábiguequinë' Juan, ate' lë na' benë' ba nalí quia' naca idútë li. ³⁴ Neda' biti' naquinda' nu bönni' gunë' ba nalí quia', pero ruá'a didza' caní para uláli'. ³⁵ Didza' bë'ë Juan na' gulaca ca tu guí' yöri, le guyegui, en buzení, ate' libí'ili', tu chí'sö guyaza ládxí'li' uzí'ili' xibé bení' queë'. ³⁶ Na'a, zoa le run ba nalí quia' neda' le nácarö idú li ladxe' ca lë na' benë' ba nalí quia' Juan. Yugu' le budödë' Dios Xuz lu na'a guna', la' leze na' runa', ate' yugu' lë na' runa', tun ba nalí quia', en nácgacaca bë' gusöl-lë'ë Dios Xuz neda'. ³⁷ Lësca' Dios Xuz nasöl-lë'ë neda' runë' ba nalí quia'. Catu caz biyönili' chí'ë, en catu caz bilé'eli' lahuë', ³⁸ en cabí nazí' lu ná'ali' xtídzë'ë, tu' cabí réajlë'eli' neda', Nu na' gusöl-lë'ë. ³⁹ Rusëdali' le nazúaj lu guichi lá'ayi, tu' réquili' huáta' yöl-la' na'bán idú queëli' ni'a que lë na' nazúaj lu guichi lá'ayi, ate' lë na' nazúaj lu guichi run ba nalí quia' neda'. ⁴⁰ Biti' rë'ënili' guídali' quia' neda' para gata' yöl-la' na'bán queëli'.

⁴¹ Biti' riguilja' yöl-la' ba le ila'gú'u bönnachi neda'. ⁴² Neda' núnbë'a libí'ili', en nözda' biti' nadxí'ili' -në' Dios. ⁴³ Bidxina' ni uláz queë' Dios Xuz, ate' libí'ili' biti' rizí' lu ná'ali' neda', pero channö huadxín nu yúbölö nu guidi rácäso que, si' lu ná'ali' nu na'. ⁴⁴ ¿Nacxi caz gaca tséajlë'eli' Dios channö rizí'ili' yöl-la' run zxöñ que luzá'ali' tulí' ia'tulí', en biti' riguiljalí' yöl-la' run zxöñ na' za' lu në'ë la's dui Dios? ⁴⁵ Biti' uzóa ícjali' uzégua' libí'ili' didza' lahuë' Xuza'. Nu na' uzegua' libí'ili' didza' naca lë cazë' Moisés, bönni' na' ruzxöni ládxí'li' -në', sal-la' gütië' dza ni'te. ⁴⁶ La'tu' réajlë'eli' -në' Moisés, tséajlë'eli' ca' neda', tu' buzúajë' Moisés lu guichi ca naca quia' neda'. ⁴⁷ Na'a, ¿nacxi caz gaca tséajlë'eli' didza' ruá'a neda' channö cabí réajlë'eli' yugu' le buzúajë' Moisés lu guichi?

6

*Rugahueü' Jesús ziánrō ca chi-un gayuá' bönnachi
(Mt. 14:13-21; Mr. 6:30-44; Lc. 9:10-17)*

¹ Gudödi guca lë ni, guyijé' Jesús ia'tsölä'a Nísado' Que Galilea, nazí'i le ca' Nísado' Quee' Tiberias. ² Bönnachi zián yöjnögaca Jesús tu' bila'lë'e yugu' yöl-la' huáca benë', cate' bunë' bönni' té'enë'. ³ Ní'irö gurenë' Jesús, guyijé' ga naca tu lu gu'ado', ga ni' gurö'ölenë' yugu' bönni' usëda queë'. ⁴ Chizoa idxín Laní Pascua cate' tu'subanë' bönni' judío ca benë' Dios, bubéajë' xuz xtó'ogaquie' luyú Egipto. ⁵ Cate' guchisa lahuë' Jesús, en bilé'enë' bönnachi zián zá'gaca ga zoë', ní'irö rë' Felipe:

—¿Gazxi tsöjö'uru' yöta xtila le ilágugaca bönnachi zián ni?

⁶ Caní gunnë' Jesús para si' bë'ë Felipe na', tu' chinözinë' Lë' naca gunë'. ⁷ Bubi'ë didza' Felipe, rnnë':

—La'tu' sí'iru' yöta xtila len lázxjaru' que idú xunu' beo', biti' guequi láti'do' huéaj le ilágugaca bönnachi zián ni.

⁸ Ní'irö tu bönni' usëda queë' Jesús, lë' Andrés, böchë'ë Simón Pedro, rë' Lë', rnnë':

⁹ —Ni zóabi' tubi' bi'i bönni', nuá'abi' gayu' yöta xtila néquiguequini zxoa' cebada, en chòpaba' böla cuídi'do'. ¿Naru' huéqui'tse ugagu le do' ni cate' xö bönnachi?

¹⁰ Ní'irö Jesús rë' légaquie' :

—Guli'gún ga ila'bö' bönnachi zián ni lu yu.

Lataj na', rö'öda' daca', ate' gula'bö'ë idú ca chi-un gayu'ë bönni' ni'. ¹¹ Ní'irö gudéjë'ë Jesús yugu' yöta xtila na'. Cate' chigudxë' Dios: "Xclenu'", gudisië'

le quégaquië' bönni' usëda queë', ate' légaquië' gula'guísië' le quégaca yúgu'të nupa na' rö'gaca lu daca' ni'. Lësca' caní guluné' quégacaba' böla cuídi'do' na', ate' gulahuë' tsca gulé'ennë' ilahuë'. ¹² Cate' chibulu'huöljanë', Jesús gudxë' yugu' bönni' usëda queë', gunnë':

—Buli'tubi le bizzaj nagá'anagaca, para cabí ilaca ditaj.

¹³ Bulu'tubé' ca', ate' bulu'líë' chinnu ga'börado' yugu' le bizzaj quégaca gayu' yöta xtila néquiguequini zxoa' cebada na', le bulu'gá'ana quégagaquië' bönni' na' gulahuë'. ¹⁴ Cate' bila'lé'enë' bönni' ni' yöl-la' huáca na' benë' Jesús, ta'nnë':

—Le nácatë bönni' ni náquië' bönni' na' ru'ë didza' uláz queë' Dios, bönni' na' ral-la' guíde' yödzölió ni.

¹⁵ Tu' réquibe'enë' Jesús të'ennë' ila'chë'ë Lë' bayudxi para ilunë' ga inná bé'enë' légaquië', que lë ni na' buzë'ë ni', sa'yéajë' tuzë' tu lu guí'a.

Rizë'e ni'ë Jesús lu nísado' (Mt. 14:22-27; Mr. 6:45-52)

¹⁶ Cate' chizá' ral-la, yójáquië' bönni' usëda queë' Jesús, ate' bila'dxinë' ra' nísado'. ¹⁷ Gula'benë' tu lë'e bárcodo' ni', en söjáquië' ta'dödë' lu nísado' na', para ulu'dxinë' Capernaum. Chinaca chul-la ate' Jesús biti' ridxíninë' ga na' nacu'ë. ¹⁸ Gusí lo recja bö' budunu' lu nísado' na', ate' riyasa ridxía nisa na'. ¹⁹ Cate' chibulu'së'ë bárcodo' na', le guzá' le naca tsca rizá'aru' tu hórasö, ní'irö bila'lé'enë' Jesús rizë'e ni'ë lu nísado' na', en zë'ë ribígüe'ë ga na' zeaj barco na', ate' guladxi gula'dzöbinë'. ²⁰ Ní'irö Jesús re' légaquië':

—Neda' caz ni. Biti' gáxdili'.

²¹ Ní'irö len yöl-la' rudzeja quégaquië' bulu'guélë'ë Lë' lë'e bárcodo' na', ate' la' bidxitnë bárcodo' na' lu yu bidxi ga ni' söjáquië'.

Bönachi zián tu'guilaj Jesús

²² Dza buropi ni', guléquibe'e bönachi zián na' nagá'anagaca ia'tsölá'a nísado' bidxiñ tuz bárcodo' ni', ate' Jesús biti' gurénlenë' yugu' bönni' usëda queë' lë'e bárcodo' na', pero légarcasë' na' yójáquië'. ²³ Ní'irö bila'rúaj ia'bal-la bárcodo' lu yödzö Tiberias, ate' bila'dxin tu lataj le dë gála'sö ga ni' gulahuë' yöta xtila cate' ni' Xanru' Jesús gudxë' Dios: "Xclenu" que. ²⁴ Tu' bila'lé'enë' bíti'rö zoë' Jesús ni', en biti' nacu'ë bönni' usëda queë' ni', que lë ni na' gula'benë' lë'egaca bárcodo' na', ate' yójáquië' Capernaum, tu'guiljë' Jesús.

Náquië' Jesús yöta xtila nabánigaca tsaz böñachi

²⁵ Cate' bila'dxín böñachi zián na' ia'tsölá'a nísado' na', yöjxáca'gaquië' Jesús, en té' Lë':

—Bönni' Usedi, ¿bátaxi bidxiñu' ni?

²⁶ Bubi'ë didza' Jesús, re' légaquië':

—Le nácatë rea' libíili': Ruguílaji' neda', caléga tu' bilé'eli' yugu' yöl-la' huáca bena', pero tu' gudágul' yöta xtila ni', en böljali'. ²⁷ Guli'gún dxin, caléga para si'ili' la' huagu ridödi que, pero para si'ili' la' huagu na' ugá'anatica'sö, en runna yöl-la' na'bán idú. Lë ni naca la' huagu neda', Bönni' Guljë' Bönachi, gunna' queëli', tu' bulu'ë lahui Xuza' Dios naca' Zxfi'inë'.

²⁸ Ní'irö gula'nábinë' Lë', ta'nnë':

—¿Bizxi run bayudxi guntu' para guntu' le raza ládxë'ë Dios?

²⁹ Bubi'ë didza' Jesús, re' légaquië':

—Lë ni le raza ládxë'ë Dios, tséajlë'eli' neda', naca' nu gusöl-lë'ë Lë'.

³⁰ Ní'irö gula'nábinë' Lë', ta'nnë':

—¿Bizxi le naca bë' runu', le ilé'etu' para tséajlë'ëtu' Li'? ¿Bizxi yöl-la' huáca runu'? ³¹ Gulahuë' xuz gudödi queëru' yöta xtila nazí'i le maná lu lataj cá'asö, ca nazúaj lu guichi lá'ayi, rnna: "Yöta xtila que yehua' yubá Moisés bë'ë quégäquië', gulahuë'."

³² Bubi'ë didza' Jesús, rë' légaquië':

—Le nácatë rea' libí'ili': Calëga Moisés na' bennë' queëli' yöta xtila que yehua' yubá, pero Xuza' Dios runnë' queëli' yöta xtila le naca idú que yehua' yubá. ³³ Yöta xtila na' runnë' Dios quégaca böñachi naca' neda', lë na' birúaj yehua' yubá, en runödzaj yöl-la' na'bán quégaca böñachi yödzölió ni.

³⁴ Ní'irö të' Lë':

—Xan, bénñatica'sö queëtu' yöta xtila na'.

³⁵ Jesús rë' légaquië':

—Neda' caz naca' yöta xtila nabánigaca tsaz böñachi. Nu za'len neda', huölaj udzé'e tsaz nu na' le naca queë' Dios, ate' nu tséajlë' neda', chinë'aj tsaz le naca queë' Dios. ³⁶ Naca ca na' chigudxi caza' libí'ili': "Sal-la' rilé'eli' neda', biti' ca' réajlë'ëli' neda'." ³⁷ Yugu'te nupa na' runnë' Xuza' quia', ídigaca quia', ate' nupa na' zaca quia', biti' usá'gaca'-në'. ³⁸ Caní naca, tu' bötja' birúaja' yehua' yubá, calëga para guna' ca rë'ënda' neda' caz, pero para guna' ca rë'ëñë' Dios Xuz, nasöl-lë'ë neda'. ³⁹ Lë ni le rë'ëñë' Xuza' nasöl-lë'ë neda', rë'ëñë' cabí unitia' nitú nupa na' bennë' quia', pero usubana' léguequi dza úksi. ⁴⁰ Lë ni le rë'ëñë' Dios Xuz nasöl-lë'ë neda', rë'ëñë' gata' yöl-la' na'bán quéguequi, yugu'te nupa na' ila'lë'e neda', Zxí'inë', en ila'yéajlë' neda', ate' neda' usubana' léguequi dza úksi na'.

⁴¹ Ní'irö gula'nnë' queë' Jesús bönni' judío unná bë' tu' gunnë': "Neda' caz naca' yöta xtila na' bötaj, birúaj yehua' yubá." ⁴² Que lë ni na' ta'nnë':

—¿Naru' cabí bönni' ni Jesús, zxí'inë' José? Nunbë' cázaru' xuz xinë'ë. ¿Nacxi caz naca na', rnna' bönni' ni: "Bötja' birúaja' yehua' yubá"?

⁴³ Ní'irö bubí'ë didza' Jesús, rë' légaquië':

—Biti' innëli' quia' la' libí'isili'. ⁴⁴ Biti' séqui'në' nitúë' bönni' guíde' quia' channö cabí idigu'ë quia' Xuza' nasöl-lë'ë neda' nu na', ate' neda' usubana' nu na' dza úksi. ⁴⁵ Nazúaj lu guichi lá'ayi ca gula'nnë' bönni' gulu'ë didza' uláz queë' Dios, le rnna caní: Dios usédinë' yugu'te böñachi. Que lë ni na', yugu'te bönni' ta'yönnë' chi'ë Xuza', en nazédagaquië' lu në'ë Lë' zá'gaquië' quia'.

⁴⁶ Cuntu nu bönni' bilé'enë' Dios Xuz, pero tuzë' Bönni' na' birúajë' ga zoë' Dios. Bönni' ni rilé'e quézinë' Dios Xuz. ⁴⁷ Le nácatë rea' libí'ili': Núti'tës bönni' réajlë'ë neda' dë yöl-la' na'bán idú queë'. ⁴⁸ Neda' caz naca' yöta xtila nabánigaca tsaz böñachi. ⁴⁹ Gulahuë' xuz xtó'oli' yöta xtila na' nazí'i le maná lu lataj cá'asö, en cate' bizá'a dza quégäquië' gulatië'. ⁵⁰ Neda' naca' yöta xtila ruhuötaj rirúaj yehua' yubá, ate' nútì'tës bönni' gahuë' le, biti' ca' gátië' bönni' na'. ⁵¹ Neda' caz naca' yöta xtila na' nabánigaca böñachi, le bötaj birúaj yehua' yubá, ate' channö nútì'tës bönni' gahuë' yöta xtila na', gaca bántica'së' bönni' na'. Yöta xtila na' runödzja' neda' naca xipëla'a, le runödzja' para gata' yöl-la' na'bán quégaca böñachi yödzölió.

⁵² Ní'irö bönni' judío unná bë' gula'chixi luzá'agaquië', ta'nnë':

—¿Naru' huácatsö bönni' ni gunnë' queëru' xipëla'ë le gáguru'?

⁵³ Que lë ni na' Jesús rë' légaquië':

—Le nácatë rea' libí'ili': Channö cabí gáguli' xipëla'a neda', Bönni' Gulje' Böñachi, en channö cabí guí'jali' xichöna', biti' ca' zóalen libí'ili' yöl-la' na'bán na'. ⁵⁴ Núti'tës nu gagu xipëla'a, en guí'aj xichöna', dë que yöl-la' na'bán idú,

ate' neda' usubana' nu na' dza údxi. ⁵⁵ Caní gaca, tu' naca xipéla'a la' huagu idú, ate' xichöna' naca tu le naca idú para nu guí'aj le. ⁵⁶ Núti'tés bönni' gahuë' xipéla'a, en guí'je' xichöna', sóalentica'se' bönni' na' neda', ate' neda' sóalentica'sa' lë'. ⁵⁷ Ca na' zoë' nabane' Dios Xuz nasöl-lë'ë neda', ate' neda' nabánida' Lë', lësca' caní ibáninë' neda' nútiti'ës bönni' gahuë' neda'. ⁵⁸ Lë ni yöta xtila bötaj birúaj yehua' yubá, en biti' naca ca yöta xtila na' nazí'ile maná, lë na' gulahuë' xuz xtó'oli', en cate' bizá'a dza quégacië', gulatië'. Núti'tés bönni' gahuë' yöta xtila ni sóatica'se' ibanë'.

⁵⁹ Yugu' didza' ni bë'ë Jesús ga naca tu lu yu'u ga tu'dubë' bönni' judío, en tu'sëdë' queé' Dios, ate' guca lë ni tsanni ni' rusédinë' böñachi Capernaum.

Didza' rúnnagaca queëü' yöl-la' na'bán idú

⁶⁰ Cate' bila'yönnë' didza' ni, zián bönni' usëda queë' Jesús gula'nnë' que, ta'nnë':

—Banigatë didza' ni. ¿Nuzxi caz gaca si' lu në'e le?

⁶¹ Réquibe'enë' Jesús ta'nnë' bönni' usëda queë' que xtídzë'ë, ate' gunábinë' légaquië', rnne'ë:

—¿Naru' run didza' ni libí'ili' zi? ⁶² ¿Nacxi caz gaca channö hualé'eli' neda', Bönni' Guljë' Bönachi, huëpa' huöja' ga ni' zoa' zí'alö? ⁶³ Le naca queë' Dios Bö' Lá'ayi naca le runna yöl-la' na'bán queëli'. Le naca bëla'sö cuntu nu uzí' xibé. Didza' na' bë'lena' libí'ili' nágacaga queë' Dios Bö' Lá'ayi, en rúnnagaca yöl-la' na'bán quégaca böñachi. ⁶⁴ Na'a, bál-lali' biti' réajlé'ëli'.

Gunnë' caní Jesús tu' nözinë' dza ni'te nupa na' biti' ta'yéajlé', enca' nu na' udödi Lë' lu ná'agaquië' bönni' ilútië' Lë'. ⁶⁵ Que lë ni na' gunnë':

—Que lë ni na' chigudxi caza' libí'ili': Biti' séqui'në' nitúë' bönni' të'ë neda' channö Dios Xuz cabí gu'ë lë' lataj.

⁶⁶ Dza na' gulaca chopa láxí'gaquië' zián bönni' usëda queë', en bíti'rö gula'dálenë' Lë'. ⁶⁷ Ní'irö Jesús gunábinë' idxínnutë' bönni' usëda queë' na', rë' légaquië':

—¿Naru' ubíga'tsali' ca' libí'ili'?

⁶⁸ Bubi'ë didza' Pedro, rë' Lë':

—Xan, ¿nuzxi que tséajtu'? Li' napu' didza' rúnnagaca queëtu' yöl-la' na'bán idú. ⁶⁹ Netu' réajlé'ëtu' Li', en núnbë'ëtu' Li', nacu' Cristo na' nasöl-lë'ë Dios, en nacu' ca' Zxi'inë' Dios ban.

⁷⁰ Bubi'ë didza' Jesús, rë' légaquië':

—Gurö caza' libí'ili' chínnuli' ni, pero tuë' bönni' lágajli' libí'ili' dzaga tu' xihui' lë'.

⁷¹ Didza' ni bë'ë Jesús ca naca queë' Judas Iscariote, zxí'inë' tu bönni' lë' Simón, tu' náquië' Judas bönni' na' udöde' Jesús lu ná'agaquië' bönni' ilútië' Lë', en nabábalenë' ia'chinéajë' bönni' usëda queë' Jesús.

7

Bönni' böch'i' cazë' Jesús biti' ta'yéajlé'ë Lë'

¹ Gudödi guca lë ni ridë' Jesús luyú Galilea. Biti' gü'unnë' tsejë' luyú Judea tu' të'ënnë' bönni' judío unná bë' nacu'ë ni' ilútië' Lë'. ² Dza ni' chizóa idxín laní quégacië' bönni' judío cate' tu'subanë' ca gula'cu'ë xuz xtó'ogaquië' zxan libín lágado'. ³ Que lë ni na' yugu' bönni' böchë'ë Jesús gulë' Lë', ta'nnë':

—Birúaj ni, en guyéaj luyú Judea para ila'lé'enë' ca' bönni' usëda quiu' nacu'ë ni' yugu' yöl-la' huáca runu'. ⁴ Channö rë'ënë' nu bönni' ilúnbë'ë böñachi

lë', biti' runë' bagáchi'sö le runë'. Tu' runu' yugu' yöl-la' huáca caní, bului'i cuinu' lógaca yúgu'të bönachi.

⁵ Caní gula'nnë', tu' cabí ta'yéajlë'ë bönni' böchë'ë Jesús Lë'. ⁶ Ní'irö Jesús rë' légaquië':

—Biti' ridxini dza quia' para ulu'i lahuá' lógaca bönachi, pero dza queëli' tséajli' ni' chizóa caz. ⁷ Bönachi yödzölió ni biti' tu'zóa libí'ili' tsölá'alö, pero tu'zóa neda' tsölá'alö tu' runa' ba nalí quégaquië', rmnía' naca xihui' le tunë'.

⁸ Guli'tséaj libí'ili' laní na'. Biti' tseja' laní na' na'a tu' biti' ridxini dza quia'.

⁹ Cate' chigudxë' légaquië' lë ni, bugá'anë' luyú Galilea.

Sa'yéajë' Jesús laní quégaca bönachi judío

¹⁰ Gudödi söjáquië' bönni' böchë'ë Jesús laní na', ní'irö sa'yéajë' ca' Lë', calëga yálajdo', pero bagáchi'sö sa'yéajë'. ¹¹ Ga na' raca laní na', bulu'guiljë' bönni' judío unná bë' Jesús, ta'nnë':

—¿Gazxi zoë' bönni' na'?

¹² Bönachi zián ni' gului'ida' didza' ca naca queë' Jesús. Bal-lë' ta'nnë':

—Náquië' dxi'a.

Ia'bal-lë' ta'nnë':

—Biti' náquië' dxi'a tu' rizi' yé'enë' bönachi.

¹³ Biti' bë'ë nitúë' bönni' didza' yálajdo' ca naca queë' Jesús, tu' tadxi bönachi zián na' le ilunë' yugu' bönni' judío unná bë'.

¹⁴ Cate' chibidxín gatsaj laní na', blë'ë Jesús ra' yudo', en busédinë' bönachi nacuá' ni'. ¹⁵ Bulu'bánine' bönni' judío, ta'nnë':

—¿Nacxi caz naca, rácadë'ë bönni' ni, en biti' ca' nazëdë' que yudo'?

¹⁶ Bubi'ë didza' Jesús, rë' légaquië':

—Le rusédida' neda', calëga quia' naca, pero queë' Dios Xuz na' nasöl-lë'ë neda'. ¹⁷ Channö rë'ënë' nu bönni' gunë' ca rë'ënë' Dios, huéquibe'enë' bönni' na' channö nequi queë' Dios le rusédida' bönachi o channö rácasö quia' ruá'a didza'. ¹⁸ Nu bönni' ru'ë didza' rácasö queë', runë' caní para ilún bal bönachi lë', pero Bönni' na' rë'ënë' ilún bönachi bal Nu nasöl-la' lë', Bönni' ni ru'ë didza' idútë li, en biti' ca' rizi' yë'ë.

¹⁹ Moisés bennë' queëli' xibá queë' Dios, pero biti' runli' ca rinná bë' xibá na'. ¿Bixz que rizóa ribö'öli' gútili' neda'?

²⁰ Bulu'bí'i didza' bönachi zián na', té Lë':

—Tu' xihui' dzaga li'. ¿Nuzxi caz rizóa ribö'ö guti li'?

²¹ Bubi'ë didza' Jesús, rë' légaquië':

—Tu yöl-la' huáca bena', ate' rubánili' yúgu'tëli'. ²² Le nácatë Moisés bennë' queëli' lë na' narugu lu xipéla'lí' le naca bë', pero calëga Moisés caz bennë' queëli' lë na', pero guzxi'ë le lu ná'agaquië' xuz xtá'ahuë'. Na'a, sal-la' naca dza lá'ayi, richúguli' lu xipéla'gacabí' bi'i bönni'do' lë na' naca bë' néquiguequibi' queë' Dios. ²³ Channö ta'zí'ibi' lu xipéla'gacabí' lë na' naca bë' cate' naca dza lá'ayi, para cabí quítsjali' xibá queë' Moisés, ¿naru' rilétseli' neda' tu' buna'-në' tu bönni', ate' böáquië' dxi'ado' cate' naca dza lá'ayi? ²⁴ Biti' ral-la' uchi'a usörö lízili' ca', pero buli'chi'a buli'sörö ca naca le naca idútë li.

Riguíxjö'ë Jesús ga nariúaje'

²⁵ Ní'irö gulu'ë didza' bal-lë' bönni' nacu'ë Jerusalén, ta'nnë':

—¿Naru' calëga bönni' ni Nu na' tu'guiljë' bönni' judío unná bë' para ilútië' Lë'? ²⁶ Buli'yútsöca', yálajdo' ru'ë didza', en biti' bi té' Lë'. ¿Naru' téquibe'enë' bönni' ta'nná bë'enë' rë'u, le nácatë bönni' ni náquië' Cristo, Nu na' ral-la' inná

be'e rë'u? ²⁷ Bönni' ni, nöz quéziru' gazxi bönni' Lë'. Cate' guídë' Cristo, cuntu nu inözi gazxi bönni' Lë'.

²⁸ Ni' zoë' Jesús rusédinë' böñachi chila yudo', en cate' biyönnë' didza' ni, nírō bë'ë zidzaj didza', rnne':

—¿Naru' núnbe'etseli' neda', en nözitseli' gazxi bönni' neda'? Bida' ni, calëga rácasö quia', pero Dios caz nasöl-lë'ë neda', ate' Lë', biti' núnbe'ëli'-në' libí'ili'. ²⁹ Neda' núnbe'eda'-në', tu' za'a queë' Lë', ate' Lë cazë' nasöl-lë'ë neda'.

³⁰ Nírō gulunë' bayudxi ila'zöne' Lë', pero cuntu nu guzxón Lë', tu' cabí ridxini dza queë' tsu'ë lu ná'agaquie'. ³¹ Gula'yéajlë' zián böñachi ni' Lë', ta'nná:

—Cate' guídë' Cristo, ¿naru' gunë' ziánrö yöl-la' huáca ca le runë' bönni' ni?

Bönni' yudo' ta'söl-lë'ë nupa ila'zön Jesús

³² Bila'yönnë' bönni' yudo' fariseo yugu' didza' ni tu'i böñachi ca naca queë' Jesús, ate' yugu' bixúz unná bë', en yugu' bönni' yudo' fariseo na' gula'söl-lë'ë ni'a ná'agaquie' para tsöjxöngaquie' Lë'. ³³ Nírō Jesús gunnë':

—Ia'tú chí'isö sóalena' libí'ili', ate' nírō huöja' ga zoë' Xuza' nasöl-lë'ë neda'.

³⁴ Uguíjali' neda', pero biti' udzólili' neda'. Ga ni' tsöjsóa' neda' biti' gaca guídali' libí'ili'.

³⁵ Nírō té' luzá'agaquie' bönni' judío, ta'nné':

—¿Gazxi tséajtsë' bönni' ni, ga ni' biti' udzóliru'-në'? ¿Naru' huayéajtsë' ga nacu'ë bönni' judío násilasigaquie' idútë yödzölió, en usédinë' yugu' bönni' zi'tu' ni'? ³⁶ ¿Bizxi rë'ëni inná didza' na' bë'ë: "Uguíjali' neda', pero biti' udzólili' neda'", enca': "Ga ni' tsöjsóa' neda' biti' gaca guídali' libí'ili'"?

Nisa yegu le runna yöl-la' na'bán queëru'

³⁷ Cate' ni' naca dza údxí que laní na', dza na' naca lo, guzuínë' Jesús, en bë'ë zidzaj didza', rnne':

—Channö zoë' nu bönni' ribidxi icja ládxí'da'ahuë', ral-la' guídë' bönni' na' ga zoa', en guí'je'. ³⁸ Nu bönni' réajlë'ë neda', gaca queë' ca na' nazúaj lu guichi lá'ayi, rnna: Lu icja ládxí'da'ahuë' bönni' na' ilén le naca ca nisa yegu, lë na' ulu'zi' xibé böñachi, gata' yöl-la' na'bán quéguequi.

³⁹ Didza' ni bë'ë Jesús ca naca queë' Dios Bö' Lá'ayi, Nu ral-la' idisóalen bönni' na' ila'yéajlë'ë Jesús. Caní gunnë' Jesús tu' cabí ridxíninë' Dios Bö' Lá'ayi, tu' cabí ruhuépinë' Jesús ga tsépisëterë'.

Ta'rúaj choplö böñachi

⁴⁰ Cate' bila'yöni didza' ni, gula'nná bal-la böñachi zián na', ta'nná:

—Le nácatë Bönni' ni náquië' Bönni' na' ru'ë didza' uláz queë' Dios, Bönni' na' guzxi' lu në'ë Dios isöl-lë'ë queëru'.

⁴¹ Ta'nné' ia'bal-lë'.

—Bönni' ni náquië' Cristo.

Ta'nná bal-la böñachi:

—¿Naru' irúajtsë' Cristo luyú Galilea? ⁴² Nazúaj lu guichi lá'ayi le rnna: "Cristo galjë' ladaj di'a dza queë' David, en gáquië' ca' bönni' Belén le guca ladzë' David na'."

⁴³ Caní guca, bila'rúaj böñachi na' choplö tu' nözinë' Jesús. ⁴⁴ Të'ënnë' bal-lë' ila'zöne' Jesús, pero cuntu nu bi ben queë'.

Biti' ta'yéajlë'ë Jesús bönni' unná bë'

45 Ní'irö bulu'dxinë' ni'a ná'agaquië' yugu' bixúz unná bë', en yugu' bönni' yudo' fariseo ga na' nacu'ë bönni' yudo' na', ate' légaquië' gulë' ni'a ná'agaquië' na', ta'nnë':

—¿Bixx que biti' dichë'ëli'-në?

46 Bulu'bi'ë didza' ni'a ná'agaquië', ta'nnë':

—Cuntu nu bönni' ru'ë didza' ca ru'ë didza' Bönni' ni.

47 Ní'irö bulu'bi'ë didza' bönni' yudo' fariseo na', ta'nnë':

—¿Naru' bë'tsalí' lataj guzxí' yé'enë' ca' libf'ili'? **48** ¿Naru' guyéajlë'tsë' Lë' nu bönni' unná bë' o nu bönni' yudo' fariseo? **49** Libf'ili' dxíali' dö' tu' cabí rácali' xibá queë' Dios.

50 Zoë' ca' Nicodemo ni', bönni' na' bidxinë' ga zoë' Jesús chi'i dzö'ölö, tu' náquië' ca' bönni' yudo' fariseo, ate' rë' légaquië':

51 —¿Naru' richúguru' queë' tu bönni' gátië' lu xibá queëru' channö cabí yóniru' lë' zí'alö para inóziru' bi benë'?

52 Ní'irö bulu'bi'ë didza' ia'zíca'rë' na', të' lë':

—¿Nácatso' ca' li' bönni' Galilea? Bulaba le nazúaj lu guichi lá'ayi, ate' uyú' catu caz birúaj nitúë' bönni' ru'ë didza' uláz queë' Dios luyú Galilea.

53 Ní'irö yöjhüöjgaquië' lidxi que queëgaquië'.

8

1 Guyijë' Jesús ga naca lu Gui'a Yaga Olivo.

Nigula naguítjanu xibá que yöl-la' nutsaga na'

2 Cate' za' reni' budxinë' Jesús ra' yudo', ate' bila'dxín yúgu'të bönnachi ga zoë'. Gurö'ë Jesús, rusédinë' légaquië'. **3** Ní'irö yugu' bönni' yudo' usedi, en yugu' bönni' yudo' fariseo duchë'ëgaquië'-nu tu nigula ga zoë' Jesús, tu' gula'dzölinë'-nu ni' riguítjanu xibá que yöl-la' nutsaga na'. Bulu'sudxinë'-nu lögaca bönnachi na' tu'zë nágagaca Jesús, **4** ate' të' Lë':

—Bönni' Usedi, nigula ni guzxöntu'-nu ni' runnu dul-la' riguítjanu xibá que yöl-la' nutsaga na'. **5** Lu xibá queë' Moisés, gunná bé'enë' netu' uládxit'u'-nu guiöj nu nigula runnu caní, para gátinu. ¿Názxiga Li', nacxi rnno'?

6 Caní gula'nnë' para ila'zí' bë'ë Jesús para ila'zéqui'në' ulu'zeguië' Lë' didza'. Ní'irö biyéchuë' Jesús, ruyúë' lu yu, en ruzúajë' lu yu na' len xibón në'ë. **7** Cate' gula'nábidé'enë' Lë', ní'irö buzuinë' Jesús, en rë' légaquië':

—Núli' cabí nunli' dul-la' isí lolí' uládxit'lí'-nu guiöj.

8 Leyúbölö biyéchuë' Jesús, ruyúë' lu yu, en buguélë'ë ruzúajë' leyúbölö lu yu na'. **9** Cate' bila'yönnë' didza' ni, bulu'xösa ládxido'gaquië' légaquië', ate' bila'rúajë' tu tuë'. Gula'sí lögäquië' bönni' gúlarö ga bidxitë bönni' cuidi'. Nagá'anë' Jesús ni', dzáganu nigula na' Lë' gatsaj láhui'lö nupa na' tu'zë nágagaca Lë'. **10** Ní'irö buzuinë' Jesús leyúbölö, en cuntu nu bilé'enë' nu ruzegui lënu didza', pero túzinu nigula na', ate' rë'ë-nu:

—Nigúla, ¿gazxi nacuá' nupa na' bulu'zegui lí' didza'? ¿Naru' cabí zoa nu bönni' richúguri' quiu'?

11 Lënu rnnanu:

—Cuntu nu caz, Xan.

Ní'irö Jesús rë'ë-nu:

—Lëzca' neda', biti' richuga' quiu'. Böaj lidxu', en bíti'rö gunu' dul-la'.

Náquië' Jesús bení' quégaca bönnachi yödzölió

12 Leyúbölö Jesús bë'lenë' bönnachi didza', rnne':

—Neda' naca' bení' quégaca bönachi yödzölió. Nu bönni' zá'lenë' neda', biti' të' ga naca chul-la que dul-la', pero tu bení' sóalen bönni' na' le ulu'i lë' naca gata' yöl-la' na'bán idú queë'.

¹³ Ní'irö të' Lë' bönni' yudo' fariseo, ta'nnë':

—Li' runu' ba nalí que la' cuinsu'. Biti' naca lesaca' le runu' ba nalí. Nítisö naca.

¹⁴ Bubi'ë didza' Jesús, rë' légaquië':

—Sal-la' runa' ba nalí que la' cuinsa', idútë li naca le runa' ba nalí, tu' nözda' ga birúaja', en ga tseja', pero libí'ili' biti' nözili' gazxi za'a, en caléga gazxi tseja'. ¹⁵ Libí'ili' ruchi'a rusöröli' ca nácagaca le taca yödzölió ni, pero neda', rácasö' quia' cuntu nu bönni' ruchi'a rusöröra' queë'. ¹⁶ La'tu' uchi'a usöröra', ca nácatë uchi'a usöröra', tu' caléga néda'sö uchi'a usöröra', pero Xuza' nasö'l-lë'ë neda' gunë' neda' tsözxön. ¹⁷ Lësca' caní lu xibá queë' Moisés nazúaj lu guichi le rnna: Le tunë' ba nalí chopë' bönni', idútë li naca. ¹⁸ Neda' runa' ba nalí que la' cuinsa', ate' Xuza' nasö'l-lë'ë neda', runë' ca' ba nalí quia'.

¹⁹ Ní'irö bönni' yudo' fariseo na' gula'nábinë' Lë', ta'nnë':

—¿Gazxi zóatse' Xuzu'?

Bubi'ë didza' Jesús, rë' légaquië':

—Biti' núnbë'ëli' neda', en biti' núnbë'ëli'-në' Xuza'. La'tu' núnbë'ëli' neda', lësca' Xuza' gúnbë'ëli'-në'.

²⁰ Yugu' didza' ni bë'ë Jesús cate' ni' zoë' rusédinë' bönachi lu chila yudo', ga na' nacuá' guí'ina gapa ta'gu'ë gun que yudo', pero cuntu nu guzxön Lë', tu' cabí ridxini dza queë' tsu'ë lu ná'agaquië'.

Rnnë' Jesús: "Ga tseja' neda', biti' gaca guídali"

²¹ Leyübölö Jesús re' légaquië', rnnë':

—Uzá'a yödzölió ni, ate' ugúljali' nu usölä libí'ili', pero ugá'ana dul-la' nabágä'li', en gátili'. Ga tseja' neda', biti' gaca guídali'.

²² Ní'irö gulu'ë didza' bönni' judío unná bë', ta'nnë':

—¿Naru' guti cuinë'? Rnnë': "Ga tseja' neda', libí'ili' biti' gaca guídali'."

²³ Jesús re' légaquië':

—Libí'ili' nácali' que luyú dë cadxí'ilö ni, pero neda' za'a yehua' yubá xitsá'. Libí'ili' nácali' bönachi yödzölió ni, pero neda' biti' naca' bönni' yödzölió ni.

²⁴ Que lë ni na' gudxa' libí'ili': Ugá'ana dul-la' nabágä'li', en gátili'. Channö cabí tséajlë'ëli' naca caza' Nu usölä, ugá'ana dul-la' nabágä'li', en gátili'.

²⁵ Ní'irö gula'nábinë' Lë', ta'nnë':

—¿Nuzxi caz nacu'?

Jesús re' légaquië':

—Naca' la' leze ca na' chigudxa' libí'ili' dza ni'te. ²⁶ Zián le ral-la' guía' libí'ili', en uchi'a usöröra' le naca queëli'. Didza' idútë li ru'ë Xuza' nasö'l-lë'ë neda', ate' didza' riyönda' ru'ë Lë', ru'ilenä' bönachi yödzölió ni.

²⁷ Biti' gula'yéajni'inë' ru'ilenë' légaquië' didza' ca naca queë' Dios Xuz.

²⁸ Que lë ni na' Jesús re' légaquië':

—Cate' idxín dza uchísali' neda', Bönni' Guljë' Bönachi, gútili' neda', ní'irö guéquibe'ëli' naca caza' Nu rusölä, en biti' bi runa' rácasö' quia', pero ca na' ruluf'inë' Xuza' neda', ca' ruá'a didza'. ²⁹ Xuza' nasö'l-lë'ë neda' zóalenë' neda'. Biti' nuca'anë' Xuza' neda' tuza', tu' rúntica'sa' le raza ládxë'ë Lë'.

³⁰ Cate' bë'ë Jesús didza' ni, bönni' zián gula'yéajlë'ë Lë'.

Nupa nácagaca zxí'inë' Dios, en nupa nadzúngaca lu na' dul-la'

³¹ Ní'irö Jesús gudxe' yugu' bönni' judío na' ta'yéajlë'ë Lë', rnmë':

—Channö góntica'sili' ca rnna xtídz'a'a, gácali' idú bönni' usëda quia'.
 32 Gúnbë'ëli' le naca idútë li, ate' le naca idútë li na' usölá lib'i'ili'.

33 Bulu'bë didza', të' Lë':

—Abraham naquie' xuz gudödi queëtu', en cuntu nu ben netu' bönni' nadó'ogaca. ¿Rnnatso: "Usölá libi'ili"?

34 Jesús rë' légaquië':

—Le nácatë rea' libi'ili': Yúgu'të nupa tun dul-la', nadzúngaca lu na' dul-la'. 35 Nu naca bönni' nadó' biti' ugá'anatica'sö lidxë' xan yu'u, pero nu naca zxí'inë' xan yu'u na' rugá'anatica'sö lidxi nu na' naca xan yu'u. 36 Caní naca, channö Nu na' naca Zxi'inë' Dios usölá libi'ili', le nácatë uláli'. 37 Nözda' naquie' Abraham xuz gudödi queëli', pero rizóa ribö'öli' gútili' neda', tu' cabí nazí' lu ná'alí' xtídz'a'a. 38 Neda' ruá'a didza' ca naca le bilé'eda' ga na' zoë' Xuza', pero libi'ili' runli' le biyönilí' ga zoa xuz quézili'.

39 Bulu'bë didza', të' Lë':

—Abraham náquie' xuztu'.

Ní'irö Jesús rë' légaquië':

—La'tu' nácali' idú zxí'iní xi'söë' Abraham, gunli' ca na' benë' Abraham.
 40 Na'a, rizóa ribö'öli' gútili' neda', sal-la' ruí'lena' libi'ili' didza' idútë li, didza' na' biyönda' bë'ë Dios. Biti' benë' Abraham caní. 41 Libi'ili' runli' ca run xuz quézili'.

Ní'irö të' Lë':

—Netu' biti' ca' nácatu' bi'i lando'. Tuzë' Dios náquie' Xuztu'.

42 Ní'irö Jesús rë' légaquië':

—La'tu' náquie' Dios idú Xúzili', huadxí'ili' neda', tu' birúaja' neda' ga zoë' Dios, en bida' luyú ni, ate' caléga rácasö quia' bida', pero Dios caz gusöl-lë'ë neda'. 43 ¿Bizx que biti' gaca tséajni'ili' didza' ruá'a? Naca tu' cabí rë'ënili' uzë nágali' xtídz'a'a. 44 Xuz quézili' naca tu' xihui'. Néquili' que tu' xihui', en rë'ënili' gunli' le rizé ladxi' xúzili' na'. Dza ni'te naca tu' xihui' nu guti böñachi, en cabí nazí' lu në'e le naca idútë li, tu' cabí ruí'i didza' idútë li. Cate' rizi' yë' tu' xihui', ca naca caz ruí'i didza', tu' naca nu rizi' yë', en naca ca xúzgaca caz nupa ta'zi' yë'. 45 Tu' ruá'a neda' didza' idútë li biti' réajlë'ëli' neda'. 46 ¿Núzzilöli' gaca usubágali' neda' dul-la'? Channö ruá'a didza' idútë li, ¿bizx que biti' réajlë'ëli' neda'? 47 Nu naca queë' Dios, ruzé nagui xtídzë'ë Dios, pero libi'ili', tu' cabí nácali' queë' Dios, biti' ruzé nágali' xtídzë'ë.

Cristo zoa caze' zí'atëlö ca Abraham

48 Ní'irö bulu'bë didza' yugu' bönni' judío, të' Jesús:

—Catëz gunnatu' cate' gunnatu' nacu' bönni' Samaria, ate' dzaga tu' xihui' Li'.

49 Bubi'ë didza' Jesús, rë' légaquië':

—Biti' dzaga tu' xihui' neda'. Neda' runa' Xuza' bal, ate' libi'ili' ruzóali' neda' tsölá'alö. 50 Biti' runa' zxön cuina'. Zoa Nu run zxön neda', ate' Lë' ruchi'a rusöröe' rë'u. 51 Le nácatë rea' libi'ili': Nu bönni' si' lu në'ë xtídz'a'a, biti' ca' gátië' bönni' na'.

52 Ní'irö yugu' bönni' judío na' të' Lë', ta'nnë':

—Na'a réquibe'etu' dzaga tu' xihui' Li'. Abraham gútië', ate' gulátië' ca' bönni' gulu'ë didza' uláz queë' Dios, pero Li' rnno': "Nu bönni' si' lu në'ë xtídz'a'a, biti' ca' gátië' bönni' na'" 53 ¿Naru' nácatërötso' Li' zxön ca xúziru' Abraham? Gútië' lë', ate' gulátië' ca' bönni' gulu'ë didza' uláz queë' Dios. ¿Nuzxi caz run cuinu'?

54 Bubi'ë didza' Jesús, rë' légaquië':

—Channö neda' guna' zxön cuina', yöl-la' zxön na' biti' bi gaca. Xuza' runë' neda' zxön, ate' libi'ili' rnnali' náquië' Dios queëli'. ⁵⁵ Libi'ili' biti' núnbe'ëli'-në' Dios Xuz, pero neda' núnbe'a-në'. La'tu' innia': Biti' núnbe'a-në', gaca' nu rizi' yë' ca na' nácali' libi'ili', rizi' yë'ëli'. Na'a, le nácaté núnbe'a-në', en nazi' lu na'a xtídze'ë. ⁵⁶ Xúzili' Abraham budzéjanë' tu' ral-la' ilé'enë' dza soa' yödzölió ni, en sal-la' gútië' dza ni'te, bilé'enë' le, en budzéjade'enë'.

⁵⁷ Ní'irö yugu' bönni' judío na' té' Jesús, ta'nnë':

—Biti' yui'iu' chi-un iz. ¿Naru' bilé'etsenu' Abraham?

⁵⁸ Jesús rë' légaquië':

—Le nácaté rea' libi'ili': Zí'atëlö ca soë' Abraham, neda' zoa caza'.

⁵⁹ Ní'irö gula'guéle'ë guiöj para ulu'ladxë' Jesús, pero Lë' bunítitë cuinë', en burúajë' lò'a yudo' na'. Gudödë' gatsaj láhui'lö ga na' nacu'ë, ate' sôhuöjë'.

9

Ruínë' Jesús tu bönni' guljë' nachúl-latë lahuë'

¹ Cate' gudödë' Jesús tu lataj, bilé'enë' tu bönni' ni' guljë' nachúl-latë lahuë'.

² Gula'nábinë' Jesús bönni' usëda queë', ta'nnë':

—Bönni' Usedi, ¿nuzxi ben dul-la'? ¿Naru' bönni' ni o xuz xinë'ë tu' guljë' nachúl-latë lahuë'?

³ Bubi'ë didza' Jesús, rë' légaquië':

—Biti' naca tu' benë' dul-la' bönni' ni, en calëga tu' gulunë' dul-la' xuz xinë'ë, pero naca para ilá' lahui yöl-la' huáca queë' Dios ni'a queë' bönni' ni.

⁴ Run bayudxi gunru' xichinë' Xuza' nasö'l-lë'ë neda', tsanni ni naca ca lahui' dza. Huadxin dza gaca chul-la que yöl-la' guti, cate' cuntu nu gaca gun dxin.

⁵ Tsanni ni zoa' yödzölió ni, naca' bení' quégaca böñachi yödzölió.

⁶ Cate' Jesús budxi bë'ë didza' ni, gurú'unë' zxöna' lu yu, en benë' gúna'do' len zxöna' na', ate' bugu'ë guna' na' guiöj lahuë' bönni' na' nachul-la lahuë'.

⁷ Ní'irö rë' lë':

—Guyéaj yöjtibi lo' lu beaj nisa nazí'i le Siloé.

Siloé naca tu didza' hebreo le rnna: Nasö'l-la'.

Ní'irö bönni' na' nachul-la lahuë' guyijë' ni', yöjtibi lahuë'. Cate' buzë'ë ni' chirilé'enë'. ⁸ Ní'irö bulu'bani böñachi dzaga yu'u queë', en nupa ni' bila'lé'e lë' zí'atëlö cate' ni' nachul-la lahuë', ta'nná:

—¿Naru' calëga bönni' ni bönni' na' ribö'ë rinabë' nu bi unödzaj queë'?

⁹ Bal-lë' ta'nnë':

—Lë' na'.

Ia'bal-lë' ta'nnë':

—Calëga lë', pero ca rna' lahuë' bönni' na', rna' lahuë' ca' bönni' ni.

Lë' rnne':

—Neda' na'.

¹⁰ Ní'irö gula'nábinë' lë', ta'nnë':

—¿Nacxi caz guca, guyalaj guiöj lo'?

¹¹ Bubi'ë didza', rë' légaquië':

—Bönni' na' lë' Jesús benë' gúna'do', ate' gudëbë' gúna'do' na' guiöj lahua', en gudxe'ë neda': "Guyéaj ra' beaj nisa nazí'i le Siloé, yöjtibi lo'." Guyija' ni', yöjtibi lahua', ate' guyálajtë guiöj lahua'.

¹² Ní'irö gula'nábinë' lë', ta'nnë':

—¿Gazxi zoë' bönni' na'?

Lë' rë' légaquië':

—Biti' nözda'.

Yugu' bönni' yudo' ta'náb yúdxiné' bönni' na' guyalaj guiój lahuë'

13 Ní'irö gula'chë'ë bönni' na' zí'alö nachul-la lahuë', en bulu'sudxiné' lë' lógaquië' bönni' yudo' fariseo. **14** Tu' naca dza lá'ayi quégaquië' cate' benë' Jesús gúna'do' na', en gusaljë' guiój lahuë' bönni' na' zí'alo nachul-la lahuë', **15** que lë ni na' yugu' bönni' yudo' fariseo na' gula'nábinë' lë' leyúbölö nacxi guca guyalaj guiój lahuë'. Lë' gudxë' légaquië':

—Budxië' gúna'do' guiój lahuua', ate' yójtiba' le, en rilé'eda'.

16 Ní'irö gulu'ë didza' bal-lë' bönni' yudo' fariseo na', ta'nnë':

—Biti' nasöl-lë' Dios bönni' na', tu' cabí rapa chí'ë dza lá'ayi. Ia'bal-lë' ta'nnë':

—¿Naru' huácatsö tu bönni' dul-la' gunë' yugu' yöl-la' huáca runë' bönni' na'? Caní guca, bila'rúajë' choplö. **17** Leyúbölö gula'nábinë' bönni' na' zí'alo nachul-la lahuë', ta'nnë':

—¿Bizxi rnno' li' queë' bönni' na', gusaljë' guiój lo?

Lë' rnne':

—Náquië' bönni' ru'ë didza' uláz queë' Dios.

18 Biti' gula'yéajlë'ë bönni' judío unná bë' na' guljë' nachúl-latë lahuë' bönni' na', en guyalaj guiój lahuë', cate' bulu'lídzarë' xuz xinë'ë bönni' na' guyalaj guiój lahuë', **19** ate' gula'nábinë' légaquië', ta'nnë':

—¿Naru' náquië' bönni' ni zxí'ini', rnnaли' guljë' nachúl-latë lahuë'? ¿Nacxi caz naca rilé'enë' na'a?

20 Bulu'bi'ë didza' xuz xinë'ë na', té' légaquië':

—Nözitu' bönni' ni náquië' zxí'initu', en guljë' nachúl-latë lahuë', **21** pero nacxi guca, rilé'enë' na'a, biti' nøztu', en nuzxi na' gusalaj guiój lahuë', biti' nøztu'. Guli'nabi-në' lë', tu' chináquië' bönni' chinaca. Lë' caze' quíxjö'ë.

22 Caní gula'nnë' xuz xinë'ë bönni' na' zí'alö nachul-la lahuë', tu' tádxiné' yugu' bönni' judío unná bë', tu' chigulún xtídfa'gaquië' bönni' judío na' channö nu bönni' si' lu në'ë Jesús náquië' Cristo, tsaz ulu'béajë' bönni' na' lu yu'u ga tu'dubë' bönni' judío, en tu'séde' queë' Dios. **23** Que lë ni na' gula'nnë' xuz xinë'ë: "Guli'nabi-në' lë', tu' chináquië' bönni' chinaca."

24 Ní'irö yugu' bönni' judío unná bë' bulu'lidzë' leyúbölö bönni' na' zí'alö nachul-la lahuë', ate' té' lë':

—Ni'a queë' Xanru' Dios gudixjö' le nácatë. Netu' réquibe'etu' bönni' na' náquië' bönni' dul-la'.

25 Ní'irö bubí'ë didza', rnne':

—Channö náquië' bönni' dul-la' biti' nøzda'. Tu le nøzda'. Zí'alö nachul-la lahuua', ate' na'a rilé'eda'.

26 Gula'nábinë' lë' leyúbölö, ta'nnë':

—¿Bizxi benë' quiu'? ¿Nacxi benë' gusaljë' guiój lo?

27 Bubi'ë didza', rë' légaquië':

—Chigúdxi caza' libí'ilí', pero biti' gú'unili' si' lu ná'ali' xtídfa'a. ¿Bizx que na' rë'énili' yónili' leyúbölö? ¿Naru' rë'énili' tá'ali' ca' Lë'?

28 Ní'irö bulu'lidza zi'ë lë', ta'nnë':

—Li' do'o Lë', pero netu' dá'atu' Moisés. **29** Netu' nøzta' Dios bë'lenë' Moisés didza', pero ca naca queë' bönni' ni, biti' nøzta' nuzxi caz gusöl-la' Lë'.

30 Ní'irö bubí'ë didza' bönni' na', rë' légaquië':

—Lë ni run ga rubánida'. Libí'ilí' biti' nøzili' nuzxi gusöl-la' bönni' ni, ate' Lë' gusaljë' guiój lahuua'. **31** Nöziru' biti' riyönnë' Dios yugu' bönni' dul-la', pero channö reaj ládxë'ë tu bönni' Dios, en rune' ca rë'énili' Lë', Dios riyönnë' bönni' ni. **32** Dza ni'te biti' riyöñ nu gunná channö nu bönni' gusaljë' guiój lahuë' tu

bönni' guljë' nachúl-latë lahuë'. ³³ La'tu' cabí náquië' bönni' ni queë' Dios, biti' bi gaca gunë'.

—Ní'irö bulu'bí'ë didza', té' lë':

—Ca gulju' naca bë' nabág'u'u dul-la'. ¿Naru' li' ruséditsenu' netu'?

Ní'irö bulu'béajë' lë' ní'ilö.

Nupa nátagaca chul-la niti

³⁵ Biyönnë' Jesús ca gulunë' bönni' judío unná bë', bulu'béajë' bönni' na' zí'alö nachul-la lahuë'. Cate' budzágue' lë', gudxë' lë':

—¿Ba réajlé'u Zxi'inë' Dios?

³⁶ Bubi'ë didza' lë', rë' Jesús:

—¿Nuzxi na', Xan, para tséajlë'a Lë'?

³⁷ Jesús rë' lë':

—Chibilé'enu' Lë', ate' neda' ni ruí'lena' li' didza', naca' Zxi'inë' Dios.

³⁸ Ní'irö bönni' na', guyalaj guiój lahuë', guyéaj ládxë'ë Jesús, en rë' Lë':

—Xan, réajlé'a Li'.

³⁹ Jesús rnñe' :

—Para uchi'a usöröa'bönachi bida' yödzölió ni, para ulu'lé'e nupa nachul-la nanítigaca, en ilaca ca nu nachul-la lahui nupa téquiguequi ta'lé'e.

⁴⁰ Cate' yugu' bönni' yudo' fariseo na' nacuá'lenë' Jesús bila'yönnë' didza' ni, ní'irö té' Lë':

—¿Naru' nachul-la nanítitsatu'?

⁴¹ Bubi'ë didza' Jesús, rë' légaquië':

—La'náru' nachúl-lasö' guiój loli', biti' ibága'li' dul-la'. Na'a rnñali': "Rilé'etu." Que lë ni na' nabág'a'li' dul-la'.

10

Rucúdzu'ë didza' Jesús que lë'a quégacaba' bö'cu' zxila'

¹ Gunnë' ca' Jesús:

—Le nácaté rea' libí'ili': Nu bönni' biti' razië' saca' ga nu riyaza lë'a quégacaba' bö'cu' zxila', pero tsází'ë' saca' ga yúbölö, bönni' ni náquië' gubán, en ribán cazë'. ² Nu bönni' razië' saca' ga nu riyaza náquië' bönni' run chi'i cazë' bö'cu' zxila' na'. ³ Para tsází'ë' bönni' ni, risalaj nu zoa run chi'i ga nu riyaza, ate' ta'yóniba' bö'cu' zxila' na' chi'ë, en tu'únbe'ëba'-në'. Lë' rulidzë'-ba' que queëba'ca lègacaba', en rubéajë' yugu'bö'cu' zxila' na'. ⁴ Cate' chinubéajë'-ba' yúgu'téba' bö'cu' zxila' néquigacaba' queë', röjnöruë' lögacaba', ate' bö'cu' zxila' na' röjnögacaba' lë', tu' tu'únbe'ëba' chi'ë. ⁵ Bönni' yúbölö biti' tsöjnögacaba' lë', pero ulu'zxúnna'ba' queë', tu' cabí núnbe'gacaba' chí'igaquië' bönni' yúbölö.

⁶ Le rucudzu' didza' ni gudxë' Jesús légaquië', pero biti' gula'yéajni'inë' lë na' rë' légaquië'.

Náquië' Jesús ca bönni' rapa chí'ë-ba' bö'cu' zxila'

⁷ Ní'irö Jesús rë' légaquië' leyúbölö, rnñe':

—Le nácaté rea' libí'ili': Neda' naca' ca tu ga ta'yázaba' bö'cu' zxila'.

⁸ Chigula'lë' è zíán bönni' gula'nnë' nátagaqüië' Cristo, pero yúgu'té bönni' na' bila'dxinë' zí'alö ca neda', nátagaqüië' gubán, en ta'bán cazë', ate' biti' bulu'zë nágaba' bö'cu' zxila' na' légaquië'. ⁹ Neda' naca' ca tu ga nu riyaza. Núti'tës bönni' tsázalenë' neda', ulë' bönni' na', en gáquië' ca tuba' bö'cu' zxila' rázaba', en rurúajba', en ridzöliba' le ráguba'.

10 'Za'zé' bönni' gubán para cuané'-ba', en gótië'-ba', en usunítië'-ba'. Neda' bida' para gata' yöl-la' na'bán idú quégaca böñachi nácagaca ca bö'cu' zxila' quia'. Le nácaté gata' quégacuïë' yöl-la' na'bán idú na'. **11** Neda' run chí'igaca' böñachi quia' ca runé' bönni' na', lu yöl-la' dxi'i ladxi' queë' rapa chí'ë yugu' bö'cu' zxila'. Bönni' na' rapa chí'ë'-ba' bö'cu' zxila' caní zoa caze' udödë' yöl-la' na'bán queë' ni'a quégacaba' bö'cu' zxila' queë'. **12** Tu bönni' nazxjé' rapa chí'ë'-ba' bö'cu' zxila', cate' rilé'enë' zá'aba' bö'cu' guí'a sínia', rucá'ané'-ba' bö'cu' zxila' na', en ruzxúnmajë', ate' bö'cu' guí'a sínia' na' ráguya'aba' yugu' bö'cu' zxila' na', en rusilásiba' légacaba'. Caní runé' bönni' na' rapa chí'ë'-ba' bö'cu' zxila' tu' cabí náquië' idú nu run chí'i-ba' bö'cu' zxila', ate' biti' néquigacaba' que caze' bö'cu' zxila' na'. **13** Ruzxúnmajë' bönni' nazxjé' na' tu' rapa chí'ë'-ba' bö'cu' zxila' na' para si'sisë' dumí, en biti' ruví'l ládxé'ë'-ba' bö'cu' zxila' na'.

14-15 'Neda' naca' bönni', lu yöl-la' dxi'i ladxi' quia' run chí'igaca'-ba' bö'cu' zxila'. Ca na' núnbeë' Xuza' neda', ate' neda' núnbeë'a-në' Xuza', lësca' caní núnbe'egacada' böñachi quia' nácagaca ca bö'cu' zxila' quia', en rudöda' yöl-la' na'bán quia' ni'a quégacaba' bö'cu' zxila' na', ate' bö'cu' zxila' na' néquiguequia' quia' núnbe'gacaba' neda'. **16** Lësca' nacuá'aba' ia'zíca'röba' bö'cu' zxila' quia' biti' nabábagacaba' ni. Lësca' légacaba' ral-la' tsöjxí'gaca'-ba'. Légacaba' ulu'zé nágaba' chí'a, en ilácaba' tuz len ia'zíca'röba' bö'cu' zxila' quia', ate' neda' caz gun chí'igaca'-ba'.

17 'Que lë ni na' nadxi'inë' Xuza' neda', tu' rudöda' yöl-la' na'bán quia', gu'a lataj nu guti neda', ate' uzi'a le leyúbölö, ubana' lu yöl-la' guti. **18** Cuntu nu bönni' séqui'në' gótië' neda', pero neda' rudödi caza' yöl-la' na'bán quia', gátia'. Dë lu na'a udöda' le, en dë lu na'a uzi'a le leyúbölö. Caní naca le gunná bë'enë' Xuza' neda'.

19 Cate' yugu' bönni' judío bila'yönnë' didza' ni, leyúbölö bila'rúajë' choplö ca téquinë' queë'. **20** Ziánë' ta'nnë':

—Yu'u bö' xihui' Lë', en nachixi icjë'. ¿Bizx que ruzé nágali' Lë'?

21 Ia'bal-lë' ta'nnë':

—Biti' ca' ru'ë caní didza' bönni' yu'u bö' xihui' lë'. ¿Naru' huácatsö bö' xihui' usalaj guiój lógaquïë' bönni' nachul-la lógaquïë'?

Yugu' bönni' judío unna bë' tu'zóë' Jesús tsölä'alo

22 Racá beo' ziaga, en naca dza na'tunë' laní yödzö Jerusalén, tu'subanë' ca gula'gu'ë yudo' quégacuïë' lu në'ë Dios. **23** Ridë' Jesús ra' yudo' ga naca chila que, nazi'l le Chila Queë' Salomón. **24** Yugu' bönni' judío unna bë' gula'gu'ë Jesús lë'aloj, en të' Lë':

—¿Bátaxi caz usanu' runu' ga rö'ötu' böninga? Channö nacu' li' Cristo, ca nácaté gudíxjö'i netu'.

25 Jesús rë' lógaquïë':

—Chigudxi caza' libí'ili', pero biti' réajlë'ëli' neda'. Yugu' dxin runa' tu' dë lu na'a uláz queë' Xuza' nácagaca bë' Nu naca'. **26** Libí'ili' biti' réajlë'ëli' neda', tu' cabí nabábalenli' nupa nácagaca bö'cu' zxila' quia', ca na' chigudxi caza' libí'ili'. **27** Ta'yóniba' bö'cu' zxila' quia' chí'a, en tu'unbe'eba' neda', ate' neda' núnbe'egacada'-ba', ate' ridijácalenba' neda'. **28** Neda' runödzja' yöl-la' na'bán idú quégacaba', ate' biti' ca' ila'nítiba', ate' cuntu nu sequi' ubéaj légacaba' lu na'a neda'. **29** Xuza' Dios bennë' quia' légacaba', ate' Lë' nápatére' yöl-la' huáca ca yúgu'té böñachi, ate' cuntu nu sequi' ubéaj légacaba' lu në'ë Xuza'. **30** Neda', en Dios Xuz, tuz nácatu'.

³¹ Leyúbölö yugu' bönni' judío unná bë' na' bulu'guélë'ë/guiój ulu'ladxë' Jesús. ³² Jesús rë' légaquië:

—Zian le naca dxi'a bena' loli' tu' dë lu na'a uláz queë' Xuza'. ¿Ni'a que bízzilö dxin dxi'a ni uládxí'lí' neda' guiój?

³³ Bulu'bí'ë didza' bönni' judío unná bë' na', të' Lë':

—Ni'a que dxin dxi'a biti' uládxí'tu' lí' guiój, pero tu' cabí rnnio' dxi'a queë' Dios, tu' nacu' lí' bönáchisö, en run cuinu' Dios.

³⁴ Bubi'ë didza' Jesús, rë' légaquië:

—¿Naru' cabí nazúaj lu guichi lu xibá queëli' ca gunnë' Dios, rnna: "Neda' rnniá": Nácali' yugu' dios"? ³⁵ Nöz quéziru' le nazúaj lu guichi lá'ayi nazúaj tsaz. Lu guichi lá'ayi na' ruí'i lágäquië' dios, bönni' ni' Dios bë'lenë' légaquië' didza'. ³⁶ Dios bubéajé' neda' quez queë', en gusö'l-lë'ë neda' yödzölió ni. ¿Naru' rnna'tsali' quia': "Li' biti' rnnio' dxi'a queë' Dios", tu' gunnë': Zxi'inë' Dios naca"? ³⁷ Channö cabí runa' dxin budödë' Xuza' Dios lu na'a, biti' ral-la' tséajlë'ëli' neda'. ³⁸ Channö runa' dxin budödë' Dios lu na'a, sal-la' biti' réajlë'ëli' neda' caz, guli'tséajlë' le nácagaca bë' dxin na' runa', para guéquibe'eli' náquië' Dios Xuz tuz len neda', ate' neda' ca' naca' tuz len Xuza'.

³⁹ Leyúbölö gula'zóa gula'bö'ë ila'zönë' Jesús, pero Lë' bulë' lu ná'agaquië'.

⁴⁰ Ní'irö guyijë' Jesús leyúbölö ia'tsöla' a yegu Jordán, ga ni' buquile' Juan bönachi nisa zí'atélo, ate' bugá'anë' Jesús ni'. ⁴¹ Bila'dxín bönachi zián ga zoë' Jesús, ta'nná:

—Le nácatë biti' benë' Juan nitú yöl-la' huáca zxön, pero yúgu'të le gunnë' Juan na' ca ral-la' gaca queë' bönni' ni, idútë li zeaj naca.

⁴² Que lë ni na' gula'yéajlë'ë bönni' zián Jesús ga na' zoë'.

11

Le gua cate' gútië' Lázaro

¹ Dza ni' ré'enë' Lázaro, bönni' Betania, le naca ládzagacanu María, en Marta. Nácanu Marta na' zxilanu María na'. ² Nácanu María na' nigula zanë' Lázaro, bönni' na' ré'enë', en nácanu ca' nigula na' gulú'unu le rilá' zxxi ni'ë Xanru', en buzxinu ni'ë len guitsa' ícjanu. ³ Gula'sól-la'nu nigula zanë' Lázaro na' nu yöjödx Jesús, gunná:

—Xan, buyütsöca', ré'enë' Lázaro, bönni' na' nadxi' inu'-në'.

⁴ Cate' biyönnë' Jesús didza' ni, gudxë' nupa nacuá' ni', rnnë':

—Yödzöhuë' ni biti' naca le guti lë' tsaz, pero naca para ilá'lahui yöl-la' zxön queë' Dios, ate' ni'a que yödzöhuë' ni ilá'lahui ca' yöl-la' zxön quia' neda', Zxi'inë' Dios.

⁵ Jesús nadxi'inë' Marta, en nigula zxilanu Marta na', en Lázaro na'. ⁶ Sal-la' nadxi'inë' Jesús légaquië', cate' biyönnë' ré'enë' Lázaro, bugá'anë' ga na' zoë' ia'chopa dza ca'. ⁷ Cate' bizá'a chopa dza na', Jesús gudxë' yugu' bönni' usëda queë', rnnë':

—Uyéajru' leyúbölö luyú Judea.

⁸ Ní'irö yugu' bönni' usëda queë' të' Lë', ta'nnë':

—Bönni' Usedi, si' gula'zóa gula'bö'ë bönni' judío unná bë' ni' ulu'ladxë' Li' guiój. ¿Naru' uyéajtsö' leyúbölö ni?

⁹ Bubi'ë didza' Jesús, rë' légaquië':

—Nacuá' caz chinnu hora lahui' dza. Nu bönni' ridë' lahui' dza, biti' tsöjchégü'ë, tu' rilé'enë', tu' zóalen lë' bení' zoa yödzölió ni. ¹⁰ Channö ridë' bönni' na' chi'i dzö'ölö, röjchégü'ë, tu' cabí zóalen bení' lë'.

11 Cate' budxi bë'ë Jesús didza' ni, ní'irö gudxë' légaquië':

—Ráisië' Lázaro, böchi' luzá'aru', ate' tseja' neda', en usubana'-në'.

12 Ní'irö yugu' bönni' usëda queë' té' Lë', ta'nnë':

—Xan, channö rásië', huöáquïë'.

13 Gunnë' caní Jesús tu' chigútië' Lázaro, pero légaquië' téquinë' gunnë': Rásisë' Lázaro. **14** Ní'irö Jesús gudxë' légaquië' yálajdo', gunnë':

—Chigútië' Lázaro. **15** Rudzéjada' tu' cabí zoa' ni', tu' gaca na'a tu le uzí'ili' xibé, le gun ga tséajlé' elí' neda'. Uyéajru' na'a ga na' dë' Lázaro.

16 Ní'irö Tomás, bönni' na'tu'ë lë', Bönni' Bilidi' gudxë' ia'zíca'rë' bönni' usëda queë' Jesús, rnnë':

—Uyéajru' ca' rë'u, en gátilenru'-në'.

Náquië' Jesús Nu rusubán nupa chinátigaca, enca' Nu nabániru'

17-19 Dë yödzö Betania gála'sö ga dë Jerusalén na', le naca ca rizá'aru' tu hóratëz. Que lë ni na' chibila'dxinë' zián bönni' judío ga na' nacuá'anu Marta, en María, en tu'huë tsáhuë'ë légacanu tu' gútië' bönni' zángacanu. Cate' Jesús bidxinë' ni', biyönnë' chiguca tapa dza yu'ë Lázaro na' yero ba. **20** Cate' biyönninu Marta didza' zë'ë Jesús, ní'irö birúajnu yu'u, yöjtságancu Lë', pero María bugá'ananu yu'u na'. **21** Marta na' rënu Jesús:

—Xan, la tu' zu' ni, biti' gátië' bönni' zana'. **22** Lësca' na'a, nözda' yúgu'të le inábinu' Dios, Lë' gunnë' quiu'.

23 Jesús rë'ë-nu:

—Ubanë' bönni' zanu'.

24 Marta rënu Lë':

—Nözda' ubanë' cate' idxín dza údxi cate' ulu'bán nupa chinátigaca.

25 Ní'irö Jesús rë'ë-nu:

—Naca caza' neda' Nu rusubán nupa chinátigaca, enca' Nu nabánigaca böñachi. Nu tséajlé' neda', sal-la' gati nu na', ubán caz, **26** ate' yúgu'të bönni' nabángaquië', en ta'yéajlé'ë neda', biti' ca' ilátië' tsaz. ¿Réajlé'u lë ni?

27 Marta rënu Lë':

—Ön, Xan. Réajlé'a nacu' Li' Cristo, Zxí'inë' Dios, Bönni' na' guzxi' lu në'ë Dios isöl-lë'ë yödzölió ni.

Ribödxë' Jesús tu' ru'i ládxë'ë nigula zanë' Lázaro

28 Cate' budxi bë'ënu Marta na' didza' ni, böajnu yu'u, yöjlídzanu María, zxílanu, ate' bagáchi'sö rënu lënu:

—Bönni' Usedi zoë' ni, rulidzë' li'.

29 Cate' biyönninu María didza' ni, la' guyástënu, zéajnu ga na' zoë' Jesús.

30 Biti' rázinë' Jesús la' yödzödo' na', pero zóasë' ga na' yöjtságancu Marta Lë'. **31** Cate' yugu' bönni' judío na' nacuá'lenë' María na', en tu'huë tsáhuë'ë-nu bila'lé'enë'-nu guyásanu, en birúajnu carelö ga naca lu yu'u, ní'irö yöjnógaquië'-nu, ta'nnë':

—Uyéajnu ra' yero ba tsöjchödxinu ni'.

32 Ní'irö bidixinnu María ga na' zoë' Jesús. Cate' bilé'enu Lë', biyéchunu xini'ë, en rënu Lë':

—Xan, la tu' zu' ni, biti' gátië' bönni' zana'.

33 Cate' bilé'enë' Jesús ribödxinu, en ta'bödxë' ca' bönni' judío na' dzágagaquië'-nu, ní'irö buí'innë', en gunnëda' ládxë'ë. **34** Rnnë':

—¿Gazxi bucáchili'-në'?

Të' Lë':

—Gudá uyú'.

35 Gurödxë' Jesús. **36** Ní'irö gula'nnë' bönni' judío na', ta'nnë':

—Buli'yútsöca' ca nadxí'ide'enë' lë'.

37 Bal-lë' ta'nnë':

—Bönni' ni benë' ga rilé'enë' bönni' na' zí'alö nachul-la lahuë'. ¿Naru' cabí gúcatsö gunë' ga biti' gátië' Lázaro?

Rubanë' Lázaro lu yöl-la' guti

38 Leyúbólö gunnëda' lâdxë' è Jesús, ate' bidxinë' ra' yero ba na'. Ba na' naca tu yero nadaj lë'e gui'a guiöj, ate' da' tu guiöjta'a le nusayaj ga nu riyaza le.

39 Jesús gudxë' nupa nacuá' ni', rnnë':

—Guli'cúa guiöj ni.

Ní'irö Marta, nigula zanë' bönni' nati na', rënu Lë':

—Xan, chirilë' è siguti tu' chiguca tapa dza nátië'.

40 Jesús rë'ë-nu:

—¿Naru' cabí chigudxi caza' li' channö réajlë'u, hualé'enu' yöl-la' zxön queë' Dios?

41 Ní'irö gula'gúë' guiöjta'a na' nusayaj ga nu riyaza yero ba ga na' yu'ë bönni' nati na'. Buyúë' Jesús zaca' lúzxibalö, rnnë':

—Xuza', rea' Li', xclenu' tu' riyönnu' neda'. **42** Neda' nözda' riyöntiqu'i'sinu' neda', pero ruá'a didza' ni para ulu'zí' xibé bönachi zián ni, en ila'yéajlë' Li' na' nasö'l-lu'u neda'.

43 Cate' budxi bë'ë Jesús didza' ni, zidzaj bulidzë', rnnë':

—Lázaro, burúaj nilö.

44 Burúajë' bönni' na' gúquië' bönni' nati lu yero ba, naröligacarö ni'a në'ë yugu' lári'do', en nagachi' ca' lahuë' ia'tú lári'do'. Ní'irö Jesús rë' légaquië':

—Buli'lí lari' na' naröli ni'a në'ë, en guli'gu'ë lataj së'ë.

Tun xtídzë' è yugu' bönni' judío unná bë' ilútië' Jesús

(Mt. 26:1-5; Mr. 14:1-2; Lc. 22:1-2)

45 Ní'irö zián bönni' judío na' gula'yéajlë' è Jesús, bönni' na' yøjácalenë' tsözxöñ María, en bila'lé'enë' lë na' benë' Lë'. **46** Bal-lë' yøjáquië' ga nacu'ë bönni' yudo' fariseo, en bulu'siyönnë' légaquië' ca na' benë' Jesús. **47** Ní'irö bönni' yudo' fariseo na' bulu'dübilenë' tsözxöñ bönni' yudo' tu'chi'a tu'söröe', en yugu' bixúz unná bë', ta'nnë':

—¿Nacxi caz gunru'? Runë' bönni' ni zián yöl-la' huáca zxön. **48** Channö gü'isiru'-në' lataj gunë' ca ni run cazë', ila'yéajlë' yúgu'të bönachi Lë', ate' idijáquië' bönni' Roma ni, duquínnajgaquië' yudo' lá'ayi queëru', en yödözö queëru'.

49 Ní'irö bë'ë didza' Caifás, bixúz lo iz na', en dzáguië' légaquië', rë' légaquië':

—Libí'ilí biti' bi nözili', **50** en biti' réquibe'eli' run bayudxi gátië' tuë' bönni' ni'a quégaca bönachi, para cabí inití idú yödözö.

51 Caléga rácasö queë' bë'ë didza' ni, pero tu' náquië' bixúz lo iz na', que lë ni na' bë'ë didza' uláz queë' Dios ca ral-la' gátië' Jesús ni'a quégaca bönachi yödözö na'. **52** Gátië' Jesús, calégasö ni'a que yödözö na', pero gátië' ca' para utubë' yugu' zxí'inë' Dios náslasigaquië', para ilácagaquië' tuz. **53** Caní guca, la' dza ná'asö gulún xtídz'a'gaquië' ilútië' Jesús. **54** Que lë ni na' bíti'rö gudë' Jesús yálajdo' gapa nacuá' bönachi judío, pero buzë'ë ni', sa'yéajë' tu lataj gala' ga naca lataj cá'asö, ate' bidxinë' yödözö Efraín, ga ni' bugá'anë, ate' dzágagaquië' bönni' usëda queë' Lë'.

55 Dza na' chizá' gala' Laní Pascua quégaquië' bönni' judío cate' tu'subanë' ca benë' Dios, bubéajë' bönachi queë' luyú Egipto. Bila'rúaj bönachi zián yugu' yödzö ni', ate' gula'benë', söjáquië' Jerusalén cate' si' idxín laní na' para tsöjpá'a cuíngaquië' ca naca que yudo'. **56** Yugu' bönni' na' nacu'ë Jerusalén tu'guiljë' Jesús, en cate' ni' nacu'ë chila yudo', gula'nabi luzá'agaquië' tuë' ia'tüë', ta'nnë':

—¿Bizxi rusáca'li? ¿Huídatsë' laní, o biti' guídë?

57 Chigula'mná bë'ë yugu' bixúz unná bë', en yugu' bönni' yudo' fariseo channö nu nøzi ga zoë' Jesús, ral-la' ududíxjö'i légaquië' para gaca tsöjxöngaquië' Lë'.

12

Maria rigú'unu le rilá' zxixi ni'ë Jesús (Mt. 26:6-13; Mr. 14:3-9)

1 Cate' ni' nagá'anagaca ia'xopa dza cate' idxín Laní Pascua cate' tu'subanë' bönni' judío ca benë' Dios, bubéajë' bönachi queë' luyú Egipto, ní'irö bidxinë' Jesús lu yödzö Betania, ga na' zoë' Lázaro, bönni' na' gútië', en bubenë' lu yöl-la' guti. **2** Gula'gu'ë tu gü'i huagu ni' le gahuë' Jesús. Gulú'unu María le ilahuë', ate' nútsë'ë Lázaro ladaj bönni' rö'ölengaquië' Jesús ga na' tahuë'. **3** Ní'irö gudéla'nu María ca tu guíë le rilá' zxixi que yöj susén lasi idú, le nazáca'da', en gulú'unu le ni'ë Jesús. Buzxinu ni'ë len guitsa' ícjanu. Idútë lu yu'u na' guzé bö' zxixi. **4** Ní'irö bë'ë didza' tu bönni' usëda queë' Jesús, lë' Judas Iscariote, zxí'inë' tu bönni' lë' Simón, en náquië' bönni' na' udödë' Jesús lu ná'agaquië' yugu' bönni' yudo', rnñë':

5 —¿Bizx que biti' gudó'o le rilá' zxixi na', le nazaca' lázxjaru' que tu iz, ate' huáca nu quisí dumí na' quégaca bönachi yechi'?

6 Gunnë' caní, caléga tu' ruí'i ládxë'ë bönachi yechi', pero tu' náquië' gubán, en lë caze' nu'ë buzudi dumí quégaquië', en rubéajlanë' dumí na' tu'cheje' lu buzudi na'. **7** Ní'irö Jesús rë' lë':

—Bë'ë-nu lataj, tu' naca lë ni bennu tu le nabá'a para dza igácha'a. **8** Yugu' bönachi yechi' ila'cuá'lentica'sö libí'ili', pero neda' biti' ugá'anatica'sa' ga zóali'.

Tun xtídfa'gaquië' bönni' judío unná bë' ilútië' Lázaro

9 Cate' bila'yönnë' bönni' judío zoë' Jesús yödz Betania, bila'dxinë' ziánë' ni', calégasö tu' zoë' Jesús ni', pero lësca' tu' té'ënne' ila'lé'enë' Lázaro, bönni' na' busubanë' Jesús lu yöl-la' guti. **10** Ní'irö gulúun xtídfa'gaquië' yugu' bixúz unná bë', ilútië' ca' Lázaro, **11** tu' ta'yéajlé'ë zián bönni' judío Jesús ni'a queë' Lázaro na', en chinulá'alengaquië' yugu' bixúz unná bë' na'.

Len yöl-la' ba zxön razië' Jesús Jerusalén (Mt. 21:1-11; Mr. 11:1-11; Lc. 19:28-40)

12 Bönachi zián bila'dxin Jerusalén dza Laní Pascua, ate' dza buropi na' ta'yoni zë'ë Jesús ni'. **13** Ní'irö gula'guítsjë' zin, en bila'rúajë' söjxí'gala'gaquië' Jesús, ate' gulu'ë zidzaj didza', ta'nnë':

—¡Yöl-la' ba Dios! ¡Yöl-la' ba Bönni' ni zë'ë uláz queë' Xanru', para inná bë'enë' bönachi Israel!

14 Budzölinë' Jesús tuba' búrrodo', ate' gudxië'-ba' ca na' nazúaj lu guichi lá'ayi, rnna:

15 ¡Biti' gádxili', libí'ili', zóali' yödzö Sión!

¡Buli'yútsöca', zë'ë Bönni' inná bë'enë' libí'ili'!

¡Dxië'-ba' tuba' búrrodo'!

¹⁶ Cate' ni' si' guca lë ni, biti' gula'yéajni'inë' bönni' usëda queë' Jesús, pero gudödi ni', cate' bubaneë' Jesús lu yöl-la' guti, en buëpë' yehua' yubá queë', ní'irö yöjnéguequinë' lë ni nazúaj lu guichi lá'ayi ca ral-la' gaca queë', ate' guca queë' caní.

¹⁷ Lësca' yugu' bönni' na' gula'cuá'lenë' Jesús cate' ni' bulidzë' Lázaro, bönni' na' yu'ë yero ba, en busubanë' lë' lu yöl-la' guti, gulunë' ba nalí queë'. ¹⁸ Que lë ni na' ca' bila'rúajë' bönni' yöjxí'gala'gaquieë' Jesús, tu' bila'yönnë' ca naca yöl-la' huáca ni benë' Lë'. ¹⁹ Ní'irö gula'nnë' la' légacasë' bönni' yudo' fariseo, ta'nnë':

—Chinaca bë' biti' bi séqui'ru' gunru'. Buli'yú ca dá'gaca yúgu'të böñachi Lë'.

Yugu' bönni' zi'tu' tu'guilje' Jesús

²⁰ Bal-lë' bönni' zi'tu' dzágagaquieë' nupa na' bila'dxín Jerusalén dza Laní Pascua na' para ila'yéaj ládxí'gaquieë' Dios. ²¹ Yugu' bönni' zi'tu' na' bila'dxinë' ga zoë' Felipe, bönni' Betsaida que luyú Galilea, ate' guláta'yuë' lahuë', ta'nnë':

—Bönni', rë'ënitu' ilé'etu'-në' Jesús.

²² Guyijë' Felipe na', en yöjödxë' ca' Andrés. Ní'irö Andrés, en Felipe na' gulé' ca' Jesús. ²³ Bubi'ë didza' Jesús, rë' légaquieë':

—Chizóa idxín dza gátia' neda', Bönni' Guljë' Böñachi, huöja' xilatja' yehua' yubá. ²⁴ Le nácaté rea' libí'ili': Ugá'ana cá'asö tu xisedo' channö cabí igachi' luyú, en úksi que. Channö úksi que xisedo' na', ate' ilén, yénni'térö unödzaj. ²⁵ Nu bönni' ruí'i ládxí'dë'ë yöl-la' na'bán queë', unitië' le, tu' gátië' tsaz bönni' na'. Nu bönni' biti' ruí'i ládxë'ë yöl-la' na'bán dë queë' yödzölió ni gun chí'ë le ga idxinxrö dza gata' yöl-la' na'bán idú queë'. ²⁶ Channö rë'ënë' nu bönni' gunë' xichina', ral-la' té'ë neda' bönni' na', ate' ga ni' tsöjsóa' neda', ni' tsöjsöë' ca' bönni' na' runë' xichina'. Channö runë' xichina' nu bönni', Xuza' Dios gunë' bal bönni' na'.

Riguíxjö'ë Jesús ca si' ilútië' Lë'

²⁷ Gunnë' ca' Jesús:

—Na'a rö'a böñiga neda'. ¿Nacxi innatsa'? ¿Naru' innía': Xuza', busölá neda' lu le gaca quia' na'a? Que lë ni na'bida', para guá' ilena' le ral-la' gaca quia' na'a. ²⁸ Xuza', ben ga ilá' lahui yöl-la' zxön quiu'.

Ní'irö biyón chí'i Nu ruí'i didza' yehua' yubá, rnna:

—Chibéna' ga nalá' lahui yöl-la' zxön quia', ate' leyübölö guna' ga ilá' lahui yöl-la' zxön quia' na'.

²⁹ Bila'yöni böñachi zián nacuá' ni' chí'i ni, ate' ta'nná:

—Guziú' na' gunnë.

Ia'bal-la böñachi na' ta'nná:

—Tu gubáz lá'ayi queë' Dios bë'lenë' Lë' didza'.

³⁰ Ní'irö bubi'ë didza' Jesús, rë' légaquieë':

—Biyón chí'i ni, caléga para uzi'a xibé neda', pero para uzí'ili' xibé libí'ili'.

³¹ Chibidxín dza uchi'a usöröë' Dios böñachi yödzölió ni. Na'a chú'unë' Dios tu' xihui' ní'lö, nu na' rinná be'e böñachi yödzölió ni. ³² Na'a, channö ilútië' bönni' neda', en ulu'chisë' neda' xitsá', guna' ga ulu'dubi yúgu'të böñachi ga zoa'.

³³ Didza' ni bë'ë Jesús naca bë' ca gátië'. ³⁴ Böñachi zián na' té' Jesús, ta'nná:

—Netu' biyöñitu' nupa bulu'laba le rnna xibá queë' Dios, lë na' rnna: Sóatica'së' Cristo. ¿Nacxi caz naca, rnno' Li': "Run bayudxi Bönni' Guljë' Bönachi, ulu'chisë' Lë' xitsá"? ¿Nuzxi na' Bönni' Guljë' Bönachi?

35 Ní'irö Jesùs rë' légaquië' :

—Ia'tú chí'ido'osö sóalena' neda' libí'ili', en naca' bení' queëli'. Guli'tá tsanni ni zóalena' libí'ili', en zóalen bení' libí'ili', para cabí ichul-la inítili'. Nu bönni' ridë' ga chul-la niti biti' nözinë' gazxi sa'yéajë'. **36** Tsanni ni zóalena' libí'ili', naca' bení' queëli'. Guli'tséajlë' neda' naca' bení' queëli' para ilé'eli' bení' na' naca idú.

Cate' Jesùs budxi bë'ë didza' ni, yöjhüöjë' yöjcachi' lahuë' lógaquië'.

Le run nigui bönachi judío, para cabí ila'yéajlë' Jesùs

37 Sal-la' benë' Jesùs zián yöl-la' huáca lógaquië', biti' gula'yéajlë'ë Lë'. **38** Caní guca lë na' buzúajë' Isaías lu guichi, bönni' na' bë'ë didza' uláz queë' Dios, gunnë' :

Xan, ¿nuzxi caz guyéajlë' didza' bë'ëtu'?

¿Nuzxi caz bulu'iñë' Xanru' yöl-la' huáca queë'?

39 Caní guca, biti' guca ila'yéajlë'ë Jesùs. Guca ca na' gunnë' ca' Isaías:

40 Dios benë' ga gula'chul-la gula'nitië',

ate' guca zidi ládxido'gaquië'

para cabí ila'lé'enë' len guijöj lógaquië',

en cabí ila'yéajni'ñë' lu icja ládxido'gaquië'.

Biti' ulu'huoáquië' quia' para úngaca'në'.

41 Bë'ë Isaías didza' ni tu' bilé'enë' yöl-la' zxön queë' Cristo, en bë'ë didza' ca naca queë' Lë'. **42** Sal-la' raca caní, gula'yéajlë' bönachi zián Jesùs, ga bidxitnë gula'yéajlë'ë bal-lë' bönni' unná bë' Lë', pero tu' tádxinë' yugu' bönni' yudo' fariseo, biti' gulunë' ba nalí queë' yálajdo', para cabí ulu'béajë' lógaquië' tsaz ga na' tu'dubë' tu'sëdë' queë' Dios. **43** Caní gulunë' tu' tunrë' zxön le tun bönnachi lógaquië' bal ca le runë' Dios lógaquië' bal.

Ilún didza' bë'ë Jesùs ga irugu quégaca bönachi ilátigaca

44 Bë'ë zidzaj didza' Jesùs, rnne' :

—Nu bönni' réajlë'ë neda', calëga néda'sö réajlë'ë, pero réajlë'ë ca' Xuza' nasö'lë'ë neda'. **45** Lësca' caní, nu bönni' rilé'enë' neda', rilé'enë' ca' Xuza' nasö'lë'ë neda'. **46** Neda' naca' bení', en bida' yödzölió ni, para cabí ulu'gá'anë' ga chul-la yúgu'të bönni' ila'yéajlë'ë neda'. **47** Channö riyönnë' nu bönni' xtídz'a'a, en biti' runë' le bal, calëga neda' ichuga' queë' bönni' na' gátië', tu' bida' ni, calëga para ichuga' quégaca bönnachi yödzölió ni, pero para usöla' bönnachi yödzölió ni. **48** Nu bönni' ruzoë' neda' tsölä'alö, en biti' rizí' lu në'ë xtídz'a, chizóa le ichugu queë' bönni' na'. Didza' na' chibë'lena' libí'ili' naca tu le ichugu queë' bönni' na' dza údxì. **49** Caní naca, ruá'a didza', calëga rácasö quia', pero Xuza' nasö'lë'ë neda' gudxë' neda' le ral-la' inniá', enca' ca ral-la' gu'a didza'. **50** Nözda' gunná bë'ë Dios caní para gata' yöl-la' na'bán idú quégaca bönnachi. Caní naca, didza' na' ruá'a, ruá'a didza' ca na' Xuza' chigudxi cazë' neda'.

13

Jesùs riguibë' ní'agaquië' bönni' usëda queë'

1 Ni' naca dza si' idxín Laní Pascua cate' tu'subanë' bönni' judío ca benë' Dios, bubéajë' bönnachi queë' tuyú Egipto. Nözinë' Jesùs chibidxín dza queë'

gátië', cate' ral-la' uzë'ë yödzölió ni, en huöjë' ga zoë' Xuzë'. Ca na' nadxi'inë' böñachi queë' nacuá' yödzölió ni, na'a nadxi'inë' légaquië' ga idxitë gátië' uláz quégäquië'.

² Satanás tu' xihui' chinagú'u yöl-la' Judas Iscariote, zxi'inë' tu bönni' lë' Simón, para udödë' Jesús lu ná'agaca nupa iluti Lë'. ³ Nözinë' Jesús ca naca, birúajë' ga zoë' Dios, en huöjë' ca' ga na' zoë' Dios, ate' Dios Xuzë' chinudödë' lu në'ë Lë' idutë yöl-la' unná bë' queë'. ⁴ Que lë ni na', cate' ni' tahuë', guzuinë' Jesús, en gudüé' lari' rixoa' yenë'. Gudélë'ë tu lari' ruzzini ná'aru' le budë'ë lë'ë. ⁵ Ní'irö gudë'ë nisa tu lu zxiga' guïë, ate' gusí lahuë' riguibe' ní'agaquië' bönni' usëda queë', en ruzzinë' ní'agaquië' len lari' na' da' lë'ë.

⁶ Cate' bidxinë' ga rö'ë Simón Pedro, Pedro na' rë' Lë':

—Xan, ¿naru' Li' quíbitso' ni'a?

⁷ Bubi'ë didza' Jesús, rë' lë':

—Lë ni runa', biti' réajni'ininu' na'a, pero huadzé tséajni'inu'.

⁸ Ní'irö Pedro rë' Lë':

—Biti' ca' quíbi cazu' Li' ni'a.

Jesús rë' lë':

—Channö neda' biti' quiba' li', biti' ca' séqui'nu' gunu' neda' tsözxön.

⁹ Ní'irö Simón Pedro rë' Lë':

—Xan, calégasö ni'a quibu', pero quibu' ca' na'a, en icja'.

¹⁰ Jesús rë' lë':

—Nu nayari, ní'asö run bayudxi tsari, tu' naca cazë' dxi'a idutë', ate' libí'ili' nácali' dxi'a, pero caléga yúgu'tëli'.

¹¹ Gunnë' caní Jesús: "Caléga yúgu'tëli' nácali' dxi'a", tu' nözinë' nulögaquië' na' udödi Lë'.

¹² Gudödi gudibë' Jesús ní'agaquië', buguélë'ë lari' na' buxóa yenë'. Bubö'ë ga tahuë', ate' rë' légaquië':

—¿Réajni'ili' lë na' si' bena' queëli'? ¹³ Libí'ili' ruí'ili' La': Bönni' Usedi enca': Xan. Dxi'a naca ca rninali', tu' caní naca'. ¹⁴ Na'a, channö nedä' naca' Xanli', en Bönni' Usedi queëli', ate' gudiba' ni'alí, lësca' caní ral-la' gunli' libí'ili', quíbili' ni'a luzá'ali' tuli' ia'tuli'. ¹⁵ Tu le bulu'i'ida' libí'ili' para gunli' libí'ili' ca na' bena' neda'. ¹⁶ Le nácatë rea' libí'ili': Biti' nayépisétëre' tu bönni' huen dxin ca xanë', ate' bönni' gubáz biti' nayépisétëre' ca nu' nasö'l-la' lë'. ¹⁷ Channö réajni'ili' yúgu'të lë ni, bica' ba libí'ili' channö gunli' caní. ¹⁸ Didza' ni ruá'a biti' rea' yúgu'tëli'. Nöz quézida' nupa gurö caza' neda', pero run bayudxi gaca lë na' nazúaj lu guichi lá'ayi, le rnna: "Nu rágulen neda' tsözxön, nu ni tá'baga' neda'." ¹⁹ Na'a riguixjö'i'ida' libí'ili' zí'alo ca gaca, para cate' gaca caní, tséajlë'ëli' zoa caza' neda'. ²⁰ Le nácatë rea' libí'ili': Nu bönni' gunë' bal gubáz isöl-la'a neda', neda' ca' gunë' bal, ate' nu bönni' gunë' neda' bal, gunë' ca' bal Xuzá', nasö'l-lë'ë neda'.

Riguixjö'ë Jesús ca gunë' Judas, udödë' Lë'

(Mt. 26:20-25; Mr. 14:17-21; Lc. 22:21-23)

²¹ Cate' Jesús budxi bë'ë didza' ni, buí'innë', ate' yálajdo' gunnë':

—Le nácatë rea' libí'ili': Tu bönni' nútse'ë lágjal' udödë' neda'.

²² Ní'irö bulu'yú lo luzá'agaquië' tuë' ia'túë' bönni' usëda queë', en gula'cu'ë böñiga, ate' ta'naba láxzi'gaquië' nuzxi que na' gunnë' Jesús caní. ²³ Tuë' bönni' usëda queë' Jesús, bönni' na' Jesús nadxi'inë' lë', zoë' cuita lë'ë. ²⁴ Simón Pedro bulá'a bulu'isë' bönni' ni para inábinë' Jesús nuzxi que na' gunnë' caní. ²⁵ Ní'irö bönni' na' zoë' cuita lë'ë Jesús rë' Lë':

—Xan, ¿nuzxi na' ru'u didza' que?

²⁶ Bubi'ë didza' Jesús, rë' lë':

—Náquië' bönni' na' gu'a-në' yöta xtila nabisa.

Ní'irö busubisië' yöta xtila na', en bë'ë queë' Judas Iscariote, zxí'inë' tu bönni' lë' Simón. ²⁷ Gudödi gudahuë' Judas yöta xtila na', guyaza Satanás tu' xihui' icja ládzi'da'ahuë'. Ní'irö Jesús rë' lë':

—Lë' na' gunu', yøjentë na'a.

²⁸ Biti' ta'yéajni'inë' ia'zíca'rë' bönni' usëda queë' rö'ögäquië' tahuë' bizx que na' Jesús gudxë' lë' caní. ²⁹ Tu' nu'ë Judas buzudi dumí quégäquië', téquinë' bal-lë' Jesús gudxë' lë': Yöxi' le gáguru' laní, o gunnë': Bë' lati' quégaca böñachi yechi'. ³⁰ Cate' budxi gudahuë' Judas yöta xtila na', en ni' naca chí'i dzö'ölö, la' birúajtë'.

Tu xibá cubi

³¹ Cate' chibirúajë' Judas na', ní'irö gunnë' Jesús:

—Na'a chizóa ilá' lahui yöl-la' zxön quia' neda', Bönni' Guljë' Bönachi, en ilá' lahui ca' yöl-la' zxön queë' Dios. ³² Channö ilá' lahui yöl-la' zxön queë' Dios ni'a quia' neda', Zxi'inë', lësca' Lë cazeë' Dios gunë' ga ilá' lahui yöl-la' zxön quia' neda', Zxi'inë', en la' guntë' caní. ³³ Libí'ilí, zxí'ina'do', ia'tú chí'isö zóalena' libí'ilí. Uguíjlali' neda', ate' ca na' chigúdxigaca'-në' bönni' judío, lësca' rea' libí'ilí' na'a: Ga na' tseja' neda', biti' gaca guídali' rácasö queëli'. ³⁴ Rea' libí'ilí' tu xibá cubi le rnna caní: Gulj'dxi'i luzá'ali' tulí' ia'tulí'. Ca na' neda' nadxi'ida' libí'ilí', lësca' caní ral-la' idxí'ilí' luzá'ali' tulí' ia'tulí'. ³⁵ Channö huadxi'i luzá'ali' tulí' ia'tulí', iléquibe'e yúgu'të böñachi dá'ali' neda'.

Rnnë' Jesús innë' Pedro biti' núnbeë' è Lë'

(Mt. 26:31-35; Mr. 14:27-31; Lc. 22:31-34)

³⁶ Ní'irö Simón Pedro gunábinë' Jesús, rnnë':

—Xan, ¿gazxi caz tseju'?

Bubi'ë didza' Jesús, rnnë':

—Ga na' tseja' neda', biti' gaca sá'lenu' neda' na'a, pero huadzé guídu' ga tseja' neda'.

³⁷ Pedro rë' Lë':

—Xan, ¿bizx que biti' gaca sá'lena' Li' na'a? Chizóa' udöda' yöl-la' na'bán quia', gátia' tu' nadxi'ida' Li'.

³⁸ Bubi'ë didza' Jesús, rë' lë':

—¿Naru' udödu' yöl-la' na'bán quiu' tu' nadxi'inu' neda'? Le nácatë rea' li', zí'alö ca cödxiba' böra, li' tá'bágu'u tsonna luzuí, innó' biti' núnbe'u neda'.

14

Náquië' Jesús nöza tséajlenru' para idxinru' ga zoë' Dios Xuz

¹ Rnnë' Jesús:

—Biti' cölli' baniga lu icja ládzi'do'oli'. Gulj'tséajlë' Dios, en guli'tséajlë' ca' neda'. ² Lu yu'u lidxeë' Xuza' lataj zián nacua'. La'tu' cabí naca caní, neda' chigudxi caza' libí'ilí'. Tseja' na'a, tsöjpá'a lataj queëli' ga tsöjsóali'. ³ Channö huayéaja', en tsöjpá'a lataj queëli' ga tsöjsóali', huöda' leyúbólö, ate' uchë'a libí'ilí' lataj quia', para ga na' tsöjsóoa' neda', tsöjsóali' ca' libí'ilí'. ⁴ Nöz quézili' ga ni' tseja', en núnbeë'eli' ca' nöza.

⁵ Tomás rë' Lë':

—Xan, biti' nöztu' gazxi na' tseju'. ¿Nacxi caz gaca gúnbe'ëtu' nöza?

⁶ Bubi'ë didza' Jesús, rë' lë':

—Neda' naca caza' nöza, en naca' ca' le naca idútë li, en naca' ca' Nu nabánigaca bönachi. Ni'a quia' néda'sö gaca nu idxín ga zoë' Dios Xuz. ⁷ La'tu' núnbe'ëli' neda', Xuza' ca' núnbe'ëli'-në'. Na'a, núnbe'ëli'-në', en chibilé'eli'-në'.

⁸ Ní'irö Felipe rë' Lë':

—Xan, bulu'i netu' Xuzu', ate' nácatë queëtu'.

⁹ Bubi'ë didza' Jesús, rë' lë':

—Felipe, xidzé chigucha zóalena' libí'ili'. ¿Naru' cabí núnbe'ëtsö' neda'? Nu bönni' rile'enë' neda', rile'enë' ca' Xuza'. ¿Rnnatso': "Bulu'i netu' Xuzu"? ¹⁰ ¿Naru' cabí réajlë'u zóalen caza'-në' Xuza', ate' Xuza' zóalen cazë' neda'? Yugu'didza' ni ruí'lena' libí'ili', calëga rácasö quia' ruá'a didza' ni, pero Xuza' zóalen cazë' neda', Lë cazë' runë' dxin ni. ¹¹ Guli'tséajlë' neda', zóalen caza'-në' Xuza', ate' Xuza' zóalen cazë' neda'. Channö cabí gaca gunli' caní, guli'tséajlë' neda' ni'a quégaca dxin ni runa'. ¹² Le nácatë rea' libí'ili': Yugu' dxin ni runa' neda', lësca' gunë' bönni' na' réajlë'ë neda', ate' le zxöntëro ca' gunë' bönni' na' tu' huöja' ga zoë' Dios Xuz. ¹³ Yúgu'te le inábili' Dios Xuz, en ugunli' dxin La' neda', neda' guna' lë na' inábili', para ulu'a lahui neda', Zxí'inë', yöl-la' zxön queë' Dios Xuz. ¹⁴ Bíti'tës bi inábili', en ugunli' dxin La' neda', neda' guna' le.

Jesús isö'l-lë'ë Dios Bö' Lá'ayi, para idisóalenë' bönachi queë'

¹⁵ Rnnë' ca' Jesús:

—Channö nadxfi'ili' neda', guli'gún le rea' libí'ili', ¹⁶ ate' neda' gáta'yua' lahuë' Dios Xuz, ate' Lë' isö'l-lë'ë queëli' Nu yüböl Nu gácalen libí'ili', Nu utipa ládx'i'li', en sóalentica'sö libí'ili'. Nu ni naca Dios Bö' Lá'ayi, Nu ruí'i didza' idútë li. ¹⁷ Biti' gaca ulu'zí' bönachi yödzöliö ni xibë' Lë', tu' cabí gaca ila'lë'e Lë', en biti' gaca ilúnbe' e Lë'. Zóalen cazë' libí'ili', ate' soë' lu icja ládx'i'do'oli'. ¹⁸ Biti' ucá'ana' libí'ili' ca yugu' bi'i uzébido'. Huöda' udusóalena' libí'ili'. ¹⁹ Ia'tú chí'ido'osö biti'rö ila'lë'e bönachi yödzöliö ni neda', pero libí'ili' ulé'eli' neda'. Tu' zoa caza' nabana' neda', libí'ili' ca', tsaz sóali' ibanli'. ²⁰ Dza ní'irö cate' Dios Bö' Lá'ayi na' idisóalenë' libí'ili', inöz quätzili' zóalen caza'-në' Xuza' Dios, ate' libí'ili' zóalenli' neda', ate' neda' ca' zóalen caza' libí'ili'. ²¹ Nu bönni' rizi' lu në'ë xtídz'a'a, en runë' ca rnna, naca bë' nadxfi'inë' neda'. Xuza' Dios idxí'inë' bönni' na' nadxfi'inë' neda', ate' neda' idxí'ida'-në' bönni' na', en ulu'i lahua' lahuë'.

²² Judas rë' lë', pero calëga Judas Iscariote, rnnë':

—Xan, ¿nacxi caz gaca ulu'i lo' lotu' netu', en biti' ulu'i lo' lögaca bönachi yödzöliö?

²³ Bubi'ë didza' Jesús, rë' lë':

—Nu bönni' nadxfi'inë' neda' gunë' ca rnna xtídz'a'a, ate' Xuza' Dios idxí'inë' bönni' na', ate' guídatu' idisóalentu'-në' bönni' na' lu icja ládx'i'da'ahuë'. ²⁴ Bönni' na' biti' nadxfi'inë' neda' biti' runë' ca rnna xtídz'a'a. Didza' na' biyöñili' bë'a neda', calégasö quia' na', pero naca queë' Dios Xuz nasö'l-lë'ë neda'.

²⁵ 'Rë caza' libí'ili' yugu' lë ni tsanni ni zóalena' libí'ili', ²⁶ pero Dios Bö' Lá'ayi gácalenë' libí'ili', en utipë' ládx'i'li'. Xuza' Dios isö'l-lë'ë Lë' queëli' tu' ugunli' dxin La' neda'. Usédinë' libí'ili' yúgu'te, en usë'ë ládx'i'li' ca naca yúgu'te didza' na' chigudxa' libí'ili'.

²⁷ 'Rucá'ana' queëli' le cuéqui dxi ládx'i'li'. Runna' queëli' yöl-la' rö'ö dxi ladxi' quia'. Yöl-la' rö'ö dxi ladxi' na' runna' queëli' biti' naca ca le tunna queëli' bönachi yödzöliö ni. Biti' ichixi icja ládx'i'do'oli', en biti' gadxi idzöbili'. ²⁸ Chibiyöñili' ca na' chigudxa' libí'ili': Huöja', ate' huöda' udusóalena' libí'ili'.

La'tu' nadxi'il'i neda', udzéjali' cate' ni' gudxa' libí'il'i huöja' ga zoë' Dios Xuz, tu' nayépisétérë' Dios Xuz ca neda'. ²⁹ Na'a, chigudxa' libí'il'i zí'alö ca si' gaca, para cate' gaca caní, tséajlë'ëli' neda'.

³⁰⁻³¹ 'Biti'rö güü'lena' libí'il'i didza' zián, tu' za' tu' xihui', nu rinná be'e böñachi yödzölió ni. Sal-la' biti' bi dë lu në'e bi gun quia' neda', ral-la' gaca caní para iléquibe'e böñachi yödzölió ni nadxi'ida'-në' Dios Xuz, en runa' ca na' chigudxë' neda' guna'. Guli'chasa, uzá'aru' ni.

15

Ca naca que lubá uva, en ni'a në'e lubá na'

¹ Lësca' caní Jesús gudxë' légaquië':

—Naca' neda' ca tu lubá uva le naca idú dxi'a, ate' Xuza' náquië' ca bönni' guz gú'una rapa chí'ë lubá na'. ² Uguë' yúgu'të ni'a në'e lubá na' naca' neda', le cabí bi ta'bía, ate' uchi'ë yúgu'të ni'a në'e na' ta'bía, para ila'bía ia'lati'. ³ Libí'il'i chinácal' dxi'a ni'a que didza' na' chibé'lena' libí'il'i. ⁴ Guli'dá'tica'sö neda', ca na' neda' dá'tica'sa' ca' libí'il'i. Ca naca que ni'a në'e lubá na', biti' gaca bi cuía rácasö que, channö cabí dá'tica'sö lubá na', lësca' caní naca queëli', biti' bi gaca gunli' channö cabí tá'tica'sili' neda'.

⁵ 'Naca' neda' ca lubá na', ate' libí'il'i nácali' ca ni'a në'e. Nu bönni' dá'tica'së' neda', ca na' neda' dá'tica'sa' lë', bönni' ni náquië' ca ni'a në'e lubá na' ribía yenni', tu' channö nulá'alenli' neda', biti' bi gaca gunli'. ⁶ Nu bönni' biti' dá'tica'së' neda', gaca queë' ca raca quégaca ni'a në'e lubá na' biti' nágagaca dxi'a, ta'rú'unë' ni'a në'e na', ate' ila'bidxi. Cate' chinabídxigaca ni'a në'e na', ulu'tubë' léguequi, en ila'gu'ë léguequi lu guí', ate' tséguigaca.

⁷ 'Channö tá'tica'sili' neda', en gunli' ca rnna xtídza'a, huáca inábali' bi gué'ënili', ate' neda' guna' lë na' inábali'. ⁸ Gunli' bal Xuza' Dios cate' gunli' xichinë', ate' gácali' ca ni'a në'e lubá na' ta'bía, en caní gaca bë' nácali' idú bönni' ta'dé'ë neda'. ⁹ Ca na' nadxi'ínë' Dios Xuz neda', lësca' caní nadxi'ida' libí'il'i. Guli'gúntica'sö ca ral-la' gunë' bönni' nadxi'ida'-në'. ¹⁰ Channö gunli' ca rea'libí'il'i, gunli' ca ral-la' gunë' bönni' nadxi'ida'-në', ca na' neda' ca' runa' ca chigudxë' Xuza' Dios neda' guna', en rúntica'sa' le raza ládxë'ë Lë', Bönni' na' nadxi'ínë' neda'.

¹¹ 'Yugu' didza' ni rea' libí'il'i para udzéjalenli' tsözxön neda', en gaca idú ca na' udzéjali'. ¹² Lë ni naca le rea' libí'il'i gunli': Guli'dxi'i luzá'ali' tulí' ia'tuli', ca na' neda' ca' nadxi'ida' libí'il'i. ¹³ Biti' gaca idxi'irönë' nu bönni' luzë'ë ca nu bönni' udödë' yöl-la' na'bán queë' gátië' para gácalenë' yugu' böchi' luzë'ë tu' nadxi'ínë' légaquië'. ¹⁴ Libí'il'i' nácali' böchi' luzá'a channö gunli' ca na' chigudxa' libí'il'i gunli'. ¹⁵ Bítirö innia' queëli' nácali' huen dxin quia', tu' cabí nözinë' bönni' huen dxin naca gunë' xanë'. Neda' chigunnia' queëli' nácali' böchi' luzá'a, tu' chibena' ga nözilí' yúgu'të le chigudxë' Xuza' neda' guna'. ¹⁶ Caléga libí'il'i' guröli' neda', pero neda' gurö' caza' libí'il'i, en buzó'a libí'il'i' para tséajli' bi tsöjenli', ca na' tun ni'a në'e lubá na' ta'bía yenni', ate' ugá'anatica'sö lë na' gunli'. Caní gaca, Xuza' Dios gunnë' queëli' yúgu'të le inábili' Lë', en ugunli' dxin La' neda'. ¹⁷ Lë ni naca le rea' libí'il'i gunli': Guli'dxi'i luzá'ali' tulí' ia'tuli'.

Bönachi yödzölió tu'zóa tsölä'alö Jesús, en nupa dá'gaca Lë'

¹⁸ Gunnë' ca' Jesús:

—Channö bönachi yödzölió ni tu'zóá libí'ili' tsölá'alö, nözili' chibulu'zóë' neda' tsölá'alö zí'alö ca tu'zóë' libí'ili' tsölá'alö na'a. ¹⁹ La'tu' nácali' tuz len bönachi yödzölió ni, huala'dxi'i bönachi yödzölió ni libí'ili' ca na' ta'dxi'i luez'eguequi, pero tu'zóá bönachi yödzölió ni libí'ili' tsölá'alö tu' cabí nácali' tuz len léguequi, tu' gurö caza' neda' libí'ili', en guléaja' libí'ili' ladaj bönachi yödzölió ni. ²⁰ Guli'tsöjnë didza' na' chigudxa' libí'ili', gunnía': Biti' nayepiséterë' nu bönni' huen dxin ca xanë'. Channö gula'bía ládx'i'gaca bönachi neda', ila'bía ládx'i'gaca ca' libí'ili'. Channö nacuá' nupa tun ca rnna xtídz'a, ilún ca' ca rnna xtídz'a'li' libí'ili'. ²¹ Yúgu'të lë ni ilún bönachi queëli' tu' dá'ali' neda', tu' cabí núnbe'gaca Dios Xuz nasöl-lë'ë neda'.

²² La'tu' cabí bida', en la'tu' cabí bë'lena' légaquië' didza', biti' ila'bágue'ë dul-la', pero na'a tu' bida' ni, biti' bi gaca ila'nnë' que dul-la' nabága'gaquië' le ubéaj légaquië' dxi'a. ²³ Nu bönni' ruzoë' neda' tsölá'alö, ruzoë' ca' Xuza' Dios tsölá'alö. ²⁴ La'tu' cabí bena' yugu' yöl-la' huáca ga nacu'ë', yugu' le cuntu nu ben ca gulaca, biti' ila'bágue'ë dul-la'. Na'a, bila'lé'enë' yugu' lë na' bena', ate' tu'zóë' neda' tsölá'alö, en tu'zóë' ca' Xuza' tsölá'alö. ²⁵ Caní raca, para gaca ca rnna xtídzë'ë Dios, le nazí' lu ná agaquië', le rnna: Tu'zóë' neda' tsölá'alö, en biti' zoa bizx que.

²⁶ Cate' idxinë' Dios Bö'Lá'ayi, Bönni' ru'ë didza' idútë li, en gácalenë' libí'ili', utipë' ládx'i'li'. Isöl-la'a Bönni' na' queëli' uláz queë' Dios Xuz, ate' gunë' ba nalí quia' neda'. ²⁷ Libí'ili' ca' gunli' ba nalí quia', tu' zóalen cázali' neda' tsözxöndza ni'te.

16

¹ Gunnë' ca' Jesús:

—Yugu' didza' ni chigudxa' libí'ili', para cabí gaca chopá ládx'i'li'. ² Yugu' bönni' judío ulu'béajë' libí'ili' tsaz ga tu'dubë' tu'sëdë' queë' Dios, ate' idxin dza cate' nu bönni' gútië' libí'ili' guéquinë' dxin queë' Dios runë'. ³ Caní ilunë', tu' cabí núnbe'gaquië' Dios Xuz, en cabí núnbe'gaquië' neda'. ⁴ Rea' libí'ili' yugu' didza' ni, para cate' idxin dza na', tsöjnëli' didza' ni chigudxi caza' libí'ili'.

Le gunë' Dios Bö'Lá'ayi

Gunnë' ca' Jesús:

—Yugu' didza' ni biti' gudxa' libí'ili' dza ni'te, tu' ni' zóalen caza' libí'ili'. ⁵ Na'a huöja', tsöjsóalena'-në' Dios Xuz, nasöl-lë'ë neda'. Biti' inábili' neda' nituli' libí'ili', biti' innali': ¿Gaxzi tseju'? ⁶ Na'a, tu' rea' libí'ili' yugu' didza' ni, risëbi ládx'i'li'. ⁷ Neda' rea' libí'ili' le naca idútë li. Gácaro dxi'a queëli' huöja', tu' channö cabí huöja', biti' idisóalene' Dios Bö'Lá'ayi libí'ili', Bönni' na' gácalenë' libí'ili', en utipë' ládx'i'li', pero channö huöja', isöl-la'a-në', na' idisóalene' libí'ili'. ⁸ Cate' guíde' Lë', gunë' ga iléquibe' bönachi yödzölió ni nabága'gaca dul-la', en biti' núnbe'gaca le naca tsahui', ate' ichúguië' Dios queëguequi ilátigaca. ⁹ Nabága'gaquië' dul-la' tu' cabí ta'yéajlë'ë neda'. ¹⁰ Biti' núnbe'gaquië' le naca tsahui' tu' ilútë' neda', ate' huöja' ga zoë' Dios Xuz, Bönni' na' náquië' tsahui', ate' bítirö ila'lé'enë' neda'. ¹¹ Ichúguië' Dios quégäquië' ilátie' tu' chiguchúguië' que tu' xihui' nu rinná be'e bönachi yödzölió ni.

¹² Ia'zica' zián didza' rë'ënda' güí'lena' libí'ili', pero biti' gaca tséajni'ili' na'a. ¹³ Cate' guíde' Dios Bö'Lá'ayi, Bönni' na' ru'ë didza' idútë li, Lë' usedinë' libí'ili' yúgu'të le naca idútë li na', tu' cabí gu'ë didza' rácasö queë', pero gu'ë yúgu'të didza' na' yönnë' ru'ë Xuza', en gunë' ga inözili' yúgu'të le ral-la' gaca.

14 Lë' gunë' neda' bal, tu' si'ë le nequi quia', en gunë' ga inözili' le. **15** Yúgu'të le nequi queë' Dios Xuz nequi quia'. Que lë ni na' gunnía' si'ë le nequi quia', en gunë' ga inözili' le.

Yöl-la' risëbi ladxi' queëli' huöáca yöl-la' rudzeja

16 Gunné' ca' Jesús:

—Yetú chí'ido'osö, en bíti'rö ilé'eli' neda', ate' ia'tú chí'ido'osö ca' ulé'eli' neda', tu' huöja' ga zoë' Dios Xuz.

17 Ní'irö bönni' usëda queë' gulë luzá'agaquïë' tuë' ia'tué', ta'nnë':

—¿Bizxi rnna didza' ni reë' reë'u? Rnnë': "Ia'tú chí'ido'osö, en bíti'rö ilé'eli' neda', ate' ia'tú chí'ido'osö ca' ulé'eli' neda', en naca tu' huöja' ga zoë' Dios Xuz."

18 Ní'irö gula'nnë':

—¿Bizxi caz rë'ëni inná didza' ni, gunnë': "Ia'tú chí'ido'osö"? Biti' réajni'itu' didza' ni ru'ë.

19 Réquibe'enë' Jesús të'ënnë' ila'nábinë' Lë', ate' reë' légaquïë':

—¿Naru' rinábítso luzá'ali' ca naca que didza' na' bë'a, gunnía': Ia'tú chí'ido'osö, en bíti'rö ilé'eli' neda', ate' ia'tú chí'ido'osö ca' ulé'eli' neda'?

20 Le nácatë rea' libí'ili': Cödxili', en isébi ládxil'i, pero bönachi yödzölió ni ulu'dzeja cate' ilutu neda'. Ní'irö sal-la' isébi ládxil'i, yöl-la' risëbi ladxi' queëli' huöáca yöl-la' rudzeja cate' ulé'eli' neda'. **21** Tu nigula cate' chizóa gáljabi' bí'ido' queënu, rigui'i rizáca'nu, tu' chibidxín dza queënu, pero cate' chizóabi' tubi' bi'i bönni'do' queënu, bíti'rö röjnenu lë na' butságanu, tu' rudzéjanu tu' chigúljabí' tubi' bi'i bönni'do' yödzölió ni. **22** Lësca' caní raca queëli', risëbi ládxil'i' na'a, pero huöda' uduyuá' libí'ili', ate' ní'irö udzeja ládxil'i', ate' biti' séqui'ne' nu bönni' ugúü'ë yöl-la' rudzeja queëli' na'.

23 'Dza ní'irö biti' bi inábili' neda'. Le nácatë rea' libí'ili': Yúgu'të le inábili' Dios Xuz, en ugunli' dxin La' neda', Lë' gunnë' queëli'. **24** Ga ridxitë na'a dza biti' rugunli' dxin La' neda' cate' bi rinábili'-ne' Dios Xuz. Guli'naba caní, ate' idéli'l'i' lë na' inábali', para gaca idú yöl-la' rudzeja queëli'.

Ridéli'në' Jesucristo lu le raca yödzölió ni

25 Gunné' ca' Jesús:

—Yugu' lë na' chibélena' libí'ili' didza' bucúdu'a didza'. Huadxín dza cate' bíti'rö gü'ilena' libí'ili' didza' le rucúdu'a didza', pero yálajdo' gü'ilena' libí'ili' didza' ca naca queë' Dios Xuz. **26-27** Dza na' inábili'-ne' Dios, en ugunli' dxin La' neda', ate' rea' libí'ili', biti' gun bayudxi gáta'yua' lahuë' Dios Xuz uláz queëli', tu' nadxí'inë' Lë' cazë' Dios Xuz libí'ili'. Nadxí'inë' libí'ili' tu' nadxí'ili' neda', en réajlë'ë'l' birúaja' ga zoë' Dios. **28** Birúaja' ga zoë' Dios Xuz, en bidxina' yödzölió ni. Ia'tú ca', ucá'ana' yödzölió ni, ate' huöja' ga zoë' Dios Xuz.

29 Ní'irö yugu' bönni' usëda queë' gulë' Lë', ta'nnë':

—Na'a ru'u didza' yálajdo', en bíti'rö rucúdu'u didza'. **30** Na'a réquibe'etu' nöz quézinu' Li' yúgu'të, en biti' run bayudxi nu bi inabi yudxi Li', tu' riguixjöi' inu' netu' le si' inábatu'. Que lë ni na' réajlë'ëtu' birúaju' ga zoë' Dios.

31 Bubi'ë didza' Jesús, rë' légaquïë':

—¿Naru' réajlë'ëtsali' neda' na'? **32** Buli'yú, huadxín dza, en chiridxín dza na', cate' gásilasili' que queëli', en ucá'anali' neda' tuza', pero biti' soa' tuza', tu' zóalen cazë' Dios Xuz neda'. **33** Yugu' didza' ni chigudxa' libí'ili' para cuéqui dxi ládxil'i', tu' nácali' quia' neda'. Lu yödzölió ni gaca queëli' le usaca' zi' libí'ili', pero buli'tipa ládxil'i'. Neda' chibidéli'da' lu le raca yödzölió ni.

17

Jesús rinábiné' Dios gácalené' nupa dá'gaca Lé'

¹ Cate' budxi bë'ë Jesús yugu' didza' ni, guchisa lahuë', ruyúë' yehua' yubálö, ate' rnne':

—Dios Xuz, chibidxín dza. Ben ga ilá' lahui yöl-la' zxön quia' neda', Zxi' inu', para gaca guna' ga ilá' lahui yöl-la' zxön quiu' Li'. ² Ben caní tu' chinudödu' lu na'a yöl-la' unná bë' para inná bé'eda' yúgu'té böñachi, en gu'a yöl-la' na'bán idú quégaca yúgu'té nupa na' chibennu' quia'. ³ Lé ni naca yöl-la' na'bán idú na', tu' núnbe' gaquie' Li', nacu' la's duí Dios idú, en tu' núnbe' gaquie' ca' neda', Jesucristo, ate' Li' nasöl-lu'u neda'.

⁴ 'Neda' chibena' ga nalá' lahui yöl-la' zxön quiu' yödzölió ni, en chibudxi bena' dxin na' budödu' lu na'a. ⁵ Na'a, Xuz, ben ga ilá' lahui yöl-la' zxön napa' tsözxön len Li', para gaca quia' yöl-la' zxön guta' quia' tsözxön len Li' dza ni te quez cate' si' gata' yödzölió.

⁶ 'Chibulu'a lahui le nacu' Li' lógaquie' bönni' ni bennu' quia', nupa na' gurö cazu' Li' ladaj böñachi yödzölió. Guléquiné' bönni' ni quiu', ate' bennagacu'-në' quia', ate' tunë' ca rnna xtídz'u. ⁷ Na'a nözguequiné' yúgu'té lë na' bennu' quia' zá'gaca lu no'o Li', ⁸ tu' chibudöda' lu ná'agaquie' didza' na' budödu' Li' lu na'a neda', ate' lógaquie' nazí' lu ná'agaquie' le, en téquibe'enë' birúaja' ga zu' Li', ate' ta'yéajlé'ë Li' nasöl-lu'u neda'.

⁹ 'Neda' ráta'yua' Lo' gácalenu' lógaquie'. Ráta'yua' Lo', caléga gácalenu' yúgu'té böñachi yödzölió, pero gácalengacu'-në' bönni' ni chibénnagacu'-në' quia', tu' néquiguequiné' quiu'. ¹⁰ Yúgu'té nupa néquiguequi quia' néquiguequi ca' quiu', ate' nupa na' néquiguequi quiu' néquiguequi ca' quia', ate' ca nácacaca nupa na' rului'i lahui yöl-la' zxön quia'.

¹¹ 'Na'a, bití'rö ugá'ana' yödzölió ni, pero yugu' bönni' ni ulu'gá'anë' yödzölió, ate' neda' udusóalena' Li'. Xuz Lá'ayi, len yöl-la' huáca quiu' ben chí'i nupa ni chibennu' quia', para ilácagaca tuz, ca na' nácaru' ré'u tuz. ¹² Cate' ni' guzóalena' lógaquie' yödzölió ni, ben chí'igaca'-në', buguna' dxin yöl-la' huáca na' bennu' quia'. Nupa na' bennu' quia', ben chí'igaca'-në', ate' nitúë' bití' bunítia'-në', pero tuzé' bönni' na' náquië' ca zxí'ini tu' xihui', en narugu quee' gátië' tsaz. Caní raca ca nazúaj lu guichi lá'ayi.

¹³ 'Na'a udusóalena' Li', ate' tsanni ni zoa' yödzölió ni, ruá'a yugu' didza' ni para gaca idú yöl-la' rudzeja quégäquie' ca na' raca quia' neda' yöl-la' rudzeja. ¹⁴ Neda' chibudöda' lu ná'agaquie' xtídz'u, ate' böñachi yödzölió ni tu' zóá lógaquie' tsolá'alo tu' cabí nácagaquie' tuz len léguequi, ca na' naca quia' neda', bití' naca' tuz len böñachi yödzölió ni, pero gun chí'igacu'-në', para cabí ila'dzunë' lu na' tu' xihui'. ¹⁵ Ráta'yua' Lo', caléga cúaagacu'-në' yödzölió ni, pero gun chí'igacu'-në', para cabí ila'dzunë' lu na' tu' xihui'. ¹⁶ Bití' nácagaquie' tuz len böñachi yödzölió ni ca na' naca quia' neda', bití' naca' tuz len böñachi yödzölió. ¹⁷ Guléaj quez quiu' lógaquie', ugunu' dxin le naca idútë li. Le naca idútë li na' naca xtídz'u. ¹⁸ Ca na' benu' Li', gusöl-lu'u neda' ladaj böñachi yödzölió ni, lësca' caní runa' neda', risöl-la'gaca'-në' ladaj böñachi yödzölió. ¹⁹ Tu' nadxí'igacada'-në' rudödi cuina' quiu', para ulu'rúaje' ca' lógaquie' quez quiu' tu' nazí' lu ná'agaquie' le naca idútë li.

²⁰ 'Ráta'yua' Lo', caléga quégacase' bönni' ni, pero lësca' quégäquie' bönni' ni' ila'yéajlé'ë neda' ni'a que didza' ilu'ë bönni' ni. ²¹ Ráta'yua' Lo' gunu' ga ilácagaquie' tuz yúgu'té, en ilácagaquie' ca' tuz len ré'u, ca na' nacu' Li', Xuza', nacu' tuz len neda', ate' neda' ca', naca' tuz len Li'. Caní ral-la' ilácagaquie'

para ila'yéajlë' ia'zíca'rö bönachi yödzölió ni, Li' caz gusöl-lu'u neda'. ²² Yöl-la' zxön na' bennu' quia', neda' bë'a ca' quégäquië', para ilácagaquië' tuz, ca na' nácaru' tuz rë u. ²³ Li' nacu' tuz len neda', ate' neda' naca' tuz len légaquië', para gaca idú ca nácagaquië' tuz, en caní iléquibe'e ia'zíca'rö bönachi yödzölió ni, Li' caz gusöl-lu'u neda', ate' nadx'igacanu'-në' ca na' nadx'inu' neda'.

²⁴ Xúza'do', rë'ënda' ila'cuálenë' neda' bönni' ni bennagacu'-në' quia' ga na' tsöjsóa', para ila'lé'enë' yöl-la' zxön na' bennu' quia' dza ni'te cate' si' gunu' yödzölió tu' nadx'inu' neda'. ²⁵ Xuza' tsahui', bönachi yödzölió ni biti' núnbe'gaca Li', pero neda' nunbë' caza' Li', ate' yugu' bönni' ni chinöziguequinë' Li' caz gusöl-lu'u neda'. ²⁶ Bena' ga nöziguequinë' le nacu' Li', en gunra' ca' ga ila'nözinë' lë ni para ca na' nadx'inu' Li' neda', lësca' caní ila'dxf'i luzá'agaquië', ate' gaca caza' tuz len légaquië'.

18

Ta'zönë' Jesús (Mt. 26:47-56; Mr. 14:43-50; Lc. 22:47-53)

¹ Cate' budxi bë'ë Jesús yugu' didza' ni, birúajë' ni, ate' sa'yéajlenë' yugu' bönni' usëda queë'. Gudödë' ia'tsólá'a yegu Cedrón, en bidxinë' ga ni' nacuá' yaga olivo ca', ate' lataj ni guyázalenë' yugu' bönni' usëda queë'. ² Lësca' Judas, bönni' na' udödë' Jesús, núnbe'ë la' yëla na', tu' butubë' Jesús yugu' bönni' usëda queë' ni' zián luzuí. ³ Ní'irö guchë'ë Judas tu cö' bönni' röjáquië' gudilla, en yugu' bönni' ni'a ná'agaquië' bixúz unná bë', en ni'a ná'agaquië' yugu' bönni' yudo' fariseo, ate' yöjáquië' ga ni' zoë' Jesús, nuá'agaquië' yugu' guí yöri, en yugu' le tu'dí'inë'. ⁴ Ní'irö, tu'nözinë' Jesús yúgu'të le ral-la' gaca queë', birúajë' ga ni' zoë', en rë' légaquië':

—¿Nuzxi riguúljali?

⁵ Bulu'bí'ë didza', të' Lë':

—Jesús, bönni' Nazaret, riguúljatu'-në'.

Jesús rë' légaquië':

—Neda' caz.

Judas, bönni' na' rudödë' Jesús lu ná'agaquië', zóalenë' légaquië'. ⁶ Cate' Jesús gudxë' légaquië': "Neda' caz", ní'irö bulu'bíguë'ë cusi zxanlö, en gula'dzö'ë lu yu. ⁷ Jesús gunabínë' légaquië' leyúbölö, rnnë':

—¿Nuzxi riguúljali?

Të' Lë':

—Jesús, bönni' Nazaret, riguúljatu'-në'.

⁸ Ní'irö bubí'ë didza' Jesús, rnnë':

—Chigúdxa' libf'ili': Neda' caz. Channö riguúljali' neda', guli'güí-gáquië' lataj tsöjuöjgaquië' bönni' ni.

⁹ Caní gunnë' Jesús para idxín didza' na' bë'ë, gunnë': "Nupa ni bennu' quia', nitüé' biti' bunítia'-në'." ¹⁰ Ní'irö, tu' nuë Simón Pedro tu guíë tuchi', gulecjë' le, en bentë' huë' Malco, tu bönni' huen dxin queë' bixúz lo, guchúguië' guídi náguië' ibëla bönni' na'. ¹¹ Ní'irö Jesús rë' Pedro na':

—Bugú'u guíë tuchi' qui' lidxi. ¿Naru' cabí ral-la' qui'i saca'a lë na' chinunë' Xuza' ca gaca quia'?

Ridxinë' Jesús lahuë' bixúz lo

(Mt. 26:57-58; Mr. 14:53-54; Lc. 22:54)

¹² Yugu' bönni' na' röjáquië' gudil-la, en bönni' na' nacu'ë lu në'ë, enca' yugu' bönni' ni'a ná'agaquië' bönni' judío unná bë' gula'zönë' Jesús, en gulúgui'ë Lë'.

13 Ní'irö gula'chë'ë Lë' zí'alö lahuë' Anás, tu' náquië' xto' zxí'inë' Caifás, bönni' náquië' bixúz lo iz na'. **14** Náquië' Caifás bönni' na' buzéajni' inë' yugu' bönni' judío unná bë', bului'në' légaquië' dxí'arö gaca gátië' tuzë' bönni', en calëga initi idütë yödöz quégaquië'.

Rnnë' Pedro: "Biti' núnbe'a-në' Jesús"
(Mt. 26:69-70; Mr. 14:66-68; Lc. 22:55-57)

15 Simón Pedro, en ia'túe' bönni' usëda queë' Jesús yöjáquië' cùdzu'lë' Lë', sönjógaquië' Lë'. Bönni' usëda ni guyázalenë' Jesús lõ'a que lidxi bixúz lo, tu' núnbe'ë bixúz lo na' lë'. **16** Bugá'anë' Pedro ní'lö ga nu riyaza lõ'a na'. Que lë ni na' burúajë' bönni' usëda na' núnbe'ë bixúz lo lë', ate' bë'lenë'-nu didza' nigula na' run chí'nu ga nu riyaza lõ'a na', ate' benë' ga guyázië' Pedro lõ'a.

17 Ní'irö nigula na' run chí'nu ga nu riyaza lõ'a rënu Pedro, rnnanu:

—¿Naru' cabí do'o ca' li' bönni' ni?

Bubi'ë didza' Pedro, rnnë':

—Calëga neda'.

18 Tu' run ziaga, yugu' bönni' huen dxin, en yugu' bönni' ni'a ná'agaca böñachi yudo' nabéquigaquië' guí', ate' zuíguequinë' ra' guí' na', en tu'tsë'e cuíngäquië'. Lësca' Pedro zuílenë' légaquië', rutsë'e cuinë'.

Bixúz lo rinabi yúdxinë' Jesús
(Mt. 26:59-66; Mr. 14:55-64; Lc. 22:66-71)

19 Ní'irö gunabi yúdxinë' bixúz lo Jesús para inözinë' nupxi dá'gaca Lë', en nacxi naca le rusedinë' Jesús böñachi. **20** Bubi'ë didza' Jesús, rë' lë':

—Lahui' lo bë'lena' yúgu'të böñachi didza'. Buseditiqu'i'sida' légaquië' gapa naca lu yu'u ga tu'dubë' tu'sëdë' queë' Dios, enca' chila yudo', ga ni' tu'dubë' yúgu'të bönni' judío, en biti' bi didza' bë'a bagáchi'sö. **21** ¿Bizx que rinabi yúdxinu' neda'? Gunabi yudxi nupa ni' bila'yöni didza' bë'lena' léguequi. Nözguequi quézinë' bönni' na' didza' na' bë'lena' légaquië'.

22 Cate' budxi bë'ë Jesús didza' ni, tu bönni' ni'a ná'agaca böñachi yudo' gudápë'ë ru'ë Jesús, rnnë':

—¿Naru' caní rubí'itso' didza' lahuë' bixúz lo?

23 Bubi'ë didza' Jesús, rë' lë':

—Channö biti' gunnía' dxí'a, gudixjö' bízxilö didza' bë'a biti' naca dxí'a, en channö guca dxí'a didza' bë'a, ¿bizx que na' gudápu'u neda'?

24 Ní'irö Anás na' gusöl-lë'ë Jesús nágüe'ë, ate' bulu'sudxinë' Lë' lahuë' Caifás, bönni' náquië' idú bixúz lo.

Leyúbölö rnnë' Pedro: "Biti' núnbe'a-në' Jesús"
(Mt. 26:71-75; Mr. 14:69-72; Lc. 22:58-62)

25 Cate' ni' zuínë' Pedro ra' guí' rutsë'e cuinë', yugu' bönni' nacu'ë ni' gulë' lë', ta'nnë':

—¿Naru' cabí do'o ca' li' Jesús na'?

Gudá'baguië' Pedro, rnnë':

—Calëga neda'.

26 Zoë' ni' tu bönni' huen dxin queë' bixúz lo, náquië' di'a dza queë' bönni' na' Pedro guchúgië' guídi nágüe', ate' bönni' huen dxin na' rë' Pedro:

—¿Naru' cabí bilé'e quézida' li' la' yëla ni', dzagu'-në' Jesús?

27 Leyúbölö gudá'baguië' Pedro, ate' la' gurödxítëba' böra.

Ridxinë' Jesús lahuë' Pilato
(Mt. 27:1-2, 11-14; Mr. 15:1-5; Lc. 23:1-5)

28 Ní'irö gula'chë'ë Jesús, en bulu'zë'ë lidxë' Caifás na', ate' bila'dxinë' yúlahui' queé' bönni' yu'u lu në'ë uláz que yödz Roma, le nazí'i le Pretorio. Chizá' rení' dza na', ate' biti' gula'yázië' yugu' bönni' judío yúlahui' na', tu' téquinë' ila'bágue'ë xíguia' channö ila'yázië' ni', le gun ga biti' gaca ilahue' xtsö' Laní Pascua, laní na' tu'subanë' ca benë' Dios, bubéajë' bönnachi Israel luyú Egipto. **29** Ní'irö birúajë' Pilato, bönni' na' yu'u lu në'ë, en bidxinë' ga na' nacu'ë, ate' rë' légaquië':

—¿Bizxi ruzégü'lí' në' bönni' ni didza?

30 Bulu'bi'ë didza', të' lë':

—La'tu' cabí nu'ë bönni' ni dö', biti' udöditu'-në' lo'.

31 Ní'irö Pilato rë' légaquië', rnñë':

—Libí'i cázali' guli'chë'ë, en buli'chi'a buli'sörö Lë' ca rinná bë' xibá queëli'. Yugu' bönni' judío të' lë', ta'nnë':

—Biti' dë lu na'tu' nu gútitu'.

32 Caní guca para idxín xtídzë'ë Jesús, le bë'ë naca ral-la' gátië'. **33** Ní'irö buázië' Pilato yúlahui' na', ate' bulidzë' Jesús, en rë' Lë':

—¿Nacu' Li' Bönni' Rinná Bé'enë' Bönachi Judío?

34 Bubi'ë didza' Jesús, rë' lë':

—¿Naru' rácasö quiu' rnno' caní, o gulë bönnachi li' caní ca naca quia'?

35 Pilato rë' Lë':

—¿Naru' réquitsenu' naca' judío? Yugu' bönni' uládz quiu', en yugu' bixúz unná bë' bulu'dödë' Li' lu na'a. ¿Bizxi caz benu'?

36 Ní'irö bubi'ë didza' Jesús, rë' lë':

—Rinná bë'a neda', pero calëga ca ta'nná bë' bönnachi yödzölió ni. La'tu' rinná bë'a ca ta'nná bë' bönnachi yödzölió, ila'dil-lë' bönni' dá'gaquië' neda', para cabí ilu'ë lataj nu udödi neda' lu ná'agaquië' bönni' judío. Ca rinná bë'a neda' biti' naca ca ta'nná bë' bönnachi yödzölió ni.

37 Ní'irö Pilato rë' Lë':

—¿Nácatso' bönni' rinná bë'ë?

Bubi'ë didza' Jesús, rë' lë':

—Naca' ca na' rnno'. Que lë ni na' bida' ga gulja' yödzölió ni, para guna' ba nalí que le naca idútë li. Yúgu'të nupa ni tun le naca idútë li tu'zë nágagaca didza' ruá'a.

38 Pilato rë' Lë':

—¿Bizxi na' le naca idútë li?

Ta'chúguië' queé' Jesús gátië'

(Mt. 27:15-31; Mr. 15:6-20; Lc. 23:13-25)

Cate' budxi gunnë' Pilato caní, burúajë' leyúbölö ga na' nacu'ë bönni' judío unná bë' na', en rë' légaquië':

—Biti' bi dö' ridzöliða' nu'ë bönni' ni. **39** Libí'ilí' dë tu le nulaga lolí' runli' cate' raca Laní Pascua ni, rinábili' neda' usana'-në' queëli' tuë' bönni' nadzunë'. ¿Rë'ënili' usana'-në' queëli' Bönni' Rinná Bé'enë' Bönachi Judío?

40 Ní'irö yúgu'të' gulu'ë zidzaj didza' leyúbölö, ta'nnë':

—¡Calëga bönni' ni, pero Barrabás usanu'-në' queëtu'!

Barrabás na' náquië' gubán.

19

1 Ní'irö Pilato guchë'ë Jesús, en benë' ga gula'guinë' yugu' bönni' röjáquië' gudil-la Lë'. **2** Bönni' röjáquië' gudil-la na' gulunë' tu bregui' ni'a në'e yötsi',

ate' bulu'dxié' le icjé' Jesús, en bulu'gácué' Lé' tu lari' tunna xiná chul-la ca naca le tácué' bönni' ta'nná bë'ë. ³ Ní'irö gula'biguë'ë lahuë' Jesús, en té' Lé':

—¡Bica' bo' Li', Bönni' Rinná Bé'enë' Bönachi Judío!

Ní'irö gula'gápe'ë lahuë'.

⁴ Ní'irö burúajé' Pilato, en rë' yugu' bönni' judío unná bë', rnñë':

—Buli'yú, rubéaja'-në' lolí' ni para inözili' biti' bi rudzölida' le naca dö' nu'ë bönni' ni.

⁵ Ní'irö birúajé' Jesús, dxía icjé' bregui' ni'a në'e yötsi' na', en nácuë' lari' tunna xiná chul-la na'. Pilato rë' légaquië':

—Ni zoë' bönni' ni.

⁶ Cate' yugu' bixúz unná bë', en yugu' bönni' ni'a ná'agaquië' bila'lé'enë' Jesús, zidzaj gulu'ë didza', ta'nnë':

—¡Budë'ë lë'e yaga cruz! ¡Budë'ë lë'e yaga cruz!

Pilato rë' légaquië':

—Libí'i cázali' guli'chë'ë, en guli'tsöjdë'ë lë'e yaga cruz. Neda' biti' bi dö' budzölida' nu'ë bönni' ni.

⁷ Ní'irö bönni' judío na' té' lë':

—Dë queëtu' tu xibá, ate' rinná bë' xibá queëtu' na' ral-la' gátië' bönni' ni tu' gunnë' náquië' Zxi'inë' Dios.

⁸ Cate' biyönnë' Pilato didza' ni, gúdxirönenë'. ⁹ Leyúbölö buázië' yúlahui' na', en rë' Jesús:

—¿Gázxitë' bönni' Li'?

Biti' bi didza' bubí'ë Jesús.

¹⁰ Ní'irö Pilato rë' Lé':

—¿Naru' cabí ubí'itsó' didza', quíxjö'ínu' neda'? ¿Naru' cabí nözinu' dë lu na'a udá'a Li' lë'e yaga cruz, en dë lu na'a usana' Li'?

¹¹ Bubi'ë didza' Jesús, rë' lë':

—Biti' bi dë lu no'o gunu' quia' la'tu' cabí nudödë' Dios yöl-la' unná bë' na' lu no'o. Que lë ni na', bönni' na' budödë' neda' lu no'o nabágä'rë' xíguia' ca li'.

¹² La' ní'isö rizóa ribö'ë Pilato usanë' Jesús, pero gulu'ë zidzaj didza' bönni' judío unná bë', ta'nnë':

—Channö usanu'-në' bönni' ni, biti' ridzagü'-në' dxi'a César, bönni' rinná bë'enë' idútë yödzölió. Nu bönni' run cuinë' bönni' rinná bë'ë, ridá'bágue'ë César na'.

¹³ Cate' biyönnë' Pilato didza' ni, gunná bë'enë' nupa diguá'gaca Jesús, ate' gurö'ë xilatjé' ga ruchi'a rusöröë', lataj na' nazí'i le Lö'a Ga Zxóagaca Guijöita'a, en ca naca didza' hebreo nazí'i le Gabata. ¹⁴ La' dza ná'asö naca dza si' idxín Laní Pascua, en naca idú hua gubidza. Ní'irö Pilato gudxé' yugu' bönni' judío unná bë' na', rnñë':

—Ni zoë' bönni' rinná bë'enë' libí'ili'.

¹⁵ Gulu'ë zidzaj didza', ta'nnë':

—¡Bëtië'! ¡Bëtië'! ¡Budë'ë lë'e yaga cruz!

Pilato rë' légaquië':

—¿Rinábitseli' neda' udá'a-në' lë'e yaga cruz bönni' rinná bë'enë' libí'ili'?

Bulu'bí'ë didza' bixúz unná bë', ta'nnë':

—Cúnturö nu zoa rinná bë'e netu'. Tuzë' César rinná bë'enë' netu'.

¹⁶ Que lë ni na' Pilato budödë' Jesús lu ná'agaquië', para tsöjdá'agaquië' Lé' lë'e yaga cruz. Ní'irö gula'guélë'ë Jesús, en gula'chë'ë Lé' ní'ilö.

¹⁷ Birúajé' Jesús ni', nu'ë yaga cruz queë', sa'yéajé' lataj na' nazí'i le Lataj Que Böga' Ícjaru', en ca naca didza' hebreo nazí'i le Gólgota. ¹⁸ Bulu'dé'ë Jesús lë'e yaga cruz ni', ate' bulu'dá'lenë' Lë' tsözxön lë'egaca yaga cruz ia'chopé' bönni'. Tsölä'a huéaj ta'dé'ë, ate' Jesús dë'ë gatsaj láhui'ló chopé' bönni' na'. ¹⁹ Gusöl-lë'ë Pilato tu bönni' nu'ë le buzúajé' lu guichi le buzóë' lë'e yaga cruz icjlé' Jesús, le rnna caní: "Jesús, Bönni' Nazaret, Bönni' Rinná Bé'enë' Bönni' Judío." ²⁰ Bulu'labé' zián bönni' judío didza' ni, tu' zoa ga na' bulu'dé'ë Jesús lë'e yaga cruz gála'sö' ra' yödzö, ate' didza' na' nuzúajé' len didza' hebreo, en len didza' griego, en len didza' latín. ²¹ Yugu' bixúz unná bë' quégäquië' bönni' judío té' Pilato, ta'nné':

—Biti' uzúajú, "Bönni' Rinná Bé'enë' Bönni' Judío." Buzúaj caní: "Bönni' ni gunnë': Inná bé'eda' bönni' judío."

²² Bubi'ë didza' Pilato, rë'légaquië':

—Le chinuzúaja', tsaz chinuzúaja'.

²³ Cate' yugu' bönni' na' röjáquië' gudil-la budxi bulu'dé'ë Jesús lë'e yaga cruz, gula'guélë'ë lari' gúcüë'. Gula'béajé' tápalö, tu cö' huéaj guta' que queëgaquië'. Gula'guélë'ë ca'lari' guxóá yenë' Jesús, ate' lari' na' biti' nadía, pero naduba tuz ca naduba. ²⁴ Ní'irö yugu' bönni' na' röjáquië' gudil-la gulë luzá'agaquië' tuë' ia'tué', ta'nné':

—Biti' ichúguru' le, pero dxí'arö gaca uyuru' le gaca bë' para inöziru' nuzxi queequi que.

Caní guca, budxín ca nazúaj lu guichi lá'ayi, le rnna:

Gula'guisië' que queëgaquië' lari' nacuá', en que lari' quia' bulu'yúë' le naca bë'.

Caní gulunë' bönni' na' röjáquië' gudil-la.

²⁵ Xinë'ë Jesús, en nigula zxílanu xinë'ë, en María, nigula queë' Cleofas, en María Magdalena gula'cuá'nu gala' ga na' dë'ë Jesús lë'e yaga cruz.

²⁶ Cate' Jesús bilé'enë'-nu xinë'ë, en bilé'enë' ca'zoë' ni' bönni' usëda queë' na' nadxfi'inë', gudxë'-nu xinë'ë:

—Na'a, na' zoë' zxí' inu'.

²⁷ Ní'irö gudxë' bönni' usëda queë' na':

—Na' zóanu xinó'o.

Bönni' usëda na' benë' ga yöjsóanu lidxe' la' dza ní'isö.

Le guca cate' gutië' Jesús (Mt. 27:45-56; Mr. 15:33-41; Lc. 23:44-49)

²⁸ Gudödi ni, tu' nözinë' Jesús yúgu'të chiböa budzaga lahui, en para udxín le nazúaj lu guichi lá'ayi, gunnë':

—Ribidxa' nisa.

²⁹ Dë ni' tu zxiga' yudzu nupi zi. Ní'irö yugu' bönni' na' röjáquië' gudil-la bulu'gui'jë' nupi zi na' tu le bululu rizzupi nisa, ate' bulu'zóë' le tu lahui gui, en bulu'dé'ë le ru'ë Jesús para xupë'. ³⁰ Budxi gu'ë Jesús nupi zi na', gunnë':

—Chinácatë.

Ní'irö buzötaj icjë'. Burúajté bö' naca cazë', gútië'.

Tu bönni' reajé' gudil-la runë'ë yaga tuchi' cuita lë'ë Jesús

³¹ Ní'irö, tu' naca dza si' idxín Laní Pascua na', en tu' cabí ral-la' ulu'gá'ana nupa nátigaca lë'egaca yaga cruz cate' naca dza lá'ayi quégäquië', le naca tu dza lá'ayi zxöntë, que lë ni na' yugu' bönni' judío guláta'yúë' lahuë' Pilato güië' bönni' röjáquië' gudil-la tsöjtitsjagaquië' xiguichjagaquië' bönni' dá'gaquië'

lé'egaca yaga cruz, en ulu'zötjé' légaquië' lé'egaca yaga cruz na'. ³² Que lë ni na' gula'biguë'ë bönni' röjáquië' gudil-la, ate' gula'guítsjé' xiguchjé' bönni' zí'alö, en lësca' caní guluné' queë' ia'tué' bönni' na' dá'lénë' Jesús lë'e yaga cruz. ³³ Cate' bila'dxiné' ga na' dë'ë Jesús, en bila'lé'ené' chinátië', biti' gula'guítsjé' xiguchjé'.

³⁴ Ní'irö tuë' bönni' na' reajë' gudil-la bunë'ë yaga tuchi' cuita lë'e Jesús, ate' la'birúajtë rön, en nisa. ³⁵ Neda, Juan, bilé'eda' lë ni, en runa'ba nalí que, ate' le runa'ba nalí naca idútë li. Nöz quézida' ruá'a didza' idútë li, para tséajlé'ëli' ca' libí'ili' ca naca queë' Jesús. ³⁶ Gulaca yugu' lë ni para budxín le nazúaj lu guichi lá'ayi, le rnna: "Biti' gatsaj nitú dxita yu'ë." ³⁷ Ia'tú le nazúaj ca' lu guichi rnna caní: "Ulu'yüé' bönni' na' bulu'në'ë lë' yaga tuchi'."

Tu'cächë'ë Jesús

(Mt. 27:57-61; Mr. 15:42-47; Lc. 23:50-56)

³⁸ Gudödi guca yúgu'té lë ni, guyijé' José, bönni' yödzö Arimatea, bönni' dë'ë Jesús, pero bagáchi'sö tu' ráxdiné' yugu' bönni' judío unná bë', ate' gunábiné' Pilato gu'élë' lataj u'ë Jesús. Pilato bë'ë lë' lataj. Ní'irö bidxiné' José ga na' dë'ë Jesús lë'e yaga cruz, ate' bu'ë Lë'. ³⁹ Lësca' bidxiné' Nicodemo ni', bönni' na' guyijé' zí'alö yöjyúë' Jesús chi'i dzö'ölö, nu'ë tu le nutsí'i nöri silá' que mirra, en tu le rilá' zxixi, le naca ca tu gayuá' guíë. ⁴⁰ Ní'irö José, en Nicodemo na' gula'guélë'ë Jesús, en bulu'chöliné' Lë' yugu' lári'do', ate' gula'gu'ë láhuilö lë na' nutsí'i nöri silá' que mirra, en le rilá' zxixi. Guluné' ca nalébiguequiné' tuné' bönni' judío cate' tu'cächë'ë tu bönni' nati. ⁴¹ Gala' ga na' bulu'dë'ë Jesús lë'e yaga cruz dë tu luyú ga zeaj da' yaga olivo, ate' gatsaj láhui'lö lataj na' zoa tu yeru ba cubi le nadaj lë'e guí'a guiöj, yeru ba na' cuntu nu ta'güi'inë'. ⁴² Lu yeru ba na' gula'gu'ë Jesús tu' dë gála'sö yeru ba na', en tu' naca dza tu'pë'ë bönni' judío que Laní Pascua.

20

Rubanë' Jesús lu yöl-la' guti

(Mt. 28:1-10; Mr. 16:1-8; Lc. 24:1-12)

¹ Cate' chinaca zílado' dza domingo, en ni' naca chul-la, guyéajnu María Magdalena ra'yeru ba na', ate' bilé'enu chinadúa guiöjta' a na' busayaj ga nu riyaza yeru ba na'. ² Ní'irö böajnu carelö ga zoë' Simón Pedro, dzáguië' lë' ia'túë' bönni' usëda, bönni' na' Jesús nadxí'inë' lë', ate' rénu légaquië':

—Bulu'báejë' Xanru' yeru ba ni', en biti' nöztu' gazxi gula'gu'ë Lë'.

³ Ní'irö bila'rúajë' Pedro, en ia'túë' bönni' usëda na', söjáquië' ra' yeru ba na'. ⁴ Tsözxon ta'xítí'ë iropë', pero ia'túë' bönni' usëda na' guxití're' carelö ca Pedro, ate' zí'alö lë' bidxiné' ra' yeru ba na'. ⁵ Biyéchuë', en buyú' lu yeru ba na', ate' bilé'enë' yugu' lári'do' na' bila'röli'në' Jesús, nacuá' ni', pero biti' guyázië' yeru ba na'. ⁶ Ní'irö bidxiné' Simón Pedro cídzulë' ia'túë' bönni' usëda na', ate' guyázië' lë' yeru ba na', en bilé'enë' lári'do' na' nacuá' ni'. ⁷ Lësca' bilé'enë' lári'do' na' gula'xoé' icje' Jesús, biti' dëlen ia'zíca'rö lári'do' na', pero tsölä'alö nudubi quez. ⁸ Ní'irö guyázië' ca' ia'túë' bönni' usëda na' bidxiné' zí'alö ra' yeru ba na', en bilé'enë' ca na' naca, ate' guyéajlé'ë didza' bë'ë Jesús. ⁹ Caní guca, tu' cabí ta'yéajni'ininë' le nazúaj lu guichi lá'ayi ca run bayudxi gaca queë' Jesús, ate' ubanë' lu yöl-la' guti. ¹⁰ Ní'irö iropë' bönni' usëda na' yöjhuöjgaquië' lídxigaquië'.

*Rulu'i lahuë Jesús lonu María Magdalena
(Mr. 16:9-11)*

¹¹ Bugá'anamu María ní'ilö ra' yero ba na', ribödxinu. Tsanni ni' ribödxinu, biyéchunu, buyunu lu yero ba na'. ¹² Bilé'enu chopë' gubáz lá'ayi queé' Dios ni', nácugaquië' lari' chiguichi. Rö'ögaquië' ni', tuë' ícjalö ba na', en ia'túë' xini'alo ba na' ga ni' gula'gu'ë Jesús. ¹³ Yugu' gubáz lá'ayi na' té' lënu, ta'nne':

—Nigúlado', ¿bizx que ribödxu?

Rënu légaquië':

—Tu' bulu'u'ë Xana', en biti' nözda' gazxi gula'gu'ë Lë'.

¹⁴ Cate' budxi gunnánu caní, buécjanu, en bilé'enu-në' Jesús, zoë' ni', pero biti' réquibe'enu Jesús na'. ¹⁵ Ní'irö Jesús gudxë'-nu:

—Nigúlado', ¿bizx que ribödxu? ¿Nuzxi ruguilju?

Tu' réquinu náquië' Lë' bönni' rapa chí'ë latja na', rënu Lë':

—Bönni', channö li' bu'u-në', gudíxjöi' i neda' gazxi gulú'u-në', ate' neda' u'a-në'.

¹⁶ Ní'irö Jesús gudxë'-nu:

—María.

Ní'irö buécjanu, en lu didza' hebreo rënu Lë':

—Raboni.

Didza' ni rnna: Bönni' Usedi quia'.

¹⁷ Jesús rë'ë-nu:

—Biti' canu' neda', tu' cabí ruhuépinida' ga zoë' Xuza'. Na'a, guyéaj ga nacu'ë böchi' luzá'a, ate' yöjödxì-gáquië': "Caní rnnë' Jesús: Huëpa' ga zoë' Xuza', náquië' ca' Xúzili'. Náquië' Dios quia', en Dios queëli'."

¹⁸ Ní'irö guyéajnu María Magdalena na', yöjtíxjöi' inu yugu' bönni' usëda queé' Jesús chibilé'enu-në' Xanru', en ca naca didza' na' gudxë'-nu.

Rulu'i lahuë Jesús lógaquië' bönni' usëda queë'

(Mt. 28:16-20; Mr. 16:14-18; Lc. 24:36-49)

¹⁹ Cate' chigul-la' dza ná'asö, le naca dza risí lo gadxi dza, nudúbigaquië' bönni' usëda queé' Jesús, ate' nayayaj yu'u ga na' nacu'ë tu' tádxinë' bönni' judío unná bë'. Ní'irö bulu'i lahuë' Jesús gatsaj láhui'lö ga na' nacu'ë, en rë' légaquië':

—Guli'zóa dxi ládxi'li'.

²⁰ Cate' budxi gudxë' légaquië' didza' ni, bulu'i inë' légaquië' në'ë, en cuita lë'ë. Ní'irö tu'dzéjanë' yugu' bönni' usëda na' tu' tu'lé'enë' Xanru'. ²¹ Ní'irö Jesús rë' légaquië' leyúbölö, rnnë':

—Guli'zóa dxi ládxi'li'. Ca benë' Xuza', gusöl-lë'ë neda', lësca' caní risöl-la'a libí'ili' tsöjenl' xichina'.

²² Cate' budxi gunnë' caní, bulubë' lógaquië', en rë' légaquië':

—Guli'sí' Dios Bö'Lá'ayi. ²³ Núti'tës nu uniti lolí', nu na' ben dul-la', chiyú'u yöl-la' runiti lo que, ate' núti'tës nu biti' uniti lolí' le, ugá'ana dul-la' que nu na' nun dul-la'.

Biti' réajlë'ë Tomás

²⁴ Tomás biti' zóalnenë' légaquië' cate' Jesús buduyúë' légaquië'. Náquië' Tomás tuë' bönni' chínnuë' ni', en tu'ë ca' lë' Bönni' Bilidi'. ²⁵ Gudödi ni' ia'zíca'rë' bönni' usëda na' gulé' Tomás, ta'nne':

—Chibilé'etu'-në' Xanru'.

Tomás rë' légaquië':

—Channö cabí ilé'eda' në'ë ga gunnë' bididaj, en unë'a xibön na'a ga na' gunë'gaca bididaj na', en unë'a na'a cuita lë'ë ga na' gunnë' yaga tuchi', biti' ca' tséajlë'a.

²⁶ Cate' chigudödi ia'xunu' dza, nudúbigaquië' bönni' usëda na' leyübölö lu yu'u, ate' Tomás na' zóalenë' légaquië'. Sal-la' nayabaj yu'u ga na' nacu'ë, bulu'i lahuë' Jesús gatsaj láhui'lö ga na' nacu'ë, en rë' légaquië':

—Guli'zóa dxi ládxi'lí.

²⁷ Ní'irö Jesús rë' Tomás na':

—Bunë' xibön no'o ni, en buyú na'a ni. Bunë' no'o cuita lë'a ni, en bíti'rö gaca chopá ládzu'u, pero guyéajlë' neda'.

²⁸ Ní'irö bubí'ë didza' Tomás, rë' Lë':

—Xána'do', en Dios quia'.

²⁹ Jesús rë' lë':

—Tomás, tu' bulé'enu' neda', réajlë'u. Bica' ba nupa ni' ila'yéajlë' neda' sal'a' biti' ila'lé'eni neda'.

Le rë'ëni gun didza' nazúaj lu guichi ni

³⁰ Benë' Jesús ziánrö ca' yöl-la' huáca lógaquië' bönni' usëda queë', le cabí nazúajgaca lu guichi ni. ³¹ Yugu' lë ni nuzúaja' lu guichi para tséajlë'ëli' náquië' Jesús Bönni' na' ru'ë Dios lë' Cristo, Zxi'inë' Dios, en cate' tséajlë'ëli', gata' queëli' yöl-la' na'bán idú tu' réajlë'ëli'-në'.

21

Rulu'i lahuë' Jesús lógaquië' gadxe' bönni' usëda queë'

¹ Gudödi guca lë ni, leyübölö bulu'i lahuë' Jesús lógaquië' bönni' usëda queë' ga naca ra' nísado' que Tiberias, ate' caní guca ca na' bulu'i lahuë' lógaquië'.

² Nudúbigaquië' Simón Pedro, en Tomás, bönni' na' tu'ë ca' lë' Bönni' Bilidi', en Natanael, bönni' yödzö Caná que luyú Galilea, en chopë' bönni' zxí'inë' Zebedeo, en ia'chopë' ca' bönni' usëda queë' Jesús. ³ Simón Pedro rë' légaquië':

—Tseaja' tsöjxöna'-ba' böla.

Të' lë' ia'zíca'rë', ta'nnë':

—Guntu' lì' tsözxöön.

Ní'irö yójáquië', en gula'benë' tu lë'e bárcodo', ate' rëla ni' nituba' böla biti' gula'zönë'-ba'. ⁴ Cate' chizá' rení', yöjsöö' Jesús luyú ra' nisa na', pero biti' téquibe'enë' bönni' usëda queë' Jesús Lë' na'. ⁵ Ní'irö Jesús rë' légaquië':

—Zxí'ina'do', ¿naru' cabí deba' lati' böla queëli'?

Bulu'bí'ë didza', të' Lë':

—Nituba'.

⁶ Ní'irö Jesús rë' légaquië':

—Guli'chílaj yöxa jöbla queëli' tsölä'a ibëla barco, ate' söngacali'-ba'.

Ní'irö gula'chilje' le, ate' bíti'rö guca ulu'béajë' le, tu' naguáraba' böla lë'e yöxa jöbla na'. ⁷ Ní'irö bönni' usëda na' nadxi'inë' Jesús lë' rë' Pedro, rnnë':

—¡Xanru' na'!

Cate' biyönnë' Simón Pedro, "Xanru' na'", böácuë' lari' gúcüë', tu' nagüë' le zí'alö, ate' guyázië' lu nisa. ⁸ Bila'dxinë' ia'zíca'rë' bönni' usëda na', tu'së'ë barco na, suná'ayöjgaquië' yöxa jöbla na' dzö'öba' böla, tu' cabí naca zí'tu' ga dë luyú bidxi. Nácatë ca tu gayuá' lóga' ní'aru'. ⁹ Cate' bila'dxinë' luyú bidxi na', bila'lé'enë' rö'ö tu guí' bo' yalaj ni', en zxóaba' tuba' böla láhui'lö, en dë ca' yöta ni'. ¹⁰ Jesús rë' légaquië':

—Guli'diguá'a-ba' ni böla na' si' guzxöngacali'-ba'.

¹¹ Gurenë' Pedro lë'e barco na', ate' gú'uyöje' yöxañ na' zaca' luyú bidxi, nalírö'ba' böla zxön, idú tu gayuá' yu' chí'nu-unba'. Sal-la' nácagacaba' böla zián, biti' biröza' yöxañ na'. ¹² Ní'irö Jesúñ rë' légaquie':

—Guli'dá gáguli'.

Biti' burúguinë' nitúë' bönni' usëda quee' na' inábinë' Lë', innë': "¿Nuzxi Li?" Nözguequi quézinë' náquië' Xanru'. ¹³ Ní'irö gubígu'ë Jesúñ, en gudéle'ë yöta na', enca' böla na', ate' bë'ë quégau'ë.

¹⁴ Lë ni naca le bunni luzuí bulu'i lahuë' Jesúñ lógaquie' bönni' usëda quee' gudödi bubanë' lu yöl-la' guti.

Jesúñ ru'ilenë' Simón Pedro didza'

¹⁵ Cate' budxi gulahuë', Jesúñ rë' Simón Pedro:

—Simón, zxí'inë' Jonás, ¿naru' nadxí'irönu' neda' ca nadxí'iguequinë' bönni' ni neda'?

Bubi'ë didza' Pedro, rë' Lë':

—Ön, Xan. Li' nöz quézinu' raza ladx'a Li'.

Jesúñ rë' lë':

—Bugagu yugu' bö'cu' zxila'do' quia'.

¹⁶ Jesúñ rë' lë' le buropi luzuí, rnnë':

—Simón, zxí'inë' Jonás, ¿naru' nadxí'ino' neda'?

Bubi'ë didza' Pedro, rë' Lë':

—Ön, Xan. Li' nöz quézinu' raza ladx'a Li'.

Jesúñ rë' lë':

—Bugagu yugu' bö'cu' zxila' quia'.

¹⁷ Jesúñ rë' lë' le bunni luzuí:

—Simón, zxí'inë' Jonás, ¿raza ladx'u neda'?

Buí'innë' Pedro tu' le chibunni luzuí rinabi yúdxinë' lë', gunnë': "¿Raza ladx'u neda'?" Bubi'ë didza' Pedro, rë' Lë':

—Xan, yugu'te nöz quézinu' Li'. Nözinu' raza ladx'a Li'.

Jesúñ rë' lë':

—Bugagu yugu' bö'cu' zxila' quia'. ¹⁸ Le nácatë rea' li', cate' ni' nacu' ra'bando', rácasö quiu' bugacu cuinu', en ca gunnásö quiu' gudó'. Cate' igulu', ulí no'o, ate' nu yúbölö ugacu li' lari', en ichë' li' ga ni' biti' gué'ennu' tseaju'.

¹⁹ Yugu' didza' ni bë'ë Jesúñ naca bë' naca gátië' Pedro, tsöjtë'ë lë'e yaga cruz, para gaca yöl-la' ba quee' Dios. Cate' budxi gunnë' caní Jesúñ, gunnë' ca' ia'tú:

—Gudá' neda'.

Ru'ë didza' Jesúñ ca gaca quee' bönni' usëda na' nadxí'inë'

²⁰ Buécjë' Pedro, en bilé'enë' söjnáhuë' légaquie' bönni' usëda na' Jesúñ nadxí'inë' lë'. Náquië' bönni' usëda na' gurö'ë cuita lë'ë Jesúñ cate' ni' gulahuë', en gudxë' Jesúñ: "Xan, ¿nuzxi na' udödi Li?" ²¹ Cate' Pedro bilé'enë' lë', rë' Jesúñ:

—Xan, ¿bizxi gunnë' bönni' ni?

²² Jesúñ rë' lë':

—Channö rë'ënda' ugá'anë' bönni' ni ga idxinxrö dza huöda', biti' ral-la' cö'u böninga. Gudá' neda' li'.

²³ Guzé' didza' ni ga nacu'ë böchí'ru' ta'yéajlë'ë Cristo. Téquinë' biti' gátië' bönni' usëda na'. Jesúñ biti' gudxë' lë' biti' gátië', pero caní gunnë': "Channö rë'ënda' ugá'anë' bönni' ni ga idxinxrö dza huöda', biti' ral-la' cö'u böninga."

24 Bönni' usëda ni naca' neda', Juan. Runa' ba nalí quéguequi lë ni, en nuzúaja' yugu' lë ni lu guichi, ate' nõzili' naca idútë li le runa' ba nalí.

25 Ziánrō ca' le benë' Jesús. Channö nu uzúaj léguequi lu guichi tu tu, rusaca' quia' biti' guequi yödzölió ni ila'cuá' guichi na' ral-la' nu uzúaj. Ca' caz.

LE GULUNË' BÖNNI' GUBÁZ NASÖL-LË'Ë CRISTO Los Hechos

Le guzxí lu në'ë Dios, isöl-lë'ë Dios Bö' Lá'ayi

¹ Cate' buzúaja' lu guichi zí'alö, quiu' li', Teófilo, neda', Lucas, buzúaja' yúgu'té le gusí lahué' runé' Jesús, en rusédiné' ² ga bidxinté dza buépë' yehua' yubá. Cate' si' huépë' Jesús yehua' yubá, dzáguië' Dios Bö' Lá'ayi Lë', gunná bë'ë ca ral-la' ilunë' gubáz queë', yugu' bönni' na' gurö cazë'. ³ Gudödi gudi'i guzxáquë'ë Jesús, gútië'. Ní'irö bubanë', en bulu'i lahué' lógaquië' gubáz queë' na'. Bulu'iné' lógaquië' zián le gulaca bë' zoë' nabanë', le cabí gaca nu tá'baga'. Zián luzu búlu'i lahué' lógaquië' idú ca choá' dza, en bë'lené' lógaquië' didza' ca rinná bë'ë Dios.

⁴ Cate' ni' nacu'ë tsözxón, gunná bë'ené' lógaquië' cabí ulu'zé'ë Jerusalén. Jesús gudxé' lógaquië', rnnë':

—Guli'cöz ni' le guzxí lu në'ë Xuza' isöl-lë'ë queëli' ca na' chibusiyön quézida' lib'iili'.

⁵ Gunné' ca':

—Le nácaté Juan buquile' böñachi nisa lu nisa. Na'a biti' tse xidzé gaca queëli' le rulu'i yöl-la' ridila nisa ni, idisóalené' Dios Bö' Lá'ayi libi'iili'.

Ruhuëpë' Jesús yehua' yubá

⁶ Ní'irö yugu' bönni' ta'yéajlé'ë Jesús, nudúbigaquië' ni', gula'nábiné' Lë', ta'nné':

—Xan, ¿naru' gunu' ga ila'nná bë' böñachi Israel leyúbölö dza ni zóaru' na'a?

⁷ Jesús gudxé' lógaquië':

—Biti' nequi queëli' inózili' bizxi dza o bizxi dzö' gunë' Dios Xuz le nuzoë' lu na' cazë'. ⁸ Sí'ili' yöl-la' huáca cate' guídë' Dios Bö' Lá'ayi idisóalené' libi'iili'. Ní'irö gunli' ba nalí quia' neda' lu yödzö Jerusalén, en idú luyú Judea, en luyú Samaria, en ga idxintél' idútë yödzölió.

⁹ Cate' budxi bë'lené' lógaquië' didza' ni, tsanni ni' tu'yusë' ca' Lë', la' buépitë' xitsá' ga rö'ö tu böaj le bucache' Lë', ate' bíti'rö bila'lé'ené' Lë'. ¹⁰ Tsanni ni' tu'yüé' lúzxibalö cate' ni' buépë' Jesús, bulu'luf'i lógaquië' chopë' gubáz lá'ayi ga na' nacu'ë, nácugaquië' lari' chiguichido'os. ¹¹ Chopë' ni gulé' lógaquië', ta'nné':

—Bönni' Galilea, ¿bixz que ruyuli' lúzxibalö? Lë cazë' Jesús ni si' guzé'ë ga zóali', buépë' yehua' yubá, lëscá' caní huödë' leyúbölö ca na' chibilé'eli'-në' söhüöjë' yehua' yubá.

Ta'böe' Matías para tsázië' xilatje' Judas

¹² Ní'irö gula'zé'ë ga na' rö'ö guí'ado' na' nazí'i le Guí'a Yaga Olivo, ate' yöjhüöjgaquië' Jerusalén. Guí'ado' ni dë gála'sö ga dë Jerusalén, tsca nazí'gaquië' lataj ta'zé'ë dza lá'ayi quégagaquië'. ¹³ Cate' bulu'dxiné' yödzö ni', gula'benë' ga naca buropi cuía lu yu'u, ga ni' ta'cu'ë Pedro, en Jacobo, en Juan, en Andrés, en Felipe en Tomás, en Bartolomé, en Mateo, en Jacobo, zxí'iné' Alfeo, en Simón, bönni' na' ru'i ládxé'ë ladzë', en Judas, böchë'ë Jacobo. ¹⁴ Yúgu'té bönni' ni tu'lidzë' Dios tsözxón, ate' yugu' böchë'ë Jesús, en María, xiné'ë Jesús, en ia'zíca'rönu nigula ca' núngaquië' lógaquië' tsözxón.

15 La' dza ná'asö guzuínë' Pedro gatsaj láhui'lö ga nacu'ë böchi' luzá'aru' na' ta'yéajlë'ë Cristo. Gulaca idú ca xópalalaj bönnachi nupa nudúbigaca ni'. **16** Pedro gudxë' légaquië', rnñe':

—Böchi' luzá'ado'. Ben bayudxi guca le nazúaj lu guichi lá'ayi, ca na' gunnë' Dios Bö' Lá'ayi dza ni'të, le buzúajë' David lu guichi, ca guca queë' Judas, bönni' na' guchë'ë nupa ni' gula'zön Jesús. **17** Judas na' gubábalenë' rë'u, en bénlenë' rë'u tsözxön dxin ni. **18** Gula'zí'inë' tu la' yëla lazxaj que dö' na' bi'ë bönni' ni. Judas ni gubixë', en biröza' lë'ë, ate' bila'rúaj yúgu'të le dzö'ö lë'ë. **19** Cate' bila'yöni bönnachi nacuá' Jerusalén lë ni, gulu'ë le la' yëla na' Acéldama, tu didza' hebreo le rnna lu didza' xidza': La' Yëla Rön. **20** Caní guca queë' Judas, ca na' nazúaj lu guichi lá'ayi nazí'i le Salmos, le rnna: Ugá'ana ca'asö lidxë', en biti' idzöli noa yu'u na'.

Rnna ca':

Nu yúbölö tsaza xilatjë'.

21-22 'Run bayudxi na'a cöru'-në' tu bönni' gunë' rë'u tsözxön para gunë' ba nalí queë' Jesús, ca guca, bubenë' lu yöl-la' guti. Ral-la' gáquië' bönni' nabábalenë' bönni' ni' gula'cuá'lenë' rë'u dza ni'te cate' ni' Xanru' Jesús gudálenë' rë'u. Gula'sílógaquië' nacuá'lenë' rë'u cate' ni' buquile' Juan bönnachi nisa, ga bidxitnë dza buëpë' Jesús yehua' yubá, cate' buzë'ë ga zóaru'.

23 Ní'irö bulu'lu'ë chopë', José, en Matías. José na' lë' ca' Barsabás, en zoa ia'tú lë' Justo. **24** Ní'irö bulu'lidzë' Dios, ta'nnë':

—Xantu' Dios, nunbë' cazu' icja ládxido' gaca yúgu'të bönnachi. Bulu'i netu' nulë' chopë' ni chigurö cazu' Li' **25** para tsázië' lu dxin ni para gáquië' gubáz quiu'. Tsázië' xilatjë' Judas, bönni' ni' bunítië' xilatjë' tu' benë' dul-la', ate' guyijé' xilataj caze' lataj chul-la.

26 Ní'irö bulu'zúajë' yugu' lu guichi lágaquië', tu queë' José, en ia'tú queë' Matías. Bulu'gútsi'në' lüzé'eguequi, en bulu'béajë' tu, ate' birúaj le nazúaj lë' Matías. Caní guca, Matías na' gubábalenë' ia' chinéajë' gubáz queë' Cristo.

2

Dios Bö' Lá'ayi ridisóalenë' légaquië'

1 Cate' chibidxín dza Pentecostés, nudúbigaquië' tsözxön yúgu'të bönni' ta'yéajlë'ë Cristo. **2** Tsálido'os biyön bö le birúaj lúzxiba, le biyön ca riyön cate' recja bö' budunu', ate' biyön idútë lu yu'u ga na' rö'ögäquië'. **3** Bulu'lu'i lahui yugu' bululu guido' lu bö'ös lógaquië', ate' gula'guísi que queëgaquië'. Bidisóalengaca tu tuë'. **4** Caní guca, Dios Bö' Lá'ayi ridisóalenë' yúgu'të', ate' gula'sílógaquië' tu'ë didza' yúbölö, tsca naca le bë'ë Dios Bö' Lá'ayi que queë' gu'ë' didza' yúbölö na'.

5 Nacu'ë zián bönni' judío yödzö Jerusalén dza na', nácagaquië' bönni' ta'yéaj ládxí gaquië' Dios, en zá'gaquië' narúajgaquië' yúgu'të yödzö idútë yödzöliö ni. **6** Cate' bila'yönnë' bö na', bulu'dubé' bönni' zián, ate' gula'bö'ë böninga, tu' bila'yönnë', ca naca xtídzagaquië' que queëgaquië', tu'ë didza' bönni' na' ta'yéajlë'ë Cristo. **7** Gula'ná' badxë' yúgu'të, en bulu'báninë, ta'nnë':

—Buli'yútsöca'. ¿Naru' caléga bönni' Galilea yúgu'të bönni' ni tu'ë didza'?

8 ¿Nacxi caz naca riyóniru' tu'ë xtídzara' ca naca didza' ru'iru' tu turu'? **9** Rë'u ni nácaru' bönni' zián yödzö, bönni' narúajgaquië' luyú Partia, en luyú Media, en luyú Elam, en luyú Mesopotamia, en luyú Judea, en luyú Capadocia,

en luyú Ponto, en luyú Asia,

10 en luyú Frigia, en luyú Panfilia, en luyú Egipto,
en luyú Africa, ga nácaro' zi'tu' ga dë luyú Cirene.

'Lësca' nacu'ë bönni' yödzö Roma ni'. Bal-lë' nácagaquië' bönni' judío, en ia'bal-lë' nazí' lu ná'agaquië' le ta'yéajlë'ë bönni' judío Dios. **11** Lësca' nacu'ë ni yugu' bönni' narúajgaquië' Creta, en luyú Arabia. Riyóniru' tu'ë didza' ruí'iru' que queéru', ate' ta'guíxjö'ë yugu' le zxön benë' Dios, le tun ga rubáiru'.

12 Caní guca, bulu'bániné yúgu'të', en gula'bö'ë böñiga. Gulé luzá'agaquië' tuë' ia'túë', ta'nnë':

—¿Bizxi caz lë ni?

13 Bulu'titjë' bal-lë', ta'nnë':

—¡Ta'zúdxinë'!

Libán benë' Pedro lógaca böñachi zián

14 Ní'irö Pedro guzuílenë' ia'chinéajë' gubáz na' nasöl-lë'ë Cristo, ate' gusí lahuë' ru'ë zidzaj didza', rë' légaquië':

—¡Libíili', bönni' Judea, en yúgu'tél' nacuá'ali' yödzö Jerusalén! ¡Lë ni ral-la' inózili! ¡Buli'zé nágali' le guía' libíili'! **15** Netu' ni biti' rizúdxitu' ca na' réquili' libíili', tu' ni zóaru' si' gala' xsila, ate' cuntu nu rizudxha hora caní. **16** Lë ni naca le gunnë' Joel, bönni' bë'ë didza' uláz queé' Dios, gunnë':

17 Caní rnnë' Dios: Lë ni le gaca dza tsöjsétégaca.

Isöl-la'a Bö'Lá'ayi quia', tsöjsóalenë' yúgu'të böñachi.

Zxi'iniili', bönni', en nigula, ilu'ibi' didza' uláz quia' neda'.

Yugu' bi'i ra'bán ila'lé'ebi' le ulu'a lahui,
ate' yugu' bönni' gula ila'nенë' yëla.

18 Cate' idxín dza ni' quísia' Bö'Lá'ayi quia',
tsöjsóalenë' huen dxin quia', bönni', en nigula,
ate' ilu'ë didza' uláz quia' neda'.

19 Ulu'a lahui lúzxiba xitsá' le ilún ga ulu'bani böñachi,
ate' yödzölió ulu'a lahui le ilaca bë',
rön, en guí', en dzön ca böaj.

20 Ichul-la gubidza, ate' gaca beo' xiná ca naca rön.

Caní gaca cate' idxín dza ni' chibulu'ë Dios.

Gaca dza ni' le catu caz rilé'eru'.

21 Ulu'lágaca yúgu'të nupa ni' ulu'lidza Lë' Xanru',
lu yöl-la' réajlë' quéguequi Lë'.

22 'Buli'zé nágali' lë ni guía' libíili', böñachi Israel. Dios caz benë' bal Jesúś, bönni' Nazaret ga zóalí'. Dios bë'ë Lë' lataj benë' le tun ga rubáiru', yugu' yöl-la' huáca, en le taca bë'. Yúgu'të lë na' benë' Dios lu në'ë Jesúś, ca na' chinöz quézili'. **23** Lësca' caní, Dios bë'ë lataj nu budödi Jesúś lu ná'ali'. Caní guca, ca na' chigunná ládxë'ë Dios gunë', en ca naca le chibucözë' dza ni'te. Libíi' cázali' guzxónli'-në' Jesúś, en bétilli'-në' lu ná'agaquië' yugu' bönni' tuá' dö', bönni' gulútië' Lë' cate' ni' bulu'dá'gaquië' Lë' lë'e yaga cruz. **24** Ní'irö Dios caz busubanë' Jesúś na'. Bubéajë' Lë' lu yöl-la' guti, tu' cabí guca ugá'anë' tsaz lu yöl-la' guti na'. **25** Ca naca lë ni, bë'ë didza' David uláz queé' Dios ca naca queé' Jesúś, gunnë':

Bilé'etiqui'sida'-në' Xanru', zoë' lahua'.

Lë' zoë'cuita lë'a ibëla, rizónë' neda',
para cabí gaca nu bi gun quia'.

26 Que lë ni na' budzeja ládx'a'a,

ate' lu yöl-la' rudzeja quia' bil-la'.
 Que lë ni na' guna' löza Lë'
 cate' idxín dza gátia'.

²⁷ Xantu' Dios, nözda' biti' ucá'anu' neda'
 lataj chul-la ga nacuá' nupa nátigaca.
 Biti' gu'u lataj initi idútë le naca'.
 Naca' bönni' nadxi'i quézinu' Li'.
²⁸ Buzéajni'nu' neda' ca ral-la' guna'
 para idéli'da' yöl-la' na'bán idú.
 Gunu' ga udzéjada' tu' zóalen cazu' neda'.

²⁹ Na'a, libí'ili', böcha'a. Naca bë' gúti'e xuz xtó'oru' David, en bigächë'ë
 yero ba, ate' ba queë' na' dë ga zóaru' ga ridxitnë na'a dza. ³⁰ David na' bë'ë
 didza' uláz queë' Dios, en gunöziné' benë' tsutsu Dios didza' le guzxí' lu në'ë
 queë', gunë' ga galjë' Cristo ladaj di'a dza queë' si' zá'gaca, ate' Cristo na'
 inná bë'ë xilatjë' David na'. ³¹ Tu' bilé'enë' David lë ni zí'alö, bë'ë didza' ca
 guca, bubanë' Cristo, en ca guca, biti' bugá'anë' lataj chul-la ga nacuá' nupa
 nátigaca, en biti' guniti le naca cazë'. ³² Dios busubanë' Jesús lu yöl-la' guti,
 ate' ca guca lë ni yúgu'tëtu' runtu' ba nalí que. ³³ Caní guca, len yöl-la' huáca
 queë', Dios buchisë' Lë' xitsá' ga ni' nácatérë' zxön. Na'a, Cristo chigusö'l-lë'ë
 Dios Bö' Lá'ayi ni, ate' raca ca na' guzxí' lu në'ë Dios gunë' lu në'ë Cristo, ate'
 Dios Bö' Lá'ayi na' runë' yugu' lë ni rilé'eli', en riyonili'. ³⁴ Biti' buëpë' David
 na' yehua' yubá, pero lë cazë' David na' gunnë':
 Xanru' Dios gudxë' Xana':

Gurö'i cuita lë'a ibëla ga naca lo
³⁵ cate' gunra' ga ulu'zechu zxibigaca nupa ta'dá'baga' Li' lo' Li'.

³⁶ Na'a, böñachi Israel, ral-la' inözili' le nácatë. Dios benë' ga náquië' Lë cazë'
 Jesús ni Xanru', en Bönni' Rusölä, bönni' na' budá'ali'-në' lë'e yaga cruz.

³⁷ Cate' yugu' bönni' ni' bila'yönnë' lë ni, gula'bö'ë böñiga, ate' gulë' Pedro,
 en ia'zíca'rë' bönni' gubáz queë' Cristo, ta'nnë':

—Böchi'ru', ¿nacxi güntsatu?

³⁸ Ni'irö Pedro gudxë' légaquië':

—Buli'bí'iládxí'li', en guli'dila nisa tu tuli' lu Lë' Jesucristo para uniti lahuë'
 Dios dul-la' nabágali', ate' Dios Bö' Lá'ayi idisóalenë' libí'ili', Nu na' isö'l-lë'ë
 Dios. ³⁹ Queëli' nequi le guzxí' lu në'ë Dios, en quégaca zxí'inili', enca' quégaca
 yúgu'të böñachi izá'a, yúgu'të bönni' ni' ulidzë' Xanru' Dios légaquië'.

⁴⁰ Yugu' didza' ni, en ia'bal-la zián didza' benë' ba nalí Pedro, le guchízië'
 icja nágagaquië', gunnë':

—Guli'gún ga uláli', irúajli' ládjagaca böñachi tuá' dö' nacuá' dza ni zóaru'
 na'a.

⁴¹ Caní guca, gula'dila nisa nupa ni' gula'zí' lu në'eguequi didza' na' bë'ë
 Pedro. Dza na' ca chi uruá' gayuá' böñachi gulún légaquië' tuz. ⁴² Gulunë'
 yúgu'të' idútë le bulu'sédinë' gubáz nasö'l-lë'ë Cristo légaquië'. Guláquië' tuz
 tuë' len ia'túë', en gulahuë' tsözxön le rusá'ládxí'ru' ca gútië' Jesús, ate' gulunë'
 tsözxön, bulu'lidzë' Dios.

Ca tun böñachi queë' Cristo

⁴³ Gulunë' gubáz queë' Cristo zián le run ga rubániru', en zián le taca
 bë', pero guladxi gula'dzöbi ia'zíca'rö böñachi. ⁴⁴ Yúgu'të nupa na' ta'yéajlé'
 Cristo gulaca tuz, ate' bulu'ún tuz yúgu'të le dë quéguequi. ⁴⁵ Cate' bila'lé'enë'
 ta'yadzaj nupa nútsa'gaca ládjagacië', ni'irö yugu' bönni' bi dë quégaequië'

gulúti'ë le, ate' gula'guisië' dumí na' que queégaca nupa ni' bi ta'yadzaj. **46** Bulu'dubé' tsözxön chila yudo' yugu' dza, ate' gulahuë' le rusá' ládxí'ru' ca góutië' Xanru'. Caní gulunë' gapa naca lu yu'u lídxigaquie'. Gulahuë' tsözxön, ate' bulu'dzéjanë', en gulaca idú ládxí'gaquie'. **47** Gula'gu'ë Dios yöl-la' ba, ate' yúgu'të böñachi gulún légaquie' bal. Buzanë' Xanru' nupa tu'dubi queë', nupa na' tu'lá tu tu dza.

3

Ruhuöáquië' tu bönni' biti' raca së'ë

1 Tu dza ni' gula'benë' Pedro, en Juan, söjáquië' tsözxön lu chila yudo', cate' tu'dubi böñachi tu'lida Dios ni', le naca idú ridödi xihuö. **2** Ga ni' ta'dödë' zoë' tu bönni' biti' raca së'ë dza ni'te ni' náquië' b'ido'. Yugu' dza röjuá'gaquie' lë' ni', en ta'béquie' lë' ra' yudo' ga nazí'i le Ra' Yu'u Lachi, para inábinë' nu bi unödzjasö queë' ladaj nupa ni' ta'yaza lö'a yudo'. **3** Bönni' ni, cate' bilé'enë' Pedro, en Juan, söjáquië' ta'yázië' lö'a yudo', gúta'yuë' lógaquie' bi ulu'nödzjasë' queë'. **4** Ní'irö bulu'yüë' Pedro, en Juan lë', ate' Pedro gudxë' lë':

—Buyú netu'.

5 Ní'irö bönni' na' buzëda' náguië' légaquie' tu' runë' löza bi ulu'nödzjasë' queë'. **6** Pedro gudxë' lë':

—Biti' dë dumí plata, dumí oro quia', pero le dësö quia' gunna' quiu'. Ni'a que yöl-la' huáca que Le' Jesucristo, bönni' Nazaret, guyasa, en guzë'e.

7 Ní'irö gudelé'ë Pedro në'ë ibëla bönni' huë' na', en buchisë' lë', ate' la' böácaté ni'ë, en buguitaj bëchaj ni'ë bönni' na'. **8** Ní'irö guzuínë' bönni' na', ate' guxití'ë, en guzë'ë. Guyázalenë' tsözxön Pedro, en Juan, lö'a yudo', rizë'e ni'ë, en rixítí'ë, en rigu'ë Dios yöl-la' ba. **9** Yúgu'të böñachi nacuá' ni' ta'lé'e lë' rizë'e ni'ë, en rigu'ë Dios yöl-la' ba. **10** Caní guca, guládxinë', en bulu'báninë ca naca lë'na' guca, tu' bulu'ünbë'ë lë', náquië' bönni' na' ribö'ë ra' yudo' ga nazí'i le Ra' Yu'u Lachi, rinabë' nu bi unödzjasö queë'.

Didza' bë'ë Pedro chila yudo'

11 Tsanni ni' bönni' na' biti' guca së'ë, ate' böáquië', zönë' ná'agaquie' Pedro, en Juan, bulu'dubi yúgu'të böñachi ga na' nacu'ë chila yudo' nazi'i le: Chila Queë' Salomón, ate' gula'ná' badxë'. **12** Cate' bilé'enë' Pedro lë ni, gudxë' böñachi na':

—Libi'ili', bönni' Israel, ¿bizx que rubánili' ca naca lë ni? ¿Bizx que ruyuli' netu', en réquitseli' nétu'sö buntu'-në' bönni' ni, en bentu' ga rizë'e ni'ë len yöl-la' huáca queéztu', o ni'a que le reaj ládxí'tu'-në' Dios? **13** Naca lë ni le benë' Dios. Náquië' Dios quégagaquie' xuz gudödi queéru' Abraham, en Isaac, en Jacob. Lë cazë' bénterë' bal Jesús, Zxi'inë'. Jesús ni, libi'i cázali' bëtili'-në' lu ná'agaquie' bönni' ta'nná bé enë' libi'ili'. Cate' gú'unnë' Pilato usanë' Jesús, gudá'bagá li'-në'. **14** Buzóali' tsöll'alö Bönni' Tsahui', en Lá'ayi, ate' gunábili'-në' Pilato usanë' queéli' tu bönni' rútië' böñachi. **15** Caní guca, bëtili'-në' Bönni' runna cazë' yöl-la' na'bán idú queéru'. Ní'irö Dios busubanë' Lë' lu yöl-la' guti, ate' ca naca lë ni runtu' ba nalí que. **16** Tu' guyéajlé'ë bönni' ni Jesús, böáca ni'ë. Rilé'eli'-në', en núnbbö'eli'-në'. Tu' réajlé'ë Jesús, Lë' bunë' dxí'ado' bönni' ni, ate' rilé'eli' yúgu'teli' le nácaté na'.

17 'Na'a, böcha'a, nözda' benli' caní, bëtili'-në' Jesús tu' cabí guyéajni'ili', en biti' gula'yéajni' inë' bönni' ta'nná bé'enë' libi'ili'. **18** Caní busudxinë' Dios didza' na' bë'ë zí'alö, le gula'nnë' bönni' gulu'ë didza' uláz queë' ca ral-la' qui'i

sáqué'ë Cristo. ¹⁹ Que lë ni na', buli'bí'ládxí'li', en buli'huöáca queé' Dios, para ugüé' dul-la' nabága'li', en guné' ga huöáca ládxí'li'. ²⁰ Ní'irö isöl-lë'ë leyúbölö Jesúś, Bönni' na' buzóé' dza ní'te para gáquië' Cristo, Bönni' Rö queé', Bönni' na' inná bé'ené' libí'ili'. ²¹ Na'a, run bayudxi ugá'ané' yehua' yubá ni' cate' idxinxrö dza uduhuénë' tsahui' yúgu'té le raca, en gaca ca na' chigunná caze' Dios, lë na' gula'nné' bönni' gulu'ë didza' uláz queé', bönni' ni' gula'cu'ë dza ní'te. ²² Lësca' caní Moisés gudxë' xuz xtó'oru', gunnë': "Xanru' Dios isöl-lë'ë queé'lí' tu bönni' galjë' ládjagaca dí'a dza queé'lí'. Gáquië' bönni' gu'ë didza' uláz queé' Dios. Isöl-lë'ë Lë' queé'lí' ca na' gusöl-lë'ë neda'. Run bayudxi uzé nágali'-në' ca naca yúgu'té le guié' libí'ili'. ²³ Yúgu'té nupa biti' ulu'zé nágagaca bönni' ni' gu'ë didza' uláz queé' Dios ila'niti, en ulu'lá'alen bönnachi queé' Dios."

²⁴ Ca naca dza ni zóaru' na'a, gula'guíxjö'ë yúgu'té bönni' gulu'ë didza' uláz queé' Dios ga gudéla'te zoë' Samuel, en gudödi ni'. ²⁵ Libí'ili' nácali' zxí'ini xi'sóagaquie' bönni' gulu'ë didza' uláz queé' Dios, ate' nequi queé'lí' didza' rucá'ana tsahui', le bénlenë' Dios xuz xtó'oru', cate' ni' gudxë' Abraham: "Ni'a que le guné' zxí'ini xi'sú' ilaca bica' ba yúgu'té bönnachi yödzölió." ²⁶ Cate' Dios busubanë' Zxi'iné' lu yöl-la' guti, gusöl-lë'ë Lë' zí'alö queé'lí' para guné' ga gácali' bica' ba, en uca'analí' le cabí naca dxi'a runli'.

4

Tadxinë' Pedro, en Juan lógaquie' bönni' yudo' tu'chi'a tu'söröe'

¹ Tsanni ni' bönnachi na' tu'ilené' Pedro, en Juan, didza', yugu' bixúz judío, en yugu' bönni' yudo' saduceo, en bönni' ta'nná bé'ené' ni'a ná'agaquie' bönni' yudo', bila'dxinë' tsálido'os ga na' nacu'ë. ² Gula'lené' bönni' ni tu' tu'sédinë' Pedro, en Juan, bönnachi, en tē' lèguequi ulu'bán nupa chinátigaca tu' bubanë' Jesúś. ³ Ní'irö gula'zöné' Pedro, en Juan, ate' gula'gu'ë légaquie' lidxi guié' ga idxinxrö dza yúbölö tu' chiridzö' dza na'. ⁴ Zián nupa ni' bila'yöni didza' gulu'ë Pedro, en Juan, gula'yéajlé' Cristo. Na'a, yugu' bönni' biguiú'sö ta'yéajlé'ë Cristo nácaquie' idú chi-un gáyu'ë.

⁵ Dza buropi ni', yugu' bönni' unná bë', en bönni' gula tu'zéajni'iné' bönnachi judío, en yugu' bönni' yudo' usëdi, bulu'dubé' lu yödzö Jerusalén. ⁶ Lësca' Anás, bixú lo, en Caifás, en Juan, en Alejandro, enca' yúgu'té bönni' di'a dza quégaquie' bixú lo bulu'dubé' ni'. ⁷ Ní'irö duché'gaquie' Pedro, en Juan, ate' bulu'sudxinë' légaquie' gatsaj láhui'lö ga na' nacu'ë, en gula'nábinë' légaquie', ta'nné':

—¿Bizxi yöl-la' unná bë' dë lu ná'ali' runli' lë ni? ¿Nuzxi budödi lu ná'ali' yöl-la' unná bë' ni?

⁸ Ní'irö Pedro gudxë' légaquie', zóalnenë' Dios Bö' Lá'ayi lë', rmnë':

—Libí'ili', núlöli' rinná bé'eli' netu', bönnachi Israel, en libí'ili', bönni' gula.

⁹ Na'a, ¿rinábitseli' netu' ca naca dxin dxí'a bentu' queé' bönni' hué' ni, en nacxi guca, böáquie' bönni' ni? ¹⁰ Riguíxjö'itu' libí'ili' para ila'nözi yúgu'té bönnachi Israel. Zoë' bönni' ni lolí', nuhuöáquie' tu' ben dxin yöl-la' huáca queé' Jesucristo, bönni' Nazaret, Bönni' ni' budá'ali'-në' lë'e yaga cruz, pero Dios busubanë' Lë' lu yöl-la' guti. ¹¹ Dios bë'ë didza' ca naca queé' Jesúś ni, cate' ni' gunnë': "Libí'ili', bönni' rucuá'ali' zö'ö, gurú'unali' guiój na', pero gurö caza' neda'guiój na' para gaca guiójlen zö'ö." ¹² Cúnturö nu zoa nu gaca usölá bönnachi, tu' cabí zoa yödzölió ni ia'túë' bönni' nuzóë' Dios, nu gaca usölá ré'u.

¹³ Cate' bila'lé'ené' nácaquie' rugu ladxí' Pedro, en Juan, en guléquibe'ené' biti' nazédagaquie' que yudo', en nácaquie' bönni' cá'asö, bulu'báninë',

ate' yöjnéguequinë' Pedro, en Juan na', gula'cuálenë' Jesús. ¹⁴ Lësca' bila'lé'enë' bönni' na' böáquië', zuínë' lógaquië', ate' biti' guca bi ila'nnë' quégäquië'. ¹⁵ Ní'irö gula'nná bé'enë' nupa ulu'béaj légaquië' lõ'alö yu'u ga na' nudúbigaquië', ate' gulún xtidzë' è la' légacasë'. ¹⁶ Gula'nnë':

—¿Nacxi güntsaru' quégäquië' bönni' ni? Le nácatë gulunë' tu le run ga tu'bani bönachi, ate' nözigaca yúgu'té bönachi nacua' Jerusalén lë ni. Biti' gaca tá'baga'ru' le. ¹⁷ Na'a, para cabí sérö didza', en ila'yoni ziánrö ca' bönachi, uzeru' bach légaquië' para cabí ilu'ilenre' bönachi didza' ca naca queë' Jesús na'.

¹⁸ Ní'irö bulu'lidzë' Pedro, en Juan, ate' bulu'zenë' bach légaquië' para cabí ilu'ilenre' bönachi didza', en para cabí ulu'sédinë' légaquië' ca naca queë' Jesús. ¹⁹ Ní'irö bulu'bí'è didza' Pedro, en Juan. Gulë' légaquië':

—Buli'chí'a buli'sörö libí'ilí' channö naca tsahui' lahué' Dios uzérö nágatu' xtídzalí' libí'ilí' ca xtidzë'è Dios. ²⁰ ¡Biti' gaca soa dxitu'! ¡Run bayudxi güí'itu' didza' que le bilé'etu', en le biyönitu'!

²¹ Ní'irö yugu' bönni' yudo' tu'chi'a tu'söröë' bulu'zenë' bach légaquië', pero bulu'sanë' légaquië' tu' cabí gula'dzölinë' nacxi ilunë' légaquië' xíguia'. Caní gulunë' tu' guláxdxinë' le ilún bönachi lu yödzö ni', tu' ta'gú'u Dios yöl-la' ba ni'a que lë na' guca. ²² Bönni' na' böáquië', en guca queë' lë na' run ga rubániru', chiyú'urë' ca choá'iz.

Ta'nábinë' Dios gunë' ga ilácagaquië' rugu ladxi'

²³ Cate' bönni' yudo' bulu'sanë' Pedro, en Juan, böajgaquië' ga na' nacu'ë luzá'agaquië', ate' bulu'siyonné' légaquië' yúgu'té lë na' gula'nnë' yugu' bixúz unná bë', en bönni' gula tu'zéajni'inë' bönachi judío. ²⁴ Cate' bila'yönnë' lë ni, bulu'lidzë' Dios tsözxón, gula'nnë':

—Xantu' Dios, ¡zxöntérö nacu' Li! ¡Li' nacu' Dios! ¡Benu' lúzzibal! ¡Benu' luyú! ¡Benu' nísado! ¡Benu' yúgu'té le nacuá' tu tu lataj na'! ²⁵ Uláz quiu' Li' bë'ë didza' David, bönni' huen dxin quiu', ni' zóalenë' Dios Bö' Lá'ayi lë', gunnë': ¿Bizx que tun dzatsa bönachi, en ta'zá' ládxigaca le ruá' dö?

²⁶ Yugu' bönni' ta'nná bë'ë yödzölió ni gulún dzatsë', ate' guláquië' tuz bönni' unná bë'.

Gula'dá'báguë'è Xanru' Dios, enca' Cristo, bönni' gurö cazë' Lé'.

²⁷ Le nácatë guláquië' tuz Herodes, en Poncio Pilato, en yugu' bönni' izá'a, en yugu' bönni' Israel lu yödzö ni. Gula'dá'báguë'è Jesús, Zxi' inu' lá'ayi, Bönni' na' buzú' queëtu'. ²⁸ Gulunë' yúgu'té le bucözu' zí'atélö, en guzxí' lu no'o, ate' guca ca na' benu' tsutsu xtidzu'u ca ral-la' gaca. ²⁹ Na'a, Xantu', buyú le tu'zenë' bach netu', en ben ga gácatu' rugu ladxi', para güí'itu' xtidzu'u, netu' bönni' huen dxin quiu'. ³⁰ Ben ga gaca úngacatu' nupa te'e, tu' sóalen yöl-la' huáca quiu' netu', en ben ga gaca gúngacatu' le ilún ga ubánitu', en le ilaca bë'. Gaca caní tu' zóalenë' Jesús, Zxi' inu' lá'ayi, netu'. ¡Ca' gaca!

³¹ Cate' budxi bulu'lidzë' Dios, guzxizi lataj ga na' nacu'ë, ate' Dios Bö' Lá'ayi guzóalenë' yúgu'té, ate' len yöl-la' rugu ladxi' quégäquië' gulu'ë xtidzë'è Dios.

Tu'únë' tuz le dë quégäquië'

³² Bönachi zián na' ta'yéajlé' Cristo, tuz ca ta'zá' ládxiguequi, en tuz ca gulúngaca. Biti' gunnë' nu bönni' nútsë'è ládjagaquië' nequi queézé' le dë queë',

pero bulu'únë' tuz le dë quégaquië'. ³³ Len yöl-la' huáca zxöñ gula'guíxjö'ë gubáz na' nasöl-lë'ë Xanru' Jesús ca bubanë' Lë', ate' le buzá' ládxë'ë Dios quégaquië' gúcalen yúgu'të'. ³⁴ Cuntu nu bi biyadzaj nu nutsa' lágjagaquië'. Caní guca tu' yúgu'të bönni' zoa bi dë quégaquië', xiyúgaquië', o lídxigaquië', gulutí'ë le, ate' dumí que na' yöjuá'gaquië', ³⁵ en bulu'dódë' le lu ná'agaquië' gubáz na' nasöl-lë'ë Cristo, ate' légaquië' gula'guisië' le que queégaca nupa bi biyadzaj quéguequi. ³⁶ Zoë' José ni', bönni' bulu'zóë' gubáz na' nasöl-lë'ë Cristo ia'tú lë' Bernabé, le rnna lu didza' xidza', Bönni' Ruhuë Tsáhuë'ë. Nabábalenë' zxí'ini xi'soë' Leví, en gulje' luyú Chipre. ³⁷ Bëti'ë bönni' ni tu cö' xiyúë', ate' yöju'ë dumí que na', en budödë' le lu ná'agaquië' gubáz na' nasöl-lë'ë Cristo.

5

Dul-la' gulunë' Ananías, en Safira

¹ Tu bönni' yúbölö lë' Ananías, bëti'ë tu cö' xiyúë'. Safira, nigula queë', bennu tsözxöñ lë'. ² Ananías na' bucachi' lanë' late' dumí que yu na', ate' nözinu ca' nigula queë'. Le bugá'anasö yöju'ë, en gulu'ë le lu ná'agaquië' gubáz nasöl-lë'ë Cristo. Rnnë':

—Tsca nisö guzxi'a.

³ Pedro gudxë' lë':

—Ananías, ¿naru' guyázatsö Satanás tu' xihui' lu icja ládxido'o, en ben ga rizi' yé'enu' Dios Bö' Lá'ayi, ate' bucachi' lanu' late' dumí que xiyú' na'? ⁴ Tsanni ni' nagá'ana yu na' lu no'o, ¿naru' cabí nequi quez quiu'? Gudödi bëti'le, ¿naru' cabí dë caz lu no'o dumí que na'? ¿Bizz que gurö'ö icju' gunu' caní? Dios can guzxi' yé'enu', calégasö bönnachi.

⁵⁻⁶ Cate' biyönnë' Ananías didza' ni', gudzö'ë, en gútítë'. Ní'irö gula'bíga'tëbi' bi'i ra'bán, ate' bulu'chölibi' lë' lari', en gulu'abi' lë', en yöjcáchi'gacabí' lë'. Guladxì gula'dzöbi yúgu'të nupa ni' bila'yöni ca guca lë ni.

⁷ Ca tsonna hora gudödi ni', bidixinnu nigula queë' Ananías na' ni', en biti' nözinu lë na' guca queë' bönni' queënu. ⁸ Ní'irö Pedro gudxë'-nu:

—Gudíxjö'i neda'. ¿Naru' guzxi'il' tsca nisö xiyuli' na'?

Gunnánu:

—Ön, tsca nisö guzxi'itu'.

⁹ Ní'irö Pedro gudxë'-nu:

—¿Bizz que ben tuz xtídzala'li' guzxi' bë' xihui'li' Dios Bö' Lá'ayi? Buyútsöca'. Chizóa ulu'dxinbi' yugu' bi'i bulu'cáchibí'-në' bönni' quiu', ate' ulu'béajbi' ca' li'.

¹⁰ Ní'irö la' gudzö'tënu xini'ë Pedro, en gútítënu. Cate' gula'yázabi' bi'i ra'bán na', gula'lé'ebi'-nu chinátinu. Ní'irö bulu'béajbi'-nu, en yöjcáchi'gacabí'-nu cuita lë'ë bönni' queënu. ¹¹ Que lë ni na' guladxì gula'dzöbi yúgu'të bönnachi queë' Dios, ate' guladxì ca' yúgu'të nupa bila'yöni ca guca lë ni.

Tunë' bönni' gubáz nasöl-lë'ë Cristo le taca bë'

¹² Gulunë' bönni' gubáz na' nasöl-lë'ë Cristo zián le taca bë', en zián yöl-la' huáca zxöñ lógaca bönnachi lu yödzö. Yúgu'të bulu'dubé' tsözxöñ ga naca chila yudo' nazí'i le Chila Queë' Salomón. ¹³ Ladaj nupa ni' biti' ta'yéajlë' Cristo, cuntu nu burugui tsöjtá' légaquië', ate' bönnachi lu yödzö ni' gulún légaquië' bal. ¹⁴ Ní'irö ia'bal-la bönnachi zián ca' gula'yéajlë' Cristo, bönni', en nigula. ¹⁵ Cate' bila'lé'e bönnachi yugu' le tunë' bönni' ni' ta'yéajlë'ë Cristo, yöjuá'agaca nupa te'e gapa naca la' nöza, ate' gula'xóë' léguequi lu da'a yaga, en ia'bal-la lu

dá'asö, para cate' tödë' ni' Pedro, tsa zxúl-lasö queë' cu'u zxul-la bal-la böñachi huë' na', para ulu'huöáca. ¹⁶ Lësca' bila'rúaj böñachi yugu' dzaga yödzö, en bila'dxín Jerusalén, nua'agaca nupa te'e, en nupa ta'gu'i ta'zaca' tu' yú'ugaca bö' xihui' léguequí, ate' bulu'huöáca yúgu'téguequí.

Bönni' yudo' ta'bía ládx'i'gaquië' bönni' gubáz nasöl-lë'ë Cristo

¹⁷ Que lë ni na' bixúz lo, en bönni' yudo' saduceo na' dá'gaquië' bixúz lo, bulu'zxé'enë' Pedro. ¹⁸ Ní'irö bixúz lo na', en bönni' na' dá'gaquië' lë' gula'zöne' gubáz na' nasöl-lë'ë Cristo, ate' gula'gu'ë légaquië' lidxi güié. ¹⁹ Ní'irö bidxinë' gubáz lá'ayi queë' Xanru' chi'i dzö'ölö, ate' gusalje' lidxi güié na', en bubéaje' légaquië'. ²⁰ Gubáz lá'ayi na' gudxë' légaquië', rnñë':

—Guli'tséaj, guli'tsöjsóa chila yudo', en guli'tsöjë'len böñachi ni' didza', quíxjö'ili' légaquië' ca naca yöl-la' na'bán idú ni, en ca gaca ila'déli'në' le.

²¹ Cate' bila'yönnë' didza' ni ru'ë gubáz lá'ayi na', gula'yázië' chila yudo' cate' za' renü' zilado', en bulu'sédinë' böñachi.

La' nfisö bulu'dubë' bixúz lo, en nupa nacuá'len lë' tsözxön, len bönni' yudo' tu'chi'a tu'söröë, en bönni' gula tu'zéajni'inë' böñachi Israel, ate' gula'söl-lë'ë nupa tsójaca lidxi güié para tsójx'i'gaquië' yugu' gubáz na' nasöl-lë'ë Cristo, tu' téquinë' ni' nacu'ë lidxi güié na'. ²² Cate' ni'a ná'agaquië' bönni' yudo' na' bila'dxine' ni', biti' yöjxáca'gaquië' légaquië' lu yu'u lidxi güié na', ate' ní'irö bulu'huöajë' tsöjtixjö'gaquië' ca'. ²³ Gulë' bönni' yudo' tu'chi'a tu'söröë' na', ta'nnë':

—Le nácaté yöjxáca'tu' nayáyajtë lidxi güié, ate' nacuá' nupa tun chi'i ra' lidxi güié na', pero cate' gusálajtu', cuntu nu yöjxáca'tu' lu yu'u na'.

²⁴ Cate' bixúz lo, en yugu' bixúz unná bë', en bönni' nacuá' lu në'ë ni'a ná'agaca böñachi yudo', bila'yönnë' didza' ni, gula'bö'dë'ë böñiga tu' cabí nöziguequinë' bizxi gunté lë na' raca. ²⁵ Ní'irö bidxinë' tu bönni' ni', en gudixjö'ji'në' légaquië', rnñë':

—Buli'yútsöca'. Yugu' bönni' na' gulú'ugacali'-në' lidxi güié nacu'ë chila yudo' tu'sédinë' böñachi.

²⁶ Ní'irö guyijë' bönni' na' rinná bé'enë' ni'a ná'agaca böñachi yudo', dzágagaquië' lë' ni'a ná'agaquië' na', ate' gula'chë'ë yugu' gubáz na' nasöl-lë'ë Cristo, pero biti' bi gulunë' quégaquië', tu' guládxinë' ulu'ladxi' böñachi nacuá' ni' légaquië' guiøj. ²⁷ Cate' chinachë'gaquië' yugu' gubáz na', bulu'sudxinë' légaquië' lógaquië' bönni' yudo' tu'chi'a tu'söröë' na', ate' bixúz lo gunábinë' légaquië', rnñë':

²⁸ —¿Naru' cabí gúdxida'atu' libíili' biti' usédili' böñachi ca naca queë' bönni' na'? Na'a, chigudísili' xibá ni idúte yödzö Jerusalén, en rë'ënili' usubága'li' netu' xíguia' tu' nözi yöl-la' guti queë' bönni' na'.

²⁹ Ní'irö bulu'bi'ë didza' Pedro, en ia'zíca'rë' gubáz na' nasöl-lë'ë Cristo, ta'nnë':

—Run bayudxi uzérö nágatu' xtídzë'ë Dios ca xtídfa'gaca böñachi. ³⁰ Libíili' bétilli'-në' Jesús cate' ni' budá'alí'-në' lë' e yaga cruz, pero Dios quégaquië' xuz xtó'oru' busubanë' Lë'. ³¹ Jesús ni, Dios buzúa cazë' Lë' ga nayépisétëre' cuita lë'ë ibëla, para gáquië' Bönni' Lo, en Bönni' Rusólá, en gunë' ga ulu'bí'i ládx'i'gaca böñachi Israel, para gaca uniti lahuë' dul-la' nabága'gaquië'. ³² Ca naca lë ni, runtu' netu' ba nalí que, ate' lësca' rune' Dios Bö' La' ayi ba nalí que, Bö' na' risö'l-lë'ë Dios quégaca nupa tun ca rnna xtídzë'ë.

³³ Cate' bila'yönnë' bönni' yudo' tu'chi'a tu'söröë' na' lë ni, gula'lenë', en gulë'ënnë' ilütië' légaquië'. ³⁴ Ní'irö guzuñë' tu bönni' yudo' ruchi'a rusöröë'

lógaquië', lë' Gamaliel, tu bönni' yudo' fariseo. Rácadë'ë bönni' ni xibá queë' Moisés, ate' yúgu'té böñachi tun lë' bal. Gudxë' nupa na' ulu'béaj yugu' gubáz na' nasö'l-lë'ë Cristo lõ'alö tu chí'ido'. ³⁵ Ní'irö gudxë' bönni' yudo' tu'chi'a tu'sörö'ë na', gunnë':

—Libi'illi', bönni' Israel, buli'yutëz queëli' ca naca le rë'ënili' gunli' quégäquië' bönni' ni. ³⁶ Ral-la' tsöjnéli' ca guca zí'atëlo cate' si' idxín dza ni zóaru' na'a. Birúajë' Teudas, ate' ben cuinë' ca tu bönni' nayépisëtëre'. Guláquië' bönni' yöjtá'gaquië' lë' idú tapa gáyú'ë bönni'. Yugu' bönni' rójäquië' gudil-la gulútië' lë', ate' gulásilasi yúgu'té nupa ni' yöjtá'gaca lë', ate' gunítisö ca' yúgu'té le benë' bönni' na'. ³⁷ Gudödi guca lë ni, birúajë' ca' Judas, tu bönni' Galilea. Benë' caní cate' ni' gula'yú'u lu guichi böñachi ta'guizxaj lázagäquië', ate' yöjtá'gaca böñachi zián lë'. Lësca' gulútië' bönni' ni, ate' gulásilasi yúgu'té nupa ni' yöjtá'gaca lë'. ³⁸ Que lë ni na' rea' libi'illi': Guli'sán-gaquië' bönni' ni, en biti' bi gunli' quégäquië'. Channö naca quégacasö böñachi lë ni ta'nnë' o lë ni tunë', initi caz, ³⁹ pero channö naca queë' Dios, biti' gaca usunitili' le. ¡Buli'yú cuinli' cabí tíl-lalenli'-në' Dios!

⁴⁰ Ní'irö gulunë' tuz didza' len lë'. Bulu'lídze' yugu' gubáz na' nasö'l-lë'ë Cristo, ate' gula'guinë' légaquië', en bulu'zenë' légaquië' bach para cabirö ilu'ilenë' böñachi didza' ca naca queë' Jesús. Ní'irö bulu'sanë' légaquië'. ⁴¹ Bila'rúajë' gubáz na' nasö'l-lë'ë Cristo lógaquië' bönni' yudo' tu'chi'a tu'sörö'ë na'. Tu'dzéjanë' tu' bë'ë Dios légaquië' lataj gula'gui'i gula'záquë'ë tu' dá'gaquië' Jesús. ⁴² Yugu' dza bulu'séditiqü'sinë' böñachi, en gulunë' libán queë' Jesucristo lu chila yudo', en gapa naca lu yu'u lídxigaca böñachi.

6

Ta'böë' gadxi bönni' para ilácalenë' böñachi queë' Cristo

¹ Dza ni', tu' gula'yán böñachi ta'yéajlë' Cristo, yugu' bönni' judío tu'ë didza' griego gula'nnë' quégäquië' bönni' judío tu'ë didza' hebreo tu' nözi le raca cate' ta'guísie' le ilágunu nigula uzëbi, tu' cuntu nu ruí'i le ilágunu nigula uzëbi quégäquië' bönni' ni' tu'ë didza' griego. ² Ní'irö idxínnutë' bönni' gubáz na' nasö'l-lë'ë Cristo bulu'tubë' yúgu'té böñachi ni' ta'yéajlë' Cristo, ate' të' légaquië':

—Biti' naca dxí'a soa dxitu', en cabí guntu' libán que xtídzë'ë Dios, para guntu' dxin cù'utu' le ilágugaca böñachi. ³ Que lë ni na', böch'i' luzá'atu', guli'cö gadxë' bönni' ládjali', para ugú'uru' lu ná'agaquië' dxin ni. Yugu' bönni' na' run bayudxi ilácagaquië' bönni' tun yúgu'té böñachi légaquië' bal, en nácaagaquië' bönni' ta'yéajni'i, en naca bë' Dios Bö' Lá'ayi zóalenë' légaquië'. ⁴ Netu' ni ulidzatica'stu'-në' Dios, en uséeditu' böñachi xtídzë'ë Dios.

⁵ Yúgu'té gula'yaza ládx'i'gaquië' didza' ni, ate' gula'böë' Esteban, tu bönni' réajlë'ë Cristo idú ládxë'ë, en zóalenë' Dios Bö' Lá'ayi lë'. Lësca' gula'böë' Felipe, en Prócoro, en Nicanor, en Timón, en Parmenas, en Nicolás, bönni' yödzö Antioquia, bönni' zí'alö butsë'ë ca runë' para tseaj ládxë'ë Dios ca tunë' yugu' bönni' judío. ⁶ Ní'irö bulu'sudxinë' bönni' na' gula'böë' lógaquië' gubáz na' nasö'l-lë'ë Cristo. Yugu' bönni' gubáz na' gula'xóá ná'agaquië' légaquië', ni' tu'lídze' Dios.

⁷ Guzérö xtídzë'ë Xanru', ate' gula'yanda' böñachi ta'yéajlë' Cristo nacuá' Jerusalén. Lësca' zián bixúz judío gula'zí' lu ná'agaquië' le réajlë'ëru' Cristo.

Ta'zönë' Esteban

⁸ Esteban na' benë' le tun ga rubániru', en yugu' le taca bë' lógaca böñachi lu yödzö, zóalen yöl-la' huáca queë' Dios lë' le buzá' ládxë'ë queë'. ⁹ Ní'irö gula'yasë' bal-lé' bönni' nabábagaquie' yu'u ga tu'dubë' bönni' judío, en tu'sëde' queë' Dios, nazí'i le Yu'u Quégaquie' Bönni' Nadzángaquië'. Bönni' narúajgaquie' yödzö Cirene, en yödzö Alejandría, en luyú Cilicia, en luyú Asia, gulunë' légaquie' tsözxön. Bönni' ni gula'díl-lalen' Esteban didza'. ¹⁰ Biti' guca tá'baga'gaquie' didza' ru'ë Esteban na', tu' bë'ë didza' len yöl-la' réajni'i, tu' zóalenë' Dios Bö Lá'ayi lë'. ¹¹ Ní'irö gula'guízjë' bönni' ila'zí' yë'ë, ila'nnë': "Netu' biyöñitu' didza' ru'ë Esteban ni, rnñe zi'ë queë' Moisés, en queë' Dios." ¹² Caní guca, bönni' ni gula'gu'ë xilá ládxí'gaca böñachi, tsözxön len bönni' gula tu'zéajni'inë', en yugu' bönni' yudo' usëdi. Yúgu'të bönni' ni gula'bía di'ë Esteban na'. Gula'zöñë' lë', en gula'chë'ë lë' lögäquie' bönni' yudo' tu'chi'a tu'söröë'. ¹³ Lësca' bulu'cu'ë lögäquie' nupa gula'guízjö' le cabí nácatë, bönni' na' gula'nnë':

—Biti' zoë' dxisö bönni' ni rnñe zi'ë que yudo' lá'ayi ni, en que xibá queë' Dios. ¹⁴ Biyöñitu' didza' bë'ë bönni' ni ca gunë' Jesús, bönni' Nazaret, rnñe' usunítië' yudo' ni, en utsë'ë yugu' le nalébiru' runru', yugu' lë na' gunná bë'enë' Moisés rë'u.

¹⁵ Ní'irö bönni' yudo' tu'chi'a tu'söröë', en yúgu'të nupa rö'gaca ni' bulu'yü'ë' Esteban, ate' bila'lé'enë' lahuë', rna' ca rna' lahuë' tu gubáz lá'ayi queë' Dios.

7

Didza' bë'ë Esteban, le gunnë' uláz queë'

¹ Ní'irö bixúz lo gunábinë' Esteban na', rnñe':

—¿Naru' nácatë caní?

² Bubi'ë didza' Esteban, rnñe':

—Libi'ili', bönni' gula, en libí'ili', böcha'a. Buli'zë nágali' le guía' libí'ili'. Dios, Bönni' nayépisëterë', bulu'i lahuë' ga zoë' Abraham, xúziru' gudödi, cate' ni' zoë' luyú Mesopotamia, cate' si' tsöjsöë' yödzö Harán. ³ Dios gudxë' lë': "Birúaj ladzu', en bulá'alen di'a dza qui', ate' guyéaj luyú ni' ulu'ida' li'." ⁴ Ní'irö birúajë' Abraham luyú Mesopotamia le naca xiyúgaca böñachi Caldea, ate' yöjsöë' yödzö Harán. Lu yödzö ni' gútie' xuzë' Abraham na', ate' lë' buzë'ë ni', ate' Dios guchë'ë lë' luyú ga ni zóaru' na'a. ⁵ Dios biti' bë'ë lë' lataj guequi queë' luyú ni. Caléga láti'sö bunödzjë' queë' ga soë' luyú ni, pero guzxi' lu në'ë Dios unödzjë' queë' luyú ni, ate' tödi gátië' Abraham guequi luyú ni quégaca zxí'ini xi'söë', sal-la' biti' nacu'ñibí' bi'i queë'. ⁶ Lësca' caní Dios gudxë' Abraham: "Tsójáquie' zxí'ini xi'sú' lu xiyúgaca böñachi izá'a, ate' ni' ilácagaquie' ca böñachi zi'tu'. Ilunë' bönni' luyú ni' ga ilácagaquie' zxí'ini xi'sú' bönni' nadó'ogaquie'. Ulu'saca' zi'ë lögäquie' idú ca tapa gayuá' iz."

⁷ Lësca' Dios gudxë' lë': "Neda' uzötja' böñachi luyú ni', ga ni' ilácagaquie' zxí'ini xi'sú' bönni' nadó'ogaquie', ate' tödi ni' ulu'rúajë' ni', ate' ilunë' xichina' luyú ni." ⁸ Dios bénlenë' Abraham tu didza' rucá'ana tsahui', en gunná bë'enë' lë' ichúguië' lu xipéla'gaquie' bönni' biguiú' nacu'ë lidxë' tu le gaca bë' nazí' lu ná'agaquie' didza' na' rucá'ana tsahui'. Gudödi ni' gúquië' Abraham xúzibi' bi'i Isaac, en cate' chigúquibi' xunu' gubidza, guchuguië' lu xipéla'bi' lë na' naca bë'. Isaac na', lësca' caní benë' queëbi' bi'i Jacob, zxí'inë', en caní benë' ca' Jacob quégaca idxinnutëbi' bi'i bönni' queë', nupa ni' gulaca xuz xtó'ogaca idxinnu cö' böñachi Israel.

⁹ 'Yugu' xuz xtó'oru' na', lu yöl-la' ruzxé'e quégaquié', gulúti'ë-bí' bi'i José, böch'i'gaquié', lu ná'agaquié' bönni' ni' gulúti'gaquié'-bi' luyú Egipto. Dios guzóalenë'-bi' bi'i José na' ¹⁰ en busölë'-bi' lu le gulaca queébi'. Dios bë'ë-bí' yöl-la' réajni'i, le ben ga guyaza ládxé'ë-bí' Faraón, bönni' rinná bë'enë bönachi Egipto, ate' Faraón na' budödë' lu ná'abi' bi'i José yöl-la' unná bë' para gunná bë'ebí' bönachi luyú Egipto, en yúgu'té bönachi nacuá' lidxé' Faraón na'.

¹¹ 'Ní'irö gúcada' gubín idú luyú Egipto, en luyú Canaán ni, ate' gula'guí'i gula'zaca' yúgu'té bönachi dza ni'. Bití' bidzöli le ilahuë' xuz xtó'oru'. ¹² Cate' biyönné' Jacob dë zxoa' xtila luyú Egipto, gusöl-lë'ë yugu' zxí'inë', bönni' ni' nácagaquié' xuz xtó'oru', luyú ni'. Caní guca le zí'alo luzuí yójáquié' ni'. ¹³ Cate' le buropi luzuí yójáquié' luyú Egipto, bené' José ga bulu'ùnbë'ë böchë'ë lë'. Caní guca, gunzöinë' Faraón nupa nácagaca dí'a dza queé' José. ¹⁴ Ní'irö gusöl-lë'ë José didza', en bené' ga bidxiné' Jacob, xuzé', luyú Egipto, ate' dzágagaca dí'a dza queé' lë'. Gulaca idú tsónnalalaj yu' chinu bönachi. ¹⁵ Caní guca, bidxiné' Jacob luyú Egipto, ga ni' gútíë' lë', ate' gulátië' ca' xuz xtó'oru' luyú ni' cate' bizá'a dza que queégaquié'. ¹⁶ Cate' gulátië' tu tu xuz xtó'oru', zxí'iní xi'sóagaquié' yöjuá'agaquié' légaquié' luyú Siquem, ate' ni' bulu'cachë'ë légaquié' yero ba lu xzan bulóaj na' gú'uë' Abraham lu ná'agaca zxí'inë' Hemor, bönni' Siquem na'.

¹⁷ 'Gudödi zián iz, cate' bidxín dza ral-la' gaca le guzxi' lu në'ë Dios, lë na' bené' tsutsu xtídzé'ë guné' queé' Abraham, gula'yán bönachi yugu' cò' Israel, ate' gulaca bönachi zián cate' ni' gula'cuá' luyú Egipto. ¹⁸ Ní'irö guyázië' bönni' yúbólö gunná bë'ë luyú Egipto na', en catu caz biyönné' ca naca le bené' José, gúcalenë' bönachi Egipto. ¹⁹ Bönni' unná bë' na' bi'ë dö' quégaca bönachi uládz queéru'. Busaca' zí'ë yugu' xuz xtó'oru' na', en bené' ga bulu'sanë'-bi' bi'i bönni' huë'ënido' que queégaquié', para ilátibi'. ²⁰ La' dza ní'isö gúljabi' ca' bi'ido' Moisés, ate' Dios guyaza ládxé'ë-bí'. Xuz xiná'abi' bulu'sculë'-bi' lídxigaquié' idú ca tsonna beo'. ²¹ Cate' bidxín dza ulu'sanë'-bi' xuz xiná'abi' para gátibi' bi'ido' Moisés na', bidxinnu nigula zxí'inë' Faraón ga ni' bulu'cá'anë'-bi', ate' yöjzxí'nu-bí', en buscúlunu-bí' ca bi'i que cázanu. ²² Caní guca, bizédabi' bi'i Moisés yúgu'té le táquié' bönni' Egipto, en gúcatéröbi' zxön ca naca didza' bë'ebí', en ca nácagaca le benbi'.

²³ 'Cate' Moisés na' chiyú'ubi' choá' iz, gunná ládxí'bi' tsöjyubi' bönachi uládz queébi', bönachi Israel. ²⁴ Cate' bidxinbi' ga na' nacu'ë, bilé'ebí'-në' tu bönni' Egipto, rusaca' zí'ë tu bönni' uládz queébi'. Ní'irö gúcalenbi'-në' bönni' uládz queébi' na', en bëtibi'-në' bönni' Egipto na'. Caní guca, buzí' labí' bi'i Moisés bönni' na' uláz queé' bönni' uládz queébi'. ²⁵ Gúquibi' Moisés huala'yéajni'inë' bönni' böchibí' guné' Dios ga usölabí' lë cázabi' légaquié', pero légaquié' bití' gula'yéajni'inë'. ²⁶ Ia'tú dza ca' yöjxáca'bí' ia'chopé' bönni' Israel, ta'dil-lë', ate' gú'unibí' cuéqui dxibi' légaquié', en gúdxibi' légaquié': "Libí'llí, böchí'llí naca. ¿Bízq que ruá'ali' lúz'ali' dö'"? ²⁷ Ní'irö bönni' na' ru'ë dö' que lúzë'ë budxiguë'ë-bí' bi'i Moisés, gunnë': "¿Núzzitë buzúa li' para inná bë'enu' netu', en uchi'a usöröu' le runtu"? ²⁸ ¿Naru'rë'ënitsenu' gútiu' ca' neda' ca benu' néaje, bëtiu'-në' bönni' Egipto na'?" ²⁹ Cate' Moisés biyönbí' didza' ni, buzxúnmajbi' ni', en yöjsóabi' luyú Madián ga ni' guzóabi' ca tu bönni' zí'tu'. Luyú Madián na' butsaga ná'aleni'nu nigula lu yödzö ni', ate' gúljagacabí' chópabi' bi'i bönni' queé'.

³⁰ 'Cate' chigudödi choá' iz zoë' ni', bului'i lahuë' tu gubáz lá'ayi queé' Dios ga zoë' lu guí' que yaga yötsi'do' régui, ga ni' naca lu lataj cá'asö, le rö'ö ra'

gui'a nazí'i le Sinaí. ³¹ Cate' Moisés bilé'ené' gui' na', bubániné', ate' gubígui'ë gala' para ilé'ené' dxi'a, ate' biyönné' chi'ë Xanru'. ³² Caní gudxé' Xanru' lë': "Neda' naca' Dios quégäquië' xuz xto'o. Naca' Dios queë' Abraham, en Dios queë' Isaac, en Dios queë' Jacob." Ní'irö lu yöl-la' radxi queë', guzxízidë'ë Moisés, en bíti'rö burúguiné' uyúü'. ³³ Xanru' gudxé' lë': "Guléaj xirachu' nudó'o, tu' naca lá'ayi ga ni zu' tu' zoa caza' neda', Dios, ni. ³⁴ Le nácatë chibilé'eda' le ta'gui'i ta'zaca' bönachi quia' nacuá' luyú Egipto, en chibiyönda' ta'bödxi yeche'. Bötja', zoa' ni para usölä' légaquië'. Gudá na'a, isöl-la'a li' luyú Egipto."

³⁵ 'Sal-la' bönni' uládz queë' Moisés, bulu'cá'ané' lë' cá'asö, gula'nné': "¿Núzxíté buzóa li' para inná bé'enu' netu', en uchi'a usöröu' le runtu?" Dios guşöl-lë'ë lë' para gáquië' bönni' unná bë', en bönni' rusölä, ca na' gubáz lá'ayi na' queë' Dios gudxé' Moisés, cate' bulu'i lahuë' lu yaga yötsi'do' régui ga na' zoë'. ³⁶ Moisés ni bubéajë' bönni' uládz queëru' luyú Egipto. Guca caní gudödi benë' le gulún ga bulu'bani bönachi ni', en le taca bë' benë' luyú ni'. Lësca' caní benë' lu nísado' nazí'i le Nísado' Xiná. Caní benë' lógaquië' idú ca choá' iz lu lataj cá'asö. ³⁷ Lë cazë' Moisés na' gudxé' bönachi Israel ni', gunnë': "Xanru' Dios isöl-lë'ë queëli' tu bönni' galje' ladaj dì'a dza queëli', ate' gáquië' bönni' gu'ë didza' uláz queë' Dios. Isöl-lë'ë lë' queëli' ca na' guşöl-lë'ë neda'. Lë cazë' run bayudxi uzé nágali'-në'." ³⁸ Lësca' lë cazë' Moisés na' guzálené' bönachi nudúbigaca queë' Dios lu lataj cá'asö, ate' gudzáguië' gubáz lá'ayi queë' Dios lë', Nu na' bë'len lë' didza' lu gui'a Sinaí na'. Moisés na' guzálené' xuz xtó'oru', ate' Dios budödë' lu né'ë xibá lá'ayi queë', le ruí'i didza' ca gaca ila'deli' bönachi yöl-la' na'bán, ate' budödë' Moisés xibá ni lu ná'agaca zxí'ini xi'sóagaquië' ga ridxitë queëru' rë'u.

³⁹ 'Btí' gulé'ënne' xuz xtó'oru' iluné' ca rnna xtídzë'ë Moisés, pero bulu'zóë' lë' tsölä'alö, en gulé'ënne' tsöjhüojgaquië' luyú Egipto. ⁴⁰ Cate' ni' zoë' Moisés na' lu gui'a Sinaí na', légaquië' gulé' Aarón, böchë'ë Moisés na', gula'nné': "Ré'ënitu' gunu' yugu' dios queëtu', tu budó' guíë, para tsöjnörugaca lotu'. Bití' nöztu' bi guca queë' Moisés, bönni' na' nubéajë' netu' luyú Egipto."

⁴¹ Ní'irö guluné' tu budó' oro le naca ca tu bëdxido', ate' gulutië'-ba' bö'cu' zxila'do', en gulú'ugaquië'-ba' lo budó' oro na', ate' guluné' laní lo budó' na' núnagaquië'. ⁴² Que lë ni na' Dios bucá'ané' lógaquië', en guléaj ládxë'ë lógaquië'. Ní'irö gula'yéaj ládxí'gaquië' yugu' le ta'yépi lúzxiba. Ca naca lë ni nazúaj lu guichi le gula'nné' bönni' gulu'ë didza' uláz queë' Dios, le rnna:

Libí'ili', bönachi Israel,
¿naru' gulú'ugacatsali'-ba' quia' neda' böa' bëdxí ni'
bëtigacali'-ba', en buzégu'gacalí'-ba',
lë na' benli' lu lataj cá'asö idú ca choá' iz?

⁴³ Bití' gulú'ugacali'-ba' quia' neda',
pero biá'ali' le nequi que Moloc, budó' guíoj queëli'.
Biá'ali' ca' tu le naca ca bólaj lúzxiba nazí'i le Refán,
lë na' buzóali' ca dios queëli'.

Yugu' budó' guíoj budó' yaga ni,
la' libí'isili' benli' para guyéaj ládxí'li' lóguequi.
Que lë ni na', ubéaja' libí'ili' lu xiyuli',
en iché' a libí'ili' zí'tu'rö ga dë luyú Babilonia.

⁴⁴ 'Cate' ni' gula'cu'ë xuz xtó'oru' lu lataj cá'asö, guta' quégäquië' yu'u lari' na' ga gulún chi'ë xibá queë' Dios, lë na' naca bë' Dios caz zóalené' lógaquië'.

Gulunë' tu yu'u lari' na' ca na' Dios gunná bé'enë' Moisés, cate' ni' gudxë' lë' gunë' le ca naca lë na' bilé'enë', le bului'inë' Dios lë' lu guí'a ni'. ⁴⁵ Lësca' bulu'dödë' yu'u lari' na' lu ná'agaquïë' zxí'inigaquïë' ga bidxitë dza ni' gulu'ë xuz xtó'oru' le luyú ni, cate' ni' dzáguië' Josué légaquïë', ate' gula'gúë' xiyúgaca böñachi izá'a, nupa ni' buláguië' Dios lógaquïë' xuz xtó'oru'. Caní gulunë' zián iz ga bidxitë dza zoë' David. ⁴⁶ Dios guyaza ládxë'ë David na', ate' lë' gunábinë' Dios gu'ë lë' lataj gunë' tu yu'u ga soë' Dios queë' Jacob. ⁴⁷ Biti' bë'ë Dios lë' lataj, ate' Salomón, zxí'inë' David na' benë' yu'u queë' Dios. ⁴⁸ Caní benë' sal-la' biti' zoë' Dios, Nu nácatérö lo, tu lu yudo' núngaca böñachi. Ca naca lë ni gunnë' tu bönni' bë'ë didza' uláz queë' Dios, gunnë':

⁴⁹ Yehua' yubá naca ga rö'a rinná bë'a,

ate' yödzölío naca xilibi ni'a.

Rnnë' Xanru': "¿Naru' gúntsali' tu yu'u ga soa?"

¿Naru' zóatsö tu lataj ga ral-la' uzi' ládx'a'a?

⁵⁰ ¿Naru' cabí len na'a caza' bena' yúgu'të lë ni?"

⁵¹ Ní'irö Esteban na' gudxë' yugu' bönni' yudo' tu'chi'a tu'söröë' na', gunnë':

—Libí'ili', bönni' zidi, biti' bi raza icja nágali'. Nazidi icja ládx'i do'oli' ca raca quégaca böñachi biti' núnbë'gaquïë' Dios. Ridá'baga'tica'sili'-në' Dios Bö' Lá'ayi. Ca na' gulunë' xuz xtó'oli', runli' ca' libí'ili'. ⁵² Gula'bía ládx'i'gaquïë' xuz xtó'oli' na' yúgu'të bönni' ni' gulu'ë didza' uláz queë' Dios. Lësca' gulútië' bönni' ni' gula'guixjö'ë zí'alö ca ral-la' guídë' Cristo, Bönni' Tsahui', ate' na'a, cate' ni' bidxinë' Bönni' Tsahui' na', libí'i cázali' bëtili'-në' lu ná'agaquïë' bönni' gulútië' Lë'. ⁵³ Libí'i cázali' dë lu ná'ali' xibá queë' Dios, lë na' gubáz lá'ayi queë' Dios bulu'dödë' lu ná'agaquïë' xuz xtó'oli', pero biti' runli' ca rnna.

Tútië' Esteban

⁵⁴ Cate' bönni' yudo' tu'chi'a tu'söröë' na' bila'yönnë' didza' ni, gula'léde'enë' Esteban, ate' lu yöl-la' rilé quégäquïë' lë' gulagu zxéatica'láyë'ë. ⁵⁵ Ní'irö buyúë' Esteban na' lúzxibalö, ate' zóalenë' Dios Bö' Lá'ayi lë', bilé'enë' lataj bení' ga zoë' Dios, enca' Jesús, zuínë' cuita lë'ë ibéla Dios ga nayépisëtérë'. ⁵⁶ Ní'irö gunnë':

—Buli'yútsöca'. Rilé'eda' nayalaj lúzxiba, ate' zuínë' Bönni' Guljë' Bönachi cuita lë'ë ibéla Dios.

⁵⁷ Ní'irö bönni' yudo' tu'chi'a tu'söröë' na' bulu'sayaj nágagaquïë'. Gula'bödxië' zidzaj, en tsözxón gula'bía di'ë Esteban na'. ⁵⁸ Bulu'béajë' lë' ni'ilö ra' yödzö na', ga ni' bulu'ladxë' lë' guiöj. Yugu' bönni' ni' tunë' ba nalí le tu'zéguë' Esteban didza' bulu'cu'ë lari' ta'xóa yéngäquïë' xini'ë tu bönni' lë' Saulo cate' ni' bulu'ladxë' Esteban guiöj. ⁵⁹ Cate' ni' tu'ladxë' Esteban guiöj, lë' bulidzë' Dios, gunnë':

—Xána' Jesús. Buzí' bö' naca caza'.

⁶⁰ Ní'irö biyéchuë', buzúa zxibë', en bë'ë zidzaj didza', gunnë':

—¡Xan! ¡Biti' usubágu'u légaquïë' dul-la' ni!

Cate' budxi bë'ë didza' ni, gútite'.

8

Saulo ribía ládxë'ë böñachi queë' Cristo

¹⁻³ Saulo benë' tsözxón yugu' bönni' ni' gulútië' Esteban.

La' ni'isö yugu' bönni' ta'yéaj ládx'i'gaquïë' Dios guluá'agaquïë' Esteban, ate' yöjcáchi'gaquïë' lë'. Gula'bödxië'ë ni'a queë'.

Dza na' yugu' bönni' judío cabí ta'yéajlé'ë Cristo gula'bía ládxí'da'gaquië' bönachi queë' Cristo nacuá' Jerusalén. Lësca' Saulo gudxía ládxé'ë bönachi queë' Cristo. Guyázie' gapa naca lu yu'u quégäquië', ate' guzxöñë' yugu' bönni', en nigula, ate' gulu'ë légaquië' lidxi guïë.

Ní'irö gulásilasi ia'láti'sö cabí bidáchigaca yúgu'të bönachi queë' Cristo idú luyú Judea, en luyú Samaria, ate' légarasë' gubáz na' nasöl-lë'ë Cristo bulu'gá'anë' Jerusalén.

Raca libán que didza' dxi'a luyú Samaria

⁴ Yugu' bönni' na' gulásilasië' yójáquië' yúgu'të lataj, ate' gulunë' libán que didza' dxi'a. ⁵ Ní'irö Felipe, tu bönni' dzáguië' nupa na' gulásilasi, guyijé' luyú Samaria, ate' benë' libán ni' ca naca queë' Cristo. ⁶ Bulu'dubë' yugu' bönni' ni', ate' idú ládxí'gaquië' bulu'zë' nágagaquië' didza' ru'ë Felipe na', tu' bila'yönnë' xtídë'ë, en bila'lé'enë' yugu' le taca bë' runë'. ⁷ Caní guca, tu' benë' ga bulu'rúaj zián bö' xihui' yú'ugaca bönachi, ta'bödxi'a zidzaj, ate' bulu'huóaca zián nupa te'e huë' nacú'uni bin, en nupa biti' guca sá'gaca. ⁸ Caní guca, bulu'dzeja bönachi yödzö' ni'.

⁹ Zoë' Simón, tu bönni' zí'alö gúquïë' bönni' udzá' unë ya'a lu yödzö' na', bönni' guzxí' yé'enë' bönachi Samaria na', gunnë' lë cazë' náquië' bönni' nayépisëté're'. ¹⁰ Yúgu'të bönachi bulu'zéda' nágagaca bönni' ni, ga riquela' yugu' bönni' cá'asö ga ridxitë yugu' bönni' lo, gula'nnë': "Bönni' ni dë lu në'ë yö'l-la' huáca zxön queë' Dios." ¹¹ Caní guca, gulunë' lë' bal, tu' xidzé nazi' yé'enë' légaquië' len yö'l-la' gudzá' unë ya'a queë'.

¹² Cate' gula'yéajlé'ë libán runë' Felipe que didza' dxi'a ca rinná bë'ë Dios, en ca naca queë' Jesucristo, ní'irö gula'dilë' nisa, bönni', en nigula. ¹³ Ní'irö guyéajlé'ë ca' Simón na', en bidilë' nisa, ate' gudálentica'së' tsózxön Felipe na'. Cate' bilé'enë' yugu' yö'l-la' huáca zxön, en yugu' le taca bë' runë' Felipe, bubáninë' Simón na'.

¹⁴ Cate' yugu' gubáz na' nasöl-lë'ë Cristo nacuë' Jerusalén bila'yönnë' ca guca lë ni, chinazi' lu ná'agaca bönachi luyú Samaria xtídë'ë Dios, ní'irö gula'söl-lë'ë Pedro, en Juan ni'. ¹⁵ Cate' Pedro, en Juan na' bila'dxinë' ni', bulu'lidzë' Dios uláz quégaca bönachi ni' ta'yéajlé' Cristo para idisóalenë' Dios Bö' Lá'ayi léqueui. ¹⁶ Ga bidxitë dza na', biti' ridxíninë' Dios Bö' Lá'ayi quégäquië'. Nadilagacasë' nisa para ilácagaquië' tuz len Xanru' Jesús. ¹⁷ Ní'irö Pedro, en Juan na', gula'xóa ná'agaquië' bönachi Samaria na'. Bulu'lidzë' Dios, ate' bidisóalenë' Dios Bö' Lá'ayi légaquië'.

¹⁸ Cate' bilé'enë' Simón, bönni' udzá' na', le guca cate' gubáz na' nasöl-lë'ë Cristo gula'xóa ná'agaquië' bönachi ni', bidisóalenë' Dios Bö' Lá'ayi légaquië', gú'unne' quizxjë' légaquië' dumí, ¹⁹ ate' rë' légaquië':

—Benna ca' yö'l-la' huáca ni quia', para cate' ixóa na'a nútítës bönachi, idisóalenë' Dios Bö' Lá'ayi nu na'.

²⁰ Ní'irö Pedro gudxé' lë', rnnë':

—Initi dumí quiu' tsózxön len li', tu' réquinu' len dumí idéli'nu' yö'l-la' huáca queë' Dios. ²¹ Biti' nacu' bachi gútsu'u lë ni, tu' dxiá le naca ruá' dö' icja ládxí'do'o lahuë' Dios. ²² Bubf'i ládxí' ca naca huiá' dö' ni runu', en gúta'yu lahuë' Dios, nadxi ca' uniti lahuë' li' ca naca lë ni rizá' ládxu'u. ²³ Réquibe'eda' nabágu'u xíguia', en nadzunu' lu yalaj que tu' xihui'.

²⁴ Ní'irö bubí'ë didza' Simón na', rë' légaquië':

—Bulí'lídzë' Dios, gáta'yuli' lahuë' Xanru' ni'a quia' neda' para cabí gaca quia' nitú lë na' chigunnáli'.

²⁵ Cate' Pedro, en Juan na' budxi gulunë' ba nalí queë' Cristo lu yödzö ni', en bulu'siyönnë' légaquië' xtídzë' è Dios, gulunë' ca' libán que didza' dxi'a yugu'lu ládzagaquië' bönni' Samaria, ate' gudödi ni' yöjhuöjgaquië' Jerusalén.

Felipe, en tu bönni' Etiopía

²⁶ Ní'irö tu gubáz lá'ayi queë' Xanru' bë'lenë' Felipe didza', en gudxë' lë':

—Guyasa, en guyéaj saca' ga ridödi gubidza beo' ziaga. Idxinu' ga ni' nalá' nöza zeaj Jerusalén zéajtë yödzö Gaza, nöza na' ridödi lu lataj cá'asö.

²⁷ Ní'irö guyu'ë nöza Felipe na', sa'yéajë'. La' nöza ni' yöjtságuië' tu bönni' Etiopía, náquië' bönni' huödx. Luyú Etiopía náquië' bönni' huen dxin lo queënu Candace, nigula na' rinná bë'enu böñachi Etiopía na', en yu'u lu në'ë yúgu'të yöl-la' tsahui' queënu dzö'ö lídxinu. Guyijë' Jerusalén bönni' ni para guyéaj ládxë' è Dios. ²⁸ Na'a, söhuójë ladzë', rö'ë lu carreta queë', en rulabë' le nazúaj lu guichi ca gunnë' Isaías, bönni' bë'ë didza' uláz queë' Dios. ²⁹ Ní'irö Dios Bö' Lá'ayi gudxë' Felipe na':

—Gubígä' ga zeaj carreta na', en guyéajlen le.

³⁰ Cate' chigubígüë' è Felipe ni', biyönnë' ru'ë didza' bönni' huödx na', rulabë' le nazúaj lu guichi ca gunnë' Isaías, ate' gudxë' lë':

—¿Naru' réajni'inu' lë na' rulabu'?

³¹ Bubi'ë didza' bönni' Etiopía na', gunnë':

—¿Nacxi gaca tséajni'ida' channö cuntu nu zoa uzéajni'i neda'?

Ní'irö gúta'yuë' lahuë' Felipe cuenë', en cö'lenë' lë' tsözxön lu carreta na'.

³² Lë na' nazúaj lu guichi rulabë', rnna caní:

Ca bö'cu' zxila'do',
gula'chë' è Lë' para ilútië' Lë',
en ca bö'cu' zxila'do',
biti' rnneba' cate' nu richugu lítsa'ba',
ca' benë' Lë', biti' gusalaj ru'ë bi innë'.

³³ Bulu'cá'anë' Lë' cá'asö,
en biti' gulu'ë lataj nu uchi'a usörö Lë'.

¿Nuzxi caz gaca inözi xíguia' nabága'gaca böñachi uládz queë'?

La' légacasë' gulútië' Lë'.

³⁴ Bönni' huödx na' gunábinë' Felipe, rë' lë':

—Ráta'yua' lo' quíjöi'inu' neda'. ¿Nuzxi que gunnë' caní bönni' na' bë'ë didza' uláz queë' Dios? ¿Naru' queë' cazë', o que nu yúbölö?

³⁵ Ní'irö la' didza' nisö buguélë' è Felipe, en busiyönnë' lë' didza' dxi'a ca naca queë' Jesús. ³⁶ Cate' ni' yú'ugaquië' nöza söjáquië', bila'dxinë' ga dë nisa, ate' bönni' huödx na' rë' Felipe, rnne':

—Buyútsöca'. Ni dë nisa. ¿Naru' huácatsö idila' nisa?

³⁷ Felipe gudxë' lë':

—Channö réajlë'u idú ládxu'u, huáca idilu' nisa.

Lë' bubi'ë didza', rnne':

—Réajlë'a Jesucristo, náquië' Zxí'inë' Dios.

³⁸ Ní'irö benë' ga guzóa dxisö carreta queë' na', ate' bulu'huötje' irópatë', yöjtsázagaquië' lu nisa. Ní'irö Felipe buquile' bönni' huödx na' nisa. ³⁹ Cate' bulu'rúajë' lu nisa, Dios Bö' Lá'ayi buchë' è Felipe, ate' bönni' huödx na' biti'rö bilé'enë' lë'. Ní'irö buguélë' xinözë', söhuójë' rudzéjanë'. ⁴⁰ Cate'

chiréqui'be'enë' Felipe, zoë' lu yödzö Azoto. Gudödë' yúgu'të yödzö ni', ate' benë' libán que didza' dxi'a, ga bidxitnë' yödzö Cesarea.

9

Saulo ruhuöáquië' queë' Cristo

1 Ni' ruzenë' bach Saulo nupa ta'yéajlë' Xanru', gú'unnnë' gútië' légaquië'. Para gunë' caní bidxinë' lahuë' bixúz lo, **2** en gunábinë' lë' tu guichi unná bë', le tsójü'ë lógaquië' bönni' unná bë' quégaca yu'u gapa tu'dubé' bönni' judío, en tu'sédë' queë' Dios lu yödzö Damasco, ate' channö utsöjxáquië' yugu' bönni', en nigula ta'yéajlë'ë Jesús ni', gaca ichë'ë légaquië' nadzúnguquië' lu yödzö Jerusalén. **3** Tsanni ni' yúugaquië' nöza Saulo, en nupa nacuá'len lë', söjáquië', en cate' chizóa ila'dxine'ë Damasco, tsálido'os buzeni'da' tu bení' za' lúzxiba, le buzení' ga ni' söjáquië'. **4** Ni'irö gudzö'ë Saulo lu yu, en biyönnë' chi'i Nu rë lë':

—Saulo, Saulo, ¿bizx que ribía ládxu'u neda'?

5 Saulo gunábinë' Lë', gunnë':

—Nuzxi lí', Xan?

Lë' gunnë':

—Neda' Jesús, Nu ribía ládxu'u. Run zi' cuinu', ridá'bagu'u neda'. Raca qui' ca na' raca queëba' bëdxi, run zi' cuimba' richégü'ba' yaga tuchi' túndë'ë-ba' zi'.

6 Ni'irö Saulo guzxízidë'ë, gúdixinë', en gunnë':

—Xan, ¿bizxi ré'ënu' guna'?

Xanru' gudxë' lë':

—Guyasa, en guyáz lu yödzö, ate' ni' isöl-la'a quiu' nu güié li' le ral-la' gunu'.

7 Guláxdxinë' yugu' bönni' na' söjácalenë' Saulo, tu' bila'yönnë' chi'i na', sal-la' cuntu nu bila'lé'enë'. **8** Ni'irö böasë' Saulo luyú, en cate' guxá' guiój lahuë', biti' ca' rilé'enë'. Que lë ni na' gula'guélë'ë në'ë, en gula'chë'ë lë' Damasco.

9 Guzóë' ni' tsonna dza nachul-la lahuë', en biti' bi gü'i gudahuë'.

10 Zoë' ca' Ananías, bönni' réajlë'ë Cristo, yödzö Damasco, ate' Xanru' bulu'i lahuë' ga zoë' ca tu lu yëla bëchigal, en gudxë' lë':

—Ananías.

Lë' bubí'ë didza', gunnë':

—Ni zoa', Xan.

11 Xanru' gudxë' lë':

—Guyasa, en guyéaj ga naca la' nöza na' nazí'i le Nöza Li, ate' lu yu'u lidxë' Judas gunaba didza' queë' Saulo, bönni' Tarso. Lu yu'u na' rulidzë' Dios.

12 Chibilé'enë' tu bönni' ca tu lu yëla bëchigal zë'ë tsázië' ga zoë', lë' Ananías, en ixóa në'ë lë' para huöjaláj guiój lahuë'.

13 Ni'irö bubí'ë didza' Ananías, rë' Lë':

—Xan, zián nupa chibulu'siyönnë' neda' ca runë' bönni' ni, zián le naca dö' nu'ë le benë' quégaca böñachi ta'yéajlë' Li', nacuá' Jerusalén. **14** Zë'ë ca' ni, dë lu në'ë uláz quégäquië' bixúz unná bë' sönë' yúgu'të nupa tu'lidza Dios len Lo' Li'.

15 Ni'irö Xanru' rë' Ananías na', rnne':

—Guyéaj, tu' gurö caza' neda' bönni' ni para gunë' libán ca naca quia' lögaca böñachi izá'a, en lógaquië' bönni' ta'nná bë' enë' légaquië', enca' lögaca böñachi Israel. **16** Uluí'ida' lë' le zián le qui'i sáquë'ë uláz quia' neda', gunë' xichina'.

17 Ni'irö guyijë' Ananías ni', ate' guyázië' yu'u, en guxóa në'ë Saulo, ate' rë' lë':

—Böcha'a Saulo, Xanru' Jesúś, Nu na' bulu'i lahui la' nöza ga ni' zo'o, gusöllé'ë neda' para huöálaj guiöj lo', en idisóalenë' Dios Bö' Lá'ayi li'.

¹⁸ La' ní'isö gula'guinnaj le naca ca xilácuba' böla lu guiöj lahuë', ate' la' böáljatë' guiöj lahuë'. Ní'irö guyasë' Saulo, en bidilë' nisa. ¹⁹ Gudödi ni' gudahuë', en böaca ládxë'ë. Ca chopá tsonna dza guzóalenë' yugu' bönni' ta'yéajlé'ë Cristo nacu'ë Damasco.

Runë' libán Saulo lu yödzö Damasco

²⁰ La' gusí lotë' Saulo runë' libán queë' Cristo gapa naca lu yu'u ga tu'dubë' bönni' judío, en tu'sédë' queë' Dios, rnnë':

—Jesús náquië' Zxi'ini cazë' Dios.

²¹ Bulu'báninë' yugu'të bönni' ni' ta'yönnë' lë', ta'nnë':

—¿Naru' caléga bönni' ni' bönni' na' busunítië' nupa nacuá' Jerusalén, en tulidza Dios lu Lë' Jesúś? Para gunë' caní bidë' ca' ni para ichë'ë légaquië' nadzúnguacië' lógaquië' bixúz unná bë'.

²² Bidíparö ládxë'ë Saulo, en benë' ga gula'bö'ë böninga bönni' judío nacu'ë Damasco, tu' bulu'inë' légaquië' Jesúś naca cazë' Cristo, bönni' na' tunë' löza idinná bë'enë' légaquië'.

Rulë' Saulo lu ná'agaquië' bönni' judío

²³ Cate' chigudödi zián dza, gulún xtílda'gaquië' bönni' judío nacu'ë ni' ilútië' Saulo. ²⁴ Rëla, en té dza gula'bö' nísië' yugu' bönni' judío ga nu ridödi lu zö'ö run chi'i yödzö na' para ilútië' lë', pero gúquibe'enë' Saulo le té'ënne' ilunë' queë'. ²⁵ Ní'irö yugu' bönni' ta'yéajlé'ë Cristo gula'guélë'ë Saulo chi'i dzö'ölö, ate' gula'gu'ë lë' tu lu ga'böra zxön naga' du, en bulu'zötjë' lë' ní'ilö lu zö'ö run chi'i yödzö na'.

Rudxinë' Saulo Jerusalén

²⁶ Cate' budxinë' Saulo Jerusalén, gú'unne' tsöjenë' tsözxöñ bönni' ni' ta'yéajlé'ë Cristo, pero yugu'të' guládxinë' lë', tu' cabi téquinë' réajlé'ë Saulo na' Cristo. ²⁷ Ní'irö bönni' na' lë' Bernabé gudélë'ë Saulo, en guchë'ë lë' ga na' nacu'ë bönni' gubáz nasö'l-lë'ë Cristo. Busiyönnë' légaquië' ca na' guca queë' Saulo, bilé'enë' Xanru' la' nöza, ate' Xanru' caz bë'lenë' lë' didza', en ca na' benë' Saulo lu yödzö Damasco, len yöl-la' ruguladxi' benë' libán ca naca queë' Jesúś. ²⁸ Ní'irö Saulo guzóalenë' légaquië' lu yödzö Jerusalén, ate' gudálenë' légaquië' tsözxöñ. ²⁹ Lu yöl-la' ruguladxi' benë' libán Saulo ca naca queë' Xanru', en gadil-lalenë' didza' bönni' judío tu'ë didza' griego, ate' légaquië' gula'zóa gula'bö'ë ilútië' lë'. ³⁰ Cate' guléquibe'enë' böchíru' ta'yéajlé'ë Cristo lë ni, gula'chë'ë Saulo lu yödzö Cesarea, ate' gula'söl-lë'ë lë' yödzö Tarso, le naca ladzë' Saulo.

³¹ Ní'irö guca tsahui' quégaca yugu'të cö' bönochí queë' Cristo, nacuá' idü luyú Judea, en luyú Galilea, en luyú Samaria, ate' bila'dipa ládx'gaquië'. Gula'cu'ë lu yöl-la' radxi quégacië' Xanru', ate' gula'yanë' tu' gúcalenë' Dios Bö' Lá'ayi légaquië'.

Pedro ruúnë' tu bönni' lë' Eneas

³² Ia'tú le guca, cate' Pedro yöjyúë' yugu' böchíru', bidixinë' ga nacu'ë bönni' ta'yéajlé'ë Jesúś lu yödzö Lida. ³³ Yójxáquië' tu bönni' ni' lë' Eneas, chiguca xunu' iz dë' ré'enë', nacú'unië' bin. ³⁴ Pedro gudxë' lë':

—Eneas, Jesucristo ruúnë' li'. Guyasa, en butubi xto'o.

La' guyásatë' Eneas na'. ³⁵ Yúgu'të nupa nacuá' yödzö Lida, en yödzö Sarón bila'lé'e lë', ate' bulu'huóáca queë' Xanru', tu' chita'yéajlë' Lë'.

Rátinu Dorcas, en rubannu

³⁶ Ia'stú le guca, lu yödzö Jope zóanu tu nigula réajlë'ënü Cristo, lënu Tabita, en ca naca didza' griego lënu Dorcas. Bennu nigula ni zián le nácagaca dxi'a le tácalen böñachi yechi'. ³⁷ Le guca dza ni', güí'nu Dorcas na', en gútinu. Gudödi gula'guíbinu lënu, gula'guíxjë'-nu tu lu yu'u ga naca buropi cuía. ³⁸ Tu' dë yödzö Lida gála'sö ga na' dë yödzö Jope, ga na' zoë' Pedro, bila'yönnë' bönni' Jope na' ta'yéajlë'ë Cristo zoë' Pedro ni', ate' que lë ni na' gula'söl-lë'ë chopë' bönni' ga na' zoë', ate' guláta'yuë' lahuë', té' lë':

—Biti' tsenu' guídu' queëtu'.

³⁹ Ni'irö la' guyásatë' Pedro, sa'yéajlenë' légaquië'. Cate' bidxinë' ni', la' gula'chë'të' lë' ga naca lu yu'u ga dënu nigula nati na'. Ni'irö yugu' nigula uzëbi bulu'dúbinu gásibi'ilë', ta'bödxinu, en tu'lui'nu lë'lari' quégäquië' bönni', en nigula, yugu' le bennu Dorcas cate' ni' zóalennu légacanu. ⁴⁰ Ni'irö Pedro bubéajë' níilö yúgu'të nupa nacuá' ni', ate' buzóá zxibë', rulidzë' Dios. Ni'irö buécjë' ga dënu Dorcas na', gunnë':

—Tabita, guyasa.

La' buxa'të guiój lonu Dorcas. Cate' bilé'enu-në' Pedro, la' guyástenu, gurö'önü. ⁴¹ Gudélë'ë Pedro ná'anu, en buchisë'-nu. Ni'irö bulidzë' bönni' na' ta'yéajlë'ë Jesús, len yugu' nigula uzëbi na', ate' busudxinë' Dorcas na' lógaquië', nabannu. ⁴² Ca guca lë ni guzé didza' idú lu yödzö Jope, ate' gula'yéajlë' böñachi zián Xanru' Jesús. ⁴³ Bugá'anë' Pedro yödzö Jope na' zián dza lu yu'u lidxë' Simón, bönni' runë' tsahui' guídi zxa bëdxi.

10

Le benë' Pedro lidxë' Cornelio

¹ Zoë' yödzö Cesarea tu bönni' lë' Cornelio, bönni' rinná bé'enë' tu gáyu'ë bönni' röjáquië' gudil-la, nazí'i lágaquië' Bönni' Italia Röjáquië' Gudil-la. ² Cornelio na' reaj ládxë'ë Dios, en rádxinë' Lë', ate' yúgu'të böñachi nacuá' lidxë' núngaca lë' tsözxön. Runödziejë' Cornelio dumí zián le rácalen böñachi yechi', en rulídzatica'së' Dios. ³ Tu dza idú ridödi xihuö бил'ënenë' Cornelio ca tu lu yéla béchigal, razië' tu gubáz lá'ayi queë' Dios ga na' zoë', en rë' lë':

—Cornelio.

⁴ Gúdxinë' Cornelio. Buyúue' gubáz lá'ayi na', en gudxë' lë':

—¿Bizxi rnno', Xan?

Gubáz lá'ayi na' gudxë' lë', rnñë':

—Dios riyönnë' le rulidzu'-në', en nözinë' ca runu', rácalenu' böñachi yechi'.

⁵ Na'a, gusöl-la' yugu' bönni' tsöjáquië' yödzö Jope tsöjlídzagaquië' bönni' na' lë' Simón, zoa ia'tú lë' Pedro. ⁶ Bönni' ni zoë' lidxë' tu bönni' runë' tsahui' guídi zxa bëdxi. Bönni' ni, lëscá' lë' Simón, ate' zoa lidxë' ra' nísado'. Pedro na' guíë' li' le ral-la' gunu'.

⁷ Cate' chibuzë'ë gubáz lá'ayi na' bë'lenë' lë' didza', bulidzë' Cornelio chòpabi' bi'i huen dxin queë', en tuë' bönni' rejë' gudil-la reaj ládxë'ë Dios, en dzáguië' böñachi nacuá' lidxë' Cornelio. ⁸ Cate' budxi busiyönnë' légaquië' yúgu'të le guca, gusöl-lë'ë légaquië' yödzö Jope.

⁹ Dza buropi, tsanni ni' yú'ugaquië' nöza, en ta'dxinë' gala' ga dë Jope na', la' ni'isö gurenë' Pedro ícjo'olö yu'u para ulidzë' Dios, ni' naca idú huagubidza.

¹⁰ La' ná'asö ridunë' Pedro, en gú'unñë' gahuë', ate' tsanni ni' tu'pë'ë queë',

bilé'enë' le naca ca tu lu yëla bëchigal. ¹¹ Bilé'enë' nayalaj lúzxiba, en ruhuötaj tu le naca ca tu lari' guitsa' zxön ga zoë', le naga' idapa la'a. ¹² Lahui lari' na' dxíagacaba' yugu' böa' guixi' izá'a nacuá' tapa ni'a ná'agacaba', en yugu' böa' ta'ayöj lë'egacaba' lu yu, en yugu' böa' zoa xíligacaba'. ¹³ Ní'irö biyönnë' chi'i nu rë lë':

—Pedro, guyasa. Bëti-gacaba', en gudagu.

¹⁴ Bubi'ë didza' Pedro, rnnë':

—¡Caléga, Xan! Catu caz gudhua' le cabí ral-la' gágutu', o le cabí naca dxi'a.

¹⁵ Le buropi luzuí biyönnë' chi'i nu na' gudxi lë':

—Le nunë' Dios dxi'a, biti' innó' que: "Biti' naca dxi'a."

¹⁶ Tsonna luzuí guca caní, ate' ni'irö la' buépitë lari' zxön na' lúzxiba. ¹⁷ Tsanni ni' rö'ë böniña Pedro, rizá' ládxë'ë bizxi sa'yéaj lë na' bilé'enë' ca tu lu yëla bëchigal, bila'dxinë' bönni' na' nasöl-lë'ë Cornelio légaquië' ra' yu'u, ta'nabë' gazxi zoa lidxë' Simón na'. ¹⁸ Cate' bila'dxinë' ni', bulu'lidzë' nupa nacuá' yu'u na', en gula'nábinë' légaquië' channö zoë' tu bönni' lë' Simón ni', zoa ia'tú lë' Pedro. ¹⁹ Tsanni ni' rizá' ládxë'ë Pedro ca naca lë na' bilé'enë', Dios Bö' Lá'ayi gudxë' lë', rnnë':

—Buyúsöca'. Chibila'dxinë' tsonné' bönni' ni, tu'guiljë' li'. ²⁰ Guyaschi na'a, en bötaj zxan yu'u. Biti' gaca chopá ládxu'u tséajlenu' légaquië', tu' nasöl-la'a neda' yugu' bönni' ni.

²¹ Ní'irö bötje' Pedro zxan yu'u ga na' nacu'ë bönni' na' nasöl-lë'ë Cornelio, en gudxë' légaquië':

—Neda' bönni' ruguylajli'. ¿Bizxi huen zá'ali' ni?

²² Bulu'bí'ë didza', té' lë':

—Cornelio, tu bönni' rinná bé'enë' bönni' röjáquië' gudil-la, nasöl-lë'ë netu'. Náquië' bönni' tsahui', en rádxinë' Dios. Yúgu'té bönni' judío tunë' bal bönni' ni, en nadxí'iguequinë' lë'. Ia'tú le guca, tu gubáz lá'ayi queë' Dios bë'lenë' lë' didza', en gudxë' lë' isöl-lë'ë nu udulídza li' guídu' lidxë' para yönne' didza' gu'u.

²³ Ní'irö Pedro gulu'ë légaquië' lu yu'u, en bë'ë ga ila'cu'ë. Cate' za' rení' ia'tú dza, guyasë' Pedro, en guyéajlenë' légaquië'. Bal-lë' böchi'ru' nacu'ë Jope na' gulunë' lë' tsözxön.

²⁴ Dza bunní ni', bila'dxine' Cesarea. Chizoë' Cornelio ribözë' légaquië', ate' chinutubë' yugu' di'a dza queë', en yugu' böchi' luzë'ë nadxí'ironë' lidxë'. ²⁵ Cate' guyázië' Pedro lö'a, birúajë' Cornelio yu'u, yöjtságuië' lë'. Biyéchuë' xini'ë Pedro, en guyéaj ládxë'ë lë' ca runru' queë' Dios caz. ²⁶ Pedro buchisë' lë', en gudxë' lë':

—Guyasa. Lësca' bönochí yödzölió naca' ca nacu' li'.

²⁷ Ni' tu'isë' ca' didza', guyázatë' Pedro yu'u, en yöjxáquië' nudúbigaca bönochí zián ni'. ²⁸ Ní'irö Pedro gudxë' légaquië', rnnë':

—Libi'ilí' nöz quézili' ca rinná bë' xibá queë' Moisé, rnna biti' ral-la' gunë' tu bönni' judío tsözxön o tsázalenë' nu bönni' izá'a. Na'a, Dios bulu'ínë' neda' biti' ral-la' innia' queë' nitúë' bönni' náquië' cá'asö o biti' náquië' dxi'a. ²⁹ Que lë ni na' cate' bulídzali' neda', la' bídiatea', en biti' guca chopá ládx'a. Rinaba' na'a, ¿bizx que na' bulídzali' neda'?

³⁰ Ní'irö bubí'ë didza' Cornelio, gunnë':

—Chiguca tapa dza ca zóaru' na'a, idú ridödi xihuö, cate' ni' runa' gubasa, en rulidza'-në' Dios lu yu'u lidxa' ni, bilé'eda'-bi' tubi' bönni' ra'bán nácubi' lari' rëpi yösa bení', dulu'í lobi' neda'. ³¹ Caní güdxibi' neda': "Cornelio. Dios

riyönnë' le rulidzu'-në', en nözinë' ca runu', rácalenu' yugu' böñachi yechi'. ³² Na'a, isöl-lu'u nu bönni' lu yödzö Jope para tsöjlídzë' tu bönni' lë' Simón, zoa ia'tú lë' Pedro. Bönni' ni zoë' lidxë' tu bönni' runë' tsahui' guídi zxa bëdxi, en lë' ca' Simón. Zoa lidxë' bönni' ni ra' nísado'. Cate' idxiñë' Pedro na' ga zu', usiyönnë' li' didza' dxi'a." ³³ Caní guca, la' gusöl-la'tea' nu tsöjlidz'a' li', ate' tsahui'do' benu' bidu' ga zóatu' ni. Que lë ni na' zóatu' ni yúgu'tétu', nudúbitu' lahuë' Dios para uzé nágatu' le inná bë'enë' Dios li' innó'.

Didza' bë'ë Pedro lidxë' Cornelio

³⁴ Ní'irö gusí lahuë' Pedro ru'ë didza', rmnë':

—Le nácaté réajni'ida' na'a, biti' ruyusé' Dios yöl-la' rinnësö quégaca böñachi, pero tuz ca rilé'enë' rë'u. ³⁵ Dios raza ládxë'ë böñachi idútë yödzölió, nupa na' tadxi Lë', en tun le naca dxi'a. ³⁶ Gusöl-lë'ë Dios xtídzë'ë ga nacuá' böñachi Israel, en gusöl-lë'ë nu ben libán que didza' dxi'a, le run ga raca dxi'a quégaca böñachi, lë' na' bidixín queérü' lu në'ë Jesucristo. Lë' cazé' náquië' Xanru' yúgu'téru'. ³⁷ Libí'ili' nöz quézili' lë na' guca luyú Judea, le gusí lo guca luyú Galilea gudödi bené' libán Juan para ila'dila böñachi nisa. ³⁸ Nözili' ca bené' Dios le guca queé' Jesús, bönni' Nazaret. Gusöl-lë'ë Dios Bö' Lá'ayi, en yölla' huáca queé' para sóalengaca Lë'. Nözili' ca na' gudé' Jesús, runë' le naca tsahui', en ruúnë' yúgu'té nupa gula'gu'i gula'zaca' lu na' tu' xihui'. Caní bené', tu' guzóalenë' Dios Lë'. ³⁹ Na'a, netu' runtu' ba nalí que yúgu'té lë na' bené' Jesús luyú Judea, en lu yödzö Jerusalén, en ca na' guca, gulútië' Jesús, cate' bulu'dé'ë Lë' lë'e yaga cruz. ⁴⁰ Ní'irö Dios busubanë' Lë' cate' guca tsonna dza nátië', en bené' ga bulu'i lahuë' ga zóatu' netu'. ⁴¹ Biti' bulu'i lahuë' lógaca yúgu'té böñachi, pero lotu' netu' bulu'i lahuë'. Dios guröë' netu' dza ni' te para guntu' ba nalí queé' Jesús, ate' gü'i gudágulento' Lë' tsözxöön gudödi bubanë' lu yöl-la' guti. ⁴² Gunná bë'enë' Dios netu' guntu' libán lógaca böñachi, ate' runtu' ba nalí queé' Cristo, náquië' Nu buzoá cazé' Dios para uchi'a usöröë' nupa nabángaca, en nupa chinátingaca. ⁴³ Lësca' yúgu'té bönni' gulu'ë didza' uláz queé' Dios gulunë' ba nalí queé' Jesús, gula'nnë': "Yúgu'té nupa ila'yéajlë' Lë', Dios uniti lahuë' dul-la' nabága'gaquië' ni'a que le bené' Lë'."

Dios Bö' Lá'ayi ridisóalenë' böñachi izá'a

⁴⁴ Ni' ruíisë' caní didza' Pedro, la' bidxitë' Dios Bö' Lá'ayi, bidisóalenë' légaquië', yúgu'té nupa ni' ta'yöni libán rune' lë'. ⁴⁵ Gula'ná'badxë'bönni'judío ta'yéajlë'ë Cristo, nupa na' bila'dxín ni' tsözxöön len Pedro, tu' bidé' Dios Bö' Lá'ayi, Nu na' nasöl-lë'ë Dios Xuz. Bidisóalenë' böñachi ni' biti' nácabaca judío. ⁴⁶ Caní gulunë' tu' bila'yönnë' tu'ë bönni' zí'tu' na' didza' yúbölö, en tune' Dios zxöön. ⁴⁷ Ní'irö bë'ë didza' Pedro, gunnë':

—¿Naru' huácatsö nu inná be'ë böñachi ni para cabí ila'dila nisa? Naca bë' Dios Bö' Lá'ayi bidisóalenë' légaquië', ca na' bidisóalenë' netu'.

⁴⁸ Gunná bë'ë Pedro ila'dilë' nisa tu' nazi' lu ná'agaquië' Lë' Xanru' Jesús. Ní'irö yugu' bönni' ni' guláta'yuë' lahuë' Pedro ugá'analenë' légaquië' ca chopa tsonna dza.

11

Didza' bë'ë Pedro lógaca böñachi queé' Cristo nacuá' Jerusalén

¹ Bila'yönnë' gubáz nasöl-lë'ë Cristo, en böchí'ru' nacu'ë luyú Judea ca na' bönni' biti' nácabacu'ë' judío gula'zí' lu ná'agaquië' xtídzë'ë Dios. ² Cate'

budxinë' Pedro Jerusalén, böchi'ru' judío gula'díl-lalenë' lë' didza'. ³ Gulë' Pedro:

—¿Bizx que yöjtsú'ulenu' bönni' biti' nácagaquië' judío, en gudágulenu' légaquië' tsózxön?

⁴ Ní'irö gusí lahuë' Pedro rusiyönnë' légaquië' idútë lë na' guca, rnnë':

⁵ —Guzóa' lu yödzö Jope, en cate' ni' rulidza'-në' Dios, bilé'eda' ca tu lu yëla bëchigal tu le bulu'iñë' Dios neda'. Bilé'eda' bötaj biruáj lúzxiba tu le naca ca tu lari' guitsa' zxöön, naga' idapa la'a, ate' bidixín ga na' zoa'. ⁶ Cate' ni' ruyúa' le para ilé'eda' le dxia láhuilö, bilé'egacada'-ba' böa' guixi' nacuá' tapa ní'agacaba', yugu' böa' guixi' sínia', en böa' tá'ayöj lë'egacaba' lu yu, en böa' zoa xíligacaba'. ⁷ Biyönda' chi'i nu gudxi neda': "Pedro, guyasa. Bëti-ba', en gudagu." ⁸ Ní'irö gudxa'-në': "Biti' ca', Xan. Catu caz gudahua' tu le cabí ral-la' gágutu', o tu le cabí naca dxi'a." ⁹ Ní'irö le buropi luzuí bulidza chi'i lúzxiba na' neda', en gudxi neda': "Le nunë' Dios dxi'a, biti' innó' biti' naca dxi'a." ¹⁰ Tsonna luzuí guca caní, ate' ní'irö idútë lë na' bilé'eda' la' buépitë lúzxiba. ¹¹ La' ní'isö' bila'dxintë' tsomnë' bönni' ra' yu'u ga na' zoa', narúajaquië' yödzö Cesarea, nasöl-lë'ë légaquië' tu bönni' lë' Cornelio. Sududíljagaquië' neda'. ¹² Dios Bö' Lá'ayi gudxe' neda': "Guyéajlen légaquië', en cabí gaca chopá ládxu'u." Lësca' izxópatë' böchi'ru' ni gula'zál'enë' neda' tsózxön. Guyéajtu' Cesarea, ate' guyaztu' lidxë' tu bönni' zoë' ni'. ¹³ Bönni' ni' gudíxjöi'inë' netu' ca na' bilé'enë', bidxinë' tu gubáz lá'ayi queë' Dios lu yu'u lidxë'. Guzuínë' lahuë', en gudxe' lë': "Na'a isöll-la'gacu'-në' bönni' tsöjáquië' yödzö Jope, tsöjlídzagagaquië' Simón, zoa ia'tú lë' Pedro. ¹⁴ Bönni' na' usiyönnë' li' naca gaca uló' li', en ulu'lágaca ca' yúgu'te bönochachi nacuá' lidxu'." ¹⁵ Cate' ni' gusí lahua' ruí'ilena' légaquië' didza', bidisóalenë' Dios Bö' Lá'ayi légaquië' ca na' bidisóalenë' rë'u zí atëlö. ¹⁶ Ní'irö yöjneda' didza' na' bë'ë Xanru', gunnë': "Le nácaté Juan buquilë' bönochachi nisa lu nisa, pero libí'ili', gaca queëli' le rulu'i'sö yöl-la' ridila nisa na', idisóalenë' Dios Bö' Lá'ayi libí'ili'." ¹⁷ Que lë ni na', channö Dios gusöl-lë'ë Dios Bö' Lá'ayi quégagaquië', la' tuz ca benë' queëru' rë'u réajlé'ëru' Xanru' Jesucristo, ¿núzxitië neda' inná bë'eda'-në' Dios?

¹⁸ Ní'irö, cate' bila'yönnë' lë ni, gula'cuá' dxië', en gula'gu'ë Dios yöl-la' ba, ta'nnë':

—Caní naca, Dios ru'ë lataj bönni' biti' nácagaquië' judío, tu'bí'i ládx'i'gaquië' para ila'déli'në' yöl-la' na'bán idú.

Yugu' bönni' nacu'ë Antioquía ta'yéajlé'ë Cristo

¹⁹ Cate' ni' yugu' bönni' judío biti' ta'yéajlé'ë gulútië' Esteban, en gula'bía ládx'i'gaquië' ia'zíca'rö bönochachi ta'yéajlé' Cristo, bulu'zxunnaj bönochachi ni, en gulásilasi zián yödzö luyú Fenicia, en luyú Chipre, en lu yödzö Antioquía. Gulunë' libán ni' que xtídzë'ë Dios, pero lógacaso bönochachi judío. ²⁰ Yugu' bönni' Chipre, en yugu' bönni' Cirene, gula'cuá'lenë' légaquië', ate' yugu' bönni' ni, cate' bila'dxinë' lu yödzö Antioquía, gulu'ilenë' ca' didza' yugu' bönni' izá'a. Gulunë' libán lógaquië' que didza' dxi'a ca naca queë' Xanru' Jesús. ²¹ Yöl-la' huáca queë' Xanru' guzoalen légaquië', ate' bönochachi zián gula'yéajlé' Xanru', en bulu'huóáca queë'.

²² Cate' bidixín didza' ca guca lë ni, ate' bila'yönnë' bönni' queë' Cristo nacu'ë Jerusalén, gula'söl-lë'ë Bernabé tséajé' Antioquía na'. ²³ Cate' Bernabé na' bidixinë' Antioquía, bilé'enë' le ruzá' ládxë'ë Dios quégagaquië', en budzéjanë'. Guchízië' icja nágagaquië' para ila'díatica'së' queë' Xanru' idú ládx'i'gaquië'.

24 Náquië' Bernabé na' tsahui', en idú zóalenë' Dios Bö' Lá'ayi lë', en idú ládxë' e réajlë' e Cristo. Ni'a que libán bené' Bernabé na', bönachi zián lu yödzö na' gula'yéajlë' Xanru'.

25 Gudödi ni', guyijë' Bernabé na' yödzö Tarso, yöjdiljë' Saulo. Cate' budzölinë' lë', buchë' e lë' Antioquia. **26** Idú ca tu iz gula'cu' e ni', tunë' tsözxön bönachi queë' Cristo, en tu'sédinë' bönachi zián. Lu yödzö Antioquia na', gusí lo gula'zí' lágiquië' cristiano le rnna len didza' xidza': Bönachi Queë' Cristo, nupa ni' ta'yéajlë' Lë'.

27 Dza ni' bila'rúajë' Jerusalén, en yójáquië' Antioquia bal-lë' bönni' tu'ë didza' uláz queë' Dios. **28** Guzuínë' Agabo, bönni' dzáguië' yugu' bönni' na', en uláz queë' Dios Bö' Lá'ayi buzéajni'inë' légaquië', gunnë':

—Si' gaca gubín idútë yödzöli.

Guca gubín na' cate' ni' rinná bë'ë Claudio, lu yödzö Roma. **29** Ní'irö gula'zí' lu ná'agaquí' bönni' ta'yéajlë' e Cristo nacu'ë Antioquia, ila'söl-lë'ë tscal le dësö que queégaquië', le gácalen böch'iru' nacu'ë luyú Judea. **30** Caní gulunë', ate' lë' na' bulu'nödzjë', gula'gu'ë lu ná'agaquí' Bernabé, en Saulo para ilu'ë le lágiquië' bönni' gula tapa chi'ë bönachi queë' Cristo nacu'ë Judea.

12

Tútië' Jacobo, en ta'gu'ë Pedro lidxi guíë

1 Dza na' Herodes, bönni' unná bë', bené' ga gula'zönë' bal-lë' bönni' queë' Cristo para ulu'saca' zi'ë légaquië'. **2** Gunná bë'enë' bönni' gulutíë' Jacobo, böchë' e Juan. Gulu'ë lë' guíë tuchi'. **3** Cate' gúquibe'enë' Herodes gula'yaza ládx'i gaquië' bönni' judío lë' ni, bené' ga gula'zönë' ca' Pedro. Gulaca lë ni dza ni' raca laní cate' tahuë' yöta xtila biti' nazí'i cúa zi que. **4** Gudödi gula'zönë' Pedro, gula'gu'ë lë' lidxi guíë, en bulu'dödë' lë' lu ná'agaquí' tapa cö' bönni' röjáquië' gudil-la, nacu'ë tape' tu huéaj cö' na', para uyúgaquië' lë'. Yu'u ládxë' e Herodes ubéajë' Pedro lógaca bönachi tödi Laní Pascua, laní na' tu'subarë' ca bené' Dios, bubéajë' bönachi judío luyú Egipto. **5** Caní guca, nun chí'igacrë' Pedro lu yu'u lidxi guíë na', pero bönachi queë' Cristo bulu'lídzatica'sö Dios, ta'nábini Dios gácalenë' Pedro.

Dios rubéajë' Pedro lidxi guíë

6 Cate' si' idxín dza yu'u ládxë' e Herodes ubéajë' Pedro lidxi guíë na', la' dzö' ní'isö dë' rásië' Pedro, ate' nacu'ë chopë' bönni' röjáquië' gudil-la cuita lë'ë Pedro na', en núga'gaquië' lë' chopa du guíë. Gula'cu'ë ia'bal-lë' bönni' röjáquië' gudil-la tapa chi'ë ga nu riyaza lidxi guíë na'. **7** Tsálido'os bulu'í lahuë' tu gubáz lá'ayi queë' Xanru' ni', ate' buzení' da' bení' lidxi guíë. Gudanë' gubáz lá'ayi na' cuita lë'ë Pedro, ate' busubanë' lë', en gudxë' lë':

—Guyaschi.

Ní'irö bulu'huédxí du guíë na' naga' ni'a në'ë Pedro. **8** Gubáz lá'ayi na' gudxë' lë', gunnë':

—Béga' lë'u, en gudá' xirachu.

La' bentë' Pedro caní. Ní'irö gubáz lá'ayi na' gudxë' lë', rnnë':

—Guxóa lari' cúuzu'u, en gudá' len nedá'.

9 Burúajë' Pedro, sa'yéajlenë' gubáz lá'ayi na', pero biti' réquibe'enë' nácatë le runë' gubáz lá'ayi na'. Gúquinë' yélaso' rinenë'. **10** Cate' chigula'dödë' ga nacu'ë bönni' zí'alö, en bönni' buropi cö', bönni' na' röjáquië' gudil-la tapa chi'ë, bila'dxinë' ga zoa le néquini guíë le nusayaj ga nu riyaza lidxi guíë

na', ga nu rurúaj la' nöza que yödzö. Ga nu riyaza na', rácasö que guyalaj. Cate' bila'rúajë' ni', gula'zé'ë ga ridzaga ia'turö nöza, ate' ni' gubáz lá'ayi na' la' bulá'alente' Pedro. ¹¹ Ní'irö réquibe'enë' Pedro, ate' lu icja ládxı'da'azé' gunnë':

—Na'a chinözda' le nácatë gusöl-lë'ë Xanru' gubáz lá'ayi queë', en busöle' neda'lu në'ë Herodes, en lu yúgu'te le gulé'ënnë' bönni' judío ilunë' quia'.

¹² Tsanni ni' yu'ë nöza Pedro, riza' ládxë'ë ca naca lë na' guca, ate' bidixinë' lídxinu María, xiná'abi' Juan, bi'i na' zoa ia'tú labi' Marcos. Lu yu'u na' nudúbigaca bönnachi zián ta'yéajë' Cristo, en tu'lidza Dios. ¹³ Cate' bulidzë' Pedro ra' yu'u lö'a, birúajbi' bi'i nigula lëbi' Rode para inözib' nuzxi na'. ¹⁴ Cate' búnbë'ëbi' bi'i nigula ni chi'ë Pedro, lu yöl-la' rudzeja queëbi' biti' gusaljbi' yu'u, pero carelö böajbi' lu yu'u, yöjtixjö'ibì' nupa nacuá' ni', rnñabi':

—Zoë' Pedro ra' yu'u.

¹⁵ Ní'irö gulé'ëbi':

—Nachixi icju'.

Lëbi' tsútsurö ben xtídzabí' naca caní. Ní'irö gula'nnë':

—Caléga lë'. Bixín queë' na'.

¹⁶ Tsanni na' biti' zoa dxíe' Pedro rulidzë' nupa nacuá' lu yu'u. Cate' gula'saljë' yu'u, gula'nítisine' cate' bila'lé'enë' lë'. ¹⁷ Ní'irö guchisa në'ë Pedro para ila'cu'ë dxisö, ate' busiyönnë' légaquië' ca benë' Xanru', bubéajë' lë' lidxi guíë. Ní'irö gudxë' légaquië':

—Guli'siyónnë' ca' Jacobo, en yugu' böchi'ru' ca na' guca.

Ní'irö burúajë' Pedro, sa'yéajë' ga yúbólö.

¹⁸ Cate' za' rení' dza na', bönni' rójáquië' gudil-la gula'bö'ë bönniga nacxi guca, bíti'rö yu'ë Pedro lidxi guíë. ¹⁹ Ní'irö gusöl-lë'ë Herodes nupa tsöjxí'gaca Pedro. Cate' biti' bulu'dzolíne' lë', Herodes gunabi yúdxinë' yugu' bönni' na' rójáquië' gudil-la, bönni' gulún chi'ë Pedro. Gudödi ni' gunná bé'enë' nupa bétigaca yugu' bönni' na' rójáquië' gudil-la. Ní'irö buzë'ë Herodes luyú Judea, sa'yéajë' Cesarea, ate' buga'anë' ni'.

Ca gútië' Herodes

²⁰ Dza ní'isö rilenë' Herodes bönnachi yödzö Tiro, en yödzö Sidón. Zí'alö bönnachi lu xiyúë' Herodes na' gula'söl-la' le biyadzaj quégaca bönnachi lu xiyúgaca yödzö Tiro, en Sidón na', pero tu' rilenë' Herodes légaquië', bíti'rö bi ta'söl-lë'ë quégäquië'. Ní'irö gulunë' tuz bönni' Tiro, en Sidón na', ate' gulunë' ga soë' Blasto unë quégäquië' lahuë' Herodes na'. Náquië' Blasto na' huen dxin nadéli'në' lataj lo lahuë' Herodes. Gulé'ënnë' bönni' Tiro, en Sidón na' ila'dxinë' lahuë' Herodes, para ila'nábinë' lë' ugá'ana tsahui' didza' bizxaj quégäquië'. ²¹ Ní'irö budxíë' bë' Herodes dza yönnë' légaquië', ate' dza na' gurö'ë xilatjë' ga ruchi'a rusörö' bi raca, nácuë' lari' nazaca', en benë' libán lógaquië'. ²² Ní'irö bulu'lidzë' zidzaj bönni' na', ta'nnë':

—¡Caléga bönni'sö ni! ¡Dios caz ni ru'ë didza'!

²³ La' ná'asö la' bë'të' gubáz lá'ayi queë' Xanru' lë' tu' buzi'ë lë cazë' yöl-la' ba ral-la' gaca queë' Dios. Ní'irö gurö'ë Herodes na' buzuga', ate' gútië' tu' táguba' lë'.

²⁴ Ní'irö guca libán que xtídzë'ë Xanru', ate' gula'yán nupa nazi' lu ná'agaca le.

Le zí'alö luzuí rójéngäquië' Bernabé, en Saulo libán

25 Cate' Bernabé, en Saulo chibulu'dödë' dumí na' lu ná'agaquië' bönni' gula tapa chi'ë bönnachi queë' Cristo nacu'ë Jerusalén, bulu'zé'ë ni', yöjhüöjgaquië' yödzö Antioquia. Gula'chë'ë-bi' ca' bi'i Juan, zoa ia'tú labi' Marcos.

13

1 Dza ná'asö gula'cu'ë bönni' tu'ë didza' uláz queë' Dios, en bönni' tu'sédinë' bönnachi lu yödzö Antioquia, tunë' tu zxön bönnachi queë' Cristo lu yödzö na'. Caní lëgaquië':

Bernabé,
Simón, (lë' ca' Bönni' Gasja),
Lucio, (bönni' Cirene),
Saulo,
Manaén, (bönni' na' guzxönlénë' tsözxön Herodes, bönni' rinná bë'ë luyú Galilea).

2 Tsanni ni' nudúbigaquië' bönni' ni queë' Xanru', en tunë' gubasa, Dios Bö' Lá'ayi' gudxë' lëgaquië', rnñë':

—Guli'béaj-gáquië' quez quia' Bernabé, en Saulo para tsójéngäquië' dxin na' bulidza' lëgaquië' ilunë'.

3 Budxi gulunë' gubasa, en gulu'üilenë' Dios didza', ní'irö gula'xóa ná'agaquië' chopë' ni, en gula'söl-lë'ë lëgaquië'.

Yugu' gubáz nasöll-lë'ë Cristo tunë' libán luyú Chipre

4 Ní'irö yöjáquië' Bernabé, en Saulo yödzö Seleucia, tu' gusöll-lë'ë Dios Bö' Lá'ayi' lëgaquië' ni', ate' ni' gula'benë' tu lë'ë barco le guché' lëgaquië' ga naca tu luyú bidxi lu nísado', nazi'i le Chipre. **5** Cate' bila'dxinë' lu yödzö Salamina luyú na', gulu'ü xtídzë'ë Dios gapa naca lu yu'u ga tu'dubë' bönni' judío luyú na', en tu'sédë' queë' Dios. Naché'gaquië' bi'i Juan para gunbi' lëgaquië' tu zxön. **6** Budxi gula'dödë' idú gapa dë yödzödo' luyú bidxi na' lu nisa zxön, ní'irö bila'dxinë' yödzö Pafos. Yöjxáca'gaquië' Barjesús, tu bönni' judío ni'. Náquië' bönni' udzá' rinné yë'ë, en rnñë' ru'ë didza' uláz queë' Dios. **7** Bönni' ni dzáguië' Sergio Paulo, bönni' réajni'i rinná bë'ë. Bönni' unná bë' na' bulidze' Bernabé, en Saulo, tu' rë'ënë' yönnë' xtídzë'ë Dios. **8** Ní'irö bönni' udzá' na' gudá'baguië' Bernabé, en Saulo, tu' gü'unnë' gunë' ga biti' tséajlé'ë Dios bönni' rinná bë'ë. Bönni' udzá' na' lë' ca' Elimas tscá naca xtídzagaca bönnachi izá'a ga na'. **9** Ní'irö Saulo, lë' ca' Pablo, buzóa tsutsu lahuë', zóalenë' Dios Bö' Lá'ayi' lë'. Ruyú' Elimas na' **10** en rë' lë':

—Li, bönni' rizi' yë', en bönni' huiá' dö', nacu' ca zxí'ini caz tu' xihui', en bönni' biti' rilé'enë' dxi'a yúgu'té le naca tsahui'. ¿Naru' cabí soa dxits'o' ca runu', ridá'bagu'u didza' tsahui' queë' Xanru', en ruzágú'u xinöza nu rë'ëni tséajlé' Lé'? **11** Na'a, Xanru' usaca' zi'ë li', ate' ichul-la lo', en biti' ilé'enu' gubidza nababa dza.

La' guchúl-latë lahuë' Elimas na', ate' gudë' nilö ná'alö, riguiljë' nuzxi sön në'ë para iché' lë'. **12** Cate' bilé'enë' bönni' unná bë' na' lë na' guca, bubáninë' ca naca xtídzë'ë Xanru', ate' guyéajlé'ë Cristo.

Le gulunë' Pablo, en Bernabé lu yödzö Antioquia luyú Pisidia

13 Ní'irö buzé'ë Pablo lu yödzö Pafos na' len yugu' bönni' dzágagaquië' lë', nacu'ë tu lë'ë barco, ate' bila'dxinë' yödzö Perge luyú Panfilia. Lu yödzö na' bi'i Juan bulá'alenbi' lëgaquië', en böajbi' Jerusalén. **14** Gudödi ni' bulu'zé'ë Perge na', en yöjáquië' yödzö Antioquia luyú Pisidia. Lu yödzö na', cate' ni' naca dza lá'ayi' quégagaquië' bönni' judío, gula'yázië' lu yu'u ga tu'dubë' tu'sédë'

queé' Dios, ate' lu yu'u na' gula'bó'ë. ¹⁵ Ní'irö tu bönni' zoë' ni' bulabë' guichi ga nazúaj xibá queé' Dios, enca' le nazúaj lu guichi ca gula'nnë' bönni' gulu'ë didza' uláz queé' Dios. Gudödi ni' yugu' bönni' unná bë' que yu'u na' gula'sölle' nu yójödx Saulo, en Bernabé, gunnë':

—Libi'ili', böchi'tu'. Channö nuá'ali' bi innali' le uzéajni'i netu', guli'nnë.

¹⁶ Ní'irö guzuínë' Pablo, en guchisa në'ë para ila'cu'ë dxisö, gunnë':

—Buli'zë nágali' le guía' libi'ili', bönni' Israel, en libi'ili', núloli' rádxili'-në' Dios. ¹⁷ Xanru' Dios, Nu ta'yéaj ládxí'gaca bönnachi Israel, gurö' cazë' xuz xtó'oru', en benë' ga gula'yándë'ë cate' ni' nácagaquië' bönni' zi'tu' luyú Egipto. Len yöl-la' huáca zxön queé' bubéajë' légaquië' luyú ni'. ¹⁸ Idú choá' iz Dios biá' gulénë' quégäquië' cate' ni' gula'dé' idú luyú bidxi lu lataj cá'asö. ¹⁹ Cate' budxi busunítië' gadxi cö' yödözö gula'cuá' luyú Canaán, bunödziej' xiýúgaca bönnachi ni' quégäquië' xuz xtó'oru'. ²⁰ Gudödi ni', le guca idú ca tapa gayua' yu' chi-un iz, Dios bucu'ë yugu' bönni' bulu'chi'a bulu'söröe' légaquië' ga bidxitë zoë' Samuel, bönni' bë'ë didza' uláz queé' Dios. ²¹ Ní'irö gula'nábinë' Dios uzóë' tu bönni' unná bë' quégäquië'. Dios gurö' Saúl, zxí'inë' Cis, bönni' nababë' dí'a dza queé' Benjamín. Idú ca choá' iz gunná bë'enë' Saúl na' légaquië'. ²² Gudödi ni' Dios gudüé' Saúl na', ate' buzöé' David quégäquië' para inná bë'ë. Dios benë' ba nalí queé' David ni, gunnë': "Nözda' runë' David, zxí'inë' Isaí, le raza ládx'a'a, en gunë' yúgu'të le rë'ënda' neda'." ²³ Ladaj zxí'ini xi'sóë' David na' benë' Dios ga guljë' Jesú斯 para gáquië' bönni' usölë' bönnachi Israel, ca na' guzxi' lu në'ë Dios zí'atélö gunë'. ²⁴ Zí'alö cate' si' ilá' lahuë' Jesú斯, benë' Juan libán lógaca yúgu'të bönnachi Israel para ulu'bí'i ládxí'gaca, en ila'dila nisa. ²⁵ Cate' ni' chizóá údxí gunë' libán Juan na', gunnë': "¿Nuzxi réquili' naca' neda'? Biti' naca' Cristo, bönni' na' ral-la' guídë'. ¡Na'a, buli'yútsöa! Chizóë' idixinë' bönni' na' ga zoa' ni, ate' neda' biti' naca' lesaca' ilecja' xiráchuë' nudé'ë."

²⁶ 'Libi'ili', böcha'a, yugu' zxí'ini xi'sóë' Abraham, en núloli' zóali' ni, en rádxili'-në' Dios. Dios caz gusöl-lë'ë queéli' didza' ni para uláli'. ²⁷ Nupa nacuá' Jerusalén, en bönni' ta'nná bë'enë' légaquië' biti' bulu'únbe'ë Jesú斯, en biti' gula'yéajni'inë' le nazúaj lu guichi le gula'nnë' yugu' bönni' gulu'ë didza' uláz queé' Dios, sal-la' tu'laba cazë' yugu' didza' ni yugu' dza lá'ayi. Lu yöl-la' cabí réajni'i quégäquië' gulunë' ga budxín ca rnna didza' ni cate' ni' gula'chuguië' queé' Jesú斯 gátië'. ²⁸ Sal-la' biti' budzöli le nabáguë'ë Jesú斯 gátië', gula'nábinë' Pilato inná bë'enë' bönni' ilútì' Lë'. ²⁹ Cate' budxi gulunë' queé' yúgu'të le nazúaj lu guichi ca ral-la' gaca queé', bulu'zötje' Lë' lë'e yaga cruz, en bulu'cächë'ë Lë' yero ba. ³⁰ ¡Ní'irö Dios busubanë' Lë' lu yöl-la' guti! ³¹ Zián dza bulu'i lahuë' Jesú斯 lógaca nupa yójäcalen Lë' tsözxön cate' ni' buzë'ë luyú Galilea, en bidxinë' Jerusalén. Na'a, yugu' bönni' na' tunë' ba nalí queé' lógaca bönnachi.

³² 'Caní naca, lësca' netu' ni rusiyöntu' libi'ili' didza' dxi'a ca naca lë na' guzxi' lu në'ë Dios gunë' quégäquië' xuz xtó'oru'. ³³ Lë na' guzxi' lu në'ë Dios quégäquië', Lë cazë' benë' ga budxín queéru', nácaru' zxí'ini xi'sóagaquië'. Caní benë' cate' busubanë' Jesú斯. Guca ca na' nazúaj lu guichi ga zoa salmo buropi, le rnna caní: "Li' nacu' Zxí'ina'. Neda' buzóa caza' Li'." ³⁴ Ca naca na', Dios busubanë' Lë' lu yöl-la' guti para cabí initi le naca cazë', Lë cazë' Dios gunnë' caní: "Gunná' quiu' le nácagaca bica' ba guzxi' lu na'a lahuë' David." ³⁵ Que lë ni na' nazúaj ca' lu guichi, ga zoa ia'tú salmo, le rnna caní: "Biti' gu'u lataj ugá'anë' bönni' lá'ayi quiu' ga initi le naca cazë'." ³⁶ Le guca queé' David naca bë'. Gudödi benë' dxin lógaca bönnachi uládz queé', ca na' gunná bë'enë' Dios

lë', ní'irö gútië', ate' gula'gu'ë lë' yeru ba ga nacu'ë xuz xtá'ahuë', ate' guniti le naca cazë'. ³⁷ Na'a, ca naca queë' Jesús na', Dios busubanë' Lë', ate' biti' guniti le naca cazë' lu yeru ba. ³⁸ Libí'ili', böcha'a, ral-la' inözili' lë ni rusiyöntu' libí'ili'. Dios runiti lahuë' libí'ili' ca naca dul-la' nabágali' ni'a que le bene' Jesús ni. ³⁹ Na'a, Dios ruúnë' tsahui' yúgu'të nupa ta'yéajlé' Jesús, rugüë' yugu' dul-la' na' le cabí guca ugúa xibá queë' Dios, le bë'ë Moisés. ⁴⁰ Guli'gún chi'i cuinli' na'a para cabí gaca queëli' le nazúaj lu guichi le gula'nnë' bönni' gulu'ë didza' uláz queë' Dios, le rnna caní:

⁴¹ Buli'yútsöca', libí'ili', bönni' cabí tunë' neda' bal.

Ubánili', pero lu yöl-la' cabí réajlé' queëli' gátili'.

Neda' guna' tu dxin dza ni zóali',

en sal-la' nu ulu'i libí'ili' le rulu'i dxin na', biti' ca' tséajlé'ëli'.

⁴² Cate' bulu'rúajë' Pablo, en yugu' bönni' na' dzágagaquië' lë' lu yu'u ga na' tu'dubë' bönni' judío, en tu'sëde' queë' Dios, ní'irö böñachi ni' guláta'yu lógaquië' ulu'sédine' légaquië' ca naca lë ni cate' idxín ia'tú dza lá'ayi quégagaquië'. ⁴³ Cate' ni' bulu'rúajë' lu yu'u na' bönni' nudúbigaquië' ni', zián bönni' judío, en bönni' nuhuoácagaquië' judío, yugu' bönni' ta'yéaj láx'i'gaquië' Dios, gulunë' tsözxón Pablo, en Bernabé. Chopë' ni gului'ilenë' légaquië' didza', en bulu'së'ë láx'i'gaquië' para ilácatica'së' tsutsu, ilunë' löza le ruzá' ládxë'ë Dios quégagaquië'.

⁴⁴ Ia'xunu' gubidza ca' cate' bidxín ia'tú dza lá'ayi quégagaquië', bulu'dubë' látu'biqu' yúgtut böñachi lu yödzö na' para ila'yönnë' xtídzë'ë Dios. ⁴⁵ Ní'irö bulu'zxé'enë' bönni' judío biti' ta'yéajlé'ë, cate' bila'lé'enë' böñachi zián na', ate' gula'nnë' que didza' ru'ë Pablo, en gula'dá'báguë'ë le. ⁴⁶ Ní'irö lu yöl-la' rugu ladxi' quégagaquië' Pablo, en Bernabé, gulë' yugu' bönni' judío na', ta'nnë':

—Ben bayudxi usiyöntu' libí'ili' zí'alö xtídzë'ë Dios, pero tu' rucá'analí' cásö didza' ni, en rusáca'li' queëli' biti' nácali' lesaca' sí'ili' yöl-la' na'bán idú ni, que lë ni na', na'a uyéajtu' ga nacuá' böñachi izá'a. ⁴⁷ Léscá' caní gunná bë'enë' Xanru' Dios netu' guntu' libán queë' Cristo lógaca böñachi izá'a, en naca ca rnna didza' na' bë'ë Dios ca naca queë' Cristo, gunnë':

Nuzó'a Li' para gacu' bení quégaca böñachi izá'a,

en gacu' Nu usólä böñachi idútë yödzölió.

⁴⁸ Cate' bila'yöni böñachi izá'a nacuá' ni' didza' ni, bulu'dzéjanë', en gula'gu'ë Xanru' yöl-la' ba ni'a que xtídzë'ë, yúgu'të nupa ni' chinunë' Dios quéguequi gata' quéguequi yöl-la' na'bán idú. ⁴⁹ Caní guca, guzë xtídzë'ë Xanru', ate' bila'yöni böñachi yúgu'të yödzö nacuá' luyú ni'. ⁵⁰ Ní'irö bönni' judío biti' ta'yéajlé'ë na' gula'gú'u yöl-lë'ë yugu' bönni' lo que yödzö ni' para cabí ila'lé'enë' dxi'a Pablo, en Bernabé. Léscá' caní gula'gú'u yöl-lë'ë nigula lo ta'yéaj láx'i'nu Dios. Caní guca, gulunë' ga gula'bía láx'i'gaquië' Pablo, en Bernabé, ate' bulu'láguë' chopë' ni ní'ilö lu xiyúgaquië'. ⁵¹ Ní'irö Pablo, en Bernabé bulu'quínnajë' yu bëchtö da' la' lábaguquië' le rulu'i nagá'ana xiguia' nabága'gaca böñachi lu yödzö na', ate' yöjáquië' lu yödzö Iconio. ⁵² Bulu'dzéjanë' bönni' yödzö Antioquia na', bönni' ta'yéajlé'ë Xanru', ate' guzóalenë' Dios Bö' Lá'ayi légaquië'.

14

Le gulunë' Pablo, en Bernabé luyödzö Iconio

¹ Cate' bila'dxinë' Pablo, en Bernabé yödzö Iconio, gula'yu'ë tsözxön lu yu'u ga tu'dubë' bönni' judío, en tu'sëdë' queë' Dios, ate' gulu'ë didza' ni'. Caní guca, zián böñachi judío, enca' zián böñachi izá'a gula'yéajlé' Cristo. ² Ní'irö bönni' judío biti' ta'yéajlé'ë gula'gú'u yöl-lé'ë bal-lé' bönni' izá'a, para cabí ila'lé'enë' dxi'a böchí'ru' ta'yéajlé'ë Cristo. ³ Tu' gula'yéajlé' böñachi zián na' Cristo, gula'cu'ë Pablo, en Bernabé ni' zián dza, ate' lu yöl-la' rugu ladxi' gulu'ë xtídzë'ë Dios, tu' tu'zxöni ládx'i'gaquië' Xanru'. Lë cazé' Xanru' bulu'e naca idútë li didza' tu'ë ca naca le ruzá' ládxë'ë Dios quégaca böñachi, tu' bë'ë légaquië' lataj gulunë' yugu' le taca bë', en le tun ga tu'bani böñachi. ⁴ Ní'irö böñachi lu yödzö na' bila'rúaj choplö. Bal-lé' gula'dé'ë bönni' judío biti' ta'yéajlé'ë, ate' ia'bal-lé' gula'dé'ë Bernabé, en Pablo, gubáz na' nasöl-lé'ë Cristo. ⁵ Ní'irö bönni' judío biti' ta'yéajlé'ë na', en yugu' bönni' izá'a ni' gulunë' tuz bönni' ta'nná bé'enë' légaquië', ate' bulu'dubë' para ilu'ë dö' quégagaquie' gubáz na' nasöl-lé'ë Cristo, en ulu'ladxë' légaquië' guiój. ⁶ Cate' téquibe'enë' Pablo, en Bernabé lë ni, bulu'zxúnnaej'ë ni', yójáquië' yödzö Listra, en Derbe luyú Licaonia, ate' gula'dödë' yugu'të yödzödö' idú gásibi'ilö ni', ⁷ gapa ni' gulunë' libán que didza' dxi'a ca naca queë' Cristo.

Tu'ladxë' Pablo guiój lu yödzö Listra

⁸ Zoë' tu bönni' lu yödzö Listra biti' raca së'ë. Rö'ösë' ni' tu' cabí rizë'ë cate' ni' guljë', en catu caz guzë'e ni'ë. ⁹ Bönni' ni ruzë náguië' didza' ru'ë Pablo. Pablo buyúe' lë', en gúquibe'enë' réajlé'ë Cristo para huóáquië'. ¹⁰ Ní'irö Pablo bë'ë zidzaj didza', en rë' lë':

—Guzuí.

La'guxítë' bönni' na', en guzë'e ni'ë. ¹¹ Cate' yugu' bönni' Listra bila'lé'enë' lë na' benë' Pablo, gula'sí lógaquië' tu'ë zidzaj didza' lu didza' tu'ë bönni' Licaonia na', ta'nnë':

—¡Yugu' dios bönni' ni! ¡Nuhuötjagaquië' ga zóaru', en tu'lu'i cuíngagaquie' ca nácagaquie' bönni'!

¹² Gula'nnë' Bernabé na' náquië' Júpiter, ca lë' dios lo quégagaquie', ate' gula'nnë' náquië' Pablo Mercurio, ia'tú dios quégagaquie'. Caní gula'nnë' tu'ru'ë didza' Pablo ca na' ta'nnë' runë' Mercurio na'. ¹³ Zoa yudo' que Júpiter ga ni' nacu'ë, cuita nöza ga ni' ta'yaza böñachi lu yödzö na'. La' bidxitxé' bixúz que Júpiter na', naché'-ë'-ba' yugu' bëdxi, en nu'ë ca' yugu' bregui' yöj, ate' dzágagaca böñachi zián lë'. Gulé'ennë' ilútië'-ba' bëdxi na' lógaquië' Pablo, en Bernabé para ila'yéaj ládx'i'gaquië' légaquië' ca tunë' quégaca dios quégagaquie'. ¹⁴ Cate' Bernabé, en Pablo, gubáz na' nasöl-lé'ë Cristo, guléquibe'enë' lë ni', gula'chözë' lari' nácagaquie'. Tu'hu'i'ininë' tu' tunë' bönni' ni le cabí ral-la' ilunë', ate' gula'xítë'ë, en yöjcü'ë gatsaj láhu'lö böñachi zián na', en gulu'ë zidzaj didza', té' légaquië':

¹⁵ —¡Libí'ili' böñachi! ¿Bizz que runli' caní? Lësca' bönni' ca libí'ili' nácatu', en riguixjö'i'itu' libí'ili' lë ni caz ral-la' ucá'anali', le cabí nácatë, para guéquili' queë' Dios ban. Dios ni benë' lúzxiba, en yödzölió, en nísado', en yugu'të le nacuá' tu tu lataj na'. ¹⁶ Yugu' iz chigula'dödi, gulún yugu'të böñachi ca rmnasö que queëguequi, ate' Dios biti' buzágue'ë xinözguequi, ¹⁷ pero benë' ga gulaca le tun ba nalí queë', yugu' le nácagaca dxi'a benë' quégagaquie'. Risö'l-lé'ë queëru' nisa guiój, en runë' ga ta'yán le rázaru'. Ruzolaj rudzé'enë' rë'u, en runë' ga rudzeja ládx'i'ru'.

¹⁸ Sal-la' Bernabé, en Pablo gulé' léraquië' caní, cánnisö bila'déli'në' bulu'zágue'ë xinözguequi bönachi zián na', para cabí ilútië'ba' bëdxi na' lógaquië'.

¹⁹ Ní'irö bal-lé' bönni' judío biti' ta'yéajlë'ë, narúajgaquië' Antioquía, en Iconio, bila'dxinë' ni', ate' gula'gú'u yöl-lé'ë bönachi zián na'. Ní'irö yúgu'të' bulu'ladxë' Pablo guiój, en gula'ayojë' le' ní'ilö ra' yödzö na', tu' téquinë' chinatië'. ²⁰ Ní'irö bulu'dubë' yugu' bönni' ta'yéajlë'ë Cristo idú gásibi'ilö ga dé' Pablo. Guyasë' le', en buázië' lu yödzö na'. Cate' za' rení' ia'tú dza, burúajlenë' Bernabé, yójáquië' yödzö Derbe.

²¹ Lu yödzö ni' gulunë' libán que didza' dxia'ca naca queë' Jesucristo, ate' bönachi zián ni' gula'yéajlë'ë Cristo. Gudödi ni' yójhuöjgaquië' Listra, en Iconio, en Antioquía. ²² Cate' gula'dödë' Bernabé, en Pablo yugu' yödzö na', bulu'tipë' ládx'i'gaquië' bönni' ni' ta'yéajlë'ë Cristo, en bulu'se'ë ládx'i'gaquië' ulu'gá'anë' tsutsu ca na' ta'yéajlë'ë Lë'. Gulé' léraquië':

—Rë'u tsaza cázaru' ga rinná bë'ë Dios, run bayudxi qui'i sáca'ru' zián le gaca queérnu'.

²³ Bulu'cu'ë yugu' bönni' gula ilún chi'ë bönachi queë' Cristo tu cö' huéaj bönachi ni' queë' Cristo. Cate' chigulu'üilenë' Dios didza', en gulunë' gubasa, ní'irö gula'gu'ë léraquië' lu në'ë Xanru', Nu na' ta'yéajlë'ë.

Pablo, en Bernabé tu'dxinë' Antioquía luyú Siria

²⁴ Ní'irö Pablo, en Bernabé gula'dödë' luyú Pisidia, ate' bila'dxinë' luyú Panfilia. ²⁵ Budxi gulunë' libán que xtídzë'ë Cristo lu yödzö Perge, yójáquië' yödzö Atalia. ²⁶ Bulu'zé'ë ni', ate' gula'benë' tu'lé'ë barco, en bulu'dxinë' yödzö Antioquía, ga na' nacu'ë bönni' queë' Cristo, bönni' na' gula'söll-lé'ë léraquië' tsójengaquië' libán, cate' ni' gula gu'ë léraquië' lu në'ë Dios, Nu na' ruzá' ladxi' quégäquië' ilunë' xichinë', dxin na' chibudxi gulunë'. ²⁷ Cate' ni' bulu'dxinë' Antioquía, bulu'dubi bönachi queë' Cristo nacu'ë ni'. Ní'irö Pablo, en Bernabé bulu'siyönnë' léraquië' ca nácgaga le zxön benë' Dios lu ná'agaquië', enca' ca benë' Dios, bë'ë yugu' bönachi izá'a lataj ta'yéajlë' ca Lë'. ²⁸ Pablo, en Bernabé bulu'gá'analene' bönachi ni' ta'yéajlë'ë Cristo zián dza.

15

Tu'dubë' huen dxin queë' Cristo lu yödzö Jerusalén

¹ Ní'irö bal-lé' bönni' narúajgaquië' luyú Judea bila'dxinë' yödzö Antioquía, ate' bulu'sédinë' böchi'ru', bönni' izá'a ni', ta'nnë':

—Channö cabí irugu lu xipéla'li' ca nalébitu' runtu' ca na' gunná bë'ë Moisés, biti' gaca uláli'.

² Ní'irö Pablo, en Bernabé gula'díll-lalenë' léraquië' didza', ate' gúcada' dzatsa. Gudödi ni', gula'böë' Pablo, en Bernabé len ia'bal-lé'ë bönni' böchi'ru' ni', para tsójäquië' Jerusalén, en ila'dxinë' lógaquië' gubáz ni' queë' Cristo, enca' lógaquië' bönni' gula tapa chi'ë bönachi queë' Cristo ni', para ilu'üilenë' léraquië' didza' ca naca lë ni raca, tu'sédinë' bönni' na' bönachi le nachixi.

³ Ní'irö yugu' bönni' queë' Cristo nacu'ë Antioquía bulu'gu'ë léraquië' nöza, ate' gula'dödë' lu xiyú yödzö Fenicia, en luyú Samaria, ate' bulu'siyönnë' böchi' luzá'aru' yugu' lataj ni' ca guca, bulu'huóäquië' bönni' izá'a queë' Cristo. Lë ni ben ga bulu'dzéjanë' yúgu'të böchi' luzá'aru' ni'.

⁴ Cate' bila'dxinë' Pablo, en Bernabé lu yödzö Jerusalén, yugu' bönni' queë' Cristo nacu'ë ni', enca' yugu' gubáz nasöll-lé'ë Lë', en yugu' bönni' gula tapa

chi'ë gulunë' légaquië' bal. Pablo, en Bernabé bulu'siyönnë' légaquië' yúgu'të le benë' Dios lu ná'agaquië'. ⁵ Ní'irö gula'zuínë' bal-lë' bönni' yudo' fariseo, bönni' ta'yéajlë'ë Cristo, en ta'nnë:

—Run bayudxi irugu lu xipélä'gaquië' bönni' izá'a na' ta'yéajlë'ë Cristo, en inná bë'eru' légaquië' ilunë' ca rnna bë' xibá queë' Moisés.

⁶ Ní'irö bulu'dubë' gubáz nasö'l-lë'ë Cristo len bönni' gula tapa chi'ë böñachi queë', para ulu'chi'a ulu'söröë' lë ni raca. ⁷ Gudödi gulu'ë zián didza', guzuínë' Pedro, en gudxë' légaquië':

—Libi'ili', böcha'a. Nöz quézili' ca guca dza ni'te, Dios gurö cazë' neda' para guna' libán lógaca böñachi izá'a para ila'yöni didza' dxi'a, en ila'yéajlë' Cristo. ⁸ Dios, Nu nunbë' caz le yu'u icja ládx'i do'gaca böñachi, buzóë' le naca bë' runë' légaquië' bal, gusö'l-lë'ë Dios Bö' Lá'ayi quégaquië', ca na' gusö'l-lë'ë Lë' queëru'. ⁹ Biti' butsë'ë ca benë' quégaquië', en queëru', en lëscá' bunë' dxi'a icja ládx'i do'gaquië' tu' ta'yéajlë'ë Cristo. ¹⁰ Na'a, ¿bizx que run leli'në' Dios, rusubág'a'li' yua' xiyéngaca böchi' luzá'aru'? Yua' ni, le naca le ta'nná bë' xibá queë' Moisés, biti' guca guá'aru' rë'u, en biti' guca ilu'ë xuz xtó'oru' le. ¹¹ Rë'u ni, réajlë'ëru' nuláru' ni'a que le buzá' ládxë'ë Xanru' Jesúz queëru', en ca na' nuláru' rë'u, ulu'lë' ca' légaquië'.

¹² Cate' budxi bë'ë Pedro didza' ni, yúgu'të' gula'cu'ë dxisö, ate' bulu'zë nágagaquië' didza' gulu'ë Bernabé, en Pablo. Bulu'siyönnë' légaquië' yugu' le taca bë', en le tun ga tu'bani böñachi, yugu' le benë' Dios lu ná'agaquië' ga nacuá' böñachi izá'a. ¹³ Cate' Bernabé, en Pablo budxi gulu'ë didza' ni, bubi'ë didza' Jacobo, gunnë':

—Libi'ili', böcha'a. Buli'zë nágali' le guía' libi'ili'. ¹⁴ Simón Pedro chigudíxjö'i quézinë' rë'u ca benë' Dios, bulu'e lahui yöl-la' huáca queë' le zí'alö luzuí lógaca yugu' böñachi izá'a para bubéajë' quez queë' böñachi nútса'gaca ládjagaquië'. ¹⁵ Ca naca lë ni röjlözgaca xtídz'gaquië' bönni' gulu'ë didza' uláz queë' Dios, ca na' nazúaj lu guichi lá'ayi, rnna:

¹⁶ Dza tödi lë ni huöda', en uchisa' Nu inná bë', bönni' na' tsázië' xilatjë' David.

Guna' ca run nu ruchisa tu yu'u naguinnaj.

Uchisa' ca' böñachi ila'cuá' lidxë', nupa nagá'anagaca.

Guna' ca run nu ruchisa tu zö'ö yexu'.

Caní uchisa' le gunná bë'ë David

¹⁷ para ulu'guilaj ia'zíca'rö böñachi Xanru'.

Ulu'guilaj böñachi izá'a Lë',

ate' si' láguequei: Bönachi Queë' Dios.

¹⁸ Caní rnnë' Xanru',

Nu na' dza ni'te ben ga naca bë' yúgu'të lë ni.

¹⁹ 'Que lë ni na' runi neda' biti' ral-la' gun níguiru' böñachi izá'a, nupa tu'huöáca queë' Dios. ²⁰ Ral-la' uzúajru' lu guichi quégaquië' ulu'cá'anë' yugu' le biti' ral-la' ilahuë', le nadödi lógaca budö' guiöj budö' yaga, en cabí ilunë' le ruá' dö', en cabí ilahuë' xipélä'gacaba' bö'a' guixi' biti' narúaj-gácaba' rön, en cabí ilahuë' xichönba' bíti'tës bö'a' guixi'. ²¹ Dza ni'te nacuá' yúgu'të yödöö nupa tun libán lu yu'u gapa tu'dubë' bönni' judío, en tu'sëdë' queë' Dios. Tunë' libán ni' que le buzúajë' lu guichi Moisés. Tu'laba cazë' le yugu' dza lá'ayi.

²² Ní'irö gula'yaza ládx'i'gaquië' gubáz nasö'l-lë'ë Cristo, en bönni' gula tapa chi'ë, en yúgu'të böñachi queë' Cristo, ila'böë' bal-lë' bönni' ládjagaquië', en ila'sö'l-lë'ë légaquië' Antioquía. Tsójácalenë' Pablo, en Bernabé. Chopë' na'

gula'böé', lëgaquië' Judas, zoa ia'tú lë' Barsabás, enca' Silas. Nácagaquië' bönni' lo ládjagaquië' böchi'ru' ni'. ²³ Bulu'zúajë' lu guichi le bulu'dödë' lu ná'agaquië' ilu'ë, le rnna caní:

"Netu', gubáz nasöl-lé'ë Cristo, en bönni' gula tun chi'ë, en yugu' böchi'ru', rugápatu' libi'ili' Dios, böchi'tu', nácali' bönachi izá'a zóali' Antioquía, en yugu' yödzö luyú Siria, en Cilicia. ²⁴ Biyönitu' ca tun bal-la bönachi bila'rúaj ga zóatu', nupa na' biti' nasöl-la'tu'. Dutsá'agaquië' libi'ili' len le ta'nnë', en tu'bequi böniga icja ládx'i do'oli', tu' ta'nna bë'ë irugu lu xipéla'lli', en gunli' ca rinná bë' xibá queë' Moisés. ²⁵ Que lë ni na' guyaza ládx'i tu' cate' chibén tuz xtídza'tu', gurötu' chopë' bönni', nupa isöl-la'tu' para uduyúgaquië' libi'ili'. Guídlenaquië' Bernabé, en Pablo, nupa na' nadxi'iru'. ²⁶ Chiyojáquië' Bernabé, en Pablo gapa guzóá bönadxi ilátië' tu' nadxi'iguequiné' Xanru' Jesucristo. ²⁷ Caní naca, risöl-la'tu' Judas, en Silas ga zóali'. Chopë' ni ulu'siyönnë' libi'ili' lë ni ruzúajtu' lu guichi ni. ²⁸ Dios Bö' Lá'ayi bulu'iné' netu' le raza ládxë'ë, en lësca' caní raza ládx'i tu' netu', biti' usubágårötu' libi'ili' yua', le naca le rinná bë' xibá queë' Moisés, pero yugu' lë nisö run bayudxi gunli':

²⁹ Biti' gáguli' le nadödi lógaca budó' guiój budó' yaga.

Biti' gáguli' rön.

Biti' gáguli' xipéla'gacaba' böa' guixi' biti' narúaj-gácabá rön.

Biti' gunli' le ruá' dö'.

Channö gun chi'i cuinli' para gunli' ca rnna yugu' lë ni, gunli' dxi'a."

³⁰ Caní guca, yugu' bönni' na' nasöl-la'gaquië' bila'dxiné' Antioquía. Bulu'tubé' bönachi queë' Cristo nacuá' ni', ate' gula'gu'ë guichi na' lu ná'agaquië'. ³¹ Cate' chibudxi bulu'labë' le, bulu'dzéjanë' ca naca le nazúaj lu guichi na', le ruhuë tsahui' légaquië'. ³² Tu' nácagaquië' Judas, en Silas bönni' tu'ë didza' uláz queë' Dios bulu'huë tsahui'ë légaquië', en bulu'tipe' ládx'i gaquië' böchi'ru' ni', bulu'gunë' dxin didza' zián le gului'lenë' légaquië'. ³³ Gudödi bulu'dzénë' Judas, en Silas ni' nababa dza, ní'irö böchi'ru' ni' bulu'zenë' légaquië' dxi'a didza' para tsöjhuöajgaquië' Jerusalén ga nacu'ë bönni' gula'sól-lë'ë légaquië'. ³⁴ Guyaza ládxë'ë Silas bugá'anë' Antioquía. ³⁵ Bulu'gá anë' ca' Pablo, en Bernabé Antioquía na', ate' bulu'sédinë' bönachi, en gulunë' libán que xtídze'ë Xanru'. Lësca' caní gulún ziánrö ca' bönachi.

Risí lahuë' Pablo röjenë' libán le buropi luzuf

³⁶ Gudödi nababa dza Pablo gudxë' Bernabé:

—Uyéajru' leyúbölö tsöjyúgacaru'-në' böchi'ru' nacu'ë yúgu'te yödzö gapa chiyöjenru' libán que xtídze'ë Xanru', para ilé'eru' nacxi raca quégaquië'.

³⁷ Gú'unne' Bernabé ila'chë'ë-bi' bi'i Juan Marcos, tséajlenbi' légaquië', ³⁸ pero biti' guyaza ládxë'ë Pablo ila'chë'ë-bi' tséajlenbi' légaquië' tu' bulá'alenbi' légaquië' luyú Panfilia, en bíti'rö yöjénlenbi' légaquië' dxin queë' Xanru'. ³⁹ Biti' guca tuz xtídza'gaquië' Bernabé, en Pablo ga bidxitnë bulu'lá'alenë' tuë' ia'túë'. Bernabé guchë'ë-bi' bi'i Marcos, ate' gula'benë' tu lë'ë barco, yöjáquië' luyú Chipre. ⁴⁰ Pablo guröë' Silas para tséajlenë' lë'. Ní'irö yugu' böchi'ru' gula'gu'ë légaquië' lu në'ë Xanru', en gula'nábinë' Lë' uzá' ládxë'ë quégaquië', ate' bulu'zë'ë Pablo, en Silas ni'. ⁴¹ Gula'dödë' yugu' yödzö luyú Siria, en Cilicia, ate' bulu'tipe' ládx'i gaca bönachi queë' Cristo nacu'ë' ni'.

16

Bi'i Timoteo runbi' tsözxön Pablo, en Silas

¹ Gudödi ni' bila'dxinë' Pablo, en Silas yödzö Derbe, en yödzö Listra. Zóabi' tu bi'i bönni' ni', réajlë'ëbi' Cristo, lëbi' Timoteo. Nácabí' zxi'ininu tu nigula judío réajlë'ënu Cristo, pero xúzibi' biti' náquië' judío. ² Yugu' böchi'ru' nacu'ë Listra, en Iconio tunë' ba nalí queëbi', ta'nnë' runbi' le naca dxi'a. ³ Gú'unne' Pablo tséajlenbi' bi'i ni lë, ate' gudéle'ë-bi', en guchúguië' lu xipéla'bí' ca tun bönachi judío. Caní benë' para cabí ila'nnë' queëbi' bönni' judío nacu'ë yugu' yödzö ni', tu' nöziguequinë' yúgu'të' xúzibi' biti' náquië' judío. ⁴ Cate' Pablo, en nupa dzágagaca lë' gula'dödë' gapa nacu'ë yödzö ni', tu tu yödzö na' bulu'dödë' lu ná'agaquïë' yugu' böchi'ru' nacu'ë gapa ni' yugu' xibá na' gulunë' gubáz nasöl-lë'ë Cristo, en bönni' gula tapa chñ'ë bönachi queë', nacu'ë Jerusalén. Bulu'dödë' yugu' xibá ni lu ná'agaquïë' para ilunë' ca rinná bë' xibá na'. ⁵ Caní guca, bönachi yúgu'të cö' bönachi queë' Cristo bila'dipa ládxigaca ca naca le réajlë'ëru' Cristo, ate' gula'yán tu tu dza.

Tu bönni' Macedonia rulidzë' Pablo lu yëla bëchigal

⁶ Pablo, en bönni' dzágagaciü' lë' gula'dödë' luyú Frigia, en luyú Galacia, tu' buzágue'ë Dios Bö' Lá'ayi xinözgaquïë', para cabí ilunë' libán que xtídzë'ë Xanru' luyú Asia. ⁷ Cate' bila'dxinë' luyú Misia, gulé'ënnë' tsöjáquië' luyú Bitinia, pero Dios Bö' Lá'ayi, Nu risöl-lë'ë Jesús queéreru', biti' bë'ë légaquïë' lataj. ⁸ Ní'irö gula'dödë' gala' ga dë Misia, ate' yöjáquië' lu yödzö Troas. Neda' Lucas, ruzúaja' lu guichi lë ni, guzóa' Troas na', ate' yöjsóaleña'-në' Pablo. ⁹ Lu yödzö ni' Dios bulu'i inë' Pablo tu le bilé'enë' lu yëla bëchigal. Tu bönni' Macedonia bulu'i lahuë' lë', zuíne', en ráta'yuë' lahuë' Pablo, rnne': "Gudödi ladztu', lu xiyú Macedonia, en gúcalen netu'." ¹⁰ Cate' bilé'enë' Pablo lë ni, lë na' bulu'i lahuë' lë', la' bë' ládxitétu' tséajtu' luyú Macedonia, tu' gúquibe'etu' Dios chibulidzë' netu' tsöjentu' libán que didza' dxi'a lögaca bönachi luyú ni'.

Le gulunë' Pablo, en Silas lu yödzö Filipos

¹¹ Ní'irö gurentu' lë'e barco, en buzá'atu' Troas. Gudöditu' lirá ga bidxintu' yödzö Samotracia, ate' gudödi ia'tú dza bidxintu' yödzö Neápolis. ¹² Buzá'atu' ni', ate' bidxintu' Filipos, yödzö na' nácarö lo ca yúgu'të yödzö nabábagaca tsólá'a ni' luyú Macedonia. Lu yödzö ni' yugu' bönni' Roma nucuá'agaquïë' bönachi uládz quégäquïë'. Lu yödzö nisö guzoatu' nababa dza. ¹³ Cate' bidxín tu dza lá'ayi, birúajtu' lu yödzö, en guyéajtu' ra' yegu ga na' tu'dubi caz bönachi yödzö na', en tu'lidza Dios. Gurö'ötü' ni', en busiyöntu' yugu' nigula nudúbigacanu ni' ca naca xtídzë'ë Xanru'. ¹⁴ Nútsa'nu lädjagacanu Lidia, tu nigula Tiatira. Nácanu nigula rúti'nu lari' xiná chul-la le nazáca'da'. Reaj ládx'nu Dios, ate' buzé' náganu didza' ru'ë Pablo, ate' Xanru' gúcalenë'-nu para guzxi' lu ná'anu didza' na' bë'ë. ¹⁵ Ní'irö bidílanu lënu nisa, ate' gula'dila ca' nisa bönachi nacuá' lídxinu. Gudödi ni' gúta'yunu lotu', gunnánu:

—Channö réquibe'eli' réajlë' a Xanru', guli'tsaza lidxa', en guli'soa ni'.

Bennu bayudxi ugá'anatu' ni'.

¹⁶ Ia'tú le guca tu dza tsanni ni' zéajtu' ga na' rulidztu'-në' Dios, birúajbi' dutsgabí' tu bi'i nigula netu' yu'u lëbi' bö' le run ga rinnë' yá'abi'. Len yö'l-la' rinnë' ya'a queëbi' runbi' ga ta'zí'dë' dumí yugu' bönni' xanbi'. ¹⁷ Bi'i nigula ni sudunóbi'-në' Pablo, en netu', rui'ibi' zidzaj didza', rnnaibi':

—¡Yugu' bönni' ni tunë' xichinë' Dios nayépisëtëre! ¡Tu'siyönnë' libí'ili' naca gaca uláli'!

¹⁸ Caní benbi' zián dza. Cate' bíti'rö guyaza ládxë'ë Pablo, buécjë', en bulidzë' bö' na' yu'u lëbi', rnnë'ë:

—Lu Lë' Xanru' Jesucristo, rinná bé'eda' li'. ¡Burúaj icja ládx'i'do'obi' bi'i nígula ni!

La' ní'isö burúajtë bö' na'.

¹⁹ Cate' bila'lé'enë' xanbi' chiburúaj bö' na' run ga rinnë yá'abi', en bíti'rö naca löza ila'zi'ë dumí ni'a queëbi', que lë ni na' gula'zönë' Pablo, en Silas, ate' gula'chë'ë légaquië' lógaquië' bönni' yúlahui', nudúbigaquië' ga naca lu yë'ëyi.

²⁰ Bulu'cu'ë légaquië' lógaquië' bönni' yúlahui' na', ta'nnë'ë:

—Yugu' bönni' ni nácagaquië' judío, en tunë' ga tu'tsatsa böñachi yödzö ni.

²¹ Tu'sédinë' le cabí ral-la' si' lu ná'aru', en biti' ral-la' gunru', tu' nabábaru' Roma.

²² Ní'irö böñachi zián ni' gula'dá'baga' Pablo, en Silas, ate' yugu' bönni' yúlahui' gula'nná bé'enë' nupa gula'lecja lari' nácagaquië' Pablo, en Silas, ate' gula'guinë' légaquië' gubá'ayi. ²³ Gudödi gula'guindë'ë légaquië', gula'gu'ë légaquië' lidxi guié. Gula'nná bé'enë' bönni' rusayjë' lidxi guié na' gun chí'idë'ë légaquië'. ²⁴ Bönni' ni, cate' chigula'nná bé'enë' lë' caní, gulu'ë légaquië' lu yu'u lë'e dxí' lidxi guié na', en gulu'ë ní'agaquië' yero yaga ta'zön ni'agaquië'.

²⁵ Idú guluhuëla Pablo, en Silas tu'lidzë' Dios, en tul-lë' yöl-la' ba queë' Dios, ate' ta'yönnë' yugu' bönni' nadzúngaquië' lidxi guié na'. ²⁶ Ní'irö tsálido'os gudödi budó' zxu' bach. Caní guca ga bidxintë guzxizi xilibi zö'ö lidxi guié na', ate' la' gula'yáljatë yúgu'të gapa nu riyaza, ate' bulu'huédxì ca' yugu' du guié nága'gaca bönni' nadzúngaquië' ni'. ²⁷ Bubanë' bönni' na' rusayjë' lidxi guié. Cate' bilé'enë' nayáljagaca gapa nu riyaza lidxi guié na', gulecjë' guié tuchi' queë' para guti cuiné', tu' réquinë' chibulu'zxúnnaejë' bönni' nadzúngaquië' lidxi guié na'. ²⁸ Ní'irö Pablo zidzaj bulidzë' lë', gunnë':

—Biti' bi góni cuinu', tu' zóatu' ni yúgu'tetu'!

²⁹ Ní'irö bönni' na' gunabé' guí', ate' gudá'atë' lu yu'u lidxi guié na'. Guzxízidë'ë lu yöl-la' radxi, ate' biyéchuë' xin'agaquië' Pablo, en Silas. ³⁰ Cate' chinubéajë' légaquië' lidxi guié na', gudxë' légaquië':

—Libi'ili', bönni', ¿bizxi ral-la' guna' para ulá'?

³¹ Légaquië' të' lë':

—Guyéajlë'ë Xanru' Jesucristo, ate' uló' li', en lësca' caní ulu'lágaca böñachi nacuá' lidxu'.

³² Gului'ilenë' lë' didza' ca naca xtídzë'ë Xanru', dzágagaca lë' yúgu'të böñachi nacuá' lidxë'. ³³ La' ná'asö, ni' naca chí'i dzö'ölö la' guchë'të' légaquië', ate' yöjtibë' légaquië' ga dxíagaquië' huë'. Gudödi ni', la' bidílate' nisa, ate' gula'dila ca' nisa yúgu'të böñachi nacuá' lidxë'. ³⁴ Ní'irö guchë'ë légaquië' lidxë', en bë'ë le gulahuë'. Rudzéjanë' lë', en tu'dzeja ca' yúgu'të böñachi nacuá' lidxë' tu' ta'yéajlë'ë Dios.

³⁵ Cate' za' rení' dza na', yugu' bönni' yúlahui' gula'sól-lë'ë ni'a ná'agaquië', ate' gulé' bönni' na' rusayjë' lidxi guié:

—Busán-gáquië' bönni' na'.

³⁶ Ní'irö bönni' na' rusayjë' lidxi guié gudíxjö'iñë' Pablo didza' ni, gunnë':

—Gula'sól-lë'ë bönni' yúlahui' didza' usana' libí'ili'. Na'a, guli'rúaj, en buli'huóaj dxí'ado' ga rizoáli'.

³⁷ Ní'irö birúajë' Pablo, en gudxë' yugu' ni'a ná'agaquië' bönni' yúlahui' na', gunnë':

—Chigula'guínë' netu' lógaca bönachi sal-la' biti' narúguini queëtu' ca rinná bë' xibá, en gula'gu'ë netu' lidxi guíë, ate' netu' ni nabábatu' Roma. ¿Naru' tu'santsë' netu' bagáchisö? ¡Biti' ca' gaca! ¡Ilídigarë' légaquië' udusángaquië' netu'!

³⁸ Yójhuöjgaquië' ni'a ná'agaquië' bönni' yúlahui' na', en bulu'siyönnë' yugu' bönni' yúlahui' didza' ni, ate' légaquië' guládxinë' cate' bila'yönnë' nabábagäquië' Pablo, en Silas Roma. ³⁹ Cate' bila'dxinë' lidxi guíë ni', guláta'yuë' lógaquië' Pablo, en Silas cabí ulu'subágue' légaquië' xíguia'. Ní'irö gula'béajë' légaquië' lidxi guíë na', en guláta'yuë' lógaquië' ulu'rúajë' yödzö na'. ⁴⁰ Ní'irö bila'rúajë' Pablo, en Silas lidxi guíë na', ate' gula'yázië' lídxinu Lidia. Cate' chibila'lé'enë' böchí'ru' nacu'ë ni', bulu'chízië' didza' icja nágagaquië', en la' bulu'zá'atë' ni'.

17

Yugu' bönachi Tesalónica tune' dzatsa

¹ Gula'dödë' Pablo, en Silas lu yödzö Anfípolis, en lu yödzö Apolonia, ate' bila'dxinë' lu yödzö Tesalónica, ga ni' zoa tu yu'u ga tu'dubë' bönni' judío, en tu'sëdë' queë' Dios. ² Bugá'anë' Pablo ni' idú galaj dza, ate' ca run cazë', guyijë' ga zoa yu'u na' cate' naca dza lá'ayi quégäquië' bönni' judío, ate' bë'lenë' légaquië' didza'. ³ Buchila lá'anë', en bulu'inë' légaquië' rusëdi le nazúaj lu guichi lá'ayi run bayudxi qui'i sáquë'ë Cristo, Bönni' na' tunë' löza bönni' judío udusölë' légaquië', ate' tödi gátië' ubanë' lu yöl-la' guti. Ní'irö Pablo gudxë' légaquië':

—¡Caní guca queë' bönni' na' lë' Jesús, runa' libán queë' ga ni zóali! ¡Bönni' ni náquië' Cristo!

⁴ Ní'irö bal-lë' gula'yéajlë'ë Cristo, ate' gulunë' tsözxën Pablo, en Silas. Lësca' caní zíán bönni' izá'a, bönni' ta'yéaj ládxigaquië' Dios, gula'yéajlë'ë Cristo. Lësca' zíán nigula lo gula'yéajlë'ënu Cristo. ⁵ Ní'irö yugu' bönni' judío biti' ta'yéajlë'ë, lu yöl-la' ruzzé'e quégäquië' Pablo, bulu'tubë' yugu' bönni' biti' nácagaquië' tsahuí', bönni' ta'dasë' ca'. Cate' chibulu'tubë' bönachi zíán, gulunë' ga gulún dzatsa idú lu yödzö na', ate' bayudxi gula'yázië' lidxë' Jasón para ulu'béajë' Pablo, en Silas lógaca bönachi na' tun dzatsa. ⁶ Cate' biti' bulu'dzölinë' Pablo, en Silas, gula'béajë' Jasón, en ia'zíca're' böchí'ru' nacu'ë ni', ate' gula'chë'ë légaquië' lógaquië' bönni' yúlahui'. Gulu'ë zidzaj didza', ta'nnë':

—Yugu' bönni' na' nutsá'gaquië' bönachi idútë yödzölió chibila'dxinë' ca' ni. ⁷ Jasón ni gulu'ë légaquië' lidxë'. Yúgu'të bönni' ni ta'dá'bagüe'ë xibá queë' César, bönni' rinná bë'enë' rë'u, ta'nnë': "Zoë' ia'túë' bönni' rinná bë'ë, lë' Jesús."

⁸ Cate' bila'yönnë' yugu' bönni' lu yödzö, en yugu' bönni' yúlahui' na' lë ni, gula'bö'ë böninga. ⁹ Ní'irö, gudödi gula'zi'ë bönni' yúlahui' dumí le bulu'ca'anagarë' Jasón, en ia'zíca're' bönni' na', bulu'sanë' légaquië'.

Le gulunë' Pablo, en Silas lu yödzö Berea

¹⁰ Ní'irö yugu' böchí'ru' ni' la' gula'söl-la'të' Pablo, en Silas, ni' naca chi'i dzö'ölö, ate' söjáquië' yödzö Berea. Cate' bila'dxinë' ni', gula'yázië' lu yu'u ga tu'dubë' bönni' judío nacu'ë ni', en tu'sëdë' queë' Dios. ¹¹ Gulácarë' tsahuí' bönni' ni ca bönni' nacu'ë Tesalónica, tu' gula'zi' lu ná'agaquië' xtídzë'ë Xanru' idú ládxigaquië'. Yugu' dza bulu'labe' dxí'a le nazúaj lu guichi lá'ayi, para iléquibe'enë' channö nácatë lë na' rnñë' Pablo. ¹² Caní guca, zíán bönni' judío

gula'yéajlë'ë Cristo. Lësca' caní, zián bönni' izá'a, yugu' nigula lo, en yugu' bönni' gula'yéajlë'ë Cristo. ¹³ Ní'irö cate' guléquibe'enë' bönni' judío nacu'ë Tesalónica, lësca' riguíxjö'ë Pablo xtídzë'ë Dios lu yödzö Berea, yójáquië' ni', en gulunë' ca' ni' ga gulún dzatsa bönachi zián. ¹⁴ Ní'irö yugu' böchí'ru' ni' la' gula'söl-la'të' Pablo, para tsejë' ga naca ra' nísado', pero bulu'gá'anases' Silas, en bi'i Timoteo lu yödzö Berea. ¹⁵ Yugu' bönni' Berea na' gula'chë'ë Pablo lu yödzö Atenas. Ní'irö la' yöhju'igacatë' lu yödzö Berea, tu'ú'ë xtídzë'ë Pablo, para ilë' Silas, en bi'i Timoteo, tsójacatë' ga ni' zoë' Pablo.

Le benë' Pablo lu yödzö Atenas

¹⁶ Tsanni ni' zoë' Pablo ribözë' Silas, en bi'i Timoteo, lu yödzö Atenas, ruhu'ini ládxë'ë tu' rile'enë' ta'yéaj ládx'i'gaca yúgu'të bönachi yödzö na' yugu' budó' guiój budó' yaga. ¹⁷ Que lë ni na' bë'lenë' bönni' judío, en bönni' ta'yéaj ládx'i'gaquië' Dios didza' ga naca lu yu'u ga tu'dubë' tu'sëdë' queë' Dios. Yugu' dza bë'lenë' nupa ta'dá lu yé'eyi didza' ca naca xtídzë'ë Cristo. ¹⁸ Bal-lë' bönni' dá'gaquië' le tu'sédinë' bönni' epicúreo, en le tu'sédinë' bönni' estoico gulu'ílenë' Pablo didza'. Bal-lë' gula'nnë':

—¿Bizxi rë'ënitenë' innë' bönni' huë' didza' ni?

Ia'bal-lë' gula'nnë':

—Réquitu' náquië' nu run libán quégaca dios zi'tu'.

Caní gula'nnë' tu' runë' libán Pablo lógaquië' que didza' dxi'a queë' Jesús, en que yöl-la' rubán. ¹⁹ Ní'irö gula'guélë'ë në'ë Pablo, en gula'chë'ë lë' lu guí'a ga tu'dubë' tu'ë didza', nazi'i le Areópago, ta'nnë':

—¿Naru' huáctsö yöñitu' didza' cubi ni rusiyönnu' netu'? ²⁰ Rusiyönnu' netu' le tun ga rubántu'. Rë'ënitu' inözitu' bizxi rnna didza' ni ru'u.

²¹ Bítirö ta'yaza ládx'i'gaquië' ilunë' bönni' Atenas na', en bönni' izá'a nacu'ë ni', pero ila'yönisinë', en ilu'isë' didza' tu le cubi.

²² Ní'irö guzuínë' Pablo gatsaj láhui'lö lë' a Areópago na', gunnë':

—Bönni' Atenas, yúgu'të le rilé'eda' naca bë' reaj ládx'i'da'ali' yugu' dios queëli'. ²³ Cate' gudöda' lu yödzö, en buyugaca' yugu' le reaj ládx'i'lí, yójxáca'a ca' tu nichu ga ni' nazúaj le rnna caní: "Tu Dios, Cuntu Nu Nunbë' Lë.". Dios na' reaj ládx'i'lí-në' sal-la' biti' núnbë'ëli'-në', Dios ni runa'libán queë' loli'.

²⁴ ¡Dios ni benë' yödzölió, en yúgu'të le nacuá' yödzölió ni! ¡Náquië' Xani yehua' yubá, en Xani luyú ni, en biti' ca' zoë' tu yudo' núngaca bönachi! ²⁵ Bítir bi riyadzaj queë' le gaca ulu'nödzaj bönachi, tu' runödzjë' Lë' cazë' quégaca yúgu'të bönachi yöl-la' na'bán, en yúgu'të le riquíñiru'.

²⁶ Lë' benë' tuzë' bönni' ga zá'gaca yúgu'të bönachi izá'a para ila'cuá' idú yödzölió, en bulu'e dza ila'cuá', en gapa ral-la' ila'cuá'. ²⁷ Dios bucu'ë légaquië' para ulu'guilje' Lë', channö nácati'tës ila'dzölinë' Lë' sal-la' ila'gán ila'zönsë'. Caní raca sal-la' biti' zoë' zi'tu' ga zóaru' tu turu'. ²⁸ Lë' cazë' runë' ga zóaru' nabanru', en bi gaca gunru', en le nácaru'. Naca ca na' gula'nnë' bal-lë' bönni' nútса'gaquië' libí'ilí', nupa bulu'zúaj le do' rúl-lalí', le ta'nná: "Di'a dza queë' Dios nácaru'." ²⁹ Na'a, channö nácaru' di'a dza queë' Dios, biti' ral-la' innaru' náquië' Dios ca tu budó' guiój budó' yaga, o tu le néquini oro, o plata, o guiój, le núngaca bönachi ca naca tu le ta'guínnajso' ícjaguequi. ³⁰ Dios budödë' cá'asö yugu' le gulunë' lu yöl-la' biti' réajni'i quégäquië' yugu' iz chigula'dödi, pero na'a rinná bë'enë' yúgu'të bönachi idúte' yödzölió ulu'bí'ládx'i'gaca. ³¹ Dios chinulu'ë tu dza cate' uchi'a usöröë' yúgu'të bönachi. Idú tsahui' naca ca uchi'a

usöröe' légaquië' lu në'ë Jesús, bönni' na' buzóa cazë' Lë', ate' lógaca yúgu'të bönnachi benë' tsutsu gaca caní tu' busubanë' Lë' lu yöl-la' guti.

³² Cate' bila'yönnë' didza' bë'ë Pablo ca guca, zoa nu bubán lu yöl-la' guti, bulu'titjë' bal-lë', ate' ia'bal-lë' gula hnë' :

—Yöniguetu' ia'tú lë ni ru'u didza' que.

³³ Ní'irö burúajë' Pablo gatsaj láhui'lö ga na' nacu'ë, söhuöjë'. ³⁴ Bal-lë' gula'yéajlë'ë Cristo, en gulunë' tsözxön Pablo. Nútsë'ë Dionisio, bönni' areópago, ládjagaquië', ate' nútsa'nu ca' ládjagaquië' nigula na' lënu Dámaris. Ia'bal-lë' na' gula yéajlë'ë ca' Cristo.

18

Le benë' Pablo lu yödzö Corinto

¹ Gudödi guca lë ni, buzë'ë Pablo yödzö Atenas na', ate' guyijë' yödzö Corinto. ² Yójxáquië' Aquilo, tu bönni' judío ni'. Gulje' bönni' ni luyú Ponto, en si' bidxíngazë' yödzö Corinto na'. Buzë'ë luyú Italia len nigula queë', lënu Priscila, tu' gunná bë'ë Claudio, bönni' unná bë', ulu'rúajë' yúgu'të bönni' judío yödzö Roma. Guyijë' Pablo ga nacu'ë Aquilo, en Priscila na' ³tu' naca tuz dxin tunë' Aquilo, en Pablo. Bugá'analenë' légaquië', ate' tsözxön gulunë' dxin, tunë' yugu' yu'u guídido'. ⁴ Cate' nácagaca dza lá'ayi quégäquië' bönni' judío, razië' Pablo lu yu'u ga tu'dubë' tu'sédë' queë' Dios, ga ni' bë'lenë' légaquië' didza'. Gú'unnë' ulu'inë' yugu' bönni' judío, en yugu' bönni' izá'a nacu'ë ni', naca idútë li le riguixjö'ë ca naca queë' Jesucristo.

⁵ Cate' bila'dxinë' Silas, en bi'i Timoteo ni', nuzá'agaquië' luyú Macedonia, nugui'ide'enë' Pablo, runë' libán que xtídzë'ë Dios, en runë' ba nali lógaquië' bönni' judío, rnnë' :

—Jesús náquië' Cristo, Nu na' tunë' löza yugu' bönni' judío udusölë' légaquië'.

⁶ Cate' bönni' judío nacu'ë ni' gula'dá'bágüë'ë xtídzë'ë, en gula'nnë zi'ë que, ní'irö Pablo gudxibë' lari' nácuë' para ulu'inë' légaquië' bití'rö nabáguë'ë lë' ni'a quégäquië', ate' gudxë' légaquië':

—La' cuínsili' nabága'li' xígua' que yöl-la' guti queëli', calëga neda' nabága'a le. Na'a, uyija' ga nacuá' bönnachi izá'a.

⁷ Ní'irö burúajë' Pablo ni', en guyijë' lidxë' Justo, bönni' reaj ládxë'ë Dios, ate' zoa lidxë' gal-la' ra' yu'u ga tu'dubë' bönni' judío, en tu'sédë' queë' Dios.

⁸ Crispó, bönni' lo que yu'u ga na' tu'dubë' tu'sédë' queë' Dios guyéajlë'ë Xanru' Jesús, ate' dzágagaca lë' yígu'të bönnachi nacuá' lidxë'. Cate' bila'yönnë' xtídzë'ë Dios, zián bönni' Corinto gula'yéajlë'ë Cristo, ate' gula'dilë' nisa. ⁹ Ní'irö Lë cazë' Xanru' gudxë' Pablo lu yéla béchigal, gunnë' :

—Bití' gádxinu', en bití' su' dxissö, quíxjö'u xtídz'a'a, ¹⁰ tu' zóalen caza' neda' li', ate' cuntu nu uzapa' në'e li' para guá' dö' qui', tu' néquiguequi quia' bönnachi zián lu yödzö ni.

¹¹ Bugá'anë' Pablo ni' idú ca tu iz yu' gatsaj, ate' busédinë' légaquië' xtídzë'ë Dios.

¹² Cate' bidxín dza rinná bë'ë Galión luyú Acaya, guláquië' tuz bönni' judío bití' ta'yéajlë', ate' gula'dá'bágüë'ë Pablo, en gula'chë'ë lë' ga rö'ë ruchi'a rusöröe' Galión na'. ¹³ Gulë' Galión na':

—Bönni' ni rigú'u yöl-lë'ë bönnachi para ilunë' bal Dios, ca ridá'baga' xibá queëtu'.

¹⁴ Cate' chizóa gu'ë didza' Pablo, Galión na' gudxë' yugu' bönni' judío, rnnë' :

—Libí'ili', bönni' judío, la'tu' guca tu le riguitsaj xibá queë' César, o tu le ruá' dö', guá' ilena' uzé naga' xtíz'a'lí' ca ral-la' guna', ¹⁵ pero channö naca didza' bizzaj que díz'a'sö, o que lágaca bönnachi, en ca naca xibá queëzili', guli'cá'ana tsahui' libí'isili', tu' cabí' rë'ënda' neda' gaca' nu uchi'a usörö yugu' le caní.

¹⁶ Ní'irö Galión bulágui'ë légaquië' lu yu'u yúlahui'. ¹⁷ Ní'irö yúgu'të bönni' ulázd na' gula'guélë'ë Sóstenes, bönni' lo que yu'u ga tu'dubë' bönni' judío, en tu'sëdë' queë' Dios, ate' gula'guínë' lë' lõ'a yúlahui', pero biti' bë' ládxë'ë Galión lë' na' raça.

¹⁸ Pablo bugá'anë' lu yödzö na' zián dza, ate' gudödi busiyönnë' böchi'ru' nacu'ë ni' didza', guyijë' yödzö Cencrea, ga ni' benë' yútusö icjë', tu' dë tu le nazi' lu në'ë lahuë' Dios gunë'. Ní'irö gurenë' tu lë'e barco, para tsejë' luyú Siria, dzágagaquië' lë' Priscila, en Aquilo. ¹⁹ Cate' bila'dxinë' yödzö Éfeso, Pablo bulá'alenë' légaquië' ni'. Guyázië' lu yu'u ga tu'dubë' bönni' judío, en tu'sëdë' queë' Dios, ate' bë'lenë' nupa nacuá' ni' didza'. ²⁰ Yugu' bönni' ni' guláta'yuë' lahuë' Pablo ugá'analenë' légaquië' ia'lati' xidzé, pero lë' biti' gú'unnë'. ²¹ Bë'lenë' légaquië' didza', gunnë':

—Run bayudxi soa' gapa' laní si' gaca Jerusalén, ate' leyúbölö huöda' ga ni zóali', channö gué'ennë' Dios.

Ní'irö gurenë' Pablo tu lë'e barco, en buzë'ë Éfeso na'.

Ridxinë' Pablo Antioquía, ate' risí lahuë' röjenë' libán le bunni luzu'

²² Gudödi bidxinë' Pablo yödzö Cesarea, gurenë' guyijë' Jerusalén, ga ni' yöjyúé' bönnachi queë' Cristo, ate' ní'irö buzé'ë ni', en guyijë' Antioquía.

²³ Gudödi zoë' ni' nababa dza, buzé'ë ni', sa'yéajë' tu tu yödzö luyú Galacia, en Frigia. Benë' tsutsu böchi'ru' nacu'ë ni' ca naca le ta'yéajlë'ë Cristo.

Runë' libán Apolos lu yödzö Éfeso

²⁴ Tu dza ni' bidxinë' Apolos, tu bönni' judío lu yödzö Éfeso. Guljë' bönni' ni lu yödzö Alejandría, en nabé'ede'enë' ru'ë didza', en nazédadë' le nazúaj lu guichi lá'ayi. ²⁵ Chinazëdë' bönni' ni ca naca le réajlé'ëru' Xanru'. Idú ládxë'ë bë'ë didza', en ca nácaté busédinë' bönnachi ca naca queë' Jesús, sal-la' núnbë'ë tuz le ruquíla bönnachi nisa ca bené' Juan. ²⁶ Gusí lahuë' Apolos ru'ë didza' idú ládxë'ë ga naca lu yu'u ga tu'dubë' bönni' judío, en tu'sëdë' queë' Dios. Cate' Priscila, en Aquilo bila' yönnë' didza' ru'ë Apolos na', gula'chë'ë lë' quez, en bulu'zéajni'irönë' lë' xibá queë' Dios. ²⁷ Cate' gú'unnë' Apolos tödë' luyú Acaya, bulu'tipë' ládxë'ë, ate' bulu'zúajë' tu lu guichi le tsöjuá'gaquië' quégäquië' bönni' teaj ládxë'ë Cristo luyú Acaya na', para ilunë' Apolos na' bal. Cate' bidxinë' Apolos luyú na', yugu' bönni' ni' teaj ládxë'ë Cristo bulu'zí'dë'ë xibé didza' ru'ë Apolos na', tu' ruzá' ládxë'ë Dios quégäquië'. ²⁸ Caní guca, tu' bucul-lë' Apolos na' yugu' bönni' judío ni' lógaca yúgu'të bönnachi, tu' bugunë' dxin le nazúaj lu guichi lá'ayi, en bulu'e bönni' na' Jesús naca cazë' Cristo.

19

Le benë' Pablo lu yödzö Éfeso

¹ Tsanni ni' zoë' Apolos lu yödzö Corinto, gudödë' Pablo gapa nacuá' yödzö ia'lati' ra'lö, ate' bidxinë' Éfeso. Yójxáquië' bal-lë' bönni' ta'yéajlë'ë Cristo ni'.

² Pablo gunábinë' légaquië', rnnë':

—¿Naru' bidisóalenë' Dios Bö' Lá'ayi libí'ili' cate' ni' guyéajlë'ëli' Cristo?
Gulë' lë':

—Bití' nayöñitu' channö zoë' Dios Bö' Lá'ayi.

³ Ní'irö Pablo gunábinë' légaquië', rnnë':

—¿Nacxi guca le bidílali' nisa?

Ta hnë':

—Ca buquílë' Juan böñachi nisa.

⁴ Pablo gunnë:

—Buquílë' Juan böñachi nisa, nupa ni' bulu'bí'i ládxi'guequi, ate' Juan caz gudxë' léguequi ral-la' ila'yéajlë' Bönni' na' si' zá'télë' ca lë', ate' Bönni' ni naquië' Jesús, Lë' Cristo.

⁵ Cate' yugu' bönni' na' bila'yönnë' didza' ni ru'ë Pablo, bila'dilë' nisa tu' chita'yéajlë'ë Xanru' Jesús. ⁶ Cate' guxóa në'ë Pablo légaquië', en ni' rulidzë' Dios, bidisóalenë' Dios Bö' Lá'ayi légaquië', ate' gulu'ë didza' yúbölö, en gulu'ë didza' uláz queë' Dios. ⁷ Guláquië' bönni' ni idúchínnuë'.

⁸ Guzóë' Pablo idú ca tsonna beo' ni', ate' guyázië' lu yu'u ga tu'dubë' bönni' judío, en tu'sédë' queë' Dios, ate' lu yöl-la' rugu ladxi' benë' libán lógaquië'. Bë'lenë' légaquië' didza', en gú'unnë' uluf'inë' légaquië' nácatë le riguíxjö'ë ca rinná bë'ë Dios. ⁹ Ní'irö bizidi icja ládxi'do'gaquië' bal-lë', en bití' gula'yéajlë'ë Cristo, ate' gula'nnë' zi'ë que xtídzë'ë Xanru' ga nacuá' böñachi zián na'. Ní'irö Pablo bulá' alene' légaquië', ate' bubéajë' quez nupa ta'yéajlë' Cristo. Bë'lenë' böñachi ni ta'yéajlë' Cristo didza' yugu' dza ga na' tu'dubë' lu yu'u ga rusédinë' Tiranno böñachi. ¹⁰ Caní bénatica'së' Pablo idú ca chopá iz, ate' caní guca, bila'yöni yúgu'të böñachi didza' ca naca queë' Xanru' Jesús, böñachi nacu'ë yugu' yödzö luyú Asia, böñachi judío, en böñachi izá'a. ¹¹ Dios benë' yugu' yöl-la' huáca zxön lu në'ë Pablo. ¹² Caní guca, bal-lë' bönni' gula'zi'ë yugu' lári'do' béguë'ë icjë' Pablo, en yugu' lari' tsolá'a bugalé' lë'ë, ate' yöjuá'gaquië' léguequi gapa nacuá' nupa te'e, ate' bulu'huöáquië' ca naca yödzöhué' que queëgaquië', en bulu'rúaj bö' xihui' yú'ugaca böñachi na'.

¹³ Ní'irö bal-lë' bönni' judío udá dzaga tu'béajë' bö' xihui' gulë'ënnë' ulu'gunë' dxin Lë' Xanru' Jesús para ulu'béajë' yugu' bö' xihui' yú'ugaca böñachi, ta'nnë':

—Ni'a que Lë' Jesús, Nu na' runë' libán que Pablo, rinná bë'etu' libíili' urúajli'.

¹⁴ Caní gulunë' gadxi bönni' zxí'inë' Esceva, tu bönni' judío náquië' bönni' lo ládjagaquië' bixúz unná bë'. ¹⁵ Bubí'i didza' bö' xihui' na', gunná:

—Núnbe'a-në' Jesús, en núnbe'eda' bönni' lë' Pablo, pero libíili', ¿núzxite libíili'?

¹⁶ Ní'irö guxití'ë bönni' na' yu'u lë' bö' xihui', yöjenë' légaquië' zi', en bucullé' yúgu'të', tu' guzxéqui'rönë' ca légaquië'. Caní guca, xiguídigacasë', en hué'gacatézë' bulu'zxúnnmajë' gadxë' bönni' na' lu yu'u ni'. ¹⁷ Guzé didza' ca guca lë ni, ate' bila'yöni yúgu'të nupa nacuá' lu yödzö Éfeso, böñachi judío, en böñachi izá'a, ate' yúgu'të' guládxinë' Dios. Que lë ni na' gulunë' zxön Lë' Xanru' Jesús.

¹⁸ Lësca' bila'dxinë' zián bönni' ta'yéajlë'ë Cristo, en gula'xóalépë' dul-la' nabága'gaquië', en gula'guíxjö'ë le chigulunë'. ¹⁹ Lësca' caní gulunë' zián bönni', zí'alö gulunë' yöl-la' udzá'. Dujuá'agaquië' yugu' guichi udzá' quégaquië', ate' bulu'zégu'ë léguequi lógaca yúgu'të böñachi. Bulu'labe' tsca nazáca'gaca guichi na', le guca idú chi un mil dumí plata. ²⁰ Caní guca, guzéda' xtídzë'ë Xanru', en bidéli'da' böñachi zián. Idú ládxi'gaquië' gula'yéajlë'ë Cristo.

²¹ Gudödi gulaca lë ni, benë' queë' Pablo tsejë' Jerusalén, pero zí'alö ral-la' tódë' yugu' yödzö luyú Macedonia, en luyú Acaya, ate' gunnë':

—Tödi tseja' Jerusalén, run bayudxi tseja' ca' Roma.

²² Ní'irö gusöl-lé'bí' chópabi' bi'i bönni' tácalenbi' lë', lëgacabi' Timoteo, en Erasto, luyú Macedonia, pero bugá'anë' lë' nababa dza luyú Asia na'.

Tu'tsatsa bönachi lu yödzö Éfeso

²³ Bulu'tsatsa bönachi Éfeso dza ni', ate' gula'dá'baguë'ë xtídzë'ë Xanru'.

²⁴ Benë' Demetrio, bönni' gubëdxi guíë plata ga bulu'tsatsë'. Run cazë' yugu' lidxi budó' guiöj budó' yaga néquiguequini plata que dios quégaquië', lënu Diana. Gula'zi'ë bönni' tunë' dxin ni dumí bach. ²⁵ Butubë' Demetrio na' ia'zíca'rë' bönni' tunë' la' dxin nisö, ate' gudxë' légaquië':

—Böcha'a, nöz quézil' ca naca dxin runru', runna dumí queëru'. ²⁶ Rilé'eli', en riyonili' ca runë' Pablo na'. Calégasö Éfeso ni, pero idú luyú Asia chibidéli'në' bönachi zián, ate' chibutsë'ë ca tunë', tu' rë' légaquië': "Yúgu le núngaca bönachi biti' nácagaca dios." ²⁷ Calégasö zoa bönadxi ugá'ana cá'asö dxin ni runru', pero lësca' zoa bönadxi ugá'ana cá'asö yudo' que dios zxön lënu Diana. Caní gaca, ugá'ana cá'asö yöl-la' zxön queënu, dios ni ta'yéaj ládzi'gaca-nu bönachi idútë luyú Asia, enca' idútë yödzöliö.

²⁸ Cate' yugu' bönni' na' bila'yönnë' didza' ni, gula'léde'enë', ate' gulu'ë zidzaj didza', ta'nnë':

—Nácatérönu zxön Diana, dios queëru' rë'u, bönachi Éfeso.

²⁹ Caní guca, bulu'tsatsa bönachi idútë lu yödzö na', ate' guláquië' tuz, en carelö yójáquië' lõ'a yúlahui'. Gulá'ayöje' Gayo, en Aristarco, bönni' Macedonia túngaquië' Pablo tsözxön, ga ni'. ³⁰ Cate' gú'unne' Pablo tsázië' ga nacuá' bönachi zián na', biti' ca' gulu'ë lë' lataj bönni' ta'yéajlë'ë Cristo. ³¹ Lësca' caní gulunë' bal-lë' bönni' yúlahui' que luyú Asia, bönni' ta'lé'enë' Pablo dxi'a. Gula'söl-lé'ë queë' nupa guláta'yu lahuë' biti' tsazië' lõ'a yúlahui' na'. ³² Ga ni' tu'tsatsë', en ta'bödxï'ë, tu le ta'nnë' bal-lë', en ia'tú le ta'nnë' ia'zíca'rë', tu' rö'ögacase' baröli bönni' zián na' tu'tsatsë', en lá'tu'biquí' yúgu'tégäquië' biti' nözguequinë' bizx que na' nudúbigaquië' ni'. ³³ Ní'irö yugu' bönni' judío gula'béajë' Alejandro ladaj bönachi zián na', ate' bulu'dxiguë'ë lë' lógaca bönachi zián na'. Bulu'e Alejandro na' len ne'ë para ila'bö' dxisö, tu' gú'unne' gu'ë didza' le gácalen yugu' bönni' judío na' lógaca yúgu'téguequi. ³⁴ Cate' guléquibe'enë' náquië' judío, yúgu'te' gulu'ë tsözxön zidzaj didza' idú ca chopa hora, ta'nnë':

—Nácatérönu zxön Diana, dios queëru' rë'u bönachi Éfeso!

³⁵ Ní'irö bönni' uzúaj que yúlahui' benë' ga gula'bö' dxisö bönachi zián na', gunnë':

—Bönni' Éfeso, nözigaca yúgu'të bönachi zoa yudo' queënu Diana, dios zxön, ni. Rë'u ni, bönachi Éfeso, run chí'iru' yudo' na', enca' budó' na' bökaj ga zóaru', le birúaj lúzziba. ³⁶ Cuntu nu gaca tá'baga' lë ni. Que lë ni na' run bayudxi sóali' dxisö, en biti' bi güntëzili'. ³⁷ Nachë'gacalí'-në' bönni' ni, en biti' ta'banë' le dzö'ö yudo', en biti' ta'nnë' xihuë'ë queënu dios queëli'. ³⁸ Que lë ni na', channö zoa didza' bizxaj quégaquië' Demetrio, en yugu' bönni' gubëdxi guíë plata nacuá'lenë' lë', len nüti'tés bönni', dë lataj ga nu uzé nagui légaquië', en zoa nu uchi'a usörö légaquië'. Ni' huáca ulu'zegui luzá'agaquië' didza' tuë' ia'tuë'. ³⁹ Na'a, channö dë ia'tú le inábalí', huáca ucá'anaru' tsahui' le cate' ulu'dubi bönni' yúlahui' ca na' rinná bë' yúlahui'. ⁴⁰ Zoa bönadxi nu uzegui rë'u

didza' ni'a que dzatsa ni guca na'a, inná ridá'baga'ru' yúlahui'. Biti' bi gaca innaru' bizx que guca dzatsa ni.

⁴¹ Cate' budxi bë'ë didza' ni, busöl-lë'ë böñachi zián na' nudúbigaca ni' tsöhuöjgaca lídxiguequi.

20

Sa'yéajë' Pablo luyú Macedonia, en luyú Grecia

¹ Cate' gurö'ö dxi dzatsa na' guca lu yödzö Éfeso, bulidzë' Pablo yugu' bönni' ta'yéajlë'ë Cristo, ate' guchízië' icja nágagaquie' didza'. Gudödi ni' bunidë' légaquie', en la' bulá'alentë' légaquie'. Birúajë' ni, ate' sa'yéajë' luyú Macedonia. ² Gudödë' yugu' yödzö luyú ni', ruzéajni'ide'enë' böchí'ru' nacu'ë ni', ate' gudödi ni' bidxinë' luyú Acaya. ³ Guzóë' Pablo ni' idú ca tsonna beo'. Cate' chizóa cuenë' tu lë'e barco para tsejë' luyú Siria, gúquibe'enë' ta'bó' nísië' bönni' judío lë' para ila'zónë' lë'. Que lë ni na' buguélë'ë nöza söhuöjë' luyú Macedonia, ate' bidixinë' yödzö Filipos. ⁴ Sópater, zxí'inë' Pirro, bönni' Berea, en Aristarco, en Segundo, yugu' bönni' Tesalónica, en Gayo, bönni' Derbe, enca'bi'i Timoteo, en Tíquico, en Trófimo, yugu' bönni' Asia, sójácalenë' tsözxön lë'. ⁵ Ní'irö yugu' bönni' ni yöjnörugaquie' lahuë' Pablo, yöjáquie' yödzö Troas, ga ni' gula'bözë' lë'. ⁶ Lu yödzö Filipos na', neda', Lucas, yöjtsaga'-në' Pablo. Cate' chigudödi laní cate' tahuë' bönni' judío yöta xtila biti' nazí'i cúa zi que, gurentu' tu lë'e barco, en buzá'atu' Filipos na'. Gudödi gayu' dza budzágatu' bönni' ni' yöjnörugaquie' lahuë' Pablo, yöjáquie' Troas, ate' ni' bugá'anatu' gadxi dza.

Le benë' Pablo lu yödzö Troas

⁷ Dza risí lo le gadxi dza bulu'dubë' bönni' ta'yéajlë'ë Cristo para ilahuë' yöta xtila le rusá' ládxí'ru' ca gútië' Jesucristo. Ni' rusédinë' Pablo légaquie', en tu' ral-la' uzë'ë ni' cate' za' rení' dza na', xidzé bë'ë didza', ga bidxitë gudödi guluhüela. ⁸ Ga ni' nudúbigaquie' naca lu yu'u xitsá', ate' nacuá' zián le ta'gú'u bení' ga na'. ⁹ Zóabi' bi'i Eutico ni', rö'öbi' ga ra'a lení' que yu'u na', ate' nadödirö yëla lobi' tu' ritunna libán runë' Pablo. Ga ni' rö'öbi' rásibi' bi'i na' naca ga bunni cuía lu yu'u, ate' rásisibi' ca' gubíxitëbí', böxbabí' ga bidxitëbí' zxan yu'u. Nátitëbí' bulu'lise'-bi'. ¹⁰ Bötje' Pablo zxan yu'u na', ate' yöjxöë' lëbí', en bunidë'-bi'. Ní'irö gudxe' nupa nacuá' ni':

—Biti' gadxi idzöbili'. Nababbi'.

¹¹ Cate' chibubenë' Pablo xitsá', gudélë'ë yöta xtila, gudahuë'. Ní'irö Pablo bë'lenë' légaquie' didza' ga bidxitë zila balö. Gudödi ni' burúajë' ni'. ¹² Bi'i bönni' ra'bán na' gubíxibi', bulu'chë'-ë-bi' nababbi', en bulu'zí' zxöndë'ë.

Ca guca bidxitu' Miletó

¹³ Gunörutu' lahuë' Pablo, en yöjchentu' tu lë'e barco, ate' gudöditu' ga bidxitu' yödzö Asón para tsöjtságatu'-në' Pablo ni', para gaca ca na' chibén xtídza'tu', tu' gú'unne' Pablo tsejë' ni' së'esi ni'ë. ¹⁴ Cate' chibudzágatu'-në' lu yödzö Asón na', gurénlenë' netu' lë'e barco, ate' guyéajtu' yödzö Mitilene. ¹⁵ Buzá' barco ni', ate' dza buropi bidxitu' tödi li ga zoa luyú bidxi nazí'i le Quío, ate' ia'tú dza ca' gudöditu' tödi li ga dë yödzö Samos, en bidxitu' yödzö Trogilio ga ni' guzóatu' tu chi'i. Ia'tú dza ca' bidxitu' yödzö Miletó. ¹⁶ Caní bentu' tu' chibenë' queé' Pablo tödisë' yödzö Éfeso, para cabí tsenë' luyú Asia, tu' run bayudxi soë' Jerusalén cate' naca dza Pentecostés channö séqu'ni'ë'.

Didza' bë'ë Pablo lu yödzö Miletó

17 Cate' ni' zoë' Pablo lu yödzö Miletó, gusöl-lë'ë nu yöjlidza bönni' gula tapa chi'ë bönnachi queë' Cristo nacu'ë Éfeso. **18** Cate' bila'dxinë' ga zoë' Pablo, lë' geduxë' légaquië':

—Libí'ili' chinöz quézili' ca béntica'sa' ga zóali' ga gudela' bidxina' luyú Asia. **19** Yugu' dza bena' xichinë' Xanru' lu yöl-la' nöaj ladxi', ga bidxitë gurödxa' ni'a queëli', ate' zián le guca quia' le guzxi' bë' neda' ni'a que le ruá' dö' gulunë' quia' bönnachi judío biti' ta'yéajlë' Cristo. **20** Béntica'sa' libán ga zóali' que yúgu'të le ruzi'ili' xibé, en busédida' libí'ili' yálajdo' ga nudúbili', en gapa naca lu yu'u lídxili'. **21** Bená' ba nalí lógaca bönnachi judío, en lógaca bönnachi izá'a para ulu'bí'i ládxí'gaca, en ulu'huoáca queë' Dios, en ila'yéajlë' Xanru' Jesucristo. **22** Na'a, Dios Bö' Lá'ayi chinunë' quia' tseja' Jerusalén, en biti' nözda' bizxi gaca quia' ni'. **23** Yúgu'të yödzö ga ridá', riguixjöi'inë' Dios Bö' Lá'ayi neda', rë' neda' ila'gu'ë neda' lidxi guié bönni' judío biti' ta'yéajlë', en ulu'saca' zi'ë neda'. **24** Biti' bi runi neda' que lë na' gaca, sal-la' gátia' o cabí gátia', pero rui'i ládxí'sida' údxí guna' le chigudéla'a runa', para guna' dxin na' budödë' Xanru' Jesús lu na'a, le naca guna' libán que didza' dxi'a ca naca le ruzá' ládxë'ë Dios queëru'. Caní guna' len yöl-la' rudzeja.

25 'Na'a, yúgu'teli' na' chibena' libán lolí' ca rinná bë'ë Dios, nözda' bíti'rö ulé'eli' neda'. **26** Que lë ni na', le nácatë rea' libí'ili' na'a dza. Biti' nabága'a neda' queëli' nituli' libí'ili'. **27** Biti' bi bucáchi'da' libí'ili', pero gudíxjöi'ida' libí'ili' yúgu'të le rnnë' Dios. **28** Que lë ni na', guli'gún chí'i cuinli', en guli'gún chí'i yúgu'të bönnachi queë' Cristo, tu' nuzoë' Dios Bö' Lá'ayi libí'ili' para gácalenli' légaquië', en gun chí'ilí' bönnachi queë' Xanru', Bönni' na' gútië' uláz quégaquië', bulaljë' xichönë' le böä'uine' légaquië'. **29** Chinözdá', tödi uzá'a ga zóali', ila'yaza nupa ilé'eni ulu'suniti bönnachi queë' Cristo ga zóali', ilunë' ca tunba' bö'cu' guí'a sínia', tu'sunitiba' yugu' bö'cu' zxila'. **30** Ila'rúajë' bönni' nútsa'gaquië' ládjali', ate' ilu'ë didza' biti' nácatë para ulu'béajë' quégacaseë' nupa ta'yéajlë' Cristo nútsa'gaca ládjali'. **31** Que lë ni na', guli'sóa ban ladxi', en guli'tsöjné ca bena' neda' idú ca tsonna iz, rëla, en té dza buchízia' icja nágali' tu tulí' ga bidxitë gurödxa' queëli'.

32 'Na'a, böchí' luzá'ado', rigu'a libí'ili' lu në'ë Dios. Rinábida' Lë'uzá' ládxë'ë queëli', en gunë' ca rnna xtídzë'ë. Dios gunë' libí'ili' tsutsu, en gunë' ga idéli'li' gunli' tsözxön yugu' bönni' rö queë'. **33** Catu caz guzé ládx'a' le nequi quégaquië' böchí' luzá'a. Biti' guzé ládx'a' dumí, o lari' quégaquië'. **34** Nöz quézili' dxi'a, len na'a caza' bena' dxin para gaca gá'ua' le biyadzaj quia', en quégaca nupa gula'cuá'len neda'. **35** Ca naca yúgu'të le bena', bulu'ida' libí'ili' caní ral-la' gunru' dxin para gaca gácalenru' nupa bi ta'yadzaj. Ral-la' tsöjneru' didza' bë'ë Xanru' Jesús, gunnë': "Uzí'irö xibé nu bi runödzaj ca nu bi rizi'."

36 Cate' budxi bë'ë Pablo didza' ni, buzúa zxibe', ate' benë' tsözxön yúgu'të', bulu'lídze' Dios. **37** Ní'irö gula'bödxë' yúgu'të'. Bulu'nidë' yenë' Pablo, en bulu'tsaga lahuë' lë'. **38** Caní gulunë' tu' bulu'huí'innë' ni'a que didza' na' bë'ë Pablo, gunnë': "Bítirö ulé'eli' neda'." Yójácalenë' tsözxön lë' ga na' gurenë' lu barco.

¹ Gudödi bulá'alentu' légaquië', guyú'utë nöza barco na', ate' lirá guyéajtu' ga zoa luyú bidxi nazi'i le Cos. Dza buropi na', gudöditu' ia'tú lataj nazi'i le Rodas, ate' buzá'atu' ni', en bidxitu' yödzö Pátara. ² Yójxáca'tu' tu barco yübölö ni' le zeaj luyú Fenicia. Gurentu' le'e barco na', ate' guyú'utë nöza. ³ Gudöditu' ga nalá' Chipre, le guta' tsölä'a yögöla, ate' guyéajtu' luyú Siria, ga ni' guyaza barco na' lu yödzö Tiro, tu' ral-la' tsöjcá' ana yua' ni' le dzö'ö le'e barco na'. ⁴ Lu yödzö Tiro na' yójxáca'tu' tu bönni' réajlë' è Cristo, ate' bugá'analentu' le', en yugu' böchi'ru' ni' idú gadxi dza. Tu' chibului' inë' Dios Bö Lá'ayi légaquië' le ral-la' gaca queë' Pablo, gulë' le'e biti' tsejë' Jerusalén. ⁵ Cate' chibizá'a dza na', burúajtu' ni', ate' gula'zá'lenë' netu' tsözxöön yúgu'të' len nigula que quegaquië', en yugu' bi'i quégäquië', ga bidxitütu' ni' ilö ra' yödzö na'. Ra' nísado' ni' buzúa zxíbitu', en bulidzütu'-në' Dios. ⁶ Budxi bunida'luzá'atu' tutu' ia'tutu', bubenü' le'e barco, ate' légaquië' yójhuöjgaquië' lídxigaquië'.

⁷ Buzá'até barco na' lu yödzö Tiro, ate' ga yójse' bidxín lu yödzö Tolaimada. Burúajtu' le'e barco na' ni'. Bugápatu' Dios böchi'ru' nacu'ë ni', ate' bugá'analentu' légaquië' tu dza. ⁸ Cate' za' rení' ia'tú dza, burúajë' Pablo ni', ate' dzágatu'-në' netu' guyéajtu' yödzö Cesarea. Ni' guyú'utu' lu yu'u lidxe' Felipe, ate' bugá'analentu' le'. Runë' Felipe na' libán que didza' dxi'a. Bítsë'ë gadxe' bönni' ni' bulu'cu'ë dza ni'te para ilácalenë' bönnachi queë' Cristo. ⁹ Nacuá'abi' tapa bi'i nigula ra'bán queë' Felipe na', tu'ibí' didza' uláz queë' Dios. ¹⁰ Gudödi gudzetu' chopá tsonna dza ni', ní'irö bidxinë' Agabo ni', bönni' ru'ë didza' uláz queë' Dios, narúajë' luyú Judea. ¹¹ Bönni' ni buduyúë' netu', ate' gudélë'è pan le néquini guídi queë' Pablo. Béguë'ë ni'a na' cuinë', en gunné':

—Caní rnnë' Dios Bö' Lá'ayi: “Caní ilunë' bönni' judío nacu'ë Jerusalén. Ilúguië' bönni' ni nequi queë' pan guídi ni, ate' ulu'dödë' le'e lu ná'agaca bönnachi izá'a.”

¹² Cate' biyöñitu' didza' ni, gúta'yutu' lahuë' Pablo, netu', en nupa nacuá' ni', para cabí tsejë' Jerusalén. ¹³ Bubi'ë didza' Pablo, gunné':

—¿Bizxi ni runli', ribödxili', en rusuhü'inili' nedä'? Neda' chizóa caza'sina', calëgasö ilúguië' nedä', pero gátia' ca' lu yödzö Jerusalén ni'a queë' Xanru' Jesús.

¹⁴ Tu' cabí guzxequítu'-në' didza', bíti'rö bi gúdxitu'-në', ate' gunnatu':

—Gaca ca raza ládxë'ë Xanru'.

¹⁵ Cate' chigula'dödi dza na', bupa'atu' queëtu', ate' guyéajtu' Jerusalén. ¹⁶ Gula'zá'lenë' netu' bal-lë' bönni' ta'yéajlë' è Cristo, nacu'ë Cesarea, ate' dzáguië' Mnasón, tu bönni' Chipre, légaquië'. Réajlë' è Cristo dza ni'te, ate' ral-la' tsöjcá'anatu' lidxe' bönni' ni.

Pablo röjyúë' Jacobo

¹⁷ Cate' bidxitu' Jerusalén, len yöl-la' rudzeja quégäquië' böchi'ru' ni' ta'yéajlë' è Cristo gulanë' netu' bal. ¹⁸ Dza buropi na' Pablo guyázalenë' netu' lu yu'u, yöjyutu'-në' Jacobo, ate' nudúbigaquië' ni' yúgu'të bönni' gula tapa chí'e bönnachi queë' Cristo nacu'ë Jerusalén. ¹⁹ Cate' Pablo chibugape' légaquië' Dios, busiyönnë' légaquië' yúgu'të le benë' Dios lu në'ë le'e ga nacuá' bönnachi izá'a. ²⁰ Cate' bila'yönnë' le ni, gula'gu'ë Dios yöl-la' ba. Ní'irö gulë' Pablo:

—Nöz quézinu', böchi'tu', cate' xö zián gáyú'ë bönni' judío ta'yéajlë' è Cristo, ate' yúgu'të' tündë' è bal xibá queë' Moisés. ²¹ Chibila'yönnë' yugu' le tu'í didza' bönnachi le ta'nné quiu', ta'nná rigú'u yöl-lu'u yúgu'të bönni' judío nútsa'gaquië' ladaj bönnachi izá'a, para ulu'cá'anë' le gunná bë'ë Moisés,

en rinná bē'enu' légaquië' biti' ila'chúguië' lu xpéla'gacabi' bi'i bönni'do' quégäquië', en biti' ilunë' bal yugu' le nalëbiru' runru' rē'u, bönnachi judío. ²² ¿Nacxi caz gunru' na'a? Ulu'rúaj bönnachi zián cate' ila'yöni chibidxínu' ni. ²³ Na'a, ben lë ni rëtu' li'. Nacuálenë' netu' ni tapë' bönni', chinazi' lu ná'agaquië' lahuë' Dios tu le ilunë'. ²⁴ Guché'ë yugu' bönni' ni, en ben légaquië' tsözxön gun dxi'a cuinli' ca naca que yudo', en gudizxaj li' le ral-la' ila'guizxjë' para ilún yútusö ícagaquië'. Ni'irö ila'nözine' yúgu'të bönni' judío biti' nácatë lë na' ta'nné' quiu', pero lëscá' li' runu' le naca dxi'a, en runu' ca rinná bë' xibá queë' Moisés. ²⁵ Ca naca quégaca bönnachi izá'a, nupa ni' chita'yéajlé' Cristo, chibén xtídza'tu', en buzúajtu' lu guichi ca ral-la' ilunë'. Biti' run bayudxi ilún chi'ë yugu' lë ni tunë' bönni' judío, pero tuz:

Biti' ilahuë' le ta'gú'u bönnachi lógaca budó' guiój budó' yaga.

Biti' ilahuë' rön.

Biti' ilahuë' xipéla'gacaba' böa' guixi' biti' narúaj-gácaba' rön.

Biti' ilunë' le ruá' dö'.

Ta'zönë' Pablo lö'a yudo'

²⁶ Ni'irö Pablo guché'ë queë' tapë' bönni' na', ate' dza buropi ni' ben dxi'a cuiné' tsözxön len légaquië' ca naca que yudo'. Ni'irö guyázië' lö'a yudo', para gaca bë' bizxi dza údxi ilunë' le tu'ún dxi'a cuíngaquië', dza ni' ral-la' tsöjuá'agaquië' le ila'gu'ë lahuë' Dios que queëgaquië'. ²⁷ Cate' chizóa izá'a gadxi dza na', bal-lë' judío narúajgaquië' luyú Asia bila'lé'enë' Pablo, zoë' lö'a yudo'. Gulunë' ga gulún dzatsa bönnachi zián, ate' gula'zönë' Pablo. ²⁸ Gulu'ë zidzaj didza', ta'nné':

—¡Guli'gácalen netu', bönni' Israel! Bönni' ni rusédinë' yúgu'të bönnachi yúgu'të lataj ulu'cá'ana cá'asö yödzö queëru', en xibá queë' Moisés, en yudo' queëru' ni. Na'a, chigulu'ë yugu' bönni' izá'a lu yudo' ni. Caní runë', run ditjanë' lataj lá'ayi ni.

²⁹ Caní gula'nnë' tu' bila'lé'enë' Pablo zí'alö lu yödzö dzáguië' Trófimo, bönni' Éfeso, en téquinë' gulu'ë bönni' ni lu yudo'.

³⁰ Caní guca, bulu'dubi yúgu'të bönnachi yödzö, ate' bila'guírë' ni'. Ni'irö gula'zönë' Pablo, en gulá'ayöjë' lë', bulu'béajë' lë' lö'a yudo', ate' la' bulu'sáyjatë' ga nu riyaza lö'a yudo' na'. ³¹ Cate' chitequi quézinë' ilútië' Pablo, bidixín didza' lahuë' bönni' lo rinná bë'enë' bönni' röjáquië' gudil-la. Biyönnë' tun dzatsa yúgu'të bönnachi Jerusalén. ³² Bönni' lo ni la' butúbitë' bönni' röjáquië' gudil-la, len bönni' ta'nná bë'enë' légaquië', ate' carelö guyéajlenë' légaquië' ga na' tun dzatsa bönnachi na'. Cate' bila'lé'e bönnachi ni' bönni' lo na' rinná bë'enë' bönni' röjáquië' gudil-la, en bönni' na' röjáquië' gudil-la, bulu'sanë' ta'guinë' Pablo. ³³ Ni'irö gubígu'ë bönni' lo na', en guzxönë' Pablo, ate' gunná bë'enë' bönni' röjáquië' gudil-la ilúguië' lë' len chopá du guíe'. Gudödi ni' gunabíne' bönnachi zián ni', rnnë':

—¿Nuzxi caz bönni' ni, en bizxi benë'?

³⁴ Ta'bödxí'a bönnachi zián na', que queégaca ca ta'nná. Caní guca, biti' bi guca tséajni'inë' bönni' lo na', tu' tu'tsatsa bönnachi na', ate' gunná bë'enë' bönni' röjáquië' gudil-la ila'chë'ë Pablo lu yu'u zxón ga nagá'anagaquië' bönni' na' röjáquië' gudil-la. ³⁵ Cate' bila'dxinë' ga naca ni' yëpi' que yu'u zxón na', bönni' na' röjáquië' gudil-la guluf'inë' Pablo, tu' dxíadi'igaca bönnachi zián légaquië', ³⁶ en zá'gaca cíduzu'lögäquië', ta'bödxí'a, ta'nná:

—Guli'gútië'.

Didza' bë'ë Pablo uláz queë' lógaca böñachi

³⁷ Cate' ni' gula'sílógaquïë' ila'gu'ë Pablo lu yu'u zxön ni', lë' gudxë' bönni' lo na' rinná bë enë' bönni' rójáquië' gudil-la, gunnë':

—¿Naru' gunnu' neda' lataj guía' li' tu didza'?

Bönni' lo na' gudxë' Pablo:

—¿Rácatso' didza' griego? ³⁸ ¿Naru' caléga li' bönni' Egipto na' dza lahui nisö butubë' yugu' bönni' gula'dábagueë' yúlahui', ate' guchë'ë idú choá' gáyu'ë bönni' huëti böñachi lu lataj cá'asö?

³⁹ Ni'irö Pablo gudxë' lë', gunnë':

—Le nácatë naca' neda' bönni' judío. Gulja' Tarso, tu yödzö lo luyú Cilicia. Rátaya'u' lo' gunnu' neda' lataj gu'a didza' lógaca böñachi ni.

⁴⁰ Bönni' lo na' bë'ë lë' lataj, ate' guzuínë' Pablo ga naca ni'yëpi', en guchisa në'ë para ila'cuá' dxisö böñachi zián ni'. Cate' chigula'cu'ë dxisö, Pablo bë'lenë' légaquïë' didza' lu didza' hebreo.

22

¹ Caní gunnë' Pablo:

—Libi'ili', bönni' gula, en libi'ili' böcha'a. Buli'zë nágali' le guía' libi'ili' ca naca le runa'.

² Cate' bila'yönnë' ru'ë didza' hebreo, gula'cuá'arë' dxisö. Pablo gudxë' légaquïë', rnnë':

³ —Naca caza' neda' bönni' judío. Gulja' lu yödzö Tarso luyú Cilicia, pero guzxöna'lu yödzö ni, ate' busédinë' Gamaliel neda' idú ca naca xibá quégagaquïë' xuz xtó'oru'. Bë'tica'sö ládxa'a guyéaj ládxa'a Dios ca runli' libi'ili' na'a.

⁴ Zí'alo gudxia' ládxigaca'-në' bönni' nazí' lu ná'agaquïë' xtídez'ë Cristo, en guchë'gaca'-në' ga ilatië'. Guzxöngaca'-në', en gulú'ugaca'-në' lidxi guíë, yugu' bönni', en nigula. ⁵ Lësca' huáca ilunë' ba nalí yugu' bixú unná bë', en yugu' bönni' gula tu'zéajni'inë' que le gulunë'. Gulunë' guichi unná bë' le yöju'a ga nacu'ë böchí'ru' judío lu yödzö Damasco. Guyija' ni' para tsöjxöngaca' nupa ni' ta'yéajlé' Cristo, para idichë'gaca'-në' nágagaquïë' Jerusalén ni, para ilácagaquïë' xíguia'.

Riguíxjö'ë Pablo ca böáquië' queë' Cristo

⁶ Ni'irö gunnë' Pablo:

—Cate' ni' sa'yéaja' la' nöza, en si' idxina' Damasco, cate' guca idú huagubidza, tsálido'os guyépi yösa bení' le za' lúzxiba, le buzení' ga na' sa'yéaja'. ⁷ La' yöjöta'tea' lu yu, en biyönda' chi'i Nu gudxi neda': "Saulo, Saulo, ¿bzix que ribia ládxu'u neda'?" ⁸ Ni'irö gunábida' lë', gunnía': "¿Nuzxi li', Xan?" Lë' gudxë' neda': "Neda' ni Jesúis, bönni' Nazaret. Neda' caz ribia ládxu'u." ⁹ Nupa ni' gula'cuá'len neda' bila'lé'e caz bení' na', en guladxi, pero biti' bila'yöni chi'i Nu na' bulidza neda'. ¹⁰ Ni'irö gudxa'-në': "¿Nacxi guna', Xan?" Xanru' gudxë' neda': "Guyasa, en guyéaj Damasco. Zoë' ni' tu bönni' guíë' li' ca naca yúgu'te le ral-la' gunu'." ¹¹ Tu' cabiro' rilé'eda' tu' budí'i yösa bení' na' guyépida' lahua', que lë ni na' yugu' bönni' dzágagaquïë' neda' gula'guélë'ë na'a, ate' gula'chë'ë neda' ga bidixíntea' Damasco.

¹² Zoë' Ananías ni', tu bönni' runë' idútë ca rinná bë' xibá queë' Dios, ate' yugu' bönni' judío nacu'ë Damasco tunë' lë' bal. ¹³ Bidxinë' Ananías na' ga zoa', en gudxë' neda': "Saulo, böcha'a, huöálaj guiøj lo'." La' ni'isö böálaj guiøj lahua', ate' bilé'eda' lë'. ¹⁴ Lë' gudxë' neda': "Dios quégagaquïë' xuz xtó'oru', dza ni'te gurö cazë' li' para inözину' le rë'ëni quézinë' Lë', en ilé'enu'-në' Bönni'

Tsahui', Lë cazë' Zxi'inë', en yönnu' le guíë' Lë cazë' li'. ¹⁵ Caní gaca, tu' ral-la' gunu' ba nalí queë' Lë' lógaca yúgu'të böñachi, usiyönnu' légaquië' ca naca le chibilé'enu', en le chibiyöninu'. ¹⁶ Na'a, ¿bizx que ridzenu'? ¡Guyasa, en bidila nisa! Bulidzë' Xanru' para únë' li' dxi'a, en ugúë' dul-la' nabág'u'u."

Cristo gusöl-lë'ë Pablo para gunë' libán lógaca böñachi izá'a

¹⁷ Gunné' ca' Pablo:

—Gudödi ni', cate' budxina' Jerusalén, en tsanni ni' rulidza'-në' Dios lu chila yudo', bilé'eda' tu le naca ca tu lu yëla bëchigal. ¹⁸ Bilé'eda'-në' Xanru', ate' gudxë' neda': "¡Guyáj carelöl! ¡Burúajtë Jerusalén ni, tu' cabí ilunë' bal bönni' ni le gunu' ba nalí quia!" ¹⁹ Neda' gudxa'-në': "Xan, nözgaca quézinë' ca bena' neda'. Guyázia' gapa naca lu yu'u ga tu'dubë' tu'sédë' bönni' judío queë' Dios. Gudina' nupa ni' ta'yéajlé' Li', en gulú'ugaca'-në' lidxi guíë. ²⁰ Cate' ni' gulútië' Esteban, bönni' ni' benë' ba nalí quiu', lësca' zoa' neda' ni', en bena' tuz yugu' bönni' gulútië' lë' tu' ben chí'a lari' nácugaquië' bönni' na' bulu'ladxë' lë' guíjö." ²¹ Ni'irö Xanru' gudxë' neda': "Guyáj, tu' risöl-la' a li' lógaca böñachi izá'a."

Pablo ruí'lenë' bönni' lo didza', bönni' rinná bë'enë' bönni' rójáquië' gudil-la

²² Nisö ze lo yugu' bönni' judío bulu'zë nágagaquië' didza' bë'ë Pablo, ate' ni'irö gula'bödxi'ë. Gulu'ë zidzaj didza', ta'nnë':

—¡Guli'gútië' bönni' ni! ¡Bíti'rö ral-la' soë' ibanë!

²³ Ni'irö tu' ta'bödxi'ë, en ta'chözë' le nácugaquië' lu yöl-la' rilé quégaquië', en tu'chejë' bëchtö yu lu bo'ös, ²⁴ bönni' lo na' rinná bë'enë' bönni' rójáquië' gudil-la gunná bë'ë ulu'gu'ë Pablo lu yu'u zxon na'. Lësca' gunná bë'enë' légaquië' ila'guinë' Pablo para quíxjö'ë le nácatë, para ila'nözinë' bizx que na' ta'bödxi'ë bönni' judío caní queë' Pablo. ²⁵ Cate' gulúgui'ë lë' du guidi para ila'guinë' lë', Pablo gudxë' tu bönni' nacu'ë lu në'ë bönni' rójáquië' gudil-la zoë' ni', rnnë':

—¿Naru' dë lataj quínili' neda'? Nababa' Roma, ate' cuntu nu buchi'a busörö neda' channö nabág'a xígua'.

²⁶ Cate' bönni' na' biyönnë' lë ni, guyijë' yöjtíxjö'iñë' bönni' lo na' rinná bë'enë' bönni' rójáquië' gudil-la. Rë' lë':

—¿Bizxi caz ni runru'? ¡Bönni' ni nababë' Roma!

²⁷ Ni'irö bidë' bönni' lo na' ga zoë' Pablo, en gudxë' lë':

—¡Gudixjö! ¿Naru' nababu' li' Roma?

Pablo gudxë' lë':

—Ön, nababa'.

²⁸ Bubi'ë didza' bönni' lo na', gunnë':

—Neda' ni, dumí zián gudizxa' para ibaba' Roma.

Ni'irö Pablo gudxë' lë':

—Neda' gubaba' Roma cate' ni' gulja' tu' nabábagaquië' xuz xiná'a Roma.

²⁹ Cate' bönni' na' chizóa ila'guinë' lë' bila'yönnë' lë ni, la' bulu'bíga'të' ga zoë' Pablo. Lësca' güdxinë' bönni' lo na' cate' gunözinë' nababë' Pablo Roma, tu' chigunná bë'ë ilúgië' lë'.

Ridxineë' Pablo lógaquië' bönni' yudo' tu'chi'a tu'söröe'

³⁰ Dza buropi ni', gú'unne' bönni' lo na' inözinë' gazxi ga rë' bizxi na' yugu' bönni' judío tu'zéguië' Pablo didza'. Gunná bë'ë bulu'sedxë' du guíë na' nágue'ë Pablo, ate' gunná bë'ë ulu'dubë' bixúz unná bë' judío, en yúgu'të

bönni' yudo' tu'chi'a tu'söröë'. Ní'irö bubéajë' Pablo ga na' nagú'ugaquïë' lë', ate' buzöë' lë' lógaquïë'.

23

¹ Ní'irö buyúdë'ë Pablo lógaquïë' bönni' yudo' tu'chi'a tu'söröë' na', en gunnë':

—Libí'ili', böcha'a. Ga ridxitë na'a riböza' dxí'ado'. Caní naca, biti' zoa le ruxösa ládxida'ahua' neda' lahuë' Dios.

² Ní'irö Ananías, bixúz lo, gunná bë'enë' nupa nacuá' cuita lë'ë Pablo ila'gápë'ë ru'ë. ³ Pablo gudxë' lë':

—Lëzca' caní Dios ubi'ë quiu', li', rulü'isö tsahui' cuinu'. ¿Naru' rö'ö cazu' ruchi'a rusöröu' neda' ca rinná bë' xibá, pero ridödi bë'tso' ca rinná bë' xibá na', na' rinná bë'enu' ila'gápë'ë neda'?

⁴ Nupa nacuá' ni' të Pablo:

—¿Naru' rulidza zi'tso'-në' bixúz lo queë' Dios?

⁵ Pablo gudxë' lógaquïë':

—Libí'ili', böcha'a. Nazúaj lu guichi, rnna: “Biti' ulidza zi'u nu rinná be'e bönochí uládz quiu”, pero neda' biti' gúquibe'eda' náquië' bixúz lo.

⁶ Ní'irö gúquibe'enë' Pablo bal-lë' nácagaquïë' bönni' yudo' saduceo, ate' ia'bal-lë' bönni' yudo' fariseo. Ní'irö bë'ë zidzaj didza' lógaquïë' bönni' yudo' tu'chi'a tu'söröë' na', gunnë':

—¡Libí'ili', böcha'a! ¡Naca' bönni' fariseo, en naca' zxí'inë' tu bönni' fariseo! ¡Na'a ruchi'a rusöröli' neda' tu' runa' löza ulu'bán nupa chinátigaca!

⁷ Cate' bë'ë Pablo didza' ni, bila'rúajë' choplö yugu' bönni' yudo' fariseo, en yugu' bönni' yudo' saduceo, ate' gula'dil-la dídzë'ë la' lágacaseë'. ⁸ Caní gulunë' tu' ta'nnë' bönni' saduceo na' biti' ulu'bán nupa chinátigaca, en biti' nacu'ë gubáz lá'ayi, en biti' nacuá' bö' nácagaca caz bönochí, pero ta'yéajlë'ë bönni' yudo' fariseo nácgaca yúgu'te lë ni. ⁹ Que lë ni na' gula'bödxi'ë. Ní'irö gula'yasë' bönni' nazédagaquïë' xibá queë' Dios, yugu' bönni' yudo' fariseo, en gula'dil-la dídzë'ë, ta'nnë':

—Rusáca'tu' queétu' biti' bi dö' nu'ë bönni' ni. Channö tu bö' naca caz bönochí bë'len lë' didza', o channö tu gubáz lá'ayi queë' Dios bë'lenë' lë' didza', biti' ral-la' tá'baga'ru'-në' Dios.

¹⁰ Cate' chita'díl-lada' dídzë'ë bönni' judío na', gúdxinë' bönni' lo na' rinná bë'enë' bönni' rójáquië' gudil-la, tu' réquinë' ulu'zxuzzaj ulu'quinnajë' Pablo. Ní'irö gunná bë'enë' bönni' rójáquië' gudil-la tsöjléajgaquïë' Pablo ladaj bönni' judío na', en ulu'chë'ë lë' lu yu'u zxön ga na' nagá'anagaquïë' bönni' na' rójáquië' gudil-la.

¹¹ Cate' chinaca chi'i dzö'ölö la' dza ná'asö, bulu'i lahuë' Xanru' ga zoë' Pablo, en gudxë' lë':

—Butipa ládxu'u, Pablo. Ca na' chibenu' ba nalí quia' Jerusalén ni, lësca' run bayudxi gunu' ba nalí quia' lu yödzö Roma.

Tun xtídza'gaquïë' ilútië' Pablo

¹² Cate' za' rení' ia'tú dza, gulún xtídza'gaquïë' bal-lë' bönni' judío, en gulún tsutsu xtídza'gaquïë', ta'nnë' gunë' Dios lágäquïë' xíguia' channö cabí ilunë' lë' na' gulún xtídza'gaquïë', gula'nnë' biti' ca' ilë'aj ilahuë' ga idixinrö chigulútië' Pablo. ¹³ Nayánrö ca choá'gaquïë' bönni' na' gulún tsutsu xtídza'gaquïë' caní. ¹⁴ Yójáquië' bönni' ni ga nacu'ë yugu' bixúz unná bë', en bönni' gula tu'zéajni'inë' bönochí judío, ate' gula'nnë':

—Chiben tsutsu xtídz'a'tu', gunnatu' gunë' Dios netu' xíguia' channö cabí guntu' caní. Biti' guí'aj gágutu' ga gútirötu'-në' Pablo. ¹⁵ Na'a, libí'ili', en bönni' yudo' tu'ch'i'a tu'söröe', guli'guí'e bönni' lo rinná bë'enë' bönni' rójáquië' gudil-la idichë'ë Pablo cuoxö para idixinë' ga nudúbili', innali' rë'ënili' inábili'-në' Pablo tu didza' gate ga rë'. Netu' cõ'ö nistu'-në' la' nöza, ate' gútitu'-në' zí'alö ca idxinë' ni.

¹⁶ Biyönbí' bi'i bönni' queënu nigula zanë' Pablo ca na' ila'bö' nísië' Pablo, ate' guyéajbi', en guyú'ubi' yu'u zxön na', ate' yöjtixjö'ibí'-në' Pablo. ¹⁷ Pablo bulidzë' tuë' bönni' nacu'ë lu në'ë bönni' rójáquië' gudil-la en gudxë' lë':

—Guchë'ë-bi' bi'i ni lahuë' bönni' lo, tu' nuá'abi' didza' guiébi'-në'.

¹⁸ Ní'irö bönni' na' gudélë'ë-bi', en guchë'ë-bi' ga na' zoë' bönni' lo na', ate' gudxë' lë':

—Bulídzë' Pablo, bönni' na' yu'ë lidxi guíë, neda', en gúta'yuë' lahu'a idigu'a-bi' bi'i ni lo', tu' rë'ënibí' güü'lenibi' li' didza'.

¹⁹ Bönni' lo na' gudélë'ë-ná'abi', en guchë'ë-bi' quez, ate' gunábinë'-bi', rnnë':

—¿Bizxi na' ral-la' guío' neda'?

²⁰ Lëbi' gúdxibi'-në':

—Chinúngaquië' didza' bönni' judío iláta'yuë' lo' ichë'u-në' Pablo cuoxö, para idixinë' lógaquië' bönni' yudo' tu'ch'i'a tu'söröe'. Ilë' li' të'ënnë' ila'nábinë' lë' tu didza' gate ga rë', ²¹ pero biti' tséajlë' le ila'nnë' tu' nadödi choá'gaquië' ila'bö' nísië' Pablo. Chigulún tsutsu xtídzë'ë gula'nnë' gunë' Dios légaquië' xíguia' channö cabí ilútië' lë'. Biti' bi ilë'aj ilahuë' ga idixinrö ilútië' lë'. Chizóagaquië' ta'bözë' si' lu no'o gunu' le ila'nábinë' li'.

²² Ní'irö bönni' lo na' rinná bë'enë' bönni' rójáquië' gudil-la gunná bë'enë'-bi' cuntu nu guiébi' lë na' chigúdxibi' lë', ate' ní'irö busól-lë'ë-bi' bi'i ni.

Ridxinë' Pablo lahuë' Félix, bönni' rinná bë'ë luyú na'

²³ Ní'irö bönni' lo na' bulidzë' chopë' bönni' nacu'ë tu gáyú'ë bönni' rójáquië' gudil-la lu ná'agaquië' tu tuë', ate' gunná bë'enë' légaquië' ulu'cözë' chopa gáyú'ë bönni' rójáquië' gudil-la ta'zë'e ní'agaquië', en tsönnalalaj yu' chie' bönni' rójáquië' gudil-la dxíagaquië' bö'a', en chopa gáyú'ë bönni' rójáquië' gudil-la ilu'ë yaga tuchi' para tsöjáquië' yödzö Cesarea idú ridödi xtsö'. ²⁴ Lësca gunná bë'enë' légaquië' ulu'cözë'-ba' tu bö'a' cuíë'-ba' Pablo, ate' ila'chë'ë lë' dxí'ado', cabí bi gaca queë', para idxinë' lahuë' Félix, bönni' lo rinná bë'ë uláz que Roma.

²⁵ Gusól-lë'ë ca' tu guichi le rnna caní:

²⁶ “Neda', Claudio Lisias, ruzúaja' quiu' lu guichi, bönni' lo unná bë', Félix. Rugapa' Dios li'.

²⁷ 'Bönni' ni risöl-la'a-në' quiu', gula'zönë' bönni' judío lë', en gulé'ënnë' ilútië' lë'. Cate' gúquibe'eda' nababë' Roma, guchë'gaca'-në' bönni' rójáquië' gudil-la, en busólá'-në' lu ná'agaquië' judío na'. ²⁸ Gú'unida' inözda' bizxi benë', lë na' tu'zéguïë' lë' didza' bönni' judío, ate' guchë'a-në' lógaquië' bönni' yudo' tu'ch'i'a tu'söröe' légaquië'. ²⁹ Cate' buédxí didza', gunözda' tu'zéguïë' lë' didza' ca naca le rinná bë' xibá quégäquië', en biti' bi nabáguë'ë bönni' ni para nu guti lë', o nu cu'u lë' lidxi guíë. ³⁰ Ní'irö cate' bidxín nu gudíxjö'i ned'a' ta'bö' nísië' yugu' bönni' judío lë', la' gusól-la'tea' lë' ga zu', ate' gunná bë'egacada'-në' bönni' ni tu'zéguïë' lë' didza' ila'dxinë' lo' li', para ila'guíxjö'i'inë' li' bi didza' nápagäquië' lë'. ¡Dios gun tsáhuë'ë li'!"

³¹ Ní'irö bönni' na' rójáquië' gudil-la gula'guélë'ë Pablo, en gulunë' ca na' chigunná bë'enë' légaquië', ate' gula'chë'ë lë' yödzö Antípatris, ni' naca chi'i

dző'ölö. ³² Cate' za' rení' ia'tú dza bönni' röjáquië' gudil-la ta'zé'e ní'agaquië' yöjhüöjgaquië' Jerusalén, ate' bönni' röjáquië' gudil-la dxíagaquië' böa' bulu'u'ë nöza, dzágagaquië' Pablo. ³³ Cate' bönni' na' röjáquië' gudil-la nachë'gaquië' Pablo bila'dxinë' Cesarea, bulu'nödziej' guichi na'lú në'ë bönni' rinná bë'ë uláz que Roma, en bulu'sudxinë' Pablo lahuë'. ³⁴ Gudödi bulabë' bönni' unná bë' guichi na', gunábinë' Pablo gazxi bönni' lë'. Cate' gúquibe'enë' nababë' luyú Cilicia, ³⁵ gudxë' lë':

—Yónida' le innó' cate' ila'dxín ni nupa tu'zegui li' didza'.

Ní'irö gunná bë'enë' ilún chi'ë lë' lu yu'u yúlahui' ga ribö'ë Herodes, bönni' rinná bë'ë, para uchi'a usöröe' böñachi.

24

Pablo ru'ë didza' uláz queë' lahuë' Félix

¹ Cate' chibizá'a gayu' dza, bidxinë' Ananías, bixúz lo, ni', ate' dzágagaquië' lë' bal-lë' bönni' gula tu'zéajni'inë', en Tértulo, tu bönni' nazë'ede'enë' didza'. Bila'dxinë' lahuë' bönni' unná bë', ate' gula'nnë' queë' Pablo. ² Cate' chibulu'lidzë' Pablo, ate' bidxinë' ni', gusí lahuë' Tértulo ruzéguï'ë lë' didza', rnne':

—Bönni' lo unná bë', Félix. Ni'a quiu' li' ruzi'tu' xibé le run tsahui' netu', ate' lu yöl-la' réajni'i quiu' rinná bë'enu' dxi'a böñachi uládz queëtu'. ³ Yúgu'të lë ni ruzí'tica'stu' xibé gáti'tës, ate' idú ládxı'tu' rëtu' li': "Xclenu'." ⁴ Na'a, para cabí upízxjarötu' li', ráta'yua' lo' gun zxön ládxu'u, yönnu' tu le do' guíetu' li'. ⁵ Gúquibe'etu' bönni' ni rigú'u yöl-lë'ë böñachi, en runë' ga ta'dá'baguë'ë yúlahui' yugu' bönni' judío nacu'ë idútë yödözlió, en náquië' bönni' lo quégagaquië' bönni' da'gaquië' bönni' Nazaret na'. ⁶ Lësca' gú'unnë' gun dítjanë' yudo' queëtu'. Que lë ni na' guzxöntu'-në', en gú'unitu' uchi'a usörötu' lë' ca naca xibá queëtu'. ⁷ Ní'irö Lisias, bönni' lo rinná bë'enë' bönni' röjáquië' gudil-la bidxinë' ga zóatu', en lu yöl-la' sínia' zxön bugüë' bönni' ni lu na'tu'. ⁸ Ní'irö gunná bë'enë' Lisias na' ídigaca nupa tu'zegui lë' didza' lo' li'. Na'a, li' caz, cate' rinabi yúdxinu'-në' Pablo ni, huáca inözinu' gate ga re' yúgu'të lë ni ruzéguitu' lë' didza'.

⁹ Lësca' caní gula'nnë' yugu' bönni' judío ni', gula'nnë' naca caz caní.

¹⁰ Ní'irö butásö në'ë bönni' rinná bë'ë uláz que Roma na' para gu'ë didza' Pablo, ate' lë' bubí'ë didza', gunnë':

—Idú ládxı'a quíxjö' a ca naca le runa', tu' chinaca zián iz ruchi'a rusöröu' le raca quégaca böñachi ladztu'. ¹¹ Le bena' huáca inabu'. Biti' réquini chinnu dza bidxina' Jerusalén para tseaj ládxı'a-në' Dios. ¹² Biti' yöjxáca'gaquië' neda' nu ridíl-lalena' didza', en biti' bena' ga ulu'tsatsa böñachi ga naca chila yudo', en cabí lu yu'u ga tu'dube' tu'sëdë' queë' Dios, en cabí lu yödzö. ¹³ Biti' ca' gaca ulu'béaj lië' yugu' lë ni tu'zéguïë' neda' didza'. ¹⁴ Lë ni rixóalëpa'lo'. Ca runa' xichinë' Dios quégagaquië' xuz xtó'otu' nalëbi ca le tu'sédinë' légaquië', pero bönni' judío ni tu'ë le: Le ridá'baga' Dios, tu' réajlë'a yúgu'të le rinná bë' xibá queë' Dios, enca' yúgu'të le bulu'zúa'je' bönni' gulu'ë didza' uláz queë' Dios. ¹⁵ Ca na' légaquië' tunë' löza Dios, lësca' neda' runa' löza Dios, usubanë' nupa chinátigaca, böñachi tsahui', en böñachi biti' nácagaca tsahui'. ¹⁶ Que lë ni na' ru'í ládxı'tica'sa' cabí ibág'a le gun ga uxös ládxı'da'ahua' neda' lahuë' Dios o lógaca böñachi.

¹⁷ 'Gudödi zoa' ga yúbölö idú chopá tsonna iz, budxina' ga nacuá' böñachi uládz quia' para unödza' dumí le gácalen böñachi yechi', en unödza' le rigu'a

lahuë' Dios. ¹⁸ Tsanni ni' runa' caní, bal-lë' bönni' judío narúajgaquië' luyú Asia bidixáca'gaquië' neda'. Ni' zoa' lö'a yudo', nubéaj dxi'a cuina' ca naca que yudo', en cabí nutuba' bönnachi zián, en cabí nuna' ga ulu'tsatsa bönnachi. ¹⁹ Yugu' bönni' judío ni' ral-la' ila'dxinë' lo' lí', en ulu'zéguë' neda' didza' channö nápagaquië' neda' didza'. ²⁰ Ila'nnátsöquië' bönni' judío ni channö bulu'dzölinë' bi le cabí naca dxi'a bena' cate' ni' bidixina' lógaquië' bönni'yudo' tu'chi'a tu'söröe' légaquië'. ²¹ Tuz cate' ni' zoa' lógaquië', bë'a zidzaj didza', gunnä': "Ruchi'a rusöröli' neda' na'a tu' runa' löza ulu'bán nupa chinátigaca."

²² Cate' biyönnë' Félix didza' ni, en dxi'ado' chinözinë' ca naca que lë na' rusédinë' Pablo, buzé láhui'sé' ca' didza' bizxaj ni, gunnë':

—Catí idixinë' Lisias, bönni' lo rinná bé'enë' bönni' rójáquië' gudil-la, údxi yónida' ca naca didza' bizxaj queëli'.

²³ Ní'irö Félix gunná bé'enë' tu bönni' nacu'ë lu në'ë bönni' rójáquië' gudil-la zoë' ni', gun chi'ë Pablo, pero gu'ë lë' lataj të' lö'a, en biti' uzáguë'ë xinözgaquië' böch'i luzë'ë duyúgaquië' lë' bi dxin ilunë' queë'.

²⁴ Chopá tsonna dza gudzé, bidë' leyúbölö Félix na'. Drusila, nigula queë' dzáganu lë'. Nácanu nigula judío. Félix bulidzë' Pablo, ate' buzé náguië' xtídzë'ë ca naca le réajlé'ëru' Jesucristo. ²⁵ Cate' bë'ë didza' Pablo ca ral-la' gácaru' tsahui', en inná be'e cuinru', ate' idixinru' ga uchi'a usöröe' Dios rë'u dza si'za', ní'irö gudxi bidzöbinë' Félix, en gudxë' Pablo:

—Guyéaj na'a. Cate' gapa' lataj ulidza' lí'.

²⁶ Lësca' gú'unnë' Félix si'ë dumí le unödziejë' Pablo lë' para usanë' lë', ate' que lë ni na', zián luzuí bulidzë' Pablo, en bë'lenë' lë' didza'. ²⁷ Cate' bizá'a chopá iz guyázië' Porcio Festo xilatjë' Félix, ate' tu' gú'unnë' Félix gunë' le tsaza ládzi'gaquië' bönni' judío, bucá'anë' Pablo nadzunë' lidxi guíë.

25

Ridxineë' Pablo lahuë' Festo, bönni' unná bë'

¹ Bidxinë' Festo yödzö Cesarea para tsázië' xilatjë', gáquië' bönni' unná bë' ulaz que Roma. Cate' bizá'a tsonna dza buzé'ë yödzö na', sa'yéajë' Jerusalén.

² Cate' bidxinë' Festo ni' yugu' bixúz unná bë', en yugu' bönni' lo quégaca bönnachi judío bila'dxinë' lahuë' para ila'nnë' queë' Pablo, ate' guláta'yuë' lahuë' Festo ³ bi uzá' ládxë'ë quégagaquië', isö'l-lë'ë nupa tsöjxi'gaca Pablo, para udxinë' Jerusalén. Gulë'ënnë' ila'bö' nísië' lë' la' nöza para ilútië' lë'. ⁴ Bubi'ë didza' Festo, gudxë' légaquië':

—Lu yödzö Cesarea nadzunë' Pablo, ate' ral-la' tseja' ni' cuxö huidzaj nisö. ⁵ Que lë ni na', nútí'tëslöli' dë lu ná'ali', ral-la' sá'lenli' neda', en channö nabáguë'ë bönni' ni' xíguia', huáca uzéguili'-në' didza' ni'.

⁶ Gudzenë' Festo Jerusalén idú ca xunu' gubidza, ate' ní'irö böajë' Cesarea. Cate' guzá' rení' ia'tú dza gurö'ë ga ruchi'a rusöröe', en gunná bé'enë' nupa tsöjxi'gaca Pablo. ⁷ Cate' chibidxinë' Pablo ni', yugu' bönni' judío narúajgaquië' Jerusalén gula'gu'ë lë' lë' alö, en zián le gula'nnë' queë'. Bulu'zéguë' lë' le tu'subáguë'ë lë' xíguia', pero biti' guca ulu'béaj lië' yugu' lë na' gula'nnë' queë'.

⁸ Ní'irö bë'ë didza' Pablo uláz queë', gunnë':

—Bití' bille ruá' dö' bena' que xibá quégagaquië' bönni' judío, en cabí que yudo' quégagaquië', en cabí queë' César, bönni' Roma, rinná bé'enë' rë'u.

⁹ Gú'unnë' Festo gunë' le ila'yaza ládzi'gaquië' bönni' judío, ate' bubí'ë didza', gudxë' Pablo:

—¿RÉ'ënu' so'o Jerusalén, ga na' soa nu uchi'a usörö li' ca nácagaca lë ni ta'nné' quiu'?

10 Bubi'ë didza' Pablo, gudxë' lë:

—Zoa caza' ga rö'ö nu ruchi'a rusörö uláz queë' César, ga na' ral-la' uchi'a usöröu' neda'. Biti' bi huiá' dö' nuna' quégagaquië' bönni' judío, ate' chinöz quézinu' lë ni. **11** La'tu' nuna' tu le ruá' dö', o biti'tës le run ga ibága'a xíguia' gátia', biti' tá'baga'a gátia'. Na'a, channö cabí nuna' ca ta'nné' quia' bönni' ni, cuntu cuz nu dë lu né'e udödi neda' lu ná'agaquië'. Rinaba' tseja' lahuë' César ga udxia' urö' quia'.

12 Cate' Festo chibé'lenë' yugu' bönni' yúlahui' didza', bubi'ë didza', gudxë' Pablo:

—Chigunábu' tseju' lahuë' César. Lahuë' César uyiju'.

Ru'ë didza' Pablo lahuë' Agripa, bönni' unná be'

13 Gudödi chopá tsonna dza, bidxinë' Agripa, bönni' rinná bë'ë lu yödzö Cesarea, dzáganan Berenice lë, duyúgaquië' Festo. **14** Cate' chigula'cu'ë ni' zián dza, Festo bului'inë' Agripa, bönni' rinná bë'ë, ca naca queë' Pablo. Gudxë' lë:

—Zoë' tu bönni' ni bucá'anë' Félix lë' lidxi guië. **15** Cate' guzóa' Jerusalén, yuga' bixúz unná bë', en bönni' gula tu'zéajni'inë', bila'dxinë' lahua', ate' gula'mnë' queë' bönni' ni. Gula'nábinë' neda' ichuga' queë' gátie'. **16** Neda' bubi'a didza', gudxa' légaquië' biti' nalébiguequinë' bönni' Roma ila'chúguië' queë' tu bönni' gátie' channö cabí ila'dxiní lahuë' nupa tu'zegui lë' didza', para gaca ubi'ë didza' ca naca lë na' ta'nné' queë'. **17** Que lë ni na', cate' bila'dxinë' légaquië' ni, biti' ca' gudzeda', pero cate' guzá' guyeaní ia'tú dza gurö'a ga ruchi'a rusöröa', ate' gunná bë'eda' nupa yöjxígaca bönni' ni. **18** Cate' gula'cu'ë ni bönni' na' tu'zéguië' lë' didza', biti' bi gula'mnë' queë' ca busaca' quia' ila'nnë'. **19** Gula'mnë' queë' bal-la didza' bizzaj ca naca le ta'yéajlë' Dios, en ca naca queë' tu bönni' lë' Jesús, nu na' guti, pero Pablo runë' tsutsu xtídzë'ë rnne' ni zoë' nabane' leyúbólö. **20** Tu' buchíxida' ca nácagaca lë ni, gunábida'-në' Pablo channö rë'ënë' tsejë' Jerusalén, ga ni' soa nu uchi'a usörö lë' ca nácagaca lë ni. **21** Ní'irö cate' gunabë' Pablo tsejë' lahuë' Augusto César para uchi'a usöröe' lë' ni', gunná bë'eda' bönni' rójáquië' gudilla ilún chí'igare' lë' cate' gála'rö dza isöl-la'a-në' lahuë' César.

22 Ní'irö Agripa gudxë' Festo na':

—Lézcá' neda' rë'ënda' yönida' le innë' bönni' na'.

Festo gudxë' lë:

—Cuxó' yönnu' le innë'.

23 Cate' za' rení' ia'tú dza, len ba zxön bila'dxinë' Agripa, en Berenice ni'. Gula'yázië' ga ral-la' ilu'ë didza', dzágagaquië' légaquië' bönni' unná bë', ate' gula'söl-lë'ë nupa tsöjxígaca Pablo. **24** Ní'irö Festo gudxë' Agripa, bönni' unná bë':

—Bönni' unná bë', Agripa, en yúgu'téli' zóali' ni tsözxöñ len netu'. Ni zoë' rilé'eli'-në' bönni' na', ta'nné' queë' yúgu'té bönni' judío nacu'ë Jerusalén, enca' nupa nacua' ni, té' neda' ral-la' gátie'. **25** Runi neda' biti' bi benë' le nabáguë'ë xíguia' gátie', pero tu' gunabë' lë cazë' tsejë' ga uchi'a usöröe' Augusto César lë', que lë ni na' chinuna' quia' isöl-la'a-në' lahuë' Augusto. **26** Tu' cabí nözdä' bi ral-la' uzúaja' lu guichi le uzegui bönni' ni didza' para isöl-la' a lu në'ë César, xana', que lë ni na' nachë'a-në' loli', en le nácarö lo, nachë'a-në' lo' li', Agripa, bönni' unná bë', para cate' údxi rinábini yudxu'-në', ní'irö inözdä' bi ral-la'

uzúaja' lu guichi ca naca queë' bönni' ni. ²⁷ Réquida' biti' naca dxi'a isöl-la'a-në' nu bönni' náguë'ë ni' channö cabí gaca ulu'a le nabáguë'ë.

26

Didza' bë'ë Pablo uláz queë' lahuë' Agripa, bönni' unná bë'

¹ Ní'irö Agripa gudxé' Pablo:

—Dë lataj gu'u didza' uláz quiu'.

Buchila né'ë Pablo lahuë' Agripa, ate' gunsi lahuë' ru'ë didza', rnnë':

² —Bönni' unná bë', Agripa. Raza ládx'a tu' dë lataj na'a gu'a didza' uláz quia' lo' li' ca naca yúgu'të le tu'zéguïë' bönni' judío neda' didza'. ³ Raza ládx'i'ra' tu' núnbe' u yúgu'të le nalébiguequinë' tunë' bönni' judío, enca' yugu' lë ni ridil'-latu' didza'.

Yugu' le benë' Pablo zí'atélo

⁴ Gunnë' ca' Pablo:

—Nózguequi quézinë' yúgu'të bönni' judío ca na' bena' ga gudéla'të cuídia' ga nacuá' bónachi uládz quia', enca' lu yödzö Jerusalén. ⁵ Nózguequi quézinë' ca', en huáca ila'guíxjö'ë ca na' bena' dza ni'te. Guca' bönni' fariseo. Yugu' bönni' fariseo tu'i ládx'i'gacaré' ila'yéaj ládx'i'gaquïë' Dios ca tunë' ia'zíca'rë' bönni' judío. ⁶ Na'a, zoa' ni lolí' para nu uchi'a usörö neda' tu' runa' löza Dios, usubanë' bönni' nati, en gunë' ca na' guzxi' lu né'ë lógaquië' xuz xtó'otu'. ⁷ Tunë' löza yugu' bönni' idxinu' cö' di'a dza queëtu' ila'déli'në' lë na' guzxi' lu né'ë Dios. Que lë ni na' ta'yéaj ládx'i'gaquïë' Dios, en tunë' xichinë' rëla, en té dza. Tu' runa' löza lë ni, nuzéguiquäquië' bönni' judío neda'. Caní naca, bönni' unná bë', Agripa. ⁸ Na'a, ¿naru' réquitselí libí'ilí biti' naca le tséajlé'ëru', usubanë' Dios bönni' nati?

Pablo gudxía ládxë'ë böñachi queë' Cristo

⁹ Gunnë' ca' Pablo:

—Lëzcá' neda', zí'atélo gúquida' le zián ral-la' guna', tá'baga'a-në' Jesús, bönni' Nazaret. ¹⁰ Caní bena' lu yödzö Jerusalén. Gulu'a zián bónachi ta'yéajlé' Jesús lidxi guíë, tu' bulu'dödë' yugu' bixúz unná bë' lu na'a yöl-la' unná bë'. Cate' gulútië' böñachi ni', bénlena' légaquië' tuz didza'. ¹¹ Zián luzuú busaca' zi'a yugu' bönni' ni' para ulu'sán ládx'i'gaquïë' ca ta'yéajlé'ë Cristo. Caní bena' gapa naca lu yu'u ga tu'dubë' bönni' judío, en tu'sëdë' queë' Dios. Guléde'eda' légaquië', ate' gudxía ládx'a' légaquië' ga bidxitnë guyija' gapa nacuá' yödzö zi'tu' para tsöjxöngaca'-në'.

Riguíxjö'ë Pablo ca böáquië' queë' Cristo

¹² Gunnë' ca' Pablo:

—Para guna' caní guyija' yödzö Damasco, ate' bixúz unná bë' nasölla'gaquïë' neda' nudödigaquïë' lu na'a yöl-la' unná bë'. ¹³ Caní guca, bönni' unná bë', Agripa. Cate' ni' sa'yija' la' nöza, ni' naca idú huagubidza, bilé'eda' tu bení' lúzxiba le buzení'rö ca gubidza. Buzení' ga na' zoa', en ga nacuá' nupa söjácalen neda'. ¹⁴ Ní'irö yúgu'tetu' gudzö'ötü' lu yu, ate' biyonda' chi'i nu bulidza neda'. Bë'ë didza' hebreo, gunnë': "Saulo, Saulo, ¿bizx que ribía ládx'u neda'? Run zi' cuinu', ridá'bagu'u neda'. Raca quiu' ca raca queë' bëwdxí, run zi' cuinu', richégu'ba' yaga tuchi' le túndë'ë-ba' zi'." ¹⁵ Ní'irö gudxa'-në': "¿Nuzxi li', Xan?" Xanru' gudxë' neda': "Neda' ni Jesús, Nu na' ribía ládx'u. ¹⁶ Na'a, guyasa, en guzuí, tu' bulu'i lahua' li' na'a, para uzóa' li' gunu' xichina', en gunu' ba nalí que lë ni chibilé'enu', enca' quégaca le

ulu'i'ida' li', ulu'i' lahu'a ga zu'. ¹⁷ Usólá' li' lu ná'agaquië' bönni' uládz quiu', en lu ná'agaquië' bönni' izá'a, lógaca nupa ni' risól-la'a li' na'a. ¹⁸ Risól-la'a li' ga na' nacu'ë para gunu' ga ulu'huöálaj guijö lógaquië', en ulu'huöáquië' queë' Dios, en ulu'cá'ané' le naca chul-la que dul-la', en ila'dxinë' lu bení'. Ulu'rúajë' lu na' Satanás tu' xihui', en ila'yázië' lu në'ë Dios. Channö ila'yéajlé'ë neda', Dios uniti lahuë' légaquië', en ugüé' dul-la' nabága'gaquië', ate' ila'déli'në' ila'bábalenë' bönachi chinubéaje' Dios quez queë'."

Benë' Pablo ca naca le bulu'inë Xanru' lë'

¹⁹ Gunnë' ca' Pablo:

—Qui lë ni na', bönni' unná bë', Agripa, biti' gudá'baga'a guna' le bulu'inë' Dios, zoë' yehua' yubá, neda'. ²⁰ Buzéajni'ida' nupa nacuá' yödzö Damasco, en gudödi ni' nupa nacuá' Jerusalén, en nupa nacuá' luyú Judea, en bönachi yugu' yödzö zí'tu' para ulu'bí'i ládxí'gaca, en ulu'huöáca queë' Dios, en ilún le ilaca bë' chibulu'bí'i ládxí'gaca. ²¹ Tu' bena' caní, yugu' bönni' judío gula'zönë' neda' cate' ni' zoa'lö'a yudo', en gulé'ënné' ilútië' neda'. ²² Ní'irö gúcalenë' Dios neda', ate' ga ridxintë na'a dza zoa' idú ládx'a, runa' ba nalí lógaquië' bönni' cá'asö, en lógaquië' bönni' lo. Biti' ruá'a didza' yúbólö, pero ca gula'nnasë' zí'alö bönni' gulu'ë didza' uláz queë' Dios, enca' ca gunnë' Moisés ca ral-la' gaca. ²³ Gula'nnë': "Qui'i sáquë'ë Cristo, en tödi gátië', gáquië' nu isí lo ubán tsaz lu yöl-la' guti, para ulu'ë lahu'i naca löza ila'dxín bönachi lataj bení', en gaca libán que lë ni lógaca bönachi uládz queëtu', enca' lógaca bönachi izá'a."

Pablo ruzéajni'inë Agripa para tséajlé'ë Cristo

²⁴ Cate' chibë'ë Pablo yugu' didza' ni, le bë'ë uláz queë', ní'irö bë'ë zidzaj didza' Festo, gunnë':

—¡Nachixi icju', Pablo! ¡Tu' nazédado'o, chiguchixi icju'!

²⁵ Ní'irö Pablo gudxë' lë:

—Biti' nachixi icja', rea' li', Festo, ate' didza' ni ruá'a naca idútë li, en naca lesaca'. ²⁶ Lë caze' Agripa, bönni' ni rinná bë'ë, nözinë' yugu' lë ni, en que lë ni na', idú ládx'a ruá'a didza' lahuë' lë. Nözinë' yugu' lë ni, tu' cabí guca bagáchi'sö lë na' guca. ²⁷ Bönni' unná bë', Agripa. ¿Naru' réajlë'u le gula'nnë' bönni' gulu'ë didza' uláz queë' Dios? Nözda' réajlë'u lë ni.

²⁸ Ní'irö Agripa gudxë' Pablo:

—Ia'láti'sö la' réquiu' idéli'nu' neda' para gaca' queë' Cristo.

²⁹ Pablo gudxë' lë:

—Ni'a queë' Xanru' Dios rë'ënda', sal-la' ia'láti'sö o yenni', calégasö li', pero lëscá' yúgu'të nupa ni ta'yöni neda', gácali' idú ca naca' neda', néquida' queë' Cristo, pero caléga gága'li' du guíe' ca ni nág'a neda'.

³⁰ Cate' budxi bë'ë Pablo didza' ni, guzuínë' bönni' lo unná bë' na', ate' gulanuínë' ca' bönni' rinná bë'ë, en Berenice, en nupa rö'lengaca légaquië'.

³¹ Cate' bila'rúajë' quez, gului'i xtídz'gaquië', ta'nnë':

—Biti' bi nunë' bönni' ni le nabáguë'ë xíguia' gátië', en caléga tsázië' lidxi guíe'.

³² Agripa gudxë' Festo:

—Huáca usanu'-në' bönni' ni la'tu' cabí gunabë' tsejë' lahuë' César ga uchi'a usöröë' lë'.

¹ Cate' chigulunë' quégaquië' ila'söl-lë'ë netu' lë'e barco para tséajtu' yödzö Roma, luyú Italia, gula'guélë'ë Pablo, en ia'bal-lë' nupa nadzungaca, ate' bulu'dödë' légaquië' lu në'ë Julio, tu bönni' rinná bé'enë' tu cö' bönni' rójáquië' gudil-la nazí'i le: Bönni' Queë' Augusto Rójáquië' Gudil-la. ² Gurentu' tu lë'e barco que luyú Adramitio, le ral-la' tödi yugu' yödzö gapa ta'dxín barco ga naca luyú Asia, ate' yú'usötu' ca' lë'e barco na', buzá'atu' yödzö Cesarea. Aristarco, tu bönni' yödz Tesalónica, le nababa luyú Macedonia dzáguië' netu'. ³ Cate' za' rení' ia'tú dza, bidxintu' yödzö Sidón, ate' ni' Julio, bönni' na' rinná bé'enë' bönni' rójáquië' gudil-la, lu yöl-la' dxí'i ladxi' queë', bë'ë Pablo lataj tsejë' ga nacu'ë böchí' luzë'ë para ilácalenë' lë' bi riyadzaj queë'. ⁴ Gudödi ni', bhubentu' lë'e barco, ate' buzá'atu' ni'. Gudöditu' tsölá'a ga dë luyú bidxi Chipre ga rö'ö dxí bö' na' recja, tu' za' saca' lotu' bö' recja lu nísado' na'. ⁵ Nírë gudöditu' lu nísado' ga nalá' luyú Cilicia, en luyú Panfilia, ate' bidxintu' Mira, tu yödzö nababa luyú Licia.

⁶ Bönni' na' rinná bé'enë' bönni' rójáquië' gudil-la, en nachë'ë netu', yöjxáquië' tu barco ni' narúaj yödzö Alejandría que luyú Egipto, barco na' zeaj luyú Italia ga rö' yödzö Roma. Gulu'ë netu' lë'e barco na'. ⁷ Guzá' barco na' tsahui' ládxido' zián dza, ate' len yöl-la' rizáca'sö bidxintu' ga nalá' tu luyú bidxi lu nísado' na' nazí'i le Gnido, ate' tu' ruzaga' netu' bö' na' recja, gudöditu' tsölá'a luyú bidxi nazí'i le Creta ga rö'ö dxí bö' na' recja, en bidxintu' ga nalá' yödzö Salmón luyú Creta na'. ⁸ Lu yöl-la' rizáca'sö gudöditu' tsölá'a ga dë luyú bidxi Creta na', en bidxintu' tu lataj ga ta'dxín barco, nazí'i le Buenos Puertos, le dë gala' ga na' dë yödzö Lasea.

⁹ Tu' chigudzéda'atu', chigula' zoa bönadxi gaca ditaj bíti'tës barco rizá' lu nísado' na', tu' chigudödi yugu' dza tunë' gubasa cate' si' idxín beo' ziaga cate' récjada' bö'. Que lë ni na' Pablo buzéajni' inë' légaquië', ¹⁰ rnnë':

—Libi'ili', bönni', réquibe'eda' ga tseaj barco ni, huazóa bönadxi gaca ditaj barco ni, en yua' dzö'ö lë'e, en lësca' soa bönadxi queéru' gátiru'.

¹¹ Bönni' na', rinná bé'enë' bönni' rójáquië' gudil-la, guyéajlë'ërë' le gula'nnë' bönni' na' dë lu në'ë barco, en bönni' xan caz, ca le gunnë' Pablo. ¹² Tu' cabí naca dxí'a lataj ni' ga ta'dxín barco, nazí'i le Buenos Puertos, para ulu'gá'anë' ni' yugu' beo' ziaga, que lë ni na' la'tu'biqu' yúgu'të bönni' nacu'ë lë'e barco na' gulún tuz xtidza'gaquië' ulu'zë'ë ni', channö huáca ila'dxinë' ga ta'dxín barco lu yödzö Fenice, lësca' dë luyú bidxi na' nazí'i le Creta, le dë tsölá'a ga ribía gubidza, ate' gulé'ennë' ulu'gá'anë' ni' yugu' beo' ziaga.

Recja bö' budunu' lu nísado'

¹³ Tu' recja tu bö'do' le za' saca' tsölá'a ga ridödi gubidza beo' ziaga, téquinë' chiraca ilunë' ca të'ënnë', ate' bulu'lise' guïë zi'i naga' du guïë le ruzúa dxisö barco, ate' gudödi barco na' gala' ra' luyú bidxi na' nazí'i le Creta. ¹⁴ Ia'tú chí'isö ca', guyecja tu bö' budunu' za' lotu', nazí'i le Euroclidón. ¹⁵ Tu' ruzéaj bö' na' recja barco na' tsölá'alö, ate' tu' cabí guca tseaj barco ga za' bö', nírë bë'ëtu' lataj bö' na' buzéaj barco na' ga rë'ëni. ¹⁶ Cate' gudödi barco na' ga bidxintu' tsölá'a tu luyú bidxido' nazí'i le Cauda, tsölá'a ni' ga biti' récjada' bö', lu yöl-la' rizáca'sö buchisatu' bárcodo' na'ayöj barco zxön na'yú'utu'. ¹⁷ Gudödi burentru' le lahui barco zxön na', nírë bégä'ratu' barco zxön na'. Zxante barco na' buchölitu' du, para cabí ilá'a lu le ridxía nisa na'. Tu' gúdxitu' tödi barco na', en inídxí' lu yuzxi lu nísado' na', buzötjatu' lari' que, le rutubi bö' rusá' barco na'. Caníso bë'ëtu' lataj bö' na' recja buzéaj barco. ¹⁸ Cate' za' rení'

ia'tú dza, en ni' ruzéajda' bö' budunu' recja barco na', ní'irö gurú'unatu' lu nísado' lati' yua' dzö'ö lë'e barco na'. ¹⁹ Dza bunni, len na' cuintu' gurú'unatu' le tun dxin que barco na' lu nísado'. ²⁰ Cate' chiguca zián dza biti' rilé'etu' gubidza, en nitú bólaj, en tu' récjada' bö' na' ruzéaj barco na' yú'utu', biti'rö runtu' löza ulatu'.

²¹ Tu' chiguca zián dza biti' nágatu', guzuínë' Pablo gatsaj láhui'lö légaquië', en gudxë' légaquië':

—Libi'ili', bönni', dxí'arö guca la'tu' uzé nágali' neda', en cabí uzá'aru' luyú Creta, en cabí udutságaru' lë ni rigu'i rizáca'ru', en yugu' lë ni raca ditaj que barco ni. ²² Na'a, rea' libi'ili': Tsutsu guli'gún ládxí'li', tu' cabí gátili' nituli' libi'ili' tscalí' zóali' ni, sal-la' gaca ditaj barco ni. ²³ Caní gaca tu' budulu'i lahuë' neda' gudiyëla tu gubáz lá'ayi queë' Dios. Dios ni néquida' queë', en runa' xichinë'. ²⁴ Gubáz lá'ayi na' gudxë' neda', gunnë': "Pablo, biti' gádxinu'. Run bayudxi idxinu' lahuë' César. Tu' nadxí'inë' Dios li', usölë' yúgu'te böhachi nacuá'len li' lë'e barco ni." ²⁵ Que lë ni na', tsutsu guli'gún ládxí'li', tu' ruzxöni ládx'a'a-në' Dios, gaca ca na' chigudxë' gubáz lá'ayi queë' neda'. ²⁶ Caní gaca sal-la' run bayudxi gaca ditaj barco ni tu luyú bíxdido', ga ni' tsöjcá'ana rë'u.

²⁷ Cate' ni' chigudöi chidá' dza, ate' bö' na' recja ruzéaj barco na' lu nísado' nazí'i le Adriático, idú ladxi' yëla guléquinë' bönni' tunë' dxin lu barco na' chizóda idxín barco gala' tu luyú bidxi. ²⁸ Gula'rú'unë' du lu nísado' na', ate' gula'nözinë' galaj ösa naca ga bidxitné ga rë' lu nisa. Cate' gudödi barco na' ia'láti'do', gula'rú'unë' du na' leyúbölö, en gula'nözinë' chinaca chinu ösa. ²⁹ Tu' guládxinë' tsöjdín barco na' lu guiój, que lë ni na', tsölä'a láhuilö que barco gula'rú'unë' lu nísado' tapa guië zi'i nágaga'gaca du guíë le tu'zóa dxisö barco lu nisa. Lu yöl-la' ruúbi rugu'i isö ládxí'do'gaquië' gula'bözë'tsení'. ³⁰ Ní'irö gulé'ennë' bönni' tunë' dxin lu barco ulu'zxúnna'jë' lë'e barco na'. Bulu'zötje' bárcodo' na' dë lahuí barco zxön na' lu nísado'. Gulunë' ca té'ennë' ilu'ë ia'lati' zi'tu' guíë zi'i na' naga' du guíë le ruzúa dxisö barco na', le zoa saca' tsölä'a láhuilö. ³¹ Ní'irö Pablo gudxë' bönni' na' rinná bé'enë' bönni' röjáquië' gudil-la, tsözxön len bönni' na' röjáquië' gudil-la, gunnë':

—Channö cabí ulu'gá'anë' bönni' ni lë'e barco ni, biti' gaca uláli'.

³² Ní'irö bönni' na' röjáquië' gudil-la gula'chúgië' du naga' bárcodo' na', ate' gulu'ë lataj gubixi lu nísado'.

³³ Cate' chizá' rení', Pablo gúta'yuë' lógaquië' bi ilahuë' yúgu'të'. Gudxë' légaquië':

—Na'a chiguca chidá' dza rubéaj yëla loli', en runli' gubasa, biti' bi náguli'.

³⁴ Que lë ni na', ráta'yua' loli' gáguli' para huöáca ládxí'li', tu' cabí gátili' nituli' libi'ili'.

³⁵ Cate' Pablo budxi bë'ë didza' ni, gudélë'ë yöta xtila, en gudxë' Dios: "Xclenu'." Caní benë' lógaquië' yúgu'të'. Ní'irö buzzuzxjë' yöta xtila na', en gusí lahuë' rahuë'. ³⁶ Ní'irö bila'dipa ládxí'gaquië' yúgu'të', en gulahuë'. ³⁷ Tscatú' zóatu' lë'e barco na', gúcatu' idú chopá gayuá' yu' tsónnalalaj yu' chizzópatu'. ³⁸ Gudödi gulahuë', en bulu'huöljane', ní'irö gula'rú'unë' zxoa' xtila dë lë'e barco na' lu nisa, para ulu'lahuë' yua' dzö'ö lë'e barco na'.

Raca ditaj barco lu nísado'

³⁹ Cate' chiguca lahuí' dza, yugu' bönni' tunë' dxin lu barco na' biti' bulu'ünbe'ë luyú na'. Bila'lé'enë' ga röjrö' nisa zxön na' gatsaj láhui'lö luyú bidxi na', en dë lataj ni' ga naca lachi' ra' nísado'. Gulé'ennë' ilunë' ga tsaza

barco na' ga ni'. ⁴⁰ Ní'irö bulu'sedxë' yugu' du guië nága'gaca yugu' guië zi'i tu'zóa dxisö barco na', en bulu'sanë' léguequi, ate' gula'bixi lu nísado'. Bulu'sedxë' ca' du naga' në'e yaga le ruzecaj rudxi'i barco. Ní'irö bulu'chisë' lari' que le rutubi bö', le zoa tsölá'a láhuilö barco na', ate' ní'irö gusí lo ridödi barco saca' ga röjrö' nísado' gatsaj láhuilö luyú bidxi na'. ⁴¹ Cate' bidxín barco na' tu lataj ga ridzaga chopá nisa, ni' binidxi' tsölá'a láhuilö barco na' lu yuzxi lu nísado' na', ate' bugá'anaso barco na' ga ni'. Bíti'rö guca bi utá le, ate' tsölá'a cùdzilö barco na', gusí lo riguitsaj nísado' na' le, len yöllä' rizá' que. ⁴² Ní'irö bönni' röjáquië' gudil-la gulë'ennë' ilútië' bönni' nadzúngaquië', para cabí ila'zxúnnaejë', ila'zxóë' lu nisa na'. ⁴³ Bönni' na' rinná bé'enë' bönni' na' röjáquië' gudil-la gü'unnë' usölë' Pablo, ate' gunná bé'enë' bönni' na' röjáquië' gudil-la cabí ilunë' ca na' té'ennë'. Ní'irö gunná bé'enë' bönni' taca ila'zxóë' lu nisa, zí'alö légaquië' ila'yázië' lu nisa para ila'dxinë' luyú bidxi. ⁴⁴ Gunná bé'enë' ca' yugu' bönni' nagá'anagaquië' ila'zxóë' lu yaga dzö'ö láhuilö barco, en ia'bal-lë' láhuigaca yágado' que barco na'. Caní guca, bulu'lë' yúgu'të'. Canísö bila'dxinë' luyú bidxi na'.

28

Le benë' Pablo luyú bidxi nazi'i le Malta

¹ Cate' chibulatu' yúgu'tëtu', gunöztu' luyú bidxi ga na' zóatu' nazi'i le Malta. ² Bönni' xidza' nacu'ë luyú bidxi na' lu yöllä' dxi'i ladxi' quégäquië' gulunë' netu' bal. Gula'béquie' guí', ate' bulu'lidzë' netu' yúgu'tëtu' iditsë'e cuintu', tu' ralaj guiøj, en runda' ziaga. ³ Ní'irö Pablo gúchë'ë tu tsölén huágaga zxisi bídxido', en cate' gulu'ë le lu guí', birúajba' tuba' bëla sínia' lë'e huágado', rizzxúnnaiba' böchila que guí' na', ate' yöjtí'iniba' yen në'ë Pablo. ⁴ Cate' bönni' xidza' na' bila'lé'enë' bëla na', nála'ba' yen në'ë Pablo, gulë' tuë' ia'tué':

—Le nacatë bönni' ni náquië' nu rutí böñachi. Sal-la' bulé' lu nísado', dios queérü' lë' Tsahui' biti' ru'ë lë' lataj soë' ibañe'.

⁵ Gudxibi në'ë Pablo, en busládu'ë'-ba' bëla sínia' na'. Yöjxóatëba' lu guí', ate' lë' biti' bi guca queë'. ⁶ Bönni' xidza' nacu'ë ni' tu'yúë' Pablo, bátacalö cö'ë guí, o tsö'ötë' gátië'. Ní'irö cate' chigudzé ta'bözë', en bila'lé'enë' biti' bi raca queë', ia'tú le guléquinë', ate' gula'nnë' naca cazé' tu dios.

⁷ Lataj ní'isö dë xiyúë' Publio, bönni' lo que luyú bidxi na', ate' bönni' ni benë' netu' bal. Lu yöllä' dxi'i ladxi' queë' gulu'ë netu' lidxë' idú tsonna dza.

⁸ Dza na' dë' ré'enë' xuzë' Publio na', yu'ë xilá, en ré'enë' huë' rön. Guyázië' Pablo söjyúë' lë', en gudödi bulidzë' Dios, ní'irö guxóa në'ë bönni' huë' na', en bunë' lë'. ⁹ Tu' benë' Pablo lë ni, lëscá' bila'dxin nupa te'e ga zoë', nacu'ë luyú bidxi ni', en bulu'huöáquië'. ¹⁰ Yugu' bönni' ni gulunë' netu' bal, en zián le gulunë' queétu'. Cate' chizóa uzá'atu' luyú ni', bulu'nödzjë' yugu' le naquíntu' queétu'.

Ridxineë' Pablo lu yödzö Roma

¹¹ Cate' chiguca tsonna beo' zóatu' ni', ní'irö gurentu' tu lë'e barco que yödzö Alejandría, le bugá'ana luyú bidxi na' yugu' beo' ziaga. Barco ni dá'gaca tsölá'a láhuilö budó' yaga léguequi Cástor, en Pólux, dios bilidi' quégaca böñachi Alejandría na'. ¹² Buzá'ba' barco na' ga ni', ate' bidxín yödzö Siracusa, ga ni' bugá'anatu' tsonna dza. ¹³ Buzá'atu' ni', ate' gudödítu' tsölá'alö luyú ni', en bidxitu' yödzö Regio. Cate' za' rení' ia'tú dza, tu' recja bö' za' saca' ga ridödi gubidza beo' ziaga, buzá'atu' ni', ate' dza buropi na' bidxíntetu' yödzö

Puteoli luyú Italia. ¹⁴ Lu yödzö na' yöjxáca'tu' yugu' böchi'ru' ta'yéajlë'ë Cristo, ate' guláta'yuë' lotu' ugá'analentu' légaquië' idú xunu' dza. Cate' bizá'a dza na' búzá'atu' ni' para tséajtu' yödzö Roma, rizë'e ní'atü'. ¹⁵ Chibila'yonné' böchi'ru' nacu'ë Roma chizóa idxintu' ni', ate' bila'rúajë' idixí'gala'gaquië' netu'. Bila'dxinë' tu yödzödo' nazí'i le Yé'ëyi Que Apio. Ia'bal-lë' bila'dxinë' tu lataj nazí'i le Tsonna Yu'u Quégaquië' Bönni' Yú'ugaquië' Nöza. Cate' Pablo bilé'enë' légaquië', bidipa ládxë'ë, en gudxë' Dios: "Xclenu'."

¹⁶ Cate' bidxitu' Roma, bönni' na' rinná bé'enë' bönni' rójáquië' gudilla, guchë'ë bönni' na' nadzungaquië', ate' budödë' légaquië' lu në'ë tu bönni' lo rinná bé'enë' bönni' rójáquië' gudil-la, ate' bë'ë Pablo lataj soë' queézë', zóalenë' lë' tu bönni' rejë' gudil-la ruyúë' lë'.

Runë' Pablo libán lu yödzö Roma

¹⁷ Cate' chigudödi tsonna dza, bulidzë' Pablo yugu' bönni' lo quégaquië' bönni' judío nacu'ë Roma. Cate' chibulu'dubë' ga na' zoë' Pablo, lë' gudxë' légaquië':

—Libí'ili', böcha'a, sal-la' biti' bi bena' quégaca bönachi ládzaru', en calëga que le nalébiru' runru' ca na' gulunë' xuz xtó'oru', yugu' bönni' judío nacu'ë Jerusalén bulu'dödë' neda' lu ná'agaquië' bönni' Roma nacu'ë Jerusalén, ate' bulu'sayjë' neda' lidxi guíë. ¹⁸ Ní'irö cate' chigula'nabi yúdxinë' neda' bönni' Roma, gulé'ennë' ulu'sanë' neda', tu' guléquibe'enë' biti' nabága'a xiguia'gátia'. ¹⁹ Yugu' bönni' judío ní' gula'dá'bágue'ë nupa na' gulé'eni ulu'sán neda', ate' ben bayudxi gunaba'tseja'lahuë' César ga uchi'a usöröe' neda', en calëga para uzéguia' bönachi uládz queéru' didza'. ²⁰ Que lë ni na' bulidza' libí'ili' para ilé'eda' libí'ili', en güi'ilena' libí'ili' didza', tu' nága'a du guíë ni tu' runa' löza le runru' löza rë'u, bönachi Israel, gácatë lë na' guzxi' lu në'ë Dios gata' queéru'.

²¹ Ní'irö légaquië' gulé' Pablo:

—Biti' ridxini queétu' guichi le za' luyú Judea ca naca lë na' raca quiu', en cuntu nu ridxini nu naca böchi'ru' judío, nu usiyöni netu' channö nu bi rnnë quiu' le ruá' dö'. ²² Na'a, rë'ënitu' yönitu' xtídzu'u, lë na' riguinnaj icju', tu' chinözitu' ta'nnë bönachi yúgu'të lataj quégaca nupa nazí' lu në'eguequi xibá cubi ni.

²³ Caní guca, bulu'dxië' bë' tu dza, ate' dza na' bila'dxinë' ziánë' ga na' zoë' Pablo. Gusi' lahuë' Pablo zílado', ate' ni' gúl-li'ni' buzéajni'inë' légaquië', en buchila lá'anë' le rinná bë'ë Dios. Gú'unnë' ulu'i inë' légaquië' naca idútë li libán runë' queé' Jesús. Para gunë' caní bugunë' dxin le rinná bë' xibá queé' Moisés, enca'le gula'nnë' bönni' gulu'ë didza' uláz queé' Dios. ²⁴ Bal-lë' gula'zí' lu ná'agaquië' didza' bë'ë Pablo, pero ia'bal-lë' biti' ca' gula'yéajlë'ë. ²⁵ Tu' bila'rúajë' choplö, gula'sílógaquië' tu'zë'ë ni', ate' Pablo gudxë' légaquië', rnnë':

—Didza' nácatë bë'ë Dios Bó' Lá'ayi, lë na' gunnë' Isaías, bönni' bë'ë didza' uláz queé' Dios, ca na' buzéajni'inë' xuz xtó'oru', gunnë':

²⁶ Guyéaj lógaca bönachi ni', yöjödxí légaquië':

Yöni nágali', pero biti' tséajni'ili'.

Uyuli' iná'ali', pero biti' ilé'eli'.

²⁷ Yugu' bönni' ni chinazidi icja ládxí'do'gaquië', en biti' bi riyaza icja nágagaquië'.

Gulunë' ca tun nupa nachul-la guiöj lóguequi para cabí ila'lë'e len guiöj lóguequi, en cabí ila'yöni nágaguequi

para cabí ulu'zéajni'i ládxi'guequi,
en cabí ilë'ëni ulu'huöáca queë' Dios
para gaca una' léguequi.

²⁸ Na'a, ral-la' inózili' lë ni. Dios risöl-lë'ë netu' lógaca böñachi izá'a para
ulu'lágaca, ate' légaquie' ila'yönnë'.

²⁹ Cate' Pablo budxi bë'ë didza' ni, bila'rúajë' bönni' judío, ta'díl-lada' dídzë'ë
la' légacasë'.

³⁰ Idú chopá iz bugá'anë' Pablo ni', zoë' tu lu yu'u ga na' riguizxjë', ate' benë'
bal yúgu'të nupa buduyúgaca Lë'. ³¹ Lu yöl-la' rugu ladxi' benë' libán ca rinná
bë'ë Dios. Busédine' böñachi ca naca queë' Xanru' Jesucristo, ate' cuntu nu
buzaga' xinözë'. ¡Ca' naca!

DIDZA' GUSÖL-LË'Ë PABLO YÖDZÖ ROMA

Pablo rugapë' Dios bönachi queë' Cristo nacu'ë Roma

¹ Neda', Pablo, naca' bönni' nadó'o queë' Jesucristo, en gubáz queë', tu' bulidzë' Dios neda', en gurö cazë' neda' para guna' libán que didza' dxi'a queë'.

² Dza ni'te guzxi' lu në'ë Dios isól-lë'ë didza' dxi'a na' queëru'. Gunnë' caní lu ruá'agaquië' bönni' gulu'ë didza' uláz queë', ate' légaquië' bulu'zúajë' le lu guichi lá'ayi queë' Dios. ³ Bulu'zúajë' lu guichi yúgu'té le ral-la' gunë' Zxi'inë' Dios, Nu na' naca Xanru' Jesucristo. Lu yöl-la' bönachi queë' náquië' zxi'iní xi'sóë' David, ⁴ pero ca naca bö' naca cazë', le naca lá'ayi, naca bë' náquië' Zxi'inë' Dios, en nápadë'ë yöl-la' huáca. Naca bë' náquië' caní tu' bubanë' lu yöl-la' guti. ⁵ Ni'a que le benë' Jesucristo ruzí'iru' xibé le ruzá' ládxë'ë queëru' Dios, ate' benë' ga naca' gubáz queë' para uláz queë' Lë' guna' ga ila'yéajlë' bönnachi idútë yödzhölió Lë', en ilún ca rnna xtídzë'ë. ⁶ Bítsa'li' libí'ili' lágajagaca bönnachi yödzhölió na', pero na'a nulidzë' Dios libí'ili' para guéquili' queë' Jesucristo.

⁷ Rugapa' Dios libí'ili', yúgu'téli' zóali' Roma. Dios nadxí'inë' libí'ili', en bulidzë' libí'ili' para gácali' quez queë'. Rinábida'-në' Xúziru' Dios, enca' Xanru' Jesucristo, gunnë' queëli' le ruzá' ládxë'ë queëru', en le ribequi dxi ládxí'ru'.

Rë'ënë' Pablo tsöjyúë' bönachi queë' Cristo nacu'ë Roma

⁸ Lë ni risí lahua' ruzúaja' lu guichi: Tu' néquiru' queë' Jesucristo rea'-në' Dios: "Xclenu'" ca naca queëli' yúgu'téli', ate' ta'guixjö' bönnachi idútë yödzhölió ca réajlë'ëli' Jesucristo. ⁹ Idú ládx'a runa' xichinë' Dios, runa' libán que didza' dxi'a ca naca queë' Zxi'inë'. Nözinë' Dios rulídzatíca'sa'-në', en rinábida'-në' gaca tsahui' queëli'. ¹⁰ Rinábitica'sida' Dios, channö naca le rë'ënë' Lë', gunnë' neda' lataj uduyúa' libí'ili'. ¹¹ Caní rinábida'-në' tu' raca ládx'a ilé'eda' libí'ili' para gaca guna' ga gata' queëli' tu le unödžjë' Dios Bö' Lá'ayi queëli', le gun ga gácali' tsutsu. ¹² Lë na' rë'ënda' naca utipa ládxí'ru' turu' ia'turu', tu' réajlë'ëru' Jesucristo yúgu'téru'.

¹³ Böchi' luzá'ado', rë'ënda' inözili' lë ni. Zián luzuí bë' ládx'a guída' ga zóali', pero ga ridxité na'a biti' runni quia'. Rë'ënda' guída' ga zóali' para guna' ga uzí'ili' xibé libán na' runa', ca na' tu'zí' xibé ia'bal-la bönnachi yödzhölió ni. ¹⁴ Dë le ral-la' guna' quégaca yúgu'té bönnachi, quégaca bönnachi nazédagaca, en quégaca bönnachi cabí nazédagaca, quégaca bönnachi ta'yéajni'i, en quégaca bönnachi cabí ta'yéajni'i. ¹⁵ Que lë ni na', tscá gaca guna', zoa' riböza' guna' ca' libán que didza' dxi'a ga ni' zóali' libí'ili', zóali' Roma.

Yöl-la' huáca zxön que didza' dxi'a

¹⁶ Biti' ca' rutu'ida' runa' libán que didza' dxi'a, tu' napa yöl-la' huáca queë' Dios para guna' ulu'lágaca yúgu'té nupa ta'yéajlë' le. Ga risí lo, rë'ënë' Dios ila'yönnë' bönni' judío le, ate' tödi na' ila'yoni ca' bönnachi izá'a. ¹⁷ Didza' dxi'a ni rului' rë'u gunë' Dios ga huóácaru' tsahui', channö uyéajlë'ëru' Lë', en biti' gaca chopá ládxí'ru'. Ca naca lë ni nazúaj ca' lu guichi lá'ayi, rnna: "Nu naca tsahui' tu' réajlë'ë Dios, gata' yöl-la' na'bán que nu na'."

Xígua' nabága'gaca bönnachi

¹⁸ Dios, Nu zoa yehua' yubá, bulu'e lahui biti' rilé'enë' dxi'a yúgu'té le ruá' dö', en le cabí naca tsahui' tun bönnachi. Gunë' xíguia' yugu' bönni' na', lu yöl-la' biti' naca tsahui' quégäquië' ta'dá'bague'ë le naca idútë li. ¹⁹ Caní gaca quégäquië' tu' nalá' lahui lógaca yúgu'té bönnachi le naca bë' zoa cazë' Dios, tu' bulu'i quéninë' Dios lë ni ga na' nacu'ë. ²⁰ Dza ni'te cate' si' guta' yödzölió, ga ridxité na'a dza, yugu' le nunë' Dios nácagaca bë' le cabí gaca ilé'eru' queë' Dios, ca naca yöl-la' huáca idú queë', en le naca cazë' Dios. Que lë ni na', biti' gaca ila'nnë' biti' nabágagaquie' xíguia'. ²¹ Cate' ni' gulúnbe'ë Dios, biti' gula'yéaj ládx'i'gaquie' Lë' ca ral-la' tseaj ládx'i'ru'-në' Dios, en biti' gulé' Lë': "Xclenu'." Que lë ni na', cá'asö böáca le gula'zá' ládx'i'gaquie', ate' gula'chul-la gula'nítie' tu' nazidi icja ládx'i'do'gaquie'. ²² Sal-la' guléquinë' ta'yéajni'inë' yenni', bulu'huóáquië' bönni' biti' bi nözguequinë' ²³ tu' bulu'cá'anë' yöl-la' beni' queë' Dios Nu zóatica'sö, ate' gula'yéaj ládx'i'gaquie' budó' guiój budó' yaga, budó' na' nácagaca ca yugu' bönni' tati cazë', en ca yugu' bö'a'do' zoa xiligacaba', en ca yugu' bö'a' guixi' ta'daba' lu yu, en ca yugu' bö'a' bëla tá'ayöj lë'eba' lu yu ni.

²⁴ Que lë ni na' Dios guléaj ládxë'ë légaquie' para ilunë' yugu' le ta'zë ládx'i'gaquie' le ruá' dö', ate' caní guca, bulu'cá'ana cuíngäquië' lu yöl-la' stu' tuë' len ia'tuë'. ²⁵ Guca caní tu' bulu'cá'anë' xtídze'ë Dios, le naca idútë li, ate' gula'zí' lu ná agaquië' tu le cabí nácatë. Gulunë' bal, en gula'yéaj ládx'i'gaquie' yugu' le benë' Dios, en calëga Lë cazë' Dios, Nu na' ral-la' gácatica'sö queë' yöl-la' ba. ¡Ca' gaca!

²⁶ Que lë ni na' Dios guléaj ládxë'ë légaquie' para ilunë' yugu' le ta'zë ládx'i'gaquie' le ruá' dö'. Yugu' nigula bulu'cá'ananu yöl-la' rizóalen bönni', para ilunnu le ruá' dö'. ²⁷ Lësca' caní gulunë' yugu' bönni' biguiú', bulu'cá'anë' yöl-la' rizóalen nigula, ate' gula'zë ládx'i'gaquie' le ruá' dö' túnlenë' tuë' ia'tuë', en gulunë' le tun ga nu rutui'i, tu' gula'cuá'lenë' la' luzá'a bönni'gacasë'. Que lë ni na' gula'guí'i gula'záquië' lu xipëla'gaquie' yugu' bönni' gulunë' caní tu' bubí'ë Dios quégäquië' ca sa'yéaj dul-la' na' gulunë' tu' nucá'anagaquie' Dios.

²⁸ Tu'cabí gulé'ënnë' ilunë' Dios bal, que lë ni na' guléaj ládxë'ë Dios légaquie' para ila'zá' ládx'i'gaquie' le biti' naca dxi'a, en ilunë' le cabí nazaca'.

²⁹ Túntica'së' yúgu'té le cabí naca tsahui', en yugu' le naca stu'.

Tunë' le ruá' dö', en tu'huídi'në'.

Biti' ta'lé'enë' dxi'a luzá'agaquie', en tu'zxé'enë' luzá'agaquie'.

Tutië' luzá'agaquie', en ta'díl-lalenë' luzá'agaquie'.

Ta'zí' yé'enë' bönnachi, en zi'te nácagaquie' xihui'.

Ta'nnë' que luzá'agaquie'.

³⁰ Ta'nnë' le cabí nácatë que luzá'agaquie'.

Biti' ta'lé'enë' Dios dxi'a, en nácagaquie' bönni' bizzaj.

Tun cuíngäquië' lo, en tun ba zxöön cuíngäquië'.

Ta'guiljë' le ruá' dö' ilunë', en ta'dá'bague'ë xuz xiná'agaquie'.

³¹ Nácagaquie' bönni' biti' ta'yéajni'inë', en tun dítjagaquie' xtídza'gaquie'.

Biti' nácagaquie' dxi'i ladxi' ca ral-la' ilácagaquie'.

Biti' tu'nti lahuë' luzá'agaquie'.

Biti' tu'huechi' ládx'i'gaquie' luzá'agaquie'.

³² Nözguequi quéninë' le nuzoë' tsaz Dios ca ral-la' gaca quégaca nupa tun yugu' le caní, llátigaca tsaz. Sal-la' nöziguequinë' lë ni, calëgasö caní tunë', pero ta'yaza ládx'i'gaquie' nupa tun ca' caní.

2

Naca tsahui' ichúguïë' Dios quégaca bönachi gátigaca

¹ Que lë ni na', biti' gaca ubéaj tsahui' cuinu', nútitiës nu nacu', richugu bë'u luzó'o. Cate' richugu bë'u luzó'o, rusubaga' cuinu' xíguia', tu' richugu bë'u luzó'o, en lësca' runu' li'. ² Nöz quéziru' ca ruchi'a rusöröë' Dios. Naca idútë li ca ruchi'a rusöröë' nupa tun le ruá' dö'. ³ Li' richugu bë'u nupa tun le ruá' dö', en tuz ca runu' li'. ¿Naru' réquitsenu' uló' li' cate' uchi'a usöröë' Dios? ⁴ ¿Naru' rucá'anatso' cá'asö yöl-la' dxi'i ladxi' idú queë' Dios, en yöl-la' riböza zxön ladxi' queë', en ca runé', ridzené' para lené' li'? ¿Naru' cabí nöz quézinu' ruzá' ládxë'ë Dios quiu' yöl-la' dxi'i ladxi' queë' para gunë' ga ubí'i ládxu'u? ⁵ Lu yöl-la' ládxido' zidi quiu' biti' rubí'iládxu'u. Que lë ni na' rusubaga' cuinu' xíguia' gunë' Dios li' cate' uchi'a usöröë' bönachi, ate' gaca bë' naca ca ral-la' gunë' Dios cate' ichúguïë' quégaca bönachi ilátigaca. ⁶ La' dza ní'isö ubí'i cazë' Dios que queë' bönni' tsca naca le gulunë' tu tuë'. ⁷ Unödzjë' yöl-la' na'bán idú quégaca nupa túntica'sö le naca dxi'a, tu' tuí'i ládxigaquie' ulu'zi'ë xibë' Dios, en ulu'rúajë' dxi'a lahuë' Lé', en ila'cuá'tica'sé'. ⁸ Lu yöl-la' rilé queë', Dios gunë' xíguia' nupa ta'dá'baga', en biti' té'eni ilún ca rnna le naca idútë li, pero tun ca rnna le cabí naca tsahui'. ⁹ Ila'gu'i ila'záquië', en hu'ínida' ládxë'ë yúgu'të bönni' tunë' le ruá' dö'. Ga risí lo gaca caní quégaca bönachi judío, en gaca ca' caní quégaca bönachi izá'a. ¹⁰ Dios gunë' ga ilácagaquie' bica' ba, en gunë' légaquie' bal, en gu'ë le cuéqui dxi ládxigaquie' yúgu'të bönni' tunë' le naca tsahui'. Ga risí lo gunë' caní quégaca bönachi judío, en gunë' ca' caní quégaca bönachi izá'a.

¹¹ Caní uchi'a usöröë' Dios bönachi, ate' Lé' biti' runë' bal le ta'nnasö bönachi. ¹² Yúgu'të bönni' na' biti' bila'yönnë' le rinná bë' xibá queë' Dios, en gulunë' dul-la', lësca' ilátië', sal-la' biti' téquibe'enë' gula'dá'baguë'ë le rinná bë' xibá na', ate' yúgu'të bönni' bila'yönnë' le rinná bë' xibá queë' Dios, en gulunë' dul-la', Lé' uchi'a usöröë' légaquie' ca naca le rinná bë' xibá na'. ¹³ Caní gaca, tu' cabí nácagaquie' tsahui' lahuë' Dios yugu' bönni' ta'yönië' xibá queë', pero ulu'huoáca tsahui' lahuë' Lé' yugu' bönni' tunë' ca rnna xibá queë'. ¹⁴ Bönni' na' biti' nácagaquie' judío, en biti' bila'yönnë' le rinná bë' xibá queë' Dios, pero tun cazë' ca rinná bë' xibá queë' na', bönni' ni, sal-la' biti' bila'yönnë' le rinná bë' xibá queë' Dios, zóalen légaquie' tu xibá le nuzóë' Dios icja ládxido'gaquie'. ¹⁵ Nupa ni tu'lui'i lahui le run xibá na' nazúaj lu icja ládxido'gaquie'. Le yu'u icja ládxido'gaquie' naca bë' naca caní. Ca ta'zá' ládxigaquie', tu'zéguie' luzá'agaquie' didza', o tu'béaj tsahui' luzá'agaquie' tuë' ia'túë'. ¹⁶ Caní ubi'ë Dios quégagaquie' dza ni' uchi'a usöröë' lu na' Jesucristo yugu' le núngaquie', en le gula'za' ládxigaquie' yúgu'të. Caní rusëdi didza' dxi'a runa' libán que.

Yugu' bönni' judío, en xibá queë' Dios

¹⁷ Núloli' rnali' nácali' judío, en ruzxöni ládxilí' xibá queë' Dios, en run ba zxön cuinli' tu' núnbë'ëli'-në' Dios, ¹⁸ nöz quézili' le rë'ënë' Dios gunli', en le rusëdi libí'ilí' xibá queë', en réquibe'eli' le nácatérö dxi'a. ¹⁹ Réquili' gaca ulu'ilí' nöza dxi'a nupa ta'dá ga yúbölö ca nu nachul-la lahui, en gaca uzéajni'ilí' nupa nachul-la nanítigaca. ²⁰ Réquili' gaca usédili' nupa biti' ta'yéajni'i, en nupa ta'yéajni'i láti'do'os, tu' dë lu ná alí' xibá queë' Dios le rusëdi bönachi ca naca yöl-la' réajni'i idú, en le naca idútë li. ²¹ Na'a, libí'ilí' rusëdili' ia'zíca'rö bönachi. ¿Naru' cabí ral-la' usëdi cuinli'? Libí'ilí' rnali': "Biti' cuanu'". ¿Naru' ribántsali' libí'ilí'? ²² Rnnali' ca': "Biti' gunu' dul-la' le

riguitsaj xibá que yöl-la' nutsaga na'." ¿Naru' rúntsali' libí'ili' dul-la' le riguitsaj xibá que yöl-la' nutsaga na'? Libí'ili' biti' rilé'eli' dxi'a yugu' budó' guiój budo' yaga. ¿Naru' ribántsali' le dzö'ö lu yudo' quéguequi? ²³ Run ba zxön cuinli' tu' dë lu ná'ali' xibá queé' Dios. ¿Naru' rucá'anatsali' Dios cá'asö, en riguitsjali' xibá le gunná bë'ë Lë? ²⁴ Nazúaj lu guichi lá'ayi ca runli', rnna: Ni'a que le runli' libí'ili' nupa biti' nácagaca judío ta'nné zi' queé' Dios.

²⁵ Le nácaté ruzi'u xibé lë na' narugu lu xipél'u le naca bë' nazí' lu ná'ali' xibá queé' Dios channö runu' ca rinná bë' xibá na' queé' Dios, pero channö riguitsju' xibá le gunná bë'ë Lë, nuhuoácu' ca tu bönni' biti' néquiné' queé' Dios. ²⁶ Que lë ni na', channö zoë' tu bönni' biti' narugu lu xipélë'ë lë na' naca bë' nu nazí'i xibá queé' Dios, pero runé' idútë ca rinná bë' xibá queé' Lë, bönni' ni náquië' lahuë' Dios ca tu bönni' narugu caz lu xipélë'ë lë na' naca bë' sal-la' biti' narugu lu xipél'a caze'. ²⁷ Bönni' na' biti' narugu lu xipélë'ë lë na' naca bë' nu nazí'i xibá queé' Dios, pero runé' idú ca rinná bë' xibá na' queé' Dios, ca runé' bönni' ni rulu'i nabágä'li' libí'ili' xiguiá', sal-la' dë lu ná'ali' xibá na' queé' Dios, en narugu lu xipél'a'lì' lë na' naca bë' nazí' lu ná'ali' xibá na' queé' Dios, pero biti' runli' ca rinná bë' xibá queé' na'. ²⁸ Biti' náquië' idú bönni' judío tu bönni' nácasë' caní lu yöl-la' bönächisö queé', ate' biti' naca idú lë na' naca bë' le narúgusö lu xipélë'ë nu bönni'. ²⁹ Náquië' idú bönni' judío bönni' na' náquië' caní lu icja láxzi'da'ahuë', en le naca idú le narugu lu xipélë'ë nu bönni' le naca bë' nu nazí'i xibá queé' Dios, naca tu le yu'u icja láxzi'do'gaca bönachi. Naca que bö' naca cázaru', en calëga que yöl-la' bönächisö queéru'. Nu bönni' náquië' caní, biti' tun bönachi lë' bal, pero Dios caz gunë' lë' bal.

3

¹ Channö caní naca, ¿bizxi ruzi'tsë' xibé tu bönni' tu' náquië' judío? ¿Bizxi ruzi'ë xibé tu bönni' judío tu' narugu lu xipélë'ë? ² Yenni' ruzi'ë xibé, en zián ca ruzi'ë xibé. Le nácatérö lo, Dios gulu'ë lu ná'agaquie' yugu' bönni' judío didza' lá'ayi queé'. ³ Bal-lë' biti' ta'yéajlë'ë Dios. ¿Naru' réquitsenu' biti' gunë' Dios ca rnna xtídzë'ë tu' cabí ta'yéajlë'ë Lë? ⁴ ¡Biti' ca' gaca! Ralla' guéquibe'eru' rúntica'së' Dios ca rnna didza' bë'ë, sal-la' ta'zí' yë' yúgu'të bönachi. Ca naca queé' nazúaj lu guichi lá'ayi le rnna: Gaca bë' nacu' tsahui' ni'a que didza' ru'u, en urujo' tsahui' channö nú uchi'a usörö Li'.

⁵ Cate' runru' le ruá' dö', Dios rnnë' biti' naca tsahui' le runru'. Lë ni naca bë' tsahui' náquië' Dios. Nacu' nupa ta'nná: "Le cabí naca tsahui' le runru' naca bë' náquië' Dios tsahui', ate' que lë ni na' biti' ral-la' gunë' rë'u xiguiá'." ⁶ ¡Biti' ca' naca caní! La'tu' ruzi'ë xibé Dios le ruá' dö' runru', ¿nacxi caz gaca uchi'a usörö' bönachi yödzölió ni?

⁷ Cate' nu rizí' yë', Dios rnnë' biti' ruí'i didza' nu na' ca runé' Lë'. Lë ni naca bë' naca idútë li didza' ru'ë Dios. Ta'nnë' bönni' le ta'zí' yë'ë légaquie' run ga gaca queé' Dios yöl-la' ba, ate' biti' ral-la' ichúguië' quéguequië', cabí innë' nácagacië' bönni' dul-la'. ⁸ ¿Naru' huannátsaru': "Guá'aru' dö' para gaca le naca dxi'a"? Nupa na' ta'nné zi' queéru' ta'nná rusédiru' caní, ate' tsahui' naca ichúguië' Dios quéguequi.

Yúgu'teru' nabágä'ru' dul-la'

⁹ ¿Bizxi caz innaru' na'a? Ca naca queétu' netu', bönni' judío, ¿nácarötu' tsahui' ca ia'zíca'rö bönachi? ¡Biti' ca' nácatu'! Chíbulu'a ni, nabágä'gaca

dul-la' böñachi judío, ate' nabága'gaca ca' dul-la' böñachi izá'a. ¡Yúgu'té' nabága'gaquie' dul-la'¹⁰ Nazúaj lu guichi lá'ayi le rnna:
Cuntu nu zoa naca tsahui', cuntu nu caz.

11 Cuntu nu réajni'i.

Cuntu nu riguilaj Dios.

12 Yúgu'té' ta'dé' ga yúbölö.

Yúgu'té' nanítigaquie'.

Cuntu nu run le naca dxí'a, cuntu nu caz.

13 Lubá'agaquie' nácagaca ca yero ba nayáljagaca.

Len yöl-la' rinnésö quégäquie' ta'zí' yé'ené' luzá'agaquie'.

Didza' rirúaj ruá'agaquie' naca ca le yudzu láya'ba' bëla sínia'.

14 Len yugu' didza' tu'ë, tu'didza' yúdxinë' böñachi,
en ta'nné zí'ë quégaca böñachi na'.

15 Nacu'ë sina' tútigaquie' böñachi.

16 Gáti'tés ga ta'dödë' tu'sunítië', en tu'saca' zi'ë luzá'agaquie'.

17 Biti' ta'zéqui'né' ila'bözë' dxí'ado'.

18 Biti' ca' tádxinë' Dios.

19 Nöziru' yúgu'té didza' ni bë'ë Dios, re' yugu' bönni' na' dë lu ná'agaquie' xibá queë'. Que lë ni na' cuntu nu gaca inná biti' nabaga' dul-la', ate' yúgu'té böñachi idútë yödällöi, uchi'a usöröe' Dios quéguequi. **20** Tuí'i ládxigaquie' yugu' bönni' judío ilunë' yugu' le rinná bë' xibá queë' Dios para ulu'huoáquie' tsahui', pero cuntu nu huoáca tsahui' caní, tu' nuzóe' Dios xibá queë' para guéquibe'eru' nabága'ru' dul-la'.

Uláru' tu' réajlë'ëru' Jesucristo

21 Na'a, chibulu'i lahui ca gaca huoácaru' tsahui' lahuë' Dios. Biti' gaca huoácaru' tsahui' tu' runru' ca rinná bë' xibá queë' Dios, sal-la' lu xibá queë' na', en lu guichi lá'ayi ga nazúajgaca le gula'nné' bönni' gulu'ë didza' uláz queë' Dios, rui'i didza' ca gaca huoácaru' tsahui'. **22** Dios caz runë' ga huoácaru' tsahui' tu' réajlë'ëru' Jesucristo, ate' gunë' ga ulu'huoáca tsahui' yúgu'té nupa ila'yéajlë' Lë'. Tuz ca nácagaca yúgu'té böñachi **23** tu' núnagaquie' yúgu'té' dul-la', en biti' ca' nácagaquie' tsahui' ca na' náquië' Dios idú tsahui'. **24** Dios ruzá' ládexë'ë queëru', en nunsé' re'u tsahui' tu' böá'ue' Jesucristo re'u. **25** Dios budödë' Jesucristo uláz queëru'. Lë' bulalje' xichönë', le rigúa dul-la', lë na' uzí'iru' xibé channö uyéajlë'ëru' Lë'. Caní benë' Dios para gaca bë' náquië' tsahui' Lë' sal-la' lu yöl-la' riböza zxön ladxi' queë' budödisë' cá'asö yugu' dul-la' benru' dza ni te'. **26** Caní benë' Dios, bulu'i cuinë' tsahui' dza ni zóaru' na'a, ate' rugá'ané' tsahui' sal-la' rugüé' dul-la' nabága'gaca böñachi, runë' ga tu'huoáca tsahui' nupa ta'yéajlë' Cristo.

27 ¿Naru' huácatsö gun ba zxön cuinru' ca naca queëru'? ¡Biti' ca' gácaru'! ¿Bizz que na'? Naca tu' nuláru', calëga tu' runru' ca rinná bë' xibá queë' Dios, pero tu' réajlë'ësiru' Jesucristo. **28** Na'a, rusáca'ru' queëru' nuhuoáquie' tsahui' tu bönni' tu' réajlë'ë Jesucristo, en calëga tu' runë' ca rinná bë' xibá queë' Dios.

29 Ca naca Dios, ¿náquië' Dios quégacasö böñachi judío? ¿Naru' cabí náquië' ca' Dios quégaca böñachi izá'a? Òn, náquië' ca' Dios quégaca böñachi izá'a na' **30** tu' zoa Tuz Nu naca Dios. Dios ni gunë' ga ulu'huoáquie' tsahui' yugu' bönni' judío tu' ta'yéajlë'ë Jesucristo, yugu' bönni' na' narugu lu xipëla'gaquie' lë na' naca bë' nu nequi queë' Dios, en lësca' caní gunë' ga ulu'huoáquie' tsahui' yugu' bönni' zi'tu' tu' ta'yéajlë'ë Jesucristo, en biti' narugu lu xipëla'gaquie' lë

na' naca bë'. ³¹ Na'a, channö nuláru' tu' réajlë'ësiru' Jesucristo, ¿ba nagá'ana cá'asö xibá queë' Dios? ¡Biti' ca' naca ca', pero nagá'anarö tsutsu xibá queë' na'!

4

Le benë' Abraham rusedi rë'u

¹ ¿Bizxi caz innaru' na'a? ¿Bizxi bidéli'në' Abraham, xuz xtó'otu' netu', nácatu' judío? ² La'tu' böáquië' tsahui' Abraham tu' zoa le ben cazé' lë', gunna gun ba zxön cuinë', pero calëga lahuë' Dios. ³ Ca naca lë ni nazúaj lu guichi lá'ayi, le rnna: "Abraham guyéajlë'ë Dios, ate' que lë ni na' Dios benë' ga böáquië' tsahui' lahuë' Lë'." ⁴ Channö zoa nu bönni' runë' xichinru', le riguizxjaro'-në' biti' naca tu le ruzá' ládx'i'ru' queë', pero naca tu le ral-la'ru' queë' bönni' na'. ⁵ Lësca' caní channö tu bönni' réajlë'ë Dios, sal-la' biti' bi dxin benë' bönni' na', Dios, Nu run ga ulu'huöáca tsahui' bönnachi biti' nácacaga tsahui', rnñë' náquië' tsahui' lahuë' Lë' bönni' na', tu' réajlë'ë Lë'. ⁶ Lësca' caní bë'ë didza' David ca náquië' bica' ba bönni', Dios rnñë' náquië' tsahui' sal-la' biti' bi dxin nunë' bönni' na'. ⁷ Caní gunnë' David:
¡Bica' ba bönni' na' Dios runiti lahuë' le biti' naca tsahui' nunë', en rugüë' yugu' dul-la' nabaguë'ë!

⁸ ¡Bica' ba bönni' na', Dios biti' rusubágue'ë'lë' xíguia' tu' nözi dul-la' benë' bönni' na'!

⁹ ¿Naru' nácacacsë' bica' ba bönni' narugu lu xipëla'gaquië' lë na' naca bë', o nácacaga ca' caní nupa na' cabí narugu lë na' lu xipëla'gaquië'? Chigunná cázaru' böáquië' Abraham tsahui' lahuë' Dios tu' guyéajlë'ë Lë'. ¹⁰ ¿Bátaxi böáquië' tsahui' caní Abraham? ¿Naru' guca cate' ni' chinarugu lu xipélë'ë lë na' naca bë', o guca zí'alö? Biti' guca cate' chinarugu lu xipélë'ë, pero zí'alö guca. ¹¹ Abraham guyéajlë'ë Dios cate' ni' biti' narúguni lu xipélë'ë lë na' naca bë'. Gudödi na' gurugu lu xipélë'ë lë na' naca bë', le rulu'i'iso chinuhuöáquië' tsahui' lahuë' Dios. Guca caní para gáquië' Abraham ca xúzgaquië' yugu' bönni' ila'yéajlë'ë Dios sal-la' biti' narugu lu xipëla'gaquië' lë na' naca bë'. Tu' ta'yéajlë'ë Dios, huáca innë' Dios nácacaguië' tsahui' lahuë' Lë'. ¹² Náquië' Abraham xuz xtó'ogaquië' yugu' bönni' judío ta'yéajlë'ë Dios. Calëgasö náquië' xúzgaquië' bönni' na' narugu lu xipëla'gaquië' lë na' naca bë', pero lësca' náquië' xúzgaquië' bönni' na' tunë' ca benë' Abraham, ta'yéajlë'ë Dios ca na' benë' Abraham cate' ni' biti' narúguni lu xipélë'ë lë na'.

Le guzxí' lu në'ë Dios gata' queëru' tu' réajlë'ëru' Lë'

¹³ Guzxí' lu në'ë Dios bi unödzjë' queë' Abraham, en quégaca zxí'ini xi'soë', gata' quégagaquië' la' yödzölió nisö. Gaca caní, calëga tu' tunë' ca rinná bë' xibá queë' Dios, pero tu' nahuöácagaquië' tsahui' lahuë' Lë' tu' ta'yéajlë'ë Lë'. ¹⁴ La'tu' gata' yödzölió ni quégacasö nupa tun ca rinná bë' xibá queë' Dios, biti' gun bayudxi nu tséajlë' Lë', ate' nítisö gaca le guzxí' lu në'ë Dios. ¹⁵ Rulu'i xibá queë' Dios rë'u nabága'ru' xíguia', le run ga ichúgwië' Dios queëru' gátiwu'. Ga ní' biti' ridxini xibá queë' na', biti' gaca ila'dá'baga' bönnachi le rinná bë' xibá na'.

¹⁶ Que lë ni na' uzí'iru' xibé le guzxí' lu në'ë Dios tu' réajlë'ëru' Lë', para gaca bë' naca tu le ruzá' ládxë'ë queëru'. Caní naca, para gaca bë'da' gata' quéguequi yúgu'të zxí'ini xi'soë' Abraham lë na' guzxí' lu në'ë Dios, calëgasö quégagaquië' bönni' na' dë lu ná'agaquië' xibá queë' Dios, pero lësca' quégaca nupa ta'yéajlë' Dios ca na' guyéajlë'ë Abraham Dios. Abraham na' náquië' ca

xuz xtó'oru' yúgu'téru' rë'u, réajlë'ëru'-në' Dios. ¹⁷ Caní náquië' ca na' nazúaj lu guichi lá'ayi, le rnna: "Nuzoá' li' ca xúzgaca böñachi idútë yödzolió."

Caní naca, lahuë' Dios, Nu na' guyéajlë'ë Abraham, náquië' xuz gudödi queëru' yúgu'téru'. Dios ni rusubanë' nupa chinatigaca, en ru'ë didza' que nu biti' zuíni tsca chizóa caz nu na' biti' zuíni.

¹⁸ Caní naca tu' gudxë' Dios Abraham na': "Ziánterö ila'cuá' zxí'ini xi'sú'." Abraham guyéajlë'ë Dios, en benë' löza lë na' guzxí' lu në'ë Dios, sal-la' biti' guca ilé' enë' lë na' runë' löza, ate' caní guca, bidéli'në' náquië' xúzgaca böñachi idútë yödzolió. ¹⁹ Biti' guca Abraham chopá ladxë'ë ca na' réajlë'ë Dios, sal-la' chiyu'ë ca tu gayuá' iz, en yöjenenë' ca naca que le naca cazë', chinati caz tu' chinagúladë'ë, enca' ca naca queënu Sara queë', nácanu nigula huödx. ²⁰ Biti' guca chopá ladxë'ë, en biti' gúquië' tu' careajlë' ca naca le guzxí' lu në'ë Dios gunë' queë', pero bidipa ladxë'ë tu' guyéajlë'ë Dios, ate' gulu'ë Dios yöl-la' ba. ²¹ Idú ladxë'ë benë' löza Dios, napë' yöl-la' huáca gunë' idútë lë na' guzxí' lu në'ë. ²² Que lë ni na', tu' guyéajlë'ë Abraham Dios, Dios buzóë' queë' náquië' tsahui'.

²³ Nazúaj lu guichi lá'ayi le rnna: "Dios buzóë' queë' náquië' tsahui'." Nazúaj lu guichi caní, calégasö para uzi'ë xibé Abraham, ²⁴ pero para uzi'iru' xibé ca' rë'u. Rë'u ni, Dios gunë' ga huöácaru' tsahui' lahuë' Lë' channö uyéajlë'ëru' Lë', busubanë' Xanru' Jesúz lu yöl-la' guti. ²⁵ Jesúz na', Dios budödë' Lë' para gútië' tu' nözi dul-la' nabága'ru', ate' busubanë' Lë' lu yöl-la' guti, para gaca gunë' ga huöácaru' tsahui' lahuë' Lë'.

5

Le rata' queëru' tu' rnne' Dios nuhuöácaru' tsahui'

¹ Na'a, rnne' Dios nuhuöácaru' tsahui' lahuë' Lë' ni'a que le benë' Xanru' Jesucristo, channö réajlë'ëru' Lë', ate' que lë ni na' nuhuöácaru' tuz len Lë'.

² Tu' réajlë'ëru' Jesucristo, ruzí'iru' xibé le ruzá' ladxë'ë Dios queëru', le rutipa ladxí'ru'. Rudzéjaru' tu' runru' löza uzi'iru' ca' xibé yöl-la' zxön queë' Dios. ³ Calégasö caní rudzéjaru', pero rudzéjaru' ca' cate' rigui'i rizáca'ru', tu' chinöziru' le rigui'i rizáca'ru' rusedi rë'u cözaru' zxön ladxi'. ⁴ Cate' ribözaru' zxön ladxi' rurúajru' tsahui' lahuë' Dios, en cate' chinurúajru' tsahui' runru' löza Lë' gácalen cazë' rë'u. ⁵ Cate' runru' löza Lë', biti' ca' raca chopá ladxí'ru'. Caní naca, tu' nuhuöläj nudzë' e icja ladxí'do'oru' yöl-la' nadxi'i queë' Dios rë'u. Runë' Dios Bö' Lá'ayi, Bönni' gusöl-lë'ë Dios queëru' ga raca caní.

⁶ Cate' ni' biti' ca' guca uláru' rácasö queëru', cate' gúla'rö dza queë', Cristo gútië' uláz queëru', ni' nácaru' böñachi dul-la'. ⁷ Cuntu nu guë'ëni gati uláz queë' tu bönni' tsahui'. Nadxi ca' nu urugui gati uláz queë' tu bönni' náquië' idú dxia'. ⁸ Dios rului'inë' rë'u ca nadxfide'enë' rë'u, tu' gútië' Cristo uláz queëru' cate' ni' nácaru' bönni' dul-la'. ⁹ Chinuhuöácaru' tsahui' lahuë' Dios tu' bulaljë' Cristo xichönë', gútië' uláz queëru'. Que lë ni na' chinácada' löza usöölë' Lë' rë'u lu dza ichúguië' Dios quégaca böñachi dul-la' gátigaca. ¹⁰ Cate' ni' biti' rilé'era'-në' Dios dxia', gútië' Zxi'inë' Dios uláz queëru' para huöácaru' tuz len Lë'. Na'a, tu' zoë' nabanë', en chinuhuöácaru' tuz len Lë', chinácada' löza uláru'. ¹¹ Rudzéjaru' lahuë' Dios ni'a que le benë' Xanru' Jesucristo, tu' nuhuöácaru' tuz len Dios ni'a que lë na' benë' Lë'.

Le benë' Adán, en le benë' Cristo

¹² Guyú'u dul-la' yödzölió ni tu' nözi le benë' tuzé' bönni', ate' tu' benë' dul-la', guyú'u ca' yöl-la' guti. Que lë ni na' ilátigaca yúgu'të bönnachi tu' nabág'a gaca yúgu'të bönnachi dul-la'. ¹³ Zí'atëlö ga bidxintë xibá queë' Dios, gulún bönnachi yödzölió ni dul-la', pero biti' busubágüë' è Dios bönnachi na' xíguia' ca nupa ta'dá'baga' xibá queë' tu' nözi dul-la' na', tu' biti' ridxini xibá queë' quégäquië'. ¹⁴ Ga gudela' zoë' Adán ga bidxintë zoë' Moisés gulati yúgu'të bönnachi tu' gula'baga' dul-la', sal-la' biti' gula'dá'baga' tu le gunná bë' è Dios ca benë' Adán. Nácagaca yúgu'të bönnachi tuz len Adán tu' nácagaca zxí'ini xi'soë'. Lë ni rului'i rë'u ca ilaca tuz len Cristo yúgu'të nupa ila'yéajlé' Lë'.

¹⁵ Le rúnnasë' queëru' Dios biti' naca ca le guca queëru' tu' nözi dul-la' benë' Adán. Tu' nözi dul-la' benë' tuzé' bönni', ilátigaca yúgu'të bönnachi. Dxí'atëro naca le ruzá' ládxë' è queëru' Dios, en le rúnnasë' queëru'. Ruzá' ládxë' è queëru' lë ni ni'a que le benë' yetuzë' Bönni', Jesucristo. ¹⁶ Le rúnnasë' Dios queëru' biti' naca ca le guca queëru' tu' nözi dul-la' na' benë' tuzé' bönni' na'. Le guchúguië' Dios queë' Adán gátië' tu' nözi dul-la' na' benë', guchúguië' ca' Dios quégaca yúgu'të bönnachi gáttigaca. Le rúnnasë' Dios queëru' naca para huöácaru' tsahui' lahuë' Lë' sal-la' nabág'a rü' dul-la' zián. ¹⁷ Guyú'u yöl-la' guti tu' nözi dul-la' benë' tuzé' bönni'. Nácatëro löza ila'deli' yöl-la' na'bán nupa ulu'huöáca tsahui' lahuë' Dios tu' zoa le ruzá' ládxë' è queëru' Dios ni'a que le benë' yetuzë' Bönni', Jesucristo.

¹⁸ Dios guchúguië' quégaca yúgu'të bönnachi ilátigaca tu' nözi dul-la' benë' tuzé' bönni' na'. Lësca' caní gaca ulu'huöáca tsahui' yúgu'të bönnachi ni'a que le naca tsahui' benë' yetuzë' Bönni' na', gata' yöl-la' na'bán idú quégäquië'. ¹⁹ Bulu'huöáca huen dul-la' bönnachi zián tu' cabí benë' tuzé' bönni' ca rnna xtídzë' è Dios. Lësca' caní ulu'huöáca tsahui' bönnachi tu' benë' yetuzë' Bönni' na' ca rnna xtídzë' è Dios.

²⁰ Guyú'u xibá queë' Dios yödzölió ni para gaca bë'da' nabág'a gaca bönnachi dul-la'. Tu' guca bë'rö nabág'a gaca dul-la', guca bë'rö ca' zxöntëro naca le buzá' ládxë' è Dios quégaca bönnachi. ²¹ Guta' yöl-la' huáca unná bë' que dul-la' guti rë'u. Lësca' caní le ruza' ládxë' è Dios queëru' napa yöl-la' huáca gun ga huöácaru' tsahui' lahuë' Lë', ate' gata' yöl-la' na'bán idú queëru' ni'a que le benë' Xanru' Jesucristo.

6

Naca tsca chináti'ru' para cabirö gunru' dul-la' tu' nabániru'-në' Jesucristo

¹ ¿Bizxi caz innaru' na'a? ¿Naru' güntsaru' dul-la' para gáta'rö queëru' le ruzá' ládxë' è Dios queëru'? ² ¡Biti' gun cázaru' ca! Naca queëru' ca tsaz chinati cázaru' para cabirö gunru' dul-la'. ¿Naru' güntica'siru' dul-la'? ³ ¿Naru' cabí nözili' ca na' naca queëru'? Channö bidílaru' nisa para huöácaru' tuz len Cristo, lë na' bidílaru' nisa rului'i rë'u chigudödiru' lu yöl-la' guti tsözxön len Lë'. ⁴ Ca na' guca, gütilenru'-në' Cristo tsözxön, lësca' caní bigächilenu'r-në' tsözxön niu' yero ba cate' ni' bidílaru' nisa. Ca na' busubanë' Dios Cristo lu yöl-la' guti len yöl-la' huáca zxöñ queë', lës caní ca' rë'u nubánlenru'-në' Jesús tsözxön para gácaru' bönnachi idútë cubi queë'.

⁵ Channö nunru' Cristo tsözxön, gútiru' ca na' gútië' Lë', lësca' caní gunru'-në' tsözxön, ubanru' lu yöl-la' guti ca na' bubanë' Lë'. ⁶ Chinöz quésziru' lë ni, yöl-la' bönnachi queëru' le guzóa zí'alö gudá'len Lë' tsözxön lë'e yaga cruz, para initi yöl-la' bönnachi queëru' na' bénlenru' le dul-la', para cabirö inná be'e le naca dul-la' rë'u. ⁷ Channö nácaru' tuz len Nu na' guti tu' nözi dul-la',

nuhuöácaru' tsahui' lahuë' Dios tu' cabirö nabága'ru' dul-la' na', ate' bíti'rö yú'uru' lu na' dul-la'. ⁸ Na'a, channö nátilenru'-në' Cristo tsözxön, réajlé'ëru' ubánlenru'-në' ca' tsözxön, ⁹ tu' chinöziru' bubanë' Cristo lu yöl-la' guti, en bíti'rö gátië'. Que lë ni na' bíti'rö bi gaca gun yöl-la' guti na' queë' Lë'. ¹⁰ Ca na' guca, gútië' Lë', tu luzuísö gútië' tu' nözi dul-la' quégaca yúgu'të bönachi, pero ca na' naca, zoë' nabanë', nabálenë' Dios. ¹¹ Lësca' caní ral-la' usáca'li' queëli' naca queëli' ca chinati cázali' para cabirö gunli' dul-la', pero zóali' nabanli' para gunli' ca rnna xtídzë'ë Dios tu' nácal' tuz len Xanru' Jesucristo.

¹² Que lë ni na', biti' gü'i'li' lataj le naca dul-la', para cabí gun ga gunli' dul-la' lu le naca cázali' le gati caz. Biti' gunli' ca naca le rizé ládx'i'li' le ruá' dö', lu le naca cázali'. ¹³ Biti' udödi cuinli' lu dul-la', biti' gunli' le ruá' dö', pero guli'dödi cuinli' lu në'ë Dios tu' nubanli' lu yöl-la' guti, en guli'dödi lu në'ë idúré le naca cázali' para ugúnlenë' le le naca dxi'a. ¹⁴ Biti' gü'i'li' lataj le naca dul-la', para cabí gun ga gunli' dul-la', tu' nuzoë' Dios libi'ili', caléga para inná be'e libi'ili' xibá queë', pero para inná be'e libi'ili' le ruzá' ládxë'ë queëru'.

Le rucudzu' didza' ca naca que nu bönni' nadó'o

¹⁵ ¿Bizxi caz innaru' na'a? ¿Naru' gúntsaru' dul-la' tu' cabirö rinná be'e xibá queë' Dios rë'u, pero rinná be'e le ruzá' ládxë'ë Dios rë'u? ¡Biti' ca' gunru' caní!

¹⁶ Chinöz quézili' dxi'a channö udödi cuinli' lu në'ë nu bönni' para gácali' bönni' nadó'ogaca queë', en gunli' ca rnna xtídzë'ë, tsaz nácali' bönni' nadó'ogaca queë' bönni' na' runli' ca rnna xtídzë'ë. Lësca' caní gaca channö udödi cuinli' para gunli' dul-la' le gun ga gátili', o channö udödi cuinli' para gunli' ca rnna xtídzë'ë Dios, Nu gun ga huöácali' tsahui'. ¹⁷ Na'a, ¡xclenë' Dios! Sal-la' zí'alö gúcali' bönni' nadó'ogaca lu na' dul-la', na'a idú ládx'i'li' runli' ca rinná be'e xibá na' budödi cuinli' lu në'e. ¹⁸ Tu' chinulali' lu na' dul-la', nuhuöácali' ca yugu' bönni' nadó'ogaca lu na' le naca dxi'a. ¹⁹ (Ruí'lena' libi'ili' didza' ca tu'i didza' bönachi, tu' cabí réajni'ili' idútë le yöl-la' bönachi queëli'.) Zí'alö budödi cuinli' len idútë le naca cázali' lu na' le ruá' dö', en lu na' le cabí naca tsahui', ate' gúcali' ca yugu' bönni' nadó'ogaca lu në'eguequi, en benli' xichini le ruá' dö' na'. Na'a, guli'dödi idútë le naca cázali' lu na' le naca tsahui', para gácali' ca yugu' bönni' nadó'ogaca lu në'e, en gunli' xichini lë na' naca tsahui' para gácali' bönachi naruájgaca quez queë' Dios.

²⁰ Cate' ni' nácali' ca yugu' bönni' nadó'ogaca lu na' dul-la', biti' benli' xichini le naca tsahui'. ²¹ Na'a, ¿naru' buzí'itsali' xibé lë na' benli' zí'alö? Na'a lë na' benli' run ga rutu'ili', en run ga nu gati tsaz. ²² Na'a chinulali' lu na' dul-la', en nácali' ca yugu' bönni' nadó'ogaca queë' Dios, en ruzí'ili' xibé le run ga nácali' bönachi naruájgaca quez queë' Dios, en le run ga dë queëli' yöl-la' na'bán idú. ²³ Lazxaj nu run dul-la' naca yöl-la' guti, pero le rúnnasë' Dios queëru' naca yöl-la' na'bán idú, le rata' queëru' tu' nácaru' tuz len Xanru' Jesucristo.

7

Le rucudzu' didza' yöl-la' nutsaga na'

¹ Böcha'ado', nülöli' núnbeë'ëli' xibá queë' Dios. Nöz quézili' rinná be'e xibá na' nu bönni' tsanni ni zoë' nabanë'. ² Naca queëli' ca naca que tu nigula nutsaga ná'lennu-në' bönni', yú'unu lu në'ë bönni' queënu tsanni ni zoë' nabanë' ca rinná be'e xibá que yöl-la' nutsaga na', pero channö chinátië', naruájnu lu na' xibá na'. ³ Caní naca, tsanni ni zoë' nabanë' bönni' queënu, channö utsaga ná'lennu-në' ia'túë' bönni', gunnu dul-la' le riguitsaj xibá que

yöl-la' nutsaga na', pero channö chináti' bönni' queënu na', nurúajnu lu na' xibá na', ate' na'a, channö utsaga ná'lennu-në' nu bönni' yúbölö, biti' gunnu dul-la' le riguitsaj xibá que yöl-la' nutsaga na'.

⁴ Lësca' caní raca queëlli', böcha'a. Tu' dzágali'-në' Cristo chinati cázali' libíili' para cabirö inná be'e libíili' le rinná bë' xibá na', para guéquili' que Nu yúbölö. Na'a chinéquili' queë' Cristo, Nu na' bubán lu yöl-la' guti. Caní naca, para gaca gunru' le raza ládxë' è Dios. ⁵ Tsanni ni' guyú'uru' lu na' yöl-la' böñachisö queëru', le rinná bë' xibá na' ben ga gulaca bë' le guzë' ládx'ru' le ruá' dö', le gulún dxin lu idútë le naca cázaru' para ilún ga gátiru'. ⁶ Na'a nuláru' lu na' xibá na' tu' nati cázaru' tsca naca le rinná bë' xibá na' gunna be'e reü' u zí'alö. Caní naca para gaca gunru' xichinë' Dios lu yöl-la' na'bán cubi le runnë' queëru' Dios Bö' Lá'ayi, en calëga gunru' xichinë' lu lë na' chinaca gula, le naca xibá na'.

Le dzaga neda' le naca dul-la'

⁷ ¿Bizxi caž innaru' na'a? ¿Naru' runtsö xibá queë' Dios ga runa' dul-la'? ¡Biti' ca' run caní! La'tu' cabí buzéajni' le rinná bë' xibá na' neda', biti' gunözda' naca dul-la' le runa'. La'tu' cabí zoa lu xibá na' le rnna: "Biti' së ládx'u' le dë que luzó'o", biti' gunözda' naca dul-la' yöl-la' rizé ladxi' le dë que luzá'a. ⁸ Cate' bidxín quia' xibá na', guca bë' le naca dul-la' na' run dxin lu idútë le naca', ate' ben ga gúquibe'eda' rizé ládx'a yúgu'të le ruá' dö'. Ga biti' ridxini xibá na', biti' naca bë' le naca dul-la'. ⁹ Dza ní'te, zí'atëlö ga bidxín quia' xibá queë' Dios, ni' gúquida' zoa' nabana', pero cate' bidxín quia' xibá na', gúquibe'eda' nabága'a dul-la', en chinati caza'. ¹⁰ Dios gunná bë'ë xibá na' para gun ga gata' queëru' yöl-la' na'bán, pero ben ga gúquibe'eda' chinati caza'. ¹¹ Guca bë' nazi' yé'eda' ca naca dul-la', tu' ben xibá na' ga gúquibe'eda' nabága'a dul-la', en ral-la' gátia'.

¹² Que lë ni na', lá'ayi naca xibá queë' Dios, ate' lá'ayi, en tsahui', en dxí'a naca le gunná bë'ë. ¹³ ¿Naru' bentsö lë na' naca dxí'a ga bidxín quia' yöl-la' guti? ¡Biti' ca' naca ca'! Le naca dul-la' bugún dxin lë na' naca dxí'a, en ben ga gúquibe'eda' chinati caza' para gaca bë' naca dul-la' le runa'. Caní guca, para gaca bë' ni'a que xibá na' nácatérö xihui' yúgu'të le naca dul-la'.

¹⁴ Nöziru' Dios Bö' Lá'ayi bennë' queëru' xibá na', pero neda' naca' böñachisö, en yu'a lu na' dul-la' ca tu bönni' nadó'o que. ¹⁵ Na'a, biti' réajni'ida' le runa'. Rë'ënda' guna' ca rinná bë' xibá na', pero biti' runa' lë na' rë'ënda' guna'. Le naca dul-la' le cabí rilé'eda' dxí'a, lë na' runa'. ¹⁶ Runa' dul-la' sal-la' biti' rë'ënda' guna' dul-la' na'. Xibá na' rusëdi neda' naca dul-la' le cabí naca dxí'a. Que lë ni na' naca bë' da' naca dxí'a le rinná bë' xibá na'. ¹⁷ Caní naca, calëga néda'sö runa' dul-la' na', pero dul-la' na' dzaga neda' run ga runa' dul-la' na'. ¹⁸ Nözda' biti' zóalen neda' le naca dxí'a, o huáca innía', lë na' naca dxí'a biti' zóalen le naca yöl-la' böñachisö quia'. Rë'ënda' guna' le naca dxí'a, pero la' néda'sö biti' gaca guna' lë na' naca dxí'a. ¹⁹ Biti' runa' le naca dxí'a le rë'ënda' guna', pero rúntica' sa' le biti' naca dxí'a le cabí rë'ënda' guna'. ²⁰ Que lë ni na', channö runa' dul-la' na' biti' rë'ënda' guna', calëga neda' caž runa' le, pero dul-la' na' dzaga neda' run ga runa' dul-la' na'.

²¹ Caní naca le raca queëru' yúgu'tëru'. Cate' rë'ëniru' gunru' le naca dxí'a, dzaga reü' le run ga runru' le ruá' dö'. ²² Lu icja ládx'i'da'ahua' raza ládx'a xibá queë' Dios ²³ pero réquibe'eda' dzaga idútë le naca' le rinná be'e neda', ate' lë ni ridá'baga' xibá queë' Dios yu'u icja ládx'i'da'ahua'. Lë na' dzaga idútë le naca' run ga runa' dul-la'.

24 ¡Bica' bayechi' neda'! ¿Nuzxi caz gaca usólá neda' lu yöl-la' bönáchisö quia' le run ga runa' dul-la'? **25** ¡Xclenë' Dios, chinularu' na'a ni'a que le benë' Xanru' Jesucristo! Que lë ni na', tscá naca le yu'u icja ládxí'da'ahua' runa' ca rinná bë' xibá queë' Dios, sal-la' yöl-la' bönáchisö quia' run ga rë'ënda' guna' dul-la'.

8

Le runru' tu' zóalenë' Dios Bö' Lá'ayi rë'u

1 Que lë ni na', bíti'rö bi xíguia' nabága'gaquië' yugu' bönni' néquiguequinë' queë' Jesucristo, bönni' na' bíti'rö tunë' ca rë'ëni yöl-la' bönáchisö quégaquië', pero ca rë'ëni Dios Bö' Lá'ayi tunë'. **2** Tu' naca' tuz len Jesucristo, Dios Bö' Lá'ayi, Nu na' nabániru', rácalenë' neda'. Que lë ni na', nulá' lu lë na' ben ga bena' dul-la', enca' lu yöl-la' guti. **3** Chinunë' Dios le cabí guca gun xibá na', tu' cabí bi guzxéqui' gun tu' nácaru' bönáchisö. Dios gusöl-lë'ë Zxi'ini cazë', ate' guljé' bönachi ca nácaru' rë'u, nácaru' bönachi dul-la', pero biti' bi dul-la' benë' Lë'. Busubaga' cuinë' dul-la' nabága'ru' rë'u, ate' caní guca, guchúguië' que dul-la' runru' lu yöl-la' bönáchisö queëru'. **4** Caní benë' para gaca gunru' idútë le naca tsahui' le rinná bë' xibá queë', nulörü' na' bíti'rö runru' ca rë'ëni yöl-la' bönáchisö queëru', pero ca rë'ëni Dios Bö' Lá'ayi runru'.

5 Bönni' tunë' ca rë'ëni yöl-la' bönáchisö quégaquië', tuí'l ládxí'gaquië' le naca que yöl-la' bönáchisö quégaquië', pero bönni' tunë' ca rë'ëni Dios Bö' Lá'ayi, tuí'l ládxí'gaquië' le naca queë' Dios Bö' Lá'ayi. **6** Channö ruí'i ládxí'siru' le naca que yöl-la' bönáchisö queëru', tsaz gátiru', pero channö ruí'i ládxí'ru' le naca queë' Dios Bö' Lá'ayi, chidé yöl-la' na'bán idú queëru', en ribözaru' dxi ladxi'. **7** Núti'tës nu ruí'i ládxí'so le naca que yöl-la' bönáchisö que, biti' rilé'e Dios dxi'a, tu' cabí run nu na' ca rinná bë' xibá queë' Dios, en biti' ca' gaca gun caní. **8** Que lë ni na', bönni' na' tunë' ca rë'ëni yöl-la' bönáchisö quégaquië' biti' gaca ilunë' le raza ládxë'ë Dios.

9 Na'a, bíti'rö runli' ca rë'ëni yöl-la' bönáchisö queëli', pero runli' ca rë'ëni Dios Bö' Lá'ayi tu' zóalen cazë' Lë' libí'ili'. Tu bönni' biti' zóalenë' Dios Bö' Lá'ayi lë', Nu na' risöl-lë'ë Cristo queëru', biti' néquinë' queë' Cristo. **10** Tu' zóalenë' Cristo libí'ili', chinati caz idútë le guca cázali' tu' nözi dul-la', ate' na'a nabánili'në' Dios Bö' Lá'ayi tu' nunë' Dios libí'ili' tsahui'. **11** Bö' Lá'ayi queë' Dios, Nu na' busubán Jesús lu yöl-la' guti, zóalenë' libí'ili'. Lë cazë' Dios, Nu busubán Jesucristo lu yöl-la' guti, runë' ga nubanli' lu idútë le gúcali' le rati caz. Caní nunë' tu' zóalenë' Dios Bö' Lá'ayi libí'ili'.

12 Que lë ni na', libí'ili' böcha'a, dë tu le ral-la'ru', pero caléga que yöl-la' bönáchisö queëru', para cabirö gunru' ca rë'ëni yöl-la' bönáchisö queëru' na'.

13 Channö runli' ca rë'ëni yöl-la' bönáchisö queëli', gátili' tsaz, pero channö len yöl-la' huáca queë' Dios Bö' Lá'ayi runli' ga ila'niti le runli' lu yöl-la' bönáchisö queëli', gata' yöl-la' na'bán idú queëli'.

14 Yúgu'të nupa tun ca rë'ëni Dios Bö' Lá'ayi nácagaca zxi'inë' Dios. **15** Dios Bö' Lá'ayi na' zóalenë' libí'ili' biti' nuzóë' libí'ili' leyúbölö ca bönni' nadó'ogaca para gadxi idzóbili', pero chinunë' ga nácali' zxi'inë' Dios caz, en runë' ca' ga rulídazu' në' Dios, rnñaru': "Abba", le rnña: Dad. **16** Lë cazë' Dios Bö' Lá'ayi ruzéajni'inë' bo' naca cázaru', en runë' ga nöziru' nácaru' zxi'inë' Dios. **17** Channö chinácaru' zxi'inë' Dios, gata' ca' queëru' tsözxón len Cristo le nequi queë' Xúziru' Dios. Caní gaca queëru' channö rigui' rizáca'lenru'-në' tsözxón Cristo para uzf'iru' xibé tsözxón len Cristo yöl-la' zxön queë' Dios.

¹⁸ Runi neda', yugu' lë ni rigui'i rizáca'ru' na'a naca tu le cuídi'do'os tsca naca yöl-la' zxön na' gata' queéru' dza si' za'. ¹⁹ Ta'böza yúgu'të le nunë' Dios, en ta'zë ládzi'gaca idxitnë dza na' ulu'ë lahuì Dios yugu' bönni' nácgaguïie' zxí'ini cazë'. ²⁰ Yúgu'të lë na' nunë' Dios gula'dödi lu na' le run ga ila'niti, calëga tu' gulë'eni caz gaca caní, pero tu' benë' Dios ga naca caní. Benë' ca' ga naca löza que idútë lë na' nunë', ²¹ ate' ulu'lágaca yúgu'të le nunë' Dios lu lë na' run ga ila'niti. Caní gaca, yúgu'të lë na' ulu'zi' ca' xibé yöl-la' rusölä le nazáca'da' na' ulu'zi' xibé yugu' zxí'inë' Dios. ²² Nöziru' ta'guíi ta'zaca' yúgu'të le nunë' Dios ga ridxitnë na'a dza, ca na' rigui'i rizáca'nu tu nigula chizóoa sóabi' b'ido' queénu. ²³ Rigu'i rizáca'a, calégasö yödzöliö ni, pero rigui'i rizáca'ru' ca' rë'u, sal-la' zóalenë' Dios Bö' Lá'ayi rë'u, Nu na' naca queéru' le rului'i rë'u ca ral-la' gaca cázaru'. Rigu'i rizáca'ru' tsanni ni ribözaru' dza ni' ulu'ë lahuì Dios nácaru' idú zxí'inë', dza ni' únë' ca' idútë le naca cázaru'. ²⁴ Tu' runru' löza lë ni, nuláru' rë'u, pero channö gaca ilé'eru' lë na' runru' löza, biti' naca tu le ribözaru'. Biti' ribözaru' le chirilé'eru'. ²⁵ Na'a, channö runru' löza tu le cabí gaca ilé'eru', lu yöl-la' ribözäa zxön ladxi' ribözaru' le.

²⁶ Lësca' caní rácalenë' Dios Bö' Lá'ayi rë'u cate' rudú ládzi'ru', tu' cabí nöziru' bi ral-la' inábiru'-në' Dios, pero Lë cazë' Dios Bö' Lá'ayi rudödë' xtídz'a'ru' lahuë' Dios, ate' lu yöl-la' rinaba yudxi queé' rinnëda' ládxë'ë, tsca cabí gaca nu inná. ²⁷ Dios ruyüé' le yu'u icja ládzi'do'gaca böñachi, en nözinë' le rë'énë' innë' Dios Bö' Lá'ayi na', ate' Lë', ca rë'eni quézinë' Dios, rudödë' xtídz'a'gaca nupa néquiguequi quez queé' Cristo lahuë' Dios.

Nadéli'teröru' tu' zóalenë' Cristo rë'u

²⁸ Nöziru' tu'zi'ë xibé bönni' yúgu'të le raca quégaquïie', bönni' na' nadxí'iguequinë' Dios, ate' bulidzë' Dios légaquïie' ca nuzóoa cazë' gunë'. ²⁹ Yugu' bönni' na' gurö cazë' queé' Dios zí'atëlö, buzöe' ca' quégaquïie' zí'atëlö ilácagaquïie' ca naca cazë' Zxí'inë', para gáquie' Zxí'inë' lo ladaj zián böchë'ë. ³⁰ Nupa na' buzöe' Dios quégaquïie' zí'atëlö ca ral-la' ilácagaquïie', bulidzë' ca' légaquïie', ate' yugu' bönni' na' bulidzë', benë' légaquïie' tsahui', ate' yugu' bönni' na' benë' légaquïie' tsahui', benë' ga tu'zi'ë ca' xibé yöl-la' zxön queé'.

³¹ ¿Bizxi caz innaru' na'a ca nácgaca lë ni? Channö rácalenë' Dios rë'u, biti' ral-la' gádxiru' sal-la' bi ilún böñachi queéru'. ³² Dios, idú ládxë'ë bennë' queéru' Zxí'ini cazë'. Budödë' lë' para gútië' uláz queéru'. Channö caní benë' Dios, ¿naru' cabí gúnnadë'ë queéru' tsözxón len Zxí'inë' yúgu'të le dë? ³³ ¿Nuzxi caz gaca bi usubaga' nupa na' gurö cazë' queé' Dios? ¡Cuntu nu gaca, tu' run cazë' Dios ga nuhuoácaru' tsahui'! ³⁴ ¿Nuzxi caz gaca ichugu queéru' gátiru'? ¡Cuntu nu gaca, tu' guti cazë' Cristo uláz queéru', en le nácaro lo, bubañë' lu yöl-la' guti, ate' na'a zoë' cuita lë'ë ibëla Dios ga nácatërë' zxön, ate' rnne' dxi'a uláz queéru' lahuë' Dios! ³⁵ Sal-la' bi raca queéru', nöz quéziru' nadxí'inë' Cristo rë'u. Nöziru' nadxí'inë' rë'u: sal-la' rigui'i rizáca'ru', o sal-la' risëbi ládzi'ru', o sal-la' ta'bía ládzi'gaca böñachi rë'u, o sal-la' ridunru', o sal-la' riyatdaj le gácuru', o sal-la' zoa böñadxi queéru', o sal-la' ilütië' bönni' rë'u.

³⁶ Ca nácgaca lë ni nazúaj lu guichi lá'ayi, rnna: Tu' néquitu' quiu' Li', túntica'sö böñachi ga gátitu'. Nácatu' ca yugu' bö'cu' zxila', nadödigacaba' lu na' nu guti légacaba'.

³⁷ Na'a, tu' zóalen rë'u Nu na' nadxi'i rë'u, nácatérö löza idéli'ru' lu le raca queéru'. ³⁸⁻³⁹ Que lë ni na' runi neda':

Biti' bi sequí' gun ga bíti'rö idxí'inë' Dios rë'u.

Nadxi'inë' rë'u tu' néquiru' queé' Xanru' Jesucristo.

Biti' sequí' gun caní yöl-la' guti o yöl-la' na'bán,

o yugu' gubáz lá'ayi o nupa ta'nná bë',

o yugu' yöl-la' huáca que tu' xihui',

o bíti'tës bi zoa o bíti'tës bi si' za',

o tu le dë xitsá'alö o tu le dë cadxi'ilö,

o bíti'tës bi nuné' Dios.

9

Dios gurò cazé' queé' bönnachi Israel

¹ Ruá'a didza' idútë li tu' néquida' queé' Cristo, ate' röjlöz didza' ni le naca queé' Dios Bö' Lá'ayi le yu'u icja ládxia'da'ahua'. ¡Biti' rizi' yë'a!

² Ruhú' inide'eda', en risébitica'sö ládx'a a ³ tu' raca ládx'a a guna' ga ulu'lë' böchí' luzá'a, bönni' uládz quia'. La'tu' huácalen légaquië', gué'eni quézida' ubéaj ládxë'ë Dios neda', en ulá'alena' Cristo. ⁴ Yugu' bönni' uládz quia' na' nácagaquië' zxí'ini xi'sóë' Israel, ate' Dios bë'ë légaquië' lataj ilácagaquië' zxí'ini cazé'. Yöl-la' zxón queé' Dios guzóalén légaquië', ate' Dios budödë' lu ná'agaquië' didza' rucá'ana tsahui', enca' xibá queé'. Bulidzë' légaquië' para tseaj ládx'gaquië' Lë', ate' budödë' lu ná'agaquië' yugu' le guzxí' lu në'ë gunë' le ilún tsahui' bönnachi. ⁵ Nácagaquië' zxí'ini xi'sóagaquië' xuz xtó'otu' Abraham, en Isaac, en Jacob, ate' ladaj di'a dza quégaquië', ca naca yöl-la' bönnachi queé', guljë' Cristo, Nu naca caz Dios, en rinná bë'enë' yúgu'të. ¡Rácatica'sö queé' yöl-la' ba! ¡Ca' gaca!

⁶ Sal-la' yúgu'të bönni' uládz quia' biti' nazí' lu ná'agaquië' Cristo, biti' ral-la' innaru': Nítisö böáca xtfídzë'ë Dios. Caléga yúgu'të zxí'ini xi'sóë' Israel nácagaquië' idú bönnachi Israel, nupa néquiguequi queé' Dios. ⁷ Sal-la' gúljagaquië' zián zxí'ini xi'sóë' Abraham, biti' guláquië' yúgu'të idú zxí'ini xi'sóë' Abraham, pero guca ca na' nazúaj lu guichi lá'ayi, le rnna: "Yugu' zxí'ini xi'sóë' Isaac ilaca idú zxí'ini xi'sú'." ⁸ Caní naca, nupa nácagaca zxí'inë' tu bönni' néquinë' queé' Dios, caléga yúgu'të' nácagaquië' zxí'inë' Dios. Lësca' caní, nácagaca idú zxí'ini xi'sóë' Abraham núpasö na' náljagaca ni'a que lë na' guzxí' lu në'ë Dios. ⁹ Lë na' guzxí' lu në'ë Dios unödziejë' queé' Abraham rnna caní: "Ia'tu iz na'a dza huöda', ate' Sara quiu' uzóanu-bi' tubi' bi'i bönni'do'."

¹⁰ Calégasö lë ni guca caní, pero lësca' cate' Rebeca ni' nuá'anu-bi' yugu' bi'i bönni'do' queé' Isaac, xuz xtó'otu', ¹¹⁻¹³ cate' ni' si' iláljabí', en biti' bi núnigacabi' le naca dxí'a o le ruá' dö', Dios gudxë'-nu Rebeca na', gunnë': "Bi'i bönni' zí'alö quiu' gunbi' xichinbi' bi'i buropi." Didza' ni röjlöz lë na' nazúaj lu guichi ca gunnë' Dios, le rnna: "Bidxi'ida'-në' Jacob, en caléga Esaú." Caní guca, bugá'ana tsutsu le buzóë' tsaz Dios ca naca lë na' chigurö cazé'. Que lë ni na' biti' raca caní ni'a que tu le gaca ilún bönnachi, pero naca caní tu' ribö' cazé' Dios nu rulidzé'.

¹⁴ ¿Bizxi caz innaru' na'a? ¿Naru' runtsë' Dios le cabí naca tsahui'? ¡Biti' ca' runë' caní! ¹⁵ Dios gudxë' Moís, gunnë': "Huéchi' ládx'a a nu rë'ënda' huéchi' ládx'a a, en gü'i ládx'a a nu rë'ënda' gü'i ládx'a a." ¹⁶ Que lë ni na', biti' raca caní ni'a que le té'ëni caz bönnachi, o tu' runë' bayudxi nu bönni', pero naca tu' rë'ëni quézinë' Dios, ruhuéchi' ládxë'ë bönnachi. ¹⁷ Ca naca lë ni nazúaj lu guichi

lá'ayi ca na' Dios gudxé' Faraón, gunnë': "Que lë ni na' buzóa' li' ga rinná bë'u para ulu'a lahui yöl-la' huáca quia' ga zu', en guna' ga ilunbë' bönachi idúte yödzölió le naca' neda'." ¹⁸ Caní naca, Dios ruhuéchi' ladxé' è nu rë'èni quézinë', en lësca' caní runë' zidzaj icja ládx'i'da'ahué' nu bönni' rë'èni' gunë' zidzaj icja ládx'i'da'ahué' bönni' na', ca na' benë' queé' Faraón na'.

¹⁹ Na'guiéli' neda': "Channö caní naca, ¿bizx que rusubágüe' è Dios bönachi xíguia'? ¿Nuzxi caz gaca tá'baga' le rë'èni quézinë' Dios gunë'?" ²⁰ ¡Biti' ca' naca caní! ¿Nuzxi caz li' rmníó' que Dios? ¿Naru' huácatsö tu yusu' néquini yu guíë bönni' huen rö'ö, inná: "¿Bizx que benu' neda' caní?" ²¹ ¿Naru' cabí dë lu në'ë bönni' huen rö'ö gunë' que guna' na' tu yusu' nu ugún le dxin ga liná', en que la' guna' ná'asö gunë' ia'tú yusu' nu ugún le dxin ga biti' naca liná'?

²² Rë'èni quézinë' Dios ulu'ë lahui ca guné' xíguia' nu ruá' dö' en gunë' ga gaca bë' yöl-la' huáca queé', pero lu yöl-la' riböza zxön ladxi' queé' biá' gulénë' yugu' bönni' ni' ral-la' ichúguie' quégäquië', yugu' bönni' na' nabága'gaquië' xíguia', en run bayudxi usunítië' légaquië'. ²³ Caní runë' Dios para gaca bë' nácatérö lesaca' yöl-la' ruzá' ladxi' queé', lë na' rulu'ë lahui lógaca nupa na' ruhuéchi' ladxé' è, bönni' na' buzóo' quégäquië' zí'atélö ulu'zi'ë xibé yöl-la' zxön queé'. ²⁴ Yugu' bönni' caní bulidzé' Dios. Calégasö bulidzé' netu', bönachi judío, pero lësca' bulidzé' bönachi izá'a. ²⁵ Ca naca lë ni nazúaj lu guichi lá'ayi ca na' bë' è didza' Oseas uláz queé' Dios, gunnë':

Nupa biti' nácagaca bönachi quia',
gu'a láguequi: Bönachi quia',
ate' nupa na' biti' bidxi'ida',
gu'a láguequi: Nupa nadxi'ida'.

²⁶ La' ná'asö ga gunnía' quéguequi:
"Biti' nácali' bönachi quia'",
si' láguequi: "Yugu' zxí'inë' Dios ban."

²⁷ Na'a, ca naca quégaca zxí'ini xi'sóë' Israel, Isaías gunnë':
Sal-la' ila'yanë' zxí'ini xi'sóë' Israel,
en iláquië' tscá naca yuzxi tu ra' yegu zxön,
ulu'lé' nabábasë'.

²⁸ Xanru' Dios la' guntë' ga gaca idúte
lë na' ichúguie' quégaca bönachi yödzölió ni.

²⁹ Lësca' caní Isaías bë' è didza' zí'atélö, gunnë':
Dios, Xanru' unná bë' idú,
la'tu' cabí bucá'anë' queéru' yugu' zxí'ini xi'sóaru',
ugá'anaru' ca yödzö Sodoma, en yödzö Gomorra,
yugu' yödzö na' busunítië' Dios.

Bönachi Israel, en didza' dxi'a

³⁰ ¿Bizx ca innaru' na'a? Yugu' bönni' biti' nabábagäquië' Israel chibila'déli'në' nuhuöácagaquië' tsahui' lahué' Dios, en biti' gulunë' bayudxi ulu'huöáquië' tsahui' lahué' Dios, pero nuhuöácagaquië' tsahui' tu' ta'yéajlé' è Dios. ³¹ Na'a, sal-la' gulunë' bayudxi yugu' bönni' Israel ilunë' ca rinná bë' xibá queé' Dios, le ral-la' gun ga ilácagaquië' tsahui', biti' bila'déli'në' le ral-la' gata' quégäquië' tu' tunë' ca rinná bë' xibá na'. ³² ¿Bizx que na' guca caní? Caní guca, tu' cabí gulunë' caní lu yöl-la' réajlé' quégäquië' Dios, pero rácasö quégäquië' gulé'ènnë' ilunë' ca rinná bë' xibá na', ate' que lë ni na' gula'chixinë', o huáca innaru': Yójchégü'gaquië' lu lë na' nazí'i le: Guiój Ga Nu Rójchegü'. ³³ Ca naca lë ni nazúaj lu guichi lá'ayi, rnna:

¡Buli'yú! Uzóá'-në' yödzö Sión bönni' na'
gáquië' ca tu guiój ga nu tsöjchegu',
guiój na' gun ga nu ichixi iniguí.
Nu tséajlé' Lé', biti' ca' utu'i nu na'.

10

¹ Libí'ili', böcha'ado', le rizé ládxa'a, en le rinábida'-në' Dios gunë' quégaca böñachi Israel naca gunë' ga ulu'lé'. ² Runa' ba nalí quégagaquië', idú ládxi'gaquië' tu'i ládxi'gaquië' Dios, pero caléga len yöl-la' réajni'i idú. ³ Biti' nözguequine' ca runë' Dios, runsé' ga nácaru' tsahui', pero té'enné' ilún cuíngaqüi' tsahui' rácason quégagaquië', en biti' ta'cu'ë nönxaj ladxi' lahuë' Dios para gaca gunë' lágagaquië' tsahui'. ⁴ Budxi benë' Cristo le rë'ëni gun xibá queë' Moisés, benë' ga gaca ulu'huöáca tsahui' yúgu'té nupa ila'yéajlé' Lé'.

⁵ Ca naca que nu huöáca tsahui' tu' run ca rinná bë' xibá queë' Dios, buzúajé' Moisés lu guichi le rnna caní: "Bönni' na' gunë' idútë ca rinná bë' xibá na', soë' ibanë' tu' gunë' caní." ⁶ Na'a, ca naca que nu huöáca tsahui' tu' réajlé' Dios, rnna caní: "Biti' innó' lu icja ládxi'do'o, biti' innó': ¿Nuzxi caz cuen ni' yehua' yubá?" Lé ni naca, para gun nu na' ga huötje' Cristo, ⁷ en biti' innó': "¿Nuzxi caz huötaj ga dë lataj que nupa chinátigaca?" Lé ni naca, para gun nu na' ga cuenë' Cristo, urúajé' lu yöl-la' guti. ⁸ Na'a, ¿bizxi caz rnna? Caní rnna: "Gala' ga zu' zoa caz xtídzë'ë Dios. Lu ru'u, en lu icja ládxi'do'o zoa xtídzë'ë na'." Lé ni naca didza' que le réajlé'ëru' Dios runtu' libán que, rnna: ⁹ "Channö didza' gu'u gaca bë' Jesúz náquië' Xanu', en uyéaj lë'u idú ládxu'u Dios busubanë' Lé' lu yöl-la' guti, uló' li'." ¹⁰ Lu icja ládxi'do'oru' réajlé'ëru' Jesúz para gácaru' tsahui', ate' len didza' ruí'iru', ruluf'iru' lahui le náquië' Jesucristo para uláru'.

¹¹ Nazúaj lu guichi lá'ayi le rnna: "Biti' ca' ulu'tu'i yúgu'té nupa ta'yéajlé' Lé'." ¹² Dios, la' tuz ca ruí'i ládxë'ë yugu' bönni' judío, enca' yugu' bönni' idútë yödzölió, tu' Lé cazé' Xanru' náquië' Xángaqüië' yúgu'té, en nápadé'ë bi unödzjë' quégaca yúgu'té nupa tu'lidza Lé'. ¹³ Ca naca lë ni nazúaj lu guichi lá'ayi, rnna: "Ulu'lá yúgu'té nupa ulu'lidza Lé' Xanru'." ¹⁴ ¿Nacxi gaca ulu'lidzë' Lé' channö cabí ta'yéajlé'ë Lé'? ¿Nacxi gaca ila'yéajlé'ë Lé' channö catu caz bila'yönnë' ca naca queë'? ¿Nacxi gaca ila'yönnë' channö cuntu nu zoa nu gun libán lógaquië'? ¹⁵ ¿Nacxi caz gaca ilunë' libán channö cuntu nu isöl-la' lágagaquië'? Ca naca lë ni nazúaj lu guichi, rnna: "Bica' bágaca nupa na' ila'dxinë' ga nacuá' bönni' röjéngaqüië' libán que le ribequi dxi ládxi'ru', en tunë' libán que didza' dxi'a."

¹⁶ Na'a, caléga yúgu'té gula'zí' lu ná'agaquië' didza' dxi'a. Ca naca lë ni, Isaías gunnë': "Xan, ¿nuzxi caz guyéajlé' le bentu' libán que?" ¹⁷ Caní naca, ila'yéajlé' Lé' nupa ila'yöni, ate' lë na' ral-la' ila'yöni naca didza' ru'ë Cristo.

¹⁸ Na'a rnna: ¿Naru' cabí bila'yönnë'? Le nácaté bila'yönnë', ca na' nazúaj lu guichi lá'ayi, le rnna:
Idútë yödzölió bila'yöni chí'iguequi.
Yúgu'té lataj bila'dxin xtídzä'guequi.

¹⁹ Lësca' rnna: ¿Naru' cabí guléquibe'enë' bönni' Israel lë ni? Le nácaté guléquibe'enë' le. Ga risí lo, bë'ë didza' Moisés uláz queë' Dios, gunnë': Gun caza' ga uzxé'eli', tu' idxi'ida' böñachi biti' nabábagaca libí'ili'. Ni'a quégaca böñachi cabí ta'yéajni'i guna' ga leli'.

20 Gudödi ni' gúcadë'ë rugu ladxi' Isaías na', en bë'ë didza' uláz queë' Dios, gunnë':

Bila'dzöli neda' nupa biti' gula'guíaj neda'.

Bului'i lahua' lógaquië' bönni' biti' bi gula'nábinë' neda'.

21 Na'a, ca naca quégaquië' bönni' Israel, Isaías na' bë'ë didza' uláz queë' Dios, gunnë': "Idú dza bulí na'a, bulidza'bönachi biti' túngaca ca rnna xtídz'a, en ta'dá'bag'a neda'."

11

Nupa nulágaca ladaj bönnachi Israel

1 Na'a rnnía': ¿Naru' nusán në'ë Dios bönnachi Israel? ¡Biti' ca' naca caní! Neda' caz naca' bönni' Israel. Naca' zxi'ini xi'soë' Abraham, en nababa' dí'a dza queë' Benjamín, zxi'ini cazë' Israel na'. **2** Dios biti' nusán në'ë bönnachi queë', nupa na' gurò cazë' queë' dza ni'te. ¿Naru' cabí núnbe'ëli' lë na' nazúaj lu guichi lá'ayi ca na' benë' Elías? Bulidzë' Dios, en buzéguië' bönnachi Israel didza', gunnë': **3** "Xan, chigulútië' bönni' gulu'ë didza' uláz quiú, en bulu'quinnajë' yugu' bucugu lá'ayi quiú' ga buzéguijacatu'-ba' böa' bëxdido' lo' Li'. Tuza' neda' nagá'ana' quiú', ate' té'ënne' ilútië' ca' neda'." **4** Na'a, ¿bizxi didza' bubí'ë Dios? Caní gunnë': "Nun chí'igaca caza'-në' quia' tsónnalalaj yu' chi gáyu'ë bönni' biti' tu'zechu zxibigaquië' lo budó' guiöj na' nazi'i le Baal." **5** Lësca' caní naca dza ni zóaru' na'a, nagá'anagaca bal-la bönnachi Israel, nupa na' gurò cazë' queë' Dios tu' ruzá' ládxë'ë caní quégaquië'. **6** Channö naca le ruzá' ládxë'ë caní quégaquië', biti' naca ni'a que tu le gaca ilunë'. La'tu' guca ni'a que tu le gaca gunru', lë na' ruzá' ládxë'ë queëru' Dios biti'rö gaca tu le ruzá' ládxë'ë queëru'.

7 ¿Bizxi caz innaru' na'a? Lë na' gula'guíjë' bönni' Israel, biti' bila'déli'në', pero chibila'déli' le nupa ni' gurò cazë' queë' Dios, ate' ia'zica'rë' na', Dios benë' zidi icja láxi'do'gaquië'. **8** Ca naca lë ni nazúaj lu guichi lá'ayi, rnna: "Dios benë' ga náca'gaquië' chul-la niti." Caní benë', en sal-la' gaca ila'lé'enë' le runë', en ila'yönne' xtídzë'ë, biti' ca' ta'yéajni'inë'. Caní naca quégaquië' ga ridxitë dza ni zóaru' na'a. **9** Ca naca lë ni bë'ë ca' David didza', gunnë': Yugu' laní quégaquië' ulu'huöáca le ila'zön légaquië', en ca tu yalaj ga ila'rölinë'.

Ilaca ca' le ilún ga ila'chixinë',

en ca tu le uzí' lëbi légaquië'.

10 Ila'chul-la guiöj lógaquië', para cabí ila'lé'enë'.

Ila'yechu tsaz cùdzu'gaquië' tu' ilu'ë yua'.

Ca gaca ulu'lágaca bönnachi biti' nácagaca judío

11 Na'a rnnía': ¿Naru' gula'chixinë' yugu' bönni' judío ga bidxitë gula'nítie' tsaz? ¡Biti' ca' guca ca'! Gula'dá'bagüe'ë xtídzë'ë Dios, ate' na'a Dios ru'ë lataj ulu'lágaca nupa biti' nácagaca judío para gunë' ga ulu'zxé'enë' yugu' bönni' judío léguequi. **12** Le gulunë' bönni' judío, gula'chixinë', ben ga bidxín quégaca bönnachi yödzölió ni le naca ca tu yöl-la' tsahui'. Channö caní guca, guta' yöl-la' tsahui' quégaca nupa biti' nácagaca judío tu' gula'nítie' yugu' bönni' judío, zxöntëro gaca le gata' quéguequi cate' yugu' bönni' judío na' ulu'huöáquië' queë' Dios.

13 Na'a rea' libíili' biti' nácali' judío, rnnía': Tu' naca' gubáz nasöl-lë'ë Dios lóga nupa biti' nácagaca judío, runa' zxön lë na' dë lu na'a **14** para nadxi

ca' huáca guna' ga ulu'zxé'enë' bönni' uládz quia' libí'ili', en caní guna' ga ulu'lë' bal-lë'. ¹⁵ Channö bulu'huöáca böñachi nacuá' idú yödzölió queë' Dios tu' bulu'nítie' yugu' bönni' judío xilátjagaquïë', zxöntérö gaca le gata' quéguequi cate' ulu'huöázië' xilátjagaca cazë' na'. Gaca ca raca cate' tu'bángaca nupa chinatigaca. ¹⁶ Channö rigú'uru' quez queë' Dios cúa nílado' rubéajru' zí'alö, lësca' cúa na' nagá'ana naca quez queë', en channö uzóaru' quez queë' Dios lui yaga, lësca' ilaca quez queë' ni'a në'e yaga na'.

¹⁷ Nácagaquïë' bal-lë' bönni' judío ca ni'a në'e tu yaga olivo narúgugaca, ate' libí'ili', ca ni'a në'e tu yaga olivo guí'a, yöjtá'ali' yaga olivo dxi'a na', en buázili' xilátjagaca nupa na' gurúgugaca, en ruzí'ili' xibe luí, en xichöni yaga olivo dxi'a na'. ¹⁸ Que lë ni na', biti' gun ba zxön cuinli', biti' uzóali' tsölá'alö nupa nácagaca ca ni'a në'e na' nabúgugaca. Channö run ba zxön cuinli', ral-la' inözili' caléga libí'ili' rugáguli' lui yaga na', pero luí yaga na' rugagu libí'ili'.

¹⁹ Nadxi ca' innó': "Gula'rugu ni'a në'e yaga na' para gaca tsázia' neda' xilátjagaca." ²⁰ Nácaté didza' ru'u, pero gula'rúguië' tu' cabí gula'yéajlë'ë, ate' yöjtó'o li' yaga na' tu' réajlë'ü Dios. Que lë ni na', biti' ral-la' gun ba zxön cuinu', pero ral-la' gádxinu' Dios. ²¹ Channö benë' Dios léguequi xíguia', nupa na' nácagaca caz ni'a në'e yaga dxi'a na', ¿narú' cabí gunë' xíguia' ca' li'? ²² Buyútsöca' na'a ca náquië' dxi'i ladxi' Dios, en ca rúndë'ë ca' xíguia'. Le nácaté rúndë'ë xíguia' nupa na' gula'chixi, pero náquië' dxi'i ladxi' len li'. Que lë ni na', ral-la' gúntica'su' ca sa'yéaj yöl-la' dxi'i ladxi' queë' na', para cabí ichúguië' ca' li' lu yaga queë' na'. ²³ Lësca' caní gaca quéguaquïë' channö cabí ulu'gá'anë' lu yöl-la' cabí réajlë' quéguaquïë', tsöjtá'gaquïë' leyúbólö lu yaga na', tu' napë' Dios yöl-la' huáca gunë' ga tsöjtá'gaquïë' le leyúbólö. ²⁴ Nacu' li' ca tu ni'a në'e gurugu lu yaga olivo guí'a, en yöjtó'o yaga olivo dxi'a ga cuntu nu udá' tu ni'a në'e yaga guí'a. Yénni'térö huáca quéguaquïë', nácagaca cazë' ni'a në'e yaga dxi'a na', huáca tsöjtá'gaquïë' leyúbólö lu yaga quéguequi cazë' na'.

Ca gaca ulu'lágaca böñachi Israel

²⁵ Bócha'ado', rë'ënda' inözili' lë ni bigachi', para cabí gun ba zxön cuinli' ca naca yöl-la' réajni'i queëli'. Bulu'huöáca bal-la böñachi Israel zidi ladxi', ate' caní iláquië' ga idxinxrö dza chinayázgaca yúgu'të böñachi biti' nácagaca judío ga rinná bë'ë Dios, nupa na' ral-la' ulu'lágaca. ²⁶ Tödi na' gata' lataj ulu'lë' ca' yúgu'të bönni' Israel, ca na' nazúaj lu guichi lá'ayi, rnna:

Irúaj yödzö Sión Nu rusólá,

en ugúa le ruá' dö' nabága'gaca zxí'ini xi'soë' Jacob.

²⁷ Lë ni naca didza' dzaga gúnlena' légaquïë'
cate' ugúa' dul-la' nabága'gaquïë'.

²⁸ Caní naca, gula'dá'baguë'ë didza' dxi'a, ate' Dios guléaj ládxë'ë légaquïë' para gaca uláli' libí'ili', pero nadxí'inë' ca' légaquïë', tu' guró' cazë' queë' xuz xtó'ogaquïë'. ²⁹ Tsaz runödzjë' Dios le runödzjë', en tsaz rulidzë' böñachi. ³⁰ Ca na' naca queëli', zí'atélo biti' benli' ca rnna xtídzë'ë Dios, ate' na' ruhuéchi' ládxë'ë Dios libí'ili' tu' cabí gulunë' yugu' bönni' judío ca rnne'. ³¹ Lësca' caní naca quéguaquïë' na'a, biti' tunë' ca rnne' Dios, pero caní gácasö ga idxinxrö dza huéchi' ládxë'ë Dios légaquïë', ca ruhuéchi' ládxë'ë libí'ili' na'a. ³² Dios guléaj ládxë'ë yúgu'të böñachi para ila'dá'baguë'ë xtídzë'ë, para gaca huéchi' ládxë'ë yúgu'të'.

³³ Zxöntérö naca yöl-la' tsahui' queë' Dios, lë na' naca yöl-la' huáca zxön, en yöl-la' réajni'i queë'. Cuntu nu gaca tséajni'i le nuzóë' Dios gunë', en biti'

gaca nu inözi yugu' le runë' Dios. ³⁴ ¿Nuzxi caz guyéajni'i le guzá' ládxë'ë Xanru'? ¿Nuzxi caz buzéajni'i Lë'? ³⁵ ¿Nuzxi caz bi bunödzaj queë' Dios para gun bayudxi bi ubi'ë Dios que? ³⁶ Yúgu'të le dë narúajgaca lu në'ë Dios, en taca lu në'ë, en nácagaca para uzi'ë xibéguequi. ¡Gácatica sö queë' Dios yöl-la' ba! ¡Ca' gaca!

12

Ral-la' udödi cuinru' quez queë' Dios

¹ ¡Böchí' luzá'ado! ¡Ruhuéchí' ládxë'ë Dios rë'u! Que lë ni na' ráta'yua' loli' udödi cuinli' lu në'ë Dios, gácali' ca tu le naca ban rigú'uru' lahuë' Dios, para gácali' quez queë', le gaca tu le tsaza ládxë'ë Dios. Lë ni ral-la' gunli', ca sa'yéaj le reaj ládxí'ru'-në' Dios. ² Biti'rö gunli' la' lëbisö ca tun böñachi dza ni zóaru' na'a, pero guli'gaca böñachi cubi tu' nucubë' Dios icja ládxí'do'oli'. Guli'gún caní para gaca inözili' le naca dxi'a rë'ënë' Dios gunli', lë na' raza ládxë'ë, en le naca idü.

³ Na'a, tu' zoa le buzá' ládxë'ë quia' Dios, rea' yúgu'tëli': Biti' gun ba zxön cuinli', le cabí ral-la' gunli', pero ral-la' gácali' nöxaj ladxi' ca ribequi ícjali', tsca naca yöl-la' réajlë' queëli' Dios le bennë' que queëli'. ⁴ Ca na' naca tuz idútë le naca cázaru', sal-la' zián le nagudi' dzágalenru', en caléga tuz dxin tun yúgu'të le zián na' nagudi' dzágalenru', ⁵ lëscá' caní naca queëru'. Sal-la' zianru' zóaru', nácaru' ca tuz le naca cázaru' tu' nácaru' tuz len Cristo, ate' que lë ni na' yúgu'tëru' nácaru' tuz turu' len ia'turu'.

⁶ Tu turu' dë lu ná'aru' tu le bennë' queëru' Dios, ate' nadzá'gaca tu tu tsca naca le buzá' ládxë'ë que queëru'.

Bönni' na' Dios bunödzjë' queë' gu'ë didza' uláz queë', tsca réajlë'ë Lë', ral-la' gu'ë didza' bönni' na'.

⁷ Bönni' na' Dios bunödzjë' queë' gunë' xichinë', dxí'ado' ral-la' gunë' dxin na'.

Bönni' na' Dios bunödzjë' queë' usédinë' böñachi, dxí'ado' ral-la' usédinë' böñachi.

⁸ Bönni' na' Dios bunödzjë' queë' uzéajni'inë' böñachi, dxí'ado' ral-la' uzéajni'inë' légaquïë'.

Bönni' bi unödzjë' que nu yübölö, idü ládxë'ë ral-la' unödzjë'.

Bönni' rinná bé'enë' böñachi, idü ládxë'ë ral-la' gunë' caní.

Bönni' rácalenë' luzë'ë, len yöl-la' rudzeja ral-la' gunë' caní.

Yugu' le ral-la' gun nu nequi queë' Cristo

⁹ Ral-la' idxí'ili' luzá'ali' idü ládxí'li'. Bulí'ca'ana le ruá' dö'.

Guli'gúí' ládxí'li' gunli' le naca dxi'a.

¹⁰ Guli'dxi'i-guéquinë' luzá'ali' ca nadxi'igüecli'-në' böchí' cázali'.

Ca runli'-në' bal luzá'ali' ral-la' gunli' ga gácarë' lo ca nácali' la' cuínsili'.

¹¹ Bulí'típatica'sö ládxí'li', en biti' gácali' xöhüëdi.

Guli'gún xichinë' Xanru' idü ládxí'li'.

¹² Bulí'dzeja tu' zoa le runli' löza.

Guli'cöz zxön ladxi' cate' bi rigu'i rizáca'li'.

Buli'lídzatica'së' Dios.

¹³ Buli'nödzaj quégaca bönnachi queë' Cristo
tsca nayádzjaguequinë'.

Guli'gü' lataj ga ila'cuá' nupa ta'dxín queëli'.

¹⁴ Guli'nábinë' Dios gunë' dxi'a
quégaca nupa ta'bía ládxigaca libí'ili'.

Guli'naba gaca dxi'a quégaquië',
en biti' udxíali' légaquië' dö'.

¹⁵ Buli'dzéjalen nupa tu'dzeja.

Guli'cödxilen nupa ta'bödxi.

¹⁶ Guli'gaca tuz len luzá'ali'.

Biti' gun ba zxön cuinli',

pero guli'gún tsözxön yugu' bönni' nönoxaj ladxi'.

Biti' guéquili' chinadéli'li' idútë yöl-la' réajni'i.

¹⁷ Cuntu nu ubí'ili' que,

biti' guá'ali' dö' que nu ruá' dö' queëli'.

Guli'gún dxi'a quégaca yúgu'të bönnachi.

¹⁸ Channö huáca, tsca séqui'li', guli'cöz dxi'a
len yúgu'të bönnachi.

¹⁹ Böchi' luzá'ado', biti' uzí' lëbili' bönnachi la' libí'isili', pero guli'gü' lataj
ubi'ë Dios quégaca bönnachi na', tu' nazúaj lu guichi lá'ayi le rnna:

Neda' caza' uzí' lëba'.

Neda' ubi'a quégaca bönnachi.

Caní gunnë' Xanru' Dios. ²⁰ Lësca' caní rnna:

Channö zoë' nu bönni' biti' ridzáguië' li' dxi'a,
en ridunë', bë'ë le gahue'.

Channö ribidxë' nisa, bë'ë le guí'je'.

Cate' gunu' caní, gunu' ga utu'irñë' bönni' na'.

²¹ Biti' gu'u lataj inná be'e le ruá' dö' li',

pero gunná be'e le ruá' dö' na',

ugunu' dxin le naca dxi'a.

13

¹ Yúgu'tëli' ral-la' gunli' ca ta'nnë' bönni' yúlahui'. Dios caz budödë' lu
ná'agaquië' yöl-la'unná bë' nápagaquië', en nucu'ë xilátjagaquië' bönni' ni dë lu
ná'agaquië' yöl-la'unná bë'. ² Que lë ni na', nu ridá'baga' yúlahui' ridá'baga'
le nuzóia cažë' Dios, ate' nupa ta'dá'baga' caní, nabágagaca xiguia'. ³ Nacu'ë
bönni' yúlahui', calëga para ulu'zenë' bach nu run le naca dxi'a, pero para
ulu'zenë' bach nu ruá' dö'. Channö rë'ën' gunu' ga biti' ulu'zenë' li' bach,
ben le naca dxi'a, ate' uruju' dxi'a lógaquië'. ⁴ Náquië' bönni' yúlahui' ni'a
në'ë Dios para gácalenë' li', pero channö runu' le ruá' dö', ral-la' gádxinu', tu'
cabí nu'ë nítiso xiyyaga yúlahui'. Náquië' ni'a në'ë Dios para uzí' lëbë', gunë'
xiguia' nu ruá' dö'. ⁵ Que lë ni na' run bayudxi gunli' ca rnne' bönni' na'
dë lu në'ë, calëgasö tu' budödë' Dios lu në'ë gunë' libí'ili' xiguia', pero lësca'
para soa dxi ládxido'oli' lahuë' Dios. ⁶ Que lë ni na' ca' riguizzaj lázali' que
yúlahui', tu' nácagaquië' bönni' yúlahui' ni'a në'ë Dios, en tunë' le nudödi cažë'
lu ná'agaquië'.

7 Guli'guízxaj yúgu'té böñachi le rál-la'li' quégäquië'. Guli'guízxaj lázali' lu na' nu ral-la' quizxaj lázali'. Guli'guízxaj dumí nu ral-la' quízxjali'. Guli'gadxi nu ral-la' gádxili', en guli'gún bal nu ral-la' gunli' bal. **8** Cuntu nu bi ral-la' gál-la'li' que, pero tuz ral-la' idxi'ilí' luzá'ali', tu' chibén idú ca rinná bë' xibá queë' Dios nu nadxi'i luzë'e. **9** Caní ta'nná bë' xibá na':

Biti' gunu' dul-la' le riguitsaj xibá que yöl-la' nutsaga na'.

Biti' gútiu' böñachi.

Biti' cuanu'.

Biti' innío' que luzó'o le cabí nácatë.

Biti' së ládxu'u le dë que luzó'o.

Yugu' xibá ni, en yúgu'té xibá ia'zíca'rö, údxi gun nu run ca rnna didza' rnna caní:

Bidxi'i luzó'o ca nadxi'i cuinu'.

10 Nu na' nadxi'i luzë'e biti' bi run que luzë'e le ruá' dö'. Caní naca, nu na' nadxi'i luzë'e run idú ca rinná bë' xibá queë' Dios.

11 Guli'gún caní tu' nözili' ca raca dza ni zóaru' na'a, en nözili' ca' chibidxín dza usubán ládxili' ca rubán nu chiguxi, tu' chizóarö gal-la' dza uláru' lu le ruá' dö' ca guca cate' ni' gusí loru' réajlé'ëru' Cristo. **12** Ga zóaru' na'a naca ca chi'i dzö'ölö, ate' chizóoa tödi rëla na', pero ga na' zoë' Cristo naca ca lahui' dza, ate' chizóoa tsöjsóaru' ni'. Que lë ni na' ral-la' ucá'anaru' le tun böñachi ga naca chul-la que dul-la'. Ca na' rugacu cuinë' tu bönni' rejë' gudil-la le run chi'i lë' lu gudil-la, ral-la' taru' lu bení' queë' Dios, le gun chi'i rë'u lu na' tu' xihui'.

13 Para gunru' caní ral-la' gunru' dxi'a ca ral-la' gun nu ridá lahui' dza.

Biti' ral-la' súdxiru', en cabí gágulë'ëru'.

Biti' ral-la' gunru' le ruá' dö', en calëga le gun ditaj rë'u.

Biti' ral-la' til'-lalenru' luzá'aru', en cabí uzzé' eru' luzá'aru'.

14 Na'a, ral-la' un cuinli' lu icja ládxido'oli' ca náquië' Xanru' Jesucristo, en biti' güi'i ládxili' gunli' le rizë ládxili' lu yöl-la' böñachisö queëli'.

14

Biti' ral-la' si' quídza'ru' böchi' luzá'aru'

1 Guli'güü' lataj nu réajlé' Cristo gun libí'ili' tsözxön sal-la' biti' naca idú ca réajlé' nu na' Lë'. Biti' til'-lalenli' nu na' ca nácagaca le runi nu na' huáca nu gun. **2** Ca naca lë ni, nacu'ë bönni' runi légaquië' huáca ilahuë' yúgu'té le tagu böñachi, pero ia'bal-lë' bönni', tu' cabí naca idú ca ta'yéajlé'ë Cristo, tágusë' le raza ruzóaru'. **3** Na'a, bönni' na' rahuë' yúgu'té biti' ral-la' uzóë' tsölä'alö nu bönni' biti' rahuë' yúgu'té, en lësca' caní, bönni' na' biti' rahuë' yúgu'té biti' ral-la' si' quídze'ë bönni' na' rahuë' yúgu'té, tu' nazí' lu në'ë Dios iropë' bönni' na' ta'yéajlé'ë Cristo. **4** ¿Nuzxi caz li', rizi' quídzu'u bönni' huen dxin que nu yübölö? Bönni' na' náquië' huen dxin queë' Dios, lahuë' Xan cazë' urúajë' tsahui' o biti' urúajë' tsahui'. Channö urúajë' tsahui' lahuë' Dios, naca tu' gun cazë' Xanru' Dios ga urúajë' tsahui'.

5 Nadxi ca' zoë' nu bönni' runrë' bal tu dza ca runë' bal ia'zíca'rö dza, ate' bönni' yübölö, tuz ca runë' bal yúgu'té dza. Tu turu' ral-la' usédada'aru' channö naca dxi'a le runru'. **6** Bönni' na' runë' bal tu dza, runë' le bal para tseaj ládxë'ë Xanru', ate' bönni' na' biti' runë' bal dza na', para tseaj ládxë'ë Xanru' biti' runë' bal dza na'. Lësca' caní, bönni' na' rahuë' yúgu'té, rahuë' caní para tseaj ládxë'ë Xanru', en rë'ë Dios: "Xclenu'", ate' bönni' na' biti' rahuë' yúgu'té, biti' rahuë' le para tseaj ládxë'ë Xanru', en rë'ë ca' Dios: "Xclenu'."

⁷ Biti' zoë' nabanë' queëzë' nitúë' bönni' nabábalenë' rë'u, en biti' ratië' queëzë' nitúë' bönni'. ⁸ Channö zóaru' nabanru', para tseaj ládxí'ru'-në' Xanru' zóaru' nabanru', en channö gátiru', para gaca yöl-la' ba queë' Xanru' gátiru'. Caní naca, channö zóaru' nabanru' o channö gátiru', nequi quéziru' queë' Xanru'. ⁹ Que lë ni na' ca' gútie' Cristo, en bubanë', para gáquie' Xángaca nupa chinatigaca, en nupa nabángaca.

¹⁰ Na'a li', ¿bizx que richugu bë'u böchi' luzó'o? ¿Bizx que ruzú' tsölá'alo böchi' luzó'o? Yúgu'térü' idixinru' lahuë' Cristo ga uchi'a usöröë' rë'u. ¹¹ Canaca lë ni nazúaj lu guichi lá'ayi, rnna:

Rnnë' Xanru': "Ni'a quia' neda' caz,
ulu'zechu zxíbigaca yúgu'të bönochachi lahua' neda'.
Illa'guixjö' yálajdo' naca' Dios."

¹² Caní naca, uchi'a usöröë' Dios yúgu'térü'.

Biti' ral-la' gunru' ga ichixi iníguinë' böchi' luzá'aru'

¹³ Que lë ni na', bíti'rö ral-la' ichugu bë'eru' luzá'aru', pero ral-la' gun yúdxiru' cabí gunru' ga ichixi iníguinë' böchi' luzá'aru', en para cabí gunru' ga gunë' dul-la'. ¹⁴ Nöz quézida' biti' bi dë le ráguru' le gaca gun ga bíti'rö nácaru' tsahui' lahuë' Dios, ate' röjlöz lë ni didza' bë'ë Xanru' Jesús. Channö réquinë' tu bönni' zoa bi gaca gun ga bíti'rö náquië' tsahui' lahuë' Dios, queë' bönni' ni, caní naca. ¹⁵ Channö rusuhuí' innu' böchi' luzó'o, tu' ragu' le runi lë' biti' ral-la' gáguru', biti' runu' ca ral-la' gun nu nadxi'i böchi' luzé'e. Biti' bi ral-la' gagu' le gun ga gaca chopá ládxë'ë bönni' na', gútie' Cristo uláz queë'. ¹⁶ Que lë ni na', biti' bi gunli' le gun ga ila'nné xihui' bönochachi que le rusácalí' queë'lí' naca tsahui'. ¹⁷ Cate' rinná bé'ené' Dios rë'u, biti' ruí'i ládxí'ru' le guí'aj gáguru', pero ruí'i ládxí'ru' gácaru' tsahui', en sóaru' dxi ladxi', en udzéjaru', yugu' le gaca gunru' tu' zóalenë' Dios Bö' Lá'ayi rë'u. ¹⁸ Núti'tës nu run xichinë' Cristo ca nácagaca lë ni, run le raza ládxë'ë Dios, ate' uruaj dxi'a lógaca bönochachi.

¹⁹ Que lë ni na' ral-la' gunru' le ilún ga gata' le ribequi dxi ládxí'ru' len yúgu'të bönochachi, en le ilún tsutsu turu' ia'turu' ca réajle'ëru' Cristo. ²⁰ Biti' bi ral-la' gagu' le gun ga gaca chopá ladxi' nu na' nuzóë' Dios. Nácatë lë na' ta'nná bönochachi: "Yúgu'të dë lataj gáguru'", pero gunru' le ruá' dö' channö gunru' ga ichixi iníguinë' luzá'aru' tu' nözi lë na' ráguru'. ²¹ Gácarö dxi'a cabí gagu' bëla', en cabí guí'ju' xisi uva nal-la, en biti' bi gunu' le gun ga ichixi iníguinë' böchi' luzó'o, o le gun ga gaca chopá ládxë'ë, o le gun ga huöaj ládxë'ë ca réajle'ë Cristo. ²² Channö réajle'ë u dë lataj bi gunu', ral-la' gunu' le lahuë' Dios ga zu' zu'. Bica' ba bönni' na' biti' ruxösa ládxí'da'ahuë' lë' tu' nözi lë na' runi lë' dë lataj gunë', ²³ pero bönni' na' raca chopá ládxë'ë tu' nözi le rahue', nabáguë'ë xíguia', tu' runë' le cabí runi lë' dë lataj gunë'. Naca dul-la' yúgu'të le runru', le cabí runi rë'u dë lataj gunru'.

15

Ral-la' gunru' le raza ládxë'ë böchi' luzá'aru'

¹ Que lë ni na', channö nácaru' tsutsu ca réajle'ëru' Cristo, ral-la' guá' ilenru' nupa na' nagul-la ládxí'gaca ca ta'yéajlé' Cristo. Biti' ral-la' gunru' le raza ládxí'ru' la' cuínsiru'. ² Yúgu'térü' ral-la' gunru' le raza ládxë'ë böchi' luzá'aru' para gaca dxi'a queë', en idipa ládxë'ë ca réajle'ë Cristo. ³ Caní ral-la' gunru', tu' cabí benë' Cristo le guyaza ládxë'ë la' cuinsë', pero guca queë' ca na' nazúaj lu guichi lá'ayi, le rnna: "Budubága'gaca neda' yugu' didza' xihui'

gulu'i nupa gula'nné xihui' quiu' Li', Dios." ⁴ Yúgu'té le bulu'zúajé' lu guichi lá'ayi dza ni'te, bulu'zúajé' lu guichi para usédi ré'u. Lë na' nazúaj lu guichi lá'ayi run ga ribózaru' zxön ladxi', en ruhué tsahui' ré'u. Que lë ni na' zoa le runru' löza. ⁵ Rinábida'-në' Dios, Nu run ga ribózaru' zxön ladxi', en Nu ruhué tsahui' ré'u, gunë' ga gunli' tuz ca rusáca'lí' queéli', para gácali' ca na' ré'ënë' Jesucristo. ⁶ Caní ral-la' gunli' para gácali' tuz, cù'uli'-në' tsözxón yöl-la' ba Dios, Xuzé' Xanru' Jesucristo. ⁷ Que lë ni na', para gaca yöl-la' ba queé' Dios, guli'sí' lu ná'ali' tulí' ia'tulí' ca na' Cristo guzxi' lu në'ë ca' ré'u. ⁸ Caní ral-la' gunli', tu' rea' libí'ili': Bidé' Jesucristo, en gúcalené' böñachi judío, ate' caní bulu'e lahui naca idútë li didza' ru'ë Dios, ate' benë' ga bulu'dxín le guzxi' lu në'ë Dios unödzjé' quégaquië' xuz xtó'otu'.

Yugu' böñachi izá'a ila'yöni didza' dxi'a

⁹ Bidé' ca' Cristo para benë' ga ila'gú'u Dios yöl-la' ba nupa biti' nácagaca judío tu' ruhuéchi' ladxé'ë Dios légaquië'. Ca naca lë ni nazúaj lu guichi lá'ayi le rnna:

Que lë ni na', ulu'a lahui le nacu' Li'
lögaca böñachi idútë yödzölió,
en gul-la' quiu' yöl-la' ba.

¹⁰ Ga yúbólö nazúaj lu guichi lá'ayi le rnna:
Libí'ili', böñachi idútë yödzölió,
buli'dzéjalen böñachi queé' Dios.

¹¹ Ga yúbólö nazúaj ca' lu guichi lá'ayi le rnna:
Guli'cu'ë Xanru' yöl-la' ba,
yúgu'téli' biti' nácali' judío.
Guli'tséaj ladxi' Lë',
yúgu'téli' zóali' idútë yödzölió.

¹² Lësca' caní buzuajé' Isaías lu guichi le rnna:
Ilá' lahui Nu nababa dí'a dza queé' Isaí.
Gaca lo Nu na' para inná be'e nupa biti' nácagaca judío.
Nupa ni ilún löza Lë'.

¹³ Rinábida'-në' Dios, Nu run ga runru' löza, gunë' ga udzéjade'eli', en ga soa dxi ládxí'li' tu' réajlé'eli' Lë', en gunë' ga gaca idú ca runli' löza, tu' zóalen yöl-la' huáca queé' Dios Bö' Lá'ayi libí'ili'.

¹⁴ Böchí' luzá'ado'. Chinöz quézida' rúntica'sili' le naca dxi'a, en dëda' yöl-la' réajni'i queéli' para gaca uzéajni'ili' luzá'ali'. ¹⁵ Na'a naca' rugu ladxi', ruzúaja' queéli' lu guichi ni, böch'a'a, en rusá'a ládxí'li' tu' zoa le buzá' ladxé'ë Dios quia' neda'. ¹⁶ Que lë ni na' runa' xichiné' Jesucristo lögaca böñachi biti' nácagaca judío, en runa' libán que didza' dxi'a queé' Dios, para gaca ugu'a böñachi biti' nácagaca judío lu në'ë Dios, nupa na' guró cazé' Dios Bö' Lá'ayi queé' Lë'. Ilágagaquië' ca tu le rigú' uru' lu në'ë Dios, le raza ladxé'ë Lë'.

¹⁷ Na'a, tu' rúnlena' tsözxón Jesucristo dxin, dë lu na'a tsaza ládxa'a ca naca le nuna' lu xichiné' Dios. ¹⁸ Lësca' rurúguida' innía' ca naca lë na' benë' Cristo lu na'a neda', benë' ga tun böñachi biti' nácagaca judío ca rnna xtídzé'ë Dios. Lë ni benë' Lë', bugunë' dxin didza' bë'a neda', en yugu' dxin bena' neda'. ¹⁹ Lu na'a neda' bugunë' dxin ca' le nácagaca bë' bulu'e lahui Lë', en yugu' yöl-la' huáca zxön benë', en yöl-la' huáca na' queé' Dios Bö' Lá'ayi le guzóalen neda'. Caní guca, gusí lahua' runa' libán lu yödzö Jerusalén, ate' idú gásibi'ilö ga ridxitnë luyú Ilírico, chinuna' libán que didza' dxi'a ca naca queé' Cristo.

20 Bë' ládxa'a bena' libán que didza' dxi'a ga biti' bila'yöni böñachi ca naca queë' Cristo. La'tu' guna' libán ga chibila'yöni böñachi, guna' neda' ca runé' tu bönni' ruguélë' è lahui dxin zxön chinuné' bönni' yúbölö. **21** Ca bena' neda' naca ca na' nazúaj lu guichi lá'ayi le rnna: Ila'lé'e nupa nacuá' ga cuntu nu ben libán queë' Lë', en ila'yéajni'i nupa catu caz bila'yöni ca naca queë'.

Rë'enë' Pablo tsejë' yödzö Roma

22 Que lë ni na', sal-la' zián luzuí gú'unida' guída' ga zóali', biti' guca guída'. **23** Na'a, chibudxi bena' dxin quia' yugu'lataj ni, en chirë'ënda' zián iz guida' ga zóali'. **24** Que lë ni na', cate' tseja' luyú España, töda' ga zóali' libíili', tu' runa' löza uduyúa' libíili', en udzéjalenda' libíili'. Tödi ni' huáca ugú'uli' neda' nöza. **25** Na'a ral-la' tseja' Jerusalén, tsöju'a tu le gácalen nupa ni' néquiguequi queë' Cristo. **26** Caní guna', le gula'yaza ládzi'gaquië' bönni' nacu'ë luyú Macedonia, en luyú Acaya, bulu'tubé' bi tu'nödzjë' quéguequi böñachi yechi' dzágagaca böñachi queë' Cristo, nacu'ë Jerusalén. **27** Gula'yaza ládzi'gaquië' bönni' biti' nácagaquië' judío guluné' lë ni. Le nácaté naca tu le rál-la'gaquië' quégacca böñachi judío ni'. Channö bönni' biti' nácagaquië' judío tu'zi'ë xibé le nátagacca queë' Dios ni'a que le núngaca böñachi judío, lësca' ral-la' ilácalené' böñachi judío na', ulu'gunë' dxin le dë quégagüi. **28** Que lë ni na', cate' úksi udöda' lu ná'agaca böñachi judío lë na' bulu'nödzjë' bönni' ni, ni'irö töda' ga zóali' libíili' cate' tseja' luyú España. **29** Cate' guída' ga zóali', runa' löza idxínlena' yúgu'té le ruzí'ru' xibé ni'a que didza' dxi'a queë' Cristo.

30 Ni'a queë' Xanru' Jesucristo, en ni'a que yöl-la' nadxi'i ruchízië' Dios Bö' Lá'ayi icja ládzi'do'oru', ráta'yua' loli', böcha'ado', ulídzali'-në' Dios tsözxón len neda', inábili'-në' gácalené' neda'. **31** Guli'nabi-në' Dios gunë' ga ulá' neda' lu ná'agaquië' bönni' biti' ta'yéajlë'ë nacu'ë luyú Judea, en gunë' ga ila'yaza ládzi'gaquië' ila'zi'ë lëna' tsöju'alu ná'agaquië' bönni' nácagaquië' queë' Cristo, nacu'ë Jerusalén. **32** Guli'nabi-në' ca', channö naca ca rë'enë' Dios, gunnë' neda' lataj idxina' queëli' len yöl-la' rudzeja quia', para uzi' ládzi'lena' libíili'. **33** Na'a rinábida'-në' Dios, Nu run ga zoa dxi ládzi'ru', sóalené' yúgu'téli'. ¡Ca' gaca!

16

Tu'gapa Dios luzë'eguequi böñachi queë' Cristo

1 Rigu'a-nu lu ná'ali' Febe, nigula zanru' dá'anu Xanru'. Nácanu nigula huen dxin queë' Dios dzágaganu böñachi queë' Cristo nacuá' yödzö Cencrea. **2** Uláz queë' Xanru' guli'sí' lu ná'ali'-nu nigula na', ca ral-la' ilún böñachi queë' Cristo. Guli'gácalen lënu, unödzjali' queënu bíti'tés bi riquínnu. Lë cázanu gúcalennu böñachi zián, en gúcalennu ca' neda'.

3 Guli'gapa Dios Priscila, en Aquilo, nupa na' gulunlen neda' tsözxón dxin queë' Jesucristo. **4** Chopë' ni gula'dödë' ga guzóa böñadxi ilátië' para guluné' ga cabí gátia' neda', ate' rea' légaquië': "Xclenli", en calégasö neda', pero lësca' yúgu'té böchi' luzá'aru' nabábaguacië' gapa nacuá' böñachi queë' Cristo biti' nácagaca judío, të'ë légaquië': "Xclenli." **5** Guli'gapa Dios böñachi queë' Cristo tu'dubë' lu yu'u lídxigaquië' Priscila, en Aquilo na'. Guli'gapa Dios Epeneto, bönni' na' nadxi'ida'. Bönni' ni guyéajlë'ë Cristo zí'atëlo ca yúgu'té böñachi luyú Acaya. **6** Guli'gapa Dios María, nigula na' bennu dxin zxön queë' Cristo ga ni' rudúbili' libíili'. **7** Guli'gapa Dios Andrónico, en Junias, yugu'

bönni' uládz quia'. Yugu' bönni' ni gula'dzúnlenë' neda' tsözxön lidxi güié, en nadéli'gaquië' lataj lo ladaj bönni' gubáz nasöl-lë'ë Cristo. Lësca' gula'yéajlë'ë Cristo zi'alo ca neda'.

⁸ Guli'gapa Dios Amplias, bönni' na' nadxí'ida', en néquinë' queë' Xanru'. ⁹ Guli'gapa Dios Urbano, bönni' na' bénlenë' netu' tsözxön dxin queë' Jesucristo. Guli'gapa Dios Estaquis, bönni' na' nadxí'ida'. ¹⁰ Guli'gapa Dios Apeles, bönni' na' naca bë' réajlë'ë Cristo. Guli'gapa Dios nupa nacuá' lidxë' Aristóbulo. ¹¹ Guli'gapa Dios Herodión, bönni' uládz quia'. Guli'gapa Dios nupa nacuá' lidxë' Narciso, en ta'yéajlë'ë Xanru'. ¹² Guli'gapa Dios Trifena, en Trifosa, nigula na' tunnu dxin queë' Xanru'. Guli'gapa Dios Pérsida, nigula na' bennu dxin zxöön queë' Xanru', ate' nadxí'iru'-nu. ¹³ Guli'gapa Dios Rufo, bönni' rö queë' Xanru'. Guli'gapa Dios xinë'ë Rufo na', nácanu ca' ca xiná' caza'. ¹⁴ Guli'gapa Dios Asíncrito, en Flegonte, en Hermas, en Patrobas, en Hermes, enca' yugu' böchi' luzá'aru' dá'gaquië' Xanru', nacuá'lenë' légaquië'. ¹⁵ Guli'gapa Dios Filólogo, en Julia, en Nereo, en nigula zanë' Nereo na', enca' Olimpas, en yúgu'të böchi' luzá'aru' ta'yéajlë'ë Cristo, nacuá'lenë' légaquië'.

¹⁶ Guli'gapa Dios luzá'ali', unída'li' luzá'ali' lu yöl-la' nadxí'i queëli'. Tu'gapë' Dios libí'ili' yúgu'të böchi' luzá'aru' nabábagaquië' gapa nacuá' böñachi queë' Cristo luyú ni.

¹⁷ Na'a, ráta'yua' lolí', böcha'ado', guli'gún ga ilaca bë' nupa tun ga irúajli' choplö, en tun ga ichixi iníguli', tu' tu'sédinë' le cabí röjlöz le nazédali'. Guli'cuítä ga nacuá' böñachi caní ¹⁸ tu'cabí tun xichinë' Jesucristo. Tuné' dxin para bi gata' quégacasë', en ta'zi' yé'enë' yugu' bönni' nöoxaj ladxi', tu'gunë' dxin didza' nöoxaj ladxi', en didza' tséajlë'ëru' le cabí nácatë. ¹⁹ Rizé didza' ca na' runli' ca rnna xtídzë'ë Xanru', ate' ta'yöni yúgu'të böñachi. Que lë ni na' rudzéjada' ni'a que le runli' libí'ili'. Na'a, rë'ënda' gácali' sina' gunli' le naca dxi'a, en caléga gunli' le ruá' dö'. ²⁰ Dios, Nu run ga zóaru' dxi ladxi', si' gunë' ga ucúl-lalí' Satanás, tu' xihui'. Rinábida'-në' Xanru' Jesucristo uzá' ládxë'ë queëli' le gácalen libí'ili'.

²¹ Bi'i Timoteo, bi'i na' rúnlenbi' neda' tsözxön dxin, rugápabi' Dios libí'ili'. Lucio, en Jasón, en Sosípater, yugu' bönni' uládz quia', tu'gapë' Dios libí'ili'.

²² Neda', Tercio, ruzúaja' lu guichi didza' ni ru'ë Pablo, rugapa' Dios libí'ili', dzáguië' Xanru' neda'.

²³ Gayo, bönni' ni ru'ë neda' lataj zoa' lidxë', en ru'ë ca' lataj tu'dubi yúgu'të böñachi queë' Cristo ni, rugapë' Dios libí'ili'. Erasto, bönni' yu'u lu në'ë dumí que yödzö ni, rugapë' Dios libí'ili'. Böchi'ru'do' Cuarto rugapë' Dios libí'ili'.

²⁴ Rinábida'-në' Xanru' Jesucristo uzá' ládxë'ë queëli' yúgu'teli' le gácalen libí'ili'. ¡Ca' gaca!

Yöl-la' ba Dios

²⁵ Na'a, rigú'utu'-në' yöl-la' ba Dios, Nu gaca gun tsutsu libí'ili' ca naca didza' dxi'a runa' libán que, en ca naca libán runa' ca naca queë' Jesucristo, en ca naca le chibulu'ë lahui Dios que le bigachi' queë', lë na' bucáchë'ë Lé' dza ni'te ga bidxitné na'a dza. ²⁶ Na'a chibulu'ë lahui lë ni yugu' lu guichi bulu'zúajë' bönni' gulu'ë didza' uláz queë' Dios ca na' gunná cazë' Dios, Nu zóatica'sö. Na'a raca libán que lögaca yúgu'të böñachi para gaca ila'yéajlë'ë Cristo, en ilún ca rnna xtídzë'ë.

²⁷ ¡Ni'a que le benë' Jesucristo, gácatica'sö yöl-la' ba queë' la's dui Dios, Nu rácáterö caz! ¡Ca' gaca!

DIDZA' ZÍ'ALÖ GUSÖL-LË'Ë PABLO YÖDZÖ CORINTO

Pablo rugapë' Dios böñachi queë' Cristo nacu'ë Corinto

¹ Ca rë'ëni quéziné' Dios bulidzë' neda', Pablo, para gaca' gubáz queë' Jesucristo. Böchí'ru' Sóstenes runé' neda' tsözxón. ² Rugapa' Dios libí'ili', böchí' luzá'ado', rudúbili' queë' Dios lu yödzö Corinto, en nácali' quez queë' Dios tu' nácali' tuz len Jesucristo. Dios caz bulidzë' libí'ili' para guéquili' quez queë' tsözxón len yúgu'té nupa nacuá' yúgu'té lataj, en tu'lidzë' Dios, tu'guné' dxin La la'ayi queë' Xanru' Jesucristo, Xángaquië', enca' Xanru'. ³ Ráta'yua' lahuë' Xúziru' Dios, en lahuë' Xanru' Jesucristo uzá' ládxë'ë queëli', en gunë' ga soa dxi icja ládx'i'do'oli'.

Yugu' le ruzí'iru' xibé tu' néquiru' queë' Cristo

⁴ Rética'sa'-në' Dios: "Xclenu" ca naca queëli', tu' zoa le buzá' ládxë'ë Dios queëli' tu' nácali' tuz len Jesucristo. ⁵ Tu' nácali' tuz len Cristo, Dios chinagú'udë'ë xinözili' yúgu'té le nequi queë'. Rácalenë' libí'ili' ca naca yúgu'té didza' ru'ili', en runé' ga réajni'ili' yúgu'té. ⁶ Caní naca, tu' guzxí' lu ná'ali' idú ládxí'ili' le runtu' liná' lo ca naca queë' Cristo. ⁷ Que lë ni na', biti' bi riyadzaj queëli' que le runné' Dios Bö' Lá'ayi queëru', tsanni ni ribözali' dza na' ilá' lahuë' Xanru' Jesucristo. ⁸ Lë cazë' utipë' ládxí'ili' para gaca guá' ilenli' yúgu'té ga idxintë dza úxsi, para cabí gaca nu bi innë' queëli' dza ni' huödë' Xanru' Jesucristo. ⁹ Dios runé' ca rnnë', en Lë cazë' bulidzë' libí'ili' para gácali' tuz len Zxí'inë', Xanru' Jesucristo.

Narúajgaca choplö böñachi queë' Cristo nacu'ë Corinto

¹⁰ Ni'a queë' Xanru' Jesucristo ráta'yua' loli', böchí' luzá'ado', guli'gún tuz xtídzala' yúgu'téli'. Biti' irúajli' choplö, pero guli'gaca tuz ca rizá' ládxí'ili', en ca runi libí'ili'. ¹¹ Caní rea' libí'ili', böchí' luzá'ado', tu' gula'guíxjö'i'inë' neda' bönni' nacu'ë lídxinu Cloé ca runli', ta'nne' ridil-la dídzala'. ¹² Lë ni rnnia': Nadzá'lö didza' ru'ili' tu tuli'. Bál-lalí' rnnali' dá'ali' Pablo. Ia'bál-lalí' rnnali' dá'ali' Apolos. Ia'bál-lalí' rnnali' dá'ali' Cefas, ate' ia'bál-lalí' rnnali' dá'ali' Cristo. ¹³ ¿Naru' birúajtsë' choplö Cristo? ¿Naru' gudá'atsa' neda', Pablo, lë'e yaga cruz uláz queëli'? ¿Naru' bidílatsali' nisa para gácali' tuz len neda'? ¹⁴ Rea'-në' Dios: "Xclenu", tu' cabí buquila' nisa niturö libí'ili', pero chópasë' Crispo, en Gayo. ¹⁵ Que lë ni na' biti' gaca innali' bidílali' nisa para gácali' tuz len neda'. ¹⁶ Lëscá' buquila' nisa Estéfanos, en nupa nacuá' lidxë'. Biti' röjneda' channö buquila' nisa nu yúbölö. ¹⁷ Gusöl-lë'ë Cristo neda', calëga para uquila' böñachi nisa, pero para guna' libán que didza' dxí'a. Ru'a didza, calëga lu yölla' rácada' que caza', para cabí ucácha'a yöll-la' huáca que le benë' Cristo lë'e yaga cruz.

Cristo napa cazë' yöll-la' huáca, en yöll-la' réajni'i queë' Dios

¹⁸ Nupa nátagaca chul-la niti téquiguequi cá'asö naca libán runru' ca naca queë' Jesús, ca na' gútië' lë'e yaga cruz, pero rë'u na' nuláru', réquibe'eru' dzaga le yöll-la' huáca queë' Dios le rusolá rë'u. ¹⁹ Caní naca, tu' nazúaj lu guichi lá'ayi le rnna:

Guna' ga huöáca nítisö yöll-la' rácada'

quégaca nupa taca yenni'.
Tsölä'alo ucá'ana' yöl-la' réajni'i
quégaca nupa ta'yéajni'i yenni'.

20 ¿Bizxi caz uzi'tsé' xibé bönni' réajni'iné' yenni'? ¿Bizxi caz uzi'tsé' xibé bönni' nazédadé'e? ¿Bizxi caz uzi'tsé' xibé bönni' nabé'ede'ené' ru'ë didza'? Dios chibené' ga böáca cá'asö yöl-la' réajni'i quégaca böñachi yödzölió ni.
21 Dios, lu yöl-la' réajni'i queë', bití' bë'ë lataj ilúnbe' e böñachi yödzölió ni Lë' ní'a que yöl-la' rácada' quégäquië'. Dios guyaza ládxë'ë busölë' nupa ta'yéajlë' Lë' ní'a que libán na' runru', sal-la' téquiguequi böñachi cá'asö naca.

22 Të'ënné' yugu' bönni' judío ila'lé'ené' yöl-la' huáca nácabaca bë', ate' bönni' zi'tu' ta'guljé' yöl-la' réajni'i. **23** Rë'u ni runru' libán queë' Cristo, ca na' gútië' lë'e yaga cruz. Le nácatë, libán runru' ca gútië' Cristo, run ga ta'chixi ta'nigui böñachi judío, ate' ia'zíca'rö böñachi téquiguequi cá'asö naca.
24 Bönni' na' bulidzë' Dios légaquië', sal-la' nácabagaquië' bönni' judío o bönni' zi'tu', téquibe'ené' napa cazë' Cristo yöl-la' huáca queë' Dios, en yöl-la' réajni'i queë' Dios. **25** Téquiguequi böñachi yödzölió ni le benë' Dios naca bë' bití' bi nöziné', pero lë na' benë' náparö yöl-la' réajni'i ca yöl-la' réajni'i quégaca böñachi. Téquiguequi le benë' Dios naca bë' nacuíd'i në', pero lë na' benë' náparö yöl-la' huáca ca yöl-la' huáca quégaca böñachi. **26** Na'a, böchi' luzá'ado', gulí'tsöjné ca gúcali' cate' bulidzë' Dios libí'ilí'. Bití' gula'cu'ë ládjali' zián bönni' ta'yéajni'iné' lu yöl-la' bönächisö quégäquië', en bití' gula'cu'ë ládjali' zián bönni' unná bë', en caléga zián bönni' nácabagaquië' lo. **27** Téquiguequi böñachi yödzölió ni yugu' bönni' na' guröë' Dios bití' bi nözguequiné'. Caní benë' Dios para gunë' ga ulu'tu'i nupa ta'yéajni'i. Lësca' caní guröë' Dios nupa nacuíd'i gaca yödzölió ni para gunë' ga ulu'tu'i nupa nál-lagaca. **28** Lësca' caní, téquiguequi böñachi yödzölió ni nupa na' guröë' Dios nácabaca cá'asö, en bití' bi nácabaca, en nacuíd'i gaca. Caní benë' Dios para gunë' ga ulu'gá'ana cá'asö lë na' tun zxön böñachi yödzölió ni. **29** Que lë ni na', cuntu nu gaca gun ba zxön cuini lahuë' Dios. **30** Dios caz benë' ga nácaru' tuz len Jesucristo, en benë' ga náparu' yöl-la' réajni'i queë' Cristo. Tu' náquië' Cristo tuz len ré'u, nuhuoácaru' tsahui', en néquiru' quez queë' Dios, en nuláru'. **31** Naca ca na' nazúaj lu guichi lá'ayi, le rnna: "Channö zoa nu bi ré'ëni gun zxön, ral-la' gun zxön Xanru'."

2

Libán runru' queë' Cristo, ca gudë'ë lë'e yaga cruz

1 Caní guca, böchi' luzá'ado', cate' bidxina' queëli'. Bena' libán lolí' que xtídzë'ë Dios, caléga len yöl-la' réajni'i quia', en bití' bë'a didza' lu yöl-la' rácada' quia'. **2** Cate' ni' guzóalená libí'ilí', bë' ládx'a cabí gu'a didza' que le yúbölö, pero ca nácatë queë' Jesucristo bë'a didza', ca na' gudë'ë lë'e yaga cruz.
3 Guzóalená libí'ilí' lu yöl-la' ricuidi' quia', ate' lu yöl-la' radxi quia' guzxízida'a.
4 Bë'lena' libí'ilí' didza', en bena' libán que xtídzë'ë Dios, caléga ca tu'i didza' böñachi lu yöl-la' rácada' quéguequisö, pero guzóalené' Dios Bö' Lá'ayi neda', ate' guzóalen yöl-la' huáca queë' Dios neda', le guca bë' naca idútë li didza' bë'a. **5** Caní bena' para gaca tséajlé'ëli' Dios, caléga tu' biyónili' yöl-la' rácada' quégaca böñachi, pero tu' bilé'eli' yöl-la' huáca queë' cazë' Dios.

Dios Bö' Lá'ayi runë' ga núnbe'ëru'-në' Dios

6 Ru'itu' didza' lu yöl-la' rácada' lógaca nupa chinácarö idú ca ta'yéajlë' Dios. Yöl-la' rácada' ni bití' naca ca le nápagaca böñachi yödzölió ni, en bití' naca ca le

nápagaquië' bönni' ta'nná bë'ë dza ni zóaru' na'a, nupa na' ta'niti caz. ⁷ Ru'itu' didza' que yöl-la' rácada' nagachi', lë na' runödziej' Dios, tu' bigachi' yöl-la' rácada' na' buzóë' Dios dza ni'te para uzí'iru' xibé. ⁸ Yugu' bönni' ta'nná bë'ë dza ni zóaru' na'a biti' gulúnbe'ë yöl-la' rácada' na'. La'tu' gulúnbe'ë le, biti' ulu'dë'ë Xanru' nayépisétëre' lë'e yaga cruz. ⁹ Naca ca na' nazúaj lu guichi lá'ayi le rnna:

Chinupé'ë Dios le ulu'zí' xibé nupa nadxí'iguequi Lë',
yugu' fe cuntu nu ble'e, en biti' biyöni,
en biti' gula'zá' ládx'i'gaca bönnachi ca naca que.

¹⁰ Na'a, Dios nuzéajni'inë' rë'u yugu' lë ni lu në'ë Dios Bö' Lá'ayi, tu' ruyú cazë' Dios Bö' Lá'ayi yúgu'të, enca' le yu'u icja ládx'i'da'ahuë' Dios caz.

¹¹ ¿Naru' gaca inözinë' nu bönni' le yu'u icja ládx'i'da'ahuë' ia'túë' bönni'? Tuz bö' naca cazë' bönni' na' nözi lë na'. Lësca' caní, cuntu nu nözi le yu'u icja ládx'i'da'ahuë' Dios. Tuzë' Dios Bö' Lá'ayi nözinë' lë ni. ¹² Rë'u ni, biti' nazí' lu ná'aru' tu bö' ridasö yödzöliö ni, pero nazí' lu ná'aru' Dios Bö' Lá'ayi, Nu na' ruchízië' Dios rë'u para gaca gúnbe'ëru' yugu' le buzá' ládxë'ë Dios queéru'. ¹³ Yugu' lë na' buzá' ládxë'ë Dios queéru' ru'iru' didza' que, caléga len didza' tu'sedinë' bönnachi rë'u len yöl-la' rácada' quéguequi, pero len yugu' didza' rusédinë' Dios Bö' Lá'ayi rë'u. Caní naca, ruzéajni'iru' bönnachi zóalenë' Dios Bö' Lá'ayi légaquië' ca naca le rusédinë' Dios Bö' Lá'ayi rë'u.

¹⁴ Tu bönni' biti' zóalenë' Dios Bö' Lá'ayi lë' biti' rizí' lu në'ë le rusédinë' Dios Bö' Lá'ayi rë'u, tu' réquinë' cá'asö naca. Biti' gaca tséajni'inë' bönni' na' lë ni, tu' gaca guéquibe'enë' tuzë' bönni' zóalenë' Dios Bö' Lá'ayi lë' le nazaca' lë ni. ¹⁵ Tu bönni' zóalenë' Dios Bö' Lá'ayi lë' gaca guéquibe'enë' le nazaca' yúgu'të, pero cuntu nu gaca guéquibe'e le nazaca' cazë' bönni' na'. ¹⁶ Nazúaj lu guichi lá'ayi le rnna:

¿Nuzxi caz nözi le rizá' ládxë'ë Xanru'?

¿Nuzxi caz gaca uzéajni'i Lë'?

Le rizá' ládxë'ë Cristo yu'u icja ládx'i'do'oru' rë'u.

3

Nácaru' huen dxin tsözxön len Dios

¹ Que lë ni na', böchi' luzá'ado', biti' guca güí'lena' libí'ili' didza' ca ru'ilenä'-në' didza' tu bönni' nudödi cuine' lu në'ë Dios Bö' Lá'ayi, pero bë'lena' libí'ili' didza' ca ru'ilenä' nu naca böñachisö didza', biti' zóalenë' Dios Bö' Lá'ayi nu na'. Nácali' ca yugu' bï'i hué'eni. Biti' nácali' tsutsu ca réajlé'ëlinë' Cristo. ² Buséídida' libí'ili' le cabí naca böñiga, lë na' guca ca nidxi' güí'ili'. Biti' buséídida' libí'ili' le naca böñiga ca bëla' gáguli'. Biti' guca tséajni'ili' le naca ca bëla' gáguli', en biti' rácali' na'a. ³ Caní naca, tu' nácali' ca nu naca böñachisö ga ridxitné na'a dza. Tsanni ni ruzxé'eli' luzá'ali', en ridil-la dídzalí', en riúajli' choplö, nácali' ca nu naca böñachisö, en runli' tuz ca tun bönnachi yödzöliö ni. ⁴ Cate' zóalen libí'ili' nu rnna da' Pablo nu na', en ia'tu nu rnna da' Apolos, nácali' ca nu naca böñachisö.

⁵ ¿Nuzxi caz naca' neda', Pablo? ¿Nuzxi caz na' Apolos? Nácatu' huen dxin queé' Dios, ate' ni'a que le bentu' guyéajlé'ëli' Cristo. Tu tutu' runtu' dxin na' benné' Xanru' que queétu'. ⁶ Dxin bentu' lu icja ládx'i'do'oli' naca ca dxin run nu raza ruzúa. Neda' guza' xisedo', ate' Apolos gulu'ë nisa, pero Dios benë' ga gulén, en guzxön xisedo' na' nadúz icja ládx'i'do'oli'. ⁷ Caní naca, láti'do'os nazáquië' bönni' guz, en láti'do'os ca' bönni' rigu'ë nisa, pero nazáca'dë'ë Dios

Nu run ga rilén, en rizxón xisedo' na'. ⁸ Tuz ca nácagaquië' bönni' razé', en bönni' rigu'ë nisa. Dios ubi'ë que'ëgaquië' tsca naca dxin runé' tu tué'. ⁹ Nácatu' huen dxin tsözxón len Dios, ate' libí'ilí' nácali' ca la' yëla que'ë' Dios ga runtu' dxin.

Lësca' caní nácali' ca tu yu'u runé' Dios. ¹⁰ Ca naca le buzá' ládxé'ë Dios quia', naca' ca tu bönni' huen zö'ö lo. Neda' gulu'a xilibi zö'ö, ate' nu yúbölö richisa zö'ö na'. Tu turu' ral-la' uyuru' ca richísaru' zö'ö lahui xilibi zö'ö na'. ¹¹ Dios chigulu'ë tu xilibi zö'ö le naca Lë cazé' Jesucristo, ate' cuntu nu gaca cu'u ia'tú xilibi zö'ö caní. ¹² Dxin runru' que'ë' Cristo naca ca richísaru' zö'ö lahui xilibi zö'ö na'. Lahui xilibi zö'ö na' gaca nu gun dxin le naca ca richisa zö'ö le naca ca le néquini oro, o plata, o guiój nazáca'da'gaca, o gaca nu gun dxin le naca ca richisa zö'ö le néquini yaga, o guizxi, o guixi' cá'asö. ¹³ Gaca bë' ca naca dxin núnngaca tu tu bönnachi. Cate' idxín dza ichúguië' Dios quégaca bönnachi, ilá' lahui dxin nunru', tu' tödi dxin na' lu guí', ate' guí' na' si' bë' dxin núnngaca tu tu bönnachi. ¹⁴ Channö dxin nuné' tu bönni' urúaj dxi'a lu guí' na', le naca ca tu zö'ö guchisë', Dios ubi'ë que'ë' ca sa'yéaj dxin nuné'. ¹⁵ Channö tsegui dxin nuné' tu bönni' le naca ca tu zö'ö guchisë', unitië' le ré'ënë' ubi'ë Dios que'ë', pero ulá cazé' lë, ate' gaca que'ë' ca raca que nu rulá tu lu guí'.

¹⁶ ¿Naru' cabí nözili' naca cázali' yudo' que'ë' Dios, ate' zoë' Dios Bö' Lá'ayi icja ládzi' do'oli? ¹⁷ Channö nu usunuti yudo' que'ë' Dios, Dios usunitië' nu na', tu' naca lá'ayi yudo' que'ë' Dios, ate' libí'ilí' naca cázali' yudo' na'.

¹⁸ Biti' si' ye'e cuinli'. Channö réqui nu nutsa'ládjali' rácada' ca tícada' bönnachi yödzölió ni, ral-la' huöáca nu na' ca tu bönni' biti' bi nözine', para gata' que yölla' rácada' le naca idú. ¹⁹ Nu bönni' napze' yöl-la' rácada' que yödzölió ni náquië' tu bönni' biti' bi nözine' lahuë' Dios. Nazúaj lu guichi lá ayi le rnna: "Dios runé' ga ila'chixi ila'nigui nupa tícada', ruguné' dxin yöl-la' rácada' quéguequi." ²⁰ Lësca' caní rnna: "Xanru' nözine' nítiso naca le ta'bequi ícjagaca bönnachi tícada'." ²¹ Que lë ni na', biti' ral-la' gunli' zxön le gaca guné' tu bönni'. Nequi queëli' yúgu'të. ²² Néquiguequi queëli':

Pablo, en Apolos, en Cefas,
en yödzölió ni,
en yöl-la' na'bán, en yöl-la' guti,
en dza ni zóaru' na'a, en dza si' za'.
Yúgu'të nequi queëli',
²³ ate' libí'ilí' néquili' que'ë' Cristo,
ate' Cristo néquinë' que'ë' Dios.

4

Dxin tuné' bönni' gubáz nasö'l-lë'ë Cristo

¹ Que lë ni na', ral-la' guéquili' nácatu' netu' huen dxin que'ë' Cristo, en nazi' lu na'tu' le nagachi' que'ë' Dios. ² Yugu' bönni', Dios nudöd' lu ná'agaquië' ulu'guné' dxin le nequi que'ë', run bayudxi iluné' idú dxi'a le tuné'. ³ Biti' bi ruf'i ládx'a a channö uchi'a usöröli' neda', o channö ulu'chi'a ulu'sörö bönnachi yödzölió ni neda'. Biti' ca' ruchi'a rusörö cuina'. ⁴ Biti' ruxós ládzi'da'ahua' neda'. Lë ni biti' naca bë' biti' nabága' xíguia'. Xanru' náquië' Nu ruchi'a rusöröe' neda'. ⁵ Que lë ni na', biti' ral-la' uchi'a usöröli' nu bönni' zí'alö ca idxín dza que. Guli'cöz dza ni' huöde' Xanru', ate' Lë' ubéajë' ga liná' le nagachi' ga chul-la, en ulu'ë lahui le yu'u icja ládzi' do'gaca yúgu'të bönnachi.

Ní'irö Dios ubi'ë que queégaca böñachi le gun bal léguequi ca ral-la' gaca quéguequi.

⁶ Na'a, böchi' luzá'ado', ca naca lë ni, bë'a didza' que le runtu' netu', Apolos, en neda'. Huáca usédali' ca runtu' netu' para gunli' le nazúajsö lu guichi lá'ayi, en biti' gunli' zxön tuë' bönni', en biti' uzóali' tsölä'alö ia'tüë'. ⁷ ¿Nuzxi bentsö ga nacu' li' lo? ¿Bizxi caz bidéli'nu' li' le cabí bennë' Dios quiu'? Channö Lë' bénnasë' quiu' lë na' dë lu no'o, ¿bizx que run ba zxön cuinu', réquiu' rácasö quiu' bidéli'nu' lë na'?

⁸ ¿Naru' réquitseli' nadéli'téröli'? ¿Naru' réquitseli' rilé'eli' yöl-la' tsahui' queéë? ¿Naru' réquitseli' rinná bë'ëli', sal-la' biti' rinná bë'ëtu' netu'? Ni'a queéë Xanru' Dios rë'ënda' inná bë'ëli' para gaca inná bë'lentu' libí'il'i' tsözxön.

⁹ Ruri neda' naca queétu', bönni' gubáz queéë' Dios, ca nuzóë' netu' zéajtu' xibánite ca na' raca quégäquië' bönni' chinarugu quégäquië' ilátië' lahui' lógaca böñachi. Nácatu' ca tu le tu'yuda' böñachi yödzölió ni, enca' ca tu le tu'yudë'ë gubáz lá'ayi queéë' Dios. ¹⁰ Tu' rë'ënitu' guntu' xichinë' Cristo, ru'it'u' böñachi lataj téquigüequi nácatu' bönni' biti' bi nözquequinë', pero libí'il'i' réquili' rácada'ali' tu' nácali' queéë' Cristo.

Libí'il'i' réquili' chinál-lali',
pero téquigüequi böñachi nacuíditu' netu'.

Tu'zóá böñachi netu' tsölä'alö,
pero tun libí'il'i' bal.

¹¹ Ga ridxitë na'a dza, riduntu', en ribídxitu' nisa.
Biti' dë lari' gácutu'.

Tun böñachi netu' zi', en biti' zoa lídxitu'.

¹² Rusaca' zi' cuintu', la' nétu'sö runtu' dxin.

Tu'lidza böñachi netu' zi',
pero netu' rinábatu' le gácalen léguequi.

Ta'bía ládx'i'gaca böñachi netu',
pero ruá' rilentu' le.

¹³ Ta'nné' queétu',
pero lu yöl-la' nöoxaj ladxi' ru'ilentu' légaquië' didza'.
Ga ridxitë na'a dza nácatu' ca bëbu que yödzölió ni,
en ca tu le ta'rú'una yúgu'të böñachi.

¹⁴ Ruzúa ja' queéli' caní lu guichi, caléga tu' rë'ënda' guna' ga utu'ílli', pero rë'ënda' uzéajni'ida' libí'il'i', runa' ca runë' tu bönni' ruzéajni'inë' yugu' zxí'ini cazë' tu' nadxi'inë' légacabi'. ¹⁵ Sal-la' gaca zián gáyu'ë bönni' ila'cuá'alen libí'il'i', en ulu'sédine' libí'il'i' ca naca queéë' Cristo, tuz nu zoa naca ca xúzili', nu na' ben ga néquili' queéë' Cristo. Lu yöl-la' na'bán cubi le nápalí' tu' dzágali' Cristo, neda' caz naca' ca xúzili' tu' busiyönda' libí'il'i' didza' dxí'a. ¹⁶ Que lë ni na', ráta'yua' lolí' güí'i ládx'i' gunli' ca runa' neda'.

¹⁷ Que lë ni na' ca' risööl-la' a-bí' bi'i Timoteo ga zóali'. Tu' rúnlenbi' neda' dxin queéë' Xanru' nácabí' ca zxí'ini caza', en nácabí' idú ladxi', ate' nadxi'ida'-bi'. Gunbi' Timoteo ga tsöjnélí' yugu' xibá rusédida' tu' néquida' queéë' Cristo, yugu' le rusédida' yúgu'të lataj lógaca yúgu'të cö' böñachi queéë' Cristo. ¹⁸ Bál-lali' run ba zxön cuinli' tu' réquili' biti' rö' udixina' ga zóali'. ¹⁹ Na'a, la' udxínte' ga zóali' channö Xanru' gunné' neda' lataj. Ní'irö guéquibe'eda', calégasö didza' tu'ë bönni' tun ba zxön cuíngäquië', pero guéquibe'eda' channö zóalen yöl-la' huáca queéë' Dios légaquië'. ²⁰ Channö názi' lu ná'ali' rinná bë'enë' Dios libí'il'i', biti' naca bë' naca caní tu' rmnásili' ca'. Naca bë' naca caní channö zóalen libí'il'i'

yöl-la' huáca queé' Dios. ²¹ ¿Bízxilö rë'ënili? ¿Naru' rë'ënili' udxina' ga zóali' len gubá'ayi, para guna' libí'ili' zi', o len yöl-la' nadxi'i, en lu yöl-la' nöxaj ladxi'?

5

Pablo ruchi'a rusöröö' tuë' bönni' runé' le ruá' dö'

¹ Rizé didza' zóalenë' libí'ili' tuë' bönni' runë' le ruá' dö', tu' zóalenë' nigula queé' xuzé'. Le ruá' dö' caní biti' ca' tun bönachi biti' núnbe'gaca Dios. ² Libí'ili' run ba zxón cuinli', pero ral-la' huí'ini li', en ubéajli' nu na' run dul-la' na' ga zóali'. ³ Sal-la' biti' zóalena' libí'ili' lu idútë le naca', le nácatë zóalena' libí'ili' lu bö' naca caza'. Ca chizóalena caza' libí'ili' chibuchi'a busöröa' nu na' run dul-la' na'. ⁴ Cate' udúbili' queé' Xanru' Jesucristo guna' libí'ili' tsözxön lu bö' naca caza'. Ní'irö' len yöl-la' huáca queé' Xanru' Jesús ⁵ buli'dödë' bönni' na' lu na' Satanás tu' xihui' para initi idútë le naca cazé', pero ulá bö' naca cazé' dza ni' huödë' Xanru'.

⁶ Biti' naca dxi'a gun ba zxön cuinli' ca naca le runli'. ¿Naru' cabí nözili' didza' na' rnna: "Cua zido'os que yöta xtila gun ga chazxaj idútë cúa nazi'i le"?

⁷ Na'a, guli'cúa ga zóal' dul-la' na' le naca ca tu cúa zi gulás, para gácali' dxi'a. Ní'irö gácali' ca tu cúa cubi le cabí nazi'i cúa zi que, ca na' le nácatë chinácali'. Naca queéru' ca chizóarú Laní Pascua cate' tahué' yöta xtila biti' nazi' cúa zi que, en chigulutié'-ba' uláz queéru' bö'cu' zxila' que Laní Pascua na', bö'cu' zxila' na' náquië'. Lë cazé' Cristo. ⁸ Que lë ni na' ral-la' gunru' laní na', calëga zóalen rë'u cúa zi gulás na' le rulu'i le ruá' dö', en le cabí nazaca', pero ral-la' ugunru' dxin yöta xtila na' biti' nazi'i cúa zi que, yöta xtila na' rulu'i le naca idú dxi'a, en le naca idútë li.

⁹ Cate' buzúaja' queéli' lu guichi zí'alö, gudxi caza' libí'ili' biti' gunli' tsözxön bönni' tunë' le ruá' dö'. ¹⁰ Gudxa' libí'ili' caní, calëga para ucuítali' tsaz ga nacua' bönachi yödzölió ni, nupa tun le ruá' dö', en ga nacuá' bönachi ta'zé láxji'gaca le dë que luzé'eguequi, en ga nacu'ë yugu' bönni' gubán, en bönachi ta'yéaj láxji'gaca budó' guiój budó' yaga. Para gunli' caní gun bayudxi irúajli' yödzölió ni. ¹¹ Le rë'ëni inná didza' na' buzúaja' queéli' zí'alö naca para cabí gunli' tu zxón tuë' bönni' rnne' néquine' queé' Cristo, pero runë' dul-la' le lë'e, o rizé láxjë' le dë que luzé'ë, o reaj láxjë'ë tu budó' néquini, o rinné xihuë'ë, o rizúdxinë', o ribanë'. Biti' ca' gágulenli' tsözxön tuë' bönni' caní. ¹²⁻¹³ Biti' nequi quia' nedá' uchi'a usöröa' nupa biti' nabábagaca rë'u. Dios uchi'a usöröe' léguequi. Libí'ili' cázali' ral-la' uchi'a usöröli' nupa nabábagaca libí'ili'. Que lë ni na', guli'cúë' ga zóali' bönni' xihui' na'.

6

Biti' ral-la' ichë'ëru' böch'i luzá'aru' lógaca bönachi yúlahui'

¹ Cate' ridil-la dídzala'li' tuli' len ia'tuli', ¿nacxi caz rurúguili' tséajli' yúlahui' ga ulu'chi'a ulu'sörö nupa biti' ta'yéajli' Cristo libí'ili'? Dxi'arö tséajli' lógaca bönachi queé' Cristo para ulu'chi'a ulu'sörö libí'ili'. ² ¿Naru' cabí nözili' nupa néquiguequi queé' Cristo ral-la' ulu'chi'a ulu'sörö yúgu'te bönachi yödzölió? Channö libí'ili' cázali' uchi'a usöröli' bönachi yödzölió, ¿naru' cabí nápal' yöl-la' réajni' uchi'a usöröli' didza' bizxaj caní? ³ ¿Naru' cabí nözili' ral-la' uchi'a usöröru' yugu' gubáz lá'ayi? Rúnterö bayudxi uchi'a usöröru' le taca yödzölió ga ni zóaru' na'a. ⁴ Na'a, channö raca tu le run bayudxi nu uchi'a usörö, lë na' raca yödzölió ni, ¿bizx que rucuá'ali' nupa ulu'chi'a ulu'sörö le, nupa na' biti' bi dë lu në'eguequi ládjagaca bönachi queé' Cristo? ⁵ Rnnia' caní para

guna' ga utu'ili'. ¿Naru' cabí zóalen libí'ili' nu raca latí' nu gaca uchi'a usörö le raca quégaquië' böchi' luzá'ali'? ⁶ ¿Nacxi caz gaca tu bönni' réajlë'ë Cristo iché'ë böchi' luzë'ë yúlahui' ga ulu'chi'a ulu'sörö bönnachi biti' ta'yéajlë'ë Cristo légaquië'?

⁷ Le nácaté richixi riníguili' tu' ridil-la dídzalí'. ¿Bizz que biti' guá' ilenli' nu ruá' dö' queëli'? ¿Bizz que biti' guá' ilenli' nu rucáchil'an le dë queëli'? ⁸ Libí'ili' ruá'ali' dö', en rucachi' lanli', ate' runli' caní quégaquië' böchi' luzá'ali' ta'yéajlë'ë Cristo.

⁹⁻¹⁰ ¿Naru' cabí nözili' biti' ila'yaza bönnachi biti' nácagaca tsahui' ga rinná bë'ë Dios? ¡Biti' si' ye'e cuinli'!

Biti' ca' tsaz ga rinná bë'ë Dios nu run le ruá' dö':
Cuntu nu reaj ladxi' budó' guiój budó' yaga,
en cuntu nu riguitsaj xibá que yöl-la' nutsaga na',
en cuntu nu bönni' run cuinë' ca nigula,
en cuntu nu bönni' zóalenë' la' luzë'ë bönni'së',
en cuntu nu bönni' gubán, en cuntu nu ruhuidi',
en cuntu nu rizudxi, en cuntu nu rinné xihui',
en cuntu nu rucáchil'an.

Biti' ca' tsaz nu run caní ga rinná bë'ë Dios.

¹¹ Caní gúcali' bál-lali' libí'ili', pero na'a chinuhuöácali' dxia' que dul-la' gubágali', en chinéquili' quez queë' Dios, en chinuhuöácali' tsahui' ni'a que le benë' Xanru' Jesús. Bö' La'ayi queë' Dios runë' ga raca caní.

Idútë le naca cázaru' nequi quez queë' Dios

¹² Ta'nná bönnachi: "Yúgu'té dë lataj gunru'." Sal-la' nácaté didza' ni, biti' ral-la' gunru' yúgu'té. Sal-la' dë lataj guna' yúgu'té, biti' gu'a lataj bi inná be'e neda'. ¹³ Ta'nná ca' bönnachi: "La' huagu naca le tsaz lë'ëru', ate' lë'ëru' naca ga tsudzu la' huagu." Nácaté didza' ni, pero idzxín dza usunítië' Dios la' huagu, enca' lë'ëru'. Dios benë' idútë le naca cázaru', calëga para ugunru' le dxin gunru' le ruá' dö'. Naca para uzi'ë xibé Xanru', ate' Xanru' náquië' para uzi'ë xibé' idútë le naca cázaru'. ¹⁴ Dios busubanë' Xanru' Cristo lu yöl-la' guti. Lëscá' caní, len yöl-la' huáca queë' usubanë' rë'u.

¹⁵ ¿Naru' cabí nözili', idútë le nácali' naca tuz len le naca cazë' Cristo? ¿Nacxi caz gaca cázali' tu le da' Cristo, en gunli' ga ta' tu nigula udá dzaga? ¡Biti' ca' ral-la' gunli' caní! ¹⁶ ¿Naru' cabí nözili' channò tu bönni' zóalenë'-nu nigula udá dzaga, náquië' tuz len lënu'? Ca naca lë ni nazúaj lu guichi lá'ayi le rnna: "Ilácagaquië' ca tuz bönnachi iropë' na." ¹⁷ Na'a, nu bönni' náquië' tuz len Xanru', náquië' tuz len Lë' lu bö' naca cazë'.

¹⁸ Que lë ni na', biti' ca' gunli' le ruá' dö'. Bítitës dul-la' yúbölö runë' tu bönni', ní'lö lu le naca cazë' runë' dul-la' na'. Nu bönni' runë' dul-la' le lë'ë, runë' dul-la' le dzaga lë cazë'. ¹⁹ ¿Naru' cabí nözili' idútë le naca cázali' naca yudo' queë' Dios Bö' La'ayi? Dios caz nuchizë' Dios Bö' La'ayi na' libí'ili', ate' Lë' zoë' icja ládxi'do'oli'. Que lë ni na' biti' nequi queëzili' idútë le naca cázali'. Na'a, nequi queë' Dios. ²⁰ Dios gú'ue' libí'ili' len tu le zxön le gudizzjë'. Guli'gún dxin idútë le nácali', enca' bö' naca cázali' para gaca queë' Dios yöl-la' ba, tu' néquiguequi queë' Dios idútë le naca cázali', enca' bö' naca cázali'.

¹ Na'a, ubi'a didza' yugu' le rinábili' neda', le buzúajli' quia' lu guichi. Gácarö dxi'a queë' nu bönni' channö cabí sóalenë'-nu nigula. ² Tu' tunda' bönachi le ruá' dö' ga ni' zóali', yúgu'té bönni' nabábagacié' libí'ili' ral-la' ila' cuá'lenné'-nu nigula que queégacanu. ³ Bönni' na' zóanu nigula queë' ral-la' gunë' queënu nigula queë' ca naca yöl-la' run que yöl-la' nutsaga na', en la' lóbisö ral-la' gunnu nigula len bönni' queënu. ⁴ Biti' dë lu ná'asönu nigula le naca cázanu, pero bönni' queënu dë lu në' è ca' le. Lësca' caní, biti' dë lu ná'asë' bönni' le naca cazé', pero nigula queë' dë lu ná'anu ca' le. ⁵ Biti' ral-la' ila'dá'bagué' è luzá'agaquié' bönni', en nigula na', nutsaga ná'agaquié'. Huácaso ca' channö iluné' tuz didza' biti' ila'dzáguié' tu chí'siò para gaca ulu'lidzé' Dios queë' gunë'. Tödi na', bönni' na' ral-la' sóalenë'-nu nigula queë' leyúbölö, para cabí sequi' Satanás tu' xihui' gun ga tsázagaquié' nöza dul-la' tu' cabí gaca ila'nná be'e cuíngaqüie'.

⁶ Lë ni rea' libí'ili' naca tu le runnë' Xanru' libí'ili' lataj. Biti' naca le gunná bë'ë. ⁷ Runi neda' gácarö dxi'a ulu'gá'ané' tuz yúgu'té bönni', ca na' zoa' tuza' neda'. Tu tuë' bönni' rizi'ë tscá le runödzjë' Dios queë' gunë'. Tuë' rizi'ë tu le runödzjë', ate' ia'tú'ë rizi'ë ia'tú' le runödzjë'.

⁸ Na'a, rea' nupa zóagaca tuz, enca' yugu' nigula uzëbi, gácarö dxi'a quéguequi ulu'gá'ana tuz ca na' zoa' tuz neda'. ⁹ Channö cabí gaca ila'nná be'e cuíngaqüie', huáca ulu'tsaga ná'agaquié', tu' gácarö dxi'a ulu'tsaga ná'agaquié', en cabí ila'zé ládx'i'gaquié' le ruá' dö'.

¹⁰ Rinná bé'eda' nupa chinutsaga né'eguequi, en caléga néda'sö runa' xibá ni, pero Lë cazé' Xanru' runé' le, rnnë': "Biti' ulá'alennu tu nigula bönni' queënu." ¹¹ Channö nu nigula ulá'alennu-në' bönni' queënu, ral-la' ugá'anana túzinu, o huöácanu tuz len bönni' queënu na'. Lësca' caní tu bönni' biti' ral-la' ucá'ané'-nu nigula queë'.

¹² Na'a, néda'sö rea' ia'zíca'rö bönachi, en caléga rnnë' Xanru' caní, rnnía': Channö zoë' nu böchi' luzá'aru' réajlé'ë Cristo, ate' nigula queë' biti' réajlé'ënu Xanru', en channö rë'ënini ugá'analenü lë', biti' ral-la' ulá'alenné'-nu. ¹³ Lësca' caní rnnía': Channö zóanu nu nigula zanru' réajlé'ënu Cristo, ate' bönni' queënu biti' réajlé'ë Xanru', en channö rë'ënne' ugá'analené'-nu, biti' ral-la' ulá'alennu lë'. ¹⁴ ¡Caní ral-la' iluné'! Bönni' cabí réajlé'ë na', Dios rilé'ené' lë' ca tu bönni' néquinë' quez queë' tu' náquié' tuz len nigula queë' réajlé'ënu Cristo, ate' nigula caní, biti' réajlé'ënu, Dios rilé'ené'-nu ca tu nigula néquinu quez queë' tu' nácanu tuz len bönni' queënu náquié' böchi' luzá'aru' réajlé'ë Cristo. La'tu' cabí naca caní, ilácabí' zxí'inigaquié' ca yugu' bi'i lan lahuë' Dios. Na'a, nácagacabi' quez queë' Dios. ¹⁵ Nu bönni' o nigula nu cabí réajlé'ë Cristo, channö rë'ëni ulá'alen nu na' nutsaga ná'alen, huáca ca'. Biti' run bayudxi ugá'analen nu na' böchi' luzá'aru' o zanru' nu réajlé'ë Cristo, tu' bulidzé' Dios rë'u para cözaru' tsáhu'ido'. ¹⁶ ¡Caní ral-la' gaca! Nadxi ca' li', nigula, huáca gunu' ga ulë'bönni' quiú', ate' nadxi ca' li', bönni', huáca gunu' ga ulanu nigula quiú'.

¹⁷ Ral-la' gunru' tu turu' tsca le bennë' queëru' Xanru', enca' tsca guca queëru' cate' bulidzé' Dios rë'u para guéquiru' queë'. Rusédida' yúgu'té cö' bönachi queë' Cristo xibá ni. ¹⁸ Channö Dios bulidzé' nu bönni' narugu lu xipélë'ë le naca bë' néquinë' queë' Dios, ral-la' ugá'ané' caní, zoa lu xipélë'ë lë na' naca bë'. Lësca' caní, channö Dios bulidzé' nu bönni' biti' narugu lu xipélë'ë le na' naca bë', biti' ral-la' ichúguié' lë na' lu xipélë'ë. ¹⁹ Biti' bi nazaca' lë na' narugu lu xipélë'ë tu bönni', en channö biti' narugu lu xipélë'ë bönni' lë

na' naca bë', biti' bi nazaca'. Le nácada' lesaca' naca gunru' ca rinná bë' xibá queë' Dios. ²⁰ Ral-la' ugá'anë' tu tuë' bönni' ca na' gúquië' cate' ni' bulidzë' Dios lë'. ²¹ Channö bulidzë' li' cate' ni' nacu' bönni' nadó'o, biti' cõ'u böninga tu' nacu' caní, pero channö gata' quiu' lataj iruju' lu na' xanu', buzí xibé lataj na' gata' quiu' iruju'. ²² Channö bulidzë' Xanru' nu bönni' cate' ni' nadó'ë, lahuë' Xanru' náquië' ca nu bönni' narúajé' lu né'ë xanë' na', para gunë' xichinë' Xanru'. Lësca' caní, channö bulidzë' Xanru' nu bönni' cate' ni' narúajé' lu né'ë xanë' na', bönni' ni náquië' ca tu bönni' nadó'o queë' Cristo. ²³ Zxöntëro le gudizxjë' Dios, gú'ue' libí'ili'. Que lë ni na' biti' ral-la' guti' cuinli' lu ná'agaca bönoch. ²⁴ Que lë ni na' ca', böchí' luzá'ado', ral-la' sóali' lahuë' Dios tsca guca queëli' tu tulí' cate' ni' bulidzë' Dios libí'ili'.

²⁵ Ca naca quégaca nupa biti' nutsaga ná'agaca, biti' bi gunná bë'enë' Xanru' neda'. Caní runi neda', ate' huáca uzxöni ládxí'li' neda' tu' ruhuéchi' ládxë'ë Xanru' neda'. ²⁶ Tu' taca zián le raca queëru' dza ni zóaru' na'a, runi neda' gácarö dxi'a channö ulu'gá'anë' yúgu'të bönni' ca nácagaquíë' na'a. ²⁷ Channö nutsaga ná'lenu'-nu nigula, biti' ulá'alenu'-nu. Lësca' caní, channö zu' tuzu', biti' quilju' tu nigula para utsaga ná'lenu'-nu. ²⁸ Na'a, channö utsaga ná'lenu'-nu nigula, biti' gunu' dul-la', en channö tu bi'i nigula utsaga ná'alenbi'-në' bönni', biti' gunbi' dul-la', pero ila'guí'i ila'zaca' nupa nutsaga ná'agaca yödzölió ni, ate' rë'ënda' guna' ga uláli' lu yöl-la' rigui' rizaca' na'.

²⁹ Na'a, rea' libí'ili' lë ni, böchí' luzá'ado'. ¡Chizóa idxín dza údxi! Que lë ni na', yugu' bönni' nutsaga ná'lengaquíë'-nu nigula ral-la' ilu' ládxí'gaquíë' Dios, ca runé' nu bönni' biti' nutsaga ná'alenë' nigula. ³⁰ Lësca' caní, nupa ta'bödxi yechi' ral-la' ulu'dzeja lahuë' Dios ca run nu biti' ribödxi, ate' nupa tu'dzeja ral-la' ila'cuá' nöxaj lahuë' Dios ca run nu biti' rudzeja, ate' nupa to'o ral-la' ilaca ca nu biti' bi dë que. ³¹ Nupa tu'gún dxin le dë yödzölió ni ral-la' ilaca ca nu biti' ruí'i ladxi' le dë yödzölió ni, tu' udödi quégaca le rilé'eu' yödzölió ni.

³² Rë'ënda' biti' ubi uguí'ili'. Tu bönni' biti' zóanu nigula queë' ruí'i ládxë'ë le nequi queë' Xanru', naca gunë' le raza ládxë'ë Xanru'. ³³ Tu bönni' nutsaga ná'lennë'-nu tu nigula ruí'i ládxë'ë le raca yödzölió, naca gunë' le raza ládxí'nu nigula queë'. ³⁴ Lësca' caní raca queënu tu nigula nutsaga ná'lennu-në' bönni', en queënu nigula na' zóanu túzinu. Nigula na' zóanu túzinu ruí'i ládxí'nu le nequi queë' Xanru', naca sóanu quez queë' Dios lu le naca cázanu, en lu bö' naca cázanu. Nigula na' nutsaga ná'lennu-në' tu bönni' ruí'i ládxí'nu le raca yödzölió ni, naca gunnu le raza ládxë'ë bönni' queënu.

³⁵ Yugu' lë ni rea' libí'ili' para uzi'ili' xibé lë ni, en calëga para uzága'a xinözili'. Rë'ënda' gunli' le ral-la' gunli', para gunli' xichinë' Xanru' idú ládxí'li'.

³⁶ Channö zoë' tu bönni' réquinë' biti' naca dxi'a ugá'anabi' túzibi' bi'i nigula ra'bando' queë', en chizóa iz queëbi', en rë'ënide'ebi' utsaga ná'alenbi'-në' bönni', huáca utsaga ná'alenbi'-në'. ¡Biti' gunbi' dul-la'! ³⁷ Channö chinún tsutsu xtídzë'ë bönni' na', en biti' run bayudxi gunë' caní, en dë lu né'ë naca gunë', en chinún tsutsu xtídzë'ë ugá'anabi' túzibi', gunë' le naca dxi'a bönni' na'. ³⁸ Caní naca, nu ruí'i lataj bi'i que utsaga ná'alenbi'-në' bönni', run le naca dxi'a, pero nu run ga ugá'anabi' túzibi' run le nácarö dxi'a.

³⁹ Nigula na' nutsaga ná'lennu-në' bönni', rinná be'e xibá que yöl-la' nutsaga na' lënu tsanni ni zoë' nabane' bönni' queënu. Channö gátië' bönni' queënu, gata' lu ná'anu utsaga ná'lennu-në' nu bönni' rë'ëniu, channö

réajlë'ë Xanru' bönni' na'. ⁴⁰ Runi neda' gácarönu bica' ba channö ugá'anamu túzinu, en réquida' Bö' Lá'ayi queë' Dios runë' neda' tzazxön.

8

Le ta'gú'u böñachi lógaca budó' guiój budó' yaga

¹ Na'a, gu'a didza' ca naca que le rë'aj ráguru', lë na' gula'gú'u böñachi lógaca budó' guiój budó' yaga. Ta'nná böñachi: "Yúgu'teru' náparu' yöl-la' réajni'i." ¡Nácaté didza' ni! Yöl-la' réajni'i caní run ga run ba zxön cuinru', pero yöl-la' nadxí'i queëru' luzá'aru' run ga rácalenru' luzá'aru'. ² Channö zoë' nu bönni' réquinë' chiréajni'inë', biti' bi réajni'ininë' ca ral-la' tséajni'inë', ³ pero nu bönni' nadxí'inë' Dios, Dios caz zóalenë' bönni' na'.

⁴ Na'a, ca naca que le rë'aj ráguru', lë na' gula'gú'u böñachi lógaca budó' guiój budó' yaga, nöziru' biti' bi nazáca'gaca budó' guiój budó' yaga na' yödzölió ni, en cúnтурö nu zoa naca Dios. ⁵ Sal-la' nacuá' le téquiguequi böñachi nácagaca dios, le nacuá' lúzxiba, en le nacuá' luyú, ate' zián le tu'lídza böñachi, en tu'i lágaca: dios, enca': xan, ⁶ pero queëru' rë'u:

Tuzé' náquië' Dios, Lë' Xuz.

Lë' benë' yúgu'te le rilé'eru',

ate' zóaru' nabanru' para tseaj ládxí'ru' Lë'.

Tuzé' náquië' Xanru', Lë' Jesucristo.

Lu në'ë Lë', Dios benë' yúgu'te le dë,

ate' nabániru' Lë'.

⁷ Caléga yúgu'te böchi' luzá'aru' ta'yéajni'inë' lë ni. Bal-lë', nupa ni' zí'alö gula'yéaj ládxí'gaca budó' guiój budó' yaga, ga ridxitné na'a dza té'aj tahuë' le gula'gú'u böñachi lógaca budó' guiój budó' yaga, ate' téquinë' napa yöl-la' huáca que budó' na'. Tu' cabí naca idú ládxí'gaquïë', que lë ni na' téquinë' nabága'gaquïë' xíguia' channö tahuë' lë na'. ⁸ Biti' gun le guí'aj gáguru' ga gunë' Dios rë'u bal. Channö gáguru' le, biti' gácaroru' dxi'a, en channö cabí gáguru' le, biti' gácaroru' cá'asö. ⁹ Dë lu ná'ali' guí'aj gáguli' bíti'tës. Guli'gún chí'i cuinli' para cabí gunli' ga ila'chixi ila'nigui nupa biti' naca idú ca ta'yéajlë' Cristo. ¹⁰ Nadxi ca' lí' réquinu' napu' yöl-la' réajni'i ca naca lë ni, en huáca gagu' bíti'tës. Channö cö'u xilataj budó' guiój budó' yaga, en guí'aj gagu' le gula'gú'u böñachi lo budó' guiój budó' yaga na', ate' channö nu böchi' luzó'o biti' naca idú ládxë'ë ilé'enë' li', rö'u ragu' ni', nadxi ca' gunu' ga gahue' lë na' gula'gú'u böñachi lo budó' guiój budó' yaga na'. ¹¹ Caní gaca, tu' réquinu' napu' yöl-la' réajni'i, gunu' ga ichixi iníguinë' böchi' luzó'o biti' naca idú ládxë'ë. ¿Naru' gunto' caní queë' böchi' luzó'o, ni'a que nu na' gútië' Cristo? ¹² Channö caní gunu', gunu' dul-la' tu' usubágu'u böchi' luzó'o xíguia', en gunu' ga ichixi iníguinë' tu' cabí naca idú ládxë'ë, en gunu' ca' dul-la' le ruzúa Cristo tsölä'alö. ¹³ Que lë ni na', channö le guí'aj gahua' gun ga ichixi iníguinë' böchi' luzá'a, bíti'rö gahua' bëla' na', para cabí guna' ga gunë' böchi' luzá'a dul-la'.

9

Le dë lu në'ë nu bönni' gubáz nasöllë'ë Cristo

¹ ¿Naru' cabí naca' gubáz nasöllë'ë Cristo? ¿Naru' cabí nadéli'da' yöl-la' rusölä? ¿Naru' cabí bilé'eda'-në' Xanru' Jesús? ¿Naru' cabí nácali' queë' Cristo ni'a que dxin bena' neda' uláz queë' Xanru'? ² Nadxi ca' téquiguequi ia'zíca'rö böñachi biti' naca' gubáz nasöllë'ë Cristo. Libí'ilí run bayudxi guéquili' naca'

gubáz queë' Cristo. Tu' nácali' queë' Xanru', le naca cázali' naca bë' naca' gubáz nasöl-lë'ë Xanru'.

³⁻⁴ Nacuá' nupa ta'zí' quidza' neda'. Caní rubi'a didza', rea' légaquië': Dë lu na'a inaba' le guí'aj gahua' tu' runa' dxin ni. ⁵ Lësca' caní dë lu na'a utsaga ná'alena'-bi' tubi' bi'i nigula zanru' réajlë'ëbi' Cristo para gunbi' neda' tsözön ga ridá', ca na' tuné' ia' zica'rë' gubáz nasöl-lë'ë Cristo, en yugu' bönni' böchë'ë Xanru', enca' Pedro. ⁶ ¿Naru' réequil' tuza' neda', en Bernabé ral-la' guntu' dxin lahuí' dza, para idzölitu' le gágutu'? ⁷ ¿Nuzxi caz bönni' rejë' gudil-la, ate' riguizxjé' la' cuinse'? ¿Nuzxi caz bönni' rudé'ë tu la' yëla que lubá uva, en biti' rahuë' le ribia' lubá na'? ¿Nuzxi caz bönni' rapa chi'ë-ba' bö'cu' zxila', en biti' re'je' nidxi' quégacaba'? ⁸ Biti' guéquili' la' néda'sò' ruá' a caní didza'. Lësca' caní rnna le nazúaj lu guichi lu xibá queë' Moisés. ⁹ Lu xibá queë' Moisés nazúaj lu guichi le rnna: Biti' cu'u du rúa'aba' bëdxi cate' rulibiba' zxoa' xtila. Bë'ë Dios didza' ni, calégasö tu' ruí'i ladxé'ë-ba' bëdxi, ¹⁰ pero para uzi'iru' ca' xibé rë'u. Que lë ni na' nazúaj lu guichi didza' na', ate' bönni' na' rugá'anë'-ba' bëdxi, enca' bönni' na' runé' ga tu'líbiba' bëdxi zxoa' xtila, iropë' na' ral-la' ilunë' löza ila'zi'ë que le rulá' luyu' na'. ¹¹ Na'a, channö bentu' dxin ga zóali', le naca ca dxin guz gú'una, lë na' naca queë' Dios Bö' Lá'ayi, ¿naru' réquitseli' biti' ral-la' uzi'itu' xibé tu le do' dë queëlli' ca na' ruzi'ë xibé bönni' guz gú'una le rulapë'? ¹² Ia' zica'rö bönochí tu' zéajni'inë' libífilí' tu'zi'ë xibé le dë queëlli'. ¿Naru' cabí rálá'térö uzi'itu' xibé netu' le dë queëlli'?

Catu caz buzi'tu' xibé lë ni dë lu na'tu', pero biá' gulentu' yúgu'të para gaca guntu' libán que didza' dxi'a ca naca queë' Cristo. ¹³ Nöz quézili' ca raca quégaca nupa tun dxin que yudo', tu'zí' xibé gun que yudo'. Lësca' caní nupa ta'gú'u rön quégacaba' bö'a bëdxi lu bucugu lá'ayi queë' Dios, tahuë' bëla' quégacaba' bö'a bëdxi na'. ¹⁴ Lësca' caní nuzoë' Xanru' ca ral-la' gaca quégacuìë' bönni' tuné' libán que didza' dxi'a. Nupa tu'zí' xibé libán na' tuné' ral-la' ulu'gagu légaquië'. ¹⁵ Neda' catu caz buzi'a xibé lë ni dë lu na'a, ate' lë ni ruzúaja' lu guichi ni biti' naca le rinábini nu bi gunna quia'. Run ba zxön cuina' tu' cabí nazxja' cate' runa' libán que didza' dxi'a. Gué'ënitéra' gátia' ca gu'a lataj nu inné runa' libán na' tu' nazxja'.

¹⁶ Biti' dë lu na'a gun ba zxön cuina' tu' runa' libán que didza' dxi'a, tu' run bayudxi guna' libán que. Bica' bayechi' neda' channö cabí guna' libán que didza' dxi'a. ¹⁷ La'tu' runa' libán tu' rë'ëni quézida', huáca inaba' lazxja', pero run bayudxi guna' libán, tu' naca tu le busubáguë'ë Dios neda' guna'. ¹⁸ ¿Bizxi lazxja' uzi'tsa' xibé channö? Ruzi'a xibé le raza ladx'a' tu' cabí nazxja' cate' runa' libán que didza' dxi'a. Biti' ca' ruzi'a xibé lë na' dë lu na'a tu' runa' libán que didza' dxi'a.

¹⁹ Na'a, sal-la' cuntu nu yu'a lu në'e, chibén cuina' ca tu bönni' nadó'o quégaca yúgu'të bönochí para gaca guna' ga ulu'lágaca ziánrö ca' bönochí. ²⁰ Cate' runa' libán lógaca bönochí judío, run cuina' ca tu bönni' judío para gaca guna' ga ulu'lágaca bönochí judío na'. Bönochí judío na' tun ca rinná bë' xibá queë' Moisés. Que lë ni na' run cuina' ca tu bönni' runé' ca rinná bë' xibá na' sal-la' biti' yu'a lu na' xibá na'. Caní runa' para gaca guna' ga ulu'lágaca nupa tun ca rinná bë' xibá na'. ²¹ Cate' runa' libán lógaca bönochí izá'a, nupa biti' rinná be'e xibá queë' Moisés léguequi, run cuina' ca tu bönni' zi'tu' na', para gaca guna' ga ulu'lé'. Biti' rucá'ana' cá'asö xibá queë' Dios. Neda' runa' ca rinná bë' xibá queë' Cristo. ²² Run cuina' ca tu bönni' biti' naca idú ca réajlë'ë Cristo para gaca guna' ga ulu'lágaca nupa na' biti' naca idú ca ta'yéajlë' Lë'.

Run cuina' ca nácagaca yúgu'té böñachi para gaca guna' ga ulu'lágaca bal-la böñachi na'. ²³ Lu yúgu'té lë ni runa', runa' ga ta'yöni böñachi didza' dxi'a, para gaca uzi'a xibé tsözxón len libí'ilí' didza' dxi'a na'.

²⁴ Chinöz quézili' ca tuné' bönni' nútsa'gaquië' lu huitaj. Ta'xiti'ë yúgu'té', pero tuzé' bönni' idéli'në' uzi'ë xibé lataj lo. Lësca' caní ral-la' gunli' xichiné' Dios, gácali' ca bönni' nútsa'gaquië' lu huitaj, para idéli'lí' uzi'ë xibé le ubi'ë Dios queéli'. ²⁵ Yúgu'té bönni', cate' tu'pá'a cuíngäquië' para gaca ila'yází'ë lu huitaj, ta'nná be' e cuíngäquië' lu yúgu'té le tuné'. Tuné' caní para ila'déli'në' tu bregui' zin le inítie', pero idéli'ru' ré'u tu le uzi'tica'siru' xibé. ²⁶ Que lë ni na', naca' neda' ca tu bönni' idú ládxé'ë rxixíti'ë. Naca' ca' ca tu bönni', idú ládxé'ë ridil-lë'. Biti' rucudxa' lu bö'os. ²⁷ Ca runé' bönni' na' rulidzé' böñachi para tsöjtsázagaca lu huitaj, runa' ca' neda', runa' libán para ulu'lágaca böñachi. Bönni' na' nútsé'ë lu huitaj runé' ga gaca tsutsu idúté le naca cazé', en rinná be'ené' le. Lësca' caní runa' neda', para cabí unítia' xilatja' lu dxin queé' Dios.

10

Biti' ral-la' tseaj ládxí'ru' budó' guiój budó' yaga

¹ Rë'ënda' uzéajni'ida' libí'ilí', böchi' luzá'ado', ca guca quégäquië' xuz xtó'otu'. Dios bené' ga gulú'u zxul-la tu böaj yúgu'té'. Lësca' caní, gula'dödë' yúgu'té' gatsaj láhui'lö nísado'. ² Lu böaj ni', en lu nísado' ni', guca quégäquië' ca raca que nu ridila nisa. Lë na' guca quégäquië' guca bë' guláquië' tuz len Moisés. ³ Lësca' caní, gulahué' yúgu'té' yöta xtildo' na' bunödzjé' Dios Bö' Lá'ayi quégäquië'. ⁴ Gulé'ajé' yúgu'té' nisa na' bunödzjé' Dios Bö' Lá'ayi, quégäquië', tu' gulé'ajé' nisa birúaj lë'e guiój na' bulu'e lahui Dios Bö' Lá'ayi, guiój na' gula'bániné' légaquië'. Ca guca guiój na' naca cazé' Cristo, nabánu'ri' Lë'. ⁵ Sal-la' guca caní, biti' guyaza ládxé'ë Dios yúgu'té'. Que lë ni na' gulatië' lu lataj cá'asó.

⁶ Yúgu'té lë ni naca tu le ruzéajni'i ré'u, para cabí së ládxí'ru' le ruá' dö', ca na' gula'zé ládxí'gaquië' légaquië'. ⁷ Biti' ral-la' tseaj ládxí'ru' budó' guiój budó' yaga, ca na' guluné' bal-lë' légaquië'. Nazúaj lu guichi lá'ayi le rnna: "Gula'bö'ë bönni' ni', en gulé'aj gulahué', ate' gula'yasë', en guluné' laní que budó' na'." ⁸ Biti' ral-la' gunru' le ruá' dö', ca na' guluné' bal-lë' légaquië' le ruá' dö', ate' tu dzasö' gulatië' idú ca tsonna-uruá' milé'. ⁹ Biti' ral-la' si' bë'érü' Xanru', ca na' gula'zí' bë'ë Lë' bal-lë' légaquië', ate' gulatië' tu' guláguya'aba' bëla sínia' légaquië'. ¹⁰ Lësca' caní, biti' ral-la' innérü' queé' Dios ca na' gula'nné' queé' bal-lë' légaquië', ate' tuë' gubáz lá'ayi queé' Dios busunítie' légaquië'.

¹¹ Yúgu'té lë ni le gulaca quégäquië' xuz xtó'otu', tu'zéajni'i ré'u, en nazúaj lu guichi lá'ayi para gun gadxi ré'u, tu' chizóaru' dza chizóa údxi que yödzöliö ni. ¹² Que lë ni na', nu réqui chinal-la, ral-la' gun chi'i cuini, para cabí ichixi inigui. ¹³ Ca naca le ta'zí' bë' libí'ilí' raca ca' quéguequi yúgu'té böñachi. Dios runé' ca rnne', en biti' gu'ë lataj bi si' bë' libí'ilí' le cabí gaca guá' ilenli', pero cate' bi si' bë' libí'ilí', ulu'ínë' libí'ilí' naca gaca irúajli' lu na' tu' xihui', para gaca guá' ilenli'.

¹⁴ Que lë ni na', böchi' luzá'ado', biti' tseaj ládxí'li' budó' guiój budó' yaga. ¹⁵ Ru'ílenä' libí'ilí' didza' ca ru'ílena' didza' nupa ta'yéajni'i. Buli'chi'a buli'sörö didza' ni gu'a. ¹⁶ Cate' inábiru'-në' Dios gun lá'ayë' le ré'ajru' cate' rusubanru' ca gútië' Cristo, lë na' ré'ajru' rulu'i nácaru' tuz len Cristo, en ruzf'iru' xibé le bené' Cristo cate' bulaljé' xichöné' cate' gútië' lë'e yaga cruz.

Lësca' caní, yöta xtila na' ruzxúzxjaru', en ráguru', rulu'i dzágaru'-në' Cristo, en ruzí'iru' xibé le benë' Cristo cate' budödë' idútë le naca cazé' uláz queëru'.
17 Sal-la' zianru' nácaru', yúgu'teru' ráguru' tuz yöta xtila na', en que lë ni na' nácaru' ca tuz böñachi.

18 Buli'yúsöca' ca tunë' bönni' Israel. Bönni' ni' tahuë' lahuë' Dios le ta'gu'ë lu bucugu lá'ayi queë', lë na' tahuë' rulu'i dzágagaquië' Dios. **19** ¿Bizxi rnna didza' ni ruá'a? Biti' rnna' napa budó' guiöj budó' yaga yöl-la' huáca, en le ta'gu'u böñachi lógaca budó' guiöj budó' yaga na' biti' napa yöl-la' huáca.
20 Caní rnna': Lë na' ta'gu'u böñachi biti' núnbe'gaquië' Dios lógaca budó' guiöj budó' yaga, ta'gu'u lógaca bö' xihui', en caléga lahuë' Dios. Rë'ënda' biti' idzágali' yugu' bö' xihui'. **21** Biti' gaca guí'jali' le rulu'i nácaru' tuz len Xanru', enca' lë na' ulu'i nácali' tuz len yugu' bö' xihui'. Biti' gaca gáguli' le rulu'i dzágaru'-në' Xanru', enca' le ulu'i dzágali' yugu' bö' xihui'. **22** ¿Naru' gúntsaru' ga uzxé'enë' Xanru'? ¿Naru' réquitseli' nápatéröli' yöl-la' huáca ca napé' Lë?

Le dë lu ná'aru' gunru', en ca ral-la' idxi'igacru'-në' böchi' luzá'aru'

23 Naca idútë li didza' na' rnna: "Yúgu'te dë lu ná'aru' gunru'." Na'a, neda' rnna': Caléga yúgu'te ral-la' gunru'. Yúgu'te dë lu ná'aru' gunru', pero caléga yúgu'te gun ga gácarö idú ca réajlé'ëru' Cristo. **24** Ral-la' güí'i ládxí'ru' gunru' le gun ga gaca dxi'a quégaquië' böchi' luzá'aru', en calégasö le gun ga gaca dxi'a que la' cuínsiru'.

25 Bítitës bi tuti' böñachi lu yë'ëyi, huáca gáguli', en biti' bi ral-la' inábali' que, para cabí cuéqui böñiga ládxí'do'oli'. **26** Nazúaj lu guichi le rnna: "Queë' Xanru' nequi yözdöliö ni, enca' yúgu'te le dë yözdöliö ni."

27 Channö ulidzë' tu bönni' biti' réajlé'ë Dios libí'ili' para guídali' lidxë', ate' gué'ënili' tséajli', guli'gagu yúgu'te le cu'ë loli', en biti' bi inábali' que, para cabí cuéqui böñiga ládxí'do'oli'. **28** Channö nútitië nu guíe libí'ili': "Lë ni gula'gu'ë lo budó' guiöj budó' yaga", biti' gáguli' lë na' para gaca dxi'a que nu na' gudíxjöi'ë caní libí'ili', en para cabí cuéqui böñiga ládxí'da'ahuë'. **29** Rnna': Para cabí cuéqui böñiga ládxí'da'ahuë' bönni' na' gudíxjöi'inë' caní libí'ili', en caléga para cabí cuéqui böñiga ládxí'do'oli' libí'i cázali'.

Nadxi ca' nu inábini neda', inná: "¿Bizx que ral-la' uzóa' tsólá'alo le dë lu na' guna' tu' ribequi böñiga ládxí'da'ahuë' bönni' yúbölö?" **30** Huáca inná ca' nu na': "Channö guía'-në' Dios: Xclenu', ni'a que lë na' rahua', ¿bizx que nu uzegui neda' didza' ni'a que lë na' rahua'?" **31** Channö bi gáguli' o bi guí'jali', o biti'ës bi gunli', guli'gún yúgu'te para gaca queë' Dios yöl-la' ba. **32** Biti' bi gunli' le gun ga ila'chixi ila'nigui böñachi judío, en biti' gunli' le gun ga ila'chixi ila'nigui böñachi queë' Dios. **33** Guli'gún ca runa' neda'. Ruí'i ládx'a' guna' le ila'yaza ládxí'gaca yúgu'te böñachi, en biti' ruí'i ládx'a' guna' le uzi'a xibé la' néda'sö, pero le ulu'zí' xibé ia'zíca'rö böñachi para ulu'lágaca.

11

1 Guli'gún ca runa' neda', ca na' neda' ca' runa' ca benë' Cristo.

Le tunnu nigula lógaca böñachi queë' Cristo

2 Runa' libí'ili' zxön, böchi' luzá'ado', tu' röjnética'sili' neda', en nazi' lu ná'ali' xibá budöda' lu ná'ali'. **3** Na'a, rë'ënda' tséajni'ili' rinná bë'enë' Cristo yúgu'te bönni', ate' bönni' rinná bë'enë'-nu nigula, ate' Dios rinná bë'enë' Zxi'inë', Bönni' na' náquie' Cristo. **4** Channö tu bönni' rulidzë' Dios, o ru'ë didza'

uláz queë' Dios, en dxía icjë' xilu'ë, rucá'anë' Cristo cá'asö. ⁵ Na'a, channö tu nigula rulídzanu Dios, o ruí'nu didza' uláz queë' Dios, en biti' bi zxoa ícjanu, rucá'anamu bönni' queënu cá'asö, en naca queënu ca naca queënu tu nigula narugu guitsa' ícjanu. ⁶ Channö tu nigula cabí bi zxoa ícjanu, ral-la' irugu ca' guitsa' ícjanu. Channö gun ga utu'nu nigula na' channö nu chugu guitsa' ícjanu, ral-la' bi ixoa ícjanu. ⁷ Tu bönni' biti' bi ral-la' udxía icjë' cate' ridxinë' lahuë' Dios, tu' náquië' ca naca caze' Dios, ate' lë na' náquië' bönni' rulu'i lahui yöl-la' zxön queë' Dios, pero le nácanu nigula na' rulu'i lahui yöl-la' zxön queë' bönni' queënu. ⁸ Cate' benë' Dios bönnachi, biti' bubéajë' bönni' na' lu nigula. Nigula na', lu bönni' na' bubéajë'-nu. ⁹ Lësca' caní, biti' benë' Dios bönni' para uzí'nu xibë' nigula, pero benë' nigula para uzi'ë xibánu bönni'. ¹⁰ Que lë ni na', nigula na' ral-la' ixoa ícjanu le rulu'i zoa nu rinná be'e lénú tu' tu'yüe' gubáz lá'ayi queë' Dios re'u. ¹¹ Na'a, lahuë' Xanru', tu bönni' riquinnë'-nu nigula queë', ate' nigula na' riquíninu-në' bönni' queënu. ¹² Ca na' benë' Dios, bubéajë'-nu nigula lu bönni', lësca' caní na'a, yúgu'të bönni' náljlengaquië'-nu nigula, ate' yúgu'të rirúdaj lu në'ë Dios.

¹³ Bulí'chí'a bulí'sörö' la' libí'isili'. ¿Naru' ral-la' ulídzanu-në' Dios tu nigula biti' bi zxoa ícjanu? ¹⁴ ¿Naru' cabí rusédi libí'ili' yöl-la' nácaté quégaca bönnachi, ral-la' utu'inë' bönni' na' ru'ë lataj itunna guitsa' icjë'? ¹⁵ Na'a, channö natúnnua guitsa' ícjanu tu nigula, naca yöl-la' lachi queënu, tu' bë'ë Dios queënu guitsa' ícjanu para usubín ícjanu. ¹⁶ Channö zoa nu gué'ëni tá'bagá' didza' ni, canísö nazí' lu na'tu' runtu', en lëbisö tun yugu' cö' bönnachi queë' Dios.

Bönachi Corinto tu'cá'ana cá'asö le rë'aj ráguru' para usubanru' ca gútië' Xanru'

¹⁷ Biti' runa' libí'ili' bal ca naca le uzéajni'ida' libí'ili' na'a. Le runli' biti' run ga raca dxi'a queëli' cate' rudúbili' queë' Cristo, pero run ga raca queëli' le cabí naca dxi'a. ¹⁸ Risí lahua' ruzéajni'ida' libí'ili' lë ni ta'guíxjöi'i bönnachi neda', ta'nná: "Cate' rudúbili' queë' Cristo, narúají' choplö", ate' réajlë'a nadxi ca' naca caní. ¹⁹ Run bayudxi ila'cuá'alen libí'ili' nupa tu'sedi le cabí nácatë para ilaca bë' nupa nácgacaca idú bönnachi queë' Cristo. ²⁰ Que lë ni na', cate' rudúbili', lë na' ráguli' tsözxön biti' naca le rë'aj ráguru' para usubanru' ca gútië' Xanru'. ²¹ Caní naca, tu' runli' bayudxi tu tulí' ráguli' le nuá'alí' que queëli' cate' ráguli' tsözxön, ate' que lë ni na' ridunli' bál-lali', ate' ia'bál-lali' rë'aj ráguli' ga ridxintë rizúdxili'. ²² ¿Naru' cabí zoa lídxili' ga huáca guí'aj gáguli'? Ca na' runli', rucá'anali' bönnachi queë' Dios cá'asö, en runli' ga tu'tu'i nupa biti' bi dë quéguequi. ¿Bizxi caz guí'a libí'ili'? ¿Naru' guntsa' libí'ili' bal? Biti' ca' runa' libí'ili' bal ca naca lë ni runli'.

Le rë'aj ráguru' para usubanru' ca gútië' Xanru'

²³ Xanru' caz budödë' lu na'a lë na' busédida' libí'ili', ca na' benë' Xanru' Jesús yëla ni' cate' nu budödi Lë' lu ná agaquië' bönni' gulútië' Lë'. Gudéléë yöta xtila, ²⁴ en cate' budxi gudxë' Dios: "Xclenu", buzzuzxjë' le, en gunnë': "Guli'gagu. Lë ni naca xipëla'a le nayuzzaj uláz queëli'. Guli'gún caní, para usubanli' ca gaca quia' neda'." ²⁵ Lësca' caní, gudödi gulahue', gudéléë tu zxígä'do', en gunnë': "Le yudzu zxígä'do' ni naca xichöna', le run tsutsu didza' cubi rucá'ana tsahui'. Guli'gún caní yúgu'të luzuí guí'jali' le, para usubanli' ca gaca quia' neda'." ²⁶ Caní gaca ga idxintë dza huödë' Xanru'. Yúgu'të luzuí gáguli' yöta xtila caní, en guí'jali' que le yudzu zxígä'do' caní, ulu'iili' lahui ca gútië' Xanru'.

Ca ral-la' gunru' cate' guí'aj gáguru' para usubanru' ca gútië' Xanru'

²⁷ Que lë ni na', nútí'tës nu gagu yöta xtila ni o guí'aj que le yudzu zxíga'do' ni queë' Xanru', en biti' run le bal, nabaga' xiguia' nu na', en run dul-la', tu' rucá'ana xipéle'ë Xanru', enca' xichónë' cásò. ²⁸ Que lë ni na', ral-la' uchi'a usöröru' la' cuínsiru' tu turu', ate' ní'irö huáca gáguru' yöta xtila ni, en guí'ajru' que le yudzu zxíga'do' ni. ²⁹ Nútí'tës nu rë'aj ragu lë ni, en biti' run le bal tu' cabí réquibe' e rului' le guca queë' Xanru', rusubaga' cuini dul-la' ni'a que lë na' rë'aj ragu. ³⁰ Que lë ni na' te'e zián nupa dzagagaca libí'ilí', en ta'cuídi', ate' ziánguequi chinátigaca. ³¹ La'tu' uchi'a usöröru' la' cuínsiru', biti' uchi'a usöröe' Xanru' rë'u. ³² Channö gun bayudxi uchi'a usöröe' Xanru' rë'u, usaca' zi'e rë'u, para cabí irugu queëru' cate' ichúguië' quéguequi böñachi yödzölió iláttigaca.

³³ Que lë ni na', böchi' luzá'ado', cate' udúbili' para guí'aj gáguli' para usubanli' ca gútië' Xanru', guli'cöza luzá'ali'. ³⁴ Channö zoa nu ridún, ral-la' gagu nu na' ga naca lu yu'u lidxi, para cabí gun bayudxi uchi'a usöröe' Dios libí'ilí' cate' udúbili'. Nacuá' ia'bal-la le runli', pero ucá'ana' tsahui' yugu' lë na' cate' uduyúa' libí'ilí'.

12

Yugu' yöl-la' huáca runnë' queëru' Dios Bö' Lá'ayi

¹ Na'a, böchi' luzá'ado', rë'ënda' tséajni'ilí' ca zeaj naca yöl-la' huáca runnë' queëru' Dios Bö' Lá'ayi.

² Nöz quézili' ca guca cate' ni' biti' réajlé'ënili' Cristo, bë'eli' lataj gula'chë' böñachi libí'ilí' ga yúbólö. Guyéaj ládxí'li' budó'guij budó'yaga, le cabí ta'nnë'. ³ Que lë ni na', ruzéajni'ida' libí'ilí' caní, rnmía': Ladaj yúgu'të nupa tui'i didza' uláz queë' Bö' Lá'ayi queë' Dios, cuntu nu gaca innë' xihui' queë' Jesús, en nitüë' gaca innë': "Jesús náquië' Xanru", channö cabí zóalenë' Dios Bö' Lá'ayi nu na'.

⁴ Na'a, nadzá'gaca tu tu le runnë' Dios Bö' Lá'ayi queëru', pero tuzë' náquië' Bö' Lá'ayi na'. ⁵ Lësca' caní, nadzá'gaca tu tu dxin rigu'ë Xanru' lu ná'aru', pero tuzë' náquië' Xanru' na'. ⁶ Nadzá'gaca ca' tu tu yöl-la' huáca náparu' le rúniru' xichinë' Dios, pero tuzë' náquië' Dios, Nu na' runna yöl-la' huáca na' queëru' para gunru' xichinë'. ⁷ Dios runnë' que queëru' tu le naca bë' náparu' yöl-la' huáca queë' Dios Bö' Lá'ayi, lë na' ruzí'iru' xibé yúgu'tëru'. ⁸ Dios Bö' Lá'ayi runödzjë' queë' tu bönni' yöl-la' huáca ru'ë didza' len yöl-la' rácada', ate' ia'tué' bönni', Lë cazë' Bö' Lá'ayi runödzjë' queë' yöl-la' huáca ru'ë didza' lu yöl-la' réajni'i. ⁹ Lësca' caní, Lë cazë' Dios Bö' Lá'ayi na' runödzjë' queë' ia'tué' bönni' yöl-la' réajlé' Cristo bi gunë', ate' ia'tué' bönni' runödzjë' queë' yöl-la' huáca ruúnë' nupa te'e. ¹⁰ Ia'tué' bönni' runödzjë' queë' yöl-la' huáca runë' yugu' yöl-la' huáca que yehua' yubá, ate' ia'tué' bönni' ru'ë lë' lataj ru'ë didza' uláz queë' Dios, ate' ia'tué' bönni' runödzjë' queë' yöl-la' huáca réquibe'enë' channö bö'dzaga nu bönni' nequi queë' Dios, o nequi que tu' xihui'. Runödzjë' queë' ia'tué' bönni' yöl-la' huáca ru'ë didza' yúbólö le cabí nazéde', ate' queë' ia'tué' bönni' yöl-la' huáca rudödë' didza' yúbólö na' biti' nazéde'. ¹¹ Yugu'të lë ni runë' Lë cazë' Dios Bö' Lá'ayi, tu' runödzjë' que tu tu böñachi tsca rë'ëni quézinë'.

Yúgu'tëru' nácaru' ca tuz böñachi

¹² Ca na' naca tuz idútē le naca cázaru', sal-la' zián le nagudi' dzágalenru', ate' le zián na' nagudi' dzágalenru' nácgacata tuz idútē le naca cázaru', lësca' caní naca queé' Cristo. ¹³ Tu' zóalenë' Lë cazë' Dios Bö' Lá'ayi rë'u, lë ni naca queéru' ca tu le nadilaru' nisa, le naca bë' nácaru' ca tuz böñachi, sal-la' nácaru' yugu' bönni' judío, en yugu' bönni' zi'tu', enca' yugu' bönni' nadó'ogaquië, en yugu' bönni' biti' nadó'ogaquië. Yúgu'tëru', Dios bë'ë rë'u lataj sí'iru' le runödzja cazë' Bö' Lá'ayi.

¹⁴ Na'a, lu idútē le naca cázaru', zián le nagudi' dzágalenru', en caléga tuz. ¹⁵ La'tu' huáca gü'i didza' ní'aru', huanná: "Tu' cabí naca' në'ë bönni', biti' néquida' queé", didza' ni biti' gun ga biti' nequi queé' bönni' na'. ¹⁶ La'tu' huáca gü'i didza' nágaru', huanná: "Tu' cabí naca' guiój lahuë', biti' néquida' queé' bönni' ni", didza' ni biti' gun ga biti' nequi queé' bönni' na'. ¹⁷ La'tu' naca guiój loru' idútē le naca cázaru', ¿nacxi gaca yöñiru'? La'tu' naca nágaru' idútē, ¿nacxi gaca ilé'e zxína'ru'? ¹⁸ Na'a, Dios nucu'ë yúgu'të le nagudi' dzágalenru' ca gú'uni quézinë' Lë'. ¹⁹ La'tu' naca tuz le nagudi' dzágalenru', biti'rö soa idú ca naca cázaru'. ²⁰ Na'a, ca nácaru', zián le nagudi' dzágalenru', pero tuz le nácaru'.

²¹ Que lë ni na', guiój loru' biti' gaca guíë ná'aru', inná: "Biti' riquinda' li'." Lësca' caní, ícjaru' biti' gaca guíë ní'aru', inná: "Biti' riquinda' libí'ili'." ²² Na'a, yugu' le nagudi' dzágalenru', lë na' réquiru' nácgacarö cuídi'sö, lë ni naquíniröru'. ²³ Lësca' caní, yugu' le nagudi' dzágalenru', le réquiru' nácgacarö cá'asö, lë ni rugácuröru' dxi'a, en yugu' le réquiru' biti' ral-la' ilá' lahui, rugácuröru' ca' dxi'a. ²⁴ Biti' run bayudxi gunru' caní que le nácarö lachi que le néquiniru'. Dios benë' idútē le naca cázaru', en benë' ga nácarö lesaca' lë na' réquiru' rë'u nácarö cá'asö. ²⁵ Caní benë', ate' biti' narúajgaca choplö le nagudi' dzágalenru', tu' tun chí'i luzë'eguequi tu ia'tú. ²⁶ Channö gaca zí' tu le néquiniru', ilaca zi' tsözxön len le yúgu'të le néquiniru' na', en channö tu le néquiniru' zoa bi ruzí' xibé, yúgu'të le nagudi' dzágalenru' tu'zí xibé tsözxön le.

²⁷ Na'a, libí'i cázali' dzágali' idútē le naca cazë' Cristo, ate' tu tulí' nácali' ca yugu' le nagudi' dzágalenü'. ²⁸ Lësca' caní, ladaj böñachi queé' Cristo, Dios nucu'ë nupa tun xichinë'.

Ga naca lo nucu'ë yugu' bönni' gubáz queé' Cristo.

Ga naca buropi nucu'ë yugu' bönni' tu'ë didza' uláz queé'.

Ga bunni nucu'ë yugu' bönni' tu'sédinë' luzá'aru'.

Ní'irö nucu'ë nupa tun yugu' yöl-la' huáca que yehua' yubá.

Ní'irö nucu'ë nupa tu'ún nupa te'e.

Ní'irö nucu'ë nupa tácalen böchí' luzá'aru'.

Ní'irö nucu'ë yugu' bönni' tu'luí'inë' rë'u dxin gunru'.

Ní'irö nucu'ë yugu' bönni' tu'ë didza' yübölö biti' nazédagaquië'.

²⁹ Caléga yúgu'të nácgagaquië' gubáz queé' Cristo.

Caléga yúgu'të tu'ë didza' uláz queé' Dios.

Caléga yúgu'të tu'sédinë' luzá'aru'.

Caléga yúgu'të tunë' yugu' yöl-la' huáca que yehua' yubá.

³⁰ Caléga yúgu'të dë lu ná'agaquië' ulu'únë' nupa te'e.

Caléga yúgu'të tu'ë didza' yübölö biti' nazédagaquië'.

Caléga yúgu'të tu'dödë' didza' yübölö biti' nazédagaquië'.

³¹ Guli'gü' ládxí'li' cu'ë Dios lu ná'ali' yugu' yöl-la' huáca na' nácgacarö lesaca'. Na'a, ulu'ida' libí'ili' tu le nácarö lesaca' ca yúgu'të lë ni.

13

Yöl-la' nadxi'i

¹ Sal-la' gaca gu'a xtínda'gaca bönachi le cabí nazëda', enca' xtínda'gaquië' gubáz lá'ayi queë' Dios, pero channö cabí nadxi'ida' luzá'a, didza' gu'a biti' gácarö lesaca' ca bö le run gui rucödxiru' o güié rutí-laru' luzë'e. ² Sal-la' nazí lu na'a gu'a didza' uláz queë' Dios en tséajni'ida' yúgu'të le nagachi', en yúgu'të didza' réajni'i, en sal-la' naca idú ca réajlë'a Dios ga ridxintë huáca cúa' yugu' gu'a, pero channö cabí nadxi'ida' luzá'a, biti' bi nazáca'a. ³ Sal-la' quisía' idútë le dë quia' para ugahua' yugu' bönachi yechi', en sal-la' udöda' idútë le naca' ga ulu'zegui bönachi le tu' réajlë'a Cristo, pero channö cabí nadxi'ida' luzá'a, biti' ca' uzi'a xibé lë na' runa'.

⁴ Nu bönni' nadxi'inë' luzë'e, ribözë' zxön ladxi'.

Náquië' dxi'i ladxi', en biti' ruzxé'enë' luzë'e.

Nadxi'inë' luzë'e idú ládxë'e.

Biti' run ba zxön cuinë', en biti' run cuinë' lo.

⁵ Biti' runë' le ruá' dö'.

Biti' rudúli'në' le dë queë'.

Biti' rilétenë', en biti' röjnenë' dö' gulü'i bönachi queë'.

⁶ Biti' ca' rudzéjanë' cate' nu run le ruá' dö'.

Rudzéjanë' cate' nu run le naca idútë li.

⁷ Ruá' rilenë' bíti'tës bi gun luzë'e queë'.

Réajlë'tica'së' luzë'e.

Rúntica'së' löza gun luzë'e le naca dxi'a.

Ribözatica'së' zxön ladxi'.

⁸ Bíti'rö tödi que yöl-la' nadxi'i. Huadödi que le dë lu ná'agaca bönachi ilui'i didza' uláz queë' Dios. Huadxín dza cate' bíti'rö gata' lu ná'agaca bönachi ilui'i didza' yübölö le cabí nazëdagaca, ate' huadödi que yöl-la' réajni'i quéguequi bönachi. ⁹ Látido'os réajni'iru' na'a, en láti'do'os ca' ruí'iru' didza' uláz queë' Dios. ¹⁰ Cate' idxín le naca idú, ní'irö úxdì que lë na' naca láti'do'os.

¹¹ Cate' ni' naca' bíido', bë'a didza' ca bíido', en gulequi icja' ca bíido', en guzá' ládx'a ca bíido'. Cate' bigula' bucá'ana' le nequi que bíida'ahua'.

¹² Na'a le rilé'eru' naca ca le rilé'eru' cate' ruyú cuinru' tu lu güié dxíldö'. Biti' rilé'eru' idú ca naca. Dza ní'irö ilé'eru' idú ca naca yúgu'të. Na'a núnbë'a láti'do'os. Dza ní'irö grünbë'a yúgu'të ca na' Dios caz núnbë'e neda'. ¹³ Na'a, nacuá'tica'sö yöl-la' réajlë' queëru' Dios, en yöl-la' run löza queëru' Dios, en yöl-la' nadxi'i queëru' luzá'aru'. Nacuá' yonna ni, pero le naca lo naca yöl-la' nadxi'i.

14

Yugu' yöl-la' huáca runnë' queëru' Dios Bö' Lá'ayi

¹ Guli'gún bayudxi idxíili' luzá'ali', en guli'güí ládxíli' sí'ili' ca' yugu' yöl-la' huáca runnë' queëru' Dios Bö' Lá'ayi, en le naca lo, yöl-la' huáca güí'ili' didza' uláz queë' Dios. ² Nu ruí'i didza' yübölö le cabí nazëda, calëga bönachi ruí'ilen didza' nu na'. Dios caz ruí'ilen didza' nu na', tu' cuntu nu zoa réajni'i didza' ruí'i nu na'. Dios Bö' Lá'ayi ruí'ë nu na'lataj ruí'i didza' ca nácgacala le nagachi' queë' Dios. ³ Nu na' ruí'i didza' uláz queë' Dios, ruí'ilen bönachi didza' para gácarö idú ca ta'yéajlë' Cristo. Rutipa ládxí'guequi, en ruhuë tsahui' léguequi. ⁴ Nu na' ruí'i didza' yübölö le cabí nazëda run tsutsu la' cuinsi, pero nu ruí'i didza' uláz queë' Dios run tsutsu yúgu'të bönachi queë' Cristo.

⁵ Raca ládex'a güí'ili' didza' yúbölö le cabí nazëdalí' yúgu'téli', pero le naca lo, rë'ënda' güí'ili' didza' uláz queë' Dios. Ruzí'iroru' xibé nu ruí'i didza' uláz queë' Dios ca ruzí'iru' xibé nu ruí'i didza' yúbölö le cabí nazëda, channö cabí zoa nu udödi didza' yúbölö na' le cabí nazëda, para ilaca tsutsu böñachi queë' Cristo. ⁶ Que lë ni na', böchi' luza'ado', cate' guída' ga zóali', channö güí'ilena' libí'ili' didza' yúbölö le cabí nazëda, biti' bi uzí'ili' xibé. Uzí'isili' xibé didza' na' güí'ilena' libí'ili' le nulu'inë' Dios neda', o didza' uzéajni' i rë'u, o didza' gu'a uláz queë' Dios, o le naca xibá queë'.

⁷ Lësca' caní raca que le ta'gú'u bö, yugu' le cabí nabángaca, ca naca gui rucödxiru', o ca naca guitarra. Channö cabí tul-la ca ral-la' ilún, ¿nacxi caz guñbë'ëru' bixilö le tul-la na', lë na' rul-la gui na', o guitarra na'? ⁸ Channö cabí cödxi ca ral-la' gun lúzuba' bö'a'na' ulidza rë'u lu gudil-la, ¿nuzxi caz upá cuini para tseaj lu gudil-la na'? ⁹ Lësca' caní raca queëli'. Channö len lúdxilí' güí'ili' didza' le cabí taca böñachi, biti' ca' ila'yéajni' i didza' güí'ili'. Caní gaca, nítisö güí'ili' didza'. ¹⁰ Le nácate' nacuá' zián didza' yúbölö tu'i zián cö' böñachi izá'a lu yödzöliö ni, ate' nacuá' böñachi ta'yéajni' i tu tu didza' na'. ¹¹ Na'a, channö cabí réajni'ida' didza' ru'ë tu bönni', gaca' ca tu bönni' zi'tu' lahuë' bönni' na' ru'ë didza', ate' bönni' na' ru'ë didza' gáquië' ca' lahuua' neda' ca tu bönni' zi'tu'. ¹² Lësca' caní naca queëli'. Ruí'ida' ládxilí' sí'ili' yugu' le runnë' queëru' Dios Bö' Lá'ayi. Que lë ni na', guli'gú' ládxilí' sí'ili' le ilún ga ilácarö tsutsu böñachi queë' Cristo.

¹³ Que lë ni na' ca', nu ruí'i didza' yúbölö le cabí nazëda ral-la' ulidza Dios, en inabi Lë' gunnë' que yöl-la' huáca quixjö' le rë'ëni inná didza' na' ruí'i nu na'. ¹⁴ Cate' rulidza'-në' Dios, channö ruá'a didza' yúbölö le cabí nazëda', lu bö' naca caza' rulidza'-në' Dios, pero tu' cabí réajni'ida' didza' ruá'a, lu yöl-la' réajni' i quia' biti' ruzi'a xibé didza' na' ruá'a. ¹⁵ ¿Nacxi caz ral-la' guna' channö? Ulidza'-në' Dios lu bö' naca caza', enca' lu yöl-la' réajni' i quia' ulidza'-në' Dios. Gul-la' yöl-la' ba lu bö' naca caza', enca' lu yöl-la' réajni' i quia' gul-la' yöl-la' ba. ¹⁶ Channö lu bö' naca cazu' rulidza lá'ayu'-në' Dios, ate' zoa ni' nu riyönisö, channö cabí réajni' i didza' ru'u, ¿nacxi caz gaca inná: "Ca' gaca", ni'a que didza' ru'u, rë'u-në' Dios: "Xclenu"?" ¹⁷ Nadxi ca' dxí'ado' ru'u didza', rë'u-në' Dios: "Xclenu". Channö cabí réajni' i didza' ru'u, biti' bi uzí' xibé nu na' riyöni. ¹⁸ Rea'-në' Dios: "Xclenu", tu' ruí'ira' didza' yúbölö le cabí nazëda' ca yúgu'téli'. ¹⁹ Lógaca böñachi queë' Dios guë'ënitéröda' gu'a gáyu'sö didza' le gaca ila'yéajni' i böñachi ca zián gayuá' didza' yúbölö le cabí nazëda', ate' cuntu nu gaca tséajni' i. Gaca usédida' ia'zíca'rö böñachi tuzi channö ila'yéajni' i didza' gu'a.

²⁰ Böchi' luza'ado', biti' gácali' ca bí'ido' ca naca le rizá' ládxilí'. Guli'gaca ca bí'ido' para cabí gunli' le ruá' dö', pero guli'gaca bönni' chinácagaca ca naca le rizá' ládxilí'. ²¹ Nazúalu guichi lá'ayi le rnna: "Len didza' yúbölö, en lu ruá' agaca böñachi izá'a güí'ilena' böñachi ni didza'. Sal-la' guna' caní, biti' ulu'zé nágagaca xtídz'a." ¡Caní rnñë' Xanru! ²² Caní naca, Dios ru'ë rë'u lataj ruí'iru' didza' yúbölö le cabí nazëdaru' para gaca tu le naca bë' lógaca böñachi biti' ta'yéajlé', en caléga lógaca nupa ta'yéajlé' Cristo. Ru'ë rë'u lataj ruí'iru' didza' uláz queë' Lë' le ulu'zí' xibé nupa ta'yéajlé' Cristo, en caléga böñachi na' biti' ta'yéajlé'. ²³ Que lë ni na', cate' udúibili' tsözxön, yúgu'téli' na' néquili' queë' Cristo, channö güí'ili' didza' yúbölö le cabí nazëdalí' yúgu'téli', ate' tsázagaca nupa nazëdagaca láti'do'os, o nupa biti' ta'yéajlé' Cristo, ¿naru' cabí ila'nná: "Nachixi ícjali"?' ²⁴ Na'a, channö yúgu'téli' güí'ili' didza' uláz queë' Dios, ate'

tsaz nu cabí réajlë' Cristo o nu nazëda láti'do'os, guéquibe'e nu na' nabaga' xíguia', ate' Dios uchi'a usöröe' lë'. Caní guéquibe'e nu na', tu' tseajni'i didza' gü'ili' yúgu'téli'. ²⁵ Guéquibe'e ca naca le rizá' ladxi' nu na', lë na' bigachi', ate' uzoa zxibi nu na', en tseaj ladxi' Dios, ate' inná: "Le nácatë Dios zóalenë' libí'ili'."

Ca ral-la' gunru' ga rudúbiru' queë' Cristo

²⁶ Que lë ni na', böchi' luzá'ado', cate' rudúbili' queë' Cristo, rul-lë' tuë' bönni' dzágüi' libí'ili' tu salmo, ate' rusédinë' ia'tué' tu xibá, ate' ia'tué' riguixjöi'inë' libí'ili' tu le bulu'iñé' Dios lë', ate' ia'tué' ru'ë didza' yúbölö le cabí nazëdë', ate' ia'tué' rudöde' didza' yúbölö na' le cabí nazëdë'. Yúgu'té le gunli' ral-la' gaca le ulu'zí' xibé nupa tu'dubi queë' Cristo. ²⁷ Cate' nacuá' ni' nupa tuí'i didza' yúbölö le cabí nazëdagaca, biti' ral-la' gü'ili' didza' caní ziáñro ca chopa tsónnasili'. Huáca gu'ë didza' tuzë' bönni' na', ate' tödi na' huáca gu'ë didza' ia'tué', pero run bayudxi soa nu udödi didza' yúbölö na' le biti' nazëdali'. ²⁸ Channö cuntu nu zoa nu gaca udödi didza' yúbölö na' le cabí nazëdali', nu na' ruí'i didza' yúbölö le cabí nazëda ral-la' soa dxisö ga na' nudúbili', ate' huáca gü'ilen Dios didza' na' lu icja ládxida'ahui. ²⁹ Lésca' caní, yugu' bönni' tu'ë didza' uláz queë' Dios ral-la' ilu'ë didza' chopa tsónnasë', ate' ia'zíca're' bönni' na' tu'ë didza' uláz queë' Dios ral-la' ulu'chí'a ulu'söröe' didza' ru'ë bönni' na'. ³⁰ Channö Dios ulu'iñé' tu bönni' rö'ë ni' le rë'ëni inná xtídzë'ë, ral-la' soa dxisö nu na' ruí'i didza'. ³¹ Yúgu'téli' huáca gü'ili' didza' uláz queë' Dios tu tulí' para izédali' yúgu'téli', en idipa ládxili' ca' yúgu'téli'. ³² Yugu' bönni' tu'ë didza' uláz queë' Dios huáca ila'nná be'e cuíngaquië', en ila'cu'ë dxisö. ³³ Caléga Dios nu run ga rutsásaru', tu' rë'ëni' Lé' gácaru' ba'a ladxi', ca na' runé' ga nacuá' yúgu'té cö' böñachi queë' Cristo.

³⁴ Ral-la' ila'cu'ënu dxisö nigula queëli' ga na' rudúbili'. Biti' dë lu ná'agacanu ilu'iniu didza' ni'. Ral-la' ila'cu'ënu nöxaj ca na' rinná bë' xibá queë' Dios. ³⁵ Channö të'ëniniu ila'yéajni'nu ia'lati', ral-la' ila'nábinu bönni' que queégacanu cate' ni' nacu'ë lídxigaquië'. Biti' ral-la' ilu'iniu didza' yugu' nigula ga na' rudúbiru' queë' Dios.

³⁶ ¿Naru' réquitseli' bunödzjë' Dios xtídzë'ë lu ruá'ali' libí'isili'? ¿Naru' réquitseli' bidxín xtídzë'ë Dios queézili' libí'ili'? ³⁷ Channö nu bönni' nútse'ë ládjali' réquinë' ru'ë didza' uláz queë' Dios, o réquinë' zóalenë' Dios Bö' Lá'ayi lë', bönni' ni ral-la' si' lu në'ë naca xibá queë' Xanru' le ruzúaja' queëli' lu guichi ni'. ³⁸ Na'a, channö cabí ruí'i ládxë'ë didza' ni, biti' gü'ili' ládxili' -në' bönni' na'.

³⁹ Que lë ni na', böchi' luzá'ado', guli'gü' ládxili' gü'ili' didza' uláz queë' Dios, en biti' inná bë'eli' nu ruí'i didza' yúbölö le cabí nazëda. ⁴⁰ Ral-la' gunru' yúgu'té ca sa'yéaj, en lu yöl-la' ba'a ladxi'.

15

Bubanë' Cristo lu yöl-la' guti

¹ Na'a, böchi' luzá'ado', riguixjöi'ida' libí'ili' ca naca didza' dxí'a na' bena' libán que ga zóali', lë na' guzxí' lu ná'ali', ate' run ga nácarö idú ca réajlë'eli' Cristo. ² Ni'a que didza' ni uláli', channö gunli' ca rnna didza' dxí'a na' bena' libán que ga zóali', channö le nácatë guyéajlë'eli'-në' Cristo.

³ Ga gusí lo budöda' lu ná'ali' le budöde' Dios lu na'a neda'. Caní rnna: "Gutië' Cristo uláz queéru' tu' nabága'ru' dul-la'." Ca naca lë ni nazúaj lu

guichi lá'ayi le rnna ben bayudxi benë'. ⁴ Rnna ca': "Bigaché'ë yeru ba, en cate' bizá'a tsonna dza, bubanë' lu yöl-la' guti", ca na' nazúaj ca' lu guichi lá'ayi le rnna ben bayudxi guca queë'. ⁵ Gudödi ni' bulu'i lahuë' Cristo, ate' bilé'enë' Pedro Lë', en gudödi ni' idxinnutë' gubáz queë' bila'lé'enë' Lë'. ⁶ Ní'irö bulu'i lahuë' lógaquië' ziánrò ca gayu' gáyu'ë böchi' luzá'aru' ta'yéajlé'ë Cristo, cate' ni' nudúbigaquië' tsözxön. La'tu'biqu' yúgu'të böchi'ru' ni nacu'ë nabángaquië' na'a, sal-la' bal-lë' chinátigaquië'. ⁷ Ní'irö Jacobo bilé'enë' Lë', en gudödi ni' bulu'i lahuë' lógaquië' yúgu'të bönni' gubáz queë'.

⁸ Ga yójsetë bulu'i lahuë' ca' lahua' neda'. Ca guca lë ni, naca' ca tu bí'ido' gúljabi' cate' chigudödi dza ral-la' gáljabi'. ⁹ Caní naca, tu' nácará' neda' cá'asö ca yúgu'të bönni' gubáz queë', en biti' naca' neda' lesaca' si' la' gubáz queë', tu' gudxía ládx'a'bönachi queë' Dios. ¹⁰ Na'a, tu' buzá' ládxë'ë quia' Dios naca' le naca' na'a, en caléga nítisö buzá' ládxë'ë quia'. Béntera' neda' xichiné' ca ia'zíca'rë' gubáz queë', sal-la' caléga rácasö quia' bena' dxin na'. Dios caz, lu yöl-la' ruzá' ladxi' queë', buguné' neda' dxin. ¹¹ Na'a, channö bema' libán neda' o channö guluné' libán ia'zíca'rë' bönni', lë ni le runtu' libán que, en le guyéajlé'ëli' libí'ili'.

Ubanru' lu yöl-la' guti

¹² Runtu' libán queë' Cristo ca na' bubenë' lu yöl-la' guti. Channö caní naca, ¿nacxi caz naca, rnna'li' bál-lali': "Biti' ulu'bán nupa chinátigaca"? ¹³ La'tu' cabí ulu'bán nupa chinátigaca, biti' bubenë' Cristo, ¹⁴ en la'tu' cabí bubenë' Cristo, nítisö naca le bentu' libán que, en nítisö naca yöl-la' réajlé' queëli' Lë'. ¹⁵ Ia'stú, la'tu' cabí bubenë' Cristo, rizi' yé'etu' cate' runtu' ba nalí queë' Dios, rnna'lu' busubanë' Cristo, ate' la'tu' cabí usubanë' nupa chinátigaca, Dios biti' busubanë' Cristo. ¹⁶ La'tu' cabí ulu'bán nupa chinátigaca, biti' bubenë' Cristo, ¹⁷ en la'tu' cabí bubenë' Cristo, nítisö naca yöl-la' réajlé' queëli' Lë', ate' nagá'anagaca dul-la' nabágälli'. ¹⁸ Lësca' caní, nupa na' chinátigaca, en gula'yéajlé'ë' Cristo, tsaz gulati channö cabí bubenë' Lë'. ¹⁹ Channö tsánnisö ni zóaru' nabanru' huáca uzí'iru' xibë' Cristo, nácaröru' bayechi' ca yúgu'të bönnachi.

²⁰ Na'a, le nácatë bubenë' Cristo lu yöl-la' guti, en náquië' nu gusí lo bubán tsaz ladaj yúgu'të nupa ulu'bán tsaz lu yöl-la' guti. ²¹ Ca na' guyú'u yöl-la' guti ni'a que le benë' tuë' bönni', lësca' caní, ni'a que le benë' ia'tuë' bönni' guyú'u yöl-la' rubán quégaca nupa chinátigaca. ²² Ca na' tati yúgu'të bönnachi tu' nájlengaca Adán, lësca' caní ulu'bán yúgu'të nupa na' nájlengaca Cristo. ²³ Tu tuë' ubanë' ca ral-la' gaca. Zí'alö bubenë' Cristo, ate' tödi ni ulu'bán nupa néquiguequi queë' Cristo cate' huödë'. ²⁴ Ní'irö idxín dza údxí cate' ugüë' Cristo idútë le dë lu në'e, en idútë yöl-la' unná bë', en idútë yöl-la' huáca que tu' xihui', ate' udödë' yöl-la' unná bë' queë' lu në'e Dios Xuuz. ²⁵ Run bayudxi inná bë'ë Cristo ga idxinxrò dza chibenë' Dios ga ulu'zechu zxíbigaca lahuë' Lë' yúgu'të nupa ta'dá'baga' Lë'. ²⁶ Le ridá'baga' Lë' le usunítië' ga údxí naca yöl-la' guti. ²⁷ Dios chinudödë' yúgu'të lu në'e para inná bë'enë' le. Nazúaj lu guichi lá'ayi, rnna: "Budödë' yúgu'të lu në'e para inná bë'enë' le." Na'a, naca bë'biti' budödi cuinë' lu në'e Zxi'inë', tu' naca cazë' Lë' Nu rudödi yúgu'të lu në'e Zxi'inë'. ²⁸ Cate' idxín dza ni' chinudödë' Dios lu në'e Cristo yúgu'të para inná bë'enë' le, ní'irö Lë' cazë' Zxi'inë' udödi cuinë' lu në'e Dios, Nu na' budödi lu në'e Zxi'inë' yúgu'të, ate' ga údxí, Dios inná bë'enë' tsaz yúgu'të.

29 Bál-lali' ridílali' nisa uláz quégaca nupa chinátigaca. Channö réquili' biti' ulu'bán nupa na' chinátigaca, ¿bizx que ridílali' nisa uláz quégaca nupa chinátigaca?

30 Zoa bönadxi queétu' gátitu' yúgu'té dza. ¿Bizx que rui'itu' lataj gaca caní channö cabí ubanru' lu yöl-la' guti? **31** Yúgu'té dza zoa bönadxi gáttia'. Riguíxjö'i'ida' libí'ili' lë ni, böchi' luzá'ado', tu' raza ládxa'a le bena'. Caní naca tu' bena' ga réajlë'eli' Xanru' Jesucristo. **32** Channö tu' gú'unisida' gudíl-lalena' böa' guixi' sínia' lu yödzö Éfeso, ¿bizxi caz uzi'a xibé? Channö cabí ulu'bán nupa chinátigaca, ral-la' gunru' ca ta'nná böñachi: "Gu'aj gáguru' tu' huátilu' cuxö huidzaj."

33 Biti' güí'ili' lataj nu si' ye'e libí'ili'. Channö si' lu ná'ali' láti'do'os le cabí nácaté, idúteli' huóacalí chul-la niti. **34** Buli'bi'i ládxí'ili', en biti' gunli' dul-la' tu' cabí nún'bë'eli'-në' Dios bál-lali' libí'ili'. Rnnia' caní para guna' ga utu'ili'.

Ca ilaca nupa ulu'bán lu yöl-la' guti

35 Nadxi ca' zoa nu inná: "¿Nacxi ulu'bán nupa chinátigaca? ¿Nacxi gaca idú ca nádagaca cazé' cate' ulu'dxiné?" **36** Lí', bönni' biti' bi nöziné'. Lé na' rázu' luyú biti' ilén channö cabí initi. **37** Lé na' rázu' luyú naca tu xiséd'oos, nadxi ca' que zxoa' xtila o que ia'tú guixi' cuando'. Lé na' rázu' biti' naca guixi' cuando' na' ral-la' ilén. **38** Dios runé' ga gaca guixi' cuando' ca nun cazé' que. Ca naca tu tu xisedo' na' runé' ga gaca guixi' cuando' que. **39** Lësca' caní, biti' naca lëbisö böla' que queégacaba' yúgu'téba' böa' guixi'. Zoa tu böla' quégaca böñachi, en ia'tú ca naca böla' quégacaba' böa' guixi'. Ia'tú ca naca böla' quégacaba' biguínni, en ia'tú ca naca böla' quégacaba' böla. **40** Lësca' caní nadzá' idú ca nádagaca caz nupa nacuá' yehua' yubá ca naca idú ca nádagaca caz nupa nacuá' luyú ni. Zoa tu yöl-la' lachi quégaca nupa nacuá' yehua' yubá, en ia'tú ca naca yöl-la' lachi quégaca nupa nacuá' luyú ni. **41** Zoa tu yöl-la' lachi que gubidza, en ia'tú que beo', en ia'tú quéguequi böläj lúzxiba. Yöl-la' lachi que tu böläj lúzxiba nadzá' ca naca yöl-la' lachi que ia'tú böläj lúzxiba. **42** Lësca' caní gaca cate' ulu'bán nupa chinátigaca. Cate' rigachi' lu yeru ba naca tu böla' initi. Cate' ubán, ní'irö gaca tu le soa tsaz. **43** Cate' rigachi' lu yeru ba naca tu böla' cá'asö, en le nacuidi'. Cate' ubán, ní'irö gaca tu le lachi, en le nál-la. **44** Cate' rigachi' lu yeru ba naca tu böla' que yödzölió ni. Cate' ubán, ní'irö gaca tu le soa tsaz yehua' yubá. Zoa tu böla' que yödzölió ni, en ia'tú ca gaca le idzaga bö' naca cázaru'.

45 Nazúaj lu guichi lá'ayi le rnna: "Bönni' na' gusí lahuë' zoë' luyú ni, lë' Adán, Dios benë' lë' bönni' ban", pero Bönni' na' guyázië' xilatjë' Adán, Lë' Cristo, Dios benë' ga náquië' Bö' nabániru'. **46** Biti' blé'ë zí'alö Bönni' na' náquië' Bö'. Bla' zí'alö nu na' naca böñachisö, ate' ní'irö blé'ë Bönni' na' náquië' Bö'. **47** Bönni' ni' blé'ë zí'alö, gúquinë' yu. Bönni' na' blé'ë burópilö, Nu na' naca Xanru', birúajë' yehua' yubá. **48** Nupa nacuá' luyú ni nádagaca ca gúquinë' bönni' na' gúquinë' yu, ate' nupa ral-la' tsöjcuá' yehua' yubá ilaca ca naca Nu na' birúaj yehua' yubá. **49** Ca na' na'a dë queéru' tu böla' le naca ca guca böla' queé' bönni' na' gúquinë' yu, lësca' ral-la' huöéquiru' ca néquinë' Nu na' birúaj yehua' yubá.

50 Caní rë'eni inná lë ni rea' libí'ili', böchi' luzá'ado', rnnia': Le néquinë böla', en rön biti' gaca tsaz ga ni' rinná bë'ë Dios, en lësca' caní, lë na' initi biti' gaca ideli' lë na' soa tsaz. **51** Buli'yútsöca', rea' libí'ili' tu le bigachi': Biti' gátilu' yúgu'térü', pero Dios utsë'ë ca nácaru' yúgu'térü'. **52** Tsálido'os gaca, tsca naca

tu le rutásö guiöj loru', cate' cödxi lúzuba' böa' le röjet. Cödxi lúzuba' na', ate' ulu'bán nupa chinátigaca, en iléquini tu le soa tsaz, ate' Dios utsé' le néquiniru' yúgu'téru'. ⁵³ Lé na' nácaru' le riniti ral-la' huóaca le soa tsaz, ate' le néquiniru', lé na' ral-la' gati, huóaca tu le catu caz gati. ⁵⁴ Cate' lë na' riniti chinuhuöáca le soa tsaz, enca' lë na' ral-la' gati chinuhuöáca le catu caz gati, ní'irö idxín lë na' nazúaj lu guichi lá'ayi, le rnna:

Nadúa tsaz yöl-la' guti.

Chibidéli'né' Cristo.

⁵⁵ Bítirö inná be'e yöl-la' guti rë'u.

Bítirö gaca yöl-la' guti bi gun queéru'.

⁵⁶ Huáca bi gun yöl-la' guti queéru' tu' nabága'ru' dul-la', ate' nabága'ru' dul-la' tu' ridá'bag'a'ru' xibá queé' Dios. ⁵⁷ ¡Xlené' Dios! ¡Lé cazé' runé' ga nuláru' lu yöl-la' guti ni'a que le bené' Xanru' Jesucristo!

⁵⁸ Que lë ni na', böchi' luzá'ado', guli'sóa tsutsu. Guli'gaca idú ládxili', gúntica'sili' xichiné' Xanru' tu' nöz quezili' biti' runli' nítisö xichiné' Xanru'.

16

Yugu' bönachi Corinto tu'nödzaj quégäquië' böchi'gaca ta'yádzjané'

¹ Na'a, ca naca que dumí na' unödzjali', le gácalen böchi'ru' ta'yéajlë'ë Cristo nacu'ë Jerusalén, guli'gún na'a ca na' gunná bé'eda' yugu' cö' bönachi queé' Cristo, nacuá' luyú Galacia. ² Yugu' dza domingo, tu tuli' ral-la' c'ulí' quez latí'dumí, tscá na'Dios runné' queéli'. Guli'gún chi'ile, para cabí gun bayudxi bi utúbili' cate' idxina' ga zóali'. ³ Cate' ni' idxina' ga zóali', isól-la'a Jerusalén bönni' na' cöli' libíili'. Uzúaja' tu lu guichi le gun ga ilaca bë'gaquië', ate' ilu'ë dumí na' unödzjali'. ⁴ Channö ral-la' tseja' ca' neda', tsójácalené' neda'.

Le rë'ënë' gunë' Pablo

⁵ Guída' ga zóali' cate' údxí töda' yugu' yödzö luyú Macedonia, tu' run bayudxi töda' yugu' yödzö na'. ⁶ Réquida' ugá'analena' libíili' tu chíi, o nadxi ca' ugá'ana' ni' yugu' beo' ziaga. Ní'irö huáca gácalenli' neda', ugú'uli' neda' nöza gáti'tés ga ral-la' tseja'. ⁷ Cate' guída' uduyúa' libíili' biti' rë'ënda' tödisa' ni'. Runa' löza sóalena' libíili' xidzé, channö gunnë' Xanru' neda' lataj.

⁸ Ugá'ana' ni lu yödzö Éfeso ga idxinrö dza Pentecostés ⁹ tu' dë lataj ni guna' tu dxin zxön queé' Xanru', sal-la' zián nupa ta'dá'bag'a' neda'.

¹⁰ Channö idxinbi' bi'i Timoteo ga na' zóali', guli'gú'i ládxili'-bi', para cabí ubi ugu'ibi' tsanni ni' sóaleni' libíili', tu' runbi' xichiné' Xanru' ca na' runa' neda' xichiné'. ¹¹ Que lë ni na', cuntu nu ral-la' uzóa lëbi' tsölä'alö. Guli'gácalen-bi', ugú'uli'-bi' nöza idú tsáhu'ido', para udxinbi' ga ni zoa' neda', tu' riböza'-bi' lëbi', enca' yugu' böchi'ru' túnlené'-bi' tsözxón dxin.

¹² Ca naca queé' böchi'ru' Apolos, gúta'yua' lahuë' tsejë' tsöjyúë' libíili' tsözxón len yugu' böchi'ru', pero biti' rë'ënë' tsejë' na'a. Guíde' cate' séqui'në'.

Didza' ru'ë Pablo ga ruúdx

¹³ Buli'subán ládxili', en guli'gaca tsutsu ca réajlë'ëli'-në' Cristo. Guli'gaca rugu ladxi', en buli'tipa ládxili'. ¹⁴ Len yöl-la' nadxi'i guli'gún bíti'tés bi gunli'.

¹⁵ Na'a, böchi' luzá'ado', chinöz quezili' ca naca queé' Estéfanas, enca' quégaca di'a dza queé'. Nácgaca nupa gula'sí lógaca ta'yéajlë' Cristo ladaj bönachi nacuá' luyú Acaya. Bulu'dödi cuíngaqüi' para iluné' xichingaca bönachi queé' Dios. ¹⁶ Ráta'yua' loli', böchi' luzá'ado', gunli' bal nupa nácgaca ca böchi'ru' na', enca' ca nácgaca nupa tunlen légaquië' tsözxón dxin, en

tácalen légaquië'. ¹⁷ Rudzéjada' tu' biladxinë' Estéfanas, en Fortunato, en Acaico ga zoa', tu' gúcalengaquië' neda' uláz queëli'. ¹⁸ Bulu'huë tsáhuë'ë neda' ca na' bulu'huë tsáhuë'ë ca' libí'ili'. Guli'gún bal böñachi caní.

¹⁹ Yugu' cö' böñachi queë' Dios luyú Asia ni tu'gapa Dios libí'ili'. Aquilo, en Priscila, enca' nupa tu'dubi queë' Dios ga naca lu yu'u lídxigáquië' tu'gapë' Dios libí'ili'. ²⁰ Yúgu'të böchí'ru' ni tu'gapë' Dios libí'ili'. Guli'gapa Dios tuli' ia'tuli', en unida'lí luzá'ali'.

²¹ Neda', Pablo, len na' cuin caza' ruzúaja' lu guichi lë ni, rrmnia': Rugapa' Dios libí'ili'.

²² Nu biti' nadxí'i Xanru' Jesucristo, chinabía dö' nu na'.

Gudá Xanru'.

²³ Rinábida'-në' Xanru' Jesucristo uzá' ládxë'ë queëli'. ²⁴ Nadxí'ida' yúgu'tëli' tu' nácaru' tuz len Xanru' Jesucristo. ¡Ca' gaca!

DIDZA' BUROPI GUSÖL-LË'Ë PABLO YÖDZÖ CORINTO

Pablo rugapë' Dios bönachi queë' Cristo nacu'ë Corinto

1 Neda', Pablo, naca' gubáz queë' Jesucristo tu' rë'ënë' caní Dios. Bi'i böchi'ru' Timoteo runbi' neda' tsözxön. Rugapa' Dios libi'ili', rudúbili' queë' Dios lu yödzö Corinto, enca' yúgu'téli' néquili' quez queë' Dios luyú Acaya ga na' nababa Corinto. **2** Rinábida'-në' Xúziru' Dios, en Xanru' Jesucristo uzá' ládxë'ë queëli', en gurë' ga soa dxi icja ládx'i'do'oli'.

Yugu' le gudi'i guzxáquë'ë Pablo

3 ¡Yöl-la' ba Dios, Xuzé' Xanru' Jesucristo, tu' náquië' Xúziru', en ruhuéchi' ládxë'ë rë'u, en náquië' ca' Dios, Nu ruhuë tsáhui'tica'sö rë'u! **4** Dios ruhuë tsáhuië'ë rë'u cate' raca bíti'tës bi raca queëru', para gaca huë tsáhui'ru' ca' nupa bi raca quéguequi. Ruhuë tsáhui'ru' légaquië' ca na' Dios ruhuë tsáhuië'ë rë'u.

5 Tsca ta'yán le rigui'i rizáca'ru', ca na' gudi'i guzxáquë'ë Cristo, lësca' caní ta'yán le tu'hüe tsahui' rë'u, tu' nácaru' tuz len Cristo. **6** Que lë ni na', channö bi rigui'i rizáca'tu', raca caní queëtu' para gaca huë tsáhui'ru' libi'ili', en guntu' ga uláli'. Channö Dios ruhuë tsáhuië'ë netu', raca caní para gaca huë tsáhui'ru' libi'ili', ate' lu yöl-la' riböza zxön ladxi' queëli', gaca guá' ilenli' yugu' le qui'i sáca'lí', ca na' raca ca' queëtu'. **7** Ruzxöni ládx'i'tu'-në' Dios gúntica'së' ga gaca dxi'a queëli', tu chinózitu' ca na' rigui'i rizáca'lí' tsözxön len netu', lësca' caní ruzí'ili' xibé tsözxön len netu' le ruhuë tsáhuië'ë Dios rë'u.

8 Rë'ënitu' inözili', böchi' luzá'ado', ca naca le zián le gulaca queëtu' luyú Asia. Gudöditë bë' lë na' guca queëtu', ate' guca zí'térö ca le guca guá'ilentu'. Ca' guca, bíti'rö bentu' löza sóatu' ibantu'. **9** Gúquitu' guca queëtu' ca raca quégäquië' bönni' chinarugu quégäquië' ilatië'. Guca caní queëtu' para cabí uzzxöni ládx'i'tu' la' cuínsitu', pero uzzxöni ládx'i'tu'-në' Dios, Nu rusubán nupa chinátigaca. **10** Dios busölë' netu' lu lë' na' ben ga guzóa bönadxi gátitu', ate' rusölë' netu' yúgu'të dza. Runtu' löza usölë' Lë' netu' caní leyübölö **11** channö gácalenli' netu', ulídzali'-në' Dios, en inábili'-në' gácalenë' netu'. Dios gunë' ca na' inábili'-në' tsözxön len bönachi zián, uzá' ládxë'ë queëtu', ate' ila'nná: "Xclenë' Dios" ni'a queëtu'.

Riguixjö'ë Pablo bizx que ridzenë' idxinx' Corinto

12 Lë ni le run ga rudzéjatu'. Bö' naca caztu' rului'i netu', len yöl-la' ba'a ladxi' queëtu', en idú ládx'i'tu' runtu' bi runtu' yödzöli' ni, ate' caní bentu' ca' ga ni' zóali'. Caní bentu', tu' gúcalen netu' le buzá' ládxë'ë Dios queëtu', en calégä len yöl-la' réajni'i queëztu' bentu' caní. **13** Ruzuájsötu' queëli' lu guichile gaca ulábali', en le gaca tséajni'ili'. Raca ládx'a' tséajni'ili' idú **14** lë na' réajni'ili' lati'. Ní'irö cate' idxín dza huödë' Xanru' Jesucristo, gaca gunli' netu' zxön ca na' netu' guntu' libi'ili' zxön.

15-16 Tu' bena' löza lë ni, guzá' ládx'a' guída' ga zóali' zí'alö cate' gudöda' luyú Macedonia, ate' guída' ga zóali' leyübölö cate' uzá'a ni para uzí'ili' xibá' chopá luzuí. Tödi ni' huáca gácalenli' neda' ugú'uli' neda' nöza tseja' luyú Judea. Caní gó'unida' guna'. **17** ¿Naru' réquitseli' guzxí' yë'a tu' butsá'a ca guna'? ¿Naru' réquitseli' lu yöl-la' bönächisö quia' runa' le rizá'asö icja', en

bé'ësa' ca' didza' cate' gunnía': "Caní guna"? ¹⁸ Ni'a queë' Xanru' Dios, Nu run idútë ca rnna xtídzë'ë, biti' bë'ësa' ca' didza' cate' bë'lena' libí'ili' xtídzë'ë Dios. ¹⁹ Jesucristo, Zxi'inë' Dios, Nu na' bentu' libán que ga zóali', neda' len Silvano, en Timoteo, biti' ru'i'së' ca' didza'. Lë' ru'ë didza' idútë li. ²⁰ Cristo caz runë' ga naca idútë löza yúgu'të le guzxí' lu në'ë Dios, ate' ni'a queë' Lë' gaca innaru': "Ca' gaca", para gaca queë' Dios yöl-la' ba. ²¹ Dios caz runë' ga runtu' löza tsözxón len libí'ili' néquiru' queë' Cristo, en budödë' lu na'tu' dxin queë' runtu'. ²² Bennë' queëru' le naca bë' néquiru' queë', tu' guchízio' icja ládzi'do'oru' Dios Bö' Lá'ayi, Nu naca queëru' le run ga naca löza yúgu'të le gunnë' Dios queëru'.

²³ Ni'a queë' Xanru' Dios, Nu nözi le rizá' ládex'a, ruá'a didza' idútë li. Nözinë' Lë' biti' bida' ga zóali' lu yödzö Corinto, para cabí gun bayudxi guna' ga huí'inili'. ²⁴ Biti' rë'ënitu' inná bë'etu' libí'ili' ca réajlë'ëli' Cristo, tu' chinácali' tsutsu ca réajlë'ëli' Lë'. Rë'ënitu' guntu' le gun ga udzeja ládzi'li'.

2

¹ Que lë ni na' bë' ládex'a cabí guídatea' queëli' zí'alö, para cabí guna' ga huí'inili'. ² Channö guna' neda' ga huí'inili', ¿nuksi caz gun ga udzéjada' neda'? ¿Naru' guntsa' ga huí'ini nu ral-la' gun ga udzéjada' neda'? ³ Que lë ni na' buzúaja' queëli' lu guichi zí'alö. Biti' gú'unida' guída' ga zóali', para cabí gunli' libí'ili' ga huí'inida' neda', tu' ral-la' gácali' libí'ili' cázali' le gun ga udzéjada' neda'. Tu' ruzxöni ládex'a libí'ili', nözda' udzéjali' yúgu'tëli' channö udzéjada' neda'. ⁴ Cate' ni' buzúaja' queëli' lu guichi lë na', gusébide'e ládex'a, en buf'inide'e ládex'a ga bidxitë gurödxa'. Buzúaja' caní lu guichi, calëga para guna' ga huí'inili', pero para inözili' ca nadxi'ide'eda' libí'ili'.

Ral-la' uniti loru' nu ruá' dö' cate' rubí'i ladxi'

⁵ Channö zoë' tu bönni' ni', bönni' na' busuhuí'ininë' rë'u, calëga néda'sö busuhuí'ininë', pero huáca innaru' busuhuí'ininë' yúgu'tëli' libí'ili'. Rnnia': "Huaca innaru'", para cabí tödi bë' ichugu bë'a queë' bönni' na'. ⁶ Tscati' gaz xíguia' chibenli' látu'biqu' yúgu'tëli' queë' bönni' na'. ⁷ Na'a, ral-la' uniti loli' bönni' na', en utípalí' ládxë'ë, para cabí tödi bë' huí'ininë', en para cabí gaca tsaz chopá ládxë'ë. ⁸ Que lë ni na' ráta'yua' loli' gunli' le gaca bë' nadxi'ili'-në' idú ládzi'li'. ⁹ Que lë ni na' ca' buzúaja' queëli' lu guichi lë na'. Gú'unida' si' bë'a libí'ili' para inözda' channö rúntica' sili' ca rnna xtídz'a. ¹⁰ Cate' nu runiti loli' libí'ili', neda' ca' runiti lahua' nu na'. Cate' nu runiti lahua', channö bi ben nu na' runiti lahua', runa' caní uláz queë' Cristo para gaca bi uzi'ili' xibé. ¹¹ Caní runa', para cabí sequi' Satanás tu' xihui' ucúl-la rë'u, tu' chinöziru' yugu' le rë'ëni gun queëru'.

Gurö'ë böniña Pablo lu yödzö Troas

¹² Cate' bidxina' lu yödzö Troas para guna' libán que didza' dxi'a queë' Cristo, bennadë'ë Xanru' neda' lataj guna' libán ni'. ¹³ Sal-la' guca caní, gurö'ë böniña tu' cabí yöjxáca'a-bi' bi'i böchí'ru' Tito ni'. Que lë ni na' buzá'lena' bönochí ni', ate' guyija' luyú Macedonia.

Idéi'ru' tu' zóalenë' Cristo rë'u

¹⁴ ¡Xclenë' Dios! Richë'tica'së' rë'u ca tu le naca bë' bidéli'në' Cristo yöl-la' rusölä queëru'. Dios rugunë' dxin rë'u para rulu'ë lahuí ca gaca ilúnbe'ë bönochí Cristo. Le nácaru' naca ca tu le rilá' zxixi, le riguisi gáti'tës. ¹⁵ Nácaru' ca tu nöri rilá' zxixi, le ruzégui'ë Cristo lahuë' Dios, en le riguisi'ë lögaca nupa

nulágaca, en nupa nanítigaca. ¹⁶ Lógaca nupa na' nanítigaca nácaru' ca tu le rilá' siguti le naca bë' ilátié'. Lógaca nupa na' nulágaca nácaru' ca tu le rilá' zxixi le naca bë' ibántica'siru'. ¿Nuzxi caz naca lesaca' gaca que caní? ¹⁷ Biti' runtu' ca tun zián böñachi, nupa tu'gún dxin xtídzë'ë Dios ca tu le tuti', en to'o. Tu' nasöl-lë'ë Dios netu', idú ládxí'tu' ruí'itu' didza' lahuë' Lë' tu' nácatu' tuz len Cristo.

3

Ca naca didza' le ruún rë'u tuz len Dios

¹ ¿Naru' réquitseli' run ba zxön cuintu' cate' ruí'itu' caní didza'? ¿Naru' runtsö bayudxi ulu'i'itu' libi'ilí' tu guichi le rulu'i le nácatu'? ¿Naru' ral-la' inábitu' libi'ilí' günnali' queétu' tu guichi caní, ca na' tun bal-la böñachi? ² Libí'i cázali' nácali' ca tu guichi le rulu'i le nácatu', le nazúaj lu icja ládxí'do'otu', ate' yúgu'të böñachi gaca ulu'laba le, en tséajni'iguequi le. ³ Le nácali' nalá' lahuí ca tu guichi nuzúajë' Cristo, le gusöl-lë'ë lu na'tu'. Biti' nazúaj tu lu guichi, pero Bö' Lá'ayi queë' Dios ban nuzúajë' le, calëga tu lu guijóta'a, pero lu icja ládxí'do'oli' nuzúajë'.

⁴ Ruí'itu' caní didza' tu' ruzxöni ládxí'tu'-në' Dios tu' zóalenë' Cristo rë'u. ⁵ Biti' réquitu' bi gaca guntu' rácasö queétu', pero Dios runné' queétu' yöl-la' huáca bi guntu'. ⁶ Dios caz benné' queétu' yöl-la' huáca guntu' xichiné' lu didza' cubi na', le ruún rë'u tuz len Dios. Didza' ni biti' naca tu xibá nazúaj lu guichi, pero naca tu le nusédinë' Dios Bö' Lá'ayi rë'u. Xibá na' nazúaj lu güichisö richugu queérü' gátiru', pero Dios Bö' Lá'ayi nabániru'.

⁷ Yugu' xibá queë' nazúajgaca lu guichi, Dios buzúajë' yugu' lu guijóta'a, ate' bulu'e lahuí yöl-la' bení' queë' cate' budödë' le lu në'ë Moisés. Sal-la' gudödi que, guyépitërö yösä bení' lahuë' Moisés. Caní guca, biti' guca ulu'yú böñachi Israel lahuë' Moisés. Channö yöl-la' bení' caní yöjtsaga xibá na', ate' xibá na' richugu quégaca böñachi ilátiгaca, ⁸ zxöntërö naca yöl-la' bení' na' dzaga yugu' le runë' Dios Bö' Lá'ayi. ⁹ Yöjtsaga yöl-la' bení' lë na' ben ga narugu quégaca böñachi ilátiгaca. Zxöntërö naca yöl-la' bení' que lë na' run ga rnne' Dios náca gaca tsahui' böñachi. ¹⁰ Tu' nácatërö lesaca' yöl-la' bení' na' nalá' lahuí na'a, cuídísö nagá'ana yöl-la' bení' na' bilá' lahuí cate' Dios bunödzë' xibá queë' quégaca böñachi. ¹¹ Channö guzóa yöl-la' bení' que lë na' guzóa tu chí'ido'osö, zxöntërö naca yöl-la' bení' que lë ni sóatica'sö.

¹² Tu' zoa lë ni runru'löza, ruí'itu' didza' lu yöl-la' rugu ladxi'. ¹³ Biti' runtu' ca benë' Moisés, bucache' lahuë' len tu lári'do', para cabí ulu'yú böñachi Israel yöl-la' bení' na' zeaj riniti. ¹⁴ Gula'chul-la gula'nítie' yugu' bönni' ni'. Ga ridxitnë na'a dza cate' tu'labë' guichi que didza' gula na' le ruún böñachi tuz len Dios, naca tscá nágá'ana la' leze lári'do' na' lógaquie', lë na' gaca ugüie' tuze' Cristo. ¹⁵ Ga ridxitnë na'a dza, cate' tu'labë' guichi ga na' nazúaj didza' queë' Moisés, zxoxa ca tu lári'do' guijó lógaquie' le run ga nachul-la nanítigacië'. ¹⁶ Cate' nu ruhuöáca queë' Xanru', rigúa lë na' run ga nachul-la naniti nua'na'. ¹⁷ Cate' ni rrnnatu': "Xanru'", ruí'itu' didza' queë' Dios Bö' Lá'ayi. Ga zoë' Bö' Lá'ayi queë' Xanru', ni' zoa caz yöl-la' nadzán. ¹⁸ Yúgu'tëru' rë'u biti' bi nusayaj loru'. Nácaru' ca tu guifé dxili ga nalá' yöl-la' bení' que lahuë' Xanru', ate' yöl-la' bení' na' queë' Xanru', Nu naca Bö' Lá'ayi, rutsa' rë'u, en run ga zeaj rácarörü' ca náquie' Cristo caz, en ráta'rö queérü' yöl-la' bení' queë'.

4

¹ Dios buéchi' ládxë'ë netu', en budodë' lu na'tu' dxin ni runtu'. Que lë ni na' biti' raca chopá ládxí'tu'. ² Chibucá'anatu' le tun böñachi bagáchi'sö, en le tun ga rutu'iru'. Cuntu nu rizi' yé'etu', en biti' rutsá'atu' xtídzë'ë Dios. Tu' ruí'itu' didza' que le naca idútë li, ruí'i ládxí'tu' guntu' le iléquibe' e yúgu'të böñachi naca dxí'a lahuë' Dios. ³ Channö zoa nu biti' réajni'ini didza' dxí'a runtu' ba nalí que, nácagacaso nupa nachul-la nanítigaca biti' ta'yéajni' i le. ⁴ Biti' ta'yéajlë' böñachi na'. Ben tu' xihui' ga naca caní, nu na' nun cuini ca dios, en rinná be'e böñachi dza ni zóaru' na'a. Ben ga nachul-la nanítigaca, para cabí ila'lé'e bení' que didza' dxí'a ca naca yöl-la' bení' queë' Cristo, Nu na' naca idú ca náquië' Dios caz. ⁵ Biti' runtu' libán que la' cuínsitu', pero runtu' libán queë' Jesucristo, en riguíxjö'ötu' náquië' Xanru', ate' netu' ni nácatu' huen dxin queëli' tu' nadxí'itu'-në' Jesús. ⁶ Dios, Nu ben ga buzení' bení' ga ni' guca chul-la, náquië' Nu rigú'u bení' icja ládxí'do'oru', le ruzéajni' i rë'u para gúnbe'ëru' yöl-la' bení' queë' Dios, lë na' ruzení' lahuë' Jesucristo.

Tu' réajlë'ëru' Dios runru' ca rë'ënë Lë'

⁷ Yöl-la' tsahui' ni yu'u icja ládxí'do'oru' rë'u. Nácaru' ca yugu' yusu' yu, para gaca bë' nequi queë' Dios yöl-la' huáca zxön na', en calëga que cázaru'.

⁸ Tu'saca' zi' böñachi netu', pero biti'rudú ládxí'tu'.

Rö'ötu' böñiga, pero biti' raca chopá ládxí'tu'.

⁹ Ta'bía ladxi' böñachi netu', pero biti' rubéaj ládxë'ë Dios netu'.

Ta'zé'ede'e netu' yu, pero biti' tu'suniti netu'.

¹⁰ Lu idú le naca caztu' rátitica'stu' tsözxön len Jesús, na' naca bë' lu le naca caztu' nabáni'tu' Lë'.

¹¹ Tsanni ni zóatu' nabantu', zóatica'sö böñadxi gátitu' tu' néquitu' queë' Jesús para gaca bë' nabáni'tu' Lë' lu le naca caztu' le riniti. ¹² Caní naca, zoa böñadxi queëtu' gátitu', pero ni'a que lë ni rata' yöl-la' na'bán queëli'.

¹³ Nazúaj lu guichi lá'ayi le rnna: "Guyéajlë'a Dios, ate' que lë ni na' bë'a didza'." Lësca' caní raca queëtu', réajlë'ëtu' Dios, en que lë ni na' ruí'itu' didza'.

¹⁴ Nöztu' ca gunë' Dios, Nu busubán Xanru' Jesús, usubanë' ca' netu' tsözxön len Jesús, en usudxinë' netu' tsözxön len libí'ili' lahuë' Lë'. ¹⁵ Raca caní yúgu'të lë ni para gaca bi uzí'ili' xibé. Channö ila'deli' ziánrö ca' böñachi le ruzá' ládxë'ë Dios queëru', ila'nné: "Xclenë' Dios", ate' gaca yöl-la' ba queë' Dios.

¹⁶ Que lë ni na', biti' raca chopá ládxí'tu'. Sal-la' riniti idú le naca caztu', yúgu'të dza rucubë' Dios le nácatu' lu icja ládxí'do'otu'. ¹⁷ Le cuídi'sö rigu'i rizáca'ru' ni tu chí'ido'osö run ga gata' queëru' le uzí'da'aru' xibé le sóatica'sö, en le nácatëro lesaca' ca gaca gúnbe'ëru'. ¹⁸ Biti' ruí'i ládxí'ru' le rilé'ëru' luyú ni, pero le biti' gaca ilé'ëru' ruí'i ládxí'ru'. Lë na' rilé'ëru', tu chí'ido'osö zoa, pero le cabí gaca ilé'ëru' sóatica'sö.

5

¹ Nöziru' cate' initi idútë le naca cázaru', le naca ca tu yu'u lári'do' yödöliö ni, Dios chinupë'ë tu le cubi queëru', le naca ca tu yu'u le zoa tsaz ni' yehua' yubá, lë na' nun cazë' Lë'. ² Que lë ni na' rinné ládxí'ru' tu' rë'ëniru' tsú'uru' le cubi ni', lë na' naca ca tu lídxiru' ni' yehua' yubá. ³ Tsú'uru' le cubi ni' ca na' rácuru' tu lari', para cabí sóaru' ga biti' zoa idútë le naca cázaru'. ⁴ Tsanni ni zóaru' lu idútë le naca cázaru', le naca ca tu yu'u lári'do', rinné ládxí'ru' lu yöl-la' risëbi ladxi' queëru'. Biti' runru' caní tu' rë'ëniru' ucá'anaru' idútë le naca cázaru', pero rë'ëniru' tsú'uru' tsaz le cubi ni'. Caní gaca, ucá'anaru' idútë le

naca cázaru' le riniti, ate' tsú'uru' lu yöl-la' na'bán idú. ⁵ Dios chinupé'ë yúgu'të lë ni queéru', ate' guchízië' ré'u Dios Bö' Lá'ayi, Nu naca queéru' le naca bë' naca löza sí'iru' lë na' nupé'ë queéru'.

⁶ Que lë ni na' nadipa ládzi'ru'. Tsanni ni yú'uru' lu le naca cázaru', nöziru' zóaru' zi'tu' ga zoa lidxë' Xanru'. ⁷ Runru' ca runru' tu' réajlé'ëru'-në' Dios, en calëga tu' zoa bi rilé'eru'. ⁸ Tu' runru' löza lë ni, ré'ëniru' ucá'anaru' le naca cázaru' ni para tsöjsóalenu'-në' Xanru'. ⁹ Que lë ni na' ruí'i ládzi'ru' gunru' le raza ládxë'ë Xanru', channö ugá'anaru' lu idútë le naca cázaru' ni, o channö tsöjsóalenu'-në' Xanru' ni'. ¹⁰ Caní runru' tu' run bayudxi idxinru' yúgu'tëru' lahuë' Cristo ga ni' rö'ë ruchi'a rusöröe'. Ní'irö ubi'ë que queéru' tscá naca le benru' tsanni ni yú'uru' lu le naca cázaru', channö benru' le naca dxi'a o le cabí naca dxi'a.

Le ruín rë'u tuz len Dios

¹¹ Que lë ni na', tu' ráxditu'ni' Dios, ruí'i ládzi'tu' uzéajni'itu' böñachi. Nözinë' Dios ca naca le yu'u icja ládzi'do'otu', ate' ruzzöni ládx'a a nözili' dxi'a ca' libi'ili' lë na' yu'u icja ládzi'do'otu'. ¹² Biti' rubéaj cuintu' dxi'a lolí'. Ré'ënitu' gata' lataj queéli' gunli' netu' bal, para gaca ubi'ili' didza', bi guiéli' yugu' bönni' tun ba zxön cuíngaquië' ca na' tu'lui'isö lahui cuíngaquië', en calëga ca nácagaquïë' lu icja ládzi'do'gaquïë'. ¹³ Channö nachixi ícjatu', naca para gaca yöl-la' ba queé' Dios, en channö cabí nachixi ícjatu', naca para gaca bi uzí'ili' xibé. ¹⁴ Run bayudxi bi guntu' tu' nadxi'inë' Cristo rë'u, tu' chinöziru' tuz Nu guti uláz quégaca yúgu'të böñachi, en que lë ni na' naca quégaca yúgu'të böñachi tscá nátilengaca Lë' tsözxön. ¹⁵ Lë' gütië' uláz quégaca yúgu'të böñachi para cabirö ilunë' bönni' nabángaquië' le nequi quégacasë', pero le nequi que Nu na' guti uláz quégaquië', en bubán lu yöl-la' guti. ¹⁶ Que lë ni na', biti'rö gümbë'ëtu' böñachi tscá naca le nalá'gaca láhu'lö, en sal-la' canísö bénbë'ëtu'-në' Cristo, biti' núnbë'ëtu'-në' caní na'a. ¹⁷ Channö nuhuóáca nútì'tës böñachi tuz len Cristo, chinaca böñachi cubi nu na'. Chigudödi que le gulaca zí'alö, ate' chinucúbigaca yúgu'të.

¹⁸ Yúgu'të lë ni nunë' Dios, Nu bun rë'u tuz len Lë' lu në'ë Cristo, en budödë' lu na'tu' guntu' libán ca gaca ulu'huóáca yúgu'të böñachi tuz len Lë'. ¹⁹ Libán runtu' rnna caní: "Dios guzáolenë' Cristo, en benë' ga gaca ulu'huóáca böñachi yödzölió ni tuz len Lë", en biti' röjenenë' dul-la' gula'baga'." Budödë' lu na'tu' didza' dxi'a ni, ca gaca ulu'huóáca böñachi tuz len Dios. ²⁰ Na'a, nácatu' gubáz queé' Cristo, en raca na'a ca Dios caz ráta'yuë' lolí' lu rú'atu' netu'. Que lë ni na' ráta'ytu' lolí' uláz queé' Cristo, guli'huóáca tuz len Dios. ²¹ Cristo biti' bi dul-la' benë', pero Dios budödë' Lë' ca tu bönni' dul-la' uláz queéru', para gata' queéru' lataj gácaru' tsahui' ca náquië' Dios caz tu' nácaru' tuz len Cristo.

6

¹ Tu' runtu' dxin tsözxön len Dios, ráta'ytu' lolí', rnnatu': Biti' udödili' cá'asö le ruzá' ládxë'ë Dios queéli'. ² Nazúaj lu guichi lá'ayi ca gunnë' Dios le rnna:

Tu dza buzá' ládx'a a quiu', biyönda'li',
ate' dza bena' ga gaca uló', gúcalena'li'.

¡Buli'yútsöca'! ¡Na'a naca dza ruzá' ládxë'ë queéru'! ¡Na'a naca dza gaca uláru'!

³ Biti' rë'ënitu' bi guntu' le gun ga nu ichixi inigui, para cabí soa nu ucá'ana cá'asö dxin ni runtu'. ⁴ Ni'a que biti'tës bi runtu', ruí'i ládzi'tu' gaca bë' nácatu'

huen dxin queé' Dios. Que lë ni na', len yöl-la' riböza zxön ladxi' ruá' rilento' yugu' le rigu'i rizáca'tu', en yugu' le riyadzaj queétu', en yugu' le tun ga rö'ötu' böniña. ⁵ Caní bentu' sal-la' gula'zé'ede'e böñachi netu' yu, en gula'gu'ë netu' lidxi' guíë, en gula'bía dí'i netu'. Gudödi bë' bentu' dxin, en biti' guta' lataj queétu' gásitu' o bi gágutu'. ⁶ Bë'ládxí'tu' gaca bë' nácatu' huen dxin queé' Dios. Guca bë' lë ni:

Tu' nácatu' ba'a ladxi', en tu' nápatu' yöl-la' réajni'i, en tu' ribözü' zxön ladxi', en tu' nácatu' dxí'i ladxi', en tu' zóalené' Dios Bó' Lá'ayi netu', en tu' naca idú ca nadxfí'tu' luzá'atu'.

⁷ Ruí'itu' didza' idútë li, ate' zóalen netu' yöl-la' huáca queé' Dios. Le naca tsahui' naca ca tu le rudí'initu' lu gudil-la, enca' le run chi'i netu' lu gudil-la na'.

⁸ Nacuá' nupa tun netu' bal, enca' nupa tu'zóa netu' tsölá'alö.

Nacuá' nupa tu'lidza ditaj netu', enca' nupa tu'lidza tsahui' netu'.

Sal-la' ta'nná böñachi rizí' yé'ëtu', ruí'itu' didza' idútë li.

⁹ Sal-la' nacuá' böñachi biti' núnbe'gaquië' netu',

nacuá' ca' nupa núnbe'gaca netu'.

Ridatu' ga zoa böñadxi gátitu', pero ni zóatu' nabantu'.

Tunë' netu' xíguia', pero biti' tutië' netu'.

¹⁰ Tu'suhu'i ini netu', pero rudzéjatica'stu'.

Nácatu' bönni' yechi', pero runtu' ga rata' yöl-la' tsahui' idú quégaca böñachi zián.

Sal-la' biti' bi dë queétu', nequi queétu' yúgu'të le dë.

¹¹ Idú ládxí'tu' ruí'ilentu' libí'ili' didza' böchi' luzá'ado', zóali' Corinto. Bulu'itu' libí'ili' ca ruí'i ládxí'da'tu' libí'ili'. ¹² Channö cabí nácaru' tuz biti' naca tu' cabí ruí'i ládxí'tu' libí'ili', pero libí'ici' cázali' biti' ruí'i ládxí'li' netu'.

¹³ Na'a, ruí'ilena' libí'ili' didza' ca runë' tu bönni' ruí'ilenë'-bi' zxí'inë' didza', rnñia': Buli'bí' queétu' ca rúnlentu' libí'ili'. Guli'gú' ladxi' netu'.

Nácaru' ca tuyudo' gayu'ë Dios ban

¹⁴ Biti' gácali' tuz len böñachi biti' ta'yéajlë'.

¿Nacxi gácatsö ilaca tuz le naca tsahui', en le cabí naca tsahui'?

¿Nacxi gácatsö ilaca tuz le naca chul-la, en le naca bení'?

¹⁵ ¿Nacxi gácatsö ilácagaquië' tuz Cristo, en Satanás, tu' xihui'?

¿Nacxi gácatsö ilácagaquië' tuz tu bönni' réajlë'ë Cristo, en tu bönni' biti' réajlë'ë?

¹⁶ ¿Nacxi gácatsö ilaca tuz yudo' queé' Dios, en budó' guiój budó' yaga?

Libi'icázali' nácali' ca tu yudo' ga yu'ë Dios ban. Ca naca lë ni, Dios caz gunnë':

Sóalena' légaquië', en tálena' légaquië'.

Gaca' Dios quégagaquië', ate' légaquië' iláquië' böñachi quia'.

¹⁷ Que lë ni na', gunnë' ca' caní:

Guli'rúaj ládjagaquië', en buli'lá'alen légaquië'.

Rnnë' Xanru': "Biti' gútsa'li' le ruá' dö', ate' si' lu na'a libí'ili'.

¹⁸ Neda' gaca' xuz cázali', ate' libí'ili' gácali' zxí'ina', bönni', en nigula."

Caní rnnë' Xanru', Nu napa caz idútë yöl-la' huáca.

naca cázaru', en bö' naca cázaru'. Lu yöl-la' radxi queëru' Dios ral-la' guéquiru' quez queë' Lë'.

Ca bulu'bí'i ládxigaca nupa ta'yéajlé' Cristo

² Guli'sí lu ná'ali' netu'.

Cuntu nu biá'atu' dö' que, nu dzaga libí'ili'.

Cuntu nu bentu' ga ichixi inigui.

Cuntu nu guzxí' ye'etu'.

³ Ruá'a caní didza', caléga para usubága a libí'ili' xíguia', pero naca ca na' chigunnía' zí'alö, rnña': Zoa' sina' ibálrena' libí'ili' o gátilena' libí'ili' tu' ruí'i ládx'a a libí'ili'. ⁴ Ruzxónida' ládx'a a libí'ili', en rúnda' a libí'ili' zxön. Sal-la' zián le riguí'i rizáca'tu', nadípada' ládx'a, en rudzéjade'e ládx'a'a.

⁵ Cate' bidxitnu' luyú Macedonia, ga ridxitné na'a dza, bití' rata' queëtu' lataj uzi' ládx'i'tu', pero zián le taca queëtu'. Ta'díl-lalen böñachi netu', ate' lu icja ládx'i do'otu' yú'ugaca le tun ga rádxitu'. ⁶ Ní'irö Dios, Nu rutipa ladxi' nu chizóa gaca chopá ladxi', butipé' ládx'i'tu' cate' budxinbi' bi'i Tito ga guzóatu'. ⁷ Bití' gücasö tu' budxinbi' queëtu', pero tu' gudíxjö'i ibí' ca' netu' ca na' libí'ili' butípali' ládx'i'ibí'. Gudíxjö'i ibí' netu' ca na' rë'ënide'eli' ulé'eli' neda', en ca na' ruhu'iñili' ni'a que lë na' guca ni', enca' ca ruí'i ládx'i'li' neda'. Yúgu'té lë ni ben ga rudzeja ládx'a'a.

⁸ Sal-la' le buzúaja' queëli' lu guichi zí'alö ben ga buí'iniili', bití' ruhu'i'inda' na'a. Zí'alö buí'inda' cate' güquibe'eda' ben ga buí'iniili' libí'ili' tu chí'ido', ⁹ pero na'a rudzéjada', caléga tu' buí'iniili', pero tu' ben yöl-la' ruhu'i'ini queëli' na' ga bubí'i ládx'i'li'. Dios buguné' dxin yöl-la' ruhu'i'ini queëli', para cabí ichixi inigui' ni'a que le bentu' netu'. ¹⁰ Yöl-la' ruhu'i'ini na' ruguné' dxin Dios run ga nu ubí'i ladxi' para ulá nu na', ate' que lë ni na' bití' ral-la' huí'iniru' que. Yöl-la' ruhu'i'ini le naca que yödzölió ni run ga ilátígaca böñachi. ¹¹ Buli'yútsöca' ca buguné' Dios dxin yöl-la' ruhu'i'ini queëli' na'.

Ben ga ruí'i ládx'i'li'-në' Dios.

Ben ga gó'unili' urúajli' dxí'a.

Ben ga guléli' nu na' ben dul-la'.

Ben ga rádxili'-në' Dios.

Ben ga bë' ládx'i'li' gunli' ca rnna xtídzé'ë Dios.

Ben ga nadxi'ili'-në' Dios idú ládx'i'li'.

Ben ga gó'unili' gunli' xíguia' nu na' ben dul-la'.

Benli' le naca bë' bití' bi dul-la' nabágali' ni'a que lë na' guca.

¹² Que lë ni na', sal-la' buzúaja' caní lu guichi na', bití' guca ni'a que nu na' ben dul-la', en caléga ni'a que nu na' gudi'i guzxaca', pero para gaca bë' lahuë' Dios le nácaté ruí'i ládx'i'li' netu'. ¹³ ¡Lë ni butipa ládx'i'tu'! Calégasö bidipa ládx'i'tu', pero rudzéjade'e ládx'i'tu' tu' rudzéjabi' bi'i Tito ni'a que le benli' libí'ili', tu' butípali' ládx'i'ibí'.

¹⁴ Bená' libí'ili' zxön lobí' Tito, ate' bití' benli' ga utu'i'ida'. Bë'lentica'stu' libí'ili' didza' idútë li, ate' lëscá' caní naca idútë li didza' bë'lentu'-bi' Tito cate' bentu' libí'ili' bal. ¹⁵ Zeaj rácarö idú ca nadxi'ibí' bi'i Tito libí'ili' cate' röjnebi' ca na' benli' ca rnna xtídzá'tu', en ca na' benli'-bi' bal lu yöl-la' radxi Dios queëli' en lu yöl-la' nöxaj ladxi' queëli'. ¹⁶ Rudzéjade'eda' tu' gaca uzxöni ládx'a a libí'ili' idú ládx'a'a.

¹ Na'a, böchi' luzá'ado', rë'ënitu' quíxjö'iitu' libí'ili' ca naca le buzá' ládxë'ë Dios quégaca yugu' cö' bönachi queë' Cristo luyú Macedonia. ² Sal-la' yenni' gula'guí'i gula'záquië' lu yugu' le guzxi' bë' légaquië', bulu'dzéjade'enë', en idú ládx'i gaquie' bulu'nödzjadë'ë sal-la' nácagaquie' bönachi yechi'. ³ Neda' runa' ba nalí quégagaquie', idú ládx'i gaquie' bulu'nödzjadë'ë tsca gula'zéqui'në', en bulu'nödzjaré' tsca gula'zéqui'në'. ⁴ Gula'nábide'enë' netu', en guláta'yudë'ë lotu' gü'iitu' légaquië' lataj tsözxón len netu' ilácalené' böchi'ru' ta'yéajlë'ë Cristo. ⁵ Gulunré' ca guqui ícјatu' ilunë'. Bulu'dödi cuíngaqüi' zí'älö lu né'e Xanru', enca' lu na'tu' netu', le naca le raza ládxë'ë Dios. ⁶ Que lë ni na' gunábitu'-bi' bi'i Tito údxi gunbi' xichinbi' ga ni' zóali', en utúbibi' dumí runödzjali' lu yöl-la' dxi'i ladxi' queëli', ca na' gusí lobi' benbi' zí'älö. ⁷ Nácali' lo ca naca yúgu'te le runli', ca réajlë'ëli' Cristo, en ca réajni'ili', en ca ruzéajni'ili' bönachi, en ca ru'i ládx'i li' luzá'ali', enca' ca nadxi'ili' netu'. Lësca' caní ral-la' gácali' lo ca gácalenli' luzá'ali', lu yöl-la' dxi'i ladxi' queëli' bi unödzjali' quégagaquie'.

⁸ Biti' rinná bé'eda' libí'ili' gunli' caní. Ruá'a didza' ca tun ia'zíca'rö bönachi, tu'nödzaj idú ládx'i'gaca, para guna' ga gunli' le gaca bë' naca idú ca nadxi'ili' luzá'ali'. ⁹ Nöz quézili' le buzá' ládxë'ë Xanru' Jesucristo queëru'. Bilé'ené' yöl-la' tsahui' pero para gácalené' libí'ili' böáquië' yechi' para gata' queëli' yöl-la' tsahui', tu' gúquië' Lë' yechi'.

¹⁰ Caní runi neda': Dxi'arö gaca queëli' údxi gunli' lë na' gusí loli' runli' chiguca tu iz. Gúcali' lo, calégasö ca bunödzjali', pero lësca' ca gú'unili' unödzjali'. ¹¹ Na'a, idú ládx'i li' buli'siyudxi gunli' lë na' gusí loli' runli', idú ládx'i li' bunödzjali'. Buli'nödzaj na'a tsca séqui'li'. ¹² Channö rë'ënili' bi unödzjali', Dios runë' bal le runödzjali' tsca naca le dësö queëli'. Biti' rinabë' unödzjaröli' tsca le dësö queëli'.

¹³ Biti' rë'ënda' guna' ga unödzjali' le gácalen ia'zíca'rö bönachi ga idxintë yadzaj queëli'. ¹⁴ Rë'ënda' gaca tuz ca dë queëli', en quégagaquie'. Na'a dëda' queëli' le gaca unödzjali' para bi gata' quégaca nupa ni' riyadzaj quéguequi. Ní'irö cate' bi yadzaj queëli', légaquië' huáca bi ulu'nödzjë' queëli' para caní gaca tuz ca dë queëli', en quégagaquie' yúgu'teli'. ¹⁵ Lësca' caní nazúaj lu guichi lá'ayi le rnna: "Nu na' butúbida', biti' bugá'ana que, ate' nu na' butubi láti'do'os, biti' biyadzaj que."

Carunbi' bi'i Tito, enca' nupa dzágagaca lëbi'

¹⁶ ¡Xclené' Dios, tu' benë' Lë' ga rui'i ládx'i bi' bi'i Tito libí'ili', ca na' ru'i ládx'a neda' libí'ili'! ¹⁷ Calégasö runbi' ca rnna xtída'a bi rinábida'-bi', pero tu' ru'i ládx'i' cázabi' libí'ili', rácasö queëbi' gú'unibi' libí'ili'.

¹⁸ Risöl-la'tu'në' tsözxón len lëbí' böchi'ru' na' tun lë' bal yúgu'te cö' bönachi queë' Cristo, tu' runë' dxi'a dxin que didza' dxi'a. ¹⁹ Ia'stú, gula'bö yugu' cö' bönachi queë' Cristo bönni' ni, para tséajlenë' tsözxón netu' guá'atu' lë na' runödzjali', para gaca yöl-la' ba queë' Xanru', en gaca bë' ca' ru'i ládx'i'ru' luzá'aru' ta'yéajlë'ë Cristo. ²⁰ Caní gaca, gunë' netu' tsözxón para cuntu nu

bi gaca innē queētu', ca rúnlentu' dumí na' runödzjada'ali', le gácalen bönachi yechi'. ²¹ Ruf'iládxitu' guntu' le naca dxi'a, calégasö lahuë' Xanru', pero lësca' lögaca bönachi.

²² Risöllat'u'-në' ca' ia'tué' böchiru' tsözxón len légaquie', ate' zián luzuí guzxí' bë'etu' lë', ate' naca bë' rë'ënë' gácalenë' rë'u idú ládxë'ë. Ia'stú, tu' ruzxöni ládxë'ë libí'ili', rë'ënitérönë' ca' gácalenë' rë'u lu dxin ni. ²³ Channö nu bi inaba ca nácabi' bi'i Tito, nácabi' luzá'a, rúnlenbi' neda' tsözxón dxin para gácalentu' libí'ili'. Channö nu bi inaba ca nácagaquie' ia'zíca'rë' böchiru' na', nasöllala'gaca yugu' cö' bönachi quee' Cristo légaquie', ate' tunë' ga gaca yöl-la' ba quee' Cristo. ²⁴ Guli'gún ga gaca bë' nadxi'ili' légaquie' para iléquibe'e yugu' cö' bönachi quee' Cristo runli' caní, en ila'nözi naca idútë li didza' dxi'a ruí'itu' ca naca queéli'.

9

Ca naca dumí rutúbiru' le gácalen yugu' böchiru'

¹ Ca naca le runödzjali' quégaquie' böchiru' ta'yéajlë'ë Cristo, biti' run bayudxi uzúaja' queéli' lu guichi ni. ² Chinözda' ca rë'ënili' gunli' lë ni, ate' ruá'a didza' lógaca bönachi ta'yéajlë' Cristo luyú Macedonia ni ca naca le dxi'a runli'. Riguíxjöida' légaquie' ca naca queéli', zóali' luyú Acaya, chiguca tu iz chizóa gunli' lë ni, ate' tu' ruí'lí ládxilí' gunli' lë ni, bidipa ládxigaca lá'tubiqui' yúgu'të bönachi ni ta'yéajlë' Cristo. ³ Na'a, risöllat'a yugu' böchiru' ni queéli' para gaca bë' naca idútë li didza' ruí'itu' ca naca queéli', ate' naca ca na' chigunnía' queéli', chizóa gunli' lë na' gácalen yugu' luzá'aru'. ⁴ Channö ila'zá'alen bal-la bönachi Macedonia ta'yéajlë' Cristo neda' tsözxón, ate' gaca bë' biti' zuíni gunli' lë na', ní'irö utu'itu' tu' buzxöni ládxitu' libí'ili', ate' libí'ili' cázali' ca' ral-la' utu'ili'. ⁵ Que lë ni na' gúquida' ral-la' isöllat'a yugu' böchiru' ni para ila'dxinë' ga zóali' zí'alö ca neda', ate' ilácalenë' libí'ili' para uwdxí utubili' lë na' guzxí' lu ná'ali' unödzjali'. Caní gaca, údxi utubili' dumí na' zí'alö ca idxina', ate' gaca bë' runödzjali' tu' rë'ëni cázali', en caléga tu' rinná bë'etu' libí'ili' bi unödzjali'.

⁶ Guli'tsöjnë lë na' rnna:

Nu raza ruzúa láti'do'os, láti'do'os ca' uzí'.

Nu raza ruzúa sizzöni, sizzöni ca' uzí'.

⁷ Tu tuli' ral-la' unödzjali' tsca na' chinuzóali' icja ládxido'oli', en caléga lu yöl-la' ruhu'i ini queéli' o tu' run bayudxi, tu' nadxi'inë' Dios nu runödzjali' idú ladxi'. ⁸ Dios gaca gunnadë'ë queéli' ca riquínili' para gata' queéli' yúgu'të lë na' riquínili', ate' ugá'ana queéli' para gaca gácalenli' nu bi riyadzaj que.

⁹ Lësca' caní nazúaj lu guichi lá'ayi le rnna:

Idú ládxë'ë bunödzjë' quégaca bönachi yechi'.

Naca bë'tica'sö yöl-la' dxi'i ladxi' quee'.

¹⁰ Dios, Nu runna queéru' bi gaz uzóaru', enca' bi guí'aj gáguru', gunnë' ca' queéli' bi unödzjali', le naca ca lë na' nu raza ruzúa, en gunë' ca' ga ila'yán le ilápali' le nácagaca yugu' le dxi'a runli'. ¹¹ Dios gunë' ga gáta'da' queéli' yöl-la' tsahui' para gaca unödzjada'ali'. Caní gaca, yugu' le unödzjali', lë na' quisitu' uláz queéli', gun ga ila'nná bönachi zián: "Xclene' Dios." ¹² Lë na' runödzjali' le gácalen yugu' böchiru', calégasö gü'i quégacaquie' le ta'yádzjanë', pero gun ga ila'nnë': "Xclenë' Dios." ¹³ Cate' gunli' caní, ila'gu'ë Dios yöl-la' ba tu' gaca bë' runli' ca rnna didza' dxi'a quee' Cristo ca na' rnna'li' runli'. Ila'gu'ë Lë' yöl-la' ba ca', tu' nácali' dxi'i ladxi', runödzjali' quégacaquie', enca'

quégaca ia'zíca'rō böñachi. ¹⁴ Ulu'lidzé' Dios, en ila'nábinë' Lë' gácalenë' libí'ilí' tu' nadxi'iguequinë' libí'ilí' ni'a que le buzá' ládxí'dë'ë Dios queëli'. ¹⁵ ¡Xclenë' Dios, bennë' tu le nácadá' lesaca' queëli'!

10

Yöl-la' unná bë' dë lu në'ë Pablo

¹ Ta'nná böñachi naca' nöxaj ladxi' cate' zóalena' libí'ilí', pero cate' zoa' zi'tu' ga zóali' naca' rugu ladxi' ca ruzúaja' lu guichi. Tu' náquië' nöxaj ladxi', en dxi'i ladxi' Cristo, neda', Pablo, ráta'yua' lolí ² cabí gunli' ga gun bayudxi gaca' rugu ladxi' len libí'ilí' cate' idxina' ga zóali'. Chizóa gaca' rugu ladxi' len nupa ni' ta'nná runtu' dxin ni lu yöl-la' böñachisö queëtu'. ³ Le nácatë nácatu' böñachi, pero calëga rácasö queëtu' runtu' xichinë' Dios. ⁴ Yugu' le rudi'initu' lu gudil-la, bití' nácgaca ca le tu'dí'ini böñachi yödölió ni lu gudil-la, pero yugu' le rudi'initu' lu gudil-la nápagaca yöl-la' huáca queë' Dios, le ruguntu' dxin para usunítitu' le nál-lagaca que tu' xihui'.

⁵ Rusinítitu' yugu' didza' bití' nácaté le tu'zxöni ládxí'gaca böñachi, en yúgu'të le tun ga tun ba zxöni cuínguequi, en le tun ga cabí ilunbë' Dios. Runtu' ga gaca ila'nná bë'enë' yúgu'të le ta'zá' ládxí'gaquië', lë na' tun ga ta'dá'baguë'ë Dios, ate' runtu' ca' ga tunë' ca rnñe' Cristo. ⁶ Tödi gunli' le gaca bë' naca idú ca runli' ca rnna xtídzë'ë Cristo, sóatu' sina' guntu' xigüia' yúgu'të nupa ni' ta'dá'baga' xtídzë'ë.

⁷ Ruyuli' le nalá' láhuisö. Channö réquinë' nu bönni' dzáguië' libí'ilí' néquinë' queë' Cristo, ral-la' guéquibe'enë' ca' lë ni: Ca na' lë' néquinë' queë' Cristo, lësca' caní netu' néquitu' queë' Cristo. ⁸ Bití' ca' rutui'ida' sal-la' gudödi bë' ben ba zxöni cuina' ca naca yöl-la' unná bë' budödë' Xanru' lu na'tu'. Lë na' dë lu na'tu' naca para guntu' ga gácarö idú ca réajlé'ëli' Cristo, en calëga para usunítitu' libí'ilí'. ⁹ Bití' rë'ënda' guéquili' rë'ënda' gun gádxida' libí'ilí' ni'a que le ruzúaja' queëli' lu guichi ni. ¹⁰ Nacuá' ni' nupa ila'nná: "Yugu' le ruzúajë' Pablo queëru' lu guichi, rulidza zi'ë rë'u, en ralë' didza', pero cate' zóalenë' rë'u runë' nöxaj ladxi', en didza' gúlado' ru'ë." ¹¹ Nu na' rui'i caní didza' rala' guéquibe'e lë ni: Ca na' nácatu' cate' bi ruzúajtu' queëli' lu guichi tsanni ni zóatu' zi'tu' ga zóali', gácatu' ca' lu le guntu' cate' ni' sóalentu' libí'ilí'.

¹² Le nácatë bití' nácatu' rugu ladxi' para innatu' nácatu' lëbi ca nácgaca nupa ni' tun ba zxöni cuínguequi. Nácgaca nupa ni' yugu' bönni' bití' bi nözguequinë'. Lu le ta'za'sö ládxí'gaquië' tu'zóé' ca ral-la' ilaca böñachi, en tu'chi'a tu'söröë' la' légacasë' tsca naca lë na' ta'za'sö ládxí'gaquië'. ¹³ Netu' bití' gunrö ba zxöni cuintu' ca ral-la' guntu', pero ca nácatë dxin budödë' Dios lu na'tu', ate' lu dxin ni, ral-la' guntu' le ga ni' zóali' libí'ilí'. ¹⁴ Channö budödë' Dios lu na'tu' dxin guntu' ga zóali', bití' ca' gudödi bë'ëtu' ca bentu' cate' bidxitu' ga zóali', en bentu' libán que didza' dxí'a ga na' zóali'. ¹⁵ Bití' run ba zxöni cuintu' ca naca dxin núngaca ia'zíca'rō böñachi, pero ca nácasö dxin na' budödë' Dios lu na'tu'. Runtu' löza gácarö idú ca réajlé'ëli' Cristo para gaca guntu' dxin ga zóali' le nácarö lesaca', tsca naca le budödë' Dios lu na'tu' guntu'. ¹⁶ Ní'irö gaca guntu' libán que didza' dxí'a ga nacuá' yödö dzö'ö zi'tu'rö ga zóali'. Caní gaca, bití' gun bayudxi gun ba zxöni cuintu' ni'a que dxin núngaca ia'zíca'rō böñachi, lë na' budödë' Dios lu në'eguequi.

¹⁷ Nazuaj lu guichi lá'ayi le rnna:

Nu rë'ëni bi gun zxöni,
le ben cazë' Xanru' ral-la' gun zxöni.

¹⁸ Nurúajé' dxi'a tu bönni' cate' rnné' Xanru' nurúajé' dxi'a, en caléga cate' ru'ë caní didza' bönni' na' que la' cuinsé'.

11

Ca nácagaquië' Pablo, en bönni' tun cuíngaqüië' gubáz queë' Cristo

¹ Rë'ënda' guá' ilenli' neda' tsanni ni gu'a didza' lu yöl-la' biti' bi nözi quia'. Bulisá' ládxili' quia'. ² Ru'i ládxia' libíili' ca na' Dios caz ru'i ládxë'ë libíili', tu' nácali' ca nácabí' tubí' bi'i nigula ra'bando', naca idú ládxibí', rusudxina' bi' lahuë' Cristo para utsaga ná'aleni' Lé cazë'. ³ Rádxida' idxín queëli' nu si' ye'e libíili', en gun ga usanli' ca nadxi'ili'-në' Cristo idú ládxili', ca na' guca queénu Eva, nigula queë' Adán, cate' guzxí' ye'e Satanás tu' xihui' lënu lu yöl-la' sina' que. ⁴ Caní rnnía' tu' idú ládxili' ru'iili' nu za' queëli' lataj, en run libán que xibá queë' Jesús, le nadzá' ca naca xibá na' bentu' netu' libán que, ate' rizi' lu ná'ali' tu bö', en tu didza' dxi'a le nadzá'gaca ca nácagaca Bó' Lá'ayi na', en didza' dxi'a na' guzxí' lu ná'ali' lu na'tu' netu'. ⁵ Réquida' biti' nácará' cuídísö ca nácagaquië' bönni' ní' nácatérögaquië' lo, ate' réquil' nácagaquië' gubáz queë' Cristo. ⁶ Nadxi ca' naca' cuídísö ca ruá'a didza', pero biti' naca' cuídísö ca naca yöl-la' réajni'i napa'. Zián luzuí, en zián ca bului'itu' libíili' ca naca yöl-la' réajni'i nápatu'.

⁷ Nadxi ca' biti' naca dxi'a tu le bena', biti' bi buquizxa' libíili' cate' bera' libán ga zóali' que didza' dxi'a. Ben cuina' cá'asö, ate' bera' ga gúcali' libíili' zxön. ⁸ Buguna' dxin le nequi quéguequi ia'zíca'rö cö' böñachi queë' Cristo, tu' guzxí' a dumí bulu'nödzje' légaquië' quia' para guca bera' dxin ga zóali' libíili'. ⁹ Cate' guzóalena' libíili', en biyadzaj quia', biti' busaca' zi'a nituli' libíili', pero lë na' biyadzaj quia', gulunne' quia' böchí'ru' bila'rúajé' luyú Macedonia, en bila'dxiné' ga zoa'. Catu caz busaca' zi'a libíili', ate' la' lëbisö ca guna'. ¹⁰ Ni'a que le naca idúte li queë' Cristo le zóalan neda', biti' soa' dxisö, gun ba zxön cuina' ca naca lë ni idú luyú Acaya. ¹¹ ¿Naru' réquitsel' rnnía' caní tu' cabí nadxi'ida' libíili'? Nöziné' Dios nadxi'ida' libíili'.

¹² Gúntica'sa' ca runa' na'a, para cabí gata' quégaequië' lataj ilún ba zxön cuíngaqüië' bönni' ní' ta'nnasë' nácagaquië' gubáz queë' Cristo, en ta'nné' tuné' xichiné' Lé' ca runtu' netu'. ¹³ Biti' ca' nácagaquië' gubáz nasö'l-lë'ë Cristo. Ta'zí' yë'ë ca naca dxin tuné', en tun cuíngacasë' gubáz queë' Cristo. ¹⁴ Biti' ral-la' ubániru' ca tuné' bönni' na'. Lësca' Satanás caz, tu' xihui', rulu'i cuini ca tu gubáz lá'ayi queë' Dios, ridé' lu bení'. ¹⁵ Que lë ni na' biti' ral-la' ubániru' channö yugu' huen dxin que tu' xihui' na' tu'lui' cuíngaqüië' ca nupa tun xichini Nu na' naca tsahui'. Uwdxí quégaequië' ca sa'yéaj le tuné'.

Yugu' le gudi'i guzxáquë'ë Pablo

¹⁶ Leyúbölö rea' libíili': Cuntu nu ral-la' guequi nachixi icja'. Channö réquili' nachixi icja', guli'güi' neda' lataj gu'a didza' ca tu bönni' nachixi icjë', para gun ba zxön cuina' tu chí'ido'. ¹⁷ Didza' ni ruá'a biti' naca le rinná bë'ë Xanru', pero ruá'a didza' ca tu bönni' nachixi icjë', run ba zxön cuina'. ¹⁸ Nacu'ë zián bönni' tun ba zxön cuíngaqüië' ca nácagaca le tuné' lu yöl-la' böñachiö quégaequië'. Que lë ni na', neda' ca' gun ba zxön cuina'. ¹⁹ Tu' réquili' rácada'ali', idú ládxili' ru'iili' lataj ilu'ë didza' yugu' bönni' nachixi icjagaequië'. ²⁰ Ru'iili' ca' lataj nu gun libíili' bönni' nadö'ogaca, o nu cúa le dë queëli', o nu inná be'e libíili', o nu ucá'ana libíili' cá'asö, o nu capa' rú'ali'. ²¹ Rutu'ida' rnnía' lë ni: Biti' bentu' caní queëli' tu' gudödi bë' gúcatu' nöxaj ladxi'.

Channö zoa nu naca rugu ladxi' para gun ba zxön cuini, neda' ca' gaca' rugu ladxi', en gu'a didza' ca tu bönni' nachixi icjë'.

²² ¿Naru' nácagaquië' bönni' hebreo?

Lësca' naca' neda'.

¿Naru' nácagaquië' bönni' Israel?

Lësca' naca' neda'.

¿Naru' nácagaquië' zxí'ini xi'sóë' Abraham?

Lësca' naca' neda'.

²³ ¿Naru' nácagaquië' huen dxin queë' Cristo?

Lësca' nácatéra' neda'.

(Na'a ruá'a didza' ca tu bönni' nachixi icjë' cate' rnnia' caní.)

Béntéra' dxin ca gulunë' légaquië'.

Guyu'a lidxi guíë ziánrö luzuí ca gula'yú'ë légaquië'.

Gula'zé'eda' neda' yu bönnachi ziánrö luzuí ca guca quégaquië'.

Guzóa bönnadxi gátia' ziánrö luzuí ca guzúa quégaquië'.

²⁴ Gayu' luzuí yugu' bönni' judío gula'guínë' neda' guídi.

Tu tu luzuí na' gula'guínë' neda' chënnna uruá' luzuí.

²⁵ Tsonna luzuí gula'guínë' neda' gubá'ayi.

Tu luzuí bulu'ladxe' neda' guiøj.

Tsonna luzuí guzúa' tu lë'e barco le guca ditaj, en böta lu nísado'.

Tu luzuí guzúa' idú tu yëla, en tu dza lu nisa que nísado'.

²⁶ Zián luzuí cate' ni' yu'a nöza,

gudöda' gapa guzúa bönnadxi quia' yugu' lu yegu,

en gapa guzúa bönnadxi quia' lu ná'agaquië' gubán,

en gapa guzúa bönnadxi quia' lu ná'agaquië' bönni' uládz quia',

en gapa guzúa bönnadxi quia' lu ná'agaquië' bönni' zi'tu',

en gapa guzúa bönnadxi quia' lu yödzö,

en gapa guzúa bönnadxi quia' lu lataj cá'asö,

en gapa guzúa bönnadxi quia' lu nísado',

en gapa guzúa bönnadxi quia' lu ná'agaquië' bönni' ta'zí' yë'ë, ta'nnë' nácagaquië' böchi'ru' ta'yéajlé'ë Cristo.

²⁷ Bena' dxin zí'i, en gudú ládex'a.

Zián luzuí biti' guta' quia' lataj gásia'.

Guduna', en gubidxa' nisa.

Zián luzuí biti' guta' quia' bi gahua', o ga utsë'e cuina', o lari' gácua'.

²⁸ Ia'stú, yúgu'té dza ruúbi rugu'ida' tu' ruí'ida' ládex'a yúgu'té cö' bönnachi queë' Cristo. ²⁹ Cate' nu ricuidi', neda' ca' ricuídida'. Cate' nu run ga ichixi iníguinë' tu böchi'ru', rileda' nu run caní. ³⁰ Channö run bayudxi gun ba zxön cuina', gun ba zxön cuina' ca naca le nácagaca bë' ricuídida'. ³¹ ¡Dios, Xuzë' Xanru' Jesucristo, gácatica'sö queë' yöl-la' ba! ¡lë' nözinë' ruá'a didza' idútë li!

³² Cate' ni' guzúa' lu yödzö Damasco, bönni' ni' guta' lu në'ë uláz queë' bönni' rinná bë'ë, lë' Aretas, bucu'ë yugu' bönni' gula'bö' nísië' para ila'zönë' neda', ³³ pero yugu' böchi'ru' ni' bulu'dödë' neda' tu ga ra'a bení' que yu'u, yu'a tu ga'böra zxön, en bulu'zötje' neda' ní'ilö lu zö'ö run chi'i yödzö na'. Caní guca, bulá' lu ná'agaquië' bönni' ni' gula'bö' nísië' neda'.

¹ Le nácaté biti' ral-la' gun ba zxön cuina'. Sal-la' caní naca, na'a gu'a didza' ca nácgacá le buluí'në' Xanru' neda', en le buzéajni'inë' neda'. ² Núnbë'a-në' tu bönni' réajlë'ë Cristo, chiguca chidá' iz zoa nu guché' lë' yehua' yubá. Biti' nözda' channö guyijé' ni' lu idútë le naca cazé', o lu bö' naca cazé'. Tuze' Dios nözinë'. ³ Nözda' guyázi' lataj lachi queë' Dios, nazi'i le paraíso. Biti' nözda' channö guyijé' ni' lu idútë le naca cazé', o cabí. Tuzé' Dios nözinë'. ⁴ Tsanni ni' zoë' ga na', biyönnë' le tun ga nu rubani, yugu' le biti' dë lataj nu gü'i didza' que. ⁵ Bönni' ni huáca guna' lë' zxön, pero biti' gun ba zxön cuina'. Tuz gun ba zxön cuina' tu' ricuídida'. ⁶ La'tu' gué'enida' gun ba zxön cuina', biti' gaca' bönni' biti' bi nözinë', channö innia' le naca idútë li. Na'a, biti' gun ba zxön cuina' tu' cabí rë'ënda' nu gunrö neda' bal tsca le bilé'e bena' neda', o tsca naca didza' biyöni' bë'a neda'.

⁷ Ni'irö, para cabí tödi bë' gun ba zxön cuina' tu' bilé'eda' lë' na' tun ga nu rubani, Dios buzöö' tu huë' lu xipéla'a le riláda' ca rilá ga rinë' tu yötsi'. Huë' na' guca ca tu le bugún dxin tu' xihui', para busaca' zi' neda'. Caní guca quia' para cabí tödi bë' gun ba zxön cuina'. ⁸ Tsonna luzuí gúta'yua' lahuë' Xanru', en gunábida' Lë' ugúe' xihuë'a na'. ⁹ Xanru' gudxë' neda': "Nácaté quiu' le ruzá' ládex'a a quiu'. Uzítérü' xibé le ruzá' ládex'a a quiu' cate' ricuídnu'." Que lë ni na', rudzéjade'eda' tu' ricuídida'. Tu' raca caní quia', rácalentérö yöl-la' huáca queë' Cristo neda'. ¹⁰ Que lë ni na', tu' nadxi'ida'-në' Cristo, rudzéjada' cate' ricuídida', en cate' nu rulidza neda' zi', en cate' bi riyadzaj quia', en cate' nu ribía ladxi' neda', en cate' bi raca quia'. Cate' nacuidida', nápatérö caza' yöl-la' huáca queë' Lë'.

Pablo ruí'l ládxë'ë böñachi queë' Cristo nacuá' Corinto

¹¹ Naca' tu bönni' biti' bi nözinë' tu' bë'a didza' ca naca le dxi'a bena' neda'. Libí'i cázali' benli' bayudxi bena' caní. Libí'ilí' ral-la' gunli' neda' bal, ate' sal-la' biti' bi naca' neda', biti' ca' nácará' cuidi' ca nácgacáquie' bönni' ni' nácdagaquie' lo, ta'nnë' nácgacáquie' gubáz queë' Cristo. ¹² Yugu' le bena' lu yöl-la' ribözä zxön ladxi' quia' ga ni' zóali' nácgacá bë' naca' gubáz queë' Cristo. Bile'eli' yugu' le bena', le nácgacá bë', en le tun ga nu rubani, en yugu' yöl-la' huáca zxön que yehua' yubá. ¹³ Tuz le cabí bena' ga zóali' le bena' ga nacuá' ia'zíca'rö cö' böñachi queë' Cristo. Biti' busaca' zi'a libí'ilí' bi gúnnali' le guí'aj gahua'. Buli'nti lo neda' tu' cabí bena' caní queëli'.

¹⁴ Chizóa guída' ga zóali' le bunni luzuí. Biti' bi inaba' gúnnali' quia'. Rë'ënda' gunna cuin cázali' quia', en caléga bi dë queëli'. Yugu' bi'i hué'enido', biti' run bayudxi ulu'gágubi' xuz xiná'agacabi'. Xuz xiná'agacabi' na' ral-la' ulu'gahuë' zxi'iniqaquie'. ¹⁵ Idú ládex'a a utóa' yúgu'të le dë quia', en udödi cuina' ni'a queëli' para gaca bi uzí'ilí' xibé, sal-la' réquida' cate' nadxi'iröda' libí'ilí', zeaj ruhuéchi' yöl-la' nadxi'i queëli' neda'.

¹⁶ Nöz quézili' biti' busaca' zi'a libí'ilí'. Na'a, bál-lali' innali' guca' sina', ate' len didza' biti' nácaté buzí'a xibali'. ¹⁷ ¿Naru' réquitseli' guzxi' yé'eda' libí'ilí' cate' gusöl-la'a yugu' gubáz quia' ga zóali'? ¹⁸ Gúta'yua' lobí' bi'i Tito tséajbi' ga zóali', ate' gusöl-la'a-në' böchi'ru' na' tsözxön len lëbi'. ¿Naru' réquitseli' buzí'ilí' xibali' bi'i Tito? ¿Naru' cabí bentu' la' lëbisö ca runtu' bi'i Tito, en neda', enca' la' lëbisö didza' bë'etu'?

¹⁹ ¿Naru' réquitseli' rubéaj cuintu' dxi'a lolí' libí'ilí? Lahuë' Dios ruí'itu' didza' uláz queë' Cristo, böchi' luzá'ado', ate' yúgu'të le runtu' nácgacá para gácarö idú yöl-la' réajlë' queëli' Cristo. ²⁰ Ráxdida' biti' gácali' ca rë'ënda' gácali'

cate' guída' ga zóali', ate' neda' biti' gaca' ca rë'ënili' libí'ili' gaca'. Ráxdida' ridilla dídza'li', en ruzxé'eli' luzá'ali', en rileli' luzá'ali', en rulidza dítjali' luzá'ali', en rnnéli' que luza'ali', en run ba zxön cuinli', en rutsásali'. ²¹ Cate' guída' ga zóali', channö caní raca queéli', ráxdida' gunë' Dios ga utu'iда' ca naca queéli', ate' gun bayudxi cödxa' ni'a quégaca zián nupa ni' gulún dul-la', en biti' bulu'bí'i ládxí'gaca ca nácagaca le cabí naca tsahui' gulúngaca, en yugu' le gula'zé ládxí'guequi le cabí naca dxi'a.

13

Pablo ruzéajni'iné' bönachi Corinto, en rugapé' Dios légaquië'

¹ Le bunni luzuú ni guída' ga zóali'. Nazuaj lu guichi lá'ayi le rnna: "Run bayudxi ila'cuá chopatsonna nupa ilún ba nalí channö nu bi uzegui luzé'e didza'". ² Chibuzéajni'ida' nupa gulún dul-la' cate' ni' guzóalena' libí'ili' le buropi luzuú, ate' na'a ruzéajni'ida' légaquië' leyúbölö, enca' yúgu'té nupa tun dul-la', sal-la' ni zoa' zi'tu', rnnia': Channö guída' ga zóali' leyúbölö biti' gaca' nöxaj ladxi' para til-la' légaquië'. ³ Rinábalí' tule gaca bë' ruá'a didza' uláz queë' Cristo. Lë na' guna' gaca bë' ruá'a caní didza'. Biti' ca' ricuídi'në' Cristo cate' bi runé' queéli', pero lu yöl-la' huáca zxön queë' runé' bi runé' queéli'. ⁴ Le nácatë gudé'ë lë'e yaga cruz ca nu ricuidi', pero zoë' nabanë' tu' zóalan yöl-la' huáca queë' Dios Lë'. Netu' ca' ricuídi'tu' tsózxón len Lë', pero tu' nácatu' tuz len Lë' nabantu', ate' zóalen netu' yöl-la' huáca queë' Dios bi guntu' ga ni' zóali'.

⁵ Buli'yú cuinli' channö réajlé'eli' Cristo o cabí. Guli'sí' bë' la' cuínsili'. ¿Naru' cabí nözili' zóalenë' Jesucristo libí'ili' channö le nácatë réajlé'eli' Lë? ⁶ Runtu' löza chinöz quézili' le nácatë netu' réajlé'etu' Cristo. ⁷ Rulídzatu'-në' Dios rinábitu'-në' gácalenë' libí'ili', para cabí guá'ali' dö', caléga para urúajtu' dxi'a netu', pero para gunli' libí'ili' le naca tsahui' sal-la' guéquili' richixi riníguitu' netu'. ⁸ Biti' ca' gaca tá'baga'tu' le naca idútë li, pero gácasö guntu' ca sa'yéaj le naca idútë li. ⁹ Que lë ni na' rudzéjatu' cate' ricuídi'tu', ate' libí'ili' ridipa ládxí'li'. Rulídzatica'stu'-në' Dios, rinábitu'-në' gunë' ga gaca idú ca réajlé'eli' Cristo. ¹⁰ Que lë ni na' ruzúaja' queéli' lu guichi lë ni tsanni ni zoa' zi'tu' ga zóali'. Ní'irö cate' guída' ga zóali' biti' gun bayudxi usaca' zi'a libí'ili', pero uguna' dxin yöl-la' unná bë' nudödë' Xanru' lu na'a, le naca para utipa' ládxí'li', en caléga para usunítia' libí'ili'.

¹¹ Na'a, böchi' luzá'ado', dipa ládxí'li'.
Guli'güí' ládxí'li' gaca idú ca réajlé'eli' Cristo.

Guli'güí' ládxí'li' ca' lë ni rea' libí'ili'.
Guli'gaca tuz len luzá'ali', en guli'cöza dxí'ado'.
Rinábida'-në' Dios sóalenë' libí'ili'.
Lë' nadxi'iné' rë'u, en rune' ga ribözaru' dxí'ado'.

¹² Guli'gapa Dios luzá'ali', tuli' ia'tuli', en unída'li' luzá'ali'. ¹³ Yúgu'té böchi' luzá'aru' ni tu'gape' Dios libí'ili'.

¹⁴ Rinábida'-në' Dios gunë' ga gata' queéli' yúgu'téli' le ruzá' ládxé'ë Xanru' Jesucristo queéru', en idxí'iné' ca' libí'ili', en gunë' ga gácali' tuz len Dios Bö' Lá'ayi. ¡Ca' gaca!

DIDZA' GUSÖL-LË'Ë PABLO LUYÚ GALACIA

Ruzúajë' Pablo quégaca böñachi luyú Galacia

1 Neda', Pablo, naca' gubáz queé' Cristo. Biti' gula'söl-la' böñachi neda'. Jesucristo caz gusöl-lë'ë neda', en nunë' Xúziru' Dios tu zxön Lë'. Lë' busubanë' Jesús lu yöl-la' guti. **2** Ruzúaja' queéli' lu guichi ni, libí'ili, yugu' cö' böñachi tu'dubi queé' Cristo luyú Galacia. Núngaquië' yugu' böchi'ru' ni tu zxön neda'. **3** Rinábida' Xúziru' Dios, enca' Xanru' Jesucristo uzá' ládxë'ë queéli', en gunë' ga soa dxi icja ládx'i'do'oli'. **4** Jesucristo caz budöi cuinë' lu yöl-la' guti tu' nözi dul-la' nabág'a'ru' para busölë' rë'u lu le naxihui' raca dza ni zóaru' na'a. Benë' caní tu' naca ca rë'ëni quézinë' Xúziru' Dios. **5** ¡Gácatica'sö queé' Dios yöl-la' ba! ¡Ca' caz!

Tuz naca le rinnë dxi'a queé' Jesucristo

6 Rubánide'eda' ca runli', rucá'anatéli' Dios. Lë' bulidzë' libí'ili' para guéquili' queé' tu' nözi le ruzá' ládxë'ë Jesucristo queéru', ate' na'a rë'ënil'i si' ladxi' na'ali' tu le rinnë dxi'a izá'a. **7** Le nácaté biti' ca' zoa ia'tu le rinnë dxi'a pero ruá' a caní didza' tu' nacu'ë bönni' tu'tsë'ë libí'ili', en té'ëñ' ulu'tsë'ë le rinnë dxi'a queé' Cristo. **8** Channö zoa nu gun ba nalí que tu le rinnë dxi'a le cabí naca tuz ca naca lë' na' bentu' ba nalí que loli' libí'ili', rinábida'-në' Dios udxíë' dö' nu na' run caní. Ral-la' udxíë' neda' dö' channö guna' caní, en channö gunë' caní tu gubáz queé' Dios zë'ë yehua' yubá, Dios caz udxíë' ca' lë' dö'. **9** Chigunná caza' caní zí'alo, ate' na'a rrnña' caní leyúbölö: Channö zoa nu gun ba nalí que tu le rinnë dxi'a le cabí naca tuz ca naca lë' na' chiguzxi' ladxi' na'ali', rinábida'-në' Dios udxíë' dö' nu na'.

10 ¿Réquitseli' rë'ënda' cù'uli' neda' yöl-la' zxön cate' ru'a caní didza'? ¡Biti' ca'! Rë'ënda' urúaja' tsahui' lahuë' Dios. ¿Réquili' rë'ënda' uzaca' baládx'i'lengaca böñachi neda'? La'tu' rë'ënda' uzaca' baládx'i'lengaca böñachi neda', biti' gaca' huen dxin queé' Cristo.

Naca böñquië' Pablo bönni' gubáz queé' Cristo

11 Ral-la' inözilli' lë ni, böchi' zána'do'. Le rinnë dxi'a na' runa' ba nalí que biti' gulén icja lo ládx'i'da'ahuiguequi böñachi. **12** Cuntu nu bönni' budödë' lu na'a le rinnë dxi'a na', en caléga nu bönni' busédinë' neda' le. Jesucristo caz buzéajni'inë' neda' ca naca le rinnë dxi'a queé'. **13** Chibiyón quézili' ca na' ben caza' neda' zí'atélö cate' ni' nazí' lu na'a ca tequi le bach Dios bönni' judío. Nözili' ca bena', yenni' gudxía nahua' böñachi queé' Dios ta'yija ladxi' Cristo, en gó'unda' usulu usunítia' léguequi. **14** Lu le tequi le bach Dios bönni' judío, guyépisétéra' neda' ca lá'tu biquí' yúgu'të luzá' a bönni' judío yú'ugaquië' iz ca yu'a neda', tu' guzxi'rö ladxi' na'a ca léguequi le bulu'dödë' xuz xtó'oru' loru' ca tun caze'. **15** Caní bena' neda', pero tu' náquië' dxi'i ladxi' Dios, gurö caza' neda' zí'atélö ca gulja', ate' bulidzë' neda' para guna' xichinë'. **16** Ní'irö, cate' gü'uni quézinë' Dios, benë' ga núnbë' a-në' zxí' inë', en gusöl-lë'ë neda' tsöjena' libán que le rinnë dxi'a ca naca queé' Lë' lögaca böñachi izá'a. Cate' benë' caní, biti' yödilja' nu naca böñachi nu usedi neda'. **17** Cabí guyija' yödzö Jerusalén para tsöyúa' nupa ni' nácacaca bönni' gubáz queé' Cristo zí'alo ca neda', pero guyija' luyú Arabia, ate' gudödi ni' böja' yödzö Damasco.

¹⁸ Caní guca, chigudödi tsonna iz cate' ni' guyija' yödzö Jerusalén, yoyúa'-në' Pedro, ate' bugá' analena' lë' idú ca chidá' gubidza. ¹⁹ Tsanni ni' zoa' ni' biti' ca' bilé'eda' ia'turë' bönni' gubáz queë' Cristo, pero tuzë' Jacobo, bönni' böhchë'ë Xanru' bilé'eda'. ²⁰ Didza' ni ruzúaja' queë'lí lu guichi nácatë. Ni'a queë' Dios biti' ca' rizí' yë'a.

²¹ Gudödi ni' guyija', gudöda' yugu' yödz luyú Siria, en luyú Cilicia. ²² Yugu' dza ni' biti' núnbe'gaquië' neda' böchi'ru' tu'dubë' queë' Cristo gapa naca luyú Judea. ²³ Gula nözisinë' lë na' gúla'guixjö' quia' ia'zíca'rö böñachi, gula'nná: "Bönni' na' gudxía nahuë' rë'u zí'alo, runë' libán na'a que le reja ládxí'ru', lë na' gú'unë' usulu usunítië." ²⁴ Caní guca, gula'gu'ë yöl-la' ba Dios tu' nözda' neda'.

2

Bönni' gubáz queë' Cristo guzxí' lu ná'agaquië' Pablo

¹ Cate' chigudödi chidá' iz, guyéajlena' Bernabé, en budxina' yödzö Jerusalén. Guchë'a-bí' Tito, dzágabi' neda'. ² Guyija' ni', en bë'lena' didza' tsölá'alö bönni' ni' yu'u lu ná'agaquië' dxin queë' Cristo, ate' gudíxjö'ida' légaquië' ca naca libán runa' que le rinnë dxí'a lógaca böñachi izá'a. Caní bena' tu' gú'unda' cabí ugá'ana nítisö dxin na' chibena', enca' dxin ni runa' na'a.

³ Sal-la' nácabí' Tito, bi'i luzá'a, bi'i griego, biti' gulunë' bönni' ni ga irugu lu xpéla'bi' lë na' naca bë' böñachi queë' Dios ca tun cazë' bönni' judío. ⁴ Le nácatë gula'cuá' bal-la böñachi ni', nupa ni' ta'zí' yë', ta'ná nácagaca böchi'ru', ate' gulé'ëni ilún ga irugu lu xpéla'bi' Tito lë na' naca bë'. Yugu' bönni' ni núnngäquië' tu zxöñ rë'u pero tu'yusë' ca runru' para iléquibe'enë' ca nuláru' lu yöl-la' unná bë' que le rinná bë' xibá queë' Moisés tu' nácaru' tuz len Jesucristo. Gulé'ëne' ilunë' ga huöácaru' leyúbölö huen dxin tsaz lu xibá na'. ⁵ Biti' ca' bë'tu' légaquië' lataj. Caní bentu' para gun chí'itu' le nácatë que le rinnë dxí'a para gaca uzí'ilí' xibé le rinnë dxí'a na'.

⁶ Yugu' bönni' ni' réquiru' yu'u lu ná'agaquië' dxin queë' Cristo biti' bi gula'nná be'e neda' le naca cubi, pero biti' ruí'ládx'a' ca nácagaquië'. Dios biti' ruchi'a rusörö' rë'u ca tu'chi'a tu'sörö böñachi rë'u. ⁷ Biti' bi gula'nná be'e neda' tu' guléquibe'enë' Dios nudödë' lu na'a dxin queë', para tsöjena' libán que le rinnë dxí'a lógaca böñachi izá'a, ca na' nudödë' lu në'ë Pedro dxin queë', para gunë' libán que le rinnë dxí'a lógaca böñachi judío. ⁸ Len yöl-la' huáca queë', Dios benë' neda' bönni' gubáz queë' para usédida' böñachi izá'a, ca na' benë' Pedro bönni' gubáz queë' para usédine' böñachi judío.

⁹ Jacobo, en Pedro, en Juan, bönni' ni' réquiru' yu'u lu na'agaquië' dxin queë' Cristo, guléquibe'enë' Dios nudödë' lu na'a dxin ni. Que lë ni na' guzxí' ladxi' ná'agaquië' neda', enca' Bernabé, ate' bentu' tuz didza' tsöjentu' xichinë' Dios lógaca böñachi izá'a neda', en Bernabé, ate' légaquië' ilunë' xichinë' Dios lógaca böñachi judío. ¹⁰ Gulá'ta'yusë' lotu' tsönetu' gácalentu' böñachi yechí', ate' lë ni naca tu le ruí'itica'sö ládx'a' runa'.

Ca guca cate' Pablo gudíl-lalenë' Pedro lu yödzö Antiquía

¹¹ Cate' bidxinë' Pedro lu yödzö Antioquía, gudíl-lalena' lë' didza' tu' lë cazë' guchixinë' ca benë'. ¹² Caní guca tu' zí'atélo gudágulenë' tsözxöñ yugu' böñachi izá'a ni'. Benë' caní ga bila'dxinrë' bal-la bönni' dá'gaquië' Jacobo. Ní'irö gusí lahuë' rubígië', en bíti'rö gudágulenë' tsözxöñ böñachi izá'a na' tu' gúdxinë' bi ilunë' bönni' na' nazí' lu ná'agaquië' ilunë' ga irugu lu xpéla'gaca böñachi izá'a

ca rinná bë' xibá queë' Moisés. ¹³ Ní'irö ia'zíca'rë'bönni' judío ni' ta'yija ládxë'ë Cristo gulunë' tu zxön Pedro ca runë' lu yöl-la' radxi queë', ate' caní guca ga bidxintë gulunë' ga gúdxinë' ca' Bernabé, ate' lë' benë' tu zxön légaquïë'. ¹⁴ Cate' bilé'eda' biti' tunë' ca naca le nácatë le rusedi rë'u le rinné dxi'a, gudxa'-në' Pedro lógaca yúgu'të nupa ni' nudúbigaca queë' Cristo, gunnía': "Li' nacu' bönni' judío, pero runu' li' ca túngaca böñachi izá'a, en caléga ca tunë' bönni' judío. ¿Bizz queë' rë'ënu' gunu' ga ilúngaca böñachi izá'a ca tunë' bönni' judío?"

Nulágaca böñachi judío ca na' nulágaca ca' böñachi izá'a

¹⁵ Gudxa' ca' Pedro: "Rë'u ni nácaru' bönni' judío tu' nácagaquïë' xuz xiná'aru' judío, en caléga böñachi izá'a, nupa cabí núnbë'gaca Dios. ¹⁶ Nöz quéziru' cuntu nu huöáca tsahui' lahuë' Dios tu' run nu na' tsca rinná bë' xibá queë' Moisés, pero huöáca tsahui' tuzi nu na' reja ladxi' Jesucristo. Lës caní ca' rë'u reja ládx'i'ru' Jesucristo para huöácaru' tsahui' lahuë' Dios, en caléga tu'runru' tsca rinná bë' xibá queë' Moisés. Cuntu caz nu huöáca tsahui' lahuë' Dios tu' run tsca rinná bë' xibá queë' Moisés.

¹⁷ 'Na'a, réquiru' nahuöácaru' tsahui' tu' reja ládx'i'ru' Cristo, pero channö naca bë' nácaru' bönni' dul-la' ca náccagaca böñachi izá'a, ¿innátsaru' runë' Cristo ga runru' dul-la'? ¡Biti' caz! ¹⁸ Channö ruí'i ládex'a' uchisa' le chibuquinja', lë ni naca bë' riguitsja' xibá le gunná bë'ë Dios. ¹⁹ Tu' cabí guca uzó'a didza' xibá na' gunná bë'ë Moisés, guca quia' tsca chinátia'. Tu' caní naca, nulá' na'a lu xibá na' para soa' ibana', en guna' ca rë'ëñë' Dios. ²⁰ Naca quia' ca chigútilena' tsözxön Cristo lë'e yaga cruz ga na' gütië' Lë'. Que lë ni na' caléga neda' ni zoa' nabana', pero Cristo zoë' nabanë' lu icja ládx'i'da'ahua'. Tsca naca zoa' nabana' na'a, naca tu' reja ládx'a' a Lë' zxí'inë' Dios, Bönni' na' bidxi'inë' neda', en budödi cuinë' lu yöl-la' guti uláz quia' neda'. ²¹ Biti' rë'ënda' uzó'a tsölä'alö le ruzá' ládxë'ë queëru' Dios. Channö huáca huöáquïë' tsahui' tu bönni' lahuë' Dios tu' runë' tsca rinná bë' xibá queë' Moisés, ní'irö nítisö gütië' Cristo."

3

Le rinná bë' xibá queë' Moisés, en le reja ládx'i'ru' Cristo

¹ Libí'ili', tu' canöz, libí'ili', bönni' Galacia. ¿Nuzxi gulú'utsö libí'ili' nëbi para cabirö uzóali' didza' le nácatë? Gate ga rë' bulu'itu' libí'ili' le sa'yéaj ca gütië' Jesucristo lë'e yaga cruz. ² Gudíxjöi'i neda' lë ni. ¿Bidisóalenë' libí'ili' Dios Bö' lá'ayi tu'benli' ca rinná bë' xibá queë' Moisés o tu' guyija ládx'i'li' le rinné dxi'a biyónili'? ³ ¿Nacxi guca nácali' tu' canöz caní? Gusí lolí' nácali' böñachi queë' Dios tu' zóalenë' libí'ili' Dios Bö' lá'ayi. ¿Réquitseli' huáca udxi gunli' ga guéquili' queë' Dios rácasö queëli'? ⁴ ¿Guca nítisö guca queëli' yúgu'të lë na' guzzaca' gudí'ili'? ¡Biti' ca' guca caní! ⁵ Cate' Dios risö'l-lë'ë queëli' Dios Bö' lá'ayi, en ru'ë libí'ili' lataj gunli' yugu' yöl-la' huáca que yehua' yubá, ¿runë' caní tu' runli' ca rinná bë' xibá queë' Moisés o tu' reja ládx'i'li' le rinné dxi'a na' biyónili'?

⁶ Lu guichi lá'ayi rnna: Abraham guyija ládxë'ë Dios, ate' Dios gunnë' náquïë' bönni' tsahui' tu' guyija ládxë'ë Lë'. ⁷ Que lë ni na na' ral-la' inözili', nupa na' ta'yija ládx'i' Dios náccagaca idü zxí'iní xi'söe' Abraham. ⁸ Lu guichi lá'ayi ruí'i didza' zí'atélö ca gunë' Dios, innë' náccagaquïë' tsahui' bönni' izá'a ila'yija ládxë'ë Lë'. Que lë ni na' Dios gudíxjöi'inë' Abraham zí'atélö ca naca le rinné dxi'a, gunnë': "Lu në'ë Zxí'iní xi'sú' guna' ga gaca dxi'a quégaca böñachi idutë yödzöliö." ⁹ Caní naca, Abraham guyija ládxë'ë Dios, ate' Dios benë' ga

guca dxi'a queë'. Lës caní ca' na'a, Dios runë' ga raca dxi'a quégaca yúgu'të nupa ta'yija ladxi' Lë'.

¹⁰ Nupa na' tu'zxöni ladxi' ulu'huöáca tsahui' tu' túngaca ca rinná bë' xibá queë' Moisés, nabágä'gaca xíguia'. Caní naca tu' nazuaj lu guichi lá'ayi, le rnna: "Yúgu'të nupa na' cabí túngaca idutë ca rinná bë' xibá na' nabágä'gaca xíguia'." ¹¹ Na'a, naca bë' cuntu nu huöáca tsahui' lahuë' Dios tu' run nu na' le rinná bë' xibá na', tu' zoa lu guichi lá'ayi le rnna: "Nu na' nuhuöáca tsahui' lahuë' Dios soa ibán tu' reja ladxi' Lë'." ¹² Ca na' nuhuöáca tsahui' lahuë' Dios nu na' reja ladxi' Cristo nadzá' ca naca que nu na' ruzxöni ladxi' nuhuöáca tsahui' tu' run ca rinná bë' xibá queë' Moisés. Zoa lu guichi lá'ayi le rnna: "Nu na' run idutë ca rinná bë' xibá na' soa ibán tu' run caní."

¹³ Cristo busölë' rë'u lu le richugu queëru' le rinná bë' xibá na' tu' bë'ë latja nu guchugu queë' uláz queëru'. Caní naca tu' zoa lu guichi lá'ayi le rnna: "Narugu quégaca yúgu'të nupa na' dá'gaca lë'e yaga." ¹⁴ Caní guca queë' Cristo para gaca gunë' Dios ca na' guzxí' lu në'ë queë' Abraham, gunë' ga gaca dxi'a quégaca böñachi izá' lu në'ë Jesucristo, en para gaca gunë' ga idisóalenë' Dios Bö' lá'ayi rë'u channö uyija láxdi'ru' Lë', ca na' guzxí' lu në'ë Dios gunë'.

Le rinná bë' xibá queë' Moisés, en le guzxí' lu në'ë Dios gunë' queëru'

¹⁵ Na'a, böchi' zána'do', uzúaja' queëli' tu le rucudzu' didza', tu le raca queëru'. Cate' chopá bönni' chigulunë' tuz xfídz'a'gaquië', en chigulunë' tsutsu didza' na', cuntu nu gaca utsá' didza' na', en cabí gaca nu bi udá' lë'e didza' na'. ¹⁶ Dios guzxí' lu në'ë bi gunë' queë' Abraham, en que zxí'ini xi'sóë'. Ga zoa lu guichi lë ni, biti' rnna: "Quégaca zxí'ini xi'sú", le rui'i didza' que zián böñachi, pero rnna: "Que zxí'ini xi'sú." Lë ni rui'i didza' que tuz bönni', Lë' Cristo. ¹⁷ Lë ni na' le rë'ënda' innia': Dios benë' tuz didza' len Abraham, en guzxí' lu në'ë gunë' ca na' gunnë'. Le nazúaj lu xibá queë' Dios, le benë' Dios tapa gayuá' yu' chi-uru'zì' igudödi ni' cate' gudxé' caní Abraham, biti' gaca ugúa lë na' guzxí' lu në'ë Dios gunë', en cabí gaca usulu le. ¹⁸ Na'a, channö ral-la' gunru' ca rinná bë' xibá na' para si'iru' le guzxí' lu në'ë Dios gunsë', biti'rö naca tu le guzxí' lu ná'asë' gunë'. Dios runsë' caní tu' caní guzxí' lu në'ë bi gunë' queë' Abraham.

¹⁹ Channö caní naca, ¿bizx queë gunná bë'ë Dios xibá na' nazúajgaca lu didza' queë'? Dios gunná bë'ë caní para gaca bë' xíguia' nabágä'ru', pero gúcasö caní ga bidxitë dza na' bilá' lahuë' zxí'ini xi'sóë' Abraham na', Bönni' na' guzxí' lu në'ë Dios gunë' queë' lë na'. Yugu' le gunná bë'ë Dios lu xibá queë', gusöl-lë'ë yözdöliö ni lu ná'agaquie' gubáz lá'ayi queë', ate' Moisés budödë' didza' ca nácabaca xibá na'. ²⁰ Biti' naquín nu udödi didza' cate' naca tuz nu run tuz didza', ate' Dios, tuz náquië'.

Bizx queë gunná bë'ë Dios le zóagaca lu xibá queë'

²¹ Le nazúajgaca lu xibá queë' Dios, ¿ta dá'gaca lë na' guzxí' lu në'ë Dios gunë'? ¡Biti' ca! La'tu' gunná bë'ë Dios tu xibá le gaca gun ga sóaru' ibanru' tsaz, ní'irö huáca huöácaru' tsahui' lahuë' Dios channö gunru' ca na' rinná bë' xibá na'. ²² Tscá naca lë na' nazúaj lu guichi lá'ayi, yúgu'tëru' nabágä'ru' dul-la'. Caní naca para gaca si'iru' lë na' guzxí' lu në'ë Dios gata' queëru' cate' tseja láxdi'ru' Jesucristo.

²³ Zí'atélö ga bidxitë dza gaca tseja láxdi'ru' Cristo, le rnna xibá na' gunná be'e rë'u, ca na' zoa le rinná be'e tu bönni' yu'ë lidxi güië. Caní guca ga bidxitë dza bilá' lahui gaca huöácaru' tsahui' channö uyija láxdi'ru' Lë'.

24 Caní naca, le nazúaj lu xibá queë' Dios gunná be'e rë'u, lë na' busedi rë'u ca tu bönni' usedi ga bidxitxé dza bilá' lahuë' Jesucristo, para gaca huöácaru' tsahui' lahuë' Dios channö uyija ládxí'ru' Lë'. **25** Na'a, tu' bidixín dza gaca huöácaru' tsahui' channö uyija ládxí'ru' Cristo, bíti'rö inná be'e rë'u lë na' busedi rë'u.

26 Yúgu'teli' nácali' bi'i queë' cazë' Dios tu reja ládxí'li'-në' Jesucristo, en chinácali' tuz len Lë'. **27** Yúgu'te nupa nadilagaca nisa para huöácagaca tuz len Jesucristo, nuhuöácagaca ca náquië' Lë cazë'. **28** Bíti'rö narúaj cholplö bönni' judío, en bönni' izá'a, en cabí narúaj cholplö bönni' náquië' tsaz huen dxin, en bönni' nazán, en cabí narúaj cholplö bönni', en nigula, tu' cate' böácali' tuz len Jesucristo, yúgu'teli' böácali' ca' tuz len luzá'ali' tulí' ia'tuli'. **29** Na'a, channö néquili' queë' Cristo, nácali' ca' zxí'ini xi'sóë' Abraham, ate' nazí'ili' lë na' guzxí' lu në'ë Dios gunnë' queë' Abraham.

4

1 Lë ni le rë'ënda' innia': Tsanni ni ribözabi' tu bi'i bönni'do' s'íbi' bi ral-la' gunnë' xúzibí' queëbi', ni' nácabí' bf'ido', en biti' nayépisétéröbi' ca raca que tu nu naca tsaz huen dxin, sal-la' le nácaté nequi queëbi' yúgu'te. **2** Tsanni ni' nácabí' bf'ido', nacuá' nupa tun chi'i lëbi', en tu'gún dxin le nequi queëbi' ga idxinté dza chinuzoë' xúzibí' queëbi'. **3** Lés caní raca ca' queëru'. Tsanni ni' gücaru' ca bf'ido', gunná be'e xibá na' rë'u ca raca quégaca bönachi yödzölió ni. **4** Cate' bizá'a dza, Dios gusöl-lë'ë zxí'ini cazë' ni. Gúquië' zxí'ininu tu nigula ca nácaru' rë'u, en gunná be'e le zoa lu xibá quégaca bönni' judío Lë'. **5** Caní guca queë' para guca busölle' nupa na' rinná be'e le zoa lu xibá léguequi, para gaca huöácaru' bi'i queë' Dios.

6 Para gaca bë' chinácali' bi'i queë' cazë', Dios guchizë' Dios Bö' lá'ayi ládxí'do'oli', ate' Lë cazë' rulidzë' Dios uláz queëli', rnnë: "Xuza". **7** Caní naca, chinácali' bi'i queë' Dios, en bíti'rö nácali' ca yugu' bönni' tsaz nácagaquíë' huen dxin. Na'a, tu' nácali' bi'i queë' cazë' Dios, Lë cazë' nazí' ladxi' në'ë guequi queëli' le nequi queë' tu' nácali' tuz len Cristo.

Pablo rui'i ládxë'ë bönni' Galacia ta'yija ládxë'ë Cristo

8 Cate' ni' biti' númbë'ëli'-në' Dios, gücali' ca yugu' bönni', tsaz nácagaquíë' huen dxin, en benli' dxin quégaca budó' néquini. Biti' ca' nácagaca budó' na' Dios. **9** Na'a, tu' númbë'ëli'-në' Dios, o huáca innaru': Tu' númbë'ë Dios libí'ili', ¿bizx queë' rë'ënilí' ubí'ili' yugu' lu xibá cané na' cabí nu uzí' xibé? ¿Rë'ënilí' huöácali' huen dxin tsaz, en gunli' ca rinná bë' xibá na'? **10** Rápali' tu ia'tú dza, enca' tu ia'tú beo', enca' tu ia'tú cuṣu na, en tu ia'tú iz. **11** Ráxdida' bi gaca queëli'. ¿Naru' nuhuöáca nítisö dxin bena' para gúnbë'ëli' le nácaté? **12** Ráta'yuá' lolí', böchí' zána'do', gácali' ca naca' neda', nulá' na'a lu na' xibá benë' Moisés. Caní ral-la' gácali' tu' böáca' neda' ca gücali' libí'ili'. Biti' bi le cabí naca dxí'a benli' quí'a neda'.

13 Chinöz quézili' bizx queë' na' gusí lahua' runa' libán lolí' que le rinnë dxí'a. Bena' libán ni' tu' güí'ida'. **14** Biti' bucá'anali' neda' cané, en cabí buzóali' neda' tsólá'alö sal-la' bigútli' ca guca yödzöhuë' quí'a' na'. Benli' neda' bal, tuz ca gunlí' bal tu gubáz lá'ayi queë' Dios, o ca runli' bal Jesucristo caz. **15** Budzéjalë'ëli' dza ni'. ¿Bizxi guca queëli' tu' cabirö raca caní? Lë ni gaca innia' ca guca queëli': La'tu' huáca gunli', bubéajli' guiój lo quézili', le gúnmalí quí'a'. **16** Na'a, ¿réquili' nuhuöáca' tu nu riléde'e libí'ili' tu' gudixa' libí'ili' le nácaté?

¹⁷ Bönni' ni' tu'tsë'ë libí'ili' tu'i ládxë'ë libí'ili', pero caléga para gaca dxí'a queëli'. Té'enë' ilunë' ga ucá'anali' netu' para güí'i ládxí'li' légaquië'. ¹⁸ Na'a, naca dxí'a zoa nu rui'i ladxi' libí'ili', pero tuz channö naca para gaca dxí'a queëli'. Caní ruví'tica'sö ládx'a libí'ili', en calégasö cate' ni' zóalena' libí'ili'. ¹⁹ Libí'ili', zxí'ina'do'. Ca na' raca queënu nigula chizóa sóabi' bí'ido' queënu, riguí'i rizáca'nu, lës caní riguí'i rizáca'a nedá' ni'a queëli' leyúbölö ga idxinrö dza gácali' idú ca náquië' Cristo. ²⁰ Nácaru la' zóalena' libí'ili' na'a para gaca güí'ilena' libí'ili' didza' nadzá'alö, tu' ruúbi ruguí'ilë'ëda' ni'a queëli'.

Le rucudzu' didza' ca guca quégacanu Agar en Sara

²¹ Na'a, libí'ili', nuli' rë'ënili' uzóa cuinli' lu xibá queë' Moisés, guli'ná'tsöca' didza' ni gu'a. ¿Catu caz buzë nágali' le rnna xibá na'? ²² Rnna xibá na' caní: gula'cuá abi' chópabi' bí'i bönni'do' queë' Abraham. Tubi' gúcabi' zxí'ininu tu nigula tsaz nácanu huen dxin, ate' ia'tubi' gúcabi' zxí'ininu nigula nazannu. ²³ Zxí'ininu nigula huen dxin na' gúlajbi' lu ni'a lu na' tu bönni' tsca tálažbi' yúgu'te bí'ido', pero zxí'ininu nigula nazannu na' gúlajbi' tu' guzxí' lu né'ë Dios gunë' ga gálajbi'. ²⁴ Lë ni naca ca tu le rucudzu' didza'. Ca guca quégacanu chópanu nigula ni sa'yéaj ca naca chopá didza' Dios bénlenë' böñachi. Tu didza' na' naca le buzóë' Dios lu guí'a Sinaí, le sa'yéaj lë na' guca queënu Agar. Nupa na' rinná be'e xibá na' léguequi, nácagaca ca zxí'ininu Agar, en nácagaca ca huen dxin tsaz lu xibá na'. ²⁵ Le gúcanu Agar na' sa'yéaj ca' ca naca guí'a Sinaí na' le zoa luyú Arabia, en sa'yéaj ca' ca naca yödzö Jerusalén na'a dza, tu' naca yödzö na' ca tu bönni' tsaz náquië' huen dxin tsözxón len nupa nacuá'lu yödzö na'. ²⁶ Jerusalén na' zoa yehua' yubá nazán, ate' rë'u ni nácaru' böñachi uládz que yödzö ni'. ²⁷ Nazúaj lu guichi lá'ayi le rnna: Budzeja, nigula huödx, cabí nacuá' zxí'inu'. Lu yöl-la' rudzeja quiu' gurödxí'a, sal-la' catu caz guca quiu' le riguí'i rizáca'nu nigula chizóa sóabi' bí'ido' queënu. Budzeja tu' sal-la' nusán né'eguequi böñachi li', gunë' Dios ga ila'yánterö zxí'inu' ca bi'i queënu nigula zóalennu bönni' queënu.

²⁸ Libí'ili', böchí' zána'do', rë'u ni nácaru' ca gúcabi' Isaac, zxí'inë' Abraham. Nácaru' ca yugu' zxí'ini xi'sóë' Abraham, guzxí' lu né'ë Dios gata' queë'. ²⁹ Dza ni', bi'i na' gúlajbi' ca tálažbi' yúgu'te bí'ido', gudxía náabi' bí'i na' gúlajbi' tu' nözi yöl-la' huáca queë' Dios Bö' lá'ayi. Lës caní raca ca' queëru' na'a, ta'bía no böñachi yödzöliö ni rë'u. ³⁰ ¿Bizí' rnna le zoa lu guichi lá'ayi? Caní rnna: "Gurú'una-nu nigula na' tsaz nácanu huen dxin tsözxón len zxí'ininu, tu' bití' gaca zxí'ininu nigula na' sí'ibí' tsözxón zxí'ininu nigula nazannu le guzxí' lu né'ë Dios guequi queëbi' zxí'ininu nigula nazannu na'." ³¹ Caní naca, böchí' zána'do'. Bití' nácaru' ca nácabi' zxí'ininu nigula na', tsaz gúcanu huen dxin, pero nácaru' ca zxí'ininu nigula nazannu na'.

5

Guli'gún chi'i cuinli', ugá'analí' lu yöl-la' nazán

¹ Chinazanru' tu' busanë' Cristo rë'u. Guli'sóa tsutsu channö, ugá'analí' lu yöl-la' nazán na'. Bití' uzóa cuinli' leyúbölö lu xibá queë' Moisés para cabí gácali' ca tu bönni', tsaz náquië' huen dxin.

² Buli'zé nágali' neda'. Neda', Pablo, rea' libí'ili', channö ruí'ili' lataj nu ichugu lu xpëla'li' ca rinná bë' xibá na', biti' ca' uzí'ili' xibé le bené' Cristo. ³ Leyúbölö rë'ënda' guía' núti'tës bönni' ru'ë lataj nu ichugu lu xpëlë'ë caní, run bayudxi gunë' idutë ca le rinná bë' xibá queë' Moisés. ⁴ Nuli' réquili' huöácali' tsahui' lahuë' Dios tu' runli' ca rinná bë' xibá na', chibulá'alenli'-në' Cristo. Chibusán ná'ali' le ruzá' ládxë'ë Dios queëru'. ⁵ Rë'u ni ruzxöni ládxí'ru' huöácaru' tsahui' lahuë' Dios ni'a que yöl-la' huáca queë' Dios Bö' lá'ayi tu' reja ládxí'ru' Cristo. ⁶ Channö nácaru' tuz len Jesucristo, biti' bi run channö narugu lu xpëla'ru' ca rinná bë' xibá na' o channö cabí narugu caní lu xpëla'ru'. Le run bayudxi naca tseja ládxí'ru' Cristo, le run ga idxi'iru' luzá'aru'.

⁷ Dxí'ado' guca ca gusí loli' runli' dza ni'. ¿Nuzxi ben ga bucá' anali' le nácatë? ⁸ Biti' bené' Dios, Bönni' rulidzë' libí'ili', ga benli' caní. ⁹ Biti' gal-la ládxí'li' lë na' rnna: "Láti'sö cúa zi que yöta xtila ruhuöázx idutë cúa ga nayú' cúa zi na'." ¹⁰ Tu' nácaru' tuz len Xanru', runa' löza ca naca queëli', sa' ládxí'li' tuz ca rizá' ládx'a' neda', ate' Dios gun zi'ë bönni' na' rutsë'ë libí'ili', núti'tës nu naca bönni' na'.

¹¹ Ca naca quia' neda', böchi' zána'do', nacuá' nupa ta'nná rusédida' böñachi ral-la' irugu lu xpëla'guequi ca rinná bë' xibá queë' Moisés. Channö runa' caní, ¿bizx queë ta'bía nahuë' bönni' judío neda'? La'tu' rusédida' caní, cuntu nu ilé neda' tu' runa' libán ca gótië' Cristo lë'e yaga cruz. ¹² Ca naca que nupa ni' tu'tsá' libí'ili', të'ëni irugu lu xpëla'li' lë na', nácoru la' ila'chugu tsaz cuïnguequi.

¹³ Ca naca queëli', böchi' zána'do', Dios bulidzë' libí'ili' para gácali' böñachi nazángaca. Biti' ugnuli' dxin yöl-la' nazán na' para gunli' ca rizësö ládxí'li', pero para gunli' dxin que luzá'ali', tulí' ia'tulí', tu' nadxi'ili' luzá'ali'. ¹⁴ Yugu'te le rinná bë' xibá queë' Dios rusudxín nu na' run ca rinná bë' xibá na' rnna: "Ral-la' idxi'nu' luzó'o ca nadxi'i cuinu'." ¹⁵ Channö rizi' quídzala'li' luzá'ali' tulí' ia'tulí', runli' ca tunba' böa' guí'a sínia', táguya'aba', en táguba' luzá'aba'. Bulí'yú tsate' usulu usunitíli' luzá'ali' tulí' ia'tulí'.

Le runru' lu yöl-la' böñachisö queëru', en le runru' len yöl-la' huáca queë' Dios Bö' lá'ayi

¹⁶ Lë ni na' rea' libí'ili': Guli'güí' latja inná bë'enë' libí'ili' Dios Bö' lá'ayi, ate' ni'irö bítirö gunli' ca rizësö ládxí'ili' lu yöl-la' böñachisö queëli'. ¹⁷ Yugu' le rizë ládxí'ru' gunru' lu yöl-la' böñachisö queëru' biti' röjlöz le rë'ënë' Dios Bö' lá'ayi gunru', ate' lë na' rë'ënë' Dios Bö' lá'ayi biti' röjlöz le rë'ëniru' gunru' lu yöl-la' böñachisö queëru'. Chopá ni, biti' röjlözgaca, en que lë ni na' biti' gaca gunli' ca rë'ëni quézili'. ¹⁸ Channö ruí'ili' lataj inná bë'enë' Dios Bö' lá'ayi libí'ili', biti'rö inná be'e xibá queë' Moisés libí'ili'.

¹⁹ Naca bë' le tun böñachi lu yöl-la' böñachisö quéguequi.
Tun dul-la' le riguitsaj xibá que yöl-la' nutsaga na', enca' dul-la' le lë'ë.
Tun yugu' le naxihui', en yugu' le cátshui'.

²⁰ Téquigüequi le bach budó' néquinigüequi.

Tun yöl-la' gudzá'.

Tu'dí'i luzé'eguequi, en ta'dí'l-lalen léguequi.

Tu'zxé'e luzé'eguequi, en ta'lé nupa na', en tu'huídi'.

Ta'rúaj choplö, en tu'béaj tsölä'alö nupa dá'gaca léguequi.

²¹ Ta'zé' ladxi' le dé que luzé'eguequi, en ta'guilaj xíguia'.

Ta'zudxi, en tagu lë'e.

Tu'dödi bë' ca túnguequi.

Le zián le caní túnguequi. Neda' ruxösa' ládzi'li' na'a para cabí gunli' caní ca na' buxösa' ládzi'li' zí'alö, rnnía': Nupa túngaca caní biti' ca' ila'deli' ila'yú'u ga na' rinná bë' è Dios.

²² Channö zóalen Dios Bö' lá'ayi rë'u runru' caní:

Nadxí'iru' luzá'aru'.
Rudzeja ládzi'ru'.
Zoa dxi ládzi'do'oru'.
Ribözaru' zxön ladxi'.
Ruí'ládzi'ru' luzá'aru'.
Nácaru' dxi'i ladxi'.
Rusudxinru' xtídzarú'.
²³ Nácaru' nöxañ ladxi'.
Rinná be'e cuinru'.

Biti' ca' gunná bë' è Moisés rë'u para cabí gunru' yugu' le caní. ²⁴ Nupa néquigüequi queé' Cristo biti'rö tun ca të'eni quez, en cabí tun le ta'zësö ladxi' lu yöl-la' böñachisö quégüequi. ²⁵ Dios Bö' lá'ayi runnë' yöl-la' na'bán queéru'. Lë' caze' ral-la' inná be'enë' rë'u ca naca yúgu'të le runru'.

²⁶ Biti' ral-la' gun ba zxön cuinru', en cabí utsá'aru' luzá'aru', en cabí uzzé'eru' luzá'aru' turu' ia'turu'.

6

Ral-la' gácalenru' luzá'aru' turu' ia'turu'

¹ Na'a, böchi' zána'do', channö ilé'eli' runë' dul-la' tu bönni' böchi'li', nuli' zóalenë' Dios Bö' lá'ayi libí'ili', ral-la' gunli' ga ubí'i ládxë'è bönni' na', pero run bayudxi gunli' caní lu yöl-la' nöxañ ladxi' queéli', en uyú cuinli' tsate' cu'u tu' xihui' libí'ili' nöza dul-la'. ² Guli'gácalen luzá'ali' tulí' ia'tuli' tsca naca yuá' nabága'li'. Channö gunli' caní uzóali' didza' le gunná bë'enë' Cristo rë'u.

³ Channö zoa nu réqui chinadelí' yöl-la' nayépisë, en biti' bi nadeli' nu na', nu ni na' rizi' ye'e la' cuinsi. ⁴ Tuhuéaj tuhuéajë' bönni' ral-la' uchi'a usöröe' que le runë'. Ní'irö channö uruajé' dxi'a, huáca gun ba zxön cuinë' ni'a que le chinunë', en biti' gun bayudxi uyúe' ca núngaca ia'zíca'rö böñachi channö ba benré' dxi'a o cabí. ⁵ Tuhuéaj tuhuéajë' bönni' ral-la' gu'ë le nusubáguë' è Dios lë'.

⁶ Channö zoa nu rusedi libí'ili' ca naca le rinnë dxi'a, ral-la' unödzjali' nu na' rusedi libí'ili' latí' que yúgu'të le do' dë queéli'.

⁷ Biti' si' ye'e cuinli' tu' cuntu nu gaca si' ye'e Dios. Ulápali' tsca naca le rázali'. ⁸ Channö le rázali' naca yugu' le runli' ca rizësö ládzi'li' lu yöl-la' böñachisö queéli', le ulápali' gaca yöl-la' guti. Channö le rázali' naca yugu' le runli' ca raza ládxë'è Dios Bö' Lá'ayi, ulápali' le gunnë' Dios Bö' lá'ayi queéli', le naca yöl-la' na'bán idú. ⁹ Caní naca, biti' ral-la' huöa ládzi'ru' gunru' le naca dxi'a, tu' channö cabí huöa ládzi'ru', idxín dza uláparu'. ¹⁰ Que lë ni na', bátati'tës gata' queéru' lataj, ral-la' gunru' le naca dxi'a quégaca yúgu'të böñachi, en le naca lo, ral-la' gunru' caní quégaca böchi' zanru' ta'yija ladxi' Cristo.

Le buzúajé' Pablo lu guichi ga ruúdx

¹¹ Bulí'yú cate' bach didza' ni ruzúaja' lu guichi len na' cuina'. ¹² Nupa na' té'eni ilún ga irugu lu xpéla'li' ca rinná bë' xibá queé' Moisés, túngaca caní para ulu'rúaj dxi'a lógaca böñachi, en cabí bi ilún quégüequi tu' túngaca libán ca güitië' Cristo lë' e yaga cruz. ¹³ Yugu' bönni' na'ta'zí' lu ná'agaquie' le narugu lu xpéla'gaquië' ca rinná bë' xibá queé' Moisés, biti' tu'zóë' didza' idutë ca rnna

xibá na'. Të'ënë' ilunë' ga irugu lu xpëla'li' para gaca ilún ba zxön cuíngaqüië' tu' ta'nná bé'enë' libí'ilí' para irugu lu xpëla'li' caní. ¹⁴ Ca naca quia' neda', cù'usa' yöl-la' ba le benë' Xanru' Jesucristo cate' gútië' lë'e yaga cruz. Tu' nözi le benë' Cristo lë'e yaga cruz, yugu' le dë yödzölió ni naca quia' ca tu le chinati, biti' rui'i ládxa'a le, ate' neda' naca' quégaca böñachi yödzölió ni ca tu bönni' nati, biti' tu'i ladxi' neda'. ¹⁵ Channö nácaru' tuz len Jesucristo, biti' bi run channö narugu lu xpëla'ru' ca rinná bë' xibá na' o channö cabí narugu lu xpëla'ru' caní. Le run bayudxi naca gácaru' böñachi cubi niu' lë'e ládxi'do'oru'. ¹⁶ Yúgu'të bönni' na' tunë' ca rinná bë xibá runa' ni, en yúgu'të bönni' na' néquiguequinë' queë' Dios, rinábida'-në' Dios gunë' ga soa dxi ládxi'do'gaquïë', en huéchi' ládxë'ë légaquïë'.

¹⁷ Na'a zë lo, cuntu nu bönni' ral-la' utsë'ë neda', tu' nácagaca bë' butsóa zóagaca lu xpëla'a naca' huen dxin queë' Xanru' Jesús.

¹⁸ Na'a, böchi' zána'do', rinábida'-në' Xanru' Jesucristo uzá' ládxë'ë queëli' yúgu'tëli'. Ca' caz.

DIDZA' GUSÖL-LË'Ë PABLO YÖDZÖ ÉFESO

Pablo rugapë Dios böñachi queëë Cristo nacuá Éfeso

¹ Neda', Pablo, naca' gubáz nasöl-lë'ë Jesucristo tu' gó'uni quézinë' Dios gaca' caní. Rugapa' Dios libí'ili', zóali' Éfeso. Néquili' quez queëë Dios, en réajlë'ëli' Jesucristo. ² Rinábida'-në' Xúziru' Dios, enca' Xanru' Jesucristo uzá' ládxë'ë queëli', en gunë' ga soa dxi icja ládx'i'do'oli'.

Le naca queëë Dios Bö' Lá'ayi rata' queëru'

³ ¡Ral-la' cù'uru'-në' yöl-la' ba Dios, Xuzé' Xanru' Jesucristo! Tu' nácaru' tuz len Cristo, Dios chibuzá' ládxë'ë queëru' yúgu'te le naca dxi'a que yehua' yubá, le runë' Dios Bö' Lá'ayi ga rata' queëru'. ⁴ Zí'atélö ca benë' Dios yödžolió ni, gurö' cazë' rë'u para guéquiru' quez queëë tsözxón len Cristo, en gácaru' böñachi lá'ayi queëë, en gácaru' idú dxi'a lahuë' Lë'. ⁵ Dios bucözë' zí'atélö si'l lu në'ë rë'u ca zxí'ini cazë' tsözxón len Jesucristo, tu' guyaza ládxë'ë gaca caní, en tu' naca le gó'uni quézinë' gunë'. ⁶ ¡Ral-la' cù'utica'siru'-në' Dios yöl-la' ba ni'a que le buzá' ládxë'ë queëru', yugu' le bennasë' queëru' tu' nácaru' tuz len Zxi'inë', Nu na' nadxi'inë! ⁷ ¡Cristo böä'ue' rë'u cate' ni' gútië' uláz queëru' para gaca uniti lahuë' Dios rë'u ca naca dul-la' nabág'a'ru'! ¡Zxöntëro naca le buzá' ládxë'ë Dios queëru', ⁸ lë na' rúnnadë'ë Lë' queëru'! ¡Lu yöl-la' rácada' queëë, en lu yöl-la' réajni'i queëë ⁹ benë' Dios le bucözë' queëru', ate' buluï'inë' rë'u lë na' bigachi', le buzó'a cazë' zí'atélö usudxinë' lu në'ë Cristo! ¹⁰ Lë na' buzó'a cazë' Dios usudxinë' cate' izá'a dza, naca gunë' ga ilaca tuz, en ila'cuá' lu në'ë Cristo yúgu'te le dë, le nacuá' yehua' yubá, en le nacuá' yödžolió ni.

¹¹ Tu' nácaru' tuz len Cristo, Dios gurö' cazë' rë'u zí'atélö para guequi queëru' le nequi queëë Xúziru' Dios, lë na' bucözë' queëru' ca naca le gó'uni quézinë' Dios, Nu run yúgu'te ca rë'ëni quézinë' Lë'. ¹² Caní benë' Dios para cù'uru'-në' yöl-la' ba ca naca yöl-la' zxön queëë, rë'u ni ruzxöni ládx'i'ru'-në' Cristo zí'atélö ca ia'zicá'rö böñachi. ¹³ Lësca' caní guca queëli'. Cate' biyöñili' didza' idútë li, didza' dxi'a ca gaca uláru', guyéjalë'ëli' Cristo, ate' Dios buzóë' queëli' le naca bë' nácali' queëë, tu' guchizíë' icja ládx'i'do'oli' Dios Bö' Lá'ayi, Nu na' guzzí' lu në'ë Dios isöl-lë'ë queëru'. ¹⁴ Tu' zóalenë' Dios Bö' Lá'ayi rë'u, naca löza guequi queëru' le nequi queëë Xúziru' Dios cate' údxí huoo'ue' rë'u, rë'u na' chinéquiru' queëë'. Caní naca para gaca yöl-la' ba que yöl-la' zxön queëë'.

Pablo rinábinë' Dios gunnë' queëru' yöl-la' réajni'i

¹⁵ Que lë ni na', cate' biyöñda' ca réajlë'ëli'-në' Xanru' Jesús, en ca nadxi'ili' yúgu'te böñachi queëë Dios, ga ridxitné na'a dza ¹⁶ biti' ca' rusana' rea'-në' Dios: "Xclenu'", ca naca queëli'. Röjneda' libí'ili' cate' rulidza'-në' Dios. ¹⁷ Rinábida'-në' Dios queëë Xanru' Jesucristo, Dios na' náquië' Xúziru' nayépisétëre', rinábida'-në' isöl-lë'ë Dios Bö' Lá'ayi queëli', Bö' na' runna yöl-la' réajni'i queëru', en rului'i rë'u ca naca cazë' Dios, para gaca idú ca núnbe'ëru'-në'. ¹⁸ Rinábida'-në' Dios uzéajni'inë' libí'ili' lu icja ládx'i'do'oli' para gaca inözili' ca naca le runru' löza, lë na' bulidze' libí'ili' para uzi'ili' xibé, en para inözili' ca naca yöl-la' tsahui' que yehua' yubá, le guequi quégaca nupa néquiguequi queëë' Dios, ¹⁹ enca' para inözili' cate' zxön naca yöl-la' huáca queëë', le rácalen rë'u ni réajlë'ëru' Lë'. Yöl-la' huáca zxön ni naca la' lëbisò

na' bulu'e lahui Dios ²⁰ cate' ni' busubané' Cristo lu yöl-la' guti, en bené' ga gurö'ë cuita lë'ë Lë cazë' ga nayépisétërë' ni' yehua' yubá. ²¹ Rinná bë'ené' nupa ni' ta'nná bë', en nupa ni' dë lu në'eguequi, en nupa ni' nadéli'gaca yöl-la' huáca, en nupa ni' nácgacaca xan. Cristo nayépisétërë' ca yúgu'të nupa nadéli'gaca yöl-la' unná bë' yödzölió ni, en lu yödzölió si' za'. ²² Dios budödë' lu në'ë Cristo yúgu'të le dë para inná bë'ené' le, en buzóë' Lë' quégacaca böñachi queë' para gáquië' Xanru' lu yúgu'të le nequi queëru'. ²³ Yugu' böñachi queë' Cristo nácgacaca ca idútë le naca cazë', ate' raquië' Lë' idú lu le naca cazë' na'. Run cazë' Lë' ga raca idú yúgu'të le dë.

2

Nuláru' tu' nadxi'iné' Dios rë'u

¹ Dios chibenné' yöl-la' na'bán idú queëli', sal-la' gúcali' zí'atëlö ca bönni' nátingaca tu' nözi dul-la' nabágä'li', en ni'a que dö' biá'ali'. ² Dza ni' benli' lëbisö ca tun böñachi biti' nácgacaca tsahui' nacuá' yödzölió ni, en benli' ca gúuni tu' xihui', nu rinná bë' lu bo'ös, en rugún dxin nupa biti' túngaca ca rnna xtídzë'ë Dios. ³ Lësca' caní gúcaru' yúgu'tëru' rë'u. Benru' ca guzësö ládx'i'ru', en ca guyaza ládx'i'ru' lu yöl-la' böñachisö queëru'. Que lë ni na' gubágä'ru' dul-la' lahuë' Dios le nun ga gunë' rë'u xigüia' ca gunë' quégacaca ia'zica'rö böñachi. ⁴⁻⁵ Ni'irö' cate' ni' nácaru' ca bönni' nátingaca tu' nözi dul-la' gubágä'ru', Dios busubané' rë'u lu yöl-la' guti tsözxón len Cristo tu' buéchi' ládx'ë'ë rë'u, en bidxi'ide'ené' rë'u. Nuláli' tu' zoa le buzá' ládx'ë'ë Dios queëli'. ⁶ Dios busubané' rë'u tsözxón len Cristo para gunë' ga cö'örü' tsözxón len Lë' ga ni' rinná bë'ë yehua' yubá. ⁷ Caní bené' Dios, en bulu'iné' böñachi si' zá gaca ca naca yöl-la' tsahui' que le buzá' ládx'ë'ë queëru', tu' budödë' Jesucristo ni'a queëru', le naca bë' ca nadxi'ide'ené' rë'u. ⁸ Nuláli' tu' zoa le buzá' ládx'ë'ë Dios queëli' tu' réajlë'ë'lí' Cristo. Busölë' libí'ili', caléga tu' nacuá' le naca dxí'a benli' libí'ili', pero tu' naca le runsë' Dios. ⁹ Cuntu nu gaca gun ba zxön cuini tu' nulá, tu' cabí nulá nu na' tu' nacuá' le naca dxí'a nun nu na'. ¹⁰ Le nácaru' naca le nun cazë' Dios. Tu' nácaru' tuz len Jesucristo, bucu'ë rë'u para gunru' le nácgacaca dxí'a, le bucözë' zí'atëlö gunru'.

Rö' ö dxi icja ládx'i'do'oru' lahuë' Dios ni'a que le benë' Cristo

¹¹ Guli'söjné' ca gúcali' zí'atëlö. Gúcali' böñachi izá'a, en que lë ni na' yugu' bönni' judío, bönni' na' ta'chúguië' lu xipéla'gaquië' le naca bë' dá'gaquië' Dios, en nazi' lágaquië' bönni' narugu lu xipéla'gaquië', ta'nnë' nácali' libí'ili' bönni' biti' narugu lu xipéla'gaquië'. ¹² Dza ni' nubiga'li' ga zoë' Cristo. Gúcali' bönni' zí'tu' lógaca böñachi Israel, en biti' buzí'ili' xibé didza' benë' tsutsu Dios, en guzxí' lu në'ë bi gata' quégacaca böñachi queë'. Guzoáli' yödzölió ni, biti' zoa le runli' löza, en biti' núnbe'ënili' në'ë Dios. ¹³ ¡Na'a, nácali' tuz len Jesucristo! ¡zí'atëlö nubiga'li' libí'ili' zí'tu' ga zoë' Dios, pero na'a nudxíguë'ë Dios libí'ili' gála'sö tu' gútië' Cristo uláz queëru'! ¹⁴ Lë cazë' Cristo runë' ga rö' ö dxi icja ládx'i'do'oru' lahuë' Dios. Lë' bené' ga yugu' bönni' judío, en yugu' bönni' zí'tu' bulu'huöáquië' tuz böñachi, en busúluë' yöl-la' rilé le guléaj légaquië' choplö ca tu zö'ö zxön. ¹⁵ Lë ni bené' Cristo cate' gútië' uláz queëru', en gudúue' yugu' xibá, en yugu' le rinná bë' nazúajacaca lu xibá quégacaca böñachi judío, ate' chopá cö' böñachi na', buné' tuz böñachi cubi, nupa nácgacaca tuz len Lë cazë'. Caní bené', en gulequi dxíë' yöl-la' rilé na'. ¹⁶ Cate' gútië' Cristo lë'e

yaga cruz, busúluë' yöl-la' rilé na', ate' chopá cō' bönachi na', bunë' légaquië' ca tuz bönachi, en gulequi dxíe' icja láxí'i do'gaquië' lahuë' Dios.

¹⁷ Caní guca, buluí'i lahuë' Cristo, en benë' libán que didza' dxi'a ca ribequi dxíe' yúgu'té bönachi, libí'ili' na' nácali' bönachi izá'a, en zóali' zi'tu' ga zoë' Dios, enca' bönachi judío nacuá' gála'sö. ¹⁸ Na'a, ni'a que le benë' Cristo, gaca ibíga'ru' lahuë' Xúziru' Dios, tu' zóalené' Lë cazë' Dios Bö' Lá'ayi rë'u, sal-la' nácaru' bönachi judío o bönachi izá'a. ¹⁹ Que lë ni na', libí'ili', bönachi izá'a, bítí'rö nácali' ca bönachi zi'tu' zóali' tu luyú'biti' nequi queëli', pero nabábalenli' bönachi queë' Dios. ¡Chinácali' ca bi'i queë' cazë' Dios! ²⁰ Libí'ili' nácali' ca tu yu'u zoa tsaz. Nácali' ca yugu' guiój zxóagaca lahui xilibi zö'ö, le bulu'cu'ë yugu' bönni' gubáz queë' Cristo, en yugu' bönni' gulü'ë didza' uláz queë' Dios, ate' Lë cazë' Jesucristo náquië' ca guiój lo que xilibi zö'ö na'. ²¹ Idútë yu'u na' le nácali' libí'ili' riyasa lahui xilibi zö'ö na' naca cazë' Cristo, en nacuá' tu'lapa yugu' guiój que, para gaca tu yudo' lá'ayi le naca tuz len Xanru'. ²² Libí'ili' cázali' nácali' tuz len Cristo Nu buzóá libí'ili' para gácali' ca tu yu'u ga na' yu'uë Dios, tu' dzágue' Dios Bö' Lá'ayi libí'ili'.

3

Náquië' Pablo huen libán que didza' dxi'a lógaca bönachi izá'a

¹ Que lë ni na', neda', Pablo, yu'a lidxi guë' tu' runa' libán queë' Jesucristo para uzí'ili' xibé', libí'ili', bönachi izá'a. ² Réquida' chinöz quézili' ca benë' Dios, budödë' lu na'a dxin runa' para uzí'ili' xibé' le ruzá' ládxë'ë queëru'. ³ Dios bulu'e lahui le bigachí' queë', en buzéajni'inë' neda' ca naca. Ca naca lë ni chibuzúaja' láti'do'queëli' lu guichi. ⁴ Cate' ulábalí' lë ni, gúnbe'ëli' le réajni'ida' ca naca le bigachí' ca naca queë' Cristo. ⁵ Dza ni'te cuntu nu buzéajni'inë' Dios ca naca le bigachí' na', pero na'a, lu në'ë Dios Bö' Lá'ayi, chibulü'ë lahui Dios ca naca, tu' bulu'inë' yugu' bönni' gubáz lá'ayi queë', en yugu' bönni' tu'ë didza' uláz queë'. ⁶ Caní rnna lë na' bigachí': "Ni'a que didza' dxi'a ila'deli' bönachi izá'a tsözxöñ len bönachi judío le nequi queë' Dios, ate' ulu'huöáquië' ca tuz bönachi, en ulu'zi'ë xibé' tsözxöñ len légaquië' le guzxí' lu në'ë Dios unödzjë' quégaquië' tu' dá'gaquië' Jesucristo." ⁷ Dios buzá' ládxë'ë quia' le bennë' quia'. Lu yöl-la' huáca zxöñ queë' benë' neda' huen libán que didza' dxi'a queë'. ⁸ Nacra' cá'asö ca yúgu'té bönachi queë' Dios, pero Lë' buzá' ládxë'ë quia' gaca' huen libán lógaca bönachi izá'a que didza' dxi'a ca naca yöl-la' tsahui' queë' Cristo, le nazáca'da'. ⁹ Dios budödë' lu na'a guna' ga iléquibe'e yúgu'té bönachi ca naca le buzóá cazë' Dios dza ni'te, lë na' naca tu le bigachí' queë' Dios, Nu ben yúgu'té le rilé'eru'. ¹⁰ Caní guca, para iléquibe'e yúgu'té nupa ta'nná bë', en nupa dë lu në'eguequi ni' yehua' yubá, idú ca naca yöl-la' réajni'i queë' Dios cate' ila'lé'e ca nácapaca bönachi queë' Cristo. ¹¹ Dios benë' lë ni, busudxinë' lë na' buzóá cazë' dza ni'te, le benë' lu në'ë Xanru' Jesucristo. ¹² Tu' nácaru' tuz len Cristo, nazí'iru' lataj ibíga'ru' idú ladxi'ru' lahuë' Dios, tu' réajlë'ëru' Lë'. ¹³ Que lë ni na' ráta'yua' loli' biti' gaca chopá láxí'i li' tu' nözi le rigu'i' rizáca'a neda' para gácalena' libí'ili', le naca tu le uzí'ili' xibé'.

Ca nacay yöl-la' nadxí'i queë' Cristo

¹⁴ ¡Que lë ni na', ruzechu zxiba' lahuë' Xuzë' Xanru' Jesucristo! ¹⁵ Ca lë', nazi'i ca' lágaca yúgu'té bönachi queë', nupa nacuá' yehua' yubá, en nupa nacuá' yödzölió ni. ¹⁶ Rinábida'në' Xúziru' Dios, lu yöl-la' zxöñ queë', le nazáca'da', gunnë' queëli' yöl-la' huáca queë' Dios Bö' Lá'ayi, en gunë' ga gálali'

lu icja láxí' do'oli'. ¹⁷ Rinábida'-në' Cristo soë' icja láxí' do'oli' tu' réajlë' elí' Lë'. Rinábida'-në' gunë' ga sóali' tsaz lu yöl-la' nadxí'i queë', en biti' tséaj bö' icja láxí' do'oli' ca nadxí'ilí'-në', ¹⁸ para gaca tséajni' ilí' tsözxón len yúgu'té bönachi queë' Cristo ca naca yöl-la' nadxí'i queë', tsca ga ridxín ní'lö, en ná'alö, en cadxí'ilö, en xitsá'alö. ¹⁹ Rinábida'-në' Dios gunë' ga gúnbeë' elí' yöl-la' nadxí'i na', le cabí gaca gúnbeë' eru' idú ca naca, para sóalen libí'ili' idú le naca cazë' Dios.

²⁰ ¡Na'a, yöl-la' ba Dios, Nu gaca gúntëro ca gaca inábaru' o ca gaca sa' láxí'ru', ugunë' dxin yöl-la' huáca queë' lu icja láxí' do'oru'! ²¹ ¡Gácatica'sö queë' Dios yöl-la' ba lögaca bönachi queë' Cristo, en lahuë' Lë cazë' Jesucristo, na'a dza, en yúgu'té dza zá'gaca! ¡Ca' gaca!

4

Dios Bö' Lá'ayi nunë' rë'u tuz

¹ Na'a, neda' ráta'yua' loli', yu'a lidxi guíë ni tu' runa' libán queë' Cristo, rinábida' libí'ili' gunli' idú ca ral-la' ilún nupa bulidzë' Dios para ilequi queë', ca na' bulidzë' ca' libí'ili'. ² Guli'gaca nöoxaj ladxi', en dxí'i ladxi'. Guli'cöz zxön ladxi'. Guli'gü' ladxi' luzá'ali' tulí' ia'tulí' lu yöl-la' nadxí'i queëli'. ³ Guli'gü' ladxi' gácatica'silli' tuz ca na' chinunë' Dios Bö' Lá'ayi libí'ili', gunli' caní lu yöl-la' riböza tsáhui' do' queëli' le rutsaga libí'ili'.

⁴ Tuz naca idútë le naca cazë' Cristo le nadzágaru' rë'u.

Tuzë' náquië' Dios Bö' Lá'ayi dzáguïë' rë'u.

Tuz naca le runru' löza, lë na' bulidzë' rë'u Dios para uzi'iru' xibé.

⁵ Tuzë' náquië' Xanru'.

Tuz le réajlë' eru'.

Tuz le bidílaru' nisa.

⁶ Tuzë' náquië' Dios Nu naca Xúziru' yúgu'tëru'.

Lë' rinná bé'enë' yúgu'tëru'.

Rugunë' dxin yúgu'tëru'.

Riböza cazë' Lë' lu icja láxí' do'oru' yúgu'tëru'.

⁷ Tu turu' nazí'iru' tu yöl-la' huáca queë' Dios tsca naca le bennë' Cristo que queëru'.

⁸ Naca caní ca na' nazúaj lu guichi lá'ayi le rnna:

Buëpë' yehua' yubá, guchë' è zíán bönachi gula'dzúngaca.

Gudísí' quégaca bönachi le runödzjasé' quégacië'.

⁹ ¿Bixxi rë'ëni inná lë na' rnna: buëpë? Rusëdi rë'u bötjë' zí'alö, en bidxinë' yödzölió cadxí'ilö ni. ¹⁰ Nu na' bótaj naca Bönni' na' buëpë' xitsá'térö ni' yehua' yubá para budzë' è yúgu'të len le naca cazë' Lë'. ¹¹ Cristo caz bennë' que queëru' yugu' yöl-la' huáca queë'.

Bë' lataj bal-lë' bönni' iláquië' gubáz queë'.

Benë' ga tu'ë didza' uláz queë' Dios ia'bal-lë' bönni'.

Gusöl-lë' è ia'bal-lë' tsójéngacië' libán que didza' dxí'a.

Bucu'ë ia'bal-lë' para ilún chi'ë bönachi queë'.

Bucu'ë ia'bal-lë' para ulu'sédinë' bönachi queë'.

¹² Cristo caz bupë' è bönachi queë' caní para gaca ilún xichinë', para ilún ga ilaca idú nupa nádagaca ca idútë le naca cazë' Lë'. ¹³ Caní gaca ga idxintë dza huöácaru' tuz yúgu'tëru' ca réajlë' eru' Cristo, en ca núnbeë' eru' -në' Zxi'inë' Dios. Gácaru' nál-la, en huöácaru' idú ca náquië' Lë cazë' Cristo. ¹⁴ Bíti'rö gácaru' ca yugu' bífido', ca nádagaca nupa na' tu'tsa'të ca túngaca, en nádagaca ca tu le nachë' lu yegu, o ca tu le röjchë' bíti'tës bö' recja, tu' ta'zí' lu në'eguequi bíti'tës

didza' nu rusëdi léguequi, nu na' rizí' ye'e léguequi len yöl-la' sina' que, en run ga ta'chixi ta'nigui. ¹⁵ Na'a, rë'u ni, tu' nadxí'iru' luzá'aru', ral-la' güí'iru' didza' le naca idútë li para gaca huöácaru' idú ca náquië' Cristo, en gácaru' tuz len Lë'. Nu naca Xani idú le naca cazë', le nácaru' rë'u. ¹⁶ Cristo caz runë' ga rutsaga dxi'a idútë le naca cazë', le nácaru' rë'u, ate' idútë le naca cazë' na' naguela' tsözxön ni'a que lë na' run tuz idútë le naca cazë'. Cate' tu turu' runru' xichinru', rë'u na' dzágaru' le naca cazë', idútë rizzön, en raca idú, ca na' zeaj rácarö idú ca nadxfí'iru' luzá'aru'.

Yöl-la' na'bán cubi náparu' tu' nácaru' tuz len Cristo

¹⁷ Uláz queë' Xanru' rea' libí'ili' lë ni, en rigua' le lu ná'ali', rnñia': Bíti'rö gunlí' ca tun nupa bití' núnbë'gaquië' Dios, nupa na' tun ca ta'za'sö ládxí'guequi, ¹⁸ en nachul-la nanítigaca icja ládxí'do'guequi. Tu' cabí nözguequinë' le nácatë, en nazídigaquië', bití' nazí'gaquië' yöl-la' na'bán na' runnë' Dios queëru'. ¹⁹ Bití' ca' tu'tu'inë'. Nudödi cuïngaqueië' lu le ruá' dö'. Idú ládxí'gaquië' tunë' yúgu'te le cabí naca tsahui'. ²⁰ Nupa ni' bulu'sedi libí'ili' ca naca queë' Cristo, bití' ca' bulu'sedi libí'ili' gunlí' ca tun böñachi caní. ²¹ Le naca idútë li biyönilí' ca naca queë' Cristo, en le nácalí' queë' tu'sédinë' libí'ili' le naca idútë li na' zóalen Jesús. ²² Guli'nná be'e yöl-la' böñachisö queëli' le gúcalí' zí'alö, lë na' riniti ni'a que yöl-la' rizë ladxi' queëli' le ruá' dö' le guzxí' ye'e libí'ili'. ²³ Ral-la' huöácalí' cubi lu icja ládxí'do'oli', en lu bö' naca cázali'. ²⁴ Ral-la' sí'ili' yöl-la'böñachi cubi le nunë' Dios ca naca cazë' Lë', le rului'i cuini ni'a que le naca dxi'a, en le naca tsahui' runli', en run ga gaca gunlí' caní.

²⁵ Que lë ni na', bíti'rö si' yë'ëli'. Yúgu'teru' ral-la' güí'ilenru' luzá'aru' didza' le nácatë, tu' dzágaru' yúgu'teru' idútë le naca cazë' Cristo.

²⁶ Channö hualéli', bití' ral-la' gunlí' dul-la'. Bití' ileli' xidzé. ²⁷ Bití' bi gunli' le güí'i lataj tu' xihui' ucúl-la' libí'ili'.

²⁸ Nu bönni' ribanë' ral-la' usanë' yöl-la' gubán queë', en tsázië' huen dxin para gata' queë' bi unödziej' quégaca nupa ta'yadzaj.

²⁹ Bití' güí'ili' didza' xihui', pero guli'güí' didza' dxi'a, yugu' le ilácalen nu yöní, en ilún ga gaca dxi'a que nu na'. ³⁰ Bití' usuhu' inili' Dios Bö' Lá'ayi, tu' naca bë' néquili' queë' Dios tu' zóalenë' Dios Bö' Lá'ayi libí'ili', ate' idxín dza údxí usölë' libí'ili' lu dul-la'.

³¹ Guli' cúa ladaj libí'ili'
yöl-la' ruzzxë'e, en yöl-la' ridzä'a,
en yöl-la' rilé, en yöl-la' ridil-la didza',
en yöl-la' rutsaga yudxi,
en yúgu'te yöl-la' bití' rilé'e luzá'ali' dxi'a.

³² Ral-la' gácalí' dxi'i ladxi',
en huéchi' ládxí'ili' luzá'ali' tulí' ia'tuli',
en uniti lolí' luzá'ali' tulí' ia'tuli',
ca na' benë' Dios, buniti lahuë' libí'ili' tu' nácalí' tuz len Cristo.

5

Ca ral-la' ilaca nupa nácagaca ca bi'i queë' cazë' Dios

¹ Tu' nácalí' ca bi'i queë' cazë' Dios, ate' nadxfí'inë' libí'ili', guli'güí' ladxi' gácalí' ca náquië' Lë'. ² Ca naca yúgu'te le runli': Ral-la' idxi'ili' luzá'ali' ca na' benë' Cristo. Bidxfí'inë' rë'u, en budödi cuinë' lu yöl-la' guti uláz queëru'. Ben cuinë' ca böa' bëdxido' rútitu'-ba' lahuë' Dios tu' nözi dul-la' nabága'ru'.

Gúquië' ca' ca tu le rilá' zxixi le raza ládxë'ë Dios le rigú'uru' lu bucugu lá'ayi queë'.

³ Tu' nácali' queë' Dios,
biti' ca' gunli' le ruá' dö',
en biti' gunli' le cabí ral-la' gunli',
en biti' uhuídil'i'.

Ní'irö cuntu nu gaca bi innë queëli'.

⁴ Biti' gü'ili' didza' xihui',
o didza' canöz, o didza' cá'asö,
yugu' le cabí ral-la' gunli',
pero nácarö dxi'a guíeli'-në' Dios: "Xclenu'."

⁵ Chinöz quézili' nitúë bönni' runë' le ruá' dö' biti' ca' tsázië' ga rinná bë'ë
Cristo tsözxörn len Dios, o nu bönni' runë' le cabí ral-la' gunë', o nu bönni'
ruhuídil'në'. Nu na' ruhuidi' naca ca nu reaj ladxi' budó' guíoj budó' yaga.

⁶ Biti' gü'ili' lataj nu si' ye'e libíili' len didza' biti' nácatë. Tu' nözi dul-la'
caní Dios gunë' xígua' nupa biti' túngaca ca rnna xtídzë'ë. ⁷ Biti' ca' gunli' tuz
bönachi caní.

⁸ Zí'atélo guzóali' ga naca chul-la que dul-la', pero na'a zóali' lu bení', tu'
nácali' tuz len Xanru'. Guli'gaca ca böñachi ta'dá lu bení', ⁹ tu' run bení' na' ga
gácaru' dxi'i ladxi', en ga gü'iru' didza' le naca idútë li, en ga gácaru' tsahui'.
¹⁰ Guli'gü' ladxi' inózili' le raza ládxë'ë Xanru'. ¹¹ Biti' gütsa'li' nupa tun le ruá'
dö', lë na' tunë' ga naca chul-la que dul-la', pero buli'béaj ga liná' yugu' lë na'
tunë'. ¹² Utu'iru' gü'iru' didza' ca naca le tun böñachi na' bagáchi'sö. ¹³ Cate'
bi ubéajru' ga liná', gaca bë' yúgu'të tsca nácagaca, tu' gun le naca bení' ga gaca
bë' yúgu'të. ¹⁴ Que lë ni na' nazúaj lu guichi lë na' rnna:

Bubán, lí' na' rasiu'.

Guyasa ladaj nupa nátigaca.

Cristo uzení'ë quiu'.

¹⁵ Buli'yú cuinli' ca runli'. Biti' gácali' nupa biti' ta'yéajni'ini, pero guli'gaca
böñachi ta'yéajni'i. ¹⁶ Guli'sí' xibé lataj dë queëli' tu' chizóaru' dza biti' raca
dxi'a queëru'. ¹⁷ Biti' gácali' bönni' biti' bi' nözguequinë'. Guli'gü' ladxi'
tséajni'ili' le rë'ënë' Xanru' gunli'.

¹⁸ Biti' súdxili', tu' gun yöl-la' rizudxi ga nítili' tsaz.

Guli'gü'ida' lataj inná bë'enë' Dios Bö' Lá'ayi libíili'.

¹⁹ Guli'gü'ilen luzá'ali' didza' tulí' ia'tuli',
ugunli' dxin yugu' le rul-la lègaca salmo,
en yugu' le rul-la yöl-la' ba Dios,
en yugu' le rul-la nagu'ë Dios Bö' Lá'ayi icja ládx'i'do'oru'.

Idú ládx'i'ru' ral-la' gúl-laru' queë',
le cú'uru'-në' Dios yöl-la' ba.

²⁰ Guli'gún dxin Lë' Xanru' Jesucristo,
en guli'guíetica'së' Xúziru' Dios: "Xclenu'" ca naca yúgu'të.

Ca ral-la' gunru' quégaca dí'a dza queëru'

²¹ Guli'gún ca rnna xtídz'a' luzá'ali' tulí' ia'tuli' para caní gunli'-në' Dios
zxön.

²² Libíili', yugu' nigula, guli'gún ca rnna xtídz'a'gaquíe' bönni' que queëli',
ca na' ral-la' gunli' ca rnna xtídzë'ë Xanru'. ²³ Caní ral-la' gunli', tu' rinná
bë'enë' bönni' nigula queë' ca na' runë' Cristo, rinná bë'enë' böñachi queë'.
Cristo náquië' ca' Nu rusólá böñachi queë', nupa na' dzágagaca le naca cazë'

Lë'. ²⁴ Ca na' tun bönachi queë' Cristo ca rnna xtídzë'ë, lësca' caní ral-la' ilunnu nigula ca rnna xtídza'gaquië' bönni' que queëgacanu ca naca yúgu'të le raca.

²⁵ Libí'ili', yugu' bönni', ral-la' idxí'ili'-nu nigula que queëli' ca na' Cristo nadxi'inë' bönachi queë', en budödi cuinë', gútië' uláz quégagaquië'. ²⁶ Gútië' Cristo para bubéajë' quez queë' Dios bönnachi queë' na', ate' nayárigaca tu lu nisa le naca xtídzë'ë. ²⁷ Gútië' uláz quégagaquië' para gaca usudxinë' légaquië' lahuë' Dios, nácagaquië' ca tu lari' lachi, biti' nuá' bösaj le në'aj, en biti' naxú'una, en biti' zoa nitú le run ditaj le, pero runë' ga ilácagaquië' idú dxi'a, cuntu nu gaca bi inné quégagaquië'. ²⁸ Ral-la' idxí'ili'-nu nigula que queëli' ca na' nadxi'i cuinli'. Nu bönni' nadxi'inë'-nu nigula queë', nadxi'i cuinë'. ²⁹ Cuntu nu bönni' runi zi' cuinë', pero rugahuë', en run chi'i cuinë', ca runë' ca' Cristo, ca rúnlenë' bönnachi queë', ³⁰ nupa dzágagaca idútë le naca cazë'.

jRë'u ni dzágaru' le naca cazë' Lë'
jNéquiniru' xipélë'ë, en dxita queë'!

³¹ Lësca' caní nazúaj lu guichi lá'ayi le rnna: "Que lë ni na' tu bönni' ral-la' ucá'anë' xuz xinë'ë para tsöjsóalenë'-nu nigula queë', ate' irópatë' ulu'huöáquië' tuz." ³² Lë na' nazúaj lu guichi ni rului' lahuí tu le naca idútë li, ate' nedá' réquida' ruí'i didza' ca' ca naca queë' Cristo, en quégaca bönnachi queë' na'. ³³ Lësca' ruí'i didza' ca naca queëli'. Yúgu'tëli' libí'ili', bönni', ral-la' idxí'ili'-nu nigula que queëli' ca na' nadxi'i cuinli', ate' yugu' nigula ral-la' ilunnu bal bönni' que queëgacanu.

6

¹ Libí'ili', yugu' bï'ido', ral-la' gunli' ca rnna xtídza'gaquië' xuz xiná'ali' para caní gunli' ca rnna xtídzë'ë Xanru'. Ral-la' gunli' le naca tsahui'. ² Xibá zí'alö na' benë' Dios le nachë' tu le guzxí' lu në'ë gunë', naca lë na' rnna: "Ben bal xuz xinó'o, ³ ate' gaca dxi'a quiu', ate' xidzé su' ibanu' yödzölió ni."

⁴ Libí'ili', yugu' xuz, biti' gun leli' zxí'ini'li', pero buli'xön légaçabi', en guli'sína' légaçabi', en buli'sëdi légaçabi' ca raza ládxë'ë Xanru'.

⁵ Libí'ili', núlölí' nácali' bönni' nadó'ogaca, guli'gún ca rnna xtídza'gaquië' xanli' luyú ni idú ládxí'li', gunli' légaquië' bal lu yöl-la' radxi queëli', en gunli' xichíngaqüië' ca ral-la' gunli' xichinë' Cristo. ⁶ Guli'gún xichíngaqüië', calégasö cate' ní' tu'yú' libí'ili' para uruajli' dxi'a lógaquië', pero idú ládxí'li' guli'gún xichíngaqüië' ca raza ládxë'ë Dios, ca na' ral-la' gunli' xichinë' Cristo. ⁷ Idú ládxí'li' guli'gún xichíngaqüië', ate' caní gaca, gunli' xichinë' Xanru', en calégasö xichíngaca bönnachi. ⁸ Nöz quézili' ca gunë' Xanru'. Ubi'ë que queëru' tsca naca le dxi'a runru' sal-la' nadzanru', o sal-la' nácaru' bönni' nadó'ogaquië'.

⁹ Libí'ili', nacuá' queëli' bönni' nadó'ogaca, guli'gún dxi'a caní quégaca huen dxin queëli' na', en biti' uzeli' ba nadx légaquië'. Guli'tsöjnë ca naca queëli', yú'uli' lu në'ë Xanru' zoë' yehua' yubá la' ca nácatë quégagaquië', ate' Lë' biti' rutsë'ë ca runë' que que bönnachi.

Dios runnë' queëru' le tun chi'i rë'u

¹⁰ Na'a, böchí' luzá'ado', guli'gaca tsutsu tu' nácali' tuz len Xanru', en záolen libí'ili' yöl-la' huáca zxön queë'. ¹¹ Guli'gún chi'i cuinli', ugunli' dxi'n yugu' le runnë' Dios queëru', le tun chi'i rë'u, para gaca sóali' tsutsu cate' guë'eni si' bë' tu' xihui' libí'ili'. ¹² Biti' ridí'lalenru' bönnachi néquiguequini bëla', en dxita, pero ridí'lalenru' yöl-la' unná bë' quégaca bô' xihui' ta'dá lu bô'ös, en dzágagaca

nupa ta'nná bë', en nupa nadéli'gaca yöl-la' unná bë', en nupa dë lu ná'agaca, nupa nacuá' yödzölió ni ga naca chul-la que dul-la'. ¹³ Que lë ni na':

Guli'sí' yúgu'të le runnë' queéru' Dios le tun chi'i rë'u,
para cate' idxín queéru' dza ni' ilaca le nácabaca xihui',
gaca guá' ilenli',
en cate' údxi gunli' caní, ugá'anali' tsutsu.

¹⁴ Guli'sóoa tsutsu.

Guli'sí' le naca idútë li,
le gaca queéli' ca tu guídi guga' lé'eli'.

Guli'gaca tsahui' tu' gun chi'i libí'ili' le naca tsahui'
ca run tu lari' yödx run chi'i luchu'ë bönni' rejë' gudil-la.

¹⁵ Guli'sóoa sina' para gunli' libán que didza' dxí'a
le ribequi dxi icja ládxí'do'oru' lahuë' Dios,

ca na' ruzóaa cuinë' sina',
en ridë'ë xiráchuë' tu bönni' rejë' gudil-la.

¹⁶ Le naca lo, yöl-la' réajlë' queéli' Cristo
gaca queéli' ca tu le naca tsutsu uzéli' loli',
para cabí gál-la' yugu' le usán tu' xihui' libí'ili',
le nácabaca ca yaga túchi'do' zoa guí' láhuilöguequi.

¹⁷ Yöl-la' russólá gaca queéli' ca tu lu'u guíë le gun chi'i ícjali'.
Xtídzë'ë Dios gaca queéli' ca tu guíë tuchi'
le runnë' Dios Bö' Lá'ayi queéru',
para útil-lalenru' le naca xihui'.

¹⁸ Guli'gún yúgu'të lë ni,
en buli'lidzë' Dios inábili'-në' gácalenë' libí'ili'.

Buli'lídzatica'sé' Dios zóalenë' Dios Bö' Lá'ayi libí'ili'.

Para gunli' caní ral-la' usubán ládxí'li' en cabí huðaj ládxí'li',
inábili'-në' Dios gácalenë' nupa néquiguequi queéë'.

¹⁹ Buli'lidzë' Dios, inábili'-në' gácalenë' ca' neda', en gunnë' quia' didza' cate' ral-la' gu'a didza', en gunë' ga gaca' rugu ladxi' cate' guna' libán para uzéajni'ida' böñachi ca naca le bigachi' que didza' dxí'a. ²⁰ Dios budödë' lu na'a didza' dxí'a na' para guna' libán que, ate' tu' bena' caní yu'a lidxi guíë ni. Buli'lidzë' Dios channö, inábili'-në' gunë' ga gaca' rugu ladxi' para guna' libán que didza' dxí'a ca ral-la' guna'.

Ruúdx didza' bë'ë Pablo

²¹ Tíquico, böchi'ru' na' nadxí'iru'-në', en runë' xichinë' Xanru' idú ládxë'ë, quíxjör'inë' libí'ili' idú ca raca quia', en ca runa' neda' ni. ²² Que lë ni na', isölla'a-në' queéli', ate' ulu'inë' libí'ili' ca raca queétu', ate' caní utipé' ládxí'li'.

²³ Rinábida'-në' Xúziru' Dios, enca' Xanru' Jesucristo gunë' ga soa dxi icja ládxí'do'oli', en gata' queéli' yöl-la' nadxí'ile dzaga yöl-la' réajlë' queéli' Cristo, yúgu'tëli' na' néquili' queéë'. ²⁴ Le ruzá' ládxë'ë Dios queéru' gaca queéli', yúgu'tëli' na' nadxí'ili'-në' Xanru' Jesucristo, naca idú yöl-la' nadxí' queéli' Lë. ¡Ca' gaca!

DIDZA' GUSÖL-LË'Ë PABLO YÖDZÖ FILIPOS

Pablo rugapë' Dios böñachi queë' Cristo nacuá' Filipos

¹ Neda', Pablo, enca' bi'i Timoteo, nactu' huen dxin queë' Jesucristo. Rugapa' Dios libí'ili', réajlë'ëli' Cristo, en libí'ili', dë lu ná'ali' xichinë' Cristo, en libí'ili', run chí'ili' böñachi queë' Cristo. Zóali' Filipos, en néquili' queë' Dios, en nácali' tuz len Jesucristo. ² Rinábida'-në' Xúziru' Dios, enca' Xanru' Jesucristo gunnë' queëli' le ruzá' ládxë'ë queëru', en gunë' ga soa dxi icja ládx'i'do'oli'.

Pablo rinabinië' Dios bi gunë' quégaca böñachi ta'yéajlë' Cristo

³ Rea'-në' Dios: "Xclenu'", cate' rizá' ládx'a'a queëli'. ⁴ Cate' rulidza'-në' Dios, en rinábida'-në' gácalenë' libí'ili', rudzeja ládx'a'a ⁵ tu' röjneda' ca bénlenli' neda' tsözxön dxin que didza' dxi'a. Gusí loli' runli' dxin na' dza ni' si' biyónili', en runli' le ga ridxitnë na'a dza. ⁶ Dios gusí lahué' runë' tu le naca dxi'a lu icja ládx'i'do'oli'. Ruzxöni ládx'a'a Lë' gúntica'së' caní ga idxintë dza huödë' Jesucristo. ⁷ Ca na' rizá' ládx'a'a queëli' naca ca ral-la' guna' tu' nadxi'i'de'eda' libí'ili'. Yúgu'téli' ruzí'ili' xibé tsözxön len neda' le ruzá' ládxë'ë Dios queëru', tsanni ni yu'a lidxi guíë, en lésca' caní benli' cate' ni' bë'a didza', cate' na' bena' libán que didza' dxi'a le bena' ga bidxín queëli' tsaz. ⁸ Nörzinë' Dios ca nadxi'i'de'eda' libí'ili'. Naca ca na' nadxi'i'de'enë' Lë' cazë' Jesucristo rë'u. ⁹ Rinábida'-në' Dios gunë' ga idxí'iröli' luzá'ali', en gáta'da' queëli' yöl-la' rácada', en yöl-la' réajni'i idú ¹⁰ para gaca cöli' le nácatérö dxi'a. Channö gaca caní queëli', gácali' idú dxi'a, ate' cuntu nu gaca bi innë' queëli' dza ni' huödë' Cristo. ¹¹ Le nácali' naca bë' le naca dxi'a runë' Cristo lu icja ládx'i'do'oli' para ilá' lahui yöl-la' zxön queë' Dios, en gaca queë' yöl-la' ba.

Zóaru' nabanru' para gácaru' ca náquië' Cristo

¹² Böchi' luzá'ado', rë'ënda' inözili' lë ni: Yúgu'té le guca quia' gulácalen neda' para guzxéqui'röda' bena' libán que didza' dxi'a. ¹³ Caní guca, yúgu'té ni'a ná'agaquie'bönni' yúlahui', en ia'zíca'rë' bönni' ni nözguequinë' yu'a lidxi guíë ni tu' runa' xichinë' Cristo. ¹⁴ Tu' yu'a neda' lidxi guíë ni ben ga látu'biqu' yúgu'té böchi'ru' nácagacarë' rugu ladxi', ate' tu'zxöni ládx'i'gaquie' Xanru', en bíti'rö tádxinë' tunë' libán que xtídzë'ë Dios.

¹⁵ Le nácaté bal-lë' tunë' libán queë' Cristo tu' tu'zxé'enë' neda', en ta'dil-lë', pero ia'bal-lë' tunë' libán queë' idú ládx'i'gaquie'. ¹⁶ Yugu' bönni' tu'zxé'enë' na' tunë' libán queë' Cristo lu yöl-la' run ba zxön cuíngaquie', en caléga idú ládx'i'gaquie'. Té'ennë' ulu'saca' zi'ë neda' tsanni ni yu'a lidxi guíë. ¹⁷ Yugu' bönni' idú ládx'i'gaquie' na', lu yöl-la' nadxi'i quégaquequie' tunë' libán queë', tu' nözguequinë' Dios caz budödë' lu na'a dxin runa', runa' libán que didza' dxi'a. ¹⁸ Biti' run lë na' ga rö'a böñiga. Rudzéjada' tu' raca libán queë' Cristo nácati'tës, sal-la' tunë' libán idú ládx'i'gaquie' o biti' tunë' le caní.

Na'a, rudzéjaröda' ¹⁹ tu' chinözida' ulá' lu le raca quia', yu'a lidxi guíë ni, tu' rulídzali'-në' Dios, en tu' rácalenë' Dios Bö' Lá'ayi neda'. Náquië' Bö' risöllë'ë Jesucristo queëru'. ²⁰ Caní rë'ënda', en ruzxöni ládx'a'a-në' Dios, gunë' ga biti' utu'ida', en gunë' ga gaca gu'a didza' lu yöl-la' rugu ladxi', ate' lu na'a neda' gácatica'sö yöl-la' ba queë' Cristo na'a dza, en yugu' dza zá'gaca, sal-la' gun bayudxi gátitea', o soa' ibana'. ²¹ Ca runi neda', channö zoa' nabana', naca para gaca' ca náquië' Cristo, en channö gátia', naca tu le uzf'ira' xibé.

²² Channö huáca guna' dxin le gácalen didza' dxi'a queë' Cristo channö sóasa' ibana', biti' nözda' bízxilö ral-la' cōa'. ²³ Naca böniga cōa'. Rē'ënda' gátitea' para tsöjsóalentea' -në' Cristo, tu' gácatérö dxi'a quia', ²⁴ pero runrö bayudxi sóasa' ibana' para séqui'da' gácalena' libí'ili'. ²⁵ Tu' chinözida' naca caní, nözda' ca' ugá'analena' libí'ili' para gácalena' libí'ili' para gácarö idú ca réajle'ëli' Cristo, ate' udzéjaröli' tu' réajle'ëli' Lë'. ²⁶ Caní naca, udusóalena' libí'ili' leyúbölö, le gun ga tsaz ládxí'ili'-në' Jesucristo ni'a que le gunë', gácalenë' neda'.

²⁷ Guli'gü'sö ladxi' gácali' ca sa'yéaj didza' dxi'a queë' Cristo. Caní gaca, channö uduyúa' libí'ili' o channö soa' zi'tu', huayónida' nácali' tsutsu, en nácali' tuz, runli' tsözxön dxin que le réajle'ëru' le za' queëru' ni'a que didza' dxi'a. ²⁸ Biti' güi'ili' nupa biti' ta'lé'e libí'ili' dxi'a lataj ilún gadxi libí'ili'. Lë ni ului'i légaquí' ila'nítie', pero ulál'i libí'ili', le gaca bë'rácalenë' Dios caz libí'ili'. ²⁹ Dios ru'ë libí'ili' lataj gunli' xichiné' Cristo, calégasö ca réajle'ëli' Lë', pero lësca' ca rigu'i rizáca'lí' cate' runli' xichiné'. ³⁰ Na'a, gaca gunli' neda' tsözxön güi'ili' ládxí'ru' gunru' libán que didza' dxi'a. Bilé'e quézili' ca gudi'i guzxáca'a cate' bena' caní zí'alö, ate' riyonili' ca rigu'i rizáca'a ca' na'a.

2

Gúquië' Cristo nöxaj ladxi', ate' bidéli'në' yöl-la' zxön

¹ Cristo runë' ga rutipa ládxí'ili', en lu yöl-la' nadxi'i queë' ruhuéchi' ládxéë'ë libí'ili', en runë' ga nácali' tuz len Dios Bö' Lá'ayi, en ga nadxi'ili' luzá'ali', en ga ruhuéchi' ládxí'ili' luzá'ali' tulí' ia'tulí'.

² Na'a guli'gún ga udzéjarö ládx'a'a. Para gunli' caní, ral-la' gácali' tuz len luzá'ali', en gaca lëbisö ca nadxi'ili' luzá'ali' tulí' ia'tulí'. Lësca' caní ral-la' gácali' tuz lu bö' naca cázali', en ca rizá' ládxí'ili'. ³ Ca naca le runli', biti' bi ral-la' gunli' lu yöl-la' rudul-li' queëli', o para gun ba zxön cuinli', pero dxí'ado' ral-la' gunli' yúgu'të, en cabí guéquili' nadéli'röli' libí'ili' ca luzá'ali'. ⁴ Guli'gü'i ladxi' gaca dxi'a ca' que luzá'ali', en caléga queëzili'.

⁵ Ral-la' gácali' nöxaj ladxi' ca na' gúquië' Jesucristo nöxaj ladxi'. ⁶ Lë' naca cazé' lëbisö ca náquië' Dios caz, pero biti' gúquiñë' ral-la' gunë' bayudxi ugá'anë' lëbisö ca na' náquië' Dios. ⁷ Bucá'ana cazé' yúgu'të le napë', en ben cuiné' ca tu bönni' nadö'o. Gulje' ca talaj bönnachi, en gúquië' idú bönnachi. ⁸ Cate' ni' náquië' bönni', gúquië' nöxaj ladxi', en benë' ca rnna xtídze'ë Dios, en gútië'. Gudë'ë lë'e yaga cruz ca na' raca queë' nu bönni' nabágue'ë dul-la'. ⁹ Que lë ni na' Dios buchise' Lë', en benë' ga náquië' lo ni' yehua' yubá, en benë' ga lë' tu le nácatérö lo ca yúgu'të lágaca bönnachi. ¹⁰ Caní benë' Dios para cate' ila'yöni ca na' lë' Jesús, ulu'zechu zxibigaca yúgu'të nupa nacuá' yehua' yubá, en lu yödzölió, en lu lataj chul-la. ¹¹ Yúgu'të' ila'guíxjö'ë yálajdo' Jesucristo náquië' Xanru' para gaca yöl-la' ba queë' Xúziru' Dios.

Ral-la' gácaru' ca tu le ta'gú'u bení' yödzölió ni

¹² Que lë ni na', böchi' luzá'ado', ca na' benli' ca rnna xtídza'a cate' ni' zóalena' libí'ili', runrö bayudxi gunli' ca rnna xtídza'a na'a, tsanni ni zoa' zi'tu' ga zoáli'. Guli'gún xichiné' Xanru' ga idxitnë dza údxí usölë' libí'ili'. Guli'gún caní lu yöl-la' radxi queëli' Lë', en lu yöl-la' rizzizi. ¹³ Lë cazé' Dios runë' dxin lu icja ládxí'do'oli'. Runë' ga rë'ënili' gunli' le raza ládxéë'ë Lë', en runë' ca' ga séqui'li' gunli' lë na'.

¹⁴Guli'gún yúgu'té le ral-la' gunli', en biti' bi innéli' que, en biti' til-la dílda'li'.
¹⁵Caní ral-la' gunli', para cabí gaca nu bi inné queéli', pero caní gácalí' ca zxí'ini cazeë' Dios, nácalí' idú dxi'a yödzölió ga ni zóali' ladaj böñachi biti' nácabaca tsahui', en nucá'anagaca Dios. Libí'ili' rigú'uli' bení' lädjagaquie' ca na' ta'gú'u bení' bólaj lúzxiba cate' ni naca chul-la, ¹⁶cate' ruí'ili' lógaquie' didza' ibániguequiné'. Channö caní gunli', huáca udzéjade'eda' ni'a que le naca cázali' dza huödë' Cristo, tu' inözda' biti' guca nítisö guzóa böñadxi gátia', en caléga nítisö bena' dxin. ¹⁷Yöl-la' réajlë' queéli' Cristo naca tu le raza ládxë'ë Dios. Sal-la' gun bayudxi gátia' para gaca idú yöl-la' réajlë' queéli' Lë', udzéjada', en uzi'lena' xibé tsözxön yúgu'teli'. ¹⁸Lësca' caní ral-la' udzéjali' libí'ili', en uzi'lenli' tsözxön neda' xibé.

Ca tunbi' bi'i Timoteo, en bi'i Epafradio

¹⁹Channö caní rë'ënë' Xanru' Jesús, runa' löza isöl-la'tea'-bi' bi'i Timoteo ga zóali', ate' ni'irö udzéjada' cate' huödabi' ududíxjöi'ibí' neda' cátëze raca queéli'. ²⁰Túzibi' lëbí' rizá'ládxí'bi' ca na' rizá'ládx'a'a neda', en ruí'ida'ládxí'bi' libí'ili'. ²¹Yúgu'té bönni' ia'zíca'rö, le naca quégacase' tuí'i ládx'i'gaquie'. Biti' tuí'i ládx'i'gaquie' xichinë' Cristo. ²²Nöz quézili' ca benbi' bi'i Timoteo, ca na' burúajbi' dxi'a. Bénlenbi' neda' tsözxön dxin que didza' dxi'a, ate' nácabi' quia' ca tubi' bi'i bönni' rúnlenbi'-në' tsözxön xúzibi' dxin. ²³Isöl-la'a-bi' bi'i Timoteo ga zóali' cate' inözda' nacxi gaca quia' ni ²⁴sal-la' ruzxöni ládx'a'a-në' Xanru' gunë' ga uduyútea' libí'ili'.

²⁵Lësca' réquida' run bayudxi isöl-la'a-bi' bi'i böchí'ru' Epafradio ga zóali'. Bi'i ni bénlenbi' neda' tsözxön dxin queéli' Cristo, ate' gudí-lalentu' tu' xihui'. Libí'i cázali' gusöl-la'li'-bi' ga zoa' para gácalenbi' neda'. ²⁶Lë cázabi' rë'ënibí' uduyúbi' libí'ili', en ruí'ida'ládxí'bi' libí'ili' tu' biyónili' ben bayá' queébi'. ²⁷Le nácaté güí'ibí', en guqui gátibi', pero buéchí' ládxë'ë-bi' Dios, en calégasö lëbí', pero buéchí' ládxë'ë ca' neda', para cabí isébirö ládx'a'a ca na' risëbi ládx'a'a na'a. ²⁸Que lë ni na', gú'uniröda' isöl-la'a-bi' queéli' para gaca udzéjali' leyübólö cate' ulé'eli'-bi', en bíti'rö isébi ládx'a'a neda'. ²⁹Guli'sí' lu ná'ali' lëbí' lu yöl-la' rudzeja queéli', tu' nácabi' bi'i böchí'ru' réajlë'ëbi' Cristo. Guli'gún bal yúgu'té böñachi nácabaca ca nácabi' lëbí', ³⁰tu' guzóa böñadxi queébi' gátibi' tu' benbi' xichinë' Cristo, en tu' gúcalenbi' neda' uláz queéli'.

3

Le naca idú tsahui'

¹jNa'a, böchí' luzá'ado', buli'dzeja tu' nácalí' tuz len Xanru'! Biti' rupizzaj neda' uzúaja' queéli' leyübólö lë na' buzúaja' queéli' zí'alö, tu' gácalen lë ni libí'ili'. ²Guli'gún chi'i cuinli' lógaca nupa ni' tuá' dö'. Nácabaca ca yugu' bö'cu' sínia', nupa na' tun bayudxi irugu lu xipéla'gaquie' bönni' le naca bë' nazí' lu ná'gaquie' xtidzë'ë Dios. ³Rë'u nadéli'ru' lë na' naca idútë li, le naca bë' nazí' lu ná'aru' le runné' queéru' Dios. Tu' réajlë'ëru' Dios, zóalenë' Dios Bö' Lá'ayi rë'u, ate' rudzéjaro' tu' nácaru' tuz len Jesucristo. Biti' ca' ruzxöni ládxí'ru' tu le runru' rácasö queéru'. ⁴La'tu' ruzxöni ládxí'ru' lë ni, lësca' neda' chinadéli'da' bi uzxöni ládx'a'a. Channö zoë' nu bönni' réquinë' ulé' tu' nacuá' le nunë', neda' nadéli'röda' ca bönni' na':

⁵Gurugu lu xipéla'a lë na' naca bë' cate' ni' gúquida' xunu' dza.
 Gulja' ladaj di'a dza quégaca böñachi Israel.
 Nababa' zxí'ini xi'sóë' Benjamín.

Xuz xiná'a nácagaquië' idú bönachi hebreo.

Guca' bönni' yudo' fariseo ca na' bena' ca rinná bë' xibá queë' Dios.

6 Bë'da' ládxa'a xibá na' ga bidxité gudxía ládxa'a bönachi queë' Cristo.

Tsca gaca gáquië' tsahui' tu bönni' tu' runé' ca rinná bë' xibá na', cuntu nu bi guca inné quia'.

7 Na'a, yúgu'té lë na' bena' zxöñ zí'alö, nuzó'a tsölá'alö tu' néquida' queë' Cristo. **8** Calégasö yugu' lë na', pero nuzó'a ca' tsölá'alö yúgu'té le dë, para gaca gúnbe'eda'-në' Xanru' Jesucristo, le nácatérö lesaca' ca yúgu'té lë na'. Para gúnbe'eda' Lë' gurú'una' ní'ilö yúgu'té, en réquida' naca ca bëbu, para uzi'a xibë' Cristo, **9** en para gaca' tuz len Lë'. Nuhuóáca' tsahui', caléga tu' runa' ca rinná bë' xibá na', pero Dios caz bunë' neda' tsahui' tu' réajlë'a Cristo, ca na' ruúné' tsahui' yúgu'té nupa ta'yéajlë' Lë'. **10** Réénisida' gúnbe'eda'-në' Cristo, en sóalen yöl-la' huáca queë' Dios neda', lë na' busubán Cristo lu yöl-la' guti, ate' guna' Lë' tsözxöñ, qui'i saca'a ca na' gudi'i guzxáquë'ë Lë', en soa' sina' gátia' ca gútié' Lë', **11** tu' runa' löza Dios, usubané' ca' neda' lu yöl-la' guti.

Le runru' para idxinru' xilátjaru'

12 Biti' rnnia' chinadéli'da' yúgu'té lë ni gunnë' quia', en biti' réquida' chinaca' idú tsahui'. Na'a, runa' bayudxi idéli'da' yúgu'té lë na', tu' chibidéli'në' Jesucristo neda'. **13** Böchi' luzá'ado', biti' ca' nadéli'da' yugu' lë ni, pero tuz le runa' bayudxi. Ruzál-la ládxa'a le chibidéli'da', ate' runa' bayudxi idéli'da' le za'. **14** Runa' ca runé' tu bönni' rixítidë'ë para idxiné' xilatjë' para idéli'në' tu le uzi'ë xibé. Caní runa' para idéli'da' lë na' bulidzë' Dios rë'u para gata' queëru' ni' yehua' yubá tu' nácaru' tuz len Jesucristo.

15 Caní ral-la' gunru' yúgu'téru' rë'u, naca idú ca réajlë'ëru' Cristo. Channö réquili' bál-lali' ral-la' gunli' tu le yúbölö, rinábida'-në' Dios uzéajni'inë' libí'ili'.

16 Na'a, ca naca lë na' bidéli'ru', ral-la' gúntica'siru' caní.

17 Böchi' luzá'ado', guli'gún ca na' runa' neda'. Chibulu'itu' libí'ili' ca ralla' gunli'. Buli'yú ca tun nupa na' tun ca na' bentu' netu'. **18** Chigudxi caza' libí'ili' zián luzuí, ate' rea' libí'ili' leyúbölö len yöl-la' ribödxí quia', rnnia': Le tuné' zián bönni' run ga nácagaquië' ca nupa biti' ta'lé'e Cristo dxí'a, tu' tu'zöé' tsölá'alö le ben cazé' Lë' lë'e yaga cruz. **19** Yugu' bönni' tuné' caní, tsójáquië' lu guí' gabilia, tu' naca le ta'zësö ládxi'gaquië' dios quégäquië', ate' tun ba zxöñ cuïngäquië' ni'a que lë na' ral-la' gun ga ulu'tui'inë'. Tui'i ládxi'sé le dë yödzölióni, **20** pero rë'u ni rui'i ládxi'ru' le dë yehua' yubá ga nabábaru', en ribözaru' dza huödë' Xanru' Jesucristo, Nu rusölä rë'u, urúajë' yehua' yubá na'. **21** Lë' utsë'ë idútë le naca cázaru', le riniti caz, en gunë' ga huöáca ca naca idútë le naca cazé' Lë', le sóatica'sö. Caní gunë' len yöl-la' huáca zxöñ queë' le ugune' dxin para inná bë'enë' yúgu'té.

4

Ral-la' udzéjalentica'siru'-në' Xanru'

1 Que lë ni na', böchi' luzá'ado', guli'gaca tsutsu ca réajlë'ëli'-në' Xanru'. Nadxi'ide'eda' libí'ili', en rë'ënda' uduyúa' libí'ili'. Runli' ga rudzéjada', en nácali' ca tu le ruzi'a xibé.

2 Libí'ili', Evodia, en Síntique, ráta'yua' loli' gácali' tuz ca ral-la' ilaca nupa néquiguequi queë' Xanru'. **3** Na'a, böcha'a idú, rë'ënda' gácalenu' irópanu ni, tu' gulúnlennu neda' dxin, cate' bentu' libán que didza' dxí'a. Lëscá' bulu'dzáguië'

Clemente, en ia'zíca'rë' luzá'a na' netu'. Chinazúajgaca lágacá nupa chinadéli'gaca yöl-la' na'bán idú.

⁴ ¡Buli'dzéjalentica'sö-në' Xanru'!

Leyúbölö, rnñia': ¡Buli'dzeja!

⁵ ¡Guli'gaca dxi'i ladxi' len yúgu'të böñachi!

¡Chizóa huödeë' Xanru'!

⁶ Biti' ubi ugu'ilí', pero guli'nabi-në' Dios le riquinili', en guli'guië': "Xclenu" ca naca yúgu'të lë na' rinabali'. ⁷ Dios gunë' ga gaca queëli' le cuéqui dxi icja ládxido'oli', lë na' nadödirö bë' ca le gaca ila'yéajni'i böñachi. Lë na' ribequi dxi icja ládxido'oru' gun chi'i icja ládxido'oli', en le rizá' ládxil' tu' nácali' tuz len Jesucristo.

Ral-la' sa' ládxiru' le nácagaca dxi'a

⁸ Ga ruúdxítë, böchi' luzá'ado', guli'sá' ládxil':
Yúgu'të le naca dxi'a, en le naca bica' ba,
en le naca idútë li, en le naca idú,
en le naca tsahui', en le naca ba'a,
en le naca lachi, en le ral-la' gunru' bal.

⁹ Guli'gún ca na' busédida' libí'ili', lë na' guzxí' lu ná'ali' tsca na' bë'lena'
libí'ili' didza', en tsca na' bena' ga ni' zóali'. Dios, Nu runna queëru' le ribequi
dxi icja ládxido'oru' sóalenë' libí'ili'.

Le tsahui' gulunë' yugu' bönni' Filipos queë' Pablo

¹⁰ Rudzéjalenda'-në' Xanru' tu' rui'i ládxil' neda' leyúbölö. Biti' rnñia' gula' ládxil' neda', pero biti' guta' queëli' lataj gácalenli' neda' zí'alö. ¹¹ Lësca' caní, biti' rnñia' caní tu' zoa bi riyadzaj quia', tu' nazëda' tsaza ládx'a' le dësö quia'. ¹² Chigudöda' lu yöl-la' yechi', en lu yöl-la' tsahui'. Nazëda' soa' nácati'tës, sal-la' nöljada' o nabila riduna', en sal-la' dëda' quia' o zoa bi riyadzaj quia'. ¹³ Yúgu'të huazéqu'i da' tu' rutipë' Cristo ládx'a'. ¹⁴ Benli' dxi'a cate' ni' gúcalenli' neda', en butípali' ládx'a' cate' gudí'i guzxáca'a.

¹⁵ Libí'ili', bönni' Filipos, nöz quézili' ca guca quia' dza ni' cate' buzá'a luyú Macedonia, para yøjena' libán que didza' dxi'a. Tsca nacuá' böñachi queë' Cristo, cúnтурö nu gúcalen neda', pero libí'isili' gúcalenli' neda'. Gusöllala'li' quia' bi bunödzjali', tu' guzxí' lu ná'ali' libán bena' neda'. ¹⁶ Tsanni ni' guzó'a yöödzö Tesalónica, tu chopa luzuú gusöllala'li' quia' le bunödzjali' cate' ni' biyadzaj quia'. ¹⁷ Biti' rui'i ládx'a' bi si'a, pero rë'ënda' gáta'rö queëli' le uzí'ili' xibé yehua' yubá. ¹⁸ Rea' libí'ili': Chiguzxi'a yúgu'të lë na' gusöllala'li' quia', ate' gudöditë bë' tsca le biyádzjada'. Ben ga naca caní lë na' gusöllala'li' lu ná'abi' bi'i Epafroditò. Lë na' bunödzjali' naca ca tu le rilá' zixxi le ridxintë lahuë' Dios, en ca tu le rigú'uru' lahuë' Dios le raza ládxë'ë. ¹⁹ Dios gunne' queëli' yúgu'të le riyadzaj queëli', tsca naca yöl-la' tsahui' rö'ö yehua' yubá, tu' nácali' tuz len Jesucristo. ²⁰ ¡Gácatica'sö queë' Xúziru' Dios yöl-la' ba! ¡Ca' gaca!

Yugu' böñachi queë' Cristo tu'gapa Dios luzë'eguequi

²¹ Uláz quia' neda', guli'gapa Dios nupa ni' néquiguequi queë' Dios tu' nácagaca tuz len Jesucristo. Tu'gapë' Dios libí'ili' böchi' luzá'aru' núngäquië' neda' tsözxön ni. ²² Lësca' yúgu'të nupa ni néquiguequi queë' Dios, tu'gapa Dios libí'ili', en lësca' caní, yugu' bönni' huen dxin nacu'ë lídxë' bönni' rinná bë'ë idú luyú Roma tu'gapë' Dios libí'ili'.

²³ Rinábida'-në' Xanru' Jesucristo uzá' ládxë'ë queëli' yúgu'teli'. ¡Ca' gaca!

DIDZA' GUSÖL-LË'Ë PABLO YÖDZÖ COLOSAS

Pablo rugapë' Dios böñachi queë' Cristo nacu'ë Colosas

1 Neda', Pablo, naca' gubáz queë' Jesucristo tu' rë'ënë' Dios caní, ate' dzágabi' bi'i böchí'ru' Timoteo neda'. **2** Rugapa' Dios libí'ili', zóali' Colosas. Nácali' böchí'tu' réajlë'ëli' Cristo, en nácali' quez queë' Dios. Rinábida'-në' Xúziru' Dios uzá' ládxë'ë queëli', en gunë' ga soa dxi icja ládxí'do'oli'.

Pablo rulidzë' Dios, en rë' Lë': "Xclenu"

3 Rética'stu'-në' Dios, Xuzë' Xanru' Jesucristo: "Xclenu" cate' rulidztu'-në' Dios, en rinábitu'-në' bi gunë' queëli' **4** tu' biyöñitu' didza' ca réajlë'ëli' Jesucristo, en ca nadxi'ili' yúgu'té nupa néquiguequi quez queë' Dios. **5** Caní runli' tu' runli' löza le nuzoë' Xanru' queëli' ni' yehua' yubá, lë na' biyöñili' que cate' bë'lentu' libí'ili' didza', le naca löza sí'ili' ni'a que didza' dxi'a. **6** Didza' dxi'a na' bidixín queëli' ca ridxín ca' idútë yödzölió. Run dxin, en raca libán que, idútë yödzölió, la' tuz ca raca ga zóali', dza ni'te ga ridxintë na'a dza, cate' ni' biyöñili', en bénbë'ëli' idútë le ruza' ládxë'ë queëru' Dios. **7** Epafras, bönni' nadxi'iru'-në', busédinë' libí'ili' lë ni. Lë' rúrلنë' netu' tsözxön dxin, en rácalenë' libí'ili'. Náquië' huen dxin idú queë' Cristo. **8** Bönni' ni gudíxjöi'inë' netu' ca nadxi'ili' luzá'ali', ate' runë' Dios Bö' Lá'ayi ga gaca gunli' caní.

9 Que lë ni na' netu' ca', dza ni'te ga ridxintë na'a dza, tu' réquibe'etu' lë ni, biti' ca' rizóá dxitu' rulidztu'-në' Dios, en rinábitu'-në' gácalenë' libí'ili', en gunë' ga gúnbe'ëli' idú le rë'ëni quézinë' Lë', en gunnë' queëli' yúgu'té yöl-la' rácada', en yöl-la' réajni'i le rigu'ë Dios Bö' Lá'ayi rë'u. **10** Caní rinábitu'-në' para gaca gunli' ca ral-la' ilún nupa néquiguequi queë' Xanru', gunli' yúgu'té le raza ládxë'ë Lë', en séqui'li' gunli' yúgu'té le naca dxi'a, en gácarö idú ca núnbë'ëli'-në' Dios. **11** Rinábitu'-në' utipë' ládxí'li', en gunnë' queëli' yöl-la' huáca idú queë', para gaca guá' ilenli' yúgu'té, en cözali' zxön ladxi', en udzeja ládxí'li'. **12** Lu yöl-la' rudzeja queëli' guli'guië' Dios Xuz: "Xclenu", tu' budödë' lu ná'aru' gata' queëru' lataj lu bení' queë', en gunru' tsözxön nupa néquiguequi quez queë'. **13** Dios Xuz na' busölë' rë'u lu na' nu rinná bë' lataj chul-la, en budödë' rë'u ga na' rinná bë'ë Zxí'ini cazé', Nu nadxi'inë'. **14** Zxí'inë' na' böá'uë' rë'u, tu' gútië' uláz queëru', ate' buniti lahuë' rë'u ca naca dul-la' gubága'ru'.

Nuhuöácaru' tuz len Dios tu' gútië' Cristo uláz queëru'

15 Cristo náquië' tuz ca náquië' Dios caz, Nu biti' gaca ilé'eru'. Zoa cazë' Lë' zí'atëlö ca yúgu'té le benë' Dios. **16** Lu në'ë Cristo benë' Dios yúgu'té le dë, le nacuá' lúzixa, en le nacuá' luyú, yugu' le rilé'eru', en yugu' le cabí gaca ilé'eru', lë na' nácacaca lataj lo, en yugu' yöl-la' unná bë', en le nápagaca yöl-la' zxön, en yugu' yöl-la' huáca que yehua' yubá, en que luyú ni. Yúgu'té benë' Dios lu në'ë Cristo para uzi'ë xibé Lë'. **17** Cristo zoa cazë' zí'alö ca yúgu'té le dë, ate' yúgu'té nacuá'tica'sö ni'a queë' Lë'. **18** Cristo náquië' Xángaca böñachi queë', en runödziejë' quégaquië' yöl-la' na'bán. Náquië' ca' Nu gusí lo bubán tsaz lu yöl-la' guti. Zí'alö Lë' bubanë' tsaz lu yöl-la' guti para tsépisëterë' ca yúgu'té le dë. **19** Caní guca, tu' guyaza ládxë'ë Dios Xuz sóalen Cristo idútë le naca cazë' Lë'. **20** Ni'a que le benë' Cristo, Dios benë' ga gaca ulu'huóáca tuz len

Lë' yúgu'të le dë, le nacuá' luyú, en le nacuá' lúzxiba. Bunë' lèguequi tuz len Lë' tu' bulaljë' Cristo xichönë' cate' gútië' lë' yaga cruz.

21 Libí'ili', zí'atélö nulá'alenli'-në' Dios, en gúcali' ca yugu' bönni' biti' ta'lé'enë' Dios dxi'a lu icja láxí'do'oli' ni'a que dö' biá'alí', pero na'a chibunë' libí'ili' tuz len Lë'. **22** Caní guca, tu' budödi cuinë' Cristo, en gútië' uláz queëli' para gaca usudxinë' libí'ili' lahuë' Dios, nácali' quez queë', en idú dxi'a, ate' cuntu nu bi gaca innë' queëli'. **23** Caní gaca channö ugá'anali' tsutsu ca réajlë'eli' Cristo. Gácali' ca tu yu'u zxoa ga rë' xilibi zö'ö que, en biti' tseaj bö' láxí'do'oli' ca runli' löza didza' dxi'a biyönili', lë na' raca libán que idútë yödzölió le benë' Dios zxan lúzxiba. Dios buzóë' neda', Pablo, para gaca' huen dxin que didza' dxi'a na'.

Dxin budödë' Dios lu në'ë Pablo

24 Rudzéjada' na'a ca naca le rigu'i rizáca'a para gácalena' libí'ili', en ruúdxi rizá'a lu idútë le naca' le rigu'i rizáca'lena' tsözxön Cristo uláz que idú le naca cazë' Lë', le naca böñachi queë'. **25** Dios benë' ga naca' huen dxin quégaca böñachi queë' Cristo, ate' runa' xichinë' Dios, le budödë' lu na'a guna' para gácalena' libí'ili', quíxjö'a idú ca naca xtídzë'ë Dios. **26** Ruzéajni'ida' böñachi le nagachi', lë na' bigachi' dza ni'te, ate' cuntu nu benbë' le, pero na'a Dios chibulu'iñë' böñachi néquiguequi quez queë' ca naca que. **27** Dios gúuni quézinë' gunë' ga ilúnbeë' yugu' yöl-la' tsahui' idú que le nagachi' ni, lë na' ta'yöni böñachi izá'a. Caní rnna lë na' bigachi': "Cristo náquië' tuz len libí'ili', en náquië' le naca löza idéli'li' tsazli' lu bení' queë'."

28 Runtu' libán queë' Cristo, en rusá'atu' láxí'gaca yúgu'të böñachi, ate' rusëditu' lèguequi idútë yöl-la' réajni'i, para gaca usudxintu' yúgu'të böñachi lahuë' Dios, naca idú láxí'gaca tu' nácabaca tuz len Jesucristo. **29** Para gaca caní runa' dxin, en ruí'i ládx'a uðxi guna' lë ni, rugúna' dxin yöl-la' huáca idú na' runnë' Cristo quia'.

2

1 Rë'ënda' inözili' ruí'ida' ládx'a runa' le gácalen libí'ili', enca' le gácalen böñachi yödzö Laodicea, en le gácalen ca' yúgu'të nupa biti' ila'lé'eni neda'. **2** Runa' caní para ila'dipa láxí'gaquie', en iláquië' tuz lu yöl-la' nadxi'i, en ulu'zi'ë xibé yúgu'të yöl-la' tsahui' que yöl-la' run löza idú le runna yöl-la' réajni'i queëru'. Caní raca para ilúnbeë' le bigachi' queë' Dios Xuz, lë na' naca cazë' Cristo. **3** Lu në'ë Cristo ruzí'iru' xibé yúgu'të yöl-la' tsahui' que yöl-la' rácada', en yöl-la' réajni'i. **4** Lë ni rea' libí'ili', para cabí gaca nu si' ye'e libí'ili', nu güí'i didza' tséajlë'ëru' le cabí nácatë. **5** Sal-la' zoa' zi'tu' ga zóali' lu idútë le naca', lu bö' naca caza' zóalena' libí'ili', en rudzéjada' tu' rilé'eda' rö'ö xibá queëli', en nácali' tsutsu ca réajlë'eli' Cristo.

6 Que lë ni na', ca na' guzxi' lu ná'ali' Xanru' Jesucristo, lësca' caní ral-la' gunli' yúgu'të le gunli', dzáguië' Lë' libí'ili'. **7** Ca na' nun ga rë' luí yaga, enca' ca na' nayás zö'ö lu xilibi zö'ö, guli'sóalen Cristo. Guli'sóa tsutsu ca réajlë'eli' Lë', ca na' chinazédali'. Guli'guética'së' Dios: "Xclenu'."

Le cubi nácaru' tu' dzágaru'-në' Cristo

8 Guli'gún chí'i cuinli' para cabí güí'ili' lataj nu si' ye'e libí'ili', nu ugún dxin yöl-la' réajni'i quégaca böñachi, en yugu' didza' ta'nnasë' nácabaca idútë li, ca naca le ta'lébi tun böñachi, en ca naca le tu'sedi böñachi le naca que yödzölió ni, en caléga le naca xtídzë'ë Cristo.

⁹ Idútē le naca cazë' Dios zóalen Cristo sal-la' böáquië' bönachi, ¹⁰ ate' libí'ili' nápalí' idútē le náquië' Dios tu' dzágali'-në' Cristo, Nu rinná be'e yúgu'të nupa ta'nná bë', en yugu' bönni' dë lu ná'agaquië'. ¹¹ Narugu lu xipéla'gaquië' bönni' judío le rului'i dá'gaquië' Dios, pero libí'ili', tu' dzágali' Cristo, zóalen libí'ili' le rului'i néquili' queë' Dios, le cabí néquini lu ni'a lu ná'agaca bönachi. Yugu' bönni' judío tu'güé' tu guídido', pero libí'ili', nadúa idútē yöl-la' bönachi queëli' le bénlenli' dul-la'. Caní naca queëli' tu'benli' tsözxön Cristo cate' gútië' lë'e yaga cruz. ¹² Cate' bidilalí' nisa guca ca bigáchil'enli'-në' Cristo tsözxön yero ba, en bubánlenli'-në' tsözxön tu' guyéajlë'ëli' Dios, len yöl-la' huáca queë' busubanë' Cristo lu yöl-la' guti. ¹³ Zí'atélo' gúcalí' ca nupa chinátigaca tu' nözi' dul-la' gubágala', en bití' guzóalen libí'ili' le rului'i néquili' queë' Dios, pero na'a Dios nunë' ga nabárlenli'-në' tsözxön Cristo, en buniti lahuë' libí'ili' ca naca yúgu'të dul-la' gubágala'. ¹⁴ Dios busúluë' yugu' le nabága'ru' le nazúajgaca lu xibá queë', lë' na' tu'zegui rë'u didza'. Bugüé' lë' na' nabága'ru', en budé' le lë'e yaga cruz ca tu le nabáguë'ë Cristo. ¹⁵ Cate' gútië' Cristo lë'e yaga cruz, bugüé' yöl-la' huáca unná bë' quégaca bö' xihui' unná bë', en quégaca bö' xihui' dë lu në'eguequi yöl-la' huáca, tu' bulu'e lahui le nácagaca bö' xihui' na', en bugüé' idútē le guta' lu në'eguequi.

Ral-la' güí'i ládxí'ru' le naca que yehua' yubá

¹⁶ Que lë ni na', bití' güí'ili' lataj nu uzegui libí'ili' didza' ca naca le rë'aj ráguli', o tu' cabí runli' zxön yugu' dza laní, o tu' cabí runli' zxön beo' si' ruzé, o tu' cabí runli' zxön yugu' dza lá'ayi quégaca bönachi. ¹⁷ Yúgu'të lë ni naca ca tu bixin que le ral-la' gaca, ate' le rului'i yúgu'të lë ni náquië' Cristo caz. ¹⁸ Bití' güí'ili' lataj nu gun ga unítil' le ral-la' si'ili', nu runda' bayudxi ga ilaca nöxaj ládxí'gaca bönachi, en ilún zxön yugu' gubáz lá'ayi. Tu'gutsa' cuíngaquei' le cabí bila'lé'ené', en tun ba zxön cuíngaquei' ca naca le dzö'ösö ícjagaquie' lu yöl-la' böñachisö quégaquei'. ¹⁹ Nu run caní bití' da' Cristo. Náquië' Xanru', en ruzoë' tsutsu idútē le naca cazë', le nácaru' rë'u. Rugahuë' le, en runë' ga naca tuz ni'a que le zeaj lu dxita lu bin, ate' rizzón idútē le naca cazë' ca rë'ënë' Dios uxöne' le.

²⁰ Libí'ili' chinátilenli'-në' Cristo para cabirö ila'nná be'e xibá que yödzölió libí'ili'. ¿Bix que runli' tsca ni nácali' que yödzölió, en runli' ca ta'nná bë' xibá que? ²¹ Caní ta'nná yugu' xibá que yödzölió ni:

Bití' quítjanu' lë ni.

Bití' gagu' lë na'.

Bití' canu' ia'tú le dë.

²² Yúgu'të lë ni ila'niti cate' chibugunru' léguequi dxin. Caní nácagaca le ta'nná bë' bönachi, en yugu' xibá nazí' lu në'eguequi. ²³ Le nácatë, yugu' xibá ni, téqui böñachi nápagaca yöl-la' réajni'i. Tun ga tu'lui'i cuínguequi ca böñachi yudo', en ga tu'lui'i cuínguequi nöxaj ladxi', en ga tu'saca' zí'gaca idútē le zeaj naca caz, pero xibá ni bití' ca' tácalen rë'u para gaca inná bë'eru' yugu' le rizë ládxí'ru' lu yöl-la' böñachisö queéru'.

3

¹ Na'a, channö nubánlenli'-në' Cristo, guli'güí' ladxi' le nácagaca que yehua' yubá ga ni' rö'ë Cristo cuita lë'ë ibëla Dios, ga náquië' lo. ² Guli'sá' ladxi' le taca xitsá'alö, en caléga le taca luyú ni. ³ Naca queëli' tsca chinátili', ate' yöl-la'

na'bán queëli' rapa chi'ë Cristo ga ni' zoa cazë' Dios. ⁴ Cristo nabánili' libí'ili'. Cate' ulu'i lahuë' Lë', ní'irö ulu'i lolí' ca' libí'ili' tsözxön len Lë' lu bení' queë'.

Yöl-la' na'bán gula, en yöl-la' na'bán cubi

⁵ Que lë ni na', guli'gún ga ila'niti le nacuá'len libí'ili' que yödzölió ni:
Yugu' le ruá' dö', en le nácagaca xihui',
en yugu' le rizë ládxí'li' le ruá' dö',
en yugu' le rizë ládxí'li' le naca xihui',
en yöl-la' ruhuidi'.

Yöl-la' ruhuidi' naca lëbi ca nu reaj ladxi' budó' guiëj budó' yaga, tu' cabí reaj ladxi' Dios nu ruhuidi'. ⁶ Tun böñachi yugu' le caní, ate' gunë' Dios xíguia' yugu'të nupa bití' túngaca ca rnna xtídzë'ë. ⁷ Yugu' dul-la' caní benli' ca' libí'ili' cate' ni' nadödili' lu né'eguequi. ⁸ Na'a, bití'rö gunli' yugu' lë ni:
Bítirö idzázali', en bítirö leli'.
Bítirö nu gunli' zi', en bítirö inné xihui'li'.
Bítirö innali' le ruá' dö'.

⁹ Bití' si' yé'eli' luzá'ali' tulí' ia'tulí' tu' chinucá'anali' le gúcali' zí'alö, en yugu' le benli' zí'alö. ¹⁰ Chinácali' böñachi cubi, ate' tu tu dza ricúbili', ruhuöácaröli' ca naca Nu na' bun libí'ili', para gúmbé'eli' Lë' idú ca náquié' Lë'. ¹¹ Tu' chidzágaru'-në' Cristo:

Bítirö nácaru' bönni' zí'tu', en bönni' judío.

Bítirö nácaru' bönni' narugu lu xipélala'gaquie' le naca bë' nu da' Dios, en bönni'
bití' narugu lu xipélala'gaquie' lë na' naca bë'.

Bítirö nácaru' bönni' ta'yéajni'inë', en bönni' bití' ta'yéajni'inë'.

Bítirö nácaru' bönni' nadó'ogaquie', en bönni' bití' nadó'ogaquie'.

Na'a, Cristo náquié' yugu'të le nácagaca lesaca', en dzáguië' yúgu'tëru'.

¹² Dios nadxí'inë' libí'ili', en guröë' libí'ili' para guéquili' quez queë'. Que lë ni na', ral-la':

Güí'ládxí'li' luzá'ali', en gácali' dxí'i ladxi',
en nöoxaj ladxi', en cuidí' ladxi',
en cözali' zxöñ ladxi'.

¹³ Channö raca didza' bizxaj tuli' len ia'tuli', guli'guá' ilén luzá'ali' tuli'
ia'tuli', en buli'niti lo luzá'ali' tuli' ia'tuli' ca na' benë' Cristo, buniti lahuë'
libí'ili'. ¹⁴ Le nazáca'térö ca yúgu'të lë ni, ral-la' idxí'ili' yúgu'të böñachi, tu'
naca yöl-la' nadxí'i le run ga nácaru' tuz, en ga nácaru' idú. ¹⁵ Guli'güí' lataj
le ribequi dxí icja ládxí'do'oru' inná bë' lu icja ládxí'do'oli', lë na' runnë' Dios
queëru'. Que lë ni na' bulidzë' libí'ili', para gácali' tuz lu idútë le naca cazë'
Cristo. Guli'guíë' Dios: "Xclenu'."

¹⁶ Guli'sí' lu ná'ali' xtídzë'ë Cristo le gaca queëli' tu yöl-la' tsahui' zxöñ. Tu'
zóalen libí'ili' yöl-la' réajni'i queë' Dios, buli'sedi, en buli'zéjni'i luzá'ali' tuli'
ia'tuli'. Idú ládxí'li' guli'gul-la yugu' salmo queë' Dios, en yugu' le rul-la yöl-la'
ba, en yugu' le rul-la lá'ayi, ate'guiëli'-në' Dios: "Xclenu'." ¹⁷ Yúgu'të le runli',
le naca didza' ruí'ili' o le naca dxin runli', guli'gún yúgu'të lu Lë' Xanru' Jesùs,
en guiëli'-në' Dios Xuz: "Xclenu'", dzáguië' Cristo libí'ili'.

Le ral-la' gunru' que luzá'aru' tu' néquiru' queë' Cristo

¹⁸ Libí'ili', nigula nutsaga ná'alenli' bönni' queëli',
guli'gún ca rnna xtídzala'gaquie' bönni' que queëli'
ca ral-la' gunli', tu' néquili' queë' Xanru'.

¹⁹ Libí'ili', bönni' nutsaga ná'alenli' nigula queëli',
guli'dxí'i nigula que queëli',

en biti' uzéli' bach légacanu.

²⁰ Libí'ili', bi'i ra'bán,
guli'gún ca rnna yúgu'té xtídza'gaquië' xuz xiná'ali'.
Lé ni raza ládxë'ë Xanru'.

²¹ Libí'ili', núloli' nácali' xúzgaca bí'ido',
biti' tódi bë' usína'li' zxí'inili',
para cabí huõaj ládxí'gacabi'.

²² Libí'ili', núloli' nácali' bönni' nadó'ogaquië',
guli'gún ca rnna yúgu'té xtídza'gaquië' xanli' luyú ni.
Calégasö gunli' caní cate' tu'yúe' libí'ili'
ca na' tun nupa té'ëni ilún ga ila'yaza ládxí'gaca böñachi,
pero idú ládxí'li' guli'gún xichíngaquië'
ca ral-la' ilún nupa tadxi Dios.

²³ Ca naca yúgu'té le runli', guli'gún idú ládxí'li',
gaca ca runli' xichinë' Xanru',
en calégasö ca runli' xichíngaca böñachi.

²⁴ Chinöz quézili' ubi'ë Xanru' queëli',
gunnë' queëli' le chinupé'ë Dios quégaca nupa nácagaca zxí'ini cazë'.
Caní gaca, tu' runli' xichinë' Xanru' Jesucristo.

²⁵ Nu ruá' dö', ubi'ë Xanru' que nu na' ca naca dö' ruá' nu na', tu' cabí utsë'ë
Dios ca ral-la' ubi'ë que queëgaca böñachi.

4

¹ Libí'ili', núloli' nácali' xángaca böñachi,
guli'gún le naca tsahui', en le naca dxí'a
ca rugunli' dxin yugu' bönni' huen dxin queëli'.
Guli'tsöjné zoa ca' Xanli' yehua' yubá.

² Libí'ili', yúgu'téli',
buli'lídzatícä'së' Dios.
Buli'subán ládxí'li' ulídzali'-në' Dios,
en guli'guië': "Xclenu'."

³ La' ná'asö cate' rulídzali'-në' Dios, guli'nabi-në' ca' gácalenë' netu', en
gunnë' netu' lataj quíxjö'ötu' xtídze'ë Xanru', para gaca uzéajni'itu' böñachi
le bigachi' ca naca queë' Cristo. Tu' runa' caní nadzuna' lidxi guíë ni.
⁴ Guli'nabi-në' ca' Dios, gunnë' neda' lataj usalaj lá'ana' le bigachi' na' ca ral-
la' guna'.

⁵ Lu yöl-la' réajni' i queëli', guli'gún le runli' lógaca nupa biti' ta'yéajlé' Cristo.
Guli'gunda' dxin yugu' dza uzá' ládxë'ë Dios queëli', gunli' xichinë'. ⁶ Ral-la'
güí'ili' didza' ca raza ládxë'ë Dios, en ca ral-la' gun nupa néquiguequi queë'.
Ral-la' inözili' ca' naca ral-la' ubí'ili' didza', bi'guiëli' tu tu böñachi.

Yugu' böñachi queë' Cristo tu'gapa Dios luzë'eguequi

⁷ Tíquico quíxjö'ìnë' libí'ili' le raca quia' ni. Náquië' böchi'ru' nadxí'iru'-në'.
Náquië' ca' huen dxin idú queë' Xanru', en rúnlenë' neda' tsözxön dxin queë'
Xanru'. ⁸ Que lë ni na' risöl-la'a-në' ga zóali', para uzéajni'ìnë' libí'ili' le raca
quia', en utipé'ládxí'li'. ⁹ Onésimo, böchi'ru' na' nabábalenë' libí'ili' sa'yéajlenë'
lë' tsözxön. Náquië' ca' böchi'ru' nadxí'iru'-në', en réajlé'ë Xanru'. Chopé' ni
ulu'siyönnë' libí'ili' yúgu'té le raca ni.

¹⁰ Aristarco, bönni' na' yú'ulenë' neda' tsözxön lidxi guíë rugapé' Dios
libí'ili'. Bi'i Marcos, bi'i bönni' queënu nigula zanë' Bernabé rugápabi' Dios ca'

libí'ili'. Chigudxa' libí'ili' bi gunli' queébi' bi'i Marcos na'. Channö huídabi' ga zóali', guli'gún-bi' bal. ¹¹ Bönni' ni lë' Jesús, en zoa ia'tú lë' Justo lësca' rugapé' Dios libí'ili'. Nacuá' zián bönachi judío ta'yéajlë' Cristo, pero tsónnase' ni ladaj bönachi judío tunë' dxin que le rinná bë'ë Dios tsözxón len neda', en tu'huí' zxöndë'ë neda'. ¹² Epafras, bönni' ni nababë' ca' libí'ili' rugapé' Dios libí'ili'. Náquië' huen dxin queë' Cristo, en idú ládxë'ë rulidzë' Dios, en ráta'yutica'se' lahuë' gácalenë' libí'ili' para gácali' idú ladxi', en sóali' ca' sina' gunli' yúgu'të le rë'ëni quézinë' Dios. ¹³ Runa' ba nalí queë' Epafras na', ruí'ida' ládxë'ë libí'ili' enca' nupa nacuá' yödzö Laodicea, en nupa nacuá' yödzö Hierápolis. ¹⁴ Demas, enca' Lucas tu'gapé' Dios libí'ili'. Náquië' Lucas bönni' na' ruúnë' bönachi, ate' nadxi'iru'në'.

¹⁵ Guli'gapa Dios böchí'ru' nacuá'ë Laodicea, enca' Ninfas, en bönachi queë' Cristo nacuá' lídxinu Ninfas na'. ¹⁶ Cate' údxi ulábali' guichi ni ga ni' zóali', guli'gún ga ulu'laba le bönachi queë' Cristo nacuá' Laodicea. Buli'laba ca' libí'ili' guichi na' ila'söl-la' bönachi Laodicea na' queéli'. ¹⁷ Guli'guíë' Arquipo: "Bë' ládxu'u gunu' dxin na' budödë' Xanru' lu no'o."

¹⁸ Neda', Pablo, ruzúaj caza' lu guichi dídz'a'do' ni, rnnía': Rugapa' Dios libí'ili'. Guli'tsöjnë ca raca quia' nadzuna' lidxi guíë ni. Rinábida'-në' Dios uzá' ládxë'ë queéli' le naca dxi'a. ¡Ca' gaca!

DIDZA' ZÍ'ALÖ GUSÖL-LË'Ë PABLO YÖDZÖ TESALÓNICA

Pablo rugapë' Dios bönachi queë' Cristo nacuá' Tesalónica

1 Neda', Pablo, rugapa' Dios libí'ili', zóali' Tesalónica. Néquili' queë' Cristo, ate' nácali' tuz len Dios, enca' len Xanru' Jesucristo. Dzágagaquië' neda' Silvano, en bi'i Timoteo. Rinábida'-në' Xúziru' Dios, enca' Xanru' Jesucristo uzá' ládxë'ë queëli', en gunë' ga soa dxi icja ládxí'do'oli'.

Yugu' le taca bë' ta'yéajlé' bönachi Tesalónica Dios

2 Rética'stu'-në' Dios: "Xclenu'" cate' röjnetu' ca naca queëli' yúgu'teli'. Röjnética'stu' libí'ili', bi rinábitu'-në' Dios ni'a queëli' cate' rulidztu'-në'.

3 Röjnética'stu' lahuë' Xúziru' Dios ca naca le runli' tu' réajlé'ëli' Cristo, en ca naca dxin runli' tu' nadxi'ili'-në', en ca na' nácatica'sili' tsutsu tu' runli' löza Xanru' Jesucristo. **4** Böchi' luzá'atu', Dios nadxi'inë' libí'ili', ate' nöztu' gurö cazë' Lë' libí'ili'. **5** Caní naca, tu' bidxín queëli' didza' dxi'a runtu' libán que, calëga len dídza'sö, pero lësca' len yöl-la' huáca bidxín queëli', ate' Dios Bö' Lá'ayi benë' tsutsu le, ate' idú ládxí'ili' benli' löza le. Nöz quézili' ca gúcatu' ga zóali' tu' nadxi'itu' libí'ili'.

6 Libí'ili' butsá' cuinli', ate' runli' ca runtu' netu', enca' ca benë' Xanru', tu' guzxí' lu ná'ali' xtídzë'ë, ate' sal-la' gudi'i guzxáca'da'ali', budzéjali' tu' zóalenë' Dios Bö' Lá'ayi libí'ili'. **7** Caní naca, chinácali' tu le naca bë' lögaca yúgu'te bönachi ta'yéajlé'ë' Cristo nacuá' luyú Macedonia, en luyú Acaya. **8** Caní naca, tu' guzé xtídzë'ë Xanru' ni'a queëli'. Calégasö luyú Macedonia, en luyú Acaya, pero lësca' yúgu'te lataj guzé didza' ca réajlé'ëli' Dios. Caní naca, bití' bi run bayudxi innatu', **9** tu' ta'guixjö' la'léguequisö bönachi ni' queëtu' ca benli' netu' bal, en ca na' butsá' cuinli'. Bucá anali' yugu' budó' guiój budó' yaga, en böácali' queë' Dios para gunli' xichinë' Dios ban, Nu naca idú Dios. **10** Na'a, ribözali' dza huödë' Zxi'inë' Dios, irúaje' yehua' yubá. Dios busubanë' Lë' lu yöl-la' guti. Nu ni naca Jesús, Nu rusólá rë'u lu dul-la', para cabí soa le gun ga ichúgui' Dios queëru' dza si' za'.

2

Xichinë' Dios benë' Pablo yödзö Tesalónica

1 Böchi' luzá'atu', nöz quézili' bití' guca nítisö dxin queë' Dios bentu' cate' ni' bidxitu' ga zóali'. **2** Nözili' ca guca queëtu' lu yödзö Filipos, ca na' gudi'i guzxáca'tu', ate' guluá' dö' bönachi ni' queëtu'. Ní'irö cate' bidxitu' ga zóali' gúcatu' rugu ladxi' tu' guzóalene' Dios queëru' netu', ate' bentu' libán lolí' que didza' dxi'a le budödë' Dios lu na'tu'. Caní bentu' sal-la' gula'dá baga'da' bönachi ládzali' netu'. **3** Cate' ni' guchízatu' icja nágali' xtídzë'ë Dios, bë'ëtu' didza', calëga tu' nazí'i ye'e netu', en calëga tu' bi guzé ládxí'tu' le dë queëli', en biti' guzxi' ye'etu' libí'ili'. **4** Tu' nuzzöni ládxë'ë Dios netu', budödë' lu na'tu' guntu' libán que didza' dxi'a queë', ate' canísö ruí'itu' didza'. **5** Nöz quézili' catu caz bë'lentu' libí'ili' didza' le gun zxöñ libí'ili', en biti' guléaj tsahui' cuintu' ca run nu bi rizé ladxi' le dë queëli'. Nöz quézinë' Dios naca caní. **6** Biti' gudiljatu' yöl-la' ba le naca que yödžöli' ni, lë na' cú'uli' libí'ili' netu', en calëga le ila'gú'u bönachi netu'. Sal-la' dë lu na'tu' inná bë'etu' libí'ili' tu'

nácatu' gubáz nasöl-lé'ë Cristo ⁷guzóalentu' libí'ili' dxi'i ládxí'do', en bentu' ca runnu xiná'agacabi' bi'i hué'ënido', run chí'inu légacabi' dxi'i ládxí'do'. ⁸Caní guca, bidxí'ide'etu' libí'ili', ga bidxiténgú'unitu' udöditu' lu ná'ali', calégasö didza' dxi'a queë' Dios, pero lá'tu'biquí' udödi caztu' yöl-la' na'bán queëtu', tu' nadxí'ide'etu' libí'ili'. ⁹Röjnelí', böchi' luzá'atu', ca na' guca cate' ni' bentu' libán loli' que didza' dxi'a queë' Dios, ca béntica'stu' dxin zí'i, ate' rëla, en té dza bentu' dxin para cabí usaca' zí'itu' nitulí' libí'ili'.

¹⁰Libí'ili' na' réajlé'ëli' Cristo, huáca gunli' ba nalí, ate' nözinë' Dios ca na' gudáalentu' libí'ili' idú ca raza ládxé'ë Dios, en idú dxí'ado', en ca na' cuntu nu gaca bi inné que. ¹¹Lésca' caní nözili' ca bentu' ca runé' tu bönni' quégacabi' zxí'iné', guchizatu' icja nágali', en butípatu' ládxí'li' tu tuli'. ¹²Busá'atu' ládxí'li' gunli' ca ral-la' gun nu nequi queë' Dios. Lë cazë' bulidzë' libí'ili' para gaca tsú'uli' ga na' rinná bë'ë Lë' lu bení' queë'.

¹³Que lë ni na' ca', rética'stu'-në' Dios: "Xclenu'." Caní runtu' tu' guzxí' lu ná'ali' xtídze'ë Dios le biyönilí' bë'ëtu' didza', caléga ca xtidza' bönächisö, pero ca le nácaté naca, xtídze'ë Dios naca. Xtídze'ë na' run dxin lu icja ládxí'do'oli' libí'ili', réajlé'ëli' Cristo. ¹⁴Böchi' luza'atu', raca queëli' ca raca quégaca bönachi queë' Dios, nupa néquiguequi queë' Jesucristo luyú Judea. Caní naca tu' chigudí'i guzxáca'da'ali' lu ná'agaca bönachi uládz queëli', lëbisö ca na' gula'guí'i gula'záquië' lu ná'agaca bönachi uládz quégäquië', nupa ni' nácagaca bönni' judío. ¹⁵Yugu' bönni' judío na' gulútië' Xanru' Jesús, en gulútië' ca' yugu' bönni' gulu'ë didza' uláz queë' Dios. Gula'bía ládxí'gaquië', en bulu'lágue' ca' netu'. Biti' tuné' le raza ládxé'ë Dios, tu' cabí ta'lé'ené' dxi'a yúgu'té bönachi izá'a. ¹⁶Tu'zágue'ë ca' xinöztu', para cabí guntu' libán lógaca bönachi izá'a na' biti' nabábagaca légaquië', tu' ruí'ilentu' léguequi didza' para ulu'lágaca. Caní raca, tu'zántica'sé' dul-la' nabága'gaquië', en chinabága'gaquië' xíguia' le run ga ichúguië' Dios quégäquië'.

Pablo rë'ënë' tsöjyúë' böchi'ru' nacu'ë Tesalónica

¹⁷Na'a, böchi'luza'atu', ruhu'initu' ca runé' tu bönni' uzëbi tu' nulá'alento' libí'ili' tu chí'ido', pero sal-la' biti' rilé'etu' libí'ili', biti' nál-la ládxí'tu' libí'ili'. Que lë ni na', ruf'iládxí'rötü'ulé'etu'loli', tu'rizeda'ládxí'tu'guntu'caní. ¹⁸Que lë ni na' ca' gú'unitu' guídatu' ga zóali', ate' neda', Pablo, le nácaté bë' láwdx'a guída' chopatsonna luzuí, pero Satanás, tu' xihui', buzaga' xinöztu'. ¹⁹¿Bizxi cañ naca le run ga runtu' löza, o le run ga rudzéjatu', o le ral-la' idéli'tu', le uzí'itu' xibé lahué' Xanru' Jesucristo cate' huödë'? ¿Naru' cabí libí'iciázali' na'? ²⁰Libí'iciázali' le run ga nácatu' bica' ba, en le run ga rudzéjatu'.

3

¹Que lë ni na', cate' bítirö guca guá' ilentu', ben xtídza'tu' ugá'anatu' chópatu'lu yödzö Atenas, ²ate' gusöl-la'tu'-bi' bi'i böchi'ru', Timoteo ga zóali'. Nácabí' bi'i huen dxin queë' Dios, en rúnlenbi' nedá' tsözxöñ libán que didza' dxi'a queë' Cristo. Gusöl-la'tu'-bi' ga zóali' para cuéquibi' libí'ili' tsutsu, en ichízabi' icja nágali' ca ral-la' tséajlé'ëli' Cristo, ³para cabí soa nu gaca chopaladxi' ni'a que le tu'saca' zi' bönachi ni netu'. Nöz quészili' zóaru' yödzölióni para guá' ilenru' le caní. ⁴Lésca' cate' ni' guzóalentu' libí'ili', busiyöntu' libí'ili' ca chizóaa gaca le ulu'saca' zi' rë'u, le gaca ca na' chiguca queëtu', ate' nöz quészili' lë na'. ⁵Que lë ni na', cate' bítirö guca guá' ilena', gusöl-la'a-bi'

bí'i Timoteo ga zóali', para ududíxjö'i ibí' neda' ca naca queéli' ca réajlé'ëli'-në' Cristo, en channö cabí gulú'u tu' xihui' libí'ili' nöza dul-la', nu na' rigí'u bönachi nöza dul-la', en channö cabí böáca nítisö dxin na' bentu' ga zóali'.

6 Cate' buzá'abi' bi'i Timoteo ga zóali', en budxinbi' ga zóatu', busiyönbí netu' le naca dxi'a. Bé'ëbi' didza' ca na' réajlé'ëli' Cristo, en ca na' nadxfí'igacali'-në' yugu' böchi' luzá'aru', en ca na', lu yöl-la' dxi'i ladxi' queéli' röjnética'sili' netu', enca' ca na' raca ládxí'li' ulé'ëli' netu', ca na' netu' raca ládxí'tu' ca' ulé'etu' libí'ili'. **7** Que lë ni na', böchi' luzá'atu', cate' ni' gudí'i guzxáca'tu' yúgu'té lë ni, en zián le guca queétu', bidxín didza' queétu' le buí'i zxön netu' cate' biyöntu' ca réajlé'ëli'-në' Cristo. **8** Na'a, nuhuöáca ládxí'tu' tu' riyöntu' rö'öli' tsutsu ca réajlé'ëli'-në' Xanru'. **9** ¿Nacxi caz gaca güiëtu'-në' Dios: "Xclenu'" ca ral-la' guntu' ni'a que yúgu'té le run ga rudzeja ládxí'tu' lahuë' Dios queéru' ni'a que le nácali' libí'ili'? **10** Bayudxi rulidztu'-në' Dios, en rinábitu'-në' rëla, en të dza para gaca ulé'etu' libí'ili', en usa'atu' le riyadzaj queéli' ca naca le réajlé'ëli'-në' Cristo.

11 Na'a rinábitu'-në' Xúziru' Dios, enca' Xanru' Jesucristo, cu'ë netu' nöza ga idxintu' ga zóali'. **12** Lësca' rinábitu'-në' Xanru' gunë' ga gala, en gaca idú ca nadxfí'ili' luzá'ali' tul' ia'tuli', en ca nadxfí'ili' yúgu'té bönachi, ca na' netu' nadxfí'itu' ca' libí'ili'. **13** Rinábitu'-në' gunë' ga gaca tsutsu, en idú dxi'a icja ládxí'do'oli' lahuë' Xúziru' Dios ca sa'yéaj le naca lá'ayi, ate' gunë' caní ga idxinxrö dza huödë' Xanru' Jesucristo, dzágagaca bönachi lá'ayi queë' Lë'.

4

Le runru' le raza ládxë'ë Dios

1 Ia'stú, böchi' luzá'atu', ni'a queë' Xanru' Jesús ráta'yutu' loli', en richízatu' icja nágali' para gunli' ca naca le chinazérali' lu na'tu' ca ral-la' gunli' le raza ládxë'ë Dios. Ca na' chirunli', ca' ral-la' güntica'sili'.

2 Chinöz quézili' yugu' le gunná bé'etu' libí'ili' uláz queë' Xanru' Jesús. **3** Le rë'ënë' Dios naca gácali' idú dxi'a, en bíti'rö gunli' le cabí naca tsahui', **4** en inözilí' tu tulí' nacxi ral-la' sóalenli'-nu nigula que queéli' idú ca sa'yéaj le naca lá'ayi, en gunli' légacanu bal. **5** Biti' ral-la' sóalenli'-nu nigula queéli' lu yöl-la' rizé ladxi' le ruá' dö', ca na' tun bönachi biti' nabábagaca Dios, en biti' núnbë'gaca Dios. **6** Ca nácagaca lë ni, cuntu nu ral-la' tödi bë', en cabí si' ye'e böchi' luzé'e bagáchisö, tu' ichúguïe' Lë cazé' Xanru' quégaca yúgu'té nupa tun le caní, gunë' ca na' chigúxditu' libí'ili', en bentu' ba nalí que loli'. **7** Dios bulidzë' rë'u, caléga para gunru' le ruá' dö', pero para gácaru' idú dxi'a. **8** Caní naca, nu ruzúa tsölä'alö lë ni, caléga böñachisö ruzúa tsölä'alö, pero Dios caz ruzúa tsölä'alö, tu' gusöl-lë'ë Lë cazé' Dios Bö' Lá'ayi queëru', Nu rufí'i caní didza'.

9 Biti' run bayudxi uzúaja' queéli' lu guichi ca ral-la' idxí'igacali'-në' böchi' luzá'ali', tu' chinazérali' la' libí'isili' lu në'ë Dios idxí'ili' luzá'ali' tul' ia'tuli'. **10** Le nácaté nadxfí'igacali'-në' yúgu'té böchi' luzá'aru' nacu'ë luyú Macedonia. Na'a, ráta'yutu' loli', böchi' luzá'atu', para idxí'igacaröli'-në' ca' yúgu'té böchi' luzá'ali'. **11** Ráta'yutu' loli' ca', gü'i ládxí'li' cözali' dxi'ado', en gunli' yugu' le dë lu ná'asili', en gunli' dxin len na'a cuinli' ca na' chigunná bé'etu' libí'ili'. **12** Gunná bé'etu' libí'ili' caní para gaca gunli' le naca dxí'ado' lögaca nupa biti' nabábagaca libí'ili', en caní gaca, biti' bi yadzaj queéli'.

Ca gaca cate' huödë' Xanru' Jesucristo

¹³ Lësca', böchí' luzá'atu', rë'ënitu' inözili' ca raca quégaca nupa chinátigaca, para cabí hui'ñili' ca tun ia'zíca'rö bönachi biti' zoa le tun löza. ¹⁴ Channö réajlé'ëru' gútië' Jesús, en bubanë', lësca' caní ral-la' uzzöni ládxí'ru'-në' Dios gunë' ga huödalengaca tsözxöni Jesús nupa ni' chigulati, en gula'yéajlé' Lë'.

¹⁵ Que lë ni na' riguíxjö'i'itu' libí'ili' xtídzë'ë Xanru' le rnna caní: "Rë'u ni zóaru' nabanru', en ugá'anaru' ga idxinrö dza huödë' Xanru' Jesucristo, biti' tsöjtságaru'-në' Cristo zí'alö ca nupa chigulati." ¹⁶ Caní gaca, tu' huötjé' Lë cazë' Xanru', en iruájë' yehua'yubá, ate' yön' chi'ë, len yöl-la' unná bë' ulidzë', ate' yön' ca' chi'ë gubáz lá'ayi lo, ate' yön' ca' luzu ucödxë' Dios, ate' ulu'bán nupa na' chigulati, en gula'yéajlé' Cristo. ¹⁷ Ní'irö rë'u ni zóaru' nabanru', en naga'anaru' luyú ni, uchisë' rë'u tsözxöni len léguequi lu böaj lúzxiba para tsöjtságaru'-në' Xanru' lu bö'ös. Caní gaca, sóalentica'siru'-në' Xanru'. ¹⁸ Que lë ni na', guli'hui' zxöni luzá'ali' tulí' ia'tulí' ca nácagaca didza' ni.

5

¹ Na'a, ca naca dza na', o rëla na' cate' ilaca lë ni, biti' run bayudxi uzúaja' queëli' lu guichi, böchí' luzá'atu'. ² Libí'ili' chinöz quézili' dxi'a ca gaca dza cate' huödë' Xanru'. Idxinë' tsálido'os ca ridxinë' gubán chi'i dzö'ölö. ³ Cate' ila'nná bönachi: "Raca dxi'a queëru', en biti' bi gaca queëru'", ní'irö la' idxintë le usuniti léguequi, lë na' idxín quéguequi ca na' ridxin le rigu'i rizáca'nu nigula na' chizóa sóabi' bï'ido' queënu, ate' cuntu nu nutsa' ladaj bönachi yödzölió ni nu ulá cate' gaca lë na' gaca dza na'. ⁴ Na'a, böchí' luzá'atu', biti' zóali' chul-la niti, en que lë ni na' biti' idxín dza ni' queëli' bagáchisö ca ridxinë' bönni' gubán. ⁵ Yúgu'teli' nácali' bönachi que bení', en que lahui' dza. Biti' nácaru' bönachi que chi'i dzö'ölö, en caléga que le naca chul-la. ⁶ Que lë ni na', biti' ral-la' tódi yëla loru' ca raca quégaca nupa biti' nabábagaca rë'u, pero ral-la' usubán ládxí'ru', en cözaru' ba'a ládxí'do'. ⁷ Nupa tasi, chi'i dzö'ölö tasi, en nupa ta'zudxi, chi'i dzö'ölö ca' ta'zudxi. ⁸ Na'a, rë'u ni, nácaru' que lahui' dza, en ral-la' cözaru' ba'a ládxí'do', tu' chinacuru' zxaru' le run chi'i rë'u, le naca yöl-la' réajlé' queëru' Dios, en yöl-la' nadxi'i, ate' le runru'löza uláru' naca ca tu lu'u guíe le run chi'i ícjaru'. ⁹ Caní naca, tu' nuzoë' Dios rë'u ni, caléga para idxinr' ga ichúguië' queëru', pero para uláru' tu' ruzxöni ládxí'ru'-në' Xanru' Jesucristo, ¹⁰ tu' gútië' Jesús uláz queëru' para sóaru' ibanru' tsözxöni len Lë' cate' huödë', sal-la' chinátiru' o sóaru' ibanru' dza ni'. ¹¹ Que lë ni na' ral-la' utípali' ládxí'li' tulí' ia'tulí', en gunli' tsutsu tulí' ia'tulí' ca na' chirunli'.

Pablo richízië' icja nágagaquíë' böchí' luzë'ë ta'yéajlé'ë Cristo

¹² Ráta'yutu' loli', böchí' luzá'atu', gúnbë'ëli' nupa tun xichinë' Xanru' ga zóali', nupa na' ta'nná be'e libí'ili' uláz queë' Xanru', en tu'sá' ládxí'li'.

¹³ Ráta'yutu' loli' ca', gunli' légaquíë' bal lu yöl-la' nadxi'i queëli', tu' tunë' dxin na'. Guli'cöza dxi'ado' tulí' len ia'tulí'.

¹⁴ Lësca' caní richízatu' icja nágali', böchí' luzá'atu', para usá'ali' ládxí'gaca nupa biti' túngaca dxin, en utípali' ládxí'gaca nupa tu'huöaj ládxí'guequi, en gácalenli' nupa biti' naca tsutsu ca ta'yéajlé' Cristo, en gácali' nöxaj ladxi' lögaca yúgu'të bönachi.

¹⁵ Guli'gún chi'i cuinli' para cabí uzi' lëbi luzá'ali', en cabí guá'ali' dö' que nu ruá' dö' queëli', pero guli'gü' ládxí'li' gúntica'sili' le naca dxi'a que luzá'ali' tulí' ia'tulí', en quégaca yúgu'të bönachi.

¹⁶ Buli'dzéatica'sö,

¹⁷ en buli'ldzatica'së' Dios,

18 en guli'guíe' Lë': "Xclenu'."

Caní ral-la' gunli' ni'a que yúgu'të le raca queéli', tu' nácagaca lë ni le rë'ënë' Dios gunli' tu' nácali' queé' Jesucristo.

19 Biti' uzóa dxili' le rulídzatica së' Dios Bö' Lá'ayi libíili'.

20 Biti' uzóali' tsölá'alö xtídzë'ë bönni' ru'ë didza' uláz queé' Dios.

21 Guli'sí' bë' yúgu'të, en guli'sí' lu ná'ali' le naca dxi'a.

22 Biti' bi gútsa'lí' le ruá' dö'.

23 Lë cazë' Dios, Nu run ga zoa dxi icja ládx'i do'oru', gunë' ga gácali' idú dxi'a, en gun chi'ë bö' naca cázali', en icja ládx'i do'oli', en idútë le nácali', ate' cuntu nu gaca bi innë queéli' dza ni' huödë' Xanru' Jesucristo. **24** Runë' Dios ca rnnë', Bönni' na' bulidzë' libíili'. Lë cazë' gunë' yugu' lë ni.

Pablo rigu'ë yugu' böchi' luzë'ë lu né'ë Dios

25 Böchi' luzá'atu', buli'lidzë' Dios, en inábili'-në' gácalenë' netu'.

26 Buli'gapa Dios yúgu'të böchi' luzá'aru', en unida'lí' légaquië' lu yöl-la' nadxi'i queéli'.

27 Ni'a queé' Xanru' Dios ruchi'a libíili' ulábalí' guichi ni lógaca yúgu'të böchi' luzá'aru' nabábaguacië' Cristo.

28 Rinábida'-në' Xanru' Jesucristo uzá' ládxë'ë queéli' le nácagaca dxi'a queé'. ¡Ca' gaca!

DIDZA' BUROPI GUSÖL-LË'Ë PABLO YÖDZÖ TESALÓNICA

Pablo rugapë' Dios bönachi queë' Cristo nacuá' Tesalónica

¹ Neda', Pablo, rugapa' Dios libí'ili', zóali' Tesalónica. Nácali' queë' Xúziru' Dios, enca' queë' Xanru' Jesucristo. Silvano, en bi'i Timoteo dzágagaquië' neda'. ² Rinábitu' Xúziru' Dios, en Xanru' Jesucristo, uzá' ládxë'ë queëli', en gunë' ga soa dxi icja ládxí'do'oli'.

Dios ichúguië' quégaca bönachi dul-la' ila'nítigaca cate' huödë' Cristo

³ Ral-la' guíetica'stu'-në' Dios: "Xclenu'" ca naca queëli', böchi' luzá'atu', ate' naca dxi'a guntu' caní, tu' zeaj rácarö idú ca réajlë'ëli'-në' Dios. Lësca' caní, ca nadxí'ili' luzá'ali' tulí' ia'tulí' zeaj rácarö idú. ⁴ Que lë ni na', len yöl-la' rудзея riguixjö'ötu' ca naca queëli' lógaca bönachi queë' Dios ni, tu' ribözali' zxón ladxi', en réajlë'ëli' Dios sal-la' ta'bíada' ládxí'gaca bönachi libí'ili', en rigu'i rizáca'da'ali', pero ruá' rilenli' yúgu'té. ⁵ Yugu' lë ni taca bë' naca tsahui' ca ruchi'a rusöröë' Dios bönachi. Ru'ë lataj rigu'i rizáca'li' na'a, para gácali' lesaca' tsázali' ga ni' rinná bë'ë Lë'.

⁶ Naca tsahui' ca gunë' Dios, ubi'ë quégaca nupa tu'saca' zi' libí'ili', gunë' ga ila'gu'i ila'zaca' nupa na'. ⁷ Ia'stú, libí'ili' rigu'i rizáca'li' na'a, ate' ubi'ë Dios queëli', gunë' ga uzi' ládxí'ili' tsözxón len netu', dza ni' ilá' lahuë' Xanru' Jesucristo, cate' irúajë' yehua' yubá. Yugu' gubáz lá'ayi ni'a në'ë ilunë' Lë' tsözxón, en ulu'lu'ë lahui yöl-la' huáca zxón queë'. ⁸ Ilá' lahuë' Cristo dza ni' ca tu gui' zxón cate' ni' gunë' zi' nupa biti' núnbë'gaca Dios, en biti' túngaca ca rnna didza' dxi'a queë' Xanru' Jesucristo. ⁹ Yugu' bönni' caní, uzi' lëbë' légaquië', ate' tsaz tsöjtsázagaquië' lu gui' gabilia. Ila'cuitë' tsaz lahuë' Xanru', ga nalá'gaca yöl-la' zxón queë', en yöl-la' huáca queë'. ¹⁰ Caní gaca dza ni' cate' huödë' para gaca queë' yöl-la' ba ni'a que le nácgagaca bönachi lá'ayi queë', ate' ulu'bani ni'a que le benë' ga nácgagaca yúgu'té nupa ta'yéajlë' Lë'. Caní gaca ca' queëli' tu' guyéajlë'ëli' le bentu' ba nalí que loli' ca naca queë' Jesús.

¹¹ Que lë ni na'ca', rulídzatrica'stu'-në' Dios queëru', en rinábitu'-në' gácalenë' libí'ili', en gunë' ga gácali' lesaca' idé'li' lë na' bulidzë' libí'ili' para uzi'ili' xibé. Lësca' rinábitu'-në' gunë' ga gaca idú yúgu'té le ruí'i ládxí'ili' gunli' le naca dxi'a, en yúgu'té dxin runli' lu yöl-la' réajlë' queëli' Lë'. Len yöl-la' huáca queë' Dios huáca gunli' lë ni. ¹² Caní gaca, gaca yöl-la' ba que Lë' Xanru' Jesucristo ni'a que le runli', ate' gácali' libí'ili' bica' ba ni'a que le gunë' Lë', gaca ca naca le buzá' ládxë'ë queëli' Dios queëru', enca' Xanru' Jesucristo.

2

Ulu'i lahuë' Bönni' Xihui'

¹ Na'a, ca naca que dza huödë' Xanru' Jesucristo, en ca gaca, udutubë' rë'u queë' Lë', ráta'yutu' lolí, böchi' luzá'atu', ² para cabí güí'ili' lataj nu gun chixi libí'ili' ca nácgagaca le guzxí' lu ná'ali'. Biti' cuéqui böniga icja ládxí'do'oli' ni'a que bi ta'nnë' bönni' ta'zi' yë'ë, ta'nnë' zóalenë' Dios Bö' Lá'ayi légaquië', o ni'a que bi didza' tu'i bönachi, o ni'a que bi nazúaj tu lu guichi ta'nnë' netu' gusöl-la'tu', le rnna: "Chigudödi dza huödë' Xanru'." ³ Biti' ca' güí'ili' lataj nu si' ye'e libí'ili', tu' cabí idxin dza ni' huödë' Jesús channö cabí ila'lá' lahui

zí'alo zián nupa ila'dá'baga' Dios, ate' ilá' lahuë' Bönni' Xihui', bönni' na' ralla' tsásie' lu güí gabila. ⁴ Bönni' ni uzágüe'ë, ate' lu yöl-la' run ba zxön cuinë' tá'bagüe'ë yúgu'té le nequi queë' Dios, o le tun zxön bönachi lu yöl-la' run Dios bal quéguequi. Gunë' bönni' na' caní ga idxintë cö'ë ca Dios caz lu yudo' ga naca xilatjë' Dios, en gun cuinë' ca Dios.

⁵ ¿Naru' cabí röjneli' busiyönda' libí'ili' yugu' lë ni cate' ni' zóalena' libí'ili'? ⁶ Na'a, núnbë'ëli' Nu ruzaga' xinözë' Bönni' Xihui' na', para cabí ilá' lahuë' zí'alo ga idxinrö dza queë'. ⁷ Chirún dxin le nagachí' que le naca xihui', pero ná'até zoa Nu ruzaga' xinözë' Bönni' Xihui' na' ga idxinrö dza ucuítia cuini Nu na' ruzaga' xinözë'. ⁸ Ní'irö ilá' lahuë' Bönni' Xihui' na', ate' Xanru' Jesucristo ucul-lë' lë' len bö' irúaj ru'ë, en usunítië' lë' len le tsépi yösa bení' que dza huödë'. ⁹ Cate' idxinë' Bönni' Xihui' na', len yöl-la' huáca que Satanás tu' xihui' ilá' lahuë'. Len yöl-la' huáca que le cabí nácatë, gunë' yúgu'té yöl-la' huáca zxön, en yúgu'té le ilaca bë', en yúgu'té le ilún ga ulu'bani bönachi. ¹⁰ Len yöl-la' huáca que le cabí nácatë, gunë' caní lógaca nupa ila'niti tu' cabí gula'zí' lu në'eguequi idú láxí'guequi le naca idútë li, para ulu'láguequi. ¹¹ Que lë ni na' Dios gu'ë lataj idxin quéguequi tu nu run yöl-la' huáca, nu si' ye'e léguequi para ila'yéajlë' le cabí nácatë. ¹² Caní gaca para ila'baga' xíguia' yúgu'té nupa bití' gula'yéajlë' le naca idútë li, pero gula'yaza láxí'gaca le cabí naca tsahui'.

Nupa gurö' cazë' Dios para ulu'lágaca

¹³ Böchi' luzá'atu', libí'ili' na' nadxí'inë' Xanru' libí'ili', ral-la' guíética'stu'në' Dios: "Xclenu'" ni'a que le naca queëli', tu' chigurö' cazë' Dios libí'ili' dza ni'te para uláli' ni'a que le runë' Dios Bö' Lá'ayi, para gácali' idú tsahui' tu' réajlë'ëli' le naca idútë li. ¹⁴ Para gaca caní queëli', Dios caz bulidzë' libí'ili', para idéli'li' gunli' tsözxón Xanru' Jesucristo lu bení' queë'. Caní gaca ni'a que didza' dxi'a runtu' libán que.

¹⁵ Que lë ni na', böchi' luzá'atu', guli'sóa tsutsu, en guli'gún chi'i didza' na' nazédali', le bë'lentu' libí'ili', en buzúajtu' queëli' lu guichi. ¹⁶⁻¹⁷ Rinábitu'-në' Xanru' Jesucristo, en Xúziru' Dios, utipé' láxí'li', en gunë' ga gácali' tsutsu ca naca yúgu'té le naca tsahui' runli', en yúgu'té didza' dxi'a ru'ili'. Lë cazë' nadxí'inë' re'u, en bennë' queëru' le ruhuí' zxöntica'sö re'u, en le naca dxi'a runru' löza, yugu' lë na' buzá' ládxë'ë Dios queëru'.

3

Le ral-la' inábiru'-në' Dios

¹ Ia'stú, böchi' luzá'atu', buli'lídzë' Dios, en inábili'-në' gácalenë' netu', runtu' libán ni, para së xtídzë'ë Xanru', ate' ilún le bal bönachi, para gaca ni ca na' guca ga ni' zóali' libí'ili'. ² Inábili'-në' ca' para ulatu' lu ná'agaquí' bönni' xihui' tuá' dö', tu' cabí ta'yéajlë' yúgu'té bönachi Dios. ³ Na'a, tu' runë' Xanru' ca rnnë', gunë' ga gácali' tsutsu, en gun chi'é libí'ili', para cabí idzunli' lu na' tu' xihui'. ⁴ Ruzxöni láxí'tu'-në' Xanru' ca naca queëli', gunli' yugu' lë ni si' gunábitu' libí'ili', ca na' chirunli'. ⁵ Rinábitu'-në' Xanru' usë'ë láxí'li' para idxí'ili'-në' Dios, en ciòzali' zxön ladxi' ca na' benë' Cristo.

Ca run bayudxi gunru' dxin

⁶ Ni'a que Lë' Xanru' Jesucristo ruchi'atu' libí'ili', böchi' luzá'atu', icuítali' ga nacu'ë böchi' luzá'aru' ta'dasë' ca', en biti' tunë' ca naca xibá buséditu' libí'ili'. ⁷ Nöz quészili' ral-la' gunli' ca runtu' netu'. Biti' gudásitu' ca' netu' ga ni' zóali'. ⁸ Biti' gudágusötu' le bennali' queëtu', pero lu yöl-la' ruúbi rugui'i,

en lu yöl-la' ricuidi' bentu' dxin rëla, en te dza para cabí usaca' zí'itu' nituli' libí'ili'. ⁹ Caní bentu' para gácatu' loli' ca tu le rulu'i libí'ili' ca ral-la' gunli', sal-la' dë lu na'tu' inábatu' bi gunli' queétu'. ¹⁰ Lësca' cate' ni' guzóalentu' libí'ili', buchi'atú' libí'ili' caní, le rnna: "Channö cabí rë'ënë' nu bönni' gunë' dxin, biti' güí'ili' le gahue'." ¹¹ Canísö rrrnatu' tu' riyöntu' nútsa'gaquië' ládjali' yugu' bönni' ta'dasë' ca', biti' bi dxin tunë', pero ta'dasë' ca' bi tun bi ta'nnë'. ¹² Ni'a queë' Xanru' Jesucristo ruchi'atú' yugu' bönni' tunë' caní, en richízatu' icja nágagaquië' ilunë' dxin lu yöl-la' riböza dxí'ado', para gaca ilahuë' le nequi quégacase'.

¹³ Na'a, böchi' luzá'atu', biti' soa dxili', gúntica'sili' le naca dxi'a. ¹⁴ Channö nútí'tés bönni' biti' gunë' ca rnna xtídza'tu', le ruzúajtu' lu guichi ni, guli'gún ga gaca bë'ë bönni' na', en biti' gunli' tsözxón lë' para utuf'inë'. ¹⁵ Biti' ral-la' ilé'eli'-në' ca tu bönni' biti' rilé'enë' libí'ili' dxí'a, pero guli'sá' ládxë'ë ca böchi' cázali'.

Pablo rigu'ë lu në'ë Dios yugu' böchi'ru' nacu'ë Tesalónica

¹⁶ Rinábitu'-në' Xanru' gúntica'së' ga cuía dxi icja ládxí'do'oli' ca naca yúgu'të le runli', en sóalenë' yúgu'tëli'. Lë cazë' runë' ga rö'ö dxi icja ládxí'do'oru'.

¹⁷ Neda', Pablo, len na' caza' ruzúaja' lu guichi ni le rugapa' Dios libí'ili', ate' naca tu le naca bë' yúgu'të guichi risöl-la'a. Canísö ruzúaja' lu guichi. ¹⁸ ¡Le ruzá' ládxë'ë Xanru' Jesucristo queëru' gaca queëli' yúgu'tëli'! ¡Ca' gaca!

DIDZA' ZÍ'ALÖ GUSÖL-LË'Ë PABLO QUEËBI' BI'I TIMOTEO

Pablo rugapë' Dios bi'i Timoteo

¹ Neda', Pablo, naca' gubáz nasöl-lë'ë Jesucristo. Caní naca' tu' caní gunná bë'ë Dios, Nu rusölä rë'u, enca' tu' gunná bë'ë caní Xanru' Jesucristo, Nu na' runru' löza. ² Rugapa' Dios li', böcha'ado' Timoteo. Nacu' ca zxí'ini caza' tu' benru' tsözxön xichinë' Dios. Rinábida'-në' Xúziru' Dios, enca' Xanru' Jesucristo uzá' ládxë'ë quiu', en huéchi' ládxë'ë li', en gunë' ga soa dxi icja ládxi'do'o.

Pablo rusë'ë ládxi'bi' Timoteo ca naca xibá cabí naca idú

³ Ráta'yua' lo' na'a gunu' ca na' gúta'yua' lo' cate' ni' guyija' luyú Macedonia, para ugá'anu' lu yödzö Éfeso, en inná bë'enu' bal-lë' bönni' ni' cabí ulu'sédinë' tu xibá yúbólö, ⁴ en cabí ilunë' zxöñ yugu' didza' ridasö, en lágaca ziántërö cö' xuz xtó'ogaca böñachi, yugu' le tun ga tu'i ládxi'gaca böñachi le nácagaca nítisö. Yugu' le caní biti' tun tsutsu böñachi queë' Dios ca naca le ta'yéajlé' Lë'.

⁵ Le rë'ni gun lë ni rea'li', naca para ila'dxi'i böñachi luzë'eguequi, naca idú ládxi'gaca, en gaca dxi'a le ta'zá' ládxi'gaca, en gaca idú le ta'yéajlé' Dios. ⁶ Ca nácagaca lë ni, biti' bulu'rúajë' bal-lë' bönni' dxi'a, pero gula'guélë'ë tu nöza yúbólö, en tunë' bal yugu' le biti' nácatë. ⁷ Të'ënne' ulu'sédinë' böñachi ca naca le rinná bë' xibá queë' Dios, sal-la' biti' ta'yéajni'inë' lë na' tu'sédinë', en biti' ta'yéajni'inë' le ta'nnë' nácatë.

⁸ Rë'u nöziru' naca dxi'a xibá gunná bë'ë Dios, channö nu rugún le dxin ca ral-la' gun. ⁹ Lë ni nöziru': Dios gudixjë' xibá queë', calëga para inná be'e böñachi tsahui', pero para inná be'e böñachi caní:

Nupa ta'dá'baga' le rinná bë' xibá na'.
Nupa biti' túngaca ca rinná bë' xibá na'.

Nupa tu'cá'ana Dios cá'asö.

Nupa tun le naca xihui'.

Nupa biti' túngaca Dios zxöñ.

Nupa tu'cá'ana le nequi queë' Dios cá'asö.

Nupa tuti xuz xiná'aguequi.

Nupa tuti böñachi.

¹⁰ Nupa tun le ruá' dö'.

Yugu' bönni' nacuá'lenë' la' löjödxi bönni'gaquië'.

Nupa ta'bán yugu' bf'ido'.

Nupa ta'zí' yë'.

Nupa tun tsutsu xtídza'guequi, ta'nná le cabí nácatë.

Nupa ta'dá'baga yugu' xibá tsahui'.

¹¹ Nöziru' naca caní tu' bidxín queëru' didza' dxi'a buzá' ládxë'ë Dios queëru'. Lë' náquie' lá'ayi, en budödë' lu na'a didza' dxi'a na' runa' libán que.

Pablo rë' Cristo: "Xclenu'" tu' buéchi' ládxë'ë lë'

¹² Rea'-në' Xanru' Jesucristo, Nu rutipa ládxa'a, "Xclenu'" tu' buzxöni ládxë'ë neda', en buzöë' neda' guna' xichinë'. ¹³ Caní bené' sal-la' zí'alö neda' gunnë zí'a queë', en gudixía ládxa' a böñachi queë', en zián le bi'a dö' quéguequi, pero Cristo buéchi' ládxë'ë neda', tu' bena' caní lu yöl-la' biti' réajni'i quia' cate'

ni' biti' réajlë'ënida' Lë'. ¹⁴ Na'a, zxöntëro naca le buzá' ladxë'ë quia' Xanru' Jesucristo, lë na' run ga réajlë'ëru' Lë', enca' ga nadxi'iru'-në'.

¹⁵ Didza' idútë li lë ni, en le naca lesaca' ila'zi' lu ná'agaca yúgu'të böñachi, le rnna: Lë cažë' Jesucristo bidë' yödzölió ni para busölé' böñachi dul-la', ate' busölé' neda' sal-la' nácará' bönni' dul-la' ca yúgu'të böñachi. ¹⁶ Que lë ni na' buéchi' ladxë'ë neda', ate' bulu'e lahui Jesucristo ni'a quia' neda', bönni' dul-la', ca naca yöl-la' zxön ladxi' idú queë', para gaca' tu le rulu'i lögaca nupa ila'yéajlë' Lë', en gata' quéguequi yöl-la' na'bán idú. ¹⁷ Na'a rnñia': ¡Yöl-la' ba Dios, Nu rinná bë'tica sö', Nu catu caz údxi que, en Nu biti' gaca ilé' eru', la's dui Dios Nu nözi caz yúgu'të! ¡Queë' Lë' gácatica'sö yöl-la' run bal, en yöl-la' ba, na'a dza, en yúgu'të dza zá'gaca! ¡Ca' gaca!

¹⁸ Xxi'ina do' Timoteo, rudöda' lu no'o xibá ni para gunu' xichinë' Dios ca runë' tu bönni' idú ladxë'ë rejë' gudil-la, en para uzi'u xibé yugu' le gula'guíjö' zi'alö nupa ni' gului'i didza' uláz queë' Dios ca gaca quiu'. ¹⁹ Len yöl-la' réajlë' qui' Cristo ral-la' gunu' caní, naca idú dxi'a icja ladxï'do'o. Chigula'chixi gula'nigui bal-la böñachi, nupa bulu'zóa tsölä'alö le réajlë'ëru' Cristo. ²⁰ Caní gulunë' Himeneo, en Alejandro, nupa na' busana' lu na' Satanás tu' xihui' para ila'zëdë' ca ral-la' ilunë', para cabirö ila'nné zí'ë que le nequi queë' Dios.

2

Le rusedi rë'u ulídzaru'-në' Dios

¹ Que lë ni na' le naca lo le richízia' icja nágagaca böñachi naca ca ral-la' ulídzaru'-në' Dios, en ca ral-la' gáta'yuru' lahuë', en ca ral-la' inábiru'-në' gunnë' bi riquíniru', en ca ral-la' guíeru'-në': "Xclenu'." Yugu' lë ni ral-la' gunru' uláz quéguequi yúgu'të böñachi. ² Lësca' caní ral-la' gunru' uláz quégaca nupa ta'nná bë', en quégaca yúgu'të nupa nácagaca lo. Caní ral-la' gunru' para gaca dxi'a queëru', en gata' queëru' yöl-la' riböza tsáhui'do'. Ral-la' gunru' caní lu yöl-la' réajlë' queëru' Dios, en lu yöl-la' ba' ladxi' queëru'. ³ Lë ni naca dxi'a, en le raza ladxë'ë Dios, Nu rusolá rë'u. ⁴ Dios caz rë'ënë' ulu'lágaca yúgu'të böñachi, en rë'ënë' ilúnbe'e le naca idútë li. ⁵ Tuzé' náquië' Dios, en tuzé' bönni' ruúnë' dzaga Dios, en böñachi. Nu ni naca Jesucristo, Nu gulaj böñachi. ⁶ Lë cažë' budödi cuinë' lu yöl-la' guti, le benë' tu' nözi dul-la' nabága'gaca yúgu'të böñachi. Dios benë' ba nalí queë' cate' bidxín dza queë' gütíë'. ⁷ Ca naca lë ni, Dios buzóë' neda' para guna' libán que, en gaca' gubáz nasöl-lë'ë Cristo, para usédigacada' böñachi izá'a ca naca le réajlë'ëru' Cristo, en ca naca le naca idútë li. Rilíteda', en biti' ca' rizi' yë'a.

⁸ Na'a, rë'ënda' ulu'lidzë' bönni' Dios, en iláta'yuë' lahuë' gáti'tës, nácagaquie' idú dxi'a, en cabí ila'lenë' luzá'agaquie', en cabí ila'dil-la dízda'gaquie'. ⁹ Lësca' caní, rë'ënda' ilácunu nigula le naca ba'a. Le naca lachi le ral-la' ulu'lui'nu lahuí naca yöl-la' nöxa' ladxi', en le naca idú ladxi', en caléga le tu'pá'asinu icja lögacanu len oro, en yugu' bugá, en lari' nazáca'da'. ¹⁰ Yugu' le dxi'a tunnu ulu'lui' lahuí le nácagacanu ca na' run le tacunu le naca ba'a. Caní ral-la' ilunnu nigula núnbe'gacanu Dios. ¹¹ Ral-la' ila'cuá'anu yugu' nigula dxi'sö cate' nu rusedi lögacanu, en ila'cuá'anu nöxa'. ¹² Biti' runna' yugu' nigula lataj ulu'sédinu, en caléga ila'nná bë'enu yugu' bönni'. Ral-la' ila'cuá'anu dxi'sö ga nudúbigaca böñachi queë' Cristo. ¹³ Caní ral-la' gaca, tu' buzóë' Dios zí'alö Adán, ate' gudödi na' buzóë'-nu Eva. ¹⁴ Adán na', biti' guzxi' ye'e tu' xihui' lë', pero nigula queë', guzxi' ye'e lënu. Caní guca, gudítsjanu xibá queë' Dios,

15 pero ulanu nu nigula ruzóanu-bi' bífido' channö gúntica'sinu ca röjlöz le réajlë'érü' Dios, en yöl-la' nadxi'i, en channö gácanu idú dxi'a, en idú ladxi'.

3

Ca ral-la' ilácagaquië' bönni' tapa chi'ë böñachi queë' Cristo

1 Didza' idútë li lë ni rnna: Channö ruí'ládxë'ë nu bönni' gáquië' nu gapa chí'ibönachi queë' Cristo, dxin dxi'a rizë ládxë'ë. **2** Nu bönni' rapa chí'ë böñachi queë' Cristo run bayudxi gáquië'.

Tu bönni' cuntu nu gaca bi innë queë'.

Zoa túzinu nigula queë'.

Ral-la' gáquië' ban ladxi', en idú ladxi', en nöxaj ladxi'.

Ral-la' gu'ë ga ila'cu'ë böchí'ru' ta'dxinë' lidxë'.

Ral-la' gáquië' bönni' nazéqui'de'enë' usédinë' böñachi.

3 Biti' gáquië' bönni' re'jë', en caléga bönni' sínia'.

Biti' gaquië' bönni' rizë ládx'i'së' si'ë dumí.

Ral-la' gáquië' bönni' dxi'i ladxi', en zxön ladxi'.

Biti' gáquië' bönni' ruhuídinë'.

4 Ral-la' gáquië' bönni' rinná bé'enë' dxi'a böñachi nacuá' lidxë'.

Ral-la' ilunbi' zxí'inë' ca rnna xtídzë'ë lu yöl-la' run bal xúzgacabi'.

5 ¿Naru' huácatsö tu bönni' gapa chí'ë böñachi queë' Dios channö cabí raca inná bé'enë' dxi'a böñachi nacuá' lidxë'? **6** Biti' ral-la' gáquië' tu bönni' si' gusí lahuë' të'ë Cristo, para cabí tödi bë' gun ba zxön cuinë', en biti' gaca queë' ca na' guca que tu' xihui', nu ben ba zxön cuini, ate' Dios guchúguïë' que tsöjgá'ana lataj chul-la. **7** Lësca' ral-la' gáquië' bönni' ta'nná dxi'a queë' nupa cabí nabábagaca böñachi queë' Cristo, para cabí soa nu uzóa lë' tsölá'alö, en para cabí idzunë' lu yalaj que tu' xihui'.

Ca ral-la' iláquië' bönni' tácalenë' böñachi queë' Cristo

8 Lësca' caní ral-la' iláquië' bönni' tácalenë' böñachi queë' Cristo:

Ral-la' iláquië' bönni' idú ládx'i'gaquië'.

Biti' iláquië' bönni' tu'rrixë' didza'.

Biti' iláquië' bönni' té'aje'.

Biti' iláquië' bönni' ta'zé ládx'i'së' dumí.

9 Ral-la' gaca ilapa chí'ë idútë le réajlë'érü' Cristo.

Ral-la' ilaca idú dxi'a icja ládx'i'do'gaquië'.

10 Yugu' bönni' ni ral-la' si' bë'ëli' légaquië' zí'alö, ate' ní'irö gata' lu ná'agaquië' ilácalenë' böñachi queë' Cristo, channö cabí zoa nu gaca bi innë quégäquië'. **11** Lësca' caní, nigula que queégäquië' ral-la' ila'cuá'anu idú ládx'i'gacanu, en cabí ilácanu unnë que luzë'e. Ral-la' ilácanu zxön ladxi', en ilácanu li ladxi' lu yúgu'të le tunnu. **12** Yugu' bönni' ilácalenë' böñachi queë' Cristo ral-la' soa túzinu nigula que queégäquië'. Lësca' ral-la' ila'nná bé'enë' dxi'a zxí'inägaquië', enca' böñachi ulidxi que queégäquië'. **13** Run bayudxi gaca caní, tu' ta'déli'në' lataj ga ilún bal böñachi xtídz'a'gaquië', channö tunë' dxi'a dxin tunë' tácalenë' böñachi queë' Cristo, ate' ilácarë' rugu ladxi' para ilu'ë didza' ca naca le réajlë'érü' Jesucristo.

Le bigachi' que le reaj ládx'i'ru'-në' Dios

14 Yugu' didza' ni ruzúaja' quiu' lu guichi, sal-la' runa' löza uduyútea' li'.

15 Channö huadzéda', ruzúaja' quiu' didza' ni para inözinu' naca ral-la' gunu' lögaca böñachi nacuá' lidxë' Dios, nupa náçagaca böñachi queë' Dios ban, en

nádagaca tsutsu, en ta'guíxjö' dxi'a le naca idútë li. Nádagaca ca yugu' ya'zxöñ, en le nunídä'gaca zö'ö, le nádagaca tsutsu, en ta'zón yu'u. ¹⁶ Le nácatë, zxöntëro naca le bigachi' que le reaj ládxí'rú'-në' Dios, ca na' nazúaj lu guichi le rrna:

Dios bulu'i lahuë', gúquië' bönachi.

Guca bë' náquië' tsahui' tu' guzóalenë' Dios Bö' Lá'ayi Lë'.

Gulácalenë' gubáz lá'ayi queë' Dios Lë'.

Guca libán queë' lögaca bönachi izá'a.

Gula'yéajlë' bönachi yödzölió Lë'.

Dios buchisë' Lë' xitsá' ga nayépisétërë'.

4

Nupa ulu'huöaj ládxí'gaca ca naca le réajlë'ëru'-në' Cristo

¹ Yálaldo' riguíxjö'ë Dios Bö' Lá'ayi, rnne': Dza tsöjsétëgaca, ila'dá'baga' bal-la bönachi Cristo. Ulu'huöaj ládxí'gaquië' ca naca le réajlë'ëru' Cristo. Ulu'zë nágagaquië' xtídzä'gaca bönachi nacuálen bö' ta'zí' yë' léguequi, ate' ulu'zë nágagaquië' yugu' xibá quéguequi bö' xihui'. ² Ulu'zë nágagaquië' xtídzä'gaca bönachi tu'lui'sisö tsahui' cuinguequi. Yugu' bönachi na' tu'i didza' le cabí nácatë, en chinazidi ládxí'do'guequi, para cabí uxösa léguequi. ³ Caní naca, tu'zágu'ë xinözguequi nupa té'ëni ulu'tsaga ná'agaca, en ta'nná bë'enë' bönachi para cabí ilágugaca le nagu'ë Dios para uzi'iru' xibé, lë na' huáca ilágugaca nupa ta'yéajlë' Dios, nupa na' chinúnbë'gaca le naca idútë li, en té' Dios: "Xclenu'" cate' tahuë' le. ⁴ Dxi'a naca yugu'te le benë' Dios, en bití' bi ral-la' uzóaru' tsöla'alö channö ráguru' le, en rëru'-në' Dios: "Xclenu'.". ⁵ Rusedi xtídzë'ë Dios rë'u, Lë' únë' dxi'a yugu'te le gáguru' channö ulídzaru'-në' Dios, en inábiru'-në' gun lá'ayë' lë na' gáguru'.

Ca rurúajë' dxi'a huen dxin queë' Jesucristo

⁶ Channö usédinu' yugu' böchi' luzá'aru' yugu' didza' ni, urúaju' dxi'a, en gacu' huen dxin dxi'a queë' Jesucristo, en gaca bë' nazédu' dxi'a ca naca didza' que le réajlë'ëru'-në' Cristo, en ca naca xibá dxi'a rapa chí'u. ⁷ Gurú'una yugu' didza' ridasö que yödzölió ca naca didza' tu'i'nu yugu' nigula gula. Béntica'sö le gun ga gacu' tsutsu para gunu' ca rë'ënë' Dios. ⁸ Látido'os uzi'u xibé gunu' le gun ga gácarö nál-la ni'a no'o, pero idú uzi'u xibé gunu' ca rë'ënë' Dios. Cate' runru' caní, lë ni run ga runru' löza sóaru' ibanru' yödzölió ni, enca' sóaru' ibanru' dza zá'gaca, todi uzá'aru' yödzölió ni. ⁹ Didza' idútë li lë ni, en le naca lesaca' ila'zí' lu ná'agaca yugu'te bönachi. ¹⁰ Que lë ni na', rusáca'da' zi' cuinru' runru' dxin, tu' runru' löza Dios ban. Cristo gútië' para usölë' yugu'te bönachi. Tu'zí' xibé le benë' nupa na' ta'yéajlë' Lë'.

¹¹ Gunná be'e, en busedi bönachi ilún yugu' lë ni. ¹² Cuntu nu ral-la' uzóli' tsöla'alö tu' nacu' bi' ra'bán, pero ral-la' gunu' le ulu'i nupa ta'yéajlë' Dios ral-la' ilún ca runu' li'. Caní ulu'i'nu' légaquië'.

Len didza' ru'u, en len le runu'.

Ca nadxfí'inu' luzó'o, en ca ru'u lataj zóalenë' Dios Bö' Lá'ayi li'.

Ca runu' ca rnno', en ca nacu' idú tsahui'.

¹³ Tsanni za'a idxina' quiu', bë'tica'sö ladxi' ulabu' guichi lá'ayi lögaca bönachi nacuá' ga ni' zu'. Guchiza icja nágagaquië' lë ni, en busedi légaquië'.

¹⁴ Bití' udödu' cá'asö le buzá' ládxë'ë Dios quiu', lë na' bennë' quiu' ca na'

gula'nná nupa ni' gulu'i didza' uláz queé' Dios, cate' ni' bönni' gula tapa chi'ë böñachi queé' Cristo gula'xóá ná'agaquië' li', en bulu'lidzé' Dios.

¹⁵ Béntica'sö yugu' lë ni. Bé'tica'sö ládxu'u gunu' caní, para ila'lé'e yúgu'të böñachi ca na' zeaj ridéli'nu' le nequi queé' Cristo. ¹⁶ Gudapa chi'i cuinu', en gudapa chi'i xibá rusédiru'. Béntica'sö yugu' lë ni, ate' channö gunu' caní, uló' li', en ulu'lágaca ca' nupa ila'yoni li'.

5

Ca ral-la' gunbi' Timoteo ni'a quégaca böñachi queé' Cristo

¹ Biti' uzenu' bach yugu' bönni' gula, pero guchiza icja nágagaquië' didza', tsca nácagacabí' xuz cazu'.

Guchiza icja nágagacabí' bi'i bönni' ra'bán didza', tsca nácagacabí' bi'i böchi' cazu'.

² Guchiza icja nágagacanu nigula gula didza', tsca nácagacanu xiná' cazu'.

Guchiza icja nágagacabí' bi'i nigula ra'bán didza', tsca nácagacabí' bi'i zan cazu', ca na' röjlöz le naca idú dxi'a.

³ Ben bal yugu' nigula ba guti bönni' que queégacanu, nácagacanu túzinu.

⁴ Channö zóanu tu nigula caní nacuá'abi' bi'i queénu o zxi'ini xi'sóanu, ralla' ila'zédabi' ilunbi' ca rë'ënë' Dios, para ilácalenbi' zí'alö böñachi nacuá' lídxigacabí', en ulu'bí'bi' quégagaquië' xuz xiná'agacabí'. Lë ni naca dxi'a, en le raza ládxé'e Dios. ⁵ Na'a, nigula na' nagá'anamu túzinu, runnu löza Dios, ate' rëla, en te dza rinábatica'sinu lahué' Dios, en rulídzanu Lë' ni'a quégaca böñachi queé', ⁶ pero nigula túzinu na' runnu ca naca le rizé ládxí'nu nácanu ca tu nigula chinátinu cate' ni zóanu nabannu. ⁷ Lësca' caní, gunná be'e böñachi nacuá' ga ni' zu', para ilún ca sa'yéaj yugu' lë ni, para ilaca böñachi cuntu nu gaca bi inné quéguequi. ⁸ Channö zoa nu bönni' cabí rugahué' yugu' dí'a dza queé', en le nácarö lo, channö cabí rugahué' böñachi nacuá' lidxé', chigudá'baguë' le réajlé'ëru' Cristo, en nácarë' xihui' ca nu cabí réajlé' Dios.

⁹ Túzinu nigula zoanu túzinu caní chiyú'urönu ca tsónnalalaj iz huáca ibábanu nupa gácalenli', channö cabí bucá'anamu-në' bönni' queénu para sóalennu-në' ia'túë' bönni'. ¹⁰ Run bayudxi soa nu gun ba nalí queénu ca nácagaca le dxi'a runnu.

Gácalenli'-nu channö buscúlunu-bí' yugu' bí'ido',
en channö ruí'inu ga ila'cuá' böchi'ru' zá'gaquië' yödzö zi'tu',
en channö ruí'inu le ilé'aj ilágugaca böñachi queé' Dios,
en channö rácalennu nupa ta'guí'i ta'zaca',
en channö rúntica'sinu yúgu'të le naca dxi'a.

¹¹ Yugu' nigula túzinu biti' yu'i'gacanu tsónnalalaj iz, biti' ibábagacanu nupa gácalenli', tu' ilunnu ca ta'zësö ládxí'gacanu, en ila'dá'baga'nu Cristo, en ilé'ënini ulu'tsaga ná'agacanu leyúbölö. ¹² Caní gaca, ila'bágä'nu dul-la' tu' tu'zóanu tsölä'alö le gula'yéajlé'ënu Cristo zí'alö. ¹³ Lësca' ilácanu nigula xöhüëdi, en nigula ta'dasö ca', en calégasö ilácanu xöhüëdi, pero lësca' ilácanu nigula unné que luzé'e, en tsöjgútsa'gacanu ga yúbölö, en ila'nnanu le cabí nácaté. ¹⁴ Que lë ni na', rë'ëndä' ulu'tsaga ná'gacanu leyúbölö nigula túzinu cani yú'ugacanu iz cuidi', en ulu'scúlanu-bí' yugu' bí'ido', en ila'nná bë'enu bi'i nacuá'abi' yu'u que queégacanu, para cabí ilui'nu nu ridá'baga' rë'u lataj bi inné queéru', rë'u na' réajlé'ëru' Cristo. ¹⁵ Caní ral-la' gaca, tu' chibulu'bíga'nu bálgagacacnu, ate' tunnu ca rë'ëni Satanás tu' xihui'.

16 Channö nútí'tës bönni' o nigula nu réajlë' Cristo, nacuá'anu nigula túzinu lídxigaca nupa na', ral-la' ilácalen légaranu, para cabí ulu'saca' zí' bönnachi queë' Cristo. Caní gaca, bönnachi queë' Cristo na' gaca ilácalen yugu' nigula nagá'anagacanu túzinu.

17 Benrö bal yugu' bönni' gula tapa chi'ë bönnachi queë' Cristo, yugu' bönni' na' ta'nná bë'ë dxi'a, en bénterö ca' bal yugu' bönni' gula na' tunë' dxin, tunë' libán, en tu'sédine' bönnachi. **18** Nazúaj lu guichi lá'ayi le rnna: "Biti' cu'u du ruá'aba' bëdxi na' rulibiba' zxoa' xtila." Rnna ca': "Náquië' lesaca' nu bönni' huen dxin si'ë lazxjë'."

19 Biti' si' lu no'o didza' ruí'i nu ruzegui didza' tu bönni' gula rapa chi'ë bönnachi queë' Cristo, channö cabí nacuá' chopa tsonna nupa tun ba nalí que le benë'. **20** Nupa túntica'sö dul-la', busidxi léguequi lógaca yúgu'të bönnachi queë' Cristo para iladxi ia'zíca'rö bönnachi ni' Dios. **21** Ni'a queë' Xanru' Dios, en Xanru' Jesucristo, en ni'a quégaquië' gubáz lá'ayi rö queë', rinná bë'eda' li' gunu' ca ta'nná didza' ni. Tuz ca ral-la' uchi'a usöröu' yúgu'të bönnachi, en biti' gunu' bal tuzë' bönni'. **22** Cuntu nu bönni' ixóatë no'o, cabí gunu' ga gáquië', huen dxin queë' Cristo, para cabí ibág'u le runë' channö gunë' bönni' na' dul-la'.

23 Biti'rö guíju' nísasö. Tu' rúntica'sö bayá' lë'u ral-la' guíju' láti'do' xisi uva nal-la para cö' dxi'a lë'ü.

24 Yugu' dul-la' quéguequi bal-la bönnachi ila'lá' lahui zí'alö cate' si' ila'dxín ga uchi'a usöröe' Dios léguequi, ate' tödi ni' ila'lá' lahui dul-la' nabág'a gaca ia'zíca'rö bönnachi. **25** Lësca' caní, ila'lá' lahui dxin dxi'a núngaca bönnachi, ate' channö cabí nalá'gaca lahui, cuntu nu bönni' gaca ucáchë'ë tsaz dxin na' nunë'.

6

1 Yúgu'të bönni' nadó'ogaca ral-la' ilündë'ë bal xángaquië', para cabí gaca nu innë' zí' que La lá'ayi queë' Dios, en que xibá queë'. **2** Nupa ni' nacu'ë xángaca ta'yéajlë'ë Cristo, biti' ral-la' ulu'ca' ana cá'asö légaquië' tu' nácagaquië' böch'i'guequi. Ral-la' ilunrö dxí'a xichíngaquië' tu' ta'yéajlë'ë Cristo, bönni' ni' tu'zi'ë xibé dxin dxí'a na', tu' nadxi'inë' Lë cazë'légaquië'. Ca naca lë ni, busëdi bönnachi nacuá' ni', en guchiza le icja nágagaquië'.

Le reaj ládxí'ru'-në' Dios le ruzí'ru' xibé

3 Channö zoa nu bönni' rusëdinë' xibá yúbölö, en biti' rusëdinë' yugu' didza' dxí'a queë' Xanru' Jesucristo, ca naca xibá na' rusedi rë'u ca ral-la' gunru' ca rë'enë' Dios, **4** bönni' ni run ba zxön cuinë', en biti' bi nözinië'. Didza' biti' naca dxí'a rizë ládxë'ë ca nágagaca didza' böninga, en didza' bizzaj, yugu' le tun ga tu'zxé' bönnachi luzë'eguequi, en ta'díl-lalen luzë'eguequi didza'. Lësca' tun didza' caní ga ta'nné zí' bönnachi que luzë'eguequi, en ta'zá' ládxí'gaca que luzë'eguequi le cabí nácatë. **5** Lësca' caní tun ga ta'díl-latica'së' didza' bönni' biti' ta'yéajni'inë', nupa biti' nazí' lu né'eguequi le naca idútë li. Téquini huáca ila'zí' dumí zián channö ilúngaca tsözxön nupa ta'yéaj ládxí'gaca Dios. Gucuita ga nacuá' bönnachi caní. **6** Zxön naca le ruzí'ru' xibé cate' len yöl-la' ribözä zxön ladxi' reaj ládxí'ru'-në' Dios. **7** Biti' bi nuá'aru' cate' ridixinru' yödzöliö, en lësca' caní, biti' bi uá'aru' cate' uzá'aru' yödzöliö ni. **8** Que lë ni na', channö dësö queëru' le gáguru', en le gácuru', ral-la' udzéjaru'. **9** Yugu' bönni' të'ennë' gata' quégaquië' yöl-la' tsahui', gaca quégaquië' le si' bë' légaquië' le xihui', ate' ila'yu'ë lu yalaj que tu' xihui', ate' lu yöl-la' biti' bi nözi quégaquië' zián le ila'zë

ládx'i'gaquië', le ilún ditaj légaquië'. Yugu' lë ni ulu'suniti légaquië', en ilún ga ila'nitié' tsaz. ¹⁰ Tu' ta'zé ládx'i'gaca bönachi dumí, lë ni run ga tun yúgu'të le cabí naca tsahui'. Bal-lë' bönni', tu' ta'zé ládx'i'gaquië' le, bulu'cá'ané' le gula'yéajlë'ë Cristo, en chiraca quégaquië' zián le tu'saca' zi' légaquië'.

Nu run dxin queë' Cristo naca ca tu bönni' rejë' gudil-la

¹¹ Na'a, bönni' queë' Dios, gucuítia ga raca le caní.

Bé'tica'sö ládx'u' gunu' le naca tsahui', en le rë'enë' Dios.

Guyéajlë'tica'së' Cristo, en bidxí'i yugu' luzó'o.

Bé' ladxi' gacu' zxön ladxi', en nöxañ ladxi'.

¹² Ca runé' tu bönni' idú ládxë'ë rejë' gudil-la,

ben dxin que le réajlë'ëru' Cristo, ate' beni quiu' yöl-la' na'bán idú.

Para gaca caní bulidzé' Dios li'. Dxi'a guca le gunnó' yalaj lulu ca réajlë'u Cristo, lë na' gunnó' lógaca zián nupa tun ba nalí que didza' bë'u. ¹³⁻¹⁴ Ni'a queë' Xanru' Dios, Nu na' nabánigaca yúgu'të le nacuá', enca' ni'a queë' Jesucristo, Nu ben ba nalí le naca dxi'a le gunnë' yálajdo' lahuë' Poncio Pilato, rinná be'eda' li' gun chi'u yugu' lë na' gunná be'enë' Cristo rë'u. Ral-la' gacu' idú tsahui', en biti' bi gunu' le gü'i lataj nu bi innë quiu', ga idxintë dza ni' ulu'i lahuë' Xanru' Jesucristo. ¹⁵ Cate' idxín dza na' huödë' Jesùs, Dios ulu'ë lahuí Lé'.

¡Dios náquië' lá'ayi!

¡Tuzé' Lé' dë lu në'ë yöl-la' unná bë',
en rinná bë'enë' yúgu'të nupa ta'nná bë',

en náquië' ca' Xángaca yúgu'të nupa nácagaca xan!

¹⁶ ¡Tuzé' Lé' zóatica'së'!

¡Zoë' lu bení' ga biti' gaca nu idxín rácasö que!

¡Catu caz nu bilé'e Lé', en biti' gaca nu ilé'e Lé'!

¡Queë' Lé' gácatica'sö le run Lé' bal, en yöl-la' unná bë'!

¡Ca' gaca!

¹⁷ Gunná be'e yugu' bönni' dë quégaquië' yöl-la' tsahui' dza ni zóaru' na'a, para cabí ilún ba zxön cuíngaqüië', en para cabí ulu'zxöni ládx'i'gaquië' yöl-la' tsahui' na' biti' naca lóza. ¡Ral-la' ilunë' lóza Dios ban, Nu rúnnada' queë' yúgu'të le ruzí'iru' xibé! ¹⁸ Gunná be'e légaquië' ilunë' le naca dxi'a, para ila yanda' dxin dxi'a tunë', lë na' naca tu yöl-la' tsahui' idú. Ral-la' bi ulu'nödzjë' quégaca bönachi yechi', en ilu'i ládx'i'gaquië' léguequi. ¹⁹ Channö ilunë' caní, ulu'tubë' yöl-la' tsahui' na' naca idú, le ulu'zi'ë xibé dza si' za', en ila'déli'në' yöl-la' na'bán idú.

Le gulu'ë Pablo lu ná'abi' bi'i Timoteo

²⁰ Bócha'ado' Timoteo, ben chi'i le nadödi lu no'o. Guçuítia ga nacuá' nupa tuí'i didza' cá'asö, en yugu' didza' biti' nazaca', en yugu' didza' bizzaj, yugu' didza' na' tuí'i nupa ta'nnasö tábada', ate' nazi' yé'eguequi ca naca lë na' tun. ²¹ Bal-la bönachi gula'zí' lu në'eguequi yugu' didza' caní, ate' gula'chixi gula'nigui ca naca le réajlë'ëru' Cristo.

Rinábida'-në' Dios uzá' ládxë'ë quiu' le nácagaca dxi'a queë'.

¡Ca' gaca!

DIDZA' BUROPI GUSÖL-LË'Ë PABLO QUEËBI' BI'I TIMOTEO

Pablo rugapë' Dios bi'i Timoteo

¹ Neda', Pablo, naca' gubáz nasööl-lë'ë Cristo. Caní naca' tu' rö'ënë' Dios gaca' caní, para caní gaca le guzxí' lu në'ë, gunnë' queëru' yöl-la' na'bán idú, le ruzá' ladxé'ë Jesucristo queëru'. ² Rugapa' Dios li', böcha'ado' Timoteo. Nacu' ca zxí'ini caza' tu' benru' tu zxön xichiné' Cristo, ate' nadxf'ida' li'. Rinábida'-në' Xúziru' Dios, enca' Xanru' Jesucristo, uzá' ladxé'ë quiu', en huechi' ladxé'ë li', en gunë' ga cõ' dxi icja ladxí' do'o.

Timoteo ral-la' gunbi' ba nali queë' Jesucristo

³ Rea'-në' Dios: "Xclenu" ca naca quiu' cate' rulidza'-në' Dios. Biti' rizóa dxí'a' rinaba' ni'a quiu' rëla, en te dza lahué' Dios, Nu na' runa' xichiné' idú ladx'a' a ca na' gulunë' xuz xtá'ahua'. ⁴Cate' röjneda' ca na' gurödxu', rizé ladx'a' a ulé'eda' li', para gaca udzéjada' idú ladx'a'. ⁵ Rea'-në' Dios: "Xclenu" tu' zoa le run ga röjneda' ca réajlë' u Cristo idú ladx'u'. Lësca' caní, gula'yéajlë'ënu' xinó'o gula Loida, enca' xinó'o Eunice Lë' zí'alö ca li', ate' runa' löza, lësca' caní réajlë' u Lë' na'a.

⁶ Tu' naca caní, rusá'a ladx'u' para usubanan' le benné' Dios quiu', lë na' bidxín quiu' cate' ni' guxóa na'a li', en bulidza'-në' Dios. ⁷ Bö' na' benné' Dios queëru' biti' naca tu bö' le gun ga gádxiru', pero benné' queëru' Bö' Lá'ayi Nu run ga náparu' yöl-la' huáca, en run ga nadxf'iru' luzá'aru', en run ca' ga rinná be'e cuinru'. ⁸ Que lë ni na', biti' utu' inu' gunu' ba nali queë' Xanru', en biti' utu' inu' ca raca quia' neda' ni, nadzuna' lidxi guifi' tu' runa' xichiné', pero ben tsözxón nupa ta'guí'i ta'zaca' tu' tun libán que didza' dxi'a. Dios gunnë' yöl-la' huáca quiu' para gunu' caní. ⁹ Dios caz busöölë' rë'u, en bulidzé' rë'u para gácaru' idú dxi'a. Biti' bulidzé' rë'u tu' zoa le dxi'a benru', pero bulidzé' rë'u tu' gó'uni quéziné' Lë', en tu' ruza' ladxé'ë caní queëru'. Dza ni'te buzóë' caní queëru' zí'atélo ca guta' yödzölió ni, tu' néquiru' queë' Jesucristo. ¹⁰ Na'a, chibulu'i lahui le ruzá' ladxé'ë Dios queëru', tu' bulu'i lahui' buzóë' Jesucristo Nu rusööl rë'u. Bugüé' yöl-la' guti, en bulu'e lahui yöl-la' na'bán idú na', le cabí ca' initi. Caní naca ca rnna didza' dxi'a.

¹¹ Cristo buzóë' neda' para guna' libán que didza' dxi'a na', en para gaca' gubáz queë' para usédigacada' bönachi izá'a. ¹² Que lë ni na' rigu'i rizáca' a ca' yugu' le raca quia' ni, pero biti' rutu'ida', tu' núnbë'a Nu na' réajlë'a. Runa' löza Lë', napé' yöl-la' huáca gapa chi'ë le budöda' lu në'ë ga idxintë dza ni' huödë'.

¹³ Didza' dxi'a na' biyönnu' bena' libán que ral-la' gaca quiu' tu le rulu'i ca ral-la' usédinu' bönachi ca réajlë'ëru' Jesucristo, en ca nadxf'iru' Lë'. ¹⁴ Ben chi'i le naca dxi'a na' nadödi lu no'o, ate' gaca gunu' caní len yöl-la' huáca queë' Dios Bö' Lá'ayi, Nu zóalen rë'u.

¹⁵ Chinöz quézinu' ca na' gulunë' zian bönni' ta'yéajlë'ë Cristo nacu'ë luyú Asia bulu'béaj ladxí'gaquie' neda'. Figelo, en Hermógenes nabábaguie' bönni' ni. ¹⁶⁻¹⁷ Rinábida'-në' Xanru' Dios huéchi' ladxé'ë bönachi nacuá' lidxe' Onesiforo, tu' butipe' ladx'a' bönni' ni zián luzuí. Cate' bidxiné' Roma, idú ladxé'ë buguilje' neda', ate' budzöliné' neda'. Biti' butuf'inë' ni'a quia' neda'

tu' nadzuna' lidxi guíe ni, nága'a du guíe. ¹⁸ Rinábida'-në' Xanru' huéchi' ládxë'ë lë' dza ni' idixinë' lahuë' Dios. Chinöz quézinu' ca na' gúcalenë' bönni' ni rë'u, cate' ni' guzóaru' yödzö Éfeso.

2

Ral-la' gácabi' Timoteo ca tu bönni' idú ládxë'ë rejë' gudil-la

¹ Na'a, zxí'ina'do', butipa ládxu'u ca naca le ruzá' ládxë'ë Jesucristo quiu'. ² Didza' biyönnu' bë'a lógaca zián nupa tun ba nalí que, didza' ni budödi lu ná'agaquie'bönni'tunë' ca ta'nnë', bönni' gaca ulu'sédinë' ca' ia'bal-la bönnachi.

³ Ral-la' guá' ilenu' le ulu'saca' li' zi' ca na' ruá' rilén nu naca bönni' queë' Jesucristo idú ládxë'ë rejë' gudil-la. ⁴ Nu bönni' rejë' gudil-la, biti' ca' gútsë'ë yugu' le tun bönnachi yödzölió ni, para tsaza ládxë'ë bönni' na' nuzoë' lë' gáquië' bönni' queë' rejë' gudil-la. ⁵ Lësca' caní, nu nutsa' lu huitaj, biti' bi ideli' channö cabí run ca ral-la' gun. ⁶ Nu bönni' gúz gú'una runë' dxin, zí'alö lë' uzi'ë xibé lë na' razë'. ⁷ Busá' ládxu'u lë ni rea' li', ate' Xanru' caz gunë' ga tséajni' inu' yúgu'të.

⁸ Yójne ca guca queë' Jesucristo. Guljë', en gúquië' zxí'ini xi'söë' David, en gudödi gútië', bubenä' lu yöl-la' guti. Caní rnna didza' dxí'a runa' libán que.

⁹ Tu' runa' libán que didza' dxí'a, rigui'i rizáca'a le raca quia', ga ridxitnë nága'a lidxi guíe ni, ca raca queë' tu bönni' huía' dö', pero biti' ca' nága'të xtídzë'ë Dios. ¹⁰ Que lë ni na' ruá' riléna'yúgu'të lë ni tu' nadxi'ida' nupa guröë' Dios, para ulu'lë' ca' légaquie'. Jesucristo caz runë' ga ulu'lágaca bönnachi na' para ila'cuá' lu bení' idú queë'. ¹¹ Catëz naca lë ni rnna:

Channö nátilenru' Lë', sóalenru'-në' ca' ibanru'.

¹² Channö guá' ilenu' le quí'i sáca'ru', inná bë'lenru' ca' Lë'.

Channö ridá'baga'ru' Lë', Lë' tá'baguë'ë ca' rë'u.

¹³ Sal-la' biti' runru' ca rnñaru', Lë' rúnntica'së' ca rnñe'.

Lë' biti' gaca tá'baguë' le náquie'.

Nu bönni' huen dxin queë' Cristo rurúajë' dxí'a

¹⁴ Busá' ládxí'gaca nupa nacuá' ga ni' zu' ca naca lë ni, ate' ni'a queë' Xanru' Dios gunná be'e légaquie' para cabí ila'dil-la dídzë'ë ca nácapaca didza' cabí nazáca'gaca. Yugu' didza' caní tun ga ila'niti nupa tu'zé nagui léguequi.

¹⁵ Bë'tica'sö ládxu'u urúajü' dxí'a lahuë' Dios para gacu' ca tu bönni' huen dxin biti' rutu'iñë' ca naca dxin nunë'. Dxí'ado' ral-la' ugunu' dxin didza' idútë li.

¹⁶ Na'a, gucuítá ga nacuá' nupa tu'i didza' biti' nazaca', en didza' cá'assö, tu' tun didza' caní ga ilunrë' le cabí rë'ënë' Dios. ¹⁷ Ila'zé didza' tu'ë ca rizzön huë' nudzu' le ridúdu'rirlá. Hímeneo, en Fileto nabábaguie' nupa tu'i didza' caní. ¹⁸ Iropë' ni gula'chixi gula'níguinë' ca naca le naca idútë li, tu' ta'nnë' chigudödi dza ral-la' ulu'bán nupa chinátigaca, ate' gula'béquie' baröli bal-la bönnachi ga ridxitnë biti' rö' ta' yéajlé' Cristo. ¹⁹ Le bene' tsutsu Dios zóaticá sö, en dë tu le naca bë', le rnna: "Núnbe'ë Dios nupa néquiguequi queë'." Rnna ca: "Guli'cuítá ga raca le ruá' dö', yúgu'télí' libí'ili' néquili' queë' Cristo."

²⁰ Tu lu yu'u zxön yú'ugaca le néquini, calégasö oro, en plata, pero lësca' le néquini yaga, en yu. Bal-la tu'gún bönnachi léguequi dxin ga liná', ate' ia'bal-la tu'gún léguequi dxin ga biti' naca liná'. ²¹ Para gácaru' ca naca lë na' tu'gún bönnachi dxin ga liná', en para gaca gunru' le naca dxí'a, en gácaru' lesaca' ugune' Xanru' rë'u dxin, ral-la' ucuítaru' ga raca le ruá' dö'. Channö gunru' caní, gácaru' lesaca' gunru' yúgu'të dxin dxí'a.

²² Gurú'una le tun ga nu së ladxi' le ruá' dö' ca raca quégaquië' bönni' ra'bando'. Bë' ladxi' gacu' tsahui'. Ben le run ga réajlé'u Cristo, en le run ga nadxi'inu' yugu' luzó'o, en le run ga ribözü' dxí'ado'. Ca nácagaca lë ni, ben tsözxón nupa tu'lidza Xanru', naca idú dxi'a icja ládxi'do'guequi. ²³ Na'a, gurú'una yugu' didza' cá'asö, en didza' biti' nazaca', tu' chinöz quézinu' tun didza' caní ga ta'dil-la didza' bönnachi. ²⁴ Bönni' huen dxin queë' Xanru' biti' ral-la' tít-lalenë' bönnachi didza', pero ral-la' gáquië' nöxaj ladxi' lógaca yúgu'të bönnachi. Ral-la' gaca usédinë' bönnachi, en gáquië' ca' zxön ladxi'. ²⁵ Lu yöl-la' nöxaj ladxi' ral-la' uzéajni'inë' nupa ta'dabaga' le runé' libán que. Channö gunë' caní, nadxi ca' Dios gu'ë légaquië' lataj ulu'bí'i ládxi'gaquië' para ilúnbe'ë le naca idútë li. ²⁶ Caní ulu'lë' lu yalaj que tu' xihui' ga nadzungaquië', ate' ulu'huöáquië' tsahui' para ilunë' ca rë'ënë' Dios.

3

Ca ilaca bönnachi dza tsöjsétëgaca

¹ Lësca' ral-la' inözinu' lë ni: Dza tsöjsétëgaca ilaca dza ila'gui'i ila'zaca' bönnachi. ² Yugu' dza ni' ila'cu'ë bönni' ilácagaquië' caní:

Ila'dxi'i la' cuíngacasë', en ulu'huídi'në'.

Ilún ba zxön cuíngaqüië', en ulu'lui' cuíngaqüië' zxön.

Ila'nnë zi'ë que le naca lá'ayi.

Ila'dá'baguë'ë xuz xiná'agaquië'.

Ilácagaquië' bönni' cabí ta'yaza ládxi'gaquië'.

Biti' ilunë' ca rë'ënë' Dios.

³ Biti' ila'dxi'inë' ca ral-la' ilunë'.

Ilácagaquië' zidzaj ladxi'.

Ila'nnë que luzá'agaquië'.

Biti' ila'nná be'e cuíngaqüië'.

Ilácagaquië' bönni' dza'a.

Biti' ila'lé'enë' dxi'a le naca dxi'a.

⁴ Ilácagaquië' hueti luzë'e, en biti' ila'dzáguië' dxi'a.

Ulu'lui' cuíngaqüië' ca bönni' nayëpisëgaquië'.

Ila'dxi'inë' le ila'yázasö ládxi'gaquië', en caléga Dios.

⁵ Ulu'lui' cuíngaqüië' ca bönni' núnbe'gaquië' Dios.

Ila'dá'baguë'ë le ruzá' ládxë'ë Dios queëru'.

Gucuíta ga nacuá' bönnachi caní. ⁶ Lësca' caní, lu yöl-la' banísä quégaquië' ila'yazë' gapa naca lu yu'u, en ila'zí' yé'enë' yugu' nigula biti' bi nözguequinu para ila'zí' lu ná'agacanu le ulu'sédinë'. Ila'bágänu nigula na' dul-la' zián, en ilu'i ládxi'gacanu yugu' le ila'zësö ládxi'gacanu le cabí nazaca'.

⁷ Ila'yönitica'sinu nigula ni' didza' ilún libán que bönnachi, pero biti' ca' ila'déli'nu ila'yéajni'ininu le naca idútë li. ⁸ Ca na' guláquië' Janes, en Jambres, bönni' ni' gula'dá'baguë'ë Moisés, lësca' caní ilácagaquië' bönni' ni, ila'dá'baguë'ë le naca idútë li. Ilácagaquië' chul-la niti, en ila'chíxine' ca naca le réajlé'ëru' Cristo. ⁹ Biti' ila'déli'rönë', pero gaca bë' nácagaquië' bönni' biti' bi nözguequinë' lógaca yúgu'të bönnachi, ate' gaca quégaquië' ca na' guca quégaquië' Janes, en Jambres na'.

Le rigu'ë Pablo lu ná'abi' bi'i Timoteo

¹⁰ Nöz quézinu' ca naca le rusédida' bönnachi, en ca runa'. Nözinu' ca' le ruí'i ládxa'a guna', en ca réajlé'a Cristo, en ca naca' nöxaj ladxi', en ca nadxf'ida'

luzá'a, en ca riböza' zxön ladxi'. ¹¹ Nözinu' ca' yugu' le gula'bía ládx'i'gaca böñachi neda', en yugu' le gudí'i guzxáca'a, le gulaca quia' lu yödzö Antioquía, en lu yödzö Iconio, enca' lu yödzö Listra. Yugu' le gula'bía ládx'i'gaca böñachi ni' neda' biá' guléna', ate' Xanru' Jesús busölë' neda' lu yúgu'të le na'. ¹² Yúgu'të nupa té'eni ilaca idú dxi'a tu' néquiguequi queé' Jesucristo, lësca' ila'gu'i ila'záquië' yugu' le ila'bía ládx'i'gaca böñachi légaquië'.

¹³ Na'a, bönni' tuá' dö', en bönni' ta'zí' yé'ë ilácarë' xihui'. Ila'zí' yé'enë' böñachi, ate' ila'zí' yé'e böñachi ca'légaquië'.

¹⁴ Na'a, ben chi'i yugu' le buzëdu', en le guzxi' lu no'o, tu' nunbë' cazu' nupa bulu'sedi li'. ¹⁵ Ga gudela' nacu' bf'ido' núnbë'u le nazúajgaca lu guichi lá'ayi, le huáca ulu'zéajni'ide'e li' para uló' tu' réajlë'u Jesucristo. ¹⁶ Yúgu'të le nazúajgaca lu guichi lá'ayi guchízië' Dios icja ládx'i'do'gaca böñachi queé', nupa na' bulu'zúaj lu guichi didza' na' bë'ë Dios. Lë na' nazúaj lu guichi nácada' lesaca' usedi rë'u, en ubéaj ga liná' le runru', en ugú'u rë'u tu nöza, en usedi rë'u para gácaru' tsahui'. ¹⁷ Caní run, para gaca sina' nu naca queé' Dios, en gácada' gun yúgu'të le naca dxi'a.

4

¹⁻² Ni'a queé' Xanru' Dios, enca' Xanru' Jesucristo, rinná bé'eda' li' gunu' libán que xtídzë'ë Xanru'. Lë cazé' uchi'a usöröe' nupa ni nabángaca, en nupa chinátigaca, dza ni' huöde' idinná bë'ë. Bé' ladxi' gunu' lë ni channö raca dxi'a quiu' o biti' raca dxi'a. Lu yöl-la' zxön ladxi', guléaj ga liná' le tun böñachi. Busá' ládx'i'gaquië', en guchiza icja nágagaquië' ca naca lë na' rusédiru'. ³ Caní ral-la' gunu' tu' idxín dza cate' biti' ulu'zé' nágagaquië' xibá' tsahui', pero ilé'ënинë' ila'yönnë' le ta'dánisinë'. Ca ta'zésö ládx'i'gaquië' ulu'tubë' quégaquië' nupa ulu'sedi légaquië'. ⁴ Ulu'cá'anë' le naca idútë li, en ila'zí' lu ná'agaquië' yugu' didza' ridasö. ⁵ Na'a, ral-la' gacu' zxön ladxi' lu yúgu'të le runu'. Biá' gulén le ulu'saca' li' zí'. Ben libán que didza' dxi'a. Idú ládxu'u ben dxin le budöde' Cristo lu no'o gunu'.

⁶ Ca naca quia' neda', nudödi cuina' lu në'ë Dios, ate' chizóa ilútië' neda' tu' runa' xichinë', ate' dza uzá'a yödzölió ni chizóa idxín. ⁷ Ca runë' tu bönni' idú ládxë'ë rejë' gudil-la, lësca' caní bena' neda' dxin, en chibudxi bena' le budöde' Cristo lu na'a guna', tu' bena' idú ca sa'yéaj le réajlë'ëru' Cristo. ⁸ Ia'stú, naca löza quia' idéli'da' le ral-la' ila'zí' nupa nácagaca tsahui', le gunnë' Xanru' quia' dza ni', ate' tsahui' naca ca ruchi'a rusöröe' rë'u. Calégasö quia' neda' gunnë' le, pero lësca' gunnë' le quégaca yúgu'të nupa ta'dxi'i Lë', en idú ládx'i'guequi ta'böza dza huöde'.

Le buzúajë' lu guichi Pablo gunbi' Timoteo

⁹ Bé' ladxi' guídateo' ga ni zoa' ¹⁰ tu' guléaj ládxë'ë Demas neda', tu' nadxi'inë' le ruzi'ë xibé yödzölió ni, ate' guyijë' yödzö Tesalónica. Crescente guyijë' luyú Galacia, ate' bi'i Tito guyéajbi' luyú Dalmacia, tu' caní ben bayudxi ilunë'. ¹¹ Tuzë' Lucas zóalenë' neda'. Guchë'ë-bi' bi'i Marcos para guídaleni' li' tsözxön, tu' nácabi' gúnlenbi' neda' tsözxön xichinë' Cristo. ¹² Gusöl-la'a-bi' bi'i Tíquico lu yödzö Éfeso. ¹³ Cate' guídu', biá' quia' lari' guitsa' na' bucá'ana' lu yödzö Troas lu yu'u lidxe' Carpo, en biá' ca' quia' yugu' guichi, en le naca lo, biá' quia' yugu' guichi néquiguequini guídi.

¹⁴ Alejandro, bönni' gubëdxi guíë, zián le bi'ë dö' quia'. Lë cazë' Xanru' ubi'ë queë' ca nácagaca le benë' bönni' ni quia'. ¹⁵ Ben chi'i cuinu' queë' bönni' ni, tu' ridá'baga'dë'ë didza' runru' libán que.

¹⁶ Cate' le zi'alö luzuí bidxina' lógaquië' bönni' yúlahui', cuntu nu gúcalen neda', pero bulu'béaj ládx'i'gaca yúgu'të bönachi neda'. Biti' ré'ënda' uzí' lëbë' Dios légaquië'. ¹⁷ Guzóalenë' Xanru' neda', en butipë' ládxa'a para údxi guna' libán que xtídzë'ë para ila'yöni yúgu'të bönachi izá'a le. Caní guca, busölë' Xanru' neda', ate' guca quia' tscá burúaja' lu ruá'aba' bëdxi guixi'. ¹⁸ Lë cazë' Xanru' usölë' neda' lu yúgu'të le cabí raca dxi'a, en gun chi'ë neda' ga idxíntea' ga rinná bë'ë Lë' ni' yehua' yubá. ¡Gácatica'sö queë' yöl-la' ba yúgu'të dza zá'gaca! ¡Ca' gaca!

Pablo rugapë' Dios bönachi queë' Cristo

¹⁹ Bugapa Dios Priscila, en Aquilo, enca' bönachi nacuá' lidxë' Onesíforo. ²⁰ Bugá'anë' Erasto lu yödzö Corinto, ate' bucá'ana'-në' Trófimo luyú Mileto tu' ré'enë'. ²¹ Bë' ladxi' guídu' ga zoa' zi'alö cate' idxín beo' ziaga. Eubulo, en Pudente, en Lino, en Claudio, en yúgu'të böchi' luzá'aru' ni tu'gapë' Dios li'.

²² Rinábida'-në' Xanru' Jesucristo sóalenë' li'. ¡Gácalen li' le ruzá'ládxë'ë Dios quiu'! ¡Ca' gaca!

DIDZA' GUSÖL-LË'Ë PABLO QUEËBI' BI'I TITO

Pablo rugapë' Dios bi'i Tito

¹ Neda', Pablo, naca' huen dxin queë' Dios, en gubáz nasöl-lë'ë Jesucristo. Gusöl-lë'ë neda' para guna' ga ila'yéajlé' bönachi chigurö cazë' Dios, para ulu'únbe' le naca idútë li ca ral-la' gun nu nunbe' Dios. ² Caní naca' tu' runa' löza uzi'a xibé yöl-la' na'bán idú le guzxí' lu në'ë Dios gunnë' queëru' dza ni'te, cate' si' gusí lo rata' yúgu'te le dë, ate' run cazë' Lë' le nazí' lu në'ë gunë'. ³ Cate' bidxín dza que, Dios bulu'e lahui xtídzë'ë, le gulu'ë lu na'a guna' libán que. Caní gunná bé'enë' Dios, Nu busólá rë'u, neda'. ⁴ Rugapa' Dios li', böcha'ado' Tito. Nacu' idú zxí'ini caza' tu' naca lëbisö ca réajlé'ëru' Cristo. Rinábida'-në' Dios Xuz, en Xanru' Jesucristo Nu busólá rë'u, uzá' ládxë'ë quiu', en huéchi' ládxë'ë li', en gunë' ga soa dxí icja ládxí'do'o.

Dxin queë' Cristo runbi' bi'i Tito luyú Creta

⁵ Que lë ni na' bucá'ana' li' luyú Creta, para usó' o le riyadzaj quégaca bönachi queë' Cristo nacuá' ni', para ilácagaca idú bönachi queë' Cristo, en para ucú'u bönni' gula yúgu'te yödzö para ilún chi'ë bönachi queë' Cristo nacuá' tu tu yödzö ni', ca na' chigunná bé'eda' li' gunu'. ⁶ Nu bönni' gula rapa chi'ë bönachi queë' Cristo ral-la' gáquië':

Bönni' cuntu nu bi gaca innë queë'.

Zoa túzinu nigula queë'.

Yugu' zxí'inë' ral-la' ila'yéajlé'ëbi' Cristo.

Biti' soa nu gaca innë quégacabi' ta'dá dzágasibi' ca', o ta'dá'baga'bi' xuz xiná'agacabi'.

⁷ Nu bönni' rapa chi'ë bönachi queë' Cristo run bayudxi:

Biti' runë' le gü'i lataj nu bi innë queë' ca runë' xichinë' Dios.

Biti' gáquië' bönni' zidi o bönni' icja dza'a,

o bönni' re'jë', o bönni' ribízxjanë',

o bönni' rizë ládxí'së' dumí.

⁸ Ral-la' gu'ë ga ila'cu'ë böchi'ru' ta'dxinë' lidxë'.

Ral-la' sé ládxë'ë gunë' le naca dxí'a.

Ral-la' gáquië' bönni' réajni'i, en bönni' tsahui'.

Ral-la' gádxinë' Dios, en inná' be'e cuinë'.

⁹ Ral-la' gun chi'ë didza' idútë li ca chinazëdë',

para gaca ichízië' icja nágagaca bönachi ca sa'yéaj xibá dxí'a,

en para gaca usayje' rú'agaca bönachi ta'nñé que.

¹⁰ Caní ral-la' gáquië' tu' ta'dá'baguë'ë zián bönni', en tu'ë didza' biti' nazaca', en ta'zí' yé'enë' bönachi. Zián bönni' tunë' caní nácagaquïë' judío.

¹¹ Yugu' bönni' ni, run bayudxi gunu' ga tsayaj ruá'agaquïë', tu' tunë' ga ta'chixi ta'nigu yúgu'te bönachi nacuá' yu'u gapa ta'yázië', en tu'sédinë' le cabí ral-la' ulu'sédinë'. Caní tunë' para ila'zí'isë' dumí.

¹² Tuë' bönni' gubábë' bönachi Creta ga na'zu', bönni' na' bë'ë didza' uláz que yudo' quégaguïë', gunnë': "Ta'zí' yé'tica'së' bönni' Creta, en nácagaquïë' ca böa' guí'a sínia'. Nácagaquïë' bönni' huágulë'ë xöhüedi." ¹³ Didza' ni benë' ba nalí quégaguïë' naca idútë li. Que lë ni na' gudil-la légaquïë' para gaca idú ca ta'yéajlé'ë Cristo, ¹⁴ en para cabí ulu'zé nágagaquïë' yugu' didza' ridasö

quégaquië' bönni' judío, en biti' ilunë' ca ta'nná bë' bönnachi nucá'anagaca le naca idútë li.

¹⁵ Yúgu'të naca dxi'a quégaca nupa nácagaca dxi'a, pero quégaca nupa nácagaca xihui', en biti' ta'yéajlë', biti' bi naca dxi'a, pero nácagaca xihui' ga ridxitnë le ta'bequi ícjaguequi, en le ta'zá' ládx'i'gaca. ¹⁶ Ta'nné' núnbë'gaquië' Dios, pero le túngaquië' biti' röjlöz le ta'nné' tu' nácagaquië' bönni' tu'dí'inë' Dios. Ta'dá'baguë'ë xtídzë'ë, en biti' ca' gaca ilunë' le naca dxi'a.

2

Xibá dxi'a le ral-la' usëdiru'

¹ Na'a, ral-la' gu'u didza' le röjlöz xibá dxi'a.

² Busedi yugu' bönni' gula:

Biti' ral-la' ilë' ajë'.

Ral-la' iláquië' ba'a ladxi', en bönni' ta'yéajni'inë'.

Ral-la' gaca idú ca ta'yéajlë'ë Cristo.

Ral-la' ila'dxi'inë' luzá'agaquië', en ila'bözë' zxön ladxi'.

³ Busedi yugu' nigula gula:

Ilunnu le raza ládxë'ë Dios.

Cabí ila'nnënu que luzá'agacanu, en cabí ilë'ajnu.

Ral-la' ulu'sédinu le naca dxi'a.

⁴ Ral-la' ulu'sédinu' nigula ni' yú'ugacanu iz cuidi'

para ila'dxi'nu bönni' que queégacanu, enca' zxí'inigacanu.

⁵ Ral-la' ilácanu nigula ta'yéajni'nu, en nigula dxi'a ladxi'.

Ral-la' ilún chí'nu le dë lídxigacanu, en ilácanu dxi'a.

Ral-la' ilunnu bal bönni' que queégacanu.

Ral-la' cabí bi ilunnu le gü'i lataj nu inné zi' que xtídzë'ë Dios.

⁶ Busedi yugu' bönni' ni' nacu'ë iz cuidi':

Ral-la' ilácaquië' bönni' ta'yéajni'inë'.

⁷ Ral-la' gúntica'su' le naca dxi'a,

ulu'i'nu' bönnachi caní ca ral-la' ilúngaca.

Ca rusédinu' ral-la' ulu'i nacu' idú ladxi', en ba'a ladxi'.

⁸ Ral-la' usédinu' didza' dxi'a le cabí gaca nu bi inné que.

Caní gunu' ga utu'i'ne' bönni' ridá'baguë'ë,

en biti' gaca bi inné' queëli' runlì' le ruá' dö'.

⁹ Busedi böchí'ru' ni' ta'yéajlë'ë Cristo, en nadó'ogaquië':

Ral-la' ila'cu'ë nöxaj lógaquië' xángaquië'.

Ral-la' ilunë' yúgu'të le ila'yaza ládx'i'gaquië' xángaquië'.

Biti' ral-la' tá'baga'gaquië' le ta'nná bë'ë.

¹⁰ Biti' bi ulu'cáchi'lanë'.

Ral-la' ulu'luí' cuíngaquië' tsahui' ca naca yúgu'të le tunë'.

Caní ulu'i lo naca dxi'a xibá queë' Dios, Nu busölá rë'u.

¹¹ Cristo, bönni' na' buzá' ládxë'ë Dios queëru' chibulu'i lahuë' lógaca yúgu'të bönnachi para ulu'lágaca. ¹² Lë' rusédinë' rë'u ucá'anaru' le cabí raza ládxë'ë Dios, en cabí sé ládx'i'ru' le naca que yödönlü ni, pero cözaru' zxön ladxi', en gácaru' tsahui' dza ni zóaru' na'a, en gunru' ca rë'ëni quézinë' Dios.

¹³ Ral-la' cözaru' le runru' löza le gun ga gácaru' bica' ba, lë na' gaca dza ni' cate' ulu'i lahuë' Jesucristo lu bení' idú queë'. Náquië' Dios zxön, Nu rusölá rë'u. ¹⁴ Lë cazë' budödi cuinë' uláz queëru', para böá'uë' rë'u lu yúgu'të le

naca xihui', ate' ruúné' rë'u tsahui' para gácaru' bönachi queë', en güí'ládxi'ru' gunru' le naca dxi'a.

¹⁵ Yugu' lë ni bë' didza', en guchiza icja nágagaca bönachi ni', ate' len yöl-la' unná bë' gudil-la léguequi. Béntica'sö caní, para cabí si' lataj nu ucá'ana cá'asö xtídu'u.

3

Le ral-la' ilún bönachi ta'yéajlé' Cristo

¹ Busá' ládxi'gaquië' böchi'ru' ni' ilunë' ca ta'nné' bönni' dë lu ná'agaquië', en bönni' yúlahui', para ilunë'ca rnna xtída'gaquië'. Ral-la' ila'cu'ë sina' ilunë' le naca dxi'a. ² Biti' bi le ruá' dö' ral-la' ila'nné' que luzá'agaquië', en biti' ila'díl-lalenë' légaquië' didza', pero ral-la' ilácagaquië' nöxa' ladxi', en idú ladxi' lögaca yúgu'të bönachi.

³ Lësca' rë'u, zí'alö gúcaru' yugu' bönni' biti' ta'yéajni'inë', en gudá'baga'ru' Dios. Gudaru' nanítiru', en gúcaru' ca nupa nadó'ogaca, tu' benru' le guzé ládxi'ru' le ruá' dö', en ia'bal-la le guyaza ládxi'ru'. Benru' ca' le ruá' dö', en buzxé'ru' luzá'aru'. Biti' bila'lé' bönachi rë'u dxi'a, ate' rë'u biti' bilé'ru' dxi'a luzá'aru' turu' ia'turu'. ⁴ Ní'irö bulu'e lahui Dios, Nu rusólá rë'u. Naca bë' náquië' idú dxi'a, en nadxi' inë' yúgu'të bönachi, ⁵ tu' busölé' rë'u, calëga tu' zoa bi le naca dxi'a benru' rë'u, pero tu' buéchi' ládxé'ë rë'u. Buné' rë'u dxi'a, en benë' ga nácaru' bönachi cubi. Dios Bö' Lá'ayi rucubé' rë'u. ⁶ Dios gusöl-lë'ë Dios Bö' Lá'ayi queëru' tu' néquiru' queë' Jesucristo, Nu rusólá rë'u. ⁷ Buzá' ládxé'ë queëru', en bunë' rë'u tsahui' para gata' yöl-la' na'bán idú queëru', le runru' lóza gunnë' queëru'.

⁸ Didza' idútë li lë ni nuzúaja' lu guichi. Rë'ënda' usédíde' enu' yugu' bönni' ni' yugu' lë ni para ilui'i ládxi'gaquië' ilúnctica'së' le naca dxi'a tu' ta'yéajlé'ë Dios. Lë ni naca dxi'a, en nácdaca' lesaca' ila'zí' lu ná'agaca yúgu'të bönachi. ⁹ Na'a, biti' gu'u lataj nu güí'i didza' le cabí nazaca', o nu güí'i ladxi' ca nágagaca lágaca ziánterö cö' xuz xtó'ogaca bönachi, o nu tsöjgutsa' yugu' didza' bizzai, en yugu' le ridil-la didza' ca naca que xibá queë' Moisés, tu' cabí bi nazáca'gaca le caní, ate' cuntu nu uzí' xibé didza' caní.

¹⁰ Channö zoa nu bönni' ni', rubéajé' choplö bönachi queë' Cristo, tödi usó'o ládxé'ë tu ia'tú luzuí, bubéajé' bönni' na'. ¹¹ Nöz quézinu' chiböáquië' caní nu bönni' biti' náquië' tsahui', en runë' dul-la'. Chinabáguë'ë xíguia' ni'a que lë na' runë'.

Le buzúajé' Pablo lu guichi le gunbi' bi'i Tito

¹² Cate' isöl-la'a-në' Artemas o Tíquico ga zu', bë' ladxi' guídu' ga ni zoa' lu yödzö Nicópolis, tu' chinuna' quia' ugá'ana' ni yugu' beo' ziaga. ¹³ Zenas, bönni' na' rudödë' didza' ca rinná bë' bönachi yúlahui', enca' Apolos, ila'dxiné' ga ni' zóali'. Bugú'u légaquië' nöza lu yöl-la' rácalen, para cabí bi yadzaj quégagaquië'. ¹⁴ Busedi yugu' böchi' luzá'aru' ilúnctica'së' le naca dxi'a, en bi ulu'nödzjë' quégaca nupa bi riyadzaj quéguequi, para gaca bë' caní le nágagagaquië' queë' Cristo.

Pablo rugapë' Dios bönachi queë' Cristo

¹⁵ Yúgu'të nupa nacuálen neda' tu'gapa Dios li'. Bugapa Dios nupa ni' nadxi'igaca rë'u tu' ta'yéajlé' Dios. Le ruzá' ládxé'ë Dios queëru' gácalen yúgu'tëli'. ¡Ca' gaca!

DIDZA' GUSÖL-LË'Ë PABLO QUEË' FILEMÓN

Pablo rugapë' Dios Filemón

¹ Neda', Pablo, dzágabi' neda' bi'i böchi'ru' Timoteo. Nadzuna' lidxi guié tu' runa' xichiné' Jesucristo. Rugapa' Dios li', Filemón. Nacu' bönni' nadxí'itu', en runu' xichiné' Cristo ca runtu' netu'. ² Rugapa' Dios Apia, nigula quiu'. Nácanu zanru' réajlé'ënú Cristo. Rugapa' Dios ca' zxí'nu', Arquipo. Nácabi' queë' Jesucristo ca tu bönni' rejë' gudil-la, tu' runbi' xichiné' Lë' ca runtu' netu'. Lësca' rugapa' Dios bónachi queë' Cristo tu'dubë' lu yu'u lidxu'. ³ Rinábida'-në' Xúziru' Dios, enca' Xanru' Jesucristo, uzá' ládxë'ë queëli', en gunë' ga soa dxi icja ládxido'oli'.

Ca runë' Filemón tu' réajlé'ë Cristo

⁴ Rética'sa'-në' Dios queëru' "Xclenu'", en röjnética'sida' li' cate' rulidza'-në'. ⁵ Caní runa' tu' ridxín quia' didza' ca nadxí'nu'-në' Xanru' Jesús, en réajlé'u Lë', en nadxí'nu' ca' yúgu'të bönachi rö queë'. ⁶ Rinábida'-në' Dios gunë' ga gunda' dxin libán runu' ca naca le réajlé'u Cristo, para ulu'zí' xibé nupa nacuá' ni' yúgu'të le naca dxi'a, le ruzá' ládxë'ë Jesucristo queëru'. ⁷ Rudzéjada', en ruzí' zxöna' tu' nadxí'nu' yugu' böchi'ru', en benu' li', böcha'a, ga bulu'huóáca ládxigaca bönachi ta'yéajlé' Cristo.

Filemón ral-la' uniti lahuë'-bi' Onésimo, bi'i nadó'o queë'

⁸ Que lë ni na', sal-la' dë lu na'a tu' naca' gubáz nasól-lë'ë Cristo inná bë'eda' li' ca ral-la' gunu', ⁹ ráta'yua' lo' len yöl-la' nadxí'i, neda' ni chinaca' bönni' gula, en yu'a lidxi guié tu' runa' xichiné' Jesucristo. ¹⁰ Ráta'yua' lo' uláz queëbi' Onésimo, bi'i na' bena' ga böácabi' queë' Cristo, en que lë ni na' nácabi' ca zxí'ini caza' ga ni nadzuna' lidxi guié.

¹¹ Bi'i ni, zí'alö biti' gúcabi' lesaca' quiu', pero na'a nácabi' lesaca' quiu' li', enca' quia' neda'. ¹² Bi'i ni rusö'l-la'-bi' ga zu'. Ben bal lëbi' ca neda' caz runu' bal, tu' nadxí'ida'-bi'. ¹³ Gú'unida' ugá'analenbi' neda' ni, para uláz quiu' gumbi' xichina' tsanní ni yu'a lidxi guié tu' runa' libán que didza' dxi'a, ¹⁴ pero biti' bi rë'ënda' guna' le cabí naca didza' quiu', para cabí guna' bayudxi gácalenu' neda', pero huáca gácalenu' neda' tu' rë'ëni quézinu' ca'. ¹⁵ Nadxi ca' que lë ni na' buzá'abi' Onésimo ga zu' tu chí'ido' para udxinbi' tsaz ga zu'. ¹⁶ Na'a, bíti'rö gácabí' quiu' ca tu bi'i nadó'o, pero gácabí' quiu' ca bi'i böchi' cazu', tu' nácabi' bi'i böchi'ru' réajlé'ëbi' Cristo, en nadxí'iru'-bi'. Nácabi' caní quia' neda', ate' ral-la' gácaröbi' ca' caní quiu', calégasö ca böchi' luzó'o, pero lësca' ca bi'i böchu'u réajlé'ëbi' Xanru' Jesucristo.

¹⁷ Que lë ni na', channö nunu' neda' tuz, ben lëbi' bal ca neda' caz runu' bal. ¹⁸ Channö bi xíguia' benbi' quiu' o channö bi rál-la'bi' quiu', gunnátëz neda' ral-la'a. ¹⁹ Neda', Pablo, len na'a caza' ruzúaja' quiu' lu guichi lë ni: Neda' caz quizzxja' bi rál-la'bi', en caléga guía' li': Lësca' ral-lu'u quia' yúgu'të le dë quiu' tu' bena' neda' ga napu' yöl-la' na'bán idú. ²⁰ Ca' gaca, böcha'a. Channö dë le uzi'a xibó' tu' néquiru' queë' Xanru', ben lë na' chigúta'yua' lo' tu' naca' böchu'u réajlé'a Cristo, ate' caní gunu' ga huóáca ládx'a'a.

²¹ Ruzúaja' quiu' lu guichi ni, tu' ruzxöni ládx'a li', gunu' ca rnna xtída'a, en nözda' gunu' ia'lati' ca lë na' chigúta'yua' lo'. ²² Lësca' rinaba' lo' upó'o quia'

ga soa' lu yu'u lidxu', tu' runa' löza urúa ja' lidxi guíë ni, ate' guída' ga zóali' tu' rulídzali'-në' Dios, en rinábalí' lahuë' ni'a quia' neda'.

Pablo ruzúajé' lu guichi le rugapa Dios Filemón

²³ Epafras, bönni' yú'ulenë' neda' tsözxón lidxi guíë ni tu' runë' xichinë' Jesucristo, rugapë' Dios li'. ²⁴ Lësca' tu'gapë' Dios li' Marcos, en Aristarco, en Demas, en Lucas, yugu' bönni' ni túnlene' neda' tsözxón dxin queë' Cristo.

²⁵ Rinábida'-në' Xanru' Jesucristo uzá' ládxë' queëli'. ¡Ca' gaca!

DIDZA' RUZÉAJNI'I YUGU' BÖNACHI HEBREO

Dios bë'lenë' rë'u didza' lu ru'ë Zxi'ini cazë'

¹ Zián luzuí, en zián ca bené' Dios, bë'lenë' xuz xtó'oru' didza' dza ni'te lu ruá'agaquië' bönni' gulu'ë didza' uláz queë'. ² Na'a, ga ruúdxia xtídzë'ë, dza ni zóaru' na'a, Dios bë'lenë' rë'u didza' lu ru'ë Zxi'ini cazë'. Dios buzóë' Lë' para guequi queë' Zxi'inë' yíugu'të le nequi queë' Lë', ate' lu në'ë Zxi'inë' na', Dios bené' yödzölió ni. ³ Zxi'inë' na' náquië' ca tu le rulu'i lahui yöl-la' zxön queë' Dios, en ca náquië' Zxi'inë' rulu'i lahui idú le náquië' Dios caz. Run cazë' ga nacuá'tica'só yúgu'të, rugunë' dxin didza' ru'ë, en yöl-la' huáca queë'. Cate' budxi bené' le ruún rë'u dxia' que le naca dul-la' nabága'ru', yöjchö'ë cuita lë'ë ibëla Dios, Nu rö'ö rinná bë' xitsá'térö.

Zxi'inë' Dios nayépisëtëre' ca yugu' gubáz lá'ayi

⁴ Zxi'inë' Dios nayépisëtëre' ca yugu' gubáz lá'ayi queë' Dios, tu' nácatërø lo le lë', lë na' Dios gulu'ë Lë' tu' náquië' Zxi'ini cazë', ca lágaquië' gubáz lá'ayi queë' na'. ⁵ Dios catu caz gudxë' tuë' gubáz lá'ayi queë' ca na' gudxë' Zxi'inë'. Gunnë':

Zxi'ina' nacu'. Buzóa' Li' na'a.

Catu caz bë'ë didza' queë' tuë' gubáz lá'ayi ca na' bë'ë didza' ca naca queë' Zxi'inë'. Gunnë':

Naca' Xuzë', ate' Lë' náquië' Zxi'ina'.

⁶ Lësca' caní, cate' Dios buzóë' Bi'i que cazë' lu yödzölió ni, gunnë': Yúgu'të gubáz lá'ayi queë' Dios ila'yéaj ládxia'gaquië' Lë'.

⁷ Ca nácagaquië' gubáz lá'ayi queë', rnna:

Lë' runë' ga nácagaquië' gubáz lá'ayi queë' ca bö' recja, ate' gubáz lá'ayi huen dxin queë', runë' ga nácagaquië' ca guí'.

⁸ Na'a, ca naca cazë' Zxi'inë', rnne':

Ga rö'u rinná bë'u, inná bë'tica'su', Dios.

Tsahui' naca ca rinná bë'u.

⁹ Nadxi'inu' le naca tsahui', en calëga le ruá' dö'.

Que lë ni na' Dios budödë' lu no'o yöl-la' unná bë',

en bené' ga ruzí'itëru' Li' xibé yöl-la' unná bë'

ca le tu'zi'i xibé luzó'o.

¹⁰ Lësca' caní rnne':

Li', Xan, cate' gusí lo, benu' yödzölió,

ate' len ná'asu' buzú' lúzxiba.

¹¹ Huadödi quéguequi, pero Li', tsaz idí'u.

Yúgu'të itébigaca ca ritëbi lari',

¹² en ca lari' utubu' láguequi, en utsó'o láguequi,

pero Li', catu caz utsá' cuinu'

en catu caz igulu'.

¹³ Dios catu caz gudxë' tuë' gubáz lá'ayi queë' ca gudxë' Zxi'inë', gunnë':

Gurö'ë cuita lë'ë ibëla

cate' gunra' ga ulu'zechu zxibigaca lo'

nupa biti' ta'lé'e Li' dxia'.

¹⁴ Yúgu'të gubáz lá'ayi queë' Dios nácagaquië' bö' huen dxin queë' Dios, ate' nasö'l-lë'ë láguequi' para ilácalenë' nupa ni nulágaca.

2

Biti' ral-la' ucá'anaru' cá'asö yöl-la' rusólá

1 Que lë ni na', ral-la' güí'i ládxí'röru' le chibiyóniru', para cabí gaca chopá ládxí'ru'. **2** Guca bë' naca idútë li didza' na', le bidxín dza ni'te lu ná'agaquie' gubáz lá'ayi quee' Dios, ate' yúgu'të nupa gula'dödi bë' ca rnna didza' na', en biti' gulún ca rnna, Dios benë' léguequi xíguia' ca na' röjlöz le gulúngaca. **3** Lësca' caní biti' ca' uláru' rë'u lu xíguia' na' channö ucá'anaru' cá'asö yöl-la' rusólá ni, le benë' Lë cazë' Xanru' libán que zí'alö, ate' nupa bila'yöni Lë' bulu'lui'i rë'u naca idútë li. **4** Lësca' caní Dios caz benë' tsözxön légaquie' ba nalí, tu' benë' le nácagaca bë', en le tun ga rubániru', en yugu' yöl-la' huáca zxön. Gudisié' ca' yugu' le runödzej' Dios Bö' Lá'ayi quégaquie' tsca gú'uni quéziné' Dios.

Dios benë' ga böáquie' Jesús idú ca nácaru' rë'u

5 Dios biti' budödë' yödzölió si' za' lu ná'agaquie' gubáz lá'ayi que yehua' yubá quee', lë na' ruí'ru' didza' que. **6** Na'a, ca naca lë ni, nazúaj lu guichi lá'ayi didza' bë' nu run ba nalí le rnna:

Dios, rubánide'eda' tu' ruí'i ládxu'u böñachi.

Rubánide'eda' tu' rácalenu' léguequi.

7 Ia'láti'sö cá'asö ca yugu' gubáz lá'ayi que yehua' yubá quiu' benu' böñachi. Buzú' quéguequi yöl-la' zxön, en yöl-la' run bal, en budödu' yúgu'të le benu' Li' lu në'eguequi.

8 Yúgu'të budödu' lu në'eguequi para ila'nná be'e le.

Nazúaj lu guichi lá'ayi lë na' rnna: "Budödu' lu në'eguequi yúgu'të." Biti' bi bucá'anë' le cabí budödë' lu në'eguequi, pero ga ridxitnë' na'a dza, biti' rilé'eru' yu'u lu në'eguequi yúgu'të. **9** Réquibe'eru' le guca quee' Jesús. Tu chí'sö, Dios benë' ga böáquie' ia'láti'sö cuidi' ca yugu' gubáz lá'ayi que yehua' yubá quee'. Guljë' böñachi para gútië', ate' gudi'i guzxáquë'ë Jesús lu yöl-la' guti uláz quégaca yúgu'të böñachi, tu' buzá'ládxë'ë Dios queëru' caní. Tu' benë' Jesús caní, Dios benë' ga rata' queëru' yöl-la' zxön, en yöl-la' run bal.

10 Dios benë' yúgu'të le rilé'eru', en runë' ga nacuá'tica'sö. Dios benë' ca ral-la' gunë' cate' benë' ga naca bë' náquië' Cristo idú tsahui' ni'a que le gudi'i guzxáquë'ë. Caní benë' Dios quee' Cristo, Nu bideli' yöl-la' rusólá para gaca ichë'ë böñachi zián yehua' yubá quee'. **11** Cristo ruúnë' tsahui' böñachi para ilequi quez quee' Dios. Tuzë' náquië' Xúzguequi nupa na' ruúnë' Cristo tsahui', en Xuz cazë'. Que lë ni na', biti' ca' rutu'inë' Zxi'inë' Dios cate' rnnë' nácagaquie' böchi' luzë'ë. **12** Ca naca lë ni nazúaj lu guichi lá'ayi le rnna: Usiyönda' böchi' luzá'a ca nacu' Li', Dios.

Gatsaj láhui'lö böñachi tu'dubi quiu', gul-la' yöl-la' ba quiu'.

13 Lësca' caní rnnë':

Uzzöni ládx'a-a-në' Dios.

Ga yúbölö nazúaj le rnnë':

¡Buli'yútsöca' neda', en yugu' zxí'inë', nupa na' Dios bennë' quia'!

14 Que lë ni na', tu' néquiguequinë' bëla' en rön yugu' zxí'inë' na', lësca' caní Cristo ben cuinë' ca nácagaquie'. Guljë' bëla' en rön. Caní guljë' para guca gútië', en caní guca busunítië' yöl-la' huáca unná bë' que tu' xihui', nu na' dë lu në'egut böñachi. **15** Caní benë' Cristo para guca busanë' yúgu'të nupa gulaca ca bönni' nadó'ogaquie' tsanni ni nacuá' nabángaca, tu' guladxi yöl-la' guti.

16 Naca bë' biti' benë' caní para gácalenë' yugu' gubáz lá'ayi que yehua' yubá queë' Dios, pero para gúcalenë' yugu' zxi'ini xi'sóë' Abraham. **17** Que lë ni na', ben bayudxi böáquië' Cristo idú ca nácaquaië' böchi' luzë'ë na', para gáquië' lahuë' Dios tu bixúz lo, tu bixúzi runë' ca rnna', en ruhuéchi' ládxë'ë bönachi, enca' para gunë' le gun ga gata' lu né'ë ugúë' dul-la' nabága'gaca bönachi. **18** Na'a, tu' gudi'i guzxáquë'ë Lë caze' Cristo, ate' guzxi' bë' tu' xihui' Lë, que lë ni na' napë' yöl-la' huáca gácalenë' nupa ni, rizi' bë' tu' xihui' léguequi.

3

Jesús nayépisétérë' ca Moisés

1 Que lë ni na', böchi' luzá'ado', libí'ili' na' nácali' quez queë' Dios tu' bulidzë' Dios libí'ili', buli'yú dxi'a ca náquië' Jesucristo. Náquië' gubáz nasöl-lë'ë Dios, enca' bixúz lo que le nazi' lu ná'aru'. **2** Jesúz ni runë' ca rnna xtídzë'ë Dios, Nu na' buzúa Lë' xilatjë', ca na' benë' ca' Moisés, benë' ca rnna xtídzë'ë Dios lógaca yúgu'të bönachi queë' Dios. **3** Nayépisétérë' Jesúz ca Moisés, para gaca queë' yöl-la' ba, ca na' nácarë' lo bönni' nequi queë' tu yu'u ca naca huen dxin zoë' lu yu'u na'. **4** Yúgu'të yu'u, zoa nu ben le, pero Dios náquië' Nu ben yúgu'të le rile'eru'. **5** Le nácatë Moisés benë' ca rnna xtídzë'ë Dios lógaca bönachi queë' Dios, pero gúquië' ca tu bönni' huen dxin, ate' benë' ba nalí que didza' ral-la' gu'ë Dios, **6** pero Cristo runë' ca rnna xtídzë'ë Dios, en náquië' Zxi'ini caze', ate' nacuá' lu né'ë bönachi queë' Dios. Rë'u ni, nácaru' bönachi na' queë' Dios channö gácaru' tsutsu ga idxinrö dza údxi. Ral-la' gácaru' tsutsu ca ridipa ládxiru', enca' ca rudzéjalenu' lë na' runru' löza.

Dë' lataj ga ulu'zí' ládxí'gaca bönachi queë' Dios

7 Que lë ni na', nazúaj lu guichi ca rnna' Dios Bö' Lá'ayi le rnna:
Na'a, channö riyónili' didza' ru'ë Dios,

8 biti' gácali' zidi lu icja ládxí'do'oli'
ca na' gulaca nupa ni' gula'dá'baga' Dios
cate' ni' gula'zí' bë' Lë' lu lataj cá'asö.

9 Gula'zí' bë'ë xuz xtó'oli' neda' ni'
sal-la' bila'lé'enë' le bena' idú ca choá' iz.
10 Que lë ni na' guléda' bönachi dza ni', en gunnía':

"Ta'chíxitica'sinë' ca ta'zá' ládxí'gaquië'.
Biti' té'ennë' ila'nózinë' le ré'ëndä' ilunë'."

11 Que lë ni na' guléda' légaquië', en bena' tsutsu xtídz'a, gunnía':
"Biti' ila'yázië' ga ulu'zí' ládxí'gaquië' tsözxöñ len neda'."

12 Guli'gún chi'i cuinli', böchi' luzá'ado', para cabí gácali' nituli' libí'ili'
tu bönni' xihui' cabí réajlë'ë, en para cabí usanli'-në' Dios ban. **13** Na'a,
buli'zéajni'i tuli' ia'tuli' yúgu'të dza, tsanni ni naca dza ni zóaru' na'a, para
cabí si' ye'e le naca xihui' libí'ili', en para cabí gácali' nituli' libí'ili' zidi lu
icja ládxí'do'oli'. **14** Yúgu'teru' gunru' tsözxöñ Cristo channö gácaru' tsutsu ga
idxinrö dza údxi, ca na' gusí lo ridipa ládxiru'.

15 Caní ral-la' gunru' tsanni ni rnna:
Na'a, channö riyónili' chi'ë Dios,
biti' gácali' zidi lu icja ládxí'do'oli',
ca na' gulaca nupa ni' gula'dá'baga' Dios.

16 ¿Nupxi na' bila'yöni xtídzë'ë Dios, en gula'dá'baga' Lë'? Gulún caní yúgu'të
nupa ni' bubéajë' Moisés léguequi luyú Egipto. **17** ¿Nupxi na' gulénë' Dios idú ca

choá' iz? Gulaca nupa ni' gulún dul-la', ate' gulati lu lataj cá'asö. ¹⁸ ¿Nupxi ni' bené' tsutsu xtídzë'ë Dios, gunnë' biti' ila'yaza ga ulu'zí' ládxí'guequi tsözxön len Lë? Gulaca nupa ni' biti' gulún ca rnna xtídzë'ë Dios. ¹⁹ Na'a, réquibe'eru' biti' guca ila'yázië' tu' cabí gula'yéajlé'ë Dios.

4

¹ Na'a, tsanni ni nagá'ana le guzxí' lu në'ë Dios queéru' para gaca tsú'uru' lataj queé' ga uzi' ládxí'ru', ral-la' gádxiru' para cabí unítiru' lataj tsú'uru' ni'. ² Biyónrru' rë'u didza' dxi'a ca na' bila'yönnë' légaquië', pero légaquië' biti' bulu'zí'ë xibé didza' na' bila'yönnë', tu' cabí gula'yéajlé'ë Dios cate' bila'yönnë' le. ³ Rë'u ni réajlé'ëru' Dios, en tsú'uru' lataj queé' ga uzi' ládxí'ru'. Raca ca na' gunnë' Dios:

Que lë ni na' guléda' légaquië'
en bena' tsutsu xtídz'a, gunnía':

Biti' tsú'ugaquië' ga ulu'zí' ládxí'lenë' neda'.

Dë lataj tsú'uru' rë'u ga uzi' ládxí'lenru'-në' Dios, sal-la' budxi bené' Dios xichiné' dza ni'te cate' ni' bené' yödzölió ni, en chiruzí' ládxë'ë. ⁴ Nazúaj lu guichi lá'ayi ga rui'i didza' ca naca que dza igadxi, le rnna: "Buzí' ládxë'ë Dios dza igadxi yugu'lu dxin bené'." ⁵ Ga yúbölö rnna: "Biti' tsú'ugaquië' ga ulu'zí' ládxí'lenë' neda'." ⁶ Nupa ni' bila'yöni zí'alö didza' dxi'a, biti' guyú'ugaca ni' tu' cabí gulún ca rnna xtídzë'ë Dios. Que lë ni na', ral-la' tsú'ugaca böñachi yúbölö ni'. ⁷ Que lë ni na' ca', Dios bulu'e tu dza yúbölö, gunnë': "Na'a dza." Caní naca, cate' chigudödi iz zián, bë'ë didza' Dios lu ru'ë David, ca na' nazúaj lu guichi lá'ayi le rnna:

Na'a dza, channó riyónili' didza' ru'ë Dios,
biti' gácali' zidi lu icja ládxí'do'oli'.

⁸ La'tu' bené' Josué ga bulu'zí' ládxí'gaquië' cate' gula'yu'ë lu xiyúgaquië', biti' bë'ë Dios didza' gudödi ni' que ia'turö dza cate' nu uzi' ládxí'len Lë'.

⁹ Que lë ni na', nagá'ana quégaca böñachi queé' Dios lataj ila'deli'në' ga ulu'zí' ládxí'gaquië'.

¹⁰ Nupa tsú'ugaca ga ulu'zí' ládxí'lengaca Dios, ulu'zí' ládxí'gaquië' lu dxin tunë', ca na' buzí' ládxë'ë Dios yugu'lu dxin bené' Lë'.

¹¹ Que lë ni na', ral-la' güi'i ládxí'ru' tsú'uru' ga ni' uzi' ládxí'lenru'-në' Dios. Biti' ral-la' tá'baga'ru' xtídzë'ë ca na' gulún nupa ni' biti' gula'yéajlé'ë Dios, en biti' gula'yu'ë ni'.

¹² Xtídzë'ë Dios naca ban caz, en napa caz yöl-la' huáca. Richúgurö ga rë' ca guíë tuchi' natuchi' ropa rui'i. Richugu ridxín ga ta'dzaga bö' naca cázaru', en le zoa lu icja ládxí'do'oru', enca' röxaç ga ridxintë lu dxita lu bin. Run ga naca bë' le ribequí íçjaru', en le rizá' ládxí'ru'. ¹³ Biti' bi gaca ucáchí'ru' ga biti' gaca ilé'enë' Dios le. Yúgu'te le nun cazé' Dios nalá' lahuí, en narúaj ga liná' lahuë' Dios. Lahuë' Lë' run bayudxi quíxjö'örü' le nunru'.

Jesús náquië' bixúz lo, Nu nácatérö zxöñ

¹⁴ Zoa queéru' tu bixúz lo, nácatérë' zxöñ, Nu na' gudödi ni' yehua' yubá, Jesús, Zxf'inë' Dios. Que lë ni na' ral-la' ugá'anaru' tsutsu ca naca le nazí' lu ná'aru'. ¹⁵ Zoa queéru' tu bixúz lo, Nu gaca huéchi' ladxi' rë'u ca nácgaca le raca queéru', tu' guzxí' bë' tu' xihui' Lë' caze' idútë ca na' rizi' bë' tu' xihui' na' rë'u, pero biti' bi dul-la' bené' Lë'. ¹⁶ Que lë ni na', idú ládxí'ru' ral-la' ibiga'ru' gala' ga rö'ë rinná bë'ë Dios, Bönni' ruzá' ladxë'ë queéru', en inábaru' lahuë' huéchi' ládxë'ë rë'u, en uzá' ládxë'ë queéru', para gácalenë' rë'u cate' bi raca queéru'.

5

¹ Dios ribō cazë' nútí'tës bixúz lo ladaj böñachi, en ruzóë' lë' para gunë' yugu' le runë' lahuë' Dios uláz quégaca böñachi, en cu'ë lahuë' Dios yugu' le tu' hödzaj böñachi, en yugu' böa' bëdxí tútigaquïë'-ba' lu bucugu lá'ayi tu' nözi dul-la' nabága'gaquïë'. ² Bixúz lo na', tu' raca queë' lëbisö ca raca quégaca böñachi, gaca gáquië' zxön ladxi' len nupa nácagaca yugu' bönni' canöz, en nupa ta'chixi ta'nigui. ³ Que lë ni na', tu' náquië' bixúz lo na' böñachisö, ral-la' cu'ë lahuë' Dios böa' bëdxí na' tútigaquïë'-ba' lu bucugu lá'ayi ni'a que dul-la' nabaga'cazë', ca na' runë' ca' ni'a que dul-la' nabága'gaca böñachi.

⁴ Cuntu nu gaca gun cuini bixúz lo, pero Dios rulidzë' nu ral-la' gaca bixúz lo, ca na' bulidzë' Aarón. ⁵ Lësca' caní guca queë' Cristo. Biti' ben cuinë' bixúz lo, pero Dios buzóë' Lë' ca bixúz lo. Ca naca lë ni, Dios gudxë' Lë': Li' nacu' Zxi'ina'. Buzóa' Li' na'a.

⁶ Lësca' caní gudxë' Lë' le nazúaj ga yúbölö, gunnë': Li' náctica'su' bixúz, ca na' gúquië' Melquisedec bixúz.

⁷ Cristo, cate' ni' zoa cazë' yöödzölió ni, bulidzë' Dios, en góta'yuë' lahuë'. Gurödxi'ë, en gurödxë' lahuë' Dios, Bönni' guca usöölé' Lë' lu yööl-la' guti, ate' Dios biyönnë' Lë' tu' gúdxine' Lë' idú ládxë'ë. ⁸ Sal-la' gúquië' Zxi'inë' Dios, bizëdë'gunë' ca rnna xtídzë'ë Dios tu' gulaca queë' yugu' le gudf'i guzxáquë'ë. ⁹ Cate' chigúquië' Cristo idú ca ral-la' gáquië' tu bixúz lo, Dios benë' Lë' Bönni' rusöölé' tsaz yúgu'të nupa tun ca rnna xtídzë'ë. ¹⁰ Ní'irö Dios buzóë' Lë' para gáquië' bixuz lo ca na' gúquië' Melquisedec na' bixúz lo.

Zoa böñadxi queëru' huöaj ládxí'ru', en tá'baga'ru'-në' Cristo

¹¹ Ca naca lë ni, zián le ral-la' güí'ilentu' libí'ili' didza', le naca böñiga quíjöi'itu' libí'ili', tu' cabí réajni'inili'. ¹² Chigudödi dza ral-la' gaca usédili' böñachi xtídzë'ë Dios, tu' chibiyöñili' xidzé, pero riquínili' nu quíjöi' libí'ili' leyúbölö yugu' le cabí naca böñiga nazí' lu në'e nu si' réajlë'. Nagá'anali' ca yugu' bi'i huë'ënido' ta'quínibi' nidxi', en caléga la' huagu tsutsu. ¹³ Yúgu'të bönni' naqunínguequinë' nu usedi légaquïë' lë na' biti' naca böñiga, nácagaquïë' ca yugu' bí'ido' té'ajbi' nidxi'. Biti' nazéðagaquïë' ca sa'yéaj le naca tsahui'. ¹⁴ La' huagu tsutsu tu'zí' xibé nupa chinál-lágaca, nupa na' gaca iléquibe'e le naca dxí'a, en le cabí naca dxí'a, tu' nugúngaqueïë' dxin yööl-la' réajni'i quégaquïë'.

6

¹ Que lë ni na', biti' ral-la' usédatica'siru' yugu' xibá buzédaru' cate' si' gusí lo riyoñiru' ca naca queë' Cristo. Ral-la' tsöjnöröru' para gácaru' idú böñachi queë' Cristo. Biti' naquini usédaru' leyúbölö yugu' xibá biti' naca böñiga: ca ral-la' ubí'i ládxí'ru',

en ca bíti'rö gunru' le ruá' dö',

en ca ral-la' tséajlë'ëru'-në' Dios,

² en ca naca xibá que le ridílaru' nisa,

en ca rixóa ná'aru' böñachi ta'yéajlë' Cristo,

en ca ral-la' ulu'bán nupa nátigaca,

en ca gunë' Dios, ichúguië' quégaca böñachi tuá' dö'.

³ Caní gunru' channö gunnë' Dios rë'u lataj.

4-6 ¿Naru' huácatsö gunru' ga ulu'bí'i ládzi'gaca leyúbölö nupa tu'huóaj ladxi', en ta'dá'baga' Dios? Channö bidxín quéguequi bení' queë' Dios, en bulu'zí' xibé le runödzjé' Dios zoë' yehua' yubá, en gulaca tuz len Dios Bö' Lá'ayi, en channö bulu'zí' xibé didza' dxi'a queë' Dios en yöl-la' huáca que dza si' za', en channö ní'irö tu'huóaj ladxi', en ta'dá'baga' Dios, biti' ca' gaca nu gun ga ulu'bí'i ládzi'gaca leyúbölö, tu' gaca tsca ulu'dá' leyúbölö Zxi'iné' Dios lë'e yaga cruz en ilún tsca ulu'titaj Lë' lahu'i lögaca böñachi. **7** Nupa tun carí nácgacaca ca yu na' ruzí' xibé nisa guiój le ribixi láhuilö zián luzuí. Channö yu na' runödzaj le tu'zí' xibé nupa tá'ana yu na', raza ládxë'ë Dios le, **8** pero channö ruzoásö yu na' lubá yötsi', en bësigá', naca ditaj, en nabía dö', en naca para nu uzegui le.

Le runru' löza le run ga nácaru' tsutsu

9 Sal-la' ru'itu' caní didza', libí'ili' na' nadxi'itu', réquitu' ruzí'ili' xibé le nácgacarö dxi'a, le tu'zí' xibé nupa nulágaca. **10** Dios náquië' tsahui', en biti' gal-la ládxë'ë dxin tsahui' benli', en yugu' le benli' tu' nadxi'ili' Lë'. Gúcalenli' nupa néquiguequi quez queë' Dios, en runli' xichínguequi. **11** Na'a, rë'ënitu' gü'i ládzi'li' luzá'ali' tu ia'tuli', en gunli' caní ga idxinxrö dza údxi, para gata' idú queéli' lë na' runli' löza. **12** Rë'ënitu' cabí gácali' xöhüédi, pero gunli' ca tun nupa ta'yéajlë' Dios, en ta'böza zxön ladxi', para idéli'li' yugu' le guzxí' lu në'ë Dios gunné' queérü.

13 Caní gaca, tu' bené' tsutsu Dios xtídzë'ë cate' guzxí' lu në'ë bi gunné' queë' Abraham. Tu' cabí zoa nu nácarö lo ca Dios, que lë ni na' buzetaj cuiné', cate' ni' bené' tsutsu xtídzë'ë. **14** Caní gunné' Dios: "Le nácatë guna' ga gaca dxi'a quiu', en guna' ga ila'yánda'abi' zxi'ini xi'sú." **15** Gulözë' Abraham zxön ladxi', ate' bidéli'në' le guzxí' lu në'ë Dios gunné' queë'. **16** Cate' tu bönni' runë' tsutsu xtídzë'ë, ruzötje' nu nácatëro lo ca lë', ate' lë ni ruzoá dxisö yúgu'të didza' bizzaj, tu' nunë' tsutsu xtídzë'ë. **17** Que lë ni na' Dios bené' tsutsu le guzxí' lu në'ë guné', en buzötaj cuiné', tu' gü'unnë' ulu'inië' nupa ulu'zí' xibé le guzxí' lu në'ë unödzjé' quéguequi, nácadá' löza, en tsaz naca le nuzoá lahuë' guné'. **18** Le guzxí' lu në'ë Dios, en le bené' tsutsu, chopá ni catu caz idzá'gaca, en ca naca quégaca chopá ni, biti' gaca si' yë'ë Dios. Caní bené' Dios para gácadá' löza queérü' tu le huë' tsahui' rë'u. Ruzzöni ládzi'ru' Lë' idéli'ru' lë na' runru' löza le gunné' si'iru'. **19** Lë na' runru' löza ruzóatica'sö tsutsu icja ládzi'do'oru', en naca ca tu du guië' ruzoá dxisö barco. Lë na' runru' löza run chi'ë Cristo ni'a queérü' ga ni' zoë' Dios yehua' yubá, le nadxín lu lataj lá'ayi na' zoa cùdzi'lö lari' nala' lu yudo' rö'ö yehua' yubá. **20** Guyázië' Jesús uláz queérü' ca Nu röjnöru loru' ga ni' zoë' Dios, ate' Dios nuzoë' Lë' náquië' tsaz bixúz lo ca na' güquië' Melquisedec bixúz lo.

7

Jesús náquië' bixúz lo ca güquië' Melquisedec

1 Melquisedec güquië' bönni' na' gunná bë'ë lu yödzö Salem, enca' bixúz queë' Dios, nayépisëtërë'. Cate' suzé'ë Abraham, sóhuójë' gudödi guca gudilla cate' bucül-lë' yugu' bönni' ta'nná bë'ë, birúajë' Melquisedec na', yöjtságuië' Abraham, en gunábinë' Dios gun lá'ayë' Abraham. **2** Abraham bë'ë queë' tu cö' tu' chi cö' que yugu'të le bidéli'në' lu gudil-la na'. Ca lë' Melquisedec na' rnna lu didza' xidza': "Bönni' Unná Bë' Tsahui", en náquië' ca' Bönni' unná bë' que yödzö Salem, le rnna lu didza' xidza': "Bönni' Unná Bë' Ribequi Dxfié'".

³ Biti' zoa lu guichi le rnna gula'cu'ë xuz xinë'ë, o xuz xtá'ahuë', en biti' nazúaj dza guljë' o dza gútië', pero náquië' ca náquië' Zxi'inë' Dios tu' náquië' tsaz bixúz lo.

⁴ Buli'yútsöca' na'a, ca na' gúquië' zxön Melquisedec na', tu' lë cazë' xúziru' Abraham bë'ë queë' tu cö' tu chi cö' que lë na' guléajë' lu ná'agaquië' bönni' ta'nná bë'ë ni' bucul-lë' lu gudil-la. ⁵ Lu xibá queë' Moisés, Dios rinná bë'enë' yugu' zxí'ini xi'sóë' Leví, nupa nácagaca bixúz, ila'zi'ë tu cö' tu chi cö' que le ta'zí' bönnachi Israel, sal-la' nácagaca dí'a dza quégäquië', tu' nácagaquië' yúgu'të' zxí'ini xi'sóë' Abraham. ⁶ Melquisedec na' biti' náquië' di'a dza quégäquië', pero guzxië' tu cö' tu chi cö' lu në'ë Abraham, nu na' bideli' yugu' le guzxí' lu në'ë Dios gunnë' queë'. Lësca' Melquisedec na' gunábinë' Dios gun lá'ayë' Abraham, ⁷ ate' cuntu nu gaca tá'baga' lë na' rnna: Nu nadéli'rö lahuë' Dios rinábini Dios gun lá'ayë' nu nacuídri. ⁸ Na'a, dza ni zóaru' na'a, nupa ta'zí' tu cö' tu chi cö' lu ná'agaca bönnachi nácagaca ca' bönnachi tati caz, pero Melquisedec na', zoa le run ba nalí queë' le rnna zoë' nabanë'. ⁹ Na'a, huáca innaru' queë' Leví, en quégaca zxí'ini xi'sóë', nupa na' ta'zí' tu cö' tu chi cö' lu ná'agaca bönnachi, lësca' gula'guíxjë' tu cö' tu chi cö' cate' ni' Melquisedec na' guzxië' tu cö' tu chi cö' lu në'ë Abraham, xuz gula gudödi quégäquië'. ¹⁰ Caní naca, tu' huáca innaru' Abraham ni' nu'ë lë'ë Leví, en yugu' zxí'ini xi'sóë' cate' ni' yöjtságuië' Melquisedec lë', tu' cabí náljaniguequine'.

¹¹ Ta'zí' bönnachi Israel xibá gunná bë'ë Moisés lu ná'agaca bixúz, nupa nácagaca zxí'ini xi'sóë' Leví ga nababë' ca' Aarón, bixúz lo. Na'a, la'tu' guca ulu'huöáca bönnachi idú tsahui' lahuë' Dios tu' tun ca rinná bë' xibá queë' Moisés, biti' ben bayudxi soa ia'túë' bixúz ca gúquië' Melquisedec, en calëga ca gúquië' Aarón. ¹² Channö rutsë'ë Dios ca ral-la' gáquië' bixúz, run bayudxi utsë'ë ca' ca naca xibá queë'. ¹³ Xanru', Nu na' nazúaj lu guichi ca naca queë' yugu' lë ni, nababë' ia'turö cö' zxí'ini xi'sóë' Israel ca le nababë' Leví na', ate' que cö' zxí'ini xi'sóë' ga nababë' Xanru', cuntu nu guca bixúz lahuë' Dios. ¹⁴ Naca caní tu' naca bë' guljë' Xanru' lu cö' di'a dza queë' Judá, ate' Moisés biti' bë'ë didza' queë' Judá na' cate' bë'ë didza' quégaca nupa ral-la' ilaca bixúz.

¹⁵ Nácatérö bë' lë ni ni'a que le raca na'a. Ca na' gúquië' Melquisedec bixúz, chibulu'i lahuë' ia'turë' bixúz, Jesús. ¹⁶ Bönni' ni, biti' gúquië' bixúz tu' rinná bë' xibá ca ral-la' ilaca di'a dza queë', pero náquië' bixúz tu' napë' yöl-la' huáca que yöl-la' na'bán le catu caz úksi. ¹⁷ Nazúaj lu guichi lá'ayi le run ba nalí queë' le rnna:

Tsaz nacu' bixúz
ca na' gúquië' Melquisedec bixúz.

¹⁸ Na'a, nadúa xibá gula ni', tu' cabí gadapa yöl-la' huáca unná bë', en biti' bi guca gun. ¹⁹ Xibá queë' Moisés na' biti' guca un bönnachi idú tsahui'. Na'a, chiguyútu tu le runru' löza le nácarö dxi'a, le run ga gaca ibiga'ru' gala' ga zoë' Dios.

²⁰ Cate' benë' Dios ga náquië' Jesús bixúz, benë' tsutsu xtídzë'ë. ²¹ Dios biti' benë' tsutsu xtídzë'ë cate' bucú'ë bönnachi ni' ca bixúz, pero cate' benë' ga náquië' Jesús bixúz, benë' tsutsu xtídzë'ë, gunnë':

Bena' tsutsu xtídz'a neda', Xanu', gunnía':
"Biti' utsá'a ca guna'.

Tsaz nacu' bixúz
ca na' gúquië' Melquisedec bixúz."

22 Que lë ni na', Cristo náquië' Nu run ga naca löza didza' rucá'ana tsahui' le nácarö dxi'a ca lë na' guca zí'alö. **23** Yugu' bixúz ni' guláquië' bönni' zíán, tu' cabí guca ulu'gá'anë' yödzölió ni tu' gulatië', **24** pero tu' zóatica'së' Jesús, tsaz náquië' bixúz, en biti' gaca nu huóáza xilatjë' para gaca bixúz. **25** Que lë ni na', tsaz gaca usólë' nupa ta'biga' gala' ga zoë' Dios, nupa tu'gún dxin Lë', tu' zóatica'së' nabanë', en rnne' dxi'a uláz quégaquië' lahuë' Dios.

26 Ben bayudxi soa tu bixúz lo caní queëru'. Náquië' lá'ayi, en idú tsahui', en biti' náquië' tsözxón bönnachi dul-la', pero nayépisétëre' ca yúgu'të le nacuá' ni' yehua' yubá. **27** Jesús ni, biti' náquië' ca yugu' bixúz lo yödzölió ni, tu' ben bayudxi gula'gu'ë rön lahuë' Dios yugu' dza, ate' gulutië'-ba' bö'a bëdxi lahuë' Lë' tu' nözi dul-la' nabága'gaca cazë', ate' gudödi ni' gulunë' caní tu' nözi dul-la' nabága'gaca bönnachi. Na'a, Jesús, tsaz gulu'ë rön lahuë' Dios, cate' ni' budödi cuinë' lahuë' Dios, en bulalje' xichön' cazë' tu' nözi dul-la' nabága'gaca yúgu'të bönnachi. **28** Lu xibá queë' Moisés bönnachi biti' nácagaca idú dxi'a nácagaca bixúz, pero gudödi bidxín xibá queë' Moisés, Dios benë' tsutsu xtídzë'ë, cate' benë' ga náquië' Zxf'imi cazë' bixúz lo, tu' náquië' idú tsahui' ca ral-la' gáquië' bixúz.

8

Jesús náquië' Bixúz Lo queëru'

1 Na'a, ca rnna lë na' si' gunnía', naca caní: Zoa queëru' tu Bixúz Lo caní. Guröë cuita lë'ë ibëla Dios, ate' rö'ë, rinná bë'ë yehua' yubá ni'. **2** Lë' runë' dxin ca Bixúz Lo lu lataj nácatërø lá'ayi, le naca yudo' le naca idútë, lë na' buchisë' Xanru', en caléga bönnachi. **3** Dios rucu'ë yúgu'të bixúz lo para ila'gu'ë yugu' le tu'nödzaj bönnachi, enca' xichöngacaba' bö'a bëdxi lahuë' Dios. Que lë ni na' ben bayudxi soa bi gulu'ë Cristo lahuë' Dios. **4** La'tu' zoë' luyú ni, biti' ca' gáquië' bixúz, tu' nacuá'tica'së' bixúz ni, nupa ta'gú'u yugu' le tu'nödzaj bönnachi lahuë' Dios ca rinná bë' xibá queë' Moisés. **5** Yugu' bixúz ni tunë' dxin que tu le rulu'isö, en le naca ca tu bixín que lë na' rö'ë yehua' yubá. Caní naca, tu' gúxdidë'ë Dios Moisés cate' si' uchisë' yú'udo' na' néquini guidi, gunnë': "Buyútsöca', ben yúgu'të idú ca naca lë na' bulu'ida' li' lu guí'a ni'." **6** Na'a, Bixúz Lo queëru' ni runë' dxin que le nácatërø lesaca', ate' ni'a que le benë' Lë' zoa tu didza' rucá'ana tsahui' queëru' le nácatërø lesaca', en le rui'i didza' que le nácatërø lesaca' guzxi' lu në'ë Dios gata' queëru'.

7 La'tu' gudapa didza' na' rucá'ana tsahui' le guzóa zí'alö idútë yöl-la' huáca, biti' ben bayudxi soa didza' buropi ni rucá'ana tsahui'. **8** Na'a, Dios rulu'ë biti' gulaca bönnachi ni' idú dxi'a cate' bë'ë didza' ca na' nazúaj lu guichi lá'ayi, gunnë':

Buli'yútsöca', gunnë' Xanru': Zá'gaca dza
cate' uzó'a tu didza' cubi ucá'ana tsahui',
le góunlena' bönnachi Israel, en bönnachi Judá.

9 Biti' gaca ca guca didza' rucá'ana tsahui' na',
lë na' bénlena' xuz xtó'ogaquië',
dza ni' gudéla' a ná'agaquië',
en bubéaja' légaquië' luyú Egipto.

Tu' bulu'cá'anë' didza' quia' rucá'ana tsahui',
neda' bucá'ana' légaquië', rnne' Xanru'.

10 Que lë ni na', caní gaca didza' ucá'ana tsahui'
góunlena' bönnachi Israel.
tödi yugu' dza ni', rnne' Xanru'.

Uchíz'ia' icja láxi'do'gaquië' xibá quia'
en uzúaja' le lu icja láxi'do'gaquië'.
Ní'irö gaca' Dios quégaquië'
ate' légaquië' iláquië' bönachi quia'.
11 Biti' gun bayudxi nu usedi luzë'e, inná:
Bénbë'ë Xanru', tu' ilún'bë'ë yúgu'të' neda',
ga ísi lo nu naca cá'asö, ga idxintë nu naca lo.
12 Huéchi' ládx'a'a légaquië',
en uniti lahua' le cabí naca tsahui' gulunë',
en bíti'rö tsöjneda' dul-la' nabága'gaquië'.

13 Cate' ni' ru'ë Dios didza' que tu didza' cubi rucá'ana tsahui', naca tu'
chibigula lë na' guzóa zí'alö, ate' chizóa idúa lë na' nagula, en chinaca gulasi.

9

Lataj lá'ayi dë luyú, en lataj lá'ayi dë yehua' yubá

1 Na'a, didza' rucá'ana tsahui' na' guzóa zí'alö, dzágagaca xibá le ca ral-la'
ila'yéaj láxi'gaca bönachi Dios, en lataj lá'ayi bidzága le guca que luyú ni.
2 Caní naca lataj lá'ayi na' néquini guídi. Lu lataj na' dë láhuilö, nazí'i le Lataj
Lá'ayi, gula'cuá' le nuá' guí', en bucugu lá'ayi ga ni' gula'gu'ë yugu' yöta xtildo'
lahue' Dios. **3** Cúdzi'lö le buropi lari' nal-la' lu yu'u na' zoa lataj ni' nazí'i
le, Lataj Idú Lá'ayi, **4** ate' lu lataj ni' gula'cuá' tu bucugu néquini oro ga na'
bulu'zégu'ë nöri, enca' tu guí'ina ga yu'u didza' rucá'ana tsahui', en nacu
guí'ina na' oro. Lu guí'ina na' gula'cuá' zxíga'do' na' néquini oro, le nadzá'
yöta xtildo' na' nazí'i le maná, enca' xuyaga queé' Aarón, lë na' bubö' ni'a
në'e, enca' yugu' guiöj blaga na', nazúaj láhuilöguequi didza' rucá'ana tsahui'.
5-6 Lahui guí'ina na' gula'cuá' chopá gubáz lá'ayi néquiguequini oro, légaca
querubín que lataj ga bulu'i láhuue' Dios, ate' bulu'zxóa xíliguequi láhuilö lataj
ga ni' gulu'ë bixúz lo rön tu' nözi dul-la'. Caní bulu'cu'ë yugu' lë ni. Biti' dë
lataj uzúaja' na'a idúte ca nácabaca lë ni.

Ta'yázatica'sé' yugu' bixúz lu lataj zoa láhuilö, ga na' tunë' dxin quégaquië'
que le ta'yéaj láxi'gaquië' Dios. **7** Tuzë' bixúz lo guyázië' lu lataj buropi
ni' tu luzuísö tu iz, en bi'ë rön le gulu'ë láhuue' Dios tu' nözi dul-la' nabaga'
cazë', enca' tu' nözi dul-la' nabága'gaca bönachi, dul-la' gulunë' le cabí
guléquibe'enë'. **8** Caní ruzéajni'inë' Dios Bö' Lá'ayi rë'u, biti' ca' guca idxinru'
lahue' Dios caz tsanni ni' tu'gunë' dxin lataj lá'ayi na' zoa láhuilö lu yu'u lá'ayi
na' néquini guídi, lë na' bidzága didza' rucá'ana tsahui' le guzóa zí'alö. **9** Yugu'
lë ni naca tu le rulu'i isö que le raca na'a dza. Yugu' le gula'gu'ë láhuue' Dios, en
ron quégacaba' böa' bëdxi na' gulútië'-ba' láhuue' Dios biti' guca ulu'un idú dxí'a
icja láxi'do'gaquië' bönni' ni' gula'yéaj láxi'gaquië' Dios caní. **10** Yugu' lë ni
bulu'i láhuue' quégacasaö le gulë aj gulahuë', en ca ral-la' ila' guíbi cuíngaqüië', en
quégaca xibá ca ral-la' gaca que idú ca zeaj naca cazë'. Yugu' lë ni buzóe' Dios
quégaquië' ga bidxité dza ral-la' utsë'ë yugu'të.

11 Na'a, chibudulu'i láhuue' Cristo, en náquië' Bixúz Lo que le naca idú
dxí'a, le bilá' láhuui ni'a que le benë' Lë'. Lataj lá'ayi ga na' guyázië' Lë'
nácarö lo, en nácarö idú, en biti' néquini lu ni'a lu ná'agaca bönachi, en biti'
naca que luyú ni. **12** Na'a, chiguyázië' Cristo lu lataj lá'ayi na', caléga len
xichöngacaba' bëdxdido', en xichöngacaba' chivo, pero len rön queé' cazë'.
Guyázië' lu lataj idú lá'ayi tu luzuísö, ate' caní guca, benë' ga nuláru' tsaz. **13** Le

nácaté xichöngacaba' bëdxi, en chivo, en dö queëba' bëdxido' bulu'zégui'ë-ba', yugu' le gula'gu'ë lu ícjagaca nupa nabága'gaca dul-la', guca ulu'gúa dul-la' na' nabága'gaca böñachi para ulu'ún légaquië' dxi'a idú ca zeaj naca cazé' ca naca que yöl-la' yudo' quégäquië'. ¹⁴ Na'a, gúnterö ca' xichönë' Cristo, tu' budödi cuinë' queë' Dios, en gúquië' idú tsahui', ate' zóalene' Dios Bö' Lá'ayi Lë', Nu zóatica'sö. Na'a, xichönë' Cristo ruún idú dxi'a icja ládxi'do'oru' lu yugu' le gubága'ru' le tun ga nu gati, para gaca gunru' xichiné' Dios ban.

¹⁵ Que lë ni na' náquie' Jesucristo Nu ben tsutsu didza' cubi rucá' ana tsahui', tu' gútië' Lë', en bugüë' dul-la' gula'baga' böñachi cate' ni' zoa didza' gula rucá'ana tsahui'. Gútië' ca' para gaca ila'zil'ë lë na' guzxí' lu në'ë Dios unôdzjë' quégäquië' bönni' bulidzë', le zóatica'sö. ¹⁶ Cate' ratië' nu bönni', en nucá'anë' tu didza' ca ral-la' ila'guisië' le nequi queë', run bayudxi gaca bë' chinatië' bönni' na' para gaca ilunë' ca rnna didza' na' nucá'anë'. ¹⁷ Cate' chinatië' bönni' na', gaca ilunë' ca rnna didza' na', pero tsanni ni zoë' nabanë', biti' ca' gaca ilunë' ca rnna didza' na'. ¹⁸ Que lë ni na', didza' na' rucá'ana tsahui' le guzóa zí'alö guca lesaca' tu' bidzágå rön didza' na', le rulu'isö zoa nu guti. ¹⁹ Cate' ni' gudíxjöi'iné' Moisés böñachi ni' ca nácacaca yúgu'të xibá queë' Dios, gudélë'ë rön quégacaba' bëdxido', en quégacaba' chivo, le nutsi' nisa, ate' len tu guixi'do' nazif'i le hisopo, en lítsa'ba' bö'cu' zzila' le në'aj xiná, buchéajë' rön, en nisa na' lahuí guichi ga na' nazúaj xibá na', enca' láhuigaca böñachi. ²⁰ Ní'irö gudxë' légaquië': "Lë ni naca rön le run tsutsu didza' rucá'ana tsahui' le gunná bé enë' Dios re'ü para gunru' ca rnna." ²¹ Lësca' caní buchéajë' Moisés rön na' lu lataj lá'ayi néquini guídi, en lahuí yúgu'të le tu'gunë' dxin para ila'yéaj ládxi'gaquië' Dios. ²² Ca na' rinná bë' xibá na', látu'biqu' yúgu'të ral-la' un dxi'a rön léguequi, ate' channö cabí tu'laljë' rön, biti' udúa dul-la'.

Xichönë' Jesucristo rugúa dul-la'

²³ Caní naca, ben bayudxi guzóa le bun dxi'a yudo' luyú ni le naca tu le rulu'isö ca naca lë na' rö'ö yehua' yubá, pero ca naca lë na' rö'ö yehua' yubá, ben bayudxi soa le un dxi'a nupa ila'yaza le, le nácarö lesaca' ca xichöngacaba' bö'a' bëdxido' caní. ²⁴ Biti' guyázjë' Cristo lataj lá'ayi néquini lu ni'a lu ná'agaca böñachi, lë na' naca tu le rulu'isö ca naca le naca idú, pero guyázjë' yehua' yubá caz para gaca ulu'i'lahue' na' lahué' Dios uláz queëru'. ²⁵ Bixúz lo zoë' luyú ni razie' lataj nácatérö lá'ayi tu tu iz len rön quégacaba' bö'a' bëdxi, pero biti' run bayudxi tsázjë' Cristo zián luzuí para udödi cuinë' lahué' Dios. ²⁶ La'tu' guca caní, gun bayudxi qui'i sáquë'ë Cristo, en gátië' zián luzuí dza ni'te cate' guta' yödzölió ga ridxitë' na'a dza, pero na'a cate' naca dza údxi, tsaz bulu'i'lahue' tu luzuísö, en budödi cuinë' lahué' Dios, cate' gútië' para bugüë' dul-la' nabága'ru'. ²⁷ Ca na' run bayudxi ilátigaca böñachi tu luzuísö ate' tödi ni' uchi'a usöröë' Dios léguequi, ²⁸ lësca' caní, gútië' Cristo tu luzuísö, cate' budödi cuinë' lahué' Dios para bugüë' dul-la' nabága'gaca böñachi zián. Na'a, ulu'i'lahue' le buropi luzuí, caléga para ugüë' dul-la', pero para usölë' tsaz nupa ta'böza Lë'.

10

¹ Xibá na' gunná bë'ë Moisés guca tu le rulu'isö ca zeaj naca le tsahui' si' zá'gaca, en biti' guca idú ca nácacaca. Que lë ni na', xibá na' queë' Moisés biti' guca un idú tsahui' nupa ni' bila'dxín lahué' Dios, en biá'gaca rön quégacaba' bö'a' bëdxido', lë na' gula'gú'utica'sé' lahué' Dios yugu' iz. ² La'tu'

guca un légaquië' idú tsahui', biti' gula'gú'utica'sé' rön ni' lahuë' Dios, tu' cabirö iléquibe'enë' bönni' guca caní quégäquië' nabágagaquië' dul-la' channö chibulu'huöäquië' idú tsahui'. ³ Rön ni' gula'gu'ë lahuë' Dios yugu' iz busá' ládzi'gaquië' nabágagaquië' dul-la'. ⁴ Caní guca, tu' cabí guca xichöngacaba' bëdxi, en chivo ugúa dul-la'.

⁵ Que lë ni na', cate' bidxinë' Cristo yödzölió ni, gudxë' Dios ca na' nazúaj lu guichi lá'ayi le rnna:

Biti' rë'ënü' nu cu'u rön quégacaba' böa' bëdxi lo' pero benu' ga naca' bönächisö.

⁶ Biti' raza ládxu'u nu uzegui'-ba' böa' bëdxi lo', o nu cu'u xichöngacaba' lo' tu' nözi dul-la'.

⁷ Ní'irö gunní'a': Ni zoa' para guna' ca rë'ënü' Li', Dios. Naca ca na' nazúaj lu guichi lá'ayi ca gaca quia'.

⁸ Lë na' nazúaj zí'alö rnna: "Biti' rë'ënü' Dios nu cu'u rön quégacaba' böa' bëdxi lahuë'." Didza' ni ruluf'i rë'u bítirö raza ládxë'ë Dios lë ni sal-la' lu xibá queë' Moisés rinná bë'enë' Dios nu gun caní. ⁹ Gudödi ni' rnna: "Ni zoa' para guna' ca rë'ënü' Li', Dios." Didza' ni ruluf'i rë'u rugüë' Dios lë na' gula'gu'ë lahuë' zí'alö, en ruzoë' xilataj le gulu'ë Zxi'ini cazë' lahuë'. ¹⁰ Na'a, Dios ruünë' rë'u idú tsahui' tu' benë' Cristo ca rë'ënü' Dios cate' ni' budödi cuinë' lahuë' Dios uláz queëru', en gútië' tu luzuísö.

¹¹ Le nácatë yúgu'të bixúz luyú ni zuíguequinë' yugu' dza, en tunë' xichingäquië', en la' tuz ca tunë', ta'gu'ë lahuë' Dios zián luzuí xichöngacaba' böa' bëdxi, yugu' le cabí gaca ulu'gúa dul-la'. ¹² Na'a, Cristo, tu le gulu'ë tsaz lahuë' Dios tu luzuísö tu' nözi dul-la', ate' ní'irö yójchö'ë cuita lë'ë ibëla Dios.

¹³ Ribözë' ni' dza gunë' Dios ga ulu'zechu zxibigaca lahuë' nupa biti' ta'lé'e Lë' dxí'a. ¹⁴ Ni'a que tuz le gulu'ë lahuë' Dios, tsaz benë' ga nácagaca idú tsahui' nupa na' bunë' dxí'a, en bubéajë' lèguequi quez queë' Dios. ¹⁵ Lësca' caní Dios Bö' Lá'ayi runë' ba nalí loru', tu' gunnë' zí'alö lë na' nazúaj lu guichi le rnna:

¹⁶ Caní gaca didza' ucá'ana tsahui' gúnlena' légaquië' tödi yugu' dza ni', rnnë' Xanru'.

Uchizí'a icja ládxido'gaquië' xibá quia', en uzúaja' le lu icja ládxido'gaquië'.

¹⁷ Gudödi na' gunnë':

Bítirö tsöjneda' dul-la' nabágagaquië' en dö' biá'gaquië'.

¹⁸ Que lë ni na', channö chinadúa dul-la', bítirö run bayudxi nu bi cu'u lahuë' Dios tu' nözi dul-la'.

Huáca ibíga'ru' gala' ga zoë' Dios

¹⁹ Na'a, yugu' böchi' luzá'ado', idú ládxiru' gaca idxinru' lahuë' Dios caz, ni'a que xichönë' Jesucristo. ²⁰ Tséajlenru' tu nöza cubi, en idú tsahui' le nuzoë' Cristo, le ridxín cùdzilö lari' na' busayaj ga nu riyaza lataj idú lá'ayi na', o huáca innaru', nöza na' gusalje' Cristo ni'a queëru' tu' budödë' idútë le naca cazë'. ²¹ Jesús náquië' queëru' tu bixúz nayëpisëtëre', en rinná bë'enë' bönachi queë' Dios. ²² Que lë ni na' huáca ibíga'ru' gala' ga zoë' Dios idú ládxiru', en lu yöl-la' run löza queëru', tu' réajlë'ëru' Cristo, tu' chibunë' dxí'a icja ládxido'oru', para cabí uxösa ládxido'oru' rë'u, ate' gudibë' idútë le naca cázaru' len le naca tu nisa nácatérö idú. ²³ Ral-la' gácaru' tsutsu, en cabí gaca chopa ládxiru' ca naca le runru' löza que le nazí' lu ná'aru', le guzxí' lu në'ë Dios gunnë' queëru', ate' Lë' runë' ca rnnë'. ²⁴ Ral-la' utipa ládxiru' turu'

ia'turu', para gunru' ga idxí'iröru' luzá'aru', en gúnröru' ca' le naca tsahui'.
 25 Bal-la bönnachi bíti'rö tu'dubi len rë'u. Biti' ral-la' gunru' ca tun bönnachi na', pero ral-la' utipa ládxí'ru' turu' ia'turu', en gúnröru' caní tu' rilé'era' chizóa idxín dza huödë' Xanru'.

26 Channö zéajlenru' runru' dul-la' tödi núnbe'ëru' le naca idútë li, biti' ca' nagá'a bi gaca cú'uru' lahuë' Dios le ugúa dul-la'. 27 Yugu' bönni' tunë' caní, lu yöl-la' radxi ridzöbi quégäquië' ta'bözë' dza ichúguië' Dios quégäquië' ila'yázïë' lu guï' gabila, lë na' uzéguitica'sö nupa ta'da'baga' Dios. 28 Cate' nu bönni' buzöe' xibá queë' Moisés tsölä'alö, gulútië' lë' channö chopaa tsonna bönnachi gulún ba nalí que le benë', ate' cuntu nu buéchi' ladxi' bönni' na'. 29 Na'a, nu bönni' uzóë' tsölä'alö Zxi'inë' Dios, en uzóë' tsölä'alö ca' xichönë' le run tsutsu didza' rucá'ana tsahui', le ruún rë'u dxí'a, ibágä're' ca' xigüia'. Nu bönni' gunë' caní ucá'anë' ca' asö Dios Bö' Lá'ayi, Nu ruzá' ladxi' queéru' le riquiniru'. 30 Caní gaca, tu' núnbe'ëru'në' Dios, Nu gunná: "Quia' neda' nequi yöl-la' ruzí' lëbi. Neda' ubi'a quégaca bönnachi, rnne'ë Xanru'." Lësca' caní gunnë': "Xanru' uchi'a usöröe' bönnachi queë'." 31 Ral-la' gadxi idzöbi nu ral-la' si' xigüia'lu në'ë Dios ban.

32 Guli'tsöjnë yugu' dza chigula'dödi cate' ni' si' bidxín queéli' bení', ate' biá' guulenli' zián le bulu'saca' zi'ë libí'ilí'. 33 Bulu'lidza ditaj bönnachi libí'ilí', en bulu'dxíalibí'ilí' dö'lahui' lögaca bönnachi, ate' benli' tsözxön ca' nupa gula'guí'i gula'zaca' caní. 34 Caní guca, tu' buéchi' ládxí'li' nupa nadzungaca lídxí guíë, en lu yöl-la' rudzeja queéli' biá' guulenli' nupa gula'béaj lídxili' yugu' le guta' queéli'. Caní benli' tu' nözili' nequi queéli' le nácarö dxí'a, en le zóatica'sö ni' yehua' yubá. 35 Na'a, biti' ucá'analí' lë na' runli' löza, le naché' tu le zxön ubi'ë Dios queéli'. 36 Run bayudxi cözali' zxön ladxi', para cate' chibenli' ca rë'ënë' Dios, sí'ilí' le guzxí' lu në'ë gunnë' queéli', ca na' nazúaj lu guichi lá'ayi, ca gunnë' Dios le rnna:

37 Ia'tú chí'ido'osö idxinë' Bönni' na' ral-la' guíde'.
 Biti' ca' tsenë'.

38 Ni'irö nu naca tsahui' lahua' neda',
 ulá nu na' tu' réajlë' neda'.

Channö huöaj ladxi', en tá'baga' neda',
 bíti'rö tsaz ládxá'a nu na'.

39 Na'a, rë'u ni, biti' nácaru' ca nupa tu'huöaj ladxi', en ta'dá'baga' Dios, en ilá'ni, pero réajlë'ëru' Cristo, en nadéli'ru' yöl-la' rusölä.

11

Ca naca yöl-la' réajlë' queëru' Dios

1 Na'a, tu' réajlë'ëru' Dios, naca löza queëru' sí'iru' le runru' löza, ate' naca bë' zoa le cabí gaca ilé eru'. 2 Caní gula'yéajlë'ë xuz xtó'oru' Dios, ate' que lë ni na' nazúaj lu guichi lá'ayi ca guca quégäquië' le rnna: Bulu'rúajë' tsahui' lahuë' Dios.

3 Tu' réajlë'ëru' Dios, réquibe'era' benë' Lë' yödzölió ni len didza' bë'ësë'. Lësca' caní, cate' benë' Dios yúgu'te le rilé'era', bugunë' dxin le cabí nalá'.

4 Tu' guyéajlë'ë Abel Dios, gulu'ë rön queëba' böa' bëdxido' lahuë' Dios, tu le nácatérö lesaca' ca le gulu'ë Caín lahuë' Dios, en que lë ni na' Dios benë' ba nalí queë' Abel na', gunnë' náquië' tsahui', en benë' bal lë na' gulu'ë lahuë'. Sal-la' chinatië' Abel na', ga ridxitë na'a dza, naca tsca ru'ë didza', tu' guyéajlë'ë Dios.

⁵ Tu' guyéajlë'ë Enoc Dios, gudödë' ni' yehua' yubá, en biti' ca' gútië', ate' bítirö nu budzöli lë', tu' buchë'ë Dios lë', ate' nazúaj lu guichi lá'ayi ca naca queë' le rnna: "Zí'alö ca buchë'ë Dios lë', benë' Enoc le raza ládxë'ë Dios."

⁶ Na'a, channö cabí réajlë'ëru' Dios, biti' gaca gunru' le raza ládxë'ë Lë', ate' para ibiga'ru' gala'ga zoë' Dios, run bayudxi tséajlë'ëru' zoa cazë' Lë', en rubi'ë que no ru'i ladxi' Lë'.

⁷ Cate' ni' Dios buzéajni'inë' Noé ca ral-la' ilaca le cabí rilé'eninë' Noé na', tu' guyéajlë'ë Noé Dios, benë' ca rnna xtídzë'ë Dios. Bupë'ë barco zxön na' nazí'i le Arca, ate' lë'e barco na' bululá bönnachi di'a dza queë' Noé. Tu' guyéajlë'ë Noé Dios, benë' ga naca bë' narugu quégaca bönnachi yödzölió ilátigaca, ate' bidéli'në' gúquië' tsahui' lahuë' Dios, le ta'deli' nupa ta'yéajlë' Lë'.

⁸ Cate' ni' Dios bulidzë' Abraham, tu' guyéajlë'ë Abraham Lë', benë' ca rnna xtídzë'ë Dios, en buzë'ë ladzë' para tsejë' lataj ni' ral-la' si'ë ca tu le guequi tsaz queë', ate' birúajë' ladzë' sal-la' biti' nözinë' gazxi na' ral-la' tsejë'. ⁹ Tu' guyéajlë'ë Abraham Dios, gúquië' ca tu bönni' zi'tu', en guzóë' luyú na' Dios guzxí' lu në'ë unödzjë' queë'. Guzóë' lu yu'u guídido', en lëbisö ca gulunë' Isaac, en Jacob, zxí'ini xi'soë' Abraham, nupa ni' guzxí' lu në'ë Dios unödzjë' quéguequi lë na' guzxí' lu në'ë unödzjë' queë' Abraham. ¹⁰ Caní benë' Abraham, tu' benë' löza idéli'në' yödzö na' rö'ö tsaz xilibi zö'ö que, le nuzóë' Dios xilibi zö'ö que, ate' gulu'ë le ga na' zoë' Lë caze'.

¹¹ Lësca' caní Sara, sal-la' chinácanu nigula huödx, guyéajlë'ënu Dios, ate' Lë' bë'ë queënu yöl-la' huáca buzóanu-bi' bi'ido'. Buzóanu-bi' bi'i bönni'do' sal-la' chigudödi izi queënu, tu' guyéajlë'ënu Dios gunë' ca rnna xtídzë'ë na' guzxí' lu në'ë queënu. ¹² Que lë ni na', sal-la' chibigúladë'ë Abraham, gula'cuá'abi' ziánteröbi' zxí'ini xi'soë'. Gula'cuá'abi' tsca rö'öba' böla'j lúzziba, en tsca rö'ö yuzzxi tu ra' nisa zxön, cuntu nu gaca ulaba légacabi'.

¹³ Yugu'te bönni' ni gulatië', en biti' gula'zi'ë lë na' guzxí' lu në'ë Dios unödzjë' quégaquië', pero gula'yéajlë'ë Dios, ate' zi'tu' zi'tu'sö bila'lé'enë' lë na' ral-la' ila'zi'ë. Gula'yéajlë'ë Dios, en gulunë' ba nalí que lë ni. Caní guca, bulu'lu'ë nácagaquië' ca bönni' zi'tu', en bönni' ta'dazë' yödzölió ni. ¹⁴ Yugu' bönni' tu'ë caní didza', tu'lu'ë ta'guiljë' tu lataj le gaca ládzagaquië'. ¹⁵ La'tu' gula'zá' ládx'i'gaquië' caní que luyú ga ni' bila'rúajë', le nácatë ulu'dzölinë' nacxi huöajgaquië' ni', ¹⁶ pero gula'zá' ládx'i'gaquië' que luyú na' nácarö dxi'a, le rö' yehua' yubá. Que lë ni na' biti' rutuí'inë' Dios cate' ta'nnë' náquië' Dios quégaquië', tu' chinupë'ë tu yödzö quégaquië'.

¹⁷ Tu' guyéajlë'ë Abraham Dios, cate' guzxí' bë'ë Dios lë', budödë'-bi' bi'i Isaac queë' lahuë' Dios ca na' tu'dödë'-ba' yugu' böa' bëdxí tútigaquië'-ba' lahuë' Dios. Guzóë' sina' Abraham gútië'-bi' bi'i bönni' zí'alö queë' na' lahuë' Dios sal-la' nácabi' bi'i na' guzxí' lu në'ë Dios unödzjë' queë'. ¹⁸ Caní benë' sal-la' gudxë' Dios lë', gunnë': "Lu ná'abi' bi'i Isaac quiu' ichísagaca'-bi' zxí'ini xi'sú'." ¹⁹ Caní benë' Abraham, tu' gúquibe'enë' napë' Dios yöl-la' huáca usubanë'-bi' lu yöl-la' guti, ate' ca tu lugá'a luséqui', huáca innaru' buzi'ë-bi' lu yöl-la' guti sal-la' biti' guti cázabi'.

²⁰ Tu' guyéajlë'ë Isaac Dios, gunábinë' Dios gun lá'ayë'-bi' bi'i Jacob, enca' bi'i Esaú ca zeaj naca le ulu'zí'ibí' xibé dza si' za'. ²¹ Tu' guyéajlë'ë Jacob Dios, cate' ni' chizóá gátië' gunábinë' Dios gun lá'ayë'-bi' tu tubi' zxí'ini' José, ate' guyéaj ládxë'ë Dios, ni' nayéchuë' lu xiyaga queë'. ²² Tu' guyéajlë'ë José Dios, cate' ni' chizóá gátië', bë'ë didza' que dza na' ila'rúajë' zxí'ini xi'soë' Israel luyú Egípto, ate' gunná bë'ë ca ral-la' ilu'ë dxita queë' luyú ga na' tsöjcu'ë.

23 Tu' gula'yéajlë'ë Dios, cate' gúljabi' bï'ido' Moisés, xuz xiná'abi' bulu'caché'ë-bi' idú ca tsonna beo', tu' bila'lé'enë nácabi' bï'i bönni'do' na' lachi, en biti' guládxinë' bönni' rinná bé'enë'bönachi Egipto, bönni' na' gunná bë'ë ilütië'bi' yugu' bï'i bönni'do' na'. **24** Tu' guyéajlë'ëbí' Moisés Dios, cate' guzxönbí', bítirö bë'ëbí' lataj nu uzóa lëbí' bï'i bönni' queénu nigula zxí'inë' Faraón, bönni' na' rinná bé'enë'bönachi Egipto. **25** Caní benbi' tu' gúquibi' nácaro dxi'a nu usaca' zi' lëbí' tsözxön len bönachi queé' Dios ca uzí'ibí' xibé tu chí'isò yugu' le tu'zí' xibé nupa tun dul-la'. **26** Gúquibi' nácaro lesaca' nu ulidza ditaj lëbí', ca na' gaca ca' queé' Cristo, ca idélibí' yugu' yöl-la' tsahui' quégaca bönachi Egipto, tu' guzá' ládxí'bi' ca naca le ubí'ë Dios queébi'. **27** Gudödi ni', tu' guyéajlë'ë Moisés Dios, birúajé' luyú Egipto, en biti' gúdxinë' yöl-la' rilé queé' bönni' rinná bé'enë'bönachi Egipto, ate' biá' gulénë' ca run nu rilé'e Dios, Nu na' biti' gaca ilé'eru'.

28 Tu' guyéajlë'ë Moisés Dios, benë' Laní Pascua ca gunná bë'enë' Dios lë', en buchéajé' rön ra' yu'u lídxigaquië', para cabí guti zxí'inigaquië' nu na' ralla' usunuti yugu' bï'i bönni' zí'alö quégaca bönachi Egipto. **29** Tu' gula'yéajlë'ë yugu' bönni' Israel Dios, gula'dödë' luyú bidxi gatsaj láhui'lö nísado' nazi'i le Nisa Xiná. Cate' gulé'ennë' ila'dödë' ca' bönni' Egipto ni', gula'yépinë' nisa, en gulátigaquië' lu Nisa Xiná na'.

30 Tu' gula'yéajlë'ë bönni' Israel Dios, cate' budxi gula'dödë' idú gásibi'ilö yödzö Jericó yugu' dza idú gadxi dza, bila'guínnaj yugu' zö'ö gulún chí' i yödzö na'. **31** Tu' guyéajlë'ënu Rahab Dios, nigula ruí'nu lataj bönachi, biti' gútinu tsözxön len bönachi Jericó na' biti' gulún ca rnna xtídzë'ë Dios, tu' bennu bal bönni' Israel na' buduyúlangaquië' le rácalen bönachi Jericó.

32 ¿Bízxirö ral-la' innía? Riyadzaj lataj uzúaja' ca gulunë' Gedeón, en Barac, en Sansón, en Jefté, en David, en Samuel, enca' yugu' bönni' gulu'ë didza' uláz queé' Dios.

33 Tu' gula'yéajlë'ë Dios, bulu'zötjë' zián yödzö zxön.

Gulunë' le naca tsahui', ate' gula'déli'në'

le guzxí' lu në'ë Dios unödzjë' quégagaquië'.

Bulu'sayjë' ruá'agacaba' bëdxi guixi'.

34 Bulu'lë' yugu' lu guí' zxön.

Bila'rúajé' lu ná'agaca nupa gulé'ëni iluti légaquië' len guíë tuchi'.

Dios bunë' légaquië' tsutsu cate' ni' gula'cuídi'në'.

Bulu'huöáquië' ca' tsutsu lu gudil-la.

Bulu'láguië' bönni' guizxi yu rójäquië' gudil-la quégagaquië' bönni' zi'tu'.

35 Yugu' nigula dza ni' bulu'zí'nu bï'i que queégacanu nubángacabi' lu yöl-la' guti.

Ia'bal-lë' bönni' ni' gulátië' lu ná'agaquië' bönni' ni' bulu'saca' zi'ë légaquië', en tu' cabí gulé'ennë' ulu'cá'anë' Dios, biti' gula'zi'ë lataj nu usán légaquië'. Caní gulunë' para ila'déli'në' yöl-la' rubán lu yöl-la' guti, lë na' gúléquine' nazáca'rö. **36** Ia'bal-lë' biá' guléngagaquië' yöl-la' rutitaj, en xíguia' que gubá'ayi, ate' gula'dzunë' lidxi guíë, nága'gaquië' du guíë. **37** Bulu'ladxi' bönachi bal-lë' guijö, en gula'chözë' ia'bal-lë'. Gula'zi' bë'ë légaquië', en gulútigaca ziángaquië' len guíë tuchi'. Gula'dödë' ná'alö ní'ilö, nácugaquië' guídi zxágacaba' bô'cu' zxila', en chivo. Guláquië' yechí', en gula'guí'i gula'záqué'ë, ate' bulu'dxíá bönachi légaquië' dö'. **38** Caní guláquië' bönni' na', ate' biti' gulaca bönachi yödzölió ni lesaca' ulu'zí' xibégaquië'. Gula'dasë' lu lataj cá'asö, en yugu' lu guí'a, ate' gula'cuá'asë' yugu' zxan bulóaj, en yugu' yeru luyú. **39** Yúgu'të'

bulu'rúajé' tsahui' lahuë' Dios tu' gula'yéajlë'ë Lë', sal-la' biti' gula'zi'ë luyú ni le guzxí' lu në'ë Dios unödzjë' quégaquië'. ⁴⁰ Caní guca, tu' nupé'ë Dios ni'a queéru' tu le nácaro dxi'a para cate' únë' légaquië' idú dxi'a, rë'u ni gunru' légaquië' tsózxön.

12

Ral-la' uyuru'-në' Cristo

¹ Que lë ni na', lësca' rë'u, tu' nacuá' idú gásibi'ilö ga ni zóaru' ziántérö nupa tun ba nalí ca ta'yéajlë' Dios, ral-la' ucá'anaru' yúgu'të le ruá' dö' le naca ca tu le naca zi'i nuá'aru', enca' yúgu'të dul-la' nazöngaca rë'u, ate' lu yöl-la' riböza zxön ladxi' queéru', ral-la' gunru' xichinë' Dios, le naca tsca xítiru' lu huitaj le zoa loru'. ² Ral-la' uyuru'-në' Jesús, Nu na' run ga gaca tséajlë'ëru' Dios, en Nu run ga raca idú yöl-la' réajlë' queéru' Lë'. Jesús gudi'i guzxáquë'ë lë'e yaga cruz, en biá' guléné' yöl-la' rutu'i que, tu' gú'unné' idéli'në' yöl-la' rudzeja na' uzi'ë xibé, ate' yöchö'ë cuita lë'ë ibëla Dios, ga ni' rö'ë rinná bë'ë.

³ Buli'yú'ë Jesús, ca na' gudi'i guzxáquë'ë le bulu'saca' zi'ë bönni' dul-la' Lë', para cabí icuídi'li', en para cabí gaca chopá ládxilí'. ⁴ Ga ridxitntë na'a dza, biti' bi biá' gulenlé' ga idxintë nu gun libí'li' huë' tu' ridá'baga li' le naca dul-la'. ⁵ Nadxi ca' chizá' ral-la ládxilí' lë' na' ruzéajni'inë' Dios libí'li'. Nácali' ca yugu' zxí'ini cazé', ca na' nazúaj lu guichi le rnnë':
Zxi'ina', biti' uzú' tsólá'alö le gunré' Xanru',
cate' usédi uzéajni'inë' li',
en biti' huóaj ládxu'u cate' uní'inë' li'.

⁶ Xanru' runí'inë' nu nadxfi'inë',
en rusëdi ruzéajni'inë' yúgu'të nupa ta'zí' lu në'e ilaca zxí'ini cazé'.

⁷ Ral-la' guá' ilenli' le uní'inë' Dios libí'li', tu' runé' Dios caní queéli' tsca nácali' zxí'ini cazé'. Biti' ca' zóabi' tubi' bí'ido' biti' uní'inë'bi' xúzibí'. ⁸ Na'a, channö cabí runí'inë' Dios libí'li' ca na' runé' quégaca yúgu'të zxí'ini cazé', ni'irö nácali' ca yugu' bi'i lan, en biti' nácali' idú zxí'inië' Dios. ⁹ Ia'stú, cate' ni' nácaru' bí'ido', gula'cu'ë xuz xiná'aru' luyú ni, bulu'ní'inë' rë'u, pero runru' légaquië' bal. Ca' naca, ral-la' gúnröru' ca rnna xtídzë'ë Xúziru' zoë' yehua' yubá para sóaru' ibanru' tsaz. ¹⁰ Yugu' xuz xiná'aru', tu chí'isö bulu'ní'inë' rë'u tsca le guléquisiné' naca dxi'a, pero cate' runí'inë' Dios rë'u, naca para gaca tu le uzí'iru' xibé, para gácaru' idú lá'ayi ca naca cazé' Lë'. ¹¹ Le nácaté biti' nalá' lahui na'a le uzí'iru' xibé que le runí'inë' rë'u, pero run ga ruhu'ñiniru'. Channö güí'iru' lataj usédi rë'u le runí'inë' rë'u, gun ga cözaru' dxi'ado', en ga gácaru' tsahui'.

Soa bönadxi queéru' channö cabí uzé nágaru' chi'ë Dios

¹² Que lë ni na' buli'ún tsutsu ná'ali' le röjxéqui'guequi, enca' zxíbili' le ta'zxizi, en idipa ládxilí' para gunli' le naca dxi'a. ¹³ Guli'sóa nöza tsahui', para cabí gunli' ga ucá'ana nu ricuidi' ladxi' nöza na', pero guli'gún ga huóáca ladxi' nu na'.

¹⁴ Guli'gúí' ládxilí' cözalenli' dxi'a yúgu'të bönnachi, en gácali' tsahui' lahuë' Dios, tu' channö cabí gunli' caní, biti' gaca ilé'eli'-në' Xanru'. ¹⁵ Guli'gún chí'i cuinli' para cabí soa nu ucá'ana le ruzá' ládxë'ë Dios queéru', en para cabí soa nu gaca ca tu guixi' silá', para cabí utsá' libí'li', en cabí gun ga cabí gácali' tsahui' zianli' libí'li'. ¹⁶ Guli'gún chí'i cuinli' para cabí gun nu dzaga libí'li' le ruá' dö', o le cabí naca tsahui', ca na' bené' Esaú, zxí'inië' Isáac. Esaú na' bëti'ë le ral-la' gata' lu në'ë tu' náquië' bi'i bönni' huaca queé' xuzë' para

guzxi'ë tu le do' gudahuë'. ¹⁷ Chinöz quézili' ca na' guca queë' Esaú gudödi ni' cate' gú'unnë' idéli'në' le inabë' xuzë' lahuë' Dios para gaca le tsahui' queë'. Buéchi'ládxë'ë xuzë' lë', pero biti' guta'lataj ubi'iládxë'ë Esaú na'sal-la' gudilaj ládxë'ë le len yöl-la' ribödxi queë'.

¹⁸ Ca raca queëli' biti' naca ca guca quégäquië' bönni' Israel. Légaquië' gula'biguë'ë gala' ga zoa tu guí'a le gaca nu can, ate' guyegui guí'a ni', en böåca chul-la lahuï' dza tu' gurö'ö böaj gasaj, en guyécjada' bö'. ¹⁹ Bila'yönnë' ta'bödxi lúzuba' bö'a, enca' chi'ë Dios Nu bë' didza'. Cate' bila'yönnë' lë ni, gulatá'yuë' lahuë' Moisés para cabirö' güü'ilenë' Dios légaquië' didza'. ²⁰ Caní gulunë' tu' cabí guca guá' iléngäquië' lë na' gunná bë'enë' Dios légaquië', gunnë': "Channö tsöjlíbibä' tuba' bö'a güixi'do'os guí'a ni, ral-la' ulu'ládxë'ë-ba' güijö, o ulu'döde'-ba' yaga tuchi'." ²¹ Lë na' bila'lé'enë' ben gádxida' légaquië', ate' Moisés gunnë': "Radxi ridzöbida', en rizxízida'a."

²² Na'a, libí'ili' ral-la' gádxiteröli' tu' ribiga'li' gala' tu lu guí'a nazí'i le Sión, en ga zoa yödzö queë' Dios ban, le nazí'i le Jerusalén que yehua' yubá, ga na' nacu'ë gubáz lá'ayi guizxi yu queë' Dios. ²³ Ribiga'li' gala' ga ni' nudúbigaca zxí'ini cazeë' Dios lahuë' Lë', nupa na' nazúajgaca láguequi lu guichi ni' yehua' yubá, enca' ga zoë' Dios Nu ruchi'a rusöröe' yugu'të böñachi, en ga na' nacuá' yugu' bö' gulaca cazeë' yugu' bönni' tsahui', tu' bunë' Dios légaquië' tsahui'. ²⁴ Ribiga'li' ca' ga zoë' Jesúś, Nu ben tsutsu didza' cubi na' rucá'ana tsahui', enca' ga nagu'ë Jesúś rön queë' le run ga runiti lahuë' Dios rë'u, rön na' run le nácarö dxi'a ca le ben xichöne' Abel, lë na' ben ga guchúguië' Dios queëbi' bi'i böchë'ë.

²⁵ Que lë ni na', guli'gún chi'i cuinli' para cabí tá'baga'li' Nu na' ruí'i didza'. Biti' ca' bulu'lá nupa ni' gula'dá'baga' nu na' bulidza légaquië' luyú ni. Nácatëro löza biti' ca' uláru' rë'u channö tá'baga'ru' Nu na' rulidza rë'u, zoë' yehua' yubá. ²⁶ Dza ni' guzzizi luyú ni tu' biyön chi'ë Dios, pero na'a chiguzxi' lu në'ë, gunnë': "Ia'tú luzuísö, en calégasö luyú uxízia', pero lúzziba ca' uxízia'." ²⁷ Cate' ni' rnnë': "Ia'tú luzuísö", lë ni rulu'i rë'u ral-la' udúa yugu' le gaca ila'zxízi, lë na' rö'ö yödzölió ni, ate' ulu'gá'ana le cabí gaca ila'zxízi, lë na' rö' yehua' yubá. ²⁸ Que lë ni na', tu' ral-la' idéli'ru' tu lataj ga inná bë'ëru', le cabí izxzizi, ral-la' güíeru'-në' Dios: "Xclenu'", ate' lu yöl-la' ba'a ladxi', en lu yöl-la' radxi Lë' tseaj ládxì'ru' Lë' ca na' raza ládxë'ë Lë', ²⁹ tu' náquië' Dios queëru' ca tu guí' le rusuniti le cabí naca idú tsahui'.

13

Le ral-la' gunru' le raza ládxë'ë Dios

¹ Ral-la' idxi'itica'sili' luzá'ali' tuli' ia'tuli'. ² Guli'tsöjnë ral-la' uzóali' lídxili' nu idxín ga zóali'. Cate' gulún caní bal-la böñachi, bulu'cuá' lídxiguequi gubáz lá'ayi que yehua' yubá queë' Dios, sal-la' biti' guléquibe'e nácagaquië' gubáz lá'ayi.

³ Guli'tsöjnë nupa nadzúngaca lidxi güié tsca nunli' légaquië' tsözxön, nadzunli' ca' lidxi güié. Guli'güü' ládxì'li' yugu' bönni' ta'bía ládxì'gaca böñachi légaquië', tsca libí'ili' rigu'i rizáca'lenli' légaquië' tsözxön.

⁴ Ral-la' gunli' bal yöl-la' nutsaga na', ate' tu tuë' bönni' ral-la' sóalenë'-nu nigula queë' lu yöl-la' ba'a ladxi' queë', tu' ichúguië' Dios quégaca nupa tun le ruá' dö', en nupa ta'guitsaj xibá que yöl-la' nutsaga na'.

⁵ Biti' bi uhuídilí', pero guli'tsaza ládxí'lí' tsca le dë queéli' na'a, tu' chigunné' Dios: "Catu caz ucá'ana' lí', en biti' ca' ubéaj ládxa'a lí." ⁶ Caní naca, huáca innaru' idú ládxí'ru' lë na' rnna: Xanru' náquië' Nu rácalen neda'. Biti' ca' gádixa' bi gun bönachi quia'.

⁷ Guli'tsöjnë yugu' bönni' tu'yúé libí'ilí', nupa na' tu'sédinë libí'ilí' xtídzë'ë Dios. Buli'yú ca nadéli'gaquië', en guli'gún ca tunë' lu yöl-la' réajlé' quégaquië' Dios.

⁸ Lébisò ca náquië' Jesucristo, néaje, en na'a, en cá'tica'sö. ⁹ Biti' güí'ilí' lataj yugu' xibá izá'a, en xibá nadzáz' iché'gaca libí'ilí' nöza yúbölö. Naca dxi'a gunli' tsutsu icja ládxí'do'oli' ca naca le ruzá' ládxë'ë Dios queéli', en caléga ca nácagaca xibá que le rë'aj ráguru', lë na' biti' ulu'zí' xibé nupa tuí'i ládxí'gaca léguequi.

¹⁰ Zoa queéru' tu bucugu lá'ayi, le cabí ulu'zí' xibé nupa tun dxin que didza' rucá'ana tsahui' na' bilá' zí'aló. ¹¹ Bixúz lo que yu'u lá'ayi na' gulu'ë xichöngacaba' böa' bëdxi lu lataj idú lá'ayi tu' nözi dul-la', pero bulu'zéguë bëla' cá'asö quégacaba' ga naca ní'ilö ra' yödzö. ¹² Lësca' caní gudí'i guzxáquë'ë Jesúz ní'ilö ra' yödzö para bunë' bönachi dxi'a len rön queé cazé'. ¹³ Tsöjtá'aru'në' Jesúz, sal-la' ila'béaj bönachi rë'u lu yödzö, en sí'iru' tsözxön len Lë' lë na' bulu'lidza ditaj bönachi Lë'. ¹⁴ Biti' zoa tu yödzö queéru' yödzölió ni le soa tsaz, pero riguiljaru' lë na' sí' za'. ¹⁵ Que lë ni na', ral-la' cù'utica'siru'-në' Dios yölla' ba, ugunru' dxin Lë' Jesucristo. Yöl-la' ba na' naca ca tu le rigú'uru' lahuë' Dios. Len ruá'a cuinru' guiéru'-në' Dios: "Xclenu'" ni'a que le náquië' Lë'. ¹⁶ Biti' gal-la ládxí'lí' gunli' le naca dxi'a, en gácalenli' luzá'ali' tulí' ia'tulí', tu' naca lë ni ca tu le rigú'uru' lahuë' Dios le raza ládxë'ë Lë'.

¹⁷ Guli'gún ca rnna xtídzä'gaquië' böchi'ru' tu'yúé libí'ilí', en guli'güí' lataj ila'nná bé'ené' libí'ilí', tu' tapa chi'ë bö' naca cázali', ca tunë' yugu' bönni' ralla' ila'guíxjöë lahuë' Dios le núngaquië'. Guli'gún caní para ilunë' dxin na' lu yöl-la' rudzeja quégaquië', en caléga lu yöl-la' risëbi ládxí' quégaquië', tu' cabí uzí'ilí' xibé dxin na' ilunë' lu yöl-la' risëbi ládxí' quégaquië'.

¹⁸ Buli'lidzë' Dios, inábili'-në' gácalenë' netu', tu' runtu' löza soa dxi icja ládxí'do'otu', para cabí uxösa netu', ate' rui'iládxí'tu' gúntica'situ' le naca dxi'a.

¹⁹ Le nácarö lo, rátá yua' lolí' inábili'-në' Dios ugu'ë neda' tu nöza para udxina' ga zóali' bayöntë.

Dios uzá' ládxë'ë queéru' le gácalen rë'u

²⁰ Na'a, rinábitu'-në' Dios, Nu run le rucá'ana rë'u tsahui', en Nu busubán Xanru' Jesucristo lu yöl-la' guti, Nu na' naca Bönni' Lo Uyú Bö'cu' Zxila', tu' bulaljë' rön queé' le run tsutsu didza' rucá'ana tsahui', le zoa tsaz, ²¹ rinábitu'-në' gunë' ga gácali' idú tsahui', para gaca gunli' yúgu'té dxin dxi'a, en gunli' ca rë'enë' Lë', ate' gunë' queéli' le raza ládxë'ë Lë', tu' néquili' queé' Jesucristo. ¡Queé' Cristo gácatica'sö yöl-la' ba! ¡Ca' gaca!

²² Rátá'yua' lolí', böchi' luzá'ado', güí'i ládxí'lí' didza' ni ruzéajni'i libí'ilí', tu' naca láti'do'os lë ni ruzúaja' queéli'. ²³ Ral-la' inözili' chiburúajbi' bi'i Timoteo, bi'i böchi'ru'do', lidxi guíë, ate' channö idxíntebi' ga zoa' ni, gunbi' neda' tsözxön uduyútu' libí'ilí'.

²⁴ Buli'gapa Dios böchi'ru' tu'yúé libí'ilí', enca' yúgu'té bönachi rö queé' Dios. Tu'gapa Dios libí'ilí' bönachi ta'yéajlé' Cristo nacuá' luyú Italia.

²⁵ ¡Dios uzá' ládxë'ë queéli' yúgu'téli! ¡Ca' gaca!

LE BUZÚAJË' LU GUICH SANTIAGO

Santiago rugapë' Dios bönni' judío ta'dë'ë Cristo

¹ Neda', Jacobo, naca' huen dixin queë' Dios, enca' queë' Xanru' Jesucristo. Rugapa' Dios libf'ili', nácali' idxinnu cö' di'a dza quégaca böñachi Israel, násilasili' idú yödzölió ni.

Yöl-la' réajni'i le runnë' Dios queëru'

² Böch'i' luzá'ado', cate' gaca bi gaca queëli' le si' bë' libf'ili', ral-la' udzéjali' idú ládxil'i' ³ tu' nöz quézili', cate' bi raca queëli' le riz'i' bë' libf'ili' ca réajlë'ëli' Cristo, lë ni rusedi libf'ili' cözalí' zxön ladxi'. ⁴ Guli'gü' ládxil'i' gaca idú yöl-la' zxön ladxi' queëli', para údxi gácali' bönni' ta'yéajni'inë', en biti' bi yadzaj queëli' ca nácgagaca lë ni.

⁵ Channö zoa ladaj libf'ili' nu biti' réajni'ini, nu na' ral-la' inabi-në' Dios, ate' Dios caz gunnë' yöl-la' réajni'i que, tu' runödžjë' yöwdxì yana' quégaca yúgu'të böñachi, en biti' ca' réqui quézinë' gunnë' queëru'. ⁶ Na'a, nu bi rinabi-në' Dios, run bayudxi tséajlë' Lë', en cabí gaca chopá ladxi'. Nu raca chopá ladxi', raca que ca raca que bidxina' que nísado' cate' rutá bö' le, ruzéaj bö' le nilö ná'alö. ⁷ Nu naca caní biti' ral-la' gun löza si' bi unödžjë' Xanru'. ⁸ Bönni' na' reaj bö' ládx'i'da'ahuë' biti' ridzölinë' nácalö gunë'.

⁹ Channö zoë' tu bönni' böch'i'ru' réajlë'ë Cristo, en náquië' ca' asö yödzölió ni, ral-la' udzéjanë' tu' chinadéli'në' tu lataj lo lahuë' Dios. ¹⁰ Bönni' böch'i'ru' na' rilé'enë' yöl-la' tsahui' queë' ral-la' udzéjanë' cate' runë' Dios ga bíti'rö ruzzöni ládxë'ë lë na' dë queë'. Nu ruzzöni ladxi' yöl-la' tsahui' que, gaca que nu na' ca raca que xiyija guíxi'do', la' ridödítë que. ¹¹ Caní naca, tu' gaca que nu na' ca raca que xiyija guíxi'do' na' cate' rilén gubidza, en ruzdá'ada', la' ribídxítë guixi' na', en riguinnaj xiyija, en riniti yöl-la' lachi que. Lësca' caní gaca queë' bönni' rilé'enë' yöl-la' tsahui' queë', inítië' tsanni ni runë' dixin riguiljë' yöl-la' tsahui' na'.

Le ta'zí' bë' rë'u

¹² Bica' ba bönni' böch'i'ru' na' ruá' rilenë' le riz'i' bë' lë'. Cate' chiburúajë' tsahui', idél'i'në' yöl-la' na'bán idú, ca na' rideli' nu nutsa' lu huitaj, nu rideli' tu bregui' zin. Bönni' böch'i'ru' na' náquië' bica' ba tu' idél'i'në' yöl-la' na'bán idú na' guzxí' lu në'ë Dios unödžjë' quégaca nupa nadxf'iguequi Lë'. ¹³ Cate' bi raca queëru' le run ga guë'ëniru' gunru' le ruá' dö', biti' ral-la' innaru': "Dios riz'i' bë'ë rë'u len le naca xihui." Dios biti' riz'i' bë'ë nu bönni' len le cabí naca dxi'a. ¹⁴ Na'a, channö nu bi raca que le riz'i' bë' le len le cabí naca dxi'a, naca tu' rizë ladxi' le ruá' dö', ate' lë ni ben ga gú'uni gun le ruá' dö'. ¹⁵ Lë na' rizë ládx'i'ru' le ruá' dö' run ga gunru' dul-la', en cate' chibudxi benru' dul-la' na', la' dul-la' ná'asö rusubaga' rë'u xíguia' gátiru'.

¹⁶ Böch'i' luzá'ado', biti' si' ye'e la' cuínsili'. ¹⁷ Yúgu'të le naca dxi'a, en yúgu'të le naca idú le ruzí'ru' xibé, zá'gaca saca' xitsá'álö, en ta'rúaj ga zoë' Xúziru' Dios, Nu ben yugu' le ta'yépi yösa lúzxiba, yugu' le tu'tsá' cuínguequi, pero Lë' biti' rutsá' cuinë', en biti' rutsé'ë ca runë', rúnnatica'sé' queëru' le naca tsahui'. ¹⁸ Ca rë'ëni quézinë' Dios, benë' ga nácaru' böñachi cubi queë'. Buguné' dixin didza' queë' le naca idútë li, para gácaru' ca tu gulapa zí'alo queë' ladaj yúgu'të nupa na' gurö cazë' Dios.

Le reaj ládxí'ru'-në' Dios le naca li ladxi'

¹⁹ Que lë ni na' rea' libí'ili', böchi' luzá'ado', yúgu'téli' ral-la' sóali' sina' yönili', pero biti' ral-la' innétezili', en biti' ilétezili'. ²⁰ Nu na' riletëz biti' run le naca tsahui' lahuë' Dios. ²¹ Que lë ni na', guli'cá'ana yúgu'té le ruá' dö', en yúgu'té le zián le cabí naca tsahui', ate' lu yöl-la' nöxaj ladxi' guli'sí' lu ná'ali' didza'na' chinayaza icja ládxí'do'oli', tu' huáca gun didza' ni ga uláli'.

²² Na'a, guli'gún ca rnna didza' ni, en cabí yönisili', tu' channö yönisili' didza' ni, si' yé'eli' la' cuínsili'. ²³ Nu riyonisö didza' ni, en biti' run ca rnna, nu ni naca ca tu bönni' ruyué' lahuë' tu lu guíe dxili, ²⁴ tu' ruyú cuinë', en söhuöjë, ate' la' ral-laté ládxë'ë ca rinë'ë. ²⁵ Na'a, nu bönni' biti' ral-la' ládxë'ë le riyonné', pero ruí'i ládxë'ë xibá queë' Dios le naca idú li, en le gaca gun ga ulárü, ate' ugá'anë' tsutsu, en gúntica'sé' ca rinná bë' xibá na', gaquië' bica' ba ca naca yúgu'té le runë'.

²⁶ Channö nu bönni' ladaj libí'ili' réquinë' naca dxi'a ca reaj ládxë'ë Dios, pero biti' rapa chi'ë lúdxë'ë para cabí innësë' ca', bönni' ni rizi' yé'enë' la' cuinsë', ate' biti' raza ládxë'ë Dios ca reaj ládxë'ë bönni' na' Lë'. ²⁷ Le reaj ládxí'ru'-në' Dios, le naca idú, en le naca dxi'a, naca gácalenru' yugu' bi'i uzébido', enca' yugu' nigula nagá'anamu túzinu, cate' ta'gui'i ta'zaca' nupa na', en cabí gútsa'ru' le cabí naca tsahui' le raca yödzölió ni.

2

Tuz ca ral-la' gunru' bönnachi bal

¹ Böchi' luzá'ado', channö réajlë'eli' Xanru' Jesucristo, Nu nácatérö lo, biti' ral-la' utsá'ali' ca gunli' bal tu tu bönnachi. ² Channö tsázië' tu bönni' ga na' nudúbili', en nagu'ë xibón në'ë le néquini oro, en nácuë' lari' nazáca'da', ate' tsázië' ca' tu bönni' yéchi'do', nácuë' lari' cá'asö, ³ channö gunli' bal bönni' na' nácuë' lari' nazáca'da', en guiëlli'-në': "Gurö'ölen rë'u ga ni naca dxi'a", pero guiëlli' bönni' yéchi'do' na': "Ná asö guzuú", o guiëlli'-në': "Gurö'i lu yu ni." ⁴ Channö caní runli', rutsá'ali' ca runli' bal tu tu luzá'ali', en run cuinli' ca nu ruchi'a rusörö luzë'e, biti' naca dxi'a ca rizá' ládxí'li'.

⁵ Böchi' luzá'ado', buli'zé nágali' lë ni. Dios gurö' cazë' yugu' bönni', salla' téquigüequi bönnachi yödzölió ni náca quië' cá'asö, para ila'déli'në' yöl-la' tsahui' lahuë' Lë' tu' ta' yéajlë'ë Cristo, en gata' quégäquië' lataj ga ni' rinná bë'ë Lë'. Gata' quégäquië' lë na' guzxí' lu në'ë Dios unödžë' quégaca nupa ta'dxi'i Lë'. ⁶ Libí'ili' rucá'analí' cá'asö bönnachi yechi' ca', en runli' bal yugu' bönni' dë yöl-la' tsahui' quégäquië', ate' bönni' na' dë yöl-la' tsahui' quégäquië' tu'saca' zi'ë libí'ili', tu' tu'gunë' libí'ili' dxin. Lësca' tu'dödë' libí'ili' lu ná'agaquië' bönni' yúlahui'. ⁷ Yugu' bönni' na' dë yöl-la' tsahui' quégäquië' ta'nné zí'ë ca' que Lë' Jesucristo le nazáca'térö, en ca naca Lë' nazí'i lali': "Nupa Dá'gaca Cristo"

⁸ Runli' dxi'a channö runli' idú ca rinná bë' xibá lo, le nazúaj lu guichi, en rnna caní: "Ral-la' idxí' inu' luzó'o ca nadxi'i cuinu'." ⁹ Na'a, channö rutsá'ali' ca runli' bal tu tu bönnachi, runli' dul-la', en nabágali' xíguia' lu xibá queë' Dios, tu' riguitsjali' xibá na'. ¹⁰ Channö runë' tu bönni' idú ca rinná bë' xibá queë' Dios, pero channö ichíxinë' ca naca tuz le rinná bë' xibá na', chinabágue'ë xíguia' que iduté le rinná bë' xibá na'. ¹¹ Lë' cazë' Dios gunnë': "Biti' gunu' dul-la' le riguitsaj xibá que yöl-la' nutsaga na'", en gunnë' ca': "Biti' gútiu' bönnachi." Na'a, channö cabí runu' dul-la' le riguitsaj xibá que yöl-la' nutsaga na', pero rútiu' bönnachi, nabágú' xíguia' que iduté xibá queë' Dios. ¹² Ca innalí', en ca gunli', ral-la' gunli' ca ral-la' ilún nupa uchi'a usörö' Dios légaquië' ca rinná

bé' xibá na', le run ga uláru'. ¹³ Nupa cabí tu'huechi' láxhi'gaca luzé'eguequi, uchi'a usöröe' Dios léguequi, ate' cuntu nu huéchi' ladxi' léguequi, pero nupa na' tu'huechi' láxhi'gaca luzé'eguequi ulu'rúaj dxi'a cate' uchi'a usöröe' Dios léguequi.

Le ral-la' gunru' tu' réajlë'ëru' Cristo

¹⁴ Böchi' luzá'ado', biti' bi uzi'ë xibé tu bönni' channö innasë: "Réajlë'a Cristo", pero biti' runë' le naca tsahui'. Biti' gaca ulë' bönni' na' channö innasë' réajlë'ë Cristo. ¹⁵ Channö nacu'ë böchi' luzá'aru' ta'yéajlë'ë Cristo, en biti' dë le ilácuë', en caléga le ilahuë', ¹⁶ ate' channö tu nu dzaga libí'ili' guíësö légaquië: "Böaj lídxil' tsáhui'do'. Chibölaj budzé'eli'", pero channö cabí unödzaq quégäquië' lë na' ta'yádzjanë, biti' ca' gúcalen légaquië. ¹⁷ Lësca' caní raca que nu bönni' rnnañas' réajlë'ë Cristo. Channö cabí runë' le naca bë' naca idú ca réajlë'ë Lë', biti' naca lesaca' yöl-la' réajlë' queë'.

¹⁸ Nadxi ca' guië' tu bönni' luzé'ë: "Li' réajlë'ësu' Cristo, ate' neda' runa' le naca tsahui'. Biti' gaca ulu'ínu' neda' réajlë'u Cristo channö cabí zoa le naca tsahui' runu'. Neda' ulu'ída' li' réajlë'a Cristo ni'a que le naca tsahui' runa'."

¹⁹ Li' réajlë'u tuzë' náquië' Dios. Naca dxi'a ca runu'. Lësca' caní ta'yéajlë' yugu' bö' xihui', en ta'zxizi táxdida' Lë'. ²⁰ Li', bönni' biti' bi nözinë'. Ralla' inözi quézinu' channö zoa nu rnnañas' réajlë'ë Cristo, pero biti' run le naca tsahui', biti' naca lesaca' yöl-la' réajlë' Lë' que nu na'. ²¹ Naca bë' burúajë' xúziru' Abraham tsahui' lahuë' Dios ni'a que lë na' benë', cate' ni' gulu'ë-bi' bi'i Isaac queë' lahuë' Dios. Gulu'ë-bi' ca na'tun böñachi ta'gú'u le tu'zegui' lahuë' Dios, sal-la' biti' buzégui'ë-bi'. ²² Na'a gaca inözili' ca guca queë' Abraham. Lë na' benë' guca bë' guyéajlë'ë Dios. Ca' naca, guca bë' naca idú ca guyéajlë'ë Dios ni'a que lë na' benë'. ²³ Caní guca lë na' nazúaj lu guichi lá'ayi le rnna: "Abraham guyéajlë'ë Dios, ate' Dios bilé'enë' lë na' benë' ca tu le ben ga böáquië' Abraham tsahui'." Que lë ni na' guzxi'i lë': "Luzé'ë Dios."

²⁴ Na'a, rilé'e quézil' naca bë' rurúajë' tu bönni' dxi'a ni'a que le runë', en calégasö tu' réajlë'ë Dios. ²⁵ Lësca' caní guca queënu' Rahab, nigula bë'ënu böñachi lataj. Lësca' naca bë' burúajnu dxi'a tu' zoa tu le tsahui' bennu, lë na' bennu cate' ni' bennu bönni' tu'yulan bal, en gúcalennu légaquië' para bulu'guéë'ë yöjhüöjgaquië' nöza yúbölö. ²⁶ Ca na' raca que idútë le naca cázaru' channö cabí yu'u bö', chinati, lësca' caní naca que le réajlë'ëru' Cristo channö cabí nalá' yöl-la' run que, biti' naca lesaca'.

3

Yugu' le rnna lúdxí'ru'

¹ Böchi' luzá'ado', biti' guntëz zián cuinli' bönni' tu'sédinë' böñachi, tu' chinöz quézili' zí'térö uchi'a usöröe' Dios rë'u, nülöru' rusédiru' böñachi. ² Yúgu'teru' runru' zián le richixi riníguiru'. Channö cabí richixi riníguinë' tu bönni' ca naca didza' ru'ë, bönni' ni' náquië' idú tsahui', en raca inná be'e cuinë' ca naca yúgu'të le runë'. ³ Cate' rigú'uru' guíë ruá'agacaba' bö'a para gunru' ga ilunba' ca rë'ëniru', gaca inná bë'eru' légacaba' lu idútë le tunba'. ⁴ Buli'yú ca' ca raca quéguequi barco. Sal-la' zxöntérö naca tu barco, en récjada' bö' ruzéaj le, cuíd'i do'os naca në'e xiyágui barco na' le ruzecaj rudxi'i barco para tseaj gáti'tés ga gué'ënnë' bönni' rusé'ë le. ⁵ Lësca' caní naca lúdxí'ru'. Sal-la' cuíd'i do'os naca, ziántérö le rnna lúdxí'ru' na'. Buli'yútsöca' ca run guí'. Sal-la' guí'do'os ribíbiru', tu guí'a sibi huayégui. ⁶ Lësca' lúdxí'ru' na' naca ca tu

gui'. Yúgu'té le ruá' dö' raca yödzölió ni rnna lúdxi'ru', en tu' dzaga lúdxi'ru' na' idútē le naca cázaru', que lë ni na' run ga raca xihui' idútē le nácaru'. Le rnna lúdxi'ru' ribequi gui', le ruzegui' rë'u ca naca yúgu'té le runru', ate' tu' rnna caní lúdxi'ru' na', naca que tsca chinaguéla'të gui' le nabequi' tu' xihui'. ⁷Yúgu'téba' böa' guixi' ta'daba' luyú, en yugu' böa' zoa xíligacaba', en yugu' böa' ta'ayój lë'eba' lu yu, enca' yúgu'téba' böa' dzö'öba' lu nísado', huáca ila'nná be'e bönachi luyú ni légacaba', ⁸pero cuntu nu bönni' gaca inná bé'enë' lúdxë'ë, tu' rnna lúdxi'ru' le ruá' dö', en biti' gaca nu uzaga' xinözi. Ziánterö le rnna lúdxi'ru' le naca ca tu le naché' yöl-la' guti. ⁹Len la' lúdxi'ru' ná'asö rulidza tsáhui'ru'-në' Dios Xuz, en rulidza dítjaru' ca' yugu' bönni', ate' benë' Dios légaquié' ca naca cazé' Lë'. ¹⁰Caní naca, len la' ruá' asiru' na' rulidza tsáhui'ru' bönachi, en rulidza dítjaru' bönachi. Böch'i' luzá'ado', biti' ral-la' gaca caní. ¹¹Biti' ca'ta'lén nisa siziá', en nisa zöna' la' tuzi ga ta'lén. ¹²Böch'i' luzá'ado', tu yaga higo biti' gaca cuía le ribia yaga olivo, ate' tu lubá uva biti' gaca cuía le ribia yaga higo na'. Lësca' caní, nitú ga rilén nisa biti' gaca ila'lén nisa zöna', en nisa siziá'.

Yöl-la' réajni'i le naca idú

¹³Channo zoë' tu bönni' lädjali' rácadë'ë, en réajni'de'enë', lu yöl-la' nöxaj ladxi' queé' ral-la' ulu'ë náquié' caní ni'a que le naca tsahui' runë'. ¹⁴Na'a, channo ruzzé'eli' luzá'ali', en runli' dxin para ila'gú'u bönachi libí'il' yöl-la' ba, biti' ral-la' gun ba zxöön cuinli' ca naca yöl-la' réajni'i queé'li'. Nu run caní rizi' yë', en ridá'baga' le naca idútë li. ¹⁵Yöl-la' réajni'i caní biti' naca le runödzjë' Dios, pero que yödzölió ni naca, enca' quégaca bönachi yödzölió ni, en que tu' xihui'. ¹⁶Yugu' bönni' tu'zxé'enë' luzá'agaquié', en té'ënnë' ila'gú'u bönachi légaquié' yöl-la' ba, lësca' ta'dil-la dídzë'ë, en tunë' yúgu'té le ruá' dö'. ¹⁷Yugu' bönni' nápagaquié' yöl-la' réajni'i na' runödzjë' Dios:

Tunë' le naca idú tsahui', en ta'bözë' dxí'ado'.

Nácagaquié' zxöön ladxi', en nöxaj ladxi'.

Tu'huechi' ládxi'gaquié' bönachi,
en tunë' le naca dxí'a.

Tuz ca tu'chi'a tu'söröe' luzá'agaquié',
en biti' ta'béaj bë'ë luzá'agaquié'.

¹⁸Nupa tu'i ládxi'gaca ila'bequi dxí le raca, ta'böza dxí'ado', para gaca ca' dxí'a idútë le zeaj naca caz.

4

Nupa tun zxöön le nacuá' yödzölió

¹¿Bizx que na' ridíl-lali', en raca didza' bizxaj queéli'? Raca caní queéli' tu' rizé ládxi'li' zián le rizé ládxi'li' tu tulí', en que lë ni na' ridíl-lalenli' luzá'ali'. ²Zián le ruhuídi'li', en tu' cabí rizí'ili' le, que lë ni na' rútili' bönachi. Ruzzé'eli' le dë que luzá'ali', en tu' cabí ridéli'li' le, que lë ni na' rizóa ribö'öli', en ridíl-lali'. Biti' rata' queéli' le rë'ënilí, tu' cabí rinábali'-në' Dios lë na'. ³Sal-la' zoa bi rinábali', biti' bi rizí'ili', tu' cabí naca dxí'a ca rinábali', tu' rë'ënilí lë na' rinábali' para ugunli' le dxin ca raza ládxi'sili'. ⁴Libí'il', bönachi nusanli'-në' Dios, ¿naru' cabí nözili' channo runli' zxöön le nacuá' yödzölió ni, chinuhuöácal' ca nu biti' rilé'e Dios dxí'a? Núti'tës nu rë'ëni gun zxöön le nacuá' yödzölió ni, nihuöáca ca nu biti' rilé'e Dios dxí'a. ⁵Biti' rnñasö ca' le nazúaj lu guichi lá'ayi le rnna: "Dios risö'l-lë'ë Dios Bö' Lá'ayi queéru', Nu zóalen rë'u, ate' Lë' nadxí'inë' rë'u, en rudúli'në' rë'u channo rusanru'-në'."

6 Na'a, zxöntëro le ruzá' ládxë'ë Dios queëru', tu' nazúaj lu guichi lá'ayi le rnna: "Dios ruzágue'ë xinözguequi nupa tun ba zxön cuínguequi, pero ruza' ládxë'ë quégaca nupa nácabaca nönoxaj ladxi." **7** Que lë ni na', guli'sóa nönoxaj ladxi' lahuë' Dios. Guli'nná be'e tu' xihui', ate' uzzunnaj ga zóali'. **8** Guli'gü'i ládx'i'li' sóalenli'-në' Dios, ate' Lë' idisóalenë' libí'ili'. Libí'ili', bönachi dul-la', guli'gaca tsahui', en bíti'rö gunli' dul-la'. Libí'ili', nülöli' reaj bo' ládx'i'do'oli', en chopá le nadxi'ili', guli'gún dxi'a icja ládx'i'do'oli'. **9** Guli'sébi ládx'i'li', en buli'huí'ini, en guli'cödxi. Na'a ruzxídxili, pero ral-la' cödxili'. Rudzéjali', pero ral-la' huí'ini'. **10** Guli'gaca nönoxaj ladxi' lahuë' Xanru', ate' Lë' gunë' ga tsépisëli'.

Biti' ral-la' ichugu bë'ëru' le run luzá'aru'

11 Böchi' luzá'ado', bíti' inneli' que luzá'ali' tulí' ia'tuli'. Nu bönni' rinnë' que böchi' luzë'ë, en rilaga yudxë' le runë', bönni' ni rinnë' que xibá queë' Dios, en ruchi'a rusöröe' le rinná bë' xibá na'. Na'a, channö ruchi'a rusöröu' le rinná bë' xibá na', run cuinu' nu ruchi'a rusöröe' le, en bíti' runu' ca rinná bë' xibá na'. **12** Na'a, tuzë' náquie' Dios, Nu ben xibá na', en náquie' ca' Nu ruchi'a rusöröe' le runru'. Lë cazë' gaca usölë' bönachi o usunítie' bönachi na'. Na'a, ¿núzxite' run cuinu', rilaga yudxu' luzó'o?

Biti' gaca gunru' löza le gaca cuxö huidzaj

13 Na'a, buli'zé nágali', nülöli' rnnañi': "Cuxö huidzaj tséajtu' yödzö ni', ate' sóatu' ni' tu iz, en zián le gó'utu', en úti'tu', ate' caní góata'da' dumí queëtu'." **14** Biti' nözili' bizzi gaca cuxö huidzaj. ¿Nacxi caz naca queëru', tsca zóaru' yödzölió ni? Nácaru' ca böchila le nalá' tu chí'ido'osö, en la' rinítite'. **15** Que lë ni na', caní ral-la' innali': "Channö güë'ennë' Xanru', sóaru' ibanru', en tu ia'tu le gunru'." **16** Na'a, libí'ili', lu yöl-la' run ba zxön queëli' rigú'uli' yöl-la' ba la' cuínsili'. Yúgu'te le caní le runli' zeaj naca le ruá' dö'. **17** Channö nöziru' le naca dxi'a le ral-la' gunru', en biti' gunru' lë na', runru' dul-la'.

5

Santiago rusë'ë ládx'i'gaquie' bönni' dë yöl-la' tsahui' quégäquie'

1 Libí'ili', bönni' rile'eli' yöl-la' tsahui', guli'cödxi, en guli'cödxi'a, tu' si' za' dza ilé'eli' yöl-la' yechi'. **2** Chinaca ditaj yöl-la' tsahui' queëli', ate' chin-utögacaba' le ráculi' bóljado' que. **3** Chinaca que dumí oro, en dumí plata queëli' ca naca que güe' nazón yoni que, ate' yoni que na' naca ca tu le ruzegui libí'ili' didza', ate' gaca queëli' ca tu güi' le usuniti libí'ili'. Caní gaca queëli', tu' busó' butubil' queëzili' yöl-la' tsahui' dza ni zóaru' chiröjsétëgaca. **4** ¡Buli'yútsöca! Yugu' bönni' huen dxin gula'lape' yöla queëli' chita'naba yúdxinë' lázxjagaquie', tu' cabí riguízxjanili' légaquie', ate' lë na' ta'nabë' bönni' huen dxin na' chibidxín didza' na' lahuë' Xanru', ate' Lë' rinná bë' enë' ni'a né'ë guizxi yu. **5** Benlí' ga buné'eli', en güi'i gudágutica'sili' le rnnañö queëli' lu yödzölió ni. Buxón cuinli', pero chizóa idxin dza údxí queëli'. Gaca queëli' ca raca queëba' bëdxí renni', chibú'u dza gútiru'-ba'. **6** Richúguli' quégäquie' bönni' tsahui', en rútili' légaquie', ate' légaquie' biti' ta'dá'baguë'ë libí'ili' cate' rútili' légaquie'.

Cözaru' zxön ladxi', en ulídzaru'-në' Dios

7 Na'a, böchi' luzá'ado', guli'cöza zxön ladxi' ga idxinxrö dza huödë' Xanru'. Buli'yú ca runë' tu bönni' guz gú'una. La yöl-la' riböza zxön ladxi' ribözë' guiöjsiu', en guiöj cusu lin, ate' tödi ni' ulapë', en utubë' yöz zián. **8** Lësca' caní,

libí'ili' na' réajlë'ëli' Cristo, guli'coza zxön ladxi', en buli'tipa ládxilí', tu' chizá' gala' dza huödë' Xanru'. ⁹ Böchi' luzá'ado', biti' innéli' que luzá'ali' tuli' ia'tuli', para cabí ibágalí' xíguia'. ¡Buli'yútsöca! ¡Chirudzaga lo udixiné' Xanru', ate' uchi'a usöröe' le runli'! ¹⁰ Böchi' luzá'ado', buli'yú ca guca quégäquië' bönni' gulu'ë didza' uláz queë' Xanru'. Nácagaquië' ca tu le rulu'i rë'u ca ral-la' qui'i sáca'ru', en cözaru' zxön ladxi'. ¹¹ Na'a, nucuá'aru' légaquië' ca yugu' bönni' guláquië' bica' ba, nupa ni' gula'gui'i gula'zaca'. Chibiyónili' ca benë' Job. Gulözë' zxön ladxi' sal-la' gudí'i guzxáca'dé'e, ate' nözili' ca' ca benë' Xanru' queë' ga búdxitë. Ruhuéchi'da' ládxë'ë Xanru' rë'u, en ruí'i ládxë'ë rë'u.

¹² Böchi' luzá'ado', le nácatérö lo naca lë ni rea' libí'ili': ¡Biti' uzötjali' Nu zoa yehua' yubá, en biti' uzötjali' le nacuá' luyú ni, en biti' uzötjali' bíti'tës bi run tsutsu xtídzalí! Cate' innali' "Ön" ral-la' innásili" "Ön." Cate' innali' "Biti" ral-la' innásili" "Biti." Caní ral-la' gunli', para cabí ibágalí' xíguia' lahuë' Dios.

¹³ Channö rigui'i rizáca' nu dzaga libí'ili', ral-la' ulidza Dios nu na'. Channö zoa nu rudzeja, ral-la' gul-la yöl-la' ba nu na'. ¹⁴ Channö re'e nu dzaga libí'ili', ral-la' ulidza bönni' gula tapa chí'ë böñachi queë' Cristo, para ulu'lídze' Dios, en ila'nábinë' Lë' únë' bönni' huë' na'. Ral-la' ila'gu'ë lë' le za, en ulu'gunë' dxin Lë' Xanru'. ¹⁵ Cate' ulu'lídze' Dios, en ta'yéajlë'ë gunë' Cristo ga huöáquië' bönni' huë' na', ní'irö gunë' Xanru' ga huöásä uzóë', en channö benë' dul-la' bönni' huë' na', Xanru' uniti lahuë' lë'. ¹⁶ Que lë ni na', guli'xóalëpi dul-la' nabágalí' tuli' ia'tuli', en guli'naba que luzá'ali' tuli' ia'tuli' lahuë' Dios para únë' libí'ili', para uruaj yödzöhuë' na' rë'eli'. Le rulidzë' tu bönni' tsahui' Dios, le runë' idú ládxë'ë, nácadá' lesaca'. ¹⁷ Elías, bönni' ni' bë'ë didza' uláz queë' Dios, gúquië' tu bönni' yödzölió ca nácaru' rë'u, pero cate' bulidzë' Dios, en gunábinë' Lë' para cabí galaj guiøj, idú tsonna iz yu' xopa beo' biti' gulaj guiój luyú ni. ¹⁸ Gudödi ni' bulidzë' Dios leyúbölö, ate' böálaj guiój, ate' bunödzaj le gulazë' yugu' bönni' dza ni'.

¹⁹ Böchi' luzá'ado', lë ni ral-la' inözili'. Channö nunbë' nu bönni' dzáguië' libí'ili' le naca idútë li, en richixi riníguinë', ate' zoa nu gun ga ubí'i ládxë'ë bönni' na' richixi riníguinë', ²⁰ nu na' gun ga ubí'i ládxë'ë bönni' dul-la' na' gudë' ga yübölö, usölë' bönni' dul-la' na' lu yöl-la' guti, en gunë' ga uniti lahuë' Dios dul-la' zíán nabágue'ë bönni' na'. ¡Ca' gaca!

DÍDZA'DO' ZÍ'ALÖ BUZÚAJË' PEDRO

Pedro rugapë' Dios nupa ta'dá' Cristo

¹ Neda', Pedro, naca' gubáz nasöl-lé'ë Jesucristo. Ruzúaja' queëli' lu guichi ni, libí'ili' násilasili' zi'tu' gapa dë ládzali', zóali' luyú Ponto, en luyú Galacia, en luyú Capadocia, en luyú Asia, en luyú Bitinia. ² Gurö cazë' Xúziru' Dios libí'ili' ca na' bucözë' dza ni'te, para guéquili' quez queë' lu në'ë Dios Bö' Lá'ayi, en gunli' ca rnna xtídzë'ë Cristo, en gácali' idú tsahui' ni'a que xichönë' Cristo. Rinábida'-në' Dios uzá' ládxë'ë queëli', en gunë' ga soa dxí icja ládxí'do'oli'.

Le rúntica'siru' löza

³ ¡Yöl-la' ba Dios, Xanru' Jesucristo! ¡Lu yöl-la' ruhuéchi' ladxi' zxön queë' bucubë' yöl-la' na'bán queëru' tu' busubanë' Jesucristo lu yöl-la' guti! ¡Lë ni run ga rúntica'siru' löza, ⁴ en gun ga idéli'rú' lë na' rapa chi'ë Dios queëru' yehua' yubá! Lë na' rapa chi'ë Dios, le unödzjë' quégaca böñachi queë', biti' initi, en biti' itëbi, en biti' igula. ⁵ Tu' réajlë'ëli' Lë', lu yöl-la' huáca zxön queë', Dios gun chi'ë libí'ili' cate' idxinrö dza ni' uzí'ili' xibé yöl-la' rusölä idú na' chinupë'ë queëru', en ulu'ë lahu' dza údxi.

⁶ Que lë ni na' rudzéjade'eli', sal-la' na'a ral-la' qui'i sáca'li' tu chí'ido' tu' taca zián le ta'zi' bë' libí'ili'. ⁷ Tu' ruá' rilenli' yugu' lë na' ta'zi' bë' libí'ili', naca bë' naca idú ca réajlë'ëli' Cristo. Lësca' caní rizí' bë' éru' oro, le initi, cate' ruchí'aru' le lu guí'. Que lë ni na', cate' chinazi' bë' yöl-la' réajlë' queëli' Cristo, le nácarö lesaca' ca oro, gaca queëli' yöl-la' zxön, en yöl-la' run bal dza ni' ulu'i lahuë' Jesucristo.

⁸ Libí'ili' nadxí'ili'-në' Cristo sal-la' catu caz bilé'eli' Lë'. Réajlë'ëli' Lë' sal-la' biti' rilé'eli'-në' na'a, ate' rudzéjali'. Yöl-la' rudzeja zxön queëli' le cabí gaca quíxjö'oru' tsca naca, naca idútë li. ⁹ Caní naca, tu' ridéli'li' yöl-la' rusölä que bö' naca cázali', le rata' queëli' tu' réajlë'ëli'-në' Cristo.

¹⁰ Dza ni'te yugu' bönni' gulu'ë didza' uláz queë' Dios bulu'sëde' dxí'ado' ca naca yöl-la' rusölä na' dë queëru' na'a, ate' gulu'ë didza' ca naca le ruzá' ládxë'ë Dios queëru'. ¹¹ Bö' Lá'ayi dzáguië' Cristo buzéajni'inë' zi'atélo bönni' na' gulu'ë didza' uláz queë' Dios, en bulu'ëinë' légaquië' ca ral-la' qui'i sáquë'ë Cristo, enca' ca gaca queë' yöl-la' zxön tödi na'. Que lë ni na' gulu'ë i ládxí'gaquië' ila'nözinë' bátaxi gaca lë ni, en nuzxi na' gaca que lë na' bulu'ëinë' Bö' dzáguië' Cristo légaquië'. ¹² Dios bulu'ëinë' bönni' na' gulu'ë didza' uláz queë' biti' naca tu le ila'lé'enë' légaquië', pero rë'u ni rilé'eri' lë na' gulu'ë didza' que, ate' libí'ili' riyönili' na'a ca naca que. Yugu' bönni' tunë' libán que didza' dxí'a tu'ë didza' que lë ni, ate' zóalen yöl-la' huáca queë' Dios Bö' Lá'ayi légaquië'. Nu na' risö'l-lé'ë Dios zoë' yehua' yubá queëru', ate' të'ennë' gubáz lá'ayi queë' Dios ila'nözinë' ca naca lë na' gulu'ë didza' que dza ni'te.

Dios rulidzë' reë'u para gácaru' lá'ayi

¹³ Que lë ni na', guli'soa ban ladxi', en guli'cözatica'sö bá'ado'. Idú ládxí'li' buli'zxöni ládxí'li' lë na' uzá' ládxë'ë queëli' Dios dza ni' ulu'i lahuë' Jesucristo. ¹⁴ Guli'gún ca rnna xtídzë'ë Dios, en biti' güí'ili' lataj yugu' le rizë ládxí'li' ila'chë' libí'ili' ga yúbólö, ca na' benli' dza ni' biti' núnbe'ënili'-në' Dios. ¹⁵ Ralla' gácali' lá'ayi ca naca yúgu'të le runli', ca na' náquië' lá'ayi Dios, en bulidzë'

libí'ili' para guéquili' queé'. ¹⁶ Lësca' caní nazúaj lu guichi lá'ayi, ca na' gunnë' Dios le rnna: "Guli'gaca lá'ayi, tu' naca' neda' lá'ayi."

¹⁷ Rëli'-në': "Xuztu" cate' rulídzali'-në' Dios, ate' Lë', lëbisö ca ruchi'a rusörö' yúgu'të böñachi tsca naca le núngaca tu tu böñachi na'. Que lë ni na' ral-la' gádxili' Lë' tsanni ni zóali' yödzölió ni, le cabí naca idú ládzali'. ¹⁸ Dios busölé' libí'ili' lu lë na' gúcali' dza ni' cate' benli' ca nácagaca le cá'asö bulu'dödë' xuz xtó'oli' loli'. Nöz quézili' böá'uë' libí'ili', caléga len tu le initi ca naca oro, en plata, ¹⁹ pero len xichönë' Jesucristo le nácatérö' lesaca', tu' budödi cuinë', en gúqui' ca tuba' bö'cu' zxila' nácabá' idú dxí'a, böá'do' tutie'bä' lahuë' Dios para ugúa dul-la'. ²⁰ Dios gurö cazë' Cristo zí'atëlö ca benë' yödzölió ni, ate' dza ni zóaru' na'a benë' ga bulu'i lahuë' para uzí'ili' xibë'. ²¹ Ni'a que le benë' Cristo réajlë'ëli'-në' Dios, busubanë' Lë' lu yöll-la' guti, en benë' ga náquië' lo. Caní naca, réajlë'ëli'-në' Dios, en ruzxöni ládxil'i Lë'.

²² Na'a, chinún cuinli' dxí'a tu' runli' ca rnna le naca idútë li, en naca idú ca nadxí'ili' yugu' böchí' luzá'ali' ta'yéajlé'ë Cristo. Que lë ni na', idú ládxil'i ral-la' idxí'ili' luzá'ali' tulí' ia'tulí'. ²³ Chiböáljalí' leyúbölö, caléga tu' nuzóagaca böñachi tati caz libí'ili', pero nuzóa Nu zoa caz libí'ili', en nájalenli' xtídzë'ë Dios, le naca ban, en le zóatica'sö. ²⁴ Caní naca, tu' nazúaj lu guichi lá'ayi le rnna:

Yúgu'të böñachi nácagaca ca naca guixi'.
Yöll-la' lachi quéguequi naca ca xiyija guixi' na'.

Ribidxi guixi' na', en riguinnaj xiyija,

²⁵ pero xtídzë'ë Dios zóatica'sö.

Didza' ni bidxín queéli' lu didza' dxí'a.

2

¹ Que lë ni na', guli'cá'ana yúgu'të le ruá' dö'. Bítirö si' yé'ëli', en biti' ubéaj dxí'a cuinli' lögaca böñachi. Bítirö uxzé'eli', en biti' innéli' que luzá'ali'.

² Ral-la' së ládxil'i' le naca queé' Dios Bö' Lá'ayi para gálali' ca na' tunbi' bi'i huë'ënido', ta'zé ládxibí' nidxi'. Caní ral-la' gunli' ga idxinxrö dza uláli',

³ channö réquibe'eli' náquië' Xanru' dxí'i ladxi'.

Cristo náquië' ca tu guiöj naca ban

⁴ Guli'biga' ga zoë' Xanru'. Náquië' ca tu guiöj naca ban. Náquië' ca tu guiöj bulu'cá'ana böñachi cá'asö pero naca tu le gurö cazë' Dios le nazáca'térö.

⁵ Lësca' caní, libí'ili' nácali' ca yugu' guiöj nabángaca. Guli'güí' Dios lataj ugunë' libí'ili' dxin, ate' gunë' ga gácali' ca tu yudo' ga soë' Dios Bö' Lá'ayi. Lu yudo' na' gácali' ca bixúz néquiguequinë' quez queé' Dios, ate' lu në'ë Jesucristo gaca udödili' yugu' le runnë' Dios Bö' Lá'ayi queéli' lahuë' Dios, lë na' raza ládxë'ë Dios. ⁶ Que lë ni na' nazúaj ca' lu guichi lá'ayi le rnna:

Rigu'a lu zö'ö yödzö Sión tu guiöj lo squin zö'ö,
le gurö caza' neda', en naca lesaca'.

Nu réajlë' Lë', biti' ichixi inigui.

⁷ Naca guiöj ni queéli' libí'ili' na' réajlë'ëli' Cristo tu le nazáca'da', pero quégaca nupa biti' ta'yéajlé'ë Cristo, naca ca na' nazúaj lu guichi lá'ayi le rnna:
Guïöj na' bulu'zö'ë bönni' tu'cu'ë zö'ö tsolá'alö,
tu' guléquinë' naca cá'asö,
guiöj ni chinaca guiöj lo squin zö'ö.

⁸ Lësca' caní nazúaj lu guichi lá'ayi le rnna:
Guïöj ni gun ga tsöjchégugaca böñachi,

en gun ga tsöjtsö'ögaca.

Le nácatë yöjchégü'gaquië'bönni'biti'ta'yéajlé'ë Cristo, tu'gula'chíxinë'cate'bulu'zóë'xtídze'ë Dios tsöla'alö. Dios bucú'ë légaquië'para ilunë'caní.

Nupa néquiguequi quez queeë' Dios

9 Libí'ili' nácali' bönachi guró cazé' Dios. Yúgu'teli' nácali' bixúz queeë' Bönni' Unná Bé' Lá'ayi. Nácali' ca tu yödzö nequi quez queeë' Dios. Nácali' bönachi que cazé' Dios. Caní nácali' para gaca gunli' libán que le zxön bené' Dios, Bönni'na' bulidzë' libí'ili' para birúajli' ga naca chul-la que dul-la', en guyázali' lu bení' idú queeë'.

10 Zí'atélö biti' gúcali' bönachi queeë' Dios,
pero na'a chinácali' bönachi queeë'.

Zí'atélö cuntu nu buéchi' ladxi' libí'ili',
pero na'a Dios caz ruhuéchi' ládxë'ë libí'ili'.

Zóaru' nabantu' para gunru' ca rë'ënë' Dios

11 Böchi' luzá'ado', nácali' ca bönachi zi'tu', en ridásili' yödzölió ni. Que lë ni na', ráta'yua' lolí', biti' güfí'ili' lataj ila'nná be'e le rizësö ládxí'ili' libí'ili', yugu' le ta'díl-lalen bö' naca cázali'. **12** Guli'gún le naca dxi'a lógaca bönachi biti' núnbe'gaquië' Dios. Caní gaca, channö ulu'zegui libí'ili' didza', en ila'nná tútili' bönachi, gaca ila'lé'e bönachi yugu' le dxi'a runli', ate' dza huödë' Xanru' ila'gu'ë Dios yöl-la' ba ni'a que le naca cázali'.

13 Tu' néquili' queeë' Xanru', guli'gún bal yúgu'të bönni' ta'nná bë'ë, bönni' na' nucuá'agaca bönachi légaquië', sal-la' náquië' bönni' rinná bë'enë' idútë yödzölió, tu' náquië' bönni' lo unná bë', **14** o channö náquië' bönni' rinná bë'enë' tu yödzö, nu na' nuzóë' bönni' lo unná bë' na' para gunë' xíguia' nupa tua' dö', en gunë' bal nupa tun le naca dxi'a. **15** Caní rë'ënë' Dios gunli' para ila'bö' dxië' yugu' bönni' biti' bi nözguequinë', en biti' núnbe'gaquië' Lë', cate' ila'lé'enë' le naca dxi'a na' runli'.

16 Guli'gaca ca yugu' bönni' nazángaquië', pero biti' ugunli' dxin yöl-la' nazán queeëli' para gunli' le ruá' dö'.

Guli'gaca ca yugu' bönni' nadó'ogaquië' queeë' Dios.

17 Guli'gún bal yúgu'të bönachi.

Guli'dxi'i yugu' böchí' luzá'ali'.

Guli'gadxi-në' Dios.

Guli'gún bal bönni' na' rinná bë'enë' idútë yödzölió.

Le gudí'i guzxáquë'ë Cristo ruzéajni'i rë'u ca ral-la' gunru'

18 Nülöli' nácali' bönni' nadó'ogaca, guli'gadxi bönni' xanli', en guli'gún légaquië' bal, calégasö gunli' bal yugu' bönni' xanli' na' nácagaquië' tsahui', en tu'i ládxí'gaquië' libí'ili', pero guli'gún bal ca' yugu' bönni' xanli' na' tu'saca' zi'ë libí'ili' lu dxin runli' quégaquië'. **19** Channö qui'i sáca'li', en biti' bi nabágä'li', ate' guá'ilenli' lë na' tu' réquili' naca ca rë'ënë' Dios, urúajli' tsahui' lahuë' Dios. **20** Na'a, channö ruá'ali' dö', ate' yugu' bönni' yúlahui' ilunë' libí'ili' xíguia', ¿nacxi caz uzí'ili' xibé sal-la' len yöl-la' ribözä zxön ladxi' queeëli' gua'ilenli' lë na' gaca queeëli'? Channö ribözä' zxön ladxi', en ruá'rilenli' le rigu'i rizáca'li', ate' berli' le naca dxi'a, níriö urúajli' dxi'a lahuë' Dios. **21** Dios bulidzë' libí'ili' para qui'i sáca'li' caní, tu' gudí'i guzxáquë'ë Lë' cazé' Cristo uláz queeëli', en buzóë' queeëli' tu le rulu'i libí'ili' ca ral-la' gunli', para qui'i sáca'li' ca na' gudí'i guzxáquë'ë Lë'.

22 Cristo biti' bi dul-la' benë', en catu caz guzxí' yë'ë.

23 Cate' bulu'dídza' yúdxinë' Lë',
biti' butsagui yúdxinë' légaquië'.
Cate' bulu'saca' zi'ë Lë',
biti' buzenë' légaquië' le bach,
pero budödi cuinë' lu në'ë Dios,
Nu na' ruchi'a rusöröë' le runru' ca sa'yéaj.

24 Lë cazë' Cristo guzxi'ë dul-la' queéru' lu idú le naca cazë' cate' ni' gútië' le'e yaga cruz, para gácaru' ca yugu' bönni' nati, para cabirö gunru' dul-la', pero sóaru' ibanru' para gunru' le naca dxi'a. Lë' gúquië' huë' uláz queéru' para huóacarú' rë'u dxi'a. **25** Gúcali' ca yugu' bö'cu' zxila' nanitigacaba', pero na'a budxinli' queë' Cristo, Nu ruyú libíili', en rapa chi'ë bö' naca cázali'. Náquië' queëli' ca tu' bönni' uyú bö'cu' zxila'.

3

Ca ral-la' ilún nupa nutsaga ná'gaca

1-2 Lësca' caní, libíili' nigula, ral-la' gunli' bal bönni' que queëli', en channö cabí ta'yéajlë'ë xtídzë'ë Cristo, ila'yéajlë'ë Lë' cate' ila'lé'enë' le naca dxi'a runli', en ca na' nácali' ba'a ladxi', en runli' légaquië' bal, sal-la' biti' bi didza' ruí'lenli' légaquië' ca naca queë' Cristo. **3** Yöl-la' lachi queëli' biti' naca le zoa láhuisö, tsca rupá'ali' ícjali', en tsca nácacaca le néquini oro nusi' cuinli', en lari' nazáca'da' náculi'. **4** Yöl-la' lachi queëli' ral-la' gaca le yu'u icja ládzi'do'oli'. Yöl-la' lachi le ridiá'tica'sö naca yöl-la' nöxaj ladxi', en yöl-la' ba'a ladxi', le nazáca'da'gaca lahuë' Dios. **5** Lësca' caní guca yöl-la' lachi quégacanu nigula gula'yéaj ládzi'nu Dios, nigula na' gula'cuá'anu dza ni'te. Bulu'zxöni ládzi'nu Dios, en gulunnu bal bönni' que queëgacanu. **6** Caní bennu Sara, tu' bennu ca rnna xtídzë'ë Abraham, bönni' queënu, en bulídzanu lë', gunnánu: "Xan." Libíili' ca' gunli' ca bennu Sara na' channö gunli' le naca dxi'a, en biti' bi gáxdili'.

7 Lësca' caní, libíili', bönni', ral-la' gü'i ládzi'li' nigula que queëli'. Guli'gún légacanu bal, calégasö tu' nöta'gacanu ca yöl-la' nál-la queëli', pero lësca' tu' nadéli'gacanu yöl-la' na'bán na' runnë' Dios queéru', lëbisö ca nadéli'li' libíili'. Guli'gún caní para cabí uzaga' tu' xihui' xinözili' cate' ulídzali'-në' Dios.

Huaguí'i huazáca'ru' sal-la' gunru' le naca dxi'a

8 Ga ruúdxitë, guli'gaca tuz tulí' len ia'tull' yúgu'tëli', en guli'gü'i ládzi'li' luzá'ali' tulí' ia'tull'. Guli'gaca dxi'i ladxi', en zxön ladxi'. **9** Biti' ubíili', cabí guá'ali' dö' que nu ruá' dö' queëli', en biti' utsaga yúdxili' nu rutsaga yudxi libíili', pero caní ubíili', inábili'-në' Dios gunë' ga gaca bica' ba nu na', tu' bulidzë' Dios libíili' para gácali' bica' ba. **10** Caní naca le nazúaj lu guichi lá'ayi le rnna:

Nu bönni' rë'ënë' uzi'ë xibé yöl-la' na'bán queë', en cioè' dxi'ado', ral-la' ucá'anë' didza' xihui', en cabirö si' yë'ë.

11 Ral-la' ucá'anë' le ruá' dö', en gunë' le naca dxi'a.

Ral-la' gü'i ládxë'ë cioè' zxön ladxi', en gúntica'së' caní,

12 Xanru' rapa chi'ë yugu' bönni' tsahui'

en ruzé náguië' le tu'lidzë' Lë',

pero ruzágüë'ë xinözguequi nupa tua' dö'.

¹³ ¿Nuzxi caz guá' dö' queéli' channö ruí'ládxí'lí' gúntica'sili' le naca tsahui'? ¹⁴ Sal-la' quí'i sáca'li' cate' runli' le naca tsahui', gácali' bica' ba. Cuntu nu gádxili', en biti' ubi uguí'ili' ¹⁵ pero buli'zxöni ládxí'lí'-në' Cristo, en güí'ilí' Lé' lataj inná bé'enë' lu icja ládxí'do'oli'. Guli'sóa sina' quirjöi'ili' yugu'té nupa ila'nabi libí'ili' bizx que runli' löza Cristo, en gunli' lë ni lu yöl-la' nöoxaj ladxi' queéli', en lu yöl-la' run bal nupa na'. ¹⁶ Guli'gúntica'sö le naca dxi'a lahuë' Dios, en channö nacuá' nupa ta'nnë xihui' que le naca tsahui' runli' tu' réajlé'eli' Cristo, ni'irö ulu'tu'i tu' nözi le ta'nnë queéli'. ¹⁷ Channö quí'i sáca'li', dxí'arö gaca channö naca tu' runli' le naca dxi'a, en caléga tu' ruá'ali' dö', channö Dios rë'ënë' qui'i sáca'li' caní.

¹⁸ Lé cazé' Cristo gudí'i guzxáquë'ë, en gútië' uláz queéru' para bugüüe' dul-la' nabága'ru'. Lé' náquië' dxi'a, pero gútië' ni'a queéru', yugu' bönni' dul-la'. Caní benë' para bunë' re'u tuz len Dios. Lu yöl-la' bönnachi queé' gútië' pero lu bö' naca cazé' ni zoë' nabanë' lu le cubi le naca cazé'. ¹⁹ Lu bö' naca cazé' guyijë' yöjenë' libán lögaca bö' nadzúngaca. ²⁰ Bö' ni gulaca cazé' yugu' bönni', dza ni'te gula'dá'bagüüe'ë xtídzë'ë Dios, dza ni' zoë' Noé, cate' ni' gulözë' Dios lu yöl-la' riböza zxön ladxi' queé', en biti' busíidxë' légaquïë', tsanni ni' benë' Noé barco zxön na'. Lé'e barco na' bulu'lá nabábasö bönnachi lu nisa. Gulaca xunu'bönnachi, bönni', en nigula. ²¹ Nisa ni' naca tu le rulu'i ca naca nisa ga na' ridílaru' nisa, le naca bë' nuláru' lu yöl-la' guti tu' bubanë' Jesucristo lu yöl-la' guti. Lé na' ridílaru' nisa biti' naca tu le run dxi'a le nácaru' láhuisö, pero rulu'i rui'i ládxí'ru' gaca dxi'a icja ládxí'do'oru' lahuë' Dios. ²² Jesucristo bubenë' yehua' yubá, ga na' yöjchö'ë cuita lë'ë ibëla Dios, en rinná bë'enë' yugu' gubáz lá'ayi, en nupa ni' ta'nná bë', en nupa nadéli'gaca yöl-la' zxön.

4

Ral-la' ugurru' dxin yöl-la' huáca queé' Dios para gunru' xichinë' Cristo

¹ Que lë ni na', ca na' gudí'i guzxáquë'ë Cristo lu le naca cazé', lësca' libí'ili' ral-la' soa cozali' qui'i sáca'li'. Nu na' rigu'i rizáca'a tu' da' le naca tsahui' chibucá'ana dul-la'. ² Na'a isí lo, ral-la' gúntica'sili' ca rë'ënë' Dios, en caléga ca rizësö ládxí'lí' lu yöl-la' bönnachi queéli'. ³ Tsca'ti' gaz le chibenli' chibenli'. Bíti'rö gunli' ca na' tun nupa biti' núnbë'gaca Dios. Dza ni'te benli' yugu' le cabí ral-la' gunli'. Guzé ládxí'lí' le ruá' dö'. Guzúdxili'. Gudödi bë' gü'i gudáguli', en guyéaj ládxí'lí' budó' guiöj budó' yaga, le rigútinë' Dios. ⁴ Na'a, tu'báninë' bönni' tunë' caní tu' cabirö runli' tsözxön légaquïë' cate' tunë' le ruá' dö' caní, en que lë ni na' tu'tsaga yúdxinë' libí'ili'. ⁵ Légaquïë' run bayudxi ulu'lui'i cuíngaquïë' lahuë' Dios, ate' Lé' chizóa uchi'a usöröë' nupa nabángaca, en nupa chinatigaca. ⁶ Que lë ni na' guca libán que didza' dxi'a lögaca nupa chinatigaca, nupa na' Dios buchi'a busöröë' löguequi cate' ni' gula'cuá' yödzöliö ni, ca na' ruchi'a rusöröë' yúgu'té bönnachi. Guca libán löguequi para ila'cuá' lu yöl-la' na'bán lu bö' nácagaca caz, ca na' zoa cazé' Dios lu yöl-la' na'bán.

⁷ Chizóa idxín dza údxi que yúgu'té le dë. Que lë ni na', guli'gaca ba'a ladxi', en buli'subán ládxí'lí' para gaca ulídzali'-në' Dios. ⁸ Tu' runtè bayudxi, guli'dxi'ili' luzá'ali' tulí' ia'tuli', ate' channö dzágali' lu yöl-la' nadxi'i, gácali' sina' uniti lolí' yugu' luzá'ali' tua' dö' queéli'. ⁹ Guli'gü'i lataj ila'cuá' böchi' luzá'ali' lídxili', en biti' innëli' quégaquïë'. ¹⁰ Ral-la' ugurru' dxí'ado' dxin yugu' le buzá' ládxë'ë Dios queéli', en gácalenli' luzá'ali' tulí' ia'tuli'. ¹¹ Nu bönni' runë' ba nalí, ral-la' gunë' ba nalí que xtídzë'ë Dios, ate' nu bönni' runë' xichinë' Cristo, ral-la' ugurri' dxin yöl-la' huáca na' runnë' Dios queé', ate' ni'a que yúgu'té le

runli', gaca yöl-la' ba queë' Dios ní'a que le nunë' Jesucristo. ¡Gácatica'sö queë' Dios yöl-la' ba, en yöl-la' unná bë! ¡Ca' gaca!

Le ila'gu'i ila'zaca' böñachi ta'yéajlé' Cristo

¹² Böchi' luzá'ado', biti' ubánili' tu' nözi le ta'zí' bë'da' libí'ili'. Biti' naca tu le cabí núnbe' gaca böñachi. ¹³ Guli'dzéjade'e tu' dë lataj queëli' gunli'-në' tsözxön Cristo lu le rigu'i rizáquë' è Lë' ní'a que böñachi queë' para gaca udzéjal' ca' dza na' huödë' Cristo, cate' ilé' eli' yöl-la' zxön queë'. ¹⁴ Channö tu'dzaga yudxi böñachi libí'ili' tu' dä'ali' Cristo, bica' ba libí'ili', tu' naca bë' zóalenë' Dios Bö' Lá'ayi libí'ili', Nu na' za' yehua' yubá. Böñachi yödzölió ni tu'dzaga yudxi Lë', pero libí'ili' runli'-në' bal. ¹⁵ Channö rigu'i rizáquë' è nu bönni' dzáguië' libí'ili', ral-la' gaca caní tu' dë'è Cristo, en caléga tu' rútië' böñachi, o ribanë', o ru'ë dö', o tu' yöjgútsë' è ga yúbölö. ¹⁶ Na'a, channö núlöli' rigu'i rizáca'li' tu' dä'ali' Cristo, biti' ral-la' utu'ili', pero guli'cu'è Dios yöl-la' ba tu' nazí' lali' böñachi queë' Cristo.

¹⁷ Chibidxín dza isí lahuë' Dios uchi'a usöröë' böñachi rö queë'. Channö zí'alö uchi'a usöröë' rë'u, ¿náxitérö gaca quégaca nupa biti' túngaca ca rnna didza' dxí'a queë' Dios? ¹⁸ Channö naca böñiga ulu'lágaca nupa tun le naca dxí'a, ¿náxitérö gaca quégaca nupa ta'dá'baga' Dios, en tun dul-la'? ¹⁹ Caní naca, yugu' bönni' ni ta'gu'i ta'zaquë' è tu' rë'ënë' Dios gaca caní, ral-la' ilúntica'së' le naca tsahui', en ulu'dödë' bö' nácagaca cazë' lu në' è Dios, tu' ben cazë' Lë' légaquië', en runë' ca rnna xtídzë' è.

5

Pedro ruzéajni'inë' nupa ta'yéajlé' Cristo

¹ Na'a, ruzéajni'ida' libí'ili', bönni' gula tapa chí'ili' nupa néquiguequi queë' Cristo, tu' naca' neda' ca' bönni' gula ca nácali' libí'ili', en bilé'eda' le gudi'i guzxáquë' è Cristo, ate' guna' ca' tsözxön libí'ili', uzí'iru' xibé yöl-la' zxön na' ilá' lahu. ² Guli'gaca ca bönni' tu'yü'ë' bö'cu' zxila', gun chí'ili' böñachi na' Dios gulu'ë lu ná'ali'. Guli'gún caní idú ládxí'li' ca rë'ënë' Dios, en caléga tu' run bayudxi queëli', o tu' rizé ládxí'li' dumí. Guli'gún xichinli' tu rë'ënisisli', ³ en caléga tu' rë'ënili' inná bé'esili' nupa na' nagu'ë lu ná'ali'. Guli'gü'í ládxí'li' gácali' tu le ruluf'i ca ral-la' ilaca nupa na' run chí'ili'. ⁴ Caní naca, cate' ului'i lahuë' Cristo, bönni' lo uyú bö'cu' zxila', idéli'li' tu le uzí'ili' xibé le catu caz inititi.

⁵ Lësca' caní, bi'i cui'di', guli'gún ca ta'nnë' yugu' bönni' gula. Yúgu'téli' ral-la' gunli' bal luzá'ali', tulí' ia'tulí', lu yöl-la' nöxaj ladxi' queëli', tu' nazúaj lu guichi lá'ayi le rnna:

Dios ruzágü'ë xinözguequi nupa tun ba zxön cuínguequi pero rácalenë' nupa nácagaca nöxaj ladxi'.

⁶ Guli'sóá nöxaj ladxi' lu në'è Dios, ate' Lë' uchisë' libí'ili' cate' izá'a dza.

⁷ Guli'cú'u yúgu'rë le run ga ruúbi rugu'i'li' lu në'è Dios, tu' ru'i'ládxë' libí'ili'.

⁸ Guli'gaca ba'a ladxi', en buli'subán ládxí'li', tu' zoa tu' xihui', nu biti' rilé'e libí'ili' dxi'a, ridá idú gásibi'ilö, en naca ca tuba' bëdxí guixi' ribödxí'aba', riguiljba' nu gáguba'. ⁹ Guli'gaca tsutsu ca réajlé'eli' Cristo, en guli'zág'a xinözä tu' xihui', tu' nözili' ta'gu'i' ta'záquë' è böchi' luzá'ali' idútë yödzölió ni ca na' rigu'i' rizáca'li' libí'ili'. ¹⁰ Ní'irö' cate' chigudí'i guzxáca'li' tu chí'isö, Dios gunë' ga gácali' idú tsahui', en ga gácali' tsutsu, en ga gálali', en ga sóali' tsaz. Lë' cazë' Dios ruzá' ládxë' è queëru' yúgu'të le ruzí'iru' xibé, en bulidzë' rë'u

para uzí'iru' xibé yöl-la' zxön queë' le zóatica'sö tu' nácaru' tuz len Jesucristo.
11 ¡Gácatica'sö yöl-la' ba, en yöl-la' unná bë' queë' Lë! ¡Ca' gaca!

Pedro ruzenë' didza' nupa ta'dá' Cristo

12 Dídz'a'do' ni ruzúa'ja' queëli' lu guichi lu në'ë Silvano. Réquida' náquië' bôchi'ru' idú ladxi'. Rë'ënda' utipa' ládx'i'lí, en runa' ba nalí loli', le nácatë lë ni naca le ruza' ládxë'ë queëru' Dios. ¡Guli'gaca tsutsu tu' ruzí'ili' xibé lë ni!

13 Yugu' bönachi queë' Cristo nacuá' Babilonia tu'gapa Dios libí'ili'. Dios gurö' caze' lèguequi ca na' guröe' libí'ili'. Lësca' bi'i Marcos rugápabi' Dios libí'ili'. Nácabí' ca zxí'ini caza'. **14** Guli'gapa Dios luzá'ali' tulí' ia'tulí', en lu yöl-la' nadxi'i queëli' luzá'ali' unídali' luzá'ali' tulí' ia'tulí'.

Rinábida'-në' Dios gunë' ga soa dxi icja ládx'i'do'oli', yúgu'tëli' na' néquili' queë' Jesucristo. ¡Ca' gaca!

DÍDZA'DO' BUROPI BUZÚAJË' PEDRO

Pedro rugapë' Dios nupa ta'dá' Cristo

¹ Neda', Simón Pedro, naca' huen dxin queë' Jesucristo, en gubáz nasöllé'ë Lë'. Rugapa' Dios libí'ili', réajlé'ëli'-në' Jesús. Lëbisö ca nazáca'gaca yölla' réajlé' queëli' Lë', en yöl-la' réajlé' queëtu' Lë'. Dios benë' ga réajlé'ëli' Lë' tu' naca cazë' tsahui', en tu' náquië' ca' Xanru' Jesucristo, Nu na' rusöla rë'u, tsahui'. ² Rinábida'-në' Dios gunë' ga gata' queëli' idútë le ruzá' ladxë'ë queëru', en gunë' ga soa dxi icja ládx'i'do'oli' tu' núnbeë'ëli'-në' Dios, enca' Xanru' Jesús.

Le nácagaca nupa ta'yéajlé' Cristo

³ Lu yöl-la' huáca zxön queë', Dios chibennë' queëru' yúgu'të le riquíniru' para gata' queëru' yöl-la' na'bán idú, en para gácaru' ba'a ladxi', tu' núnbeë'ëru' Nu na' bulidza rë'u para gata' queëru' yöl-la' zxön queë', en le naca tsahui' queë'. ⁴ Tu' runë' caní, benë' ga gaca uzí'iru' xibé yugu' le zxön, en le naca tsahui' guzxi' lu në'ë gunne' queëru', ate' tu' naca caní nuláru' lu le ruá' dö' raca yödzölió ni tu' ta'zë ládx'i'gaca böñachi le cabí naca tsahui'. Nuláru' para gácaru' ca náquië' Lë cazë' Dios. ⁵ Que lë ni na':

Channö réajlé'ëli' Cristo,

guli'gü' ládx'i'li' gácali' dxi'i ladxi'.

Channö chinácali' dxi'i ladxi',

guli'gü' ládx'i'li' gata' ca' queëli' yöl-la' rácada'.

⁶ Channö nápalí' yöl-la' rácada',

guli'gü' ládx'i'li' inná be'e cuinli'.

Channö rinná be'e cuinli',

guli'cöza zxön ladxi'.

Channö ribözali' zxön ladxi',

guli'sóa ba'a ladxi'.

⁷ Channö zóali' ba'a ladxi',

guli'dxi'i luzá'ali'.

Channö nadxi'ili' luzá'ali',

guli'dxi'i ca' yúgu'të böñachi.

⁸ Channö caní runli', en zeaj rácarö idú ca runli' caní, lë ni gun ga biti' gaca nítisö yöl-la' réajlé' queëli' Lë', ate' tseaj gácarö idú ca núnbeë'ëli'-në' Xanru' Jesucristo. ⁹ Nu bönni' biti' ruí'ládxë'ë gunë' caní, náquië' ca tu bönni' nachul-la nanitië', tu' chizá' ral-la ládxë'ë bunë' Cristo lë' tsahui', en bugüë' yugu' dul-la' gubágüë'ë zí'atélö. ¹⁰ Que lë ni na', böchi' luzá'ado', ral-la' güí'itérö ládx'i'li' guéquibe'ëli' bulidzë' Dios libí'ili', en gurö cazë' libí'ili'. Channö gunli' caní, biti' ca' ichixi iníguali'. ¹¹ Caní gaca, idú ládxë'ë Dios gúnnasë' queëli' lataj tsázali' ga inná bë'tica'së' Xanru' Jesucristo, Nu rusöla rë'u.

¹² Que lë ni na' gúntica'sa' ga tsöjnél' yugu' lë ni sal-la' chinöz quézili' le, en rugunli' dxin le naca idútë li na' chiguzxi' lu ná'ali'. ¹³ Runi neda' ral-la' usubana' ládx'i'li' ca nácagaca lë ni tsanni ni zoa' nabana'. ¹⁴ Ral-la' guna' caní tu' nözda' si' gátia'. Xanru' Jesucristo chigudxi cazë' neda' gaca caní quia'. ¹⁵ Que lë ni na' ruí'ida' ládx'a' guna' ga tsöjnética'sili' yugu' lë ni tödi gátia'.

Nupa bila'lé'e yöl-la' zxön queë' Cristo

16 Biti' bě'lentu' libí'ili' tu didza' ridasö lu yöl-la' sina' queëtu', cate' buzéajni'itu' libí'ili' ca ral-la' idxín dza huödë' Xanru' Jesucristo, napë' yöl-la' unná bë' zxön. Netu' bilé'e quézitu' yöl-la' zxön queë'. **17** Bile'etu' Lë' cate' Xúziru' Dios benë' Lë'bal, en bë'ë Lë' yöl-la' zxön, ate' biyön chi'ë Dios, le birúaj lataj bení' queë', cate' gunnë': "Bönni' ni náquië' Zxi'ina'. Nadxi'ida' Lë', en raza ládex'a' Lë'." **18** Netu' biyön quézitu' chi'ë na' le birúaj yehua' yubá cate' ni' guzóalentu'-në' Xanru' lu guí'a lá'ayi na'.

19 Lë' na' guca, naca bë'da' zeaj nácatë didza' gulu'ë yugu' bönni' uláz queë' Dios, ate' ral-la' güf'i láxzi'li' didza' na', tu' naca ca tu guí' ruzení' tu ga naca chul-la ga idxitnë dza uzení' lu icja láxzi'do'oli' Nu na' naca ca bólaj hui sila queëru'. **20** Lë ni runda' bayudxi tséajni'ili': Cuntu nu bönni', rácasö queë' biti' gaca tséajni'inë' didza' bë'ë tu bönni' uláz queë' Dios. **21** Yugu' didza' gulu'ë yugu' bönni' uláz queë' Dios biti' ca' gulu'ë tu' gulé'ëni quézinë', pero gulu'ë didza' uláz queë' Dios le guchízië' Dios Bö' Lá'ayi icja láxzi'do'gaquië'.

2

Ca nácagaca nupa tu'sédinë' le cabí nácatë

1 Yugu' bönni' ta'zí' yë'ë gula'cuá'lenë' bönnachi Israel, en gula'nnë' nácagaciüi' bönni' tu'ë didza' uláz queë' Dios. Lësca' caní yugu' bönni' ila'zí' yë'ë ila'cuá'lenë' libí'ili', en ulu'sédinë' libí'ili' le cabí nácatë. Lu yöl-la' sina' quégaciüi' ulu'sédinë' libí'ili' xibá quégacase' le gun ga soa bönnadxi queëli' ucá'anali' le naca idútë li. Ila'dá'bague'ë ca' Xanru', Nu busölá rë'u. Le ilunë' gun ga usunítië' Dios légaquië'. **2** Zianli' libí'ili' gunli' légaquië' tsözxön lu le ruá' dö' ilunë', ate' tu' gunli' bál-lali' caní ila'nnë xihui' bönnachi que didza' dxi'a le naca idútë li. **3** Lu yöl-la' ruhuidi' quégaciüi' ulu'sédinë' libí'ili' le cabí nácatë, para gata' quégaciüi' dumí queëli'. Chinarugu quégaciüi' bönni' ni, ate' naca löza ila'nítii' tsaz.

4 Dios biti' buniti lahuë' yugu' gubáz lá'ayi queë' na' gulinë' dul-la', pero gurú'unë' légaquië' lataj chul-la. Nágagaquië' du guíë ga naca chul-la na', ga na' ta'bözë' dza usiúdxë' Dios légaquië'. **5** Lësca' caní, biti' buniti lahuë' bönnachi gula'cuá' dza ni'te cate' gusöl-lé'ë nisa guiöj le busuniti yödzölió le beti bönnachi nácagaca xihui', pero busölë' Noé lu nisa na', bönni' ni' benë' libán que le naca tsahui'. Dios busölë' ca' ia'gadxi di'a dza queë' Noé na' lu nisa. **6** Lësca' caní, Dios guchúguië' quégaca bönnachi gula'cuá' yödzö Sodoma, en yödzö Gomorra. Busuniti' léguequi lu guí', ate' bulu'huóaca dö. Le guca quéguequi naca tu le rului'i le run gadxi nupa tua' dö'. **7** Cate' busuniti' yugu' yödzö na', Dios busölë' Lot, tu bönni' tsahui', lu guí' na'. Bu'sinida' ládxë'ë Lot cate' bilé'enë' le xihui' gulún bönnachi tuá' dö' na'. **8** Caní guca, tu' guzóalenë' bönni' tsahui' na' léguequi, ate' bilé'enë', en biyönnë' le ruá' dö' na' gulúngaca, ate' tu' gúquië' tsahui' gusëbiládxë'ë yúgl'të dza ni'a que yugu' le cabí naca tsahui' gulúngaca. **9** Caní naca, Xanru' nözine' usölë' nupa na' tadxi Lë'lu na' nu run ga tsázagaca bönnachi nöza dul-la', pero nucözë' xíguia' gunë' nupa biti' nácagaca tsahui' ga idxinrö dza ichúguië' quéguequi ila'niti tsaz.

10 Ichúguda'aró quégaciüi' bönni' ni tunë' yugu' le ta'zé ládxë'ë le ruá' dö', en ta'dá'bague'ë yöl-la' unná bë' queë' Xanru'. Nácagaciüi' rugu ladxi', en zidi ladxi'. Biti' tádxinë' tu'lidza ditjë' gubáz lá'ayi ta'dé'lu bení'. **11** Gubáz lá'ayi na' nápagacatëre' yöl-la' unná bë', en yöl-la' huáca ca yugu' bönni' na', pero gubáz lá'ayi na' biti' tu'huázzjanë' nu ulu'zéguë' didza' lahuë' Xanru'.

¹² Yugu' bönni' ni nácagaquië' ca böa' guixi', biti' bi ta'yéajni'iba', pero náljagacaba' para nu sön légacaba', en guti légacaba'. Ta'nné xihuë'ë que le cabí ta'yéajni'iné', ate' ila'nitië' tsaz ca raca quégacaba' böa' guixi' na'. ¹³ Dios ubi'ë quégacabi' le ila'gu'i ila'záquë'ë, tu' bulu'saca' zí'ë bönachi. Téquiné' naca xibágacië' tu'zi'ë xibé le raca na'a dza. Nácagaquië' ca tu huë' nudzu', en tu le run ditaj cate' ni' tahuë' tsözxón len libi'ilí, ate' tu'dzéjanë' tu' ta'zí' ye'enë' libi'ilí.

¹⁴ Lu yöl-la' rizë ladxi' quégacabi' le ruá' dö' tu'yüë'-nu yugu' nigula. Biti' nacu'ë dxisö túngaquië' dul-la'. Túngaquië' ga ta'chixi ta'nigui nupa biti' nácagaca tsutsu ca ta'yéajlë' Cristo. Ta'guíjatica'së' yugu' le tu'huídi'në'. Dios chinuchúguië' quégacabi' ilátigaquië'. ¹⁵ Bulu'ca'anë' le naca idútë li, ate' nachul-la nanitigaquië'. Tunë' ca benë' Balaam, zxí'inë' Beor, bönni' ni' bidxi'inë' dumí, ate' benë' le ruá' dö' tu' nazxjë'. ¹⁶ Dios buzenë' le bach Balaam na' tu' benë' le ruá' dö' na'. Tuba' bürrodo' bë'lenba' lë' didza' ca na' tu'i didza' bönachi, ate' buzága'ba' xinözë' Balaam ga na' sa'yéajë' lu yöl-la' ridá'baga' queë'.

¹⁷ Nácagaquië' bönni' ni ca tu buduá' chibui' nisa que, enca' ca tu böaj le richë' bö' budunu'. Chinabá'a xilátjagaquië' lataj chul-la'. ¹⁸ Caní nácagaquië' tu' tu'ë didza' yugu' le zxön lu yöl-la' biti' bi nözi quégacabi', en tu'gunë' dxin yugu' le ta'zé ládx'i'gaca bönachi le ruá' dö', en tunë' ga ta'chixi ta'nigui nupa si' bulu'lá ladaj nupa nácagaca chul-la niti. ¹⁹ Te' bönachi ila'deli' yöl-la' rusölä, pero légaca cazë' nadzúngacabi', en tunë' bayudxi le ruá' dö'. Nadzúngacabi' yugu'të bönni' lu na' bi rinná be'e icja ládx'i'do'gaquië'. ²⁰ Channö bulu'lé' lu le cabí naca tsahui' nacuá' yödzölió ni tu' gulúnbe'ë Xanru' Jesucristo, Nu rusölä rë'u, ate' ní'irö ta'röli le cabí naca tsahui' na' légaquië' leyúbölö, en ta'nná be'e légaquië', le nácatë nabága'gacatérë' xíguia' ga röjetë ca le gula'bágue'ë zí'alö. ²¹ Dxi'arö gaca quégacabi' la'tu' catu caz ilúnbe'ë Nu ruzúa rë'u nöza tsahui' ca le gaca quégacabi' channö gulúnbe'ë Lë', ate' ní'irö bulu'ca'anë' xibá lá'ayi bë'ë Dios quégacabi'. ²² Chibudxi' quégacabi' didza' na' rnna: Ruhuécaba' bö'cu', ruhuöáguba' le si' gúbabá'. Ruyázaba' cuchi na' si' gudíbiru'-ba' lu guna'.

3

Naca löza huödë' Xanru'

¹ Didza' ni naca le buropi ruzúaja' queëli' lu guichi, böchi' luzá'ado'. Lu irópatë guichi na' ruí'i ládx'a' usubana' ládx'i'li' ca nácagaca lë ni. ² Guli'tsöjnë yugu' didza' gulu'ë bönni' queë' Dios zí'atëlö, ca gulu'ë didza' uláz queë'. Guli'tsöjnë ca' xibá na' Xanru', Nu rusölä rë'u, gunná bé'enë' rë'u, lë na' bulu'sédinë' bönni' gubáz nasöl-lë'ë Lë' libi'ilí.

³ Ral-la' tsöjnélí' lë ni naca lo. Dza tsösétëgaca ulu'lui' lahuë' bönni' ilunë' le ta'zé ládxë'ë le ruá' dö'. ⁴ Ulu'titjë', ila'nné': "Gazxi caz lë na' guzxí' lu në'ë Cristo? Gunnë': Huöda' leyúbölö. Dza ni'te cate' gulátië' xuz xtó'oru', yugu'të raca tuz ca guca cate' gusí lo rata' yödzölió ga ridxitë na'a dza." ⁵ Tu'zóë' tsölá'alö le guca dza ni'te. Bë'ë didza' Dios, ate' gulata' lúzxiba, en luyú. Birúaj luyú na' lu nisa ate' zoa gatsaj láhu'lö nisa. ⁶ Len nisa ca' busunítë' Dios yödzölió dza ni'te cate' ni' gusö'l-lë'ë nisa guiój le beti yugu' bönachi dul-la'. ⁷ Lúzxiba, en yödzölió ni le nacuá' na'a dza, Dios nucu'ë léguequi ga idxinxrö dza usunítë' léguequi lu guí'. Caní gaca tu' gunnë' caní Dios caz. Uzégu'ë léguequi dza ni' ichúgu'ë quégacaba bönachi biti' nácagaca tsahui' gátigaca.

⁸ Biti' gal-la ládxí'li' lë ni, böchi' luzá'ado'. Tu dza naca queë' Xanru' ca zián gayuá' iz, ate' zián gayuá' iz nácagaca queë' ca tu dza. ⁹ Biti' ridzenë' Xanru' gunë' le guzxi' lu né'ë gunë'. Téquiguequi bal-la böñachi ridzenë', pero ribözë' zxön ladxi', en ruá' rilenë' rë'u tu' cabí rë'ënë' initi nitú böñachi, pero rë'ënë' ulu'bí'i ládxí'gaca yúgu'të böñachi.

¹⁰ Tsálido'os idxín dza huödë' Xanru' ca ridxinë' tu bönni' gubán chi'i dzö'ölö. Lu dza na' huadödi que lúzxiba len tu bö' zxön. Ila'niti yúgu'të le nacuá' lu gui' zxön. Ila'yegui yödzölió ni, en le nacuá' yödzölió ni.

¹¹ Channó caní gaca, ila'niti yúgu'të lë ni, ¿bizxi caz ral-la' gunli? Ral-la' gácali' ba'a ladxi', en udödi cuinli' lu né'ë Dios. ¹² Ral-la' ciòzali' dza huödë' Xanru', en gü'i ládxí'li' gunli' ga idxinxrö bayön dza ni' cate' initi lúzxiba, ate' ila'niti yúgu'të le nacuá' ni lu gui'. ¹³ Caní gaca, pero rë'u ribözaru' le guzxi' lu né'ë Dios. Gunë' tu lúzxiba cubi, en tu luyú cubi ga ni' soa le naca tsahui'.

¹⁴ Que lë ni na', böchi' luzá'ado', tsanni ni ribözali' yugu' lë ni, guli'güi' ládxí'li' gácali' idú tsahui' lahuë' Dios, ate' gunli' ga cuntu nu bi gaca inné' queëli', en ciòzali' dxí'ado' cate' idxinxrö dza ni'. ¹⁵ Ral-la' inözili' ribözë' Dios zxön ladxi' para gata' quégaca böñachi lataj ulu'lágaca, ca na' gunné' ca' böchi'ru' Pablo. Buzúajë' queëli' lu guichi, zóalen lë' yöl-la' réajni'i na' bë'ë Xanru' queë'. ¹⁶ Yúgu'të lu guichi ruzúajë', ru'ë didza' ca nácagaca lë ni, sal-la' nútsa'gaca ca' léguequi yugu' didza' nácagaca böñiga tséajni'iru'. Yugu' didza' caní tu'chíxinë' bönni' biti' nözguequinë', en bönni' biti' naca idú ládxí'gaquië'. Lësca' caní tunë' quégaca ia'bal-la didza' nazúajgaca lu guichi lá'ayi, le gun ga usunítië' Dios légaquië'.

¹⁷ Chinöz quézili' lë ni, böchi' luzá'ado'. Que lë ni na' guli'gún chi'i cuinli', para cabí ila'zi' ye'e böñachi biti' nácagaca tsahui' libí'ili', en para cabí ilún ga tseaj bö' icja ládxí'do'oli' ca réajlë'ëli' Cristo. ¹⁸ Guli'güi' ládxí'li' gácarö idú ca núnbe'ëli'-né' Xanru' Jesucristo, Nu rusólä rë'u, ate' ruzí'ili' xibë'. ¡Yöl-la' ba Lë' na'a dza, en yúgu'të dza za'gaca! ¡Ca' gaca!

DÍDZA'DO' ZÍ'ALÖ BUZÚAJË' JUAN

Didza' nabániru'

¹ Rusiyöntu' libí'ili' ca naca queë' Bönni' na' zoa cazë' dza ni'te, le biyöntu' bë'ë didza', en le bilé'etu' ca naca queë', en le buyutu' benë' Bönni' na'. Gudantu' Lë'. Bönni' ni náquië' Jesús, lë' ca' Didza' Nabánigaca Bönachi. ² Bönni' na' nabánigaca bönachi buluí'lahuë', ate' bilé'etu' Lë'. Runtu' ba nalí queë', en ruluí'itu' libí'ili' ca naca queë' Bönni' na' nabániru'. Bönni' ni guzóalenë' Dios Xuz, en chibudulu'i lahuë' ga zóaru'. ³ Le bilé'etu', en le biyöntu' rusiyöntu' libí'ili' para gácali' ca' libí'ili' tuz len netu'. Le nácatë naca yöl-la' tuz queëru' len Dios Xuz, enca' len Jesucristo Zxi'iné' Dios. ⁴ Ruzúajtu' queëli' lu guichi lë ni para gaca udzéjaru' idú ládxi'ru'.

Dios náquië' bení'

⁵ Lë ni naca didza' biyöntu' bë'lenë' Jesús netu', ate' le rusiyöntu' libí'ili'. Caní rnna: Dios náquië' bení', ate' nitú le naca chul-la que dul-la' biti' zóalen Lë'. ⁶ Channö innaru': "Nácaru' tuz len Dios", pero channö runru' le naca chul-la que dul-la', lë ni naca bë' rizí' yé'érü', en biti' runru' le naca idútë li. ⁷ Na'a, channö runru' le naca tsahui', en ridaru' lu bení' ca na' Lë' náquië' tsahui', en zoë' lu bení', nácaru' tuz turu' len ia'turu', ate' xichönë' Jesucristo, Zxi'iné' Dios ruún rë'u dxi'a, en rugúa yúgu'të dul-la' nabága'ru'.

⁸ Channö rnnaru': "Biti' bi dul-la' runru'", rizí' yé'érü' la' cuínsiru', en biti' nazí' lu ná'aru' le naca idútë li. ⁹ Channö ixálépiru' lahuë' Dios dul-la' nabága'ru', Lë' runë' ca rnnë', en náquië' tsahui'. Uniti lahuë' dul-la' nabága'ru', en únë' rë'u tsahui', ugúë' yúgu'të le rua' dö' dzaga rë'u. ¹⁰ Channö innaru': "Biti' bi dul-la' nabága'ru'", naca ca innaru': "Dios rizí' yé'ë", ate' biti' runru' ca rnna xtídzë'ë.

2

Cristo náquië' Nu rudödi xtídzä'ru' lahuë' Dios

¹ Libí'ili', zxi'ina'do', ruzúaja' queëli' lu guichi lë ni, para cabí gunli' dul-la'. Na'a, channö nútì'tës nu gun dul-la', zoa nu rudödi xtídzä'ru' lahuë' Dios Xuz, Lë' Jesucristo, Nu naca tsahui'. ² Naca cazë' Bönni' budödi cuinë', en gútië' para bugüë' dul-la' nabága'ru' lahuë' Dios. Calégasö gútië' para bugüë' dul-la' nabága'ru' rë'u, pero gútië' ca' para bugüë' dul-la' nabága'gaca bönachi idútë yödzölió.

³ Channö runru' ca naca le gunná bë'enë' rë'u, nöziru' chinúnbë'érü' Lë'. ⁴ Nu rnna: "Neda' núnbe'a-në' Dios" pero biti' run ca rinná bë' xibá queë', nu ni rizí' yë', en biti' run le naca idútë li. ⁵ Nu run ca rnna xtídzë'ë Dios, le nácatë nadxi'i nu ni Dios ca ral-la' gun. Channö runru' caní, nöziru' néquiru' queë' Dios. ⁶ Lësca' caní, nu rnna: "Neda' néquida' queë' Cristo", ral-la' gaca nu na' ca na' gúquië' Cristo cate' gudë' yödzölió ni.

Tu xibá cubi

⁷ Böchi' luzá'ado', ruzúaja' queëli' lu guichi xibá ni. Biti' naca tu xibá cubi, pero xibá gula na', le zóalen libí'ili' dza ni'te. Xibá gula na' naca didza' biyönlili' dza ni'te. ⁸ Lësca' naca ca ruzúaja' queëli' lu guichi tu xibá cubi, lë

na' le nácaté bené' Jesú斯 ca rnna, ate' runli' ca' libí'ili' ca rnna, tu' chiridödi que le naca chul-la que dul-la', ate' bení' idú chiruzení'.

⁹ Nu rnna: "Zoa' lu bení'", pero biti' rilé'e dxi'a böchi' luzé'e, nu ni ni run le naca chul-la que dul-la'. ¹⁰ Nu nadxi'i böchi' luzé'e zoa lu bení', ate' le run ga nu ichixi inigui biti' zóalen nu na'. ¹¹ Le naca chul-la que dul-la' run ga nu biti' rilé'e dxi'a böchi' luzé'e, en ga ridá nu na' ga chul-la. Biti' nözi ga zeaj, tu' run le naca chul-la na' ga nachul-la naniti nu na'.

¹² Ruzúaja' queéli' lu guichi, zxí'ina'do', tu' chibunit lahuë' Dios dul-la' nabágali', tu' runé' le guzxi' lu né'e guné'. ¹³ Ruzúaja' queéli' lu guichi, libí'ili' nácali' xuz, tu' núnbë'ëli' Nu na' zoa caz dza ni'te. Ruzúaja' queéli' lu guichi, bi'i ra'bán, tu' chibucú'lali' tu' xihui'.

¹⁴ Chibuzúaja' queéli' lu guichi, zxí'ina'do', tu' núnbë'ëli'-né' Dios Xuz. Chibuzúaja' queéli' lu guichi, libí'ili' nácali' xuz, tu' núnbë'ëli' Nu na' zoa caz dza ni'te. Chibuzúaja' queéli' lu guichi, bi'i ra'bán, tu' nácali' bi'inál-la, en nazi' lu ná'ali' xtídzé'ë Dios, en chibucú'lali' tu' xihui'.

¹⁵ Biti' idxí'isili' yödzölió ni, en caléga le dë yödzölió ni. Channö zoa nu nadxi'i yödzölió, biti' nadxi'i Dios Xuz. ¹⁶ Caní naca, tu' naca le tun bönochí yödzölió ni le cabí ré'ené' Dios Xuz, pero naca le té'eni bönochí yödzölió ni. Tuné' le riyaza ladxi' yöl-la' böñachisö quégaquië'.

Tun ba zxón cuíngaquië' ni'a que le dë quégaquië'.

Caní nácgaca le ruá' dö' tuné'. ¹⁷ Huadödi que yödzölió ni, enca' que le ta'zé ládxi'gaca bönochí, pero nu run ca rë'ené' Dios sóatica'sö.

Nu rui'i didza' idútë li, en nu rizi' yë'

¹⁸ Zxí'ina'do', chizóaru' dza údxi, en ca na' chibiyönili' huidë' bönni' ridá'baguë'ë Cristo, lësca' na'a chigusí lo nacu'ë zián bönni' ta'dá'baguë'ë Cristo. Que lë ni na' nöziru' chizóaru' dza údxi. ¹⁹ Bila'rúajë' bönni' caní ládjaru', pero biti' guláquië' tuz len rë'u. La'tu' guláquië' tuz len rë'u, ila'cuá'lentica'së' rë'u. Ná'a, bila'rúajë' para gaca bë' biti' nácgagaquië' yúgu'të' tuz len rë'u.

²⁰ Na'a, Bö' Lá'ayi nagú'u Nu naca lá'ayi rë'u, chizóalen libí'ili', ate' nöz quézili' yúgu'të. ²¹ Buzúaja' queéli' lu guichi, tu' chinözili' le naca idútë li, en caléga tu' cabí nözili' le. Nözili' ca' biti' ca' rizi' yë' nu nözi le naca idútë li.

²² ¿Nuzxi caz na' nu rizi' yë'? ¿Naru' cabí naca nu na' ridá'baga' náquië' Jesú斯 Nu gusöl-lë'ë Dios? Naca nu ni bönni' ridá'baguë'ë Cristo, tu' ridá'baguë'ë náquië' Dios Xuzë' Jesú斯, en ridá'baguë'ë ca' náquië' Jesú斯 Zxí'inë' Dios. ²³ Núti'tés nu ridá'baga' Dios Zxí'ini, biti' ca' zóalenë' Dios Xuz nu na'. Núti'tés nu rnna yáaljido' Jesú斯 náquië' Zxí'inë' Dios, lësca' zóalenë' Dios Xuz nu na'.

²⁴ Na'a, guli'gúí' lataj le biyönili' dza ni'te ugá'analentica'sö libí'ili'. Channö le biyönili' dza ni'te ugá'analentica'sö libí'ili', lësca' libí'ili' ugá'analentica'sili'-né' Dios Zxí'ini, enca' len Dios Xuz. ²⁵ Le guzxi' lu né'e Dios naca lë ni: Gunnë' gunnë' yöl-la' na'bán idú queéru'.

²⁶ Chibuzúaja' queéli' lu guichi lë ni ca naca quégaca nupa ta'zí' ye'e libí'ili'.

²⁷ Na'a, zóalenë' Dios Bö' Lá'ayi libí'ili'. Cristo gusöl-lë'ë Lë' queéli', ate' Lë cazë' zóalentica'së' libí'ili'. Que lë ni na' biti' riqúinili' nu usedi libí'ili', tu' chizóalen Nu na' libí'ili', en rusedi libí'ili'. Didza' idútë li ru'ë Lë', en biti' rizi' yë'ë. Ca na' chinazédali', guli'sóalentica'së' Cristo.

²⁸ Na'a, zxí'ina'do', guli'sóalentica'së' Cristo para cate' ulu'i lahuë' Lë', gácaru' rugu ladxi', en biti' utu'íru' sóaru' lahuë' Lë' cate' huödë'. ²⁹ Channö

nőzili' náquië' Dios tsahui', ral-la' inőzili' ca' yúgu'të nupa tun le naca tsahui' nácabaca zxí'inë' Dios.

3

Nupa nácabaca zxí'inë' Dios

¹ Buli'yú ca nadxi'ide'enë' Dios Xuz rë'u, benë' ga nazí'i laru' zxí'inë' Dios caz. Que lë ni na' bönachi yödzölió ni biti' ca' núnbë'gaca le nácaru', tu' cabí gulúnbe'e Jesús. ² Böchi' luzá'ado', na'a chinácaru' zxí'inë' Dios, en biti' naca bë'eni le ral-la' gácaru'. Nöziru' cate' ulu'i lahuë' Jesús, gácaru' ca náquië' Lë', ate' ilé'eru'-në' catëz náquië' Lë'. ³ Núti'tës nu run löza gaca ca náquië' Jesús, ru'i ladxi' nu na' gaca dxi'a ca na' náquië' Jesús dxi'a.

⁴ Núti'tës nu run dul-la' riguitsaj xibá queë' Dios, tu' naca dul-la' le riguitsaj xibá. ⁵ Nözili' bulu'i lahuë' Jesús para bugüé' dul-la' nabága'ru', en biti' bi dul-la' runë' Lë'. ⁶ Núti'tës nu dzaga Lë' biti' run dul-la'. Núti'tës nu run dul-la' catu caz bilé'e Jesús, en biti' núnbe'e Lë'. ⁷ Zxí'ina'do', guli'gún chi'i cuinli' para cabí nu si' ye'e libíili'. Nu run le naca tsahui', naca tsahui' nu na' ca na' náquië' Jesús tsahui'. ⁸ Nu rúntica'sö dul-la' nequi que tu' xihui', tu' run dul-la' tu' xihui' dza ni'te. Que lë ni na' budulu'i lahuë' Zxí'inë' Dios, para usunitié' yugu' le nun tu' xihui'.

⁹ Núti'tës nu naca zxí'inë' Dios biti' rúntica'sö dul-la', tu' zóalentica'sö le guzxi' lu në'ë Dios Xuz nu na'. ¹⁰ Caní naca bë' nupa nácabaca zxí'inë' Dios, en nupa nácabaca zxí'ini tu' xihui'. Núti'tës nu biti' run le naca tsahui', en biti' nadxi'i böchi' luzé'e biti' nequi queë' Dios.

Ral-la' idxí'iru' yugu' böchi'ru' ta'yéajlé'ë Cristo

¹¹ Lë ni naca didza' biyónili' dza ni'te, le rnna: Ral-la' idxí'iru' luzá'aru' turu' ia'turu'. ¹² Biti' ral-la' gunru' ca na' benë' Caín. Gúquië' Caín que tu' xihui', ate' bëtië'-bi' bi'i böchë'ë. ¿Bizx que bëtië'-bi' bi'i böchë'ë? Bëtië'-bi' tu' gulaca le benë' Caín na' le ruá' dö', pero le benbi' bi'i böchë'ë, gulaca tsahui'.

¹³ Böcha'ado', biti' ubánili' channö cabí ta'lé'e bönachi yödzölió ni libíili' dxi'a. ¹⁴ Nöziru' chigudödiru' lu yöl-la' guti, en chidë yöl-la' na'bán idú queëru' tu' nadxi'iru' yugu' böchi'ru'. Nu biti' nadxi'i böchi' luzé'e, chinati caz nu na'. ¹⁵ Núti'tës nu biti' rilé'e dxi'a böchi' luzé'e, naca huëti bönachi nu na', ate' nözili' nu ruti bönachi biti' dë yöl-la' na'bán idú que. ¹⁶ Caní núnbe'ëru' yöl-la' nadxi'i le naca idú. Naca ca budödë' Jesús yöl-la' na'bán queë', en gütie' uláz queëru'. Lësca' caní rë'u ral-la' udödiru' yöl-la' na'bán queëru', para gácalenru' yugu' böchi'ru'. ¹⁷ Na'a, núti'tës nu dë yöl-la' tsahui' que, lë na' dë yödzölió ni, ate' rilé'e böchi' luzé'e, bi riyadzaj queë', en biti' ruhuéchi' ladxi' lë', bi unödzaj queë', ¿naru' nadxi'itsö nu na' Dios? ¹⁸ Libíili', zxí'ina'do', ral-la' idxí'iru' luzá'aru', caléga len dídzä'sö o lu yöl-la' rinnësö queëru', pero idú ládzi'ru', enca' len idútë yöl-la' run queëru' ral-la' idxí'iru' luzá'aru'.

Le runru' löza lahuë' Dios

¹⁹⁻²⁰ Channö caní nadxi'iru' yugu' böchi' luzá'aru', nöziru' néquiru' que Nu na' naca idútë li, ate' lahuë' Dios huáca cö' dxi icja ládzi'do'oru' channö ruxösa ládzi'do'oru' rë'u, tu' rácada' arë' Dios ca ládzi'do'oru', ate' Lë' nözinë' yúgu'të. ²¹ Böchi' luzá'ado', channö cabí ruxösa ládzi'do'oru' rë'u, dë le runru' löza lahuë' Dios ²² tu' nöziru' gunné' queëru' biti'tës bi inábaru' lahuë'. Caní naca, tu' runru' ca rinná bë' xibá queë', en la raza ládxë'ë Lë'. ²³ Lë ni naca xibá queë', para tséajlé'ëru'-në' Jesucristo, Zxí'inë' Dios, en idxí'iru' luzá'aru' ca na'

chigunná bë' enë' rë'u. ²⁴ Zóalen Dios nu run ca rinná bë' xibá queë', ate' Dios caz zóalenë' nu na'. Caní nöziru' dzágatica'së' Lë' rë'u, tu' chigusöl-lë'ë Dios Bö' Lá'ayi queëru'.

4

Le naca bë' zóalenë' Dios Bö' Lá'ayi rë'u

¹ Böchi' luzá'ado', biti' tséajlë'ëli' nútitiës bönni' rnnë' zóalenë' Dios Bö' Lá'ayi lë', pero guli'sí' bë' bönni' na', channö zóalenë' Dios Bö' Lá'ayi lë', tu' ta'dë' zián bönni' ta'zí' yë'ë yödzölió ni. Ta'nnë' tu'ë didza' uláz queë' Dios. ² Caní gúnbë'ëli'-në' nu bönni' zóalenë' Dios Bö' Lá'ayi lë'. Nequi queë' Dios bönni' na' rnnë' yálajdo' ca bidë' Jesucristo, Nu gusöl-lë'ë Dios, rnnë' guca cazë' böñachi. ³ Lësca' caní, biti' nequi queë' Dios nu bönni' biti' rnnë' yálaç lulu ca bidë' Jesucristo, rnnë' biti' guca cazë' böñachi. Bönni' ni néquinë' que nu na' ridá'baga' Cristo, bönni' na' chibiyónili' ral-la' guídë', ate' na'a chiridë' yödzölió ni.

⁴ Zxí'ina'do', néquili' queë' Dios, en chibucú'lali' nupa na' ta'zí' yë', tu' náparö Nu na' zóalen libí'ili' yöl-la' huáca unná bë' ca nu na' ridá yödzölió ni. ⁵ Légaquië' nácagaquië' böñachi yödzölió. Que lë ni na' tu'ë didza' que le naca que yödzölió, ate' böñachi yödzölió ni tu'zé nágagaca légaquië'. ⁶ Néquiru' rë'u queë' Dios. Nu nunbë' Dios ruzé nagui rë'u. Nu biti' nequi queë' Dios biti' ruzé nagui rë'u. Caní núnbe'ëru' nu na' yu'u le Bö' ru'i didza' le naca idútë li, enca' nu na' yu'u le tu bö' rizi' yë'.

Náljalen Dios yöl-la' nadxi'i

⁷ Böchi' luzá'ado', ral-la' idxí'iru' luzá'aru', tu' náljalen Dios yöl-la' nadxi'i, ate' nútitiës nu nadxi'i luzë'e náljalen ca' Dios, en núnbe'e Dios. ⁸ Nu biti' nadxi'i luzë'e, biti' núnbe'e Dios, tu' náljalen Dios yöl-la' nadxi'i. ⁹ Caní bulu'e lahui Dios ca nadxi'inë' rë'u, gusöl-lë'ë la's duí Zxí'ini cazë' yödzölió ni, para gata' yöl-la' na'bán idú queëru' ni'a queë' Lë'. ¹⁰ Caní naca bë' yöl-la' nadxi'i idú, caléga ca nadxi'iru'-në' Dios, pero ca na' Lë' bidxi'inë' rë'u, en gusöl-lë'ë Zxí'ini cazë' para gútië', en caní bugüé' dul-la' nabága'ru'.

¹¹ Böchi' luzá'ado', channö caní bidxi'ide'enë' Dios rë'u, lësca' rë'u ral-la' idxí'iru' luzá'aru'. ¹² Catu caz nu bilé'e Dios, pero channö nadxi'iru' luzá'aru', Dios zóalenë' rë'u, ate' naca bë' nadxi'iru'-në' Dios idú ládxí'ru'. ¹³ Nöziru' zóalenru'-në' Dios, ate' Lë' zóalenë' rë'u, tu' guchízië' Dios Bö' Lá'ayi rë'u. ¹⁴ Netu' bilé'etu' le benë' Dios Xuz, en runtu' ba nalí que. Lë' gusöl-lë'ë Zxí'ini cazë' Nu rusólá böñachi yödzölió. ¹⁵ Nu bönni' rnnë' yálajdo' náquië' Jesús Zxí'inë' Dios, Dios zóalen cazë' bönni' na', ate' lë' zóalenë' Dios.

¹⁶ Rë'u ni nöziru', en réajlë'ëru' nadxi'inë' Dios rë'u. Yöl-la' nadxi'i náljalen Dios, ate' nu bönni' nadxi'inë' luzë'ë, zóalenë' bönni' na' Dios, ate' Dios zóalenë' lë'. ¹⁷ Caní run dxin yöl-la' nadxi'i lu icja ládxí'do'oru', run ga bíti'rö rádxiru' dza ichúguïë' Dios quégaca böñachi ilátigaca. Ca náquië' Jesús, nácaru' ca' rë'u yödzölió ni. ¹⁸ Channö nadxi'iru'-në' Dios, biti' bi gádxiru'. Cate' nadxi'iru'-në' Dios idú ládxí'ru', runë' ga biti' rádxiru'. Nu radxi, rigu'i rizáca'a. Nu na' radxi, biti' nadxi'i Dios idú ladxi'.

¹⁹ Rë'u ni nadxi'iru'-në' Dios, tu' zí'alö bidxi'i quézinë' Lë' rë'u. ²⁰ Channö nu inná: "Neda' nadxi'ida'-në' Dios", pero biti' rilé'e dxí'a böchi' luzë'e, nu ni rizi' yë'. Nu biti' nadxi'i böchi' luzë'e nu rilé'e caz, ¿nacxi caz gaca idxí'i Dios,

en catu caz bilé'e Lë? ²¹ Caní gunná bë'enë' Jesús rë'u. Gunnë': Nu nadxí'i Dios, ral-la' idxí'i ca' böchi' luzë'e.

5

Ca gaca idéli'ru' lu le raca queëru' yödzölió ni

¹ Núti'tës bönni' réajlë'ë Jesús náquië' Cristo, náquië' zxí'inë' Dios, ate' nútì'tës bönni' nadxí'inë' Dios Nu buzóalë', ral-la' idxí'inë' ca' luzë'ë nu naca bi'i queë' Dios. ² Caní réquibe' eru' nadxí' iru' yugu' bi'i queë' Dios. Naca caní channö nadxí' iru'-në' Dios, en runru' ca rinná bë'enë' rë'u. ³ Caní naca bë' nadxí' iru'-në' Dios. Naca caní channö runru' ca rinná bë'enë' rë'u, ate' lë na' rinná bë'enë' rë'u biti' naca böninga. ⁴ Núti'tës bönni' náquië' bi'i queë' Dios ridé'lë'në' lu le raca yödzölió ni. Chibidéli' ru' lu le raca yödzölió tu' réajlë' èru'-në' Dios. ⁵ ¿Nuzxi na' rideli' lu le raca yödzölió? Run caní nu réajlë' náquië' Jesús Zxí'inë' Dios.

Dios Bö' Lá'ayi runë' ba nalí queë' Cristo

⁶ Caní bleë'ë Jesucristo. Bidé' bidile' nisa, en bulaljë' xichönë'. Calégasö bidile' nisa, pero lësca' bulaljë' xichönë'. Dios Bö' Lá'ayi náquië' Nu run ba nalí queë', tu' naca idútë li didza' ru'ë Dios Bö' Lá'ayi. ⁷ Tsonna nupa tun ba nalí queë' Jesùs yehua' yubá ni', Dios Xuz, en Dios Zxí'ini, lë' ca' Didza', en Dios Bö' Lá'ayi. Yonna' ni nácagaquíë' tuz. ⁸ Lësca' caní, tsonna le tun ba nalí queë' luyú ni, ca na' zóalenë' Dios Bö' Lá'ayi Lë', en le bidilë' Jesùs nisa, en ròn ni' bulaljë' lë'e yaga cruz, ate' yonna ni, tuz ca ta'nná. ⁹ Channö si' lu ná'aru' le tun ba nalí böñachi, le runë' ba nalí Dios nácatérö' lesaca'. Lë na' benë' ba nalí Dios naca le benë' ba nalí queë' Jesùs, gunnë' náquië' Zxí'ini caze'. ¹⁰ Nu réajlë' Zxí'inë' Dios, nazí' lu në'e le nunë' ba nalí Dios. Nu cabí réajlë' Dios, naca ca rnna nu na': Dios rizi' yë'ë. Caní naca, tu' cabí guyéajlë' le benë' ba nalí Dios queë' Zxí'inë'. ¹¹ Lë ni naca le benë' ba nalí Dios. Gunnë' chibennë' yöl-la' na'bán idú queëru', ate' Zxí'inë' na' náquië' Nu nabániru' caní. ¹² Nu bönni' zóalenë' Zxí'inë' Dios lë', dë yöl-la' na'bán idú queë'. Nu bönni' biti' zóalenë' Zxí'inë' Dios lë', biti' dë yöl-la' na'bán idú queë'.

Ca nöziru' dë yöl-la' na'bán idú queëru'

¹³ Libí'ili' na' réajlë'ëli'-në' Zxí'inë' Dios, ruzúaja' queëli' lu guichi lë ni para inözili' chidë yöl-la' na'bán idú queëli', en para gaca idú ca réajlë'ëli'-në' Zxí'inë' Dios.

¹⁴ Lë ni naca le ruzzxöni ládxí'ru' Lë'. Channö bi inábiru' Lë' ca rë'ënë' Lë', Lë' riyyönnë' rë'u. ¹⁵ Channö nöziru' riyyönnë' rë'u ca naca bi rinábiru' Lë', nöziru' ca' ideli' quéziru' lë na' rinábaru'.

¹⁶ Channö ilé'eru' böchí' luzá'aru' runë' dul-la' le cabí nachë' yöl-la' guti, ral-la' inábaru' queë' lahuë' Dios, ate' Lë' unödzjé' yöl-la' na'bán queë'. Caní rnnia': Ral-la' inábali' quégaca nupa tun dul-la' le cabí nachë' yöl-la' guti. Dë dul-la' le nachë' yöl-la' guti. Biti' rnnia' inábali' que nu run dul-la' caní. ¹⁷ Yugu'të le cabí naca tsahui' naca dul-la', pero dë dul-la' le cabí nachë' yöl-la' guti. ¹⁸ Nöziru' biti' rúntica'sö dul-la' nu naca zxí'inë' Dios, tu' rapa chi'ë Zxí'ini caze' Dios nu na', ate' tu' xihui' biti' sequí' bi gun que.

¹⁹ Nöziru' yú'uru' lu në'ë Dios, ate' yúgu'të böñachi tuí'i ládxí'gaca le dë yödzölió ni yú'ugaca lu na' tu' xihui'.

²⁰ Na'a, nöziru' chibidë' Zxí'inë' Dios, en bennë' yöl-la' réajni' i queëru', para gúnbe'ëru' Nu na' naca idútë li. Zóalenru' Nu na' naca idútë li tu' zóalenru'-në'

Jesucristo, Zxí'inë' Dios. Nu ni naca Dios idú, en Nu runna yöl-la' na'bán idú queëru'. ²¹Zxí'ina'do', guli'gún chi'i cuinli' para cabí tseaj ládxí'li' yugu' budó' guiøj budó' yaga. ¡Ca' gaca!

DÍDZA'DO' BUROPI BUZÚAJË' JUAN

Núnbe'ëru' le naca idútë li, en yöl-la' nadxi'i

¹ Neda', bönni' gula run chi'a bönachi queë' Cristo, rugapa' li' Dios, nigula rö queë' Dios, tsözxön len yúgu'të zxi'inu'. Nadxi'ida' libi'il'i tu' núnbe'ëru' le naca idútë li, en calégasö neda', pero lësca' yúgu'të nupa chinúmbë'gaca le naca idútë li ta'dxi'ilibíili'. ² Nadxi'itu' libi'il'i tu' núnbe'ëru' le naca idútë li, le zóalentina'sö rë'u. ³ Rinábida'-në' Dios Xuz, en Xanru' Jesucristo, Zxi'ini cazë' Dios, uza' ládxë'ë queëli', en huéchí' ládxë'ë libi'il'i, en gunë' ga soa dxi icja ládxido'oli' tu' núnbe'ëli' le naca idútë li, en nadxi'il'i luzá'ali'.

⁴ Budzéjade'eda' cate' biyönda' tunbi' zxi'inu' ca naca le naca idútë li, tu' tunbi' ca na' gunná bë'enë' Dios Xuz rë'u. ⁵ Na'a, ráta'yua'lo', nigúlado', gunu' ca rinná bë' xibá queë' Cristo. Biti' ruzúaja' quiu' lu guichi tu xibá cubi. Ruzúaja' la' lébisö lë na' gunná bë'enë' rë'u dza ni'te. Gunnë' ral-la' idxí'ru' luzá'aru'. ⁶ Caní naca bë' nadxi'iru'-në' Dios. Naca caní channö runru' ca rnna le gunná bë'enë' rë'u. Lë na' gunná bë'enë' rë'u naca para idxí'ru' luzá'aru' ca na' chibiyónili' dza ni'te.

Nupa të'ëni ila'zí' ye'e rë'u

⁷ Lë ni riguixjö'i'ida' libi'il'i, tu' chita'dá zián nupa ta'zí' yë' yödzölió ni, nupa na' biti' ta'zí' lu në'eguequi ca bidë' Jesucristo, gúquië' idú bönachi. Nu na' run caní, naca nu rizi' yë', en nu ridá'baga' Cristo. ⁸ Guli'gún chi'i cuinli' para cabí initi le nadéili' tu' guzxí' lu na'li' Cristo, pero guli'gü' ládxil'i' idéli'l'i' idútë le ral-la' sí'il'i lu në'ë Dios.

⁹ Núti'tës nu riguela' nöza yúbölö, en rucá'ana xtídzë'ë Cristo, biti' zóalenë' Dios nu na'. Nu dá'tica'sö xtídzë'ë Cristo, zóalenë' Dios Xuz, enca' Zxi'inë' nu na'. ¹⁰ Channö núti'tës nu za' ga zóali', en rusedi xibá yúbölö, biti' ulëbili' nu na' lídxili', en biti' guiëli' le: "Guyú'u len netu'." ¹¹ Nu rële: "Guyú'u len netu'", run tsözxön nu na' ca naca le ruá' dö' run nu na'.

Runë' Juan löza idxinë' ga nacu'ë böchi' luzë'ë

¹² Sal-la' le zián ral-la' uzúaja' queëli' lu guichi, biti' rë'ënda' uzúaja' yúgu'të lu guichi. Runa' löza guída' ga zóali', ate' gü'iru' didza' ruá'a cuinru', para gaca udzéjaru' idú ládxí'ru'.

¹³ Zxi'ininu nigula zxilu', nigula rö queë' Dios, tu'gápabi' Dios li'. ¡Ca' gaca!

DÍDZA'DO' BUNNI BUZÚAJË' JUAN

Le naca tsahui' runë' bönni' lë' Gayo

¹ Neda', bönni' gula run chi'a bönachi queë' Cristo, rugapa' Dios li', Gayo dxi'i ladxi'. Nadxf'ida' li' tu' núnbe'ëru' le naca idútë li.

² Böcha'ado', rinábida'-në' Dios gunë' ga gaca dxi'a quiu' lu yúgu'të le runu', en su' ca' dxi'a, ca na' raca dxi'a que bö' naca cazu'. ³ Rudzéjada' tu' ta'dxinë' yugu' böchi'ru' ga zoa', en tunë' ba nalí quiu', ta'nnë' nacu' li ladxi', en runu' ca naca le naca idútë li. ⁴ Biti' bi dë le runrō ga rudzéjada' ca lë ni, riyönda' tun nupa nácacaca ca bi'i que caza' ca rnna le naca idútë li.

⁵ Böcha'ado', runu' le naca tsahui', rácalenu' böchi'ru', en runu' ca' le nácarö lesaca', rácalenu' böchi'ru' biti' núnbe'enu' légaquië'. ⁶ Yugu' böchi'ru' ni tunë' ba nalí quiu' lógaca bönachi queë' Cristo ni, ta'guíxjö'ë ca na' nadxf'ina' nácarö lesaca', rácalenu' böchi'ru' biti' núnbe'enu' légaquië'. Runu' le naca dxi'a, rugú'u légaquië' nöza, en rácalenu' légaquië' ca na' sa'yéaj gunu' quégaca nupa tun xichinë' Dios, para ulu'ú'ë nöza. ⁷ Légaquië' bila'rúajë' ni tu' nadxf'igaquië' Jesús, en biti' bi ta'zi'ë lu ná'agaca bönachi biti' ta'dá' Cristo. ⁸ Que lë ni na' ral-la' gunru' bal bönachi tun caní, para gúnlenru' légaquië' dxin que le naca idútë li.

Le cabí naca tsahui' runë' Diótrefes

⁹ Chibuzúa'ja' lu guichi le uzéajni'i bönachi queë' Cristo ni', pero Diótrefes, bönni' ni' raza ládxë'ë gáquië' lo ládjagaquië', biti' runë' netu' bal. ¹⁰ Que lë ni na', channö huida' ga zóali', usa'a ládxíli' cate' udúbili' ca nácacaca le runë'. Rizí' quídzë'ë netu', en rnne' queëtu' le cabí nácatë. Biti' rizzxón ládxë'ë tsa lë nisö, pero lësca' biti' runë' bal böchi'ru' ta'dxinë' ni', ate' ruzágue'ë xinözguequi nupa ni' të'ëni ilún légaquië' bal, en rubéajë' nupa na' ladaj bönachi queë' Cristo.

¹¹ Böcha'ado', biti' gunu' ca tun nupa tua' dö', pero ca tun nupa tun le naca tsahui' gunu'. Nu run le naca tsahui' nequi queë' Dios, pero nu ruá' dö' catu caz benbë' Dios.

Le naca tsahui' runë' Demetrio

¹² Yugu'të böchi'ru' tunë' ba nalí queë' Demetrio, ate' naca bë' runë' le naca idútë li. Lësca' netu' runtu' ba nalí queë', ate' nözili' nácatë lë ni runtu' ba nalí queë'.

Le rinabë' Juan lahuë' Dios

¹³ Ziánrö ca' le gú'unida' uzúaja' quiu' lu guichi, pero biti' rë'ënda' uzúaja' le lu guíchisö. ¹⁴ Na'a, runa' löza ilé'eteda' li', ate' güí'ru' didza' ruá'a cuinru'.

¹⁵ Rinábida'-në' Dios gunë' ga soa dxi icja ládxí' do'o. Nupa ni ta'dxi'i rë'u tu'gapa Dios li'. Lësca' li', bugapa Dios tu tu nupa ni' ta'dxi'i rë'u. ¡Ca' gaca!

DÍDZA' DO' BUZÚAJË' JUDAS

Judas rugapë' Dios nupa nulidzë' Dios

¹ Neda', Judas, tsaz naca' huen dxin queë' Jesucristo, en naca' ca' böchë'ë Jacobo. Rugapa' Dios libí'ili', nulidzë' Dios Xuz libí'ili', en nadxi'inë' libí'ili', en rapa chí'ë libí'ili' tu' nácali' tuz len Jesucristo. ² Rë'ënda' inözili' ca ruhuéchi'da' ládxë'ë Dios libí'ili', en nadxi'ide'enë' libí'ili', enca' ruzóadë'ë dxi icja ládxi'do'oli'.

Nupa tu'sedi le cabi'nácatë

³ Libí'ili', böchi' luzá'ado', gúcada' ládxa'a uzúaja' queëli' lu guichi ca naca yöl-la' rusólá nadéli'rú', pero run bayudxi uchízia' icja nágali' para idú ládxi'li' til-lalenl' nupa ta'dá'baga' le réajlé'ér'u'-në' Dios, lë na' budöde' Dios tsaz lu ná'agaca nupa néquiguequi quez queë' para ulu'zé didza' que lógaca yúgu'té bönachi. ⁴ Caní run bayudxi guna' tu' bagáchi'sö chigula'yázalenë' bal-lë' bönni' rë'u', Dios buzóö' quégaquië' dza ní'te ichúguië' quégaquië' ila'nítie' tsaz. Biti' ta'yéaj ládxi'gaquië' Dios bönni' caní. Tu' zoa le ruzá'ládxë'ë Dios queëru', téquinë' huáca iluné' le ruá' dö'. Ta'dá'baguë'ë Xanru' Jesucristo. Tuzé' Lë' rinná bé'enë' rë'u.

⁵ Chinöz quézili'lë ni, pero rë'ënda' usá'a ládxi'li' ca benë' Xanru' Dios. Sal-la' busölë' bönachi Israel cate' bubéajë' léguequi luyú Egipto, gudödi ni' busunitié' nupa bítsa'gaca ládjaguequi, en biti' gula'yéajlé' Lë'. ⁶ Lësca' caní, yugu' gubáz lá'ayi queë' Dios, nupa ni' biti' gulún xichíngaquië', pero bulu'cá'anë' xilátjagaquië', Dios busayjë' légaquië' tu lataj chul-la. Nágagaquië' tsaz ni' ga idxinrö dza usiúdxë' Dios yödzöliö ni. ⁷ Lësca' caní guca quégaca yödzö Sodoma, en yödzö Gomorra, enca' yugu' yödzö dzágagaca léguequi. Ca na' gulunë' gubáz lá'ayi na', gula'dá'baguë'ë Dios, lësca' caní gulunë' bönni' yugu' lu yödzö na'. Bulu'dödi cuíngaquië' para gulunë' le ruá' dö', en le gula'zësö ládxi'gaquië' le tun ga nu rutu'i. Na'a, tu' busaca' zi'ë Dios légaquië' lu guí' le cabirö ulu, lë na' guca quégaquië' naca tu le run gadxi yúgu'téru', para cabí gunru' la' lébisö.

⁸ Sal-la' gulaca lë ni, la' canísö tunë' bönni' ni, bönni' röjácalenë' yëla ta'nénë'. Tun dítjanë' idútë le naca cazë'. Ta'dá'baguë'ë le rinná bé'enë' Dios rë'u, en ta'nnë zi'ë quégaca nupa ta'nná bë' yehua' yubá. ⁹ Miguel caz, gubáz lá'ayi lo, cate' gudil-lalenë' tu' xihui' para gaca u'ë idú le naca cazë' Moisés, biti' burúguinë' udxië' dö' tu' xihui' na', pero gudxë' le: "Xanru' uzenë' li' bach." ¹⁰ Yugu' bönni' ni ta'nnë zi'ë quégaca le runë' Dios, yugu' le biti' ta'yéajni'inë', ate' yugu' le ta'yéajni'inë' rácasö quégaquië' ca na' tunba' böa' guixi' biti' ta'yéajni'iba', lë ni tu' gunë' dxin, en caní tu'dxiá dö' cuíngaquië'.

¹¹ Bica' bayechi' légaquië' tu' chigulunë' dul-la' ca na' benë' Caín, ate' lu yöl-la' ruhuidi' quégaquië' chigula'chixi gula'niguinë' ca na' guchixi guniguinë' Balaam para si'ë dumí, ate' chinarugu quégaquië' ilátië' ca na' gútie' Coré cate' gudá'baguië' Moisés. ¹² Yugu' bönni' ni tágulenë' tsözxön libí'ili' cate' ráguli' yugu' gü'i huagu lu yöl-la' nadxi'i queëli'. Tunë' ga ta'chixi ta'nigu nupa dzágagaca libí'ili', tu' të'aj tagu lize'. Nácagaquië' ca yugu' bönni' ral-la' ulu'gágugaquië'-ba' bö'cu' zxila', pero la' cuíngacase' tu'gahue'. Nácagaquië' ca böaj lúzxiba biti' nachë'gaca nisa, ate' ruá' bö' léguequi ná'alö ní'lö.

Nácagaquië' ca' ca yugu' yaga chibidxín dza bi ila'bía, pero biti' bi ta'bía. Nácagaquië' ca' ca yugu' yaga chigula'bidxi idú lui, en chinaládzu'gaca. ¹³ Nácagaquië' ca' ca nísado' cate' riyasa ridxía, ate' ribö' bidxina' que, lë na' rului'i ca naca yöl-la' stu' tuné'. Nácagaquië' ca yugu' bólaj lúzziba nucá'anagacaba' xinózgacaba'. Dios chinunë' quégaquië' ila'yázië' tsaz lataj chul-la.

¹⁴ Ca naca quégaquië' bë'ë ca' didza' Enoc uláz queë' Dios. Enoc na' gúquië' tu bönni' gubábalenë' le igadxi cō' zxí'ini xi'soë' Adán. Gunnë': "Bull' yútsöca', zë'ë Xanru', ate' dzágagaca Lë' zián gayuá' böñachi néquiguequi quez queë'. ¹⁵ Zë'ë para gunë' xíguia' yúgu'të böñachi, en ichúguië' quégaca yúgu'të nupa tua' dö'ila'niti tsaz." Caní gunë' tu' nözi yúgu'të didza' zi' gula'nnë' bönni' dul-la' na' queë' Lë'. ¹⁶ Yugu' bönni' caní ta'nnë' queë', en ta'zi' quídez'ë, en tunë' ca naca le ta'zësö ládx'i'gaquië'. Tu'ë didza' lu yöl-la' run ba zxón cuíngacabä', en para ulu'zi'ë xibéguequi, tu'ë didza' le ta'gú'u böñachi yöl-la' zxön.

Judas rusë' è ládx'i'gaca nupa ta'yéajlé' Cristo

¹⁷ Na'a, böchi' luzá'ado', guli'tsöjnë yugu' didza' gulu'ë bönni' gubáz queë' Xanru' Jesucristo dza ni'te. ¹⁸ Yugu' bönni' na' gulë' libi'ilí: "Yugu' dza tsöjsétégaca ulu'lui'i lógaquië' bönni' ulu'titjë' le naca lá'ayi, en ilunë' ca naca le ta'zësö ládx'i'gaquië' le ruá' dö'." ¹⁹ Yugu' bönni' ni tunë' ga irúajli' choplö. Tu'ë didza' lu yöl-la' böñachisö quégaquië', en biti' zóalanë' Dios Bö' Lá'ayi légaquië'.

²⁰ Na'a, böchi' luzá'ado', guli'soa tsutsu lu yöl-la' réajlé' queëli' Dios le naca idú lá'ayi. Buli'lidzé' Dios, uguñli' dxin yöl-la' huáca queë' Dios Bö' Lá'ayi. ²¹ Buli'gá'analenë' Dios, Nu nadxi'i rë'u, en guli'cöza dza ni' ulu'i lahuë' Xanru' Jesucristo, Nu ruhuéchi' ládxë'ë rë'u para gata' yöl-la' na'bán idú queéru'.

²² Guli'gún ga ila'dipa ládx'i'gaca nupa raca chopá ládx'i'gaca. ²³ Guli'gún ga ulu'lë', le gaca tsca ubéajli' légaquië' lu guí'. Lu yöl-la' radxi queëli' buli'huéchi' ládx'i'li' ia'zíca'rö böñachi. Guli'gún chi'i cuinli', para cabí gunli' tsözxöñ légaquië', en cabí gútsa'li' le ruá' dö' tunë'.

Le rigú'uru' Dios yöl-la' zxön

²⁴⁻²⁵ Dios la's dui, Nu nözi caz yúgu'të, en Nu busölá rë'u ni'a que le benë' Xanru' Jesucristo, napë' yöl-la' huáca gun chi'ë libi'ilí, para cabí ichixi iníguili', en usudxinë' libi'ilí lahuë' Lë' ga zoë' lu bení' idú. Gunë' ga gácali' idú tsahui', en ga udzéjade'eli'. ¡Gaca caz queë' Dios yöl-la' ba, en yöl-la' zxön, en yöl-la' naca lo, en yöl-la' unná bë', na'a dza, en yúgu'të dza zá'gaca! ¡Ca' gaca!

LE BULUÍ'INË' DIOS JUAN

Apocalipsis

Le bulu'e lahui Dios ca naca queë' Jesucristo

¹ Lë ni naca le bulu'e lahui Jesucristo, le bë'ë Lë' lataj Dios ulu'í'inë' yugu' huen dxin queë' ca naca le run bayudxi ilácatë. Jesucristo gusöl-lë'ë tuë' gubáz lá'ayi queë', nu na' buzéajni' neda', Juan, huen dxin queë' Cristo. Gubáz lá'ayi na' bulu'í'inë' neda' ca naca lë ni. ² Neda', Juan, ruzúaja' lu guichi ni le naca idútë li ca naca yúgu'të le bilé'eda', en runa' ba nalí que xtídzë'ë Dios, en que le benë' ba nalí Jesucristo.

³ Bica' ba nu ulaba didza' ni, ate' bica' bágaca nupa ulu'zë nágagaca nu na' ulaba xtídzë'ë Dios ni, en ilún ca rnna lë ni nazúaj lu guichi, tu' chizóa gaca.

Juan ruzúaje' le uzéajni'i gadxi cö' böñachi queë' Cristo

⁴ Neda', Juan, ruzúaja' lu guichi didza' ni le uzéajni'i gadxi cö' böñachi queë' Cristo nacuá' luyú Asia. Dios, Bönni' zoa cazë', en guzóatica'së', en ral-la' huödë', rinábida'-në' uzá' ládxë'ë queëli', en gunë' ga cö' ö dxi icja ládxì' do'oli', ate' dzágagaca gadxi bò' Lë' nacuá' lahuë' Lë' ga ni' rö'ë rinná bë'ë. ⁵ Dzáguië' ca' Jesucristo Lë'. Jesús ni runë' ca rnnë', en runë' ba nalí queë' Dios. Zí'alö Lë' bubanë' tsaz lu yöl-la' guti, en rinná bë'enë' bönni' ta'nná bë'ë yödzöliö ni. Lë' nadxi'í'në' rë'u, en gudibë' rë'u, tu' bugüë' dul-la' nabága'ru' len xichönë' le bulaljë' lë' e yaga cruz, cate' gütii' uláz queëru'. ⁶ Jesucristo benë' ga rinná bë'ëru', en ga nácaru' yugu' bixúz, para cú'uru'-në' Dios, Xuzë' Jesús, yöl-la' ba. ¡Yöl-la' ba Lë', en gácatica'sö queë' yöl-la' unná bë'! ¡Ca' gaca!

⁷ ¡Buli'yútsöca'! ¡Zë'ë Cristo lu böaj lúzxiba! ¡lla'lé'e Lë' yúgu'të böñachi, enca' nupa ni' gulún Lë' huë', en bétigaca Lë'! ¡lla'bödxì yechi' yúgu'të böñachi yödzöliö ni cate' ila'lé'e Lë'! ¡La'tu' gácaté caní! ¡Ca' gaca!

⁸ Caní rnnë' Lë': "Neda' naca' Bönni' zoë' zí'alö, enca' Bönni' röjsétië' ca naca le risí lo, en le ruúdxitë." Caní rnnë' Xanru', Bönni' napa cazë' yöl-la' huáca. ¡Zoa cazë' Lë', en guzóatica'së', en si' ulë'ë!

Rilé'enë' Juan yöl-la' zxön queë' Jesucristo

⁹ Neda', Juan, naca' böchi' luzá'ali', en tsözxön rigu'i rizáca'lena' libf'ili', en tsözxön len libf'ili' ruzi'a xibé le rinná bë'ë Dios, en nadéli'da' yöl-la' riböza zxön ladxi' na' runnë' Jesucristo queëru'. Nadzuna' tu luyú bidxi ni gatsaj láhui'lö nísado', nazí'i le Patmos. Nadzuna' tu' bena' libán que xtídzë'ë Dios, en tu' bena' ba nalí queë' Jesucristo. ¹⁰ Lu dza lá'ayi queë' Xanru', guzóalenë' Dios Bö' Lá'ayi neda', ate' biyönda' cúdzula' chi'ë tu bönni' rulidzë' zidzaj. Biyön chi'ë ca ribödxì lúzuba' böa' bëdxì. ¹¹ Bönni' ni gudxë' neda': "Neda' naca' Bönni' zoë' zí'alö, en Bönni' röjsétië' ca naca le risí lo, en le ruúdxitë. Buzúaj lu guichi le riyönnu', en rilé'enu', ate' gusöl-la' le quéguequi gadxi cö' böñachi quia' nacuá' luyú Asia, nupa nacuá':

Lu yödzö Éfeso,
lu yödzö Esmirna,
lu yödzö Pérgamo,
lu yödzö Tiatira,
lu yödzö Sardis,

lu yödzö Filadelfia,
lu yödzö Laodicea."

¹² Buécja' para ilé'eda' Bönni' na' rulidzé' neda'. Cate' buécja', bilé'eda' gadxi le nuá'gaca guí' le néquigueequini oro. ¹³ Ladaj gadxi le nuá'gaca guí' na' bilé'eda' tu Bönni' riné'ë ca tu bönni'. Nácuë' tu lari' tunna le ridxín xini'ë, en luchu'ë nasie' tu le néquini oro. ¹⁴ Chiguichido'os naca guitsa' icjé' ca naca zxila' o ca riná' bögui', ate' rëpi yösa bení' guijoj lahuë' ca guí'. ¹⁵ Rëpi yösa bení' ni'ë ca guíë bronce dxilido', le nudzé'eda' lu guí' ca bo'yalaj. Zidzaj biyön chí'ë ca riyón tu yegu zxön. ¹⁶ Lu në'ë ibëla zxóagacaba' gadxi bölaj bení', ate' rirúaj didza' ru'ë le naca ca tu guíë tuchi' natuchi' iropa la'a. Rëpi yösa bení' lahuë' ca gubidza cate' rudzá'a.

¹⁷ Cate' bilé'eda' Lë' gudzö'a xini'ë ca tu bönni' nati. Ní'irö Lë' guxóa në'ë neda' len në'ë ibëla, en gudxë' neda': "Biti' gádxinu'. Neda' naca' Bönni' zoë' zí'alö, en röjsétië'. ¹⁸ Naca' Nu nabán caz. Gútia', ate' na'a zóatíca'sa' nabana'. Dë lu na'a inná bé'eda' yöl-la' guti, en lataj ga nacuá' nupa nátigaca. ¹⁹ Buzúaj lu guichi lë na' chibillé'enu', en le raca na'a, enca' le ral-la' gaca tödi na'a. ²⁰ Lë ni naca le nagachi' ca naca quégacaba' gadxi bölaj bení' na' bilé'enu' zxóagacaba' lu na'a ibëla, en ca naca gadxi le nuá'gaca guí' le néquigueequini oro. Gadxi bölaj bení' na' sa'yéajgacaba' gadxi gubáz quégaca gadxi cö' böñachi quia', ate' gadxi le nuá'gaca guí' na' sa'yéajgaca gadxi cö' böñachi quia' na'."

2

Didza' gusöl-lë'ë yödzö Éfeso

¹ Gunnë' ca' Bönni' na': "Buzúaj lu guichi didza' ni isöl-lu'u queë' gubáz quia' zóalenë' böñachi quia' lu yödzö Éfeso. Caní uzúaju' lu guichi: Ru'ë didza' Bönni' na' zxóagacaba' gadxi bölaj bení' lu në'ë ibëla, en ridé' gatsaj láhui'lö gadxi le nuá'gaca guí' na' néquigueequini oro. ² Caní rnnía': Neda' nöz quézida' yugu' le runli', en ca rúnda'ali' dxin. Nözda' ribözali' zxön ladxi', en biti' gaca guá' ilenli' nupa tua' dö'. Nözda' chiguzzxi' bë'ëli' nupa ta'nná nácagaca gubáz quia' pero biti' ca' nácagaca, ate' na'a nözili' ta'zí' yë'. ³ Ribözali' zxön ladxi', en chigudi'i guzxáca'li' tu' dá'ali' neda', pero biti' gucuidi' ládxi'li'. ⁴ Na'a, dë tu le ruzegui libi'ili' didza': Bítirö nadxi'ili' neda' ca na' bidxi'ili' neda' zí'alö. ⁵ Que lë ni na', guli'tsöjné ca na' benli' zí'alö, lë na' busanli', ate' na'a, buli'bí'i ládxi'li', en guli'gún ca na' benli' zí'alö. Channö cabí ubí'i ládxi'li', guídatia' queëli', ate' ugúa' le nuá' guí' queëli' xilataj. ⁶ Na'a, zoa tu le rácalen libi'ili'. Biti' rilé'eli' dxia' le tunë' bönni' nicolaíta, nupa na' ta'yéaj ládxi'gaca budó' guijoj budó' yaga, en tun le ruá' dö', lë na' lësca' biti' rilé'eda' dxia'. ⁷ Nu riyóni ral-la' uzé nagui lë ni rnnë' Dios Bö' Lá'ayi, ruí'ilené' yugu' cö' böñachi quia' neda', Cristo, didza', rnnë': Nupa ila'deli' lu le raca yödzölió, guna' ga ilágugaca le ribía yaga da' gatsaj láhui'lö luyú lachi queë' Dios, le gun ga ila'cuá'tica'sö nabán."

Didza' gusöl-lë'ë yödzö Esmirna

⁸ Gunnë' ca': "Lësca' caní, buzúaj lu guichi didza' ni isöl-lu'u queë' gubáz quia' zóalenë' böñachi quia' lu yödzö Esmirna. Caní uzúaju' lu guichi: Ru'ë didza' Bönni' na' zoë' zí'alö, en náquië' ca' Nu röjsete, Bönni' na' gútië', en bubanë' tsaz. ⁹ Caní rnnía': Neda' nöz quézida' le runli', en ca rigu'i'riza'ca'li'. Nözda' nácal' yechi', pero le nácatë rilé'eli' yöl-la' tsahui' le naca idú. Nözda' ca' ca ta'nnë queëli' nupa ni' ta'nná nácagaca böñachi judío, pero biti' ca' nácagaca

caní. Nupa ni ta'dá' Satanás, tu' xihui'. ¹⁰ Biti' ca' gádxili' le ral-la' qui'i sáca'li'. Tu' xihui' na' gun ga idzunli' bál-lali' libí'ili' lidxi guíé. Caní si' bë' libí'ili', ate' qui'i sáca'li' idú ca chi dza. Guli'tséajlé' neda' ga idxintë dza gátili', ate' neda' gunna' yöl-la' na'bán idú queëli'. ¹¹ Nu riyöni ral-la' uzé nagui lë ni rnnë' Dios Bö' Lá'ayi, ruí'ilené' didza' yugu' cö' böñachi quia' neda', Cristo, rnnë': Nupa ila'deli' lu le raca yödzölió, biti' bi gun yöl-la' guti quéguequi, lë na' gaca le buropi luzuí quégaca nupa ila'cuá'tica'sö lu guí' gabila."

Didza' gusöl-lë'ë yödzö Pérgamo

¹² Gunné' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' böñachi quia' lu yödzö Pérgamo. Caní uzúaju' lu guichi: Ru'ë didza' Bönni' na' nu'ë guíé tuchi' na' natuchi' iropa la'a. ¹³ Neda' nöz quézida' le runli'. Nözda' ca' zóali' ga ni' rinná bë' Satanás, tu' xihui', pero ni ruzzöni ládxí'ili' neda'. Biti' ca' nusanli' ca réajlé'ëli' neda'. Biti' busanli' le yugu' dza ni' cate' gulútië' Antipas, bönni' ni' bénctica'së' ba nalí quia', en gútië' ga ni' zoa Satanás, tu' xihui'. ¹⁴ Na'a, dë tu chopa le tu'zegui libí'ili' didza': Nacuá'len libí'ili' bal-la böñachi lu yödzö Pérgamo, nazí' lu në'eguequi xibá queë' Balaam, bönni' ni' busédinë' Balac benë' ga gula'chixi gula'nigui böñachi Israel, ate' gulahuë'-ba' yugu' böa' bédxido' gulútigaquíë'-ba' lógaca budó' guiój budó' yaga, en guluné' le ruá' dö'. ¹⁵ Lësca' caní nacuá'len libí'ili' nupa ni' nazí' lu në'eguequi xibá quégaca böñachi nicolaíta, lë na' biti' rilé'eda' neda' dxí'a. ¹⁶ Que lë ni na', bulibí'i ládxí'ili' na'a. Channö cabí ubí'i ládxí'ili', guídatea' ga zóali', en til'-lalena' légaquíë' len didza' rirúaj ruá'a, le naca ca tu guíé tuchi'. ¹⁷ Nu riyöni ral-la' uzé nagui lë ni rnnë' Dios Bö' Lá'ayi, ruí'ilené' yugu' cö' böñachi quia' neda', Cristo, didza', rnnë': Nupa ila'deli' lu le raca yödzölió, guna' ga ilágugaca yöta maná nagachi'. Unödza' ca' tu guiój chiguichido' quégaquíë', ate' lu guiój na' nazúaj tu la cubi, cuntu nu nunbë' le, pero núpasö na' ila'zí'i le, ilúnbë' le na'."

Didza' gusöl-lë'ë yödzö Tiatira

¹⁸ Gunné' ca': "Lësca' caní, buzúaj lu guichi didza' ni isöl-lu'u queë' gubáz quia' zóalenë' böñachi quia' lu yödzö Tiatira. Caní uzúaju' lu guichi: Ru'ë didza' Zxi'inë' Dios, Bönni' na' dxía guiój lahué' nácagaca ca guí', ate' ni'ë nácagaca ca guíé bronce dxílico'. ¹⁹ Caní rnnë': Neda' nöz quézida' le runli'. Nözda' ca nadxi'ili' neda', en ca réajlé'ëli' neda'. Nözda' ca' ca runli' xichina' lu yölla' riböza zxón ladxi' queëli'. Nözda' nácarö idú ca runli' yugu' lë ni ca benli' zí'alö. ²⁰ Nacuá' tu chopa le tu'zegui libí'ili' didza': Ruí'ili'-nu lataj nigula na' lënu Jezabel, rnnnanu ruí'iniu didza' uláz queë' Dios, ate' ni'a que le ruséedinu rizí' yé'enu bönni' tuné' xichina'. Ruséedinu légaquíë' le run ga tuné' le ruá' dö', en tahuë'-ba' böa' bédxido' ta'gu'ë légacaba' lógaca budó' guiój budó' yaga. ²¹ Neda' bë'a-nu lataj ubí'i ládxí'nu, pero biti' rë'ënину ucá'anana le ruá' dö' na' runnu. ²² Que lë ni na' chú'una'-nu tu le gáti'nu ga na' qui'i sáca'nu lu xihuë'enu tsözxön len nupa gulún tsözxön len lënu le ruá' dö'. Caní guna' na'a channö cabí ulu'bí'i ládxí'guequi para cabirö ilún dul-la' na'. ²³ Guna' ga ilátibi' zxi'ininu. Caní gaca, iléquibe' e yúgu'té cö' böñachi quia' ruyúa' le ta'bequi ícjaguequi, en le ta'zá'ládxí'gaca böñachi, ate' ubi'a queëli' tsca naca le runli'. ²⁴ Ia'zíca'li' zóali' yödzö Tiatira, nülöli' biti' nazí' lu ná'ali' lë na' ruséedinu, en biti' nazédeli' lë na' ta'nná böñachi ni' naca le nayéajni'i idú, pero le nácatë naca xtidza' Satanás, tu' xihui', rea' libí'ili': Biti' usubága'a libí'ili' ia'tú le ral-la' gunli'. ²⁵ Na'a, lë na' chinazi' lu ná'ali', guli'gún chí'i ga idxintë dza

huöda'. ²⁶ Bönni' ni' ila'deli'në' lu le raca yödzölió, en ilunë' ca rë'ënda' neda' ga údxitë, neda' guna' ga ila'nná bë'enë' böñachi idútë yödzölió. ²⁷ Ca na' budödë' Xuza' Dios yöl-la' unná bë' lu na'a, neda' ca' guna' ga ila'nná bë'enë' yugu' yödzö, ate' gata' lu ná'agaquie' tu xiyaga güë, ate' ulu'zxuzzxjë' böñachi na' ca nu ruzxuzzaj zxiga' yö'öna néquini yu. ²⁸ Gu'a ca' le naca ca bölaj hui sila quégäquië'. ²⁹ Nu riyöni ral-la' uzë nagui lë ni rnnë' Dios Bö' Lá'ayi, ruí'ilenë' yugu' cö' böñachi quia' neda', Cristo, didza'."

3

Didza' gusöl-lë'ë yödzö Sardis

¹ Gunnë' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' böñachi quia' lu yödzö Sardis. Caní uzúaju' lu guichi: Ru'ë didza' Bönni' na' nacuálen Lë' gadxi bö' na', ate' zxóagacaba' gadxi bölaj bení lu në'ë ibëla, rnnë': Neda' nöz quézida' le ruá' dö' runli', en nözda' chinati cázali' sal-la' téquigüequi böñachi zóali' nabanli'. ² Buli'subán ládxili'. Guli'gún tsutsu le nacuálen libíili', le chizóa ilátigaca, tu' réquibe'eda' le runli' biti' naca idú tsahui' lahuë' Dios. ³ Guli'tsöjnë na'a xibá na' biyónili' le guzxi' lu ná'ali'. Guli'gún ca rnna xtídzë'ë Dios, en buli'bíi ládxili'. Channö cabí usubán ládxili', guída' ga zóali' tsálido'os ca na' ridxinë' tsálido'os gubán, en biti' inözili' bizxi dza na' guída' ga zóali'. ⁴ Nacuálen bal-la böñachi libíili' lu yödzö Sardis, nupa biti' nácagaca xihui'. Ila'dalen nupa ni neda', nácugaca lari' chiguichido'os le rului' nuhuöágacaca idú tsahui', en nácagaca lesaca' gaca caní quéguequi. ⁵ Nupa ila'deli' lu le raca yödzölió ugácu' léguequi lari' chiguichido'os, en biti' usúlua' láguequi chinazúajgaca lu guichi ga nazúajgaca lágaca nupa nadéli'gaca yöl-la' na'bán idú. Si' lu na'a nupa ni lahuë' Xuza' Dios, enca' lógaquie' gubáz lá'ayi queë'. ⁶ Nu riyöni ral-la' uzë nagui lë ni rnnë' Dios Bö' Lá'ayi, ruí'ilenë' yugu' cö' böñachi quia' neda', Cristo, didza'."

Didza' gusöl-lë'ë yödzö Filadelfia

⁷ Gunnë' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' böñachi quia' lu yödzö Filadelfia. Caní uzúaju' lu guichi: Ru'ë didza' Bönni' na' náquië' lá'ayi, en ru'ë didza' idútë li, en dë lu në'ë zxí'ini güie queë' David, bönni' gunná bë'ë. Bönni' na' ru'ë didza' risálajë' ga nu riyaza, ate' cuntu nu gaca usayaj le, en rusayjë' ga nu riyaza, ate' cuntu nu gaca ísalaj le. ⁸ Bönni' ni rnnë': Neda' nöz quézida' le runli'. Nözda' nápalí' láti'do'os yölla' huáca, pero runli' ca rnna xtídz'a, en biti' rutuifili' rmnali' néquili' quia'. Que lë ni na' nuzóá' loli' tu ga nu tsaz le nayalaj, ate' cuntu nu gaca usayaj le. ⁹ Buli'yútsöca', ta'dë' bönni' ni' Satanás, tu' xihui', en ta'zi' yë'ë, ta'nnë' nácagaquie' böñachi judío ta'yéaj ládx'i'gaca Dios, pero biti' nácagaquie' caní, guna' ga ila'dxinë' loli', en ulu'zechu zxíbagaquie' xiní'ali'. Ní'irö iléquibe'enë' nadxi'ida' libíili'. ¹⁰ Tu' benli' ca rnna xtídz'a, en gulözali' zxöön ladxi', gun chí'a libíili' dza na' ila'gu'i ila'zaca' yúgu'të böñachi lu yödzölió ni, lë na' gaca para si' bë' léguequi. ¹¹ ¡Si' guída'! Que lë ni na' guli'gún chí'i le nápalí', para cabí gaca nu gun ga cabí sí'ili' lë na' ral-la' gunna' queëli'. ¹² Núloli' ni' idéla'li' lu le raca yödzölió, neda' guna' ga gácali' tsutsu ca nácagaca ya'zxöön, ate' sóali' yudo' ga na' zoë' Dios, en catu caz irúajli' ni'. Udá'a libíili' ca lë' Dios quia', enca' ca lë yödzö queë' Dios le naca Jerusalén cubi, le huötaj irúaj yehua' yubá lu në'ë Dios. Lësca' udá'a libíili' La' cubi. ¹³ Nu riyöni ral-la' uzë nagui lë ni rnnë' Dios Bö' Lá'ayi, ruí'ilenë' yugu' cö' böñachi quia' neda', Cristo, didza'."

Didza' gusöl-lëë yödzö Laodicea

¹⁴ Gunné' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' böñachi quia' lu yödzö Laodicea. Caní uzúaju' lu guichi: Ru'ë didza' Bönni' na' zoë' tsaz, Bönni' runë' ca rnne', en ru'ë didza' iduté li ca runë' ba nalí, en náquië' ca' Bönni' na' gulén lu në'ë yúgu'të le benë' Dios. ¹⁵ Caní rnne': Neda' nöz quézida' le runli'. Ca runli' naca ca nisa biti' naca ziaga, tu' cabí rucá'anali' tsaz neda', en biti' naca ca nisa zögui', tu' cabí dá'ali' neda' idú ládx'i'. Dxí'arö gaca la' gácal' ca nisa ziaga o ca nisa zögui'. ¹⁶ Na'a, tu' nácali' ca nisa nati yulasö, en biti' nácali' ca nisa ziaga, en biti' nácali' ca nisa zögui', chú'una' libí'ili' ca run nu ruhuëbi nisa nati yula na'. ¹⁷ Libí'ili' rnmalí' rilé'eli' yöl-la' tsahui' queëli', en raca dxí'a queëli', en biti' bi riyadzaj queëli', pero biti' réquibe'eli' le nácali'. ¡Bayechi' nácali'! ¡Nácali' xizf'! ¡Nácali' yechi', en lo chul-la, en ridali' xiguídisö!. ¹⁸ Que lë ni na', neda' ruzéajni'ida' libí'ili' gá'uli' le naca ca oro lu na'a neda' le nuna' dxí'a lu guí', para gata' yöl-la' tsahui' idú queëli'. Ral-la' gá'uli' ca' lari' chiguichi quia' le gáculi' para igachi' yöl-la' xiguídidö queëli' le run ga nu rutu'i. Ral-la' gá'uli' ca' quia' le gun ga ulu'huöáca guiøj loli' para gaca ilé'eli' le naca quia'. ¹⁹ Neda' ruzeda' bach, en run zi'a yúgu'të nupa nadxí'ida' channö cabí tun le naca dxí'a. Que lë ni na', bulibí'illádx'i'li', en gullí'gún xichina' idú ládx'i'. ²⁰ Buli'yútsöca', neda' caz zuína' ga nu riyaza, en rulidza'. Channö nútítës nu yöni chí'a, en isalaj quia', tsázia', en gágulena' nu na', ate' nu na' gágulen neda'. ²¹ Núlöli' idéli'li' lu le raca yödzöliö, neda' guna' ga cö'öli' tsözxön len neda' ga na' rö'a rinná bë'a, ca na' benë' ca' Xuza' quia' neda'. Bidéli'da' neda' lu le guca quia', ate' gurö'lena' Xuza' tsözxön ga na' rö'ë rinná bë'ë. ²² Nu riyöni, ral-la' uzë nagui lë ni rnne' Dios Bö' Lá'ayi, ruí'ilenë' didza' yugu' cö' böñachi quia' neda', Cristo."

4

Yöl-la' ba ta'gu'ë Dios yehua' yubá

¹ Gudödi gulaca yugu' lë ni, buyúa', en bilé'eda' tu ga nu riyaza le nayalaj yehua' yubá. Biyönda' ca' chí'ë bönni' na' biyönda' zí'alö, ate' bulidza zidzaj ca ribödxi lúzuba' bö'a' bëdxi. Chi'i ni bulidza neda', gunná: "Gudá xitsá'älö ni, ate' neda' ulu'íida' li' le run bayudxi ilaca tödi ni."

² La' ní'isö guzóalenenë' Dios Bö' Lá'ayi neda', ate' bilé'eda' yehua' yubá ni' tu lataj ga Nu rö'ö rinná bë', en bilé'eda' ca' Nu na' rö'ö lataj na'. ³ Rëpi yösa bení' Nu na' rö'ö lataj na', ca na' rëpi yösa bení' guiój jaspe, en guiój cornalina, yugu' guiój nazáca' da'. Idú gásibi'ilö lataj na' zoa biguita' le naca lachi ca naca guiój esmeralda, le rëpida' yösa bení'. ⁴ Idú gásibi'ilö lataj na' nacuá' ca' ia'tapa uruá' lataj gapa ta'bö' nupa ta'nná bë', ate' yugu' lataj na' rö'ögaquie' tapa uru'ë bönni' gula, nácugaquie' lari' chiguichido'os, en dxíagaca ícjagaquie' le néquiguequini oro. ⁵ Ta'rúaj yösa, en guziú' rinné lu lataj lo ga ni' rö'ö Nu na', ate' bö' zxön ru'u. Lahui' lo lataj na' tu'zení' gadxi le ta'gú'u bení', le nácapaca gadxi bö' dzágagaca Dios. ⁶ Ca dödilö lahui lataj ni dë tu ca naca tu nísado' le rëpi yösa bení' ca guiój jara.

Nacuá' tapa nupa nabángaca cuiti lataj na', tsölá'a huéaj, ate' zián guiój lögaca dxíagaca zaca' cùdzi'löguequi, en láhülöguequi. ⁷ Nu nu nutsa' ladaj tapa ni nalá' ca nácapa' bëdxi guixi'. Nu na' europi nalá' ca nácapa' bëdxi, ate' nu na' bunni nalá' lahui ca naca lo bönni', ate' nu budapi nalá' ca nácapa' bisiá' ruzuba'. ⁸ Idápaté nupa ni, nacuá' xopa xiligaca que queëguequi, ate'

idá'alöguequi, en lë'elöguequi xíliguequi dxíada'gaca zián guiój lóguequi. Rëla, en te že biti' ta'cuá' dxisö, ta'nná:

¡Lá'ayil! ¡Lá'ayil! ¡Lá'ayi náquië' Xanru' Dios!

¡Napa cazé' yöl-la' huáca!

¡Guzóa caze' Lë', en zoa caze', en chizóa ulë'!

⁹ Nupa na' nabángaca ta'gú'u yöl-la' ba Nu na' rö'ö rinná bë', en zóatica'sö nabán. Tun bal Nu na', en të Nu na': "Xclenu'." Bátati'tës tun idapa na' caní, ¹⁰ tu'tsaga lógaca tapa uru'ë bönni' gula na' lu yu lahui' lo Nu na', en ta'yéaj ládx'i'gaca Nu na' zóatica'sö, en tu'cu'ë le néquiguequini oro dxía ícjagaquië' lahui' lo lataj ga ni' rö'ö rinná bë' Nu na', ta'nnë'.

¹¹ ¡Xantu' Dios, nacu' lesaca'
cú'utu' Li' yöl-la' ba, en guntu' Li' bal,
en gata' quiu' yöl-la' unná bë' tu' benu' yúgu'të le dë!
¡Ca rë'ëni quézinu' nacuá', en gula'sí lo nacuá'!

5

Tu guichi, en Bönni' náquië' Bö'cu' Zxíla'do'

¹ Ni'irö bilé'eda' tu guichi lu na' ibëla Nu na' rö'ö lataj lo. Guichi na' naca tu guichi nudubi, en dá'gaca didza' lë'elö, en láhuilö. Naguela' guichi na' gadxi le nusáyajgaca le. ² Bilé'eda'-në' tuë' gubáz lá'ayi lo, ate' bë'ë zidzaj didza', gunnë': "¿Nuzxi naca lesaca' uladzu' le naguél'a'gaca guichi ni, en usalaj le?"

³ Cuntu nu guca usalaj guichi na', en biti' guca nu uyú le, calëga nu zoa yehua' yubá, en calëga nu zoa luyú, en calëga nu zoa zxánilö luyú. ⁴ Ni'irö gurödxa' tu' cabí bidzöli nu naca lesaca' usalaj guichi na', en biti' bidzöli nu naca lesaca' ulaba le, en cuntu nu naca lesaca' uyú le. ⁵ Ni'irö tuë' bönni' gula ni' gudxë' neda', gunnë': "Biti' cödxu'. Bönni' na' náquië' ca bëdxi guixi', en nabábalenë' zxí'ini xi'sóë' Judá, en náquië' ca' zxí'ini xi'sóë' David, chibidé'l'në' lu yúgu'të le raca, en séqui'në' uládzu'ë le naguél'a'gaca guichi ni, en usálajë' le."

⁶ Ni'irö bilé'eda'-në' Bönni' náquië' Bö'cu' Zxíla'do', zuínë' lahui' lo lataj lo na' zoa gatsaj láhui'lö nupa na' nabángaca, en gatsaj láhui'lë' ca' yugu' bönni' gula na'. Dxie' huë' ca naca que tu bö'cu' zxila' zoa nu bëti lëba' lahui' Dios, nacuá' gadxi lúzuba', en gadxi guiój loba', le tu'lui'i ca nácabaca gadxi bö'na' dzágagaca Dios, nasö'l-lë'ë léguequi idútë yödzölió. ⁷ Gudödë' Bönni' náquië' Bö'cu' Zxíla'do', en gudélë'ë guichi na' lu na' ibëla Nu na' rö'ö lataj lo na'.

⁸ Cate' chigudélë'ë guichi na', bulu'zóa zxibiguequi idapa nupa na' nabángaca, en idapa uru'ë bönni' gula na' lahuë' Bönni' na' náquië' Bö'cu' Zxíla'do'. Tu tuë' bönni' gula na' zöngaquië' le rul-la nazí'i le arpa, en nuá'agaquië' ca' yugu' zxíga'do' néquiguequini oro, yugu' le yúdzugaca yalaj, lë na' rului'i yölla' rulidza Dios quégaca böñachi queë'. ⁹ Tul-lë' tu le rul-la yöl-la' ba, le naca cubi, le rnna caní:

Nacu' lesaca' quélu'u guichi na',

en uládzu'u le naguél'a'gaca le,

tu' bë'lu lataj yugu' bönni' gulútië' Li',

ate' len xichónu' böá'u' böñachi para ilequi queë' Dios,

nupa nácabaca böñachi izá'a nacuá' idútë yödzölió,

böñachi tu'i yúgu'të didza' yúbölö,

en nabábagaca yúgu'të yödzö,

en yúgu'të luyú nacuá' idútë yödzölió.

10 Benu' ga nácagaquië' bönni' ta'nná bë'ë
en ga nácagaquië' bixúz queë' Dios queëru'.
Benu' ga ta'nná bë'ë lu yu yödzölió.

11 Ní'irö buyúa', en biyönda' chí'igaquië' gubáz lá'ayi zián. Zián gáyu'ë, en gáyu'ë nacu'ë. Nacu'ë idú gásibi'ilö lataj lo na' tsözxön len nupa na' nabángaca, enca' yugu' bönni' gula na'. **12** Tu'ë zidzaj didza' yúgu'të', ta'nné:
¡Bönni' na' náquië' Bö'cu' Zxila'do' gulútië',
náquië' lesaca' gata' yöl-la' unná bë' lu në'ë,
en yöl-la' tsahui', en yöl-la' réajni'i, en yöl-la' huácal!
¡Náquië' lesaca' gunru'në' bal, en tseaj ládxí'ru' Lë',
en cù'uru'në' yöl-la' ba!

13 Ní'irö biyönda' tul-la yúgu'të le benë' Dios yehua' yubá, en lu yu yödzölió, en zxánilö luyú, en lu nísado'. Tul-la yúgu'të le nacuá' yugu' lataj na', ta'nná:
¡Yöl-la' ba Nu na' rö'ö lataj lo,
enca' Bönni' na' náquië' Bö'cu' Zxila'do'!
¡Gúntica'siru'në' bal
en cù'utica'siru'në' yöl-la' ba,
ate' inná bë'tica'së' Lë'!

14 Idápatë nupa na' nabángaca ta'nná: "¡Ca' gaca!"
Ní'irö idapa uru'ë bönni' gula na' bulu'tsaga lógaquië' lu yu, en gula'yéaj ládxí'gaquië' Nu na' zóatica'sö.

6

Yugu' le naguela'gaca guichi

1 Ní'irö bilé'eda'-në' Bönni' náquië' Bö'cu' Zxila'do', ate' buládzu'ë tu le naguela' guichi na', ate' biyönda' tu nu nutsa' ladaj idapa na' nabángaca, ate' biyón chí'i ca guziú' rinné, gunná: "¡Gudá uyú!"

2 Buyúa', en bilé'eda'-ba' tuba' böa' chiguichi, ate' nu na' dxía lëba' zön tu uxití' yaga. Gulu'ë lë' tu le néquini oro udxíë' icjë', ate' birúajë' ca tu nu nácatérö lo para idéli'në' lu gudil-la.

3 Cate' buládzu'ë le buropi le naguela' guichi na', biyönda' nu buropi na' nabán, ate' gunná: "¡Gudá uyú!"

4 Ní'irö birúajba' ia'tuba' böa', nácabá' xiná. Bulu'dödë' lu në'e nu na' dxía lëba' yöl-la' huáca unná bë' tsöjtúa yöl-la' riböza dxi'a tsáhui'do' quégaca böñachi, en gun ga iluti luzé'eguequi. Bulu'nödzjë' queë' tu guié tuchi' zxön.

5 Cate' buládzu'ë le bunni le naguela' guichi na', biyönda' nu bunni na' nabán, ate' gunná: "¡Gudá uyú!"

Buyúa', en bilé'eda'-ba' tuba' böa' gasaj, ate' nu na' dxía lëba' zön tu zxigóns.

6 Biyönda' ruí'i didza' tu chí'i gatsaj láhui'lö tapa na' nabángaca, ate' gunná: "Chopa guié zxoa' xtila len lazxaj que tu dza huen dxin tu' gaca gubín, en xopa guié zxoa' cebada len lazxaj que tu dza huen dxin, pero biti' gunu' ga yadzaj le naca za, en biti' bi gunu' que xisi uva nal-la."

7 Cate' buládzu'ë le budapi le naguela' guichi na', biyönda' ruí'i didza' nu budapi na' nabán, ate' gunná: "¡Gudá uyú!"

8 Buyúa', en bilé'eda'-ba' tuba' böa' gulaj, ate' nu na' dxía lëba' nazí'i le Yöl-la' Guti, ate' zéajlen nu na' nu nazí'i le Lataj Chul-la. Bulu'dödë' lu në'e nu na' inná be' e gatsaj tu gatsaj böñachi nacuá' yödzölió para guti léguequi len guié tuchi', en len yöl-la' ridún, en len yugu' yödzöhüé', en len yugu' böa' guixi'sinia' dzö'öba' luyú.

⁹ Cate' buládzu'ë le guyu' le naguela' guichi na', bilé'eda' zxan bucugu yehua' yubá ni' yugu' bö' gulaca cazé' bönni' ni' gulútië' légaquië' tu' gulunë' libán que xtídzë'ë Dios, en tu' gulunë' ba nalí queë'. ¹⁰ Gulu'i zidzaj didza' yugu' bö' ni, gula'nná: "¡Xantu' Lá'ayi, runu' ca rnno'! ¿Bátaxi caz uchi'a usöröu' queëtu', en uzi'i lëbu' yugu' bönni' nacu'ë yödzölió tu' gulútië' netu'?"

¹¹ Bulu'nödzje' quéguequi yugu' lari' chiguichido'os ilácuë', en gulé' léguequi: "Ral-la' uzi' láxí'lí ia'tú chí'ido'osö, ga idxinxrö dza ila'dxín yúgu'té lúzalí' huen dxin queë' Cristo ni, yugu' bönni' na' ral-la' iluti bönachi légaquië' ca' ca na' bëtigacá libí'ili'."

¹² Cate' buládzu'ë le buzxopi le naguela' guichi na', buyúa', en bilé'eda' gudödida' budó' zxu' luyú. Böáca gasaj gubidza, en guca ca tu lari' guitsa' gasaj, ate' böáca beo' xiná ca naca rön. ¹³ Gula'guínnaj bólaj lúzxiba lu yu, le guca ca raca que yaga higo, cate' ta'guínnaj le ribía cate' rutá le bö' budunu'.

¹⁴ Gudödi que lúzxiba, ate' guca que ca raca que tu guichi cate' nu rutubi le. Bulu'tsá' xilátjagaca yúgu'té guí'ado', enca' yúgu'té gapa zoa luyú bidxi lu nísado'. ¹⁵ Ní'irö yugu' bönni' ta'nná bë'ë luyú, en yugu' bönni' lo, en yugu' bönni' ta'lé'enë' yöl-la' tsahui', en yugu' bönni' ta'nná bë'enë' bönni' röjáquië' gudil-la, en yugu' bönni' dë lu ná'agaquië', en yúgu'té nupa nadó'ogaca, en yúgu'té nupa biti' nadó'ogaca bulu'cachi' lógaquië' gapa naca zxan bulóaj, en gapa naca lë'e guiój lu guí'ado'. ¹⁶ Gulé' yugu' guí'ado' na', en yugu' lë'e guiój na': "Guli'dubága' netu', en buli'cachi' netu', para cabí ilé e Nu na' rö'ö lataj lo ní' netu', en para cabí ideli' yöl-la' rilé queë' Bönni' na' náquië' Bö'cu' Zxila'do' netu'. ¹⁷ Chibidxín dza ulu'i lahui yöl-la' rilé quégaequië', ate' ¿nuzxi caz sequi' guá' ilén le?"

7

Tu gayuá'yu' tapa-un milé' bönni'

¹ Gudödi gulaca yugu' lë ni bilé'eda' tapa gubáz lá'ayi zuíguequinë' idapa la'a yödzölió. Tu'zágue'ë xinözgaca idapa bö' recja tsölá'a huéaj luyú, para cabí tsecja bö' luyú yödzölió, en para cabí tsecja lu nísado', en para cabí utá yaga. ² Bilé'eda' ca' ia'tué' gubáz lá'ayi zë'ë rirúajë' ga rilén gubidza. Nu'ë tu le udë'ë nupa nácagaca queë' Dios ban le gaca bë' léguequi. Bë'ë zidzaj didza', en bulidzë' idapë' gubáz lá'ayi ni' nadödi lu ná'agaquië' yöl-la' huáca unná bë' ilún dítjanë' luyú, en nísado'. ³ Gudxë' légaquië': "Biti' gun dítjalí' luyú, en nísado', en yugu' yaga cate' udá'arötu' tu le gaca bë' ra' xigágaquië' bönni' huen dxin queë' Dios queëru'."

⁴ Biyönda' tsca nácagaquië' bönni' da' légaquië' lë na' naca bë'. Nácagaquië' idú tu gayuá'yu' tapa-un milé' ladaj yúgu'té cö' zxí'ini xi'söë' Israel. ⁵ Yugu' bönni' na' da' légaquië' lë na' naca bë' nácagaquië':

Chinnu milé' di'a dza queë' Judá.

Chinnu milé' di'a dza queë' Rubén.

Chinnu milé' di'a dza queë' Gad.

⁶ Chinnu milé' di'a dza queë' Aser.

Chinnu milé' di'a dza queë' Neftalí.

Chinnu milé' di'a dza queë' Manasés.

⁷ Chinnu milé' di'a dza queë' Leví.

Chinnu milé' di'a dza queë' Isacar.

⁸ Chinnu milé' di'a dza queë' Zabulón.

Chinnu milé' di'a dza queë' José.

Chinnu milë' di'a dza queë' Benjamín.

Bönachi guizxiyu nácugaca lari' chiguichido'os

⁹ Gudödi guca lë ni buyúa', en bíle'egacada' bönachi zián, cuntu nu gaca ulaba léguequi. Nabábaguacië' yúgu'té yödzö tuí'i didza' yúbölö idüté yödzöliö. Zuíguequinë' ca dödilö lahui lataj lo, ga na' rö'ë ca' Bönni' na' náquië' Bö'cu' Zxila'do', en nácugacië' lari' chiguichido'os, en zöngaquicië' zin. ¹⁰ Tu'ë zidzaj didza' yúgu'té, ta'nnë':

¡Yöl-la' rusöla za' lu në'ë Dios queëru', rö'ë lataj lo ni,
en za' ca' lu në'ë Bönni' na' náquië' Bö'cu' Zxila'do'!

¹¹ Zuíguequinë' yúgu'té gubáz lá'ayi idú gásibi'ilö lataj lo na', enca' idú gásibi'ilö ga nacu'ë bönni' gula, enca' idú gásibi'ilö ga nacuá' idapa na' nabángaca, ate' tu'tsaga lógaquicië' lu yu ca dödilö lahui lataj lo na', en ta'yéaj ládx'i'gaquicië' Dios, ¹² ta'nnë':

¡Ca' gaca! ¡Yöl-la' ba Li', Dios queëtu'!

¡Napu' yöl-la' zxön, en yöl-la' réajni'il!

¡Rétu' Li': "Xclenu", en runtu' Li' bal!

¡Napu' yöl-la' unná bë', en yöl-la' huáca!

¡Gácatica'sö caní quiu', Dios queëtu'!

¡Ca' gaca!

¹³ Ní'irö gunábinë' neda' tuë' bönni' gula na', gunnë': "¿Nupxi na' nácugaca lari' chiguichido'os, en gapxi bönni' légaquicië'?"

¹⁴ Neda' gudxa' lë: "Xan, li' nöz quézinu'."

Lë' gudxe' neda': "Nupa ni gula'guí'i gula'záca'da'. Gula'guíbe' lari' nácugacië', en bulu'ún léguequi chiguichido'os len xichönë' Bönni' na' náquië' Bö'cu' Zxila'do'. ¹⁵ Que lë ni na' nacu'ë ca dödilö lahui lataj lo ga rö'ë rinná bë'ë Dios, en tunë' dxin lahuë' Lë' rëla, en të dza lu yudo' queë'. Nu na' rö'ö lataj lo ni gun chi'i légaquicië' tu' zóalentina'sö légaquicië'. ¹⁶ Bíti'rö ila'dunë', en bíti'rö ila'bidxe' nisa, en bíti'rö ila'yéguinë' gubidza, en bíti'rö iléquinë' xilá ¹⁷ tu' uyú'ë' Bönni' na' náquië' Bö'cu' Zxila'do' légaquicië' ca nu uyú bö'cu' zxila'. Zoë' gatsaj láhui'lö lataj lo na'. Ichë'ë légaquicië' gapa ralaj nisa le ruí'i yöl-la' na'bán, ate' Dios uzxië' lógaquicië' nisa ta'bödxë'."

8

Le igadxi le naguela' guichi

¹ Cate' buládzü'ë le igadxi le naguela' guichi na', gurö'ö dxi yehua' yubá idú gatsaj hora. ² Ní'irö bíle'egacada'-në' gadxi gubáz lá'ayi na' zuíguequinë' lahuë' Dios, ate' bulu'dödë' lu ná'agaquicië' gadxi lúzuba' böa' bëdxi. ³ Ní'irö bidë' ia'túë' gubáz lá'ayi, nu'ë tu zxiga'do' néquini oro, en guzuinë' ra' bucugu yehua' yubá ni'. Gulú'udë'ë yalaj lu në'ë para ugutsë' le len yöl-la' rulidza Dios le gulún yúgu'té bönachi queë' Cristo, en uzégui'ë le lu bucugu na' néquini oro, le zoa lahuí lo lataj lo na'. ⁴ Gurén dzön que yalaj na' zoa lu në'ë gubáz lá'ayi na', en guca tuz len yöl-la' rulidza Dios le gulún bönachi queë' Cristo, ate' bidxín ga na' rö'ë Dios. ⁵ Ní'irö gubáz lá'ayi na' bulié' zxiga'do' na' len bo' yalaj dxia lu bucugu na', ate' gurú'unë' le luyú. Gunnë guziú', ate' bö zidzaj biyön. Guyëpi yösa, en gudödi budó' zxu'.

Tu'cödxë' lúzuba' böa' bëdxi

⁶ Ní'irö igádxite' gubáz lá'ayi na' zöngaquicië' gadxi lúzuba' böa' bëdxi na' gula'cu'ë sina' ulu'cödxë' léguequi.

7 Bucödxë' gubáz lá'ayi zí'alö lúzuba' böa' bëdxi, ate' gurö'ö guiöj bögui' yöla sunna, en guí' nutsi'i rön, ate' bulu'huoxicaj luyú. Guyegui tu cö' tsa tu tsonna cö' le dë luyú ni, ate' guyegui ca' tu cö' tsa tu tsonna cö' yaga. Guyegui ca' yúgu'të guixi' ya'a.

8 Bucödxë' gubáz lá'ayi buropi na' lúzuba' böa' bëdxi, ate' gubixi tu le naca ca tu guí' a zxön régui lu nísado', ate' ia'láti'do'os ca gatsaj tu gatsaj nísado' na' böáca rön. **9** Guti tu cö' tsa tu tsonna cö' le nabángaca dzö'ö lu nisa zxön na', ate' guca ditaj tu cö' tsa tu tsonna cö' le ta'dödi láhui'lö nisa na'.

10 Bucödxë' gubáz lá'ayi bunni lúzuba' böa' bëdxi, ate' böxaj tu böläj lúzxiba, le régui ca tu guí' yöri gapa dë nisa yegu, enca' gapa ralaj nisa, ate' guca caní que ia'láti'do'os ca gatsaj tu gatsaj nisa na' rö'ö luyú. **11** Böläj ni lëba' Ajenjo, le naca tu le silá', ate' böáca silá' ia'láti'do'os ca gatsaj tu gatsaj nisa gapa na' dë nisa, en guca ca naca le silá' na', ate' gulati böñachi zián ni'a que nisa na' böáca silá'.

12 Bucödxë' gubáz lá'ayi budapi lúzuba' böa' bëdxi, ate' böáca chul-la ia'láti'do'os ca gatsaj tu gatsaj gubidza, en lësca' caní guca que beo', ate' böáca chul-la tu cö' tsa tu tsonna cö' böläj. Caní guca, bití' buzení' gubidza ia'láti'do'os ca gatsaj tu gatsaj dza, en bití' bulu'zení' böläj, en beo' ia'láti'do'os ca gatsaj tu gatsaj rëla.

13 Ní'irö buyúa', en biyönda' ru'ë zidzaj didza' tuë' gubáz lá'ayi ridödë' gatsaj láhui'lö lúzxiba, en rnné': "¡Bica' bayechi' libí'ilí! ¡Bica' bayechi' libí'ilí! ¡Bica' bayechi' libí'ilí' zóali' luyú ni cate' ulu'cödxë' ia'tsonné' gubáz lá'ayi na' lúzuba' böa' bëdxi!"

9

1 Bucödxë' gubáz lá'ayi guyu' lúzuba' böa' bëdxi, ate' bilé'eda' nu naca ca tu böläj lúzxiba böxaj luyú, ate' bulu'nödzje' nu na' zxí'ini guíé que lataj chul-la.

2 Gusaljë' lataj chul-la na', ate' gurén dzön que lataj chul-la, le guca ca dzön rirúaj ga tu'zégu'ë' bulá'do', ate' gula'chul-la gubidza, en lúzxiba ni'a que dzön na'. **3** Lu dzön na' bila'rúajba' böchi'zu, yugu' le gula'zxóasiba' luyú, ate' Dios bë'ë légacaba' lataj iládu'ba' böñachi ca tunba' xöjnö' dzö'öba' luyú. **4** Gunná bë'ené' légacaba' bití' ilún dítjabá' guixi' rö'ö luyú, en bití' ilún dítjabá' yugu' le naca ya'a, en caléga yugu' yaga, pero gácasö iládu'ba' böñachi na' bití' da' lë' na' naca bë' nu nequi queé' Dios ra' xigágiquié'. **5** Bití' bë'ë légacaba' lataj ilútiba' légaquie', pero ulu'saca' zí'isiba' légaquie' idú ca gayu' beo'. Riláda' ga tádu'ba' ca na' rilá ga rádu'ba' xöjnö'. **6** Yugu' dza na' ilé'ené' yugu' bönni' iluti cuíngaquie', pero bití' ila'zéquí'né'. Ilé'eniné' ilátië', pero ucuíta cuini yöl-la' guti.

7 Nalá'gacaba' böchi'zu na' ca nácagacaba' böa' nácugacaba' le néquiguequini guíé, para tsójacaba' gudil-la. Dxiágaca ícjagacaba' le nácagacaba ca tu le néquini oro. Naca lógacaba' ca naca lógaca böñachi. **8** Naca guitsa' ícjagacaba' ca naca guitsa' ícjantu nigula. Nácagaca láyi'gacaba' ca nácagaca láyi'ba' bëdxi guixi'. **9** Nácagaca luchú'ugacaba' le néquini guíé. Ta'gú'u bö xíligacaba' ca na' ta'gú'u bö carreta ná'ayöjgacaba' bö' ta'xítiba' lu gudil-la. **10** Nácagaca xibángacaba' ca naca xibángacaba' xöjnö', zoa lí'igacaba'. Lu xibángacaba' na' zoa le tu dí'iniba', para ilunba' zí' böñachi idú ca gayu' beo'. **11** Zoa nu rinná be' légaçaba', nu na' naca gubáz xihui' que lataj chul-la. Gubáz ni nazi'i le lu didza' hebreo: Abadón, le rnna lu didza' griego: Apolión, en lu didza' xidza': Nu Rusuniti.

¹² Chigudödi tu le rusuniti böñachi, le za' zí'alö, pero zá'gaca ia'chopa le ulu'suniti böñachi.

¹³ Bucödxë' gubáz lá'ayi buzxopi lúzuba' böa' bëdxí, ate' biyönda' tu chi'i rui'i didza' gatsaj láhui'lö tapa le náçagaca ca lúzuba' bëdxí dá'gaca tapa squin bucugu na' néquini oro, le rö' lahuë' Dios. ¹⁴ Chi'i ni rui'ilen didza' gubáz lá'ayi buzxopi na' si' bucödxë' lúzuba' böa' bëdxí, en rnna: "Busedxi idápate' gubáz xihui' na' nág'a'gaca ra' yegu Eufrates."

¹⁵ Ní'irö bulu'sedxë' tapa gubáz xihui' na', chinucözë' Dios léguequi para la' ná'asö, le naca dza na', en beo' na', en izi na', para ilútigaca tu cö' tsa tu tsonna cö' böñachi nacuá' yödzölió. ¹⁶ Biyönda' tsca nácagaquie' bönni' röjáquie' gudilla dxíagaquie'-ba' böa', en dzágagaquie' tapa gubáz xihui' na'. Nácagaquie' idú chopa gayuá' mil milë'.

¹⁷ Bilé'egacada'-ba' böa' na' ca tu lu bixín, ate' nupa ta'bía légacaba' nacu luchú'uguequi le naca gui'do'os, en ya'a ca lúzxiba, en gulaj. Nácagaca ícjagacaba' böa' na' ca ícjaba' bëdxí guixi', ate' lu ruá'agacaba' ta'rúaj guí', en dzön, en tu le ruzégui'da', nazí'i le azufre. ¹⁸ Yugu' lë na' ta'rúaj ruá'agacaba' bëtigaca tu cö' tsa tu tsonna cö' böñachi nacuá' luyú, lë na' nácagaca guí', en dzön, en lë na' ruzégui'da'. ¹⁹ Yugu' le tu'dí'iniba' böa' na' ta'rúaj ruá'agacaba', en dzöö'lu xibángacaba', tu' nácagaca xibángacaba' ca yugu' bëla zoa ícjagacaba' le tu'dí'iniba'.

²⁰ Ia'zica'rö böñachi, nupa biti' gulati lu chopa ni tu'suniti, biti' bulu'bí'i lädxí'guequi para cabirö ilúngaca ca na' túngaca, en biti' bulu'sán ta'yéaj lädxí'guequi yugu' bö' xihui', en yugu' budó' guiój budó' yaga, yugu' budó' na' biti' ta'lé'e, en biti' ta'yöni, en biti' gaca sá'gaca. ²¹ Biti' bulu'bí'i lädxí'guequi para cabirö iluti böñachi, en caléga para cabirö ilúngaca yöl-la' gudzá' quéguequi, en le ruá' dö' túngaca, en yöl-la' ribán quéguequi.

10

Gubáz lá'ayi, nuá' lu në'ë tu guíchido'

¹ Ní'irö bilé'eda'-në' ia'túe' gubáz lá'ayi nál-la, bötje' birúajë' yehua' yubá, nácuë' böaj lúzxiba, en zoa ca tu biguita' ícjale'. Rëpi yösa bení' lahuë' ca run gubidza, ate' nácagaca ni'ë ca ya'zxón ta'yegui. ² Zoa lu në'ë tu guíchido' nayalaz, ate' tu ni'ë ibëla nulibë' lu nísado', en ia'tú ni'ë yögöla nulibë' luyú bidxi. ³ Ní'irö bëë' zidzaj didza', ate' biyön chi'ë ca riyön cate' ribödxí'aba' bëdxí guixi', en cate' budxi bëë' zidzaj didza' na', bila'yöni chí'igaca gadxi guziú'. ⁴ Cate' budxi bila'yöni chí'igaca guziú' na', neda' si' uzúaja' lu guichi, pero biyönda' nu rui'i didza' yehua' yubá, rë nedä': "Bucáchisö didza' ni gulu'i gadxi guziú' na'. Biti' uzúaju' didza' na' lu guichi."

⁵ Ní'irö gubáz lá'ayi na' bilé'eda'-në' zuíne' lu nísado', en luyú bidxi, guchisa në'ë ibëla zaca' lúzxibalö, ⁶ ate' ben tsutsu xtídzë' è ni'a que Nu na' zoa caz, Nu na' ben yehua' yubá, en le nacuá' ni', enca' yödzölió, en le nacuá' ni', enca' nísado', en le nacuá' ni', ate' gunnë': "¡Bítirö tse! ⁷ Cate' ucödxë' gubáz lá'ayi igadxi lúzuba' böa' bëdxí, usudxinë' Dios le nagachi' queë', lë na' bulu'finë' yugu' huen dxin queë', bönni' ni' gulu'ë didza' uláz queë'."

⁸ Ní'irö chi'i na' biyönda' rirúaj yehua' yubá bë'len neda' didza' leyúbölö. Gunná: "Guyéaj, yöjxi' guíchido' nayalaj na' zönë' gubáz lá'ayi na' nulibë' lu nísado', en luyú bidxi."

⁹ Guyija' ga na' zoë' gubáz lá'ayi na', en gunábida'-në' gunnë' guíchido' na' quia'. Gubáz lá'ayi na' gudxë' neda', gunnë': "¡Guzxi', gudagu! Lu ru'u gaca zxixi ca naca bidxína'do' queéba' buz, pero lë'u huöáca silá'."

¹⁰ Guzxi'a guíchido' na' zöne', en gudahua' le. Lu ruá'a guca zxixi ca naca bidxína'do' na', pero cate' budxi gudahua' le, böáca silá' lë'a. ¹¹ Ní'irö gudxë' neda': "Ral-la' gu'u didza' leyübölö uláz queë' Dios lógaca zián cö'bönachi izá'a, en gapa nacuá' yúgu'të yödzö, en gapa tuí'i zián didza' yübölö, en lógaca zián bönni' unná bë'."

11

Chopë' bönni' tunë' ba nalí

¹ Ní'irö bidxín nu benna tu gui quia' le naca ca tu yaga ribixi, en gudxi neda': "Guyasa, en burixi yudo' queë' Dios. Burixi ca' bucugu lá'ayi que, en bulaba nupa nacuá' ni' ta'yéaj ládx'i gaca Dios. ² Bucá'ana ca' lö'a que yudo' na' dë ní'ilö, en biti' urixu' le, tu' nadödi lu ná'agaca bönnachi izá'a, ate' ulu'libi ulu'léaj yödzö lá'ayi na' idú ca chopa-un beo'."

³ Gudxë' ca' neda': "Isöл-la'a chopë' bönni' ilunë' ba nalí quia', ate' ilu'ë didza' uláz quia' idú ca chinnu gayuá' yu' tsónnalalaj dza, nácugaquïë' lari' le naca bödzádzado'." ⁴ Chopë' bönni' ni tunë' ba nalí, nácagaquïë' chopa yaga olivo na' nazúaj lu guichi lá'ayi ca naca quégagaquïë', en nácagaquïë' ca' chopa le nuá'gaca guí' na' nacuá' lahuë' Dios, Xani yödzölió. ⁵ Channö güe'ëni nu guá' dö' quégagaquïë', iruaj guí' ruá'agaquïë' le usuniti nu na' rë'ëni guá' dö' quégagaquïë', en guti' nu na', enca' nupa ta'dá'baga' légaquïë'. ⁶ Chopë' ni dë lu ná'agaquïë' ilu'zágü'ë xinöza nisa guiój lúzxiba, para cabí galaj guiój tsca dza na' ral-la' ilu'ë didza' uláz queë' Dios, ate' dë lu ná'agaquïë' ca' ilunë' ga huöáca nisa rön, en ilunë' ga gatsaj yödzöhuë' yödzölió. Ilunë' caní bálati'tës luzuí ilë'ennë'. ⁷ Cate' údxi ilunë' ba nalí, iruajba' böa' sínia' lataj chul-la, en til-lalenba' légaquïë', en ucúl-laba' légaquïë', en gútiba' légaquïë'. ⁸ Le gulaca cazë' ila'túlusö ca' la' nöza lu yödzö zxön, ga ní' gudë'ë ca' Xanru' lë'e yaga cruz, en ca rucúdu'ru' didza', nazi'i le ca' Sodoma, enca' Egipto. ⁹ Idú ca tsonna dza yu' gatsaj bönnachi yúgu'të yödzö, en yúgu'të bönnachi izá'a, en bönnachi tu'i zián didza' yübölö, en bönnachi yúgu'të luyú, ila'lé'eni le gulaca cazë', en biti' ilu' lataj nu ucache' légaquïë' yero ba. ¹⁰ Ulu'dzéjade'e nupa nacuá' yödzölió tu' gulatië', ate' lu yöl-la' rudzeja quéguequi ila'söl-la' le ulu'nödzaj quégaca luzé'eguequi, tu' bulu'saca' zi'ë chopë' ni gulu'ë didza' uláz queë' Dios bönnachi nacuá' yödzölió.

¹¹ Ní'irö cate' chibizá'a tsonna dza yu' gatsaj na', Dios busubanë' légaquïë', ate' gula'yasë' gulazuínë', ate' guladxi gula'dzöbi yúgu'të nupa bila'lë' légaquïë'. ¹² Ní'irö bë' zidzaj didza' tu chi'i yehua' yubá, en gudxi légaquïë': "Guli'cuén ni."

Gula'benë' lu böaj lúzxiba zaca' yehua' yubálö, ate' nupa na' gula'dá'baga' légaquïë' bila'lë' légaquïë'. ¹³ La' ní'isö gudödida' budó' zxu', ate' biguinnaj tu cö' tsa tu chi cö' yugu' yu'u dzö'ö lu yödzö na', ate' lu budó' zxu' na', gulati tsónnalalaj yu' chi gayuá' bönnachi. Guladxi gula'dzöbi nupa ni' nagá'anagaca, ate' gula'gú'u yöl-la' ba Dios zoë' yehua' yubá.

¹⁴ Chigudödi le buropi le rusuniti bönnachi, ate' chizóa idxín le bunni le usuniti léguequi.

Rucödxë' gubáz lá'ayi igadxi lúzuba' böa' bëdxí

15 Bucödxé' gubáz lá'ayi igadxi lúzuba' böa' bëdxi, ate' guluí'i zidzaj didza' yugu' chí'i yehua' yubá, ta'nná:
 Gapa ta'nná bë' bönachi yödzölió nadödigaca lu në'ë Xanru' Dios, en lu në'ë Cristo.
 Lë' inná bë'tica'së'.

16 Ní'irö idapa uru'ë bönni' gula na' rö'ögäquië' gapa na' ta'nná bë'ë lahuë' Dios, bulu'tsaga lógaquië' lu yu, en ta'yéaj ládxí'gaquië' Dios. **17** Ta'nnë':

¡Xantu' Dios, napa cazu' yöl-la' huáca!
 ¡Guzóa cazu', en zoa cazu', en ral-la' guída cazu'
 ¡Xclenu', tu' chibugunu' dxin yöl-la' huáca zxön quiu', en risí lo' rinná bë'u!

18 ¡Gula'lé bönachi yugu' yödzö pero chibidxín dza gunu' léguequi xíguia'!
 ¡Naca dza uchi'a usöröu' nupa chinátigaca!
 ¡Ubí'u quégäquië' huen dxin quiu', yugu' bönni' gulu'ë didza' uláz quiu', nupa néquiguequi quez quiu', en gulún bal Lo', nupa nácagaca cá'asö, en nupa nácagaca lo!
 ¡Chibidxín dza usuníti' nupa bulu'suniti yödzölió!

19 Ní'irö guyalaj yudo' queë' Dios rö'ögäquië' yehua' yubá, ate' bilá' lahui guí'na lá'ayi ga yu'u didza' rucá'ana tsahui' le nunë' Dios. Guyépi yösa, en gulú'u bö zidzaj, en gunnë guziú' luyú. Gudödi budó' zxu', en gurö'ögäquië' bögü' yöla sunna.

12

Tunu nigula, en tuba' bëla zxön xitsini'

1 Ní'irö bilá' lahui yehua' yubá tu le naca bë'da', bulu'i lonu tu nigula nácunu le naca ca gubidza, en zoa zxan ní'anu beo'. Dxía ícjanu tu le néquini oro ga dxíagacaba' chinnu bólaj bení'. **2** Nigula ni chizóa soa bï'ido' queënu, en ribödxinu tu' rúdixa' lë'ënu. Rigu'i rizáca'nu ruzóanu bï'ido' queënu. **3** Ní'irö ia'tú le naca bë' bilá' lahui yehua' yubá. Bulu'i loba' tuba' bëla zxön xitsini'. Nácabz' xiná gui'is, ate' dxíagaca gadxi ícjaba', en chi lúzuba', ate' dxía tu le néquini oro tu tu ícjaba' na'. **4** Len xibanba' gú'uyöjbä' tu cö' tsa tu tsonna cö' bólaj lúzxiba, en gurú'unaba' légaracaba' luyú. Guzuiba' bëla zxön xitsini' na' lonu nigula na' chizóa sóabi' bï'ido' queënu. Zóaba' sina' gáguba'bi' bï'ido' queënu na' ca gáljabi' na'. **5** Buzóanu-bi' tubi' bi'i bönni'do' ral-la' inná bë'ebi' yúgu'te yöödzö len tu xiyaga guíë. La' bucuítatë'ë-bi' Dios bï'ido' queënu na', en buchisë'-bi' ga ni' zoa cazë' Lë', rö'ë lataj lo ga na' rinná bë'ë. **6** Buzxúnnajnu nigula na', zéajnu lu lataj cá'asö, ga ni' chinupë'ë Dios lataj queënu. Ulu'gahuë'-nu ni' idu ca chinnu gayuá' yu' tsónnalalaj'dza.

7 Gudödi gulaca lë ni, gúcada' gudil-la yehua' yubá. Gubáz lá'ayi lo lë' Miguel, en yugu' gubáz lá'ayi dá'gaquië' lë' gula'díl-lalenë'-ba' bëla zxön xitsini' na'. Gula'díl-la bëla zxön na', en yugu' gubáz xihui' dá'gaca lëba' **8** pero biti' bila'deli' lu gudil-la na'. Que lë ni na' bíti'rö bidzöli xilátjagaca yehua' yubá. **9** Caní guca, gula'rú'unë'-ba' bëla zxön xitsini' na' ní'ilö. Nácabz' bëla na' zóaba' dza ni'te, lëba' tu' xihui'. Gula'rú'unë' tu' xihui' yödzölió, dzágagaca le gubáz xihui' na' dá'gaca le.

10 Ní'irö biyönda' tu chí'i ruí'i zidzaj didza' yehua' yubá, rnna: "Na'a chibidxín dza nulu'ë lahu yöl-la' rusölä nunë' Dios, en yöl-la' huáca queë', en le rinná bë'ë, enca' le rinná bë'ë Cristo, tu' chigula'rú'unë' ní'ilö nu na' buzegui yugu' böchí' luzá'aru' didza'. Rëla, en té dza buzegui légaquië' didza' lahuë' Dios queëru'. **11** Yugu' böchí' luzá'aru' ni bulu'cul-lë' nu na', tu' bulu'gunë' dxin xichönë' Bönni' na' náquië' Bö'cu' Zxíla'do' queë' Dios, en tu' bulu'gunë' dxin didza' na' gulunë' ba nalí queë'. Biti' gului'i láxhi'gaquië' yöl-la' na'bán quégäquië', pero gulatië'. **12** Que lë ni na' gaca yöl-la' rudzeja yehua' yubá. ¡Buli'dzeja libí'ili', zóali' ni! ¡Bica' bayechi' libí'ili' zóali' yödzölió, en lu nísado', tu' chibötaj tu' xihui', en bidzxín ga zóali! Riléde'e tu' xihui' na' tu' chiréquibe'e ia'tú chí'isö'de lataj que."

13 Cate' gúquibe'eba' bëla zxöön xitsiní' na' chigula'rú'unë'-ba' luyú, ní'irö yöjsóa régua'ba'-nu nigula na' buzóanu bi'i bönni'do' na' queënu. **14** Ní'irö Dios bë'ë-nu nigula na' chopá xíliba' bisa' nácagaca zxöön para gaca sunu, en icuítanu ga na' zóaba' bëla zxöön xitsiní' na', en idxinnu xilátjanu lu lataj cásö. Ní' ulu'gahüe'-nu idú tsonna iz yu' gatsaj. **15** Bëla zxöön xitsiní' na' gúbabá' nisa zile zaca' cúdzu'lönu, le guca ca tu nisa yegu, en gú'uniba' gua'të nigula na'. **16** Ní'irö luyú gúcalen nigula na'. Guyalaj luyú na', en gü'i nisa yegu na' gúbabá' bëla zxöön xitsiní' na'. **17** Ní'irö bëla zxöön xitsiní' na' guléde'eba'-nu nigula na', ate' guyéaja' yöjtí'lalenba' nupa nagá'anagaca queënu di'a dza queënu, nupa na' tun ca rnna le gunná bë'ë Dios, en nazí' lu në'eguequi le nunë' Jesucristo ba nalí.

13

Chópaba' böa' sínia'

1 Guzuída' lu yuzxi ra' nísado', en bilé'eda' ribenba' rirúajba' lu nísado' tuba' böa' sínia' dxíagaca gadxi ícjaba', en chi lúzuba'. Dxíagaca lúzuba' chi le néquini oro, ate' láhuigaca ícjaba' da' tu la le naca xihui' le cabí rilé'e Dios dxi'a. **2** Böa' sínia' na' bilé'eda'-ba' riná'aba' ca nácaba' tu bëdxito', nacuá' ní'aba' ca nácagaca ní'aba' oso, ate' ruá'aba' naca ca naca ruá'aba' bëdxí guixi'. Bëla zxöön xitsiní' na' budödiba' lu na'aba' böa' sínia' ni yöl-la' huáca queëba', enca' xilátjaba' ga rinná bë'ëba', en yöl-la' unná bë'zxöön queëba'. **3** Dxíajahue' tu ícjaba' böa' sínia' na', le naca le guti lëba', pero buniti hué' na', ate' bulu'bani yúgu'të böñachi yödzölió, en yöjdá'gaca böa' sínia' na'. **4** Gula'yéaj láxhi'gaquië'-ba' bëla zxöön xitsiní' na', tu' budödiba' yöl-la' unná bë' queëba' lu ná'aba' böa' sínia' na'. Gula'yéaj láxhi'gaquië'-ba' böa' sínia' na', en gula'nné': "¿Nuzxi caz naca zxöön ca naca zxöön böa' sínia' na', en nuzxi caz sequi' til-lalen lëba'?"

5 Guta' lu ná'aba' böa' sínia' na' bë'ëba' didza' ba zxöön, en didza' xihui' le rinnëba' queë' Dios. Idú ca chopá-un beo' guta' lu ná'aba' yöl-la' unná bë'. **6** Gusi' loba' rinnëba' queë' Dios, en rinnë xihui'ba' que Lë' Dios, en que lataj lá'ayi queë', en quégaca nupa nacuá' yehua' yubá. **7** Guta' lu ná'aba' gudíllalenba' nupa néquiguequi quez queë' Dios, en bucúl-laba' légaquië'. Guta' ca' lu ná'aba' gunná bë'ëba' yúgu'të böñachi izá'a, böñachi yúgu'të yödzö, en böñachi tuí'i yúgu'të didza' yúbölö, en böñachi idútë yödzölió. **8** Yúgu'të böñachi nacuá' yödzölió gula'yéaj láxhi'gaca böa' sínia' na', nupa na'biti' nazúajaca láguequi lu guichi que yöl-la' na'bán, guichi na' buzúajé' Bönni' na' náquië' Bö'cu' Zxíla'do' queë' Dios cate' si' guta' yödzölió. Buzóaa cazé' Dios gútie' Bönni' na' ni'a quégaca böñachi queë'.

9 Channö nu riyöni, ral-la' uzë nagui. **10** Nupa nucu'ë Dios idzúngaca, ral-la' idzúngaca, ate' nupa nucu'ë Dios para nu guti léguequi len guïë tuchi', len guïë tuchi' ilátigaca. Que lë ni na', ral-la' ila'böza zxön ladxi' nupa néquiguequi queë' Dios, en ta'yéajlé' Lë'.

11 Gudödi na' bilé'eda'-ba' ia'tuba' böa' sínia' gurenba' birúajba' lu yu. Dxíagaca chopá lúzuba' ca naca lúzuba' bö'cu' zxila', en rui'iba' didza' ca na' ruí'iba' didza' bëla zxön xitsiní' na'. **12** Dë lu ná'aba' böa' sínia' ni yúgu'të yöl-la' unná bë' queëba' böa' sínia' bidxinba' zí'alö, cate' dzágaba' lëba'. Runba' böa' sínia' buropi ni ga ta'yéaj ládxi'gaca yúgu'të böñachi nacuá' yödzölió böa' sínia' zí'alö na', böa' na' buniti huë' le guti lëba'. **13** Böa' buropi na' runba' ca' le nácagaca bë' ga ridxintë runba' ga ruhuóxaj guí' le za' lúzxiba, en ruhuóxaj luyú lógaca yúgu'të böñachi. **14** Rizi' yé'eba' böñachi nacuá' yödzölió len le nácagaca bë' dë lu ná'aba' runba' loba' böa' sínia' zí'alö na'. Rinná bë'eba' böñachi nacuá' yödzölió ilunë' tu budó' ca nácabá' böa' sínia' na' gúcaba' huë' que guïë tuchi', ate' nabanba'. **15** Dë lu ná'aba' runba' ga soa ibán budó' na' naca ca nácabá' böa' sínia' zí'alö na', en gü'i didza' budó' ni, en gun ga nu guti yúgu'të nupa biti' ila'yéaj ládxi'gaca le. **16** Benba' ga gudá' yúgu'të böñachi tu le naca bë' dá'gaca lëba', nupa nácagaca cá'asö, en nupa nácagaca lo, nupa ta'lé'e yöl-la' tsahui', en nupa nácagaca yechi', nupa biti' nadó'ogaca, en nupa nadó'ogaca. Budá'aba' le lu ná'agaca ibéla o ra' xigágaca böñachi na'. **17** Cuntu nu gaca bi ga'u o bi guti' channö cabí da' nu na' lë'na' naca bë', o channö cabí da' nu na' laba' böa' sínia' na', o le nabábaba' nuá'aba'. **18** Na'a riquínnu' yöl-la' réajni'i. Nu napa yöl-la' réajni'i ral-la' ulábatëz tsca le nabábaba' nuá'aba' böa' sínia' na', le naca ca le nababé' tu bönni', ate' le nabábaba' na' naca xopa gayuá' yu' tsónnalalaj yu' xopa.

14

Le tul-lë' tu gayuá' yu' tapa-un milë' bönni'

1 Gudödi ni' buyúa', en bilé'eda'-në' Bönni' na' náquië' Bö'cu' Zxíla'do' zuínë' lu guí'ado' nazí'i le Sión. Nacuá'lenë' Lë' tu gayuá' yu' tapa-un milë' bönni', da' ra' xigágaciue' Lë' Bönni' na' náquië' Bö'cu' Zxíla'do', enca' Lë' Xuzë'. **2** Ni'irö biyönda' tu le rigú'u bö' yehua' yubá, le rinné zidzaj ca rinné tu yegu zxön, en ca rinné guziú'. Biyönda' le riyön cate' ta'guínnië' lë'e tu le rul-la zë zián du que. **3** Tul-lë' tu le rul-la cubi, nacu'ë ca dödilö lahui lataj lo ni', enca' ca dödilö lahui ga na' nacuá' idapa nupa na' nabángaca len yugu' bönni' gula na'. Cúnturö nu gaca gul-la le rul-la ni, pero légacasë' tu gayuá' yu' tapa-un milë' bönni' ni, bönni' na' böa'uë' Cristo légaquië' ladaj böñachi yödzölió. **4** Nácagaquië' bönni' ni idú ladxi'. Biti' gula'cuá'lenë' nigula, tu' nácagaquië' idú bönni' ra'bán. Sójácalenë' Bönni' na' náquië' Bö'cu' Zxíla'do' gáti'tés ga sa'yéaje'. Cristo caz böá'uë' légaquië' lädjagaca böñachi, ate' nácagaca nupa bulu'dödi cuíngaciue' zí'alö queë' Dios, enca' queë' Bönni' na' náquië' Bö'cu' Zxíla'do'. **5** Catu caz gula'zí' yë'ë, ate' cuntu nu gaca bi innë' quégaciue' ga na' nacu'ë ca dödilö lahui lataj lo ga rö'ë Dios.

Didza' röjuá'gaquië' tsonna gubáz lá'ayi

6 Ni'irö bilé'eda' ia'túë' gubáz lá'ayi, ridödë' lu bö'ös lúzxiba, en röju'ë didza' dxí'a zóatica'sö para gunë' libán que lögaca nupa nacuá' yödzölió, böñachi idútë luyú, yúgu'të böñachi izá'a, en böñachi tu'i yúgu'të didza' izá'a, en böñachi

yúgu'té yödzö. ⁷ Ru'ë zidzaj didza', rnnë': "¡Guli'gádxi Dios, en guli'cu'ë yöl-la' ba tu' chizóa uchi'a usörö'ë bönachi! ¡Guli'tséaj ládxë'ë Dios, nunë' lúzxiba, en luyú, en nísado', en gapa ralaj nisa!"

⁸ Ia'tué' gubáz lá'ayi söjnáhuë' gubáz lá'ayi ni, en rnnë': "¡Chibudxi que yödzö Babilonia! ¡Chibudxi que yödzö zxön na! Caní guca que, tu' gulún nupa nacuá' ni' ga gula'zí' lu ná'agaquië' bönni' yúgu'té yödzö ilunë' ca nácacaca le ta'zé ládx'i'gaquië' le ruá' dö'."

⁹ Ia'tué' gubáz lá'ayi söjnáhuë' gubáz lá'ayi buropi ni, en ru'ë zidzaj didza', rnnë': "¡Channó nu tseaj ladxi'-ba' böa' sínia' na', enca' budó' queéba', en güí'i lataj ta' ra' xigué o lu në'e le naca bë' da' läba', ¹⁰ gunë' Dios nu ni xíguia' lu yöl-la' rilé queé! ¡Qui'i saca' nu na'lu guí', en lu lë na' ruzégu'ida', lógaca gubáz lá'ayi, en lahué' Bönni' na' náquie' Bö cu' Zxíla do'! ¹¹ Cuéntica'sö dzön que guí' ga ni' qui'i saca' nu na'. Rëla, en te dza qui'i saca', ate' catu caz gata' lataj ulu'zí' ládx'i'gaca nupa ila'yéaj ládx'i'gaca-ba' böa' sínia' na', en budó' queéba'. Biti' ulu'zí' ládx'i'gaca nupa ilu'i lataj ta' laba' láguequi. ¹² Que lë ni na' nupa na' néquiguequi queé' Dios, en tun ca rnna le gunná bë'ë, en ta'yéajlë' Jesús, ral-la' ila'böa zxön ladxi'."

¹³ Ní'irö biyónda' chi'i no ruí'i didza' yehua' yubá, en rë neda': "Buzúaj lu guichi lë ni: ¡Bica' bágaca nupa ilátigaca na'a si lo, nupa na' ta'yéajlë' Xanru'!"

Dios Bö' Lá'ayi rnnë': "¡Ca' gaca! ¡Ulu'zí' ládx'i'gaquië' lu dxin gulunë', en ulu'zí'ë xibé ca sa'yéaj le gulunë'!"

Tu'zi'ë le rulá' luyú

¹⁴ Ní'irö buyúa', en bilé'eda' tu böaj lúzxiba chiguichido'os, ate' lu böaj na' rö'ë tu bönni' náquie' ca náquie' Bönni' Guljë' Bönachi, ate' dxia icjë' tu le néquini oro, ate' zöne' tu guié tuchi' lu në'ë. ¹⁵ Birúajë' tué' gubáz lá'ayi lu yudo' rö'ö yehua' yubá, ate' bë'ë zidzaj didza', en gudxë' Nu na' rö'ö lu böaj na', gunnë': "¡Bugún dxin guié tuchi' quiu', en guchugu zxoa' xtila, tu' chibidxín dza nu uzí' le! ¡Chinabídx do que le dë yödzölió!"

¹⁶ Ní'irö Nu na' rö'ö lu böaj na' bugún dxin guié tuchi' idútë yödzölió, ate' buzi'ë le rulá' luyú.

¹⁷ Ní'irö birúajë' tu gubáz lá'ayi lu yudo' zoa yehua' yubá. Nu'ë ca' tu guié tuchi'. ¹⁸ Birúajë' ia'tué' gubáz lá'ayi ra' bucugu ni', dë lu në'ë inná bë'enë' guí', ate' bë'ë zidzaj didza', en bulidzë' gubáz lá'ayi zí'alö na' nu'ë guié tuchi', gunnë': "¡Bugún dxin guié tuchi' quiu', en butubi tu'xóa huéaj le ta'bía lubá uva rö'gaca yödzölió, tu' chiná le ta'bía lubá uva!"

¹⁹ Ní'irö gubáz lá'ayi ni bugunë' dxin guié tuchi' idútë yödzölió, en butubë' le ta'bía lubá uva rö'gaca luyú, ate' yöjc'hü'unë' le ta'bía lubá uva na' lu yero zxön ga izí xisi. Yugu' lë ni rulu'i ca gunë' Dios, gunë' xíguia' bönachi nacuá' yödzölió. ²⁰ Bulu'libë' le ta'bía lubá uva na' lu lerui zoa ní'ilö ra' yödzö, ate' lu lerui na' birúaj rön, en gurén ga bidxitë ruá'agacaba' böa', en gudödi rön na' idú tsca gaca sá'aru' idú chinna dza.

15

Yugu' gubáz lá'ayi nuá'gaquië' gadxi yödzöhuë'

¹ Bilé'eda' ia'tú le nácada' bë' yehua' yubá, le run ga nu rubani. Bila'rúajë' gadxi gubáz lá'ayi, nuá'agaquië' gadxi yödzöhuë' röjsétegaca, le ugunë' dxin Dios, údxí gunë' xíguia' bönachi yödzölió.

² Bilé'eda' ca' tu le naca ca tu nísado' le rëpi yösa bení' ca guiöj jara le nutsí'i guí'. Nupa na' bulu'xicja lu böa' sínia' na', en lu budó' queëba', en lu laba', zuígaca lu lë na' naca ca tu nísado', en nuá'agaquie' le tul-la, yugu' le bë'ë Dios queëgaquie'. ³ Tul-lë' le rul-la na' bil-lë' Moisés, bönni' huen dxin queë' Dios. Naca tu le rul-la queë' Bönni' na' náquië' Bö'cu' Zxíla'do'. Ta'nné':
 ¡Li', Xantu' Dios, zxönterö nacu' Li'!
 ¡Zxönterö naca yúgu'të le benu',
 le tun ga rubánitu'
 ¡Li' rinná bë'enu' yugu' yödzö!
 ¡ldú dxí'ado', en idú tsahui' naca ca bi runu'
⁴ ¿Nuzxi caz cabí gadxi Li', Xantu'?
 ¿Nuzxi caz cabí cu'u Li' yöl-la' ba?
 ¡Tuzu' Li' nacu' lá'ayi!
 ¡lla'dxín böñachi yúgu'të yödzö,
 en ila'yéaj láxí'guequi Li'
 tu' ta'lé'e naca tsahui' yúgu'të le runu'!

⁵ Gudödi guca lë ni, buyúa', en bilé'eda' guyalaj yudo' yehua' yubá ga ni' dë lataj lá'ayi que le naca bë' zóalenë' Dios böñachi queë'. ⁶ Bila'rúajé' gadxi gubáz lá'ayi lu lataj lá'ayi na', nuá'agaquie' gadxi yödzöhuë' na'. Nácugaquie' lari' nazáca'da' le rëpi yösa bení', en núga'gaca luchú'ugaquie' le néquigueequini oro. ⁷ Ni'irö tu nu nutsa' ladaj idapa nupa na' nabángaca, bë' que queëgaquie' gadxi gubáz lá'ayi na' gadxi zxíga'do' néquigueequini oro, en yúdzugaca le rului'i yöl-la'rile queë' Dios, Bönni' zoa caze'. ⁸ Lu lataj lá'ayi na' bidzá'a dzön, tu' zoa ni' yöl-la' bení', en yöl-la' huáca zxön queë' Dios. Cuntu nu sequí' tsaza lu lataj lá'ayi na' cate' gátsjarö gadxi yödzöhuë' na' nuá'agaquie' gadxi gubáz lá'ayi na'.

16

Yugu' zxíga'do' yúdzugaca le rulu'i yöl-la' rilé queë' Dios

¹ Ni'irö biyönda' chi'i nu ru'i zidzaj didza' lataj lá'ayi na', en rë gadxi gubáz lá'ayi na', rnna: "¡Guli'tséaj! ¡Guli'tsöjlálaj gadxi zxíga'do' na' lu yödzölió, le yúdzugaca lë na' rulu'i yöl-la' rilé queë' Dios!"

² Guyijé' gubáz lá'ayi zí'alö, en yöjlaljé' le yudzu zxíga'do' na' zönë' lu yödzölió. Lë na' yudzu zxíga'do' na' ben ga gutsaj yudzu' ya'a le riláda' idútë le naca caz nupa na' da' léguequi le naca bë' dá'gaca böa' sínia' na', enca' nupa na' ta'yéaj láxí'gaca budó' queëba'.

³ Ni'irö guyijé' gubáz lá'ayi buropi, en yöjlaljé' le yudzu zxíga'do' na' zönë' lu nísado', ate' nisa na' böáca rön ca naca rön queë' tu bönni' nati, ate' gulati yúgu'të nupa nabángaca nacuá' lu nísado' na'.

⁴ Guyijé' gubáz lá'ayi bunni, en yöjlaljé' le yudzu zxíga'do' na' zönë' gapa dë yegu, en gapa ralaj nisa, ate' gapa dë nisa na' bulu'huöáca rön. ⁵ Ni'irö biyönda' ru'ë didza' gubáz lá'ayi na' dë lu në'ë rinná bë'enë' nisa na', rnne': "¡Xantu' Dios Lá'ayi! ¡Zoa cazu', en guzóa cazu'! ¡Tsahui' nacu' tu' richugu' caní quégaca böñachi ⁶ tu' bulu'laljé' rön quégaca nupa néquiguequi quez quiu', en quégaca nupa gului'i didza' uláz quiu'! ¡Na'a, Li' runu' ga ilë'ajë' rön, tu' caní ral-la' gaca quégagaquie'!"

⁷ Ni'irö biyönda' ru'i didza' tu nu zoa ra' bucugu yehua' yubá ni', rnna: "¡Ca' gaca, Xantu' Dios, napa cazu' yöl-la' unná bë'! ¡Idútë li, en tsahui' naca ca richugu' quégaca böñachi!"

⁸ Guyijé' gubáz lá'ayi budapi na', en yöjlaljé' le yudzu zxíga'do' na' zönë' lu gubidza, ate' gubidza na', bë'ë Dios le lataj uzégui'da' böñachi len gui' que. ⁹ Gula'yégui'da' yúgu'të böñachi tu ruzégui'da' gubidza, pero biti' bulu'bí'i ládxigaca, en biti' gula'gú'u Dios yöl-la' ba. Gula'nné zí'i queë' Dios, Bönni' dë lu nèë' inná bë'ené' yugu' lë ni tu'saca' zí' böñachi.

¹⁰ Guyijé' gubáz lá'ayi guyu'na', en yöjlaljé' le yudzu zxíga'do' zönë' lu xilataj bö'a' sínia' ga na' rinná bë'ëba', ate' gurö'ö chul-la gapa rinná bë'ëba'. Ní'irö, tu' gula'gui'i gula'zaca' böñachi, guláguya'a ládxigaca, ¹¹ pero biti' bulu'bí'i ládxigaca para cabirö ilúngaca le ruá' dö' tunë'. Gula'nné zí'i queë' Dios zoë' yehua' yubá tu' ta'gui'i ta'zaca', en tu' dxíagaca yudzu' ya'a na'.

¹² Guyijé' gubáz lá'ayi buzxopi na', en yöjlaljé' le yudzu zxíga'do' na' zönë' lu yegu zxön nazí'i le Eufrates, ate' gubidxi nisa yegu na' para ibá'a nöza ga ila'dödi nupa ta'nná bë', nupa ila'rúaj zaca' ga rilén gubidza.

¹³ Ní'irö bilé'eda' bëla zxön xitsini' na', en bö'a' sínia'na', en bönni' ru'ë didza' uláz quégacaba'. Bila'rúaj tsonna bö' xihui' tun ditaj böñachi lu ruá'agaca nupa na'. Nalá'gaca ca nalá'gacaba' buludzu. ¹⁴ Nácagaca yonna bö' ni bö' que tu' xihui', bö' na' tun le nácagaca bë' le ilún ga ulu'bani böñachi. Yójaca bö' xihui' na' idú yödzölió, en yöjtübigaca nupa ta'nná bë', para tsöjáquië' lu gudil-la na' gaca lu dza zxön queë' Dios, Bönni' napa cazë' yöl-la' unná bë'. ¹⁵ Caní rnne' Dios: "¡Buli' yútsöca'! Guída' tsálido'os ca ridxiné' tu bönni' gubán. Bica' ba nu zoa ban ladxi', en run chi'i le nacu nu na', en rúntica'sö dxi'a, para cabí gun bayudxi ta xiguídisö, en para cabí utu'i nu na' lahuí' lögaca böñachi." ¹⁶ Yugu' bö' xihui' na' bulu'tubi yugu' bönni' ta'nná bë'ë, ate' bulu'dubë' tu lataj nazí'i le lu didza' hebreo: Armagedón.

¹⁷ Guyijé' gubáz lá'ayi igadxi na', en yöjlaljé' le yudzu zxíga'do' na' zönë' lu bö'ös, ate' bë' zidzaj didza' tu nu zoa lu lataj lá'ayi zoa yehua' yubá ga dë lataj lo na', rnna: "Chinaca."

¹⁸ Ní'irö guyépi yösa, en gurö'öda' bö, en gunnë guziú'. Gudödida' budó' zxu', le gudödida'rö ca gudödi tsanni ni nacuá' böñachi yödzölió. ¹⁹ Birúaj tsonna cö'ölö yödzö zxön na', ate' gula'guínnaj yödzö nacuá' yödzölió. Yöjené' Dios le naca xihui' gulún böñachi yödzö zxön na' nazí'i le Babilonia, ate' lu yöl-la' rilé queë' benë' xíguia' nupa nacuá' ni'. ²⁰ Bila'gachi' yugu' luyú bidxi dzö'ö lu nísado', ate' biti'rö gula'lá' yugu' gui'ado'. ²¹ Bóxaj ca' guiój bögu' yöla sunna, le za' lúxiba, en yöjsóa ícagaca böñachi, ate' nál-li' tu tu guiój bögu' na' ca tu gayuá' guië, ate' yúgu'të böñachi gula'nné xihui' queë' Dios tu' nözi guiój bögu' na' tu' bulu'sáca'da' zí'i léguequi.

17

Dios richúguië' queënu nigula udá dzaga

¹ Ní'irö bidxiné' tuë' gubáz lá'ayi ga zoa', nababë' gadxi gubáz lá'ayi na' gula'zönë' gadxi zxíga'do' na' néquiguequini oro. Bé'lenë' neda' didza', gunnë': "Gudá ni, ate' uluf'ida' li' ca gunë' Dios, gunë'-nu xíguia' nigula udá dzaga na', rö'önu lu nísado' zián. ² Gula'cua'len lënu nupa ta'nná bë' luyú yödzölió, en gulún le ruá' dö', ate' gula'zudxi nupa nacuá' yödzölió ni, tu' gulunlen lënu le biti' naca dxi'a."

³ Dios Bo' Lá'ayi guzóalenë' neda', ate' gubáz lá'ayi na' guché'ë neda' tu lu lataj cá'asö, ate' bilé'eda'-nu tu nigula ni' dxíanu cíduz'ba' tuba' bö'a' sínia', náca'ba' xiná gui'ido'os. Dxíagaca gadxi ícjaba', en chi lúzuba', en dá'gaca ca' lëba' le ta'nné xihui' queë' Dios. ⁴ Nigula na' dxíanu lëba' nácuñu lari' xiná

chul-la, en lari' xiná guí'ido'os. Nazí'i biquitaj queénu le néquiguequini oro, en yugu' guiój nazaca', en yugu' bugá. Lu ná'anu rö'ö tu zxiga'do' néquini oro, en yudzu le nácacaca xihui', en le ruá' dö' runnu. ⁵ Ra' xigánu dá'gaca ca lënu, le tu'lui' tu le nagachi', en ta'nná caní: "Yödzö Babilonia Le Naca Lo", en "Xiná'agacanu Nigula Udá Dzaga", en "Xiná'agaca Le Xihui' Dzö'ö Yödzölió." ⁶ Gúquibe'eda' nazúxdinxu nigula na' tu' bennu ga gulaj rön quégaca nupa néquiguequi queé' Dios, en quégaca nupa na' zoa nu bëti léguequi tu' gulún ba nali' queé' Jesús. Cate' bilé'eda'-nu, bubánide'eda'. ⁷ Gudxë' gubáz lá'ayi na' neda', gunnë: "¿Bizx que rubáninu? Uzáejni'ida' li' lë na' nagachi', le rulu'i ca naca nigula ni, enca' le rulu'i ca naca böa' sínia' na' dxianu-ba', böa' na' dxíagaca gadxi ícjaba', en chi lúzuba'. ⁸ Böa' sínia' na' bilé'enu' guzóaba' zí'alö, pero biti' zóaba' na'a. Böa' ni chizóa irúajba' lataj chul-la, ate' tséajba' ga nítiba' tsaz. Ulu'bánide'e nupa nacuá' luyú cabí nazúajgaca láguequi lu guichi que yöl-la' na'bán, le buzúajé' Dios dza ni'te quez cate' si' gata' yödzölió. Cate' ila'lé'eni böa' sínia' na' guzóaba' zí'atëlö, pero biti' zóaba' na'a, ulu'bani tu' nubanba'.

⁹ 'Lë ni naca tu le uzáejni'i nu gaca tséajni'i: Gadxi ícjaba' na' tu'lui' gadxi guí'ado' gapa rö'önu nigula na'. ¹⁰ Lësca' caní gadxi ícjaba' na' tu'lui' gadxë' bönni' ta'nná bë'ë. Gáyu'ë bönni' ni chigudödi quégaguie'. Tuë' bönni' ni rinná bë'ë na'a, ate' ia'tué' biti' ridxíninë', pero cate' guídë', inná bë'ë tu chí'ido'osö. ¹¹ Böa' sínia' na' guzóaba', pero biti' zóaba' na'a, rulu'i tu bönni' izxunu', inná bë'ë. Nunë' tsözxöön bönni' gadxi na', ate' tödi ni nítie' tsaz.

¹² 'Chi lúzuba' na' bilé'enu' tu'lui' chié' bönni' ila'nná bë'ë. Biti' ta'zí'ininë' yöl-la' unná bë', pero ila'zi'ë yöl-la' unná bë' tu chí'ido'osö, en ila'nná bë'ë tsözxöön len böa' sínia' na'. ¹³ Chié' bönni' ni, lëbisó nácagaquië', ate' ulu'dödë' yöl-la' unná bë' quégaguie', en le nazí' lu ná'agaquië' lu ná'aba' böa' sínia' na'. ¹⁴ Ila'díl-lalenë' Bönni' na' náquië' Bö'cu' Zxila'do', pero Lë' ucul-lë' légaquië', tu' náquië' Xángaca yúgu'të nupa nácacaca xan, en náquië' Bönni' rinná bë'enë yúgu'të nupa ta'nná bë'. Nupa nacuá'len Lë', bulidzë' Dios léguequi, en guröë' léguequi, ate' tsaz dá'gaca Lë'."

¹⁵ Gubáz lá'ayi na' gudxë' ca' neda', gunnë: "Yugu' nísado' na' bilé'enu' gapa ni' rö'önu nigula udá dzaga na', tu'lui' i bönachi yugu' yödzö, en yugu' bönachi izá'a, en bönachi tu'i yugu' didza'yúbölö, en bönachi yugu' luyú. ¹⁶ Chi lúzuba' böa' sínia' na' bilé'enu', en tu'lui' chié' bönni', biti' ila'lé'enë'-nu nigula udá dzaga na' dxi'a, ate' ulu'cá'anë'-nu cá'asö, en xiguídiso. Ilahuë' xipëla'nu, en ulu'zegui'ë'-nu len gui'. ¹⁷ Dios uchízië' icja ládxido'gaquië' chié' bönni' na' le gun ga ilunë' ca rë'ëni quégine' Lë', ate' ilácagaquië' tuz, en ulu'dödë' yöl-la' unná bë' quégaguie' lu ná'aba' böa' sínia' na' para gaca ca rnna xtídzë'ë. ¹⁸ Nigula na' bilé'enu'-nu rulu'i yödzö zxöön na' rinná bë'e nupa ta'nná bë' yödzölió ni."

18

Riguinnaj yödzö Babilonia

¹ Gudödi na' bilé'eda'-në' ia'tué' gubáz lá'ayi ruhuötje' rirúajé' yehua' yubá, en dë lu në'ë yöl-la' unná bë' zxöön, ate' guyëpi yösa bení' luyú ni'a que yöl-la' bení' queé' gubáz lá'ayi na'. ² Bë'ë zidzaj didza'yugánu' na', gunnë': ¡Chibiguínnaj! ¡Chibiguínnaj Babilonia, yödzö zxöön na'! ¡Chiböoáca xilataj tu' xihui', en xilátjagaca bö' xihui' tun ditaj bönachi! ¡Yugu' biguínni xitsin', en yugu' biguínni xihui' tu'zóaba' xilátjagacaba' ni'!

³ Caní guca que yödzö na' ni'a que le gulún bönachi nacuá' ni'.
 Guluné' ga gulún bönachi yúgu'té yödzö ca nácagaca le ta'zësö ladxi' le ruá' dö'.
 Nupa ta'nná bë' luyú yödzölió gulunlen légaquié' le ruá' dö',
 ate' guta' yöl-la' tsahui' quégaquié' bönni' to'o tuti' nacu'ë yödzölió
 tu' guyánda' yugu' le nazaca' gula'zë ladxi' bönachi ni'.

⁴ Ní'irö biyönda' ruí'i didza' ia'tú nu zoa yehua' yubá, rnna:
 Guli'rúaj lu yödzö na', libí'ilí néquili' quia'
 para cabí gunli' dul-la' tsözxón len légaquié',
 en para cabí qui'i sáca'li' le gaca quégaquié'.

⁵ Nayánda' dul-la' nabága'gaquié',
 en chinayasa nadxín caz lúzxiba,
 pero Dios röjnené' le ruá' dö' nungaquié'.

⁶ Buli'bí'i quégaquié' ca na' guluné' queéli'.
 Buli'bí'i quégaquié' chopá cö' tsca le guluné'.
 Buli'bí'i quégaquié' chopá cö' tsca le naca xihui' guluné' queéli'.

⁷ Guli'gún ga ila'guí'i ila'záquié', en ila'bödxi yéchë'ë
 tsca guca yöl-la' ba, en yöl-la' zxön gului'i cuíngaquié'.
 Ta'zá' ládxí'gaquié', ta'nné':
 Rö'ötu' ni, rinná bë'etu'.

Biti' nácatu' uzébi, en catu caz cödxi yéchi'tu'.

⁸ Que lë ni na', tu dzasö ila'dxín quégaquié' le ila'guí'i ila'záquié',
 yöl-la' guti, en yöl-la' ribödxi yechi', en yöl-la' ridún.
 Iléguié' lu guí', tu' napa cazé' yöl-la' huáca zxön Xanru' Dios.
 Lé cazé' usiúdxé' quégaquié'.

⁹ Ní'irö gunnë: "Ila'bödxi nupa ta'nná bë' luyú yödzölió, en gulún le ruá' dö' tsözxón len légaquié', en bulu'zí' xibé le nequi quégaquié'. Ila'bödxe', en ila'bödxi yéchë'ë cate' ila'lé'ené' dzön que yödzö zxön na' régui. ¹⁰ Zi'tu' zí'tu'sö ila'cu'ë tu' iládxine' ca gaca xíguia' le gaca que yödzö na', ate' ila'nné': ¡Bica' bayechi' Babilonia, yödzö zxön ni, le gúcada' lo! ¡Tu dzasö guca xíguia' que!"

¹¹ Ní'irö gunnë: "Ila'bödxe' ca bönni' to'o tuti' nacu'ë yödzölió, en ila'bödxi yéchë'ë ni'a que yödzö na' tu' cabirö soa nu ga'u bi ilúti'ë ni'." ¹² Cúnturö nu ga'u ni':

Le néquiguequini oro, en plata,
 en yugu' guiój zaca', en yugu' bugá,
 en yugu' lari' nazáca'da', en lari' xiná chul-la,
 en lari' dxí'ado', en lari' xiná guí'ido'os,
 en yugu' yaga rilá' zxixi,
 en le néquiguequini dxita nazáca'da',
 en le néquiguequini yaga nazáca'da',
 en le néquiguequini guí'e cobre,
 en le néquiguequini guí'e,
 en le néquiguequini guíój jara.

¹³ Cúnturö nu ga'u ni':
 Canel, en yugu' le rilá' zxixi, en yalaj,
 en le rilá' zxixi que mirra, en que yöj olíbano,
 en xisi uva nál-la, en le naca za,
 en yiözja dxí'ado', en zxoa' xtila,
 en yugu' búrrodo', en yugu' bö'cu' zxila',
 en yugu' bö'a', en yugu' carreta,

en yugu' bönni' huen dxin, en ia'bal-la bönachi.

¹⁴ Nupa na' to'o tuti' ilé légaquië', ila'nná:

Nadúagaca le guzé ládxílli'.

Chigudödi quégaca yöl-la' tsahui',

en le nácagaca lachi queëli',

ate' bíti'rö idzöllili' léguequi.

¹⁵ Ní'irö gunnë: "Ila'bödxë' bönni' to'o tuti' na', tu' guta' quégäquië' yöl-la' tsahui' tu' gulúti'le lu yödzö na', ate' ila'cu'ë zi'tu' zí'tu sö tu' iládxine' ca gaca xíguia' le gaca que yödzö na', en ila'bödxí yéchë'ë." ¹⁶ Ila'nnë:

¡Bica' bayechi' yödzö ni guca zxön!

Guca ca tu nigula nácunu lari' nazáca'da',

en lari' xiná chul-la, en lari' xiná guíido'os,

en nazí'i biquitaj queënu le néquiguequini oro

en le néquiguequini guiój zaca', en yugu' bugá.

¹⁷ Tu dzasö guniti yöl-la' tsahui' que yödzö ni.

Ní'irö gunnë: "Yúgu'té bönni' xan barco, en nupa nacuá' lë'egaca barco na', en nupa tu'sá' yugu' barco na', en nupa tun dxin lu nísado', ila'cu'ë zi'tu' zí'tu'so." ¹⁸ Cate' ila'lé'enë' dzön que yödzö na' régui, ila'bödxë', en ila'nnë: "¿Bízzilö yödzö guca zxön ca naca yödzö ni?"

¹⁹ Ní'irö gunnë:

Ulu'dxië' bëchtö ícjagaquië'.

Ila'bödxë', en ila'bödxí yechë'ë, ila'nnë'.

¡Bica' bayechi' yödzö ni guca zxön!

Yöl-la' tsahui' que yödzö ni ben ga guta' yöl-la' tsahui'

quégaca yúgu'té nupa nácagaca xan barco lu nísado'.

Tu dzasö guniti yödzö ni.

²⁰ Buli'dzeja ca gaca que yödzö ni, libíili' zóali' yehua' yubá,

enca' libíili' néquili' queë' Dios,

libíili', bönni' gubáz queë',

en libíili', bönni' ruíili' didza' uláz queë'.

Buli'dzeja, tu' chiguchúguië' Dios que yödzö ni

ni'a que bi gulún queëli' nupa nacuá' lu yödzö ni.

²¹ Ní'irö tuë' gubáz lá'ayi nál-la buchise' tu guiój zxön le naca ca tu guichi riyyetu, ate' gurú'unë' le lu nísado', gunnë:

La' canísö gaca que yödzö Babilonia,

tu' iguínna yödzö na' guca lo,

ate' bíti'rö nu udzöli le.

²² Bíti'rö nu yöni lu yödzö na' nupa ta'guínni lë'e le rul-la,

en caléga nupa tu'cödxi gui

en caléga nupa tu'cödxi lúzuba' böa' bëdxí.

Bíti'rö udzöli bönni' huen dxin ni',

en bíti'rö yöni bö rigú'u le rutu ni'.

²³ Bíti'rö uzení nitú guí' lu yödzö na',

en bití' yöni chí'e bönni' rutsaga ne'e ni',

en caléga chí'ibí' bí'i nigula rutsaga ná'abi'.

Caní gaca sal-la' nácalí' lo, libíili' rá'uli', en rúti'li' lu yödzö ni,

en guzxí' ye'eli' bönachi idútë yödzölió len yöl-la' gudzá' queëli'.

²⁴ Lu yödzö ni gulaj xichöngacaquie' bönni' gulu'ë didza' uláz queë' Dios,

en xichöngaca nupa néquiguequi queë' Dios,

enca' xichöngaca yúgu'té böñachi yödzölió,
tu' bëtigaca nupa nacuá' yödzö ni léguequi.

19

1 Gudödi lë ni biyönda' tu'i zidzaj didza' böñachi zián nacuá' yehua' yubá, ta'nná:
¡Yöl-la' ba Dios! ¡Yöl-la' rusólá runë',
ate' yöl-la' zxön, en yöl-la' unná bë' napë' Dios queëru'
2 ¡Naca idútë li, en tsahui' ca rusiúdxë'
¡Guchúguië' que yödzö na' naca ca tu nigula udá dzaga,
en quégaca böñachi lu yödzö na' ila'niti tsaz!
¡Gulún ditaj böñachi yödzölió tu' nözi le ruá' dö' gulunë'
¡Dios buzí' lëbë' légaquië'
tu' gulutié' yugu' huen dxin queë'
3 Leyúbölö gula'nnë: "¡Yöl-la' ba Dios! ¡Cuéntica'sö dzön ga régui yödzö na'!"

4 Idapa uru'ë bönni' gula ni' bulu'tsaga lógaquië' lu yu tsözxön len idapa
nupa ni' nabángaca, en ta'yéaj ládx'i'gaquië' Dios, Bönni' rö'ë lataj lo queë'.
Gula'nnë: "¡Ca' gaca! ¡Yöl-la' ba Dios!"

5 Ní'irö biyönda' ru'i didza' tu nu zoa lataj lo na', rnna:
¡Guli'cu'ë Dios queëru' yöl-la' ba
yúgu'teli' runli' xichinë', libf'ili' na' rádxili' Lë',
nácali' böñachi cá'asö, en böñachi lo!

Laní que yöl-la' rutsaga na' queë' Bönni' náquië' Bö'cu' Zxila'do'

6 Biyönda' ca' nu ru'i zidzaj didza', le biyön ca riyön cate' tu'i didza' böñachi
zián, en biyön ca' ca riyön ga ridödi tu yegu zxön, o ca riyön cate' rinnë guziú',
ate' rnna:

¡Yöl-la' ba Dios tu' risí lahuë' rinná bë'ë!
¡Napa cazë' yöl-la' huáca!
7 ¡Ral-la' udzeja ládx'i'ru', en uzf'iru' xibë',
en cú'uru'-në' yöl-la' ba
tu' chibidxín dza laní que yöl-la' rutsaga na'
queë' Bönni' na' náquië' Bö'cu' Zxila'do'!
¡Si' lu në'ë Cristo nupa néquiguequi queë'!
¡Chinabá'a queëbi' bi'i utsaga ná'alenbi' Lë'!
¡Nácabí' le rulu'i nupa na' néquiguequi queë'!
8 ¡Dios ru'ë-bi' lataj gáculi' lari' nazáca'da'
le naca idú, en rëpi yösa bení!

Lari' nazáca'da' na' rulu'i le naca tsahui' núngaca nupa néquiguequi queë'
Dios.

9 Ní'irö gubáz lá'ayi na' gudxë' neda', gunnë: "Buzúaj lu guichi didza'
ni: ¡Bica' bágaca nupa na' nulidzë' Dios légaquië' para ila cu'ë laní que yöl-la'
rutsaga na' queë' Bönni' náquië' Bö'cu' Zxila'do'!"

Gudxë' ca' neda': "¡Yugu' didza' idútë li ni ru'ë didza' Dios caz!"

10 Buzóaa zxiba' xini'ë gubáz lá'ayi na' para tseaj ládx'a'a lë', pero gudxë'
neda': "¡Biti' gunu' caní! Neda' ca' naca' huen dxin queë' Dios ca nacu' li', en
ca nácaquaquië' böch'i' luzó'o nazí' lu ná'agaquië' le naca idútë li ca naca queë'
Jesús. ¡Guyéaj ládxë'ë Dios!"

Nupa tu'i didza' uláz queë' Dios, tu'i didza' le naca idútë li ca naca queë'
Jesús.

Bönni' dxié'-ba' böa' chiguichi

¹¹ Ní'irö bilé'eda' nayalaj lúzxiba, ate' bului'i loba' tuba' böa' chiguichi, ate' le' Bönni' dxié'-ba', Nu Run Ca Rnna, enca' Nu Ru'i Didza' Le Nácatë. Caní le' tu' ruchi'a rusöröë' ca naca le naca idútë li, enca' caní tsejë' gudil-la. ¹² Répi yösa bení' guiój lahuë', le nácgacaca ca gui', en dxíagaca icjë' zián le néquiguequini oro. Nazúaj lahuë' tu le le', le cuntu nu nözi, pero tuzë' Lë' nözinë'. ¹³ Nácuë' tu lari' në'aj rön, en le' ca' "Nu Naca Xtídzë'ë Dios." ¹⁴ Röjnógaquië' Lë' ni'a në'ë guizxi yu nacuë' yehua' yubá, dxíagaquië'-ba' böa' chiguichi, en nácuagaquië' lari' nazáca'da', le naca chiguichido's, en biti' naca böṣaj. ¹⁵ Rirúaj ru'ë le naca ca tu guië tuchi' le gúninë' zi' bönachi yugu' yödzö. Inná bé'enë' légaquië' len tu xiyyaga guië, en gunë' légaquië' xigui'a, le gaca quégaquië' ca raca que le ribía lubá uva, zoa nu rulibi léguequi, tu' riléde'enë' Dios, Bönni' napa cazë' yöl-la' unná bë'. ¹⁶ Nazúaj lu lari' nácuë', enca' lu xigatsjë' ca lë', "Bönni' Rinná Bé'enë' Nupa Ta'nná Bé'", enca' "Bönni' Náquië' Xángaca Nupa Nácgacaca Xan."

¹⁷ Ní'irö bilé'eda'-në' tuë' gubáz lá'ayi zuínë' lu gubidza, ate' bë'ë zidzaj didza', en gudxë'-ba' böa' ta'daba' lúzxiba, rnnë': "¡Guli'dá, buli'dubi ga ni gáguli' laní zxöñ queë' Dios! ¹⁸ Gáguli' xipéla'gaca nupa ta'nná bë', en xipéla'gaca nupa ta'nná be'e bönni' röjáquië' gudil-la, en xipéla'gaca nupa nál-lagaca, en xipéla'gacaba' böa', en xipéla'gaca nupa ta'bía légacaba', en xipéla'gaca yúgu'të bönachi, nupa biti' nadó'ogaca, en nupa nadó'ogaca, nupa nácgacaca cá'asö, en nupa nácgacaca lo."

¹⁹ Ní'irö bilé'eda'-ba' böa' sínia' na', enca' yugu' bönni' ta'nná bë'ë yödzölió, en bönni' röjáquië' gudil-la guizxi yu quégaquië', nudúbigaquië' para ilúnlenë' gudil-la Bönni' dxié'-ba' böa' chiguichi, dzágagaca Lë' ni'a në'ë guizxi yu. ²⁰ Bidzunba' böa' sínia' na', enca' bönni' na' bë'ë didza' uláz queëba', bönni' na' benë' yugu' le nácad'a bë' loba', en guzxí' yé'enë' nupa ni' gului'i lataj nu uzúaj láhuiguequi lë na' naca bë' dá'gaca lëba', en gula'yéaj ládzi'gaca budó' queëba'. Böa' sínia' na', enca' bönni' na' bë'ë didza' uláz queëba', gula'rú'unë' léguequi nabángacasö ca' ga rö'ö guí' zxöñ le réguilen lë na' ruzégui'da'. ²¹ Bönni' na' dxié'-ba' böa' chiguich bëtië' yúgu'të nupa na' gudá'gaca léguequi len guíë tuchi' na' rirúaj ru'ë, ate' bulu'huoljaba' yúgu'tëba' böa' na' ta'daba' lúzxiba, tu' guláguba' xipéla'guequi.

20

Chi gayuá' iz

¹ Gudödi lë ni bilé'eda' ruhuötjë' tu gubáz lá'ayi, zë'ë yehua' yubá, en zönë' zxí'ini guíë que lataj chul-la, ate' nu'ë tu du guíë yödx. ² Guzxónë'-ba' bëla zxöñ xitsiní' na', nácab'a bëla guzóaba' dza ni'te, bëla na' lëba' Tu' Xihui', enca' Satanás, ate' bégue'ë'-ba', en bucá'anë'-ba' caní chi gayuá' iz. ³ Yójchú'unë'-ba' lataj chul-la, en busayjë' lataj na', ate' budé'ë tu le riguela' le rusayaj lataj na' para cabirö si' yé'eba' bönachi yugu' yödzö ga izá'arö chi gayuá' iz na', ate' tödi ni' ral-la' yédixa' tu chí'ido'.

⁴ Ní'irö bilé'eda' yugu' lataj gapa ta'bö' nupa ta'nná bë', ate' nupa bila'deli' ulu'chi'a ulu'sörö le raca ta'bö' yugu' lataj na'. Bilé'eda' ca' yugu' bö' gulaca caz bönachi bulu'rixé' yénguequi yugu' bönni' biti' nácgagaquië' tsahui' tu' gulún ba nalí queë' Jesús, en tu' gulún libán que xtídzë'ë Dios. Yugu' bönachi ni biti' gula'yéaj ládzi'gaca böa' sínia' na', en budó' queëba', en biti' gului'i lataj nu uzúaj ra' xígáguequi, o lu në'eguequi lë na' naca bë' nu da' lëba'. Bulu'bán nupa ni lu yöl-la' guti, ate' gula'nná bë'len Cristo chi gayuá' iz, ⁵ pero ia'zíca'rö

bönachi nátigaca biti' bulu'bán. Cate' izá'arö chi gayuá' iz na' ulu'bán. Yöl-la' rubán lu yöl-la' guti guca ni naca le raca zí'alö. ⁶ ¡Bica' ba, en bica' lá'ayi nupa ta'deli' yöl-la' rubán na' raca zí'alö! ¡Yöl-la' guti le raca burópilö biti' bi gaca gun quéguequi, pero ilácagaca bixúz queé' Dios, enca' queé' Cristo, ate' ila'nná bél'en Lé' chi gayuá' iz na'!

⁷ Cate' izá'a chi gayuá' iz na', ulu'sané' Satanás ga na' nadzún. ⁸ Urúaj Satanás, en tsójzxí' ye'e böñachi yugu' yödzö nacuá' idapa la'a yödzölió. Si' ye'e ca' böñachi yödzö Gog, en yödzö Magog, ate' utubi léguequi lu gudil-la. Tsca nácagaca nupa ni, nácagaca ca naca yuzxi rö'ö tu ra' yegu zxön. ⁹ Guizxi yusö gula'dödë' idútë luyú, ate' gula'cu'ë lë'ajlò lataj ga na' nacuá' böñachi néquiguequi queé' Cristo, le naca yödzö na' nadxi'iné' Dios. Ni'irö bené' Dios ga böxaj guí' le birúaj yehua' yubá, le buzegui' légaquië'. ¹⁰ Tu' xihui' na' nazi' ye'e légaquië', yöjchú'unagaquië' le ga rö'ö guí' zxön que lë na' ruzégu'da', ga na' chizóaba' bö'a' sínia' na', enca' bönni' na' bë'ë didza' uláz queéba'. Ila'guí'i ila'zaca' ni' rëla, en te dza yúgu'të iz zá'gaca.

Ta'dxín böñachi lahuë' Dios ga rö'ë ruchi'a rusöröë'

¹¹ Ni'irö bilé'eda' tu lataj lo chiguichi, en bilé'eda' ca' Nu rö'ö ruchi'a rusöröë' lataj na'. Lahui' lo Nu ni gula'nítitë yödzölió, en lúzxiba, ate' bíti'rö budzöli xilatjaguequi. ¹² Bilé'eda' ca' nupa chinátigaca, nupa nácagaca lo, en nupa nácagaca cá'asö, zuíguequiné' lahuë' Dios. Gula'yálaj guichi, en guyalaj ca' ia'tú guichi ga na' nazúajgaca lágaca nupa nadéli'gaca yöl-la' na'bán idú. Buchi'a busöröë' Dios nupa na' chinátigaca tsca naca le nazúaj yugu' lu guichi na', lë na' gulúngaca. ¹³ Lu nísado' bulu'rúaj nupa chinátigaca, nacuá' lu nísado'. Lu yöl-la' guti, en lu lataj chul-la bulu'rúaj nupa chinátigaca, gula'cuá' gapa ni', ate' buchi'a busöröë' Dios tu tu tsca naca le gulúngaca. ¹⁴ Ni'irö yöjtsázagaca yöl-la' guti, en lataj chul-la ga ni' rö'ö guí' zxön le naca lataj que yöl-la' guti le raca burópilö. ¹⁵ Nupa biti' nazúajgaca lu guichi quégaca nupa nadéli'gaca yöl-la' na'bán idú yöjtsázagaca lataj na'.

21

Tu lúzxiba cubi, en tu luyú cubi

¹ Gudödi na' bilé'eda' tu lúzxiba cubi, en tu luyú cubi, tu' chigudödi quégaca lúzxiba na', en luyú na' gula'cuá' zí'alö. Bíti'rö dë nísado'. ² Neda', Juan, bilé'eda' yödzö lá'ayi na', le naca Jerusalén cubi, ruhuötaj, rirúaj yehua' yubá ga zoë' Dios, en chinabá'a que ca nabá'a queébi' bi'i nigula chizóa utsaga ná'alenbi' tu bönni'. ³ Biyönda' rufi' didza' nu rnna yehua' yubá: "¡Buli'yútsöca'! ¡Ga zoë' Dios zóalen böñachi! ¡Sóalené' léguequi, ate' léguequi ilácagaca böñachi queé'! ¡Dios caz sóalené' léguequi, en gáquië' Dios quéguequi!" ⁴ Dios uzxië' nisa ribödxi zoa guiöj lóguequi. Cúnturö nu gati, en cùnturö nu cödxi, en cùnturö nu cödxi yechi', en cùnturö nu qui'i saca', tu' chigudödi quégaca lë na' gulaca zí'alö."

⁵ Ni'irö Nu na' rö'ö lataj lo ni' gunná: "¡Buyútsöca'! ¡Yúgu'të ruúna' cubi!"

Gudxi ca' neda': "¡Buzúaj lu guichi lë ni, tu' naca idútë li didza' ni, en naca löza!"

⁶ Ni'irö gudxi neda': "¡Chinaca caz! ¡Neda' naca' Nu zoa zí'atëlö, enca' Nu röjsete ca naca le risí lo, en le ruúdxite! ¡Nu ribidxi nisa, neda' guna' ga guí'aj nisa na' runna yöl-la' na'bán! ⁷ Nupa ila'deli' lu le raca yödzölió, gaca quéguequi yúgu'të lë ni. Neda' gaca' Dios quéguequi, ate' léguequi ilácagaca

zxí'ini caza',⁸ pero nupa tadxi, en nupa biti' ta'yéajle' neda', en nupa nátagaca xihui', en nupa tuti bönachi, en nupa tun le biti' naca tsahui', en nupa nátagaca udzá', en nupa ta'yéaj ládx'i'gaca budó' guiój budó' yaga, en yúgu'té nupa ta'zí' yé', chizóa riböza xilátjaguequi lu guí', ga ni' rö'ö guí' zxón que lë na' ruzégui'da', lë na' naca yöl-la' guti le raca burópilö."

Yödzö Jerusalén le naca cubi

⁹ Ní'irö tué' gubáz lá'ayi nababé' gadxé' gubáz lá'ayi ni' gula'zönë' gadxi zxíga'do' yúdugaca gadxi yödzöhué' yöjsétegaca, bidé' ga zoa'. Gudxé' neda': "¡Gudá ni! ¡Ulu'ida' li' bi'i nigula na' si' utsaga ná'alenbi' Bönni' na' náquië' Bö'cu' Zxíla'do'!"

¹⁰ Guzoálenë' Dios Bö' Lá'ayi neda', ate' guché'ë gubáz lá'ayi na' neda' tu lu guí'a sibi, en bulu'iné' neda' yödzö lá'ayi Jerusalén, ruhuötaj, rirúaj yehua' yubá ga zoë' Dios. ¹¹ Yödzö ni rëpi yösa bení' tu' zóalen le yöl-la' bení' queë' Dios. Rëpi yösa bení' ca rëpi yösa bení' tu guiój nazáca'da' ca naca guiój guí'do'os nazí'i le jaspe. Naca yödzö na' yení'ido' ca naca guiój jara. ¹² Zoa tu zö'ö zxón, en sibi idú gásib'i ilö yödzö na'. Lë'e zö'ö na' nacuá' chinnu gapa nu riyaza. Ra' gapa nu riyaza na' nacu'ë chinnuë' gubáz lá'ayi tapa chi'ë. Tu tu ga nu riyaza na' nazúaj tu tu lágaca idxinnu cö' di'a dza zxí'ini xi'sóë' Israel. ¹³ Lë'e zö'ö le ruyú saca' ga rilén gubidza nacuá' tsonna gapa nu riyaza, en saca' ga za' bō' ziaga nacuá' tsonna gapa nu riyaza, en saca' tsölä'a ga ridödi gubidza beo' ziaga nacuá' tsonna gapa nu riyaza, en saca' ga ribía gubidza nacuá' ca' tsonna gapa nu riyaza. ¹⁴ Xzan zö'ö que yödzö na' nacuá' chinnu xilibi zö'ö, ate' lë'egaca xilibi zö'ö na' nazúajgaca lágaquië' idxinnuté' bönni' gubáz queë' Bönni' na' náquië' Bö'cu' Zxíla'do'.

¹⁵ Gubáz lá'ayi na' ruí'ilenë' neda' didza' zönë' tu yaga urixi le néquini oro para urixé' tsca naca yödzö na', en tsca nátagaca gapa nu riyaza, en tsca naca zö'ö que. ¹⁶ Yödzö na', lédi'i nátagaca idapa la'a. Lédi'i naca yöl-la' tunna que, en yöl-la' blaga' que. Len yaga na' burixé' tsca naca yödzö na', naca idú tsca gaca nu sa' idú chinnu dza, ate' lédi'i naca yöl-la' tunna que, en yöl-la' xitsá' que, en yöl-la' bólaga' que. ¹⁷ Burixé' ca' yöl-la' yödx que zö'ö na', naca tu gayuá' yu'tapa-un dxita, tsca naca dxita que na' bönachi, lë na' ruríxinë' gubáz lá'ayi na'.

¹⁸ Zö'ö na' néquini guiój jaspe, ate' yödzö na' néquini órotëz, le naca yení'ido' ca naca guiój jara. ¹⁹ Yugu' xilibi zö'ö que yödzö na' nazí'gaca biquitaj guiój nazáca'da'gaca.

Xilibi zö'ö zí'alö néquini guiój jaspe.
Le buropi néquini guiój zafiro.
Le bunni néquini guiój ágata.
Le budapi néquini guiój esmeralda.
²⁰ Le guyu' néquini guiój ónica.
Le buzxopi néquini guiój cornalina.
Le igadxi néquini guiój crisólito.
Le izzxunu' néquini guiój berilo.
Le igá néquini guiój topacio.
Le idxí néquini guiój crisoprasa.
Le idxinéaj néquini guiój jacinto.
Le idxinnu néquini guiój amatista.

21 Chinnu gapa nu riyaza na' ta'yáyjani chinnu bugá. Tu tu ga nu riyaza na' riyáyjani tuz bugá. Luyú la' nöza lo que yödzö na' néquini órotëz, le naca yení'ido' ca naca guiój jara.

22 Biti' bilé'eda' tu yudo' lu yödzö na', tu' náquië' Xanru' Dios yudo' que, napa cazé' idútë yöl-la' unná bë', en lësca' caní náquië' Bönni' náquië' Bö'cu' Zxíla'do', náquië' yudo' que yödzö na'. **23** Biti' run bayudxi tsení'gaca gubidza, en beo' lu yödzö na', tu' uzení' yöl-la' bení' queë' Dios lu yödzö na', ate' lësca' Bönni' náquië' Bö'cu' Zxíla'do' náquië' le uzení' ni'. **24** Bönachi yugu' yödzö, nupa nulágaca, ila'dá lu bení' que yödzö na', ate' yugu' bönni' ta'nná bë'ë yödzölió idiguá'agaquïë' yöl-la' tsahui' quégäquïë' lu yödzö na'. **25** Catu caz tsáyajgaca gapa nu riyaza lu yödzö na' lahuí' dza, ate' lataj na' catu caz gaca rëla. **26** Bönachi yugu' yödzö idiguá'agaquïë' ni' le nácagaca lesaca', en yöl-la' tsahui' quéguequi. **27** Tu le ruá' dö' biti' ca' tsaza ni', en caléga tu le naca xihui', en caléga nu rizí' yë', pero tsázagacaso ni' nupa nazúajgaca láguequi lu guichi queë' Bönni' náquië' Bö'cu' Zxíla'do', ga na' nazúajgaca lágaca nupa nadéli'gaca yöl-la' na'bán.

22

1 Ní'irö gubáz lá'ayi na' bulu'iñë' neda' tu yegu yení'ido', le naca nisa yegu le runna yöl-la' na'bán. Répi yösa bení' yegu na' ca répi yösa bení' guiój jara. Rirúaj yegu na' lu lataj lo ga rö'ë Dios, en ga rö'ë ca' Bönni' náquië' Bö'cu' Zxíla'do'. **2** Rizá' yegu ni gatsaj láhu'lö nöza lo que yödzö na'. Tsölä'a huéaj ra' yegu na' rö'ö tu yaga le runna yöl-la' na'bán, ate' ta'bía chinnu luzuí tu iz. Tu tu beo' ta'bía yaga na'. Xilágui'gaca yaga na' nácagaca le tu'ún bönnachi yugu' yödzö. **3** Biti' soa ni' nitú le dxia dö'. Soa lu yödzö na' lataj lo ga rö'ë Dios, enca' ga rö'ë Bönni' náquië' Bö'cu' Zxíla'do', ate' yugu' huen dxin queë' ila'yéaj ládx'i'gaquïë' Lë'. **4** Ila'lé'enë' lahuë' Lë', ate' le nazi'i Lë' nazúaj ra' xigágaquïë'. **5** Biti' gaca rëla ni', ate' nupa nacuá' ni' biti' ila'quínna tu le cu'u bení', en caléga bení' que gubidza, tu' gáquïë' Xanru' Dios bení' quégäquïë'. Nupa nacuá' ni' ila'nná bë' tica'sö.

Chizóá huödë' Cristo

6 Ní'irö gubáz lá'ayi na' gudxë' neda', gunnë': "Didza' ni naca idútë li, en naca löza. Xanru' Dios, Nu ruchiza Bö' Lá'ayi icja ládx'i'do'gaquïë' yugu' bönni' tu'ë didza' uláz queë', chigusöl-lé'ë gubáz lá'ayi queë' para ulu'iñë' yugu' huen dxin queë' le ral-la' gácatë. **7** Caní rnñë' Jesucristo: ¡Chizóá huöda! ¡Bica' ba nu run ca rnna didza' ruá' uláz queë' Dios, le nazúaj lu guichi ni!"

8 Neda', Juan, biyónida', en bilé'eda' yugu' lë ni. Gudödi biyónida', en bilé'eda' yugu' lë ni, buzóá zxiba' xini'ë gubáz lá'ayi na' bulu'iñë' neda' yugu' lë ni para guna' lë' zxöñ. **9** Ní'irö lë' gudxë' neda': "Biti' gunu' caní, tu' naca' neda' huen dxin queë' Dios ca nacu' li', en ca nácagaca yugu' të nupa tun ca rnna le nazúaj lu guichi ni. ¡Ben zxöñ Dios!"

10 Gudxë' ca' neda': "Biti' ucachu'u xtídë'ë Dios ni, didza' ruá' a uláz queë', en nazúaj lu guichi ni, tu' chizóá ilaca yugu' lë ni. **11** Nu ruá' dö' guá'tica'sö dö'. Nu run le cabí naca tsahui' güntica'sö le cabí naca tsahui'. Nu run dxia'a, güntica'sö dxia'a, ate' nu nequi quez queë' Dios, güéquitica'sö quez queë'." **12** Rnnë' Jesús: "¡Chizóá huöda! Nu'a lu na'a le nadéli'gaca bönnachi, ate' ubi'a que queëguequi tsca naca le gulúngaca. **13** Neda' naca' Nu zoa zí'atélo, enca'

Nu röjsete, ca naca le risí lo, en le ruúdxitë. Naca' ca' Nu run ga risí lo, en Nu rusiúdxi."

¹⁴ Ní'irö gunnë': "¡Bica' ba nupa nayari le nácugaca, en tun le naca dxi'a! ¡Nazí'guequi lataj ilahuë' le ribía yaga le runna yöl-la' na'bán, en gaca ila'yaza gapa nu riyaza lu yödzö na'! ¹⁵ Nupa nácagaca xihui', en nupa nácagaca udzá', en nupa tun le ruá' dö', en nupa tuti bönachi, en nupa ta'yéaj ládxí'gaca budó' guiój budó' yaga, en nupa ta'yaza ládxí'gaca ta'zí' yé' ila'cuá' ní'ilö ra' yödzö na'. ¹⁶ Neda', Jesús, gusö'l-la' a gubáz lá'ayí quia', ate' buluf'inë' libí'ili' yugu' lë ni, libí'ili' na' dzágali' yugu' cö' bönachi quia'. Neda' naca' dí'a dza queë' David, enca' zxí'ini xi'soë'. Naca' ca' böläj hui sila."

¹⁷ Tu'ë didza' Dios Bö' Lá'ayi, enca' bi'i nigula utsaga ná'alenbi'-në' Bönni' náquie' Bö'cu' Zxila'do', ta'nnë': "¡Gudá!"

¡Nu ribidxi nisa, en nu rizë ladxi' le, ral-la' guídi, en guí'aj nisa le runna yöl-la' na'bán!

¹⁸ Neda', Juan, ruzéajni'ida' nupa ta'yöni didza' ni ruá'a uláz queë' Dios, en nazúaj lu guichi ni, rnñia': Channö nu udá' lë'e didza' ni, Dios ubi'ë que nu na'. Gunë' lë' xíguia' ca naca le nazúajgaca lu guichi ni. ¹⁹ Lësca' caní, channö nu cúa bíti'tés didza' ni ruá'a uláz queë' Dios, en nazúaj lu guichi ni, Dios ugüë' ca' xilataj nu na' lu guichi ga nazúajgaca lágaca nupa nadéli'gaca yöl-la' na'bán idú, enca' lu yödzö lá'ayi, ca na' nazúaj quéguequi lu guichi ni.

²⁰ Xanru', Nu run ba nalí quéguequi lë ni rnnë': "¡Ön! ¡Huödatea!"

¡Ca' gaca! ¡Gudá, Xantu' Jesús!

²¹ Rinábida'-në' Xanru' Jesucristo uzá' ládxë'ë queëli' yúgu'téli'. ¡Ca' gaca!